


Yompor Po'ñoñ ñeñ' attõ Yepartseshar

Jesucristo e'ñe etserra a'pochtaternay

Yomporesho



New Testament in Yanesha' (PE:ame:Yanesha')

**Yompör Po'ñoñ ñeñf attõ Yepartseshar Jesucristo e'ñe etserra
a'pöctaterrnay Yompöresho
New Testament in Yanesha' (PÉ:ame:Yanesha')**

copyright © 2008 Wycliffe Bible Translators, Inc.

Language: Yanesha'

Translation by: Wycliffe Bible Translators, Inc.

Yanesha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanesha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	94
SAN LUCAS	149
SAN JUAN	248
HECHOS	308
ROMANOS	384
1 CORINTIOS	425
2 CORINTIOS	464
GÁLATAS	489
EFESIOS	503
FILIPENSES	517
COLOSENSES	527
1 TESALONICENSES	536
2 TESALONICENSES	544
1 TIMOTEO	548
2 TIMOTEO	559
TITO	567
FILEMÓN	572
HEBREOS	574
SANTIAGO	605
1 PEDRO	616
2 PEDRO	626
1 JUAN	632
2 JUAN	641
3 JUAN	643
JUDAS	645
APOCALIPSIS	649

COHUEN ÑOÑETS ÑEÑŦ QUELLCA' SAN MATEO

*Arrpa' all aquellcareŦ allohuen pa'so'chñechno ñeñŦ pa'tañneshañ pen Jesús
(Lc. 3.23-38)*

¹ Arrpa' all aquellcareŦ Jesucristo pa'tañneshañ e'ñe pa'so'chñechnohuenet. Jesucristopa' David po'nĩreneñ, e'ñe Abrahamoteñ. Allohuen añ so'chñetspa' ñeñŦara mereñtsorecmuet.

² Abrahampa' chemere'tana Isaac. Isaacña' chemere'tana Jacob. Jacobña' chemere'tana Judá epuet ñaña pa'mo'nasheñechno.

³ Judáña' chemere'tana Fares epuet ñaña Zara. Ñet pachoretpa' añ pa'so'cheñ Tamar. Faresña' chemere'tana Esrom. Esromña' chemere'tana Aram.

⁴ Aramña' chemere'tana Aminadab. Aminadabña' chemere'tana Naasón. Naasónña' chemere'tana Salmón.

⁵ Salmónña' chemere'tana Booz. Ña pachorpa' añ pa'so'cheñ Rahab. Boozña' chemere'tana Obed. Ña pachorpa' añ pa'so'cheñ Rut. Obedña' chemere'tana Isaí.

⁶ Isaíña' chemere'tana David ñeñŦ añcha'tarettatseŦ. Davidña' chemere'tana Salomón. ÑeñŦpa' arroŦ Urías puetaporot.

⁷ Salomónña' chemere'tana Roboam. Roboamña' chemere'tana Abías. Abíasña' chemere'tana Asa.

⁸ Asaña' chemere'tana Josafat. Josafatña' chemere'tana Joram. Joramña' chemere'tana Uzías.

⁹ Uzíasña' chemere'tana Jotam. Jotamña' chemere'tana Acáz. Acázña' chemere'tana Ezequías.

¹⁰ Ezequíasña' chemere'tana Manasés. Manasésña' chemere'tana Amón. Amónña' chemere'tana Josías.

¹¹ Josíasña' chemere'tana Jeconías epuet ñaña pa'mo'nasheñechno. Ñehua, Josíaspa' alla chemere'tos allempo ačhapatarettet allaŦar all anetso ñeñŦ pa'so'cheñ Babilonia.

¹² Allempo huačherret Babiloniotpa' Jeconíasña' chemere'tuerrana Salatiel. Salatielña' chemere'tana Zorobabel.

¹³ Zorobabelña' chemere'tana Abiud. Abiudña' chemere'tana Eliaquim. Eliaquimña' chemere'tana Azor.

¹⁴ Azorña' chemere'tana Sadoc. Sadocña' chemere'tana Aquim. Aquimña' chemere'tana Eliud.

¹⁵ Eliudña' chemere'tana Eleazar. Eleazarña' chemere'tana Matán. Matánña' chemere'tana Jacob.

¹⁶ Jacobña' chemere'tana José ñeñŦepa'tcha' puerrollar Ŧa' María. Maríaña' cheyore'tana Jesús, ñeñŦara ñeñŦ Cristotats.

¹⁷ Allempoteñ correŦ Abraham Ŧarremphua allempo correŦ ñaña David, ñeñŦña allponsheña chemere'shatnomuetspa' allo'tsenca'ye čharrasheña puechenet pa'tatssheña. Ñaña allempoteñ correŦ David Ŧarremphua allempo ačhapatarettet Babilonio, ñeñŦpa'čo'ña allo'tsenererr čharrasheña puechena pa'tatssheña ñeñŦ allponsheña chemerasha'terrtser allempo. Ñaña allempoteñ ačhapatarettet Babilonio Ŧarremphua allempo eñalleta Cristo, ñeñŦpa'čo'ña allo'tsenererr čharrasheña puechenet

pa'tatssheñet ñeñt allponsheña chemerasha'tnerrtserr tarrempohua allempo eñalleta ñaña Cristo.

*Arrpa' atto eñalleta Jesucristo
(Lc. 2.1-7)*

¹⁸ Te'pa' o'ch neserrpare'tatas atto allempo eñalleta Jesús. Allempoña María ñeñtcha' pachor pa' Jesús pa' añca'ye o'patenaya José ño'ch yore'. Ama yoreña'pa' Maríaña'pa' ahuepa't a'chomenta Parets Puecamquëñoť.

¹⁹ Joséña ñeñtcha' puerrollar pa'pa' ñaña'pa' e'ñe cohuen acheñer ñeñto'marña ñapa' ama mueno o'ch pencach. Ñaña'pa' atet coťape'ch o'ch ser e'ñe a'nahuoťa.

²⁰ Allempoña atet coťape'chenpa' machayoťo' orrtoña Yompor po'mllañoťeñer. Ñeñt orrtoya pue'chopoñopa' atet otos:

—José Davidna'tare, amach pa'llpatsto; pocte'ca'ye o'ch peyore María ñeñtcha' petapor pe'pa' tarro'mar ñapa' o'ca'ye a'chomenta Parets Puecamquëñoť.

²¹ Te'pa' eñalletatancha' asheñorr, ñeñtña'pa' peso'chcha' Jesús tarro'mar ñapa' ñeñtcha' a'queshpaterre' pa'cheñer po'chñaroťet. Arrpa' allohua ñeñt atet och mellañoťeñ.

²² Ñeñt'pa' tarro'mar atet pa' attoch etsota ñeñt atet eñorana'tane't Isaiás ñeñt a'mtahuete't Yompor po'ñoñ, ñeñt'pa' atet ote't:

²³ Ñeñtña' shoppshesha'pa' amach a'p'llaretote'ye' a'chomento; cheyore'tanach asheñorr, ñeñtña'pa' sochetcha' Emanuel.

Ñeñt ña so'chñetspa' atet oten: Te'ña Paretspa' e'ñe parro'tseney.

²⁴ Allempoña José oyerr ñemoť, atet och Yompor po'mllañoťeñerpa' ñaña'pa' atet'cho' pa'. Yoran María ñeñtcha' puetapor pa'.

²⁵ Tarraña ñapa' ama a'p'lleñe tarrempohua allempoch emare'tua; ñeñtña' asheñorrpa' soch JESÚS.

2

Atto eñotañnesha'pa' hua'cha'tet o'ch enteñeta' Jesús allempo eñalleta

¹ Allempo eñalleta Jesús all Beléño, e'ñe alla Judeopa' añ am'cha'tarettatset Herodes. O'ña eñalletuapa' eñotañnesha'ña hua'cha'tet allot huena atsrre'tpa' o'cha'cha'tet Jerusaléño.

² Ñetña'pa' atet otyesoset:

—¿Erro'tsena'tña ñeñt eñalletatsa ñeñtcha' pa'm'cha'tareter pa' judionesha'? Yapa' yeñoteñ o' eñalleta tarro'mar yapa' o' yentoñ po'rantor allot huena atsrret; yapa' ñeñtecopña yehuena o'ch yeconcorpana'teña'.

³ Allempoña am'cha'taret Herodes e'man atet ñoñetspa' ñaña'pa' ñeñta na' pueyo'chro ama eñmato pueyo'chro. Allohuen jerusaléño'marnesha'pa'cho'ña ama esesha' eñmatatseto ñamet pueyo'chreto.

⁴ Allempoña'pa' agotatan am'cha'taretnesha' ñeñtara judioneshet; o'ch ap'chet allohuen cornanesha' ñeñt atarr sher'ba'yets judioneshacop. O'ch ap'chet ñaña ñeñt atarr etsotayene' ñoñets ñeñt atet anaret judioneshacop. Allña a'p'ťo'tyesanet:

—¿Erra't otete'tña allcha' eñalletaña ñeñtcha' Cristoterrets?

⁵ Ñetña'pa' atet ochet:

—Arr anetso Beléño allara Judeo tarro'mar quellcopa' atet anuaret, atet quellqu'e't ñeñt a'mtaye't Yompor po'ñoñ. Ñeñt'pa' Yomporña atet otatset:

6 Añ Beléñ ñeñt judana'tarnesha' po'patseñ, e'ñe po'ñoçh ñeñt anetser ñeñt atarr asherben entyeñet allohuen ñeñt añcha'tarefetyetsa allo'marnesha'. Tarro'mar all Beléño allcha' eñalleterra ñaña ñeñtcha' atarr añcha'tarettertsa ñeñtcha' cohuañperre' allohuen neyochreshachno ñeñtara israelnesha'.

7 Allempoña otuoset atetpa' Herodesñaapa' e'ñe a'nahua agotaterran ñaña po'potantañ eñotañnesha' ñeñt çhaçha'tats allempo Jerusaléño. Allñaapa' e'ñe acoña a'p̄to'tare'tyesapanet:

—Rantopa' ¿e'ñe'tña esempoteñña señch ñeñt sorrtoya ñenmañ?

8 Allempoña eñotatosetpa' ñañaapa' otanet:

—Te'pa' o'ch ahues Beléño, e'ñech acoña se'nyesos ñeñt cheshatoll. Ñerra'm o'ch señchpa' o'ch sotuerren allochñaapa' napa'çho'ña o'ch ahuen o'ch neconcorpana'teña' ñaña.

9 Ñetñaapa' allempo e'mhuanmuet atet otanet añcha'taretpa' allempoñaapa' ahuanmuet. Rantoña ñeñt entnenet allot huena atsrretpa' ta'netsa allenet senet, attotapa' o' çhap e'ñe allot'sen cheshatoll. O'ña çhap allot'sen cheshatollpa' o' muechecosa e'ñe alla ento e'ñe pocto.

10 Allempoña enterreterr rantopa' atarr nanac coshet.

11 Allempoñaapa' o' be'tososet pocollo, allña entoset cheshatoll epuet pachor María. Concorpana'tosyetpa' ma'yochosyet. Torañpesyesoset po'tsapotpa' aposet e'ñe atfa oro, aposet tsach puese' ñeñt atarr eñmosañ. Aposet ñaña eñmosañ puerets.

12 Allempoña ñetpa' eñotatanet Yompor pueçhopoño allochñaapa' attoch ama oñerreto Herodesesho'mar. Allempo puerrerret pa'nyetopa' aña coferret po'poñ toñ.

Allempo cheshatoll Jesúsapa' anmet Egipto allcha' a'queshpachet

13 Puerraçherrtsetpa' Yomporña po'millañoñeñerpa' alla orrterranerr José pueçhopoñoñ. Ñeñtapa' atet otererr:

—Petantaye'cha o'ch pa'yech cheshatoll pachore'na, orraye'chap all anetso Egipto allcha' seyçhosa. Eempohuañeññaapa' o'ch alla noterrperr atetcha' peña. Herodes po'ñoçhpa' e'natancha' añ cheshatoll attoch muetsatach.

14 Allempoña o' tantapa' anman cheshatoll, pachore'na yeta tsapo, ahuanmuet Egipto.

15 Allñaapa' alleneta attotañaapa' o' rromuen Herodes. Attoña etsota Yompor po'ñoñ atet ote't ñeñt a'mtaye't po'ñoñ; ñeñtapa' Yompor atet otatse't: “Egip-to'tcha' nagotater Nechemer.”

Allempo Herodespa' mueñan ñeñtcha' muetsue' allohuen asheñorroñollesha'

16 Ñehua, allempoña Herodespa' o' eñoch çha sheca'neñ eñotañnesha'pa' ñañaapa' ñeñta atarr atsrre'mate'. Atto atsrre'ma nanacpa' allempoñaapa' mueñan ñeñtcha' muetsue' allohuen asheñorroñollesha' ñeñt Beléño'tsa'yen ñaña ñeñt allohuen allampaño'tsa'yen Beléño. Allohuen asheñorroñollesha' ñeñt echene' epa po'charña ama't ñaña allohuen ñeñt eñalletyetsa chenta' e'ñe poctacma muetsanatu. Ñehua, ñeñt atet eñotatos eñotañnesha'pa' ñañaapa' atet cotape'ch ahuo'te' epa char eñalletuaña ñeñt cheshatoller.

17 Attoña etsota ñeñt atet ote't Jeremías ñeñt a'mtaye't Yompor po'ñoñ ahuañ; ñeñtapa' atet ote't:

18 Ñeñt anetser Ramopa' atarrcha' e'morrterra yahueñets, atarr gogatstena; allpa' Raquelca'ye ya'na'tene' puechoyoresha'; ama mueno o'ch esesha' emya'te' tarro'mar puechoyoresha'pa' ama eñallmeñe, o' e'ñe muetsanatu.

¹⁹ Allempoña rroma Herodespa' Yomporña po'millañoñerpa' alla orrter-ranerr José puechopoño all Egipto.

²⁰ Allñapa' otererr:

—Te'ñapa' o'ch petanterra, o'ch alla ñaner cheshatoll pachore'na o'ch alla pepuerrerra israelnesha' pa'nyo; o'ca'ye colla'huaña ñeñt' o'pataye't añ cheshatoller ñeñto'ch muetsayeñ.

²¹ Atet otuepa' ñañapa' allenta tantena o' alla anerran cheshatoll pachore'na alla ahuerret israelnesha' pa'nyo.

²² Allempo ahuerretpa' ñetñapa' e'mare'tueret añ añcha'tarettertsa Judeo ñeñt' Herodesoñ puechemer ñeñt' sochetsa Arquelao. Ñeñto'marña mecha'tenet serrtset all. Puechopoñoñapa' alla eñotatererr ñeñto'marña allempopa' alla serr Galileo.

²³ Cherr Galileopa' ahuerret paterr anetso ñeñt' pa'so'cheñ Nazaret. Allñapa' alla ye'cha'huerra. Attotca'yeña etsotaña ñeñt' atet otyese't ñeñt' a'mta'yesaye't Yompor po'ñoñ; ñetpa' atet otyesete't ñeñt'cha' Cristoterretspa' "oteñetcha' nazareto'marnesha'."

3

Allempo orrta Juan ñeñt' serrpare'tosets all amayo

(Mr. 1.1-8; Lc. 3.1-9, 15-17; Jn. 1.19-28)

¹ Allempoñapa' orrta Juan ñeñt' apatose' acheñenesha' Yomporecop. Ñañapa' arr serrpare'tatosanet amayo e'ñe alla Judeo.

² Allñapa' atet otosanet:

—Te'pa' o'ch soctape'cherr ello cohuen Yomporecop tarro'mar o' chapmoch allempoch ayochreshatterra Yompor ñeñt' pue'ntaño'tsen.

³ Ñehua, añmapa' ñocopca'ye eñose'tña Isaías ñeñt' a'mtaye't ahua't Yompor po'ñoñ. Allempopa' atet ote't:

E'morrterrach puesheñarr po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñt'pa' atet'cha' oterranet: "Te'pa' o'ch sa'cohuenetyes toñ allcha' oñmos Part-sesha', o'ch e'ñe sa'pacharretyesoñ pa'tep." Arrpa' allohua ñeñt' atet aquellcare't ahua'toñ Cristocop.

⁴ Ñeñt'ña Juanpa' camello pue'ch apomotaret' ñeñt' pa'shtam pen. Allo chanena ñeñt'pa' pa'rrom. Allñapa' rra'yesane't ahuañchenclla* ñeñt'ña puerran pe't epuet pets po'moñ.

⁵ Allempoña jerusaléño'marnesha'pa' chocma hua'cha'tyenet ñesho ñaña allohuen judeo'marnesha'. Hua'cha'tyeññaña ñaña allohuen jordanaso'marnesha'.

⁶ Allña ñetpa' a'meta'yesoset po'chñaret, Juanñapa' apatyapanet Yomporecop. Ñeñt'ña oñ all apatyapanet añ pa'so'cheñ Jordanas.

⁷ Allempoña entapan shonte' saduceonesha' ñaña fariseonesha' ñeñtareta ñeñtet judioneshet. Ñetpa' tarro'mar hua'chenet añ muenenet o'ch apapanet Juan. Juanña serrpare'tatapanetpa' otapanet:

—Sapa' ama cohuenayayso atarr ashcarñañes, cha sottena ñerra'mrrate' shechpa sompor sepen. Po'ño'chca' ama eseshaye' sotenaye e'ñech sap-ataretteñoña o'ch sequeshperra allochñapa' amach coñchatuerrso Yompor allempoch yoro'chtatuer tsapatonet.

⁸ Napa' añcha'ña notapas o'ch sorrtyes ñeñt' e'ñe cohuen enten Yompor ñeñt' atet pena ñeñt' po'ño'ch o' cotape'cherran ello cohuen Yomporecop.

* **3:4** Ñeñt' ahuañchenclapa' arrapo' enteñ palestino'marnesha'.

⁹ Sapa' čha soteneñ seyočhro año' es sepallteno, sapa' año' e'ñe seyemtena satañ Abrahamañ. Tarraña napa' o'ch notas amach atet soctape'chatsto tarro'mar ñeñt'pa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñt' senten arr o'ch a'pnasereñ Abraham po'mireneñ.

¹⁰ Ñeñto'marña napa' o'ch notas ñerra'm amach soctape'cherro cohuen Yomporecop o' mameshamerra o'ch čhaponasa attoch coñchaterres Yompor. O'ch netma'ntatasa atet ñerra'mrrate' allempo o'ch a'mata'tmochet tsach. O' e'ñe onañchachet gach allcha' tet e'ñe allohua huañen puepallactar. Ñeñt' allohuen tsachečno ñeñt' ama cohuenaye' me'tetsopa' a'mata'tueretcha' saprochetcha' all huorten tso' allcha' e'ñe a'poyatatueret.

¹¹ Elloña Juanpa' atet oterraneterr:

–Ñeñtes coťape'cherre' cohuen Yomporecop napa' ama't e'ñe po'ñočh napatensoñ Yomporecop, napa' e'ñeca'ye oñočaya napatenes. Tarraña Cristo ñeñt'cha' huapatsa chenta'pa' ñapa' añcha'ca'ye chorratossa Parets Puecamquëñ ñeñt' atet ñerra'm tso'. Ñapa' ñeñt' atarr ahuaamencatesha' nañapa' ama tama ahuaamencateyayno. Ñapa' ñeñt'ña atarr sherbets, nañapa' ama es nesherbena attoch ama't po'sapatapa' o'ch nanmoñ.

¹² Ñapa' atarr ahuaamencat' ñapa' ñach acrerre' allohuen acheñenesha'. Ñapa' añ toma'ntena ñeñt' orrene' puehoshnat alloch shoshnan po'trigo o'ch e'ñe pue'llom'rochayama. Ñeñt'ña pue'llomerpa' o'ch a'yapa'che' o'ch añño'ch allecma añño'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeñt'ña tso'pa' ama emaya'pahuo ama't errponaña. Ñeñt'pa' allohua atet serrpare'tatanet Juan.

*Allempo apataretta Jesús Yomporecop
(Mr. 1.9-11; Lc. 3.21-22)*

¹³ Allempo huapa Jesús Galileoť, čhap Jordanaso allo'tsen Juan, ñapa' añ muenen o'ch apatař Juan Yomporecop.

¹⁴ Juanña'pa' eñoratsa čha mueneñeñ o'ch emman Jesús. Ñeñt'pa' atet otař:
–Ama pocteyaye o'ch napatapař řa, añña poctetsa řachña napatose'. Papa' eso'maruachña'ca'ye řonña nesho, řaca'yeña ñeñteř atarr sherbets.

¹⁵ Jesúsña'pa' atet otererr:

–Papatapno'tach Juanacha' tarro'mar atetca'ye poctetsa o'ch yetsota allohuen ñeñt' poctetsa Partsocop.

Allempoña Juanpa' e'ñe pocte' eñch,

¹⁶ allempoña'pa' apatapan Jesús. E'ne apatue'pa' o' čha'nerrña Jesús oñoť, enetña'pa' ahuepa't atorareťta. Alloťña e'ñe sohua'nma Parets Puecamquëñ, Jesúsña'pa' e'ñe atet entař ñerra'mrrate' yeř o' sohua'nma entoť, e'ñe čhap ñesho.

¹⁷ Allempoña'pa' čha e'morrtatsa ñama ñoñets entoť atet eñorena Yompor. Ñeñt'ña ñoñetspa' atet oten:

–Añmapa' ñeñt'ña Nechemer ñeñt' atarr nemorrentena. Ña atarr nanac nocshatene'.

4

*Allempo oneñt'pa' topatenan Jesús, mueneñ o'ch atet řatan Jesús ñeñt' ama pocteye' enteno Yompor
(Mr. 1.12-13; Lc. 4.1-13)*

¹ Allempoña Parets Puecamquëñpa' anman Jesús all amayo. Ñeñt'pa' añecop atet p'a attochña allpa' o'ch huapoña oneñeñ, tarro'mar ñapa' añ mueneñ o'ch atet p'atyes ñeñt' ama pocteye' enteno Yompor.

² Allñapa' ama rreno e'ñe aña torrena attoch etsotuan ora allohuen ñeñt' cohuentetsa Pomporecop. Ñeñt'o'marña ama't o' pa'tatsoch çharramatpa' ama't coñe'tapa' ama es rreno ye'to ama't ñaña tsapo. O'ña pa'tatsoch çharramatuapa' cho cheporratsa.

³ Allempoñapa' huapoña oneñeñ. Atto topatosan Jesús'pa' atet otos:

—Pa ñerra'm po'ñoçhte' Parets Puechemerep'a' o'ch p'ot: Añ mapue' puenasepa' pan.

⁴ Jesúsñapa' atet otaþ:

—Napa' ama nemno o'ch atet neþa tarro'mar Yompor po'ñoñ ñeñt' anuaret' ahua'toteñ ñeñt'pa' atet oteney: “Allohueney acheñeneseshohueneypa' ama e'ñe rreñtsa ñapue't yocrram' yepeno. Añe'ñaña yocrram' yepen yecamquëñecop ñeñt' allohuen allpon oteney Yompor.”

⁵ Allempoña oneñe'tpa' o' anem' all Jerusaléño, ñeñt' anetserpa' anaret' Partsocop. Allñapa' a'tapatos nanac eno allohuanen Parets pa'paquëll.

⁶ Allñapa' otuererr:

—Papa' ñerra'm po'ñoçhte' Parets Puechemereþ te'pa' þomacha arrot' tarro'mar amach p'a'tserrþo tarro'mar Parets po'ñoñ ñeñt' anuaret' ñeñt'pa' ama'tña atet oten:

Yomporpa' o'ch mueñoñaþ po'mllaño'teñneshar ñeñt'cha' pecuam'þsapue'.
Ñetcha' þagapapuet, o'ch enatapapet attoch amach p'a'tserrþatca'toso mapyo.

⁷ Allempoña Jesús'pa' alla otererr:

—Añpa'cho'ña anuaret' Yompor po'ñoño: “Amach ya'llocchame'tatsche Yompor ñeñt' Yepartseshar yepen.”

⁸ Allempoña oneñe'tpa' o' alla anerranerr Jesús all atarr aspen'to e'ñe a'noso. Allo'tña gatyuesuererr allohuen ñeñt' allpon all añcha'taretetyena pa'namen acheñenesha' ñeñt' ye'cha'yetsa erraþaren añe patsro, gatyuesuererr all atarr cohuentatyene't.

⁹ Oneñe'tñapa' alla otuererr:

—Ñerra'm na pema'yocheno'ten o'ch peconcorpana'tna, napa' napaþcha' ora allohuen ñeñt' cohuen pentyen arr.

¹⁰ Jesúsñapa' alla otererr:

—Te'pa' o'ch orrerreþ oneñe'te. Napa' ama nemno o'ch atet neþa tarro'mar Yompor po'ñoñ ñeñt' anuaret' ñeñt'pa' atet oteney: “Añach ñapue't yema'yochena Yompor ñeñt' Yepartseshar yepen, e'ñech ñap'ta yesherbe'.”

¹¹ Allempoña oneñe't topatuahuan Jesús'pa' o' ahuer' o' que'chpa'ner. Allempoñapa' çha'cha'toña Yompor po'mllaño'teñneshar; ñetñapa' e'ñe cohuen sherþoset Jesús all. Arrpa' allohua huañ atto oneñe'tpa' topatenan Jesús allempo.

Allempo e'ñe ñenmá torrena Jesús Partsocop all Galileo

(Mr. 1.14-15; Lc. 4.14-15)

¹² Allempoña Jesús e'mare'tan Juan o' yottam'þset, ñaña'pa' allenta ahuer' Galileo.

¹³ Cherr Galileopa' ama a'pohuerro anetso Nazareto, arraña serr Capernaumo, allña ye'cha'huerra. Ñeñt' Capernaumpa' e'ñe sa'patoþño'tsen, allara ñeñt' otenet Zabulónneshar pa'netser ñaña Neftalenesha' pa'netser.

14 Ñeñtpa' allña ye'cha'huerra allochñapa' attoch etsota Isaías po'ñoñ ñeñt a'ntaye't Yompor po'ñoñ; ñeñt ñapa' atet ote't ñeñte anetsrecop:

15 Ñeñt Zabulónmanesha' pa'netsro ñaña Neftalenesha' pa'netsro ñeñt all sa'patopño all Jordanas yom'ta'n, allara Galileo all ye'cha'yena pa'namen acheñenesha' ñeñt ama judioneshayayeto.

16 Ñeñt acheñenesharpa' ñetpa' aña ye'cha'yenet ñeñt ama cohuenaye' enteno Yompor; ñetpa' 'cha ottenet ñerra'm checmeto'tseneta. Tarraña te'ñapa' o' enteret ñeñt'cha' e'ne cohuen a'puetarsam'perrahuet po'capñet. Ñetña ama't aña o'patyesahuetañe't rromueñets ñeñtara chenquëñets, te'ñapa' ama't ñocpuetpa' o' a'puetarsam'psaretterret e'ne cohuen. Ar-rpa' allohua atet nane't Isaías po'ñoñ.

17 Allempo 'cherr Jesús Galileo allempoña e'ne ñenmañ serrpare'tatuerranet all. Ñeñtpa' atet otuerranet:

—Te'pa' o'ch soctape'cherr ello cohuen Yomporecop tarro'mar te'pa' o' 'cherrmoch allempoch ayochreshatterra Yompor ñeñt pue'ntañotsen.

Atto Jesús pa' 'chore'tosan pa'tatssheña ñeñt e'ne caca torrenet rromuet (Mr. 1.16-20; Lc. 5.1-11)

18 Allempo Jesús pa' chopeñe'chyen all sa'patopño'mar; ñeñtña sa'ppa' añ pa'so'cheñ Galileas. Allñapa' entosan acheñ epsheña; ñeñtña puesheñarrpa' añ pa'so'cheñ Simón ñeñtara sochetsa Pedro epuet pa'mo'nasheñ Andrés. Ñetñapa' terrayets e'ne alla sa'po tarro'mar ñetpa' e'ne ñeñt po'taruas penet.

19 Jesúsñapa' atet otosanet:

—Te'ñapa' o'ch notas, socta'n na attoch neyochresha' neperres. Ñeñt atet sepena ahuatoteñ e'ne' cac te'ñapa' o'ch ney'chatterres attoch se'nerr ñaña acheñ ñeñt'cha' same'ñaterra.

20 Ñetñapa' allorocma na'nmuet po'terrayapa' o' cotet Jesús.

21 Allempoña meterrerr allo'tpa' entuerranerr po'poñ acheñ epsheña; ñeñtña puesheñarrpa' añ pa'so'cheñ Jacobo* epuet pa'mo'nasheñ Juan; ñeñtpa' Zebedeo puechemeresha'. Ñetñapa' po'noñfo'tsa'yenet; allo'tsen ñaña pomporet all a'cohuenetyenet po'terraya. Jesúsñapa' 'chore'tuerraneterrpa' atet otuerraneterr ñamet:

—Te'pa' o'ch socta'n samña.

22 Ñetpa'cho'ña e'ne allorocma na'nmuet po'noñt ñaña pomporet o' cotet ñamet Jesús attoch pueyochresha' perranet ñamet.

Allempo Jesús pa' ye'chatenan shonte' acheñenesha' (Lc. 6.17-19)

23 Allempoñapa' chopeñe'chyes Jesús errañaren Galileo'mar. Ye'chatyesosan judionesha' e'ne ñet po'prahuet. Allñapa' serrpare'tatosanet cohuen ñoñets atto ayochreshattena Yompor. A'crratyesosan acheñenesha'; ama't pa'namen osyenahuet, ama't pa'namen a'prrama'yenahuet, ñaña'apa' e'ne a'crratyesuosanet.

24 Atteñapa' e'mare'tuet errañaren ama't Sirio'mar. Huapatyesoñet allohuen ñeñt muero'chtatyen atsnañets. Huapatyesoñet ñeñt osyen pa'namen atsnañets ñaña ñeñt atserrpañachno. Huapatyesoñet ñaña ñeñt chorra'yena oneñet ñaña ñeñt o'tañachno ñaña echarrtañachno. Allohuenetpa' ñaña'apa' e'ne a'crratyesuerranet.

* 4:21 Jacobopa' ñeñtara ñeñt sochenet Santiago.

²⁵ Shonte' acheñenesha' ñeñt cota'yese'. Cota'yes galileo'marnesha', ñaña decapoliso'marnesha' ñaña jerusaléño'marnesha', ñaña judeo'marnesha'; ama't ñeñt yeçhetsa Jordanaso yomta'npa' o' e'ñe cota'yesuet.

5

Allempo Jesús'pa' serrpare'tatosanet all aspeno

¹ Allempoña entan shonte' acheñenesha' ñeñt cotene', Jesús'ñapa' ahuo' aspeno. Allña anorrospa' huaçha'toña allohuen pueyochreshaçhno.

² Ñaña'pa' yeçhatapanetpa' atet otapan acheñenesha' ñeñt po'ñoçh atarr cosheñtso'tsa'yenet:

Acheñenesha' ñeñt po'ñoçh atarr cosheñtso'tsa'yenet (Lc. 6.20-23)

³ —Nanac cosheñtso'tsa'yen allohuen ñeñt ama esoye' asherbenaye' entyetso pueyoçhreto Yomporecop tarro'mar ñetpa' o'paterretcha' Yompor po'cohuenña atto ayochreshattena pue'ntañot.

⁴ 'Nanac cosheñtso'tsa'yen allohuen ñeñt lleca'yetsa Yomporecop tarro'mar ñetpa' coshaterranetcha' Yompor.

⁵ 'Nanac cosheñtso'tsa'yen allohuen ñeñt ama añeye' e'neneto ñeñt e'ñe ñocpueta tarro'mar ñetpa' o'pataterranetcha' Yompor allohuanen pats.

⁶ 'Nanac cosheñtso'tsa'yen allohuen ñeñt nanac muenene' o'ch e'ñe ortatyenet ñeñt e'ñe pocte' enten Yompor. Ñetpa' e'ñe atet mueneñet ñerra'mrrate' cho nanac yachporrena ñaña nanaccha' yo'ñpa'ten. Nanac cosheñtso'tsa'yenet ñet tarro'mar Yomporña e'ñe atet muenaterranet.

⁷ 'Nanac cosheñtso'tsa'yen allohuen ñeñt nanac cohuen muerannetsa tarro'mar elloña Yomporpa' atarrcha' muererranet ñet.

⁸ 'Nanac cosheñtso'tsa'yen allohuen ñeñt e'ñe pueyoçhretopa' ama eñalle sosya'tsañ ama't coñe'ta tarro'mar ñetpa' enteretcha' Parets.

⁹ 'Nanac cosheñtso'tsa'yen allohuen ñeñt chocma amo'tstanna'tatenahuet tarro'mar ñetpa' po'ñoçhcha' Yompor puechemer perranet.

¹⁰ 'Nanac cosheñtso'tsa'yen allohuen ñeñt e'moñe'tyenet atto ñetpa' e'ñe pocte' es pa'yenet Yomporecop. Nanac cosheñtso'tsa'yenet tarro'mar ñetpa' o'paterretcha' Yompor po'cohuenña atto ayochreshattena pue'ntañot.

¹¹ 'Sapa'cho'ña nanac cosheñtso'tsa'yenes ñerra'm esempo errotuansen penset no'mar. Nanac cosheñtso'tsa'yenes ñerra'm cho sapa' sasare'tyenset, e'moñe'tyenset, pa'namen sosey toma'tam'pesyenset.

¹² Chocmuepa'chña socsha tarro'mar shonte' ñeñt o'patatensa Yompor pue'ntañot; ñeñtcha'ña atarr socshaterre'. Ama't ahuatoteñ allempo ama se'ñalletena' attecma e'moñe'tyesete't ñaña ñeñt a'mta'yesaye't Yompor po'ñoñ.

Acheñenesha' ñeñt sherbets Yomporecop arr patsro ñetpa' atet atma'ntatarettenet ñerra'm pos ñaña puetare'

(Mr. 9.50; Lc. 14.34-35)

¹³ 'Sapa' ñeñtes name'ñenaya añ netma'ntatensa atet ñerra'm pos ñeñt atarr sherbene' allohuen acheñenesha' arr patsro. Tarraña pospa' ñerra'm o'ch huañer po'poserrteña amach errotenot ellopa' ya'poserrtatere. Allempopa' o'huañcha' es sherba' acheñenesha'cop; añeçpach sherberr o'ch yehuapore'ch a'yo allcha' atmama'ch acheñenesha'.

¹⁴ 'Ñaña añ netma'ntatensa puetare' elloña ñeñtña atarr sherbene' acheñenesha' arr patsro. Sapa' chocmach cohuen es sorrtyen. Atetcha'

sepena ñerra'mrrate' paterr anets ñeñt e'ñe a'noso'tsen aspeno. Ñeñña anetserpa' chocmach cohuen orrtena allenmateñ, amach errotenoñ ma'natacheto.

¹⁵ Ñaña ñerra'm esempo ya'llchaten lampareña' ñeñtpa' ama tarrecpaye' ya'llchateñe o'ch ye'rramanpes coymño. Ñeñtpa' añecopña ya'huortateñ o'ch yene' enonet attoch e'ñe choyo'tamipesuan allohuen ñeñt pocollo'tsa'yen.

¹⁶ Sapa' attecmuepa'chña sorrtatyen ñeñt cohuen enten Yompor. Allochña' po'potantaña'cho'ña e'ñech cohuenare' entennaset atet es sorrtatyen cohuen. Attochña ñetpa'cho'ña cohuentatapreterrasetcha' Seyomporer ñeñt pue'ntaño'tsen.

Atto Jesús'pa' ye'chatosanet atarr sherben Yompor po'ñoñ ñeñt atet anaret ahuatoteñ

¹⁷ Jesús'ña'pa' atet oterraneterr:

–Amach soctape'chatsto napa' añecopñe' nohuapa o'ch nehuapore'taterr Yompor po'ñoñ ñeñt ahuatoteñ atet anaret atet ñerra'm Moisés po'ñoñ ñaña añ po'ñoñ ñeñt quellca'yese't ñeñt a'mta'yese't Yompor po'ñoñ. Napa' ama añecpaye' nohuapo o'ch nehuapore'tach, napa' e'ñechca'yena netsotatuer.

¹⁸ E'ñe po'ñoñ notenes: Ama ahuapore'tpahuoyaye Yompor po'ñoñ ñeñt atet anaret ahuatoteñ, ama't tayoteñ tarremphuach esempohuañencha' chenca'huerra pats ñaña enet. Ama't patrra ñoñets ñeñt atet anaretpa' amach chenquerro ama't e'ñe patrra quelled puehempotollohuenpa' amach chenquerro ama't tayoteñ tarremphuach esempohuañencha' e'ñe etsotuerra ñeñt atet oten ahuatoteñ.

¹⁹ Ñeñto'marña ñerra'm esesha' o'huañ e'ñeye' ame'ña'po' entan ama't patratolla ñoñets ñeñt atet anaret ahuatoteñ ñaña ñerra'm attach ye'chatan po'potantañ, ñeñña'acheñerpa' amach tama sherbeno Yomporecop ñeñt atto ayochreshattena ña pue'ntañoñ. Tarraña ñerra'm esesha'chña e'ñe etsoterre' ñaña ñerra'm e'ñech atet ye'chatan po'potantañ, ñeñña'acheñerpa' ñeñtcha'ña atarr sherberrets Yomporecop attoch ayochreshatterra ña.

²⁰ Napa' o'ch notas, po'ñoñca'ye sa atet e'ñe pocte' es sorrtatyen, ellochña semtana'tuerepa'ch atet es cohuen orrtatyeneñ fariseonesha' ñaña añ ñeñt atarr etsotayenayeñ ñoñets ñeñt atet anaret. Ñerra'm amach semtana'tuerranetopa' amach errotenoñ so'pataprechoña Yompor po'cohuenña atto ayochreshattena ña pue'ntañoñ. Attoña ama't ahuatapa' amach secherro all añcha'tarettena pue'ntaño.

Atto Jesús'pa' ye'chatosanet ama e'moñe'tanna'tpahuoyaye (Lc. 12.57-59)

²¹ Jesús'ña'pa' alla yerpaterraneterr ñeñt atet anarettete't ahuatoteñ ñoñets, ñeñtpa' atet oterraneterr:

–Sa ahuatoteñpa' se'marte'ña atet otarettete't ahuat'acheñenesha'. Ñeñtpa' atet otarettete't: “Amach muetsatsteto'acheñ. Ñerra'm esesha' muetsene'acheñpa' ñapa'cho'ña muetseretcha' tarro'mar ñeñto'tcha'ña o'patateret coñcheñets.”

²² Elloña na te'pa' o'ch noterres, ama't ñeñt atta e'moñe'tene' pamo'tspa' ñapa'cho'ña ñeñto'tach o'patateret coñcheñets. Ñaña ñerra'm esesha' atarr sosyo't sochatse'teñet pamo'ts ñeñtpa'cho'ña ñeñto'tach o'patateret coñcheñets allo'tsa'yen añcha'taretnesha'chno allecma a'pocatenet ñoñets. Ñaña ñerra'm esesha' puepencare'teñoñ atarr sosyo't sochatse'teñet pamo'ts ñeñtpa'cho'ña acheñerpa' añ o'patenaya tso' ñeñt parrarets erraparen.

23 'Ñeñto'marña napa' o'ch notas: Ñerra'm esempo cho es p̄apuen Yomporecop allecma sherbeñet Yompor allñapa' taya o' peyerposya p̄amo'tsñapa' cha p̄atsrre'mateñ,

24 p̄añapa' ñeñtcha' p̄ap Yomporpa' pena'ner alla. O'ch ahuerrep̄, pemo'nasheñña ñanom p̄amo'tsterra'. Allempochña pepuerrerra allecma sherbeñet Yompor allempochña p̄aphuer Yompor ñeñt p̄o'patateña.

25 'Ñaña ñerra'm esempo esesha' setmantene' o'ch anmaset am̄cha'taretesho allcha' sa'poclaterra' señoñ, sañapa' e'ñech allorocma samo'tstera ñeñt se'moñe'tene' tayepa'tñapa' ama sechena' am̄cha'taretesho. Chosachña amo'tsterraya ñeñt setmantene' te't attot pomataterret am̄cha'taretesho ñañapa' o'ch pomuensa' guardiyesho ñeñtcha' seyottam̄pse'.

26 Po'ñochca'ye o'ch notas, ñerra'm choch yottam̄psasetpa' allenasachca'ye o'pono allotpa' amachca'ye ahuen cha'nmaterrseto. Esemphuañencha' choch secha'nmaterret ñerra'm esempoch e'ñe setsa'tuerra ora allohuen ñeñt allpon quelle muenenet. Ama't e'ñe eptalla centavotollña ñerra'm ama setsa'tueña'pa' amachca'ye cha'nmaterrseto alloť. Ñeñto'marña notenes o'ch e'ñe cohuen samo'tstera ñeñt se'moñe'tene' tayepa'tñapa' ama chennasa' ñeñt atarr yorochen senten socop.

Atto Jesús pa' yeçhatosanet ama achtapretpahuoyaye taporets

27 'Ñaña sapa' ahuatoteñ se'marte'ña atet otarettete't acheñenesha': "Amach chetapretatsteto taporets."

28 Elloña na te'pa' o'ch noterres, ñerra'm esesha' cohueñe' coyanesha' pueye'cheñot, o'ca'ye ochña'tet pueyo'chreto.

29 'Ñeñto'marña notenes: Ñerra'm seclle' p̄atyenes ñeñt ama pocteye' enteno Yompor, añ poctetsa o'ch sequechpuerr ñeñt seye'chena seclloyot. Ñeñt pa' e'ñe atet ñerra'mrrate' cho serroten seclle' o'ch sehuapore'ch, ama't ñeñt seclle' secohuenrote'tsen ñeñt atarr sesherbene'. Añña ama tama yorochenayaye socop o'ch sa'ypo'ñer e'ne tayecma ñeñt soctape'chatene' sosya'tsañ. Añcha'ña atarr yorochen socop ñerra'm ama tayecma sa'ypo'ñerepa' esempohuañenpa' orach huapore'terrset coñcha'puetso all parraren tso'. Ñeñt pa' añ toma'ntena atet ñerra'mrrate' o' ya'chencaterr paterr yechets ama't yecle' ama't yot, te't esempohuañen ora yechtsohuenpa' huapore'terryet coñcha'puetso.

30 Attecma ñaña ñerra'm sotpa' p̄atyenes ñeñt ama pocteye' enteno Yompor añ poctetsa o'ch sequechpuerr ñeñt atet chocma p̄atse'tatyenes sot. Ñeñt pa' e'ñe atet ñerra'mrrate' cho sepechen sotpa' o'ch sehuapore'ch, ama't ñeñt secohuenrote'tsen sot ñeñt atarr sesherbene'. Ñeñt pa' o'ch alla noterrser. Añña ama tama yorochenayaye socop o'ch sa'ypo'ñer e'ne tayecma ñeñt soctape'chatene' sosya'tsañ. Añcha'ña atarr yorochen socop ñerra'm ama tayecma sa'ypo'ñerepa' esempohuañenpa' orach huapore'terrset coñcha'puetso.

*Atto Jesús pa' yeçhatosanet ama asanna'tpahuoyaye
(Mt. 19.9; Mr. 10.11-12; Lc. 16.18)*

31 'Ñaña te'pa' o'ch noterrser po'poñ: Sapa' ahuatoteñ pa' señoñe'ña atet otarettete't: "Ñerra'm esesha' serre' puetaporpa' apa'nme pa'ña papell all aquellcare't attoch quechpuerran puetapor."

32 Elloña na te'pa' o'ch noterres: Ñerra'm ama añecpaye' quechpuerrano puetapor atto ama choye' aguënano po'psheñeñ yacma, ñerra'm attota ser-ran puetapor, ñaña'pa' ochña'taterrancha' puetaporeshe'mañ po'psheññeshoñ; ñeñtpa' ama cohuenaye' enteñe Yompor. Ñaña ñerra'm esesha'ña yorerre' ñeñt' asaretpa' ñeñña yacmarpa' chach chetapretenan po'psheñeñ puetapor; ñeñtpa'cho'ña ama cohuenaye' enteñe Yompor.

Atto Jesús'pa' ye'chatosanet amach natsteto po'ñoñ Parets pa'so'chño

33 'Ñaña te'pa' o'ch noterserr po'poñ: Sa ahuatoteñpa' se'mare'tña ñeñt' atet otarettete't: "Amach e'ñe orrena na'yeneto po'ñoñet Parets pa'so'chño tarro'mar ñerra'm erra'tsen nene' po'ñoñ Parets pa'so'chño ñeñtpa' atarr huomenc ñoñets amach atta puesatscheto, chocmachña e'ñe a'pocatyenet ñeñt' atet o' nohuetña po'ñoñet Parets pa'so'chño." Ñeñtpa' atetca'ye otarettete'tña ahuatoteñ.

34 Tarraña elloña na te'pa' o'ch noterres: Ama't e'ñe erra'tsena pa'so'chño'pa' amach senatsto señoñ. Amach sotatsto o'ch sena' señoñ Yompor pue'ntañ pa'so'chño; ñeñtpa' ama tama huomencaye' senteññe ñeñtecop atet senen señoñ. Tarro'mar napa' o'ch notas ama't pue'ntañpa' ñeñt' po'conañ pen Parets ñeñto'marña attera atarr huomenc ñerra'm Pamo'mte'.

35 Ñaña amach sotatsto o'ch sena' señoñ Yompor po'patseñ pa'so'chño tarro'mar ñeñtpa'cho'ña attera atarr huomenc tarro'mar ñeñtpa' ñeñña nen Parets pa'tconet. Ñaña amach sotatsto o'ch sena' señoñ Jerusalén pa'so'chño tarro'mar ñeñtpa'cho'ña attecma atarr huomenc tarro'mar ñeñtpa'cho'ña ñeñt' pa'netser pen Parets.

36 Ñaña amach sotatsto o'ch sena' señoñ e'ñe sa soñ pa'so'chño tarro'mar ñeñtpa'cho'ña ama soyaye seye'chcatar. Ama't e'ñe pue'parra sechpa' amate' errotenot sello'tacheña sa. Ñaña ñerra'm esempo'ch sello'tenpa' amach errotenot alla sa'quelluetatereña sa.

37 Ama't errotena sepa'yese'chpa' atetcha' sotanna'tyese: Ñeñtpa' atetcha'ca'ye yepe'. Ama palltenoña o'ch sena'yen señoñ ama't e'ñe esa pa'so'chño tarro'mar ñerra'm atet sepa'yenapa' ñeñtpa' oneñeteshota huena.

Atto Jesús'pa' ye'chatosanet ama atsa'tatpahuoyaye atto e'moñe'tenyet (Lc. 6.29-30)

38 'O'ch alla noterserr po'poñ: Ñaña sapa' ahuatoteñ se'mare'tña ñeñt' atet otete't: "Ñerra'm esesha' pochocle'che' pamo'ts, semoñseñoñ ñeñt' apochocle'charetpa' sepo'chocle'ch ñaña ñeñt' pochocle'chene' pamo'ts. Ñaña ñerra'm esesha' pue'moñe'teñoñtan a'cayam'psan pamo'ts pa'spa' semoñseñoñpa' sa'cayam'pes ñaña pa's ñeñt' a'cayam'pene' pamo'ts pa's." Ñeñtpa' atetca'ye otarettete'tña ahuañ.

39 Tarraña na te'pa' o'ch notas ellonet: Amach semoñsatstoña sa e'ñe sañeña ñerra'm esempo e'moñe'tyenset. Atet ñerra'm esempo esesha' pue'moñe'teñoñetas o'ch tacllaset setsa'po secohuenrot, sañapa' poctepa'chña señch tacllerrserrepa' ñaña po'psheññañot.

40 Ñaña ñerra'm esempo esesha' muenene' o'ch temantaset attoch puer-ratam'psaset seshtam, sañapa' poctepa'chña señch puerratam'psasetepa' seshtam ñeñt' muenenet ama't ñaña po'pmañ seshtam allo sepmatena.

41 Ñaña ñerra'm esesha' sanmatsre'tatene' e'ñe atta paterr kilómetro, sañapa' poctepa'chña señch o'ch sanmatsre'ch ama't epa kilómetro.

42 Ñaña ñerra'm esesha' es senamuene', sañapa' sapepa'ch. Ñaña ñerra'm esesha'ch senamuene' o'ch es sarchapa' sañapa' sarchepa'ch.

Atto Jesúsapa' ye'chatosanet amorrentpo'ch yeñch ñeñt'ye'moñe'tyene'
(Lc. 6.27-28, 32-36)

⁴³ 'Ñaña sapa' se'marte'ña atet otete't ahuat: "Mueryetcha' pamo'tset ñeñt muerenahuet. Tarraña ñeñt e'moñe'tenahuetpa' ñetpa'cho'ña o'ch e'moñe'chet ñamet." Ñeñtpa' atetca'ye otete't ama't ahuatoteñ.

⁴⁴ Tarraña naña te'pa' elloña o'ch noterres: Semueryach ama't ñeñt se'moñe'tene'. Ñaña ñeñt sarrnomare'tenaya sañapa' o'ch senamaterrñañ Yompor pa'nateña. Ñaña ñeñt errof sepene'pa' sañapa' añcha' atet sepoñ ñeñt atarr cohuen enten ña. Ñaña ñeñt sa'muerochtatene' sañapa' o'ch sema'yochampesya.

⁴⁵ Attochña sapa' eñotenset po'ño'ch puechemer penes Yompor ñeñt pue'ntaño'tsen tarro'mar sapa' añ sorrtatyen cohuen ama't e'ñe allohuena-cop e'ñe atet pena Sompor ñapa' e'ñe cohuenare' es orrtatyen ama't allohuena-cop. Atet ñapa' chocma huapata'muenane't po'puetarenña allohuena-cop ama't atsrre'mñañecop ñaña ñeñt cohuenacop acheñer. Ñaña ñapa' chocma huatateñ añecop ñeñt e'ñe pocte' es pets ama't ñaña añecop ñeñt ama pocteye' es pa'yetso.

⁴⁶ Ñeñto'marña notenes: Ñerra'm aña e'ñe semorrentena ñeñt semor-
rentenaya saña ñeñtpa' amach e'ñeye' sorrtatenoña ñeñt e'ñe po'ño'ch co-
huentetsa, attoña Yomporpa' amach es apuerrso ñeñtcha' atarr socshatterre'.
Tarro'mar ñeñt ama ame'ñenayo Yompor; ñetpa' aña morrentenet ñeñt
e'ñe morrentenahuet ñamet. Sapa' e'ñeca'ye seño'teñ e'ñe atet pena ñeñt
pueshquëño'te'na cobrenan acheñenesha' shonte' quelle. Añña atarr co-
huentetsa ama't ñeñt ama yemorrentenayepa' o'ch yemorrencha e'ñe co-
huen.

⁴⁷ Ñaña ñerra'm e'ñe aña cohuen saguën ñeñt e'ñe samo'ts sepen, ñeñtpa'
amach errofeno't semtanoña ñeñt ama ame'ñetso, tarro'mar ñetpa' e'ñe aña
cohuen aguënet ñeñt e'ñe pamo'ts penet.

⁴⁸ Ñeñto'marña napa' notenes: Sapa' e'ñepa'chña cohuenare' es sorrtatyen
allohuena-cop e'ñe atet pena Sompor ñeñt pue'ntaño'tsen e'ñe cohuenare' es
orrtatyenña ña.

6

*Atto Jesúsapa' ye'chatosanet amach pommo'cheño'te'na es cohuen orrtatat-
steto*

¹ Jesúsña'pa' atet oterraneterr:

—E'ñech seño'ta, amachña e'ñe sommo'cheño'te'naña es sorrtatyeno co-
huen Yomporcop attoch acheñenesha'pa' o'ch entset sapa' atarro' cohuen
acheñeseñ. Tarro'mar ñerra'm ñeñt'epa'na es sorrtatyen cohuen, Yomporña
ñeñt pue'ntaño'tsenpa' amach es apuerrsoña sa ñeñtcha' atarr socshatterre'.

² Ñerra'm esempo es sapueñ huocchañnesha'pa' e'ñechña a'nahua
sapuenanet. Sommo'cheño'tpa' amach sotatsto entasepa' allohuen
acheñenesha' attoch e'ñe cohuen entasetañ. Tarro'mar ñeñtpa'
ommoñat'enesha' atet petsa. Ñeñt ommoñat'enesha'pa' ñerra'm esempo
es apueñet huocchañnesha'chnopa' o'ch orrtachet allo'tsa'yen allohuen
acheñenesha' all puerahuo'mar ama't ñaña toño'mar; attochña allohuen
acheñenesha'pa' e'ñech cohuen entenanetañ. Tarraña napa' o'ch
notas, ñeñt atet petsapa' Yomporña'pa' amach es apuerraneto ñeñtcha'
atarr coshaterrahuet. Tarro'mar ñetpa' aña e'nenet acheñenesha'ch
cohuentatenahuet. Ñetpa' e'ñech alla atsa'tare'tterret.

³ Tarraña sapa' ñerra'm esempo es sapueñ huocchañneshačno amach esesha' sotaþsa'tatsto ama't ñeñt e'ñe parro seyemtannena.

⁴ E'ñechña a'nahua es cohuen seþa'yen, allochñapa' Sompor ñeñtña entene' allohuen ñeñt a'nahua es seþa'yen, ñachña sapuerre' ñeñtcha' ello atarr socshaterre'.

*Atto Jesúsapa' yeçhatosanet e'ñech cohuen ma'yochet
(Lc. 11.2-4)*

⁵ Jesúsñaapa' atet oterraneterr:

—Ñaña ñerra'm esempo sema'yochena sapa' amach atet seþatsto atet pena ommoñañenesha'. Ñetpa' añecpaña ma'yochenet attoch acheñenesha'pa' e'ñech cohuen entenanetañ. Ñeñto'marña allempo ma'yochenetpa' ar-rach tomyesoset all shontena acheñenesha' puerahuo'mar amapa' all et-sape'tyena toñ allecma huachena shonte' acheñenesha' attochña allohuen acheñenesha'pa' e'ñech cohuen entenanetañ. Tarraña napa' po'ñoçhpa' o'ch notas: Ñeñt atet ommo'chetsa Yomporñaapa' amach apuerraneto ñeñtcha' coshaterrahuet tarro'mar ñetpa' aña e'nenet acheñeneschach cohuentate-nahuet. Ñetpa' e'ñech alla atsa'taretterret.

⁶ Sañaapa' ñerra'm esempo sema'yochenapa' o'ch sebe'tosyes so'ponro çochña seyottamþsa attochña sapa' amach sommo'cheñoña sema'yocheñoña Sompor, ñeñtapa' e'ñech ñapuet allo'tsenes epas. Allochñapa' Sompor ñeñt e'ñe ñapña sentene' ñachña sapuerre' ñeñtcha' ello atarr socshaterre'.

⁷ Sa ñerra'm çho sema'yochenapa' amach atta nanac señosatsto atarr aton e'ñe orrena ñeñt atet pena po'poñ acheñenesha' ñeñt ama ame'ñenayo ñeñt ya Yeyomporer. Ñetpa' atarr tematen ma'yochenetaña' tarraña ñeñtach alla oterrete't. Cha'te' otenapuetañ ñerra'm atarr tematen eñosetpa' e'ñete' cohuen entenanet Yompor attoch e'ñe cohuen e'mñotenanet.

⁸ Sañaapa' amach atet seþatsto atet penet ñet tarro'mar sapa' ama't ama es senamuena' sema'yocheñoñ, Somporña e'ñe eñotuennas ñeñt sepallta'yena.

⁹ Sañaapa' atetcha'ña cohuen sema'yochaña sa:

Yompore Partso ñeñteþ pe'ntaño'tsen, yentapepa'ch þa atarr Partsoþ.

¹⁰ Chapuepa'ch Nompore allempoch atarr þa'yochreshatterra arr patsro. Yetsotonapepa'ch arr patsro ñeñt atet pemnen þa Nompore ñeñt atet penet ñaña all pe'ntaño.

¹¹ Chocmuepa'ch Nompore þapueney ñaña yocrramñ ñeñt allpon yepallta'yena pate'tets yet.

¹² Peþretna'huonayepa'ch Nompore allohuen yo'chñar ñeñt ama pocteye' pentapretenye atto Nompore yapa'çho'ña yeþretnannena ñerra'm es-empo erro't yeþannena.

¹³ Ñaña amach Nompore pemnatatsche sosya'tsañ o'ch atarr topateney. Añcha'ña çoch Nompore þa'ypo'ñataterrey allohuen sosya'tsañečno. Tarro'mar e'ñe þa Nompore ayochreshattetsa ñeñteþ atarr Partse-shatets, e'ñe þapña ñeñteþ Nompore aye'choçhtatarettetsa e'ñe er-ronañohuen. Ñeñtach nenamaþ; ñeñtapa' attepa'ch Nompore.

¹⁴ Ñerra'm sa çocma seþretnannena atto erro't seþannenapa' sapa'çho'ña çocmach peretnerresña Sompor ñeñt pue'ntaño'tsen.

¹⁵ Tarraña ñerra'm ama çho seþretnannenopa' Somporpa'çho'ña amach peretnerrnasoña saña so'chñar.

Atto Jesúsapa' yeçhatosanet ñeñt e'ñech po'ñoçh tore'teñets Yomporecop

¹⁶ Jesúsñapa' atet oterraneterr:

—Ñaña ñerra'm esempo semneñ sema'yocheñoñ Yompor o'ch sequeçpa' serrar ñeñtpa' e'ñe pocte'. Tarraña ñeñtpa' ama añecpayaye attoch entas acheñenesha' ñerra'm çha sellca'huena. Tarro'mar ñeñtpa' ommoñañenesha'ña atet petsa. Ñetpa' ñerra'm esempo queçhpuenet puerrar Yomporecop ñetpa' attach atsocloyayenet allochñapa' attoch eñotenanet acheñenesha' ñetpa' Yomporecop' atet penet. Tarraña na po'ñoçhpa' o'ch notas: Ñeñt atet ommo'chetsa puefore'teñoñ Yomporñapa' amach es apuerraneto ñeñtcha' atarr coshaterrahuet. Tarro'mar ñetpa' aña e'nenet acheñeneschach cohuentatenahuet. Ñetpa' e'ñech alla atsa'taretterret.

¹⁷ Tarraña sa ñerra'm esempo e'ñe sema'yocheñoñ Yompor o'ch sequeçpa' serrar sapa' atterachña sorrtena e'ñech cohuen satsaño'tyena ñaña se'paclle'chyena.

¹⁸ Allochña acheñenesha'pa' amach çha eñotaseto sapa' çho sequeçhpuen serrar ma'yochaya Yompor. Sapa' e'ñech ñapña Sompore sentene' ñeñt pue'ntaño'tsen. Allochñapa' Sompore ñeñt e'ñe ñapña sentene' ñachña sa-puerre' ñeñtcha' ello atarr socshatterre'.

Atto ñeñtcha' seshonterr ñeñt atarr sherbets arrca'ye seshonten all Yompor pue'ntaño

(Lc. 12.33-34)

¹⁹ Jesúsapa' alla oterrer:

—Ñaña amach seshonta'yesatsto checmañats aña patsro ñeñtcha' atarr semorrentena. Ñeñtpa' atarr apomñpere'chña atarr aptsaña. Ama't eñetpa' o'ch be'tosamñpsonasapa' o'ch yoratsre'tamñpesuas.

²⁰ Yompor pue'ntañoçhña seshonta'yesña ñeñt e'ñe po'ñoçh sherbets. Ñeñtpa' ama apomñpere'chño ñaña ama aptsaño. Allpa' ama't eñetapa' ama be'teno attoch yoratsre'tamñpesuas.

²¹ Tarro'mar ñerra'm all Yompor pue'ntaño seshonta'nen ñeñt atarr cohuen senten, yeñoteñ e'ñe ñeñta paterr senen seyoçhro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñta paterr senen seyoçhro ñeñtñapa' ama es sherbenoña Yomporecop.

Atto yecle'pa' añ toma'ntena ñeñt po'lampareñ pen allohuen yechets

(Lc. 11.34-36)

²²⁻²³ Jesúsñapa' alla oterraneterr:

—Yecle'pa' añ toma'ntena atet ñerra'm ñeñt po'lampareñ pen ora yechets. Ñerra'm e'ñe cohuen huomech yecle'pa' e'ñech cohuen entateney puetare'. Allochñapa' attoch e'ñe cohuen torratyenana allemeñ yechets tarro'mar e'ñe cohuen a'puetarsamñpsarettenet. Tarraña yecle'ña ñerra'm ama e'ñe cohuen huomñcheyayepa' amach e'ñe cohuenaye' entateney puetare' attochña amach eshcaye' torratyenano allemeñ yechets tarro'mar çha ottena ñerra'mrrate' checmeto'tsa'yeneta. Attecma pena ñaña yeyoçher. Ñerra'm e'ñe cohuen yocape'chyen yeyoçhro, ama aña es ye'nyeno ñeñt e'ñe yocpa, attoña çhennayaña e'ñe ora allohuen Yompor poçtañña ñeñt po'cohuenña pen. Attoña ora yoctañña' e'ñech a'puetarsamñpsarettena Yomporeshot. Tarraña ñerra'm ama cohuenaye' yocape'cheno yeyoçhro, ñerra'm aña ye'nyen ñeñt e'ñe yocpa ñeñtpa' amach errotenot a'puetarsamñpenyeña ñeñt yoctañña yepen. Ñeñtña yoctañña yepenpa' atarrcha' a'checmetamñpenay yeyoçher.

Amach añã yema'yoçhratsto ñeñt e'ñe yocpa attoch yegana aton quelle; ñeñt atetpa' amach errotenot yema'yoçhroña ñaña Yomporecop (Lc. 16.13)

24 'Ñeñtpa' atetcha' yetma'ntacha: Ama't puesheñarrofeyapa' amach errotenot e'ñe cohuen yetaruasoña epsheño'mar yamo'mtayecop. Tarro'mar ñerra'm atet yeřapa' puesheñarr e'ñech cohuen yemorrenteñoť yocsheñeshocmañen yesherbeñ, po'psheñeñña' amach e'ñeye' yemorrenteño; çhach yottena ñerra'm çha yetsena'teñ. Ñeñto'marña ñeñtpa' amach cohuenaye' yesherbeñe. Ñerra'm añã e'ñe sema'yoçhrena ñeñt e'ñe socpa attoch segana aton quelle, ñeñt atetpa' amach errotenot sema'yoçhroña ñaña ñeñtecop atarr sherbets Yomporecop.

Atto Yomporpa' ñach e'ñe cohuen cohuanĩpene' ñeñt puechemerasha' pen (Lc. 12.22-31)

25 'Ñeñto'marña te'pa' o'ch noterrser: Amach añã sellcatsto ñeñt atto yocrena arr patsro. Ama't seyoçhrapa' amach sotatsto, esuachca' yerrerrerte' tsapaťonet, esuachca' yorrte'. Ñaña amach añã sellcatsto ñeñt e'ñe sechtsocpa. Amach sotatsto, esuachca' yechorrate'. Tarro'mar Yompor ñã yapuene' yo'rrerrña allo yocrena ñeñtña atarr nanac sherbets. Ñeñto'mar yeñoteñ ñã yapuene' ñaña yerrar ñeñtña ñocoppa' ama esoye' enteñe. Ñaña ñã yeçcatene' ye'chets ñeñt atarr sherbets. Ñeñto'mar yeñoteñ ñã yapuene' ñaña ama't ñeñt yechorra'yena ñeñtña ñocop ama esoye' enteñe.

26 Senteñte' atto correna otneshaçhno ñeñt anomçha'tyetsa entonet. Ñetpa' ama çhoye' nare'tatse'teneto ñaña ama çhoye' apçha'yeneto puerrar ñeñtcha' rra'yenet. Ñetpa' ama es echenaye allcha' es añño'tyenet. Ama't atto correnet Somporña ñeñt pue'ntaño'tsenpa' e'ñe yeçcatyesuanet ñeñtcha' puerrar řa'yenet. Elloña sa Yomporpa' atarr morrentensa sa; ello semtaneñ ñeñt atto atarr morrentenana otneshaçhno.

27 Ñaña amach sellcatsto attoch amach serromo tarro'mar ama't sellquënañ attoch atarr atomat socra arr patsro, tarraña ama't e'ñe puesheñarrofesapa' amate' errotenot so'chtatoña socreña ama't e'ñe pamtarra.

28 'Eso'mare'tcha'ña selca'yesaña attoch sepashta. Senteñte' atet yeçquëna roreçhno ñeñt chopyets ñota allemeñ. Ñetpa' ama çhoye' taruasa'yeneto ama't mamesha ama çhoye' taneneto ñeñt chorra'yenet atto e'ñe cohuen orreyenet.

29 Tarraña napa' o'ch notas: Ama't añcha'tareť Salomón atto e'ñe a'cohuentate't ahuat, ama't ñapa' ama chorrane'teña ñeñt atarr cohuen ñeñt atet atarr cohuentena ror.

30 Ñaña ñeñt ror pue'chorpa' ñeñtara ta'te' ñeñt chopyets allemeñ ñeñt sentyen te' tarraña ñeñtpa' mamecpa. Ama't cohuen chopyleneñ te'pa' tsapaťonetña' o'ch etomanĩperetpa' e'ñech colla'huerrapa' o'huañcha' cohuenta. Ñehua, Yompor atto cohuentatyenan ama't ñeñt e'ñe mamecpa, elloña sapa' atarr chorratyensañ saña; saña' eso'marte'ña amaña e'ñeye' seyemteño.

31 Ñeñto'marña notenes: Amach atarr selca'yesatsto. Amach sotatsto: "Esuachca'ye yerra'te'. Esuachca'ye yorrte'." Amach sotatsto: "Esuachca'ye yechorrate'."

³² Tarro'mar allohuen acheñenesha' arr patsro ñeñt' ama ame'ña'yetsa, ñetpa' ñeññaña e'ñe paterr e'nenet. Ñehua, Somporna ñeñt' pue'ntaño'tsen ñapa' e'ñe entuenes ñeñt' allpon pa'namen sepallta'yena arr patsro.

³³ Sapa' añcha'ña e'ñe ñanom sema'yochrena Yomporecop attoch atarr ayochreshattena ña. Ñaña añcha'ña sema'yochrena ñeñt' e'ñe pocte' enten ña, allochñapa' ñachña sapa'yene' ñeñt' allpon sepallta'yena samña.

³⁴ Amach e'ñe tayecma sellca'yestatsto ñeñt'cha' setantyesoya tsapa'oneñ. Tarro'mar ama't e'ñe tayoteñpa' chocma eñall ñeñt' allcatañetyetsa ama't e'ñe pate'tets yet.

7

*E'ñe attotapa' amach yotteñe'channa'tatsto
(Lc. 6.37-38, 41-42)*

¹ Jesúsapa' atet oterraneterr:

—Sapa' e'ñe attotapa' amach sottene'chatsche po'psheñeñ allochñapa' amach otteñe'cherrso samña Yompor.

² Tarro'mar ñerra'm atet sottene'chyeñ po'potantañ, Yomporpa'cho'ña e'ñech attecma otteñe'cherres samña. Ñerra'm errponochcha' sottene'chyeñ po'potantañpa' sapa'cho'ña e'ñech allponoch otteñe'cherres samña Yompor.

³⁻⁵ Amach atet sentatsche po'potantañ ñerra'm ñetpa' ama cohuenaye' es peneto, ama't sapa' ama sentenoña ñeñt' atet sepa'yena sa ñeñtpa' ello semtaneña po'potantañ ñeñt' atet es pa'yenet ñet. Ñerra'm ama cohuenaye' es sepeno samapa' amach sotatscheña po'potantañ: “Napa' o'ch noctape'chatuerres e'ñe cohuen.” Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr ñeñt' ama cohuenaye' sepeno sa, allochñapa' attoch seño'ch co'tape'chate' samo'ts e'ñe cohuen. Ñeñtpa' añ toma'ntena o'ch sentoñ po'psheñeñ pa'clloyo'tsen puepachña ama't sa seclloyopa' allo'tsen tsach; ñeñt'ñapa' ama sentene. Ñerra'm atetpa' amach erroteno't socheña po'psheñeñ napa' o'ch nechterrna'p peclloyo't pepachña tarro'mar añ tsach ñeñt' seclloyo'tsenpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyo't allochñapa' attoch e'ñe cohuen es sentyen. Attochña e'ñe cohuen sechterrñañ po'psheñeñ puepachña pa'clloyo't.

⁶ Jesúsapa' atet oterraneterr po'poñ:

—Ñeñt' ama quechpuenaye pachm'areñ ñaña patpareñ amach alla seserpare'taterranete'te Parets po'cohuenña. Tarro'mar ñetpa' atta penet ñerra'mrrate' ochec. Ñehua, ochec ñerra'm esempo ama'tcha' atarr cohuen ya'ppa' ya'nach rrema'pes chach achota'teypa' o'ch shetsay. Ñaña ama't atet ñerra'm chañcho ñerra'm esempo es yena' ñesho ama'tcha' atarr cohuen yenten ya, yesar, chañchoñapa' attach atmama'tam'psey tarro'mar chañchopa' ama esoye' entenano ama't ñeñt' atarr cohuen.

*Chocmach es yenamueñ Yompor ñaña chocmach ye'neñ
(Lc. 11.9-13; 6.31)*

⁷ Jesúsapa' alla ye'chaterraneterr po'poñ, ñeñtpa' atet oterraneterr:

—E'ñe senamueño't, Yomporñapa' apascha'. Se'name'teño'tpa' señchcha'; se'chore'teño't, Yomporñapa' e'ñe pue'mñoteño'tespa' e'ñech cohuen toram'psapas.

8 Tarro'mar ñeñt es enamare'tetspa' ñetña es aguëtset; ñaña ñeñt es e'name'tets ñetña'pa' chocmach eñchet ñaña erra'tsen ñeñt chore'tyene' ñetña'pa' e'ñe e'mñotenanet Yompor.

9-11 'Yompor ñeñt pue'ntañot'sen chocmach e'ñe cohuenare' es apa'yeney ñerra'm esempo es yenamueñ. Ñapa' amach aña apuenye ñeñt ama cohue-naye' yenteno ya. Ama't sa ñeñtes arromña'tes atet sepeñ saña sechemer, e'ñech cohuen es sapueñ ñerra'm esempo es enamuenes. Atet ñerra'm allempo pa'chporrño't es enamuenes, o'ch enamas mam* ñeñtcha' rra', sapa' ama't puesheñarrot'esapa' amach aña sapueñeña sechemer mapue' ñeñt ama arrapahuoyaye. Amapa' ñerra'm cac enamuenes saña'pa' ama't puesheñarrot'esapa' amach aña sapueñeña sechemer shechep ñeñt atarr amurochtatañ. Ñeñto'marña sa ama't arromña'tes ama't ñaña atsrre'mña'tes sapa' e'ñe seño'teñ apa'yese' sechemerasha' e'ñe cohuenare'. Añña ñeñt Seyomporer sepen saña ñeñt pue'ntañot'sen elloña ñapa' e'ñe eñoteñ atto e'ñe cohuenare' es apa'yenes saña ñeñtes es enamuene'.

12 'Ñeñto'marña atet notenes: Ñerra'm erra'tsente' e'ñe cohuen senten ñeñt semnen sa ñeñtcha' atet p'onas po'psheñeñ, sapa'cho'ña e'ñech attecma sepanet saña. Tarro'mar ñeñt'pa' atet oteney Yompor po'ñoñ ñeñt ahuatoteñ, ama't Moisés po'ñoñ ñeñt atet anaret ama't ñaña ñeñt a'mta'yese't Yompor po'ñoñ'pa' e'ñe attecma otyesete't.

Atto Jesús'pa' toma'ntaterraneterr ñerra'mrrate' yetarro'tollo yebe'ten esheccha' yechap Yomporesho

(Lc. 13.24)

13 Jesús'ñapa' atet toma'ntaterraneterr; ñeñt'pa' atet otanet:

—Sebe'tos yetarro añetoll tarro'mar ñeñt atarr yetarr, atarr toñ ñeñt'pa' alla sen chenca'puetso. Shonte' acheñenesha'pa' e'ñe alla be'toscha'tyenet.

14 Ñeñtña añetoll yetarr, añetoll toñ ñeñt'ñapa' arr sen corra'puetso allña sapa' corretsasach. E'ñe puesheña'ttsa entene'ña ñeñt toñer.

Ñeñt'pa' añ toma'ntena attoch yocter Cristo, choch yesuanemña ñeñt ama cohuenaye' entapretenye.

Allohuen acheñ ñeñt e'ñe po'ño'ch cohuen acheñer, ñetña'pa' añcha' orrtatyenet ñeñt e'ñe cohuenare'

(Lc. 6.43-44)

15 Jesús'ñapa' atet oterraneterr:

—Sapa' seño'ta'tach tarro'mar huaponasach ñeñtcha' aycha'natatsa ñetpa' a'mteneto' Yompor po'ñoñ. Ñetpa' puehquëñotetpa' ottenetañ atet ñerra'm atarr cohuen acheñret e'ñech attetañ ñerra'mrrate' carrnero ñeñt ama erro't apañeyaye ama't mamesha. Tarraña ñetpa' atta shequënet tarro'mar e'ñe po'ño'ch ñetpa' e'ñe attet ñerra'mrrate' ma'yarr ñeñt añach e'nyen ñeñt e'ñe ñocpa. Attotcha'ña e'ñe a'chencatuerran acheñenesha'.

16-20 Tarraña sapa' attotcha'ña e'ñe sechme'tyesanet. Tarro'mar allohuen acheñenesha' ñeñt e'ñe po'ño'ch cohuen acheñenesha', ñetpa' añcha'ña orrtatyenet ñeñt e'ñe cohuenare'. Tarraña po'potantañ acheñenesha' ñeñt po'ño'ch ama cohuenayaye, ñetña'pa' añach orrtatyenet ñeñt ama cohue-nayaye. Ñeñt'pa' atetcha' netma'ntacha. Ora allohuen ñeñt e'ñe cohuenare' narmetsochechnopa' pue'merpa'cho'ña e'ñech cohuenare'. Ama't parrochapa' amach me'toña ñeñt ama cohuenayaye. Añña po'pchañechno

* 7:9-11 Ñehua, Jesús añ toma'ntatanet pan ñeñt puerrar penet all pa'nyo.

narmetsochečno ñeñt ama cohuenayaye, pue'merpa'cho'ña amach cohuenayaye. Ñeñtpa'cho'ña ama't parrochapa' amach me'tenoña e'ñe cohuen. Ñaña yapa' e'ñe yeñoteñ ama't errotenapa' ama arroteye' yetoquënoña llo'm ajchoť. Ñaña ama't errotenapa' ama arroteye' yetoquënoña ap rrenagachot.† Ñeñto'marña attoña yeñoteñ erra'tsente' ñeñt e'ñe cohuenare' narmetsoch, ñaña ñeñt ama cohuenayaye; pue'merotaña yechme'teñ. Ñaña allohuen narmetsochečno ñeñt ama cohuenaye' me'tyetsopa' a'mata'tueretcha' saprotueretcha' tso.

Atto amach allohuenacmaye' chapueto all amcha'tarettena Yompor pue'ntaño

(Lc. 13.25-27)

²¹ Jesúsña'papa' atet oterraneterr:

—Ñeñt notyenayeñ: “Papa' po'ñočh na'yochreshater nepeneť”, tarraña amach allohuenacmaye' chapueto all amcha'tarettena Nomporets ñeñt pue'ntaño'tsen. Añach chapyerrets all ñeñt e'ñe po'ñočh atet pene' ñeñt atet muenen Nomporets ñeñt pue'ntaño'tsen.

²² Allempopa' shonte'ch acheñenesha' ñeñtcha' notyerrayeñ: “Po'ñočh Ayochreshate e'ñe peso'chñopa' chocmaca'ye ya'mtonape'tña peñoñ. Ñaña yeçhore'teñoť peso'chñopa' chocmaca'ye yequeçhpatache'tña shonte' oneñe'chno. Ñaña yeçhore'teñoť peso'chñopa' epaye'ca'ye yorrtatyese'tña partsoteñets.”

²³ Naña allempopa' na'meta'huerranetcha', notyerranetcha': “Ama't ahua'tapa' ama nentarlo, ama neyochreshayayso. Te'pa' orrerres, sapa' aña setsoten ñeñt ama cohuenaye' nenteno.”

Atto Jesús toma'ntatana acheñ ñeñt e'ñe eñotene' ñeñt po'ñočh sherbets ñaña ñeñt ama eñotene' ñeñt sherbets

(Lc. 6.47-49; Mr. 1.22)

²⁴ Jesúsña'papa' atet oterraneterr:

—Allohuen ñerra'm erra'tsencha' e'mñotene' neñoñ ñeñt atet e'ñe cohuen neyçhatenanet, ñerra'm ñetña e'ñech atet penet, ñetña'papa' e'ñech eñoteñet ñeñt e'ñe po'ñočh sherbets. Ñeñt acheñer ñeñt atet petsapa' ñapa' e'ñe atet ñerra'mrrate' puesheñarr yacma ñeñt atarr es eñotets. Ñaña'papa' tomatan pa'paquëll, e'ñe echarr pe'.

²⁵ E'ñe tomatue'pa' huata huomenc, apellchena oñ, orrnota, pocollña'papa' orrnotañpsa. Ama a'matamñpse tarro'mar quellpachpa' e'ñe echarr a'omataret.

²⁶ Tarraña po'potantaña ñeñt e'mñotene' neñoñ ñetña ñerra'm amach atteye' peneto ñeñt notenanet, ñetña'papa' e'ñech ateta ñerra'mrrate' puesheñarr yacma ñeñt ama es eñoteno. Ñapa'cho'ña tomataneñcha'ña pa'paquëll, tarraña amach echarroye' pe.

²⁷ E'ñe tomatue'pa' huata huomenc, apellchena oñ, orrnota, pocollña'papa' orrnotañpsatsapa' chepa'tcha' mata'nerretspa' e'ñe muellotsetuerra.

²⁸ Allempo serrpare'tatuanet Jesús, acheñenesha'ña'papa' epaye' cohuanrorteñet ñeñt atet yeçhatenanet ña.

²⁹ Tarro'mar ñapa' atarr cohuen yeçhatenanet ñerra'mrrate' ñeñt allsen sarettetsa Partseshot. Judionesha' pa'mcha'tareñenesha' ñeñt atarr etso'tayenayeñ ñoñets ñeñt atet anaret, ñetña'papa' ama e'ñeye' atteye' yeçhateneto.

† 7:16-20 Ñehua, Jesús aña toma'ntatanet uva ñaña higo ñeñt puenarem penet all pa'nyo.

8

Atto Jesús a'crraterran puesheñarr yacma ñeñt aptsarñat
(Mr. 1.40-45; Lc. 5.12-16)

¹ Allempoña err Jesús aspenťotpa' coťa'huanererr acheñenesha' nanac shonte'.

² Allñapa' huapoña puesheñarr ñeñt osen puetsarñats ñeñt otenet lepra. Chap Jesúseshopa' allenta concorposana Jesúsapa' atet otos:

—Ayochreshate ñerra'm pa muenats papa' ñeñtep atarr ahuaencaťeshap pa'crrataye'cherren allochñapa' attoch e'ñe cohuen entuerren acheñenesha'.

³ Jesúsña anretapa' allenta a'pille', atet och:

—Napa' nemneñca'ye, metuerrepa'ña peptsarña allochñapa' attoch e'ñe cohuen entuerrep allohuen acheñenesha'.

Yacmañapa' allorocmuepa'tcha' metuerña pueptsarñapa' cha cohuenterrtsa.

⁴ Jesúsñapa' alla otererr:

—Te' atto o' na'crraterreppa' po'ñočh ama't e'ñe puesheñarrapa' amach potapša'tatsche ama't mamesha. Corneshachña pegatena' all peptsarseť. Atet naneť Moisés ñoñets añ acheñrecop ñeñťcha' a'crrataretterrtsapa' te'ñapa' o'ch es panom ñeñťcha' papos all ñeñť Yomporecop allochñapa' attoch e'ñe cohuen enterrep allohuen acheñenesha'.

Atto Jesús a'crraterran puesheñarr capitán pueñañra; ñeñťpa' romo'marnesha'
(Lc. 7.1-10)

⁵ Allempoña cherr Jesús Capernaumopa' allñapa' huapoña puesheñarr solltar po'captaner, ñeñťñapa' romo'marnesha' ama judioneshayaye. Ñañaapa' atarr otare'tosan Jesús,

⁶ ñeñťpa' atet otos:

—Nompurcha' nepaclopa' atarr pa'nattenapa neñañra. Alla panena po'mayo nanac mueročhtena cha echarrtena.

⁷ Jesúsñapa' atet och:

—Ama'tpa' napa' o'ch ahuen o'ch na'crratera'.

⁸ Capitánña puepatare'teñoťpa' atet och:

—Na Nompurcha'pa' ama cohuenayayno attoch pebeťosapo'tamťpesna nepaclo. Arroťach pot: “Ama'tpa' correrrepa' peñañra”, neñañrañapa' acrrerroche'ch.

⁹ Tarro'mar napa' ñeñten ñeñť atet petsa ñeñť atet otenen ñeñť neyechenaya na. Napa'cho'ña eñall ñeñť neyechena naña ñeñť nesolltarer nepen. Ñerra'm puesheñarr solltar noteñ: “Papa' o'ch ahuep a'yo”, ñañaapa' o'chcho' ahuo'. Naña po'psheñeñ solltar ñerra'm noch: “Papa' apon arr”, ñañaapa' o'chcho' huapa. Naña po'psheñeñ na'taruasañer ñerra'm noch: “Papa' arrcha' petaruasa'muen”, ñapa' allcha'cho' taruasa'muen. Ñeñťo'marña napa' neñotenep ñerra'm erroťen potenpa' e'ñechca'ye atet pena.

¹⁰ Allempo e'man Jesús ñeñť atet oten capitán, ñañaapa' atet otan allohuen acheñenesha' ñeñť coťa'nene':

—Ñapa' atarrca'ye yemtenna, ama't ñapa' amaca'ye judioneshayaye. Napa' po'ñočh o'ch notas: Ama't ahuaťapa' ama nentareña acheñ ñeñť e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñť atet atarr neyemtenaya.

¹¹ Ñeñťo'marña te'pa' o'ch notas: Shonte'ch acheñenesha' ñeñť ama judioneshayaye ñeñťcha'ña e'ñe neyemterraya. Allochñapa' esempohuañenpa' ñetñapa' allemateñcha' e'ñe huačha'tuerret ñeñťcha'

anorrcha'tyesuerrets all e'ñe Yomporesho all am̃cha'tarettena ña pue'ntaño. Allcha'ña rrallme'chapreteret yatañneshačhno Abraham, ñaña Isaac ñaña Jacob.

¹² Shonteña judionesha' ñetcha'ña čapatsetañ all am̃cha'tarettena Yompor, tarraña ñetña' amach čapueto all tarro'mar ñetpa' ama naye' yemteneto. Ñetña' allach ahupore'taretteret a'yot checmeto. Allña' allcha' yahuanrrorterret, panmueño'et atserrpa' rraso'tyesosetcha' pa's.

¹³ Allempoña Jesús'pa' alla oterranerr capitán:
—Te'pa' o'ch ahuerre'p pepaclo, e'ñe atto atarr peyemtenapa' attetepa'ch p̃ocop.

Pueñaña' e'ñe allempocma correrra.

Allempo a'crratosan Jesús Simón Pedro pa'so'mue

(Mr. 1.29-31; Lc. 4.38-39)

¹⁴ Alloña' čhap Jesús Pedro pa'paclo. Allña' entosñañ pa'so'mue alla panena po'mayo čha atsna'ten, čha hueraten.

¹⁵ Jesúsña' allenta a'p̃losñañ potpa' čha metuerretsña po'urateña. Alenta tantapa' o' yema'tallme'ča'pa.

Allempo Jesús'pa' a'crraterran shonte' pa'namen atsnañe'čhno

(Mr. 1.32-34; Lc. 4.40-41)

¹⁶ Ñeñte yetrocma allempo ellerrenpa' huača'tateññañeterr shonte' ñeñt chorra'yena oneñe'. Jesúsña' e'ñe po'ñoñoča quečpatuerranet oneñe' ñeñt chorra'yenahuet. Ñaña allohuen ñeñt atsna'tyetspa' o' a'crratyesapanet.

¹⁷ Ñeñtpa' tarro'mar atet p̃a allochña' attoch etsota Isaías po'ñoñ ñeñt a'mtaye't Yompor po'ñoñ; ñapa' atet ote't: "Ñapa' ñach yahuanmañperre' ñeñt yemuerochtatyene', ñapa' ñach ahuanerre' allohuen ñeñt ya'tserrpa'yene'."

Allempo Jesús'pa' yečhatan ñeñt muenene' o'ch coter

(Lc. 9.57-62)

¹⁸ Po'pocheño allempo Jesús'pa' entapuenanerr shonte' acheñenesha' čha emchorra'hueñerr, ñaña' atet otan pueyochresha':

—Te'pa' o'ch ahuañp̃sey yomta'n.

¹⁹ Allña' huapoña puesheñarr ñeñt atarr etsotene' ñoñets ñeñt atet anaret. Ñaña' atet otos:

—Na te'pa' Maestrocha' nemneñ o'ch noctare'tyese'p ama't errohuanencha' pechophe'chyes.

²⁰ Jesúsña' atet och:

—Te'pa' napa' peñotench'a' ama't nepacllapa' ama necheñe allcha' neychenañ. Ro'quēppa' chocma eñall pa'pon allecma yečhena.* Otečhnopa'cho'ña chocma eñall pa'ma' allecma yeča'yenet. Tarraña naña Ñeñten Acheñetosetspa' ama eñalle ñeñt e'ñe nepaquell nepen allcha' nepanena.

²¹ Po'pocheño Jesús'pa' atet otenanerr po'psheñeñ pueyochresha':

—Te'pa' o'ch p̃octa'n attoch e'ñe po'ñočh neyochresha' neperre'p̃.

Tarraña ñeñña' acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho o'chña nepampa'huera' apañpa' allempochna' nohuerrapa' o'ch nocta'p̃.

²² Tarraña Jesús'pa' atet otererr:

* **8:20** Ñehua, Jesús añ toma'ntacha zorra ñeñt berrotets all pa'nyo.

–Acheñenesha' ñeñt ama yerpa'penaye Yompor, ñetñapa' pampanna'tetepa' parro arromñañecmuet. Tarraña pócoppa' ñeñteř o' peyerpuera Yompor añ poctetsa o'ch pōcta'n attoch po'ñočh e'ñe neyochresha' nepperreř.

Allempo a'mchecherran Jesús huomenquēsha' ñaña sa'p ñeñt emo'yarertetsa (Mr. 4.35-41; Lc. 8.22-25)

²³ Allempoña Jesúsapa' a'tapos noñto pueyochresha'ñapa' coťa'huanmet, ahuanpset rroča'sonet atarr sa'po.

²⁴ Allñapa' machayotepa'tcha' huomenquēshatañpesnomuet. Emo'yare'ña čha esha'tena noñto, atteña oññapa' chorramoch noñto. Jesúsñapa' čha muen.

²⁵ Atteña pueyochresha'ñapa' ponemiyet Jesús all muenpa' opueret atet ochet:

–jĤa'qeshpātaye'chey Ayochreshate po'ñočuachca'ye yoclla'huerrate'!

²⁶ Ñaña' atet otanet:

–Eso'mare'tña nanac seyoren. Sapa' ama e'ñeye' seyemtenno.

Jesúsña tanterrapa' e'ñe po'ñoñoťa a'mtsoññetuerran huomenquēsha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen muechettamperret.

²⁷ Atta cohuanrrorteñet ñetñapa' atet otanna'tyeset:

–Ta'mca'ye, añ acheñerpa' esona'tarte'ca'ye. Atarrepa't es a'mchechaten, ama't po'ñoñoťapa' a'mchechaterran huomenquēsha' ama't ñaña emo'yare' oñ.

Atto gadaro'marnesha' ñeñt chorrena oneñet ñetñapa' huapuet Jesúsesho (Mr. 5.1-20; Lc. 8.26-39)

²⁸ Allempoñapa' o' etsotoset yomta'n all sechenet. Allpa' añ pa'ney pene' gadaro'marnesha'. Allñapa' huapoña ñaña epsheña acheñ tarraña ñetpa' añ chorrenahuet oneñet. Ñeñtpa' arroť huenet allecma pampa'yeñet arromñañečhno. Allenetñapa' ama eseshaye' setso tarro'mar ñeñt chorra'yena oneñet ñetpa' atarr añcha'nočhetyenet allenet.

²⁹ Allempoñapa' rranare'tapet Jesús, atet ochet:

–Eso'maruachca'ye, Parets Puechemerecha' pã'tsrre'močhtana'tosey. Papa' añecopfe' pehuena o'ch pecoñchaterrey ama't ama čhena' allempoch ya'coñchatareťterra.

³⁰ Ñehua, allpa' a'yente'tsa'yen shonte' chañchočhno all rratse'tyen.

³¹ Ñeñto'marña oneñeťečhnopa' atet otare'tapet Jesús:

–Ñerra'm čhoch pequečhpatozey acheñpa' arrña pemñaye'chosey chañchesho allochñapa' o'ch yechorra'yererr ñaña chañchočhno.

³² Jesúsñapa' allenta otanet:

–Ama'tca'yepa' orrasca'ye.

Allempoña oneñeťečhnopa' quečhp'a'neret acheñpa' o' chorrereter ñaña chañchočhno. Chañchoña allempo chorrosya oneñeťečhnopa' čhepa'tcha' matrra'tua allohuen ñegoneť, shorča'tuos allotpa' e'ñe ño'shrra'tuosa oño.

³³ Acheñenesha'ña ñeñt cohuanpene' chañcho, ñetñapa' allenta matrra'tet ñamet po'yorñoť, ahuanmuet anetso. Allñapa' serrpare'tyesoset ora atet o' perra ñeñt chorra'yeseť oneñet.

³⁴ Allenetpa'tcha' ahuanmaña allohuen anetso'marnesha' ahuo'ch enteñeta' Jesús. Ñetña entoset Jesúsapa' atet otoset:

–Te'pa' o'ch ahuerreř arroť, yenyot.

9

Atto Jesúsapa' a'crraterran ñaña ñeñt echarraña
(Mr. 2.1-12; Lc. 5.17-26)

¹ Alloña Jesúsapa' a'terr noñtopa' pechaterra, çherr anetso all a'puena.

² Allñaapa' huapatañpsoñet echarraña, puechecnape'na. Jesúsñaapa' eñotapanet ñetpa' atarr nanac yemteñet. Allempoña ñapa' otapan echarraña:
—Chochña neyochre pöcherra tarro'mar te' ñeñt pö'chñarpa' aþretna'huareterra.

³ Puesheña'tetsña ñeñt etsotayenayeñ ñoñets ñeñt atet anaret ñetñaapa' atta otatse'tyeset pueyoçhreto e'ñe ñagattseta, ñeñtpa' atet otet: “Añ acheñerpa' çha achmenan Yompor.”

⁴ Jesúsñaapa' o' eñotanet ñeñt atet otyenet ñocop, ñañaapa' atet otanet:

—Sapa' eso'mare'tcha'ña atet soctape'chatse'tyesña seyoçhro.

⁵ Sapa' çhate' soten ñeñt atet o' notue echarraña po'chñar o' aþretna'huareta ñeñtpa' ama torrapahuoyaye. Sapa' añña atarr torrapo' senten attoch na'crrater çhoncha'ña ote': “Petantena pechope'chnen.”

⁶ Ñehua, napa' o'ch neñotatas na Ñeñten Acheñetosets, napa' ñeñten apareten llesens attoch nach peretnerre' ochñarets añe patsro.

Ñeñto'marña Jesúsapa' atet otterrannerr echarraña:

—Te'pa' o'ch petantena, peçhta'nen pemue'pa' pechope'chnen, ahueneþ pepaclo.

⁷ E'ñe otue' atetpa' echarrañañaapa' çha tantetsa allorocma, ahuerr pa'paclo.

⁸ Acheñenesha'ña all ñeñt entene' ñetñaapa' çha yorenet, elloñaapa' alla cohuentaterrñañet Yompor. Atet otyenet:

—Yomporca'yeña o' llesenserran ñeñt ama't e'ñe acheña.

Allempo Jesúsapa' hua'ña'nman Mateo attoch pueyochresha' per
(Mr. 2.13-17; Lc. 5.27-32)

⁹ Jesúsña meterrerr allotpa' entnoman puesheñarr acheñ ñeñtñaapa' añ pa'so'cheñ Mateo.* All anen allecma cobra'yenan acheñenesha' quelle ñeñt gobiernocop. Jesúsñaapa' atet otosan Mateo:

—Te'pa' o'ch pöçta'n attoch neyochresha' neperreþ.

Mateoñaapa' çha tantnomtsapa' allenta cotan Jesús.

¹⁰ Allempoña çhap ñaña allempoch rrallme'chen Jesús pocollo. Allñaapa' huacha'ta po'potantañ shonte' ñeñt po'taruas pene' o'ch cobra'yeñet acheñenesha' quelle ñeñt gobiernocop. Ñeñtpa' atarr ashcañnesha' entyeñ allohuen acheñenesha'. Ñaña epuet po'potantañ ochñañeneshaçhno ñetñaapa' all anorrçha'tyesoset all anen Jesús epuet pueyochreshaçhno.

¹¹ Añña fariseonesha' ñeñt allo'tsa'yen ñetña allempo atet eñchetpa' allenta otoñet pueyochresha':

—Eso'mare'tña ñeñt semaestror sepenpa' rrallme'chapretenanña añ acheñeneshar ñeñt puehquëño'te'na cobra'yene' acheñenesha' ñaña epuet acheñenesha' ñeñt atarr ochñañeneshaçhno.

¹² Atto e'manet Jesús, ñañaapa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt atsna'tetspa' ñetñaapa' çhocma e'nenet ñeñtcha' a'crraterrahuet.

¹³ Napa' ama añecpaye' nohuapo attoch neçhore'tos ñeñt e'ñe atet entetsañ ñetpa' e'ño' cohuen es þa'yenet. Napa' añecopña nohuapa attoch neçhore'tos

* 9:9 Mateopa' ñeñtara ñeñt sochenet Levi.

ñeñt atarr ochñañ entyetsa. Allochñapa' attoch o'ch cotape'cherret ello e'ñe cohuen Yomporecop. Socoppa' añ poctetsa ñerra'm o'ch ahuerrespa' seño'tuerrepa'chña ñeñt atet ye'chateney añ Yompor po'ñoñ ñeñt atet anaret ahuatoteñ. Ñeñtpa' atet oteney Yompor: "Napa' ama e'ñe aña cohuen nenteno o'ch sapuenen sayara ñeñt semtsen nocop. Añe'naña atarr cohuen nenten o'ch semuereña allohuen samo'tsesha'."

Allempo Jesúsapa' eñotatanet atetcha' tore'tet Yomporecop ñeñt po'ño'ch sherbets

(Mr. 2.18-22; Lc. 5.33-39)

¹⁴ Allempoñapa' ñeñt pueyochresha' pen Juan ñeñt apataye't acheñenesha' ñetña hua'cha'toñet Jesúsapa' atet otoset:

—Yapa' tore'tetsay Yomporecop ñaña fariseonesha'pa'cho'ña tore'tetset. Pañapa' ¿eso'mare'tña ama tore'tenoña peyochresha'?'†

¹⁵ Jesúsñapa' alla toma'ntatanet, atet otanet:

—Ñeñt ahua'ñarefe'chno all rrallme'chapreteñet ñeñt errte' sena'tetsa, ama pocteyaye o'ch yotamet amach es serra'yesatsto. Amach yellcatatstaneto tarro'mar atet coshapreteñet ñeñt sena'tetsa. Tarraña ñerra'm esempo machayota sa'nerranet ñeñt sena'tetsa, ñeñtña parro yemuetyena allempoña ñetpa' e'ñe puellquëño'fet que'chpa'huerretcha' puerrar, amach arrenaye' enterreto. Ñeñtpa' attochña tore'terret allempo Yomporecop e'ñe po'ño'ch. Arrpa' allohua huañ ñeñt atet Jesús toma'ntata ña sena'tostsa.

¹⁶ Elloñapa' alla toma'ntaterraneterr ñeñt atet ye'chen judionesha' arr patsro, ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet ye'patse'chpa' ñeñtpa' e'ñech orrena yellteñ tarro'mar ñeñt emarr lletamuetspa' ñerra'm esempo yatsama'tam'pespa' chach chelama'ta chach martse'tatanña shetamtso'she'm. Ñeñtña yelltenpa' allo'nach sen rrrartse'tats nanac.

¹⁷ Jesúsñapa' alla toma'ntaterraneterr po'poñ ñeñt atet ye'chen judionesha' o'ch ye'chcatenet pa'rrom orrot. Ñeñto'marña atet otanet:

—Ama't puesheñarro'teyapa' amach yeshatstoña vinos emasa mellasha'mañ orroto ñeñt aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' chach a'ptsan orrot, vinosñapa' e'ñech shebhua, ñeñtña orrotpa' ama't mameshapa' amach es sherberro. Añña ñerra'm emasa vinos, arrcha'ña yeshe' emerra orroto ñeñt aye'chcataret pa'rrom. Allochñapa' ama'tcha' chasa' vinospa' amach cha potsa'psoña vinos, ñeñtpa' allach ye'chen epo'mar.

Ñeñtpa' attoña Jesúsapa' eñotatanet ña po'chapña e'ñe etserra.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeñt a'p'lla'nmue' pa'shtam

(Mr. 5.21-43; Lc. 8.40-56)

¹⁸ Allempo atet eñorena Jesúsapa' huapa ñaña puesheñarr ñeñt am'cha'tare'tetsa judioneshacop, concorposñañapa' atet otos:

—Nesñeñpa' e'ñe errte' rromuets. Tarraña ama't o' rromañpa' te'pa' o'ch po'cterren, ama't attapa' o'ch pa'p'lleña' p'oto'f attoch o'ch alla correrra.

¹⁹ E'ñe otue'pa' allempoñapa' allenta cota'ner Jesús epuet pueyochresha'.

† 9:14 Añ tore'teñetspa' añecop o'ch yetorra Yomporecop. Amach añecpayaye atomat, ñeñtpa' añecpa mameshacop o'ch ye'que'chpa' yerrar.

20 Allñapa' coṭa'nmanet ñaña puesheñarr coyanesha' ñeñt̃ atsna'tets. Charra' puechena epa char ñeñt̃ atto ḥocma yella'yena. Ñaña' allenta coṭa'nenan Jesús chenta' pa'che'ñoṭ, allñapa' a'ṗllerrñaña' pa'shtam pa'rrpe'moṭ.

21 Tarro'mar, ñapa' atet oten pueyoḥhro: "Ama't pa'shtama na'ṗlloñpa' ñeñt̃ach na'crraterre'."

22 Allempo atto a'ṗlla'huoñ pa'shtampa' Jesúsña allenta puetallerra pa'che'ñoneṭpa' entan coyanesha', ñeñt̃pa' atet och:

—Choña nesñeshacha' ṗocsherra tarro'mar atto atarr peyemtenna na, attoña te'pa' o' e'ñe na'crratnomueṗ.

Coyanesha'ñapa' allorocma correrra.

23 Jesúsña allempo ḥap añcha'taret pa'paclo allñapa' entosan ñeñt̃ penclla'tamṗesyene' arromñaṭ llequēñtsoreḥo, entosan ñaña shonte' acheñenesha' all puellquēñoṭet atarr ano'tatse'tyenet.

24 Jesúsñapa' atet otosan acheñenesha':

—Sahuanerra arroṭ, añ shopshesha'pa' amaca'ye ḥoye' rromueno, ḥaca'ye muen.

Ñetñapa' pachm̃are'teñoṭetpa' at̃a che'tatsetyesapet tarro'mar ñetpa' e'ñeca'ye eñoteñet ḥoca'ye rromuen.

25 Allempoña ḥa'nmaḥa'tatuosan ñeñt̃ shontetsa all, ñaña' be'tosos o'pono. Allempoña Jesús'pa' rromota'tosan shopsheshañ potot ñaña'pa' ḥepa'tcha' tanterrtsa.

26 Allempoñapa' e'mare'tuet errañaren anetso'mar Jesús'pa' o' tantaterran arromñaṭ.

Atto Jesús'pa' a'crraterran epsheña aporo'yēt

27 Ahuerrerr Jesús alloṭpa' coṭa'nem̃ ñaña epsheña aporo'yēt. Rranare'tneñet chenta' atet otneñet:

—Pemueraye'cherrya ñeñteṗ Davidna'tare.

28 Chap Jesús pocollopa' all be'tosos allña rromuera'ña ñaña aporo'yēt. Jesúsñapa' a'ṗto'tapanet:

—¿Seyemtennafe' napa' ahuaencaṭen at̃toṭcha' necuaterres?

Ñetñapa' atet otoset:

—Yeyemtenṗaca'ye, Ayochreshate.

29 Allempoñapa' allenta a'ṗllacle'chanetpa' atet otanet:

—Atto atarr seyemtennapa' attetepa'ch socop.

30 Allempocma e'ñe cohuen cohuerret. Jesúsñapa' atet otanet:

—Po'ñoḥ te'pa' o'ch notas: Amach esesha' sotaṗsa'tatsto, ama't e'ñe puesheñarra.

31 Elloña ñetñapa' ahuanmuet a'metare'tyeset Jesús. Errañaren allampaño'mar e'mare'tuet Jesús atet pena.

Atto Jesús'pa' a'crraterran ñaña ñeñt̃ opanatets

32 Allempo ahuen epsheña aporo'yēt allña Jesúseshopa' huapaterrñañeterr ñaña opan ñeñt̃ chorrena oneñeṭ.

33 Jesúsñapa' allenta queḥpatan oneñeṭ ñeñt̃ atto opanatateñ, opanñapa' allenta eñorerra. Acheñenesha'ñapa' cohuanrrorteñetpa' atet otyenet:

—Israelnesha'pa' ama't ahuaṭapa' ama puentarano ñeñt̃ atet pena te' Jesús.

34 Fariseonesha'ñapa' puesasare'teñoṭetpa' atet otyeset:

—Oneñeṭte' pompor ahuaencaṭ pene' at̃toṭ queḥpatenan oneñeṭeḥno acheñenesha'.

Atto Jesús'pa' atarr muerenana allohuen acheñenesha'

³⁵ Alloṭña'pa' asuahuanom Jesús allohuen anetso ama't ñaña all ama tama eñalle acheñ. All yečhatyesosanet puerahuo'mar. Serrpare'tatosanet ñeñt cohuen ñoñets atto ayochreshattena Yompor. A'crratyesosan ñeñt osyen pa'namen atsnañets ñaña ñeñt pa'namen atsotyenet.

³⁶ Allempo entosan shonte' acheñenesha'pa' ñaña'pa' nanac muerenanet. Tarro'mar e'ñe atet entenanet ñerra'mrrate' carrnero ñeñt ama acuañpsaretayaye; ñeñto'marña nanac allpatatarettenet tarro'mar ama eñalle ñeñtcha' ahuaencat penahuet.

³⁷ Ñeñto'marña atet otan pueyochresha':

—Shonte' narmets ñeñt nanac ellomire'tets ñeñtcha' a'yapačhetañ. Tarraña ataruasañña ñeñtcha' a'yapače'pa' ama atarr atonayayeto.

³⁸ Te'pa' añcha'ña sanamoñ pamo'mte' mueñanepa'ña ñeñtcha' a'yapačherrets pa'mro.

Ñeñt'pa' atet toma'ntatanet Jesús atto atarr shonte' acheñenesha' ñeñtcha' ame'ñerrtsañ tarraña ñeñtcha' ame'ñaterrahuetpa' ama atarr atonayayeto. Añcha'ña yanam Yompor ñeñt Yamo'mte' yepen mueñanepa'ña pa'taruasañer ñeñtcha' torra'yerrtsa ñocop allemeñ anetso'mar.

10

Allempo Jesús'pa' acran čharrasheña ñeñt puechetsa epsheña ñeñtcha' llesensa'

(Mr. 3.13-19; Lc. 6.12-16)

¹ Allempo čhapa'muen allempo Jesús agota'mueanan pueyochresha' čharrasheña ñeñt puechetsa epsheña. E'ñe apča'huet ñeshopa' ñaña'pa' apanet llesens attoch quečhpatyeset oneñeččno acheñenesha'. Ñaña llesensanet attoch a'crratyeset acheñenesha' ñeñt osyen allohuen pa'namen atsnañtsoččno ñaña ñeñt pa'namen atsotyenet.

² Ñehua, ñetpa' arro'tsa'yenet pa'so'chñeččno; allohuenetpa' čharrasheñet puechena epsheña ñeñt llesensa'. Ñeñt ñanom atarr sherbets ñeñt'pa' Simón ñeñtara sochetsa Pedro, alloṭpa' ñaña Andrés ñeñt e'ñe pa'mo'nasheñ; alloṭña'pa' ñaña Jacobo ñeñt Zebedeo puechemer epuet pa'mo'nasheñ Juan.

³ Alloṭña'pa' ñaña Felipe ñaña Bartolomé; alloṭña'pa' ñaña Tomás ñaña Mateo ñeñt cobraye't acheñenesha' quelle ñeñt gobiernocop; alloṭña'pa' Jacobo ñeñt Alfeo puechemer, alloṭpa' ñaña Tadeo.

⁴ Alloṭña'pa' ñaña Simón ñeñt cananistanesha' ñeñt nanac torratset pa'netsrecop, alloṭpa' ñaña Judas Iscariote ñeñtcha' pomuerre' tsapatonet Jesús.

Allempo Jesús'pa' llesensan pueyochresha' o'ch ahuanemyeset allcha' serrpare'tyeneta'

(Mr. 6.7-13; Lc. 9.1-6)

⁵ Ñeñtña čharrasheña puechena epsheña llesensanet attoch ahuanemyeset pa'namen anetso'mar, ñeñt'pa' atet otapanet:

—Amach arrenta setatsto all yeča'yena ñeñt ama judioneshayaye. Ñaña amach arrenta setatsto samario'marnesha' pa'netsro all yeča'yenet.

⁶ Arrcha'ña seta all yeča'yena israelena'tarnesha'. Ñetpa' e'ñe atet nentenanet ñerra'mrrate' carrneroččno ñeñt paya'tyetsa.

⁷ Allcha' soñemyespa' seserrpare'tatiesnomanetcha' atetcha' sotyensomanet: “Te'pa' o' čherr allempoch ayochreshattena Yompor ñeñt pue'ntaño'tsen.”

⁸ Ñaña alla oterranerr pueyochresha':

–Ñeñt atsna'tyetspa' sa'crratyeshnomanetcha', ñeñt rromayetspa' setanatyeshnomicha', ñeñt osyen puetsarñatspa' sa'crratyeshnomicha' attoch e'ñe cohuen entuerranet acheñenesha', sequechpatatyetscha' ñaña oneñeñechno ñeñt chorra'yenaya acheñenesha'. Sapa' e'ñe atta aparetes huomencñats atto es cohuen sorratyen Yomporecop, ñeñto'marña sapa'cho'ña e'ñech atta sapa'yesanet samña, amach secobratstaneto ñeñt atet o' sepa'yesanet.

⁹ Ñaña o'ch notas: Ñerra'm o'ch sahuamapa' ama't puetallarrapa' amach sesha'tatsetnomo quelle. Ama't orotlullen, ama't huallatlullen, ama't cobretlullen amach sesha'tatsetnome.

¹⁰ Ama't e'ñe coñe'ta amach es sanmatsto allcha' sechopeñe'chyes, ama't sebolsa, ama't e'ñe epma seshtam, ama't sesapata, ama't secarra, amach sanmatsche tarro'mar ñeñtescha' torra'yetsapa' e'ñe pocte' rratyeshapasetcha'.

¹¹ 'Ama't erra'tsena anetser ama't ñaña all ama tama eñalle acheñ ñerra'm erra sechapa'chpa' chochña ñanom sa'p'to'tyeshosonet erro'tsente' cohuen acheñpa' allcha'ña sechap. Allña'pa' allcha'ña sa'posa tarremphuach esempoch seserrerr ñaña allot.

¹² Ama't erra'tsena pocoller allcha' sechap, e'ñe sehuomicha'teñoñ o'ch senamatosanet Yompor pa'nateña.

¹³ Ñetña ñerra'm e'ñe cohuen acheñret, Yomporña'pa' a'natenanetcha'. Ñerra'm ama cohuenayaye acheñretpa' Yomporña'pa' o'ch alla apuerres sa pa'nateña.

¹⁴ Ñerra'm erra anetsro ñeñt allo'marnesha'ña ama cohuenaye' agapaseto tarro'mar ñetpa' amach mueneto o'ch e'mñotapaset ñeñt atet seserrpare'ten, sañapa' o'ch semterrerr ñaña allot. Ñerra'm allempo semterrerrña ñaña allot, ñeñtña setco'tsa'yen pañe'te' patspa' choch sepa'shetca'tyeshnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenaneoña Yompor.

¹⁵ Po'ñoçh te'pa' o'ch notas: Esemphuañen allempoch acraretetuerra allohuen acheñenesha'pa' añ anetso'marnesha' ñeñtcha' ama cohuenaye' sagapaye te', ñetña'pa' nanaccha' a'coñchatare'tterretña allempo. Ama't sodomo'marnesha' ñaña gomorro'marnesha' ñetpa' amach tama a'coñchatare'tterreto atet ñerra'm ñeñt anetso'marnesha' ñeñtcha' ama cohuenaye' sagapaye te'.

Allempo Jesús'pa' eñotatenan pueyochresha' choçmach eñall ñeñtcha' e'moñe'tahuet

¹⁶ Ñaña sapa' ñerra'm o'ch ahues te'pa' señoçcha' po'ñoçh choçmach eñall ñeñtcha' se'moñe'te' ama't sapa' amach cho erro't sepenaneto ñet. Ñeñto'marña notenes te'pa' o'ch nemñas e'ñech attes ñerra'mrrate' carrnero o'ch ahuo' allo'tsa'yen ma'yarroçhno. Ñeñto'marña sapa' seño'ta'tach atet ñerra'm shecheppa' atarr eñote'. Tarraña sapa' amach erro't apañso atet ñerra'm yeppa' ama erro't apañeyaye.

¹⁷ Ñeñto'marña notenes: Seño'ta'tach tarro'mar acheñenesha'pa' erro'tuanencha' perrset, sanmare'tterrach añcha'tare'tesho allcha' otteñe'cherrset. Nalle'tyerrsetcha' all judionesha' po'prahuo'mar.

¹⁸ Po'ñoçh e'ñe no'marpa' rremanaterrsetcha' attoch mueroçhtatyerrset, sanmare'tterrach añcha'tare'tesho ñaña allo'tsa'yen ñeñt nanac añcha'tare'techno allcha'ña sa'me'ta'yeshosnancha' neñoñ. Ñaña arrcha' sa'me'terrnan neñoñ allo'tsa'yen ñeñt ama judioneshayaye.

19 Ñaña allempoch sanmaretetyesapa' ama't mameshapa' amach cha sellca'psatsto, amach sotap'sa'tatsto: Errotuachca'ye notoste' añcha'taretsho ñerra'm o'ch a'p'to'tare'tapuen. Tarro'mar allempopa' Somporkha'ña Puecamquëñ se'notatyesose'ña all.

20 Attoña amach e'ñe sochaya se'ñora'yesoso, añcha'ña Somporkha'ña Puecamquëñ ñeñtcha'ña se'ñoratyese'.

21 'Allempoch atet perrsetpa' ñeñt e'ñe semo'nasheñ sepen ñato' ñeñtchca'ye sepomuerre' attoch muetsaterres tarro'mar ñapa' amaca'ye ame'ñenno. Amapa' ñato' pomporkha' o'ch pomuerran ñaña puechemer. Ama't ñaña puechemerpa' ñato' patparñotpa' o'paterranach pamo'mte' attoch muetsatater.

22 Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr muerochtaterrsetpa' tarraña esesha'ch e'ñe ahuanta'huanmue' e'ñe pueyemteñoñen na, ñeñtcha'ña a'queshpatarettertsa.

23 Ñerra'm esempo e'moñe'terrset ñeñt anetsro allo'tsenes o'ch seyetañpsanetpa' o'ch sahanma po'poñ anetso. Allpa'cho'ña ñerra'm attecma e'moñe'terrseterrpa' o'ch seyetañperraneterr o'ch sahanerrerr ñaña po'poñ anetso. E'ñe po'ño'ch notenes: Amach e'ñe sepa'huen' ora allohuen israelnesha' pa'netsropa' na Ñeñten Acheñetosets o'ch alla norrterra.

24 'Ñaña o'ch noterrset: Ñeñt yochreshatspa' ñerra'm e'moñe'teññañet po'maestror, e'ñech attecma e'moñe'terrñañet ñaña ñeñt pueyochreshachno pen. Ñaña ñeñt ñañretsoyets ñerra'm e'moñe'teññañet pamo'mte' e'ñech attecma e'moñe'terrñañet ñaña pueñañreshachno.

25 Ñeñt yochreshatsochnopa' e'ñepa'chña pocte' entyeñet o'ch atet a'paretterret atet ñerra'm po'maestror. Ñaña ñeñt ñañretsochnopa' e'ñepa'chña pocte' entyeñet ñaña o'ch atet a'paretterret atet ñerra'm pamo'mte'. Ñaña señoche'pa'ch ñerra'm na puesochatse'teñoñetan otentet napa' oneñe'fo' pomporen ñeñt otentet Beelzebú, sapa'cho'ña ellochña atarr sochatse'terrset. Ama't na ñeñten e'ñe samo'mte' sepenen atto atarr sochatse'tentet na, sapa'cho'ña ñeñtes nechemereshachno nepen, elloña sapa' atarrcha' nanac sochatse'terrset samña.

Atto amach yemcha'tatsto ñeñtcha' muetse' yechets, añcha'ña yemcha'na't Yompor

(Lc. 12.2-9)

26 'Ama't atteñpa' tarraña sapa' amach semcha'tatstaneto tarro'mar yapa' yeñoteñ allohuen ñeñt atto e'ñe a'nahua shecare'tyenet te', esempohuañenñapa' a'metamñpsaretterretcha'. Ama't allohuen ñeñt e'ñe a'nasotyenet te'pa' esempohuañenñapa' e'ñech eñotataretterret.

27 Ñeñto'marña ama't erra'tsena neserrpare'tatyenes te' e'ñe saptoche', esempoña sapa' e'ñech señotatuer ora allohuen acheñenesha'. Ama't erra'tsen ñeñt atet neserrpare'tatyenes te' e'ñe a'nahua o'pono pocollo, esempoña sapa' seserrpare'terrcha' allcha' e'ñe cohuen e'muerres allohuen acheñenesha' atet ñerra'mrate' enot seserrpare'ten shelleto.

28 Amach aña semcha'tatsto ñeñtcha' semtse'. Tarro'mar añach muetsonaset sechets, secamquëñña' amach errotent muetsonaseto. Añcha'ña semcha'na't Yompor tarro'mar ñerra'm ña muenatspa' e'ñe ña po'huanenco'pa' o'ch a'chencatonay ye'chets yecamquëñpa'cho'ña o'ch a'chencatonay coñcha'puetso all parraren tso'.

29-31 'Elloña te'pa' napa' o'ch notas: Chocmach seyemcha Yompor, po'ñoch ñapa' ñach secuamĩpene'. Ama't otetollesha'pa'cho'ña chocma cohuanĩpeñ. Ñehua, ama't yapa' yeñoteñ otetollpa' ama tama sherbeno. Ama't yepomatset epa otetollesha'pa' ñeñtpa' ama tsa'teyaye, e'ñe puetallarratolla centavo tsa'tena. Tarraña ama't atteñpa' ama't patrra otetoll amach rromo attoch shora'nom ñerra'm ama Sompomor muenataye atet. Ñeñto'marña notenes: Ama't mameshapa' amach sencha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a' nasotpahuo Jesucristo acheñesho'mar

(Lc. 12.8-9)

32 'Elloña napa' o'ch noterrser: Allohuen ama't erra'tsencha' ñeñtcha' ama na'nasotenaye acheñeneshesho, napa'cho'ña Ñeñten Acheñetosetspa' amach na'nasotueraneto naña Nomporecho all pue'ntaño.

33 Tarraña ñerra'm esesha' na'nasotenaya na arr patsro acheñeneshesho, napa'cho'ña na'nasoterranetcha' Nomporecho all pue'ntaño.

Atto Jesúsapa' orrtatosan e'ñe ño'mar elloptanna'teñets

(Lc. 12.51-53; 14.26-27)

34 'Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñenesha' arr patsro. Ñeñtpa' ama atteyaye. Añecpa'naña nohuapa allochñapa' e'ñe no'marpa' acheñenesha'ñapa' o'ch atta elloptanna'tyeset.

35-36 Ñehua, ñeñt noten te' ama't ñeñt e'ñe pamo'tsna'tarecmuet ñato' no'marach e'moñe'tannerret. Tarro'mar ñato' eñallcha' ñeñtcha' name'ñerraya, pamo'tseshetñapa' ñato' amach ame'ñerrneto. Ñeñto'marña notenes e'ñe no'marpa' ñato' puechemerpa' o'ch epatare'tenan pompor, ñaña ñato' puechyorpa' o'ch epatare'tenan pachor, ñaña ñato' ñeñtpa'to'ñen pen o'ch epatare'tenan ñaña pa'so'mue.

37 'Tarraña ñerra'm erra'tsencha' nemorrenterrayañ ñerra'm ñetña pompora atarr morrentenet ñamet pachoret ñeñtña acheñerpa' ama e'ñeye' pocte' nenteñe attoch neyochresha' neperranet. Ñaña po'potantañ ñeñtcha' nemorrenterrayañ ñetpa'cho'ña ñerra'm puechemera atarr morrentenetpa' ñaña po'sñet ñeñtpa'cho'ña acheñerpa' ama e'ñeye' pocte' nenteñe attoch e'ñe neyochresha' neperranet.

38 Tarro'mar ñerra'm erra'tsen ama e'ñeye' sehuanmaye ñeñt atet muenenet e'ñe ñocueta attoch coterrnet e'ñe poctacma, nañapa' amach pocte' nenteñe o'ch neyochresha' neperranet. Ñeñtpa' añ toma'ntena atet ñerra'mrrate' cho sechechen secorsoch alloch semueroçhta saña.

39 Tarraña ñerra'm esesha' e'ñe añ e'nenet o'ch correna atomat attoch e'ñe coshenet arr patsro, ñetñapa' a'chencatterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet nocop ñeñt atet muenenet ñeñt e'ñe ñocueta arr patsro ñeñtña acheñerpa' corretsach pocsheñeshocmañen e'ñe tayoteñ errponañohuen.

Ñeñtcha' apuerrey Yompor attoch atarr coshaterrey

(Mr. 9.41)

40 Jesúsapa' alla oterranerr pueyochresha':

–Ñerra'm o'ch sahanma, ñerra'm esesha'ch e'ñe cohuen sagapue' sa, ñetpa' na'naca'yeña aguënet e'ñe cohuen. Ñaña ñeñt e'ñe cohuen naguëne' na, ñetpa' Nompore'naca'yeña aguënet ñeñt nellsensene' na.

⁴¹ Ama't erra'tsena ñeñt e'ñe cohuen aguëne' ñeñt a'mtene' Yompor po'ñoñ tarro'mar ñapa' Yomporca'ye po'ñoñ a'mten, ñeñtña acheñer ñeñt e'ñe cohuen aguëne'pa' Yomporcha'ña apuerre' ñeñtcha' atarr coshaterre'. E'ñech attecma apuer ñeñt atet coshatenan ñeñt a'mtene' po'ñoñ. Ñaña ama't erra'tsena ñeñt e'ñe cohuen aguëne' ñeñt e'ñe pocte' es orrtatyets Yomporecop tarro'mar ñapa' Yomporecopca'ye e'ñe pocte' es orrtatyen, Yomporcha'ña apuerre' ñeñtcha' atarr coshaterre'. E'ñech attecma apuer ñeñt atet coshatenan ñeñt e'ñe pocte' es orrtatyets Yomporecop.

⁴² Ñaña añ ñeñt ama esoshe'maye' enteneto, erra'tsencha' apapue' ñeñtcha' orros tarro'mar ñapa' noca'ye neyochresha', ama't coñe'ta oñ apapet, napa' po'ñoñ o'ch notas, Yomporcha'ca'yeña apuerrahuetña ñeñtcha' atarr coshaterrahuet.

11

*Juan ñeñt apatañtase'tpa' mueñan pueyochresha' Jesúsesho
(Lc. 7.18-35)*

¹ Yeçhatuahuan Jesús pueyochresha' ñeñt çharrasheña ñeñt puechetsa epsheña atetcha' ña'yeset, allempoñapa' ahuo' ñaña Jesús allot yeçhatysets; serrpare'tatyesan acheñenesha' all pa'netsreto.

² Añña Juanpa' allo'tsena all yottampeñet. Allñaapa' o' e'mare'tan Cristo atet ña'yena, allenta mueñan pueyochresha' Jesúsesho.

³ Ñetña o' çhapuet allpa' atet otoset:

—Ñato' ñate'ña ñeñtep e'ñe po'ñoñ Cristotets ñeñt atarr yecuen ahuatoteñ o'ch huapa. Ñerra'm amate' ñeñteyaypepa' o'ch e'ñe potey allochñaapa' añcha' yecua' po'psheñeñ ñeñtcha' huapatsa ñeñt e'ñe Cristo.

⁴ Jesúsñaapa' anapanetpa' atet otapanet:

—Te'pa' o'ch ahuerres seserrpare'tatuercha' Juan ora allpon ñeñt atet sentyuesuennana' arr ñaña ora allpon ñeñt atet se'myuesuennana' arr.

⁵ O'ch e'ñe seserrpare'tatuer ora ama't atto aporo'yetechnopa' te'ñapa' o' e'ñe necuatyesuerranet ñaña ñeñt checa'repayetspa' te'pa' o' e'ñe chope'chyesuerret cohuen, ñaña ñeñt a'ptsaresyen leprapa' te'ñapa' o' e'ñe a'cohuentataretetuerret ñamet, ñaña ñeñt paquetneshachnopa' ama't ñetpa' te'ñapa' o' e'ñe e'myuesuerret cohuen, ama't ñaña ñeñt rromayets te'ñapa' o' alla atantataretetuerret, ñaña ama't ñeñt huocchañneshachno te'ñapa' o' e'ñe neserrpare'tatuerranet añ cohuen ñoñets alloch qeshperret ñamet.

⁶ Jesúsñaapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt atet notenes, atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshaterrahuet.

⁷ Allempoña Juan pueyochresha'pa' o' ahuanerret. Jesúsñaapa' alla serrpare'taterranerr acheñenesha' ñeñt atet pe't ahuaña Juan, ñeñtapa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ mōrr.

⁸ Ñaña amaca' añecpaye' sete'teña all o'ch senteña' ñeñt atarr coçhnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr coçhnesha'tetsa pa'shtam. Yapa' yeñoteñ arrña yentenña ñeñt atarr coçhnesha' chorra'yenaya shetamuets añcha'taretepahuo.

⁹ Sapa' añecopca'yeña sete'tña amayo o'ch senteña' all ñeñt' po'ñoçh a'mtene' Yompor po'ñoñ. Napa' o'ch notas: Juanpa' atto atarr sherbenan Yomporpa' ello metana'tuan allohuen ñeñt' atto a'mtenet Yompor po'ñoñ.

¹⁰ Tarro'mar Juanpa' ñocop eñose't Yompor ahuañ. Ñehua, allempopa' atet otne't na ñeñt' atet'cha' p'osa Juan nocop esempoch huapa, ñeñt'pa' atet anaret' ñoñets ahuañoteñ:

Papa' peñoche'pa'ch napa' o'ch nemñonañ puesheñarr ñeñt'cha' ñanom otatsa ñeñt'cha' pa'cohuentatyese' p'ocop allcha' p'oñmos.

¹¹ Ñeñto'marña na te'pa' e'ñe po'ñoçh atet notenes: Allohuen allpon acheñenesha' ñeñt' eñalletsa arr patsro ama't puesheñarra ama eñalleña ñeñt' atarr sherbets atet ñerra'mrrate' Juan ñeñt' apatyese' t' ahuaña acheñenesha' Yomporecop. Tarraña ñeñt' ama esoshe'maye' enteneto ama't mamesha, tarraña ñerra'm pueyochresha' peñ Yompor ñeñt' pue'ntaño'tsen atto te'pa' ayochreshaterra ña, ñeñt'ña acheñerpa' atarrca'ye sherben, ello metanenan atto atarr sherben Juan.

¹²⁻¹³ Tarro'mar añña ñoñets, Moisés po'ñoñ ñeñt' atet anaret' ñaña añ ñoñets ñeñt' quellca'yese't ñeñt' a'mta'yese't Yompor po'ñoñ, ñetpa' ñeñt'ña serrpare'tete't attoch atarr ayochreshaterra Yompor tarremphua allempo orrtosa Juan. Ñaña allempoteñ serrpare'tatosanet Juan ama't teme'ttsen e'ñe po'huamencocma serrpare'tatyese't atet penaña Yompor po'cohuenña attoch ayochreshaterra ña ñeñt' pue'ntaño'tsen. Ama't atsrre'mñañnesha'pa' e'ñe ñeñt'ña atarr muenet pueyoçhrocmañen.

¹⁴ Ñaña ñerra'm po'noçh same'ñyañcha' Juanpa' ñaca'yeña Elíasoterrets ñeñt' atarr secuen ñeñt'cha' sehuerroya.

¹⁵ Allohuenes ñeñtes ne'mñotene' neñoñ, çhaponasepa'chña seyoçhro ñeñt' atet notenes.

¹⁶⁻¹⁹ Jesúsñapa' atet otterrannerr acheñenesha':

—Ñehua, napa' o'ch neñotatas ñeñt' atet pena patantarr acheñenesha' ñeñt' yentyen te' ñeñt' ama't errotena ama acshatpoteneto. Ñeñt'pa' fariseonesha' atet petsa. Tarro'mar ama't allempo orrta Juan ñeñt' apatañtate't ñapa' amarrane'te ñeñt' yocrrañ yepen allohueney, ama orrane'te ñeñt'ecma yorren allohueney. Ñeñto'marña ñapa' çha sotyese't cho'te' chorreña oneñe't; ama't e'ñe mameshapa' ama pocteye' señche'te. Te'ñapa' o' norrterra ñaña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen ñaña atarro' arratsñañen ñaña atarro' orranñañen napa' año'chña e'ñe neyemuetyena ñeñt' atarr ochñañenesha' ñaña ashcarñañeçhno ñeñt' atarr cobra'yene' acheñenesha' quelle. Tarraña ama't atet sepennoñpa' Nomporna e'ñe eñotene' ñeñt' po'ñoçh atarr sherbets ñocop. Ñaña allohueney ñeñt'ey e'ñe puechemerasha' pohueney ñeñt'ey cotene' ña poctapña yapa'cho'ña e'ñe yeñotuenña ñeñt' po'ñoçh atarr sherbets. Ñeñto'marña yorrtatyehñañ ñeñt' cohuen enten ña. Sañapa' ama't e'ñe mameshapa' ama acshatpahuoyayso, e'ñe attes ñerra'mrrate' cheshanesha' ñeñt' çhocma po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetñapa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñeneta' atet oteñet po'potantañ pacmachoresha': “Yapa' ama't o' yerequerca'hua allo yocshame'tenapa' sañapa' amaña seshe'rarampenye; allotpa' ama't o' yepoctorare'tua ñeñt' ya'chpeñtsoreçh allo yelcanrrortena' sañapa' amaña sellcapretenyo.”

*Atto Jesúsapa' eños epo'mar anetsocop all ama ame'ñyeto
(Lc. 10.13-15)*

²⁰ Allempoña Jesúsapa' čha muene' che'ptare'tyenan acheñenesha' all pa'netsreto all epaye' entatyenanet po'partsoña ahuañmo'chofeñ. Ama't entatyenanetañ po'partsoña ñetñapa' ama es cotape'chenaye ello cohuen Yomporecop, ñeñto'marña allpa' čha muene' che'ptare'tyesanet. Ñeñtpa' atet otyesanet:

²¹ —Nanaccha' llequëntso'tsa'yenes coraziño'marneshacha', nanaccha' llequëntso'tsa'yenes samña betsaido'marneshacha'. Tarro'mar ama't atarr norrtatyennaseñ nepartsoña sesho, sañapa' amaña soctape'cherroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuatoteñte' cotape'cherretañ e'ñe cohuen Yomporecop. Ñetpa' attoch e'ñe orrtetañ čha llecatenanet po'chñaret, cotnashe'mach chorra'yesetañ, tsapñach epachshema'tyenetañ all anorrcha'tyenet puellquëñoťet.

²² Ñeñto'marña te'pa' notenes: Esemphuañen allempoch acrarretetuerra allohuen acheñenesha'pa' tiro'marnesha' ñaña sidóno'marnesha' ñetñapa' amach tama a'coñchatareťterretoña allempo. Coraziño'marneshacha' ñaña betsaido'marneshacha' saña allempopa' atarrcha' a'coñchatareťes.

²³ Ñaña sa capernaumo'marneshacha' čate' sotenapañ atto e'ñe cohuen sentyena sañeña, Yomporña'pa' allentach a'tapaterres pue'ntaño. Ñeñtpa' amachca'ye atteye' perrsoña Yompor, allachca'ye huapore'terres o'pono coñcha'puetso all parraren tso'. Tarro'mar ama't atarr norrtatonaseñ nepartsoña sesho, sañapa' amaña semnoña o'ch soctape'cherr cohuen Yomporecop. Ñerra'm arrcha' ñanom norrtatañ ahuatoteñ nepartsoña sodomo'marneshesho ñetpa' allorocmate' cotape'cherretañ cohuen Yomporecop. Allempopa' amate' a'poyatatareťterretañeña pa'netser. Orate' allo'tsenaraña.

²⁴ Ñeñto'marña te'pa' notenes: Esemphuañen allempoch acrarretetuerra allohuen acheñenesha'pa' sodomo'marnesha' ñetpa' amach tama a'coñchatareťterretoña allempo. Capernaumo'marneshacha' saña allempopa' atarrcha' a'coñchatareťes.

*Jesúsapa' atet oten, e'ñe same'ñeñoťen na, napa' na'huañamperrescha' ñeñť atarr amueročhtatañ sentyen
(Lc. 10.21-22)*

²⁵ Allempoña Jesúsapa' ma'yochenana Pompor, ñeñtpa' atet oten:

—Na Apacha' o'ch na'ye'chočhtatona'p, p'apa' p'a ñeñte'p atarr ayochreshattetsa pe'ntaño ama't ñaña arr patsro. Na'ye'chočhtatona'p tarro'mar ora añečno ñeñť pecohuenña pepen, ñeñtpa' ama arreye' pečhapateñe pueyočhro ñeñť atarr eñotañ entyetsa. Papa' aña pečhapaten pueyočhreto ñeñť ama eñotañeye' entyetso.

²⁶ Tarro'mar Apa e'ñe pemuereñoť ñeñtpa' atetña e'ñe pocte' penten p'a. Arrpa' allohua ñeñť atet ma'yochenana Pompor.

²⁷ Jesúsapa' alla oterranerr acheñenesha':

—Nomp por allohuen po'cohuenña e'ñe eñotatuenen. Na ñeñťen Puechemerenpa' ama po'ñoč eseshaye' neñotenaye, ñapñaña Nomp por e'ñe eñoten. Nomp porpa'čo'ña ama po'ñoč eseshaye' eñotenaye napñaña na ñeñťen Puechemeren e'ñe neñoteñ Nomp por, ñaña erra'tsencha' ñeñť e'ñe pocte' nenten na ñeñťen Puechemeren ñeñťña'pa' o'ch neñotater Nomp por.

28-30 Sehua'cha'ta nesho allohuenes ñeñtes nene' seyo'chro ñeñt atarr amuero'chtatañ sentyen. E'ñe same'ñeñoten na, napa' na'huañañperrescha' ñeñt atarr amuero'chtatañ sentyen. Napa' añcha'ña nenerrnas ñeñt amach'cha muero'chtaterrso; ñeñña sapa' e'ñech pocte' senteñ. Attochña sapa' señotenen napa' atarr nemuerensa ama atsrre'mo'chen entñoeno ama't e'ñe puesheñarrocpa. Ama't e'ñe mamesha ama añeye' ne'nen ñeñt e'ñe nocpa. Attochña e'ñe cohuen nocshatterres seyo'chro ama't e'ñe secamquëñohuen.

12

Allempo Jesús pueyochresha' taso'tam'pesyesnomuet trigo añe yetro allem-pocma amesen judionesha'

(Mr. 2.23-28; Lc. 6.1-5)

¹ Allempoña cherrerr pam'tarr allempo chocma amesen judionesha'. Allempoña Jesús'pa' arr oñem chetso'mar epuet pueyochresha'chno. Allempo oñenet pueyochresha'ñapa' e'ñe pa'chporrño'etpa' taso'tam'pesyesnomuet puechm'a'tets trigo o' rra'yeshomet.

² Fariseonesha'ña ñeñt entahuet atet pa'nmu'etpa' ñetñapa' allenta otyeset Jesús:

—Pecue'ñaca'yeña añ peyochresha' taso'tam'pesyesnomuet trigo; atet penet ñeñt ama pocteyaye o'ch atet ye'pa taruasats añe yetro tarro'mar te'pa' añe yetro ñeñt atet anaret ahuatoteñ allem'pocmach yamesen.

³ Jesús'ñapa' atet otanet:

—Sapa' ama'trra selleyareña ñeñt atet pa' ahua't David allem'po cheporra'nma epuet ñaña allohuen ñeñt cotene'.

⁴ Ña allem'popa' be'tosos Yompor pa'paclo allñapa' rrosan pan ñeñt atma'ntataret atet ñerra'mrrate' ñeñt nenet all Partsocop. Ñehua, ñeñt panpa' ama pocteyayñe o'ch rros David ñaña ñeñt epuet. Ñeñt'pa' añach ñapue't rrene' cornaneshachno; ñeñt'pa' atet anuaret judioneshacop.

⁵ Ñaña ama't selleyareña ñoñets ñeñt atet anaret ñeñt Moisés po'ñoñ all oten atet pena ñaña cornaneshach' Parets pa'paclo. Ñehua, ñet puesherbeño'etpa' ama ameseneto añe yetro allem'pocma yamesen. Ñetpa' ama't atet penetpa' Yomporñapa' e'ñe pocte' entenanet.

⁶ Napa' o'ch notas: Napa' ñeñten arro'tsenen nanac neshherben ello nem'taneñ ñeñt atet sherben Parets pa'paquëll.

⁷ Ñehua, añ ñoñetspa' ñeñña atet ote't Yompor ahua't: “Napa' ama e'ñe añe cohuen nenteno o'ch sapu'enen sayara ñeñt semtsen nocop. Añe'ñaña atarr cohuen nenten o'ch semuereña allohuen samo'tsesha'.” Ñerra'm cho'chennasañ seyo'chro ñeñt atet oteney Yompor, amach errot sotatscheña ama't erra'tsena acheñer ñeñt e'ñe pocte' enten Yompor.

⁸ Ñeñto'marña te'pa' o'ch notas, na Ñeñten Acheñetosets ñeñten allsen-sareten, naca'yeña atet otets este' poctetsaña ñeñt'cha' atet ye'pa añe yetro allem'pocma yamesen.

Allempo Jesús'pa' a'crraterran ñeñt chelletsap'ot

(Mr. 3.1-6; Lc. 6.6-11)

⁹ Metuerrerr Jesús allo'tpa' be'tosuerrerr judionesha' po'prahuo.

¹⁰ Allñapa' allo'tsen puesheñarr yacma ñeñt'cha' chellena pot. Fariseonesha'ñapa' allenta a'p'to'chet:

—Añe yetro allem'pocma yamesenpa' ta'm ¿pocte'te' penteñ o'ch pa'crrateñer acheñ?

Tarro'mar atet a'p̄to'teñet allochñapa' esheccha' otteñe'chet.

¹¹ Ñaña'pa' atet otanet:

—Sapa' ñerra'm cho shora'nen ama't puemocarra secarrneror aña yetro allempocma yamesen, ama'tcha'ña allenta sechtere ama't ñeñte yetro allempo yamesen allohueny.

¹² Ñehua, acheñpa' ellocaye metanenanña ñeñt atto sherben carrnero. Ñeñto'marña napa' notenes e'ñe pocte' o'ch atet ye'pa ñeñt cohuentetsa ama't aña yetro allempocma yamesen.

¹³ Allempoña Jesús'pa' atet otan yacma ñeñt chelletsa pot:

—Te'pa' o'ch nota'p̄ petapuerr p̄ot.

E'ñe otue'pa' ñaña'pa' allentepa'tcha' tapuerran pot, e'ñe allorocma cohuenterra pot e'ñe attecmaterr ñerra'm po'pshemñtañot pot.

¹⁴ Fariseonesha'ña cha'nmaçherretpa' cotape'chatanna'tyesnerret, atarr o'pateñet Jesús attoch muetsatachet.

Atet ote't Yompor ahuat Jesúsocop

¹⁵ Jesús'ña eñotanetpa' ahuer allot. Shonte' acheñenesha'chno co'a'huanereter. Allohuen ñeñt atsna'tyetspa' e'ñe a'crratyesuerranet.

¹⁶ Atet otyesamet:

—Po'ño'ch amach esesha' sota'psa'tatsto napa' na ñeñten Yompor Puechemeren.

¹⁷ Ñehua, ñeñtpa' atet pa' allochñapa' attoch etsota Isaías po'ñoñ ñeñt a'mtaye't Yompor po'ñoñ, ñeñtpa' atet ote't Yompor Puechemerecop ñeñtcha' Cristoterrets:

¹⁸ Añmapa' ñeñtcha' atarr torrerrtsa nocop, ñapa' ñeñt nenen ñeñtcha' atarr sherberrets. Ñapa' ñeñt atarr nemorrentena ñeñt e'ñe nocshatene'. Ñapa' ñach ahua'ncat neperr necamquēñot, ñach eñotaterre' allohuen pa'namen acheñenesha' ama't ñeñt ama judioneshayaye. Añcha' eñotateranet ñeñt e'ñe cohuen ñoñets attochña e'ñe pocte' nentueranet.

¹⁹ Ñapa' amach es otnare'tyerraneto ama't mameshapa' amach ama'tochetyerro. Ama't mameshapa' amach che'chame'tyerraneto ama't allecma chopeñe'chyen acheñenesha'.

²⁰ Ama't ñeñt muero'chetyetsapa' ñapa' e'ñech muererranet. Ñeñtpa' atetcha' netma'ntacha ñerra'mrate' ama't puecharra cho'ne'ch tsopa'ne'pa' ñaña'pa' amach cha a'meyatere. Ñaña ñerra'm lampareñ cha muene' mayen ñeñtpa'cho'ña amach emayatere. Ñapa' amach cha es añcha'nochtana'tyerro, tarraña esempohuañenpa' e'ñech atta a'mchechatuerran ora allohuen ñeñt ama pocteye' enteno Yompor.

²¹ Ñeñto'marña allohuen pa'namen acheñenesha'chno ñachña e'ñe yemuetuerret. Arrpa' allohua huañ atet ote't Yompor ñeñt quellquē't Isaías.

Atto puesheña'tets oteñet Jesús ñapa' oneñe'to' po'huamencot quechpatenanña po'potantañ oneñe'te'chno acheñenesha'

(Mr. 3.19-30; Lc. 11.14-23; 12.10)

²² Jesús'pa' alla huapaterrñañeterr puesheñarr yacma ñeñt aporo'yet ñeñt chorrena oneñe't cha opanatateñ. Jesús'ña'pa' a'crrata'p̄, ñeñtña opanerpa' o' alla eñorerra, ñaña o' e'ñe cohuen cohuer.

²³ Allohuenña acheñenesha'pa' atarr cohuanrrorteñet, ñetñapa' atet otyeset:

—Ñato' aña'ca'yena David po'mñreneñ ñeñtcha' Cristotosets.

²⁴ Fariseonesha'ña allempo e'mare'chetpa' ñetñapa' atet otyeset:

—Atto quechpatatyenan oneñeñechno acheñenesha' añaca'ye ahuamencat pene' Beelzebú ñeñt' pompor pen allohuen oneñeñechno.

²⁵ Jesúsñapa' eñotanet ñeñt' atet cotape'chatse'tyenet pueyoçhreto ñocop ñeñt' atto otyeñet ñapa' oneñeta pompor po'huamencoť quechpatatenan oneñeñechno acheñenesha'. Ñeñto'marña ñapa' atet otanet:

—Ñerra'm puesheñarr añcha'tareť elloptannena pa'cheñer e'ñe ñagattsetpa' e'ñech poctacma a'cclatanna'tuerret. Attecmach ðannerra ñeñt' parro yeçhetsa paterr anetso, ñerra'm çho elloptannenet e'ñe ñagattsetpa' ñeñt'ña atto huomencatenetpa' ñeñt'pa'çho'ña çhachca'ye huañerrets. Attecmach ðannerra ama't ñeñt' e'ñe pamo'tsna'tarecmuet ñerra'm elloptannerret e'ñe ñagattsetpa' ñeñt'ña atto huomencatenetpa' ñeñt'pa'çho'ña çhachca'ye huañerrets.

²⁶ Attecmach ðanna'ta ñaña oneñeť pueyochresha'chno ñerra'm oneñeñechno e'moñe'tannenet, ñerra'm huapore'tannenet e'ñe ñagattseta amach errotenoť allo'na atarr huomencatneneto. Po'ñoçh oneñeťpa' amaca'ye huapore'tanneno.

²⁷ Sapa' atet sotenen napa' Beelzebo' po'huamencoť nequechpateññañ e'ñe ña pueyochresha', ñehua, te'pa' o'ch notas: Ñeñt' seyochresha' sepen sa ñeñt' eñotene' ñamet o'ch quechpatachet oneñeñechno acheñenesha', ñetpa'çho'ña amaña Beelzebú po'huamencoťeye' quechpateñetoña oneñeñechno acheñenesha'. Ñetpa'çho'ña Yomporoña po'huamencoť quechpateñetña oneñeť. Ñeñt'ña o' eñotatas ñeñt' atet sotenoñ ñeñt'pa' amaca'ye po'ñoçh atteyaye.

²⁸ Po'ñoçhca'ye Yompor e'ñe Puecamquẽnoť ñeñt'ña ahuamencat nepene' attot nequechpateñña oneñeñechno acheñenesha', ñeñt'cha'ña señotate' te'pa' o' neçhapatonas Yompor po'cohuenña ñeñt' atto po'ñoçh atarr ayochresha'ttena ña.

²⁹ Ñehua, yapa' yeñoteñ ñeñt' atarr ahuamencattetsa atto atarr ahuamencattena oneñeť, ñaña'apa' e'ñe po'huamencoť cohuañpesyenan allohuen e'ñe cohuen ñeñt' pa'paquẽll ða'yen. Tarraña ñerra'm esempo o'ch huapoña ñeñt' atarr ahuamencatesha' ñeñt'cha' metanose'ña po'huamenc atet ñerra'm na Nompör, ñeñt'cha'ña rromose' o'ch huancos, allochñapa' o'ch be'tosos all ñeñt' pa'paquẽll ða'yen o'ch e'ñe puerratamþsos ñeñt' allpon o'patyena ña.

³⁰ Ñeñto'marña te'pa' o'ch notas allohuenes: Ñerra'm eseshas ñeñtes ama netorrapretenaye ñeñt'ña acheñerpa' çhaca'ye epatare'tennan ñeñt' atet netorra'yena na. Ñeñt'pa' o'ch netma'ntatasa atet: Ñerra'm esesha' ama na'yapaçhapretenaye ñeñt' na'yapaçhen na, ñeñt'ña'pa' çha a'parratse'tamþnenen a'yeneť.

³¹ Ñeñto'marña te'pa' o'ch notas: Allohuen pa'namen sosya'tsañechno ñeñt' ama pocteye' enteno Yompor ama't ñaña achmãare'tanna'teñets ñeñt'pa' aþretna'po' nenteñ.

³² Ñaña ñerra'm esesha' nesasene' na Ñeñten Acheñetosets ñeñt'pa' aþretna'po' nenteñ. Tarraña ñerra'm esesha' añ achmãare'teññañet Parets Puecamquẽñ ñeñt'ña'apa' amaca'ye aþretna'pahuoye' nenteñe. Ñeñt'pa' amach aþretna'pahuoterro e'ñe tayoteñ errponohuañen.

Allohuen acheñ ñeñt' e'ñe po'ñoçh cohuen acheñer, ñetñapa' añcha' orrtatyenet ñeñt' e'ñe cohuenare'
(Lc. 6.43-45)

33 'Ñehua, yeñoteñ allohuen acheñ ñeñ e'ñe po'ñoçh cohuen acheñer, ñetcha'ña orrtatenet ñeñ e'ñe cohuenare'. Tarraña po'potantañ acheñenesha' ñeñ po'ñoçh ama cohuenayaye ñetña'pa' añach orrtatenet ñeñ ama cohuenayaye. Ñeñpa' atetcha' netma'ntaterra: Ora allohuen ñeñ e'ñe cohuen narmetsoch pue'merpa'cho'ña e'ñech cohuenare'. Añña po'pchañ narmetsoch ñeñ ama cohuenayayepa' pue'merpa'cho'ña amach e'ñe cohuenayaye. Ñeñto'marña attoña yeñoteñ erra'tsente' ñeñ e'ñe cohuenare' narmetsoch ñaña ñeñ ama cohuenayaye narmetsoch, pue'merotña e'ñe yechme'tenanet.

34-35 Sapa' ama cohuenayayso. Cha sottena ñerra'm shechpa e'ñe sompor sepen allohuenes. Ñeñto'marña amach errotenot señoso cohuen tarro'mar sapa' po'ñoçhpa' ama cohuenayayso. E'ñe atet atarr soctape'chatse'tyen seyoçhro ñeñ ama cohuenayaye, attotca'yeña señosatse'tyen. Ama't erra'tsena acheñer ñeñ e'ñe po'ñoçh cohuen ñapa' añcha'ña orrtatyen ñeñ e'ñe cohuenare' cotape'chen pueyoçhro tarro'mar pueyoçhroña all cotape'chenan shonte' ñeñ e'ñe cohuentetsa. Tarraña po'poñ acheñer ñeñ po'ñoçh ama cohuenayaye, ñapa'cho'ña añach orrtatyen ñeñ atet cotape'chen pueyoçhro ñeñ ama cohuenayaye tarro'mar pueyoçhroña all cotape'chenan shonte' pa'namen sosya'tsañ. Tarro'mar ñerra'm shonte' yocape'chen yeyoçhro ñeñ cohuentetsa, ñeñpa' e'ñech ñeña cohuen yeserrpare'ten. Tarraña ñerra'm shonte' yocape'chen ñaña yeyoçhro ñeñ ama cohuenayayepa' ñeñpa'cho'ña e'ñech ñeña yemnen o'ch yeserrpare'tyen.

36 Po'ñoçh napa' o'ch alla noterrser, esempohuañen allempoch acrare'tetuerra allohuen acheñenesha'pa' allohuen ñoñets ñeñ atta otatse'tyen acheñenesha' ñeñña'pa' a'metatatyeretcha'.

37 Tarro'mar ñerra'm e'ñe cohuenare' seserrpare'tyen te' Yomporña'pa' e'ñech pocte' entuerrnas señoñ allempo. Tarraña te'pa' ñerra'm cha señosatse'tyen ñeñña señoñerpa' ñeñfachña secoñchaterre' allempo.

Atto Jesús'pa' otan acheñenesha' ñeñ ama cohuenaye' cotape'chetso ñetña'pa' çhocma e'nenet partsoteñets
(Mr. 8.12; Lc. 11.29-32)

38 Allempoña allponsheña ñeñ atarr etsotayenayeñ ñoñets ñeñ atet anaret epuet ñaña allpon fariseonesha' ñetña e'ñe puehquẽñoçhpa' atet ochet Jesús:

—Yapa' Maestrocha' yemneñ o'ch porrtatonay pepartsoña ñeñcha' yeñotate' papa' po'ñoçhte' Parets Puechemerep ñeñte' Cristotosets.

39 Ñaña'pa' atet otanet:

—Acheñenesha' ñeñ corra'yetsa te' ñetña'pa' ama cohuenaye' cotape'chyeneto, ama aye' cosheneto Yompor ñeñto'marña ñetpa' e'ñe orrena otannet ahuo'ch norrtatanet nepartsoña. Tarraña amach es norrtataneto. Napa' añach paterr neñotatanet atet eñotatane't Jonás ahua't nínivo'marnesha' allempo a'mítane't Yompor po'ñoñ.

40 Ñehua, yeñoteñ Jonás allempo'pa' allo'tsena cacacotmo ma'pamuet, yeto ama't ñaña tsapo ñeñ añecmuen cac. Atetcha' neperra ñaña Ñeñten Acheñetosets, napa'cho'ña nema'pamuetcha' o'pono e'ñe allohuanen patso, yeto ama't ñaña tsapo. Ñeñcha'ña eñotaterrahuet atet penaña ñeñ huetsa Yomporshot.

41 Tarro'mar ahua't allempo serrpare'tatane't Jonás nínivo'marnesha', ñetña'pa' allempocma cotape'cherret e'ñe cohuen Yomporcop. Te'ña arr

seshopa' allo'tsenen na ñeñten ello metanene' ñeñt atet serrpare'tate't Jonás. Tarraña saña'p' amaña soctape'chenoña ello cohuen Yomporecop. Ñeñto'marña esempohuañen allempoch acrare'tetuerra allohuen acheñenesha' ñeñtña nínivo'marnesha' ñeñt e'ñe cohuen co'tape'cherrets Yomporecop ahuat, ñetpa'cho'ña orrterretcha', ñeñtcha'ña seño'taterre'ña sapa' ama't mameshapa' ama pocteyayeña ñeñt atet se'pa'yese't tarro'mar ama soctape'cherro ello cohuen Yomporecop.

⁴² Ñaña te'pa' o'ch neyerpatasa ñeñt atet pa ahuat puesheñarr coyanesha' ñeñt amcha'tarettatset atarr bachayo allohuanen pats sa'ponet. Ñeñtña coyanesha'pa' alloteñ on o'ch e'mñotenana' Salomón pueserrpareñ ñeñt atet atarr eñotañte't. Te'ña arr e'ñe seshopa' allo'tsenen ñeñten puesheñarrana ñeñten atarr es neñoten naña, ello nemtaneñ atto eñotañte't Salomón. Tarraña saña'p' amaña es sotapoteno. Ñeñto'mar esempohuañen allempoch acrare'tetuerra allohuen acheñenesha', ñeñtña coyanesha' ñeñt e'ñe cohuen e'mñotatset ñapa'cho'ña orrterrach, ñeñtcha'ña seño'taterre' sapa' ama pocteyayeña ñeñt atet se'pa'yese't tarro'mar sapa' ama es same'ñe'te ama't e'ñe mamesha.

Atto Jesús'pa' eñotatanet ñato' oneñetpa' o'ch alla chorrerranerr acheñ allot cha'nom ahuaña
(Lc. 11.24-26)

⁴³⁻⁴⁵ Ellonetpa' o'ch alla neñotaterrser po'poñone't ñeñtcha' atet a'pare'tterra acheñenesha' ñeñt te'pa' ama e'ñeye' cohuen co'tape'cheneto Yomporecop. Ñehua, oneñet ñerra'm esempo cha'nom acheñeneshesho't, ñeñtña oneñetpa' o'ch auyes erraparen ama't amayo'mar e'nyese' po'psheñeñ allcha' ye'cherrerr allcha' e'ñe amesurrerr cohuen. Tarraña ñerra'm amach erra eñchepa' atteñapa' o'ch ot: "Napa' o'ch alla ahuerren nepaclo allot ne'cha'nom ahuaña." Atetcha'cho' pa. O'ch alla ahuer allot cha'nom ahuaña. Allña o'ch cherrpa' e'ñech cohuen entuerran pa'paquell, e'ñech cohuen atarrapo'tuaret, e'ñech cohuen añño'tyesaret, tarraña amach eseshaye' ye'chetso all. Allemponapa' o'ch alla ahuer allot'sa'yen pamo'tsesha'pa' o'ch enana' po'poñ cancherrsheña oneñete'chno ñeñt nanac sosyare', ñeñt ello metana'tuene' ñeñt atet sosyaten ñeñt hua'ñene' o'ch ye'chaprecha. Allohuenetpa' o'ch chorreñet ñeñt acheñer. Allempona tsapatonetpa' allo'nach sen ñeñt acheñer sosyatnomuets huomenc. Elloch metanerran ñeñt atet patsetyese't ñenma't. Po'ño'chcha'ca'ye atet perraña acheñenesha' ñeñt te'pa' ama e'ñeye' cohuen co'tape'cheneto Yomporecop.

Allempo huapona Jesús pachor ñaña pa'mo' nasheñnesha'
(Mr. 3.31-35; Lc. 8.19-21)

⁴⁶ Allempo atet eñorana'tenana acheñenesha'pa' o' huapa Jesús pachor epuet ñaña pa'mo' nasheñnesha'. O' chapuet allpa' ñetñapa' alla tom'chenet a'yo't. Añ muenenet ahua'ch serrpare'tatoset.

⁴⁷ Allempona puesheñarrpa' atet otan Jesús:

—O'ca'ye huapaña pachor ñaña pemo' nasheñnesha'. Ñetpa' a'yo'te'tsa'yenet, mueneñet o'ch serrpare'tatospet.

⁴⁸ Ñaña'pa' atet otan ñeñt otene':

—¿Ama't seño'teñe ñeñt e'ñe po'ño'ch nachor nepen ñaña ñeñt e'ñe po'ño'ch nemo' nasheñ nepen?

⁴⁹ Allemponapa' yochan pueyochresha'pa' atet otanet:

—Napa' añca'yeña ñeñt e'ñe po'ño'ch nachor nepen ñaña ñeñt e'ñe po'ño'ch nemo' nasheñnesha' nepen.

⁵⁰ Ñehua, ama't erra'tsena ñeñtcha' e'ñe atet p̄ohuene' ñeñt atet muenen Nomp̄or ñeñt pue'ntaño'tsen ñeñtca'yeña e'ñe po'ñoçh nemo'nasheñ nepen ñeñtña noçh nepen ñeñtña nachor nepen.

13

All toma'ntatanet Jesús ñeñt a'parre'tene' puerets

(Mr. 4.1-9; Lc. 8.4-8)

¹ Ñeñte yetropa' cha'nerrerr Jesús pocollotpa' anorruerr sa'patopño.

² Allña'pa' emchorra'huererr shonte' acheñenesha' ñeñto'marña Jesús'pa' a'tap noñtopa' ahuañpes mame' allpononet allña'pa' anorros noñto. Acheñenesha'ña allohuenetpa' alla tomcha'tet sa'patopño.

³ Allña'pa' esocmañen yeçhatyenan acheñenesha' pa'namen toma'nteñtsoçhno. Ñeñt ñanompa' atet otanet:

—Ñeñtña a'parrene' puerets ñaña'pa' ahuo' allcha' a'parre'tyenana' puepuer.

⁴ All a'parre'tyeñ patanta'tetsña'pa' alla çhapyes toño'mar. Allña'pa' huaçha'tyesa o't e'ñe añyallmechuenana' puerets.

⁵ Po'poñeçhnoña'pa' alla çhapyes mapuetro'meso'mar all ama tama eñalle pats. Ama nanac o'pono'tseno patso ñeñto'marña mametollapa' chepare-suañ.

⁶ O'ña enome'ta'muen atsrretpa' alla a'uyatuer. Ama erçha'tena' ñeñto'marña alla hueya'huerra.

⁷ Po'potantaña' puerets'pa' alla çhapyes allcha' chepares aj. Allpa'çho' mameshapa' cheparesuaña'p añña'pa' mameshapa' atesha'tua alla ca'matuerranña narmets alla a'cllatuer.

⁸ Po'potantañeçhno ñeñtña'pa' arr çhapyes all e'ñe cohuen patso. Ñeñtña'pa' e'ñe cohuen chepares. Allempoña atesha'tuapa' ñeñtña'pa' atarr aton ellomre'tyes—puecha'tetspa' çharroch çharra' pue'llomer, po'pchañeçhnopa' pechapoch çharra' pue'llomer, po'pchañeçhnopa' ma'poch çharra' pue'llomer.

⁹ Allempoña Jesús'pa' alla oterraneterr:

—Ñeñtes po'ñoçh ne'mñotene', çhaponasepa'ch seyoçhro ñeñt atet netma'ntatensa añ ñoñets.

Atet otanet Jesús ñeñtecop atet toma'ntatyenanet

(Mr. 4.10-12; Lc. 8.9-10)

¹⁰ Allempoña'pa' ponemña pueyochresha'pa' atet otoset:

—¿Eso'mare'tña peserrpare'teño'pa' atta es petma'ntatyenanet?

¹¹ Jesús'ña'pa' atet oterraneterr:

—Sa te'pa' Yomporña o' muenaterres attoch seño'terr ñeñt ama eñotpahuoyaye ama't ahuatoteñ ñeñt atet penaña Yompor po'cohuenña atto ayochreshatena ña pue'ntaño't. Tarraña po'potantañeçhnoña'pa' ñeñt atta es puecha'yetsa, ñocpuetña'pa' amach erro'teno't eñoterrñañeto Yompor po'cohuenña.

¹² Esha'te' o' çherranet pueyoçhreto ama't e'ñe allpona Yompor po'ñoñ elloña Yompor'pa' allo'nach eñotatnenanet nanac shonte'. Tarraña esha'ña ñerra'm ama çhenaneto pueyoçhro tarro'mar ñetpa' ama po'ñoçhaye' aguëññañeto Yompor po'ñoñ, ama't allpon eñotyenetañ pueyoçhro ñeñtña'pa' çhach puerratañperranet Yompor.

¹³ Ñeñto'marña ama't neserrpare'tatenanet toma'nteñtso, ñocpuetña'pa' ama eñoteñetoña ñeñt atet netma'ntatenanet. Attoña ama't enteñetañ, ñetña'pa' ama amnataretteneto o'ch es çhapahuet pueyoçhreto. Ama't

e'mueñetañ amaña çhenanetoña pueyoçhreto ñeñt atet yeçhateney Yompor po'cohuenña.

¹⁴ Atet penet ñetpa' te'ñapa' po'ñoçh o' etsotua Isaías po'ñoñ ñeñt a'mtaye't Yompor po'ñoñ ahuat. Ñeñtpa' atet ote't Yompor:

Ama'tcha' po'ñoçh e'mueñetañ ama't e'ñe ahuatapa' amach çhapanetoña pueyoçhreto. Ñaña ama'tcha' cho e'ñe es entenetaña' amach çhapanetoña pueyoçhreto.

¹⁵ Tarro'mar ñeñt acheñenesha' te'ña ñet pueyoçhretopa' nanac echarrtenet attochña amach es çhenahueto pueyoçhreto. Te'ña ñetpa' amach mueneñeto o'ch es e'mñotet taye'to'te' es çhenahuet pueyoçhreto. Te'ñapa' amach mueneñeto o'ch es entet taye'to'te' çherranet pueyoçhreto. Attochña amach es cotape'cherreto nocop ama't e'ñe mamesha attochña na'queshpatteranetañ.

¹⁶ Allempoña Jesús'pa' alla oterranerr pueyochresha':

—Saña po'ñoçhpa' atarr cosheñtso'tsenes sa tarro'mar atto o' senterrñañ Yompor po'cohuenña secloyot te'ñapa' o' e'ñe çherrnasa seyoçhro. Ñaña atto se'muerrñañ Yompor po'ñoñ, te'ñapa' o' e'ñe çherrnasa seyoçhro.

¹⁷ Po'ñoçhca'ye notenes e'ñe ahuatoteña' shonte' ñeñt a'mta'yesaye't Yompor po'ñoñ ama't ñaña ñeñt e'ñe pocte' es pa'yestse't allempo, ñetñapa' atarr muenetañe't o'ch enterrñañetañ Yompor po'cohuenña ñeñt o' senter sa te'. Tarraña allempo ñetpa' amaña eseshaye'ña enterrapaye Yompor po'cohuenña. Ama't atarr muenetañe't o'ch e'mñoterrñañet Yompor po'ñoñ ñeñt o' se'muerr sa te'. Tarraña allempo ñetpa' amaña eseshaye'ña e'muerrapayeña Yompor po'ñoñ.

Arrpa' all eñotatanet Jesús ñeñt toma'ntatenanet ñeñt a'parre'tene' puerets (Mr. 4.13-20; Lc. 8.11-15)

¹⁸ Jesús'ña'pa' alla oterranerr pueyochresha':

—Ñeñto'marña te' sapa' se'mñoten o'ch neñotatas ñeñt atet yeçhateney ñeñt atet o' netma'ntatua atet ñerra'mrrate' puesheñarr ñeñt a'parrene' puerets.

¹⁹ Ñehua, añ puerets ñeñt çhapyesets toño'mar, ñeñtpa' añ notenes acheñenesha' ñeñt e'mñotenayen Yompor po'ñoñ ñeñt atto ayochreshattena ña. Ama't e'mñotenetañ tarraña ama çhenaneto pueyoçhreto ñeñt po'ñoçh atet oteney Yompor. Ñeñto'mar allorocmach huapa oneñetpa' o'ch alla puerratanperranet Yompor po'ñoñ e'ñe pueyoçhreto't.

²⁰⁻²¹ Ñaña ñeñt çhapyesets mapuetro'meso'mar ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech allorocma pocsheñesha' aguëññañetañ Yompor po'ñoñ. E'ñech cohuen ame'ñeretañ tarraña ñeñtpa' mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt chepuets mapyo amach eñalle puereçh. Tsapatoneña ñerra'm o'ch huapanet topateñets ñeñtcha' mueroçhtatahuet tarro'mar ñetpa' o' ame'ñeretañ Yompor po'ñoñ, ñetñapa' allorocmach alla queçhpuerretña Yompor po'ñoñ.

²² Ñaña puerets ñeñt çhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñotenayen Yompor po'ñoñ. Ama'tcha' çhapanetañ pueyoçhreto, tarraña ñetpa' allo'nach senet e'ñech aña atarr cotape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es eçhyenet, tarraña ñeñtpa' çhaca'ye shequënanet. Attoña ñetpa' amach erro'tenot orrtatyesñañetoña ñeñt e'ñe cohuen enten Yompor.

Ñetpa' e'ñe atteta ñerra'm narmets ñeñt' cha a'cllaten ajma' ñeñto'marña amach errotenot me'teneto o'ch ellomre'tyeset.

²³ Ñaña añ puerets ñeñt' chapyesets e'ñe cohuen patso ñeñt' e'ñe cohuen cheparsatspa' ñeñt'ña toma'ntenaya po'potantañ acheñenesha' ñeñt' e'mñotene' Yompor po'ñoñ, ñoñetspa' e'ñech cohuen chenonet pueyoçhreto. Ñetñapa' ñeñtet po'ñoçh orrtatyenet ñeñt' atarr sherbets Yomporecop. Attoña ñetpa' e'ñe atet penet ñerra'm narmets ñeñt' atarr aton ellomre'tyets—pate'tets çharroch çharra' pue'llomer, po'poñpa' pechapoch çharra' pue'llomer, po'poñpa' ma'poch çharra' pue'llomer.

Atto Jesúsapa' toma'ntaterranet atet pena ñeñt' a'parre'tene' ta'tllom' e'ñe all a'parraret cohuen trigo

²⁴ Allempoña Jesúsapa' alla toma'ntaterraneterr, ñeñt'pa' atet oterraneterr:

—Yompor po'cohuenña ñeñt' atto te' ayochreshattena ña pue'ntañot, ñeñt'pa' atet pena ñerra'mrrate' puesheñarr yacma ñeñt' a'parrene' cohuen puerets pa'mro.

²⁵ E'ñe cohuen a'parre'tuepa' tarraña allempo manrrenet allohuenet, e'ñe't a'nahua huapa ñeñt' e'moñe'tene'pa' allña' ahuo't a'parre'tyesuenana' ta'tllom' e'ñe all a'parraret cohuen trigo. Ahuo'tña a'parre'tueña'pa' o' ahuer a'nahua.

²⁶ Narmetsñapa' o' cheparesua o' me'tyesuapa' allempoñapa' entet ñaña ta'te' o' chepares epuet trigo.

²⁷ Allempoñapa' huacha'ta pamo'mte' pa'taruasañer, ñetñapa' atet otoset: “¿Ama't, Nomporcha' cohuenaye' pa'parrenoña puerets pa'mro? Errotenotuañaca'ye o' chopña ñaña ta'te' all.”

²⁸ Ñaña'pa' atet otanet: “E'ñeca'ye cohuen na'parrañña nepuer all. Ñeñt' ne'moñe'tene'pa' ñeñt'ca'yeña o' atet pãmñsen.” Pa'taruasañerña'pa' atet ochet: “¿Ama't pemno o'ch ahueyo'ch ya'mare'tuerra'ña ta'te'?”

²⁹ Ñaña'pa' atet otanet: “Amachca'ye sa'mare'tatsche te't' cha sa'maramñennan netrigo.”

³⁰ Allepa' chepuepa' epuet. EsemPOCH pomella'hua trigopa' allempochña noch ñeñt'cha' a'yapaçhe' trigo: Ñanomcha' añ sa'yapaçha' ta'te' o'ch sehuan-cachmech attoch ya'poyatater. Sehuanca'huepa' çhoscha'ña a'yapaçhe'ña ñaña trigo o'ch sañño'teña' allecma neshontateñ.”

Atto Jesúsapa' toma'ntaterranet atet pena pue'llomer ñeñt' otenet mostazllom' (Mr. 4.30-32; Lc. 13.18-19)

³¹ Allempoña Jesúsapa' alla oterraneterr:

—Añ Yompor po'cohuenña ñeñt' atto ayochreshattena ña pue'ntañot, ñanompa' e'ñech puesheña'ttsa ame'ña'yetsa. Allempoteñña'pa' allo'nach sen atonetnomtsa ñeñt'cha' ame'ñerrtsa attochña e'ñe epa'huerra erracmañen Yompor po'cohuenña.

Ñeñt'pa' añ toma'ntaterraneterr mostazllom':

—Ñeñt'ña pue'llomretollpa' puesheñarrña'pa' o' anem' pa'mro allcha' nare'teña'.

³² Ñehua, e'ñe yeñoteñ mostazllom' ñeñt'pa' atarrca'ye nanac añeñolleshallmerr, tarraña ñerra'm o'ch yenare'chpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetsoçhno. Ñeñt'ña narmetsocherpa' o'ch huacha'toña oteçhno ñeñt'cha' ama'tanatyesosets puetacro'mar.

Atto Jesúsapa' toma'ntaterranet ñeñt atet pena chase'
(Lc. 13.20-21)

³³ Jesúsapa' alla serrpare'taterraneterr ellonet ñeñt atet pena Yompor po'cohuenña ñeñt atto atarr ayochreshattena ña pue'ntañot. Ñeñtpa' ama'tcha' añeñolla ñeñtcha' ñanom orrtatsa tarraña e'ñe ña po'huamencot mametollapa' o'ch e'ñe epa'hua ora erraparen. Ñeñtpa' añ toma'ntaterraneterr atet pena chase':

—Ñeñt chase'pa' allo tsetenan coyanesha' harina' ñeñt oñetsetstaten attoch a'chasatan harina' esheccha' e'ñe a'muesatue. Ñeñña chase'pa' ama'tcha' añeñolla net, ama'tcha' aton harina' ñeñt ma'pa arroga, mametollapa' o'ch e'ñe a'muesatuanña ama't atarr aton harina'.

Jesúsapa' ora allpon ñeñt atet yechatyen an acheñenesha' ñeñtpa' attoña pa'namenot es toma'ntatyenanet
(Mr. 4.33-34)

³⁴ Ora allpon ñeñt atet yechatenan Jesús acheñenesha', ñeñtpa' atto es toma'ntatyenanet. Allempopa' ama serrpare'tataneto e'ñe atta, chocmaña serrpare'tatenanet toma'nteñtso.

³⁵ Attoña o' etsoterra ñeñt atet ote't ñeñt a'mtaye't Yompor po'ñoñ ahuat ñeñt atetcha' yechaterr Cristo:

Napa' neñerrcha' e'ñe toma'nteñtso; na'poterrcha' ñeñt ama a'potareteyaye ama't ahuatoteñ allempoteñ Yompor yeçcatan añ patser.

Atto Jesúsapa' eñotaterranet ñeñt atma'ntatarettetsa ta'tllom epuet trigo

³⁶ Alloña Jesúsapa' sa'nman acheñenesha'pa' o' çherr pocollo. Allña huaçha'toña pueyochresha'pa' atet otoset:

—Te'pa' o'ch potey e'ñe eñotoçhen ñeñt toma'ntena ta'te' ñeñt chepuets pa'mro.

³⁷ Ñaña'pa' atet otanet:

—Ñeñt nare'tene' e'ñe cohuen pueretspa' ñeñtpa' naca'ye Ñeñten Acheñetosets.

³⁸ Ñeñt na'muer nepenpa' ñeñtca'yeña añe patser. Ñeñt cohuen pueretspa' ñeñtca'yeña Yompor pueyochresha' ñeñtcha'ña çherrets all añcha'tarettena Yompor. Ñeñt ta'te'pa' ñeñtca'yeña oneñeñ pueyochresha'.

³⁹ Ñeñt e'moñe'tene' ñeñt nare'tamñse' ta'te' ñeñtca'yeña oneñeñ pompor. EsemPOCH çherr allempoch pomella'huapa' ñeñtpa' añ toma'ntena allempochña mellapoterra. Ñeñtcha'ña a'yapaçherretspa' ñeñtca'yeña mellañoteñnanesha' ñeñtcha' huaçha'ttsa entot.

⁴⁰ Atet apçhenet ta'te' te' o'ch a'poyatachet tsopa' atetcha' perrñañetña oneñeñ pueyochresha'çhno allempoch mellapoterra.

⁴¹ Ñehua, na Ñeñten Acheñetosetspa' nach mueñerre' nemllañoñeñnanesha' ñeñtcha' a'yapaçha'tuerre' allohuen ñeñt cotape'chatyenahuet sosey ñaña allohuen ñeñt e'ñe añe etsotayen patpareñ. Arroçha' a'yapaçhare'tterra allo'tsa'yen ñaña Yompor pueyochresha'çhno, ama't e'ñe all ayochreshattena ña.

⁴² O'ch e'ñe a'yapaçhare'tetuerretpa' allempochña asaprrotarettet o'pono all huorten tso'. Allña'pa' allcha' yahuanrrorterret, panmueñoñet atserrpa' rraso'tyerretcha'pa's.

⁴³ Allempoña allohuen ñeñt e'ñe pocte' es pa'yets ñetña'pa' poptetsetach e'ñech attet ñerra'm atsrret. E'ñech cohuen popuetyenet all añcha'tarettena ñeñt pompor penet. Allohuenes ñeñtes ne'mñotene' neñoñ çhaponasepa'chña seyoçhro ñeñt atet notenes.

Atto Jesúsapa' toma'ntaterraneterr shonte' quelle ñeñi e'potarettetsa patso

44 Po'pocheño Jesúsapa' alla toma'ntaterranet po'poñoneñ. Ñeñtapa' añ toma'ntatanet Yompor po'cohuenña atto atarr ayochreshattena ña, ñeñtñapa' atarr aye'chochen. Ñeñtapa' atet toma'ntatanet ñerra'mrrate' shonte' quelle ñeñi e'potarettetsa e'ñe patso. Ñeñtña quelle puesheñarr yacmapa' machayotach entos. O'ña entuepa' o' alla pampa'ner ñañapa' o' ahuerr e'ñe pocsheñesha' allenta pomhuahuerran ora ñeñt allpon echyen allochñapa' attoch echan quelle alloch rañterrana ñeñt patser allo'tsen quelle. Attochña ganañperrana atarr shonte' quelle ñeñt atarr ye'chena.

Atto Jesúsapa' toma'ntaterraneterr ñeñt atarr coñnesha' serets

45 Po'pocheñoapa' atet toma'ntaterraneterr:

—Yompor po'cohuenña atto atarr ayochreshattena ña ñeñtapa' atarr aye'chochen atet ñerra'mrrate' ñeñt atarr coñnesha' serets. Puesheñarrña ñeñt pomatsre'tyetsa ñeñtach atarr e'nyen ñeñtcha' rañta.

46 Pamtarrñapa' entosan serets ñeñt atarr nanac coñnesha' ñeñtñapa' atarr tsa'te'. Ñañapa' allentach ahuerr o'ch pomhuahuerran ora ñeñt allpon echyen allochñapa' attoch echan quelle alloch rañterrana serets ñeñt atarr nanac coñnesha'.

Atto Yompor po'cohuenña e'ñe atet pena ñerra'mrrate' añecmuen terraya

47 Jesúsapa' alla toma'ntaterraneterr; ñeñtapa' atet otanet:

—Yompor po'cohuenña atto atarr ayochreshattena pue'ntañof ñeñtñapa' e'ñe atet ñerra'mrrate' terraya añecmuen. O'ch terrayet sa'popa' o'ch e'ñe ap'cha'huan allohuen pa'namen caca'chno.

48 Ñerra'm o'ch e'ñe chorra allempoñapa' o'ch chetañperet toññaso, o'ch anorrcha'tet allcha' acret ñeñt e'ñe cohuenare' ñeñtcha'ña esha'tanetet puecañtro. Ñeñtña ama cohuenayayepa' o'ch saprochet.

49 Ñeñtapa' atetcha'ca'ye perraña allempoch mellapoterra. Cha'nma'cha'tcha' mellañoteñnesha' ñeñtcha' ellopa'tetstatterre' ñeñt atsrre'mñañnesha' ñaña ñeñt e'ñe pocte' es pa'yets.

50 Ñeñtña atsrre'mñañnesha'pa' huapore'teretcha' o'pono all huorten tso'. Allñapa' allcha' yahuanrrorterret, panmueñoñtet atserrpa' rraso'tyerretcha' pa's.

Attoch e'ñe cohuen yorrtatyen coñañats ñeñt ahuatoteñ atarr sherbets ñaña attoch e'ñe cohuen yorrtatyen coñañats ñeñt e'ñe etserra atarr sherbets

51 Allempoñapa' allenta a'p'to'tanet:

—¿Eñoto'chena't sentenña allohuen ñeñt atet notyenes?

Ñetñapa' atet ochet:

—Eñoto'chenca'ye yenteñ.

52 Allempoñapa' atet otanet:

—Ñeñto'marña ama't allohuen erra'tsen ñeñt atarr etsotene' ñoñets ñeñt atet anaret ahuatoteñ, ñerra'm elloña ay'chatarettet ñamet ñeñt atet pena Yompor po'cohuenña atto atarr ayochreshattena ña, ñeñtña acheñer atarr rcha' cohuen orrtatenan coñañats ñeñt ahuatoteñ, elloña cohuencha' orrtaterran ñaña ñeñt e'ñe etserra coñañats. E'ñech atet pena ñerra'mrrate' ñeñt apaclatesha'. All año'tyenan ñeñt atarr morrentena errotenopa' o'ch orrtatenan ñeñt errte' año'ten all; errotenoñapa' o'ch orrtatyenan ñaña ñeñt año'ten ahuatoteñ all pa'paclo.

*Allempo serrpare'tatan Jesús acheñenesha' all Nazareto
(Mr. 6.1-6; Lc. 4.16-30)*

⁵³ Serrpare'tatuanet Jesús ñeñt atet toma'ntatyesanet, ñaña'pa' ahuerterr allot.

⁵⁴ Cherr pa'nyo all Nazareto yeçhatuerraneterr all po'prahueto. Allña'pa' nanac cohuanrrorteñet, atet otyeñet:

—Ñapa' errahuañaca'yeña eñotanña ora allohuen ñeñt atet pa'yena. Esha'huañaca'yeña eñotatene'ña atot orrtatenan partsoteñets.

⁵⁵ Ñapa' aña puechemer ñeñt po'taruas pene' o'ch torrenana tsach attoch es yeçcatyen pa'namen. Pachorpa' aña María. Pa'mo'nasheñpa'cho'ña aña Jacobo, José, Simón, Judas.

⁵⁶ Allohuen po'chanesha'pa' eñeca'ye yechme'tuenanet parro'marneshayarramche'. Ta'm ñaña'pa' errotenotte'ña atarr es eñotyen.

⁵⁷ Ñeñto'marña all e'ñe ña pa'nyo ama eseshaye' acua'penaye entenaye. Allempoña Jesús'pa' atet otanet:

—Ñeñt a'mtene' Yompor po'ñoñpa' chocmaca'ye amcha'na'tpo' entyeñña allohuen acheñenesha', arrña pa'nyo allo'tsen e'ñe ña pamo'tsna'tarnesha' ñetña'pa' ama acua'penaye' enteñeto. Ama't ñaña ñeñt parro yeçchenet pa'pacletto, ñetpa'cho'ña ama acua'penaye' enteñeto.

⁵⁸ Ama ame'ñeñeto ñeñto'marña allpa' ama atonocheye' orrtataneto po'partsoña.

14

*Allempo e'ñe cohuen es orrtatyes Jesús, Herodesña'pa' cha otapañ Juanañie' o' tanterra ñeñt apataye't acheñ Yomporecop
(Mr. 6.14-29; Lc. 9.7-9)*

¹ Allempoña amcha'taret Herodespa' e'mare'tenan atet pa'yena Jesús. Ñehua, Herodespa' all amcha'tare'ttena anetso Galileo.

² Allempoña'pa' atet otan ñeñt sherbene':

—Añepa'tca'yeña Juanañ ñeñt apataye't acheñ Yomporecop; ta'mca'ye çate'ca'ye tanterraña rromot. Ñeñto'marte'ca'yeña te'pa' orrtaterranña partsoteñets.

³ Ñehua, allempopa' ahuañmo'chacma rrematenana' Juanañ o' huan-cachpa' allña yottamñsach attoch coshatan Herodías ñeñt pa'mo'nasheñ Felipe puetapor.

⁴ Tarro'mar Juanañpa' ña otaye't Herodes:

—Amaca'ye pocteyaye o'ch peyoramñpes pemo'nasheñ puetapor.

⁵ Ama't atarr mueneñeñ o'ch muetsatacheñ e'ñe allempocma tarraña Herodespa' mecha'tenan acheñenesha' ñeñto'marña ama eshcaye' muetsatache. Tarro'mar acheñenesha'pa' e'ñe cohuen enteñet Juanañ atet ñerra'mrrate' ñeñt a'mtene' Yompor po'ñoñ.

⁶ Allempoña coshame'tapreteñet Herodes allempo eñalletña allña'pa' o' tanc-sosa Herodías puechoyor.

⁷ Herodesña'pa' ñeñta atarr cohuen ent. Ñeñto'marña och:

—Na po'ñoçhpa' o'ch nena' neñoñ e'ñe Parets pa'so'chño, ama't es pena-muenpa' napa' napaçha'.

⁸ Pachorña'pa' allenta otare'ch e'ñe a'nahua:

—O'hua pçochte' amcha'taret: "Añcha' pçapuen Juan poñ."

Allempoña shopshesha'pa' atet otan Herodes:

—Napa' añ nemnen o'ch pepechennana' Juan poñ ñeñt' apataye't acheñenesha', o'ch penon platopa' o'ch paphuerren e'ñe arrma.

⁹ O'ña enamhuepa' amcha'taretñapa' cha lleca. Tarraña ama't llecañpa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñt' hua'ñen ñeñt' e' muene' atet oten ñeñto'marña otanet:

—Te'pa' o'ch saḡ Juan poñ.

¹⁰ Allempoñapa' o' mueñan pa'cheñer o'ch pecheñeta' Juan all yottam̄peñet.

¹¹ Allempoña o' huapaterrñañet poñ platopa' aphueret shopshesha'. Ñañaapa' anem̄ pachoresho o'ch apueña'.

¹² Allempoñapa' ahuanma Juanañ pueyochresha' o' aneret apecharet o'ch pampuereta'. O'ña pampa'huereta'pa' o' ahuanerret o'ch e'mare'tateñeta' Jesús.

Allempo Jesúsapa' rratenan shonte' acheñenesha'; ñeñña acheñenesha'pa' allo'tsen amnaroch mil

(Mr. 6.30-44; Lc. 9.10-17; Jn. 6.1-14)

¹³ Jesúsapa' allempo e'mare'tan Juanañ, ñañaapa' ahuañpes noñto o' sa'nman acheñenesha' o'ch ahuo' all ama acheñempañoayae. Acheñenesha'ñapa' allempo e'mare'chet ñetñapa' allenta ahuanmuet ñamet. Allohuen anetsotpa' e'ñe ahuanmuet o'ch entereta' Jesús. Ñetñapa' alla oñmacha'tet patso'mar.

¹⁴ Allempoña sehuosa Jesús noñto'tpa' alla entuerraneterr o' alla shonta'huerrerr acheñenesha'. Ñañaapa' atarr nanac muera'huerraneterr. Allñaapa' o' alla a'crratyessuerraneterr patsñañeter.

¹⁵ Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempañoayae ñaña o'ca'ye ellerren. Te'pa' o'ch poch acheñenesha' ahuanemyerretapa' anetso'mar allcha' rañta'yesuerret puerraret ñeñt'cha' rra'yesuerret.

¹⁶ Jesúsñapa' otanet:

—Amachca'ye ahuanmatsterreto. Sachca'ye apa'yesahuet ñeñt'cha' rret.

¹⁷ Ñetñapa' atet ochet:

—Ya arrpa' amaca'ye es yechenoña ama't coñe'ta; yapa' e'ñeca'ye amnara pan yechen ñaña epatoll cac.

¹⁸ Allempoña Jesúsapa' atet otanet:

—Sanmon arrma o'ch sapuenna'.

¹⁹ Allempoñapa' otan acheñenesha':

—Te'pa' o'ch sanorrcha'tyes e'ñe all cohuen emmo'ratyen pasetma'.

Allempoña agapan ñeñt' amnar pan ñaña epatoll cac, o' cohua' enonet, parasyoso'tam̄psan pan allo'tñapa' shota'tan pan, apanatyesan pueyochresha'. Ñetñapa' o' epatyaset allohuen acheñenesha'.

²⁰ E'ñe epa'huet, allempoña o' rrallme'chet allohuenet e'ñepa'tcha' yetrra'tuahuet. E'ñe yetuahuetpa' cha a'pchatyaset ñeñt'ñapa' a'yapa'cheret. Ñeñña a'yapa'cherretpa' chepa'tcha' chorrats charra' puechena epa cañter e'ñe tamo'yare'.

²¹ Ñeñña rrallme'chatspa' atarr shonte' acheñenesha'; ñato' allo'tsente' amnaroch mil ñeñt' e'ñe yacmaneshoche'. Ellonetpa' allo'tsa'yen ñaña coy- aneshachno ñaña cheshaneshachno.

Atto Jesúsapa' e'ñe cohuen chope'chnen enot oño

(Mr. 6.45-52; Jn. 6.16-21)

²² Allempoña Jesúsapa' otan pueyochresha':

—Te'pa' o'ch sa'tacha't noñto o'ch sota sanom o'ch seḡchaterra yot. Napa' o'ch neso'tnom̄ ora acheñenesha'.

23 O'ña so'tuanmanetpa' ñaña'p' ahuo' aspeno e'ñe ñapueť allña ma'yochosa. Ama't o' tsapuenpa' ñaña'p' allo'tsena ñapueť.

24 Noññapa' ñeñta rrochaso'tsenara sa'po, emo'yare'ñapa' čha anmape'čañpenanet, a'puerrame'tañpenanet orrno.

25 Atteña allempoña puetarenmochpa' huenanet Jesús čha chope'chnen enoť oño.

26 All chope'chnen allempoña entapueñ pueyochresha', ñetñapa' čha toratsetyeset pueyočhret, atet otanna'tyeset:

—Choyeshe'matste'ca'ye huaponaya.

Pueyorñoťetpa' atta rrannartet.

27 Jesúsñapa' eñorana'tuenanet, atet otuenanet:

—Choñaca'ye socshapuenna, naca'ye o' nohuapa, amach atta semicha'tatstapno.

28 Allempoña Pedropa' eñorana'cha ñeñťpa' atet och:

—Ñerra'm po'ñočhte' pa Partseshacha', te'pa' o'ch potosen, aponca'ye nesho, pechope'chnom pama enoť oño.

29 Jesúsñapa' allenta och:

—Aponca'ye.

Ñaña'p' allenta sohua noñťotpa' o' chope'chnom ñaña enoť oño o'ch ahuo' Jesúsesho.

30 Chope'chnomtsapa' o' cohua'nman huomenquęsha' ñeñť čha emo'yartatenan sa'ppa' čha yore'ch. Čha yore'chpa' alla muene' esha'ta oño. Allñapa' rranare'ta atet otan Jesús:

—¡Pa'qeshpátosen Partseshacha'!

31 Jesúsña tecma rrema'ppa' atet och:

—Papa' ama't e'ñeye' peyemtenno. Eso'mare't čha pe'charrtatenña peyočer.

32 E'ñe a'tačha'tatseta noñťopa' huomenquęsha'ñapa' čhepa'tcha' muetsoñeñterrtsa.

33 Ñeñťña noñťo'tsa'yenpa' allentepa'tcha' concorpanrrortana'tapetpa' atet otyeset:

—Po'ñočhepa't papa' e'ñe Parets Puechemereř.

Allempo Jesús'pa' a'crratyesosan pa'namen atsnañeťečhno all Genesareto

(Mr. 6.53-56)

34 Allempoña pechatañpsetpa' arr etsotaset all oteñet Genesareto.

35 Ñeñťña ane'tañnesha' allpa' o' cheme'tapet Jesús. Atto cheme'tapetpa' ñetñapa' allenta mueñet ačeñ, o'ch e'mare'tatenana' ačeñnesha' allampaño'mar. Alloťñapa' huapatyesoñet allohuen atsnañeťečhno.

36 Ñeñťña atsnañeťečhno'pa' o' enemyesoset ama't poso'moťa o'ch a'plla'yesosñañet pa'shtam. Allpon ñeñť a'plla'yese' Jesús pa'shtam allpončo' e'ñe corra'yesserřsa.

15

Atto Jesús'pa' eñotatenanet ama añeye' ya'sosyatenaye Partsocop ñeñť yerra'yen yenamot

(Mr. 7.1-23)

1 Allempoña fariseonesha' ñaña ñeñť atarr etsotayenayeñ ñoñets ñeñť atet anaret judioneshacop ñetñapa' arroť huacha'tet Jerusaléñoť. Čačha'tet Jesúseshopa' atet otyesoset:

2 —Eso'mare'tña peyochresha'ñapa' quechpuerretña ñeñt atet yeyche't ya ahuat yatañeshohuen. Ñeñto'mar o'huañ e'pota'tetña Partsocop allempo rrenet.

3 Ñaña'apa' atet otanet:

—Sapa'cho'ña ñeñto'mare'trraña satpare'teññañña saña Yompor po'ñoñ ñeñt atet anaret allochñapa' e'ñech sañeña seycheña e'ñe setsotayen.

4 Ñehua, po'ñoçhca'ye yeñoteñ Yomporpa' atet oteney: “Semorrenteño'tpa' semcha'na'chcha' sompor ñaña sachor.” Elloña ñaña po'poñone't atet oteney: “Ñerra'm esesha' sasare'tene' pompor ñaña pachor ñeñt'pa' muetsetepa'.”

5 Tarraña sañapa' amaña atteye' sepeno tarro'mar sapa' chaña atet sotyen:

—Ñerra'm esesha' atet otene' pompor ñaña pachor: “Ñeñt nechen o'ch napapeñpa' tarraña amach napape te'pa' o'ch nene' Yomporecop”

6 ñeñtña acheñerpa' sañapa' atetcha' soteñ: “Pocoppa' ama pallteno o'ch es pa'p pamo'mte'.” Sapa' attoca'yeña sehuapore'teññañña Yompor po'ñoñ allochñapa' e'ñech aña setsoten ñeñt e'ñe sañeña seycheña.

7 Sapa' atarrca'ye ommoñañeshas tarro'mar atarr seshcare'ten amaña Yomporeye'ña sesherbena. Isaíaspa' e'ñe cohuen a'mñtane't Yompor po'ñoñ, saña te'pa' e'ñe atet sepena atet ote't; allempopa' atet ot Yompor:

8 Ñeñt acheñenesharpa' e'ñe puenamo'ta cohuentatennanetañ; pueyoçhretoñapa' ama chenano'to ñeñt cohuen nenten na.

9 E'ñe orrena ma'yochennet, ñeñt atet yeçhatannenetpa' ñeñt'pa' e'ñe acheña naye't ahuat poçta'pña.

10 Allempoña Jesúsapa' chore'tan acheñeneshas ñeñt shontetsa, ñetñapa' atet otanet:

—Sañapa' e'ñepa'chña cohuen se'mñnoten allochñapa' attoch e'ñe cohuen çhaponasa seyoçhro.

11 Ama aye' ya'sosyatenaye Partsocop ñeñt yerra'yen yenamot. Añca'yeña ya'sosyatene' yeñoñ ñeñt cha'nets yenamot ñeñt atet yeñosatse'tyen.

12 Allñapa' atet oteña' pueyochresha':

—¿Peñoteñe't fariseonesha'ñapa' allempo e'monapet peñoñ ñeñt atet potyenanet ñetñapa' cha'atsrre'muet?

13 Ñaña'apa' atet toma'ntatanet ñeñt'cha' atet a'paretterra fariseonesha', ñeñt'pa' atet otanet:

—Allohuen narmetsoçhno ñeñt ama aye' nare'taye Apa ñeñt pue'ntaño'tsen ñeñtñapa' a'mare'taretetuerrach.

14 Ñetpa' ottetepa'ta. Ñetpa' e'ñe atet penet ñerra'mrrate' puesheñarr ñeñt aporo'yetpa' ñapa' o'ch echa'nman po'psheñeñ ñeñt parro aporo'yeteçmuet. Allempo atet penet ñerra'm aroro'ton'ta echa'nman'nomuet epsheño'maret çhach shora'nmoset aroro'to. Arrpa' allohua ñeñt atet toma'ntatanet atet ñerra'm ya allempo ama yoçtape'cherra' ñeñt cohuentetsa Yomporecop amach erro'teno't yoçtape'chache po'psheñeñ ñeñt ama eñotenaye ñeñt cohuen enten Yompor.

15 Allempoña Pedropa' atet ot:

—Yapa' choçhña peserrpare'tatey e'ñe cohuen eñotoçhen ñeñt atet petma'ntatena ñorra'.

16 Ñaña'apa' atet otanet:

—Ama't sapa'cho'ña ama'tña seño'teña'.

17 Sapa' ama't çhennasoña seyoçhro ñeñt yerra'yen yenamotpa' alla sen ya'to ñeñt'pa' choçmach yener a'yo.

18 Añña ñeñt̃ cha'nets yenamot̃ ñeñt̃ atto yeñosatse'tyen ñeñt̃pa' e'ñe yeyochrot̃ huena ñeñt̃ña chocma ya'sosyatene'ña Partsocop.

19 E'ñe yeyochrot̃ huena cot̃apñats ñeñt̃ ama't mameshapa' ama cohuenayaye, ñeñt̃pa' añ: muetsanna'teñets, chetapretanna'teñets, cañoresha'teñets, etatsre'tyeñets, toma'tam̃psanna'teñets, sasare'teñets.

20 Ñeñt̃ allohuen sosya'tsañechno ñeñt̃ huetsa yeyochrot̃ ñeñt̃ña po'ñoçh ya'sosyatene' Partsocop. Tarraña allempo yerrallme'chyen ama't ama ye'pota'tyesopa' ñeñt̃pa' amaña ñeñt̃eye'ña ya'sosyatenayeña Partsocop.

Atto puesheñarr coyanesha' ñeñt̃ ama judioneshayaye ñapa' atarr yemtapana Jesús

(Mr. 7.24-30)

21 Ahuerrerr Jesús allot̃pa' alla çhap allampaño anets Tiro ñaña Sidón.

22 Allñapa' o' huapa puesheñarr coyanesha' ñeñt̃ allo'marnesha' ñeñt̃ canano'marnesha'. Ñaña'pa' allenta rranare'tospa' atet̃ otos:

—Pemueraye'chosna, Nepapareshacha' p̃apa' ñeñt̃ep̃ Davidna'tarep̃. Na nacñe'terpa' atarr mueroçhtateñ oneñe't̃.

23 Jesúsñapa' ama't mameshapa' ama eñorana'teño. Atteñapa' o' ponem̃ya pueyochresha' otoset:

—Pe'm̃ñochnaca'ye tecma allochñapa' o'ch ahuerri, çhaca'ye cot̃a'neney per-ranare'tnomue'.

24 Ñaña'pa' atet̃ otanet:

—Napa' e'ñe añecpa allsensareten ñeñt̃ israelena'tarneshacop; ñetpa' e'ñe atet̃ nentenamet̃ ñerra'm carrneroçhno ñeñt̃ paya'tyetsa.

25 Coyanesha'ña ñeñt̃ ama israelena'tareyayepa' ñaña'pa' allenta on e'ñe ñesho concorposña'pa' atet̃ otos:

—Choña Nepapareshacha' pebensam̃psaye'cherrnan nacñe'ter.

26 Jesúsñapa' toma'ntatana acheñenesha' ñeñt̃ ama israelena'tarneshayaye ñeñt̃o'marña atet̃ och:

—Ama pocteyaye o'ch yeprratam̃pes yacñetar puerrar o'ch yehuapore'tam̃pes allo'tsen ochec o'ch rre' ñaña ochec.

27 Coyanesha'ñapa' atet̃ otererr:

—Ama't atteñ Nepapareshacha' tarraña ama't ochecpa'çho'ña rra'yenan ñeñt̃ a'shore'tatyen pamo'mte' po'mesa'pnaçho.

28 Allempoña Jesús'pa' atet̃ otererr:

—Chepa't nesñeshacha' atarr nanac peyemtenna ñeñt̃ep̃ña'pa' attetepa'ch p̃ocop atet̃ pemnen p̃a.

Pacñe'terña'pa' allorocma correrra.

Atto Jesús'pa' a'crraterranerr po'potantañ atsnañe'iechno

29 Ahuerrerr Jesús allot̃pa' alla oñem sa'patopñño'mar e'ñe Galileaso. Al-lot̃pa' ahuo' aspeñto allñapa' anorros.

30 Allñapa' alla huaçherrñañerr shonte' acheñenesha'. Huapatyerrñañeterr checa'repaçhno, mancoçhno, aporo'yeteçhno, opananeshaçhno ñaña huap-atoñet shonte' po'potantañechno. Ñeñt̃ña'pa' alla nanatyesosñañet pa'rrp̃ot̃. Ñaña'pa' e'ñe a'crratyesuerranet.

31 Allña acheñenesha'pa' çha atarr cohuanrrorteñet allempo eñchet atto opanaçhno çha eñora'yerrtsa, mancoçhnopa'çho'ña çha cohuenetyerrtsa, checa'repaçhnopa'çho'ña çha chope'chyerrrets, aporo'yeteçhnopa'çho'ña çha e'ñe cohuen cohua'yerrrets. Atet̃ e'ñe cohuen eñchetpa' allohuenetña'pa' co-huentateññañet israelnesha' Po'yomporer.

Allempo Jesúsapa' rratenan shonte' acheñenesha', ñeñña acheñenesha'pa' allo'tsen pa'tatsoch mil

(Mr. 8.1-10)

³² Allempoña Jesúsapa' agotan pueyochresha'pa' atet otapanet:

—Napa' cha atarr nemuereña allohuen acheñenesha' ñeññ shontetsa arr. O' ma'pamtoset nesho ama eñallmeñeto ñeññcha' rret. Ama pocteye' nenteñe o'ch ahuanerret e'ñe pa'chporrñesha' te't ama a'ñshe'mterreto ñoño.

³³ Pueyochresha'ñapa' atet otoset:

—Errahuachca'ye yentña allpon rreñets ñeññcha' yerrach shonte' acheñ, arrpa' amayaca'ye.

³⁴ Jesúsñapa' atet oterraneterr:

—Sapa' ¿errpona't sechenña pan?

Ñetñapa' otereterr:

—E'ñeca'ye canchrra ñaña coñe't cacatollesha'.

³⁵ Allempoñapa' otan acheñenesha':

—Te'pa' sanorrcha'tyes patso.

³⁶ Allñapa' agapan ñeññ cancherr pan ñaña cacatollesha'. Agaphuepa' o' parasyoso'tenanerr Pompor allotñapa' o' shota'tan pan, shetse'tan ñaña cac, apanatyesan pueyochresha'. Ñetñapa' o' epatyeset ñamet allohuen acheñenesha' e'ñe epa'huet.

³⁷ Allempoñapa' o' rrallme'chet allohuenet, e'ñe yetrra'tuahuet. O' e'ñe yetuahuetpa' cha a'pchatyeset ñeñññapa' a'yapacheret. Ñeñña a'yapacherretpa' chepa'tcha' chorrats cancherr cañter e'ñe tamoyare'.

³⁸ Ñeññ rrallme'chats atarr aton acheñenesha' ñato' allo'tsente' pa'tatsoch mil ñeññ e'ñe yacmaneshoche'. Ellonetñapa' allo'tsa'yen ñaña coyane-shachno ñaña cheshaneshachno.

³⁹ Allempoña Jesúsapa' so'tnerran acheñenesha'pa' ahuer, a'tapos noñtopa' ahuañperr o'ch ahuo' anetso ñeññ pa'so'cheñ Magdala.

16

Atto fariseonesha' ñaña saduceonesha' enamoset Jesús gatapanetepa'to' po'partsoña

(Mr. 8.11-13; Lc. 12.54-56)

¹ Fariseonesha' ñaña saduceonesha' ñetpa' o' ahuanmuet o'ch enteñeta' Jesús. Chacha'tet Jesúsesho ñetña pueshquënoñetpa' atet otyesoset:

—Yapa' añ yemnen o'ch pegatapuey pepartsoña ento't allochñapa' attoch yeñotosep po'ñoçh p'apa' Parets Puechemerep.

Ñetpa' cha mueneñet o'ch topatoset Jesús.

² Ñañapa' aña yerpatapanet ñeññ atet otyenet ñet pa'nyeto:

—Sapa' ñerra'm esempo sentnen o'ch tsatatetnena enet, sañapa' chocmach atet sotyesnene't: “Tsapatpa' atarrcha' char.”

³ Aromtañañapa' ñerra'm esempo senta'muen enet cha tsatatta'muena, sañapa' chocmach atet sotyesa'muene't: “Choch huata'muena ñeñño'mar o' cha rrenarsa'muen.” Sapa' atarr señoteneñña ñeññ sentyen ento ñeñña señoatene'. Tarraña ñeññ atet norrtatyennas nepartsoteña eso'marte'ña ñeñññapa' amaña eñotatensoña ñeññ atet pennas Yompor te' o'ch orrtatonas po'cohuenña. Ñeñtpa' attate' seshquën.

⁴ Acheñenesha' ñeññ corra'yetsa te' ñetñapa' ama cohuenaye' cotape'chyeneto, ama añeye' cosheneto Yompor ñeñño'marña ñetpa' e'ñe orrena otennet ahuo'ch norrtatanet nepartsoña. Tarraña amach es

norrtataneto. Napa' añach pa'terr neñotatanet atet eñotatanet Jonás ahuat nínivo'marnesha'.

Jesúsñapa' sa'nerranetpa' ahuerr.

Atto Jesús toma'ntaterraneterr ñeñt po'chaser pen fariseonesha'

(Mr. 8.14-21)

⁵ Allempoña pechatrra'tet yomta'n o' chapuet all, pueyochresha'ñapa' o' yerpuerret ñetpa' ama anmueto pan ñeñtcha' rrosset all.

⁶ Jesúsñapa' atet otapanet:

—E'ñech señota ñato't semeñe'teña'ña fariseonesha' ama't ñaña saduceonesha' po'chaser allo tsetenet pan.

⁷ Ñetña cotape'chyasetpa' atet otanna'tyeset:

—Amaca'ye yanmoña pan ñeñto'marte'ca'yeña oteney año'ch yemeñe'tatscheña fariseonesha' po'chaser.

⁸ Jesúsña allempo eñotanet atet cotape'chyenet ñaña'apa' atet otarraneterr:

—Eso'mare't sellquëñesha' sotanna'tyena año' eñalle ñeñtcha' serra'. Sapa' ama'tña e'ñeye' seymtenno.

⁹ Teme'ttsena'tña ama es sechenoyoña seyo'chro. Ama'tña seyerpuenoña allempo natontat amnar pan ñeñt nerratallme'chpa' allo'tsen amnaroch mil acheñenesha'. Ama't seyerpuenoña ñaña ñeñt allpon chorrarerrrets cañtro ñeñt sap'cherr allempo.

¹⁰ Ama't ñaña allempo natontaterrerr ñeñt can'cherr pan ñeñtña nerratallme'cherrerrpa' allo'tsen pa'tatsoch mil acheñenesha'. Ñaña ñeñt allpon chorrarerrrets cañtro ñeñt sap'cherrerr allempo.

¹¹ Erroteno'uañaca'yeña ama señotenoña ñeñt atet notas ñorra' attoch ama semeñe'tatsche fariseonesha' ama't ñaña saduceonesha' po'chaser ñeñt'pa' ama rreñtsoye' notenso.

¹² Allempoña ñetpa' o' chapamet pueyo'chreto, atet otanna'tet:

—Amuepa'tca'ye añeye' otenye pan po'chaser; añepa'tca'yeña oteney amach yemeñe'tatsche fariseonesha' ama't ñaña saduceonesha' po'chaser ñeñt atet ye'chatannenet ñeñt ama cohuenayaye, te't mamesha epa'hua erracmañen e'ñe atet pena chase' mameshapa' o'ch a'chasa'huan ora all yeneñ.

Atto Pedro'pa' otan Jesús, p'apa' p'aña Yompor Puechemerep' ñeñtep' Cristotsets

(Mr. 8.27-30; Lc. 9.18-21)

¹³ Allempoña chap Jesús all Cesarea ñeñtara Filipino, allñapa' otosan pueyo'chresha':

—¿Errofena't otyenenña allohuen acheñenesha', na Ñeñten Acheñetsets eseshante'?

¹⁴ Ñetñapa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñtepo' apatañtatset' Yomporecop. Po'potantaññapa' atet otyenpet p'apa' Elíaso'po'te'; po'potantaññapa' atet otyenpet p'apa' Jeremíaso'po'te' amapa' añepo'te' po'psheñeñ ñeñt a'mtaye't Yompor po'ñoñ ahuat.

¹⁵ Allempoñapa' alla a'p'to'terraneterr:

—Sañapa' ¿errofena'tña sotenencia sa?

¹⁶ Simón Pedroñapa' eñoratsapa' atet och:

—Papa' ñeñtep'ca'ye atarr yecuen ama't ahuatoteñ; ñeñtep'ca'ye Parets Puechemerep' ñeñtep' Cristotsets. Ñeñtña Parets ama arromñañeshayaye.

¹⁷ Jesúsñapa' atet och:

—Nanac cosheñtso'tseneḡ, Simóna ñeñteḡ Jonás puechemereḡ tarro'mar atto peñotenenpa' ñeñtḡpa' ama arromñañeshaye' peñotatenaye; naña Nomporeñotatene' ñeñtḡ pue'ntañotsen.

¹⁸ Napa'cho'ña te'pa' o'ch notapḡ pama, papa' añcha' nesocherreḡ Pedro. (Ñehua, añ so'chñets Pedropa' añ toma'ntena ñeñtḡ atarr es echarr atet ñerra'm mapue'.) Ñaña pa e'ñe peyemteñoñen na, na po'ñoçhpa' naña Cristotosets, ñeñtḡpa' allochca'yeña norrtaterrña allohuen ñeñtḡcha' name'ñerraya ñeñtḡcha' apcha'yerrtsa e'ñe na pame'ñeñoñet. Atarrcha' huomenc echarr neḡa'yerranet allohuenet ñeñtḡcha' apcha'yerrtsa pame'ñeñoñetan na attochña ñocpuetpa' amach eñalle ñeñtḡcha' huapore'terrahuet, ama't ahuaña. Ama't rromueñets po'huamencpa' amach erroñenot metanerranetoña ñet po'huamenc.

¹⁹ Ñaña na te'pa' o'ch napuerreḡ llesens attoch pa'poterrñañ Yompor po'cohuenña ñeñtḡ atto ayochreshattena ña pue'ntañot; ñeñtḡpa' añ toma'ntena atet ñerra'mrrate' llave alloch petoramper allohuen ñeñtḡ muenene' o'ch pueyochresha' perranet. Ñaña ñerra'm erra'tsencha' e'ñe pocte' pent ñeñtḡcha' pena'yes arr patsropa' Yomporpa'cho'ña ñeñtḡ ento'tsen e'ñech attecma pocte' enterranet. Ñaña ñeñtḡcha' ama pocteye' penteno ñeñtḡcha' pena'yes arr patsro, Yomporpa'cho'ña ñeñtḡ ento'tsen e'ñech attecma amach pocteye' enterraneto.

²⁰ Allempoñapa' otan pueyochresha':

—Amach esesha' sotaḡsa'tatsto ama't puesheñarra napa' na ñeñten Cristotosets.

*Atto Jesúsapa' eñotatan pueyochresha' ñapa' amsaretterrach
(Mr. 8.31-9.1; Lc. 9.22-27)*

²¹ Jesúsña e'ñe allempoteñpa' motetnomñ eñotatyeshomue' pueyochresha' ñeñtḡ atet anaret ñocop, ñapa' mueroçhtateretcha'; o'ch ahuo' Jerusaléño allña' allcha' mueroçhtateret. Añcha' erroñuanen perre' ñeñtḡ pomporne-sha' pen allohuen judionesha' ñaña ñeñtḡ pa'mñcha'tareñernesha' pen allohuen po'cornaneshar ñaña ñeñtḡ atarr etsotayenayeñ ñoñets ñeñtḡ atet anaret judioneshap. Allña' allcha' muetsatateret tarraña puema'pamtañoña Pomporpa' o'ch alla tantater.

²² Pedroña' allenta anemñ a'yenetpa' allña' atet otos:

—Arepachña Partseshacha' atteye' perrpeto ama't errponaña. Yomporpa'chña e'ñe pecuanpene'.

²³ Ñaña' puetallsa a'yenet mame'pa' atet otan Pedro:

—Orrapḡ a'yo neshot oneñeñe, papa' e'ñe orrena pepatare'tenen; papa' amaca'ye Yomporreye' atet poctape'chatenaye, ñeñtḡpa' acheñarramche' poctapña.

²⁴ Allempoña Jesúsapa' atet otan pueyochresha':

—Ñerra'm esesha' muenene' o'ch coterrnet na e'ñe po'ñoçh attoch neyochresha' neperranet, añ poctetsa sehuanmuetepaña ñeñtḡ atet muenenet e'ñe ñocpueta. Attochña ñetpa' o'ch e'ñe toma'nteret ñeñtḡ chechnene' po'corsoch allcha' mueroçhtet ñamet. Attochña coterrnet e'ñe po'ñoçh.

²⁵ Tarro'mar ñerra'm esesha' e'ñe añña muenenet o'ch correna atomat attoch e'ñe coshenet arr patsro, ñetña' chach a'chencatenet e'ñe ñañeñeta. Tarraña ñerra'm esesha' e'ñe pocte' entene' o'ch es sohuanerret e'ñe pocreñoñhuenet nocop, ñeñtḡña acheñerpa' ñaña' corretsach pocsheñeshocmañen e'ñe tayoteñ errponañohuen.

26 Ama't errponenañaren esocmañen es yeyoratse'tyes ora allpon ñeñt yentyen añe patsro, tarraña ñerra'm ñeñtach e'ñe ya'chencaterre' yecamquëñohuen, ñeñña' ama't coñe'tapa' amach es sherberrye. Tarro'mar ama eñalle po'poñ ñeñt atarr sherbets, añña atarr nanac sherbets ñeñtcha' a'queshpaterre' yecamquëñ. Tarro'mar yocoppa' ama es eñalle ñeñtcha' yepomuerr alloch alla yerañterra yecamquëñ.

27 Po'ñoçh napa' Ñeñten Acheñetosets o'ch nohuerra epan ñaña nemillañoñeñnaneshar. E'ñech Nompör po'cohuenñoñ nohuerra. Allempochña netsa'terranet e'ñe puesheña'ttsoçmuet erro'tente' pa'yesete't.

28 Po'ñoçhca' te'pa' o'ch notas, patanta'ttsos ñeñtes arro'tsa'yenes ama't ama serromhuena'pa' o' senterrñañ Yompör po'cohuenña atto napa' Ñeñten Acheñetosetspa' atarrcha' na'yochreshatterra.

17

Allempo Jesús'pa' po'poñetañpsana pueyochresha'
(Mr. 9.2-13; Lc. 9.28-36)

1 Allempo pechapmaterrerr, Jesús'ña'p' ahuanerranerr pueyochresha'; añ anem Pedro ñaña Jacobo ñaña Juan ñeñt Jacobo pa'mo'nasheñ. Ñetpa' arr anmanet atarr aspeno e'ñe ñaptochayet.

2 Allña Jesús'pa' machayotepa'tcha' po'poñetañpsosanet. Pa'clloyotpa' cha poptosa e'ñe atet ñerra'mrrate' atsrret poptetsa. E'ñe pa'shtamohuen atarr huallama'to poptosa cha a'puetaresue a'yohuen.

3 Allña'pa' machayotepa'tcha' orrtanet Moisés ñaña Elías. Ñetña'pa' alla serrpare'toset epuet Jesús.

4 Pedroña eñoratsapa' atet otan Jesús:

—Atarruaca'ye Partseshacha', cohueno'tseneyte' arr. Ama't pocte' penteñe napa' o'ch natomatonas ma'ppahua querpachet—puepahuarrrpa' pocopcha', po'ppahueña'pa' Moisésocopcha', po'ppahueña'pa' Elíasocopcha'.

5 Allempo eñorena Pedropa' cha orrtosahuet os ñeñt atarr cohuen poptetsa chepa'tcha' a'pomamñpsosanet. Cha e'morrtostsa ñoñets osot; ñeñña ñoñetspa' Yompör otosahuet; ñeñtpa' atet ot:

—Añmapa' ñeñt no Nechemer ñeñt atarr nemuerena ñeñña atarr nocshatene', ñeñtcha'ña e'ñe cohuen se'mñoterr.

6 Allempo atet e'muet ñoñets pueyochresha'ña'pa' alla rrema'rrtet patso atarr nanac yorenent.

7 Jesús'ña'p' allenta ponerranetpa' a'plla'huerranet, atet otanet:

—Setanterra, amach cha seyorenatsto.

8 Allempoña o' cohuerretpa' arepa'tcha' eseshaye' enterreto, ñapña enteret Jesús.

9 Allempo onaçherret aspenot Jesús'ña'p' atet otnerranet:

—Te'pa' amach esesha' sota'psa'tatsto ama't e'ñe puesheñarra ñeñt atet o' sentua. Tarremphuach allempoch netanterra rromot na Ñeñten Acheñetosets, allempochña seserrpare'taterña allohuen acheñenesha'.

10 Pueyochresha'ña'pa' atet otnerrret:

—¿Eso'mare'tña otenña ñeñt atarr etsotene' ñoñets ñeñt atet anaret, Elíaso'ch ñanom huerrtsa?

11 Ñaña'pa' atet otnerraneterr:

—Elías po'ñoçhpa' ñachca'yeña huerrtsa, ñapa' e'ñechca'ye a'cohuentatuer ora allohuen.

12 Tarraña napa' o'ch notas: Elías'pa' o'ca'ye huaphuerrañ arr tarraña amaca'ye eseshaye' cheme'tapuerayee ñeñña'pa' chaña erro'tuanen papueret

ñeñt atet muena'yenet ñet. E'ñech attecma perrnet namã Ñeñten Acheñetosets.

¹³ Allempoñapa' o' çhapanet pueyoçhreto ñeñt otenanetpa' añepa'tca'ye Juanañ ñeñt apataye't acheñenesha' Yomporecop ñeñtepa'tca'yeña Elíasoterrets.

Atto Jesúsapa' a'crraterran cheshachor ñeñt otetsa

(Mr. 9.14-29; Lc. 9.37-43)

¹⁴ Cherreterr all shontena acheñenesha' puesheñarrña yacmapa' ponmapuerrana Jesús concorposñaña.

¹⁵ Ate't otos:

—Pemueraye'chosnana, Ayochreshate, nacñe'ter çha o'tena, nanac mue-roçhtena. Epaye' coya'nmame'tateñ tso, erro'tenopa' o'ch coya'nmame'tach ñaña oño.

¹⁶ Nanomhue peyochresheshopa' ñetñapa' ama erro'teye' peto attoch a'crrateret.

¹⁷ Jesúsñapa' atet ot:

—Sa ñeñtes acheñres ama't mamesha'pa' ama ayemtenaye' sentpenno; çchach po'poñ sentuena seyoçhro nocop. O' allponmatuanen allo'tsenen arr patsro napa' atfa atarr na'huantennas, atfa necuenes ñato' attotpa' o'ch same'ñerrna.

Allempoñapa' atet otanet:

—Ama'tpa' sanmonca'ye chesha' arr.

¹⁸ Jesúsñapa' atet otapan oneñet ñeñt otatene':

—Te'pa' po'ñoçh o'ch notap, pequeçhpuer cheshachor.

Oneñetñapa' allentepa'tcha' queçhpa'ner. Cheshachorñapa' allorocma cor-rerra.

¹⁹ Allempoñapa' ponemya pueyoçhresha', e'ñe ñaptoçhayetpa' atet otoset:

—Yañapa' ¿eso'mare'tña ama eshcaye' yequeçhpaterena oneñet atto otatenan cheshachor?

²⁰ Ñaña' atet otanet:

—Tarro'marca'ye amaca' e'ñeye' seyemtenno ñeñt atet notenes. Napa' o'ch notas, ñerra'm po'ñoçh e'ñe na seyemtenañ napa' e'ñeca'ye na'pocatenña neñoñ ñeñt atet notenes. Ama'tcha' allponatollofa seyemtenna ñerra'mrrate' mostazllometoll sañapa' ama't erra'tsena senamuennonñ ama't ñeñt atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot: “Añ aspenetpa' rrote'tepa' a'yenet”, aspenetñapa' atetcha'cho'ña pennasañ ñeñt e'ñe atet soteñ. Ama't mameshapa' amach eñalleña ñeñt torrapo' senten ñerra'm e'ñe po'ñoçh na seyemtena.

²¹ Ñehua, ñeñt atet oneñetpa' amach erro'tenot yequeçhpatacheña acheñ e'ñe atfa. Chochña yema'yochena ñaña yema'yochreño't ama't yerrarpa' o'ch yequeçhpue' mame'. Attotcha'ña yequeçhpaterña oneñet ñeñt atet.

Jesúsapa' eñotaterraneterr puepocheño ñapa' çhocmach muetseret

(Mr. 9.30-32; Lc. 9.43-45)

²² Allempo chopeñe'chyenet parro all Galileo'mar, Jesúsña allpa' eñotatan pueyoçhresha', ñeñtpa' atet otnomanet:

—Na Ñeñten Acheñetosetspa' pomuerrnetcha' attochña erro'tuanencha' perrnet.

²³ Atteñapa' o'ch muetsataterret tarraña poma'pamtañoñapa' o'ch alla netanterra. Ñetñapa' ñeñta atarr nanac lleca'rrtatyehuet.

Atto Jesúsapa' tsa'ta impuesto añecop Parets pa'paclecop

²⁴ Allempoña Jesús epuet pueyochreshačhnopa' o' alla čhačherreterr Capernaumo. Allña'pa' huapanet ñeñt' tsa'tatenaya acheñenesha' quelle ñeñt' impuesto; ñeñt'pa' Parets pa'paclecop. Ñetpa' atet otoset Pedro:

—Semaestrorpa' ¿ama't pomuenana'ña quelle impuesto añecop Parets pa'paclecop?

²⁵ Pedroña'pa' atet otanet:

—Chocmach tsa'ta.

Allempo čhap pocolopa' Pedroña'pa' ama otenana'ña Jesús, ñaña'pa' ñanmacma otapan Pedro:

—¿Errotena't, Simóna, penteñña pa? Ñeñt' amčha'taretečhno ñeñt' añe patsro'tsa'yen, ¿eseshatña cobrenetña quelle ñeñt' impuestocop, ñato' añate' cobrenet ñeñt' e'ñe ñet pamo'tsna'tarecmuet amapa' añe' cobrenet ñeñt' ello'marnesha'?

²⁶ Pedroña atet otan Jesús:

—Añca'ye cobrenet ñeñt' ello'marnesha'.

Jesúsña'pa' atet och:

—Ñeñt'epña'pa' ñeñt' e'ñe pamo'tsna'tarecmuetpa' ama'trra ñeñt'eye' cobreneto.

²⁷ Ama't pocten amach netsa'tatsto tarro'mar napa' ñeñten Puechemeren ñeñt' pa'paquell pene' ñeñt'ecop tsa'tenet, tarraña attoch ama ya'tsrre'matanetopa' e'ñeca'ye pocte' o'ch netsa'ta. O'ch ahuep oño o'ch pego'tena' all. Erra'tsencha' ñanom pechta' pegoroť ñeñt'ña'pa' o'ch pechete. Puenamopa' allcha'ca'ye pent puetallarr quelle. Ñeñt'ña'pa' o'ch paner ñeñt'ña'pa' alloch petsa'tanet nocop ama't ñaña' pocop.

18

All eñotateney ñeñt' acheñer e'ñe po'ñoč atarr asherben enteñ Yompor (Mr. 9.33-37; Lc. 9.46-48)

¹ Allempoña Jesús'pa' a'p'to'teña' pueyochresha', ñeñt'pa' atet ochet:

—Ñeñt'ey allponey ñeñt'cha' e'ñe pueyochresha' perr Yompor ñeñt' pue'ntañot'sen, yapa' añ yemnen te'pa' o'ch p'otey, ¿erra'tsenoteyte'ñaca'yeña ñeñt'ey atarr sherbets ñeñt'ey atarr amčha'taretoyen entyenyet?

² Jesúsña'pa' cheshatolla čhore'tpa' tomach e'ñe allo'tsa'yenet.

³ Allempoña'pa' atet otanet:

—Po'ñoč napa' o'ch notas: Ñerra'm ama čho sequečpa'huerro sommo'cheña attoch o'ch atet sepena cohuen ñerra'mrrate' añ cheshatoll ñeñt' ama eñotenana' o'ch ommo'chena, sañapa' amate' errotenoť es so'paterroña atto atarr ayochreshatena Yompor pue'ntañoť.

⁴ Ñeñt' allpon ñeñt'cha' e'ñe pueyochresha' perr Yompor ñeñt'ña' acheñer atto o'huañ cohuen enta ñaña'ña ñeñt'pa' o' e'ñe atet perra ñerra'm cheshatoll ñeñt' ama eñotenana' pommo'cheña. Ñeñt'ña'pa' atarr nanac asherben enteñ Yompor.

⁵ Erra'tsenotes sa ñerra'm e'ñe same'ñeñofen na e'ñe cohuen saguēñ ama't ñeñt' ama asherbenaye' entyenet atet ñerra'm añ cheshatoll, na'ña e'ñe cohuen saguēn.

Atto chocmach huaponaya ñeñt'cha' yetpatyene' o'ch atet p'atyeseñ ñeñt' ama poctey' enteno Yompor (Mr. 9.42-48; Lc. 17.1-2)

6 'Ama't erra'tsena ñeñt ama pommo'cheñoŕeye' ame'ñenno atet ñerra'm cheshatoll ñeñt ama eñotenana' o'ch ommo'chena, tarraña ñerra'm esha'ña po'psheñeñ o'ch atet patach ñeñt ama pocteye' enteno Yompor, ñeñña acheñerpa' atarrcha' yoro'cheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoro'chenayayñe ñerra'm ama atet patenana' po'psheñeñ, e'ñech allorocma o'ch çharachetañ mapue' añecmuen pa'çhnoŕo allpon ñerra'm puetse'tamets o'ch huapore'chet oño epo allcha' ño'shach mapue'.

7 Atarr llequëñets acheñenesnacop arr patsro ñerra'm esempo esesha'pa' o'ch atet ptyenanet ñeñt ama pocteye' enteno Yompor. Tarro'mar çhocmach huaponaya ñeñtcha' yetpatyene' o'ch atet ptey ñeñt ama pocteye' enteno Yompor. Tarraña napa' o'ch notas, atarrcha' yoro'cheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet ptyenanet ñamet ñeñt ama't mameshapa' ama pocteye' enteno Yompor.

8-9 'Ñaña o'ch noterrser: Ñerra'm sechets ptyenes ñeñt ama pocteye' enteno Yompor atet ñerra'm sot, setac, seclle', añ poctetsa o'ch sequeçpuerr ñeñt çhocma atet pats'e'tatyenes sechets. Ñeñtpa' e'ñe atet ñerra'mrate' e'ñe allorocma o' sepecherr sot, setac, o' serroterr seclle', o'ch sehua-pore'ter. Añ cohuen socop ama't e'ñe sepo'yota'teñoŕ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch huapore'terrset coñcha'puetso all parraren tso' ñeñt ama ahuañaño ama't errponaña. Ñaña añ cohuen socop ama't e'ñe setcoŕpa' sepshemtatquëñoŕ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeñt ama ahuañaño ama't errponaña. Ñaña añ cohuen socop ama't seclloyoŕ sepshemtaçllo'yeñoŕ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'.

*Acheñ ñeñt ama ame'ñetsopa' arrpa' all atma'ntatarettet atet ñerra'm car-
rnero ñeñt chenquëtsa*

(Lc. 15.3-7)

10 Jesús pa' alla oterranerr pueyochresha':

—E'ñech señoŕa, añepa'chña atarr asherben senten ñeñt ama ommo'chetso ñeñt atet petsa ñerra'm cheshatoll ñeñtña'pa' e'ñech pueñmañesha' yemtena. Tarro'marña te'pa' o'ch notas, ñeñt ama pommo'cheñoŕeye' name'ñenayo ñocpuetpa' eñalletca'yeña po'mllañoŕeñer ñeñtcha' cohuanmpenahuet. Ñeñña po'mllañoŕeñretpa' çhocma Yomporesho'tsenet allña e'ñe cohuen e'mñotenanetña Yompor pue'ntaño.

11 Po'ñoçh na Ñeñten Acheñetosets añecopña nohuapa attoch na'qeshpatyesos acheñenesha' ñeñt chenquëtsa.

12 'Ñehua, ¿ama't atet senteñeña? Ama't erra'tsen acheñer ñeñt echene' shonte' po'carrneror, çharroch çharra' echen tarraña ñerra'm puemocarrña machayoŕa a'chencachpa' pamo'mte'ñapa' o'ch sa'nman allohuen po'potantañ ñeñt o' noventa nuebama all aspeno o'ch ahuo' e'nerraya' puemocarr ñeñt chenquëtsa. Allcha' e' name'tyera'pa' attoçach enter.

13 Ñerra'm ña o'ch enterpa' ñeñtcha'ña atarr coshaterre'. Elloch metanan atto coshenana po'potantañ noventa nueve po'carrneror ñeñt ama paya'tetso.

14 Atetca'ye penaña ñaña Sompör ñeñt' pue'ntaño'tsen; ñapa'cho'ña amaca' mueno o'ch chenca ama't puesheñarro'tolla acheñ.

*Attoch e'ñe cohuen yamo'tstera yemo'nasheñ
(Lc. 17.3)*

15 Jesúsña'p' alla oterraneterr; ñeñt'pa' atet otanet:

—Ñerra'm erroten p'onas semo'nasheñpa' o'ch ahues ñesho e'ñech sapuet o'ch soctape'chatera' e'ñe cohuen. Ñerra'm cho e'mñoterrespa' allempoñapa' o'ch amo'tso't senterra.

16 Ñerra'm soctape'chatueña' amach e'mñotasopa' se'ñ puesheñarr amapa' epsheña ñeñt'cha' sa'poc'tatapreterre'. Atet'cha' se'pa allochñapa' ñeñt'cha' e'ñosets epsheña amapa' ma'psheño'marescha' e'ñosets allempopa' e'ñech po'ño'ch same'ña ñeñt' ñoñets tarro'mar e'ñech attecma otenet.

17 Ñerra'mña atet'ña o' se'pohuerña' amach e'mñoterrisopa' allempoñapa' o'ch soch allohuenet ñeñt' chocma ap'chetsa pame'ñeño'f Yompor. Cotape'chateretepa' ñamet. Ñerra'm o'ch cotape'chatuet allohuenet'ña', ama't ñet'ña amach e'mñoterranetopa' sañapa' e'ñech atta senter ñerra'm po'poñ acheñer ñeñt' ama semo'nasheñeyaye. E'ñech atet senteñ ñeñt' acheñer ñeñt' ama ame'ñetso, atet ñerra'mrrate' ñeñt' puehquëño'fe'na cobra'yene' acheñenesha' quelle ñeñt' gobiernocop.

18 'Ñehua, te' po'ño'chpa' o'ch alla noterriserr: Ñerra'm errotench'a' e'ñe pocte' sent ñeñt'cha' sena'y'es arr patsro, Yomporpa'cho'ña ñeñt' ento'tsen e'ñech attecma e'ñech pocte' enterranet. Ñaña ñeñt'cha' ama pocteye' senteno ñeñt'cha' sena'y'es arr patsro, Yomporpa'cho'ña ñeñt' ento'tsen e'ñech attecma amach pocteye' enterraneto.

19 'Ñaña o'ch alla noterriserr: Po'ño'ch ñerra'm epsheñas arr patsro o'ch e'ñe sa'poc'tatue epsheño'mares ñeñt'cha' senamuennan Nompör ñeñt' pue'ntaño'tsen ñapa' ama't erra'tsena senamueñ chocmach e'ñe atet pennas.

20 Tarro'mar ñerra'm erro'tsen ama't e'ñe epsheña amapa' ma'psheña ñeñt' ap'chetsa e'ñe pame'ñeño'fetan na, naña allpa' allo'tsenench'a' e'ñe ñesheto.

21 Allempoña Pedropa' a'p'to'tenana' Jesús, ñeñt'pa' atet otos:

—Parteshacha', ñerra'm chocma epaye' erro't penen namo'ts, ta'm ¿erponoche'tcha'ña ne'pretne' ñato' e'ñech canch'rrocha ne'pretne'?

22 Jesúsña'p' atet och:

—Napa' ama notenpe e'ñech canch'rrocha pe'pretne', añña notene'p atonochcha' pe'pretne' —ama't canch'rrochcha' charra', ñaña po'poñ canch'err, allponochcha' se'pretne'ña samo'ts.

*Atto Jesús'pa' e'ñotatanet ñerra'm amach e'ñe cohuen ye'pretnannenopa'
Yomporpa'cho'ña amach peretnerrye yaña*

23 Jesús'pa' atet oterraneterr:

—Ñeñto'marña Yompor po'cohuenña ñeñt' atto ayochreshattena ña pue'ntaño'f ñeñt'pa' atet ñerra'mrrate' puesheñarr añcha'tare't. Ñeñt'ña'p' añcha' muenen o'ch a'poc'tatyesan atto te'ba'y'eñ allohuen pa'taruasañre'chno.

24 Allempoña all e'ñe a'poc'tatyesanetpa' allña'p' huapatoñet puesheñarr pa'cheñer ñeñt' tebene' patoner quelle ñeñt' allpon tebenpa' ñeñt' oteñet shonte' millones.

25 Nañapa' ama echenano allpon quelle alloch tsa'terra ñeñt' allpon teben. Po'patronarña'p' atet otanet: "Te'pa' o'ch sepomuer epuet pue'tapor epuet ñaña puechemerasha' ñaña o'ch sepomhuerrñañ errponte' e'chyen allochñapa' ama't allapa' o'ch tsa'terrna atto tebenen."

26 Allempoñapa' allenta concorpana'cha pa'taruasañer ñeñt tebene', ñeñtpa' atet otare'ch: "Amach nomporcha' pema'yore'tatsetno, netsa'tuerrpach acoña."

27 Po'patronarñapa' alla morrentera allenta a'rroyer allempocma e'shohuerrñañ all quellquëññañet ñeñt allpon teben.

28 Ñeñña pa'taruasañerpa' o' cha'nerr entuerran po'psheñeñ ñeñt parro ataruasatarettenet ñeñt tebene' ñaña, ñeñtpa' e'ñe coñe'ta quelle. Ñaña'pa' cha rrema'huerre'pa' allenta mueñoche' atet otuer: "Petsa'terrnañaca'ye ñeñt allpon petebenen."

29 A'rroyerpa' ñaña'pa' allenta concorpana'tana ñaña ñeñt o' mueñocho'tue. Allña'pa' atet och: "Amach pema'yore'tatsetno, netsa'terrpach acoña allpon ñeñt netebeneñ."

30 Ñaña'pa' ama't mameshapa' ama pocteye' eñche, ñeñtpa' anemñ allcha' yottamñsach. Allña'pa' allach esempohuach e'ñe tsa'tuerra ñeñt allpon teben.

31 Añña po'potantañechnoña ñeñt parro ataruasatarettenetpa' ñetña'pa' ama't mameshapa' ama pocteye' eñcheto ñeñt atet pa' ñeñt e'ñe atta e'shohuarettertsa ñeñt allpon tebane't po'patronar. Allempoña ñetpa' allenta ahuanmuet po'patronaresho. Allña'pa' a'metamñperet.

32 Allempoñapa' o' alla agotater po'patronar. O' cherr po'patronareshopa' atet otapuer: "Pa na'taruasañre, ama't mamesha ama cohueneshayape. Paña'pa' atta potare'ten napa' ahuo'ch nepretnerreñ ñaña'pa' e'ñe atta ne'shohuerrnañ ñeñt allpon petebenen."

33 Ama't e'ñe poctey ñapa'cho'ña o'ch pemueryañ ñeñt parro petaruasen. Atet nepena na e'ñe cohuen nemuererrpa."

34 Allempoña po'patronarpa' e'ñe patsrre'mueñsha' pomuer, o' apuer ñeñtcha' coñchate' esempohuañen allcha'ña e'ñe tsa'tuerrana ñeñt allpon teben.

35 'Sapa'cho'ña e'ñe puesheña'ttsosña ñerra'm amach sepretnerre samo'tspa' e'ñech attecma perres saña Nompore' ñeñt pue'ntaño'tsen. Chocmuepa'ch e'ñe cohuen sepretnannenaña sa e'ñe seyo'chrocmañen.

19

Atto Jesús'pa' ye'chatosanet ama asanna'tpahuoyaye

(Mr. 10.1-12; Lc. 16.18)

1 Serrpare'tuanerr Jesús'pa' err Galileo't. Arr cherr Judeo, ñeñña Judeapa' e'ñe alla Jordanaso yomta'n.

2 Co'ta'huanererr shonte' acheñenesha' allña'pa' a'crratyesuerraneterr allohuenet patsnañeteret.

3 Allña'pa' o' alla hua'cherrñañerr ñaña fariseonesha'. Ñetpa' añ muenenet e'ñe puehquëño'tetpa' o'ch eñorachet ñeñt ama cohuenayaye. Attoña ñetpa' atet otoset:

—Ta'm ¿poctey'e' o'ch yeser yetapor ñerra'm esempo erro'tenot'?

4 Jesús'pa' atet otapanet:

—Ama't selleyareña atet oten Yompor po'ñoñ ñeñt aquellcare't ahuatoteñ. Ñehua, allpa' atet oten, Yomporpa' e'ñe ahuatoten allempoteñ es ye'chcatyes allempo ye'chcatan ñaña asheñorr, ye'chcatan ñaña peno.

5 Allempo Yomporpa' atet ot: "Ñeñto'marña yacmapa' ñerra'm esempoch sena'ta, coyanesha'pa' o'ch echan puerrollar, añ poctey o'huañcha' tama yemteñet pamo'mte' allochña'pa' yacmapa' attochña e'ñe parrocmat epuet puetapor. Attoña epsheño'maretpa' e'ñech patrpa' po'chets penet."

⁶ Attotcha'ña o'huañcha' puesheña'tetstet, allochñapa' o'ch e'ñe puesheñarratet. Ñeñt'atto Parets e'ñe patrratatan yacma epuet puetapor amach čha ellopa' alla sannerreto.

⁷ Ñetñapa' atet otereterr:

—Ñerra'm po'ñočh atetpa' ¿eso'mare'tña nanña Moisés ñoñets all oteneý o'ch yaḡ yetapor papell aquellcaret attoch yesannerra, allempoñapa' e'ñech pocte' o'ch yeser?

⁸ Ñañaapa' atet otteraneterr:

—Sapa' ama es sečhenoyo seýočhro ñeñt'o'marca'yeña Moiséspa' muenatas o'ch sese' setapor. Ama't atet muenataseña' tarraña Yompor e'ñe ahuatoteña' amaca'yeña atteýe' oteno.

⁹ Na te'pa' o'ch notas: Ñerra'm esesha' serre' puetapor, puetaporñaapa' ñerra'm ama čho aguēnano po'psheñeñ yacma, ñeñt' e'ñe atta serre' puetapor, ñañaapa' čhach ochña'tamḡperrana puetaporeshe'mañ ñerra'm o'ch alla yorerranerr po'poñ coyanesha'. Ñeñt'pa' ama pocteye' enteñe Yompor. Ñaña ñeñt'cha' yorerre' coyanesha' asaret, ñeñt'ña yacmarpa' čhach chetapreten taporets. Ñeñt'pa'čho'ña ama pocteye' enteñe Yompor.

¹⁰ Pueyochresha'ñapa' atet ochet:

—Ñerra'm amate' asapahuo yetapor ama't ahuatapa' amate' tama pocteyayeña yocop o'ch yeyore coyanesha' ñeñt'cha' yetapor yeḡa'.

¹¹ Ñañaapa' atet otanet:

—Tarraña atetpa'čho'ña e'ñeca'ye poctet' tarraña ama allohuenacmaye' čhennasoña seýočhro atet tarro'mar ama allohuenacmaye' seyčhenofña atet. Ñeñt'pa' aña eñotene' ñeñt' atet cotape'chaten Yompor.

¹² Ñehua, atet ñerra'm puesheña'tets yacma ñeñt' atta eñalletenet e'ñech atta yečhquēnet po'čets amach mueneñeto coyanesha'. Ellonetpa' eñall ñaña po'potantañ yacmanesha', ñetñapa' čhoch acaparettenet ñeñt'o'marña amach mueneñeto coyanesha'. Ellonetpa'čho'ña eñall ñaña po'potantañ yacmanesha', ñetñapa' añecpach ama mueneñeto coyanesha' esheccha' e'ñech aña ma'yočhrenet Yomporecop attoch atarr ayochreshattena ña pue'ntañot. Ñeñt' atet cotape'chenet Yomporecop ñeñt'pa' e'ñe pocte'. Attepa'chña pet ñerra'm Yompor cotape'chatenahuet atet.

*Atto Jesús'pa' bensare'tamḡsapan cheshanesha' ñeñt' huapatoñet
(Mr. 10.13-16; Lc. 18.15-17)*

¹³ Allempoñapa' huačha'tachet ñaña shonte' cheshatollesha' Jesúsesho. Ñetpa' añecopña huačha'tachet o'ch a'ḡlla'yesapanet Jesús attoch bensare'tamḡsapanet. Jesúsña pueyochresha' allempo entapan ñeñt' huačha'tate' cheshaneshachno ñetñapa' ama pocteye' eñchet o'ch anmoset cheshatollesha' Jesúsesho ñeñt'o'marña ama amnatarettapueto.

¹⁴ Tarraña Jesúsñapa' atet otanet:

—Pocte'ñačho' semnachñaca'yeña cheshanesha' onosetepa' e'ñe nesho. Amachca'ye čha sepatare'tatstapaneto tarro'mar allohuen ñeñt' atarr neýemtenaya na e'ñe attet ñerra'mrrate' cheshatoll, ñetcha' o'patenetña Yompor po'cohuenña ñeñt' atto ayochreshattena ña pue'ntañot.

¹⁵ Allempoña Jesús'pa' a'ḡlla'yesapan cheshanesha' allohuenet e'ñe puesheña'ttset. Allempoñapa' ahuer allot.

*Atto puesheñarr ñeñt' huepueshameñ ñeñt' atarr ečllayoret ñañaapa' eñorana'tosana Jesús
(Mr. 10.17-31; Lc. 18.18-30)*

16 Allempoñapa' huapa puešheñarr yacma Jesúsesho, ñeñt'pa' ora huepuešhameñ. Ñaña'papa' atet otos:

—Maestro, ñapa' atarr cohuen acheñreḗ, te'pa' o'ch potapuen ¿errotena'tcha'ña neḗaña na e'ñe cohuen attochña napa' corretsanach e'ñe tayoteñ ama't errponañohuen?

17 Jesúsñapa' atet otaḗ:

—Eso'mare't potenenña napa' atarro' cohuen acheñren. Arr arromñañenesha' ama't e'ñe puešheñarrapa' ama eñalleña ñeñt' e'ñe cohuen acheñer. Ñapñaña Yompor ñeñt' e'ñe po'ño'ch cohuen. Ñerra'm aña' pemnen attoch ñapa' corretsaḗach e'ñe tayoteñ ama't errponañohuen añ poctetsa ḗocop o'ch e'ñe peḗohuoñ ñeñt' atet oten Yompor.

18 Huepuešha'ñapa' alla a'ḗto'tererr:

—¿Erra'tsente'ña ñoñets ñeñt'cha' atet neḗohua?

Jesúsñapa' atet otererr:

—Ñeñt'pa' aña'ye, amach pemsatsto acheñ, amach pechtapretatsto taporets, amach petyesatsto, amach petoma'tamḗsatsche ḗamo'ts e'ñe atfa.

19 Ñaña e'ñe pemorrenteño'tpa' pemñcha'na'chcha' ḗompor ñaña ḗachor. Ñaña aña' atarr cohuen pemorrenta ḗamo'ts e'ñe atet atarr pemorrentena e'ñe ḗañeña.

20 Huepuešha'ñapa' alla oterranerr Jesús:

—E'ñe cheshoteñ ora añechnopa' napa' e'ñeca'ye netsotueñ. Ta'm ¿erra'tsenmeñte'ña ñeñt' nepalltena?

21 Jesúsñapa' atet otererr:

—Ñerra'm añ pemnen o'ch e'ñe petsotua ñeñt' pepalltenmeñ te'pa' aña'ña atet peperra, o'ch ahuerreḗpa' o'ch pepomhuerr ora allpon ñeñt' pechyen o'ch ḗapa'yera' huocchañneshachno ñeñt' atarr es palla'yetsa, attochña ḗapa' pecherrcha' ñeñt' atarr nanac sherbets Yompor pue'ntaño. Allempochña pehuerrapa' o'ch ḗocterren attoch e'ñe neyochresha' neperreḗ e'ñe poctacma.

22 O'ña e'mhuan huepuešha' ñeñt' atet och Jesús'pa' ñaña'puellquëñesha' ahuer tarro'mar ñapa' shonte' esocmañen echyen.

23 Jesúsñapa' atet otan pueyochresha':

—Po'ño'ch napa' o'ch notas: Ñeñt' atarr eçllayore'tpa' atarrca'ye nanac echarr attoch agapoñet Yompor po'cohuenña ñeñt' atto ayochresha'ttena ña pue'ntaño't.

24 Ñeñt'pa' atetcha' netma'ntacha. Yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añeñollponatollo atet ñerra'mrrate' acosh puetatollo. Ñeñt'pa' atetca'ye penaña acheñ ñeñt' eçllayore't ello atarr torrapo' o'ch agapan ñaña Yompor po'cohuenña ñeñt' atto ayochresha'ttena ña (tarro'mar ñetpa' ama mueneñeto o'ch sehuanmuet ñeñt' atarr morrentenet ñet attoch pueyochresha' perranetañ Yompor).

25 Pueyochresha'ña allempo e'met Jesús atet oten, ñetñapa' cha muene' lleca'rrtetpa' atet otanna'tyenet:

—Tarraña ñerra'm atet te'pa' amate' esesha' a'queshḗataretterrtso ama't puešheñarra tarro'mar yapa' yeñoteñca'ye huaquëshpa' amaca' esho'tenoña acshequeto.

26 Allempoña Jesús'pa' atfa cohua'yesanetpa' atet oterraneterr:

—Sa arromñañeneshaspa' amach es errotenaye' apen senteno. Tarraña Yomporpa' ama eñalle ñocop ñeñt' atarr torrapo' enten.

* 19:24 Ñehua, Jesús añ toma'ntatanet camello ñeñt' payara penet all pa'nyo, ñeñt' e'ñe allpon ñerra'mrrate' huaquësh.

27 Allempoña Pedropa' atet och:

—Partseshacha', po'ñoçh yapa' o' e'ñe yesuanom ora allohuen attoch e'ñe yocterreþ. Yapa' ¿eso'tcha'ña apuerreyña Yompor?

28 Jesúsapa' atet otanet:

—Po'ñoçh notenes, allempoch etserrater terr pats allempoch nanorruerr neconaño allcha' necohuenetuerra nepartsoteñoõ na Ñeñten Acheñetosets sapa'çho'ña allcha' sanorryesuerr seconañeçhno e'ñe puesheña'ttsos çharra' puechena epa seconañ ñeñtes noctene'. Sa ñeñtes noctene' allcha' sanorryesos allotcha'ña sa'mcha'taretterraña añecop ñeñt' çharra' puechena epa Israel po'mrenñenesha'.

29 Jesúsapa' alla oterraneterr:

—Allohuen erra'tsencha' acheñer ñeñt'cha' e'ñe sehuanmue' allohuen ama't pa'paclohuen, ama't pa'mo'nasheñnesha' ñato' poçhanesha' ñato' pompor, pachor ñato' po'patseñ, attochña na e'ñech cohuen sherberrnet, ama't erra'tsencha' ñeñt'cha' sehuanmue' allohuen, elloña ñetpa' o'ch alla aguërret shonte' esocmañen ñeñt' atarr cohuen. Ama't allponapa'tets sehuanomyesnomuet, elloña çharrochcha' çharra' alla agapyerret. Elloña tsapaonetpa' o'ch aguërret ñeñt' alloch ñetpa' corretsetach beñecpuen pocsheñeshocmañen.

30 Te'pa' señocheapa'ch, eñall shonte' acheñ ñeñt' ama esoye' senteno sa te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeñt' atarr asherben sentyen sa te', tarraña ñetña allempopa' amach asherbenaye' enterraneto Yompor.

20

Atto Jesúsapa' toma'ntaterraneterr e'ñech allponeshacma atsa'tarettá allohuen ataruasañeçhno pamtarr yet

1 Yompor po'cohuenña ñeñt' atto ayochreshattena ña pue'ntañõ, ñeñt'pa' añ toma'ntena ñeñt' atet pena puesheñarr ane'tañ. Ñaña'pa' ahuatecma ahua'muen e'nyenaya' acheñ ñeñt'cha' taruasat pa'mro o'ch toteññañeta' puenarení.

2 Ñeñt' allpon entospa' atet otosanet: “Ama't semno o'ch setaruasena' na'mro. Pamta'tetspa' netsa'tasach allpon quelle ñeñt' paterr denario.”* Ñetña'pa' e'ñe pocte' eñchet allenta mueñanet pa'mro, allcha' totoset narmetsmo.

3 O'ña enome'ta'muenpa' o' alla ahuerterr allecma shontena acheñenesha' ñeñt' e'nyene' taruas. Allña'pa' entuerranerr tama allponsheña, ñetpa' ama es otteneto.

4 Ñaña'pa' atet otosanet: “Sapa'çho'ña ñerra'm semne'pa' o'ch setaruasa' na'mro; napa' netsa'tasach allpon ñeñt' poctetsa.” Ñetpa'çho'ña allenta ahuanmuet pa'mro allcha' totoset ñamet narmetsmo.

5 Allempo çhap poctopa' alla ahuerterr ane'tañ, alla entuerranerr po'potantañ acheñ. Ñetpa'çho'ña attecma otuerraneterr ñeñt' atet otan ñorra' po'potantañ. Ñetpa'çho'ña allenta mueñerraneterr pa'mro allcha' totoset ñamet narmets. O'ña ellerrenmochpa' o' alla ahuerterr, allña'pa' entuerranerr po'potantañ acheñ. Ñetpa'çho'ña e'ñe attecma otuerraneterr ñeñt' atet otan ñorra' po'potantañ. Ñetpa'çho'ña allenta mueñerraneterr pa'mro.

* 20:2 Denariopa' quelle ñeñt' allpon tsa'tenet pamtarr ñeñt' taruaset all pa'nyo.

⁶ Atteña o' ellerrenpa' o' alla ahuererr; allñapa' entuerranerr po'potantañ achen, ñetpa'cho'ña ama es otteneto. Ñetpa'cho'ña atet otuerraneterr: "Sapa' ¿eso'mare'tña atta sellapene't tom'cha'tyesetsña arrma? Amaña es sotteno."

⁷ Ñetñapa' atet ochet: "Yapa' amaca'yeña eseshaye' yetaruasatenaye ñeñfo'marca'ye ama es yotteno." Ñañapa' atet otanet: "Ñehua, sapa'cho'ña o'ch ahues na'mro, ama't mameshapa' setaruasa'nen. Napa' netsa'tasach allpon ñeñt poctetsa."

⁸ O'ña puenaso'tenpa' ane'taññapa' otosan ñeñt cohuanpene' allohuen pa'taruasañer: "Te'pa' o'ch pechore'ter ataruasañnesha', o'ch petsa'tyesapuerranet e'ñe puesheña'ttsocmuet. Añcha' ñanom petsa'tapuerra ñeñt taruasosets chenta' alloteñach pamo'tech tsa'tyesapuerrahuet attotach petsa'tuanet ora allohuenet ama't ñeñt aromtañohuen."

⁹ Ñeñña taruasosets ellerronet ñetñapa' o' hua'cherret. E'ñe allponeshacma atsa'tare'tyesapuerret ñeñt paterr denario.

¹⁰ Atteña allempo o' hua'cherra ñaña ñeñt taruasosets ahua'tecma, ñetñapa' cha otenapuetañ ñato' atoncha' atsa'tare'tapuerret. Tarraña ñetpa'cho'ña e'ñe puesheña'ttsocmuetpa' e'ñe allponeshacma atsa'tare'tapuerret ñeñt paterr denario.

¹¹ Allempo agapetpa' ñetñapa' cha po'poñ entet, cha e'moñe'tueret ane'tañ.

¹² Ñeñfo'marña atet ochet: "Añenesha' ñeñt huapatsa chenta'pa' ñetñapa' mamesha taruasoset. E'ñe allponeshacma petsa'tapuerranet ñeñt e'ñe allpon petsa'tapuerrya yaña. Ama't yapa' o' yellapen ya'ñetse' yetaruas, nanac etay atsrret all yetaruasen. Eso'mare'tña e'ñe allponeshacma petsa'tapuerrya ñeñt allpon petsa'tapuera ñaña ñeñt taruasosets mame'."

¹³ Allempo atet otuer ataruasañ, ane'taññapa' atet och: "Ama, masheñcha', choye' neshquënpe, e'ñe allpona netsa'tenpa' ñeñt allpon ya'poctata'muen aromtaña.

¹⁴ Te'pa' panerr peçllayor, orrerreþ. Napa' e'ñe pocte' nenteñ na allponcha' netsa'cha ñeñt huapatsa chenta' allpon netsa'tasa saña.

¹⁵ Sapa' ama't pocteye' senteñe allpon ñeñt e'ñe nocma napa' e'ñech atet nepe' ñeñt atet nemnen na. Ñato' tarro'marte' cha muene' se'moñe'tenenña' napa' atarrca'ye amuerañan."

¹⁶ Ñeñfo'mar te'pa' o'ch noterrser: Ñeñt ama esoye' senteno sa te' tarraña ñetña allempopa' atarrcha' asherben enterranet Yompor. Ñeñña atarr asherben sentyen te', ñetña allempopa' amach tama asherbenaye' enter-raneto Yompor. Ñeñfo'mar te'pa' o'ch alla noterrser: Ama't shonteñña ñaña ñeñt ahua'ñareñ ñeñtcha' neyochresha' nepperreñ, tarraña ñetpa' e'ñe puesheña'ttseta ñeñtcha' e'ñe pocte' nenterr na ñeñtcha'ña e'ñe neyochresha' neperr poctacma.

*Allempo Jesúsapa' alla eñotaterraneterr ñapa' chocmach amtsare'tterra
(Mr. 10.32-34; Lc. 18.31-34)*

¹⁷ Jesúsapa' ahuenerr Jerusalénoneñ pueyochreshohuen. O' ahuanenan pueyochresha' a'yenteye' allñapa' atet otnenanet:

¹⁸ —Te' po'ño'ch o' ahueney Jerusaléno, allcha' pomataterrnet na Ñeñten Acheñetosets. Añcha' nerrmaterre' ñeñt pa'm'cha'tare'ternesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anareñ. Ñetñapa' atetcha' otyesnet na'mtsare'tterrepa'to',

¹⁹ o'ch pomuerrnet po'poñ acheñesho ñeñt ama judioneshayaye. Ñetña pueche'tatseteñoŕetanpa' allcha'ña achm̄are'terrnet, ashterrnetcha', attotcha'ña o'ch corso'tam̄perrnet, tarraña poma'pamtañoŕch alla netanterra.

Ñeñt pachor pen Jacobo ñaña Juan, ñañaapa' enamuenan Jesús attoch anorrcha'tyesuerr puechoyoresha' Jesúsesho
(Mr. 10.35-45)

²⁰ Allempoñapa' ponmosya ñeñt pachor pen Jacobo ñaña Juan ñeñt Zebedeo puechemeresha'. Huapa epuet epsheño'mar puechoyor, ñañaapa' concorpana'tosana Jesús attoch es enamos.

²¹ Jesúsñapa' atet otaḗ:

—¿Eso'tña pemnen?

Ñapa' atet otos:

—Napa' añ nemnen te'pa' o'ch pemnatapon añ nechoyor epsheño'mar o'ch anorruerret pesho allcha' pa'm̄cha'tareterra e'ñe pecohuenño. Puesheñarrpa' anorrosepa'ch pecohuenroŕ, po'psheñeñña' anorrosepa'ch pe'chcoŕoŕ, allcha' cohuentapreŕterpet.

²² Jesúsñapa' atet otanet:

—Sapa' amaca'ye señoŕeñe ñeñt po'ñoŕch senamuenen. Añca'yeña senamuenen attoch semueroŕhtapreŕterrna saña. Ta'm ¿e'ñeŕe' po'ñoŕch poŕte' senteñ o'ch semueroŕchterra saña tarro'mar napa' ŕhocmach na'mueroŕhtatareŕterra?

Ñeñt mueroŕhteñetspa' Jesúsŕpa' atet toma'ntatanet ñerra'mrreŕe' atarr pesherr es yorren orran̄tso ñaña atto yapatareŕttena e'ñe atet ñerra'mrreŕe' ŕho ya'mtsareŕterra Yomporecop. Ñetñaŕpa' atet ochet:

—Yapa'ŕho'ña atetcha'ca'ye yepe'.

²³ Ñañaapa' alla oŕerraneterr:

—Ñehua, po'ñoŕchpa' sa'mueroŕhtatareŕterrach saña attescha' ñerra'm na, sa'mtsareŕterrach saña. Tarraña añña attoch sanorryesos nesho necohuenroŕ ñaña ne'chcoŕoŕ allcha' secohuentapreŕterrna ñeñtŕpa' amachca'ye naye' semnaterraye. Añcha'ña anorryesuerrets all ñeñt e'ñe o'patatenna Nompore.

²⁴ Añña po'potantañ pueyochresha' ñeñt ŕharrasheña allempo e'met ñeñt atet enamuen Jacobo epuet pa'mo'nasheñ Juan, ñetñaŕpa' ama poŕteye' eñchet o'cha muene' e'moñe'chet.

²⁵ Allempoña Jesúsŕpa' alla ŕhore'terranet allohuen e'ñe ñesho ñeñtŕpa' atet otanet:

—Sapa' señoŕeñe' ñeñt atet pena po'poñ acheñenesha' ñeñt ama judioneshayaye. Ñet ñeñt pa'm̄cha'tareŕter penet e'ñech pa'm̄cha'noŕchteñoŕcmañen pomnaren pa'yenan allohuen pueyochreshaŕchno.

²⁶ Sapa' arepa'chña atteye' seḗanna'tatsto e'ñe sommo'cheñoŕ. Socoppa' añña poŕtetsa o'ch atet sepena. Ñerra'm erra'tsenotes ñeñtes atarr añcha'taretoyen entetsañ ñeñtes acheñres socoppa' añ poŕtetsa o'ch atet senterra ñerra'm ama esoshe'mayayso ñeñt atet pena ñeñt atta atarr taruaset po'potantañecop.

²⁷ Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ poŕtetsa o'ch atet senterra ñerra'm ama esoyayso allochñaŕpa' attochña e'ñech cohuen setorrna po'potantañecop atet ñerra'mrreŕe' acheñ ñeñt atarr taruaset e'ñe atta.

²⁸ Atet ñerra'm na Ñeñten Acheñetosets, napa' ama añecpaye' nehuapo añe patsro allochñaŕpa' sapa' o'ch atta atarr sesherḗapuen na atet ñerra'mrreŕe' napa' atarr añcha'tareŕ sentenen. Napa' añecopña nehuapa allochñaŕpa' nachña sesherḗoseña sa, ñeñto'marña napa' naña pomostsa nañeña o'ch

nerromos socop attochña netsa'tuerrnasa so'chñar ñeñtes shontes pa'namen acheñres. Attochña sapa' amach sañeña rromatso so'chñarecop.

Allempo Jesús a'crraterranerr epsheña aporo'yet

(Mr. 10.46-52; Lc. 18.35-43)

²⁹ Alloñapa' alla meterreterr Jericótpa' coña'huanererr shonte' acheñenesha'.

³⁰ Allcha' oñmuetpa' allñapa' ahuepa't anorros epsheña aporo'yet e'ñe toñetoño. Ñetña eñotatareñtet añ huetsa Jesús. Ñeñña aporo'yetpa' allenta rranare'tapet Jesús, ñeñtpa' atet otapet:

—Pemueraye'chnomya, Ayochreshate, p'apa' ñeñtep' Davidna'tarep'.

³¹ Acheñenesha'ñapa' cha muene' che'ptare'tnometña aporo'yet, atet otoset:
—O'hua semma.

Aporo'yetñapa' elloña alla rranare'terreterr atet otereterr:

—Pemueraye'chnomyañaca'ye, Ayochreshate, p'apa' ñeñtep' Davidna'tarep'.

³² Jesúsñapa' alla tomos o' chore'tanetpa' atet otanet:

—¿Eso'tña semnen ñeñtcha' atet neposes?

³³ Ñetñapa' alla otereterr:

—Ayochreshate, yapa' añ yemnen o'ch pecuatnomuey attoch o'ch cohuen yenterrapa.

³⁴ Jesúsñapa' allenta muerosanet attoña ñapa' a'p'llacle'chosanet. A'p'llacle'chuanetpa' aporo'yetñapa' allorocma enterret e'ñe cohuen. E'ñe cohuerretsetpa' cha coña'nmuert ñamet Jesús.

21

Allempo chap Jesús Jerusaléño

(Mr. 11.1-11; Lc. 19.28-40; Jn. 12.12-19)

¹ Atteñapa' o' cha'cha'tet allame'tets Jerusaléño. Chapuet aspeno ñeñt pa'so'cheñ Olivopen. Allñapa' allo'tsen anets ñeñtpa' añ pa'so'cheñ Betfagé. O'ña chapmochet all anetso,

² Jesúsñapa' atet otnoman epsheña pueyochresha':

—Sapa' o'ch sota o'ch se'chap a'yenteye' e'ñe allara anetso. Allñapa' allcha' sentos ashen all huanquëñet epuet ñaña puechoyor ñeñt rre'ptor. Ñeñña ashenpa' o'ch sepyañpsospa' o'ch sanerrnan.

³ Ñerra'm esesha' erro't sotapue' sañapa' atetcha' sotosanet: “Yepartse-sharca'ye muenene'ña añ ashen. Mameshapa' o'ch alla apuerrsa'.”

⁴ Ñeñtpa' tarro'mar atet p'a allochñapa' attoch etsota añ po'ñoñ ñeñt a'mtaye't ahuat Yompor po'ñoñ. Ñeñtpa' Yompor eñorataye't atet:

⁵ Atetcha' soch sióno'marnesha' ñeñtara jerusaléño'marnesha': “Secue'tach, te'chca'yeña huaponasaña ñeñtcha' Sa'm'cha'tareter seperr. Atto huena ñapa' amaca'ye pommo'cheñofeye' chapoña all, ñeñto'marña ama't rre'ptorechora ashenpa' ñeñtachca'ye monta'nena.” Arrpa' allohua huañ añ po'ñoñ ñeñt a'mtaye't ahuat Yompor po'ñoñ.

⁶ Allempoña pueyochresha'ña ñeñt mueñapa' ñetñapa' allenta ahuanmuert all anetso. E'ñe atet otapanet Jesús, ñetñapa' e'ñe'cho' atet p'oset.

⁷ Allempoñapa' huapaterrñañet ashen epuet ñaña puechoyor. Ñetñapa' nohuerret pa'shtam ashnache'ño'pa' montatueret Jesús.

⁸ Shonte' acheñenesha' ñetñapa' totma'tyesoñet pa'shtam toño allcha' oñem Jesús. Po'potantañe'chnoñapa' tsorrm'o're'tyeset tsach pue'mo'rer allo topane'tyeset toñ.

⁹ Allohuen acheñenesha' ñeñt' otachetsa ñaña ñeñt' cota'huanene' chenta' ñetñapa' puerrannarteñotetpa' atet' atarr cohuentatyesneññañetpa' atet' otenet:

—¡Acsherrapo'ch allohueney! ¡Aye'chochtaterrapo'ch Jesús ñeñt' amcha'taret' David po'mreneñ! ¡Aye'chochtaterrapo'ch Jesús ñeñt' llesensen Yompor! ¡Ya'ye'chochtaterrñañepa'ch Yompor Parets ñeñt' pue'ntaño'tsen!

¹⁰ Atteñapa' o' chap Jesús Jerusaléno. Chap allpa' allohuen anetso'marnesha' epaye' cohuanrrortapet. Ñetñapa' atet' otyeset:

—¿Esesha'te'ña añ'acheñer?

¹¹ Acheñenesha' ñeñt' cota'nene'pa' ñetñapa' atet' otoset:

—Añca'yeña Jesús ñeñt' a'mtene' Yompor po'ñoñ. Ñapa' Galileotca'ye huena allara anetso Nazareto.

*Atto Jesúsapa' a'cohuentatosan Parets pa'paquëll
(Mr. 11.15-19; Lc. 19.45-48; Jn. 2.13-22)*

¹² Allotña Jesúsapa' be'tosos Parets pa'paclo. Allñapa' mueño'tuosan allohuen ñeñt' pomatsre'tetsa all ñaña allohuen ñeñt' rañta'yetsa. E'ñe cha'nmacha'tatosanet allot, a'coye'tamñpsosanet po'mesachno allecma camyatyenet po'çllayoret, a'coye'tuosan ñaña allecma anorryen ñeñt' pomuene'yepéchno.

¹³ Allempoñapa' atet' otosanet:

—Yompor po'ñoñ ñeñt' atet' anuaret' ahuatoteñ allñapa' atetca'ye oten Yompor: “Añ ñeñt' nepaquëll nepenpa' añecpaca'yeña sherben allecmach ma'yochennet.” Tarraña sañapa' e'ñe atet' sepeññañña Yompor pa'paquëll ñerra'mrrate' eñeñ ñeñt' epotyetsa mapuetpono.

¹⁴ Allña Parets pa'paclopa' hua'cha'toña aporo'yetechno ñaña ñeñt' checa'repayets. Ñañaapa' e'ñe a'crratyesapanet.

¹⁵ Añña ñeñt' pa'mcha'tareternesha' pen allohuen judionesha' po'cornaneshar epuet ñaña ñeñt' atarr etsotayenayeñ ñoñets ñeñt' atet' anaret, ñetñapa' entoñet ñeñt' atarr cochnesha' atet' orrtatyen Jesús ñeñt' ama't eseshapa' ama puentareto. Ñaña e'mueññañet cheshanesha' all Parets pa'paclo puerranarotetpa' atet' otyenet:

—¡Aye'chochtaterrapo'ch Jesús ñeñt' amcha'taret' David po'mreneñ!

Ñetña atet' entetpa' ñeñt'epa'tcha' atarr atsrre'matahuet.

¹⁶ Allempoñapa' atet' ochet Jesús:

—¿Ama't pe'muenoña atet' otachre'tapa' cheshanesha'?

Jesúsñapa' otanet:

—Ne'mueñca'ye. Sañapa' ama't selleyareña Yompor po'ñoñ. All anaret' ñoñetspa' ñeñt'ña atet' oten:

Ama't cheshatollesha' e'ñe puenamotet e'ñech cohuen pe'ñoratos a'chota'chre'teñtso. Ama't ñeñt' ora momuenmeñ pe'morrtatoscha' e'ñe cohuen pocop.

¹⁷ O'ña yerpatuerranet añ'ñoñets ñeñt' atet' anaret' ahuatoteñ ñocop, allempoña sa'nerranet ñeñt' anetsrotpa' o' alla ahuererr Betanio. Allpa' allecma ommuena.

*Allempo Jesúsapa' eñora higoche'cop amach eñalletatsto pue'mer
(Mr. 11.12-14, 20-26)*

¹⁸ Tsapa't puetaren alla ahua'muener Jesús anetso Jerusaléno. Toñoñapa' cha cheporra'nma.

19 Allñapa' entnoman higoch toñetoḗño'tsen. Ponmosya ama entoñe pue'mer, pasopanrepa'tcha' entosñañ. Jesúsña chepa'tcha' eñorosta higochecop, ñeñt'pa' atet otos:

—¡Arepa'ch eñalleterro pue'mer ama't e'ñe ahuata!

E'ñe otue'pa' allorocmuepa'tcha' hueya'huaña pasopaner.

20 Pueyochresha'ñapa' e'ñe enteñet o' hueya'huaña higochpan. Ñetñapa' atta cohuanrrorteñet, atet otanna'tet:

—Errotenotuañaca'yeña o' a'uyatachña e'ñe mamecmate'.

21 Jesúsña atet otanet:

—Po'ñoçhca'ye o'ch notas: Ñerra'm seyemteña Yompor, ama çhoye' se'charrtateno seyocher, amach añayaya atet seḗo atet neḗa' higoch. Añe'nachña e'ñe setsoten ñeñt' ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspenetecop, “Añ aspenetpa' rrote'tepa'ch arroḗ, arrepa'chña esha'tosa sa'po allcha' e'ñe chencosa”, aspenetñapa' atetcha'cho' ḗonasa.

22 Ama't allohuen erra'tsencha' es senam' Yompor e'ñe sema'yocheñoḗ, ñerra'm cho senamueñ e'ñe seyemteñoçmañen, ñeñt'ñapa' sagaḗcha'.

Atto allsensareḗtena Jesús

(Mr. 11.27-33; Lc. 20.1-8)

23 Allempoña Jesúsapa' o' alla çherrerr Jerusaléño, allñapa' be'tosuerrerr Parets pa'paclo. Allñapa' yeçhatuerranerr acheñenesha'. Atto yeçhatenan acheñenesha'pa' allempoña huacha'toña ñaña ñeñt' pa'm'cha'tareñenesha' pen allohuen judionesha' po'cornaneshar epuet puesheña'tets ñeñt' pompor-nesha' pen allohuen judionesha'. Ñetñapa' atet otoset:

—Ñehua, yapa' añecop yohuena yemneñ o'ch ḗotey ¿erroḗe't apuenpetña llesens? ¿Esesha'tña ḗapueñe'ña llesens attot ḗorrtatyenña ñeñt' çhocma attecma peḗa'yena?

24 Jesúsñaapa' atet otapanet:

—Ñehua, napa'cho'ña nemneñ o'ch na'ḗto'tapas sam'a ama't patrra ñoñets. Ñerra'm sanaposencha'pa' napa'cho'ña attochña notapas nam'a allot apuen-netña llesens ñeñto'mar atet nepena.

25 Sapa'cho'ña o'ch sotosen, ahuañmo'cha allempo apate't Juanañ Yomporecop, ñapa' ¿eseshatña llesense' ñato' Yompor amapa' acheñaḗe' apue'ña llesens? Nemnen o'ch sotosen ñeñt' atet soçtape'chen sa.

Ñetñapa' e'ñe a'nahua otanna'tyeset:

—Ta'm errotcha'ca'ye yochte'. Ñerra'm çha yoch Yomporeshoḗca'ye apetña llesens, ñapa' çhate'ca'ye otey: “Ñehua, sañapa' eso'mare'tña ama se'm'ñocheña ahuaña allempo serrpare'tatosan acheñenesha'.”

26 Elloña ñerra'm çha yoch acheñeshoḗa apet llesenspa' acheñenesha'ñapa' çhate' e'moñe'tyet, tarro'mar ñetpa' e'ñe cohuen eñchete't Juanañ, çhocma otyeñet ñapa' ñeñt'ca'yeña a'm'tose' Yompor po'ñoñ.

Ñeñto'marña ñetpa' mecha'teñet acheñenesha'.

27 Ñeñto'marña ñetpa' atet ochet Jesús:

—Ta'm yapa' amaca'yeña yeñoteñe; erroḗte' huapaña Juanañ, erroḗte' apetña ñaña llesens.

Allempoña Jesúsapa' atet oterraneterr:

—Napa'cho'ña te'pa' amach notaso sam'a allot apareten nam'a llesens attot atet neḗa'yena.

Atto Jesúsapa' toma'ntaterraneterr puesheñarr yacma atet penaña epsheña puechemer

²⁸⁻³² Jesúsñaapa' alla oterraner judionesha' pa'mcha'tareternesha':

–Ahuañmo'cha allempo huapa Juanañ, ñapa' añecop huapa attoch ñach seyçhaterre' allohuen ñeñt e'ñe pocte' enten Yompor. Tarraña sañapa' ama same'ñyo. Aña e'ñe cohuen ame'ñapaya ñeñt atarr ochñateneshaçhno atet ñerra'm añ ñeñt po'taruas pa'yene' e'ñe puehquëñoñet cobra'yene't acheñeneshaçhno quelle ñeñt gobiernocop ñaña aña e'ñe cohuen ame'ñapayaña Juanañ ñeñt atarr ecañoreshateçhno. Allempo sentanet atto ñetpa' cotape'cherret ello cohuen Yomporecop, sañapa' amaña eseshas cotape'cherrayeña cohuen Yomporecop attoch o'ch same'ñera samã. Ñeñtña te'pa' o'ch netma'ntacha. Ñehua, puesheñarr yacma eñall epsheña puechemer. Ñañaapa' atet otenana' puesheñarr puechemer: “Te'pa' nechemere, o'ch ahua'muenep ya'mro allcha' petaruasa'muen.”* Ñañaapa' ellonta otapan pompor: “Amaca'ye nemno, amachca'ye neto.” Tarraña elloñaapa' cotape'cherran cohuen allempoñaapa' ahua' pompor pa'mro taruasats. Allempoña pomporpa' ahua' ñaña po'psheñeñ puechemeresho, ñapa'cho'ña atet otos atet otuan po'psheñeñ puechemer: “Te' nechemere, o'ch ahua'muenep ya'mro allcha' petaruasa'muen paña.” Ñañaapa' e'ñe cohuen otapan pompor: “Ñehua, apacha' o'ch ahuen o'ch netaruasa'muen ya'mro.” Tarraña ñañaapa' ama't atet otaña' ama to.

Jesúsñaapa' alla oterraneterr:

–Te'pa' o'ch na'p'to'tas sa, ñeñt epsheña puechemer, ¿erra'tsena't sentenña sa ñeñt e'ñe po'ñoçh atet petsa ñeñt atet muenen pompor?

Judionesha'ña pa'mcha'tareternesha'pa' ñetñaapa' atet ochet:

–Añca'ye ñeñt ñanom, ñeñt otapue' ñapa' año'ch to taruasats tarraña elloñaapa' allenta ahua' taruasats pa'mro. Ñeñtca'yeña etsotene'ña ñeñt atet muenen pompor.

Jesúsñaapa' atet oterraneterr:

–Ñeñto'marña te'pa' o'ch notas: Ñeñt puehquëñoñe'na cobra'yene' acheñeneshaçhno ñaña ñeñt atarr ecañoreshateçhno, ñetñaapa' po'ñoçh allenta aguërret Yompor po'cohuenña ñeñt atto ayochreshattena ña. Sañapa' amaña allentaye' sagüereña samã tarro'mar sapa' çhaña atarr se'charrtatenña seyoçher.

Atet atma'ntatarettena ñeñt ataruasañeçhno ñeñt ama cohuenayaye

(Mr. 12.1-12; Lc. 20.9-19)

³³ Jesúsñaapa' alla oterraner judionesha' pa'mcha'tareternesha':

–Te'ñaapa' se'mñnotencha', napa' o'ch netma'ntatasa po'poñ. Eñall puesheñarr ane'tañ, ñañaapa' nare'tanatanoman shonte' uvach; pa'muerñaapa' e'ñe ora uvachmatatue. E'ñe concha'tampesue allotñaapa' eñan ñaña allcha' a'pecho'toñet uvas po'ñer. Allñaapa' tomatatnoman torrepo' allotcha' cohuañpsoñet pa'muer.

'Tomatuepa' na'nman ñeñtcha' taruasatats ñeñtcha' coyerrahuet allpon ñerra'm esempoch toteñet. O'ña nare'tanatatuepa' o' ahua' po'poñ anetso baçhayo.

³⁴ Chap allempo yen uvachllompa' ñañaapa' mueñerran po'psheñeñeçhno pa'taruasañer ñetcha' enamuerretseta' uvachllom po'psheñeñ pa'taruasañresho ñeñt cohuañpene' uvachma'.

* 21:28-32 Ñeñt po'taruas penet ñetpa' toteneta' uva.

³⁵ Allempoña chenet allpa' enamosan ñeñt' allpon o'patena pamo'mte', arepa'tcha'ña es apapuenayeña uvachllomñ, elloña ñeñtapa' cha rremapoñet pa'taruasañer, cha nalle'tapueñet puesheñarr, cha muetsapet po'psheñeñ, po'psheñeñpa'cho'ña cha rrolle'tapoñet.

³⁶ Allempoña ñeñt' pamo'mte' pen uvachma'pa' o' alla mueñerranerr po'psheñeñechno pa'taruasañer shonte'. Allempo chapuet ñamet allpa' attecma errotuanen a'parettapuet ñamet.

³⁷ Allempoña ñeñt' pamo'mte' penetpa' ñaña'pa' atet ot: "Te'pa' o'ch nemñe all ñeñt' e'ñe na nechemer. Ñato'rraña ñeñt'pa' mecha'na'tapetcha'."

³⁸ Ñeñt'pa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetña'pa' atet otanna'tyeset: "Añmapa' ñeñt'ca'yeña puechemer ñeñt'cha' o'paterraya pompor puenareñ esempo. Ñapa'cho'ña te'pa' o'chca'ye yemtsap' allochñapa' yachca'yeña e'ñe o'paterrayaña pompor puenareñ. Te'pa' o'ch ahuey o'ch yemtsap' ñaña."

³⁹ Allempoñapa' o' rromapet o' chetare'tnomet narmetsmot a'yenet, allña muetsapetña ñaña. Arrpa' allohua atet toma'ntata Jesús e'ñe ñañaña.

⁴⁰ Allempoña Jesús'pa' atet oterraneterr:

—Ñehua, ñerra'm esempoch huerra ñeñt' pamo'mte' pen ataruasañechnopa' ¿señoteñe'tña ñetpa' atet'cha' a'paretterret?

⁴¹ Judionesha'ña pa'm'cha'tare'ternesha'pa' atet oterretter:

—Ñerra'm huerrachpa' ñeñt'ña ama matsrre'mño'pa' e'ñech a'cllatuerranet pamo'mte', nanaccha' coñchatuerranet; narmetsmoñapa' elloch nerranerr po'potantañ ñeñt'cha' taruaserrtserr all uvachmo. Nerranerrcha' ñeñt'cha' e'ñe po'ño'ch apuerre' pue'mer ñerra'm esempoch yen.

⁴² Allempoña Jesús'pa' atet oterraneterr:

—Sapa' ama't ahuatapa' ama'tña selleyareña ñeñt' atet anuaret Yompor po'ñoñ ahuatoteñ. Tarro'mar ñeñt'pa' atet oten nocop, na atma'ntataret mapue'. Ñeñt'pa' atet oten:

Añ mapue' ñeñt' ama pocteye' entyeno ñeñt' tomatyene' pocoll, ñeñt'ña te'pa' o' anaretterra ñeñt'cha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll. Ñeñt'pa' Yomporca'yeña atet patene', ñeñto'marña yapa' e'ñe cohuen yenteñ. Arrpa' allohua atet toma'ntaterrerr Jesús e'ñe ñañaña.

⁴³ Ñeñto'marña sa ñeñtes judioneshaspa' te'ña Yomporpa' puer-ratamperrescha' po'cohuenña ñeñt' atto ayochreshattena ña. Añcha'ña apuerr ellonet po'potantañ acheñenesha' ñeñt' ama judioneshayaye ñeñt'cha' po'ño'ch orrtaterre' e'ñe ña po'cohuenña atto atarr ayochreshattena ña.

⁴⁴ Allohuen erra'tsencha' atetsa añ mapyo ñeñt'ña mapue'pa' e'ñech a'yosatse'tuanet. Ñaña ñerra'm eseshesho shora'nom ñeñt' mapyerpa' e'ñech a'pe'ptse'tuosanet.

Atfoña Jesús'pa' toma'ntatanet ñerra'm ama esesha' pocteye' entenaye Cristo ñerra'm erra'tsencha' ama aguerraye, ñeñt'ña acheñerpa' chocmach huapoña ñeñt'cha' atarr muerochtaterrahuet.

⁴⁵ Allempo atet e'myes ñeñt' pa'm'cha'tare'ternesha' pen allohuen judionesha' po'cornaneshar ñaña fariseonesha', ñeñt' atet toma'ntatenanet Jesús, ñetña allempopa' chapamet pueyo'chreto ñocpuetepa't serrpare'tenña Jesús.

⁴⁶ Ñetña'pa' mueneñetañ o'ch rremuetañ tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús ñapa' po'ño'ch ñeñt' a'm'tene' Yompor po'ñoñ.

22

Atto atma'ntatarettena puesheñarr amcha'taret puetare'tatan shonte' rreñets ñeñtcha' rret allempoch sena'ta puechemer

¹ Jesúsñapa' alla toma'ntaterraneterrpa' atet oterraneterr:

² —Yompor po'cohuenña ñeñt atto ayochreshattena ña pue'ntañot ñeñt'pa' o'ch netma'ntacha atet ñerra'mrrate' puesheñarr amcha'taret. Ñeñña amcha'taretpa' o' puetare'tatan shonte' rreñets ñeñtcha' nanac rret allempoch sena'ta puechemer.

³ O'ña a'potatuan rreñetspa' o' mueñan pa'taruasañrenesha' o'ch otyeñeta' ñeñt ahua'ñareñ o'ch rrapreteneta' rreñets. O'ña otyesuarettetpa' ñetñapa' arepa'tcha' eseshaye' sechatso o'ch ahuet all.

⁴ Po'pocheñopa' o' alla mueñerranerr po'potantañ pa'taruasañrenesha'. Ama seneta'pa' atet otapanet: “Sotoscha' acheñenesha' ñeñt ahua'ñareñ: 'Amcha'taretca'ye sagotatene', atetca'ye oten: Rreñetspa' o' e'ñe na'potatue. Huacshečno ñaña beserečno ñeñt ne'soya'tatyen o' e'ñe nemtsatue ñaña o'ca'ye e'ñe na'potatue. Te'pa' sona'cha'tepa'to' ahuo'ch serrapreteña.'”

⁵ Ahua'ñareñnesha'ñapa' arepa'tcha' a'cua'psenaye' eñchetofña ñeñt hua'ñenahuet. Ñeñtapa' ahuanemyeset ñopa'tets. Puesheñarrpa' ahuo' pa'mro, po'psheñeñpa' ahuo' pomatsre'tatsa.

⁶ Po'potantaññapa' ñeñtapa' o' rremapoñetña pa'taruasañrenesha'pa' erroñuanen pet, atteñapa' o' muetsanatu.

⁷ Amcha'taretñapa' ñeñtña atarr atsrre'mate'. Allempoñapa' o' mueñan ñaña po'solltar-renesha' ñeñtcha' a'cllatenaya' ñeñt amtsañečno, ñeñtcha' a'poyatatuenaya' ñaña pa'netser.

⁸ Alloña amcha'taretpa' atet oterranerr po'potantañ pa'taruasañrenesha': “Rreñtsočnoña po'ño'chpa' epaye'ca'ye. Tarraña ñeñtña ahua'ñaretpa' ñetpa' amaca'ye cohuenaye' nentenaneto.

⁹ Te'pa' orras samña allo'tsen toñečno tarro'mar allpa' shonte' chopeñe'chyen acheñenesha'. Allohuen errponcha' sentyes o'ch sotyepapanet onetepa' arr o'ch rrapreteneta' rreñets ñeñt shonte' na'potaten.”

¹⁰ Allempoña alla ahuanerrerr pa'taruasañrenesha', ñetñapa' añ co'ta'yeset toñ. Ñeñt allpon pocta'yeset toño'mar e'ñe sechatyesuahuet, ama't atsrre'mña'ečno ñaña ñeñt cohuen acheñ. Atteñapa' o' cha shontosa ñeñt hua'ñenet. Allña pocollo all sena'tena puechemerpa' e'ñe que'chcosa ñeñt ahua'ñareñ.

¹¹ 'Amcha'taretñapa' allenta be'tos o'ch entapan ñeñt hua'ñatyen ñeñtcha' rrallme'chosets all. Allñapa' entan puesheñarr yacma. Ñaña'pa' ama a'ñeye' chorreno shetamuets emarr ñeñtecma chorrenet all atto coshapreteñet ñeñt sena'tetsa.

¹² Amcha'taretñapa' atet och: “Eso'mare'tña masheñe pebe'tenña arr amaca'ye a'ñeye' pechorreno shetamuets emarr attoch p'ochshaprecha ñeñt sena'tetsa.” Ñaña'pa' ama eñoro.

¹³ Allempoña amcha'taretpa' otan pa'taruasañrenesha': “Sehuancoñ pa'tac ñaña potpa' chosa huapore'terre' a'yo' checmetot. Allñapa' allcha' yahuanrorterret, panmueñotet atserrpa' rraso'tyerretcha' pa's.”

¹⁴ Tarro'mar ama't shonteñña ñeñt ahua'ñaretpa' tarraña puesheña'ttsaña ñeñt e'ñe cohuen a'crareñ.

*Atto a'p'to'chet Jesús, pocte'te' o'ch tsa'tet impuesto
(Mr. 12.13-17; Lc. 20.20-26)*

15 Allempoña fariseonesha'pa' ahuanerra. Ñetñapa' cha atarr coťape'chatanna'teneta'. Ñetpa' aña atarr e'nenet attoch e'ñe puehquëñoťetpa' ama't parrochapa' o'ch eñorachet Jesús ñeñt ama pocteyaye. Allochñapa' attoťcha'ña otteñe'chet.

16 Ñetñapa' e'ñe a'nahua mueñet ñet pueyochresha' epuet ñaña pueheña'tets Herodes pueyochresha'. Ñetña chapuet Jesúseshopa' e'ñe puehquëñoťet atet otoset:

—Maestrocha' yapa' yeñoteneñ papa' ama peshquëno ama't mamesha ñaña ñeñt atto pey'chaten Yompor poctapña ñeñt'pa'cho'ña e'ñe cohuenacma, ama shequëntsoyaye ama't mamesha. Ñaña papa' ama aña ñapueť pemorrenteno ñeñt atarr am'cha'na'tpo' entyen allohuen acheñenesha'. Allohuen acheñ e'ñe cohuen pentueñ.

17 Ñeñto'marña te'pa' yapa' yemneñ o'ch peñotatapuey erra'tsente'ña e'ñe po'ño'ch cohuentetsa. ¿Pocte'te' penteñña pa' o'ch yetsa'ta impuestos añecop ñeñt am'cha'tareťtetsa all anetso Romo ñeñt ama judioneshayaye? Ñato' amate' pocteyayeña yocop ñeñtey judioneshay o'ch yetsa'cha am'cha'tareť romo'marnesha' ñeñt ama judioneshayaye.

18 Jesúsñapa' e'ñotapanet ñeñt atet coťape'chyenetañ ñocop, ñañaapa' atet otanet:

—Sapa' atarr ashcarña'es, eso'mare'tña semneñña o'ch seshcare'tenen.

19 Ñehua, ama't atteseñpa' segatenca'ye puetallarr quelle ñeñt alloch setsa'ta impuestos.

Allempoñapa' gachet puetallarr quelle ñeñt otenet denario.

20 Ñañaapa' atet oterraneterr:

—Ñehua, sapa' o'ch soten, ¿eseshat sentenña ñeñt atma'ntareťtetsa all? ¿Esesha't pa'so'cheñ aquellcareťtetsa all?

21 Ñetñapa' atet ochet:

—Am'cha'tareťca'ye atma'ntareťtetsaña all, ñaña ñoca'yeña pa'so'cheñ ñeñt aquellcareťtetsa all.

Jesúsñapa' alla oterraneterr:

—Ñeñte'pñapa' añ poctetsa o'ch ya'p am'cha'tareť ñeñt ño ñeñt atet poctetsa gobiernocop, tarraña ellonetña ñeñt Yomporo o'ch ya'p ñaña ñeñt atet poctetsa ñocop.

22 Ñetña atet e'mueñet Jesús atet anapuenanetpa' atta cohuanrrorteñet tarro'mar Jesúsapa' atarrca'ye cohuen anapuenanet. Atteñapa' quechpa'huaneretpa' ahuanerret.

Atto a'p'to'chet Jesús, ñerra'm po'ño'chte' atanterrapo' rromot, ta'm, allem-popa' errotencia'ña yeperra

(Mr. 12.18-27; Lc. 20.27-40)

23 Ñeñte yetrocma hua'cha'toña ñaña patantarr ñeñt saduceoneshatets. Ñehua, ñeñt saduceoneshatets ñetñapa' ellonet echenet poctapña ñeñto'marña ñetpa' atet otenet amate' errotentot yetanterroña rromot ama't errponaña. Ñetñapa' atet otoset Jesús:

24—Añ Maestrocha' ñeñtca'yeña atet otye'tña Moisés ñeñt poctetsa ñeñt'cha' atet ye'pa. Ñerra'm esempo rroma yacma o'ch sa'nman puetapor tarraña ñerra'm ama chemere'tnomopa', añ poctetsa pa'mo'nasheñcha' alla yor-erre'ña po'norrar allochñapa' attoch eñalletteraña ñeñt'cha' puechemer perr pa'mo'nasheñ. Ñeñt'pa' atetca'ye quellca'nmonayña ahuat Moisés.

25 Ñehua, te'pa' eñall cancherrsheña yamo'ts ñeñt e'ñe poctacma pa'mo'nasheñecmuet. Ñeñt puesheñarr popo'naretpa' o' yoran coyanesha' ñeñt puetapor pa'. E'ñe allponmatatsapa' o' rroma, atta sa'nman puetapor ama chemere'tnomo. Allempoña ñeñt po'rrocho'merpa' o' yorerran pa'mo'nasheñeñ puetapor.

26 E'ñe allponmatatsapa' ñapa'cho'ña o' rromuerrerr ñaña, ñeñt'pa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña, ñeñt'pa'cho'ña ama chemere'tnerrerro o' atta rromuerrerr. E'ñe attecma pohuet cancherrsheño'maretpa' e'ñe pueyoruarochetña ñeñtara puesheñarr coyanesha'. Allohuenetpa' e'ñe attecma pet rromayestset ama't puesheñarrofetapa' amaca'yeña chemere'tnomueto.

27 Allempoñapa' cho rromatsña ñaña coyanesha'.

28 Te'ña ñerra'm po'ñochte' atanterrapo' rromotpa' añña coyanesha'ñapa' allempopa' ¿essha'tcha'ña e'ñe ñapueñ puetapor perre' tarro'mar allohuenet cancherrsheño'maretpa' e'ñeca'ye pueyoruarochet?

29 Jesúsñapa' atet otapanet:

—Chaca'ye atarr sepanteñ tarro'mar amaca'ye chennasoña seyocho ñeñt e'ñe po'ñoch atet yechateney Yompor po'ñoñ ñeñt atet anuaret ahuatoteñ. Ñaña añña sepantatene' tarro'mar sapa' ama sepocteññañe Yompor po'huañenc.

30 Tarro'mar esempohuañen allempoch tanterret po'pocheño, allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuerraye ñeñtcha' yorerrahuet. Tarro'mar allempopa' e'ñech attet ñerra'm Yompor po'millañoñeñnashar ñeñt pue'ntaño'tsa'yen.

31 Sapa' ama'tña selleyare ñeñt atet ote't ahuat Yompor e'ñe socop attoch señoç po'ñoçpa' ama't ñeñt o' colla'huapa' ñetñapa' corretseta.

32 Ñehua, ñeñt'pa' atet oteneñ Yompor: “Napa' na ñeñten Po'yomporer pen Abraham ñaña Isaac ñaña Jacob ama't ñetpa' o' rromhuet ahuatoteñ.” Ñehua, yapa' yeñoteñ Yomporpa' ama añeye' Po'yomporer penaye ñeñt rromuets e'ñe poctacma, ñapa' añca'yeña Po'yomporer pene' acheñ ñeñt corretsetach. Attoña Yomporpa' e'ñe allame'ttsa entenanet allohuen ñetñapa' e'ñe bettetseta.

33 Allempoña allohuen acheñenesha' ñeñt e'muene' Jesús atto emma'huan saduceonesha', ñetñapa' atet otanna'tyeset:

—¡Errotenoñtuanaca'yeña atarr es eñoten, atto atarr cohuen yechatyeneñ!

Añmapa' ñeñt ñoñets ñeñt atarr sherbets, e'ñe metana'tuenan allohuen po'poñechno ñoñets
(Mr. 12.28-34)

34 Ñaña allempo fariseonesha' e'mare'chet atto Jesús emma'huan saduceonesha' ñetñapa' apchanna'tet parro.

35 Allempoña puesheñarrofet ñeñt atarr etsotene' ñoñets ñeñt atet anaret ñaña'pa' otenana' Jesús. Ñeñt'pa' tarro'marña atet a'pto'tos ñetpa' choça'ye mueneñet o'ch topachet Jesús.

36 Ñeñt'pa' atet otos:

—Maestrocha' ¿erra'tsena't ñoñtsor ñeñt atet anaret ñeñt atarr sherbets ñeñt ello metana'tuene' ora allohuen po'poñechno ñoñets ñeñt e'ñe parro attecma anaret?

37 Jesúsñapa' atet otañ:

—Añca'yeña ñeñt ello atarr sherbets, ñeñt ñoñetspa' atet oten: “Atar-repa'ch yemorrenteña Yeyomporer ñeñt Yepartseshar yepen e'ñe ora yeyochrocmañen. Ñaña e'ñe yecamquëñoñ yemorreñchach, ama't ñaña ora yocñapñohuen.”

³⁸ Ñeñtpa' ñeñtca'ye ñoñets ñeñt po'ñoñ atarr sherbets, ñeñtpa' elloc'a'yeña metana'tuenan po'poñechno ñoñtsochno.

³⁹ Allo'tpa' po'poñ ñoñets ñeñt atarr sherbets ñeñtpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.”

⁴⁰ Añ epo'mar ñoñets ñeñtña e'ñe etsotatuene' allohuen po'poñechno ñoñtsochno ñeñt atet ana'yese't, ñaña allohuen Yompor po'ñoñ ñeñt a'ñta'yese't ahuat.

Atto Cristo ñeñt Po'partseshar pe't David ahuat, elloñapa' o' alla po'mreneñ per

(Mr. 12.35-37; Lc. 20.41-44)

⁴¹ Allempoña fariseonesha'pa' ñetñapa' allo'tsenareta all apchenet e'ñe ñochayet,

⁴² Jesúsña allpa' atet otanet:

—Sapa' ¿erfo'ena't sotenña sa añecop ñeñtcha' Cristotosets? ¿Esesha't soten ñeñtcha' po'mreneñ perre'ña ñeñtcha' Cristotosets?

Ñetñapa' atet ochet:

—Davidcha'ca'ye po'mrenñoñ huapaña ñeñtcha' Cristotosets.

⁴³ Ñaña'pa' alla oterraneterr:

—Ñerra'm po'ñoñcha' David po'mreneñ perre'pa' sapa' ama't seño'teñeña Davidpa' allempo eñorache't Parets Puecamquëñ ñapa' atetca'ye ote't po'mrenñecop ñeñtara ñeñtcha' Cristoterrets: “Napa' ñeñtca'yeña Nepartseshar nepen.” David allempopa' atetca'ye eñose'tña añecop ñeñtcha' Cristoterrets:

⁴⁴ Yompor Paretspa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets): “Te'pa' o'ch ñanorruerr arr necohuenrot allcha' pecohuentapreterrna. Attochña ama't ñeñt pe'moñe'tene' napa' o'ch e'ñe name'ñatuerranet allochñapa' o'ch atet perret ñeñt pem-nen ña.”

⁴⁵ Ñeñtpa' atetca'ye ote'tña David, ñeñtcha' Cristoterretspa' ñeñtca'yeña Po'partseshar pe'tña ama't allempoteñ. Ñehua, ama't seño'teñeña Cristo ñeñt Po'partseshar pe't Davidpa' ñeñtña te'pa' o' alla po'mreneñ per ñaña.

⁴⁶ Ñetñapa' ama't puesheñarro'tetapa' ama eseshaye' anapuenaye' entaye. Ñeñto'marña allempoteñpa' ama't puesheñarro'tetapa' ama eseshaye' a'pto'tenaye' enterraye.

23

Atto Jesús'pa' a'metare'tenan fariseonesha' ñeñt atet ye'chenet ñetpa' ñeñtpa' ama cohuenaye' entapretenaneto Yompor

(Mr. 12.38-40; Lc. 11.37-54; 20.45-47)

¹ Allempoña Jesús'pa' alla serrpare'taterran allohuen acheñenesha' ñaña e'ñe ña pueyochreshachno. Ñeñtpa' atet otanet:

² —Añña fariseonesha' epuet ñaña ñeñt atarr etsotayene' ñoñets ñeñt atet anare't, ñetpa' añecpa anare'ttenet ñetcha' seño'tatene' ñoñets ñeñt atet nonase't Moisés ahuat.

³ Ñeñto'marña socoppa' e'ñe pocte' o'ch seño'huenta ñeñt atet otenset, amachña chaña satpare'teñe. Tarraña sapa' amachña atet sepatsto ñeñt

atet p̄atse'tyenet ñet. Tarro'mar ama't atarr cohuen serrpare'tenetañpa' amaca'yeña e'ñeye' atet peneto ñeñt̄ atet serrpare'tatenset.

4 Ñetpa' çhaca'ye atarr atontatennasetña ñoñets ñeñt̄cha' e'ñe atet seṽohueneñ ñetpa' ñeñt̄aca'yeña nennaset ñeñt̄ atarr torrapo' sentyen. Ñeñt̄pa' atetcha' netma'ntacha ñetpa' çhaca'ye ottenet ñerra'mrrate' añ huanquënnaset ñeñt̄ atarr eñerr se'muen attoch sechechnom̄. Tarraña ñet ama't mameshapa' amaña anmapretenseto, ama't potaṽotetapa' ama echantapretnenseto ñeñt̄ chechatnenset.

5 Fariseonesha' allohuen ñeñt̄ atet etsotayeneñpa' ñeñt̄pa' e'ñe pommo'cheñoṽeta atet penet allochñapa' acheñenesha'ñapa' e'ñech cohuen entyeñet ñeñt̄ atto atarr torra'yenetañ Yomporecop. Tarraña ñeñt̄pa' e'ñeca'ye orrena. Ñaña ñetpa' çhaca'ye ateshatomuerrtatenet poreñ allñapa' all quellquëññañetañ Yompor po'ñoñ ama't ñeñt̄pa'çho'ña alloca'yeña huancato'tenet. Tarraña ñeñt̄pa' e'ñe añecpa atet penet attoch acheñenesha'pa' e'ñech cohuen entenamet. Tarraña ñeñt̄pa' e'ñe orrena atet penet ñeñt̄ atto ommo'chenet. Ñaña ñetpa' añe'naca'yeña allpocha'ṽtatenet ñeñt̄ çhera'rrtenet pa'shtamueto pa'rrpe'monet. Tarraña ñeñt̄pa'çho'ña e'ñe añecpa atet penet e'ñe pommo'cheñoṽet.

6 Ñaña ñetpa' ñerra'm çho rrallme'chapretenetpa' añaca'ye atarr muenenet o'ch anorrçha'tyenet allecma anorryen ñeñt̄ atarr añcha'na'tpo' entyen allohuen acheñenesha'. Ñaña ñetpa' e'ñe attecma penet ama't all judionesha' po'prahuo.

7 Ñaña ñetpa' e'ñe pommo'cheñoṽet añe'naña atarr muenenet acheñenesha'pa' o'ch huom̄cha'tyesapanet pue'm̄cha'nañoṽet ñerra'm esempo chopeñe'chyenet toño'mar allecma shontena acheñenesha'. Ñaña pommo'cheñoṽetpa' añe'naña atarr muenenet o'ch otanet acheñenesha' ñetpa' e'ño' partsesharerochet.

8 'Tarraña saye'ña neyochreshacha' ñato'tña semnena'ña o'ch otas acheñenesha' sapa' e'ño' partseshareroches. Ñaña sa allohuenespa' e'ñechña semo'nasheñecma seṽannena, tarro'mar sa allohuenacpaspā naptaca'yeña Separtseshar sepenen na ñeñten Cristotosets.

9 Ñaña arr patsro ama't puesheñarra amach seyomporer seṽatstaneto. Tarro'mar sapa' e'ñeca'ye patrraña Sompor ñeñt̄ pue'ntañotsen.

10 Ñaña sapa' amach semnatsche ama't puesheñarra e'ñe pueçhore'teñoṽetaspa' o'ch otaset: Na'yochreterneshacha'. Tarro'mar sa allohuenacpaspā naptaca'yeña Sa'yochreshater sepenen na ñeñten Cristotosets.

11 Tarro'mar ñeñt̄ po'ñoçh cohuen añcha'tarettetsa sesho ñeñt̄pa' ñeñt̄ca'yeña atarr torretsaña po'potantañecop attoch orrtatanet ñeñt̄ atarr sherbets ñocpuet.

12 Tarro'mar allohuen ñeñt̄ e'ñe cohuen entetsa e'ñe pommo'cheñoṽ ñeñt̄ña tsapaṽonetpa' amach esoshe'maye' entereto. Tarraña allohuen ñeñt̄ ama esoshe'maye' entetso te' ñeñt̄ña tsapaṽonetpa' atarrcha' cohuen enteret.

13 'Atarr nanac llequëñtso'tsenes fariseoneshacha' ñaña sam̄a ñeñtes e'ñe etsotayenayen̄ ñoñets ñeñt̄ atet anaret judioneshacop tarro'mar sapa' sommo'cheñoṽe'na atarr seshcare'tyen. Tarro'mar ama't sapa' amaca'ye senteññañeña Yompor po'cohuenña, ellonetpa'çho'ña çhocma sepatare'teñña po'potantañ ñeñt̄ e'nene' Yompor po'cohuenña. Cha

sa'npampeñña acheñenesha' attoch ñetpa'cho'ña amach enterrñañeto Yompor po'cohuenña ñeññ atto atarr ayochreshattena ña pue'ntañot.

14 'Atarr nanac llequëntso'tsenes fariseoneshacha' ñaña samña ñeñtes e'ñe etsotayenayeñ ñoñets ñeññ atet anaret judioneshacop, tarro'mar sapa' sommo'cheño'e'na seshcare'tyeñ. Ama't rretorrnanesha'pa' ñeñte'naña seprratam pesyenña pa'paquëll. Elloña e'ñe sommo'cheño'pa' aña atarr semnen o'ch atet sepena ñerra'm atarr cohuen acheñres ñeñto'marña all sema'yochena allecma shontena acheñenesha'pa' amach tematenayaya sema'yocheno. Ñeñto'marña na te'pa' o'ch notas, sapa' elloña atarrcha' sa'coñchataretterra.

15 'Atarr nanac llequëntso'tsenes fariseoneshacha' ñaña samña ñeñtes e'ñe etsotayenayeñ ñoñets ñeññ atet anaret tarro'mar sapa' sommo'cheño'e'na atarr seshcare'tyen. Sapa' chocma sechopeñe'chyen erracmañen patso'mar, sepchatyena ama't ñaña sapa'mar. Ñeñtpa' añecpa atet sepena attoch same'ñatyasya ama't e'ñe pueheña'ttsa e'ñe sa soctañña ñeñtes judioneshas. Ñeññ allpon same'ñatyenapa' ñetñapa' aña seychatyenanet ñeññ ama cohuenayaye ñeññ e'ñe atet sepena samña. Ñeñto'mar ñetpa'cho'ña ello atarr nanac o'patatarettenet coñcheñets, e'ñe epoche'ttsocma so'patatenanet coñcheñets.

16 'Atarr nanac llequëntso'tsenes tarro'mar ama't ñeññ ama sechenoyo seyo'chro sañapa' ñeññara seychateñña po'potantañe'chno. Ñeñtpa' e'ñe atet sepena ñerra'mrate' aporo'yecmas echa'nmannetsa. Ama't seychateneñ ñeññ po'ño'chpa' amaca'ye atteyaye. Ñeñtpa' atet soteneñ: "Ñerra'm esesha' nene' po'ñoñ ñerra'm aña Parets pa'paquëll pa'so'chño nenan po'ñoñ saña ñeñtpa' cha soten año' esoyaye ama pallteno o'ch e'ñe po'ño'ch a'pocatan po'ñoñ." Tarraña po'poñpa' atet soteneñ: "Ñerra'mña añ oro pa'so'chño yena' yeñoñ ñeññ Parets pa'paclo'tsen allempoña po'ño'chpa' chocmach e'ñe ya'pocatat yeñoñ."

17 Sapa' atarr otatsñañes, ama añeye'ña sechenoyoña seyo'chro ñeññ cohuen enten Yompor. Chaca'ye sottena ñerra'mrate' aporo'yecmas. Ama't señoñeña atet sherben oropa' e'ñeca'ye attecma sherbenña ñaña Parets pa'paquëll. Tarro'mar allempo nete't oro Parets pa'paclo, ñeññña oropa' añca'ye e'ñe cohuen a'pocatataye't Partsocop ñeññara Partsopo'.

18 Ñaña po'poñpa' atet soteneñ: "Ñerra'm esesha' nene' po'ñoñ e'ñe altar pa'so'chño allecma neñet ñeññ amtsarettetsa Yomporecop, ñeñtpa'cho'ña cha soten año' esoyaye, ama pallteno o'ch e'ñe po'ño'ch a'pocatan po'ñoñ." Tarraña po'poñpa' atet soteneñ: "Ñerra'mña añ pa'so'chño yena' yeñoñ ñeññ amtsarettetsa Yomporecop ñeññ nenet altarro enot, allempoña po'ño'chpa' chocmach e'ñe ya'pocatat yeñoñ." Tarraña ama't atet sotatse'tyeneña' ñeñtpa' amaca'ye po'ño'choyaye.

19 Sapa' ama añeye' sechenoyoña seyo'chro ñeññ cohuen enten Yompor. Cha sottena ñerra'mrate' aporo'yecmas. Ama't señoñeña altarpa'cho'ña atarrca'ye sherben. E'ñe attecma sherben ñerra'mrate' ñeññ amtsarettetsa Yomporecop ñeññ nenet all altarro enot. Tarro'mar altarpa' ñeññca'yeña a'pocatatene'ña Yomporecop ñeññ nenet all.

20 Ñeñto'marña yeñoñeñ ñerra'm esempo yenen yeñoñ altar pa'so'chño, ama e'ñe ñapña altar pa'so'chño yenenoña yeñoñ; añohuenca'yeña yenenña yeñoñ e'ñe pa'so'chño allohuen ñeññ na'yenet all, allecma sherba'yenet Yompor.

21 Ñaña ñerra'm esempo yenen yeñoñ Partsopo' pa'so'chño, ama e'ñe ñapña Partsopo' pa'so'chño yenenoña yeñoñ. Yompore'naca'yeña pa'so'chño

yenenña yeñoñ tarro'mar ñapa' e'ñeca'ye ño pa'paquëll.

22 Ñaña ñerra'm yenen yeñoñ Yompor pue'ntañ pa'so'chño, Yompore'naca'ye pa'so'chño yenenña yeñoñ ama't ñaña Yompor po'cona'ñe'naca'ye pa'so'chño yenenña yeñoñ tarro'mar enetpa' Yomporca'ye po'cona'ñ pene'tarro'mar allpa' allo'tsenca'yeña Yompor.

23 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop tarro'mar sapa' sommo'cheño'te'na atarr seshcare'tyen. Ora allohuen ñeñt senaremñ sepen ama't chocma sapueñeñ Yompor allpon ñeñt poctetsa ñocop —mentapan, anísopan, cominopan—sapa' cha sepsenña ñeñt ñoñtsor ñeñt atet anaret ñeñtca'yeña ello nanac sherbets. Ñeñt'pa' attoch e'ñe cohuen es sepa'yeññañ po'potantañ. Ñeñtña sapa' chaña sepseñ. Ñaña attoch semueranna'ta ñeñt'pa'cho'ña sañapa' chaca'yeña sepseñ. Ñaña attoch po'ño'ch e'ñe cohuen same'ñañatena Yomporecop ñeñt'pa'cho'ña sañapa' chaca'yeña sepseñ. Sapa' e'ñe ñeñtñaña sepalltena. Ñaña atto chocma es sapa'yen Yomporecop ñeñt'pa'cho'ña chocmach atet sepene amach cha sepsatstere.

24 Sapa' ama't ama choye' chennaso seyo'chro ñeñta atarr semneñ o'ch sey'chach po'potantañ acheñenesha'. Ñeñt'pa' e'ñe atet sepene ñerra'mrrate' aporo'yete'cmas echa'nmannetsa. Añ ñoñets ñeñt atet anaret socop ñeñt setseten e'ñe so'na socta'pña ama't ñeñt'pa' atarr coñe'tot sherben Yomporecop, sañapa' ñeñtaca'ye atarr semneñ o'ch sey'chateñ po'potantañ. Tarraña añ ñoñtsor ñeñt atarr nanac sherbets Yomporecop, saña ñeñt'pa' ama chennasoña seyo'chro ama't e'ñe mamesha. Ñeñt'pa' o'ch netma'ntacha atet ñerra'mrrate' ñeñt atarr es añe'toll allpon ñerra'm chopo'yete'toll saña ñeñt'pa' chaca'yeña seyorasoteñ tarraña ñeñtña atarr añecmuen allpon ñerra'm huaquësh* sapa' ñeñtñaña sañyen e'ñe atta.

25 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop. Sapa' e'ñe se'pame'teneñña setaza eno'tpa' o'pono'tña'pa' ama se'parro'teñe. Seplatopa'cho'ña eno'ta e'ñe se'pata'teñ o'pono'tña'pa' ama se'pata'teñe. E'ñe atet sepene saña. E'ñe sa'cohuentatena ñeñt eno'mar ñeñt atet sey'chena sa allochñapa' attoch entenes allohuen acheñenesha' sapa' e'ño' cohuenes, tarraña o'pono seyo'chropa' amaca'yeña sa'cohuentateñe, allña'pa' e'ñe chorren shonte' sosya'tsañe'chno ñeñt atto e'ñe seshquëño'te'na chocma es seprratañpesyen, atarr es seye'chapretannena, ñeñtña'pa' e'ñeca'ye socpa.

26 Ñeñtes fariseoneshas, sapa' ama añeye' sechenoyoña seyo'chro ñeñt cohuen enten Yompor. Chaca'ye sottena ñerra'mrrate' e'ñe aporo'yete'cmas. Socoppa' añca'yeña poctetsa, ñanomcha'ña o'ponot se'pame'tña setaza, seplatopa'cho'ña ñanomcha'ña o'ponot se'patach. Allochñapa' o'ch e'ñe cohuenta emoshem'to'mar.

27 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop. Sapa' e'ñe attes ñerra'm apampaña ñeñt a'huallama'ttam'penet. Eno'tpa' e'ñech cohuen orrtenañ. O'pono'tña'pa' e'ñech chorren arromña'ap ñaña pa'namen ñeñt nanac sosey.

28 Sapa'cho'ña e'ñerramche' attesña saña. Po'ño'chca'ye ñeñt atet sorrtatyen acheñenesha'ñapa' e'ñe atet entenset ñerra'mrrate' sapa' e'ñe cohuenare' es sepa'yen. Tarraña o'ponoña seyo'chropa' e'ñe añña shontetsa alloch

* 23:24 Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

sommo'chyena, atarr seshcare'tanna'tyena, pa'namen sorratyen ñeñt' ama't mamesha ama cohuenaye' entapretenso Yompor.

29 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt' atet anaret judioneshacop tarro'mar sa te'pa' sařomaten enot' ñeñt' atarr cohuen senten sa all pampa'yesete't ñeñt' a'mta'yesaye't Yompor po'ñoñ. Ñaña aña'na sa'cohuentamřpesyen all pampa'yesete't ñeñt' acheñeneshar ñeñt' e'ñe pocte' es řa'yesete't.

30 Saña te'pa' atet sotyeneñ: "Ñerra'm allempocmach ye'ñalletañ allempo corre't yatañneshañ, atfo ñetpa' muetsanachete't ñeñt' a'mta'yesaye't Yompor po'ñoñ, yañapa' amate' eso'mar yemtsapretaneto."

31 Ñeñt' atet sotyeneña' te'ña e'ñe sa señoñoťpa' o' sa'metamřpsa e'ñe sañaña po'ñočh sapa' po'mrenñesca'ye ñeñt' muetsanataye't ahuať ñeñt' a'mta'yesaye't Yompor po'ñoñ.

32 Ñeñto'marña sa te'pa' ñeñtaca'yeña e'ñe setsoteññañ satañneshañ ñeñt' allpon sosya'tsañečno ñeñt' e'ñe motetnomnas ahuaťoteñ e'ñe sa sa-tañneshañ.

33 'Sapa' ama cohuenayayso atarr ashcarñaťes, řha sottena ñerra'mrrate' shečřa sompor sepen. Sapa' errotenohuachña'yeña sequeshperrate'. Sapa' añaca'ye so'patenaya coñcheñets ñeñt' parrare' tso' all o'pono.

34 Ñeñto'marña te' napa' o'ch nemñernnas ñeñt'cha' a'mta'yerre' neñoñ, ñaña ñeñt' atarr eñotañ neřa'yen, ñaña ñeñt' atarr etsotayene' neñoñ ñeñt' atet anaret ahuaťoteñ. Tarraña saña ñeñt'pa' řhachca'yeña semtsanat-uerrnan ñeñt' patanta'tets, po'potantañña' e'ñech secorso'tamřpesuerrnan. Po'potantañña sapa' řhach senalle'tyesuerrnan e'ñe all sa seprahuo'mar. Atarr se'moñe'tenanet ñeñto'marña řhocma soťtare'tenanet anetsoť o'ch sa'yetatuanet ñetñapa' o'ch ahuanemyeset po'poñ anetso'mar.

35 Attoca'yeña ora allohuen ñeñt' e'ñe pocte' es řa'yestse't ñeñt' amtsanatyessarettatse't ashataretetyesete't po'rras, sañapa' allempoteñ e'ñe sa'yohuarettena ama't teme'ttsen, sa ñeñtes corretsa te', ama't allempoteñ amtsaretteta Abel ñeñt' ama es yečcatetso ama't coñe'ta tarremphua allempo semtser ñaña Zacarías ñeñt' Berequías puechemer. Ñeñt'ña sapa' alla semtser Parets po'ponro puecha'petarot' allo'tsen altar allotecma sherbete't Yompor. Ama't allohuen ñeñt' amtsanatyessarettatse't allempo sañapa' e'ñe allempoteñ sa'yohuaretterra.

36 Po'ñočhca'ye notenes, acheñenesha' ñeñt' corretsa te' ñetñapa' atsa'tataretterretcha' e'ñe ora allpon atserrřatse'tyesonete't ñeñt' e'ñe pocte' es řa'yestse't Yomporecop.

Atto Jesús pa' puellquëñoťan jerusaléño'marnesha' atarr ya'na'tosanet (Lc. 13.34-35)

37 'Te'pa' e'ñe nellquëñoť o'ch notas sa ñeñtes jerusaléño'marneshas, ñeñtes muetsanatyessaye't ñeñt' a'mta'yesaye't Yompor po'ñoñ, sa ñeñtes rrollapechyesaye't ñeñt' amñarettatse't sesho, te'ña napa' o'ch notas: Napa' atarr atonoche'tats nemneñeñ o'ch na'yapačha'huerrsoñ allohuenes nesho attoch e'ñe cohuen necuamřpensoñ. Nemneñeñ o'ch na'yapačha'huerres atet ñerra'mrrate' atollop a'yapačhene' puechyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno.

38 Te'ñapa' all seyčhena sa, Yomporñapa' o'ch a'ypo'ñerres.

³⁹ Tarro'mar te'pa' o'ch alla noterrser: Na po'pocheño'pa' amach alla senterne'te. Esemphuañenñapa' senterrencha', allempoñapa' atetcha' soterren: "Aye'chochtatpahuépa'ch Jesucristo ñeñt' huapatsa ñeñt' llesensen Yeyomporer."

24

Atto Jesús'pa' eñotatanet e'ñech a'mata'tare'tetuerra Partsopo' all Jerusaléño
(Mr. 13.1-2; Lc. 21.5-6)

¹ Jesús'ñapa' cha'nerrerr Parets pa'paclo't. Alla ahuenerr allempoñapa' ponemña pueyochresha'. Ñetñapa' allenta cohuatyaset ñeñt' atarr cochnesha'tyetsa allo orratarettena Partsopo'.

² Allempo Jesús'pa' atet otanet:

—Ama't senteñeñ ora allohuen ñeñt' cochneshare' tarraña napa' o'ch notas: Po'ño'chca'ye cherrcha' allempoch e'ñe a'mata'tare'tetuerra. Ama't e'ñe pueñarra mapyetpa' amach a'puerroña all allo orratenet Partsopo' e'ñechca'ye poctacma a'coye'tare'tetuerra.

Atto Jesús'pa' eñotatanet shonte'ch entyerret pa'namen ñeñt'cha' eñotaterahuet o' cherrmoch allempoch mellapoterra
(Mr. 13.3-23; Lc. 21.7-24; 17.22-24)

³ Ñeñta otuanenanetpa' allenta ahuen Olivopno. Allñapa' anorruen, pueyochresha'ñapa' o' alla huacherrñañeterr, e'ñe ñapfochayet. Ñetñapa' atet otuereterr:

—Yapa' yemneñca'ye o'ch potey ¿esempo'tcha'ña atet perra? Ñaña ¿eso'tcha' yentyerrña ñeñt'cha' yeñotaterre' allempoch pehuerrmocha o'ch mellapoterra?

⁴ Jesús'ñapa' atet otanet:

—E'ñech seño'terra, allochñapa' amach esesha' seshquërraye.

⁵ Tarro'mar shonte'ch orrterrtsa ñeñt'cha' aycha'nataterre' neso'cheñ, ñeñt'cha' otyerrets: "Napa' ñeñtenca'yeña Cristotets." Ñetñapa' shonte'ch shequëret acheñenesha'.

⁶ Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora errañaren anetso'mar. Saña allempopa' amach cha seyorenatsto ama't e'ñe mamesha. Ñeñt'pa' atetcha'ca'ye e'ñe po'ño'ch perra. Tarraña allempopa' amach chena' allempoch e'ñe mellapoterra.

⁷ Pa'namen acheñ ñeñt' e'ñe po'poñe'ttsocma mereñtsoret'pa' ñetpa' quellaranna'terretcha'. Ñaña pa'namen anetso't añcha'tare'technopa' quellaraterrancha' pueyochrenesha'chno. Orrterrach allemeñ muecheñets o'ch e'ñe chaporrñatsotyerr errañaren. Ñaña orrterrach pa'namen atsnañtso'chno ñeñt' atarr apatanna'tpo'. Pella'yerrach pats ora errañaren.

⁸ Ñeñt' atet o' notuas te'pa' ñeñt'ña allempopa' ñeñt'cha'ña ñanom mue-rochtaterrahuetña allempo.

⁹ Allempoña sapa' pomuerrsetcha' attoch errotuanen perrset allcha'ña muetsatyerrset. Atarrcha' e'moñe'terres allohuen acheñenesha'chno tarro'mar sapa' naca'yeña e'ñe same'ñena.

¹⁰ Ñaña shonte'ch acheñ allempo ñeñt'cha' quechpuerre' Yompor. E'ñe ñagattsetapa' e'moñe'tanna'terretcha' attotcha' pomatatanna'tyerret.

¹¹ Ñaña allempopa' orretyerrach shonte' ñeñt'cha' aycha'naterrtsa ñetpa' año' a'mtenet Yompor po'ñoñ. Tarraña po'ño'ch amach Yomporeye' po'ñoñ a'mterreto, ñetpa' atatchña shequëretña shonte' acheñenesha'.

12 Allempopa' atonterrach errañaren pa'namen sosya'tsañechno allochña atarr atpare'terrñañet Yompor po'ñoñ. Ñeñto'marña shonte' acheñpa' o'huañcha' allo'na morrentanna'tnenet.

13 Tarraña ama'tcha' erro'tuanen apane'tterret, esesha'ch e'ñe ahuanta'huanmue' ñeñcha' ama nequechpuerraye, ñeñña'pa' ñeñcha'ña a'qeshpatare'ttertsa.

14 Ñaña allempopa' añ cohuen ñoñets atto ayochreshattena Yompor ñeñcha'ña ñanom serrpare'tatyeretña acheñenesha' ora errañaren allohuanen añe patsro. Attochña eñotateretña ora allohuen pa'namen acheñenesha' ñeñ po'ñoñ atet oteney Yompor. Allempochña po'ñoñ mellapoterra.

15 'Ñehua, ahuat Daniel ñeñ a'mtaye't Yompor po'ñoñ, ña po'quellcopa' atet ote't: "Cherrcha' allempo ama't ñeñ ama masosyaye' enteno Yomporpa' ñeñña'pa' cherrcha' all ama't ñeñ e'ñe Partsocpa anareteñ. Ñeñpa' ñeñchaca'yeña e'ñe a'chencatuerrahuet." Ñehua, ñeñcha' lleyerre' añ ñoñetspa' ñetña'pa' eñoteretepa'ch. Ñeñto'marña ñerra'm esempoch senter o'chap all ñeñ e'ñe Partsocpa anaretpa'

16 allempoña ñeñ allpon Judeo'tsa'yen ñetña'pa' allorocmuepa'ch yetrra'terret, ahuanerretepa'ña aspenareronet.

17 Ate't ñerra'mrate' pueheña'tets ñato' ñetña allempopa' eno'tsa'yenetcha' pa'pacllato, ñetña'pa' sohuetepa'chña tecma tarraña amachña be'tosatsetnomuetoña po'ponreto attoch yoratsre'tnomuet.

18 Ñaña pueheña'tets ñeñ pa'mro'tsenpa' allempoña ñetpa' amachña onatsterreto attoch erreta' pa'shtamuet.

19 Allempopa' atarrcha' llequeñets añecop ñeñ a'chomenare' coyanesha' ñaña ñeñ allohuen emaretetolleshachno. (Tarro'mar ñocpuetpa' atarr torrapo' attoch yetrra'tet ñamet.)

20 Ñaña Yomporcha'ña sema'yocha allochña'pa' amach cha huapoto allempoch seyetañpesya ñaña amachca'ye aña yetro seyetatsto allempocma samesen.

21 Allempopa' orrterrach muerochteñets ñeñcha' atarr muerochtaterre' allohuen acheñenesha'. Ñeñ ama't ahuatapa' ama puemuerochtareto atet atarr nanac huomenc. Ama't allempoteñ e'ñe errte' aye'chcataretta añ patser ama puemuerochtareto atet. Allempoña ellopa' amach atet alla muerochterrete'te ama't errponaña.

22 Allempoch atarr amuerochtataterret. Tarraña allempoña Yomporpa' ñach oterrets te'pa' allohuach. Ñerra'm amach oto allohuachpa' allempoña ama't pueheñarrapa' amach esesha' qeshperrtso. Tarraña ñeñña ame'ñenaya ña ñeñ acrenpa' ñocpuetña'pa' otercha' te'pa' allohuach.

23 'Ñehua, allempoch orameñ muerochteñetspa' ñerra'm esesha' sote': "Arro'tsenca'yeña Cristo", amapa' o'ch otaset: "Tarro'tsenca'ye Cristo", sañapa' amach same'ñatstaneto.

24 Orretyerrachca'ye ñeñcha' otyerrets ñapa' ño'ña Cristotets. Tarraña ñeñpa' attachca'ye shecare'tyerranña acheñenesha'. Orretyerrach ñaña ñeñcha' otyerrets ñapa' ño'ña a'mtene'ña Yompor po'ñoñ, tarraña ñeñpa'cho'ña e'ñech attecma shecare'tyerran acheñenesha', amachña Yomporeye'ña po'ñoñ a'mteno. Ñeñcha' atet shecare'tyerrets, ñetña'pa' orrtatyerretcha' ñeñ ama't ahuata acheñenesha'pa' ama puentare, attochña cohuanrrortateretña acheñenesha'. Ama't ñeñ Yompor pa'carnesharpa' mueneñetañcha' ñeñ'e'nachña shequ'erret.

²⁵ Señochepa'ch ama't ama čhena' mueročhteñtsopopa' napa' o' e'ñe notuas sa.

²⁶ Ñeñto'mar te'pa' notenes: Ñerra'm allempoch atet oterrset: "Tarro'tsenca'yeña Cristo a'yo all amayo", sañapa' ñato'tña sesena'ña all o'ch senteña'. Amapa' ñerra'm atetcha' oterrseterr: "Tarro'tsenca'ye Cristo o'pono pocollo", sañapa' ñato'tña sesena'ña all o'ch senteña'.

²⁷ Tarro'mar ñerra'm esempo čherr allempoch nohuerra na Ñeñten Acheñetosets e'ñe allohuen acheñenesha'pa' entapuerrnetcha' tarro'mar allempopa' atetcha' neřater ñerra'mrrate' meratste', o'ch meratsta huomencpa' e'ñech a'puetaresuan ora enet errařaren, ama't allot huena atsne' ama't e'ñe allohuanen emuena.

²⁸ Ñeñtpa' e'ñechca'ye atet perraña ñeñt atet senten te' ñerra'm erro'tsen ñeñt rromuepa' allcha'ca'yeña shonterraña tse'm.

*Atetcha' perra allempoch huerra Cristo Ñeñt Acheñetosets
(Mr. 13.24-37; Lc. 21.25-33; 17.26-30, 34-36)*

²⁹ 'O'chña huañerr ñeñt mueročhteñtsopa' allempoñapa' e'ñech allorocma mayerr atsne'. Arrorrrpa'cho'ña o'huañcha' atsnom. Rantočhnopa'cho'ña shorčha'terrcha' entot. Ñaña ñeñt huomenc orra'yetsa ento te' allempoña ama't ñeñtpa' pella'yerrach.

³⁰ Allempoñapa' orrterrach ento ñeñtcha' señotaterre' naca'yeña o' nohuerra Ñeñten e'ñe Acheñetosets. Allempochña nanac llecanrrorterra allohuen pa'namen acheñeneshačhno ñeñt aña patsro'tsen. Entapuerrnetcha' na Ñeñten Acheñetosets o'ch nesuanřperra osoř e'ñe entot. E'ñe nepart soteñohuen e'ñech necohuenteñesha' nohuerra.

³¹ Nemñercha' nemillañoñeñneshar ñetcha'ña poctora'nerrtset atarr huomenc. Ñetcha'ña a'yapačha'huerret allemañeñ ñeñt acren Nompoc nocop e'ñech pa'tatsshemto'marohuen allotecma orrnotena. E'ñech allemañeñ a'yapačha'hueretcha' e'ñe allohuanen añ patsroř.

³² Ñaña te'pa' señochepa'ch ñeñt atet pena higoch. Ñehua, esempocho senteñ higoch o'ch emčachyen puetacretollesha' allotcha' o'ch alla tapna'tyerrerr pasopaner; sañapa' ñeñtcha'ña señotatene' o' čhenmoch allempoch huorateterrerr.

³³ Attecmach perra ñerra'm esempocho sentyerr ñaña ñeñt allpono' notuas, sapa' ñeñtcha'ña señotaterre' po'ñoč o'ca'ye čherrmoch allempoch e'ñe etsotuerria, o'ca'ye e'ñe allame'ttsamerria.

³⁴ Napa' po'ñoč o'ch notas, acheñenesha' ñeñt e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añečhno.

³⁵ Esempohuañen añ enet ñeñt senten te'pa' e'ñech chenca'huerra; patspa'cho'ña attecmach perra e'ñech chenca'huerra. Tarraña ñaña neñoñpa' amach chenquerro ama't e'ñe ahuata.

³⁶ 'Tarraña ñeñt yetroch nohuerrapa' ñeñtñapa' ama eseshaye' eñotenaye. Ama't erro'tsente' atsne' ama't erro'tsen tsapro ñeñtpa' ama't mellañoñeñesha' ñeñt pue'ntaño'tsa'yen ñetpa'cho'ña ama't puesheñarrořetapa' amaña eseshaye'ña eñotenaye allempoch nohuerrerr po'pocheño. Ama't na ñeñten Yompoc Puechemeren napa'cho'ña te'pa' ama neñoteñe, ñapñaña Nompoc Parets eñotene'.

³⁷ 'Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't ahuat allempo corre't Noé.

³⁸ Ñehua, allempopa' ama es puečha'yeneto aña e'ñe cotape'chete't atto atarr pa'namen muenenet ñeñtcha' rra'yenet, orrare'tyesete't,

sena'tanatyena yacmanesha'chno, coyanesha'chnopa'cho'ña apanatyese'te'ñeñ' yoranatyehahue'te. Ñet'ñapa' ñeñña e'ñe cohuen entete'te. Atte'ñapa' chap allempo be'tosos Noé po'huarcopahuo.

³⁹ Ama es pue'cha'yese'te'te machayote'pa'tcha' cho'pa oñ erracmañen, attoña añyanatuerranet oñ allohuenet. Attecmach perra ñerra'm esempoch nohuerra na Ñeññen Acheñetosets. Machayotachca'ye nohuerra.

⁴⁰ Ñaña allempopa' atet'cha'ca'ye perra; puesheña'tetspa' anmare'tterrach; ama't ñeññ' e'ñe pamo'ts pannenetañ ñeññ'apa' allach asa'nmare'tterra. Ñato' allempopa' allo'tsencha' epsheña yacma pa'mro, puesheñarr'ñapa' anmare'tterrach po'psheñeñ'ñapa' allach asa'nmare'tterra.

⁴¹ Amapa' ñato' allempo allo'tsencha' epsheña coyanesha' ñeññ' parro puetse'tets mapyo, ñeññ'pa'cho'ña puesheñarr'pa' anmare'tterrach po'psheñeñ'ñapa' allach asa'nmare'tterra.

⁴² Ñeñño'marña te'pa' o'ch notas: Chocmuepa'ch seño'se'rtenna tarro'mar sapa'cho'ña ama seño'tenno esempoch nohuerra na ñeññen e'ñe Separtseshar sepen.

⁴³ Napa' e'ñech machayota nohuerra atet' pena eñeñ' allempo atta es sep'cha'yena machayotach huaponasa o'ch yoratsre'tensa'. Tarraña sa ñeññes apacllates seño'che'pa'ch ñerra'm seño'teñeñ' e'ñech esempo tsapro huaponasa eñeñ', sapa' cho'chña seño'se'rtenañ attoch amach semnacheña o'ch toram'psas sepaclo o'ch be'tosam'psasa o'ch yoruennasa' ñeññ' allpon semorrenyena.

⁴⁴ Ñeñño'mar notenes sapa'cho'ña chocmuepa'chña seño'se'rtenna tarro'mar allempoch atta es sep'cha'yenapa' allempochña nohuerra na Ñeññen Acheñetosets.

Atet'cha' apare'tterra ataruasañ ñeññ' e'ñe cohuen etsotene' atet' yecheña pamo'mte' ñaña atet'cha' apare'tterra po'poñ ataruasañ ñeññ' ama etsotaye ñeññ' atet' yecheña pamo'mte'

(Lc. 12.41-48)

⁴⁵ Jesús'ñapa' alla toma'ntaterraneterr po'poñoneñ', atet' o'terraneterr:

–Allohuenespa' atet'cha' se'pa e'ñe cohuen atet' ñerra'mrrate' puesheñarr yacma ñeññ' atarr ame'ñañatetsa ñaña e'ñech eñotenan ñeññ' atarr sherbets. Ñeññña yacmarpa' añ yechenaya pamo'mte' e'ñe alla pa'paclo. Añcha' po'taruas pen chocmach apa'yesan allohuen po'potantañ pamo'mte' pa'taruasañer puerraret allpon ñeññ' poctetsa puesheña'ttsocop. Ñapa' attecmach penanet, chocmach apuenanet ñerra'm esempoch cherrerr allempo atet' anare't'ñocop o'ch alla apa'yerraneterr po'pocheño. Ñapa' chocmach atet' pena amach que'chpuenaneto tarro'mar ñapa' e'ñe eñoteñ' attoch e'ñe coshatenan pamo'mte'.

⁴⁶ Ñeññña ataruasañpa' atarrcha' coshatapuerran pamo'mte'. Ñerra'm esempoch huerra o'ch alla entuenan pa'taruasañer ama cho' que'chpuenano ñeññ' po'taruas apa'neñ' ahuañmo'choteñ.

⁴⁷ Po'ño'ch o'ch notas, ñeññña yacmar atarrcha' coshatueñ' pamo'mte'. Añcha' coshaterre' o'ch nohuer añcha'tare't' ñeññ'cha' cohua'm'psaprete' ñeññ' allpon echyen pamo'mte'.

⁴⁸⁻⁴⁹ Tarraña ñeññña ataruasañer allempo ama huerra' pamo'mte' ñerra'm ñapa' atta oten pueyo'chro, namo'mte'pa' amach ahuen huerro, allempoña ñapa' chach ashtapechyenan ataruasañe'chno ñeññ'cha' rratañ. Ñaña'pa' ñerra'm attach allemeñ' rrapretyen ñaña attach orrare'tapretyen allcha' atarr

posa'tare'tyen, ñeñña ataruasañ atetpa' ama't mameshapa' ama cohue-
nayaye.

⁵⁰ Ñeñña ataruasañer ñerra'm ñapa' attach ottatse'tyena amach es
puecha'yeno amach eñoteñe ñeñte yetroch huerra pamo'mte' ama't
erro'tsencha' yetro huena.

⁵¹ Machayotachña huerra pamo'mte'pa' atarrcha' coñchatuer, allach
mueñuer all ñeñt o'patenaya allohuen ñeñt po'ñoçh ama ame'ñetso ñeñt
atta shecare'tyets. Allña' allcha' yahuanrrorterret panmueñoet atserrpa'
rraso'tyesosetcha' pa's.

25

All atma'ntataretta ñeñt atet pena çharrasheña shopshare'

¹ Jesúsña'papa' alla yeçhaterraneterr, ñeñtpa' atet otanet:

–Allempoch amcha'taretterra Yompor ñeñt pue'ntaño'tsen allempoch
nohuerra na, ñeñña allempopa' atetcha' perra e'ñech atet ñerra'mrrate'
çharrasheña shopshare' ñeñtcha' tatsa allcha' cohuoset allempoch huerranet
ñeñt e'ñe errte' sena'tetsa. Ñetña'papa' anomyeset po'lampareñ alloch pocta-
pueñet ñerra'm esempoch huerra.

²⁻⁴ Ñeñña amnarsheña ñetpa' atta es puecha'yenet ñeñto'marña ama an-
muetona po'poñ aceite' alloch a'huortaterret po'lampareñ allempoch huañ
ñeñt anmam̄set po'lamparñeño. Po'potantañ amnarsheña ñetpa' atarr
eñotenet attoch eñose'rteñet e'ñe cohuen, ñeñto'marña ñet e'ñe ellonetpa'
anomyeset aceite' puetellm̄o alloch a'huortaterret po'lampareñ ñerra'm es-
empo huañap̄set ñeñt po'lampareñeño'tsenet.

⁵ Allña ñetpa' cohueñet, ama ahuenaye' huerranetona ñeñt sena'tetsa.
Ñetña all machayota moñe'tyesetpa' çhepa'tcha' manrra'tuatset.

⁶ O'ña ñarenen tsappa' allempoñapa' machayota e'muet rranarets, ñeñña'papa'
atet oten: “Tayaca'yeña huennasaña ñeñt sena'tetsa ñeñt atarr secuen.
Secha'nomñaca'ye' o'ch sepocetñ.”

⁷ Allempoñapa' allenta tanrra'tuaña allohuen shopshare' ñetña'papa'
a'cohuenetyeset po'lampareñ.

⁸ Amnarsheñaña ñeñt ama yerpa'pesnomaye aceite' ñetña'papa' atet
otare'chet po'potantañ amnarsheña ñeñt çhocma anmue' aceite': “Te'pa'
o'ch socya'y yañña aceite' ñeñtcha' ya'huortatnom. Yapa' o' maya'huaña
yelampareñ.”

⁹ Ñeñña e'ñe cohuen eñotene' eñose'rtatsapa' ñetña'papa' atet ochetña
po'poñ amnarsheña ñeñt enamuenahuet aceite': “Amachca'ye yocyaso
te't yehuañapen yañña. Sapa' arrña seta all pomueñet o'ch serañteña' saña
socop.”

¹⁰ Ñet ahuanmatset o'ch rañteñeta'pa' ñeñña sena'tetsapa' e'ñe allorocma
çhen. Ñeñña po'poñ amnarsheña ñeñt e'ñe po'ñoçh çhocma eñose'rtetsa,
ñetña'papa' be'toscha'tet parro epuet ñeñt sena'tetsa. Allña'papa' allcha' atarr
coshame'tapreteret. Allña'papa' e'ñe echarr yottam̄set.

¹¹ Allña e'ñe o'chtatsapa' o' huacherraña po'potantañ amnarsheña
shopshare' ñeñt ahuanmatsa ñorra'. Ñetña'papa' atet otuerret:
“Petoram̄psaye'chapuerrey Nepapareshacha'.”

¹² Ñaña'papa' atet otapuerret: “Te' napa' o'ch notapuerres, sa amaca'ye
po'ñoçhaye' seyemtenno.”

¹³ Jesúsña'papa' alla oterranerr ñeñt e'mñotene':

–Ñeñto'marña na te'pa' o'ch notas: Sapa' chocmuepa'chña e'ñe cohuen señose'rtena, tarro'mar sapa' amaca'ye señoteñe erra'tsencha' yetñatsro allempoch nohuerra na Ñeñten Acheñetosets, ñaña erro'tsencha' yetro ama't ñeñtpa' ama señoteñe.

All atma'ntataretta ataruasañechno ñeñt aparettatsa puesheña'tets quelle ñeñt otenet talento

¹⁴ Jesúsñapa' alla ye'chaterraneterr po'poñ, ñeñtpa' atet oterraneterr:

–Allempoch am'cha'tare'tterra Yompor ñeñt pue'ntaño'tsen allempoch nohuerra na, ñeñña allempopa' e'ñech atet perra ñerra'mrrate' puesheñarr yacma o'ch ahuo' ñachayo. Ñeñña yacmarpa' o'ch agotnoman pa'taruasañrenesha'pa' o'ch apa'yesnomanet quelle ñeñt allpon echen; ñetñapa' o'ch cohuañpsoñet tarremphuach esempohuañencha' huerra.

¹⁵ 'Puesheñarrpa' apa'neñ amnarmeta talento, ñeñtpa' atarr shonte' quelle allpon ñerra'm amnar mil. Ñapa' añecop apa'neñ attoch ellopa' o'ch atontatan po'patronar po'çllayor. Po'psheñeñpa' apa'neñ epmeta talento, ñeñtpa' allpon quelle allpon ñerra'm epa mil. Po'psheñeñpa' apa'neñ puemetarr talento. Ñeñtpa'cho'ña allpon quelle ñerra'mrrate' paterr mil. Ñehua, puesheña'ttsetpa' e'ñe allpona apa'yesnomanet ñeñt e'ñe allpona eñotyenet attoch ellonetpa' atontatet quelle. Ñeñña apa'yesuanmanetpa' ñañaapa' allenta ahuo' ñachayo.

¹⁶ Ñeñt agapue' amnar mil ñañaapa' allorocma ahuo' allcha' taruasatan quelle; attoña ellonetpa' o' alla ganerrerr po'poñ amnar mil quelle.

¹⁷ Atet ña ñaña ñeñt agapue' epa mil. Ñapa'cho'ña ellonetpa' ganerrerr po'poñ epa mil quelle.

¹⁸ Tarraña añña ñeñt agapue' paterr mil ñañaapa' allenta aneñ allcha' pampueña'; attoca'yeña ñapa' cha e'potanña quelle.

¹⁹ 'O'ña atomatpa' o' huerranetña po'patronaret, allenta agotatuerranet attoch entuerranet po'taruas errotente' taruasa'yeset e'ñe puesheña'ttset.

²⁰ Ñeñña agapue' amnar mil ñañaapa' huapapa' apapuenan po'patronar po'poñ amnar mil quelle, ñeñtpa' atet otapueñ: "Añña Nomporcha' ñeñt ñapa'nmuen amnar mil quelle ahuaña, napa' elloca'ye neganerrerrña peçllayoro't po'poñ amnar mil quelle."

²¹ Po'patronarpa' atet och: "E'ñe pocte' neyochrecha'; ñapa' atarr cohuen pesherenen. Papa' e'ñe cohuen petsoton ñeñt atet notnomuep. Ama't allponatolla napa'nmañ ahuaña, ñañaapa' atarro't cohuen pesherbaton. Ñeñto'marña te'pa' o'ch nenuerreñ ñach necuañpsapreterre' ñeñt atarr aton. Te'ña ñapa' pebe'tos allcha' atarr ñocshapreterrna."

²² Allempoñapa' ñeñt agapue' ñaña epa mil, ñapa'cho' huapapa' apapuenan po'patronar po'poñ epa mil quelle. Ñapa'cho'ña atet otapueñ: "Nomporcha' ñeñt ñapa'nmuen ñaña epa mil, napa'cho'ña elloca'ye neganerrerrña peçllayoro't po'poñ epa mil quelle."

²³ Ñapa'cho'ña po'patronarpa' atet och: "E'ñe pocte'; ñapa'cho'ña atarro't cohuen pesherenen. Papa'cho'ña e'ñe cohuen petsoton ñeñt atet notnomuep. Ama't allponatolla napa'nmañ ahuaña, ñañaapa' atarro't cohuen pesherbaton. Ñeñto'marña te'pa' o'ch nenuerreñ ñaña ñach necuañpsapreterre' ñeñt atarr aton. Papa'cho'ña te'pa' pebe'tos ñaña allcha' atarr ñocshapreterrna."

²⁴ Allempoñapa' huapa ñaña ñeñt agapue' paterr mil quelle. Ñañaapa' atet otapueñ: "Napa' neñoteneñ Nomporcha'. Papa' amaca'ye matsrre'mñaep;

ṗapa' čhocmaca'ye peprratamṗesyen ama't ñeñṗa' ama ṗoyaye ñaña čhocmaca'ye ṗocsechatyenña ñeñṗa' ama ṗaye' nare'tatyenaye; čhocma es ṗa'yapačha'yen ama't ñeñṗa' amaca'ye ṗaye' na'yenaye.

²⁵ Ñeñto'marña napa' čha nemiča'teneṗ. Ñeñto'marña ñeñṗa' napa'nmuena ahuaña paterr mil quellepa' nañapa' čha nepamponaṗ. Te'ñapa' o'ch alla napapuerreṗ ñeñṗa' e'ñe ṗo."

²⁶ Allempoña po'patronarpa' atet och: "Paña po'ñočpa' amaca'ye cohuenaye' pesherbenna ama't mamesha; atarrca'ye quellañtsoṗ. Ñerra'm e'ñe po'ñoč peñotenoñ čhocma es neprratamṗesyeneñ ñeñṗa' ama noyaye; ñerra'm po'ñoč čhocma nocsechatyeneñ ñeñṗa' ama naye' nare'tatyenaye; ñerra'm po'ñoč čhocma es na'yapačha'yeneñ ñeñṗa' ama naye' na'yenayne, ñerra'm e'ñe po'ñoč atet pentennoña"

²⁷ eso'maruañaca'ye amaña bancoye' penennanoña nečllayor allochñapa' te'ña o' nehuerrapa' nagaphuerreñcha' ñaña allo atontatonet nečllayor."

²⁸ Allempoñapa' atet otan ñeñṗa' tomčha'tyets all: "Te'pa' čhosa puer-ratamṗerre'ña ñeñṗa' paterr mil quelle o'ch sapuer ñeñṗa' echene' čharra' mil quelle."

²⁹ Ñeñto'marña te' napa' o'ch notas: Ñeñṗa' es echets shonte' e'ñe puesherbateñoṗet pamo'mte', ñetña ellonetpa' o'ch alla aparetterret po'poñ aton. Tarraña ñeñṗa' ama es echetsopa' ama't allponatolla ñeñṗa' echyenetañ aprratamṗsaretterretcha'.

³⁰ Ñaña añ ataruasañer ñeñṗa' ama nesherbena, te'ñapa' čhosaña huapore'te' a'yoṗ checmetoṗ. Allñapa' allcha' yahuanrrortenet panmueñoṗet atserrpa' rraso'tyesosetcha' pa's."

Allempoch ellopa'tetstatareterra ñeñṗa' toma'ntenaya carrneročhno ñaña ñeñṗa' toma'ntenaya cabračhno

³¹ Allempoch nohuerra na Ñeñten Acheñetosets, nohuerrach e'ñe nepartsoteñoṗen epan allohuen nemillañoṗeñnaneshar. Allempopa' nanorruerrcha' neconaño allcha'ña e'ñe nepartsotuerr e'ñe necohuenteñsha'.

³² Allempoñapa' e'ñech nesho apčherra allohuen pa'namen acheñ ñeñṗa' yečha'yetsa arr patsro. Allempochña nellopa'tetstaterranet e'ñe atet pena ñeñṗa' pamo'mte' pen carrnero, ñaña'apa' o'ch ellopa'tetstatenan carrneročhno ñaña cabračhno.

³³ Acheñenesha'ña ñeñṗa' e'ñe cohuenpa' ñetñapa' necohuenrotcha' nenuerranet ñeñṗa' e'ñe atet ñerra'm carrneročhno. Ñaña ñeñṗa' ama cohuenayayepa' ñetñapa' ne'chcoterotach nenuerranet ñeñṗa' e'ñe atet ñerra'm cabračhno.

³⁴ Naña allempoch atarr na'miča'tarettarapa', atetcha' noter ñeñṗa' necohuenronte'tsa'yen: "Sapa' sonačha't allohuenes tarro'mar Nompore'ca'ye atarr bensare'tamṗerres. Te'ña sapa' o'ch saguerr ñeñṗa' o'patatensa ahuatoteñ. Ama't allempoteñ Nompore'pa' erre't yečcatene' pats sañapa' allempoteñ o'patatasa attoch sa'miča'tarettapretera.

³⁵ Tarro'mar napa' allempo nachporre'tpa' saca'yeña nerratallme'chaye't. Allempo no'ñpa'te'tpa' saca'yeña nonayesaye't. Allempo nečhapue't sesho all ama nentare sañapa' čhocma e'ñe cohuen sagapne't.

³⁶ Allempo nemuelle'tpa' saca'yeña nepashtaye't. Allempo natsna'te'tpa' sañapa' čhocma secuamṗesne't. Allempo yottamṗesnete'tpa' saca'yeña e'ñe cohuen nemo'taye't."

³⁷ Allempoña ñeñṗa' e'ñe cohuen es neṗa'yeyaye'tpa' ñetñapa' atetcha' oterret: "Ta'm Partseshacha', ¿esempo'tña yentape't allempo ṗachporre't allempo

yerratallme'chape't? ¿Esempo'tña yentape't allempo p̄o'ñpa'te't allempo yonape't?

³⁸ ¿Esempo'tña yentape't allempo pe'chapue't yesho all ama pentare allempo e'ñe cohuen yagapape't? Ta'm ¿esempo'te'ña yentape't allempo pemuelle't allempo yepashtape't?

³⁹ ¿Esempo't yentape'tña allempo p̄atsna'te't ñaña allempo yottam̄psapete't allempo yemo'tape't?"

⁴⁰ Allempoña na ñeñfen Partshanpa' atetcha' noterres: "Te' napa' o'ch notas: Po'ño'chpa' allempo e'ñe cohuen atet sepa'yeshane't na nemo'nasheñnesha' na'naca'yeña e'ñe cohuen atet sepen. Ama't puesheñarra ñeñt ama esoshe'maye' entyese'te acheñenesha' allempo, tarraña saña allempopa' atto e'ñe cohuen es sepa'yeshanete't, na'naca'yeña e'ñe cohuen atet sepen allempo."

⁴¹ 'Allempoña ñeñt ne'chcoteronte'tsenpa' atetcha' noterranet: "Sapa' orrerres arro't, sapa' aña so'patenaya ñeñt atarr yoro'chen. Te'ñapa' orras all huorten tso' errañaren ñeñt ama amayaño ama't errponaña. Ñeñtña tsorpa' añ o'patateñet oneñe't e'ñe pueyochreshohen."

⁴² Tarro'mar na allempo nachporre'tpa' sapa' amaca'ye saye' nerratallme'chaye'te. Allempo no'ñpa'te'tpa' amaca' saye'ña nonaye'te.

⁴³ Allempo ne'chapue't sesho all ama nentare sapa' amaca'ye cohue'naye' sagapne'te. Allempo nemuelle'tpa' sapa' amaca'ye saye' nepash-taye'te. Allempo natsna'te't ama't ñaña allempo yottam̄pesnete'tpa' sañapa' amaca'ye semo'tne'te."

⁴⁴ Allempoña ñetpa' atetcha' oterrnet: "¿Esempohuañaca'ye, Partshacha', yentape't allempo p̄achporre't ñaña allempo p̄o'ñpa'te't ñaña allempo pe'chapue't yesho all ama pentare ñaña allempo pemuelle't ñaña allempo p̄atsna'te't, ñaña allempo yottam̄psapete't? ¿Esempo'tña yentape't atet allempo yapa' ama't coñe'tapa' ama es yapape'te?"

⁴⁵ Allempoña napa' atetcha' noterranet: "Te'pa' o'ch notas: Po'ño'ch sa allempo ama a'cua'psenaye' sentone'te allohuen na nemo'nasheñnesha', na'naca'yeña atet sente'tña allempo."

⁴⁶ Allempoña acheñenesha' ñeñt ne'chcoteronte'tsen, ñetñapa' ahuanerretcha' allcha' coñcherret e'ñe errponohuañen. Añña ñeñt e'ñe cohuen es p̄a'yestse't ñetñapa' ahuanerretcha' Yomporesho allña ñetpa' corretsetach pocsheñeshocmañen errponañohen.

26

*Atto atarr o'pateñet Jesús o'ch muetsatateret
(Mr. 14.1-2; Lc. 22.1-2; Jn. 11.45-53)*

¹ Jesúsñapa' allempo serrpare'tatuahuanet allohuen añ ñoñetspa' allempoña' atet otan pueyochresha':

² —Sapa' seño'teñ o'ca'ye epomtñapa' o'ch çhapa'muen pascuapo. Allempoña na Ñeñfen Acheñetosetspa' allempochña pomuerrnet attotcha'ña corso'tam̄perrnet.

³ Allempoña allohuen judionesha' pa'm̄cha'tare'ternesha' ñetñapa' apçhet. Añ apçhatsa allohuen ñeñt judionesha' po'cornaneshar pa'm̄cha'tare'ternesha' epuet ñaña ñeñt atarr etsotayenayeñ ñoñets ñeñt atet anaret epuet ñaña ñeñt pompornesha' pen allohuen judionesha'. Ñetñapa' arr apçhenet cornesha' pa'paclo, ñeñtña cornesha'pa' ñaca'yeña atarr nanac pa'm̄cha'tare'ter penet, ñeñtapa' añ pa'so'cheñ Caifás.

⁴ Allña ñetpa' cotape'chatannenet, Jesús a atarr o'patenet. Ñetña' atet otanna'tyeset:

—Errotuachca'ye yepe'te' attoch yeshcach e'ñe a'nahua esheccha' yermach atto'tcha' yemtsatach.

⁵ Ñetña allempopa' alla otanna'tyerreterr:

—Tarraña te' pascuapo allempo shontena acheñenesha' amachca'ye yermatsche allañaca'ye cha yatsrre'mochtateñ acheñenesha'.

Atto puesheñarr coyanesha'pa' shosan eñmosať Jesús poño
(Mr. 14.3-9; Jn. 12.1-8)

⁶ Pamtarrña Jesús'pa' Betanio'tsen all Simón pa'paclo, ñeñña Simónpa' ñeñt ose't puetsarñats.

⁷ Jesús'ña'pa' alla anen all rrallme'chen. Allña'pa' huapoña puesheñarr coyanesha', huapatan eñmosať ñeñt ama matsa'to; huapatanpes puetellmo ñeñña puetellenpa' añ socheñet alabastro. Ñeñña eñmosaťpa' alla she' Jesús poño.

⁸ Pueyochresha'chnoña ñetña eñchetpa' cha atsrre'muet, atet otyeset:

—Eso'mare'tña atta a'pertatosanña eñmosať. Ñeñt eñmosaťerpa' amaca'ye matsa'to.

⁹ Chochña'cho' pomoseña' gana'cha' shonte' quelle allempoña'pa' apa'yeseñcha' ñaña allohuen huocchañneshachno.

¹⁰ Jesús'ña e'manetpa' ñaña'pa' atet otanet:

—Eso'mare'tcha' cha muene' satsrre'mochtana'tañña coyanesha'. Ñapa' atarrca'ye cohuen posen.

¹¹ Tarraña ama'tcha' cho pomosaneñ eñmosať alloch es apa'yeseñ huocchañneshachno, tarraña chocmachca'ye eñallña huocchañneshachno arr patsro. Nañapa' po'ño'chpa' amachca'ye allo'na sentenno arr patsro.

¹² Ñeñt atto shosnan te' eñmosať nechtso, ñeñtpa' añecpa'naca'ye sherben tarremphua allempoch a'yana'terrneterr ñeñtcha' epuet pampa'pesnet.

¹³ Po'ño'chca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'chetpa' ñaña atet penen te' añ coyanesha', attochña ña'nach yerpunenet.

Atto Judaspa' pomuerran Jesús
(Mr. 14.10-11; Lc. 22.3-6)

¹⁴ Allempoña pueyochresha' ñeñt charra' puechetsa epsheña, puesheñarrña ñeñt pa'so'cheñ Judas Iscariote, ñaña'pa' allenta ahuo' allo'tsa'yen ñeñt pa'm'cha'tareternesha' pa'yen allohuen judionesha' po'cornaneshar.

¹⁵ Chap allpa' ñaña'pa' atet otosanet:

—Ñerra'm o'ch negatas Jesús attoch serrmue'pa' ¿errpona'tcha'ña setsa'tna? Ñetña'pa' atet ochet:

—O'chca'ye yapa' ma'poch charratlla quelle.

¹⁶ Allempoña ñapa' aña e'ñe cotape'chyen errotentoch' pomuerranña Jesús.

Atto Jesús'pa' rrallme'chatnenan pueyochresha' attoch chocmach yerpueret ñeñt yoten te' Santa Cena

(Mr. 14.12-25; Lc. 22.7-23; Jn. 13.21-30; 1Co. 11.23-26)

¹⁷ Allempoña chapa'muen ñeñt yetñatsro allempoch rrrerreterr pan ñeñt ama anareteyaye chase'. Chapa'muen ñeñt yeterpa' Jesús'ña'pa' huacha'toña pueyochresha' ñetña'pa' atet otoset:

–Te'pa' ¿erra't pemneñ allcha' ya'potonaþ ñeñtcha' perra' pascuapo?

¹⁸ Ñaña'pa' atet otanet:

–Te'pa' o'ch ahues anetso; o'ch seçhap allo'tsen puesheñarr acheñ. Ñeñtpa' atetcha' sotos: “Ñeñña Maestro Jesús'pa' atetca'ye oten: ‘Te'pa' o' çhapmoch allempoch nerroma, te' pascuapopa' arrcha' nerra'nom pepaclo neyochreshohuen.’ ”

¹⁹ Atet otanet Jesús'pa' ñetña'pa' atetcho' pet. Allca'yeña añño'tosñañetña rreñets allcha' rrallme'chet.

²⁰ O'ña ellerrotenapa' Jesús'ña'pa' anorros allcha' rrallme'chatnenan pueyochresha' ñeñt çharrasheña puechena epsheña.

²¹ Allña rrallme'chetsetpa' Jesús'ña'pa' atet otanet:

–Po'ñoçhca'ye notenes: Puesheñarrofes sa ñeñtescha'ca'ye nepomuerre'.

²² Ñetña'pa' çha atarr lleca'rrtet. A'þto'tyeset e'ñe puesheña'ttset:

–Partseshacha' ta'm ¿amate' na nepomuerrmochape?

²³ Ñaña'pa' atet oterraneterr:

–Ñeñt netsapechapretene' nerrarpa' ñeñtcha'ca'yeña nepomuerre'.

²⁴ Po'ñoçhca'ye te'pa' allo'na sen etsotnomtsa ñeñt atet anuaret Yompor po'ñoño nocop Ñeñten Acheñetosets; atotcha' muetsaterrnet. Tarraña nocoppa' e'ñe pocte'; añña po'ñoçh acheñer ñeñtcha' nepomuerre' ñocopña'pa' atarr llequëñets. Añ acheñerpa' e'ñeca'ye pocteñ ñocop amachñaçho' eñalletatstañe.

²⁵ Judasña ñeñtcha' pomuerre'pa' ñaña'pa' atet och:

–Maestrocha' ta'm ¿amate' na nepomuerrmochape?

Jesús'ña'pa' atet och:

–Pate'ca'ye atetca' þoten.

²⁶ All rrallme'chenet, Jesús'ña'pa' chetan pan parasyoso'tan Pompor. Parasyoso'tuepa' shota'tan panpa' apa'yesan pueyochresha'. Ñeñtpa' atet otanet:

–Sagapyes o'ch serre' añmapa' ñeñtcha'ña nechets sepen.

²⁷ Allotña'pa' chetan ñaña orramets parasyoso'tuerrerrpa' apa'yerraneterr. Ñeñtpa' atet oterraneterr:

–Sorr ñaña añ narmetsos allohuenes.

²⁸ Añpa' nerrasca'ye sepeñ ñeñtcha' ashatarettatsa shonte' acheñeneshacop alloch aþre'tnare'tterret po'chñaret. Añ nerraspa' alloch e'ñe etserra a'pocoterra acheñenesha' Apuesho.

²⁹ Napa' o'ch notas: Te'pa' amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'taretetuerra Apa.

Atto Jesús'pa' eñotatan Pedro ñapa' çhocmach a'nasocha

(Mr. 14.26-31; Lc. 22.31-34; Jn. 13.36-38)

³⁰ Allempoña o' morrechuanmuet Yomporecoppa' ahuaneneterr Olivoþno.

³¹ Allña'pa' atet otosanet Jesús:

–Añ tsaprocmach sa allohuenespa' sa'ypo'ña'huanmuencha' tarro'mar Yompor po'ñoñopa' atetca'ye anuaret, ñeñtpa' atet ote't Yompor nocop: “O'ch nemtsater ñeñt cohuaþpene' carrnero, po'carrnerorña'pa' çhach ma'ttra'tyesa allemeñ.”

³² Jesús'ña'pa' atet oterraneterr:

–Tarraña esempoch alla netanterra napa' nanomcha' oterrtsa Galileo.

³³ Allempoña Pedropa' atet och:

–Ama't allohuenet ñerra'm a'ypo'ña'huerrpetcha'pa' naña ama't ahua'apa' amach na'ypo'ñerrpe.

³⁴ Jesúsña'pa' atet otererr:

–Po'ño'chca'ye o'ch notañ, añe tsaprocma amach eñena' atolloppa' pñaña'pa' o'ch ma'poch pñanasotenna.

³⁵ Pedroña'pa' alla otererr:

–Ama'tcha' yerromhuanen parro'pa' naña'pa' ama't parrocha amach na'nasota'po.

Allohuen pueyochresha'pa' ñetpa'cho'ña e'ñe attecma otyeñetañ ñamet.

Atto Jesús'pa' ma'yochuena all oteñet Getsemaní

(Mr. 14.32-42; Lc. 22.39-46)

³⁶ Allo'ña'pa' chap Jesús pueyochreshohuen all narmetsmño, ñeñ'pa' añ pa'so'cheñ Getsemaní. Allña'pa' otosanet:

–Te' sapa' allach sanorr'cha'tos arma, napa' o'ch nema'yochena' tarronteye'.

³⁷ Allña'pa' añ anmos Pedro ñaña Zebedeo puechemerasha', epsheña. Jesúsña'pa' cha nanac llequëna, nanac allpatena.

³⁸ Allempoña'pa' atet otosanet:

–Napa' cha chepo'chenen nellquëña neyo'chro, cha muene' nerromuen nellquëño'. Sapa' allasa'tach arr secuapretosno'tach.

³⁹ Ñaña'pa' ahua' a'yente'ye' all rremosa patso atet ma'yochosa:

–Apa, ñerra'm erroteno'tpa' arepa'chña pemnatatsche o'ch chapona ñeñ' atarr amuerochtatañ nenten.* Tarraña ñerra'm pñach muenats añepa'chña atet pe'paton ñeñ' pemnen pñ, amachña añeyaye ñeñ' nemnen na.

⁴⁰ O'ña atet ma'yochuapa' o' ahuer allo'tsa'yen pueyochresha' ma'psheña. O' cherr allpa' alla entuerranet ñetña'pa' cha atarr manrrenet. Allempoña'pa' otuerran Pedro:

–Ama't mamesha are'tcha'ña acuenaye' sentoso. Amahuachñaca' secuapretosnote' ama't mamesha.

⁴¹ E'ñe seño'serteño'tpa' choña sema'yochosa allochña'pa' attoch amach sañeña a'puerrataterro topateñets ñeñ'cha' sehuapoya atarr huomenc. Ñeñ'pa' ama't atarr semneñeñ tarraña sechetsña'pa' amaca'ye ahua'men-ca'eye' penso, ñeñ'o'marña notenes chocmach sema'yochena.

⁴² Jesúsña'pa' alla ahuererr puepocheño o'ch ma'yocherrerr, ñeñ'tara atet otuerrerr:

–Ñerra'm Apacha' añ pemnaten o'ch chapona ñeñ'cha' atarr na'muerochtate', ñerra'm ama erroteno't pñ'huañata'mperrno, ñeñ'pa' e'ñe pocte'. Añepa'chña atet pe'paton ñeñ' pemnen pñ.

⁴³ O'ña alla ma'yochuerrerrpa' allempoña'pa' huerrerr alla entuerranerr pueyochresha' ñetña'pa' o' alla manrrerretter, cha nanac atserr moñe'tenet.

⁴⁴ Jesúsña'pa' alla sa'nerraneterrpa' ahuererr ma'yochatsa poma'pocheño'hua. E'ñe attecma ma'yochuerrerr atet otua ñorra'.

⁴⁵ O'ña ma'yochuerrapa' allempoña'pa' alla huerrerr pueyochreshesho, atet otuerraneterr:

–Ama't teme'ttsenpa' alla't semanrren; ama'tpa' alla sames. Te'pa' seño'chepa'ch o' chap allempoch pomataterrenet na Ñeñ'ten Acheñetosets attotcha' erro'tuanen perren ñeñ' atarr ochña'tenesha'.

⁴⁶ Te'ña'pa' setanterra o'ch ahuey o'ch yepocte'. Secue'ca'ye ñeñ'cha' nepomue' ñeñ'pa' alla'tsena.

* **26:39** Ñeñ' amuerochtatañ ñeñ'pa' po'ño'ch arr atma'ntataret ñerra'mrrate' ñeñ' atarr pesherr yorren orran'tso.

*Allempo rromoset Jesús**(Mr. 14.43-50; Lc. 22.47-53; Jn. 18.2-11)*

47 All atet eñorena Jesús pa' cha huapatsa puesheñarr ñeñt' pueyochresha' peneñ ñeñt' a' pchenahuet epsheña, ñeñt' ñapa' añ Judas. Ñaña pa' hua'cha' tatan shonte' acheñenesha' occhelletareret ñaña etsachperetareret. Ñehua, añ ñeñt' hua'cha' tsapa' añ mueñenahuet ñeñt' pa' m'cha' tareternesha' pen allohuen judionesha' po' cornaneshar ñaña ñeñt' pompornesha' pen allohuen judionesha'. Ñetca' yeña mueñene' ña ñeñt' cha' rremuenaya' Jesús.

48 Ñehua, Judas ñeñt' pomuerre' Jesús pa' ñaña pa' atet otnoman acheñenesha' ñeñt' anom attoch cheme' toset Jesús. Ñeñt' pa' atet otnomanet:

—Erra' tsencha' nehuom'cha' tos e' ñe netso' tsapa' teño' pa' ñeñt' ca' yeña Jesús. Sañapa' ñeñt' cha' ña serrmos.

49 Allempoña huapapa' cha ponmosaya Jesús huom'cha' tos e' ñe puetso' tsapa' teñesha' atet otos:

—Tsapo, Maestrocha'.

50 Jesús ñapa' atet ota' p:

—Eso' maruañaca' masheñe, penña arr nesho.

Allempoña acheñenesha' pa' ponmosyet Jesús pa' rromoset e' ñe po' huamencocma.

51 Allempoña puesheñarr ñeñt' epuet Jesús pa' ñaña pa' po' c'hella cheta' pa' o' ch' chonto' tapanañ cornesha' pueñañra, puetepa' t'cha' tsorroñ. Ñeñt' pa' año pueñañra ñeñt' pa' m'cha' tareter pen allohuen judionesha' po' cornaneshar.

52 Allempoña Jesús pa' atet och:

—Penerr alla p'oc'hell allecma peneñ. Allohuen ñeñt' orrotetsa po' c'hellopa' cochllochca' ye colla' huerret.

53 Papa' cha' te' p'otenapañ amate' erroteno' es nenameña Nomp'or. Ama' te peñoteñe ñerra' m' cho nenañpa' ñapa' allorocmach mueñoneñ shonte' nanac po' m'llaño' teñaneshar ñeñt' cha' nemoñsayañ,

54 tarraña ñerra' m' atet ne' papa' amate' erroteno' etsotoña ñeñt' atet anuaret Yomp'or po' ñoño nocop. Allña oten ñeñt' pa' atet cha' ca' ye perra.

55 Allempoña Jesús pa' atet otan acheñenesha':

—Eso' mare' t' sehua' cha' tennanaña e' ñe occhelletareroches ñaña etsachperetareroches attoch serrma' n. Napa' ¿e' ñe' t' atet sentenen ñerra' m' rrate' eñeñen? O' allponmatuanen nanorryen Parets pa' paclo' mar, all ney' chatyen, eso' mare' t'ña ama allempocmaña serrma' ne' te.

56 Ama' tpa' atepa' ca' ye perra allochñapa' attoch e' ñe etsotuerra ñeñt' allpon quellca' yese' t' nocop ñeñt' a' m' ta' yesaye' t' Yomp'or po' ñoñ.

Allempoña allohuen pueyochresha' pa' allorocma a' ypo' ña' huanmet, ñeñt' pa' yetrra' tuet.

*Allempo chapata' mueñet Jesús all ap'cha' muena allohuen judionesha' pa' m'cha' tareternesha' ñeñt' a' p'octatyene' ñoñets ñocpuet**(Mr. 14.53-65; Lc. 22.54-55, 63-71; Jn. 18.12-14, 19-24)*

57 Acheñenesha' ñeñt' rromose' Jesús pa' ñeñt' pa' anmet allo' tsen Caifás ñeñt' pa' m'cha' tareter pen allohuen judionesha' po' cornaneshar. Allña pa' all ap'chenet parro allohuen ñeñt' atarr etsotayenayeñ ñoñets ñeñt' atet anaret epuet ñaña ñeñt' pompornesha' pen allohuen judionesha'.

58 Pedroña pa' co' ta' nmanet tarraña ñapa' chenta' en a' yot. E' ñe cornesha' po' pampohua allña pa' anorros epuet ñeñt' guardianesha' allochñapa' esheccha' entan Jesús attoch erro' tuanench'a' pet.

⁵⁹ Cornanesha'ña pa'mcha'tareternesha' ñaña ñeñt pompornesha' pen allohuen judionesha' ñaña allohuen ñeñt a'pocatyene' ñoñets ñocpuet ñetña'pa' aña atarr e'nenet ñeñtcha' toma'tam̄pse' Jesús allochñapa' attoch muetsatachet.

⁶⁰ Ama't shonte' huapatsañ ñeñtcha' toma'tam̄psosayeñpa' amcha'taretnesha'ña ama't puesheñarrofetapa' ama eseshaye' entayeña attoch muetsatachet. Atteñapa' huapa ñaña epsheña ñeñtcha' toma'tam̄pse'.

⁶¹ Ñetñapa' atet otoset:

—Añ acheñer ahuañapa' atetca'ye oten: “Napa' atarr ahuañenaten attoch na'materrñañ Parets pa'paquëll. Allotña poma'pamtañopa' o'ch alla natomater.” Ñapa' atetca'ye otña allempo.

⁶² Allempoñapa' cornesha' ñeñt nanac amcha'tareñ allenta tompa' atet otan Jesús:

—Pañapa' ¿ama'tcha'ña ñanapaneto? ¿Erroñenote'tña otteñe'chenpet?

⁶³ Jesúsñapa' ama eñoreno. Allempoña cornesha'pa' alla otererr:

—Te'pa' o'ch notap̄ o'ch potey e'ñe Yompor pa'so'chño ñeñt ama arromñañeshayaye, ñapa' ¿pa'tña ñeñtep̄ Parets Puechemerep̄, ñeñtepte' Cristotosets?

⁶⁴ Jesúsñapa' atet och:

—Napa' po'ñoçhca'ye ñeñten e'ñe atet poten. Elloña napa' o'chca'ye notas, o'ca'ye e'ñe çhampoch allempoch e'ñe senterren na Ñeñten Acheñetosets o'chca'ye alla nanorruerr Parets po'cohuenroñ allcha' nepartsotapretera. Ñaña po'pocheño o'ch sentapuerren o'ch nesuan̄perra oso Yompor pue'ntañot.

⁶⁵ Cornesha'ñapa' ñeñta e'mpa' allenta rrarre'tan pa'shtam e'ñe pat-srre'mueñoñ, ñeñtapa' atet ot:

—O'ca'ye çha achm̄are'tanña Yompor. Ñeñteñapa' amach ye'natsche po'psheñeñ ñeñtcha' a'metam̄psose'. Te' ama't sapa' o'ca'ye se'm̄ atet achm̄are'tenan Yompor. ¿Erroñena't senteñña sa?

⁶⁶ Ñetñapa' atet otyeset:

—Ña po'ñoçhpa' atarrca'ye nanac achm̄are'tenan Yompor, pocte'ñaçho' te'pa' o'ch semtsatach.

⁶⁷ Allempoñapa' a'coshare'tyeset e'ñe pa'clloyot, çho'ña çhota'tyeset; po'potantañeçhnoñapa' tacllapeçheset.

⁶⁸ Pachm̄are'teñoñetpa' atet otyeset:

—Te'ña ñerra'm po'ñoçhte' Cristoppa' eñoratenperrepa' Parets allochñapa' attoch potey esesha'te'ña peçhota'tyene'.

Atto Pedropa' a' nasotana Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedropa' a'yote'tsen all anen pampo. Allña' huapoña coyanesha' ñeñt cornesha' pueñañra, ñaña'pa' atet otosan Pedro:

—Paca'ye e'ñe cotaye'tña Jesús ñeñt galileo'marnesha'.

⁷⁰ Pedroñapa' anapue'pa' çha a'nasocha. Allohuenetñapa' e'ñe e'mhueñet atet ot:

—Napa' amaca'ye neñoteñe ñeñt atet potenen.

⁷¹ Allempoña Pedropa' ahuer, çherr allotecma be'tenet o'ch çhapuet o'pono pampo. Allña'pa' entuererr po'psheñeñ coyanesha' ñeñt cornesha' pueñañra. Ñaña'pa' atet otan ñeñt parro allo'tsa'yenet:

—Añ acheñerpa' ñeñtca'ye cotene'ña Jesús ñeñt nazareto'marnesha'.

⁷² Pedroñapa' alla a'nasotererrpa' atet otererr:

—Te' napa' o'ch notas e'ñe Yompor pa'so'chño, napa' amaca'ye nentareña añ yacmar ñeñt' potenen.

⁷³ O'ña o'chterrerra' huapoña ñaña ñeñt' tom'cha'tyets all, ñetpa'cho'ña atet otoset:

—Po'ño'chca'ye p'apa' Jesúsca'ye pueyochreshař. E'ñe atet peñen ñerra'mrrate' galileo'marnesha', ñeñto'marca'yeña o' yeñotař.

⁷⁴ Allempoña Pedropa' e'ñe pueshquëño'fanetpa' atta otatse'tyerraneterr; ñeñt'pa' atet otanet:

—Napa' e'ñe Yompor pa'so'chño notenes, ñerra'm amate' po'ño'choye' noten-sopa' te'pa' nerromuepa'. Napa' po'ño'chca'ye ama nentareña añ yacmar.

Ñeñta otuanetpa' e'ñepa'tcha' allempocma eñenña atollop.

⁷⁵ Allempoña Pedropa' alla yerpuerrana ñeñt' atet oteñ Jesús: “Amach eñena' atollop p'aña'pa' o'ch ma'poch p'anasotenna.” Allempoña Pedro čha'nom allo'tpa' ahuo' a'yenet all'ña'pa' all atarr yahuosa huomenc.

27

Allempo čhapata'mueñet Jesús allo'tsen am'cha'taret Pilato

(Mr. 15.1; Lc. 23.1-2; Jn. 18.28-32)

¹ Tsapatña puetarenpa' ñeñt'ña pa'm'cha'tare'ternesha' pen allohuen judionesha' po'cornaneshar ñet'ña'pa' ap'cha'mueneterr parro epuet ñeñt' pompornesha' pen judionesha'. All'ña ap'chenetpa' ñet'ña allohuenetpa' cotape'chatanna'tet attot'cha' muetsatateret Jesús.

² Jesús'ña'pa' o' huancota'tuet allempo'ña'pa' anma'mueñet allo'tsen am'cha'taret Poncio Pilato (ñeñt' nen gobierno Romot ñeñt' am'cha'tare'ttetsa allo'marneshacop). Allca'ye poma'mueñet'ña Jesús.

Atto tsomerra Judas e'ñe ñañeña

³ Judasña ñeñt' pomue' Jesús'pa' allempoña ñapa' eñoch Jesús'pa' čhochca'ye muetseret. Allempoña puellquëño'tpa' ello alla cotape'cherran cohuen. Allempo atet cotape'cherrpa' ñaña'pa' alla pomuerran quelle ma'poch čharratlla. Alla apuerrana' cornaneshar pa'm'cha'tare'ternesha' ñaña ñeñt' pompornesha' pen allohuen judionesha'.

⁴ All'ña'pa' atet otuerranet:

—Napa' o' čha norrtaterr ñeñt' ama cohuenayaye, o'ca'ye čha nepomuer acheñ attoch muetseret ama't' ñapa' ama't' coñe'ta amaca'ye eñalleña po'chñar.

Ñet'ña'pa' atet anaprra'tet:

—Ñeñt'pa' amaca'ye errotenoña yocop, ñeñt'pa' p'ocpaca'ye.

⁵ Allempoña ñapa' atta huapore'terrana' quelle o'pono Parets pa'pacillo'pa' o' alla ahuer, e'ñe puellquëño'tpa' tsom'ña'huerra ñañeña.

⁶ Cornaneshar'ña'pa' o' alla cheterret quelle. Ñet'ña'pa' atet otanna'tyeset.

—Añ quellepa' alloca'ye atsa'taretta attoch shataterrñañet acheñ po'rراس. Ñeñto'marña te'pa' amate'ca'ye pocteyaye o'ch alla yenererr allecma ap'chenet quelle Parets pa'pacillo.

⁷ Allempoña e'ñe ñagattsetapa' atet a'pochtachet o'ch rañtoñet allo añ po'patseñ ñeñt' yečcatyene' patsrro' alloch'ña'pa' allcha' pampa'yeret ama't' erra'tsena acheñer ñeñt' ahua'ña ñerra'm esempo rromayenet allampaño.

⁸ Ñeñto'marña ñeñt' patserpa' añ sochet Errasatsotnanen tarro'mar ñeñte quellayero rañtyet allo ashatare'tterra errasats. Ama't' teme'ttsen ñeñt' patser socheñet Errasatsotnanen.

⁹ Attoca'yeña etsotaña atet ote't Jeremías ñeñt' a'm'taye't Yompor po'ñoñ ahua't, ñeñt'pa' atetca'ye quellquë't Cristocop: “Cheterretcha' ñeñt' ma'poch

čharratlla quelle ñeñt allpon po'tsa' nen israelena'tarnesha' atto muetsa-tateret.

¹⁰ Ñeñtña quellepa' allochca'ye rañtterrñañet po'patseñ ñeñt yečhatene' patsrro'. Atefca'ye otenenña Partsesha' o'ch atet neña."

Atto Jesús pa' a'p'to'tare'teñ amcha'taret Pilato

(Mr. 15.2-5; Lc. 23.3-5; Jn. 18.33-38)

¹¹ Allempo čhapachet Jesús amcha'taret Pilatesho, allñapa' all amcha'taretñapa' allenta a'p'to'tař:

—Papa' ¿pa'tña amcha'tarettetsaña judioneshacop?

Jesúsñapa' atet och:

—Napa' ñeñtenca'ye atet p'ten.

¹² Ñeñt pa'mcha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñetña allpa' atarr otteñe'chyesoset Jesús. Ñaña' ama't mameshapa' ama eñoreno, ama't parrocha ama anapuenaneto ñeñt atto a'metare'teñet.

¹³ Allempo Pilatopa' atet och:

—¿Ama't pe'muenoña atet a'metare'tenpetpa' esocmañen otenpet?

¹⁴ Ñaña' ama anapuenaneto ama't e'ñe parrocha. Ñeñto'marña amcha'taretpa' nanac cohuaña'teñ. Ama eñoteñeto eso'marte' ama eñoreno ñocop.

Atto amcha'taret Pilatopa' otanet ama'tpa' čhosa muetse'ña Jesús

(Mr. 15.6-20; Lc. 23.13-25; Jn. 18.38-19.16)

¹⁵ Ñehua, ñetpa' atefca'ye yečhenet. E'ñe pate'tets char allempoch čherrerr pascuapo, ñeñtña amcha'taret ñeñt nen gobierno Romotpa' ñaña'pa' čhocmach a'rroyerran puesheñarr judioneshacop ñeñt ayottamřsarettetsa allempo, ñeñtara ñeñt pamo'ts penet ñet. O'ch apanet erra'tsenčo' enamuenet ñeñt muenenet ñet. Ñeñt pa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'.

¹⁶ Ñaña e'ñe allempopa' allo'tsen puesheñarr judionesha' ñeñt ayottamřsarettetsa ñeñt pa' añ pa'so'cheñ Barrabás. Allohuenetpa' e'ñe eñotueñet añecopña yottamřpeñet ñapa' čhocma atpare'tane't amcha'taret ñeñt nen gobierno Romot.

¹⁷ Ñeñto'marña allempo apča'hua allohuen acheñenesha'pa' amcha'taretña Pilatopa' a'p'to'tapanet:

—¿Erra'tsena't semnenña ñeñtcha' na'rroyonas, ñato' añcha' Barrabás amapa' Jesús ñeñt otenet Cristo?

¹⁸ Ñehua, Pilatopa' eñotapan judionesha' pa'mcha'tareternesha' ñetpa' e'ñe pue'moñe'tateñme'chatsa o' pomueret Jesús. Ñeñto'marña Pilatopa' añ muenen o'ch a'p'to'tan allohuen acheñenesha' tarro'mar ñapa' añca'ye e'nen attoch a'rroyerran Jesús.

¹⁹ Ñaña tarro'mar allempo anorros po'conaño allcha' a'p'octatan ñoñets, puetaporñapa' oñmach po'ñoñ all oteñ: "Amach erroť pepatsche Jesús ñeñt e'ñe cohuen acheñer tarro'mar ama't añ tsapro napa' o' nečhopo'teñ; napa' ñeñtña atarr neyore'te'."

²⁰ Tarraña ñeñt pa'mcha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñetña'pa' añ atarr cotape'chatenet acheñenesha' attoch ñetpa' allohuenetpa' o'ch ochet Pilato:

—Añcha' pa'rroyerrnay Barrabás, Jesúsñapa' pemtsatachepa'ch.

²¹ Allempoña amcha'taret Pilatopa' o' alla a'p'to'terraneterr:

—¿Erra'tsena'tña po'ñoçh añ epsheño'mar semnen ñeñtcha' na'rroyernnas?
Ñetña anaprra'tetpa' atet ochet:

—Añcha'ca'ye ña'rroyernay Barrabás.

²² Pilatoñapa' alla oterraneterr:

—Ñehua, añ Jesús ñeñt otenet Cristopa' ¿errofe'tcha'ña nepe'?

Allohuenetñapa' alla otereterr:

—¡Ñapa' pecorso'tam̄psachñaca'ye!

²³ Pilatoñapa' atet oterraneterr:

—Ñapa' ¿eso'tña pen ñeñt ama't mameshapa' ama pocteye' sentapreteñe?

Ñetñapa' alla rrannarterretter huomencpa' atet oterretter:

—Ñapa' ¡choñañaca'yeña corso'tam̄psate'!

²⁴ Pilatoñapa' e'ñe eñoteñ attoch ñapa' amach errof pe, elloña acheñenesha'pa' cha atarr atsre'moçhtana'teñet. Allempoñapa' chetan oñpa' e'pota'ta allochñapa' attoch eñotatanet ñapa' amaca'ye ñaye' otteñe'chenaye, ñeñtapa' atet oterraneterr:

—Napa' amach seyohuatsetno attoch rroma añ acheñer ñeñt ama't coñe'ta ama çhoye' errof es peno. Ñeñtapa' ama nocpa'nayaye, ñeñtapa' e'ñeca'ye saptecpa.

²⁵ Allohuenña acheñenesha'pa' ñetñapa' alla otereterr:

—Attoch rromapa' ama'tpa' yohua'yetepa'—ya ñaña ama't yem̄renñohuen.

²⁶ Allempoñapa' a'rroyerranet Barrabás, Jesúsñapa' ashtach allempoñapa' otan po'solltarneshar:

—Te'pa' o'ch secorso'tam̄peña'.

²⁷ Ñehua, solltarnesha'ña ama aneñeta' allcha' corso'tam̄psoset ñetñapa' arrña ñanom anmet Jesús añcha'taretepahuo. Allña agotachet allohuen po'potantañ solltarnesha' ñeñt allo'tsa'yen o'ch e'ñe apçhet Jesúsesho.

²⁸ Allña'pa' pa'llocchame'teñoñet Jesús'pa' rrotam̄pes pa'shtam, chorrachet shetamuets tsamamuen ñeñt pa'shtam pen ñeñt po'ñoçh añcha'tarettetsa.

²⁹ Pella'toñet ñaña choyo'mets agreçhpa' ñeñtña choyo'mtchet ñeñt atet choyo'mtena ñeñt po'ñoçh añcha'tarettetsa. Orrachet ñaña tsachep̄ pota po'cohuenrof ñeñt atet orren ñeñt po'ñoçh añcha'tarettetsa. Allempoñapa' concorpa'yesyet. Pa'llocchame'teñoñetpa' e'ñe atet p̄achet ñerra'mrrate' ñeñt e'ñe po'ñoçh añcha'tarettetsa. Pachm̄are'teñoñetpa' atet oteñet:

—Puetare' añcha'taretecha', atarruaca' cohuenep̄te' ña ñeñtep̄ judione-sha' pa'm̄cha'taretereñ.

³⁰ Pueche'tatseteñoñet a'coshare'teñetpa' o' chetam̄peretña ñaña tsachep̄ pota'pa' alloña asto'tame'teñet poño.

³¹ O'ña achm̄are'tuahuetpa' allempoñapa' rrotam̄peret shetamuets tsamamuen chorrateret e'ñe ña pa'shtam. Allempoñapa' anmet a'yo allcha' corso'tam̄peñeta'.

Atto corso'tam̄psoset Jesús

(Mr. 15.21-32; Lc. 23.26-43; Jn. 19.17-27)

³² E'ñe ahuanmatsetpa' allña oñenetpa' o' poctet puesheñarr yacma ñeñt cireneo'marnesha' ñeñtapa' añ pa'so'cheñ Simón. Ñaña'pa' allenta chechat-nomet Jesús po'corsoch.

³³ Chapachet all socheñet Gólgota ñeñt yoten yeñoño Poñetallep̄no.

³⁴ O' çhapachet all Jesús'pa' aposetañ vinos ñeñtapa' añ atsetaref pueretso ñeñt atarr pesherr. Atta am̄lle'pa' ama mueno o'ch orr.

35 Allempoña o' corso'tam̄pesuetpa' solltarnesha'ñapa' allenta yellsheñe'chatoñet pa'shtam po'suertot attoch orrtet e'ñe puesheña'ttsetpa' o'ch yorayesñañet pa'shtam puema'tets. Attoña etsoterra añ ñoñets ñeñt a'mtaye't ahuat Yompor po'ñoñ. Ñehua, allempopa' e'ñe atet ñerra'mrrate' Cristo otatset, ñeñtpa' atet oten: "Yellsheñe'chaterrnanetcha' neshtam po'suertot attoch orrtet e'ñe puesheña'ttsetpa' o'ch yorayesonet neshtam puema'tets."

36 Allempoña solltarnesha'pa' alla anorrcha'tet o'ch cohuañpset.

37 Ñehua, poñot all corsocho all noñet tsachtall aquellcayet attochña eñoteñet ñeñtecop corso'tam̄peñet. Ñeñña quellecpa' atet oten: "Añ Jesúsapa' ñeñca'yeña judionesha' Pa'm̄cha'tareter."

38 Allña'pa' corso'tam̄pset epuet ñaña epsheña eñet, puesheñarrpa' nosñañet po'cohuenrot, po'psheñeñña'pa' nosñañet pue'chcoferot.

39 Ñeñña oñmachets allpa' ñetpa'cho'ña chocma achm̄are'tneñet. Pachm̄arñoñetpa' coño'coñtana'tyesneñet,

40 ñeñtpa' atet otyesneñet:

—Pa ñeñteḡ pommo'cheñoḡpa' potatsete't po'ch a'materrayeñ Parets pa'paquell, poma'pamtañocmo'ch alla patomatereñ, te'ñapa' pa'queshp̄aterrañaca'ye e'ñe pañeña. Ñerra'm po'ñochte' Parets Puechemereḡpa' pesuerrañaca'yena tayecma corsochoḡ.

41 E'ñe attecma achm̄are'teñ ñaña ñeñt pa'm̄cha'tareternesha' pen judionesha' po'cornaneshar ñaña ñeñt etsotayenayeñ ñoñets ñeñt atet anaret ñaña ñeñt pompornesha' pen allohuen judionesha', ama't allohuenet fariseoneshohuen. Ñetña'pa' pachm̄are'teñoḡpa' atet otatsetyeñet:

42 —Te'ña papa' o' pa'queshp̄atyets po'potantañ, pañapa' eso'mare'tcha'ña ama eshcaye' pa'queshp̄aterroña e'ñe pañeña.

E'ñe pachm̄are'teñoḡetpa' atet otyereter:

—Papa' ñeñteḡo'ca'ye israelnesha' Pa'm̄cha'taretereḡpa' pesuerrañaca'ye corsochoḡ allochña'pa' attoch yame'ñaḡa yam̄a.

43 Papa' pa' yemtenaya Yomporpa' te'ñapa' a'queshp̄aterrpepa'ñaca'ye ñerra'm po'ñochte' e'ñe cohuen muerenḡa. Papa' ñeñteḡ po'ñoch atet otets Yomporo' Puechemereḡ.

44 E'ñe attecma pe' ñaña eñet ñeñt epuet corso'tam̄peñet ñetpa'cho'ña atarr es otnare'chet allot po'corsochoḡ.

Atto rroma Jesús all po'corsocho

(Mr. 15.33-41; Lc. 23.44-49; Jn. 19.28-30; Heb. 9.11-14)

45 O'ña chap poctopa' o'huañ atsnom o' e'ñe checmetua ora erraḡaren añe patsro, o'ña ellerrotenmochapa' o' alla puetarerr.

46 Allempoña ellerrotenmochapa' Jesúsña'pa' rrana huomenc, ñeñtpa' atet ot e'ñe ña po'ñoño:

—Elí, Elí, lama sabactani. Ñeñña ñoñtsorpa' atet oten: Eso'maruachñaca'ye Neyompor-recha' pa'ypo'ñerren.

47 Puesheña'tetsña ñeñt tomchets all ñeñt e'mue' atet oten Jesús, ñetña'pa' amaca'ye e'mueññañeto po'ñoñ ñeñt atet oten, ñeñto'marña ñetpa' cha otyeset:

—O' cha chore'tante' Elías ñeñt a'mtaye't ahuat Parets po'ñoñ.

48 Allempoñapa' mata puesheñarr ñeñt allo'tsen, e'chomosan chella'so ñeñt atsotso'tpo' o' ne' tsachḡopa' allotña tsotso'tatosanña Jesús.

49 Po'potantañña'pa' atet ochet ñeñt tsotso'tatene':

—Amach es p̄apatsche, te'pa' attachca'ye yecue' ñato'rraña huapa Elías ñach a'qushp̄atose'.

⁵⁰ Allempoña Jesús'pa' o' alla rranerrerr huomencpa' rroma.

⁵¹ Allempoña besom allo yottam̄peññañet Parets pa'paquëll o'ponopa' ahuepa't rrarra'nom e'ñe poctacma, ellopa'tetsta enoteñ e'ñe sotatsohua. Allempoñapa' o' pella pats atarr huomenc, rrarna'tyes mapuetačhno.

⁵² Torna'tam̄pesyes apampaña. Shonte' ñeñt̄ pueyochresha' pen Parets ñeñt̄ o' colla'huañ, ñetñapa' ahuepa't e'ñe tanrra'tuerret.

⁵³ Allempoña tanterra Jesús'pa' ñetpa'čho'ña o' sohuanerretña all apamparettete't̄ o' alla ahuanerret anetso Jerusaléño ñeñt̄ anaret̄ Partsocop, allña'pa' shonte' acheñ ñeñt̄ entapuerrahuet.

⁵⁴ E'ñe allempo rroma Jesús, solltarnesha'ña epuet po'cařtaner ñeñt̄ allpon cohuan̄pene' Jesús, ñetñapa' e'ñe enteñet ñeñt̄ atet̄ p̄a'yesa allempo, atto pella pats. Ñeñto'marña ñetpa' atarr yorenet. Allempoñapa' atet̄ otet:

—Po'ñočuaca'ye añmapa' Partsepa'tca'ye Puechemer.

⁵⁵ Allo'tsa'yen ñaña shonte' coyaneshačhno, ñetñapa' a'yota cohuanrrorteñet. Ñetpa' ñetca'yeña cota'huanmue'ña Jesús Galileoteñ ñeñt̄ sherba'yese't̄.

⁵⁶ Ñeñt̄pa' María Magdalena ñaña po'psheñeñ María ñeñt̄ Jacobo pachor ñaña José. Allo'tsen ñaña ñeñt̄ pachor pen Zebedeo puechemeresha', ñaña po'potantañečhno coyaneshačhno.

Atto pampuet Jesús

(Mr. 15.42-47; Lc. 23.50-56; Jn. 19.38-42)

⁵⁷⁻⁵⁸ Atteñapa' o' ellerren. Puesheñarr ñeñt̄ ečllayoret̄ ñeñt̄ pa'so'cheñ José ñeñt̄ arimateo'marnesha' ñeñt̄ara Jesús pueyochresha' ñaña'pa' ahuos Pilateshopa' o'ch oteña' pocte'ch eñch ñach asuatose' Jesús ñeñt̄ rromuets corsocho. Pilatopa' atet̄ otan pa'cheñer:

—Te'pa' o'ch sa'rroyoñ arromñañ anerepa'.

O'ña ellerren Joséñapa' o' čherr corsocho,

⁵⁹ a'suatuerran Jesús corsochoť all rromuen. Allempoñapa' epatse'ch shetamtso ñeñt̄ e'ñe cohuen emarr. Allempoñapa' anem̄ allcha' pampueña'.

⁶⁰ All e'ñe errte' eñatene' mapuetpon ñeñt̄pa' e'ñe pamo'tsna'tarneshacpañ allca'yeña nenana'ña Jesús. Allempoñapa' attome'terrñañ mapue' añecmuen allo yottam̄pesner ñeñt̄ puepampuer p̄ach. O'ña yottam̄pesuanerpa' Joséñapa' ahuerr.

⁶¹ Allña'pa' allo'tsen María Magdalena ñaña po'psheñeñ María. Ñetñapa' alla anorrcha'toset allame'tets all pampueñet.

Atto guardianesha'pa' cohuan̄peñet all pampuet Jesús

⁶² Met añ yeter allempo čhocmach añño'terreterr ñeñt̄ tsapatecop allem-pocma amesen judionesha'. Tsapañapa' ñeñt̄ pa'm̄cha'tareťernesha' pen judionesha' po'cornaneshar ñaña fariseonesha' ñetñapa' e'ñe alla shontenet parro all Pilatesho.

⁶³ Ñeñt̄pa' atet̄ otoset:

—Nompocha' yapa' o'ca'ye yeyerpuera añ acheñer ñeñt̄ atarr ashcañpa' allempo corre'tpa' atet̄ca'ye otye't̄: “Napa' ama't puema'pamtañopa' netan-terrachca'ye rromot̄.”

⁶⁴ Te'pa' pemñaye'chñaca'ye ñeñt̄cha' nanac cohuan̄p̄sose' puepampro e'ñe puema'pamtañohua, te't huapa pueyochresha'pa' čhate'ca'ye e'ñe a'nahua ereta'. Allempoña ñetpa' čhate' ochet acheñenesha' Jesús'pa' o'ca'ye tanterra

rromot. Ellote'ña ñet allempopa' nanacte' shecare'teret acheñenesha'. Ellote' metanerret ñeñt' atto shecare'tyesete't' ahuaña acheñenesha'.

⁶⁵ Pilatoña'p' atet otapanet:

—Añca'yeña guardianesha', te'pa' orras parro, ñetpa' o'ch cohuanp'soset, e'ñech echarr sepanp'sosñañ puepampuer, errotencia' e'ñe pocte' sent sa.

⁶⁶ Ñetña'p' ahuanmuet puepamp'ro. Mapue' allo yottam'peñetpa' e'ñe cohuen yomrraram'p'soset attochña eñoteret ñerra'm esesha'ch toram'perre'. O'ña e'ñe cohuen panp'suetpa' allempoña'p' na'neret guardia all ñeñt'cha' cohuanp'se'.

28

Atto tanterra Jesús

(Mr. 16.1-8; Lc. 24.1-12; Jn. 20.1-10)

¹ O'ña huañ yetñats allempocma amesenet allempoña taya puetaren temenc allempo motta'muena yetñatspa' Maríaña Magdalena ñaña po'psheññ María ñetña'p' ahuatecma ahuanma'muenet o'ch enta'mueñet Jesús puepamp'ro.

² Allempoña machayotepa'tcha' pella pats huomenc; añ sohuatsa Yompor po'mllañoñeñer ento't. O' sohuapa' a'rrote'tosan mapue' a'yenet ñeñt'ña mapue'pa' allña anorros.

³ Ñaña'p' atarr nanac poptosa e'ñe atet orrtosa ñerra'mrrate' meratste'. Pa'shtamñapa' atarr nanac huallama't.

⁴ Guardianesha'ña'p' ñeñt'ña atarr yore'tose'. Puenchañoñetpa' cha yonshema'tyeset cha o'ta'yaset e'ñe attet ñerra'm cho rromuenet.

⁵ Allempoña mellañoñeñpa' atet otapan coyanesha'chno:

—Amach cha seyorenatsto. Napa' neñotenes añca'ye semnen o'ch senta'mueñ Jesús ñeñt' corso'tam'p'set.

⁶ Amaca' arro'tsenaro arr, ñapa' atet otase'tpa' te'ña'p' o'ca'ye tanterra. Sonca'ye secueña' all panet amaca' eñalle.

⁷ Secua'huepa' orrerres sema'yoreñ o'ch soterrñaña' pueyochresha': "O'ca'ye tanterraña Jesús rromot. Ñapa' ñanomcha' otatsa o'ch ahuen Galileo. Sapa' allcha'ña sentuer."

⁸ Allempoña'p' puema'yoreñ ahuanerret puepamp'rot. Ama't yorenetaña'p' pocsheñesha' matrra'teret o'ch oteññañeta' pueyochresha'.

⁹ Matachetsetpa' Jesúsña'p' ahuepa'tcha' poctanet, huom'cha'tapanet. Ñetña'p' allenta ponem'yet, rromoset pa'rrp'ot concorposñañet.

¹⁰ Allempoña Jesús'p' atet otanet:

—Amach sem'cha'tatsetno. Orrerres sotennana' nemo'nasheñnesha'chno ahuanmuetepa' Galileo, allcha'ña e'ñe enterrnet.

Atto solltarnesha'pa' serrpare'tatyesan allohuen cornanesha'chno ñeñt' atet entet ñet

¹¹ Ahuanmatsetpa' puesheña'tetsña guardiapa' ahuanmuet ñamet anetso. Allña'p' serrpare'tatoset cornanesha'p' m'cha'tareternesha' allohuen atet o' entuet.

¹² Ñetña allempo ap'chenet epuet ñeñt' pompornesha' pen judionesha' ñetña'p' cotape'chatanna'tet. O'ña cotape'chatanna'tuetpa' allempoña'p' apet solltarnesha' shonte' quelle.

¹³ Ñeñt'pa' atet ochet solltarnesha':

—Te'pa' atet'cha' sot: "Yaña tsapopa' muetsye'tpa' pueyochresha'ña'p' ahuo't huapuet a'nahua't ereta'ña arromña't."

¹⁴ Ellopa' alla oterranerr solltarnesha':

–Ñerra'm añcha'taret' cha e'mare'te' yapa' ya'pochtatonascha' e'ñe cohuen ñesho attochña sapa' amach erroť paseto.

¹⁵ Ñetña allempo agaphuet quellepa' atet otarettetpa' atet'cho' pet. Ñeñto'marña ñet pueserrparñetpa' e'ñe allempoteñ epa'hua judioneshesho'mar.

*Atto Jesús'pa' otnerran pueyochreshachno ñetpa' atet'cha' pa'yerret
(Mr. 16.14-18; Lc. 24.36-49; Jn. 20.19-23)*

¹⁶ Ñeñt' charra' puechena paterr pueyochresha'pa' ñetñapa' ahuanerret Galileo. Arr ahuanmuet all aspento all otanet Jesús allcha' tet.

¹⁷ Allempo entosetpa' ñetñapa' cha concorpa'rretyesoset. Puesheña'tetsña'pa' cha echartanet pueyo'chro.

¹⁸ Allempoña Jesús'pa' ponmanet atet otapanet:

–Napa' apareten allohuen llesens a'ne patsrecop ñaña Yompor pue'ntañecop.

¹⁹ Ñeñto'marña te'pa' orras o'ch sey'chatyes ora allohuen pa'namen acheñ attoch neyochresha' neperranet. O'ch sapat Janet Yompor Parets pa'so'chño ñaña Yompor Puechemer pa'so'chño ñaña e'ñe Yompor Puecamquēñ pa'so'chño allochñapa' attochña e'ñe pueyochresha' perranet Yompor Parets.

²⁰ Ñaña 'chocmach o'ch e'ñe sey'chatyesanet allochñapa' attoch e'ñe cohuen ame'ñerrnanet e'ñe ora ñeñt' allpon o' notuas. Ñaña señoche'pa'ch napa' e'ñe pate'tets yet 'chocmach allo'tseney parro attoch 'chocma nebensare'tañpenes ama't tarrempohuach esempohuañen allempoch mellapoterra. Ñeñt'pa' attetepa'ch Nompore. Allohua.

COHUEN ÑOÑETS ÑEÑT̃ QUELLCA' SAN MARCOS

*Allempo orrta Juan ñeñt̃ serrpare'tosets all amayo
(Mt. 3.1-12; Lc. 3.1-9, 15-17; Jn. 1.19-28)*

¹⁻² Te' arr napa' o'ch nequellconas ñeñt̃ e'ñe cohuen ñoñets alloch yeqush-perra e'ñe yame'ñeñoña Jesucristo ñeñt̃ Puechemer pen Yompor. Ñehua, ñeñt̃ ñanom orrtatsa ñeñt̃pa' e'ñe atet o' perra e'ñe atet quellquë't̃ Isaías ñeñt̃ a'mtaye't̃ ahuat̃ Yompor po'ñoñ. Isaíaspa' ñapa' añca'ye quellquë't̃ ñeñt̃ atet Yomporpa' otan Puechemer ñeñt̃ara Cristo, ñeñt̃pa' atet och:

Te'pa' peñoche'pa'ch napa' nemñerrna'pcha' puesheñarr ñeñt̃cha' p̃otañperraya. E'ñe ña pueserrpare'teño'tpa' añño'terrna'pcha' allcha' p̃oñmos p̃aña esempo.

³ Ñapa' e'morrterrach po'ñoñ all amayo allcha'ña serrpare'taterranña acheñenesha'. Puerranarot̃pa' añcha' toma'ntaterranet toñ, ñeñt̃pa' atet̃cha' otarranet: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pa'charretyesoñ pa'te'p̃." Arrpa' allohua ñeñt̃ atet̃ quellquë't̃ Isaías.

⁴ E'ñe atet̃ anuaret̃ ahuat̃oteñpa' ñeñt̃ña'pa' e'ñe'cho' atet̃ perra allempo orrtosa Juan ñeñt̃ apatose' acheñenesha' Yomporecop. Ñapa' alla orrta amayo allña serrpare'tatosanña acheñenesha'. Ñeñt̃pa' atet̃ otosanet:

–Te'pa' o'ch soctape'cherr ello cohuen Yomporecop allochñapa' e'ñech cohuen sapataret̃terra e'ñe same'ñeño't̃ Yompor. Attochña Yomporpa' o'ch peretna'huernnas so'chñar.

⁵ Ñeñt̃o'marña shonte' acheñenesha' chocma huacha'tyenet ñesho o'ch e'mñoteñeta'. Allohuen ñeñt̃ judeo'marnesha' ñaña allohuen ñeñt̃ jerusaléno'marnesha' chocma huacha'tyenet ñesho. Allña ñetpa' a'meta'yesoset po'chñaret, Juanñapa' apatyesanet Yomporecop. Ñeñt̃ña oñ all apatyesanet añ pa'so'cheñ Jordanas.

⁶ Ñeñt̃ña Juanpa' camello pue'ch apomotaret̃ ñeñt̃ pa'shtam pen. Allo chanena ñeñt̃pa' pa'rrom. Allñapa' rra'yesane't̃ ahuañchenclla* ñeñt̃a puerran pe't̃ epuet̃ pets po'moñ.

⁷ Juanñapa' atet̃ serrpare'tatanet:

–Cristoña ñeñt̃cha' huapatsa chenta'pa' ñapa' atarrca'ye ahuamencatesha', nañapa' ama tama ahuamencateyayno. Ñapa' ñeñt̃ña atarr sherbets, nañapa' ama es nesherbeno attoch nemo'ca pa'rrp̃ot̃ ama't̃ po'sapatre'chapa' o'ch nepyoñ.†

⁸ Ñaña napa' ama't̃ napatensoñ Yomporecoppa' e'ñeca'ye oñochaya napatyenes. Tarraña Cristoñapa' añcha'ca'ye chorratossa Parets Puecamquëñ.

*Allempo apataretta Jesús Yomporecop
(Mt. 3.13-17; Lc. 3.21-22)*

⁹ Allempoña huapa Jesús Nazaretot̃ allara Galileo. Chap Juanesho allñapa' apata'p̃ Juan oño Jordanaso.

* **1:6** Ñeñt̃ ahuañchencllapa' arrapo' enteñ palestino'marnesha'. † **1:7** Ñeñt̃ atet̃ po'taruas pe't̃ esclavos o'ch pueyam̃psan pamo'mte' po'sapatre'ch.

¹⁰ E'ñe apatue'pa' o' čha'nerrña Jesús oñoťpa' allenta entan enet atorareť. Allotña e'ñe sohua'nmaña Parets Puecamquẽñ e'ñe atet entať ñerra'mrrate' yeť o' sohua'nma entoť. E'ñe arr čhap Jesúsesho.

¹¹ Allempoñapa' čha e'morrtatsa ñaña ñoñets entoť atet eñorena Yompor. Ñeñña ñoñetspa' atet oten:

—Papa' ñeñteť Nechemereť ñeñteť atarr nemorrentena, ăa atarr nocshatene'.

Allempo oneñtepa' topatenan Jesús, mueneñ o'ch atet ăatan Jesús ñeñi ama pocteye' enteno Yompor

(Mt. 4.1-11; Lc. 4.1-13)

¹² Allempoña Parets Puecamquẽñpa' allenta anman Jesús all amayo.

¹³ Pa'tatsoch čharramat allo'tsena amayo; allñaapa' allo'tsa'yen pa'namen berročno. Attoña allpa' o' huapoña oneñeť mueneñ o'ch atet ăatyesh ñeñi ama pocteye' enteno Pōmpor Parets. O'ña topatuahueña'pa' allempoñapa' huacha'toña ñaña Yompor po'mllañoťeñnaneshar; ñetña sherbōsetña Jesús all.

Allempo e'ñe ñenmāi torrena Jesús Partsocop all Galileo

(Mt. 4.12-17; Lc. 4.14-15)

¹⁴⁻¹⁵ Allempoña yottamăset Juan allcha' mueročhtachet, Jesúsñapa' allenta ahuerr Galileo. O'ña čherr all ñañaapa' serrpare'tatuerranet ñeñi e'ñe cohuen ñoñets ñeñi huetsa Yomporeshoť alloch yequeshperra. Ñeññaapa' atet otueranet:

—Te'ñapa' o' etsoterra yeťñats, o' čherrmoch allempoch atarr ayochreshaterra Yompor. Socoppa' añ poctetsa o'ch soctape'cherr ello cohuen Yomporecop ñaña o'ch same'ñerra ñeñi e'ñe cohuen ñoñets allochca'yeña sequeshperra.

Atto Jesúsapa' chore'tosan pa'tatssheña ñeñi e'ñe caca torrenet rromuet

(Mt. 4.18-22; Lc. 5.1-11)

¹⁶ Allempo Jesúsapa' chopenē'chyen all sa'patopño'mar; ñeñña sa'ppa' añ pa'so'cheñ Galileas. Allñaapa' entnoman Simón epuet pa'mo'nasheñ Andrés. Ñetñaapa' all terrayenet e'ñe all sa'po țarro'mar ñetpa' ñeñi po'taruas penet.

¹⁷ Jesúsñapa' atet otosanet:

—Te'ñapa' o'ch notas: Soctā'n na attoch neyochresha' neperres. Ñeñi atet sepena ahuatoteñ e'ne' cac te'ñapa' o'ch neyčaterres attoch se'nerr ñaña achen ñeñtcha' same'ñaterra.

¹⁸ Ñetñaapa' allorocma na'nmuet po'terrayapa' o' coťet Jesús.

¹⁹ O'ña meterrerr a'yenteye'pa' allñaapa' entuerranerr ñaña Jacobo‡ epuet pa'mo'nasheñ Juan; ñeñtepa' Zebedeo puechemerasha'. Ñetñaapa' po'noñto'tsa'yenet all a'cohuenetyenet po'terraya.

²⁰ Jesúsñapa' chore'tuerraneterrpa' atet otuerraneterr ñamet:

—Te'pa' o'ch soctā'n samā.

Ñetñaapa' allenta sa'nmet pomporet Zebedeo all po'noñto epuet ñaña pa'taruasañret. Ñetpa'cho'ña coťet Jesús attoch pueyochresha' perranet ñamet.

Allempo Jesúsapa' entať puesheñarr yacma ñeñi chorrena oneñeť

(Lc. 4.31-37)

²¹ Atteñapa' ahuanmuet ñaña anetso Capernaumo. O'ña čhap añ yeťñatsro allempocma amesen judionesha', allña Jesúsapa' be'tosos judionesha' po'prahuo, all yečhatyesosanet.

‡ 1:19 Jacobopa' ñeñfara ñeñi sochenet Santiago.

22 Allempo serrpare'tatuanet Jesús, acheñenesha'ñapa' epaye' cohuanrrorteñet ñeñt atet yečhatenanet ña. Tarro'mar ñapa' atarr cohuen yečhatenanet atet ñerra'mrrate' ñeñt allsensarettetsa Partseshot. Judionesha' pa'micha'tareternesha' ñeñt atarr etsotayene' ñoñets ñeñt atet anaret, ñetñapa' ama e'ñeye' atteye' yečhateneto.

23 Puesheñarrña yacma ñeñt allo'tsen puerahuo, ñeñtñapa' añ chorrenaya oneñt. Ñaña rranare'tapa' atet otapan Jesús:

24—Eso'mare'tcha'ña erroť peposey Jesús, pa ñeñtepa nazareto'marnesha. ¿Añecopte' pehuena o'ch pa'chencaterrey? Napa' o' neñotapa. Papa' atarr Partsoť añ pellsensene' Pompor ñeñt atarr nanac Parets.

25 Tarraña Jesús pa' ama muenache o'ch eñorana'cha. Ñañaapa' atet och:

—Pemma, te'pa' choña quechpa'nerre'ña añ acheñer.

26 Oneñtñapa' cha atanman yacmapa' alla o'shshe'ma. Oneñtñapa' cha rranare'tnoma allempo quechpa'nerran acheñ.

27 Acheñenesha'ñapa' cha atarr torats panet pueyočhret. Ñetñapa' atet otanna'tyeset:

—Ta'mca'ye, erroťente'ca'yeña Jesús po'ñoñ; po'poñonťepa'tca'ye yečhatyen. Ñeñtpa' erroťente'ca'ye. E'ñe atet pena po'ñoñ atet ñerra'mrrate' ñeñt allsensarettetsa Yomporeshot. ¡Ama't oneñt erroť otenpa' atetcho' pteñ, e'ñech ame'ñateña!

28 E'ñe mamecmapa' o' e'ñe serrpare'tuahuet allampaño'mar Galileo atet pa'yena Jesús.

Allempo a'crratosan Jesús Simón Pedro pa'so'mue

(Mt. 8.14-15; Lc. 4.38-39)

29 Allempoña cha'nmačherret puerahuotpa' arr ahuanmuet all yečhena Simón ñaña pa'mo'nasheñ Andrés. Allñapa' añ cota'nmue' Jacobo ñaña Juan.

30 Allña Simón pa'so'muepa' cha atsna'ten, cha huoraten, alla panena po'mayo. Otapet Jesús:

—Simón pa'so'muepa' cha atsna'ten.

31 Allempoña Jesús pa' ponmosana atsnañtapa' rremota'tos pototpa' cha echantose' cha metuerretsña atto huoraten. Allempoña o' metua po'urateñaapa' allenta tanta o' agapapanet e'ñe cohuen o' yema'tapanet.

Allempo Jesús pa' a'crraterran shonte' pa'namen atsnañtēchno

(Mt. 8.16-17; Lc. 4.40-41)

32 Ñeñte yetrocma allempo ellerren o' emuena atsretpa' acheñenesha'ña huapatyesnenet Jesúsesho allohuen ñeñt atsna'tyets ñaña ñeñt chorra'yena oneñt.

33 Huača'tyesoña allohuen anetso'marnesha', ñetñapa' alla shontoset allotecma be'tenet pocollo.

34 Jesúsña allempopa' e'ñe a'crratyesuapanet, ama't shonte' pa'namen atsnañtsočhno ñeñt osyenahuet. Ama't ñaña shonte' acheñenesha' ñeñt chorra'yena oneñt ñeñtpa'cho'ña e'ñe quechpatyesuapanet oneñt ñeñt chorra'yenahuet. Jesúsñapa' ama muenatano oneñt attoch eñorana'tnomet, tarro'mar ñetpa' e'ñe eñoteñet ñapa' ñeñtca'ye Cristotets.

Allempo Jesús pa' serrpare'tatyesnoman acheñenesha' erraparen Galileo'mar

(Lc. 4.42-44)

35 Tsapaña e'ñe ahuatecma tanta'muena Jesús, ama e'ñe orretuena' cha'nma'muen ñeñte anetsroť ahua'muen all ama acheñempaño yaye allcha' ma'yocha'muena.

³⁶ E'ñe o'chtatsapa' ahua'muen ñaña Simón ñaña po'psheññechno ñeñt epuet ta'muena. Ñetpa' o'ch e'nereta' Jesús.

³⁷ Allempoña entosetpa' atet otoset:

—Papa' allohuen acheñenesha' chocmaca'ye e'nenpet.

³⁸ Ñaña' otapanet:

—Te'pa' o'ch ahuey po'poñ anetso ñeñtara allampaño'mar allpa'cho'ña o'ch neserrpare'tatyesnomanet tarro'mar napa' ñeñtecopca'yeña nohuapa.

³⁹ Allempoñapa' chopeñe'chyes Jesús errañaren Galileo'mar, serrpare'tatyesanet e'ñe ñet po'prahueto. Ñaña ñeñt chorra'yena oneñeñ, ñaña' e'ñe quechpatyesuerranet.

Atto Jesús a'crraterran puesheñarr yacma ñeñt aptsarñat
(Mt. 8.1-4; Lc. 5.12-16)

⁴⁰ Allempoñapa' huapoña ñaña puesheñarr yacma ñeñt osen puetsarñats ñeñt otenet lepra. Chap Jesúseshopa' concorpana'tosana Jesúsapa' atet otos:

—Ñerra'm pa muenatspa' pa ñeñtep atarr ahua mencatesha' pa'crrataye'cherren allochñapa' attoch e'ñe cohuen entuerren acheñenesha'.

⁴¹ Jesúsñapa' e'ñe cohuen muerapya ñeñto'marña anretapa' allenta a'p'le', atet och:

—Napa' nemneñca'ye, metuerrepa'ña peptsarña allochñapa' attoch e'ñe cohuen entuerre' allohuen acheñenesha'.

⁴² Yacmañapa' allorocmuepa'tcha' metuerña pueptsarña cha cohuenterrtsa.

⁴³⁻⁴⁴ Jesúsñapa' alla otererr:

—Te' atto o' na'crraterre'pa' po'ño'ch ama't e'ñe puesheñarrapa' amach pota'psa'tatsche ama't mamesha. Corneshachña pegatena' all peptsarse't. Atet nane't Moisés ñoñets añ acheñrecop ñeñtcha' a'crrataretterrtsapa' te'ñapa' o'ch es panom ñeñtcha' p'apos all ñeñt Yomporecop. Allochñapa' attoch e'ñe cohuen entuerre' allohuen acheñenesha'.

Atto'tca'yeña Jesúsapa' mueñe o'ch ahuo' corneshesho.

⁴⁵ Ñaña' allempo ahua'pa' e'ñe serrpare'tatyesuanman allohuen acheñenesha' ñeñto'marña e'ñe ña pa'metare'teño'tpa' o' erracmañen eñotuet ñeñt atet pa'yena Jesús. Ñeñto'marña Jesúsapa' ama eshcaye' seno anetso all shontena acheñenesha'. Ñapa' alla chopeñe'chyen a'yo'mar all ama acheñempaño'yaye. Tarraña ama't atet penañ acheñenesha'ñapa' alleñateñ huacha'teññañet ñeñt shontenoya ama't all.

2

Atto Jesús a'crraterran ñaña ñeñt echarrtaña
(Mt. 9.1-8; Lc. 5.17-26)

¹ O'ña met allponmat Jesúsñapa' o' alla cherrerr anetso Capernaumo. Acheñenesha'ñapa' e'mare'chet o' alla cherrerr pocollo.

² Allempoñapa' o' alla shonterrñañerr acheñenesha'. Atteñapa' o'huañ epuet o'pono pocollo. Ama't allo't be'tenet pocollopa' o'huañ epuet. Jesúsña allpa' serrpare'tatapan acheñenesha' Yompor po'ñoñ.

³ Atteñapa' huapatañ'psoñet ñaña echarrtaña ñeñtñapa' pa'tatssheña ñeñt anman'pene' puechecna'pot.

⁴ Ñetpa' añ muenenetañ o'ch be'tosotet o'ch e'ñe noset Jesúsesho, tarraña shonte' acheñenesha' ñeñto'marña ama eshcaye' abe'tosetoña atsñañet attoch chapachet e'ñe Jesúsesho. Atteña a'tapatoset enot pocollato, ñeñtña pocollpa' patsopo'. Ñetñapa' rrorosetña ñeñt pocollatar enot e'ñe ñeñtecoptaro'tsen

Jesús all patsot. Alloña a'suatañpsoetña echarraña e'ñe puechecnapena. Attoña chapachet e'ñe rrocho allo'tsen Jesús.

⁵ Jesúsña' eñotapanet ñetpa' atarr nanac yemteñet. Allempoña ñapa' otapan echarraña:

—Te'ña neyochre, pa po'chñarpa' o' apretna'huareterra.

⁶ Ñehua, allña' allo'tsa'yen ñaña puesheña'tets ñeñ atarr etsotayenayeñ ñoñets ñeñ atet anaret judioneshap. All anorrcha'tyenet ñetña' atet otatse'tyeset pueyoçhreto:

⁷ “Eso'mare'tña atet eñenña añ acheñer. Ñeñ atet otenpa' ñapa' chaca'ye achmare'tenanña Yompor tarro'mar arr patsropa' ama't e'ñe puesheñarra ama eñalleña ñeñ peretnene' ochñarets ñapña Yompor peretnene' ochñarets.”

⁸ Jesúsña pueyoçhropa' eñotanet ñeñ atet otyenet ñet pueyoçhreto ñocop. Allempoña Jesús'pa' atet otanet:

—Sapa' eso'mare'tcha'ña atet soçtape'chatse'tyesña seyoçhro.

⁹ Sapa' chate' soten ñeñ atet o' notue echarraña po'chñar o' apretna'huareta, ñeñpa' ama torrapahuoyaye. Sapa' añña atarr torrapo' senten attoch na'crrater, choncha'ña ote': “Petantena, pechta'nen pemue'pa' o'ch pechope'chnen.”

¹⁰ Ñehua, napa' o'ch neñotatas na Ñeñen Acheñetosets, napa' ñeñen apareten llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarraña:

¹¹ —Te'ña napa' o'ch nota: Petantena, pechta'nen pemue'pa' o'ch pechope'chnen, ahuenep pepaclo.

¹² E'ñe otue' atetpa' echarrañaña' cha tantetsa e'ñe allorocma, o' cheta'nenan po'mue'pa' cha'nen allot. Allohuenña acheñenesha' e'ñe entueñet; ñetña' cha atarr cohuanrrortapueñet. Ñeñto'marña ñet allempopa' atarr cohuentatyeññañet Yompor. Ñetña' atet otyenet:

—Yapa' ama't ahuatapa' ama yentareña atet ñeñ atarr cohuen.

Allempo Jesús'pa' hua'ña'nman Leví attoch pueyoçhresha' per (Mt. 9.9-13; Lc. 5.27-32)

¹³ Jesúsña'papa' alla ahuererr sa'patopño. Allohuen acheñenesha'pa' alla huacherrñañeterr, ñaña'pa' yechatyesapanet.

¹⁴ O'ña yechatuanetpa' o' meterrerr Jesús allot, allña oñenpa' entnoman ñaña Leví* ñeñ Alfeo puechemer. Ñaña'pa' alla anen allecma cobra'yenan acheñenesha' quelle ñeñ gobiernocop. Jesúsña'pa' atet otosan Leví:

—Te'pa' o'ch poçta'n attoch neyochresha' neperrep.

E'ñe otue' Jesús atetpa' Levíña'pa' cha tantnomtsapa' allenta coñan Jesús.

¹⁵ Allempoña chap ñaña allempo Jesús'pa' alla rrallme'chen Leví pa'paclo. All rrallme'chapreteñ shonte' acheñenesha' ñeñ po'taruas pa'yenet ñamet o'ch cobra'yenan acheñenesha' quelle ñeñ gobiernocop. Ñetpa' atarr ashcañnesha' entenanet acheñenesha'. Ñaña allo'tsa'yen shonte' po'potantañechno ñeñ atarr ochñañenesha' entyen acheñenesha'. Ñetña'pa' all anorrcha'tyenet all anen Jesús epuet pueyoçhresha'. Tarro'mar shonte' acheñenesha' ñeñ coña'huanene' Jesús.

¹⁶ Añña fariseonesha' ñeñ allo'tsa'yen ñaña ñeñ etsotayenayeñ ñoñets ñeñ atet anaret ñeñfaretta judioneshet, ñetña allempo enteñet Jesús all

* **2:14** Leví'pa' ñeñfara ñeñ sochenet Mateo.

rrallme'chapretenan ñeñt atarr ochñañenesha' ñetñapa' allenta otoñet pueyochresha':

—Eso'mare'tña ñeñt semaestror sepenpa' rrallme'chapretenanña añ acheñenesha' ñeñt puehquëño'te'na cobra'yene' acheñenesha' ñaña epuet acheñenesha' ñeñt atarr ochñañenesha'chno.

¹⁷ Atet e'manet Jesús, ñaña' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt atsna'tetspa' ñetñapa' chocma e'nenet ñeñtcha' a'crraterrahuet. Napa' ama añecpaye' nohuapo attoch neçhore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch neçhore'tos ñeñt atarr ochña' entyetsa. Allochñapa' attoch o'ch co'tape'cherret ello e'ñe cohuen Yomporecop.

Allempo Jesús'pa' eñotatanet atet'cha' tore'tet Yomporecop ñeñt po'ño'ch sherbets

(Mt. 9.14-17; Lc. 5.33-39)

¹⁸ Parrochña allempo tore'tyena† Juan pueyochresha' Yomporecop ñaña fariseonesha' pueyochresha', pueheña'tetsña acheñpa' huacha'tet Jesúsesho, ñetñapa' atet otoset Jesús:

—Juan pueyochresha'pa' tore'tetset Yomporecop; fariseonesha' pueyochresha'pa'cho'ña tore'tetset ñamet Yomporecop. Paña peyochresha'pa' eso'mare'tña amaña tore'teneto.

¹⁹ Jesúsñapa' atet toma'ntatanetpa' ñeñt'pa' atet otanet:

—Ñeñt ahua'ñarete'chno all rrallme'chapreteñet ñeñt e'ñe errte' sena'tetsa, ama pocteyaye o'ch yotamet “amach es serra'yestatsto” tarro'mar ñeñt'pa' atet coshapreteñet ñeñt sena'tetsa. Amachña cha tore'teno allempo allo'tsenmeñ parro ñeñt errte' sena'tetsa.

²⁰ Tarraña ñerra'm esempo machayo'ta sa'nerranet ñeñt sena'tetsa, ñeñtña parro yemuetyenapa' allempoña ñetpa' e'ñe puellquëño'tet queçhpa'huerretcha' puerrar, amach arrenaye' enterreto. Ñeñt'pa' attochña tore'terret allempo Yomporecop e'ñe po'ño'ch. Arrpa' allohua huañ ñeñt atet Jesús toma'ntata ña sena'tostsa.

²¹ Elloñapa' o' alla toma'ntaterraneterr ñeñt atet ye'chen judionesha' arr patsro ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet ye'patsechpa' ñeñt'pa' e'ñech orrena yellteñ tarro'mar ñeñt emarr lletamuetspa' ñerra'm esempo yatsama'tam'pespa' çhach chelama'ta çhach martse'tatanña shetamtsoshe'm. Ñeñtña yelltenpa' allo'nach sen rrrartse'tats nanac.

Ñeñt'pa' attoña Jesús'pa' eñotatanet ña poçtapña e'ñe etserra.

²² Jesúsñapa' alla toma'ntaterraneterr po'poñ ñeñt atet ye'chen judionesha' o'ch ye'chcatenet pa'rrom orrot. Ñeñto'marña atet otanet:

—Ama't pueheñarrot'eyapa' amach yeshatstoña vinos emasa mellasha'mañ orroto ñeñt aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' çhach a'ptsan orrot, vinosñapa' çhate' e'ñe shebhua, ñeñtña orrot'pa' ama't mameshapa' amach es sherberro. Añña ñerra'm emasa vinos arrcha' yeshe' emerra orroto ñeñt aye'chcataret pa'rrom.

Ñeñt'pa'cho'ña attoña Jesús'pa' eñotatanet ña poçtapña e'ñe etserra.

† **2:18** Añ tore'teñetspa' añecop o'ch yetorra Yomporecop. Amach añecpayaye atomat, ñeñt'pa' añecpa mameshacop o'ch ye'queçhpa' yerrar.

Allempo Jesús pueyochresha' taso'tam̄pesyesnomuet trigo añe yetro allem-pocma amesen judionesha'

(Mt. 12.1-8; Lc. 6.1-5)

²³ Allempoña çherrerr pamtarr allempo çhocma amesen judionesha'. Allempoña Jesús pa' arr oñem chetso'mar epuet pueyochresha'chno. Allempo oñenet chetso'mar pueyochresha'ñapa' taso'tam̄pesyesnomuet puechm̄a'tets trigo.

²⁴ Fariseonesha'ñapa' ñeñt̄ entahuet ñetñapa' allenta otyeset Jesús:

—Pecue' eso'mare'tña peyochresha'ñapa' atet̄ penet̄ ñeñt̄ ama pocteyaye o'ch atet̄ yeḡa tarro'mar te'pa' añe yetropa' ñeñt̄ atet̄ anaret̄ ahuatoteñ allem-pocmach yamesen.

²⁵ Jesúsñapa' atet̄ otanet:

—Sapa' ama'trra selleyareña ñeñt̄ atet̄ ḡa ahuat David allempo pallta'ḡsa ñeñt̄cha' rret allempo cheporra'nma epuet ña'ma allohuen ñeñt̄ cotene'.

²⁶ Ña allempopa' be'tosos Yompor pa'paclo, allñapa' rrosan pan ñeñt̄ atma'ntataret̄ atet̄ ñerra'mrrate' ñeñt̄ nenet all Partsocop. Ñehua, ñeñt̄ panpa' ama pocteyayne o'ch esesha' rre'. Ñeñt̄pa' añach ñapue't̄ rrene' cornane-sha'chno, ñeñt̄pa' e'ñe atet̄ anuaret̄ judioneshacop. Ñeñt̄ña panpa' o' rros David, rratosan ña'ma allohuen ñeñt̄ epuet. Ñehua, ñeñt̄pa' tarrempo atet̄ pe't̄ David allempo judionesha' po'cornanesharpa' añ pa'm̄cha'tare'ter pete't̄ Abiatar.

²⁷ Jesúsña alla oterraneterr:

—Añ yetro allempo yamesen ñeñt̄pa' añecop anaret̄ acheñeneshacpay ñeñt̄cha' yesherbene'. Amaña añecpaye' anareteña yetñats ñeñt̄cha' yesherbena ya.

²⁸ Ñeñto'mar na Ñeñten Acheñetosets, ñeñten allsensare'ten, naca'yeña atet̄ otets este' poctetsaña ñeñt̄cha' atet̄ yeḡa añe yetro allem-pocma yamesen.

3

Allempo Jesús pa' a'crraterran ñeñt̄ chelletsap̄ot

(Mt. 12.9-14; Lc. 6.6-11)

¹ Po'pocheñoña Jesús pa' alla be'tosuenerr judionesha' po'prahuo. Allñapa' allo'tsen puesheñarr yacma ñeñt̄ ḡa chellena pot.

² Fariseonesha'ña allpa' Jesús a'tarr cohuana'tyenet attoch eñchet ñato'rraña a'crratenanerrcha' acheñ añe yetro allem-pocma amesenet. Ñerra'm o'ch a'crratenanerr ama't puesheñarra añe yetro allempo amesenet, allempoñapa' esheccha' a'metam̄peñeta' am̄cha'tare'tesho.

³ Allempoña Jesús pa' otan ñeñt̄ chelletsap̄ot:

—Aḡon, ḡatomos arrma.

⁴ Jesúsñapa' atet̄ otanet:

—¿Erro'tena'tña ñeñt̄ e'ñe pocte' senten ñeñt̄cha' atet̄ yeḡa añ yetro allempo yamesen? Ñato' o'ch atet̄ yepe' e'ñe cohuen po'psheñeñ, amapa' ñato' o'ch atet̄ yeḡoñ ñeñt̄ ama cohuenayaye. ¿Ñato' añte' pocte' senten o'ch ya'crrach acheñ amapa' añte' pocte' senten amach ya'crratatsche ḡachña yemtsatach?

Ñetñapa' ama't puesheñarro'tetapa' ama eseshaye' anapaye.

⁵ Allempoña Jesús pa' cohua'yesanet, ama't mamesha ama pocteye' entenaneto, atarr llecateñet tarro'mar ñetpa' ama mueneneto o'ch ḡapanet cohuen pueyo'chreto. Allempoña Jesús pa' otan yacma ñeñt̄ chelletsap̄ot:

—Te'pa' o'ch notaḡ, petapuerr ḡot.

E'ñe otue'pa' ñaña'pa' allentepa'tcha' tapuerranña pot, o' e'ñe cohuenterra pot.

⁶ Fariseonesha'ña čha'nmačherretpa' cotape'chatanna'tet epuet Herodes pueyochresha', ñetñapa' Jesús a atarr o'patenet attoch muetsatachet.

Shonte' acheñenesha' ñeñt' huačha'tatsa sa'patopño all enteñeta' Jesús

⁷⁻⁸ Allempoña Jesús'pa' ahuerr sa'patopño'mar pueyochresha'na. Shonte acheñ galileo'marnesha'pa' cota'huanmet ñamet. Ñaña shonte' po'potantañečno acheñenesha' ñetña allempo e'mare'teñet Jesús ñapa' atarr cohuen orrtatyen ñetpa'čho'ña allenta huačha'tyesoñet ñamet. Allemateñ anetsot huačha'tyaset Judeot, Jerusalénoť, Idumeot, Jordanas yomta'not, ñaña allo'marnesha' ñeñt' huetsa Tiroť ñaña Sidónoť. Ñetpa' añ atarr muenenet o'ch enteñeta' Jesús.

⁹ Shonte' nanac acheñenesha'. Attoch ama atarr quečhcare'teñe Jesús acheñenesha' ñeñt' shontetsa, ñaña'pa' otan pueyochresha':

—Chocmach sehuapaton noñt'.

¹⁰ Allempo Jesús'pa' a'crratyasan shonte' atsnañečno ñeñto'marña allohuen ñeñt' atsna'tyets ñetña allempo'pa' atarr emchorreñet Jesús, añ atarr muenenet o'ch a'plloset Jesús.

¹¹ Añña oneñečno ñeñt' chorra'yenaya acheñ ñeñtpa'čho'ña allempo entoset Jesús'pa' allepa'tcha' rromañpsosyet pa'rrpōť, rranare'tyesosetpa' atet otoset:

—¡Pepa'tña Parets Puechemerep'!

¹² Jesús'ña'pa' ama muenatano oneñečno o'ch oteñet ñapa' po'ñoč Parets Puechemer.

Allempo Jesús'pa' acran čharrasheña ñeñt' puechetsa epsheña ñeñt'cha' llesensa'

(Mt. 10.1-4; Lc. 6.12-16)

¹³ Allempoña Jesús'pa' ahuo' aspeno. Alloña agotatosan ñeñt' e'ñe cohuen enten ña ñeñt'cha' pueyochresha' pa'. Ñeñt' agotatenpa' ñetña allenta ahuanmuet ñesho. O'ña čhačha'tuetpa'

¹⁴ ñaña'pa' napanet ñeñtet čharrasheñet ñeñt' puechetsa epsheña, ñetñapa' ñeñt'cha' e'ñe parro chopeñe'chyen ñaña ñeñt'cha' llesensen attoch serpare'tyerret Yompor po'cohuenña.

¹⁵ Ñaña o'ch apuerranet llesens attoch quečhpatyeret oneñečno acheñenesha'.

¹⁶ Ñeñt' llesensa' ñeñtpa' añ pa'so'chnečno: Simón ñeñt'ara o' sochererr Pedro,

¹⁷ allotpa' ñaña Jacobo ñaña pa'mo'nasheñ Juan ñeñt' Zebedeo puechemeresh'a'; ñetñapa' o' socherraneterr Boanerges ñeñt' yoten yeñoño Tecorena'tar.

¹⁸ Allotpa' ñaña Andrés, ñaña Felipe, ñaña Bartolomé, ñaña Mateo, ñaña Tomás, ñaña Jacobo ñeñt' Alfeo puechemer, ñaña Tadeo, ñaña ñeñt' po'psheñeñ Simón ñeñt' cananistanesha' ñeñt' atarr torratset pa'netsrecop.

¹⁹ Allotpa' ñaña Judas Iscariote ñeñt'cha' pomuerre' tsapatonet Jesús.

Atto puešheña'tets oteñet Jesús ñapa' oneñečo' po'huamencot quečhpatenanña po'potantañ oneñečno acheñenesha'

(Mt. 12.22-32; Lc. 11.14-23; 12.10)

Allempoña Jesús'pa' o' alla čherrerr pocollo pueyochresha'na.

²⁰ Allña'pa' o' alla shonerrñañerr allohuen acheñenesha', ñeñto'marña allempo'pa' ama eshcaye'rreneto.

21 Allempo e'mare'ch Jesús pamo'tsesha' atet pa'yenapa' ñetña'pa' hua'cha'tet o'ch ereta' Jesús tarro'mar ñetpa' otenapuetañ ñato' cho'te' o' mospaña Jesús.

22 Puesheña'tetsña ñeñt atarr etsotayenayeñ ñoñets ñeñt atet anaret ñetpa' Jerusaléno' hua'cha'tet. Ñetña'pa' atet otyesoset Jesúsocop:

—Añ yacmarpa' añaca'ye chorrenaya Beelzebú ñeñt pompor pen allohuen oneñe'te'chno; ñeñtca'yeña ahuamencat pene' atot que'chpatenanña oneñe'te'chno acheñenesha'.

23 Allempoña Jesús'pa' chore'tan acheñenesha', allempoña'pa' atet otapanet:

—O'ch notas, po'ño'ch oneñe'tpa' amaca'ye huapore'tanneno.

24 Atet ñerra'm paterr añcha'taret ñerra'm cho elloptannena pueyochresha' ñeñtña atto añcha'tare'tena chach huañerrets amach allo'na huomencatneno.

25 Attecmach pannerra ñaña ñeñt e'ñe pamo'tsna'tarecmuet pannenet ñerra'm cho elloptannenet e'ñe ñagattsetapa' ñeñtña atto huomencatenetpa' ñeñt'pa'cho'ña chachca'ye huañerrets.

26 Attecmach pannerra ñaña oneñe't pueyochresha'chno, ñerra'm oneñe'te'chno e'mone'tannenet, ñerra'm tantanna'ta oneñe'te'chnopa' ñeñtña atto huomencatenetpa' ñetpa'cho'ña chachca'ye huañerrets amach allo'na huomencatneno. Ñeñto'marña po'ño'ch oneñe'tpa' amate' errotent huapore'tanna'teto e'ñe ñagattseta.

27 'Ñehua, yapa' yeñoteñ ñeñt atarr ahuamencattetsa atto atarr ahuamencattena oneñe't, ñaña'pa' e'ñe po'huamenco't cohuan'pesyenan allohuen e'ñe cohuen ñeñt pa'paquell pa'yen. Tarraña ñerra'm esempo o'ch huapoña ñeñt atarr ahuamencatesha' ñeñtcha' metanose'ña po'huamenc atet ñerra'm na Nompore, ñeñtcha'ña rromose' o'ch huancos, allochña'pa' o'ch be'tosos all ñeñt pa'paquell pa'yen o'ch e'ñe puerrata'mpsos ñeñt allpon o'patyena ña.

28 Jesús'pa' alla oterraneterr:

—Napa' o'ch notas, po'ño'ch allohuen pa'namen sosya'tsañe'chno ñeñt ama pocteye' enteno Yompor ama't ñaña achm'are'tanna'teñets ñeñt'pa' a'pretna'po' nenteñ.

29 Tarraña ñerra'm esesha' añ achm'are'teññañet Paret's Puecamquëñ ñeñtña'pa' amaca'ye a'pretna'pahuoye' nenteñe. Ñeñtña po'chñaretpa' amachca'ye a'pretna'pahuoterro e'ñe tayoteñ errponohuañen.

30 Ñehua, ñeñt'pa' atet otanet Jesús tarro'mar ñetpa' atet otyeñet Jesús, ñapa' año' chorrenaya oneñe't ñeñto'ña ahuamencat pene'.

*Allempo huapoña Jesús pachor ñaña pa'mo'nasheñnesha'
(Mt. 12.46-50; Lc. 8.19-21)*

31 Allempoña'pa' huapa Jesús pachor epuet ñaña pa'mo'nasheñnesha'. Chapuet allpa' ñetña'pa' alla tom'cha'toset a'yot, allotña agotatoset Jesús.

32 Ñeñt anorr'cha'tyets epuet Jesús ñeñt arrotam'penaya, ñetña'pa' atet ochet:
—O'ca'ye huapa pachor ñaña pemo'nasheñnesha'. Ñetpa' a'yote'tsa'yenet, pa'ca'ye e'nenet.

33 Jesúsña'pa' atet otanet:

—Ama't seño'teñe ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñ nepen.

34 Allempoña'pa' cohua'yesan acheñenesha' ñeñt arrotam'penaya all anorr'chenet. Allempoña'pa' atet oterraneterr:

—Napa' añca'yeña ñeñt po'ño'ch nachor nepen ñaña ñeñt po'ño'ch nemo'nasheñnesha' nepen.

³⁵ Ñehua, ama't erra'tsena ñeñt e'ñe atet p̄ohuene' ñeñt atet muenen Nompor ñeñt pue'ntaño'tsen ñeñtca'yeña e'ñe po'ñoch nemo'nasheñ nepen ñeñtña noch nepen ñeñtña nachor nepen.

4

All toma'ntatanet Jesús ñeñt a'parre'tene' puerets

(Mt. 13.1-9; Lc. 8.4-8)

¹ Jesúsñapa' alla ye'chaterranerr acheñenesha' e'ñe alla sa'patop̄ño. Allña emchorra'huererr shonte' acheñenesha'. Ñeñto'marña Jesúsapa' a'tap noñtopa' ahuañpes mame' allpononet allñapa' anorros noñto e'ñe all sa'po. Acheñenesha'ña allohuenetpa' e'ñe sa'patop̄ño'tsa'yenet all masto.

² Allñapa' esocmañen serrpare'tatenan acheñenesha' pa'namen toma'nteñtsöchno. All ye'chatyenanetpa' atet otanet:

³—Se'mñoton añ ñeñt atet notenes: Ñeñtña a'parrene' puerets ñañapa' ahuo' allcha' a'parre'tyenana' puepuer.

⁴ All a'parre'tyeñ patanta'tetsñapa' alla çhapyes toño'mar. Allñapa' hua'cha'tyesa of e'ñe añyallme'chuenana' puerets.

⁵ Po'poñe'chnoñapa' alla çhapyes mapuetro'meso'mar all ama tama eñalle pats. Ama nanac o'pono'tseno patso ñeñto'marña mametollapa' chepare-suañ.

⁶ O'ña enome'ta'muen atsrre'tpa' alla a'uyatuer. Ama er'cha'tena' ñeñto'marña alla hueya'huerra.

⁷ Po'potantaña pueretspa' alla çhapyes allcha' chepares aj. Allpa'çho' mameshapa' cheparesuaña' ajñapa' mameshapa' atesha'tua alla ca'matuerranña narmets alla a'cclatuer, ñeñto'marña ama ellom̄re'to.

⁸ Po'potantañe'chno ñeñtñapa' arr çhapyes all e'ñe cohuen patso. Ñeñtñapa' e'ñe cohuen chepares. Allempoña atesha'tuapa' o' ellom̄re'tyes. Atarr atonapa'tets ellom̄re'tyes—puecha'tetspa' ma'poch çharra' pue'llomer; po'pchañe'chnoñapa' pechapoch çharra' pue'llomer; po'pchañe'chnoñapa' çharroch çharra' pue'llomer.

⁹ Allempoña Jesúsapa' alla oterraneterr:

—Ñeñtes po'ñoch ne'mñotene', çhaponasepa'ch seyo'chro ñeñt atet netma'ntatensa añ ñoñets.

Atet otanet Jesús ñeñtecop atet toma'ntatyenanet

(Mt. 13.10-17; Lc. 8.9-10)

¹⁰ Allempoña patmuerra acheñpa' o' ñapñamña Jesús epuet ñañapa' pueyochresha' ñañapa' puesheña'tets po'potantañ ñeñt allo'tsa'yen, ñetñapa' atet ochet Jesús:

—Ta'm ¿es'te'ña petma'ntatenyaña ñorra'?

¹¹ Jesúsñapa' atet oterraneterr:

—Sa te'pa' Yomporña semnatene' attoch se'noterr ñeñt ama eñotpahuoyaye ama't ahua'toteñ atet penaña Yompor po'cohuenña atto ayochreshattena ña. Tarraña po'potantañe'chno ñeñt atta es pue'cha'yetsa, ñocpuetpa' ama eñoteñeto ñeñt atet atma'ntataret ñoñets.

¹² Attoña ama't enteñetañ ñetñapa' amach erro'tenot es çhapahueto pueyochreto. Ama't e'mueñetañ amach çhenanetoña pueyochreto ñeñt atet ye'chateney Yompor po'cohuenña. Attoña amach cotape'cherreto ello cohuen Yomporrecop attoch ñach peretnerrahuet po'chñaret.

Arrpa' all eñotatanet Jesús ñeñt toma'ntatenanet ñeñt a'parre'tene' puerets

(Mt. 13.18-23; Lc. 8.11-15)

13 Jesúsñapa' alla oterraneterr:

—Sapa' ama't mameshapa' are't señothenoña ñeñt' o' netma'ntatuasa ñorra'. Ñerra'm ama' chennaso seyo'chro ñeñt' o' netma'ntatuasa ñorra'pa' errotenotuachñaca'yeña' chaponasaña seyo'chro allohuen po'poñe'chno ñeñt'cha' netma'ntaterrser tsapa'onet.

14 Allempoña Jesúsapa' eñotatanet ñeñt' atet o' toma'ntatuanet ñoñets ñocpuet, ñeñt'pa' atet otanet:

—Ñeñt' a'parre'tyene' puerets, ñeñt'ña pueretspa' añca'ye notenes Yompor po'ñoñ allempo serrpare'teñet.

15 Añ puerets ñeñt' chapyets toño'mar ñeñt'pa' añ notenes acheñenesha' ñeñt' e'mñotenayeyñ Yompor po'ñoñ. Allempo e'mñotuetpa' allorocmach huapa oneñet o'ch alla puerratamperranet Yompor po'ñoñ ama't allpon ñeñt' eñotetañ pueyo'chreto.

16-17 Ñaña ñeñt' chapyesets mapuetro'meso'mar ñeñt'pa' añ notenes acheñenesha' ñerra'm esempo e'mñoteññañet Yompor po'ñoñ e'ñech allorocma pocsheñesha' aguññañetañ Yompor po'ñoñ. E'ñech cohuen ame'neretañ tarraña ñeñt'pa' mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt' chepuets mapyo amach eñalle puerech. Tsapa'onetña ñerra'm o'ch huapanet topateñets ñeñt'cha' muero'chtatahuet tarro'mar ñetpa' o' ame'neretañ Yompor po'ñoñ, ñetña'pa' allorocmach alla quechpuerrñañet Yompor po'ñoñ.

18 Ñaña po'poñe'chno puerets ñeñt' chapyets ajmo'mar ñeñt'pa' añ netma'ntatena po'potantañ acheñenesha' ñeñt' e'mñotenayeyñ Yompor po'ñoñ.

19 Ama'tcha' chapanetañ pueyo'chreto tarraña ñetpa' allo'nach senet e'ñech añña atarr cotape'chenet ñeñt' lleca'yenet arr patsro ñeñt' e'ñe ñocpueta. Añach muenenet o'ch esocmañen es echyenet tarraña ñeñt'pa' chaca'ye shequënanet. Attach pa'namen ye'chatse'tyenet. Attoña huenanet topateñets ñeñto'marña ñetpa' amach errotenot orrtatoñetoña ñeñt' e'ñe cohuen enten Yompor. Ñetpa' e'ñe atteta ñerra'm narmets ñeñt' cha ca'mateñ ajma' ñeñto'marña amach errotenot me'teneto o'ch ellom're'tyeset.

20 Ñaña añ puerets ñeñt' chapyesets e'ñe cohuen patso ñeñt' e'ñe cohuen cheparsatspa' ñeñt'ña toma'ntenaya po'potantañ acheñenesha' ñeñt' e'mñotene' Yompor po'ñoñ. Ñoñetsñapa' e'ñech cohuen chenonet pueyo'chreto. Ñetña'pa' ñeñtet po'ño'ch orrtatenet ñeñt' atarr sherbets Yomporecop. Attoña ñetpa' e'ñe atet penet ñerra'm narmets ñeñt' atarr me'tets—pate'tets ma'poch charra' pue'llomer, po'poñpa' pechapoch charra' pue'llomer, po'poñpa' charroch charra' pue'llomer.

*Arrpa' all toma'ntatanet lampareñ atto' choyo'tam'peney
(Lc. 8.16-18)*

21 Jesúsñapa' alla toma'ntaterraneterr, ñeñt'pa' atet oterraneterr:

—Ñerra'm esempo ya'llchaten lampareñ, ñeñt'pa' ama añecpaye' yehuapateñe o'ch alla ye'rramañpsos coyño. Ñaña ama añecpaye' ya'huortatenoña lampareñ o'ch yene' o'ponot yemayepñacho. Añecopña ya'huortatenoña lampareñ o'ch yene' enonet attoch choyo'tam'pesuan allohuen ñeñt' allo'tsa'yen.

22 Tarro'mar allohuen pa'namen ñeñt' ama eñotpahuoyaye ama't ahuatoteñ, te'ñapa' o'ch e'ñe orrtataretterra attochña o'ch e'ñe eñotataretetuerret e'ñe poctacma.

23 Ñeñtes po'ño'ch ne'mñotene' chaponasepa'ch seyo'chro ñeñt' atet netma'ntatensa añ ñoñets.

²⁴ Jesús^{pa}’ alla oterraneterr:

—Sapa’ seño^{tena}te’ e’ñe^{te}’ po’ño^{ch} cohuen se’ñño^{te}ññañ Yompor po’ñoñ ñato’pa’ ama^{te}’. Tarro’mar ñerra’m erro^t sepoñ po’psheñeñ ñeñt ama cohuenayaye Yomporñapa’ attec^{mach} perres samña. Ñaña ñerra’m e’ñe cohuen sepenanet, Yomporñapa’ e’ñech cohuen perres samña ama’t ellonet o’ch apuerres ñeñt e’ñe cohuen.

²⁵ Tarro’mar esesha^{te}’ čhena pueyočhro ama’t e’ñe allpona Yompor po’ñoñ, elloña Yomporpa’ allo’nach eñotatnenanet nanac shonte’. Tarraña esesha’ña ñerra’m ama čhenaneto pueyočhreto tarro’mar ñetpa’ ama po’ño^{ch}aye’ aguëññañeto Yompor po’ñoñ, ama’t allpon eñotyetañ pueyočhro ñeñtñapa’ čhach puerratanperranet Yompor.

All toma’ntatanet puerets ñeñt e’ñe cohuen chepyets

²⁶ Jesús^{pa}’ alla toma’ntaterraneterr, ñeñt^{pa}’ atet oterraneterr:

—Yompor po’cohuenña ñeñt atto ayochreshattena ña, ñeñt^{pa}’ atet pena ñerra’mrrate’ puesheñarr acheñ ñeñt nare’tene’ puepue^r. O’chña nare’tuepa’ o’ch ahuerr pa’paclo.

²⁷ Allach allponmaterra’ o’ch tsapuenpa’ allach muene^t, yetoñapa’ čhocmach tanta’muene^t, puepueñapa’ atteñapa’ o’ch chepua o’ch atesha’ta. Pamo’mte’ñapa’ amach e’ñeye’ eñoteñe errotenotte’ña chepyen.

²⁸ Ñehua, yeñoteñ patspa’ ñeñtca’ye a’chpatene’ yepuer e’ñe ñoña. Choch ñanom čho’pe’chyes allempoñapa’ o’ch atarrchet čhoch potsets attoch el-lomre’tyes, attotachčo’ e’ñe po’nuen.

²⁹ E’ñe erre^t’ po’netspa’ e’ñech allorocma mueñan ñeñtcha’ tsorrenaya’. O’ca’ čhen allempoch apchenetña ñeñt narmetser.

Atto Jesús^{pa}’ toma’ntaterranet atet pena pue’llomer ñeñt otenet mostazllomí (Mt. 13.31-32; Lc. 13.18-19)

³⁰ Jesúsña ellonetpa’ atet oterraneterr:

—Añ Yompor po’cohuenña ñeñt atto ayochreshattena ña—ñanompa’ e’ñech puesheña’ttsa ame’ña’yetsa, allempoteññaapa’ allo’nach sen atonetnomtsa ñeñtcha’ ame’ñerrtsa, attochña e’ñe epa’huerra erracmañen Yompor po’cohuenña. Ñeñtña te’pa’ o’ch netma’ntatasa ñeñt atet pena ña.

³¹ Ñeñt^{pa}’ atet pena ñerra’mrrate’ añ pue’llomer ñeñt atarr añeñolleshallmerr ñeñt otenet mostazllomí. Ñeñtña pue’llomretollpa’ o’ch nare’chet patso. Ñehua, e’ñe yeñoteñ mostazllomí ñeñt^{pa}’ atarrca’ye nanac añeñolleshallmerr.

³² Tarraña ñerra’m o’ch nare’chetpa’ allempoña choppa’ allo’nach sen rrorranmats cohuen, atarrchetnomuets, elloch metana’tuan po’pchañ narmetsočno. Puetacre’nach ateshatacrerrtatsa. Allñaapa’ o’ch huacha’toña otečno o’ch rrema’rrartosa puetacro’mar po’mañtero.

Jesús^{pa}’ ora allpon ñeñt atet yečhatyenan acheñenesha’ ñeñt^{pa}’ atto pa’namen es toma’ntatyenanet (Mt. 13.34-35)

³³ Shonte’ po’poñečno ñeñt alla toma’ntaterraneterr atto serppare’tatenanet Yompor po’ñoñ. Attoña e’ñe allpona serppare’tatanet ñeñtñapa’ e’ñe cohuen eñotatanet pueyočhreto.

³⁴ Ama serppare’tatenaneto atfa, añña čhocma serppare’tatenanet toma’nteñtso. Ellonetpa’ čhocma e’ñe eñotochen serppare’tatenan pueyočhresha’.

Allempo a'mchecherran Jesús huomenquësha' ñaña sa'p ñeñt emo'yarertetsa (Mt. 8.23-27; Lc. 8.22-25)

³⁵ Ñeñte yetrocma e'ñe ellerronet Jesúsñapa' otan pueyochresha':

—Te'pa' o'ch ahuañpsey yomta'n.

³⁶ Pueyochresha'na sohuanmet acheñenesha'. Ñeñtara noñto allo'tsen Jesúsapa' alloña anmanpeñet Jesús o'ch ahuañpset yomta'n. Allñapa' coña huanmanet po'pnañechno noñtechno.

³⁷ Allempo ahuañpset allñapa' machayotepa'tcha' huomenquëshatañpesnomuet. Emo'yareña cha esha'tena noñto atteña oññapa' choramoch noñto.

³⁸ Jesúsñapa' alla muen puepopato alla ñotena. Pueyochresha'ña opueretpa' atet ochet:

—¡Maestro, amahuaca'ye pellquënyoñe' o'rramche' yoclla'huamocha!

³⁹ Jesúsña tanterrapa' e'ñe po'ñoñoña a'mtsoññetueran huomenquësha'. Ñaña po'ñoñoña a'mtsoññeterran sa'p ñeñt emo'yartetsa, ñeñtpa' atet ot:

—¡Muecheherrepa', muetsoñeñterrepa'!

E'ñe otue'pa' cha muecheherrtsaña huomenquësha'. Attoña ñetpa' o' alla muechettamperret e'ñe cohuen.

⁴⁰ Allempoña Jesúsapa' atet otanet:

—Sapa' eso'mare'tña cha atarr seyoren. Eso'mare'tña ama e'ñeye' seyemtenno.

⁴¹ Ñetñapa' cha atarr nanac yoren, atet otanna'tyeset:

—Ta'mca'ye añ acheñerpa' esona'tarte'ca'ye. Atarrepata' es a'mchechaten, amata' po'ñoñoñapa' a'mchechaterran huomenquësha' amata' ñaña emo'yare' oñ.

5

Atto gadaro'marnesha' ñeñt chorrena oneñtapa' huapa Jesúsesho (Mt. 8.28-34; Lc. 8.26-39)

¹ Allempoñapa' o' etsotaset yomta'n all sechenet. Allñapa' añ pa'ney pene' gadaro'marnesha'.

² Jesúsñapa' sehuosa all noñtot, allñapa' huapoña puesheñarr yacma tarraña ñapa' añ chorrenaya oneñt. Ñeñtpa' arroñ huapa allecma pampa'yeñet arromñañechno.

³⁻⁴ Ñehua, ñapa' alla yeçhena all pampueñet arromñañechno. Amata' puesheñarrapa' ama eseshaye' erroñ penaye attoch a'mchecheret. Amata' çhocma huanquëñetañ asrerecho pa'tcoñ ñaña potot, ñañaapa' çhach tsepe'tuerranña asrerech allo huanquëñet potot ñaña pa'tcoñ çhach rrollapecheñ o'ch e'ñe tsepe'tatue. Ñeñto'marña amata' e'ñe eseshapa' ama eshcaye' a'mchecheñeto.

⁵ Allñapa' ellapene'tcha' ñaña arepene'tcha' chopeñe'chyesets apampaño'mar ñaña aspentarero'mar. Allñapa' allecma atarr ama'toçhena, tsotse'tyena mapyo e'ñe ñañaña.

⁶ Tarraña allempo entapan Jesús a'yoteñ allentepa'tcha' matosa concorpana'tosana Jesús.

⁷⁻⁸ Allempoña Jesúsapa' atet otosan oneñt ñeñt chorrenaya ñeñt yacmar, atet otos:

—O'ch oneñte notosep te'ñapa' ipequechpa'ner añ acheñer!

Ñeñto'marña ñeñt chorrena oneñtapa' rranosa huomencpa' atet otapan Jesús:

—Eso'maruachca'ye Jesúsocha' p̄atsrre'moçhtana'tosna, p̄apa' ñeñteṑ Ñeññ nanac Parets Puechemereṑ. Te'pa' o'ch notapaṑ e'ñe Parets pa'so'chño, amach çha pecoñchatatstosno.

⁹ Jesúsña'pa' alla oterranerr ñeññ chorrena oneñeñ:

—Papa' ¿eso'tña peso'cheñ?

Ñaña'pa' atet oterranerr Jesús:

—Napa' añ neso'cheñ Legión tarro'mar yapa' nanac patonrey.

¹⁰ Allempoña ñeññ chorrena oneñeñpa' ñaña'pa' atet otare'tapan Jesús:

—Amach pemño'tatsterrye allapaṑ baçhayo.

¹¹ Ñehua, allpa' a'yente'tsa'yen shonte' chañchoçhno ñeññ rratse'tyets as-pentonet.

¹² Ñeñto'marña oneñeñeçhnopa' atet otare'tapet Jesús:

—Ñerra'm çhoch muene' erroten peṑoseypa' arrña pemñaye'chosey chañchesho allochña'pa' o'ch yechorra'yerr ñaña' chañchoçhno.

¹³ Jesúsña'pa' allenta otanet:

—Ama'tca'yepa' orrasca'ye.

Allempoña oneñeñeçhnopa' queçhpa'neret acheñ o' chorrereter ñaña' chañchoçhno. Chañchoña allempo chorrosya oneñeñeçhnopa' çhepa'tcha' matrra'tua ñegoneñ, shorçha'tuos alloṑpa' e'ñe ño'shrra'tuosa oño. Ñeñña' chañchoçhnopa' allo'tsente' epoch mil.

¹⁴ Acheñenesha'ña ñeññ cohuanṑpene' chañcho, ñetña'pa' allenta matrra'tet ñamet po'yorñoñ ahuanmuet anetso. Allña'pa' serrpare'tyesoset ñaña' ora allohuen allampaño'mar. Acheñenesha'ña'pa' allenta ahuanmuet ahuo'ch enteñeta'.

¹⁵ O' çhaçha'tet Jesúseshopa' allña'pa' entoset yacma ñeññ chorre't oneñeñeçhno alla anen ashtamaṑ, o' eñoterra, o' cohuenterra. Ñetña'pa' çha atarr mecha'na'toset.

¹⁶ Añña ñeññ entene' Jesús atto queçhpaterran oneñeñ acheñ, o' alla mueñererr chañchesho, ñetña'pa' allenta serrpare'tatyesapet ñeññ huaçha'ttsa anetsoṑ.

¹⁷ Allempoña acheñenesha' ñeññ yeçhetsa allpa' atet ochet Jesús:

—Te'pa' ahuerreṑ arroṑ yenyot.

¹⁸ Allempoña Jesús'pa' a'terr noñto o'ch ahuer, yacmaña ñeññ chorre't oneñeñ ñaña'pa' allenta otan Jesús:

—Napa' nemneñca'ye te'pa' o'ch nocterreṑ.

¹⁹ Tarraña Jesúsña'pa' ama muenache atet och:

—Allapaçh, te'pa' o'ch ahuerreṑ pepacillo pamo'tsesho'mar o'ch peser-rrpare'tatuerranet ora allohuen atto Yomporpa' atarr yenposeṑ ñaña' atto atarr muerosṑa.

²⁰ Ñaña'pa' atet otue Jesús'pa' atetçho' p̄a. Allenta ahuer serr-rrpare'tyesnerrets ora anetso'mar ama't all oteñet Decapoliso atto Jesús'pa' atarr nanac yenpos. Allohuenña acheñenesha'pa' atta atarr cohuanrrorteñet.

Atto Jesús'pa' tantaterran Jairo po'señ ñaña' all a'crratnoman puesheñarr coyanesha' ñeññ a'p̄lla'nmue' pa'shtam

(Mt. 9.18-26; Lc. 8.40-56)

²¹ Allempoña'pa' ahuanṑperrerr Jesús noñto, o' alla çherrerr añeñta'n allot ta ahuaña. Allña'pa' o' alla emchorra'huererr shonte' acheñenesha' e'ñe all sa'patopño.

²² Allña'pa' huapoña puesheñarr añcha'taret ñeññpa' añ pa'so'cheñ Jairo. Ñapa' ñeññ puesheñarr ñeññ añcha'tarettsa judionesha' po'prahuo. Allempo entosan Jesús'pa' ñaña'pa' alla rromosa Jesús pa'rrṑot.

23 Allñapa' atet otos:

—Nesñeñollañačo' o' cha a'po'ntsena. Ñeñto'marña napa' nohuennaña o'ch pōcterren nepaclo. Ama't pōtotapa' o'ch pā'p̄lleña' attoch pā'crrater o'ch alla huom̄cherra.

24 Jesúsñapa' allenta cōta'ner, allenta cōta'huanem̄ ñaña shonte' acheñenesha' cha emchorratse'tnomet, cha to'mama'tneñet.

25 Allñapa' cōta'nmanet ñaña puesheñarr coyanesha' ñeññ atsnatets. Charra' puechena epa char ñeññ atto chocma yella'yena.

26 Epaye' muerochtateñ shonte' apartañechno ñeññ partenayeyñ. Ama't o' a'gasta'huahuan ora allpon quelle echen atto partatena ñañaapa' attera ama't mameshapa' ama choye' pasateñe. Elloña allo'na sen a'po'ntsa'nmatsa.

27 Ñeññ coyanesha'pa' o' e'mare'tan Jesús ñeññ atto chocma a'crratyenan atsnañechno. Ñeñto'marña allempo cōta'huanem̄ Jesús acheñenesha'pa' ñapa'cho'ña allenta cōta'nman Jesús chenta' pa'che'ñoñ. Attoña allpa' a'p̄lla'nmoñ pa'shtam.

28 Tarro'mar ñapa' atet cōtape'chen pueyocho: “Ama't pa'shtama na'p̄lloñpa' ñeññachca' na'crraterre'.”

29 E'ñe a'p̄lla'hue' pa'shtampa' allorocmuepa'tcha' maserrña po'rras. Ñapa' e'ñe eñotena po'chtso o' metueña ñeññ muerochtatene'.

30 Jesúsñapa' eñotnoñ e'ñe ña po'huamencōtpa' o' a'crratnoman puesheñarr atsnañet. Ñañaapa' allenta puerraperra alla acheñenesheshoneñ ñeññ cōta'huanene', allñapa' atet otanet:

—¿Esesha'tña o' a'p̄lla'nmuena neshtamoñ?

31 Pueyochresha'ñapa' atet ochet:

—Pentente' shonte' acheñenesha' ñeññ allotemeña peto'mama'tnene'. Eso'mare'tña pōtenña esesha'te' pā'p̄llene' peshtamoñ.

32 Jesúsñapa' alla cohua'yesanet o'ch entan ñeññ a'p̄llene' pa'shtamoñ.

33 Ñeññña coyanesha'pa' ñapa' o' eñotnoma Jesúsca'yeña o' a'crratnoñ. Ñañaapa' cha pa'shmuena po'yorñoñ allempoñapa' concorposa Jesús pa'rrpōñ. Allñapa' e'ñe a'meta'nman ora allpon ñeññ po'ñoñch atet cōtape'chen.

34 Jesúsñapa' atet otapan coyanesha':

—Papa' nesñeshacha' atto atarr peyemtenna na, attoña te'pa' o' e'ñe na'crratnomuep̄. Te'ñapa' o'ch ahuerreñ peñmañesha', tarro'mar amach alla muerochtaterrperro atsnañets.

35 Allempo eñorena atetpa' allñapa' huacha'ta ñeññ huetsa añcha'tareñ Jairo pa'pacloñ. Ñetña huapuetpa' atet otoset Jairo:

—Peseña' o'ca'ye rroma. Te'ñapa' amach allo'na p̄atsrre'moçhtana'tatsche Maestro o'ch coterreñ pepaclo.

36 Jesúsña ama't e'man atet otoset Jairopa' ñañaapa' atet otan Jairo ñeññ añcha'tareñtetsa judionesha' po'prahuo:

—Papa' amach cha pe'charrtatatsto peyoçher, nachña e'ñe peyemta.

37 Jesúsñapa' aña muenat Pedro ñaña Jacobo ñaña pa'mo'nasheñ Juan. Ñeññach cōta'nmue'.

38 Allempoñapa' ahuanmuet añcha'tareñ Jairo pa'paclo. O'ña chaça'tet allpa', allñapa' entoset shonte' acheñenesha' ñeññ ano'tatse'tets, all yahuanr-ortenet, atarr ya'na'teñet arromñañ.

39 Jesúsñapa' be'tosos pocollo, ñañaapa' atet otosanet:

—Sapa' eso'mare'tña atarr sano'tatsen, cha atarr seyahuanrrortena. Añ shopshesha'pa' amaca'ye choye' rromueno, chaca'ye muen.

40 Ñetña pachmare'teño'tetpa' atta che'tatsetyesapet tarro'mar ñetpa' e'ñeca'ye eñotenet choca'ye rromuen. Allempoña Jesús'pa' cha'nma'cha'tatosan allohuen acheñenesha' pocollot. Ñaña'pa' be'tosos o'pono allo'tsen shopshesha' ñeñt' rromuets. Ñapa' aña muenatos arromña' puepapar ñaña pachor ñaña ñeñt' cota'huanene', ñeñña epuet be'tos'cha'toset allo'tsen arromña'.

41 Allempoña Jesús'pa' rromota'tosan shopshesha'ñ pototpa' atet otos e'ñe ña po'ñoño:

—Talita cumi—ñeñt' yoten ya yeñoño: O'ch nesñe'folle notosep te'pa' cho'pa tantertsa.

42 E'ñe otue' atetpa' allentepa'tcha' tanterra, cha chope'cherrets. Ñehua, ñeñt' shopshesharpa' charra' puechena epa po'charña. Allohuenetña'pa' cha atarr cohuanrrorteñet.

43 Allempoña Jesús'pa' atet otanet:

—Po'ño'ch te'pa' amach esesha' seño'tatatsto ama't e'ñe puesheñarra.

Alla otarraneterr:

—Te'pa' serratallme'cherñaca'ye.

6

Allempo serrpare'tatan Jesús' acheñenesha' all Nazareto

(Mt. 13.53-58; Lc. 4.16-30)

1 Jesús'ña ahuererr allo'tpa' o' alla cherrerr pa'nyo all Nazareto. Pueyochresha'ña'pa' alla cota'huanererr.

2 Allña'pa' allempo cherr yet allempocma amesenet, ñaña'pa' arr ye'chatuerraneterr judionesha' po'prahuo. Shonte' acheñenesha' ñeñt' e'mñotapuerre' atet serrpare'tatuerranet all, ñetña'pa' nanac cohuanrrortapueret, allempoña'pa' atet otyeset ñocop:

—Ñapa' errahuañaca'yeña eñotanña ora allohuen ñeñt' atet pa'yena. Esesha'huañaca'yeña eñotatene'ña attot orrtatenan partsoteñets. Errotuaca'yeña huenaña ñeñt' eñoteñtsor ñeñt' orrtatyen ña.

3 Ñapa' aña'ye ñeñt' po'taruas pene' o'ch torrenana tsach attoch es ye'chcatyen pa'namen. Ñapa' aña'ye María puechoyor. Pa'mo'nasheñpa'cho'ña aña'ye Jacobo, José, Judas, ñaña Simón. Ñaña po'chanesha'pa' e'ñeca'ye yechme'tenanet, parro'marneshayarramche'.

Ñeñto'marña all e'ñe ña pa'nyopa' ama eseshaye' acua'penaye entenaye.

4 Allempoña Jesús'pa' atet otanet:

—Ñeñt' a'mtene' Yompor po'ño'ña'pa' chocmaca'ye añcha'na'tpo' entyeñña allohuen acheñenesha'; arrña pa'nyo allo'tsen e'ñe ña pamo'tsna'tarnesha' ñeñt' e'ñe pamo'tsna'tar penpa' ñetña'pa' ama acua'penaye' enteñeto. Ama't ñaña ñeñt' parro ye'chenet pa'pacleto, ñetpa'cho'ña ama acua'penaye' enteñeto.

5 Ama ame'ñeñeto ñeñto'marña allpa' ama atonocheye' orrtataneto po'partsoña. Allpa' aña orrtatyen attoch a'p'lla'yenan puesheña'tets atsñañet allpa' attoca'yeña a'crratenanet.

6 Ñeñto'marña Jesús atarr cotape'chateñ pamo'tsesha' atto ñetpa' ama acua'penaye' enteñeto, ñapa' cha muene' llecateñet. Allempoña Jesús'pa' alla chope'ne'chyerrerr ye'chatyerrtserr allemeñ anetso'mar.

Allempo Jesús'pa' llesensan pueyochresha' o'ch ahuanemyeset allcha' serrpare'tyeneta'

(Mt. 10.5-15; Lc. 9.1-6)

7 Allempo čhapa'muen allempo Jesús agota'mueanan pueyochresha' čharrasheña ñeñt' puechetsa epsheña. E'ñe apčha'huet ñeshopa' ñañaapa' ap Janet llesens attoch quečhpatyaset oneñečhno atto chorra'yenana acheñeneshačhno. Attoña llesensanet ñetpa' o'ch ahuanemyeset e'ñe epsheña'ttso cmuet.

8-9 Ñaña atet otapanet:

–Ñerra'm o'ch sahanmapa' amach es sanmatsto ama't coñe'ta allcha' sechopeñe'chyes—ama't sebolsa, ama't ñeñt'cha' serra'yenom, ama't sečllayora. Ama't e'ñe epma seshtampa' amach sanmatsche. Añach sanem secarr, sena'nomcha' ñaña sesapat.

10 Alla otarraneterr:

–Ama't errach pocollro sečhap allach sommosa allponmat esempohuach ahuerreserr po'poñ anetso.

11 Ñerra'm erra anetsro ñeñt' allo'marnesha'ña ama cohuenaye' agapaseto ñerra'm amach mueneto o'ch e'mñnotapasetpa' o'ch semterrer ñaña allot. Ñerra'm allempo semterrer ñaña allot, ñeñt'ña setco'tsa'yen pañe'te' patspa' čhoch sepa'shetca'tyesnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenanetoña Yompor. Po'ñočh o'ch notas: Esemphuañen allempoch acraretetuerra allohuen acheñenesha', añña anetso'marnesha' ñeñt' ama sagapaye ñetñaapa' atarrcha' a'coñchatare'tterret. Elloch metana'tueret ñeñt' atto a'coñchatare'tterra sodomo'marnesha' ñaña gomorro'marnesha'.

12 E'ñe ñeñt' otaretetuetpa' ñetñaapa' allenta ahuanmuet o'ch chopeñe'chyeset erracmañen anetso'mar. Allñaapa' serrpare'tyesnomuet ñeñt' poctetsa allohuenacop o'ch co'tape'cherret ello cohuen Yomporecop.

13 Ñaña all chopeñe'chyeset erracmañenpa' ñetpa' allña quečhpatyaset shonte' oneñečhno atto chorra'yenana acheñeneshačhno. Ñaña shonte' po'potantañečhno acheñenesha' ñeñt' atsna'tyets all, ñetñaapa' a'yana'tyesoset atsnañečhno olivoso'yo* e'ñe a'crratyoset.

Allempo e'ñe cohuen es orrtatyes Jesús, Herodesñaapa' čha otapañ Juanañte' o' tanterra ñeñt' apataye't acheñ Yomporecop

(Mt. 14.1-12; Lc. 9.7-9)

14 Allempoña añcha'taret Herodes ñañaapa' atet e'mare'tenan Jesús ñeñt' atet pa'yena, tarro'mar Jesús allohuen acheñenesha'pa' e'ñe e'mare'tueñet ñeñt' atet pa'yena. Ñañaapa' atet ot:

–Añepa'tca'yeña Juanañ ñeñt' apataye't acheñ Partsocop. Ta'mca'ye čhate' tanterraña rromot. Ñeñto'marepa'tca'yeña te'pa' orrtaterranña partsoteñets.

15 Po'potantaññaapa' atet otyenet:

–Añepa'tca'yeña Elías ñeñt' a'mtaye't Yompor po'ñoñ ahuat.

Po'potantaññaapa' ñetpa'čo'ña atet otyenet:

–Añepa'tca'yeña ñeñt' a'mtene' Yompor po'ñoñ, e'ñeca'ye atet ñerra'm ñeñt' a'mtaye't Yompor po'ñoñ ahuat.

16 Herodesña allempo e'mare'ch ñañaapa' atet ot:

–Añepa'tca'yeña Juanañ ñeñt' nepechat ahuañmo'cha, čhepa'ttramche' tanterraña rromot.

17 Nehua, allempo Herodespa' ahuañmo'chacma rromatenana' Juanañ o' huancachpa' allña yottam'psach attoch coshatan Herodías ñeñt' pa'mo'nasheñ Felipe puetapor. Tarro'mar allempo Herodespa' o'ca'ye puerraterran pa'mo'nasheñ puetapor.

* 6:13 Olivo ñeñt' tsach allot yoreñet puerets pue'merot.

18 Juanañpa' ñaca'ye otaye't Herodes:

—Amaca'ye pocteyaye o'ch peyoram̄pes pemo'nasheñ puetapor.

19 Ñeñto'marña allempo Herodíaspa' atarr e'moñe'tane't Juan, atarr mueneñe't o'ch muetsatacheñ tarraña ama erro't pe.

20 Tarro'mar Herodespa' mecha'na'tane't Juan, eñochet' ñapa' e'ñe pocte' es ña'yese't. Eñochet' ñapa' añecpa'na atarr torrena Partsocop. Ñeñto'mare'naña e'ñe cohuen cohuañpsache't allochñapa' amach muetseto. Allempo e'mñnoten Juan atto serrpare'te't atarr cohuen enteñeñ, tarraña ama e'ñeye' eñnotenanoña ñeñ't atet cotape'chateñ Juan e'ñe cohuen.

21 Atteñapa' çhapa'muen pamtarr allempoch Herodías eñoteñ attotcha' muetsaterran Juan. Ñeñtpa' tarrempo atet ña allempo çhapa'muen Herodes pue'ñalletño ñeñ't puerrollar pen Herodías. Allempoña Herodespa' hua'ñatyesan acheñenesha' ñeñ'tcha' rrallme'chapretenaya'. Añ hua'ñatyes ñeñ't añcha'tareteçhno ñaña ñeñ't soltar po'captanrenesha' ñaña ñeñ't atarr ecñlayoretenesha' ñeñ't galileo'marnesha'.

22 Allempo rrallme'chetpa' allña be'tososña ñaña shopshesha' ñeñ't Herodías puechoyor. Ñaña' allña tancsare'tosa. Herodesña' ñeñ'ta atarr cohuen ent ama't ñaña ñeñ't ahua'ñareteçhno. Ñeñto'marña añcha'taret Herodespa' atet otan shopshesha':

—Ama't erra'tsena penamuenenpa' napa' napa'çha'.

23 Elloñapa' e'ñe Yompor pa'so'chño nan po'ñoñ, allempoñapa' alla otererr:

—Po'ñoçhca'ye napa' ama't es penamuen napa' napa'çha' ama't pueshmet nepatseñ all na'mcha'tare'tena.

24 Allempoña shopshesha'pa' çha'nerr ahuer pachoresho, atet otosan pachor:

—Ta'm çescha' nenamña añcha'taret?

Pachorñapa' atet och:

—Añcha' penam Juan poñ ñeñ't apataye't ahuaña acheñ.

25 Allempoña shopshesha'pa' materra alla añcha'taret Herodesesho atet otuerran añcha'taret:

—Napa' añ nemnen o'ch pepechennana' Juan poñ ñeñ't apataye't acheñenesha' o'ch penon platopa' o'ch paphuerren e'ñe arrma.

26 Allempo enamhue shopshesha' Juan poñpa' añcha'taretñapa' çha lleca. Tarraña ama't llecañpa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñ't hua'ñen ñeñ't e'muene' atet oten ñeñto'marña çhocmach a'pocatan po'ñoñ atet otuan ñorra' shopshesha'.

27 Allempoñapa' allenta otan po'solltarer:

—Te'pa' o'ch pepecheññaña' Juan poñ all neyottam̄psateñ; poññapa' pehuapater arrma.

28 Solltarñapa' allenta ahua' pechenana' Juan poñ, o' huapater plato, aphuerran shopshesha'. Shopshesha'ñapa' apuenana' ñaña pachor.

29 Allempoña Juan pueyochresha'pa' o' e'mare'chet o' pecheret pa'yochreshateret Juanañ, allempoña ñet ahuanmuet all pecheret Juanañ allempoña ñetpa' ereta' apecharet o'ch pampueñeta'.

Allempo Jesús'pa' rratenan shonte' acheñenesha'; ñeñ'tña acheñenesha'pa' allo'tsen amnaroch mil

(Mt. 14.13-21; Lc. 9.10-17; Jn. 6.1-14)

30 Attotañapa' o' çhacherr ñeñ't llesensen Jesús. Ñetñapa' serrpare'tatueret Jesús allohuen ñeñ't atet ña'yaset. Serrpare'tatueret ñaña atet yeçhatyaset acheñenesha' Yompor po'ñoñ.

31 Jesúsñapa' atet oterranerr pueyochresha':

—Te'pa' o'ch ahuey e'ñe yaptoche' all ama acheñempañooyaye; sapa' allcha'ña samesuerr allponmat.

Ñeñt allempopa' atet otan Jesús pueyochresha' tarro'mar allempo shonte' acheñenesha' ñeñt hua'cha'tyetsa ñaña ñeñt chocma ahuanemyetsa ñeñto'mar ama't mameshapa' ama eshcaye' rreneto.

32 Allempoñapa' e'ñe ñaptochayet ahuanmam̄pset noñto, o'ch ahuanmuet all ama acheñempañooyaye all otenanet Jesús.

33 Allempoña shonte' acheñenesha'pa' alla enterraneterr all oñmam̄penet. Allempoña achme'tarettapuetpa' acheñenesha'ñapa' o' alla matrra'terrerr allohuen ñeñte anetsoť. Ñetñapa' patso'mara oñma'cha'tet ñanmacmueta ča'cha'tet all sechena Jesús pueyochreshohuen.

34 Allempoña sehuosa Jesús allpa' alla enterraneterr o' alla shonta'huerrerr acheñenesha'. Atarr nanac muera'huerraneterr Jesús, tarro'mar ñetpa' e'ñe atet enterraneterr ñerra'mrrate' carrnero ñeñt ama acum̄psareteyaye. Allempoña Jesúsapa' alla yečhatuerraneterr pa'namen esocmañen ñeñt Yompor po'cohuenña.

35 Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempañooyaye ñaña o'ca'ye ellerren.

36 Te'pa' o'ch p̄och acheñenesha' ahuanemyerretepa' anetso'mar allcha' rañta'yesuerret puerraret ñeñtcha' rra'yesuerret tarro'mar arrpa' ama es eñalle.

37 Tarraña Jesúsñapa' otan pueyochresha':

—Sachca'ye apa'yesahuet ñeñtcha' rret.

Ñetñapa' atet ochet:

—¿Añe't pemnen o'ch ahuey o'ch yepomuena' shonte' quelle ñeñt doscientos denario† alloch yerañfena' pan ñeñtcha' yerratuerranet allohuenet?

38 Jesúsñapa' atet oterraneterr:

—Ñehua, secua' pan, ¿errponte' sechen?

Ñetña cohuet panpa' atet otereterr:

—E'ñeca'ye amnara pan eñall ñaña epatoll cac.

39 Allempoña Jesúsapa' atet otan acheñenesha':

—Te'pa' o'ch sanorrcha'tyes e'ñe sopa'ttsocma e'ñe all cohuen emmo'ratyen pasetma'.

40 Ñetñapa' atetcho' pet. Anorrcha'tyeset e'ñe ñopa'ttsocmuet—čharrasheña'ttsocma čharrapa'tets ñaña amnarsheña'ttsocma čharrapa'tets ñeñt anorrcha'tyesets.

41 Allempoña Jesúsapa' agapan ñeñt amnar pan ñaña epatoll cac, cohua' enoneť parasyoso'tam̄psan pan. Allempoñapa' shota'tan panpa' apanatyesan pueyochresha', ñetñapa' epatyaset allohuen acheñenesha' ñeñt anorrcha'tyets all, e'ñe epa'huet. Ñaña shetse'tan cac attoch epatyesanet allohuenet.

42 Allempoñapa' o' rrallme'chet allohuenet e'ñepa'tcha' yetrra'tuahuet.

43 E'ñe yetuahuetpa' elloña čha a'pchatyeset cac ñaña pan ñeñt ashota'tyesaret. Ñeñtña a'yapa'cherretepa' čhepa'tcha' chorrerrets čharra' puechena epa cañter.

44 Ñeñtña rrallme'chats atarr shonte' acheñenesha' allo'tsen amnaroch mil ñeñt e'ñe yacmaneshoche'.

† 6:37 Denariopa' quelle ñeñt allpon tsa'tenet pamtarr ñeñt taruaset all pa'nyo.

Allempo Jesúsapa' e'ñe cohuen chope'chnen enot oño
(Mt. 14.22-27; Jn. 6.16-21)

⁴⁵ Allempoña Jesúsapa' otan pueyochresha':

—Te'pa' o'ch sa'ta'cha't noñto o'ch sota sanom o'ch se'pchaterra yot o'ch se'cherr anetso ñeñt pa'so'cheñ Betsaida.

Allempoña Jesúsapa' o' so'tnoman acheñenesha'.

⁴⁶ So'tuanmanetpa' ñaña'pa' ahua' aspeno, allcha' ma'yochosa.

⁴⁷ Atteñapa' o' tsapuen, ñapa' allo'tsenara e'ñe ñapueñ aspeno. Noñtpa'cho'ña ñeñta rro'chaso'tsenara sa'po.

⁴⁸ Alloña entenan pueyochresha' ñeñt noñto'tsa'yen. Ñetñapa' e'ñe po'muero'chenño'teta echotnenet oñ tarro'mar orrnoñapa' cha a'puerrame'tam'penanet. Atteña allempoña puetarenmochpa' huenanet Jesús cha chope'chnen enot oño. Ahua'ch metanenanetañ,

⁴⁹ allempoña pueyochresha'pa' entapueñet cha chope'chnen enot oño. Ñetñapa' cha otenapuetañ choyeshe'matste' huapanet. Cha rrannartet pueñchaño't.

⁵⁰ Allohuenetpa' e'ñe entuapet nanac yore'tosanet. Jesúsñapa' eñorana'tuenanet, atet otuenanet:

—Choñaca'ye socshapuenna, naca'ye o' nohuapa, amach atta señcha'tatstapno.

⁵¹ Allempoña Jesúsapa' a'tapos noñto allo'tsa'yen pueyochresha'. Huomen-quèsha'ñapa' chepa'tcha' muetsoñeñterrtsa. Ñetñapa' cha atarr cohuanrrorta-pueñet.

⁵² Ama chenanelo pueyo'chreto ama't atto Jesúsapa' atontatan pan, amaca'ye es chenahueto pueyo'chreto.

Allempo Jesúsapa' a'crratyesosan pa'namen atsnañe'chno all Genesareto
(Mt. 14.34-36)

⁵³ Allempoña pechatañ'psetpa' arr etsotaset all oteñet Genesareto.

⁵⁴ Allempo sohua'cha'toset noñto't, añña acheñenesha' ñeñt allo'tsa'yen, ñetñapa' cheme'tapet Jesúsapa'

⁵⁵ allenta matrra'tyeset ora erracmañen all ye'cha'yena acheñenesha'. Atto'tca'yeña huapatam'pesyesoñetña atsnañe'chno allem'ateñ. Ama't erra e'mare'teñet o' chap all, allcha'cho' anmoñetña patsnañe'ter pueche'cnape'na.

⁵⁶ Ama't erra chapyen all shontena acheñenesha' ñaña ñerra'm arr chen all ama tama eñalle acheñ, ama't allecma oñen acheñenesha' ñetñapa' allcha'cho' na'yeneta' patsnañe'teret allcha' enamapet ama't poso'mota o'ch a'p'lapoñet pa'shtam. Allpon ñeñt a'p'lla'yesapue' Jesús pa'shtampa' allponcho' e'ñe corra'yesuerrtsa.

7

Atto Jesúsapa' eñotatenanet ama a'ñeye' ya'sosyatenaye Partsocop ñeñt yerra'yen yenamot
(Mt. 15.1-20)

¹ Allempoña allpa' hua'cha'toña fariseonesha' epuet ñaña puesheña'tets ñeñt hua'chetsa Jerusaléno't ñeñt atarr etsotayenayeñ ñoñets ñeñt atet anaret judioneshacop.

² Ñetña allpa' entosñañet Jesús pueyochresha' atta rra'yenet ama e'pota'tyeneto pot Partsocop allempoch rrallme'chet.

³ (Ñehua, allohuen fariseonesha' ama't ñaña allohuen judionesha' ñetpa' atet ye'chenet amach rreneta'pa' o'ch e'pota'tyeset Partsocop. Tarraña ñeñtpa' pa'tañneshaña ye'chatnomahuet.

⁴ Ñaña po'poñ ellonetpa' atet ye'chatanete't pa'tañneshañ ñerra'm esempo huerret allotecma pomatsre'tyenet, amach rreneta'pa' 'choch ñanom a'cohuentatenetañ Partsocop. Ñaña shonte' po'poñe'chno ñeñt e'ñe ye'chatyesanete't pa'tañneshañ. Ama't ñeñt porret pa'yenet ñaña po'pajo'chnetpa' 'chochña e'ñe e'pame'tyeñetañ Partsocop, e'parro'tyenetañ ama't ñaña pa'srerrogachno Partsocop. Ama't ñaña all panrame'tyenet e'ñech e'pata'tueñetañ Partsocop.)

⁵ Añña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop ñetña allempo entosñañet Jesús pueyochresha' atta rra'yenet ama e'pota'teneto Partsocop ñeñto'marña ñetpa' atet otoset Jesús:

—Peyochreshachnoñapa' eso'mare'tña ama esesha' ye'chenayeña ñeñt atet ye'che't yatañneshañ. Ñetpa' atta rra'yenet ama e'pota'teneto Partsocop allempo rrenet.

⁶ Jesúsñapa' atet otanet:

—Sapa' atarruaca'ye ommoñañeshaste' tarro'mar atarr seshcare'ten, amaña Yomporeye' sesherbena. Isaíaspa' e'ñe cohuen a'mítane't Yompor po'ñoñ, saña te'ñapa' e'ñe atet sepena atet ote't allempo atet ot Yompor:

Ñeñt acheñenesharpa' e'ñe puenamoña cohuentatennanetañ; pueyo'chretoñapa' ama chenaneo ñeñt cohuen nenten na.

⁷ E'ñe orrena ma'yochennet, ñeñt atet ye'chatannenetpa' ñeñtpa' e'ñe acheña naye't ahua't po'capña.

⁸ Jesúsapa' alla otarraneterr:

—Sapa' 'chaca'ye seque'chpuenña ñeñt atet otene'y Yompor ñeñtcha' atet ye'pa'yen cohuen; sapa' añaca'yeña atarr setsotayen ñeñt atet ye'chatyesnomues sa'tañneshañ; ñeñta atet se'pa'yen orrote'chno e'pame'tyese' ñaña sepajo'chno. Ñaña po'poñe'chno pa'namen se'patse'tyeneñ ñeñt soten Partsocopaño'.

⁹ Jesúsapa' alla otarraneterr:

—Sapa' añaca'ye atarr seño'ten attoch sehuapore'toñ Yompor po'ñoñ ñeñt atet otene'y ña ñeñtcha' atet ye'pa cohuen; ñeñto'marña sapa' e'ñe añña setso'tayen ñeñt ye'chatyesnomues satañneshañ.

¹⁰ Ñehua, Moisésapa' atetca'ye ote't: “Semorrenteño'tpa' sem'cha'na'chcha' sompor ñaña sachor.” Elloña ñaña po'poñone'tpa' atet ote't Moisés: “Ñerra'm esesha' sasare'tene' pompor ñaña pachor ñeñtpa' muetsetepa'.”

¹¹ Tarraña sañapa' atet sotyen ñerra'm esesha' atet otene' pompor ñaña pachor: “Ñeñt nechen o'ch napapeñpa' tarraña amach napape te'pa' o'ch nene' Yomporecop ñeñt otenet Corbán”,

¹² ñeñtña acheñerpa' sañapa' atetcha' soteñ: “Pocoppa' ama pallteno o'ch es pa'p pamo'mte'.” Attoña sapa' ama semnateñe ñeñt acheñer e'ñe ña puemorrenteño'tpa' o'ch es apuenan pompor ñaña pachor.

¹³ Attoca'yeña sehuapore'teññañña Yompor po'ñoñ allochñapa' e'ñech añña setsoten ñeñt e'ñe sa seycheña. Ama't ellonetpa'cho'ña shonte' po'poñe'chno ñeñt atet se'patse'tyena pa'namena'ttso'cma.

¹⁴ Allempoña Jesúsapa' chore'tan acheñenesha' ñeñt shontetsa, ñetñapa' atet otanet:

—Sañapa' po'ño'ch allohuenes e'ñepa'chña cohuen se'mñoten allochñapa' attoch e'ñe cohuen 'chaponasa seyo'chro.

15 Ama añeye' ya'sosyatenaye Partsocop ñeñt' yerra'yen. Añca'yeña ya'sosyatene' e'ñe ya yoc'tape' chatse'teñoť ñeñt'pa' yeyochrotca'ye huena.

16 Ñeñtes po'ñočh ne'mñotene' čhaponasepa'ch seyočhro ñeñt' atet netma'ntatensa añ ñoñets.

17 Allempoña Jesús'pa' sa'nerran acheñenesha'pa' ñaña'pa' be'tosuerrerr pocollo allña pueyochresha'pa' atet otoset:

—¿Eso'tña petma'ntatyeneña ñorra'?

18 Jesús'ña'pa' atet otanet:

—Sapa'čho'ña e'ñe'tña attecmas samña, ama es sechenoyo seyočhro. Sapa' ama't señotenoña ñeñt' yerra'yen yenamot' ñeñt'pa' amate' errotenot' a'sosyatyeña Partsocop.

19 Tarro'mar ñeñt' yerra'yenpa' amaca'ye yeyochroye' čheno, yařaca'ye čhen. Ñeñt'pa' čhocmachca'ye yener a'yo.

Ñehua, ñeñt'pa' atet eñotateney Jesús allohuen rreñtsočhnopa' e'ñeca'ye cohuenacma e'ñe arrapahuocma.

20 Jesús'ña'pa' alla oterraneterr:

—Añña ñeñt' čha'nets yenamot' ñeñt' atto yeñosatse'tyen ñeñt'pa' e'ñe yeyochrot huena ñeñt'ña čhocma ya'sosyatene'ña Partsocop.

21 E'ñe yeyochrot huena cořapñats ñeñt' ama't mameshapa' ama cohue-nayaye, ñeñt'pa' añ: čhetapretanna'teñets řaporet, cañoresha'teñets, muet-sanna'teñets,

22 etatsre'tyeñets, ye'čhapretanna'teñets, atsrre'mueñets, she-care'tanna'teñets, ottatse'teñets, moparrñats, sasare'teñets, ommo'cheñets, otatse'teñets.

23 Ñeñt' allohuen sosya'tsañečhno ñeñt'pa' yeyochrotca'yeña huena, ñeñt'ca'yeña ya'sosyatene'ña Partsocop.

Atto puesheñarr coyanesha' ñeñt' ama judioneshayaye ñapa' atarr yemta-pana Jesús

(Mt. 15.21-28)

24 Allempoña'pa' ahuererr Jesús allořpa' alla čhap allampaño anets Tiro ñaña Sidón. Allempo čhap all pocolopa' ñapa' mueneñeñ e'ño'čh a'nahua čhapañ. Tarraña ama errotenot' čhapa a'nahua,

25 tarro'mar e'ñe allempo čhap čha e'mare'te' puesheñarr coyanesha' ñeñt' achoyoret. Puechyorñapa' penochor ñeñt'ña'pa' čha chorreña oneñeť. Ñeñt'ña coyanesha' huapapa' rromosa Jesús pa'rrpōť.

26 Ñeñt'ña coyanesarpa' ama judioneshayaye, ñapa' po'poñ acheñ ñeñt' sirofenicio'marnesha'. All rromosa Jesús pa'rrpōťpa' atet otos:

—Nepapare, pequečpatataye'chapon nechoyor oneñeť.

27 Jesús'ña'pa' atet toma'ntatana acheñenesha' ñeñt' ama judioneshayaye ñeñto'marña atet och:

—Ñanomcha' ya yacñeřar ya'yeta' tarro'mar ama pocteyaye o'ch yeprratañpes yacñeřar puerrar o'ch yehuapore'tañpes allo'tsen ochec o'ch rre' ñaña ochec.

28 Coyanesha'ña'pa' atet otererr:

—Ama't atteñ nepapareshacha' tarraña ama't ochepa'čho'ña rra'yenan cheshanesha' puerrar ñeñt' a'shore'tatyenet po'mesařnačo.

29 Allempoña Jesús'pa' atet otererr:

—E'ñe pocte' atet pe'ñorena; e'ñepa't pame'ñenna. Ñeñto'mar te'pa' o'ch ahuerrep e'ñe peñmañesha', te'ña oneñeťpa' o' quečhpa'nerrnař pechoyor.

³⁰ Allempoña coyanesha'pa' ahuer pa'paclo, o' cherrpa' alla entuerran puechoyor alla panena e'ñe cohuen po'mayo, oneñeñapa' o' quechpa'ner.

Allempo Jesús'pa' a'crraterran paquet ñeñt' opanatets

³¹ Allempo puerrerra allot ñeñt' allampañoť Tiroť, arr oñemhuanom anetso Sidón allot ñaña po'poñ anetso Decapoliso'mar. Attoña o' alla ahuer sa'ponet all Galileyas.

³² O' cherr allpa' huapaterrñañeterr puesheñarr yacma ñeñt'ña' paquet ñaña ama e'ñeye' cohuenaye' eñeno. Ñeñt'ña huapate'pa' atet otosan Jesús:

—Añecopca' nehuapateñ o'ch pa'p'le' potot attoch correrra.

³³ Jesús'ña' allenta anemñ ñapueť a'yenet, allña' esho'tosan potař paquet pueto; ñaña o' senmare'pa' o' alla a'p'lerñañer ñaña pueñeñ.

³⁴ Allempoña Jesús cohua' enonetpa' enara. Allempoña'pa' atet ot e'ñe ña po'ñoño:

—Efata —ñeñt' yoten yeñoño: Pota'nerrepa' pet allochña'pa' o'ch pe'muerra e'ñe cohuen.

³⁵ E'ñe otue'pa' cha pota'nerrets pueta'pa' e'ñe cohuen e'muerra. Ama't ñeñt' echartatene' pueñeñpa' o' a'rroyer cha eñorerřsa e'ñe cohuen.

³⁶ Jesús'ña'pa' atet otanet:

—Te'pa' amach esesha' sotařsa'tatsto ama't e'ñe puesheñarra.

Ama't atet otanetañ elloña ñetpa' a'metare'teñet.

³⁷ Allña'pa' atarr nanac cohuanrreñet, atet otyenet:

—Jesús'pa' atarro'trra cohuenña ñeñt' allohuen atet es pa'yen. Ama't paquetnesha'pa' chocma e'ñe cohuen e'matuenanet. Ama't ñaña opanane-shačnopa' chocma e'ñe cohuen eñoratyenanet.

8

Allempo Jesús'pa' rratenan shonte' acheñenesha' ñeñt'ña acheñenesha'pa' allo'tsen pa'tatsoch mil

(Mt. 15.32-39)

¹ Allempoña po'pocheño shonterrer acheñenesha' Jesúsesho. Allem-popa'cho'ña ama eñalle ñeñt'cha' rret. Ñeñto'mar Jesús'pa' agotan pueyochresha'pa' atet otapanet:

² —Napa' cha atarr nemuereña allohuen acheñenesha' ñeñt' shontetsa arr. O' ma'pamtoset nesho ama eñallmeñeto ñeñt'cha' rret.

³ Ama pocteye' nenteñe o'ch ahuanerret e'ñe pa'chporrñesha' te't ama a'ñshe'mterreto toño tarro'mar patanta'tetspa' atarr řačhayoť huapyenet.

⁴ Pueyochresha'ña'pa' atet ochet:

—Errahuachca'ye yentña rreñetsťe' ñeñt'cha' yerrach shonte' acheñ arřpa' amayaca'ye.

⁵ Jesús'ña'pa' atet oterraneterr:

—Sapa' řerrpona't sechenña pan?

Ñetña'pa' atet otereterr:

—E'ñeca'ye cančhrra yechen.

⁶ Allempoña'pa' otan acheñenesha':

—Te'pa' sanorrča'tyes patso.

Allña'pa' agapan ñeñt' cančherr pan. Agaphuepa' o' parasyoso'tenanerr Pomp' allotña'pa' o' shota'tan pan, apanatyesan pueyochresha'. Ñetña'pa' o' epatyeset ñamet allohuen acheñenesha' e'ñe epa'huet.

7 Apuanet panpa' eñall ñaña pate'tets cacatollesha'. Jesúsñapa' alla parasyoso'tam'perranerr ñaña cacatollesha' allempoñapa' oterranerr pueyochresha':

—Sepatyerraneterr ñaña cacatollesha'.

8 Allempoñapa' o' rrallme'chet allohuenet, e'ñe yetrra'tuahuet. O' e'ñe yetuahuetpa' cha a'pchatyeset ñeññapa' a'yapa'cheret. Ñeññña a'yapa'cherretpa' chepa'tcha' chorrats cancherr cañter e'ñe tamo'yare'.

9 Ñeññ rrallme'chats atarr aton acheñenesha' ñato' allo'tsente' pa'tatsoch mil acheñenesha'. Allempoña Jesúsapa' so'tnerran acheñenesha'pa' ahuerr,

10 a'tapos noñfo pueyochreshohuen ahuanm'pset o'ch ahuanmuet anetso ñeññ pa'so'cheñ Dalmanuta.

Atto fariseonesha' enamaset Jesús gatapanetepa'to' po'partsoña

(Mt. 16.1-4; Lc. 12.54-56)

11 Allempoña Jesúsapa' huacherrñañerr ñaña fariseonesha' ahuo'ch otnare'chet Jesús. Ñetñapa' cha mueneñet o'ch topachet Jesús. Ñeñño'marña atet otoset:

—Yapa' añca'ye yemnen o'ch pegatapuey pepartsoña ento' allochñapa' attoch yeñotosep po'ño'ch p'apa' Parets Puechemerep'.

12 Jesúsñapa' allenta enara cha muene' po'poñ entanet pueyo'chro ñeñño'marña atet otanet:

—Eso'marte'ca'ye acheñenesha' ñeññ corra'yetsa te' ñetñapa' aña atarr e'nenet o'ch norrtatanet nepartsoña ento'. Po'ño'chca'ye na te'pa' o'ch notas, ama't coñe'ta amach es negataneto.

13 Allempoña Jesús sohuanerranetpa' a'taphuerr noñfo'pa' ahuanm'pes, pechaterra yom'ta'n.

Atto Jesús toma'ntaterraneterr ñeññ po'chaser pen fariseonesha'

(Mt. 16.5-12)

14 Pueyochresha'ñapa' cha puesnomuet o'ch anmuet pocrram', noñfo'pa' ama es eñalle ñeññcha' rret, e'ñe patrpa pan eñall.

15 Jesúsñapa' alla toma'ntaterraneterr, ñeñññapa' atet otanet:

—E'ñech seño'ta ñato't semeñe'teña'ña fariseonesha' ama't ñaña Herodes po'chaser allo tsetenet pan.

16 Ñetña co'tape'chyesetpa' atet otanna'tyeset:

—Amaca'ye yechenoña pan ñeñño'marte'ca'yeña otene'y año'ch yemeñe'tatscheña fariseonesha' po'chaser.

17 Jesúsña allempo eñotanet atet co'tape'chyenet ñaña'apa' atet oterraneterr:

—Eso'mare't sellquëñesha' sotanna'tyena año' eñalle ñeññcha' serra'. ¿Ama't seño'teñe? ¿Ama't chennasoña seyo'chro? Teme'ttsena't se'charrtatenña seyo'cher.

18 Sapa' ama't aclo'yetesepa' chaca'ye sottena ñerra'mrrate' ama senteno. Ama't etatesepa' chaca'ye sottena ñerra'mrrate' ama se'mueno. Ama't mameshapa' are'tña es seyerpueno.

19 Ñehua, ahuaña allempo neshota't amnar pan e'ñeca'ye epa'hua amnaroch mil yacmanesha'. Ellopa' ¿errpona'tña sap'cha'huerrña ñeññ ashota'tyesare't allempo e'ñe seyetua? ¿Errpona'tña cañter se'chorrerr?

Ñetñapa' atet ochet:

—Charra'ca'ye puechena epa cañter.

20 —Ñaña allempo neshota't cancherr pan pa'tatsoch mil acheñ ñeññ rre' ¿errpona'tña sap'cherrerrña ñeññ ashota'tyesare't allempo e'ñe seyetuerrerr? ¿Errpona'tña cañter se'chorrerrerr?

Ñetña atet ochet:

—Cancherrca'ye cañter ye'chorrerrerrña allempo.

²¹ Jesúsñapa' alla oterraneterr:

—Te'ñapa' ¿ama'tña o' chaponasoña seyoçhro? Ñeññ neñotatenes ñeññpa' ama serrarecpaye' notenso.

Allempo Jesúsapa' a'crraterran aporo'yef all Betsaido

²² Allempoña chaçha'tet anetso Betsaido, allñapa' huapaterrñañeterr aporo'yef, ñeññpa' atet otoset Jesús:

—Añecopca'ye yehuapateñña o'ch pa'pñlacle'chap attoch pecuater.

²³ Allempoña Jesúsapa' echa'nman aporo'yef pototpa' anemñ a'yenet all ama eñalle pocoll. Allñapa' a'yacclle'chos pa'snemo, attoña a'pñlacle'chos, allñapa' atet och:

—¿Ama't coñe'tapa' ama't o' pento?

²⁴ Aporo'yefña cohua'yestsapa' allenta otan Jesús:

—O'ca'ye nent acheñ alla chopeñen tarraña e'ñe atet nentyenanet ñerra'mrrate' tsach tomçha'tyets.

²⁵ Jesúsñapa' alla a'pñlacle'chererr, aporo'yefñapa' cohua'yerrtserrpa' çhepa'tcha' e'ñe cohuenterrtsaña pa'cille'. E'ñe cohuen es entyesuahuer allohuen.

²⁶ Allempoña Jesúsapa' atet och:

—Te'ña ñerra'm o'ch ahuerreç pepadllopa' tarraña amach poñmatsterroña anetso'mar, allochñapa' amach esesha' potaþsa'tatsetnerro ama't e'ñe puesheñarra.

Atto Pedropa' otan Jesús, þapa' þaña Yompor Puechemereç ñeññeç Cristotets

(Mt. 16.13-20; Lc. 9.18-21)

²⁷ Allempoña ahuererr Jesús pueyochreshohuen. Arr sechenet all oteñet Cesarea ñeññara Filipino allcha' chopeñe'chyeneta' all anetso'mar. Allña toñopa' a'þto'tnoman pueyochresha' ñeññpa' atet otnomanet:

—¿Errofena't otyenenña allohuen acheñenesha', napa' eseshante'?

²⁸ Ñetñapa' atet otyeset:

—Patantarr acheñenesha'pa' atetca'ye otyenpet þapa' Juanañþo'te' ñeññeþo' apatañtate't Yomporecop. Po'potantaññapa' atet otyenpet þapa' Elíasoþo'te'; po'potantaññapa' atet otyenpet þapa' añeþo'te' po'psheñeñ ñeññ a'mtaye't Yompor po'ñoñ ahuat.

²⁹ Allempoñapa' alla a'þto'terraneterr:

—Sañapa' ¿errofena'tña sotenenna sa?

Pedroña eñoratsapa' atet och:

—Papa' ñeññeþca'ye Cristotets.

³⁰ Allempoñapa' otan pueyochresha':

—Amach esesha' sotaþsa'tatsto ama't puesheñarra napa' na ñeññen Cristotets.

Atto Jesúsapa' eñotatan pueyochresha' ñapa' amsaretterrach

(Mt. 16.21-28; Lc. 9.22-27)

³¹ Jesúsña e'ñe allempoteñpa' moñetnomñ eñotatyeshomue' pueyochresha' ñeññ atet anaret ñocop, ñeññpa' atet otanet:

—Na Ñeññen Acheñetosetsapa' atet anaret nocop, nanaccha' na'mueroçhtatare'tterra. Amach esesha' pocteye' nenterraye—ama't ñeññ pompornesha' pen judionesha', ama't ñeññ pa'mñcha'tare'ter pen judionesha' po'cornaneshar, ama't ñaña ñeññ etsotayenayeñ ñoñets ñeññ atet anaret

judioneshacop—ama't ñetpa' amach eseshaye' neyemterraye. Attochña napa' muetsataterretcha'. Tarraña poma'pamtaño ch o'ch alla netanterra.

³²Ñeñtpa' e'ñe eñotochen otnomanet ñapa' atetcha' aḡaretterra. Pedroña'papa' allenta anem' a'yenetpa' allña'papa' atet otos:

—Arepa'ch Partseshacha' atteye' perrpeto ama't errponaña.

³³Jesúsña'papa' alla puerraperra cohuos pueyochresheshonet allña'papa' atet otan Pedro:

—Orraḡ a'yo neshot oneñeñe; ḡapa' amaca'ye Yomporeye' atet ḡoctape'chatenaye; ñeñtpa' acheñarramche' ḡoctaḡña.

³⁴Allempoña Jesús'papa' agotan acheñenesha' ñaña pueyochresha' ñeñtpa' atet otanet:

—Ñerra'm esesha' muenene' o'ch coterrnet na e'ñe ḡo'ñoch attoch neyochresha' neperranet añ ḡoctetsa sohuanmuete'papa'ña ñeññ atet muenenet e'ñe ñocpueta ama't e'ñe ḡocreñohuenet. Attochña ñetpa' o'ch e'ñe toma'nteret ñeññ chechnene' ḡo'corsoch allcha' muerochtet ñamet. Attochña coterrnet e'ñe ḡo'ñoch.

³⁵Tarro'mar ñerra'm esesha' e'ñe añña muenenet o'ch correnet atomat attoch e'ñe coshenet arr patsro, ñetña'papa' ḡhach a'chencatet ñañeñeta. Tarraña ñerra'm esesha' e'ñe ḡocte' entene' o'ch es sohuanerret e'ñe ḡocreñohuenet nocop attoch epatuerret cohuen ñoñets ñeñtpa' alloch sequeshperra, ñeñña acheñerpa' ñaña'papa' corretsach e'ñe cohuen tayoteñ errponañohuen.

³⁶Ama't errponenaparen esocmañen es yeyoratsetyes ora allpon ñeññ yentyen añe patsro, tarraña ñerra'm ñeññach e'ñe ya'chencaterre' yecamquēñohuen, ñeññña'papa' ama't coñe'tapa' amach es sherberrye. Tarro'mar ama eñalle ḡo'ḡoñ ñeññ atarr sherbets, añña atarr nanac sherbets ñeññcha' a'queshpaterre' yecamquēñ.

³⁷Tarro'mar yocoppa' ama es eñalle ñeññcha' yepomuerr alloch alla yerañterra yecamquēñ.

³⁸Tarraña ñerra'm erra'tsencha' nepenquēnaya na te', neñoñpa'ḡho'ña ḡha apencochen entennanet, napa'ḡho'ña nepenca'huerranetcha' esempoch nohuerra. Shonte' acheñenesha' ñeññ corra'yetsa te' arr patsro ñetña'papa' atarr ochñañeneshet tarro'mar ñetpa' ḡo'ḡoña ḡo'yomporer ḡa'yenet. Tarraña ñerra'm esesha'ch puepenquēñotetan na amach a'metenneto all, ñeññña acheñerpa' napa'ḡho'ña ḡhach nepenca'huera ñerra'm esempoch nohuerra. ḡo'ñoch napa' Ñeññen Acheñetosetspa' nohuerrach e'ñe Nompḡo'cohuenñot epan ñaña ḡo'millañoteññaneshar ñeññ e'ñe torra'yetsa Partso-cop.

9

¹Allempoña Jesús'papa' alla otterraneterr:

—ḡo'ñochca'ye te'pa' o'ch notas, patanta'ttsos ñeññes arro'tsa'yenes te'ña ama't ama serromhuena'pa' o'ch senterrñañ Yompḡo'cohuenña atto atarrcha' ayochreshatterra ña e'ñe ḡo'huamencoḡ.

Allempo Jesús'papa' ḡo'ḡoñetañḡsana pueyochresha'
(Mt. 17.1-13; Lc. 9.28-36)

²Allempo pechapmaterrerr, Jesúsña'papa' ahuanerranerr pueyochresha'; añ anem Pedro ñaña Jacobo ñaña Juan. Ñetpa' arr anmanet atarr aspeno e'ñe ñaḡochayet all aspeno. Allña Jesús'papa' machayote'papa'tcha' e'ñe ḡo'ḡoñetañḡsosanet.

³ Pa'shtampa' čha popta atarr nanac huallama't. Arr patsropa' ama eñalle alloch ya'huallama'ttat yeshtam atet ñerra'm ña pa'shtam atarr huallama'to poptena.

⁴ Allñapa' machayo'tepa'tcha' orrtanet Elías ñaña Moisés. Ñetñapa' alla serrpare'toset epuet Jesús.

⁵ Pedroña eñoratsapa' atet otan Jesús:

—Atarruaca'ye Maestrocha' cohueno'tseneyte' arr. Ama't pocte' penteñe yapa' o'ch ya'tomatonas ma'ppahua quërpachet, puepahuarrpa' p'ocopcha' po'ppahueñpa' Moisésocopcha', po'ppahueñpa' Elíasocopcha'.

⁶ Ñehua, Pedroña pueyorño't atta muene' otatse't, ama eñoche erro'tencha' ot.

⁷ Allempo eñorena Pedropa' čha orrtosahuet os ñeñ't atarr cohuen poptetsa čhepa'tcha' a'pomam'psosanet. Cha e'morrtostsa ñoñets osot; ñeñ'tña ñoñetspa' Yompor otosahuet; ñeñ'tpa' atet ot:

—Añmapa' ñeñ't no Nechemer ñeñ't atarr nemuerena, ñeñ'tcha'ña e'ñe cohuen se'mñoterr.

⁸ Allempoña o' cohua'yerretpa' arepa'tcha' eseshaye' enterreto, ñap'ta enteret Jesús.

⁹ Allempo ona'cherret aspentot Jesúsñapa' atet otnerranet:

—Te'pa' amach esesha' sota'psa'tatsto ama't e'ñe puesheñarra ñeñ't atet o' sentua. Tarremphuach allempoch netanterra na rromot na Ñeñ'ten Acheñetosets, allempochña seserrpare'taterña allohuen acheñenesha'.

¹⁰ Ñetña atet otanet Jesúsapa' atet'cho' pet, ama a'meteññañeto po'ñoñ. Tarraña ñetñapa' atta a'p'to'tanna'tyesnerret:

—Ta'm ¿es'e'ña oteneña Jesús o'ch tanterra rromot?

¹¹ Allempoña pueyochresha' atet otnerranet:

—¿Eso'mare'tña oteneña ñeñ't atarr etsotene' ñoñets ñeñ't atet anaret, Elíaso'ch ñanom huerrtsa?

¹² Ñañaapa' atet otnerraneterr:

—Elías po'ño'chpa' ñachca'yeña huerrtsa ñanom, ñapa' e'ñechca'ye a'cohuentatuer ora allohuen. Tarraña sapa' ama't señotenoña ñaña ñeñ't atet anaret quellco e'ñe nocop. Ñeñ't allpa' atet'ca' oten na Ñeñ'ten Acheñetosets atarrcha' na'muero'chtataretterra, atarrcha' tsena'terrnet.

¹³ Tarraña napa' o'ch notas, Elíasapa' o'ca'ye huaphuerrañ arr, ñeñ'tapa' čhaña erro'tuanen p'apueret ñeñ't atet muena'yenet ñet. Attoca'yeña etsoter-raña ñaña ñeñ't atet anaret quellco ñocop.

*Atto Jesúsapa' a'crraterran cheshachor ñeñ't otaten oneñ't
(Mt. 17.14-21; Lc. 9.37-43)*

¹⁴ Allempoña čha'cherret allo'tsa'yen pueyochresha' allñapa' alla entuereterr shonte' acheñenesha' ñeñ't emchorrenaya po'potantañ pueyochresha'. Ñeñ'tña etsotayenayeñ ñoñets ñeñ't atet anaretpa' alla entuerraneterr all es otnare'teññañet pueyochresha'.

¹⁵ Allempoña entapuer allohuen acheñenesha'pa' čha atarr cohuanrrorta-pueret, matrra'tet ñeshopa' huom'cha'tapueret.

¹⁶ Jesúsñapa' allenta otuerranet:

—Sapa' ¿erro'tena'tña sotanna'tyena?

¹⁷ Puesheñarrña ñeñ't allo'tsenpa' ñañaapa' atet ota'p:

—Maestrocha' napa' o'ca'ye nohuapatonapeñña nechemer, čhaca'ye chorreña oneñ't čha opanatateñ.

18 Ñerra'm erroteno rremueñpa' chachca'ye ata'tateñ patso, chach amtan pa'po'pa' o'ch rraso'tan pa's, o'ch e'ñe echarra. O' notuosnañña peyochresha' o'ch quechpateret oneñeñ ñesho'pa' tarraña ñetpa' amaca'ye eshcaye' quechpateñeto.

19 Jesúsñapa' atet otanet:

—Sa ñeñtes acheñres ama't mameshapa' ama ayemtenaye' sentpenno. O' allponmatuanen allo'tsenen arr patsro, napa' atfa atarr na'huantennas, atfa necuenes ñato' atfo'pa' o'ch same'ñerna.

Allempoñapa' atet otanet:

—Ama'tpa' sanmonca'ye chesha' arr.

20 Allempoña anmoñet chesha'pa' oneñeñña' entosan Jesús'pa' chepa'tcha' otatosanña chesha'pa' alla ata patso, cha pomero'ta, amtan ñaña pa'po'.

21 Jesúsñapa' allenta otoñ pompor:

—¿Esempoteñe'tña atet perra?

Ñaña'pa' atet och:

—Cheshoteñca'ye atet perra.

22 O'te' epaye' ata'tater ama't tso ama't ñaña oño attoch muetsereñ. Paña te'pa' ñerra'm erroteno'pa' e'ñe pemuereño' pebensañpsaye'cherrnan nechemer allochñapa' attoch metuer atto muero'chtana.

23 Jesúsñapa' atet och:

—Ñerra'm na peyemtena amaca'ye eñalleña ñeñt torrapo' añecop ñeñt e'ñe neyemtenaya na.

24 Allempoña ñeñt pompor pen chesha'pa' rranapa' atet otererr:

—Napa' neyemtenpañca'ye, te'ñapa' peyenpa'n Ayochreshate attoch neyemterpa e'ñe poctacma.

25 Allempoña Jesús'pa' entapan shonte' acheñenesha' ñeñt matachetsa ñeshoneñ, ñaña'pa' allenta otan oneñeñ:

—Pa oneñete, opanatatañe'p, a'paquetatañe'p, te'ñapa' o'ch nota'p: Pequechpa'ner cheshachor e'ñe tayecma, ama't errponaña amach alla pechorere'te.

26 E'ñe otue' atet oneñeñña' chepa'tcha' rrana'nmata, alla otatnerranerr cheshachorpa' cho quechpa'nmue' o' ahuerr.

Cheshachorpa' ama pelleno cha otta ñerra'mrrate' o' rroma. Acheñenesha'ñapa' atet otyes:

—Po'ño'ch te'pa' o'ca'ye rroma.

27 Jesúsñapa' allenta chete' pototpa' o' tantach, chesha'ñapa' cha terrets e'ñe cohuen.

28 Allempoña Jesús'pa' ahuerr pueyochreshohuen, o' be'toscha'tuerret pocollo, allpa' e'ñe ñaptochayet, pueyochresha'ñapa' allenta otueret Jesús:

—Yapa' ¿eso'mare'tña ama eshcaye' yequechpatatereña oneñeñ?

29 Ñaña'pa' atet otanet:

—Ñeñt atet oneñe'pa' amach erroteno' yequechpatatereña e'ñe atfa. Chochña yema'yochena ñaña yema'yochreño' ama't yerrarpa' o'ch yequechpue' mame'. Atto'cha'ña yequechpatatereña oneñeñ ñeñt atet.

Jesús'pa' eñotaterraneterr puepocheño ñapa' chocmach muetseret

(Mt. 17.22-23; Lc. 9.43-45)

30 Ahuanerretterr allotpa' arr oñemhuanerret Galileo'mar. Jesúsñapa' mueneñeñ a'nahuoto'ch metañ

31 tarro'mar ñapa' mueneñ o'ch yechatnoman pueyochresha'. Ñeñt'pa' atet otnomanet:

—Na Ñeñten Acheñetosetspa' pomataterntetcha' attochña erroñuanencha' perrnet. Atteñapa' o'ch muetsataterntet ñarraña poma'pamtañoñapa' o'ch alla netanterra.

³² Ñeñña ñoñets ñetñapa' ama't puesheñarroñetapa' ama eseshaye' eñotenaye' enteñeto ñeñto'marña ama a'p'to'tenaye' enteñeto.

All eñotateney ñeññ acheñer e'ñe po'ñoñch atarr asherben enteñ Yompor
(Mt. 18.1-5; Lc. 9.46-48)

³³ Allempoña čhača'tet ñaña Capernaumo. Allempoña čhapuet pocollo Jesúsñapa' otanet:

—Sapa', ¿eso't sotanna'tyesnenaña ñorra' toño?

³⁴ Ñetñapa' ama eseshaye' anapuenaye' entaye ñarro'mar ñetpa' añca'ye otanna'tyesnenetña toño:

—Yapa' erra'tsenoteyte'ñaca'yeña ñeñtey atarr sherbets, ñeñtey atarr añcha'taretoyen enteney acheñenesha'.

³⁵ Jesúsñapa' all anorrospa' allenta chore'tan allohuen pueyochreshačnopa' atet otanet:

—Ñerra'm erra'tsenotes ñeñtes atarr añcha'taretoyen entetsañ, ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeññ atet pena ñeññ atta atarr taruaset po'potantañecop, ama't ñaña allohuenacop.

³⁶ Jesúsñapa' cheshatolla chore'tpa' tomach e'ñe alla, allenta enachpa' atet otanet:

³⁷ —Erra'tsenotes sa ñerra'm e'ñe cohuen saguëñ ama't ñeññ ama asherbenaye' entyeneto atet ñerra'm añ cheshatoll ñarro'mar sapa' na same'ñena, na'ña e'ñe cohuen saguëñ. Elloña ñaña erra'tsenotes sa ñeñtes naguëne' na, ama e'ñe naptocheye' saguëno, añe'ña saguënnan Nompör ñeññ nellensene'.

Atto eñotateney ñeññ ama čhoye' yepatare'tenaye ñeñña po'ñoñchpa' e'ñe parrocma yeyenpanna
(Lc. 9.49-50; Mt. 10.42)

³⁸ Allempoña pueyochresha' ñeññ Juanpa' atet otan Jesús:

—Maestro, ya ahuañapa' atet yeñch puesheñarr yacma ñeññ quečhpateñe' oneñeñ. E'ñe pueçhore'teñoťeř pa peso'chñopa' quečhpateñe' oneñeñ. Yañapa' ama pocteye' yeñche ñarro'mar ñapa' ama parroye' yeyemteno. Ñeñto'marña yapa' atet yoch:

—Amach atet peřatsto.

³⁹ Jesúsñapa' atet ot:

—Sapa' amachca'ye sepatare'tatsche ñarro'mar ñerra'm erra'tsencha' orrtate' partsoteñets e'ñe na neso'chño, ñeñña acheñer tsapatoneřpa' amachca'ye muenere alla o'ch achñare'terren.

⁴⁰ Ñaña ñerra'm ama čho epatare'tenye yaña, ñeñña po'ñoñchpa' e'ñeca'ye parrocma yeyenpanna.

⁴¹ Po'ñoñchca'ye notenes: Ama't erra'tsena acheñer ñeññcha' sapue' ama't coñe'ta oñ ñarro'mar sapa' e'ñe na neyochresha' nepenes, ñeñña acheñerpa' čhocmach atsa'tare'terra ñeññcha' atarr coshaterre' ña.

Atto čhocmach huaponaya ñeññcha' yetpatyene' o'ch atet řatyeseñ ñeññ ama pocteye' enteno Yompor
(Mt. 18.6-9; Lc. 17.1-2)

⁴² 'Ama't erra'tsena ñeññ ama pommo'cheñoťeye' ame'ñenno atet ñerra'm cheshatoll ñeññ ama eñotenana' o'ch ommo'chena, ñarraña ñerra'm esha'ña po'psheñeñ o'ch atet řatach ñeññ ama pocteye' enteno Yompor,

ñeñña acheñerpa' atarrcha' yorocheno'tsen tarro'mar ñapa' aña o'patenaya coñcheñets ñeññ atarr huomenc. Ama't ñocoppa' ama tama yorochenayayñe ñerra'm ama atet p'atenana' po'psheñeñ, e'ñech allorocma çharachetañ mapue' añecmuen pa'çhnoþo allpon ñerra'm puetse'tamets o'ch huapore'chet oño epo allcha' ño'shach mapue'.

43-48 Ñaña o'ch noterrser: Ñerra'm sechets p'atyenes ñeññ ama pocteye' enteno Yompor atet ñerra'm sot, setac, seclle', añ poctetsa o'ch sequeçhpuerr ñeññ çhocma atet p'atse'tatyenes sechets. Ñeñña' e'ñe atet ñerra'mrrate' e'ñe allorocma o' sepecherr sot, setac, o' serroterr seclle', o'ch sehua-pore'ter. Añ cohuen socop ama't e'ñe sepo'yotateñoñ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch seçherr coñcha'puetso all parraren tso' ñeññ ama emaya'pahuoyaye. Allpa' ama't pueñmochapa' ama rromueno; tso'pa'çho'ña ñeññ allo'tsenpa' ama amayaño ama't errponaña. Ñaña añ cohuen socop ama't e'ñe setco'tpa' sepsheñtatquëñoñ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeññ ama emaya'pahuoyaye. Allpa' ama't pueñmochapa' ama rromueno; tso'pa'çho'ña ñeññ allo'tsenpa' ama amayaño ama't errponaña. Ñaña añ cohuen socop ama't seclloyo't sepsheñtaçclo'yeñoñ o'ch seçherr all añcha'tarettena Yompor. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'. Allpa' ama't pueñmochapa' ama rromueno; tso'pa'çho'ña ñeññ allo'tsenpa' ama amayaño ama't errponaña.

49 Ñeñña Jesúsapa' atet toma'ntaterraneterr:

—Allohuen ñeñña' cohuenterrtsapa' añcha'ca'ye a'cohuentatene' tso'; ñaña allohuen ayarraçhno ñeññ amsarettsa Yomporecoppa' añca'yeña a'cohuentatene' pos.

50 Ñehua, yapa' yeñoteñ pospa' atarr cohuen sherbeney. Tarraña ñerra'm posña po'poserrteña huañerretspa' yapa' amate' erro't yepe o'ch alla ya'poserrtater attoch alla sherberrey. Sapa' e'ñepa'çhña cohuen se-sherbanena e'ñech ates ñerra'm pospa' atarrcha' sherbeney. Attochña e'ñe cohuen sentannena e'ñech muechet seyçha'yena.

10

Atto Jesúsapa' yeçhatosanet ama asanna'tpahuoyaye

(Mt. 19.1-12; Lc. 16.18)

1 Allempoña Jesúsapa' err Capernaumo'tpa' ahuerr anetso Judeo ñaña arre'na sen Jordanas yom'ta'n. Allña'papa' alla shonerrñañerr acheñenesha', ñaña'papa' yeçhaterraneterr Yompor po'ñoñ ñeññ çhocma attecma penanet.

2 Allña'papa' o' alla huacherrñañerr ñaña fariseonesha'. Ñetña'papa' aña atarr e'nenet e'ñe puehquëño'tet po'ñoño'tetpa' o'ch eñorachet ñeññ ama cohue-nayaye. Ñeñño'marña ñetpa' atet otoset:

—Ta'm çpocte'te' o'ch yeser yetapor?

3 Ñaña'papa' atet otapanet:

—Sapa' çama't seño'tenoña Moisés po'ñoñ ñeññ atet nonase't?

4 Ñetña'papa' atet ochet:

—Moisés po'ñoñpa' atetca'ye oten, çhoch yequellcoñ yetapor papell ñeñña'papa' yaþ allempochña yeser.

5 Jesúsña'papa' atet otanet:

—Tarraña sa seyočhropa' čhocmaca'ye po'poñ sentuena ñeñto'marca'yeña Moiséspa' atet quellconase't attoch sese' setapor.

⁶ Ama't atet muenataseña'p' tarraña Yomporpa' e'ñe ahuaťoteñ allempoteñ es yečhcatyes "allempo yečhcatan ñaña asheñorr, yečhcatan ñaña peno."

⁷ Allempo Yomporpa' atet ot: "Ñeñto'marña yacmapa' ñerra'm esempoch sena'ta, coyanesha'pa' o'ch echan puerrollar; añ pocte' o'huañcha' tama yemteñet pamo'mte' allochñapa' yacmapa' attochña e'ñe parrocmat epuet puetapor.

⁸ Attoña epsheño'maretpa' e'ñech paťrra po'chets penet." Attoťcha'ña o'huañcha' puesheña'tetstet, allochñapa' o'ch e'ñe puesheñarratet.

⁹ Ñeñť atto Parets e'ñe paťrratatan yacma epuet puetapor amach čha ellopa' alla sannerreto.

¹⁰ Allempo čhačerret pocollo, allña pueyochresha'pa' atet otueret:

—¿Erroťente'ña ñeñť atet p'oten ñorra' año' asanna'tpahuo?

¹¹ Ñaña'pa' oterraneterr:

—Ñerra'm esesha' serre' puetapor o'ch alla yorerran po'psheñeñ ñeñťcha' puetapor perr, ñeñťña yacmarpa' čhachca'ye ochña'tam'perrana puetaporeshe'mañ. Ñeñťpa' ama pocteye' enteñe Yompor.

¹² Ñaña coyanesha' ñerra'm serran puerrollar o'ch yorer po'psheñeñ yacma ñeñťcha' puerrollar perr, ñeñťña coyanesharpa' čhachca'ye ochña'tam'perrana ñaña puerrollareshe'mañ. Ñeñťpa'cho'ña ama't mameshapa' ama pocteye' enteñe Yompor.

*Atto Jesús'pa' bensare'tam'psapan cheshanesha' ñeñť huapatoñet
(Mt. 19.13-15; Lc. 18.15-17)*

¹³ Allempoña'pa' huačha'tachet ñaña shonte' cheshatollesha' Jesúsesho. Ñetpa' añecopña huačha'tachet o'ch a'p'lla'yesapanet Jesús. Jesúsña pueyochresha' allempo entapan ñeñť huačha'tate' cheshaneshačhno ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnatareťtapueto.

¹⁴ Tarraña Jesúsña allempo entan pueyochresha' čha epatare'tapan cheshatollesha', ñaña'pa' ama't mameshapa' ama pocteye' entaneto. Ñaña'pa' atet otanet:

—Pocte'ñačho' semnachñaca'yeña cheshanesha' onosetepa' e'ñe nesho. Amachca'ye čha sepatare'tatstapaneto tarro'mar allohuen ñeñť atarr neyemtenaya na atet ñerra'mrrate' cheshatoll, ñetcha' o'patenetña Yompor po'cohuenña ñeñť atto ayochreshaťtena ña.

¹⁵ Po'ñočhpa' o'ch notas, ñerra'm esesha' ama e'ñeye' pueyemteñoťeye' aguěññañeto Yompor po'cohuenña amach atet perreto ñerra'm cheshatoll e'ñech yemtenana ñeñť cohuan'pene', ñetñapa' amach o'patenetoña Yompor po'cohuenña atto atarr ayochreshaťtena ña.

¹⁶ Allempoña Jesús'pa' a'čhono'tyesapan cheshanesha'pa' allña a'p'lla'yesapanetña e'ñe ña potot'attoña bensare'tam'psapanet.

Atto puesheñarr ñeñť huepueshameñ ñeñť atarr ečllayoret ñaña'pa' eñorana'tosana Jesús

(Mt. 19.16-30; Lc. 18.18-30)

¹⁷ Allempoña Jesús'pa' o'ch ahuenñerr allenet sechena. Allentepa'tcha' huapa'muena puesheñarr yacma e'ñe matenacma huapa. Alla concorpana'tosana Jesús'pa' atet otos:

—Maestro, p̄apa' atarr cohuen acheñreḗ, te'pa' o'ch p̄otapuen ḗerroḗena'tcha' nepaña na ñeñḗ e'ñe cohuen attochña napa' corretsanach e'ñe tayoteñ ama't errponañohuen?

¹⁸ Jesúsña'p̄a' atet̄ otap̄:

Eso'mare't p̄otenenña napa' atarro' cohuen acheñren. Arr arromña'tenesha' ama't e'ñe puesheñarrapa' ama eñalleña ñeñḗ e'ñe cohuen acheñer. Ñapñaña Yompor ñeñḗ e'ñe po'ño'ch cohuen.

¹⁹ Papa' e'ñe peñotuen Yompor po'ñoñ all oteney ñeñḗcha' atet̄ yepena e'ñe cohuen, ñeñḗ atet̄ oteney: “Amach yechtapretyesatsto ḗaporet̄s, amach yemtsanna'tatsto, amach yetyesatsto, amach yetoma'tam̄psatsche yamo'ts e'ñe at̄ta, yeshquēñoḗpa' amach es yeprratam̄psatsche po'psheñeñ, ñaña yemorrenteñoḗpa' yenḗcha'na'chcha' yompor ñaña yachor.”

²⁰ Ñeñḗña a'p̄to'tene'pa' atet̄ otererr:

—Maestrocha' napa' e'ñeca'ye cheshoteñ ora añechnopa' e'ñeca'ye net-sotueñ.

²¹ Jesúsña e'ñe puemorrenteñoḗ cohue'pa' atet̄ otererr:

—Eñallmeñca'ye paterr ñeñḗ pepalltena ñeñḗ ama at̄teye' pepeno. Te'pa' añcha'ña atet̄ peḗa o'ch ahuerreḗ o'ch pepomhuerr ora allpon ñeñḗ pechyen o'ch p̄apa'yera' huocchañneshachno ñeñḗ atarr es pallta'yetsa, attochña p̄apa' pecherrcha' ñeñḗ atarr nanac sherbets Yompor pue'ntañ. Allempochña pehuerrapa' o'ch p̄octerren attoch e'ñe neyochresha' nepperreḗ e'ñe p̄octacma.

²² O'ña e'mhuan ñeñḗ atet̄ och Jesús'pa' ñaña'pa' cha atarr nanac lleca tarro'mar ñapa' shonte' esocmañen echyen. Ñeñḗto'marña e'ñe puellquēñesha' ahuerr.

²³ Allempoña Jesús'pa' cohua'yesanetpa' atet̄ otan pueyochresha':

—Ñeñḗ atarr ec̄llayoreḗpa' atarrca'ye nanac echarr attoch agapoñet Yompor po'cohuenña ñeñḗ atto ayochreshattena ña.

²⁴ Pueyochresha'ña'pa' cha muene'yore'tanet ñeñḗ atet̄ otenanet. Jesúsña'p̄a' alla oterraneterr:

—Nechemerneshacha' o'ch notas: Añ acheñer ñeñḗ añach e'ñe yemtena ñeñḗ allpon echyen arr patsro ñeñḗña acheñerpa' atarrca'ye nanac echarr o'ch agapoñet Yompor po'cohuenña ñeñḗ atto ayochreshattena ña.

²⁵ Ñehua, ñeñḗpa' atet̄cha' netma'ntacha. Po'ño'ch yapa' yeñoteñ berr añecmuen allpon ñerra'm huaquēsh* atarrca'ye torrapo' o'ch esho'tosa añeñollponatollo atet̄ ñerra'mrrate' acosh puetatollo. Ñeñḗpa' atet̄ca'ye penaña acheñ ñeñḗ ec̄llayoreḗ, ello atarr torrapo' o'ch agapan ñaña Yompor po'cohuenña ñeñḗ atto ayochreshattena ña (tarro'mar ñetpa' ama mueneñeto o'ch sehuanmuet ñeñḗ atarr morrentenet ñet attoch pueyochresha' perranetañ Yompor).

²⁶ Pueyochresha'ña allempo e'met Jesús atet̄ oten, ñetña'pa' cha muene' lleca'rrtetpa' atet̄ otanna'tyeset:

—Tarraña ñerra'm atet̄te'pa' amate' esesha' a'queshp̄atareḗterrtso ama't puesheñarra tarro'mar yapa' yeñoteñca'ye huaquēshpa' amaca' esho'tenoña acshequeto.

²⁷ Allempoña Jesús'pa' at̄ta cohua'yesanetpa' atet̄ oterraneterr:

—Sa arromña'teneshaspa' amach es erroḗenaye' apen senteno. Tarraña Yomporpa' ama eñalleña ñocop ñeñḗ atarr torrapo' enten.

²⁸ Allempoña Pedropa' atet̄ och:

* **10:25** Ñehua, Jesús añ toma'ntatanet camello ñeñḗ payara penet all pa'nyo, ñeñḗ e'ñe allpon ñerra'mrrate' huaquēsh.

—Partseshacha' po'ñoçh yapa' o' e'ñe yesuanom ora allohuen attoch e'ñe yocterreḡ.

²⁹ Jesúsñapa' alla oterraneterr:

—Allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ama't pa'mo'nasheñnesha' ñato' po'chanesha' ñato' pompor, pachor ñato' pueḡapor, ñato' pacñeḡar ñato' po'patseñ attochña napa' e'ñech cohuen sherberrnet pueserrpare'teñoḡet cohuen ñoñets alloch a'queshḡatareḡterra acheñenesha',

³⁰ elloña ñetpa' o'ch alla aguḡrret shonte' esocmañen ñeñt atarr cohuen. Ama't allponapa'tets sehuanomyesnomuet, elloña çharroch çcharra'ch alla agapyerret, ama't e'ñe tayoteñ allempo correnet arr patsro—ama't ñeñtcha' pa'pacllaçhno perret ñaña ñeñtcha' pa'mo'nasheñneshaçhno perret, ñaña ñeñtcha' po'chaneshaçhno perret, ñaña ñeñtcha' pachorneshaçhno perret ñaña ñeñtcha' pacñeḡareçhno perret, ñaña ñeñtcha' po'patseñ perret. Tarraña ama'tcha' ateḡ apareḡterretañpa' çhocmach amuroçhtatareḡterret pame'ñeñoḡetan na. Elloña tsapatoneḡña ñetñapa' aguḡrretcha' ñeñt alloch corretsetach beñecpuen pocsheñeshocmañen.

³¹ Te'pa' señocheḡa'ch eñall shonte' acheñ ñeñt ama asherbenaye' senteno sa te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeñt atarr asherben sentyen sa te', tarraña ñetña allem-popa' amach asherbenaye' enterraneto Yompor.

Allempo Jesúsḡa' alla eñotaterraneterr ñapa' çhocmach amtsareḡterra (Mt. 20.17-19; Lc. 18.31-34)

³² Allempo ahuaneneterr ñaña Jerusaléñoneñ, all oñenet toño'mar Jesúsñapa' ña otetsa. Pueyochresha'ñapa' çha toratsetyesnenet pueyoçhret, e'ñe pueñcha'nañoḡa coteñ. Pueyochresha' ñeñt çcharra' puechena epsheña ñeñtñapa' ahuanemñ Jesús ellonet, allñapa' eñotaterraneterr ñeñtcha' huapoya ñocop.

³³ Ñeñtḡa' ateḡ otanet:

—Te'ña po'ñoçhpa' o'ca'ye ahueney Jerusaléño. Allcha' pomataterret na Ñeñten Acheñetosets. Añcha' nerrmuerre' ñeñt pa'mñcha'tareḡternesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt ateḡ anareḡ. Ñetñapa' ateḡcha' otyesnet na'mtsareḡterreḡa'to' o'ch pomuerrnet po'poñ acheñesho ñeñt ama judioneshayaye.

³⁴ Ñetña pueche'tatseteñoḡetanpa' allcha'ña achmāre'terrnet, ashterrnetcha', a'coshare'terrnetcha' attotcha'ña o'ch corso'tamḡperrnet, tarraña poma'pamtañoçh alla netanterra.

Atto Jacobo ñaña Juan ñetpa' enamueñet Jesús attoch anorrçha'tyesuerret ñesho (Mt. 20.20-28)

³⁵ Allempoñapa' ateḡ oteña' Jacobo ñaña Juan ñeñt Zebedeo puechemere-sha' ñeñtḡa' ateḡ otoset:

—Maestrocha' yapa' aña'ye yemnen o'ch ateḡ peḡa'y ñeñtcha' yotaḡ.

³⁶ Ñañaḡa' ateḡ otanet:

—Sapa' çerrotēna'tña semnen ateḡcha' neḡas?

³⁷ Ñetñapa' ateḡ otereterr:

—Yapa' aña'ye yemnen te'pa' o'ch pemnatey o'ch yanorruerr pesho pecohuenño, puesheñarroḡeḡpa' pecohuenrotcha' yanorryesuerr, po'psheñeñpa' pe'chcoḡerotcha' anorruerr allcha' yecohuentapreḡterḡa.

³⁸ Jesúsñapa' ateḡ otanet:

—Sapa' amaca'ye señoteñe ñeñt' po'ño'ch senamuenen. Añca'yeña senamuenen attoch semuero'chtapreterrna samã. Ta'm ¿e'ñe' po'ño'ch pocte' senteñ o'ch semuero'chterra samã tarro'mar napa' chocmach na'muero'chtatare'tterra?

Ñeñt' muero'chteñetspa' Jesús'pa' atet toma'ntatanet ñerra'mrrate' atarr pesherr es yorren orranitso ñaña atto yapatare'ttena e'ñe atet ñerra'mrrate' cho' ya'mtsare'tterra Yomporecop.

³⁹ Ñetñapa' atet ochet:

—Yapa'cho'ña atetcha'ca'ye ye'pa.

Ñaña'pa' alla oterraneterr:

—Ñehua, po'ño'chpa' sa'muero'chtatare'tterrach samã attescha' ñerra'm na, sa'mtsare'tterrach samã.

⁴⁰ Tarraña añña attoch sanorryesuerr nesho necohuenrot ñaña ne'chco'tero't allcha' secohuentapreterrna ñeñt'pa' amaca'ye naye' semnatenaye. Añcha'ña anorryesuerrrets all ñeñt' e'ñe o'patatenna Nompore.

⁴¹ Añña po'potantañ pueyochresha' ñeñt' charrasheña allempo e'met ñeñt' atet enamuen Jacobo epuet pa'mo'nasheñ Juan, ñetñapa' ama pocteye' eñcheto cha muene' e'moñe'chet.

⁴² Allempoña Jesús'pa' alla chore'terranet allohuenet ñesho ñeñt'pa' atet otanet:

—Sapa' señoteñe' ñeñt' atet pena po'poñ acheñenesha' ñeñt' ama judione-shayaye. Ñet ñeñt' pa'mcha'tare'ter penet e'ñech pa'mcha'no'chteñocmañen pomnaren pa'yenan allohuen pueyochresha'chno.

⁴³ Sapa' arepa'chña atteye' se'panna'tatsto e'ñe sommo'cheño't. Socoppa' añña poctetsa. Ñerra'm erra'tsenotes atarr amcha'tare'toyen entetsañ ñeñtes acheñes socoppa' añ poctetsa o'ch atet senterra ñerra'm ama es-oshe'mayayso ñeñt' atet pena ñeñt' atta atarr taruasets po'potantañecop.

⁴⁴ Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñespa' añ poctetsa o'ch atet senterra ñerra'm ama es-oyayso allochñapa' attochña e'ñech cohuen setorrena po'potantañecop ama't ñaña allohuenacop atet ñerra'mrrate' acheñ ñeñt' atarr taruasets e'ñe atta.

⁴⁵ Atet ñerra'm na Ñeñten Acheñetosets, napa' ama añecpaye' nehuapo añe patsro allochñapa' sapa' o'ch atta atarr sesher'pauen na atet ñerra'mrrate' napa' atarr amcha'tare't sentenen. Napa' añecopña nehuapa allochñapa' nachña sesher'bose'ña sa, ñeñto'marña napa' naña pomostsa nañeña o'ch nerromos socop attochña netsa'tuerrnasa so'chñar ñeñtes shontes pa'namen acheñes. Attochña sapa' amach sañeña rromatso so'chñarecop.

Allempo Jesús'pa' a'crraterran puesheñarr aporo'yet ñeñt'pa' añ pa'so'cheñ Bartimeo

(Mt. 20.29-34; Lc. 18.35-43)

⁴⁶ Allempoñapa' o' cha'cha'tet Jericó. Allempo meterrerr Jericó't epuet pueyochresha' ñaña shonte' acheñenesha' e'ñe allpona serre'terrpa' allña e'ñe toñeto'pñopa' ahuepa't anorros puesheñarr aporo'yet ñeñt' chocma enam-are'tets quelle. Ñeñt'pa' añ pa'so'cheñ Bartimeo ñeñt'pa' Timeo puechemer.

⁴⁷ Ñaña'pa' eñotatoset añ huetsa Jesús ñeñt' nazareto'marnesha'. Ñeñña aporo'yetpa' allenta rranare'ch atet otapan Jesús:

—¡Pemuera'ychnomna Jesús'ocha' naña! Papa' ñeñte'p Davidna'tare'p.

⁴⁸ Acheñenesha'ñapa' cha muene' che'ptare'tnometña aporo'yetpa' atet otaset:

—O'hua pemma.

Aporo'yetñapa' ello alla rranare'terrerr atet oterrrerr:

—¡Pemueraye'chnomnañaca'ye Ayochreshate! Papa' ñeñteř Davidna'tareř.

⁴⁹ Jesúsñapa' alla tomos atet otosan acheñenesha':

—Seçhore'chñaca'ye onepa' arr.

Ñetña çhore'chet aporo'yetpa' atet ochet:

—Te'pa' çhořa cosherrtsa, ñapa' o'ca'ye agotoseř. Petantnoma e'ñe tayecma.

⁵⁰ E'ñe atet otuetpa' çha tantatsa çha a'meyanmue' allo ca'mařna'tenapa' allenta ahuo' Jesúsesho.

⁵¹ Jesúsñapa' atet otař:

—Papa' ¿eso'tña pemnen ñeñtcha' atet neřoseř?

Aporo'yetñapa' atet och:

—Añca'ye Maestro nemnen o'ch pecuatnomuen attoch o'ch cohuen nenter-rapa.

⁵² Jesúsñapa' alla otererr:

—Te'pa' ahuerreř e'ñe peñmañesha' tarro'mar atto atarr peyemtapna na ñeñtca'yeña o' e'ñe a'crraterreř.

E'ñepa'tcha' allorocma e'ñe cohuen enterra. E'ñe cohuerrtsapa' çha cota'nmue' ñaña Jesús allenet sen.

11

Allempo çhap Jesús Jerusaléño

(Mt. 21.1-11; Lc. 19.28-40; Jn. 12.12-19)

¹ Atteñapa' o' çhaçha'tet allame'tets Jerusaléño. Chapuet aspeno ñeñt pa'so'cheñ Olivopen. Allñapa' allo'tsen anets ñeñtapa' añ pa'so'cheñ Betfagé, po'poñpa'çho' allo'tsen anets ñeñtapa' añ pa'so'cheñ Betania. O'ña çhappochet all anetso,

² Jesúsñapa' atet otnoman epsheña pueyochresha':

—Sapa' o'ch sota o'ch seçhap a'yenteye' e'ñe allara anetso. Allñapa' allcha' sentos ashen rre'ptor all huanquëñet; ñeñtapa' ama't puesheñarra acheñ amaca'ye monteña'. Ñeñtña ashenpa' o'ch sepyamřsospa' o'ch sanerrnan.

³ Ñerra'm esesha' sotapue': "¿Eso'mare't sepyamřpenña ashen?" sañapa' atetcha' sotosanet: "Yepartsesharca'ye muenene'ña añ ashen. Mameshapa' o'ch alla apuerrsa'."

⁴ Allempoña ñetpa' allenta ahuanmuet. O'ña çhappuet anetsopa' all entoset ashen ehuanca'ret e'ñe opellromta'note'tsen all ten e'ñe toñoř. Ñetñapa' pueyamřsuset.

⁵ Allempoña puesheña'tets ñeñt tomçha'tyets allpa' atet otapanet:

—¿Eso't sottenña arr? ¿Eso'mare'tcha' sepyamřsosña ashen?

⁶ Ñetña atet otapanet Jesúsapa' atetçho' otoset. Allempoñapa' atet otarettet:

—Ñeñteřpa' sanerca'ye.

⁷ Allempoñapa' allenta anerretña ashen Jesúsesho. Nohuerret pa'shtam ashnache'ño'pa' Jesúsñapa' allenta monta'nmana ashen.

⁸ Shonte' acheñenesha' ñetñapa' totma'tyesoñet pa'shtam toño allcha' oñem Jesús. Po'potantañeçhnoñapa' tsormo're'tyeset tsach pue'mo'rer allo topanetyeset toñ.

⁹ Allohuen acheñenesha' ñeñt otachetsa ñaña ñeñt cota'huanene' chenta' ñetñapa' puerrannarteño'tetpa' atet atarr cohuentatyesneññañetpa' atet otenet:

—¡Acsherrapo'ch allohuene'y! ¡Aye'choçtaterrapo'ch Jesús ñeñt llesensen Yompor!

¹⁰ ¡Aye'chochtaterrapo'ch Jesús ñeñtcha' amcha'tarettertsa! Te'pa' o'ca' huerraña yatañ David pa'mcha'taretteña. ¡Aye'chochtaterrapo'ch ñaña Yompor Parets ñeñt pue'ntañotsen!

¹¹ Atteñapa' chap Jesús Jerusaléño'pa' allenta ahuos Parets pa'paclo, all be'tosos, cohua'yesosan ora allohuen ñeñt allo'tsa'yen. Cohua'yesueña'pa' o' cha'nerrpa' ahuo' anetso Betanio allohuen pueyochreshohuen ñeñt charra' puechena epsheña tarro'mar allempopa' o'ca'ye ellerren.

Allempo Jesús'pa' eñora higohecop amach eñalletatsto pue'mer
(Mt. 21.18-19)

¹² Tsapat allempo onacha'ta'muenet Betanio't, Jesúsñapa' cheporra'nma.

¹³ All oñenet Jesúsñapa' a'yoteñ entosan higoch ñeñt taya o' asopanre'terr. Ñaña'pa' allenta ponemya o'ch enteña' ñato' e'merette'. O'ña chap allame'tetspa' pasopanrepa'tcha' entosñañ tarro'mar ama chena' allempo me'ten.

¹⁴ Jesúsña chepa'tcha' eñorotsa higohecop, ñeñt'pa' atet otos:

—Ama't errponañapa' amuepa'ch esesha' tsomuerraye añ higoch pue'mer. Pueyochresha'ñapa' e'ñe e'mueñet atet eños higohecop.

Atto Jesús'pa' a'cohuentatosan Parets pa'paquëll
(Mt. 21.12-17; Lc. 19.45-48; Jn. 2.13-22)

¹⁵ Allempo entuanman Jesús higoch allempoñapa' o' alla cha'cheneterr Jerusaléño. Jesúsñapa' be'tosuener Parets pa'paclo, allñapa' allentepa'tcha' mueño'tuosan allohuen ñeñt pomatsre'tetsa all ñaña allohuen ñeñt raña'yetsa. E'ñe cha'nma'cha'tatosanet allot, a'coye'tam'psosanet po'mesachno allecma camyatyenet po'çllayoret, a'coye'tuosan ñaña allecma anorryen ñeñt pomuene' yepe'chno.

¹⁶ Allempo Jesús'pa' ama't puesheñarroña ama muenaterraneto o'ch es oñmatet all Parets pa'paclo'mar.

¹⁷ Allempoña ye'chatosanetpa' ñapa' atet otosanet:

—Yompor po'ñoñ ñeñt atet anuaret ahuatoteñ allñapa' atetca'ye oten Yompor: “Añ ñeñt nepaquëll nepenpa' añe'paca'yeña sherben allecmach ma'yochennet ama't allohuen pa'namen acheñenesha'.” Tarraña sañapa' e'ñe atet sepeññañña Yompor pa'paquëll ñerra'mrrate' eñeñ ñeñt e'potyetsa mapuetpono.

¹⁸ Añña ñeñt pa'mcha'tare'ternesha' pen allohuen judionesha' po'cornaneshar ñaña añ ñeñt atarr etsotayenayeñ ñoñets ñeñt atet anaret, ñetñapa' allempo atet e'mare'tetpa' Jesús'pa'tcha' atarr o'patet o'ch muetsatachet. Tarraña allempopa' ama erro't peto cha mecha'na'chet tarro'mar allohuen acheñenesha'pa' atarrca'ye cosheññañet ñeñt atet ye'chatenanet, nanac cohuen enteñet.

¹⁹ Allempoña o' ellerrenpa' onacheneterr Jerusaléño'tpa' ahuaneneterr Betanio.

Arrpa' atto entuerret higoch o' e'ñe hueya'hua
(Mt. 21.20-22)

²⁰ Tsapatña ahuatecma alla oñma'mueneterr allo'tsen higoch. Entueneterpa' o' e'ñe hueya'huenaña higoch e'ñe puer'chohuen.

²¹ Allempoña Pedro allenta yerpana atet eños ellerro Jesús higohecop, ñaña'pa' allenta otosan Jesús:

—Maestro, pecua' añ higoch ñeñt potnom ellerro ama't esesha'pa' amach tsomuerrñañeto pue'mer, te'ñapa' o' hueya'hua.

²² Jesúsñapa' atet otnomanet:

—Sapa'cho'ña e'ñeñaca'yeña seyemteraña Yompor.

²³ Po'ñoçhca' na te'pa' o'ch notas: Ñerra'm ama çhoye' se'charrtateno seyoçher, ñerra'm po'ñoçh e'ñe seyemteña Yompor, ñachca'yeña atet pene'ña ñerra'm erroten es soten. Añe'nachña e'ñe setsoten ñeñt ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspentecop "Añ aspenetpa' rrote'tepa'ch arrot, arrepa'chña esha'toso sa'po allcha' chencosa", aspenetñapa' atetcha'cho' ñonasa.

²⁴ Ama't allohuen erra'tsencha' es senam sema'yocheñoť, ñerra'm çho senam e'ñe seyemteñocmañen, ñeñtñapa' sagařcha'.

²⁵ Ñaña te'pa' o'ch notnomues: Ñerra'm sema'yocheñoť çho saten ñerra'm çho se'moñe'teñ po'psheñeñ çhosach peretnerre' seyoçhro allorocma, allochñapa' Sompör ñeñt ento'tsen peretnerrnascha' samña ñeñt atet seřatse'tyen ñeñt ama pocteye' enteno ña.

²⁶ Tarro'mar ñerra'm ama seřretnannenopa' Sompörpa'cho'ña ñeñt ento'tsen amach peretnerrnaso samña ñeñt atet seřatse'tyen ñeñt ama pocteye' enteno ña.

Atto allsensare'ttena Jesús

(Mt. 21.23-27; Lc. 20.1-8)

²⁷ Allempoñapa' alla çhaçha'ta'mueneterr Jerusaléño. Jesúsñapa' all chopeñe'chen Parets pa'paclo. Allñapa' huaçha'toña ñaña shonte' amçha'taretnesha' ñeñt pa'mçha'taretnesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anaret ñaña po'potantañ ñeñt pompornesha' pa'yen allohuen judionesha'.

²⁸ Ñetñapa' atet otoset Jesús:

—Ñehua, yapa' añecop yehuena yemneñ o'ch řotey ¿erroťe't apuenpetña llesens? ¿Esesha'tña řapauene'ña llesens attot řorrtatyenña ñeñt çhocma attecma peřa'yena?

²⁹ Jesúsñapa' atet otapanet:

—Ñehua, napa'cho'ña nemneñ o'ch na'řto'tapas samña ama't pařra ñoñets. Ñerra'm sanaposencha'pa' napa'cho'ña attochña notapas namña allot apuenetña llesens ñeñto'marña atet nepena.

³⁰ Sapa'cho'ña o'ch sotosen ñeñt atet soctape'chen sa, ahuañmo'cha allempo apate't Juanañ Yomporecop, ñapa' ¿eseshatña llesense' ñato' Yompor amapa' acheñaite' apue'ña llesens? Nemnen o'ch sotosen ñeñt atet soctape'chen sa.

³¹ Ñetñapa' e'ñe a'nahua otanna'tyeset:

—Ta'm erroťcha'ca'ye yochte'. Ñerra'm çha yoch Yomporeshoťca'ye apetña llesens, ñapa' çhate'ca'ye otey: "Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'."

³² Elloña amach yotatsche acheñeshoťa apet llesens.

Ñehua, acheñenesha'ñapa' çhate' e'moñe'chet amçha'taretnesha' řarro'mar acheñenesha'pa' e'ñe cohuen eñchete't Juanañ ñeñto'marña çhocma otyeñet ñapa' ñeñtca'yeña po'ñoçh a'mtose' Yompor po'ñoñ.

³³ Ñeñto'marña amçha'taretnesha'pa' atet ochet Jesús:

—Ta'm yapa' amaca'yeña yeñoteñe; erroťte' huapaña Juanañ, erroťte' apetña ñaña llesens.

Allempoña Jesúsapa' atet oterraneterr:

—Napa'cho'ña te'pa' amach notaso samña allot apareten namña attot atet neřa'yena.

12

Atet atma'ntatarettena ñeñt ataruasañechnopa' ama cohuenayaye
(Mt. 21.33-46; Lc. 20.9-19)

¹ Allempoña Jesús pa' alla serrpare'taterranerr acheñenesha' toma'nteñtso, ñeñtpa' atet otanet:

—Eñall puesheñarr acheñ ñeñt nare'tanatatnomue' shonte' uvach; pa'muerñapa' e'ñe ora uvachmatatue. E'ñe concha'tam̄pesue alloñapa' eñan ñaña allcha' a'pecho'toñet uva po'ñer. Allñapa' tomatatnoman torrepo' allotcha' cohuan̄psoñet pa'muer. Tomatuepa' na'nman ñeñtcha' taruasatats ñeñtcha' coyerrahuet allpon ñerra'm esempoch toteñet.

'O'ña nare'tanatatuepa' o' ahuo' po'poñ anetso baçhayo.

² Chap allempo yen uvachllom̄pa' ñaña'p' mueñerran po'psheñeñ pa'taruasañer o'ch enamuer' uvachllom̄ po'psheñeñ pa'taruasañreneshesho ñeñt cohuan̄pene' uvachma'.

³ Allempoña chen allpa' enamosan ñeñt allpon o'patena ña, arepa'tcha'ña es apapuenayeña uvachllom̄, elloña ñeñtapa' cha rremapueññañet pa'taruasañerpa' o' nalle'tapueñet, o' alla mueño'teret e'ñe atta.

⁴ Allempoña ñeñt pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr ñaña allpa' ñapa'cho'ña cha rrolle'tapetpa' o' atserrp̄apueñet poñopa' cha es otnatapueñet.

⁵ Allempo o' alla mueñerranerr po'psheñeñ pa'taruasañer. Ñeñtpa'cho'ña allempo chenerr ñaña allpa' ñaña'p' chepa'tcha' muetsapueñet. E'ñe attecma p̄a'yeset po'potantañechno—patanta'tetspa' nalle'tapueñet, po'potantañechnoñapa' cha amtsanatarettapuenet.

⁶ 'Ñeñt pamo'mte' penetpa' eñallmeñ ñaña puesheñarr ñeñt e'ñe ño puechemer ñeñt atarr morrentena. Allempoñapa' atet ot: “Te'pa' o'ch nemñe all ñeñt e'ñe na nechemer. Ñato'rraña ñeñtpa' mecha'na'tapetcha'.”

⁷ Ñeñtpa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet otanna'tyeset: “Añmapa' ñeñtca'yeña puechemer ñeñtcha' o'paterraya pompor puenarem̄ esempo. Ñapa'cho'ña te'pa' o'chca'ye yemtsap̄ allochñapa' yachca'yeña e'ñe o'paterrayaña pompor puenarem̄. Te'pa' o'ch ahuey o'ch yemtsap̄ ñaña.”

⁸ Allempoña o' rremapoñet ñaña puechemerpa' o'cho' muetsapet, huapore'teret allot uvachmōt. Arrpa' allohua atet toma'ntata Jesús e'ñe ñañaña.

⁹ Jesúsñapa' atet otterranerr acheñenesha':

—Ñehua, te'pa' o'ch notas, ñeñt pamo'mte' pen ataruasañechnopa' ama't señoñeña sa atetcha' p̄ohuerranet. Ñerra'm esempoch huerranet, pamo'mtayetpa' a'cclatuerranetcha', narmetsma'ñapa' o'ch apuerran po'potantañ.

¹⁰ Allempoña Jesús pa' atet otterraneterr:

—Sapa' ama't ahuatapa' ama'tña selleyareña ñeñt atet anuaret Yompor po'ñoñ ahuatoteñ. Tarro'mar ñeñtpa' atet oten nocop, all atma'ntatarettan mapue'. Ñeñtpa' atet oten:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anare'terra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

¹¹ Ñeñtpa' Yomporca'yeña atet p̄atene' ñeñto'marña yapa' e'ñe cohuen yenteñ.

¹² Ñeñt e'moñe'tene' Jesús ñetñapa' eñoteñet ñeñtpa' ñetca'ye atma'ntatarettanet, ñeñtpa' ñocpuetca'ye atet eñoreñaña Jesús. Allempoña

ñetpa' atarr mueneñetañ o'ch rromuet Jesús e'ñe allorocma tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús. Ñeñto'marña ñetñapa' quechpa'huaneret Jesúsapa' ahuanerret.

Atto a'pto'chet Jesús, pocte'te' o'ch tsa'tet impuesto
(Mt. 22.15-22; Lc. 20.20-26)

¹³ Atteñapa' chap allempo po'pocheño e'ñe a'nahua mueñeññañet puesheña'tets fariseonesha' ñesho ñaña puesheña'tets Herodes puey-ochresha', tarraña ñetpa' añecpa amñareñtenet attoch e'ñe puehquëñoñet po'ñoñoñetpa' o'ch eñoratoset ñeñt ama cohuenayaye. Allochñapa' attotcha'ña otteñe'chet.

¹⁴ Ñeñto'marña ñetpa' allempo chapuet ñeshopa' atet otoset:

—Maestrocha' yapa' yeñoteneñ papa' ama peshquëno ama't mamesha ñaña ñeñt atto peychaten Yompor pocta'ña ñeñtpa'cho'ña e'ñe cohuenacma, ama shequëñtsoyaye ama't mamesha. Papa' allohuen acheñpa' e'ñe cohuen pentueñ; ama ñaña ñapueñ pemorrenteno ñeñt atarr amcha'na'tpo' entyen allohuen acheñenesha'. Ñeñto'marña te'pa' yapa' yemneñ o'ch peñotatapuey erra'tsente'ña e'ñe po'ñoñch cohuentetsa. ¿Pocte'te' penteñña pa' o'ch yetsa'ta impuestos añecop ñeñt amcha'tarettetsa all anetso Romo ñeñt ama judioneshayaye? Ñato' amate' pocteyayeña yocop ñeñtey judioneshay o'ch yetsa'cha amcha'tareñ romo'marnesha' ñeñt ama judioneshayaye.

¹⁵ Jesúsñapa' eñotapanet ñetpa' chaca'ye shecare'teñet, ñañaapa' atet otapanet:

—Sapa' eso'mare'tña semneñña o'ch seshcare'tosen. Ñehua, ama't atet setpatennoñpa' sorratatca'yeña puetallarr quelle o'ch necue'.

¹⁶ Ñetña apetpa' ñañaapa' atet oterraneterr:

—Ñehua, sapa' o'ch soten, ¿esesha't sentenña ñeñt atma'ntatareñtetsaña all? ¿Esesha't pa'so'cheñ aquellcarettetsa all?

Ñetñapa' atet ochet:

—Amcha'tareñca'ye atma'ntareñtetsaña all, ñoca'yeña pa'so'cheñ ñeñt aquellcarettetsa all.

¹⁷ Jesúsñapa' alla oterraneterr:

—Ñeñte'pñapa' añ poctetsa o'ch ya'p amcha'tareñ ñeñt ño ñeñt atet poctetsa gobiernocop, tarraña ellonetña ñeñt Yomporo o'ch ya'p ñaña ñeñt atet poctetsa ñocop.

Ñeñña shequëñayeñ atta cohuanrrorteñet tarro'mar Jesúsapa' atarrca'ye cohuen anapuenanet.

Atto a'pto'chet Jesús, ñerra'm po'ñoñchte' atanterrapo' rromot, ta'm, allempo' errotencha'ña yeperra
(Mt. 22.23-33; Lc. 20.27-40)

¹⁸ Allempoñapa' huacha'toña ñaña patantarr ñeñt saduceoneshatets. Ñehua, ñeñt saduceoneshatets ñetñapa' ellonet echenet pocta'ña ñeñto'mar atet otenet amate' errotenot yetanterroña rromot ama't errponaña. Ñetñapa' atet otoset Jesús:

¹⁹ —Maestrocha' ahuañ Moisésapa' atet quellconay ñoñets ñeñt poctetsa ñeñtcha' atet ye'pa. Ñeñtpa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa', añ poctetsa pa'mo'nasheñcha' alla yorerre'ña po'norrar allochñapa' attoch eñalletteraña ñeñtcha' puechemer perr pa'mo'nasheñeñ. Ñeñtpa' atetca'ye quellca'nmonayña Moisés ahuañ.

20 Ñehua, te'pa' eñall cancherrsheña ñeñt e'ñe poctacma pa'mo'nasheñecmuet. Ñeñt puesheñarr popo'naretpa' o' yoran coyanesha' ñeñt puetapor pa'. E'ñe allponmatatsapa' o' rromaña, yacma ama chemere'tnomo.

21 Allempoña ñeñt po'rrocho'merpa' o' yorerran pa'mo'nasheñeñ puetapor. E'ñe allponmatatsapa' ñapa'cho'ña o' rromuerrerr ñaña, ñeñtpa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña ñeñtpa'cho'ña ama chemere'tnerrero o' atta rromuerrerr.

22 E'ñe attecma pohuet cancherrsheño'maretpa' e'ñe pueyoruarochet ñeñfara puesheñarr coyanesha'. E'ñe allohuenetpa' e'ñe attecma pet rromayestset ama't puesheñarrofetapa' ama chemere'tnomueto. O' rromape-suaña cancherrsheño'mar puerrollaresha'pa' cho rromatsña ñaña coyane-sha'.

23 Te'ña ñerra'm po'ñochte' yetantena rromotpa' añña coyanesha' allempoñapa' ¿essha'tcha'ña puetapor perre' tarro'mar allohuenet cancherrsheño'maretpa' e'ñe pueyoruarochet?

24 Allempoña Jesúsapa' atet oterraneterr:

—Sapa' ñeñto'marca'yeña cha atarr sepanteñ tarro'mar amaca'ye chennasoña seyocho ñeñt e'ñe po'ñoche atet yechateney Yompor po'ñoñ ñeñt atet anuaret ahuatoteñ. Ñaña aña sepantatene' tarro'mar sapa' ama sepocteeññañe Yompor po'huamenc.

25 Tarro'mar esempohuañen allempoch tanterret po'pocheño, allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuerraye ñeñtcha' yorerrahuet. Tarro'mar allempopa' e'ñech attet ñerra'm Yompor po'millañoñnaneshar ñeñt pue'ntaño'tsa'yen.

26 Sapa' ama'tña selleyareña ñeñt atet quellquët ahuañ Moisés attoch señoch ama't ñeñt o' colla'huapa' ñetñapa' corretseta. Ñehua, all aquellcareñ tsachmo'r ñeñt e'ñe ñoña huortets. Alloññaca'yeña Yomporpa' eñorana'tanaña Moisés; ñeñtpa' atetca' otña Yompor allempo: “Napa' ñeñten Po'yomporer pen Abraham ñaña Isaac, ñaña Jacob.”

27 Jesúsñapa' alla oterraneterr:

—Ñehua, yapa' yeñoteñ Yomporpa' ama ayeñe' Po'yomporer penaye ñeñt rromuets e'ñe poctacma, ñapa' añca'yeña Po'yomporer pene' acheñ ñeñt corretsach. Attoña Yomporpa' e'ñe allame'ttsa entenanet allohuenet ñetñapa' bettetseta. Ñeñto'marca'yeña sapa' atarr sepanteñ.

Añmapa' ñeñt ñoñets ñeñt atarr sherbets, e'ñe metana'tuenan allohuen po'poñechno ñoñets

(Mt. 22.34-40)

28 Allempoña huapoña ñaña puesheñarr ñeñt etsotene' ñoñets ñeñt atet anaret, ñañaapa' e'mosan ñeñt atet a'pto'tare'teñet Jesús. Ñañaapa' e'mosan Jesús e'ñe cohuen anapuenanet. Ñeñto'marña ñapa'cho'ña allenta a'pto'tos, ñeñtpa' atet otos:

—¿Erra'tsena't ñoñtsor ñeñt atet anaret ñeñt atarr sherbets, ñeñt ello metana'tuene' ora allohuen po'poñechno ñoñets ñeñt e'ñe parro attecma anuaret ahuatoteñ?

29 Jesúsñapa' atet otap:

—Ñeñt ñoñtsor ñeñt atarr sherbets ñeñt ello metana'tuene' po'poñechno ñoñetspa' ñeñtpa' atet oten: “Se'mñot israelneshacha' attoch señoch: Ñeñt Yeyomporer yepenpa' ñapa' e'ñeca'ye patrira ñeñt Yepartseshar yepen.

³⁰ Ñeñto'marña atarrepa'chña yemorrenteña Yeyomporer ñeñt Yepartse-shar yepen e'ñe ora yeyochrocmañen. Ñaña e'ñe yecamquëñoñ yemor-reñchach, ñaña yocpaññohuen, ama't ñaña e'ñe ora yehuamencohuen."

³¹ Allo'tpa' po'poñ ñoñets ñeñt atarr sherbets ñeñt'pa' atet oten: "Atar-rcha' yemorrenteña yamo'ts e'ñe atet atarr yemorrentena yañeña." Añ epo'mar ñoñetspa' ñeñtca'yeña atarr sherbets, ñeñtña ello metana'tuene'ña po'poñechno ñoñets ñeñt atet anare't.

³² Allempoña ñeñt etsotene' ñoñets ñeñt atet anare't, ñaña'pa' atet oterranerr Jesús:

—Maestrocha' papa' e'ñeca'ye po'ño'ch atet p'oten. Po'ño'ch Yomporpa' e'ñeca'ye patrpa' ama eñalleña po'poñ Yeyomporer patrpa'ye.

³³ Ñerra'm choch yemorrenteña Yompor e'ñe yeyochrocmañen e'ñe yeñoteñohuen, ñaña e'ñe yecamquëñoñ yemorreñchach e'ñe yehuamencohuen ñaña ñerra'm atarr yemorrenteña ñaña yamo'ts e'ñe atet atarr yemorrentena yañeña, ñeñtca'yeña atarr nanac sherbets. Elloca'yeña metana'tuenan allohuen po'poñechno ama't ayarra'chno ñeñt yemtsayen Yomporecop, ama't ñaña allohuen ñeñt yachamuen allo yesherbeñ Yompor.

³⁴ Jesúsña'pa' atet eñch ñapa' atarr eñotenan ñeñt atarr sherbets Yomporecop, ñeñto'marña atet otererr:

—Papa' amaca'ye atarr atonaye' pepallteno attoch e'ñe pagaphuerrñañ Yompor po'cohuenña atto ayochreshattena ña.

Allempoña'pa' ama't puesheñarro'tetapa' ama eseshaye' a'p'to'tenaye' enter-rayeña Jesús.

Atto Cristo ñeñt Po'partseshar pe't David, elloña'pa' o' alla po'm'reneñ per (Mt. 22.41-46; Lc. 20.41-44)

³⁵ Allempoña Jesús'pa' alla ye'chaterraneterr all Parets pa'paclo. Ñeñt'pa' atet oterraneterr:

—Ñeñt atarr etsotayenayeñ ñoñets ñeñt atet anare't, ñetpa' eso'marte'ña otyenet ñeñtcha' Cristotosets ñapa' aña po'm'reneñ pene' David tarro'mar ñeñtcha' Cristoterrets ama aña po'm'reneñ pene' David tarro'mar ñapa' Po'partseshare'ñaña pe't David.

³⁶ Tarro'mar ama't Davidpa' allempo eñorache't Parets Puecamquëñ, allempo'pa' atetca'ye eñose'tña añecop ñeñtcha' Cristoterrets:

Yompor Parets atet otennan ñeñt Nepartseshar nepen na (ñeñtara ñeñtcha' Cristoterrets): "Te'pa' o'ch panorruerr arr necohuenro't allcha' peco-huentapreterrna. Attochña ama't ñeñt pe'moñe'tene' napa' o'ch name'ñatuerranet allochña'pa' o'ch atet perret ñeñt pemnen pa."

³⁷ Ñeñt'pa' atetca'ye ote'tña David, ñeñtcha' Cristoterrets'pa' ñeñtca'yeña Po'partseshar pe'tña ama't allempoteñ. Ñehua, ama't seño'teñeña Cristo ñeñt Po'partseshar pe't Davidpa' ñeñtña te'pa' o' alla po'm'renñ per ñaña.

Ñeñto'marña Jesús allempo ye'chatenan shonte' acheñenesha' ñetpa' e'ñe pocsheñesha' e'mñoteñet.

Atto Jesús'pa' a'metare'tenan ñeñt etsotayenayeñ ñoñets ñeñt atet anare't, ñeñt atet ye'chenet ñetpa' ñeñt'pa' ama cohuenaye' entapretenaneto Yompor (Mt. 23.1-36; Lc. 11.37-54; 20.45-47)

³⁸ All ye'chaterraneterr ñeñt'pa' atet oterraneterr:

—Amach semeñe'tapretatsche ommonañenesha' po'capña ñeñtareta ñeñtet atarr etsotayenayeñ ñoñets ñeñt atet anare't. Tarro'mar ñetpa' añe'ñaña atarr cohuen entenet o'ch chorrenet atarrom shetamuets o'ch atfa yorma'tatse'tenet pa'shtam. Ñaña pommo'cheño'tetpa' atarrcha' mueneñet

o'ch e'ñe pueñcha'na'teñoť e'ñech cohuen huomĭcha'tenanet acheñenesha' all chopeñe'chyenet.

³⁹ Ñaña ñetpa' añe'nach atarr muenenet o'ch anorrĭcha'tyenet judione-sha' po'prahuo allecma anorryen ñeñť atarr añcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet.

⁴⁰ Tarraña ñetñapa' rretorrnanesha'ñaña puerratanĭpesyenetña pa'paquell. Elloña e'ñe pommo'cheñoťetpa' aña atarr muenenet o'ch atet penet ñerra'mrrate' ñetpa' atarr cohuen acheñret ñeñťo'marña arr ma'yochyenet all shontena acheñenesha'pa' amach tematenayaya ma'yocheneto. Ñeñťo'marña te' napa' o'ch notas ñeñť atet petsa pommo'cheñoť elloña atarrcha' a'coñcha'tareťterret.

Atto rretorrnanesha' ñeñť atarr huocchañetets ñapa'ĉho'ña nosan quelle ñeñť Yomporecop

(Lc. 21.1-4)

⁴¹ Allempo Jesús pa' alla anen a'yente' allecma na'yenet quelle Parets pa'paclo. Allñapa' shonte' entenan acheñenesha' ñeñť na'yene' quelle Part-socop, shonte' ecłlayoretenesha' ñeñť na'yene' shonte' po'cłlayor Partsocop.

⁴² Jesúsña allpa' atta cohuenanet, huapa ñaña puesheñarr rretorrnanesha' ñeñť atarr huocchañetets. Ñapa'ĉho'ña nosan eptallaťoll quellayetoll ñeñť cobretall, ñeñť quellayerpa' ama tsa'teno, ama es sherbeno.

⁴³ Allempoña Jesús pa' agotan pueyochresha'pa' atet otanet:

—Te'pa' o'ch notas, añ rretorrnaneshar ama't atarr huocchañpa' ñapa' po'ñoĉhca'ye atarr aton nosan quelle, ello metana'tuosan allohuen po'potantañeĉhno allpon quelle ñeñť na'yenet ñet.

⁴⁴ Tarro'mar allohuenet ñeñť na'yenet quellepa' añaca'ye na'yenet ñeñť a'pcha'tyenet, ñaña pa' ama't atarr huocchañpa' e'ñe pomhuahuospan allohuen ñeñť echyen ñeñť muenatenaneñ attoch yoran alloch correna arr patsro.

13

Atto Jesús pa' eñotatanet e'ñech a'mata'taretetuerra Partsopo'

(Mt. 24.1-2; Lc. 21.5-6)

¹ Allempo ĉha'nerrerr Jesús Parets pa'pacloť puesheñarrña pueyochresha'pa' atet och:

—Maestro, pecuaye'ch, atarruaca' coĉhnesha'te' mapyet ñeñť allo oratyenet Partsopo', atarr coĉhneshaĉhnote' Parets pa'pacleĉhno.

² Jesúsña pa' atet och:

—Ama't sentyeñ te' ñeñť atarr coĉhnesha're' pocolleĉhno tarraña esempopa' ĉherrcha' allempoch e'ñe a'mata'taretetuerra. Ama't e'ñe pueñarra mapyetpa' amach a'puerroña all allo orratenet Partsopo'.

Atto Jesús pa' eñotatanet shonte'ch entyerret pa'namen ñeñťcha' eñotaterahuet o'ĉherrmoch allempoch mellapoterra

(Mt. 24.3-28; Lc. 21.7-24; 17.22-24)

³ Allempoña ahuenerr Olivopnopa' anorruenerr all, e'ñe alla yot Parets pa'pacloť. Allempo anen all e'ñe ñapťochayet allpa' aña epuet Pedro ñaña Jacobo ñaña Juan ñaña Andrés. Ñetñapa' atet oteñet:

⁴ —Te'pa' yemneñ o'ch pťotey, ¿esempo'tcha'ña atet perra? Ñaña allempopa' ¿eso'tcha'ña yentyerr ñeñťcha' yeñotaterre' po'ñoĉhpa' o'ch ĉherrmoch allempoch e'ñe etsotuerra ñeñť atet pťoteney te'?

⁵ Jesúsña pa' atet otanet:

—E'ñech señoterra allochñapa' amach esesha' seshquërraye.

6 Tarro'mar shonte'ch orrterrtsa ñeñtcha' aycha'nataterre' neso'cheñ, ñeñtcha' otyerrets: "Napa' ñeñtenca'yeña Cristotets." Ñetñapa' shonte'ch shequëret acheñenesha'.

7 'Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora errañaren anetso'mar. Saña allempopa' amach cha seyorenatsto ama't e'ñe mamesha. Ñeñtpa' atetcha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra.

8 Pa'namen acheñ ñeñt e'ñe po'poñe'ttsocma mereñtsoretpa' ñetpa' quellaranna'terretcha'. Ñaña pa'namen anetso't añcha'tareteçhnopa' quellaraterrancha' pueyochreneshachno. Pella'yerrach pats ora errañaren. Orrterrach allemeñ muecheñets o'ch e'ñe chaporrñatsotyerr errañaren. Orrterrach ñaña atpare'teñtsoçhno attochña atarrcha' ama'toçhtatanna'terret. Ñeñt atet o' notuas te'pa' ñeñtña allempopa' ñeñtcha'ña ñanom muerochtaterrahuetña allempo.

9 'Sapa' señota'tach allempoch atet perrset. Sanmare'terrach añcha'taretesho allcha' otteñe'cherrset. Sashtare'terrach all judionesha' po'prahuo'mar. E'ñe same'ñeñoften na sapa' çhapaterrsetcha' añcha'taretneshesho'mar ñaña allo'tsa'yen ñeñt nanac añcha'taretnesha'; sapa' allcha' sa'metosnanña neñoñ.

10 Ñaña allempoch ama mellapoterra'pa' añ cohuen ñoñets alloch sequeshperra ñeñtcha' ñanom serrpare'tatyeretña allohuen pa'namen acheñenesha' ora errañaren allohuanen añe patsro.

11 Ñaña allempoch sanmare'tetyesa allcha' otteñe'cherrset ama't mameshapa' amach cha sellca'psatsto, amach sota'psa'tatsto erro'tuachca'ye notoste' añcha'taretesho allempoch a'p'to'tare'tapuen. Allempopa' añcha'ña se'ñoratosé' Parets Puecamquëñ. Attochña amach e'ñe so'taye' se'ñoroso, añcha'ña se'ñoratosé' Parets Puecamquëñ.

12 Allempoch atet perrsetpa' ñeñt e'ñe semo'nasheñ sepen ñato' ñeñtchca'ye sepomuerre' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' patparño'tpa' o'paterranach pamo'mte' attoch muetsatater.

13 Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr muerochtaterrsetpa' tarraña esesha'ch e'ñe ahuanta'huanmue' e'ñe pueyemteñoften na, ñeñtcha'ña a'queshpatare'tterrtsa.

14 'Ñehua, ahua't Daniel ñeñt a'mtaye't Yompor po'ñoñ, ña po'quellcopa' atet ote't: "Cherrcha' allempo ama't ñeñt ama masosyaye' enteno Yomporpa' ñeñtñapa' çherrcha' all ama't ñeñt e'ñe Partsocpa anareteñ. Ñeñtpa' ñeñtchca'yeña e'ñe a'chencatuerrahuet." Ñehua, ñeñtcha' lleyerre' añ ñoñetspa' ñetñapa' eñoteretepa'ch. Ñeñto'marña ñerra'm esempoch senter o' çherr all ñeñt ama pocteyaye allempoña ñeñt allpon Judeo'tsa'yen ñetñapa' allorocmuepa'ch yetrra'terret, ahuanerretepa'ña aspentareronet.

15 Ate't ñerra'mrrate' puesheña'tets ñato' ñetña allempopa' eno'tsa'yenetcha' pa'pacllato, ñetñapa' sohuete'pa'chña tecma tarraña amachña be'tosatsetnomuetoña po'ponreto attoch yoratsre'tnomuet.

16 Ñaña puesheña'tets ñeñt pa'mro'tsenpa' allempoña ñetpa' amachña onatsterreto attoch erreta' pa'shtamuet.

17 Allempopa' atarrcha' llequëñets añecop ñeñt' ačhomenare' coyanesha' ñaña ñeñt' allohuen emaretetolleshačhno. (Tarro'mar ñocpuetpa' atarr torrapo' attoch yetrra'tet ñamet.)

18 Ñaña Yomporcha'ña sema'yocha allochñapa' amach čha huapoto allem-poch seyeta.

19 Allempopa' orrterrach mueročhteñets ñeñt'cha' atarr mueročhtaterre' allohuen acheñenesha'. Ñeñt' ama't ahuařapa' ama puemueročhtareto atet atarr nanac huomenc, ama't allempoteñ e'ñe errte' yečhcatyene' Yompor allohuen pa'namen ñeñt' yentyen arr patsro. Allempoña ellopa' amach atet alla mueročhterrete'te ama't errponaña.

20 Allempoch atarr amueročhtataretterret. Tarraña allempoña Yomporpa' ñach oterrets "te'pa' allohuach." Ñerra'm amach oto allohuachpa' allem-poña ama't puesheñarrapa' amach esesha' queshperrtso. Tarraña ñeñt'ña ame'ñenaya ña ñeñt' acrenpa' ñocpuetñapa' oterrcha' "te'pa' allohuach."

21 'Ñehua, allempoch orameñ mueročhteñetspa' ñerra'm esesha' sote': "Secueña', arro'tsenca'yeña Cristo", amapa' o'ch otaset: "Secueña' tarro'tsenca'ye Cristo", sañapa' amach same'ñatstaneto.

22 Orretyerrachca'ye ñeñt'cha' otyerrets ñapa' ño'ña Cristotets. Tarraña ñeñt'pa' attachca'ye shecare'tyerranña acheñenesha'. Orretyerrach ñaña ñeñt'cha' otyerrets ñapa' ño'ña a'mtene'ña Yompor po'ñoñ, tarraña ñeñt'pa'cho'ña e'ñech attecma shecare'tyerran acheñenesha', amachña Yomporeye'ña po'ñoñ a'mteno. Ñeñt'cha' atet shecare'tyerrets, ñetñapa' orrtatyerretcha' ñeñt' ama't ahuařa acheñenesha'pa' ama puentare, attochña cohuanrrortateretña acheñenesha'. Ama't ñeñt' Yompor pa'crarnesharpa' mueneñetañcha' ñeñt'e'nachña shequërret.

23 Señoche'pa'ch ama't ama čhena' mueročhteñtsopopa' na allohuenpa' o' e'ñe notuas.

*Atetcha' perra allempoch huerra Cristo ñeñt' Acheñetsosets
(Mt. 24.29-35, 42-44; Lc. 21.25-36)*

24 'O'chña huañerr ñeñt' mueročhteñetspa' allempoñapa' čhoch mayerrets ñaña atsne'. Arrorrrpa'cho'ña o'huañcha' atsnom.

25 Rantočhnopa'cho'ña shorčha'terrcha' entot. Ñaña ñeñt' huomenc orra'yetsa ento te' allempoña ama't ñeñt'pa' pella'yerrach.

26 Allempoñapa' entapuerrnetcha' na Ñeñten Acheñetsosets o'ch nesuamñperra osot e'ñe nepartsoteñohuen e'ñe necohuenteñesha'.

27 Nemñercha' nemñllañoñeñaneshar, ñetñapa' a'yapačha'hueretcha' allemñateñ ñeñt' acren Nompoc nocop e'ñech pa'tatsshemto'marohuen allotecma orrnotena. E'ñech allemñateñpa' a'yapačha'hueretcha' e'ñe allohuanen añ patsrot.

28 Ñaña te'pa' señoche'pa'ch ñeñt' atet pena higoch. Ñehua, esempoch senteñ higoch o'ch emčachyen puetacretollesha' allotcha' o'ch alla tapna'tyerrerr pasopaner, sañapa' ñeñt'ñaña señoatene'ña o' čhenmoch allempoch huorateterrerr.

29 Attecma' mach perra ñerra'm esempoch sentyerr ñaña ñeñt' allpono' notuas, sapa' ñeñt'cha'ña señoataterre' po'ñočh o'ca'ye čherrmoch allempoch e'ñe et-sotuerra, o'ca'ye e'ñe allame'ttsamerra.

30 Napa' po'ñočh o'ch notas, acheñenesha' ñeñt' e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añečhno.

31 Esemphuañen añ enet ñeñt senten te'pa' e'ñech chenca'huerra; patspa'cho'ña attecmaç perra e'ñech chenca'huerra. Tarraña naña neñoña' amach chenquërro ama't e'ñe ahuata.

32 'Tarraña ñeñt yetroch nohuerrapa' ñeñtña'pa' ama eseshaye' eñotenaye. Ama't erro'tsente' atsne' ama't erro'tsen tsapro ñeñt'pa' ama't mellaño'teñnesha' ñeñt pue'ntaño'tsa'yen ñetpa'cho'ña ama't puesheñarro'tetapa' amaña eseshaye'ña eñotenaye allempoch nohuerrerr po'pocheño. Ama't na ñeñten Yompor Puechemeren napa'cho'ña te'pa' ama neñoteñe, ñaptaña Nompor Parets eñotene'.

33 'Sapa' seño'ta'tach ñaña çhocmach seño'sertenna ñaña çhocmach sema'yochena tarro'mar sapa' amaña seño'teñe esempoch çherr ñeñteñpo allempoch nohuerra.

34 Ñeñt'pa' e'ñe atet ñerra'mrrate' puesheñarr yacma ñerra'm esempo ta ðachayopa' o'ch na'nman pa'taruasañreçhno pa'paclo ñeñt'cha' apa'yenom taruas e'ñe puesheña'ttsocmuet. Ñaña po'poñ pa'taruasañer ñeñt'cha' cohuets yetarro't ñapa' atet'cha' otnomñ pamo'mte': "Papa' çhocmach peñose'retna."

35 Ñeñto'marña te'pa' o'ch notas: Chocmuepa'ch seño'sertenna na ñeñten Samo'mte' sepen ñeñten sena'nmue' na nepaclo tarro'mar sapa'cho'ña ama seño'tenno esempoch nohuerra. Nato' ellerronet'cha' nohuena, ñato' rroçh tsapo, ñato' puetarenmoch allempo eñen atollop, amapa' ñato' aromtañach nohuena.

36 O'ch alla noterr'serr: Chocmuepa'ch seño'sertenna, ñerra'm machayota nohuerrapa' ñato'rraña alla nentuerres sapa' cha atarr semanrren.

37 Ñeñt atet notenes sa ñeñt'pa' allohuenacpasca'ye, ñeñto'marña o'ch alla noterr'serr: Chocmuepa'ch seño'sertenna allohuenes.

14

Atto atarr o'pateñet Jesús o'ch muetsatateret (Mt. 26.1-5; Lc. 22.1-2; Jn. 11.45-53)

1 Epomtameñ palltena o'ch alla çherrerr pascuapo allempoch rrerranerr judionesha' pan ñeñt ama anareteyaye chase'. Ñeñtña pa'mcha'tareternesha' pen allohuen judionesha' po'cornaneshar epuet ñaña ñeñt etsotayenayeñ ñoñets ñeñt atet anaret, ñetña'pa' aña atarr e'nenet attoch shequët Jesús e'ñe a'nahua esheccha' rremuetpa' o'ch muetsatachet.

2 Ñetña'pa' otanna'tyenet:

—Tarraña te' pascuapo allempo shontena acheñesha'pa' amachca'ye yermatsche allañaca'yeña cha ya'tsrre'moçhtateñ acheñenesha'.

Atto puesheñarr coyanesha'pa' shosan eñmosa't Jesús poño (Mt. 26.6-13; Jn. 12.1-8)

3 Pamtarrña Jesús'pa' Betanio'tsen all Simón pa'paclo, ñeñtña Simón'pa' ñeñt ose't puetsarñats. Jesús'ña'pa' all anen all rrallme'chen. Allña'pa' huapoña puesheñarr coyanesha', huapatan eñmosa't ñeñt'pa' e'ñe ñeñtoche' ñeñt otenet nardo puese' ñeñt ama matsa'to. Huapatamñpes puetellmño ñeñtña puetellmñpa' añ socheñet alabastro. Allempoña ñeñt coyane-sharpa' potamñpsosan eñmosa't; ñeñtña eñmosa'tpa' alla she' Jesús poño all rrallme'chen.

4 Puesheña'tetsña'pa' ñeñtña cha atsrre'matanet, atet otanna'tyaset:

—Eso'mare'tña atta a'pertatosanña eñmosa't.

5 Ñeñt eñmosaŕterpa' amaca'ye matsa'to. Chochña'cho' pomoseña' ganañcha' shonte' quelle chachca'ye metananeña ñeñt trescientos denario. Allempoña'apa' yesaneñcha' ñaña allohuen huocchañnesha'chno.

Ñeñt'pa' atet sasare'chet coyanesha'.

6 Allempoña Jesús'pa' atet otanet:

—Semnachñaca'yeña coyanesha' ñeñt atet penen. Eso'mare'tcha' cha muene' satsrre'mohtana'ta'pa. Ñapa' atarrca'ye cohuen p'osen.

7 Tarraña ama'tcha' cho pomosaneñ eñmosa' alloch es apa'yesaneñ huocchañnesha'chno, tarraña chocmachca'ye eñallña huocchañnesha'chno arr patsro. Ñerra'm esempo semneñ o'ch e'ñe cohuen sorratyesanet ñocpuet chocmach atet sepanet. Tarraña ñaña'pa' po'ño'chpa' amachca'ye allo'na sentenno arr patsro.

8 Añ coyanesarpa' aña'ye apuenen ñeñt allpon echyen. Ñeñt atto shosnan te' eñmosa' nechtso, ñeñt'pa' añe'pa'naca'ye sherben tarrempohua allempoch a'yana'terrnaneterr ñeñt'cha' epuet pampa'pesnet.

9 Po'ño'chca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'chetcha' ñaña atet penen te' añ coyanesha', attochña ña'nach yerpunen.

Atto Judaspa' pomuerran Jesús
(Mt. 26.14-16; Lc. 22.3-6)

10 Allempoña pueyochresha' ñeñt charra' puechetsa epsheña, puesheñarrña ñeñt pa'so'cheñ Judas Iscariote, ñaña'pa' allenta ahuo' allo'tsa'yen ñeñt pa'm'cha'tareternesha' pa'yen allohuen judionesha' po'cornaneshar. Ñaña'pa' añe'pa' sen attoch pomataterran Jesús.

11 Ñeñtña atarr coshatenahuet. Ñetña'pa' allempocma a'pochachet chocca'ye tsa'chetña Judas allpon quelle. Allempoña ñapa' aña e'ñe cotape'chyen errotenot'cha' pomuerranña Jesús.

Atto Jesús'pa' rrallme'chatnenan pueyochresha' attoch chocmach yerpueret ñeñt yoten te' Santa Cena
(Mt. 26.17-29; Lc. 22.7-23; Jn. 13.21-30; 1Co. 11.23-26)

12 Allempoña chapa'muen ñeñt yetñatsro allempoch rrerretterr pan ñeñt ama anareteyaye chase' allempoch muetserrretterr ñaña carrnero; ñeñt'pa' pascuapo. Chapa'muen ñeñt yeterpa' pueyochresha'ña'pa' atet ota'mueñet Jesús:

—Te'pa' ¿erra't pemneñ allcha' yeta'muena allcha' ya'potona' ñeñt'cha' perra' pascuapo?

13 Allempoña ñeñt epsheña pueyochresha' ñeñt'cha' mueña, Jesúsña'pa' atet otapanet:

—Te'pa' o'ch ahua'muenes anetso allcha' sepocete' puesheñarr yacma ñeñt anmañpene' oñ porrtó. Ñeñtña acheñerpa' o'ch socta'ner.

14 Allcha' be'tosuerr allcha'ña sebe'tosos samña. Allña'pa' atet'cha' sotos ñeñt apacllatesha': "Yemaestrorpa' atet oteney atet'cha' yotosep: '¿Erro'tsena'tña pecuarto allcha' nerrallme'chos pascuapo epan neyochresha'?" "

15 Ñeñt apacllatesha'pa' gatapascha' eno po'cuarto ñeñt atarr a'yohuen e'ñe cohuen a'paret. Allcha'ña sañño'tosña ñeñt'cha' yerra' pascuapo.

16 Allempo atet otuanet Jesús'pa' pueyochresha'ña'pa' atet'cho' pet, cha ahuanmatset. O'ña cha'cha'tet anetso, e'ñe atet otapanetpa' ñetña'pa' e'ñe'cho' atet entoset. Allña añño'tosñañetña rreñets allcha' rrallme'chet ñeñte pascuapo.

17 Allempoña o' puenaso'tenpa' o' chap ñaña Jesús all epuet pueyochresha' ñeñt' charrasheña puechena epsheña.

18 All anorrchenet all rrallme'choset, Jesúsñapa' atet otanet:

—Po'ñoçhca' notenes: Puesheñarrotes sa ñeñtescha'ca'ye nepomuerre'. E'ñe puesheñarr ñeñt' e'ñe parro nerren ñeñtcha'ca'yeña nepomuerre'.

19 Ñetñapa' cha atarr lleca'rrtet. A'p'to'tyeset e'ñe puesheña'ttset:

—Ta'm amate' na nepomuerrmochape.

20 Ñañaapa' atet oterraneterr:

—E'ñe puesheñarrotes ñeñtes charrasheñas sepchena epsheña ñeñtña net-sapechapretene' nerrar, ñeñtcha'ca'ye nepomataterre'.

21 Po'ñoçhca'ye te'pa' allo'na sen etsotnomtsa ñeñt' atet anuaret Yompor po'ñoñ nocop na Ñeñten Acheñetosets; attotcha' muetsaterrnet. Tarraña nocoppa' e'ñe pocte'; añña po'ñoçh acheñer ñeñtcha' nepomuerre' ñocopñapa' atarr llequëñets. Añ acheñrecoppa' e'ñeca'ye pocteñ amachña'cho' eñalletatstañe.

22 All rrallme'chenet, Jesúsñapa' chetan pan parasyoso'tan Yompor. Parasyoso'tuepa' shota'tan panpa' apa'yesan pueyochresha'. Ñeñtpa' atet otanet:

—Sagapyes, añmapa' ñeñtcha'ña nechets sepen.

23 Allostñapa' chetan ñaña orramets parasyoso'tuerrerrpa' apa'yerraneterr. Ñetña allohuenetpa' e'ñe orryesuahuet.

24 Jesúsñapa' atet oterraneterr:

—Añpa' nerrasca'ye sepeñ ñeñtcha' ashatarettatsa shonte' acheñeneshacop. Añ nerraspa' alloch e'ñe etserra a'pocataerra acheñenesha' Apuesho.

25 Na te'pa' o'ch notas: Amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'taretetuerra Yompor.

Atto Jesúsapa' eñotatan Pedro ñapa' chocmach a'nasocha

(Mt. 26.30-35; Lc. 22.31-34; Jn. 13.36-38)

26 Allempoña o' morrechuanmuet Yomporecoppa' ahuaneneterr Olivoño.

27 Allñapa' atet otosanet Jesús:

—Añ tsaprocmach sa allohuenespa' sa'ypo'ña'huanmuencha' tarro'mar Yompor po'ñoñopa' atetca'ye anuaret, ñeñtpa' atet ote't Yompor nocop: "O'ch nemtsater ñeñt' cohuañpene' carrnero, po'carrnerorñapa' chach mattrra'tyesa allemeñ."

28 Jesúsñapa' atet oterraneterr:

—Tarraña esempoch alla netanterra napa' nanomcha' oterrtsa Galileo.

29 Allempoña Pedropa' atet och:

—Ama't allohuenet ñerra'm a'ypo'ña'huerrpetcha'pa' naña ama't ahua'apa' amach na'ypo'ñerrpe.

30 Jesúsñapa' atet otererr:

—Po'ñoçhca'ye o'ch notañ, añe tsaprocmach ama't e'ñe epocha amach eñena' atollop pañapa' o'ch ma'poch pa' nasotenna.

31 Pedroñapa' alla otererr:

—Ama'tcha' yerromhuanen parropa' naña po'ñoçhpa' ama't parrocha amach na' nasotaño.

Allohuen pueyochresha'pa' ñetpa'cho'ña e'ñe attecma otyenetañ ñamet.

Atto Jesúsapa' ma'yochuena all oteñet Getsemani

(Mt. 26.36-46; Lc. 22.39-46)

³² Alloñapa' chap Jesús pueyochreshohuen all narmetsmño, ñeñtpa' añ pa'so'cheñ Getsemaní. Allñapa' otosanet:

—Te' sapa' allach sanorrcha'tos arrma, napa' o'ch nema'yochena'.

³³ Allñapa' aña anmos Pedro ñaña Jacobo ñaña Juan. Jesúsñapa' ama't mameshapa' ama eñmateno pueyoçhro, çha nanac allpatena.

³⁴ Allempoñapa' atet otosanet:

—Napa' çha chepoçhenen nellquëña neyoçhro, çha muene' nerromuen nellquëñoť. Sapa' allasa'tach arr secuapretosno'tach.

³⁵⁻³⁶ Ñañaapa' ahuo' a'yenteye' all rremosa patso atet ma'yochosa:

—Apa, pçoppa' ama eñalle ñeñť ama erroten apen penteno; ñeñťo'mar te'pa' notenep amach pemnatatsche o'ch çhapona ñeñť atarr amuroçhtatañ* nenten na. Tarraña ñerra'm pçach muenatspa' añepa'chña atet pepaton ñeñť pemnen pç, amachña aneyaye ñeñť nemnen na.

³⁷ O'ña atet ma'yochuapa' o' ahuer allotsa'yen pueyochresha' ma'psheña. O' çherr allpa' alla entuerranet ñetñapa' çha atarr manrrenet. Allempoñapa' otuerran Pedro:

—Cha't Simóna atarr pemos. Ama't mamesha are'tña acuenaye' penteno.

³⁸ E'ñe seño'srteñoťpa' çhoña sema'yochosa allochñapa' attoch amach sañeña a'puerrataterro topateñets ñeñťcha' sehuapoya atarr huomenc. Ñeñtpa' ama't atarr semneñeñ tarraña sechetsñapa' amaca'ye ahua mencateye' penso, ñeñťo'marña notenes çhocmach sema'yochena.

³⁹ Jesúsñapa' alla ahuer rerr puepocheño o'ch ma'yocherrerr, ñeñťara atet otuerrerr.

⁴⁰ O'ña alla ma'yochuerra'pa' allempoñapa' huerrerr, alla entuerranerr pueyochresha' ñetñapa' o' alla manrretererr, çha nanac atserr moñe'tenet. Ama eñoteñeto errotencha'ña otapuereteť.

⁴¹ Jesúsñapa' alla ahuer rerr ma'yochatsa. O'ña ma'yochuerra'pa' allempoñapa' alla huerrerr poma'pocheñohua, atet otuerranerr pueyochresha':

—Ama't teme'ttsenpa' alla't semanrren; ama'tpa' alla sames. Te'pa' ñeñťepa'ta, señoche'pa'ch o' chap allempoch pomataterrnet na Ñeñten Acheñetosets attoťcha' erroťuanen perren ñeñť atarr ochñañenesha'.

⁴² Te'ñapa' setanterra o'ch ahuey o'ch yepocte'. Secue'ca'ye ñeñťcha' nepomue' ñeñťpa' alla'tsena.

Allempo rromoset Jesús

(Mt. 26.47-56; Lc. 22.47-53; Jn. 18.2-11)

⁴³ All atet eñorena Jesúsapa' çha huapatsa pueheñarr ñeñť pueyochresha' peneñ ñeñť a'pchenahuet epsheña, ñeñťñapa' añ Judas. Ñañaapa' huaçha'tatan shonte' acheñenesha' occhelletareret ñaña etsachperetareret. Ñehua, añ ñeñť huaçha'ttsapa' añ mueñenahuet ñeñť pa'm'cha'tareñenesha' pen allohuen judionesha' po'cornaneshar ñaña ñeñť etsotayenayeñ ñoñets ñeñť atet anaret ñaña ñeñť pompornesha' pen allohuen judionesha'. Ñetca'yeña mueñene'ña ñeñťcha' rromuenaya' Jesús.

⁴⁴ Ñehua, Judas ñeñťcha' pomuerre' Jesúsapa' ñañaapa' atet otnoman acheñenesha' ñeñť anom attoch cheme'toset Jesús. Ñeñťpa' atet otnomanet:

—Erra'tsencha' nehuom'cha'tos e'ñe netso'ttsapa'teñoťpa' ñeñťca'yeña Jesús. Sañapa' ñeñťcha'ña serrmospa' o'ch sanem' e'ñe sehuamencocma.

⁴⁵ Allempoña huapapa' çha ponmosaya Jesús huom'cha'tos e'ñe puetso'ttsapa'teñesha', atet otos:

* **14:35-36** Ñeñť amuroçhtatañ ñeñťpa' po'ñoçh ñeñťpa' añ atma'ntataret ñerra'mrrate' ñeñť atarr pesherr yorren orranťsot.

—Tsapo, Maestrocha’.

⁴⁶ Allempoña acheñenesha’pa’ ponmosyet Jesúsapa’ rromoset e’ñe po’huamencocma.

⁴⁷ Allempoña puesheñarr ñeñt Jesús pueyochresha’ ñaña’pa’ po’cchella cheta’pa’ o’ch chonto’tapanen cornesha’ pueñañra puetepa’tcha’ tsorroñ. Ñeñtpa’ año pueñañra ñeñt pa’mcha’tareter pen allohuen judionesha’ po’cornaneshar.

⁴⁸ Allempoña Jesúsapa’ atet otan acheñenesha’:

—Eso’mare’t sehua’cha’tennanaña e’ñe occhelletareroches ñaña etsach-peretareroches attoch serrma’n. Napa’ ¿e’ñe’t atet sentenen ñerra’mrrate’ eñeten?

⁴⁹ O’ allponmatuanen allo’tsenen Parets pa’paclo e’ñe parro sesho, eso’mare’tña amaña allempocmaña serrma’ne’tē. Ama’tpa’ attepa’ca’ye perra allochñapa’ attoch e’ñe etsotueria ñeñt allpon quellca’yese’t nocop ñeñt a’mta’yese’t Yompor po’ñoñ.

⁵⁰ Allempoña allohuen pueyochresha’pa’ allorocma a’ypo’ña’huanmet, ñetña’pa’ yetrra’tuet.

Atto a’yetachet puesheñarr huepuesha’ allempo muene’ rromuetañ ñaña

⁵¹ Ñehua, allempopa’ allo’tsen ñaña puesheñarr huepueshachor ñeñt epuet ta Jesús. Ñaña’pa’ cha muelle’mquēn atta e’pamco’tnoma. Ñapa’cho’ña ahuo’ch rromuetañpa’

⁵² aña a’meyampereta’ allo e’pamco’tena, huepueshachorña’pa’ muelle’mco’a a’yetachet.

Allempo chapata’mueñet Jesús all ap’cha’muena allohuen judionesha’ pa’mcha’tareternesha’ ñeñt a’pocatyene’ ñoñets

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Acheñenesha’ña ñeñt rromose’ Jesúsapa’ ñetña’pa’ arr anmet allo’tsen ñeñt pa’mcha’tareter pen allohuen judionesha’ po’cornaneshar. Allña’pa’ all ap’cha’ña ama’t allohuen cornaneshachno ñeñt pa’mcha’tareternesha’ pen judionesha’ po’cornaneshar ñaña ñeñt pompornesha’ pen allohuen judionesha’ ñaña allohuen ñeñt atarr etsotayenayeñ ñoñets ñeñt atet anaret judioneshacop. Ñetña allohuenet e’ñe all ap’chenet.

⁵⁴ Pedropa’ ñapa’cho’ña cote’ tarraña ñapa’ chenta’ en a’yo’t. Cornesha’ po’pampopa’ allña’pa’ anorros epuet ñeñt guardianesha’ all a’torenet tso’ all shotoset parro.

⁵⁵⁻⁵⁶ Cornaneshana’ pa’mcha’tareternesha’ ñaña allohuen ñeñt chocma a’pocatyene’ allohuen ñoñets ñeñt judioneshacop, ñetña’pa’ aña atarr e’nenet ñeñtcha’ a’metare’tam’psose’ Jesús allochñapa’ attoch muetsatachet. Ama’t shonte’ huapatsañ ñeñtcha’ toma’tam’psosayeñpa’ am’cha’taretnesha’ña ama’t puesheñarrofetapa’ ama eseshaye’ entayeña attoch muetsatateret tarro’mar allohuenet ñeñt toma’tam’psosayeñpa’ ama e’ñe attecma’ye’ otosetoña Jesúsocop.

⁵⁷ Allempoña tom’cha’tos ñaña po’potantañ; ñetpa’cho’ña toma’tam’psoset Jesús; ñetña’pa’ atet otoset:

⁵⁸ —Ya ahuañapa’ ye’mē’tca’yeña Jesús atetca’ye ote’t: “Napa’ o’chca’ye na’materrñañ añ Parets pa’paquell ñeñt’pa’ acheñaca’ye pueyechcatar; tarraña poma’pamtañoñapa’ napa’ o’chca’ye alla natomater po’poñ ñeñt’pa’ amachca’ye aneyaye ñeñt yechcaten acheñ.”

⁵⁹ Tarraña ama’t atet toma’tam’pesyesosetañpa’ ama e’ñe attecma’ye’ otoseto.

⁶⁰ Allempoña cornesha' ñeñt nanac añcha'taref allenta tompa' atef otan Jesús:

—Pañapa' ¿ama'tcha'ña ñapananeto? ¿Errofenote'tña otteñe'chenpet?

⁶¹ Jesúsñapa' ama eñoreno, ama anapuaneto. Allempoña cornesha'pa' alla otererr:

—Te'pa' o'ch notap, nemneñ o'ch pōten pāpa' ¿pā'tña ñeñtepte' Cristotosets? ¿Ñeñtepte' Parets Puechemerep, ñeñt Parets chocma ya'ye'chochtateññañ?

⁶² Jesúsñapa' atef och:

—Napa' ñeñfenca'ye. Elloña napa' o'chca'ye notas, senterrencha' na Ñeñten Acheñetosets o'chca'ye alla nanorruerr Parets po'cohuenrof. Ñaña po'pocheño o'ch sentapuerren o'ch nesuam̄perra osof Yompor pue'ntañof.

⁶³ Cornesha'ñapa' ñeñfa e'mpa' allenta rrarre'tan pa'shtam e'ñe pat-srre'mueño, ñeñtpa' atef ot:

—Te'pa' amachca'ye ye'natsche po'psheñeñ ñeñtcha' a'metam̄psose'.

⁶⁴ Te' ama't sapa' o'ca'ye se'm̄ atef achm̄are'tenan Yompor. ¿Errofena't senteñña sa?

Ñetña allohuenetpa' atef otyeset:

—Ña po'ñoçhpa' atarrca'ye nanac achm̄are'tenan Yompor, pocte'ñaçho' te'pa' o'ch semtsatach.

⁶⁵ Allempoñapa' a'coshare'tyeset, huancacle'chet pa'clloyotpa' çhota'tyeset. Pachm̄are'teño fet atef otyeñet:

—Te'ña eñoratenperrepa' Parets allochñapa' attoch pōtey esesha'te'ña peçhota'tyene'.

Ama't guardianesha' ñetpa'çho'ña o' çhota'chet.

Atto Pedropa' a' nasotana Jesús

(Mt. 26.69-75; Lc. 22.56-62; Jn. 18.15-18, 25-29)

⁶⁶ Pedroña allempopa' patsofe'tsen pampatollo. Allempoña allpa' huapa puesheñarr coyanesha' ñeñt sherbene' cornesha'.

⁶⁷ Ñañaapa' entosan Pedro all shotenana tso'. Cohuana'tospa' atef och:

—Paca'ye e'ñe coçaye'tña Jesús ñeñt nazareto'marnesha'.

⁶⁸ Pedroña anapue'pa' çha a'nasochapa' atef och:

—Napa' amaca'ye nentareña, ama't napa' amaca'ye neñoteñeña ñeñt atef pōtenen.

Allempoña Pedropa' ahuerr, çherr allotecma be'tenet o'ch çhapuet o'pono pampo. Allempoña allenta eñen atollop.

⁶⁹ Allñapa' entuererr coyanesha' ñeñt cornesha' pueñañra. Ñañaapa' atef oterranerr ñeñt parro allo'tsa'yenet:

—Añ acheñerpa' ñeñtca'ye e'ñe parro yemtenet ahuaña.

⁷⁰ Pedroñapa' alla a'nasotererr. O'ña o'çhterrerrpa' ñeñt tomçha'tyets all, ñetpa'çho'ña atef otereterr:

—Po'ñoçhca'ye pāpa'çho'ña e'ñeca'ye parro seyemtena țarro'mar pāpa'çho'ña galileo'marnesha'pca'ye ñeñto'mar e'ñe atef peñen ñerra'm ña.

⁷¹ Allempoña Pedropa' e'ñe puehquēñoñanetpa' atfa otatse'tyerraneterr, ñeñtpa' atef otanet:

—Napa' e'ñe Yompor pa'so'chño notenes, ñerra'm amate' po'ñoçhoye' noten-sopa' te'pa' nerromuepa'. Napa' po'ñoçhca'ye ama nentareña añ yacmar.

⁷² O'ña atef otuanetpa' e'ñepa'tcha' allempocma puepocheño eñeña atollop. Allempoña Pedropa' alla yerpuerrana ñeñt atef oteñ Jesús: “Ama't e'ñe epocha amach eñena' atollop pñapa' o'ch ma'poch pā'nasotenna.” Allempoña Pedropa' allenta atarr yahuena huomenc.

15

*Allempo chapata'mueñet Jesús allo'tsen amcha'tareť Pilato
(Mt. 27.1-2, 11-14; Lc. 23.1-5; Jn. 18.28-38)*

¹ Tsapať o' taya puetarenpa' ñeñña pa'mcha'tareťernesha' pen allohuen judionesha' po'cornaneshar ñetña' apcha'mueneterr parro epuet ñeñ pompornesha' pen allohuen judionesha' ñaña añ ñeñ atarr etsotayenayeñ ñoñets ñeñ atet anaret epuet ñaña po'potantañ ñeñ po'taruas pene' o'ch a'pocatan ñoñets judioneshacop. Ñetña' cotape'chatannetset, attoña o' e'ñe a'pocata'mueñet atetcha' pa'mueñet Jesús. Jesúsña' o' huancota'tuet allempoña' anma'mueñet allo'tsen amcha'tareť Pilato (ñeñ nen gobierno' Romoť ñeñ amcha'tareťtetsa allo'marneshacop).

² Pilatoña a'pťo'tapan Jesús'pa' atet och:

—Papa' ¿pa'tña amcha'tareťtetsaña judioneshacop?

Jesúsña' atet och:

—Napa' ñeñfenca'ye atet pťoten.

³ Ñeñ pa'mcha'tareťernesha' pen allohuen judionesha' po'cornaneshar, ñetña allpa' shonte' pa'namenot otteñe'cha'mueñet Jesús.

⁴ Pilatoña' atet otererr:

—Papa' ¿are'tcha'ña panapaneto? ¿Ama't pe'muenanetoña ñetpa' pa'namenot a'metare'tampenpet?

⁵ Jesúsña' ama't e'ñe parrocha ama anapuenaneto. Ñeñto'marña Pilatopa' cha atarr cohua'napan Jesús.

*Atto amcha'tareť Pilatopa' otanet, ama'tpa' chosa muetse'ña Jesús
(Mt. 27.15-31; Lc. 23.13-25; Jn. 18.38-19.16)*

⁶ Ñehua, ñetpa' atetca'ye yechenet. E'ñe pate'tets char allempoch cherrerr pascuapo, ñeñña amcha'tareť ñeñ nen gobierno' Romoťpa' ñaña'pa' chocmach a'rroyerran puesheñarr judioneshacop ñeñ ayottam̄psareťtetsa allempo, ñeñtara ñeñ pamo'ts penet ñet. O'ch apanet erra'tsencho' enamuenet ñeñ muenenet ñet. Ñeñtpa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'.

⁷ Ñaña e'ñe allempopa' allo'tsen puesheñarr judionesha' ñeñ ayottam̄psareťtetsa ñeñtpa' añ pa'so'cheñ Barrabás. Ñehua, ñeñ Barrabás ahuaño'mchofeñ yottam̄peñet epuet po'potantañ tarro'mar ñetpa' ñetca'ye ye'chatenetña acheñenesha' atpare'chetepa'to' amcha'tareť ñeñ nen gobierno' Romoť. E'ñe patpare'teñotet o' muetset ñaña acheñ.

⁸ Allempoña acheñenesha'pa' cha'cha'tet Pilateshopa' ñetña'pa' atet otoset:

—Te'pa' o'ch pa'rroyerrnay puesheñarr ñeñ atet chocma peperrnaye't.

⁹ Pilatoña' atet otapanet:

—Sapa' ¿añe'tña semnen o'ch na'rroyerrnas ñeñ amcha'tareťtetsa judioneshacop?

¹⁰ Ñehua, Pilatopa' atet otapan acheñenesha' tarro'mar ñapa' eñotenan cornaneshachno pa'mcha'tareťernesha'pa' ñetpa' e'ñeca'ye pue'moñe'tateñme'chatsa pomueñetña Jesús.

¹¹ Tarraña ñeñ pa'mcha'tareťernesha' pen judionesha' po'cornaneshar ñetña'pa' añ atarr cotape'chatenet acheñenesha' attoch ñetpa' allohuenetpa' o'ch ochet Pilato: "Añcha' pa'rroyerrnay Barrabás."

¹² Allempoña Pilatopa' alla otarraneterr:

—Ñehua, añ ñeñ soten judionesha' pa'mcha'tareťer, ñapa' ¿erroťe'tcha'ña nepe'?

13 Ñetña puerranare'teñoŕetpa' atet otyeset:

—Ñapa' ¡pecorso'tam̄psachñaca'ye!

14 Pilatoñapa' atet oterraneterr:

—Ñapa' ¿eso'tña pen ñeñt ama't mameshapa' ama pocteye' sentapreteñe?

Ñetñapa' alla rrannarterreterr huomencpa' atet oterreterr:

—Ñapa' ¡chopañaca'yeña corso'tam̄psate'!

15 Pilatoñapa' añ atarr muenen o'ch coshatan acheñenesha' ñeñto'marña a'rroyerranet Barrabás ñeñt enamueñet. Allempoña ashtatan ñaña Jesús alloñapa' otan po'solltarneshar:

—Te'pa' o'ch secorso'tam̄peña'.

16 Ñehua, solltarnesha'ña ama aneñeta' allcha' corso'tam̄psoset arrña ñanom anmetña Jesús am̄cha'taretepahuo. Allña agotachet allohuen po'potantañ solltarnesha' ñeñt allo'tsa'yen o'ch e'ñe ap̄chet Jesúsesho.

17 Allñapa' pa'llocchame'teñoŕet Jesús chorrachet shetamuets tsamamueno' quelluemamtena ñeñt pa'shtam pen ñeñt po'ñoŕh am̄cha'tarettetsa. Pella'toñet ñaña choyo'mets agreŕhpa' ñeñtña choyo'mtchet ñeñt atet choyo'mtena ñeñt po'ñoŕh am̄cha'tarettetsa.

18 Pachmare'teñoŕetpa' atet oteñet:

—¡Puetare' am̄cha'taretecha' atarruaca' cohuenep̄te'! pa' ñeñteŕ judionesha' pa'm̄cha'taretereŕ.

19 Pueche'tatseteñoŕet asto'tame'teñet tsachp̄o poño, a'coshare'teñet, allempoña concorpana'teñet, ottenetañ ñerra'mrrate' cho' muechatse'teñet.

20 O'ña achmare'tuahuetpa' allempoñapa' rrotam̄peret shetamuets tsamamuen chorrateret e'ñe ña pa'shtam. Allempoñapa' anmet a'yo allcha' corso'tam̄peñeta'.

Atto corso'tam̄psoset Jesús

(Mt. 27.32-44; Lc. 23.26-43; Jn. 19.17-27)

21 E'ñe ahuanmatsetpa' allña oñenetpa' o' poctet puesheñarr yacma ñeñt cireneo'marnesha' ñeñt̄pa' añ pa'so'cheñ Simón ñeñt errte' huerrtsa a'yoŕ. Ñaña'p̄a' allenta chechatnomet po'corsoch. Ñeñtña Simónpa' ñeñt̄pa' añ pompor pen Alejandro ñaña Rufo.

22 Chapachet all socheñet Gólgota ñeñt yoten yeñoño Poñetallep̄no.

23 O' chapachet allpa' Jesús̄pa' aposetañ vinos ñeñt̄pa' añ atsetareŕ pueretso ñeñt atarr pesherr ñeñt otenet mirra tarraña Jesús̄pa' ama mueno o'ch orr.

24 Allempoña o' corso'tam̄pesuetpa' solltarnesha'ñapa' allenta yellsheñe'chatoñet pa'shtam po'suertoŕ attoch orrtet e'ñe puesheña'ttsetpa' o'ch yorayesñañet pa'shtam puema'tets.

25 O'ña enome'ta'muen atsne' allempoca'ye corso'tam̄psa'mueñetña Jesús.

26 Ñehua, poñoŕpa' all corsocho all noñet tsachtall aquellcareŕ attochña eñoteñet ñeñtecop corso'tam̄peñet. Ñeñtña quellecpa' atet oten: “Añpa' ñeñtca'yeña judionesha' pa'm̄cha'tareter.”

27 Allña corso'tam̄pset epuet ñaña epsheña eñeŕ, puesheñarrpa' nosñañet po'cohuenroŕ, po'psheñeñña' nosñañet pue'chcoterot.

28 Attoca'yeña etsoterraña Yompor po'ñoñ ñeñt atet anuareŕ ahuatoteñ Cristocop; ñeñt̄pa' atetca'ye oten: “Ñapa'cho'ña e'ñech attecma enteret ñerra'mrrate' ñeñt atet p̄atse'tyene' ñeñt ama pocteyaye.”

29 Ñeñtña oñmachets allpa' ñetpa'cho'ña chocma achmare'tneñet. Pachmarñoŕetpa' coño'coñtana'tyesneñet, ñeñt̄pa' atet otyesneñet:

—Pa ñeñteḡ ḡommo'cheñoṡpa' ḡotatse'te't ḡo'ch a'materrayeñ Parets pa'paquëll, poma'pamtañocmo'ch alla ḡaṡomatereñ,

³⁰te'ña'pa' ḡa'quesḡaterraña'ca'ye e'ñe ḡa'ñaña, pesuerraña'ca'yeña ṡayecma corsochoṡ.

³¹E'ñe attecma achmāre'teñ ñaña ñeñṡ pa'mcha'tareṡernesha' pen judionesha' po'cornaneshar ñaña ñeñṡ etsotayenayeñ ñoñets ñeñṡ atet anareṡ. Ñetña'pa' e'ñe parrocmā pachmāre'teñoṡpa' atet otatse'tyeñet:

—Te'ña ḡapa' o' ḡa'quesḡatyes po'potantañ, ḡaña'pa' eso'mare'tcha'ña te'pa' ama erroṡenoṡ ḡa'quesḡaterroña e'ñe ḡa'ñaña.

³²E'ñe pachmāre'teñoṡetpa' atet otyereter:

—Papa' ñeñteḡo'ca'ye Cristotostañ, ñeñteḡo'ca'ye israelnesha' pa'mcha'tareṡerpeñ, pesuerraña'ca'ye corsochoṡ allochña'pa' attoch yame'ñaḡa yañā.

E'ñe attecma pe' ñaña eñeñ ñeñṡ epuet corso'tamḡeñet, ñetpa'cho'ña atarr es otnare'chet alloṡ po'corsochoṡ.

Atto rroma Jesús all po'corsocho

(Mt. 27.45-56; Lc. 23.44-49; Jn. 19.28-30; Heb. 9.11-14)

³³O'ña ḡhap poctopa' o'huañ atsnom o' e'ñe checmetua ora erraḡaren añe patsro, o'ña ellerrotenmochapa' o' alla puetarerr.

³⁴Allempoña ellerrotenmochapa' Jesúsña'pa' rrana huomenc, ñeñṡpa' atet ot e'ñe ña po'ñoño:

—Eloi, Eloi, lama sabactani. Ñeñṡña ñoñṡsorpa' atet oten: Eso'maruachña'ca'ye Neyompor-recha' ḡa'ypo'ñerren.

³⁵Puesheña'teṡña ñeñṡ tomḡhets all ñeñṡ e'mue' atet oten Jesús, ñetña'pa' amaca'ye e'mueññañeto po'ñoñ ñeñṡ atet oten, ñeñṡo'marña ñetpa' ḡha otye-set:

—Se'mueñe't o' ḡha ḡhore'tante' Elías ñeñṡ a'mṡaye't ahuat Parets po'ñoñ.

³⁶Allempoña'pa' mata puesheñarr ñeñṡ allo'tsen, e'ḡhomosan chella'so ñeñṡ atsotso'tpo' o' ne' tsachḡopa' alloṡña tsotso'tatosañña Jesús. Ñaña'pa' atet otanet:

—Te'pa' o'ch yecue' Elías ñato'rraña o'ch huapapa' ñach a'suatose'.

³⁷Allempoña Jesús'pa' o' alla rranerrerr huomencpa' rroma.

³⁸Allempoña besom allo yottamḡeññañet Parets pa'paquëll o'ponopa' ahuepa't rra'ra'nom e'ñe poctacma, ellopa'tetsta enoteñ e'ñe sotatsohua.

³⁹Capitánña ñeñṡ romo'marnesha'pa' ñeñṡ teṡs allame'tets ñaña'pa' e'ñe entenā Jesús atto rroma, allempoña ñapa' atet ot:

—Po'ñoḡhuaca'ye añ acheñerpa' Partsepa'tca'ye Puechemer.

⁴⁰⁻⁴¹Allo'tsa'yen ñaña shonte' coyaneshaḡno, ñetña'pa' a'yota cohuanrrortenet. Ñetpa' ñetca'yeña cota'huanmue'ña Jesús Galileoteñ ñeñṡ sherḡa'yesaye't. Ñeñṡpa' María Magdalena ñaña po'psheñeñ María ñeñṡ Jacobo pachor ñaña José. Ñehua, ñeñṡ Jacobopa' puechoyomer peñ José. Allo'tsa'yen ñaña shonte' po'potantañ coyaneshaḡno ñeñṡ cota'yesaye't Jesús Jerusaléño.

Atto pampuet Jesús

(Mt. 27.57-61; Lc. 23.50-56; Jn. 19.38-42)

⁴²Atteña'pa' o' ellerren. Ñehua, ñeñṡ yeñṡatsropa' allempoca'ye ḡhocma añño'tena judionesha' ñeñṡ tsapatecop allempoch ameserreter.

⁴³Ñeñṡo'marña allempopa' Joséña ñeñṡ arimateo'marnesha'pa' ñaña'pa' ama pueṡcha'ñoṡeye' ahuoso Pilatesho o'ch oteña' pocte'ch eñch ñach a'suatose' Jesús ñeñṡ rromuets corsocho. Ñehua, ñeñṡ Josépa' atarr cohuen

acheñ, atarr am̄cha'na'tpo' enteñ allohuen ñeñt̄ parro a'pocatenet ñeñt̄ llequēna allohuen judionesha'. Ñapa'cho'ña ñeñt̄ atarr cohueñe' Yompor esempohuañencha' o'ch atarr ayochreshatterra.

⁴⁴ Allempo atet enamosan Pilato, Pilatoñapa' atet ot:

—Ta'm ¿po'ñoçhte' o' rromaña e'ñe mamecma?

Allempoñapa' agotan solltar po'cañtanerpa' a'p̄to'ch:

—¿Po'ñoçha't o' rromaña Jesús?

⁴⁵ Capitánñapa' atet otos:

—Po'ñoçhca'ye o'ca'ye rroma.

Pilatoñapa' atet otan José:

—Ñeñtepa' pa'suater corsocho'tpa' pañerca'ye.

⁴⁶ Joséñapa' allenta rañtosana emarr shetamuets, çherr corsochopa' a'suaterranña Jesús corsocho't all rromuen. Epa'tse'ch shetamtso ñeñt̄ e'ñe cohuen. Allempoñapa' aneñ allcha' pampueña'. All eñatenan mapuetpon allca'yeña nenana'ña Jesús. Allempoñapa' attome'tuerrñañ mapue' allo yotam̄pesner ñeñt̄ puepampuer pa'ch.

⁴⁷ All cohueñ María Magdalena ñaña po'psheñeñ María, José pachor. Ñetñapa' e'ñe enteñet all na'neret Jesús.

16

Atto tanterra Jesús

(Mt. 28.1-10; Lc. 24.1-12; Jn. 20.1-10)

¹ O'ña huañ yet allempo amesenet, María Magdalena ñaña Salomé ñaña po'psheñeñ María ñeñt̄ Jacobo pachor, ñetñapa' rañta'yesnenet eñmosa't ñeñt̄cha' anma'muenet tsapa't Jesús puepampro alloch a'yana'tereta' ama't rromota.

² Tsapa't allempo motta'muena yetñats temenc ñetñapa' e'ñe ahuatecma ahuanma'muenet Jesús puepampro. O'taya huapa'muena atsne'pa' allempo ahuanma'muenet.

³ Ñetñapa' otanna'tyesnomuet:

—Ta', esesha'ch a'rrote'te'ña mapue' añecmuen ñeñt̄ allo yottam̄peñet attoch yebe'tos all puepampro esheccha' ya'yana'tera' eñmosa'to.

⁴ Ñetña çapatseta all, cohuostseta entoset mapue' o' a'rrote'tare'ttena a'yene't, ama't ñeñt̄ mapue'pa' añecmuen.

⁵ Ñetña allempo be'toset puepampro allñapa' all entoset puesheñarr huepuesha' all anen po'cohuenrot̄. Pa'shtamñapa' atarr huallama't, cha torats pañet pueyoçhret.

⁶ Ñeñt̄ña mellaño'feñerpa' atet otapanet:

—Amach cha seyorenatsto. Napa' neñotenes añca'ye semnen o'ch senta'mueñ Jesús ñeñt̄ otenet nazareto'marnesha' ñeñt̄ o' corso'tam̄perret. Tarraña ña te' o'ca'ye tanterra, ama arro'tsenaro. Secueña'ca'ye all neretañ, amaca'ye eñalle.

⁷ Allempoña mellaño'feñerpa' alla otarraneterr:

—Te'pa' o'ch ahuerres o'ch sotuer Pedro ñaña po'potantañ pueyoçhresha', Jesús oten o'ch ota o'ch ahuer Galileo. Choscha'ña ahuanmatsa saña allochñapa' allcha' senter ñeñt̄ atet otase't ahuaña.

⁸ Allempoña coyaneshachno atet otare'ttet all Jesús puepampro, ñetña cha'nmaçherre'tpa' matenacma ahuanerret po'yorño'tetpa' cha yonshema'tyesnerret. Poñchaño'fet ama't e'ñe eseshapa' ama erro'tenaye' otenaye' entnerreto.

Allempo tanterra Jesúsapa' añ ñanom orrterra María Magdalena
(Jn. 20.11-18)

⁹ Ñehua, ahuatema tanterra Jesús aña yetro allempo moŧta'muenerr yetñats temenc. Allempo tanterrapa' añ ñanom orrterra María Magdalena. Ñeñña Mariápa' cancherrsheña oneñeñ ñeññ chorraye't Jesúsña' e'ñe quechpatam̄psatuer.

¹⁰ Mariáña' allenta ahua' o'ch otenana' ñeññ epuet yemte't Jesús all puellqueñoŧet atarr yahuanrrortenet.

¹¹ Ñetña allempo e'mare'chet o' tanterra Jesús, Mariápa' o'ca'ye enter, ñetña' arepa'tcha' ame'nyeto.

Allempo Jesúsapa' orrterrana ñaña epsheña pueyochresha'
(Lc. 24.13-35)

¹² Po'pocheño Jesúsapa' e'ñe po'poñoŧ orrterrana epsheña pueyochresha' allempo chopeñe'chneñet allampaño'mar.

¹³ Ñetña' allenta puerrerret o'ch otueret po'potantañ, arepa'tcha'ña ame'ñareñtappereto ñeññ atet enteret ñamet Jesús.

Atto Jesúsapa' otnerran pueyochreshachno ñetpa' atetcha' pa'yerret
(Mt. 28.16-20; Lc. 24.36-49; Jn. 20.19-23)

¹⁴ Po'pocheño Jesúsapa' alla orrterrannerr pueyochresha' charrasheña ñeññ puechetsa pa'terr all rrallme'chenet. Ñaña' atet coŧape'chatuenanetpa' atet otuenanet:

—Sapa' eso'mare'tña ama same'ñeñoña po'potantañ ñeññ sotene' napa' o'ca'ye netanterra tarro'mar ñetpa' cho'ca'ye enterrnet. Tarraña sapa' amaca'ye es sechenoyo seyo'chro.

¹⁵ Allempoña Jesúsapa' atet oterrannerr:

—Te'pa' o'ch auyeses ora errañaren allohuanen añ patser, seserrpare'tach allohuen acheñenesha' añ cohuen ñoñets alloch a'queshpatare'tterret.

¹⁶ Allohuen ama't erra'tsena ñeññcha' ame'ñerraya añ cohuen ñoñets ñaña ñeññ pame'ñeñoŧetpa' apatare'tterretcha' ñetña' a'queshpatare'tterretcha'. Tarraña ñeññcha' ama ame'ñerrtso, ñetña' amñare'tterrach coñcheñtso.

¹⁷ Ñeññcha' name'ñerraya ñocpuetpa' norrtaterranetcha' nepartsoña. E'ñe na neso'chño'ch quechpatyese'tcha' oneñeñe'chno, ñaña eñosyese'tcha' po'poñe'ttso'chma ñoñtso.

¹⁸ Ñaña ñerra'm e'ñe pototet chetetcha' shecheŋ, tarraña amach erroŧ paneto; ñaña ama'tcha' añ orret ñeññ amtsañtetsa tarraña amach erroŧ paneto. Ñaña ñerra'm esempoch a'plla'yeñet atnañeñ, atnañeñña' acrrerroche'ch.

Allempo a'terr Jesús pue'ntaño
(Lc. 24.50-53)

¹⁹ O'ña atet otuanerranet Partsesha' Jesúsapa' allenta a'tapater Pompor pue'ntaño, allña' anorrnen e'ñe Pompor po'cohuenroŧ, all partsoŧapre'tuera.

²⁰ Pueyochresha'ña' ahuanomyeset, serrpare'tyesnomuet errañaren. Partsesha' Jesúsapa' cho'chma torrapretenanet, orrtatenanet po'partsoña attoch acheñenesha' e'ñech eñotenanet ñeññ atet serrpare'tyenet, ñeññpa' e'ñe po'ño'ch Parets po'ñoñ. Ñeññpa' attetepa'ch Nompore. Allohua.

COHUEN ÑOÑETS ÑEÑŦ QUELLCA' SAN LUCAS

Ñehua, añpa' ñeñica'yeyña e'ñe pa'moter penña serrparñats

1-4 Masheñe Teófilo, ðapa' peñoteñ ahuañmo'chapa' pa'namen esocmañen ñeñŦ atet etsotayese't Jesús acheñenesesho ñeñŦ e'ñe ñanom ame'ñaya ña, ama't teme'ttsen yocpa'naña ñeñŦey o' yame'ñera yaña. Ñaña allem-poteñ Jesús pa' orrtana pa'namen acheñenesha' ñeñŦ entyesaye't e'ñe al-lame'tets. Ñetñapa' e'ñe entuoñete't allohuen ñeñŦ atet ða'yese't. Ñetñapa' serrpare'tyesete't atet oten Yompor po'ñoñ. Attoña eñotaterryetña yaña. ÑeñŦ atet eñotatyenet ñetpa' shonte' acheñenesha' quellca'yeseña ñeñŦ atet ðosa Cristo allempo huapa. ÑeñŦo'marña napa'cho'ña e'ñe pocte' nenteñ o'ch nequellconañ e'ñe ora allpon ñeñŦ atet orrtatos Jesús, tarro'mar napa' ahuañmo'choteñ atarr noctape'cheñ o'ch e'ñe neñoch errotenete'ña ñeñŦ e'ñe po'ñoch atet ða'yeseña Jesús. ÑeñŦo'marña te' arrpa' o'ch e'ñe neñotatañ ora allpon ñeñŦ o' etsotua allochñapa' attoch e'ñe peñotuer ðaña ñeñŦ allpon yeçhatenpetpa' ñeñŦpa' e'ñe po'ñoch atet. Ñehua, arrpa' atet o' etsotua.

Ñehua, te'pa' o'ch neserrpare'tatañ atto mellañoñeñpa' eñotatanet o'ch eñalleta Juan ñeñŦcha' apatañtatsa Yomporecop

5 Ahuat allempo añ añcha'tarettatse't Herodes all anetso Judeo, eñall ñaña puesheñarr ñeñŦ judionesha' po'corneshar. ÑeñŦpa' añ pa'so'cheñ Zacarías ñeñŦ çhocma yemtenana po'potantañ cornaneshachno ñeñŦ otenet Abíasona'tar ñeñŦ torratse't Yompor pa'paclo. Zacarías puetapor añ pa'so'cheñ Elisabet; ñapa'cho'ña corneshañnor ñeñŦ po'mreñeñ pen Aarón ñeñŦ corneshatatse't ahuat.

6 Ñetña epsheño'maretpa' Yomporñapa' e'ñe pocte' entenanet ñeñŦ atet penet ñet, e'ñe cohuen etsotueññañet ora po'ñoñ ñeñŦ atet anaret ahuatoteñ acheñeneshecop ñeñŦcha' atet ðohuenet. ÑeñŦo'marña ama't puesheñarrapa' amach errotenoñ otaretteto, "ama pocteyaye ñeñŦ atet sepena."

7 Ñetpa' ama eñalleto ama't puesheñarra pacñe'ter tarro'mar Elisabetpa' ama achoyore'tañeyaye. Ama't ñaña puerrollar epsheño'maret o' atta po'nme'tuenet.

8-9 Atteñapa' çhap allempo torrena allohuen cornaneshachno ñeñŦ epuet parro yemtena Zacarías atto corneshatenet Yomporecop. Ñehua, allem-popa' allohuen ñeñŦ corneshatatse't Yomporecop, ñetñapa' añ yeçhete't ahuo'ch yellsheñe'chenet allohuenet attoch eñochet po'suertoñ erra'tsencha' puesheñarrer ñeñŦcha' be'tosets Yompor pa'paclo allcha' a'çrratan ñeñŦcha' eñmosañtatsa Yomporecop. Allempoña pamtarrpa' añ orrtatsa Zacarías ñeñŦcha' be'tosets Yompor pa'paclo allcha' a'çrratan ñeñŦcha' eñmosañtatsa Yomporecop.

10 Ñehua, allempo çhap allempoch be'tosos puesheñarr Yompor pa'paclo shonte' acheñenesha' ñetñapa' allach tomçha'tet a'yot allcha' ma'yochrra'toset. Ama't allempo be'tosos Zacarías pa' atterach ma'yochrra'tet a'yot.

11 Ñehua, Zacarías allempo sherbenan Yompor o'pono, allñapa' machayotepa'tcha' orrtoña Yompor po'mllañoñeñer. Arr tomos altar

po'cohuenrot, ñeñt' altarpa' allecma a'crratenet ñeñt' eñmosat'tetsa Yomporecop, ñeñt'pa' atto sherbete't Yompor.

¹² Allempo orrtoña mellañoñeñ, Zacaríasña'papa' atarr yoren, atarr nanac mecha'ch.

¹³ Mellañoñeñña'papa' atet otosan Zacarías:

—Zacarías, amach peyorenatsto tarro'mar Yomporpa' e'muenna' ñeñt' atet penamueñ pema'yocheñot. Ñeñto'marña te' petapor Elisabetpa' eñalletaterrancha' paterr asheñorr ñeñt' e'ñe po' pechemer, ñeñt'ña'papa' pesochcha' Juan.

¹⁴ Papa' atarrcha' p'ocshena nanac. Shonte'ch acheñenesha' ñeñt'cha' nanac p'ocshapretaya atto o' eñalleta pechemer.

¹⁵ Ñapa' atarrcha' asherben enteñ Yompor. Ñapa' amach orrarñañeyaye, ama't vinosapa' amach orreñe. Ama't ñaña pa'namen ñeñt' aposa'tpotetsapa' amach orreñe ama't mamesha. Ñapa' e'ñech aña chorraya Parets Puecamquëñ. Ama't allempoteñ pachor pa'to'tsen ñapa' e'ñech chorreña Parets Puecamquëñ.

¹⁶ Allempoña mellañoñeñpa' alla otererr:

—Ñapa' cohuencha' cotape'chaterran shonte' israelena'tarnesha' allochña'papa' attoch cotape'cherret e'ñe cohuen Yomporecop ñeñt'cha' Po'partseshar perret.

¹⁷ Ñeñt'ña Juanpa' ñeñt'cha'ña ñanom orrtatsa Yomporecop. Ñapa' aña' ahuamencat' pene' Yompor Puecamquëñ atet pe't' ahuat' Elías ñeñt' a'ñtaye't Yompor po'ñoñ. Allochña'papa' attoch e'ñe cohuen amo'tstaterrana achemerete'chno puechemerasha'. Allochña'papa' ama't ñeñt' atpare'tetsapa' o'ch ame'ñaterranet ñeñt' e'ñe pocte' es pets. Attochña' cotape'chaterranet cohuen, allochña'papa' attoch agapueret Partsesha' ñerra'm esempoch orrta.

¹⁸ Zacaríasña'papa' ahuo' a'p'to'tan mellañoñeñ, ahuo' och:

—Ta', ¿errot'nochña neñoch e'ñete' po'ñoñ o'ch eñalleta cheshatoll? Tarro'mar napa' o' nepo'nme'ten; netaporpa'cho'ña e'ñe attecma' o' atarr yepo'nme'tuen.

¹⁹ Mellañoñeñña'papa' alla otererr:

—Napa' ñeñten Gabriele'tets ñeñten sherbene' Yompor. Napa' ña nellensene' attoch ne'ñorana'tapa' o'ch neñotata' añ cohuen ñoñets.

²⁰ Tarraña p'apa' ama p'ame'ñenno ñeñt' atet notene'p, ñeñto'marña te' p'apa' o'ch po'panat, amach eshec pe'ñorerro tayoteñ tarremphuach allempoch eñalleta pechemer, allempochña' pe'ñorerra. Tarro'mar po'ñoñ etsoterrach ñeñt' atet o' notua'p o'ch chap allempo onañchare't. Arrpa' allohua ñeñt' atet ot mellañoñeñ.

²¹ Atto' ellapes Zacarías o'ponopa' acheñenesha'ña'papa' cohueñet a'yot' ama cha'nerro. Atto' cohueñetpa' otanna'tet:

—¿Eso'marte' amo' cha'nerroña Yompor pa'paclo't?

²² Allempoña cha'nerpa' ama eshcaye' eñorana'tuerraneto. Ñeñt'ña'papa' otyenet pueyo'chreto, ñato' cho'te' es orrtoya Yomporecop ñeñto'marte'ña atarr ellapes o'pono Yompor pa'paclo. Ñaña'papa' ama eshcaye' eñorana'tuerraneto, potota' eñotatuerranet ñeñt' atet ent Yompor pa'paclo.

²³ Allempoña o' chap allponmat ñeñt' atto sherbenet Yompor pa'paclo, Zacaríasña'papa' o' ahuer pa'paclo.

²⁴ E'ñe allponmatatsapa' o' a'chomenta puetapor. Allempoteñña Elisabetpa' ama mueno o'ch orrterra acheñeneshesho. Ama't o' amnarnña arrorrpa' ñaña'papa' ama orrteno. Ñaña'papa' atet oten:

25 —Te'ñapa' atarr cohuen muera'na Yepapar, allochñapa' o'huañcha' allo'na pencna'ntatnennet tarro'mar napa' otyennet muechopeno'.

Atto mellañoñeñpa' eñotatanet o'ch eñalleta Jesús

26 Allempoña o' pechapña arrorr ačhomenta Elisabet, Yomporñapa' o' alla mueñerranerr po'mllañoñeñer ñeñtara Gabriel. Arr mueñe anetso Nazareto ñeñtara Galilea.

27 Allempoña chap Nazareto, allñapa' orrtosana puesheñarr shopshesha' ñeñt ama a'pllareteyaye. Ñehua, ñeñt shopshesha'pa' añ o'patenaya yacma ñeñtpa' añ pa'so'cheñ José, ño'ch yore'. Ñeñña shopshesha' arrot eñalletña David po'mrenñoñ; ñeñtpa' añ pa'so'cheñ María.

28 Mellañoñeñña allempo chap e'ñe ñeshopa' atet otos:

—O'ch nocha nehuomcha'tosep. Yompor e'ñe puemuereñoñep ñapa' atarrcha' coshaterreñ, ñapa' e'ñe pesho'tsen. Yomporpa' atarr bensare'tamñep. Ello penñtana'tueñ allohuen ñacmanesha' atto bensare'tamñenanet ñet.

29 Allempo e'man atet och mellañoñeñ, ñañapa' cha moññe'tacha, cha cotape'ch pueyo'chro:

—Ta', ¿esñe' otenenña ñeñt atet huomcha'tenen?

30 Mellañoñeñña' alla otererr:

—María, amach penñcha'tatsto, Yomporpa' atarr o' morrenterrpa.

31 Te'pa' ñachomentach, pechyore'tcha' ñeñtpa' asheñorrcha'. Ñeñña' peso'chcha' JESÚS.

32 Ñeñtcha' nanac añcha'tarettatsa. Otyesetcha' ñapa' ña Ñeñt Nanac Parets Puechemer. Pomporña ñeñtara Paretspa' ñachña ne' añcha'taret atet añcha'taretteta' pa'tañ David.

33 Atteña ñapa' añcha'tarettach Jacob po'mrenñecop ñeñtara israelnesha'. Ama't errponañapa' amach huañerro ñeñt atto añcha'tarettena ña.

34 Maríañapa' atet otapan mellañoñeñ:

—Ta'm ¿erroñenotcha'ña nechyore'tña? Napa' ama't puesheñarra encanesh'a' amarramtso yorenna'.

35 Mellañoñeñña' alla otererr:

—Paretscha'ca'ye Puecamquëñ pechapoya. Ñeñt Nanac Parets po'huamencpa' a'pomamñpsoseñcha' atet ñerra'mrrate' os ña'pomamñpene'. Ñeñto'marña cheshatoll ñeñtcha' pe'ñalletatpa' ñapa' añach e'ñe ma'yo'chrosa ñeñt atet muenen Parets. Otyesetcha' ñapa' ña e'ñe Yompor Puechemer.

36 Ñaña Elisabetña ñeñt pamo'ts pepen, ñapa'cho'ña o'totana asheñorro'toll, ama't o' po'nme'ten. Ñaña ama't oteñet muecho'ppa' te'ñapa' o' pechapña arrorr o' ačhomenta.

37 Tarro'mar Yomporpa' ama eñalle ñocop ñeñt atarr torrapo' enten.

38 Allempoña María'pa' alla oterranerr mellañoñeñ:

—Ñehua, napa' e'ñe pocte' nenteñ o'ch nesherber Yepapar ñeñt Nepartse-shar nepen. Ñeñtpa' attetepa'ch nocop ñeñt atet pōtenen.

Allempoña mellañoñeñpa' o' ahuerr.

Atto María'pa' emo'tenana' Elisabet ñeñt e'ñe pamo'ts pen

39-40 Maríañapa' allenta ahua'poma'yorñecma o'ch emo'tenana' Elisabet. All ye'chenapa' all shonte' aspentarar allara Judeo. Allempoña chap anetso all sechenapa' be'tosos Zacarías pa'paclo, huomcha'tosan Elisabet.

41 Ñañaapa' allempo e'mapan María ñeñt atet huomicha'tospa' pue'maretollña ñeñt pa'to'tsenpa' allentepa'tcha' pella. Pachorñaapa' e'ñe chorreña Parets Puecamquëñ.

42 Ñeñña eñoratene', pocsheñeshocmañen eñorena huomencpa' atet otapan María:

—Papa' o' atarr coshaterreḗ Yepapar. Papa' o' e'ñe penitana'tue ora allohuen yacmaneshačhno atto coshatenanet ñet Yepapar. Ñaña Yepaparpa' atarrcha' bensare'tamḗpennaḗ pechoyoretoll.

43 Ama't na Yepaparpa' atarr coshatenen atto pemo'tenen ama't ñeñteḗ pachor pen ñeñtcha' Yepartseshar yeperr.

44 Tarro'mar e'ñe allempocma ne'maponañ peñoñ atet pehuomicha'tosen, ne'maretollpa' e'ñe pocsheñeshoḗpa' allentepa'tcha' pella naḗo.

45 Paña te'pa' atarr cosheñtso'tseneḗ tarro'mar ḗapa' e'ñe ḗame'ña'huoña ñeñt atet otuenḗa' Yepapar. Ñeñto'marña ñeñtḗpa' e'ñech atet etsoterra ḗocop.

46 Maríañaapa' alla otererr:

—Te'ñaapa' e'ñech neyočhrocmañen na'ye'chočhtatoñ Yepapar.

47 Necamquëñohuen atarr nocsheña Yepapar ñeñt Ya'quesḗḗatañer yepen.

48 Yepapar e'ñe puemuerenoñen ñapa' entenen ama esoyayno, añana ñeñten torretsa ñocop. Tarraña te'pa' allohuen acheñenesha' ñeñtcha' mererrtsa arr patsro ñetñaapa' atarrcha' coshapreterrnet atto Yepaparpa' o' atarr coshaterren na.

49 Tarro'mar ñapa' ñeñt atarr ahuañencattetsa attoña o' orrtaton ñeñt nanac sherbets, ñeñtara Yepapar ñeñt otenet Ñeñt atarr nanac Parets.

50 Allohuen ñeñt añcha'na'tpo' entene' Yepapar, ñañaapa' čhocmach atarr muererranet ama't tayoteñ errponañohuen ama't allpon allohuen acheñenesha' ñeñtcha' mererrtsa arr patsro.

51 Ñaña ñapa' e'ñe etsotuenan ama't ñeñt atarr nanac echarr entyenet, ñaña allpon allohuen acheñ ñeñt atarr asherben entyetsa, ñañaapa' e'ñech pomnaren ḗohuerranet.

52 Ñaña ñeñt atarr ahuañencat entyetsa ñañaapa' e'ñech a'suatanrrortatuerranet allot añcha'tarettenet. Tarraña ñeñt ama esoshe'maye' entyetsopa' ñetñaapa' Yepaparcha' nohuerrahuet attotcha' añcha'na'tpo' enter allohuen acheñenesha'.

53 Ñaña ñeñt nanac es pallta'yetsa, ñetñaapa' Yepaparcha' esocmañen aphuerahuet. Tarraña ñeñt atarr esocmaneñ es echyets, ñetñaapa' Yepaparcha' puerratanḗpesuerrahuet, amach es anerreto ama't coñe'ta.

54-55 Yepaparpa' añach čhocma yenpuen israelena'tar ñeñt pueyochresha' pen ña. Amach pueserrano ñeñt atet otane't ahuañt yamo'mtayñeneshañ ñeñtcha' atet perranet ñaña allohuen ñeñtcha' po'mreñeñ perret. E'ñe atet otane't ahuañ Abraham po'mreñeñecop. Attoch čhocma muerenanet ama't errponohuañen. Arrpa' allohua ñeñt atet ačhotan María Yompor.

56 Allempoñaapa' ñato' ma'pmate' arrorr alla a'pa Elisabetesho. Alloña Mariapa' ahuer pa'paclo.

Arrpa' atto eñalleta Juan ñeñt apatañtatse't Yomporecop

57 Allempoña chap allempoch emare'ten Elisabet. Ñeñña pue'marpa' asheñorroḗoll.

58 Allohuen acheñenesha' ñeñt yečhetsa all ñesho ñaña allohuen pamo'tsesha' ñetñaapa' e'ñe coshaprechet. Tarro'mar eñoteñet Yomporpa' o' orrtatoñ atto ñapa' atarr muereña.

59 Allempoña o' posocmata'muen ñeñña asheñorroñollpa' o' tsor-
rañolle'ta'mueñet ñarro'mar ñetpa' atetca'ye yeñenet ñeñtet judioneshet.*
Allempopa' añ sochetañ Zacarías o'ch anmatoñetañ pompor pa'so'cheñ.

60 Tarraña pachorpa' otanet:

—Napa' ama nemno o'ch sesochon ne'mar Zacarías. Napa' añcha' nesoch
Juan.

61 Allempoña acheñenesha'pa' atet ochet:

—¿Eso'mare't pemneña o'ch pesoch Juan ñarro'mar ama't puesheñarra
pamo'tspa' ama eñalle ñeñ sochetsa Juan?

62 Allempoña acheñenesha'pa' e'ñe pototeta a'p'to'toñet ematoll pompor
escha' sochanña puechemeretoll.

63 Ñapa'cho'ña potota eñotatan acheñenesha' o'ch apet quellcatets allcha'
quellcan ñeñcha' sochan puechemeretoll. Allempoñapa' apet quellcatets,
añapa' atet quellca': “Añcha' yesoch Juan.” Acheñenesha'ñapa' atta cohuan-
rrochet.

64 E'ñe allempocma Zacaríasñapa' allenta eñorerra. Allorocma
aye'chochtaterran Yompor.

65 Acheñenesha'ña ñeñ yeçheta allpa' allohuenet atarr mecha'na'teñet
Yompor. Ñetñapa' serrpare'tatanna'tyeset all aspentarero Judeo.

66 Ñaña ama't allohuen ñeñ e'mare'tyese' ñetñapa' cotape'chyaset
pueyoçhreto, atet otyenet:

—Añ cheshatollpa' po'ñoçha' atarr sherberran Yompor tsapañet.

Tarro'mar Yomporpa' atarr muereña.

Atto Zacarías atarr açhotenan Yompor Parets

67 Cheshatollña pompor ñeñ Zacaríaspa' añ chorrenaya Parets
Puecamquëñ ñeñña eñoraterre' Yomporecop ñeñcha' atet perra ama't
esempo. Ñeñpa' atet ot Zacarías:

68 —Aye'chochtaterrapo'ch Yompor, ñeñtara ñeñ Po'partseshar pen allohuen
israelnesha', ñarro'mar te'ñapa' o' orrtaterrnay puemuereña ñeñcha'
ya'qeshpaterre' ñeñfey puechemer pen.

69 Ñapa' o' orrtatonay ñeñcha' a'qeshpatañtertsa ñeñ atarr ahuaamen-
cañsha' ñeñtara ñeñcha' eñalletatsa David po'mrenñoñ, ñeñtara David
ñeñ atarr sherbaye't ahuañ Yompor.

70 Ñeñpa' ahuañteñ atet eñoratyese't ñeñ a'mta'yese't po'ñoñ, ama't
allohuen ñeñ e'ñe ma'yoçhra'yestse't Partsocop.

71 Ama't ñaña allohuen allpon ñeñ ye'moñe'tene' ñeñ añcha'noçhetyetsa
yocop, ñachña ya'rroyataterre'.

72 Attoçhña etsotaterrnay ñeñ atet otane't ahuañ yatañneshañ ñeñcha' atto
çhocma muererrya. Atteña ñapa' amach pueserrano ñeñ atet a'pocstat
ahuañteñ yocop ñarro'mar ñeñpa' e'ñe Partsesho't a'pocstataretta.

73 Ñehua, añpa' atet pa' allempo Yomporpa' ahuañ otan yatañ Abraham
ñeñcha' atet perrnay e'ñe po'ñoçh.

74 Ñeñpa' atet ote't Yompor yocop ama't ñeñ allpon ñeñ ye'moñe'tene' ñeñ
añcha'noçhen yentyen ya, ñaña'pa' ñach ya'rroyataterre'. Allochña
yapa' o'huañcha' yemcha'nañ yesherber Yompor.

* **1:59** Añ ñoñets “atsorraret”, añ ñeñ otets atet yeche't judionesha'. Ñeñpa' atet: Ñerra'm allempo
eñalletena asheñorrofollesha' ñeñ e'ñe judionesha'pa' añña pomporpa' o'ch tsorratenet po'chtso.
Ñehua, ñeñ tsorratenetpa' ematollach o'ch çhapa'muen po'psocmatño. Ñehua, po'chtso allcha' tsorret
asheñorroñollpa' all e'ñech poteretollo e'ñe po'ñoñ parrmatollo.

- 75 Attoch yetsotoñ ñeñt e'ñe pocte' enten Parets allochñapa' attochña pocte' enteney ñaña acheñenesha' atto e'ñe cohuen es yeþa'yen e'ñech tarremphua esempohuach yocrena arr patsro.
- 76 Te'pa' o'ch nechemeretolle notaþ: Papa' oterrpetcha' ñeñteþo' ñeñtcha' eñorana'tena ñeñt nanac Parets. Tarro'mar þapa' þanomcha' orrtatsa attoch þa'cohuentatyesoñ allcha' oñmos Partsessa'.
- 77 Ñeñtþa' attoch þoctape'chater acheñenesha' e'ñe cohuen allochña ñetþa' esheccha' aþretnaretterret po'chñaret attoch a'quesþataretterret.
- 78 Te'pa' chapcha' allempoch Yompor e'ñe puemuerẽñoþey chapaterrnaycha' ñeñt huetsa entoþ ñeñtcha' yoctape'chaterre' e'ñe cohuen, ñeñtña coþañatserpa' ñeñtcha' ya'puetarsamþerre'.
- 79 Attochña a'puetarsamþsaretterra allohuen acheñenesha' ñeñt checmeto'tsa'yeneta, ñeñt ama eñotenaye Yompor, ñetñapa' aña o'patenahuet rromueñets ñeñtara coñcheñets. Ñeñt atto a'puetarsamþsareþey ñeñtcha'ña yeñotatene' attoch e'ñe cohuen yocsheñeshocmañen yeychena arr patsro. Arrpa' allohua huañ atto Zacaríaspa' aþhotenan Yompor e'ñe pocsheñeshocmañen.
- 80 Aña cheshaþoll Juanpa' allo'na sen atarretnomtsa. Puecamquẽñoþpa' atarr ahuamencatetnena. Ñañaþa' alla yeçhena allaþar amayo tarremphua allempo orrta israelena'tarneshesho.

2

Atto eñalleta Jesús (Mt. 1.18-25)

1 Allempopa' añ amcha'tarettatset romo'marnesha' ñeñtþa' añ pa'so'cheñ Augusto. Ñañaþa' nenan po'ñoñ ñeñtþa' atet oten: Allohuen acheñenesha' erraþaren aña patsropa' quellcatyeseþa' pa'so'cheñ.

2 Ñehua, allempo ñanom quellcatyeseþ pa'so'cheñþa', arrña anets Siriapa' añ amcha'tarettetsa ñeñtþa' añ pa'so'cheñ Cirenio ñeñt pa'mcha'tareþer pen allohuen judionesha'.

3 Ñehua, allohuenet ahuanerret pa'tañnesha' pa'netsro allochñapa' allcha' quellcatyerreta' pa'so'cheñ.

4 Ñeñto'marña Josépa' on Nazaretoþ allara anets Galileo, o'ch ahuo' all pa'netser pe't pa'tañneshañ, ñeñtña anetserpa' añ pa'so'cheñ Beléñ, allara Judeo, tarro'mar Beléño eñalleta ahuat pa'tañ David. Tarro'mar Josépa' Davidna'tarca'ye.

5 Allempoña Josépa' ahuo' epuet María o'ch quellcateneta' pa'so'cheñ. Maríaþa' José o'patenaya ño'ch yore'. Allempoña Maríaþa' aþhomenepa'to'.

6 Allempoña allo'tsa'yenet Beléño, Maríaþa' ahuepa't çhen allempoch emare'ten.

7 Alla emare't, ñeñtña pue'mareþollpa' asheñorroþoll ñeñt e'ñe po'moter þa'. Eþe' po'ño'mopa' alla þanaþolle'ch huacsþepahuo allotecma apueñet huaquesh þuerrar. Ñehua, tarro'mar alla emare'tos huacsþepahuoña' muetsopahuopa' ama esesha' epatso e'ñe poctacma esþepena acheñ ñeñt manrra'tosets all.

Atto Yompor po'mllañoþeñerpa' orrtana ñeñt cohuanþpene' po'carrneror

8 Allempo emare'ten María all Beléño ñeñte tsaproçma allampaño'tsen ñaña ñeñt cohuanþpene' po'carrneror pastemo.

9 Allñapa' machayotepa'tcha' orrtanet Yompor po'mllañoñeñer, cha pop-tana'tosanet. Ñeñtpa' Yompor po'cohuenña ñeñt' cha a'puetarsam̄psosahuet. Ñetñapa' atarr nanac mecha'trra'tapet.

10 Mellañoñeññapa' otosanet:

—Amach semcha'tatsetno choña se'mñnoten na, o'ch neñotatoses ñeñtcha' atarr socshaterre' sa ama't ñaña allohuen errañaren acheñeneshap.

11 Te'pa' socop o' eñalleta ñeñtcha' Sa'queshpatañer seperr ñeñtpa' ñeñtcha' Cristotats ñeñt' Yepartseshar yepen. Ñeñtña cheshatollpa' arr eñalleta David pa'netsro allara Beléño.

12 Te'pa' o'ch noterrser attoch señoñ ñeñt' cheshatoller. Ñeñtcha' sentos cheshatoll epare't po'ño'mo all panatolle'teñet huacshepahuo, ñeñtca'yeña Yompor Puechemer.

13 Allempoñapa' machayotepa'tcha' orrterrerr po'potantañ shonte' mellañoñeñnesha' ñeñt' o' sohuaçherrerr entot. Ñeñtña mellañoñeñnesha'pa' atarr aye'choçhtatosñañet Yompor.

14 Ate't otoset:

¡Aye'choçhtaterrapo'ch Yeyomporer ñeñt' pue'ntaño'tsen! Ama't ñaña acheñenesha' ñeñt' añe patsro'tsen cosha'rrtetepa' ñamet ñeñt' coshaten Yompor.

15 Allempoña mellañoñeñnesha'pa' sohuanerret ñeñt' cohuañpene' po'carrneror, ñetñapa' o' ahuanerret pue'ntaño. Allempoña ñeñt' cohueñe' po'carrnerorpa' allenta otanna'tyeset:

—Errotenuaca'yeña ñeñt' otenya' Yompor. O'ch ahuey Beléño o'ch yenteña' ñeñt' atet otenyeta'.

16 Allempoñapa' poma'yorñecma ahuanmuet, o'ña chapuet Beléño'pa' all entoset María ñaña José ñaña cheshatoll all panatolle'tena huacshepahuo.

17-18 Allempo entoset ñetñapa' serrpare'toset ñeñt' atet o' otuenaneta' mellañoñeñ cheshatollecop. Allohuen ñeñt' e'muene'pa' nanac cohuanrrroreyetset, otanna'tyeset:

—Ta'm errotenoñte'ñaca' o' serrpare'tosña atet.

19 Maríañapa' e'ñe ñeñtña nen pueyoçhro e'ñe ñeñtña cotape'chen ñeñt' allpon o' entua ahuañoñeñ.

20 Allempoña ñeñt' cohueñe' po'carrnerorpa' o' ahuanerret. Ate't otenaneta' mellañoñeñnesha'pa' ñetñapa' e'ñe po'ñoçh entoset. Allpon ñeñt' atet e'muet, ama't ñaña ñeñt' atet entet, ñeñto'marña ñetpa' e'ñe pa'ye'choçhtateñeshet ahuanerret, attoña ñetpa' atarr cohuentatnerrñañet Yompor.

Atto anmet cheshatoll Jesús Parets pa'paclo attoch a'pocateñeta' ñeñt' Part-socop

21 Ñehua, allempoña o' posocmata'muen, ñeñt' asheñorroçollpa' o' tsor-ratatolle'chet, ñeñtpa' atet yeçhenaña allohuen judionesha'. Allempo ñeñtña cheshatollpa' o' sochet JESÚS. Ñehua, ñeñt' so'chñets ñeñtpa' atet otenana' mellañoñeñ María ama't ahuañmo'choñeñ allempo ama açhomentena'.

22-24 Allempoña çhap allempoch a'pocachet ñeñt' atet nane't Moisés po'ñoñ ñeñtcha' atet yeçha' judionesha'. Ñehua, ñeñtña ñoñetspa' atet oten: “Ñerra'm esempoch cheyore'ten coyanesha', ñerra'm asheñorr pue'maretoll ñeñt' e'ñe po'moterpa' neñetepa' Partsocop.” Ñaña po'poñ Moisés po'ñoñ ñeñt' atet ne't, ñeñtpa' atet oten: “Muetsatenetepa' epña arot amapa' epña yepeçho'ye' ñeñtcha' net Yomporecop.” Ñeñto'marña allempo çhap allempoch a'pocatatet Yomporecop ñeñt' atet anaret po'ñoñ, ñeñtña cheshatollpa' allenta anmet Jerusaléño, allcha' a'pocachet Yomporecop.

25-27 Allempoña chapuet Jerusaléño'pa' o' be'tososet Parets pa'paclo attoch a'pocateneta' ñeñt' atet ye'chenet ñeñt' atet oten ñoñets ñeñt' anaret ahua'toteñ. Allña'pa' huapa pue'sheñarr yacma añ pa'so'cheñ Simeón ñeñt'pa' jerusaléño'marnesha'. Tarro'marña ñapa' allempocma huapaña' ñapa' añ eñotate' Parets Puecamquëñ. Tarro'mar ñeñt' acheñerpa' atarr cohuen ñeñt' atarr ma'yo'chrenaya ñeñt' cohuentetsa Yomporecop. Ñapa' ñeñt' atarr cohue'ne' esempoch huapa ñeñt'cha' a'rroyataterre' israelena'tarnesha' allochña'pa' o'ch alla atarr cosherret. Atto chapoña Parets Puecamquëñ ñeñt'ña eñotate'ne' ñapa' amach rromuena'pa' enterrancha' Yompor Puechemer ñeñt' Cristo ñeñt'cha' llesenserr esempo.

28 Huaptsapa' allenta enata'olle'tosan chesha'toll, atarr aye'cho'chtatosan Yompor. Ñeñt'pa' atet otos:

29-30 Te'ña po'ño'ch Nompore ama't'cha' nerromapa' e'ñech noc-sheñeshocmañen nerroma tarro'mar te'pa' po'ño'ch o' nenterrna'p ñeñt' o' pemñerrnay ñeñt'cha' ya'qeshp'aterre' e'ñe atet potne't ahuañmo'choteñ na ñeñten atarr pesherbene'.

31 Ñeñt'ña o' porrtaterrnay allohuenacpay ñeñt'ey pa'nameney acheñenesacpay añe patsro.

32 Ñapa' ñach sherberrets atet ñerra'mrrate' puetare' ñeñt'cha' a'puetarsam'perre' allohuen acheñenesha' ama't' ñeñt' ama israelena'tareyaye attoch ñetpa'cho'ña o'ch eñoteret ñeñt'cha' a'qeshp'atanterrtsa e'ñe po'ño'ch. Allochña'pa' attot'cha' e'ñe cohuen aye'cho'chtaterrna'p ñaña peyochresha'chno ñeñt'ara israelena'tarnesha'.

33 Ñeñt'ña pamo'mte' pen chesha'tollpa' ñetña'pa' atta cohua'na'teñet Simeón atet eñorana'tenanet pue'maretollet.

34 O' eñorana'tuanet pue'maretolletpa' allempoña'pa' enamatanet ñamet ñocpuet Yompor pa'nateña. Allempoña'pa' otoñ pachor María, ñeñt'pa' atet och:

—Peño'chepa'ch añ chesha'toll ñeñt'pa' ñeñt'ña onañche't ahua't Yompor. Ñocoppa' shonte'ch israelena'tarnesha' ñeñt'cha' ama ame'ñerrayo ñeñt'cha' chenquërrtsa. Tarraña eñall ñaña shonte' po'potantañ ñeñt'cha' ame'ñerraya ñeñt'cha' cohueno'tsenterrtsa. Tarro'mar Pomporpa' añecopña mueñer allochña'pa' ñach eñotate'rrahuet ñapa' Pomporesho't huapa. Tarraña shonte'ch acheñ ñeñt'cha' achm'are'terre'.

35 Papa' ñeñt'cha'ña atarr pellcaterre'ña pa. Atarrcha' atserr pe'muerr pellquëña e'ñech atet pe'muerr puellquëña atet ñerra'mrrate' cochllo patenpet peyo'chro. Elloña pue'sheña'tetspa' eñotate'rranetcha' erro'tente' ñeñt' atet co'tape'chyenet pueyo'chreto.

36 Allña'pa' allo'tsen ñaña pue'sheñarr coyanesha' ñeñt'pa' añ pa'so'cheñ Ana ñeñt'ecma a'm'tene' Yompor po'ño'ñ. Ñapa' año' po'señ ñeñt' sochetsa Faniel, ñeñt'pa' Aserna'tar.* Ñeñt'ña Anapa' o' atarr nanac po'nme'ten. Ñehua, allempo shopshena'pa' some'ta, e'ñe can'cherr charohua ye'chañ epuet puerrollarpa' o' rromapes.

37 Ñeñt'ña rretorrnanesha'pa' atta correna ñapue't. O' poscoch charra' puechena pa'tats char allponmat correna atta. Ñapa' e'ñe ellapene't sherbe' Yompor ama't' ñaña tsapome'tets. All Yompor pa'paclo'tpa' amach cha'nen. All atarr ma'yo'chenana Yompor. Erro'teno e'ñe puema'yocheño't Yomporpa' amach rreno ama't' coñe'ta.

* 2:36 Ñeñt'ña Aserpa' Jacob puechemer.

³⁸ Ñapa'cho'ña allempocma huapa all o' chapachet cheshatoll Jesús. Ñaña'pa' ma'yochosa, atarr parasyoso'tenan Yompor cheshatollecop. Ñeñto'marña ñapa' atarr serrpare'tatosan acheñenesha' ñeñt cheshatollecop tarro'mar o' huapa ñeñt atarr cohuen allohuen acheñenesha' ñeñtcha' a'qeshpatose' israelnesha' ñeñt pa'netser pene' Jerusaléñ.

Allempo alla puererret anetso Nazareto

³⁹ Allempoña o' a'pocstatuet ora allpon ñeñt atet anaret Yompor po'ñoño ñeñtcha' e'ñe ye'cha' judionesha' ñetña'pa' ahuanerret pa'nyeto Nazareto allara Galileo.

⁴⁰ Cheshatollña'pa' allo'na sen rrorranmats, allo'na sen huomencat-nomuets, nanac eñotnenan ñeñt atarr cohuen enten Pompor Parets, ñeñto'marña Yomporpa' atarr muereña.

Allempo alla a'pa cheshachor Jesús Parets pa'paclo

⁴¹ Ñehua, ñeñt cheshachor pamo'mte' ñetpa' atet ye'chenet pate'tets char pascuapopa' chocmach senet Jerusaléño o'ch coshapreteneta' pascua ñeñt atet ye'chena judionesha'.

⁴² Allempo chap Jesús po'charña charra' puechena epa ahuanerretter Jerusaléño, ñetpa' atetca'ye ye'chenet.

⁴³ O'ña huañ pascuapa' ñetña'pa' o' ahuanerret. Ñeñtña cheshachor Jesús'pa' alla't a'pa Jerusaléño. Pomporña ñaña pachorpa' ama eñoteñeto o'te' alla a'pa.

⁴⁴ Cha otapuetañ añte' co'ta'nen po'potantañ ñeñt parro onachenet. O'ña chope'cherret pamfarrpa' allempoñapa' o' yerpueret, e'name'tyereta' pamo'tseshesho'mar. E'name'tyereta' allo'tsen ñeñt e'ñe cheme'tyen pompor ñaña pachor.

⁴⁵ O'ña e'name'tuet ama es enterrayepa' o' alla ahuerret Jerusaléño. Allpa'cho' e'name'tuereterr.

⁴⁶ Poma'pamtañoña'pa' alla entereta' Parets pa'paclo. All anen e'ñe parro maestronesha' ñeñt atarr eñotyene' Yompor po'ñoñ ñeñt atet anaret. Jesús'pa' all e'ñotyenanet ñeñt atet serrpare'tyenetpa' o'chcho' a'pto'tyerranet.

⁴⁷ Ñeñto'marña allohuen ñeñt e'muene'pa' cha atarr cohuanrrorteñet, otyenet:

—Errotenotuañaca'yeña atarr es eñoten ñeñto'mar atarr cohuen es anapen.

⁴⁸ Allempo enter pompor ñaña pachorpa' atta cohua'ntoset. Pachorña'pa' atet otos:

—¿Eso'marte'ña ne'mare o' atarr pellcatya? ¿Ama't peñoteñe atarr yel-lquëñesha' ye'namene'p?

⁴⁹ Ñaña'pa' otapanet:

—Eso'mare'tña se'name'tenen. Ama't señotenoña napa' ñeñt pocetsa nocop o'ch netorreññaña ñeñt pocetsa Nomporecop.

⁵⁰ Ñetña'pa' ama es eñotaye ñeñt atet otanet.

⁵¹ Allempoñapa' o' coterran pamo'mte' o' cha'cherret Nazareto, ñapa' e'ñe cohuen ame'ñenana pompor ñaña pachor. Pachorña'pa' allohuen ñoñetspa' e'ñe eñotueñ pueyo'chro.

⁵² Jesús'pa' allo'na sen rrorranmats atarretnomtsa. Allo'na nanac eñotañetnena. Pomporña Parets'pa' atarr cohuen enteñ, ñaña acheñenesha'pa' atarr cohuen enteñet.

3

Allempo orrta Juan ñeñt serrpare'tosets all amayo
(Mt. 3.1-12; Mr. 1.1-8; Jn. 1.19-28)

¹ Ñehua, allempo chap allempoch amcha'tarettta ñaña ñeñt pa'so'cheñ Tiberio all Romo. Allempo chap o' amcha'tarettta charra' puechena amnar char allempoña Judeopa' añ amcha'tarettatsa ñaña Poncio Pilato. Galileoñapa' añ amcha'tarettatsa Herodes. Pa'mo'nasheñña Felipepa' ñapa' epa anetsocop amcha'tarettta, ñeñtpa' arr amcha'tarettta Iturea ñaña Traconite. Lisaniásñapa' arr amcha'tarettta Abilinio.

² Ñehua, allempopa' judionesha' añ po'corneshar penet Anás ñaña Caifás, ñeñt po'corneshar pen ora allohuen cornaneshachno. E'ñe ñeñte chararocma amcha'taretetyenet allemeñ anetso'mar e'ñe allempocma Yomporpa' eñorana'tana ñaña Juan ñeñt Zacarías puechemer ñeñt amayo'tsen.

³ Ñeñto'marña Juan allempopa' o' chopeñe'chyes erracmañen Jordanaso'mar, all serrpare'tyesnom. Ñeñtpa' atet otyesnomanet:

—Te'pa' o'ch soctape'cherr e'ñe ello cohuen Yomporecop attoch Yomporpa' o'ch peretnerrnas allohuen so'chñar, allochñapa' o'ch sapataretterra Yomporecop.

⁴ Ñeñtpa' añ serrpare'tatosanet attoch etsoterra ñoñets ñeñt anaret ñeñt atet eñose't ahuat Isaiás ñeñt a'mtaye't Yompor po'ñoñ. Ñeñt Isaiás po'ñoñ ñeñtpa' atet oten:

E'morrterrach puesheñarr po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñtpa' atetcha' oterranet: “Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pa'charretyesoñ pa'te'p.

⁵ All rrapatse'tyen patspa' o'ch e'ñe sa'muepñetyes, all pocmo'yaretyenapa' o'ch e'ñe sa'muepñetuahue, all terepe'parretyenapa' o'ch e'ñe sa'pa'charretyes, all arrorotetyena toñpa' o'ch e'ñe sepampa'huahue.

⁶ Allempoña allohuen acheñenesha'pa' enteretcha' ñeñt o' mueñerrnay Yompor ñeñtcha' ya'queshpaterre'.” Arrpa' allohua ñeñt atet aquellcare't ahuatoteñ Cristocop.

⁷ Allempoñapa' shonte' acheñenesha' huacha'tet Juanesho. Ñetpa' tarro'mar huachenet añ muenenet o'ch apatapanet Juan Yomporecop. Juanña serrpare'tatapanetpa' otapanet:

—Sapa' ama cohuenayayso atarr ashcarñañes, cha sottena ñerra'mrrate' shechpa sompor sepen. Po'ño'chca' ama eseshaye' sotenaye e'ñech sapataretteñoña o'ch sequeshperra allochñapa' amach coñchatuerrso Yompor allempoch yoro'chtatuer tsapatonet.

⁸ Napa' añcha'ña notapas o'ch sorratyes ñeñt e'ñe cohuen enten Yompor ñeñt atet pena ñeñt po'ño'ch o' cotape'cherran ello cohuen Yomporecop. Sapa' cha soteneñ seyo'chro año' es sepallteno sapa' año' e'ñe seyemtena satañ Abraham. Tarraña napa' o'ch notas amach atet soctape'chatsto tarro'mar ñeñtpa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñt senten arr o'ch a'pnasereñ Abraham po'mreneñ.

⁹ Ñeñto'marña napa' o'ch notas ñerra'm amach soctape'cherro cohuen Yomporecop o' mameshaña o'ch chaponasa attoch coñchaterres Yompor. O'ch netma'ntatasa atet ñerra'mrrate' allempo o'ch a'matamochet tsach. O' e'ñe onañchachet gach allcha' tet e'ñe allohua huañen puepallactar. Ñeñt

allohuen tsachečno ñeñt ama cohuenaye' me'tetsopa' a'mata'tueretcha' saprochetcha' all huorten tso' allcha' e'ñe a'poyatatueret.

¹⁰ Allempoña acheñenesha'pa' a'p'to'tyeset Juan, ochet:

—Ñehua, ¿eso'tña poctetsaña yocop attoch e'ñe yorrtatyes ñeñt cohuentetsa Yomporecop?

¹¹ Ñaña'panetpa' otanet:

—Ñerra'm eseshas echene' epma seshtam o'ch saḡ ñeñt ama echenaye ñeñtcha' chorrena. Ñaña ñerra'm eseshas echene' serrar o'ch saḡ ñeñt ama echenaye ñeñtcha' rrenet.

¹² Allempoña huača'ta ñaña acheñenesha' ñeñt po'taruas pene' atto cobrenan acheñenesha' quelle ñeñt gobiernocop. Ñetpa'cho'ña añecop huenet Juanesho o'ch apatarettet Yomporecop. Ñetpa'cho'ña o' a'p'to'toset Juan, atet otoset:

—Yocop Nompocha' ¿eso'tña poctetsa attoch yorrtatyes yaña ñeñt cohuentetsa Yomporecop?

¹³ Ñaña'panetpa' atet otanet:

—Ñeñt allpon quelle ñeñt e'ñe allpona enamuen gobiernopa' e'ñech allpona secobreña acheñenesha', amachña allo'na atarr aton secobra'neñe acheñenesha' quelle ñeñt e'ñech socpa'na.

¹⁴ Allempoña patantarr guardianesha' ñeñt allo'tsa'yenpa' a'p'to'toset ñamet, ñetpa' atet otet:

—Yocoppa'cho'ña ¿eso'tña poctetsa ñeñtcha' attoch yorrtatyes yaña ñeñt cohuentetsa Yomporecop?

Ñaña anapanetpa' atet otanet:

—Sapa' amach es seprratamḡsatsche acheñenesha' e'ñe se'mueñocma ñaña sa'metanḡpeñoḡ e'ñe seshquēñoḡpa'cho'ña amach es seprratamḡsatsto e'ñe attota. Ñaña ñeñt allpon tsa'tenset gobierneshoḡpa' e'ñepa'chña ñeñta cohuen socshena.

¹⁵ Acheñenesha'ñapa' atta cohueñet, pueyočhretoñapa' atta cotape'chyenet cha otenapuetañ Juanpa' ñeñte'ña Cristotets ñeñt cohuenet ahuatoteñ ñeñtcha' mueñerranet Yompor.

¹⁶ Juanña'panetpa' atet otanet:

—Napa' ama añeyayno ñeñt Cristotets, tarro'mar napa' ama't napatensoñ Yomporecop e'ñe oñochaya napatenes. Tarraña Cristo ñeñtcha' huapatsa chenta'pa' ñapa' añcha'ña chorratossa Parets Puecamquēñ ñeñt atet ñerra'm tso'. Ñapa' ñeñt atarr ahuaamencatesha', ñaña'panetpa' ama tama ahuaamencateyayno. Ñapa' ñeñtña atarr sherbets, ñaña'panetpa' ama es nesherbena attoch ama't po'sapatrechapa' o'ch nepyoñ.*

¹⁷ Ñapa' atarr ahuaamencat, ñapa' ñach acerre' allohuen acheñenesha'. Ñapa' añ toma'ntena ñeñt orrene' puehoshnat alloch shoshnan po'trigo o'ch e'ñe pue'llomrochayaña. Ñeñtña pue'llomerpa' o'ch a'yapache' o'ch añño'ch allecma añño'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeñtña tso'pa' ama emaya'pahuo ama't errponaña.

¹⁸ Juanña allpa' atet serrpare'tatyananet cohuen ñoñets ñeñt huetsa Yomporeshoḡ alloch yequeshperra. Elloneñapa' shonte' pa'namen serrpare'tatan acheñenesha' ñeñt ama pocteye' enteno Yompor.

*Allempo apataretta Jesús Yomporecop
(Mt. 3.13-17; Mr. 1.9-11)*

* **3:16** Ñeñt atet po'taruas pe't ahuat esclavos o'ch pueyan pamo'mte' po'sapatrech.

19-22 Allempoña o' atarr apataretta shonte' acheñenesha' Yomporecoppa' cho apatarettatsa ñaña Jesús. E'ñe apataretetuatsapa' o' ma'yocha. Allempoña ma'yochenapa' enetñapa' ahuepa't atorareta. Alloña e'ñe sohua'nma Parets Puecamquëñ e'ñe atet entapet ñerra'mrrate' yeḗ o' sohua'nma entoḗ. E'ñe arr chap Jesúsesho. Cha e'morrtatsa ñoñets entoḗ atet eñorena Yompor. Ñeñña ñoñetspa' atet oten:

—Papa' ñeñteḗ Nechemereḗ ñeñteḗ atarr nemorrentena, ḗa atarr nanac nocshatene'.

Allempoña amcha'taret Herodespa' o' yottamḗpsatan Juan tarro'mar Juanpa' eñotach ama pocteye' enteñe ñeññ atet ḗatse'tyena. Ama't pa'mo'nasheñ Felipe puetaporpa' o' yoramḗper. Ama't shonte' pa'namen ñeññ atet ḗatse'tyena Herodespa' elloñapa' o'cho' yottamḗpsaterranerr ñaña Juan.

Arrpa' all aquellcaret allohuen pa'so' chñechno ñeññ pa'tañneshañ pen Jesús (Mt. 1.1-17)

²³ Ñehua, Jesúsapa' allempo orrta o' torra'mochana ñeññ po'taruas pen Pomporecop, allempoña po'charñapa' ñato' o'te' chap ma'poch charra' char. Acheñenesha'ñapa' aña pompor ḗateñet ñeññ José. Ñehua, Josépa' Elí puechemer,

²⁴ Elípa' Matat puechemer, Matatpa' Leví puechemer, Levípa' Melqui puechemer, Melquipa' Jana puechemer, Janapa' José puechemer,

²⁵ Josépa' Matatías puechemer, Matatíaspa' Amós puechemer, Amósapa' Nahum puechemer, Nahumpa' Esli puechemer, Esliapa' Nagai puechemer,

²⁶ Nagaipa' Maat puechemer, Maatpa' Matatías puechemer, Matatíasapa' Semei puechemer, Semeipa' José puechemer, Josépa' Judá puechemer.

²⁷ Judápa' Joana puechemer, Joanapa' Resa puechemer, Resapa' Zorobabel puechemer, Zorobabelpa' Salatiel puechemer, Salatielpa' Neri puechemer,

²⁸ Neripa' Melqui puechemer, Melquipa' Adi puechemer, Adipa' Cosam puechemer, Cosampa' Elmodam puechemer, Elmodampa' Er puechemer,

²⁹ Erpa' Josué puechemer, Josuépa' Eliezer puechemer, Eliezerpa' Jorim puechemer, Jorimpa' Matat puechemer,

³⁰ Matatpa' Leví puechemer, Levípa' Simeón puechemer, Simeónpa' Judá puechemer, Judápa' José puechemer, Josépa' Jonán puechemer, Jonánpa' Eliaquim puechemer,

³¹ Eliaquimpa' Melea puechemer, Meleapa' Mainán puechemer, Mainánpa' Matata puechemer, Matatapa' Natán puechemer,

³² Natánpa' David puechemer, Davidpa' Isaí puechemer, Isaípa' Obed puechemer, Obedpa' Booz puechemer, Boozpa' Salmón puechemer, Salmónpa' Naasón puechemer,

³³ Naasónpa' Aminadab puechemer, Aminadabpa' Aram puechemer, Arampa' Esrom puechemer, Esrompa' Fares puechemer, Farespa' Judá puechemer,

³⁴ Judápa' Jacob puechemer, Jacobpa' Isaac puechemer, Isaacpa' Abraham puechemer, Abrahampa' Taré puechemer, Tarépa' Nacor puechemer,

³⁵ Nacorpa' Serug puechemer, Serugpa' Ragau puechemer, Ragaupa' Peleg puechemer, Pelegpa' Heber puechemer, Heberpa' Sala puechemer,

³⁶ Salapa' Cainán puechemer, Cainánpa' Arfaxad puechemer, Arfaxadpa' Sem puechemer, Sempa' Noé puechemer, Noépa' Lamec puechemer,

³⁷ Lamecpa' Matusalén puechemer, Matusalénpa' Enoc puechemer, Enocpa' Jared puechemer, Jaredpa' Mahalaleel puechemer, Mahalaleelpa' Cainán puechemer,

³⁸ Cainánpa' Enós puechemer, Enóspa' Set puechemer, Setpa' Adán puechemer, Adánpa' Yompor puechemer.

4

Allempo oneñeñpa' topatenan Jesús, mueneñ o'ch atet p̄atan Jesús ñeññ ama pocteye' enteno Yompor

(Mt. 4.1-11; Mr. 1.12-13)

¹ Allempoña Jesúsapa' o' err Jordanasot̄. Ñañaapa' añ e'ñe chorrenaya Parets Puecamquēñ ñeññña anmue'ña all amayo.

² Attoña allpa' o' huapoña oneñeñ, mueneñ o'ch atet p̄atyes ñeññ ama pocteye' enteno Pompor. Allñapa' ama rreno e'ñe añña torrena attoch et-sotuan ora allohuen ñeññ cohuentetsa Pomporcop. Ñeñño'marña ama't o' pa'tatsoch çharramatpa' ama't coñe'tapa' ama es rreno. O'ña pa'tatsoch çharramatuapa' cho cheporratsa.

³ Allempoña oneñeñ atto topatosan Jesúsapa' atet otos:

—Pa ñerra'm po'ñochte' Parets Puechemerep̄pa' o'ch p̄ot: Añ mapue' puenasepa' pan.

⁴ Jesúsñapa' atet otaṗ:

—Napa' ama nemno o'ch atet neṗa tarro'mar Yompor po'ñoñ ñeññ anuaret̄ ahuatoteñ ñeññpa' atet oteney: “Allohueney acheñeneshohueneypa' ama e'ñe rreñtsa ñapueṗ yocrrañ yepeno. Añe'ñaña yocrrañ yepen yecamquēñecop ñeññ allohuen allpon oteney Yompor.”

⁵ Allempoña oneñeñpa' o' aneññ all atarr aspen̄to e'ñe a'noso. Allotña gatye-suererr allohuen ñeññ allpon all añcha'taretetyena pa'namen acheñenesha' ñeññ yeçha'yetsa errap̄aren añe patsro. Allotña ama't mamesha cohuospa' e'ñe orre'tuena erracmañen.

⁶⁻⁷ Oneñeññaapa' alla oterranerr Jesús:

—Ora allohuen ñeññ o' pentyesua ñeññpa' e'ñe nocma tarro'mar ñeññpa' na aparet̄. Ñerra'm esesha' nemnen o'ch naṗpa' napa' naṗcha'ca'ye. Ñeñño'mar te'pa' o'ch notaṗ, ñerra'm na pema'yochēñōten o'ch peconcorpana'tna, napa' napaṗcha' ora all añcha'taretetyenet all atarr cohuentatyeñet, e'ñe ora allohuen ñeññpa' e'ñech p̄ocma.

⁸ Jesúsñapa' alla otererr:

—Te'pa' o'ch orrerreṗ oneñeñe. Napa' ama nemno o'ch atet neṗa tarro'mar Yompor po'ñoñ ñeññ anuaret̄ ñeññpa' atet oteney: “Añach ñapueṗ yema'yochena Yeyomporer ñeññ Yepartseshar yepen, e'ñech ñap̄ta yesherbe'.”

⁹ Allempoña oneñeñpa' o' anerranerr Jesús Jerusaléño. Allñapa' a'tapatos nanac eno allohuanen Parets pa'paquēll. Allñapa' otuererr:

—Papa' ñerra'm po'ñochte' Parets Puechemereṗ te'pa' p̄omacha arrot tarro'mar amach p̄a'tserrṗo

¹⁰ tarro'mar Parets po'ñoñ ñeññ anuaret̄ ñeññpa' ama'tña atet oten: Yomporpa' o'ch mueñonaṗ po'millañoñeñrenesha' ñeññcha' pecuañṗsapue'.

¹¹ Ñetcha' p̄agapapuet o'ch enatapapet attoch amach p̄a'tserrṗatca'toso map̄yo.

¹² Allempoña Jesúsapa' alla otererr:

—Añpa'cho'ña anuaret̄ Yompor po'ñoño, ñeññpa' atet oten: “Amach ya'llocchame'tatsche Yeyomporer ñeññ Yepartseshar yepen.”

¹³ Allempoña oneñeñ topatuahuan Jesús pa'namenotpa' o' ahuerer o' caçhpa'ner allponmat tarro'mar oneñeñ çhocma topach.

*Allempo e'ñe ñenmã torrena Jesús Partsocop all Galileo
(Mt. 4.12-17; Mr. 1.14-15)*

¹⁴ Allempoña Jesúsapa' o' alla ahuerr Galileo. Ñapa' añ atarr ahuamencat pene' Parets Puecamquëñ. Errañaren Galileo'mar o' e'ñe e'mare'tuet ñeñt atet pa'yena Jesús.

¹⁵ All apcha'yena judionesha' po'prahuetopa' ñañaapa' all yechatyenanet. Attoña allohuen acheñenesha'pa' atarr cohuen enteñet.

*Allempo serrpare'tatan Jesús acheñenesha' all Nazareto
(Mt. 13.53-58; Mr. 6.1-6)*

¹⁶ Atteñapa' o' alla çherr Nazareto all yeçhache't pompor allempo cheshena'. Pamtarrña allempo çhap yet allempo çhocma amesen judionesha', Jesúsñaapa' o' ahua' judionesha' po'prahuo, ñapa'çho' atet yeçhena. O' çhap puerahuopa' allñaapa' tomos allcha' lleyatan acheñenesha' Yompor po'ñoñ.

¹⁷ Allñaapa' añ apet libro ñeñt allo'tsen Isaías po'ñoñ ñeñt a'mtaye't Yompor po'ñoñ ahua't. Ñañaapa' toran libropa' all entan ñoñets ñeñt atet aquellcare't ñocop, ñeñtñaapa' atet oten:

¹⁸ Napa' añ nechorrenaya Nompor Puecamquëñ tarro'mar ña nellsense' nach serrpare'taterre' ora allohuen acheñenesha' ñeñt atarr es palltetsa. Napa' añcha' neñotatterranet cohuen ñoñets ñeñtapa' alloch qeshperret. Ñaña añecopña llesenserren attoch nach a'crratyerre' allohuen ñeñt mueroçhetyetsa puellquëño't pueyoçhreto. Nach eñotatterre' ñaña ñeñt ayottam'psaretetyetsa allochñaapa' o'ch atoram'psaretterret. Nach eñotatterre' ñaña ñeñt ama entetso allochñaapa' o'ch enterret. Ñaña ñeñt amuroçhtataretetyetsa nachña a'rroyataterrahuet.

¹⁹ Ñaña napa' añecopña llesenserren nach eñotatterrahuet te'pa' o' çhap allempo pocte' enteñ Yompor o'ch atarr orrtatterranet puemuereña. Ñehua, arrpa' allohua ñeñt allpon lleyatanet Isaías po'ñoñ.

²⁰ O' lleyatuanetpa' o' alla e'tam'perran libro apuerran ñeñt sherbets all puerahuo. Allempoñaapa' o' alla anorruerr. Allohuenña acheñenesha' ñeñt puerahuo'tsa'yen ñetñaapa' atarr cohuanrrorteñet Jesús.

²¹ Ñañaapa' atet otanet:

—Atto' o' se'mhua añ ñoñetspa' te'ñapa' o' e'ñe çherr attoch e'ñe etsoterra ñeñt atet aquellcare't ahua'toteñ.

²² Allohuenña acheñenesha'pa' e'ñe cohuen eñora'yenet Jesúsocop. Atarr coçhnesha' enteññañet po'ñoñ ñeñt atet serrpare'tatyenanet. Ñetñaapa' atet otanna'tyenet:

—Erroteno'tuañaca'yeña atarr coçhnesha' serrpare'tatyeney. Ñapa' añaca'ye José puechemer.

²³ Jesúsñaapa' atet o'terraneterr:

—Sapa' ñeñt atet o' se'mare'ton ñeñt atet norrtatyena' ahuaña Capernaumo te'ña sapa' çha semneñ o'ch soten añ ñoñets ñeñtecma muene' yotannena ama't ahua'toteñ: “Pa ñeñte'p a'crratañtetsa te'pa' o'ch pa'crrata e'ñe pa'neña”, tarro'mar sapa' añte' semnen o'ch atet norrtat ñaña arr cohuen e'ñe ya ya'netsro atet norrtatena' ahuaña Capernaumo.

²⁴ Tarraña napa' po'ñoçh o'ch notas:

—Ñeñt a'mtene' Yompor po'ñoñ ama't puesheñarra ama eñalleña ñeñt e'ñe cohuen enten allohuen pamo'tsesha' ñeñt parro yeçhenet all e'ñe ñet pa'netsreto.

25-26 Napa' po'ño'ch te'pa' añcha' neyerpatasa ñeñt atet pe't Elías ñeñt a'mtaye't Yompor po'ñoñ ahuat. Ñehua, allempopa' o' ma'pa char ñaña po'poñ pueshmet charpa' nanac chares ama't mameshapa' ama huateno ñeñto'marña orrta muecheñets erracmañen all anetso ñeñt Israel all yeche't Elías. Ñaña ama't shonteñ israelena'tar ñeñt rretornaneshatyets allempo, tarraña Yomporñapa' ama alleye' mueñanoña Elías attoch yenposan ama't puesheñarra rretornanasha' ñeñt e'ñe pamo'ts pen ña. Arra mueñe po'poñ anetso ñeñt pa'so'cheñ Sarepta ñeñt allara Sidón allo'tsen puesheñarr rretornanasha', ñañaapa' ñeñta yenpos.

27 Elloña o'ch alla neyerpaterrser po'poñ ñeñt atet pe't ñaña Eliseo, ñapa'cho'ña ñeñt a'mtaye't Yompor po'ñoñ ahuat. Ñehua, allempopa' shonte' israelena'tarnasha' ñeñt osyen puetsarñats ñeñt otenet lepra all anetso Israel all yeche't Eliseo. Tarraña ama't atteñ ama't puesheñarro'tapa' ama a'crratereña Eliseo e'ñe all Israelo. Ñapa' aña a'crraterr ñeñt po'poñena'tar acheñ ñeñtpa' añ pa'so'cheñ Naamán ñeñtpa' po'poñ anetso'marnasha'; ñeñt pa'netser penpa' añ pa'so'cheñ Siria.

28 Acheñenesha'ña allempo e'met ñeñt atet yerpatanet Jesúsapa' ñeñtña atarr atsrre'matahuet allohuenet ñeñt puerahuo'tsa'yen.

29 Ñetña tantrra'tetpa' o' mueño'teret allot pa'netsreto't. Cheta'neret, allotpa' arr anmet allohua huañen pocoll allot e'ñe atserettena allcha' huapore'chet attoch muetsatachet.

30 Tarraña ama't huapore'chetañ, Jesúsñapa' o' chope'chnerr ama't all shontena acheñenesha'. Ñañaapa' all cheta'tnerra rro'chopa' o' ahuerr.

Allempo Jesúsapa' entap puesheñarr yacma ñeñt chorrena oneñt
(Mr. 1.21-28)

31 Allempoñapa' o' alla ahuerrerr anetso Capernaumo allara Galilea. Pam'tarrña allempo chap yetñats allempo amesen judionesha' ñañaapa' o' ahuo' po'prahuetō. Allñapa' ye'chatyesosan acheñenesha'.

32 Ñeñt atet ye'chatenanet, acheñenesha'ñapa' atta cohuanrrorteñet. Tarro'mar ñapa' atet ye'chatenanet ñerra'mrrate' ñeñt allsensarettetsa Partseshot.

33 Puesheñarrña yacma ñeñt allo'tsen puerahuo, ñeñtñapa' añ chorrenaya oneñt. Ñaña rranare'tapa' atet otapan Jesús:

34 —¿Eso'mare'tcha'ña erro't pe'posey Jesúsō, pa' ñeñte'p nazareto'marneshap? Añecopte' pehuapa o'ch pa'chencaterrey. Napa' o' neñotapap. Papa' atarr Partso'p añ pellsensene' Pompōr ñeñt atarr nanac Parets.

35 Tarraña Jesúsapa' ama muenache o'ch eñorana'cha. Ñañaapa' atet och:
—Pemma, te'pa' cho'pañña ca'chpa'nerre'ña añ acheñer.

Oneñtñapa' cha atanman yacmapa' alla o'shshe'ma e'ñe all shontena allohuen acheñenesha'. Allempoñapa' o' ca'chpa'ner e'ñe atta, ama erro't pa'nme.

36 Acheñenesha'ñapa' cha atarr torats'panet pueyo'chret. Ñetñapa' atet otanna'tyeset:

—Ta'mca'ye, erro'tente'ca'yeña Jesús po'ñoñ, atarrep'a't huomenc po'ñoñ pen. E'ñe atet ñerra'mrrate' ñeñt allsensarettetsa ñeñt atarr ahua'mencatesha'. Ama't oneñt erro't otenpa' atet'cho' pateñ. Po'ño'chca'ye te'pa' o' cha'nerr oneñt.

37 Allempoñapa' erracmañen allampaño'mar serrpare'tyeset ñeñt atet pena Jesús.

Allempo a'crratosan Jesús Simón Pedro pa'so'mue

(Mt. 8.14-15; Mr. 1.29-31)

³⁸ Allempoña Jesús pa' čha'nerr puerahuot o' ahuo' ñaña Simón pa'paclo. Allña Simón pa'so'muepa' čha atsnaten, čha atarr nanac hueraten. Otapet Jesús:

—Te' yapa' yemneñ o'ch pa'crratos atснаñeť.

³⁹ Allempoña Jesús pa' o' ponmosana atснаñeťpa' čha a'huañañpsose'ña po'urateña. Allempoña o' metua po'urateña pa' allenta tanta o' agapapanet e'ñe cohuen o' yema'tapanet.

Allempo Jesús pa' a'crraterran shonte' pa'namen atснаñeťečho

(Mt. 8.16-17; Mr. 1.32-34)

⁴⁰ Ñeñe yetrocma allempo o' emuena atсна'pa' acheñenesha'ña allohuenet ñeñť atсна'tyets pamo'tsesha' ñetña pa' o' huapatyesnenet atснаñeť e'ñe Jesúsesho. Ñaña pa' na'yesapanet pot ñesheto puesheña'ttset, attoña a'crratyesapanet allohuenet.

⁴¹ Ñaña shonte' acheñenesha' cačhpatatyesapanet oneñeť ñeñť puerranarot otnomue' Jesús:

—Papa' ñeñtep e'ñe po'ñoč Parets Puechemerep.

Tarraña Jesús pa' a'mtsoñeñtanet, ama muenataneto o'ch eñorana'tnomet, tarro'mar ñetpa' e'ñe eñotnomet ñapa' ñeñť Cristotets.

Allempo Jesús pa' serrpare'tatyesnoman acheñenesha' erraparen Galileo'mar
(Mr. 1.35-39)

⁴² Tsapaña o' puetarenpa' Jesúsña pa' ahua'muen a'yo all ama acheñempaño yaye. Acheñenesha'ña pa' e'name'ta'mueñet. Atteña pa' o' čhapa'muenet allo'tsen Jesús. Ñetña pa' ama mueneñeto o'ch erra sa'nmanet.

⁴³ Ñaña pa' atet otapanet:

—Napa' añ poctetsa nocop o'ch ahuen po'poñ anetso'mar, allpa'čo'ña o'ch neserrpare'tatyesnomanet ñeñť cohuen ñoñets, o'ch neñotatyesosanet Yompor po'cohuenña ñeñť attoch ayochreshattena ña, tarro'mar napa' ñeñtecopña llesenserren Nompor.

⁴⁴ Atteña pa' o' serrpare'tatyesnoman acheñenesha' erraparen Galileo'mar all apča'yenet po'prahueto.

5

Atto Jesús rromatosanet shonte' cac

(Mt. 4.18-22; Mr. 1.16-20)

¹ Allempoña po'pocheño Jesúsña pa' e'ñe sa'patopño ten, ñeñťña sa'ppa' añ pa'so'cheñ Genesaretas. Allña pa' huacha'toña shonte' acheñenesha' o' čha echta'tatse'tanna'toset. Attoña ama't Jesús pa' o'ča echta'toset. Ñetpa' añ muenenet o'ch e'mñotosñañet Yompor po'ñoñ.

² Jesúsña pa' all entosan epna noñť e'ñe all sohua'puetso. Ñeñťña po'taruas pene' ñeñť rremuene' cacpa' ñetña pa' ama po'noñť'tsa'yeneto. Ñetpa' o' ahuanmuet a'yeneť allcha' tsama'teneta' po'terraya.

³ Jesúsña allpa' a'tapos puenarr noñť, ñeñť Simón po'noñť. A'tapos pa' otan Simón:

—Pechtampsen mame' rročha'soneť.

Jesúsña anorros noñťopa' allotña yečhatosan allohuen acheñenesha'.

⁴ Allempoña serrpare'tatuanet, o' alla oterranerr Simón:

—Te'pa' o'ch ahuep rročha'soneť epopa' o'ch alla peterrayerrerr, te'pa' perrma'ch shonte' cac.

⁵ Simónñapa' atet och:

—Yapa' o' Maestrocha' e'ñe yarepen torratsa terrayats e'ñe orrena ama't parra cac ama yerrmueñe. Te'ña paca' notene' o'ch alla neterrayerrerr ama'tpa' atetcha' neña o'ch alla neterrayerrerr.

⁶ Allempoñapa' atetcho' pet, o' alla terrayerreterr. Terrayañapa' shonte' rroman cac nanac aton, cha muene' rrarre'tatan terraya.

⁷ Atteñapa' agochet po'potantañ pamo'tset ñeñt po'noñto'tsa'yen o'ch hua-puet ñeñtcha' rromapretahuet cac. O'ña chapuet o' esha'tanatet cac noñto e'ñe epno'mar chorreres cac noñto, cha muene' esha'tatan noñt.

⁸ Allempoña atet eñch Simón Pedro ñaña' poma'yorñecma ponmana Jesús, concorposa pa'rrpōt, all otos:

—Amach Partshacha' allo'na peyemtatsennno tarro'mar napa' ñeñten atarr ochñaen.

⁹ Atet otan Jesús pueyorñoñ tarro'mar eñoteñ ñeñt atto rreman shonte' cacpa' Parets atet patene'. Ama't allohuen ñaña ñeñt epuet taruasenetpa' atarr nanac yorenēt.

¹⁰ Ama't ñaña Jacobo ñaña Juan ñeñt Zebedeo puechemerasha' ñeñt parro taruasen Simón, atarr nanac yorenēt. Allempoña Jesús'pa' atet oterranerr Simón:

—Amach cha peyorenatsto. Ñeñt atet pepena ahuatoteñ e'ne' cac te'ñapa' atetcha' peperra e'nerre' ñaña achen ñeñtcha' pame'ñaterra.

¹¹ Allempoñapa' ahuanperret o'ch etsotuerret allecma etsotenet. Ñetñapa' allempocma sohuanmuet allohuen ñeñt allpon echyenet. Allempoñapa' coteret Jesús attoch pueyochresha' perranet.

Atto Jesús a'crraterran puesheñarr yacma ñeñt aptsarñat
(Mt. 8.1-4; Mr. 1.40-45)

¹² Allempo po'pocheño Jesúsñapa' alla cherrerr po'poñ anetso. Allñapa' huapoña puesheñarr yacma ñeñt osen puetsarñats ñeñt otenet lepra, atarr apochtateñ. Entosan Jesús'pa' alla rromañpsosya. Allña rromuenapa' allotña enamosan Jesús, atet otos:

—Ayochreshate ñerra'm pa muenatspa' pa ñeñtep atarr ahuaencateshaḡ pa'crrataye'cherren allochñapa' attoch e'ñe cohuen entuerren achenenesha'.

¹³ Jesúsña anretapa' allenta a'pille', atet och:

—Napa' nemneñca'ye, metuerrepa'ña peptsarña attoch e'ñe cohuen enter-reḡ allohuen achenenesha'.

Yacmañapa' allorocma metuer pueptsarña.

¹⁴ Jesúsñapa' alla otererr:

—Te' atto o' na'crraterreḡpa' ama't e'ñe puesheñarrapa' amach pōtapsa'tatsche. Corneshachña pegatena' all peptsarse't. Atet nane't Moisés ñoñets añ achenrecop ñeñtcha' a'crratare'terrtsapa' te'ñapa' o'ch es panom ñeñtcha' papos all ñeñt Yomporecop. Allochñapa' attoch e'ñe cohuen enterreḡ allohuen achenenesha'.

¹⁵ Elloña atarr nanac serrpare'tyeñet, o' erracmañen epa'hua atto' pena Jesús. Ñeñto'marña shonte' achenenesha' hua'cha'toñet attoch e'mñotoñet po'ñoñ ñaña attoch a'crratyesapanet allohuen pa'tsnañe'teret.

¹⁶ Tarraña ñapa' errotenopa' o'ch ahuer a'yo all ama achenempaño'yaye allcha' ma'yochena.

Atto Jesús a'crraterran ñaña ñeñt echarrtaña
(Mt. 9.1-8; Mr. 2.1-12)

17 Po'pocheño allempo Jesúsapa' all ye'chaterranerr shonte' acheñenesha', allña allpononetpa' all anorrcha'tyen ñaña patantarr fariseonesha' ñaña ñeññ atarr etsotayenayeñ ñoñets ñeññ atet anaret judioneshacop. Ñetpa' pa'namen anetsot hua'cha'tyenet—Galileo' ñaña Judeo' ñaña Jerusaléño'. Jesúsña' atarr ahua'menca' peñ Pompor, attoña a'crratyesan shonte' ñeññ atsna'tyets.

18 Atteña o' huapatoñet ñaña echarraña, huapatam'pset puechecna'po'. Ñetpa' añ muenenetañ o'ch be'toset o'ch e'ñe noset Jesúsesho.

19 Tarraña shonte' acheñenesha' ñeñño'marña ama eshcaye' abe'tosetoña atsnañe'ñ attoch 'chapachet e'ñe Jesúsesho. Atteña' a'tapatoset eno' pocollato. Allña' o' a'rrote'toset pate'prarr echet alloña a'suata'm'pset echarraña puechecna'pe'na. Attoña 'chapachet e'ñe rro'cho allo'tsen Jesús.

20 Jesúsña' eñotapanet ñetpa' atarr nanac yemteñet, ñeñño'marña atet otapan echarraña:

—Masheñcha' te'ña pa' po'chñarpa' o' a'pretna'huare'tta.

21 Otue' atetpa' añña fariseonesha' ñaña ñeññ atarr etsotayenayeñ ñoñets ñeññ atet anaret judioneshacop, ñetña' otatse'tet ñañeñeta:

—Esesha'huañaca'ye o' achm'are'tañña Yompor. Arr patsropa' ama't puesheñarra ama eñalleña ñeññ peretnene' ochñarets, ñapña Yompor peretnene' ochñarets.

22 Jesúsña' eñotapanet ñeññ atet otenet ñocop, ñaña' atet otanet:

—Sapa' eso'mare'tcha'ña atet soctape'chatse'tyesña seyo'chro.

23 Ñehua, sapa' 'cha soten ñeññ atet o' notue echarraña po'chñarpa' o' a'pretna'huare'tta, ñeñña' ama torrapahuoyaye. Sapa' añña atarr torrapo' senten attoch na'crrater 'choncha'ña ote': "Petantena, pechope'chnen."

24 Ñehua, napa' o'ch neñotatas na Ñeññen Acheñetosets, napa' apareten llesens attoch nach peretnerre' ochñarets añ patsro.

Ñeñño'marña Jesús allempopa' atet otan echarraña:

—Te'ña napa' o'ch nota'p: Petantena, pechta'nen pemue' o'ch pechope'chnen, ahuenep' pepaclo.

25 E'ñe otue' atetpa' echarrañaña' 'cha tantetsa e'ñe allorocma. Allohuenña acheñenesha' e'ñe entueñet. O' cheta'nenan po'mue' pa'ye'chochtateñesha' Yompor o' ahuen pa'paclo.

26 Allohuenña acheñenesha'pa' 'cha atarr cohuanrrortapueñet. Attoña ñetpa'cho'ña atarr cohuentatyeyñañet Yompor. Allohuenetña' atarr nanac yorennet, atet otyenet:

—Te'pa' o' yenterr ñeññ ama't ahua'tapa' ama yentareña ya ñeññ atarr cohuen.

Allempo Jesúsapa' hua'ña'nman Leví attoch pueyochresha' per (Mt. 9.9-13; Mr. 2.13-17)

27 Allempoña' o' ahuererr Jesús. All oñempa' all entnoman puesheñarr ñeññ po'taruas pene' o'ch cobrenan acheñenesha' quelle ñeññ gobiernocop. Ñeñña' añ pa'so'cheñ Leví*. Alla anen allecma ap'chenet quelle ñeññ gobiernocop. Jesúsña' otosan Leví:

—Te'pa' po'cta'n attoch neyochresha' nepperre'p.

28 E'ñe otue' atet Levíña' 'cha tantnomtsa o' co'tan Jesús. Attoña ñapa' e'ñe sohuanman ñeññ allohuen pa'namen.

29 Allempoña' 'chapa'muen ñaña pam'tarr allempo Leví pa'paclo'pa' ye'chcatatan shonte' rreñets attoch coshame'tam'pesyet Jesús. All

* 5:27 Levípa' ñeññara ñeññ sochenet Mateo.

rrallme'chapreteñ shonte' acheñenesha'. Allo'tsa'yen ñaña ñeñt̃ parro yemtena Leví. Ñetpa'cho'ña ñeñtareta ñeñt̃ po'taruas penet o'ch cobra'yenet acheñenesha' quelle ñeñt̃ gobiernocop, tarraña ñetpa' puehquẽño'te'na cobreñet acheñenesha' aton. Ñeñt̃ rrallme'chapretene' Jesús.

³⁰ Fariseonesha' ñaña ñeñt̃ atarr etsotayenayeñ ñoñets ñeñt̃ atet anaret, ñetñapa' sasare'teññañet Jesús pueyochresha'. Atteñapa' otarettet:

—Ta'm, eso'marte'ña serrallme'chapreteñña añ acheñeneshar ñeñt̃ puehquẽño'te'na cobra'yene' acheñenesha' aton quelle ñaña epas acheñenesha' ñeñt̃ atarr ochñañenesha'chno.

³¹ Atet e'manet Jesús, ñañañapa' atet toma'ntatanet:

—Ñeñt̃ e'ñe huomech entetsapa' ñetpa' ama e'neñetoña apartañ. Añña ñeñt̃ atsna'tetspa' ñetñapa' chocma añ e'nenet ñeñt̃cha' a'crraterrahuet.

³² Napa' ama añecpaye' nohuapo attoch ne'chore'tos ñeñt̃ e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch ne'chore'tos ñeñt̃ atarr ochñañ entyetsa. Allochñapa' attoch o'ch cotape'cherret ello e'ñe cohuen Yomporecop.

Allempo Jesúsapa' eñotatanet atetcha' tore'tet Yomporecop ñeñt̃ e'ñe po'ño'ch sherbets

(Mt. 9.14-17; Mr. 2.18-22)

³³ Ñetñapa' alla otereterr Jesús:

—Ñeñt̃ Juan pueyochresha'pa' chocma tore'tenet Yomporecop,† chocma ma'yochenet. Ñaña fariseonesha' pueyochresha'pa'cho'ña attecma penet. Tarraña paña peyochresha'pa' eso'mare'tña ama atteye' peneto. Ñetpa' atta es rratse'tyenet, atta es orryenet.

³⁴ Jesúsñapa' alla toma'ntaterraneterrpa' atet otanet:

—Ñeñt̃ ahua'ñarete'chno all rrallme'chapreteñet ñeñt̃ e'ñe errte' sena'tetsa, ama pocteyaye o'ch yotamet “amach es serra'yesatsto”, tarro'mar ñeñt̃pa' atet coshapreteñet ñeñt̃ sena'tetsa.

³⁵ Tarraña ñerra'm esempo machayo'a sa'nerranet ñeñt̃ sena'tetsa, ñeñt̃ña parro yemuetyena allempoña ñetpa' e'ñe puellquẽño'tet cachpa'huerretcha' puerrar, amach arrenaye' enterreto. Ñeñt̃pa' attochña tore'terret allempo Yomporecop e'ñe po'ño'ch. Arrpa' allohua huañ ñeñt̃ atet Jesús toma'ntata ña sena'tostsa.

³⁶ Elloñapa' o' alla toma'ntaterraneterr ñeñt̃ atet ye'chen judionesha' arr patsro ñeñt̃o'marña atet otanet:

—Ñehua, ñerra'm ye'chen epma yeshtam, paterr emarr ñaña po'poñ mellashañpa' amach yerrarratstoña emarr yeshtam alloch yellta' yeshtam mellashañ all rrrarra'nen. Tarro'mar ama't atet ye'patsechpa' ñeñt̃pa' e'ñech orrena. Ama't yeshtam emarrpa' o'huañcha' cohuenta all yerrarreñ. Ñaña yeshtam mellashañ ama't o' yelltereñ emarropa' amach alla cohuenterro tarro'mar ñeñt̃ allo o' yellterpa' ama mellashañecmayaye, ñeñt̃o'marña amach ñeñt̃tate.

Ñeñt̃pa' attoña Jesúsapa' eñotatanet ña poctapña e'ñe etserra.

³⁷ Jesúsñapa' alla toma'ntaterraneterr po'poñ ñeñt̃ atet ye'chena judionesha' o'ch ye'chcatenet pa'rrom orrot. Ñeñt̃o'marña atet otanet:

—Ama't pueheñarro'teyapa' amach yeshtatstoña vinos emasa mellasha'mañ orroto ñeñt̃ aye'chcataret pa'rrom. Tarro'mar ñerra'm atet

† 5:33 Añ tore'teñetspa' añecop o'ch yetorra Yomporecop. Amach añecpayaye atomat, ñeñt̃pa' añecpa mameshacop o'ch ye'quechpa' yerrar.

yep'e'pa' o'ch chasa'ña vinospa' chach a'ptsan orroŧ, vinosña'pa' e'ñech shebhua, ñeñña orrotpa' ama't mamesha'pa' amach es sherberro.

³⁸ Añña ñerra'm emasa vinos, arrcha'ña yeshe' emerra orroto ñeñ ayečcataret pa'rrom. Allochña'pa' ama'tcha' chasa' vinospa' amach cha potsa'psoña vinos ñeñpa' allach yechen epo'mar.

Ñeñpa'cho'ña attoña Jesús'pa' eñotatanet ña počtapña e'ñe etserra.

³⁹ Po'poñone'pa' alla toma'ntaterraneterr Jesús, ñeñpa' atet oterraneterr:

—Ñeñ e'ñe yechenaya o'ch orran co'nes ñeñ atarr chase'pa' ñapa' ama mueno o'ch orran co'nes emasa, tarro'mar ñapa' atet oten ñeñ atet yechena ahuaŧoteña' ñeñ e'ñe cohuen enten.

6

Allempo Jesús pueyochresha' taso'tam'pesyesnomuet trigo añe yetro allem-pocma amesen judionesha'

(Mt. 12.1-8; Mr. 2.23-28)

¹ Allempoña cherrerr allempo chocma amesen judionesha'. Allempoña Jesús'pa' arr oñem chetso'mar epuet pueyochresha'chno. Allempo oñenet chetso'mar pueyochresha'ña'pa' taso'tam'pesyesnomuet puechmã'tets trigo a'she'challme'chyesnomet atŧoŧ rrocllome'chachet o' rra'yesnomet.

² Ñeñña patanta'tets fariseonesha'pa' che'ptare'tanet, atet otaretet:

—Eso'mare'tña atet sepena ñeñ ama pocteyaye o'ch atet ye'pa tarro'mar te'pa' añe yetro ñeñ atet anaret ahuaŧoteñ allem pocmach yamesen.

³ Jesús'ña'pa' otanet:

—Sapa' ama'trra selleyareña añ ñoñets all oten ñeñ atet pa' ahuaŧ David allempo cheporra'nma epuet ñaña allohuen ñeñ co'tene'.

⁴ Ña allempopa' be'tosos Yompor pa'paclo, allña'pa' chetosan pan ñeñ atma'ntataret atet ñerra'mrrate' ñeñ nenet all Partsocop. Ñehua, ñeñ panpa' ama pocteyayne o'ch esesha' rre'. Ñeñpa' añach ñapueŧ rrene' cornane-sha'chno; ñeñpa' e'ñe atet anuaret judioneshacop. Ñeñña panpa' o' chetos David, rros, rratosan ñaña allohuen ñeñ epuet.

⁵ Allempoña alla oterraneterr Jesús, ñeñpa' atet otanet:

—Ñeñto'marña te'pa' o'ch notas, na Ñeñten Acheñetosets ñeñten allsen-sareten, naca'ye atet otets este' poctetsaña ñeñcha' atet ye'pa añe yetro allem pocma yamesen.

Allempo Jesús'pa' a'crraterran ñeñ chelletsapot

(Mt. 12.9-14; Mr. 3.1-6)

⁶ Allempoña'pa' cherrerr po'pocheño ñeñ yetñatsro allem pocma amesenet. Jesús'ña'pa' be'tosuener judionesha' po'prahuo. Allña'pa' ye'chatyesuenanerr acheñenesha'. Allña'pa' allo'tsen ñaña puesheñarr yacma ñeñ cha chellena pot po'cohuenroŧ.

⁷ Acheñenesha'ña ñeñ atarr etsotayenayeñ ñoñets ñeñ atet anaret epuet ñaña fariseonesha' ñetña allpa' Jesús'a atarr cohua'nyenet attoch enteñeterr ñato'rraña o'ch a'crratenanerr acheñ añe yetro allem pocma amesenet. Ñerra'm o'ch a'crratenanerr ama't puesheñarra acheñ añe yetro allem pocma amesenet, allem poña'pa' esheccha' a'metam'peñeta' am'cha'taretesho.

⁸ Jesús'ña'pa' eñotanet ñeñ atet co'tape'chatse'tyenet pueyo'chreto. Ñaña'pa' atet otan yacma ñeñ chelletsapot:

—A'pon pa'tomos arrma.

Yacmaña huapapa' o'tomos all rro'cho.

⁹ Jesúsñapa' atet otanet:

–Ñehua, napa' o'ch na'p̄to'tas: ¿Erra'tsena'tña ñeñt e'ñe pocte' senten ñeñtcha' atet yeḡa añ yetro allempo yamesen? Ñato' o'ch atet yepe' e'ñe cohuen po'psheñeñ, amapa' ñato' o'ch atet yepoñ ñeñt ama pocteyaye. Ñato' añte' pocte' senten o'ch ya'crrach acheñ amapa' añte' pocte' senten amach ya'crratatsche ḡhachña yemtsatach.

Ñetñapa' ama't puesheñarrofetapa' ama eseshaye' anapuenaye entaye.

¹⁰ Ñaña'apa' cohua'yesan allohuen ñeñt anorrḡhets all, allempoñapa' otan ñeñt chelletsa pot:

–Te'pa' o'ch notaḡ: Petapuerr ḡot.

E'ñe otue'pa' ñaña'apa' allentepa'tcha' tapuerran pot, o' e'ñe cohuenterra pot.

¹¹ Fariseonesha'ñapa' ñeñtña atarr atsrre'matahuet. Allempoñapa' cotape'chatanna'tet, atarr o'pachet Jesús.

Allempo Jesús'apa' acran ḡharrasheña ñeñt puechetsa epsheña ñeñtcha' llesensa'

(Mt. 10.1-4; Mr. 3.13-19)

¹² Allempoña Jesús'apa' o' alla ahuerrerr a'yo aspeno allcha' ma'yochena'. Allñapa' arepen ma'yochaya Pompor.

¹³ Tsapa'tña puetarenpa' agota'muenan allohuen ñeñt pueyochreshaḡno pen. Allempo ḡhaḡha'tet ñeshopa' ñaña'apa' o' acrapan ñeñt ḡharrasheña ñeñt puechetsa epsheña ñeñtcha' llesensa' ñeñtcha' serrpare'tyetsa' allemeñ anetḡo'mar.

¹⁴ Ñeñt llesensa' ñeñt'pa' añeḡhno: Simón ñeñt socherr Pedro, allotpa' ñaña pa'mo'nasheñ Andrés, allotpa' Jacobo* ñaña pa'mo'nasheñ Juan, allotpa' Felipe, ñaña Bartolomé,

¹⁵ ñaña Mateo ñaña Tomás ñaña Jacobo ñeñt Alfeo puechemer, ñaña ñeñt po'psheñeñ Simón ñeñt cananistanesha' ñeñt atarr torrattse't pa'netsrecop,

¹⁶ allotpa' ñaña Judas† ñeñt Jacobo pa'mo'nasheñ, allotpa' ñaña po'psheñeñ Judas Iscariote ñeñtcha' pomuerre' tsapa'toneḡ Jesús.

Allempo Jesús'apa' yeḡhatenan shonte' acheñenesha'

(Mt. 4.23-25)

¹⁷ Allempoña huerra Jesús aspeno't epuet pueyochresha', tomḡha'tuerret all aspenet pacñe'tpener poño po'mopñero. Allñapa' o' ḡhaḡha't shonte' po'potantañ acheñenesha' ñeñt pueyochresha' pen. Ñaña allo'tsa'yen shonte' acheñenesha' ñeñt huachetsa allemeñ anetsot –Judeot ñaña Jerusaléño't, ñaña sa'patoḡño'marnesha' ñeñt huetsa Tiro't ñaña Sidóno't. Ñetpa' añecopña huachenet o'ch e'mñoteret ñamet Jesús ñeñt atet serrpare'ten ñaña añecpa'ñaña huachenet attoch a'crratyesapanet Jesús patsñañe'teret.

¹⁸ Ama't ñaña allohuen ñeñt mueroḡhtatyen oneñet ñaña'apa' e'ñe a'crratyesuapanet.

¹⁹ Allohuenña acheñenesha'pa' atarr mueneñet o'ch a'ḡlloset Jesús tarro'mar ñapa' ña atarr ahuamencatesha', e'ñe ña po'huamenco't a'crratyen an allohuen acheñenesha'.

Atto atarr cosheñtso'tsa'yen patantarr ñaña atarr llequēñtso'tsa'yen po'potantañ

(Mt. 5.1-12)

²⁰ Allempoña Jesús'apa' cohua'yesan ñeñt pueyochresha' pen, ñaña'apa' atet otanet:

* **6:14** Jacobopa' ñeñtara ñeñt sochenet Santiago. † **6:16** Judaspa' ñeñtara sochenet Tadeo.

—Ñeñtes atarr huocchañnesha' entetsa ñeñtescha'ña atarrcha' cosheñtso'tsa'yenes tarro'mar sapa' o'pataterrrsach Yompör po'cohuenña atto atarr ayochreshattena ña.

21 'Ñaña sapa' ñeñtes cheporrare'tyetsa te' ñeñtescha'ña atarrcha' cosheñtso'tsa'yenes tarro'mar Yompörcha'ña e'ñe señmataterre'.

'Ñaña sapa' ñeñtes yahuetsa te' e'ñe sellquëñoñ ñeñtescha'ña atarrcha' cosheñtso'tsa'yenes tarro'mar Yompörcha'ña e'ñe seche'taterre' socsheñoñ.

22 'Ñaña sapa' atarr cosheñtso'tsa'yenes ñerra'm esempo e'moñe'tenset no'mar ñerra'm esempo mueño'tenset, ñerra'm esempo puesasare'teñoñetas sochatse'tenset tarro'mar sapa' na same'ñena Ñeñten Acheñetosets.

23 Allempo atet penset ñeñt ama cohuenayaye, sañapa' socshepa'ch nanac ñaña señochepa'ch shonte' ñeñt o'patatensa Yompör pue'ntañño ñeñtcha'ña atarr socshaterre'. Ñehua, ñetpa' pa'tañneshañpa' attecma mueroçhtatyese't ñaña ñeñt a'mta'yese't Yompör po'ñoñ ahuat.

24 'Tarraña te'pa' o'ch notas sa ñeñtes atarr eçllayoretas ñeñtes echene' ora allpon ñeñt e'ñe socpa. Sapa' ñeñtescha'ña atarr llequëñtso'tsa'yenes tarro'mar esempopa' huañerrcha' ñeñt socshatene'.

25 'Ñaña atarr llequëñtso'tsa'yenes ñeñtes atarr esocmañen es echyets allo e'ñe señmatena seyeteñoñ. Cherrcha' allempoch atarr sepallterra ñeñtcha' serrar seperr.

'Ñaña atarr llequëñtso'tsa'yenes sa ñeñtes te'pa' e'ñe socsheñesha' seche'tatsetyena. Cherrcha'ña allempoch seyahuerra sellquëñoñ.

26 'Ñaña atarr llequëñtso'tsa'yenes ñerra'm esempo allohuen acheñenesha' e'ñech cohuen entapretenset, e'ñe cohuen eñosyenet socop. Tarro'mar ñetpa' atet pete't pa'tañneshañ ahuat, e'ñe cohuen eñosyese't añ acheñreneshacop ñeñt ama't ama Yompöre'ye' po'ñoñ a'mta'yese'te.

Atto Jesús pa' yeçhatos Janet amorrentpo'ch yeñch ñeñt ye'moñe'tyene'

(Mt. 5.38-48; 7.12)

27 'Sa ñeñtes ne'mñotene' o'ch notas ñeñtcha' atet sepa e'ñe cohuen, semueryach ama't ñeñt se'moñe'tene'. O'ch atet sepe' e'ñe cohuen.

28 Ñaña ama't erra'tsen ñeñt sarrnomare'tenaya sañapa' o'ch senamaterrñañ Yompör pa'nateña. Ñaña ñeñt sesasare'tene' sañapa' o'ch sema'yochamñpenanet.

29 Nehua, atet ñerra'm esempo esesha' pue'moñe'teñoñetas o'ch tacllaset setsa'po, sañapa' poctepa'chña señch tacllerrserrepa' ñaña po'pshemñtañoñ. Ñaña ñerra'm esempo esesha' seprratamñpse' seshtam, sañapa' poctepa'chña señch puerrratamñpsasetepa' seshtam ñeñt muenenet ama't ñaña po'pmañ seshtam allo sepmatena.

30 Ñerra'm esesha' es senamuene' sañapa' sapepa'ch ama't esesha. Ñaña ñerra'm esesha' seyoratsre'tamñpse' sañapa' amach alla senamatstere apuerrsetepa' alla.

31 Ñehua, ñerra'm erra'tsente' e'ñe cohuen senten ñeñt semnen sa ñeñtcha' atet ponas po'psheñeñ, sapa'cho'ña e'ñech attecma sepanet samña.

32 'Ñaña sa ñerra'm añña semorrentena ñeñt atarr semorrentenaya samña, ñeñt pa' amach e'ñeye' sorratenoña ñeñt e'ñe po'ñoçh cohuentetsa, tarro'mar ñeñt ama ame'ñenayo Yompör ñetpa añña morrentenet ñeñt e'ñe morrentenahuet ñamet. Añña atarr cohuentetsa ama't ñeñt ama yemorrentenayepa' o'ch yemorrencha e'ñe cohuen.

³³ Ñaña ñerra'm aña e'ñe cohuen seyenpa'yen ñeñt seyenpa'yene' samã, ñeñtpa' ama e'ñeye' sorratenoña ñeñt e'ñe po'ñoçh cohuentetsa, tarro'mar ñeñt ama ame'ñenayo Yompor ñetpa' aña yenpa'yenet ñeñt yenpa'yenahuet ñamet.

³⁴ Ñaña ñerra'm añecpa es sartanna'tyena attoch ellopa' o'ch alla apuerrset samã, ñeñt atet sepenapa' ama e'ñeye' sorratenoña ñeñt e'ñe po'ñoçh cohuentetsa; añcha'ña es saretyena po'psheñeñ ama't ñetpa' ama'tcha' ama apuerrseto ama't coñe'ta, tarro'mar atet pena ñeñt ama ame'ñenayo Yompor ñerra'm eñoteñet o'ch alla aparetterret ñamet esheccha'ña archet po'psheñeñ.

³⁵ Tarraña napa' o'ch notas, sapa' añe'nachña semorrentena ama't ñeñt se'moñe'tene'. Ñaña sapa' añe'nachña seyenpuen ama't ñeñt ama seyenpuenaye. Ñaña sapa' añe'nachña es saretyena ama't ñeñtcha' ama sapuer-raye. Ñerra'm atetcha' sepa Yomporña' apuerrescha' ello ñeñtcha' atarr socshatuerre'. Ñapa' allempoch e'ñe puechemer perres, ñeñtara Yompor Ñeñt Nanac Paret. Tarro'mar ñapa' añe'naña muerena ama't ñeñtcha' ama coshaterraye ña, ñeñtara ñeñt ama cohuenaye' es petso.

³⁶ Sapa'cho'ña atarrepa'chña semueranna'ta e'ñe atet pena ñeñt Yeyomporer yepen atarr muerenya yaña.

E'ñe attotapa' amach yotteñe'channa'tatsto

(Mt. 7.1-5)

³⁷ Sapa' amach sotatsche po'psheñeñ "ama pocteyaye ñeñt atet sepa'yena", allochñapa' amach otuerrso samã Yompor ama pocteyaye ñeñt atet sepa'yena samã. Ñaña e'ñe attotapa' amach sottene'chatsche po'psheñeñ allochñapa' Yomporpa'cho'ña amach otteñe'chuerrso samã, çhochña e'ñe cohuen sepretnannena allochñapa' Yomporpa'cho'ña e'ñech cohuen peretna'huerres samã.

³⁸ Ñaña sapa' e'ñech cohuen es sapanna'tyena allochñapa' Yomporpa'cho'ña e'ñech cohuen es apuerres samã. Shonte'ch nanac es apuerres, atet ñerra'mrrate' cho es e'chorratenset soshaco atet ñerra'm chop e'chare't. O'ch chorrappa' o'ch a'rrapuet esheccha' esha'tereter po'poñ, ñerra'm o'ch chorrerrerra' o'ch pa'shmuet attoch e'ñe a'tamo'yonaset. Ñeñtpa' añ toma'ntena atto es apueney Yompor nanac aton. Ñaña errponcha' saþ po'psheñeñ, sapa'cho'ña e'ñech allpon apuerres samã Yompor.

³⁹ Allempoña Jesúsapa' atet toma'ntaterraneterr, ñeñtpa' atet otanet:

–Ñeñt aporo'yetpa' ñapa' amach errotenot echa'nmano po'psheñeñ ñeñt parro aporo'yetecmuet. Tarro'mar ñerra'm atet penet, ñerra'm arrorotonta echa'nmanna'tnomuetpa' epsheño'maret çhach shora'nmuet arroroto. Arrpa' allohua ñeñt atet toma'ntatanet atet ñerra'm ya allempo ama yoctape'cherra' ñeñt cohuentetsa Yomporecop amach errotenot yoctape'chache po'psheñeñ ñeñt ama eñotenaye ñeñt cohuen enten Yompor.

⁴⁰ 'Ñeñt ayçhatarettsapa' ama't puesheñarra amach errotenot metanetoña ñeñt allpon eñoten ñeñt yeçhatene'. Ama't allempo e'ñe ayçhatarettapa' e'ñech allpona yeçha' ñeñt allpon eñoten ñaña ñeñt yeçhate'.

⁴¹⁻⁴² Amach atet sentatsche po'potantañ ñerra'm ñetpa' ama cohuenaye' es peneto ama't sapa' ama sentenoña ñeñt atet sepa'yena sa; ñeñtpa' ello semtaneñña po'potantañ ñeñt atet es pa'yenet ñet. Ñerra'm ama cohuenaye' es sepeno samapa' amach sotatscheña po'potantañ: "Masheñcha' napa' o'ch noctape'chatterreþ e'ñe cohuen." Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr ñeñt ama cohuenaye' sepeno

sa, allochñapa' attoch seño ch cotape'chate' samo'ts e'ñe cohuen. Ñeñtapa' añ toma'ntena o'ch senten po'psheñeñ pa'clloyo'tsen puepachña ama't sa seclloyopa' allo'tsen tsach; ñeñtñapa' ama senteñe. Ñerra'm atetpa' amach erroteno't socheña po'psheñeñ: "Masheñcha' napa' o'ch nechterrnaḡ pecloyot pepachña." Tarro'mar añ tsach ñeñt seclloyo'tsenpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyot allochñapa' attoch e'ñe cohuen es sentyen. Attochña e'ñe cohuen sechterrñañ po'psheñeñ puepachña pa'clloyot.

Allohuen acheñ ñeñt e'ñe po'ño ch cohuen acheñer, ñetñapa' añcha' orrtatyenet ñeñt e'ñe cohuenare'

(Mt. 7.17-20; 12.34-35)

⁴³ Tarro'mar allohuen acheñ ñeñt e'ñe po'ño ch cohuen acheñer, ñetñapa' añcha' orrtatyenet ñeñt e'ñe cohuenare'. Tarraña po'potantañ acheñenesha' ñeñt po'ño ch ama cohuenayaye ñetñapa' añach orrtatyenet ñeñt ama cohuenayaye. Ñeñtapa' atetcha' netma'ntaterra: Ora allohuen ñeñt e'ñe cohuen narmetsoch, pue'merpa'cho'ña e'ñech cohuenare'. Añña po'pchañechno narmetsoch ñeñt ama cohuenayayepa' pue'merpa'cho'ña amach e'ñe cohuenayaye.

⁴⁴ Ñeñto'marña attoña yeñoten erra'tsente' ñeñt e'ñe cohuenare' narmetsoch ñaña ñeñt ama cohuenayaye, pue'merotaña e'ñe yechme'teñ. Ñaña yapa' e'ñe yeñoteñ ama arroteye' yetoquënoña llo'm ajcho't. Ñaña ama arroteye' yetoquënoña ap rrenagachot.‡

⁴⁵ Ama't erra'tsena acheñer ñeñt e'ñe po'ño ch cohuen, ñapa' añcha'ña ortaten ñeñt e'ñe cohuenare' cotape'chen pueyo'chro tarro'mar pueyo'chro allña shonte' cotape'chenan ñeñt cohuentetsa. Tarraña po'poñ acheñer ñeñt po'ño ch ama cohuenayaye, ñapa'cho'ña añach ortaten ñeñt atet cotape'chen pueyo'chro ñeñt ama cohuenayaye tarro'mar pueyo'chro allña shonte' pa'namen cotape'chenan sosya'tsañ. Tarro'mar ñerra'm shonte' yotape'chen yeyo'chro ñeñt cohuentetsa, ñeñtapa' e'ñech ñeñta cohuen yeserrpare'ten. Tarraña ñerra'm shonte' yotape'chen ñaña yeyo'chro ñeñt ama cohuenayayepa' ñeñtapa'cho'ña e'ñech ñeñta yemnen o'ch yeserrpare'teñ.

Atto Jesús toma'ntatana acheñ ñeñt e'ñe eñotene' ñeñt po'ño ch sherbets ñaña ñeñt ama eñotenaye ñeñt sherbets

(Mt. 7.24-27)

⁴⁶ 'Sapa' eso'maruañaca'yeña soten napa' Sa'yochreshatero' sepenen, sapa' amaca' choye' same'ñenno ñeñt atet o' notuas.

⁴⁷ Allohuen erra'tsencha' huapatsa nesho ñeñtcha' name'ñenaya na ñaña ñerra'm e'mñotennanet neñoñ ñeñt atet cohuen ney'chatenanet ñerra'm atet e'ñe penet, ñetñapa' atarrcha' eñotenet ñeñt e'ñe po'ño ch sherbets.

⁴⁸ Ñeñt acheñer ñeñt atet petsa o'ch netma'ntacha atet ñerra'mrrate' puesheñarr yacma ñeñt atarr es eñotets ñeñt tomatene' pocoll ñeñt e'ñech echarr penan pa'paquëll. Ñañaapa' atarrcha' o'pono eñan pats attoch e'ñe echarr pan po'quellpach. Atteñapa' o' chap allempo apellchena oñ, pocollñapa' ama a'mato apellche' tarro'mar quellpachpa' atarr huomenc a'omataret.

⁴⁹ Tarraña po'potantañ ñeñt e'muene' neñoñ ñetña ñerra'm ama atteye' peneto ñeñt atet notenanet, ñetñapa' e'ñech attet ñerra'mrrate' puesheñarr yacma ñeñt ama es eñoto. Ñapa'cho'ña o' tomataneñ pa'paquëll

‡ 6:44 Ñehua, Jesús añ toma'ntatanet uva ñaña higo ñeñt puenaremñ penet all pa'nyo.

tarraña ñaña' ama atarr o'ponoye' eñanoña pats attoch e'ñe echarr ñan po'quellpach. Allempoñapa' apellcha oñ apellche'ñapa' chepa'tcha' a'matañpsos pa'paquell. Pocollña' e'ñe poctacma muello'tstosa.

7

Atto Jesús'pa' a'crraterran capitán pa'taruasañer; ñeñt capitán'pa' romo'marnesha'
(Mt. 8.5-13)

¹ Allempoña Jesús'pa' serrpare'tatuerranerr allohuen acheñenesha' ñeñt e'mñotene', ñaña'pa' ahuererr, o' cherrerr Capernaumo.

² Allña'pa' allo'tsen puesheñarr yacma ñeñt solltar po'cañtaner, ñeñt'pa' romo'marnesha', ama judioneshayaye. Ñeñtña capitán'pa' echenan puesheñarr pa'taruasañer cha atsnaten atarr pa'nattena, ñaña'pa' atarr morrentenana pa'taruasañer.

³ Ñeñtña capitán'pa' allempo e'mare'tan Jesús o' alla cherr Capernaumo, ñaña'pa' o' mueñan patantarr acheñ ñeñt pompornesha' pen judionesha', o'ch oteñeta' Jesús atto agotateñ capitán o'ch a'crraterrñaña' pa'taruasañer.

⁴⁻⁵ Allempoña chapuet Jesúseshopa' ñetña'pa' atet otoset:

—Ñeñt capitán'pa' ñapa' atarr cohuen acheñ, ñapa' atarr morrentenya ya ñeñtey israelena'tarey, ama't yeprahuapa' o' tomatatuosnay. Ñeñto'marña ama't yapa' e'ñe pocte' yenteñ o'ch peyenpueña' ñaña, ñapa' ama't ama judioneshayaye. Attoña atarr enamueñet Jesús attoch yenpuenanana' capitán.

⁶ Allempoñapa' coña'nerranet Jesús. Chapmochet capitán pa'paclo, capitánña'pa' mueñerranerr po'potantañ acheñ ñeñt parro yemtena ñeñtcha' otapue' Jesús atet oten capitán:

—Yapa' atet otapuey capitán atto'ch yotapañ: “Amach Ayochreshate at-srre'mochen nentatatstapape tarro'mar napa' ama cohuenayayno attoch pebe'tosapo'tañpesna nepaclo.

⁷ Napa' ama cohuenayayno ñeñto'marña aña nemñen po'psheñeñ ñeñtcha' nepoctatapañ, ñeñtcha' potap correrrepa' na'taruasañer, ñaña'pa' acrrerroche'ch.

⁸ Tarro'mar napa' ñeñten ñeñt atet petsa ñeñt atet otenen ñeñt neyechenaya. Ñaña napa'cho'ña eñall ñeñt neyechena ñaña ñeñt nesolltarer nepen. Ñerra'm puesheñarr solltar noteñ: Papa' o'ch ahuep a'yo, ñaña'pa' o'chcho' ahuo'. Ñaña po'psheñeñ solltar ñerra'm o'ch noch: Papa' apon arr, ñaña'pa' o'chcho' huapa. Ñaña po'psheñeñ na'taruasañer ñerra'm o'ch noch: Papa' arrcha' petaruasa'muen, ñaña'pa' allcha'cho' taruasa'muen. Ñeñto'marña napa' neñotenep ñerra'm erroten potenpa' e'ñechca'ye atet pena.”

⁹ Allempo e'man Jesús ñeñt atet oten capitán, ñaña'pa' alla cohua'yesan allohuen acheñenesha' ñeñt coña'nene'. Ñaña'pa' atet otanet:

—Erroteno'tuañaca'yeña atarr yemtena, ñapa' amaca'ye judioneshayaye. Napa' o'ch notas, ama't ahuatapa' ama nentareña acheñ ñeñt e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñt atet atarr neyemtenaya. Ama'tpa' correrrepa' pa'taruasañer.

¹⁰ Allempoña ñeñt pocte' Jesús o' ahuanerret capitán pa'paclo. Ñetña'pa' entuerrñañet capitán pa'taruasañer o' e'ñe correrra.

Atto Jesús'pa' tantaterran arromñañ ñeñt rretorrnanesha' puechoyor

11 Allempo allponmaterrerr; Jesúsñapa' ahuerrerr po'poñ anetso, ñeñt añets añ pa'so'cheñ Naín. Alla co'a' huanererr pueyochresha' ñaña shonte' po'potantañ acheñenesha'.

12 O' chapmochet all allotecma be'tenet attoch chapuet anetso. Alloñña' cha'nma'cha'tos ñeñt anene' arromña't, o'ch pampueñeta'. Arromña'tñapa' asheñorr ñeñt e'ñe po'patrerr pen pachor. Pachorñapa' rretorrnanesha'. Shonte' acheñ ñeñt allo'marnesha' ñeñt llecapretnenaya rretorrnanesha' all co'a'neñet.

13 Partsesha'ña Jesús allempo entapan rretorrnanesha' puellcapreteño'tpa' atarr muerosya. Ñaña'pa' atet otapan rretorrnanesha':

—Amach no'cha peyahuatsto.

14 Allempoña ponmapana arromña't, a'plata'tosñañ po'cajon. Ñeñtña anene'pa' alla tom'cha'toset. Jesúsñapa' otan huepuesha' ñeñt rromuets:

—Napa' o'ch nota'p; ¡Te'pa' o'ch petanterra!

15 E'ñe otue'pa' ñeñtña arromña'tpa' allenta tanterra cha eñorerrtsa. Jesúsñapa' o' alla apuerrñañ pachor.

16 Acheñenesha'ñapa' atarr nanac yorenent. Po'yorño'tetpa' atarr aye'chochtateññañet Yompor. Ñetñapa' atet otyenet:

—Te'pa' o' orrtonaya puesheñarr ñeñt atarr sherbets ñeñt a'mtene' Yompor po'ñoñ. Yomporpa' o' yerpuerrya ñeñtey e'ñe pueyochreshay peney.

17 Attoña acheñenesha'ñapa' epaye' serrpare'tyesuerret ñeñt atet pa'yena Jesús. O' e'ñe epa'hua ora Judeo'mar ñaña ora erracmañen allampaño'mar.

Juan ñeñt apatañtatse'tpa' mueñan pueyochresha' Jesúsesho (Mt. 11.2-19)

18 Añña Juan ñeñt ayottañpsaret, ñaña'pa' chocma serrpare'tateñ pueyochresha' ñeñt atet pa'yena Jesús.

19 Atteña Juanñapa' agotatan epsheña ñeñt pueyochresha' pen ñeñtcha' mueña Jesúsesho ñeñtcha' a'p'to'tenaya' Jesús po'ñochte' ñapa' ñeñt Cristotets ñeñt atarr cohuenet ahuatoteñ, ñato' amate' ñeñteyayepa' añcha' cohuet po'psheñeñ ñeñtcha' huapatsa.

20-21 Allempoña ñetpa' ahuanmuet. Allempo chapuet allo'tsen Jesús, Jesúsñapa' añ torra'yena a'crratanatyese' shonte' acheñenesha' ñeñt at-sna'tyets ñeñt pa'namen muerochtatyenahuet. Ñaña ñeñt chorra'yena oneñet ñapa' o' e'ñe ca'chpatatuerranet oneñet. Ñaña shonte' aporo'yetechno ñaña'pa' o' alla e'ñe cohuatyesuerranet. Ñeñtña Juan pueyochresha'pa' a'p'to'toset Jesús, atet otoset:

—Juan ñeñt apatañtatse't Yomporecop yapa' ñeñtña yemñene' o'ch yotenpa', ñato' p'ate'ña ñeñte'p'te' e'ñe po'ño'ch Cristotets ñeñt atarr yecuen ahuatoteñ o'ch huapa; ñerra'm amate' ñeñteyayepa' o'ch e'ñe p'otey allochñapa' añcha' yecua' po'psheñeñ ñeñtcha' huapatsa ñeñt e'ñe Cristo.

22 Jesúsñapa' otapanet:

—Te'pa' o'ch ahuerres seserrpare'tatuercha' Juan ora allpon ñeñt atet sentyesuennana' arr ñaña ora allpon ñeñt atet se'myesuennana' arr. O'ch e'ñe seserrpare'tatuer ora ama't atto aporo'yetechnopa' te'ñapa' o' e'ñe necu- atyesuerranet, ñaña ñeñt checa'repayetspa' te'pa' o' e'ñe chope'chyesuerret, ñaña ñeñt osyen puetsarñats, te'pa' o' e'ñe a'cohuentatare'tetuerret ñamet, ñaña paquetneshachnopa' ama't ñetpa' te'ñapa' o' e'ñe e'myesuerret cohuen, ama't ñaña ñeñt rromayets te'ñapa' o' alla atantatare'tetuerret, ñaña ama't

ñeñt huocchañneshačno te'ñapa' o' e'ñe neserrpare'tatuerranet añ cohuen ñoñets alloch queshperret ñamet.

²³ Jesúsñapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt atet notenes: Atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshaterrahuet.

²⁴ Allempoña Juan pueyochresha'pa' o' ahuanerret. Jesúsñapa' alla serrpare'taterranerr acheñenesha' ñeñt atet pe't ahuaña Juan, ñeñtapa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ mōrr.

²⁵ Ñaña amaca' añecpaye' sete'teña all o'ch sentena' ñeñt atarr cochnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr cochnesha'tetsa pa'shtam. Yapa' yeñoteñ arrña yentenña ñeñt atarr cochnesha' chorra'yenaya shetamuets añcha'taretepahuo.

²⁶ Sapa' añecopca'yeña sete'tña amayo o'ch sentena' all ñeñt po'ñoçh a'mtene' Yompor po'ñoñ. Napa' o'ch notas, Juanpa' atto atarr sherbenan Yomporpa' ello metana'tuenan allohuen ñeñt atto a'mtenet Yompor po'ñoñ.

²⁷ Tarro'mar Juanpa' ñocop eñose't Yompor ahuañ. Ñehua, allempopa' atet otne't na ñeñt atetcha' pōsa Juan nocop esempoch huapa, ñeñtapa' atet anaret ñoñets ahuañoteñ:

Papa' peñoche'pa'ch napa' o'ch nemñonañ puesheñarr ñeñtcha' ñanom otatsa ñeñtcha' pā'cohuentatyese' pōcop allcha' pōñmos.

²⁸ Ñeñto'marña na te'pa' atet notenes: Allohuen allpon acheñenesha' ñeñt eñalletetsa arr patsro ama't puesheñarra ama eñalleña ñeñt atarr sherbets atet ñerra'mrrate' Juan ñeñt apatyese't ahuaña acheñenesha' Yomporecop. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompor atto te'pa' o' ayochreshattena, ñeñtña acheñerpa' atarrca'ye sherben, ello metanenan atto atarr sherben Juan.

²⁹ Allohuen acheñenesha' ama't ñaña ñeñt ashcañetyestse't atto atarr cobra'yese'te't quelle ñeñt gobiernocop ñeñt apatyese' Juan, ñetñapa' atto e'mñotenetpa' otyeset: "E'ñe pocte' atet otene' Yompor."

³⁰ Tarraña fariseonesha' epuet ñaña ñeñt atarr etsotayenayeñ ñoñets ñeñt atet anaret judioneshacop, ñetñapa' ama't e'ñe mamesha ama pocteye' enteñeto ñeñt atet muenen Yompor ñocpuet, ñeñto'marña ñetpa' ama apataneto Juan Yomporecop allempo.

Partsesha'ñapa' atet oterraneterr:

³¹⁻³⁵ —Ñehua, napa' o'ch neñotatas ñeñt atet pena patantarr acheñenesha' ñeñt yentyen te' ñeñt ama't errotena ama acshatpoteneto. Ñeñtapa' fariseonesha' atet petsa. Tarro'mar ama't allempo orra Juan ñeñt apatañtate't ñapa' ama rrane'te ñeñt yocrramñ yepen allohuene'y, ama orrane'te ñeñtecma yorren allohuene'y. Ñeñto'marña ñapa' cha sotyese't çhote' chorreña oneñe't, ama't e'ñe mameshapa' ama pocteye' señche'te. Te'ñapa' o' norrterra ñaña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen ñaña atarro' arratsñañen ñaña atarro' orraññañen napa' año'chña e'ñe neyemuetyena ñeñt atarr ochñañenesha' ñaña ashcarñañečno ñeñt atarr cobra'yene' acheñenesha' quelle. Tarraña ama't atet sepennoñpa' Nomporna e'ñe eñotene' ñeñt po'ñoçh atarr sherbets ñocop. Ñaña allohuene'y ñeñte'y e'ñe puechemeresha' pōhuene'y ñeñte'y

cotene' ña poctapña yapa'cho'ña e'ñe yeñotuenña ñeñt' po'ñoçh atarr sher-bets. Ñeñto'marña yorrtatyeññañ ñeñt' cohuen enten ña. Sañapa' ama't e'ñe mamesha ama acshatpahuoyayso, e'ñe attes ñerra'mrrate' cheshanesha' ñeñt' çhocmach po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetñaapa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o' yerequërca'hua allo yocshame'tenapa' sañapa' amaña seshe'rarampenye; al-lotpa' ama't o' yepoctorare'tua ñeñt' ya'chpeñtsorecho allo yelcanrrortenapa' sañapa' amaña sellcapretenyo."

Allempo Jesúsapa' rrallme'chos fariseo pa'paclo ñeñt' sochetsa Simón

³⁶ Allempoña Jesúsapa' o' huapoña ñaña puesheñarr fariseo o'ch otenana' Jesús rrallme'chapreteñepa' pa'paclo. Jesúsñaapa' allenta coterran fariseo. Allempoña çhapach pa'paclo anorrcha'toset parro allcha' rrallme'chapretos.

³⁷ Puesheñarrña coyanesha' ñeñt' allo'marnesha' ñeñt' atarr ecañoresha't, ñañaapa' o' e'mare'ch o' çhap Jesús fariseo pa'paclo all rrallme'chen. Ñañaapa' huapa, huapatan ñeñt' atarr eñmosa't ñeñt' nanac tsa'te'; huapatañpes puetellmño ñeñt' otenet alabastro.

³⁸ Allñaapa' pueya'chpeñesha' huapa, ponmosana Jesús pa'tco. All atarr yahuosa, puese'ñaapa' cha tsopsa'tos Jesús pa'tco. Allempoña chetosanña pue'chpa' alloña alla a'porrarra'tquër, tso'tsteca'tosan pa'tac, she'tatca'tos eñmosa'to.

³⁹ Añña fariseo ñeñt' hua'ñene' Jesús, ñañaapa' eñchpa' atet ot pueyoçhro: Tarraña añ yacma ñerra'm po'ñoçh ñeñt' a'mtenayeñ Yompör po'ñoñpa' eñotapaneñcha'ña añ coyanesha' ñeñt' a'pllene'pa' atarr ecañoresha't, amach muenacheñe o'ch a'pllosñañ ama't pa'tca.

⁴⁰ Jesúsñaapa' atet otan fariseo:

—Napa' nemneñ o'ch masheñe Simóna notap allpon ñoñets.

Fariseoñaapa' atet och:

—E'ñe pocte' nenteñ Maestrocha' o'ch pöten.

⁴¹ Jesúsñaapa' alla toma'ntacha, atet och:

—Napa' o'ch not, allo'tsen puesheñarr acheñ ñeñt' artetsa quelle. Ñañaapa' artana puesheñarr acheñ nanac shonte' quelle ñeñt' otenet quinientos denario*; po'psheñeññaapa' archa po'poñ quelle ñeñt' ama tama atonayaye ñeñt' otenet cincuenta denario.

⁴² Attoña epsheño'maretpa' ama eshcaye' tsa'tuerreto ñeñt' allpon teba'yenet tarro'mar ama echeneto alloch tsa'terret. Ñañaapa' e'ñe atta peretna'huerranet epsheño'maret, e'ñe attecma ama eseshaye' tsa'terrtso. Te'ña masheñe Simóna o'ch na'p'to'tap, añ epsheño'mar ñeñt' amorrentare't attoch peretnerranet allpon tebenet çerra'tsena't pentenña pa' ñeñt' atarr morrentenaya ñeñt' peretnene', ñato' añte' acheñer ñeñt' tebene' quinientos denario amapa' añte' ñeñt' e'ñe cincuenta denario tebene'?

⁴³ Simónñaapa' alla anapueranerr Jesús, atet otererr:

—Ñehua, añte'ca'ye atarr morrentenaya ñeñt' ap shonte' quelle, tarro'mar ñapa' shonte' o' atta ap'retnare'tterra ñeñt' allpon shonte' teben.

Jesúsñaapa' alla otererr:

—Atetca'ye masheñe.

* **7:41** Denariopa' quelle ñeñt' allpon tsa'tenet pam'tarr ñeñt' taruaset all pa'nyo.

⁴⁴ Allempoña Jesúsapa' cohua' allente'tsen coyanesha' allotñaapa' alla oterranerr Simón:

—Pecue' añ coyanesha' ñeñt atet pösen. Allempo nechap pepaclopa' pñapa' ama es pñapapno ama't oñapa' ama pñapapno alloch ne'patca'tosa. Tarraña añña coyanesha'pa' ñaña ne'patca'tose' e'ñe ña püeso'yo allempoñaapa' alla a'porrarra'tquërren e'ñe ña pue'cho.

⁴⁵ Ñaña allempo nechap pepaclopa' pñapa' ama't pehuomcha'teño'apa' ama petso'ttsa'pa'tapno. Tarraña añ coyanesha' e'ñe allempo nechap pepaclo ama atta cächposno allorocma tso'tsteca'tosen attoña orrtatosan püemorrenteña nocop.

⁴⁶ Papa' ama't coñe'tapa' ama es peshapono noño ama't olivoso'ya ñeñt ama tsa'teyaye. Tarraña ñañaapa' eñmosa'to she'tatca'tosen ñeñt atarr tsa'te'.

⁴⁷ Attoña te'pa' atarr orrtatosnan ñeñt atto morrentosna. Napa' neñoteññañ ama't shonte' po'chñar te'ñapa' o' e'ñe a'pretna'huare'tta. Tarraña po'psheñeñ ama't ama tama ochña'teyaye attoña a'pretna'huare'tta po'chñarpa' ñañaapa' ama e'ñeye' morrentapanoña ñeñt o' peretnerrñañ po'chñar.

⁴⁸ Allempoña Jesúsapa' otan coyanesha':

—Te'ña po'ño'chpa' o' e'ñe a'pretna'huare'tterra po'chñar.

⁴⁹ Allempoñaapa' ñeñt parro rrallme'chenet, ñetñaapa' otanna'tyeset:

—Esesha'huañaca'yeña añ yacmar atto peretnerraña ochñarets.

⁵⁰ Jesúsñaapa' alla oterranerr coyanesha':

—Papa' atto atarr peyemtenna ñeñtña o' a'qushpaterre'p. Te'ñapa' o'ch ahuerre'p e'ñe peñmañesha'.

8

Atto coyanesha'chnopa' es apa'yese't Jesús ñeñt allpon echyenet

¹ Allempoñaapa' chopeñe'cherrerr Jesús erraparen serrpare'tyesnomue' cohuen ñoñets attoch chap allempo ayochreshattena Yompor. Erracmañen chopeñe'chyen, ora allemeñ anetso'mar all shonta'yena acheñenesha' ñaña all ama tama shonteyaye acheñ. Allñaapa' cota'huanererr pueyochresha' charrasheña ñeñt puechetsa epsheña.

² Allñaapa' cota'huanemñ ñaña patantarr coyanesha'chno ñeñt a'crratyeesua Jesús ahuañmo'cha, püesheña'tetspa' ñeñt cächpatatyerr oneñe't ñeñt chorahuate't, po'psheñeñe'chnopa' ñeñt a'crratyees ñeñt pa'namen atснаñtsor muerochtatyesahuete't. Püesheñarr coyanesha' ñeñtapa' añ pa'so'cheñ María Magdalena. Ñeñt Maríarpa' Jesúsñaapa' puecächpatataroñ cancherr oneñe't.

³ Ñehua, po'psheñeñ coyanesha' añ pa'so'cheñ Juana. Puerrollarñaapa' añ pa'so'cheñ Chuza añ po'taruas pen atto sherbenan añcha'taret Herodes. Allotña po'psheñeñ coyanesha' ñeñt cota'nene' Jesús ñeñtapa' añ pa'so'cheñ Susana. Ellopa' shonte' po'potantañ coyanesha'chno ñeñt es apa'yese't Jesús ñeñt allpon echyenet ñet.

All toma'ntatanet Jesús ñeñt a'parre'tene' puerets

(Mt. 13.1-9; Mr. 4.1-9)

⁴ Allema'teñ anetsot huacha'tyena acheñenesha' ñeñt chächets Jesúsesho. Allempoñaapa' o' cha shontoset nanac, Jesúsñaapa' serrpare'tatapanet, atet toma'ntatanet:

⁵ —Ñeñtña a'parrene' puerets ñañaapa' ahua' allcha' a'parre'tyenana' puepuer. All a'parre'tyeñ patanta'tetsñaapa' alla chapyes toño'mar, ñeñtñaapa'

atta atmama'tyes acheñenesha'. Allñapa' huačha'tyesa ñaña ot e'ñe añyallme'chuenana' puerets.

⁶ Po'poñechnoñapa' alla čhapyes mapuetro'meso'mar. Ñeññapa' mameshapa' cheparesuañ, tarraña mameshapa' alla hueya'huerra tarro'mar all mapuetro'mesopa' ama eñalle ama't coñe'ta oñ ñeñtcha' a'yamosam̃pse' narmets ñeñt o' cheparesua all.

⁷ Po'potantañña pueretspa' alla čhapyes allcha' chepares aj. Allpa'čho' mameshapa' cheparesuañpa' ajñapa' mameshapa' atesha'tua alla ca'matuerranña narmets alla a'cllatuer.

⁸ Po'potantañechno ñeññapa' arr čhapyes all e'ñe cohuen patso. Ñeññapa' e'ñe cohuen chepares. Allempoña atesha'tuapa' atarr aton ellom̃re'tyes. Puecha'tetspa' čharroch čharra' pue'llomer.

Allempoña serrpare'tatuanet atetpa' o' alla oterraneterr. E'ñe huomen-cocma eñorana'tanet, atet otanet:

—Ñeñtes po'ñočh ne'mñotene', čhaponasepa'ch seyočhro ñeñt atet netma'ntatensa añ ñoñets.

*Atet otanet Jesús ñeñtecop atet toma'ntatyenanet
(Mt. 13.10-17; Mr. 4.10-12)*

⁹ Allempoña pueyochresha'pa' ochet Jesús:

—Ta'm ¿esťe'ña petma'ntatenya? Yañapa' ama yeñoteñe.

¹⁰ Jesúsñapa' alla oterraneterr:

—Sa te'pa' Yomporña o' muenaterres attoch señoterr ñeñt ama eñotpahuoyaye ama't ahuatoteñ atet penaña Yompor po'cohuenña atto atarr ayochreshattena ña. Tarraña po'potantañechnoña ñeñt atta es puecha'yetsa, ñocpuetpa' ama eñoteñeto ñeñt atet atma'ntatareť ñoñets. Attoña ama't enteñetañ ñetñapa' amach es čhenahueto pueyočhreto. Ama't e'mueñetañ amaña čhenanetoña pueyočhreto ñeñt atet yečhateney Yompor po'cohuenña.

*Arrpa' all eñotatanet Jesús ñeñt toma'ntatenanet ñeñt a'parre'tene' puerets
(Mt. 13.18-23; Mr. 4.13-20)*

¹¹ 'Nehua, ñeñt atet netma'ntatasa ñorra'pa' ñeñtpa' atet notenes: Ñeñt a'parre'tyene' puerets, ñeñt pueretspa' añ notenes Yompor po'ñoñ allempo serrpare'teñet.

¹² Añ puerets ñeñt čhapyesets toño'mar ñeñtpa' añ notenes acheñenesha' ñeñt e'mñotenayeyñ Yompor po'ñoñ. Allempo e'mñotueta' allorocmach huapa oneñeť o'ch alla puerratañperranet Yompor po'ñoñ pueyočhretoť. Attoña amach mueneñeto o'ch ame'ñenet, attochña ñetpa' amach a'queshpatareťterreto.

¹³ Ñaña ñeñt čhapyesets mapuetro'meso'marpa' ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech pocsheñesha' aguerrñañetañ Yompor po'ñoñ. E'ñech cohuen ame'ñeretañ tarraña ñetpa' mamecpach atet pet. Tarro'mar ñetpa' atet penet ñerra'mrrate' narmets ñeñt chepuets mapyo amach eñalle puerečh. Tsapatonetña ñerra'm o'ch huapanet topateñets, ñetñapa' o'ch alla cačhpuerrñañet Yompor po'ñoñ.

¹⁴ Ñaña puerets ñeñt čhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñotenayeyñ Yompor po'ñoñ. Ama'tcha' čhapanetañ mame' pueyočhreto, tarraña ñetpa' allo'nach senet aña atarr coťape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es ečhyenet attoch allo e'ñe cosha'yenet. Attoña ñetpa' amach

errotenot orrtatoñeto ñeñt atarr sherbets Yomporecop. Ñetpa' e'ñe atteta ñerra'm narmets ñeñt čha ca'matuerr ajma' amach errotenot ellomre'tyeseto.

15 Ñaña añ puerets ñeñt čhapyesets e'ñe cohuen patso ñeñt e'ñe cohuen cheparsatspa' ñeñtña toma'ntenaya po'potantañ acheñenesha' ñeñt e'mñotene' Yompor po'ñoñ. Ñetña'pa' atto ame'ñeññañet Yompor po'ñoñ amach puesereto čhoch eñochet pueyočhreto attoch e'ñe cohuen ma'yočhroñet Yompor po'ñoñ. Chocmach orrtatyenet ñeñt atarr sherbets Yomporecop amachña čha cačhpueñeto. Attoña ñetpa' e'ñe atet penet ñerra'm narmets ñeñt atarr aton ellomre'tyets.

Arrpa' all toma'ntatanet lampareñ atto čhoyo'tampeney

(Mr. 4.21-25)

16 Jesús'pa' alla toma'ntaterraneterr po'poñonet; ñeñt'pa' atet otanet:

—Ñerra'm esempo ya'llchaten lampareñ ñeñt'pa' ama añecpaye' ya'huortateñe o'ch alla ye'rromanper coymño. Ñaña ama añecpayaye o'ch alla yener o'ponot yemayeñnačo. Añecopña ya'huortatenña lampareñ o'ch yene' enonet attoch čhoyo'tampesuan allohuen acheñ ñeñt be'tosčhets o'pono pocollo.

17 Tarro'mar allohuen ñeñt ama eñotpahuoyaye ama't ahuaťoteñ, te'ñapa' o'ch e'ñe orrtataretterra attoch e'ñech eñotataretetuerret e'ñe poctacma.

18 Ñeñto'marña sapa' señotenaťe' e'ñete' po'ñočh cohuen se'mñoteññañ Yompor po'ñoñ ñato'pa' amate'. Esha'te' čhena pueyočhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esha'ña ñerra'm ama čhenaneto pueyočhro tarro'mar ñetpa' ama po'ñočhaye' aguññañeto Yompor po'ñoñ ama't allpon eñotenetañ pueyočhro ñeñt'ña'pa' čhach puerratañperranet Yompor.

Allempo huapoña Jesús pachor ñaña pa'mo'nasheñnesha'

(Mt. 12.46-50; Mr. 3.31-35)

19 Allempoñapa' huapa Jesús pachor epuet ñaña pa'mo'nasheñnesha'. Chapuet allpa' shonte' acheñenesha' ñeñt emchorrenaya Jesús. Ñeñto'marña ñetpa' ama eshcaye' entosetoña Jesús allame'tets.

20 Allempoña acheñenesha' ochet Jesús:

—O'ca'ye huapaña pachor ñaña pemo'nasheñnesha'. Ñetpa' a'yote'tsa'yenet, mueneñet o'ch entenpeta'.

21 Ñaña'pa' atet otanet:

—Allohuen ñeñt e'mñotene' Nompor po'ñoñ ñetña ñerra'm atet pohuenet ñeñt atet oteney, ñeñtña e'ñe po'ñočh nachor nepen ñaña ñeñtña e'ñe nemo'nasheñ nepen.

Allempo a'mcherran Jesús huomenquěsha' ñaña sa'p ñeñt emo'yarertetsa

(Mt. 8.23-27; Mr. 4.35-41)

22 Allempo čherrerr pamťarr Jesúsñapa' a'tapos noñto epuet ñaña pueyočhresha'. Ñaña'pa' atet otanet:

—Te'pa' o'ch ahuañpsey yomťa'n.

Allempoñapa' ahuañpset noñto.

23 Allempo ahuañpset Jesúsñapa' alla ma' noñto. All muenpa' machayota huomenquěshatañpesnomuet. Emo'yare'ñapa' čha esha'tena noñto, atteñapa' chorramoch oñ noñto čha muene' esha'tatan noñt.

24 Atteña pueyočhresha'ñapa' ponem'yet Jesús all muenpa' opueret, atet ochet:

—Maestro, po'ñočuachca'ye yocla'huerrate'.

Jesúsña tanterrapa' e'ñe po'ñoñoña a'mtsoññetueran huomenquësha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen muechettamperret.

²⁵ Allempoña Jesúsapa' otanet:

—Eso'mare'tña sapa' ama e'ñeye' seyemtenno.

Ñetñapa' cha atarr nanac yorennet. Atta cohuanrrorteñet ñetñapa' atet otanna'tyeset:

—Ta'mca'ye añ acheñerpa' esona'tarte'ca'ye. Atarrepa't es a'mchechaten, ama't po'ñoñoñapa' a'mchechaterran huomenquësha' ama't ñaña emo'yare' oñ.

Atto gadaro'marnesha' ñeñt chorrena oneñetpa' huapa Jesúsesho
(Mt. 8.28-34; Mr. 5.1-20)

²⁶ Allempoñapa' o' etsotaset yomta'n all senet. Allpa' añ pa'ney pene' gadaro'marnesha' alla yot Galileot.

²⁷⁻²⁹ Allña sohuosa Jesús noñto'pa' allñapa' huapoña puesheñarr yacma ñeñt allo'marnesha', tarraña ñapa' añ chorrenaya oneñet patoner. Ñeñtñapa' ahuatoteñ atta chopeñe'chyen muelle'mcot, ama shetamteno. Ñapa' alla ye'chena all pampueñet arromña'etchno ama pocolloye' ye'cheno. Ñehua, oneñetpa' allempo rromuenan yacmapa' epaye' ottatse'tache't allempoteñ. Pamo'tsesha'ñapa' ahuo'ch rromuetpa' o'ch huanquëtañ attoch cohuanmpeñet. Ñaña'pa' chach tsepe'tuanman allo huanquëññañet pot ñaña pa'tac oneñetñapa' ahuo'chcho' matach a'yo amayo. Allempoña entapan Jesúsapa' rrananma huomenc, mata Jesúsesho, rromosñaña allame'tets. Allempoña Jesúsapa' otosan oneñet ñeñt chorrenaya yacma:

—Te'pa' o'ch peca'chpa'ner añ acheñer.

Ñeñtña chorrena oneñetpa' ñaña'pa' atet otapan Jesús:

—Eso'maruachca'ye Jesús o'pa'tsrre'mochtanatosen, papa' ñeñte'p Ñeñt Nanac Parets Puechemerep. Te'pa' notapapcha' amach pecoñchatatstosno.

³⁰ Jesúsña'pa' alla oterranerr ñeñt chorrena oneñet:

—Papa' ¿eso'tña peso'chena?

Ñaña'pa' atet oterranerr Jesús:

—Napa' añ neso'cheñ Legión.

Ñehua, añ so'chñets ñeñt otenet shonte' nanac, tarro'mar ñeñt nanac patoner oneñet ñeñt chorrenaya.

³¹ Ñehua, oneñete'chnoñapa' atet otare'tapet Jesús:

—Amach arra pemñatstosye o'pono coñcha'puetso.

³² Ñehua, allpa' a'yente'tsa'yen shonte' chañcho'chno ñeñt rratse'tyets as-pentonet. Ñeñto'marña oneñete'chnopa' atet otare'tapet Jesús:

—Ñerra'm choch muene' erroten pe'poseypa' arrña pemñaye'chosey chañchesho allochñapa' o'ch yechorra'yererr ñaña chañcho'chno.

Jesúsña'pa' allenta otanet:

—Ama'tca'ye orrasca'ye.

³³ Allempoña oneñete'chnopa' ca'chpa'huaneret yacmapa', alla chorrereter ñaña chañcho'chno. Chañcho'ña'pa' allempo chorrosya oneñete'chnopa' chepa'tcha' matrra'tua allohuen ñegone't shor'cha'tuos allotpa' e'ñe ño'shrra'tuosa oño.

³⁴ Acheñenesha'ña ñeñt cohuanmpene' chañcho allempo eñchet atet pa' chañcho o' shor'cha'tua oño, ñetñapa' allenta matrra'tet ñamet pueyorñot

ahuanmuet anetso. Allñapa' serrpare'tyesoset ñaña ora allohuen allampaño'mar.

³⁵ Acheñenesha'ñapa' allenta ahuanmuet ahuo'ch enteñeta'. O' cha'cha'tet Jesúseshopa' allñapa' entoset yacma ñeñt chorre't oneñeñ. Alla anen alame'tets Jesús pa'tcot ashtamañ. O' eñoterra o' cohuenterra. Ñetñapa' cha atarr mecha'na'toset.

³⁶ Añña ñeñt entene' Jesús atto ca'chpatatenan oneñeñ acheñ, ñetñapa' allenta serrpare'tatapet ñeñt hua'cha'ttsa anetsoñ.

³⁷ Allempoña allohuen acheñenesha' ñeñt ye'cha'yetsa all ñeñt gadaro'marnesha' ñetñapa' pueyorñotet atet otoset Jesús:

—Te'pa' o'ch ahuerre'p arrot.

Allempoña Jesúsapa' a'terr noñto o'ch ahuerr.

³⁸ Yacmaña ñeñt chorre't oneñeñ ñaña'apa' allenta otan Jesús:

—Napa' nemneñca'ye te'pa' o'ch nocterre'p.

Tarraña Jesúsñapa' ama muenache, atet och:

³⁹ —Allapach, te'pa' o'ch ahuerre'p pepacillo pamo'tsesho'mar o'ch peserpare'tatuerranet ora allohuen atto Yompor atarr yenpose'p.

Ñaña'apa' atet otue Jesúsapa' atet'cho' pa. Allenta ahuerr serrpare'tyesnerrets ora anetso'mar atto Jesúsapa' atarr nanac yempos.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeñt a'plla'nmue' pa'shtam

(Mt. 9.18-26; Mr. 5.21-43)

⁴⁰ Allempoña alla cherr Jesús añeñta'n allot ta ahuaña. Acheñenesha'ña allpa' e'ñe pocsheñesha' agapapueñet tarro'mar o' atarr cohueret o'ch huerra.

⁴¹ Allempoña allpa' huapoña puesheñarr am'cha'taret añ pa'so'cheñ Jairo. Ñapa' ñeñt puesheñarr ñeñt am'cha'tarettetsa judionesha' po'prahuo. Ñaña'apa' alla rromosa Jesús pa'tcotpa' atet otosan Jesús:

—Napa' nemneñ o'ch p'octerren nepacillo,

⁴² tarro'mar neseñ ñeñt nepatrrorpa' cha atsna'ten o' a'po'ntsa'mocha.

Ñehua, ñeñt po'señpa' allponte' echenan po'charña charra' puechena epa char.

⁴³ Allempo cota'ner Jesús cota'huaner ñaña shonte' acheñenesha' cha emchorratse'tnomet, cha to'mama'tneñet. Allñapa' cota'nmanet ñaña puesheñarr coyanesha' ñeñt atsna'tets. Charra' puechena epa char ñeñt atto chocma yella'yena. Ama't epaye' partata o' a'gasta'huahuan po'çllayor atto parteñet amaña eseshaye' a'crraterraye.

⁴⁴ Ñaña'apa' all cota'nenan Jesús pa'che'ñoñ, allñapa' a'p'llerrñaña' pa'shtam pa'rrpe'mot. E'ñe a'p'lla'hue' pa'shtampa' allorocma maserrña po'rras, o' metuer ñeñt atto muerochtena.

⁴⁵ Jesúsñapa' atet otanet:

—¿Esesha'tña o' a'p'lla'nmuenña neshtamot?

Ama eseshaye' eñoratso. Pedroña ñaña ñeñt epuet yemtena, ñetñapa' atet ochet Jesús:

—Maestrocha' papa' penteñte' shonte' acheñenesha' ñeñt allotemeña peto'mama'tnene'. ¿Eso'mare'tña p'otenña esesha'te' pa'p'llene' peshtamot?

⁴⁶ Tarraña Jesúsapa' atet oterraneterr:

—Napa' neñoteñ po'ño'ch puesheñarr acheñ e'ñe puemnenñoñ a'p'llenen neshtamot tarro'mar napa' neñotena napa' o' na'crrach e'ñe na nehuamencot atto a'p'llenen.

⁴⁷ Coyaneshañña allempo ñapa' eñotena amach errotenoť a'nasoto. Ñapa' čha pa'shmuena pueyorñoť concorposa Jesús pa'rrpōť. Allñapa' e'ñe a'meta'huosan ñapa' añecopña a'pñenan Jesús pa'shtam attoch correrra e'ñe cohuen. Allñapa' atet otan allohuen acheñenesha':

—Na allempo na'pñloñ Ayochreshať pa'shtampa' ñeñña na'crraterre' al-lorocma.

⁴⁸ Jesúsñapa' atet otan coyanesha':

—Papa' nesñeshacha' atto atarr peyemtena na attoña te'pa' o' e'ñe na'crratnomuep. Te'ñapa' o'ch ahuerrep e'ñe peñmañesha'.

⁴⁹ Allempo eñorena atetpa' allñapa' huacha'ta ñeñ huetsa amcha'taret Jairo pa'pacloť. Ñetña huapuetpa' atet otoset Jairo:

—Peseñpa' o'ca'ye rroma. Te'ñapa' amach allo'na pã'tsre'moçhtana'tatsche Maestro o'ch coterrep pepaclo.

⁵⁰ Jesúsña ama't e'man atet otoset Jairopa' ñaña'apa' atet otan Jairo:

—Papa' amach čha pe'charrtatatsto peyoçher, nachña e'ñe peyemta attoch correrraña peseñ.

⁵¹⁻⁵³ Allempoñapa' ahuanmuet Jairopahuo. Chapuet pocollo allñapa' allo'tsa'yen shonte' acheñenesha' all yahuanrrortenet, ya'na'teñet arromñať. Jesúsñapa' otosanet:

—Amach atarr seyahuatsto. Añ shopshesha'pa' amaca'ye çoye' rromueno çhaca'ye muen.

Ñetña pachmare'teñoťetpa' atta che'tatsetyesapet tarro'mar ñetpa' e'ñeca'ye eñoteñet çhoca'ye rromuen. Allempoña Jesúsñapa' ama muenatano allohuen acheñenesha' o'ch be'toset allo'tsen arromñať. Ñapa' aña muenat Pedro ñaña Juan, ñaña Jacobo ñaña arromñať puepapar ñaña pachor ñeñña epuet be'tosçha'toset allo'tsen arromñať.

⁵⁴ Allempoña Jesús'pa' rremota'tosan shopsheshañ pototpa' po'huamencocma otos:

—O'ch nesñe notosep, te'pa' çořpa tanterrtsa.

⁵⁵ E'ñe otue' atetpa' allente'pa'tcha' o'rrerrerra čha tanterrtsa. Jesúsñapa' otanet:

—Te'pa' o'ch serratallme'cher.

⁵⁶ Puepaparña ñaña pachorpa' ñetña'apa' atta cohuanrrorteñet. Jesúsñapa' atet otanet:

—Amach esesha' sota'psa'tatsto ama't puesheñarra ñeñ atet o' norrtaten-nasa' sepaclo.

9

Allempo Jesús'pa' llesensan pueyochresha' çharrasheña ñeñ puechetsa epsheña

(Mt. 10.5-15; Mr. 6.7-13)

¹ Allempo çhapa'muen allempo Jesús agota'mueanan pueyochresha' çharrasheña ñeñ puechetsa epsheña. E'ñe apçha'huet ñeshopa' ñaña'apa' atarr ahuanencať pã'yasanet, attoña apanet ñaña llesens attoch caçhpatatyeret oneñeť acheñenesha' ama't erra'tsena ñeñ atarr mueroçhtatyenuhuet. Ñaña ahuanencať pã'net attoch a'crratyaset acheñenesha' ama't erra'tsena ñeñ osyenuhuet.

² Attoña llesensanet attoch ahuanemyeset pa'namen anetso'mar ser-ppare'tyesnomuet Yompor po'cohuenña atto atarr ayochreshatena ña. Ñaña añecpa'ña llesensenanet attoch a'crratyaset acheñenesha'.

³ Ñaña atet otapanet:

—Amach es sanmatsto ama't coñe'ta allcha' sechopeñe'chyes—ama't se-carra, ama't sebolsa, ama't ñeñtcha' serra'yesnom ama't seçllayora ama't e'ñe epma seshtampa' amach sanmatsche sechope'chpayo.

⁴ Alla oterraneterr:

—Ama't errach pocollro seçhap allach sommosa allponmat esempohuach ahuerrerr po'poñ anetso.

⁵ Ñerra'm erra anetsro ñeñt allo'marnesha'ña ama cohuenaye' agapase-topa' o'ch semtterrerr ñaña allot. Ñerra'm allempo semtterrerrña ñaña allot ñeñtña setco'tsa'yen pañe'te' patspa' çhoch sepa'shetca'tyesnomña setac. Attochña allo'marnesha'pa' o'ch señoatnomanet ñetpa' amaca'ye pocteye' entenanetoña Yompor.

⁶ E'ñe ñeñta otaretetuetpa' ñetñaapa' allenta ahuanmuet o'ch chopeñe'chyeset erracmañen anetso'mar. Allñaapa' añ serrpare'tyesnomuet cohuen ñoñets alloch yequeshperra. Ñaña all chopeñe'chyeset erracmañenpa' allña a'crratyeshomet ñeñt atsna'tyets.

Allempo e'ñe cohuen es orrtatyes Jesús, Herodesñaapa' çha otapañ Juanañte' o' tanterra ñeñt apataye't acheñ Yomporcop

(Mt. 14.1-12; Mr. 6.14-29)

⁷ Anicha'taretña Herodespa' ñañaapa' atet e'mare'tenan Jesús ora ñeñt allpon atet pa'yena. Ñañaapa' çha atarr llequëna tarro'mar patanta'tets acheñenesha'pa' atet otyenet te'pa' o' orrtterra Juanañ, o' tanterra rromot. (Herodespa' añña atarr llecatene' tarro'mar ñapa' ña pechate' Juan ahuaña.) Ñeñto'marña ñapa' ñeñta nen pueyoçhro atto acheñenesha' otenet ahuo' tanterra Juan rromot.

⁸ Po'potantaññaapa' atet otyenet:

—Elíasoñca'ye o' orrtterra.

Po'potantaññaapa' ñetpa'çho'ña atet otyenet:

—Añpa' ñeñtca'ye a'mtaye't Yompor po'ñoñ ahuañ, te'ñapa' o' tanterra rromot.

⁹ Anicha'taretña Herodespa' atet ot:

—Napa' neñotena naca'ye pechate'ña Juan ahuaña. Esha'huañaca'yeña ñeñt orrtatene' ñeñt ama't ahuañapa' ama yentare ñeñt atet atarr ne'mare'ten.

Ñeñto'marña ñapa' atarr mueneñ o'ch entan ñeñt Jesúsotets ñeñt orrtatyene' ñeñt ama puentare acheñenesha'.

Allempo Jesúsapa' rratenan shonte' acheñenesha'; ñeñtña acheñenesha'pa' allo'tsen amnaroch mil

(Mt. 14.13-21; Mr. 6.30-44; Jn. 6.1-14)

¹⁰ Allempo huacherra Jesús pueyochresha' ñeñt llesensa'yes ahuaña. Ñetñaapa' o' çhaçherret Jesúsesho, serrpare'tatyesueret Jesús allohuen allpon atet pa'yaset allemeñ anetso'mar. Allempoña Jesúsapa' ahuanman pueyochresha' e'ñe ñapfochayet, çhapuet all ama acheñempañooyaye all allame'tets anetso, ñeñt anetspa' añ pa'so'cheñ Betsaida.

¹¹ Tarraña acheñenesha'ñaapa' allempo e'mare'chet o' ahuanmuet all, ñetpa'çho'ña allenta ahuanmuet ñamet. Chaçha'tet Jesúsesho ñañaapa' e'ñe cohuen agapanet. Allñaapa' serrpare'tatyesapuerraneterr atet penaña Yompor po'cohuenña atto atarr ayochreshattena ña. Ñaña allpa' a'crratyepuerranerr ñeñt atsna'tyets.

¹² Atteñapa' o' ellerren. Añña pueyochresha' çharrasheña ñeñt puechetsa epsheña ñetñaapa' oteñeta' Jesús:

—Te'pa' o'ch pemueñhuer acheñenesha' ahuanemyerretepa' anetso'mar allampaño allcha' mayesuerret allcha' entyesuerret puerrar ñeñtcha' rra'yesuerret. Tarro'mar te'pa' arro'tseney all ama acheñempañooyaye.

¹³ Tarraña Jesúsñapa' otan pueyochresha':

—Sachca'ye apa'yesahuet ñeñtcha' rret.

Ñetñapa' atet ochet:

—Ya arrpa' amaca'ye es yecheno ama't coñe'ta. Yapa' e'ñe amnara pan yechen ñaña epatoll cac. Ñato' yapa' o'ch ahuey anetso allcha' yerañtena' rreñets ñeñtcha' yerrach allohuen shonte' acheñenesha'.

¹⁴ Ñehua, allo'tsen shonte' acheñenesha' amnarochte' mil yacmanesha'. Allempoña Jesúsapa' atet otan pueyochresha':

—Te'pa' o'ch soch acheñenesha' anorrcha'tyesetepa' e'ñe ñopa'ttsochmuet, e'ñech amnaroche'ttsochma charrapa'tets anorrcha'tyeset.

¹⁵ Pueyochresha'ñapa' atetcho' pet, anorrcha'tatieset acheñenesha' allohuenet.

¹⁶ Allempoña Jesúsapa' agapan ñeñ amnar pan ñaña epatoll cac, cohua' enonet parasyoso'tam'psan pan. Allempoñapa' shota'tan pan, shetse'tan ñaña cac. Apanatiesan pueyochresha', ñetñapa' epatieset allohuen acheñenesha' ñeñt anorrcha'tyets all.

¹⁷ O'ña epa'huet allempoña o' rrallme'chet allohuenet, e'ñe yetrra'tuahuet. O'ña yetuahuetpa' cha a'pchatyeset ñeñtñapa' a'yapa'cheret. Ñeñña a'yapa'cheretpa' chepa'tcha' chorrats charra' puechena epa cañter e'ñe tamo'yare'.

Atto Pedropa' otan Jesús p'apa' p'aña Yompor Puechemerep' ñeñtep' Cristotsets

(Mt. 16.13-19; Mr. 8.27-29)

¹⁸ Allempoña pam'tarrpa' allo'tsen Jesús all ma'yochena e'ñe ñap'ochayet pueyochresha' epuet allo'tsen. Allñapa' atet otan pueyochresha':

—¿Erroñena't otyenenña allohuen acheñenesha' napa' eseshante'?

¹⁹ Ñetñapa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñtepo' apatañtate't Yomporecop. Po'potantañña' atet otyenpet, p'apa' Elíasopo'te'. Po'potantañña' atet otyenpet p'apa' ñeñtepo' ñeñt a'mtaye't Yompor po'ñoñ ahuat. Te'ñapa' ahua' alla petanterra perromñot.

²⁰ Allempoñapa' alla a'p'to'terraneterr:

—Sañapa' ¿erroñena't sotenenna sa?

Pedroñapa' eñoratsapa' atet och:

—Papa' ñeñtepca'ye Parets Puechemerep' ñeñtep' Cristotsets.

Atto Jesúsapa' eñotatan pueyochresha' ñapa' amtsare'terrach

(Mt. 16.20-28; Mr. 8.30-9.1)

²¹ Jesúsñapa' alla o'terraneterr:

—Ama't pueñeñarroña amach esesha' sota'psa'tatsto napa' ñeñten Yompor Puechemeren ñeñten Cristotets. E'ñe po'ñoñ notenes amach esesha' sota'psa'tatsto.

²² Elloñapa' alla o'terraneterr:

—Napa' Ñeñten Acheñetosets, atet anaret nocop, nanaccha' na'muerochtatare'tterra. Amach esesha' pocteye' nenterraye—ama't ñeñt pompornesha' pen allohuen judionesha', ama't ñeñt pa'm'cha'tare'ternesha' pen allohuen judionesha' po'cornanesha', ama't ñaña ñeñt etsotayenayeñ ñoñets ñeñt atet anaret judioneshacop. Ama't ñetpa' amach eseshaye'

neyemterraye. Attachña napa' muetsataterrnetcha'. Tarraña poma'pamtañopa' o'ch alla tantaterren Nompör.

²³ Elloñapa' alla oterraneterr allohuenet:

—Ñerra'm esesha' muenene' o'ch coterrnet na e'ñe po'ño'ch attoch neyochresha' neperranet, añ poctetsa sehuanmuetepa'ña ñeñt atet muenenet e'ñe ñocpueta. Attochña ñetpa' o'ch e'ñe toma'nteret ñeñt chechnene' po'corsoch ama't pate'tets yet allcha' muerochtet ñamet. Attochña coterrnet e'ñe poctacma.

²⁴ Tarro'mar ñerra'm esesha' e'ñe añ muenenet o'ch correna atomat attoch e'ñe coshenet arr patsro, ñetñapa' chach a'chencatet ñañeñeta. Tarraña ñerra'm esesha' e'ñe pocte' entene' o'ch sohuanmuet ñeñt atet muenenet ñeñt e'ñe ñocpueta arr patsro attochña ñetpa' añach ma'yo'chret ñeñt cohuentetsa nocop, ñeñtña acheñerpa' corretsach pocsheñeshocmañen tayoteñ e'ñe erponañohuen.

²⁵ Ama't errponenaparen esocmañen es yeyoratsetyes ora allpon ñeñt yentyen añe patsro, tarraña ñerra'm ñeñtach e'ñe ya'chencaterre' yecamquëñohuen ñeñtñapa' ama't coñe'tapa' amach es sherberrye.

²⁶ Tarraña ñerra'm erra'tsencha' nepenquënaya na te' neñoñpa'cho'ña cha apenco'chen entennanet, napa'cho'ña nepenca'huerranetcha' esempoch nohuerra. Po'ño'ch napa' Ñeñten Acheñetosets nohuerrach e'ñe na necohuenño't, ñeñtara Nompör po'cohuenña epan ñaña po'millaño'teññaneshar ñeñt e'ñe torra'yetsa Partsocop.

²⁷ Po'ño'chca' te'pa' o'ch notas: Patanta'ttsos ñeñtes arro'tsa'yenes te'ña ama't ama serromhuena'pa' o'ch senterrñañ Yompör po'cohuenña atto atarr ayochreshatterra ña.

Allempo Jesús pa' po'poñetañpana pueyochresha'
(Mt. 17.1-8; Mr. 9.2-8)

²⁸ Allempo met allponmat ñato' po'psocmatño Jesús pa' ahuanman pueyochresha'; añ anem Pedro ñaña Juan ñaña Jacobo. Arr anmanet aspeno allcha' ma'yochena' Jesús.

²⁹ Allña ma'yochosapa' machayotepa'tcha' po'poñetañpsosanet. Pa'clloyotpa' cha po'poñ orrtosanet. Pa'shtamohuen atarr huallama'to poptosa.

³⁰⁻³¹ Allñapa' machayotepa'tcha' orrtanet Moisés ñaña Elías. Ñetpa'cho'ña atarr cohuen orreyenet. Allñapa' serrpare'toset epuet Jesús. Ñetpa' añ serrpare'tenet atto o' chapmoch attoch rroma Jesús o'ch ahuer pue'ntaño. Ñetpa' atet otyenet, arrcha' atet peret Jerusaléño.

³² Ñehua, Pedro ñaña ñeñt epuet allo'tsen, ñetñapa' ama't atarr moñe'tenetañpa' alla e'ñe achñesuerret, attoña entoñet Jesús po'cohuenña ama't ñeñt parro tom'chen.

³³ O' ma'naterrmocha Moisés ñaña Elías attoch sa'neret Jesús. Pedroñapa' allenta eñora, atet otan Jesús:

—¡Atarruaca'ye Maestrocha' cohueno'tseneyte' arr! Ama't pocte' penteñe o'ch yatomatonas ma'ppahua quërpachet, puepahuarra' pöcopcha', po'ppahueñpa' Moisésocopcha', po'ppahueñpa' Elíasocopcha'.

Pedropa' pueyorño't atfa muene' otatse't, ama eñocherrottencha' ot.

³⁴ Allempo eñorena Pedropa' cha orrtosahuet os chepa'tcha' a'pomañpsosanet. Atto a'pomañpsosanet ospa' ñetñapa' atarr nanac yörenet.

35 Cha e'morrtostsa ñoñets osoť; ñeñña ñoñetspa' Yompor otosahuet; ñeñtpa' atet ot:

—Añmapa' ñeññ no Nechemer ñeññ atarr nemuerena ñeññcha' e'ñe cohuen se'mñoterr.

36 Allempo o'huañ e'morrrta ñoñetspa' o' e'ñe ñapñamerra Jesús. Pueyochresha'ña allempopa' atfa a'nasoteñet. Ama't puesheñarroťetapa' ama otuerreto ñeññ atet o' entuahuet.

Atto Jesúsapa' a'crraterran cheshachor ñeññ otaten oneñeñ
(Mt. 17.14-21; Mr. 9.14-29)

37 Tsapatña allempo huaçhenet aspentotpa' allñapa' shonte' acheñenesha' ñeññ huaçha'ttsa ñeññ pocterrahuet.

38 Allo'tsen puesheñarr yacma ñañapa' atet otosan Jesús:

—Maestro, napa' atarr nemneñ o'ch pentennana' nacñe'ter. Napa' e'ñe ñeññetollapa nepatrror.

39 Ñapa' ñerra'm esempo rromueñ oneñeñpa' çhach rranare'ta o'ch otachpa' o'ch ata'tach patso çhach amtan pa'po'. Atfoña atarr atserrpatse'tateñ. Ama mueno o'ch a'rroyer.

40 Napa' o' notuosnañña peyochresha' o'ch caçhpatateret oneñeñ țarraña ñetñapa' ama erroť peto atfoch caçhpatateret oneñeñ ñeññ atarr mueročtatene'.

41 Jesúsñapa' atet ot:

—Sapa' ñeññes acheñres ama't mameshapa' ama ayemtenaye' sentpenno, çhach po'poñ sentuena seyoçhro nocop. O' allponmatuanen allo'tsenen arr patsro napa' atfa atarr na'huantennas, atfa necuenes ñato' atfoťpa' o'ch same'ñerrna.

Allempoñapa' atet otan yacma ñeññ otene' o'ch a'crratoñ puechemer:

—Te'pa' o'ch ñanmon pechemer arr.

42 Allempo aneñ Jesúseshopa' oneñeñña'papa' alla rromuerranerr cheshachor o' alla otatererr alla ata'tatererr patso. Jesúsñapa' atet otapan oneñeñ:

—Te'pa' po'ñoçh o'ch notañ, pecaçhpa'nerñaca'yeña añ cheshachor.

Allempo a'crrater Jesús o' alla apuerrñañ pompor.

43 Allohuen acheñenesha'pa' atfa cohuanrrorteñet. Ñetpa' e'ñe eñoteñet Yompor po'partsoña orrtetsa.

Arrpa' atto Jesúsapa' eñotaterraneterr puepocheño ñapa' çhocmach muetseret
(Mt. 17.22-23; Mr. 9.30-32)

Atfa epaye' cohuanrrorteñet atarr cohuen enteññañet po'partsoña, țarraña Jesúsñapa' alla yerpaterranerr pueyochresha', ñeñtpa' atet otanet:

44 —Te'pa' se'mñoten e'ñe cohuen, amach sepsatsternano neñoñ ñeññ atet notenes te'. Na Ñeññen Acheñetosetspa' pomataterrnetcha' atfoçhña erroťuanencha' perrnet.

45 Ñeñña ñoñetspa' ñetñapa' ama't puesheñarroťetapa' ama eshcaye' eñotenaye' enteñeto țarro'mar ama çhena' allempoch çhapanet pueyoçhreto. Ñetña pueyorñotetpa' ama eseshaye' a'pťo'tenaye este' otenanetña atto eñorana'tenanet.

All eñotateney ñeññ acheñer e'ñe po'ñoçh atarr asherben enten Yompor
(Mt. 18.1-5; Mr. 9.33-37)

46 Po'pocheñoña pueyochresha'pa' e'ñe ñagattseta otanna'tyeset:

—Ta'mca'ye erra'tsenoteyte'ñaca'ye ñeññey atarr sherbets ñeññey atarr amcha'tareťoyen enteney acheñenesha'.

⁴⁷ Jesúsñapa' e'ñe eñotenanet ñeñt atet cotape'chatse'tyenet ñet pueyoçhreto atto e'ñe cohuen entyenet e'ñe ñañeñeta. Ñaña' cheshatolla çhore'tpa' tomach e'ñe ñesho,

⁴⁸ allempoñapa' atet otanet:

—Erra'tsenotes sa ñerra'm e'ñe cohuen saguëñ ama't ñeñt ama asherbenaye' enteneto atet ñerra'm añ cheshatoll tarro'mar sapa' na same'ñena, na'ña e'ñe cohuen saguën. Elloña ñaña erra'tsenotes sa ñeñtes naguëne' na, ama e'ñe naptocheyey' saguëno, añe'ñaña saguënnan Nompoy ñeñt nellensene'. Tarro'mar ñerra'm erra'tsencha' pocte' entene' o'ch yenpuenan ama't ñeñt ama esoye' enteneto, ñetña' atarrcha' po'ñoçh asherben entenonet Yompor.

Atto eñotateney ñeñt ama çhoye' yepatare'tenaye ñeñña po'ñoçhpa' e'ñe parrocma yeyenpanna

(Mr. 9.38-40)

⁴⁹ Allempoña pueyochresha' ñeñt Juanpa' atet otan Jesús:

—Maestro, ya ahuañapa' atet yeñch puesheñarr yacma ñeñt caçhpatatene' oneñet acheñ. E'ñe pueçhore'teñoñep' pa peso'chñopa' oneñetpa' caçhpa'nerran acheñ. Yañapa' ama pocteye' yeñche tarro'mar ñapa' ama parroye' yeyemteno. Ñeñto'marña yapa' yoch:

—Amach atet pepatsto.

⁵⁰ Jesúsñapa' atet otanet:

—Amachca'ye sepatare'tatsche tarro'mar ñerra'm ama çho epatare'tenye yaña ñeñña po'ñoçhpa' e'ñeca'ye parrocma yeyenpanna.

Allempo Jesús'pa' cotape'chaterran cohuen pueyochresha' epsheña, ñeñtpa' Jacobo ñaña Juan

⁵¹ Chapmoch allempoch o'ch alla ahuer Jesús pue'ntañopa' ñaña' atarr sechena o'ch ahuer Jerusaléño. Ñeñto'marña mueñan pueyochresha' ñeñtcha' otrra'tatsa

⁵² o'ch ahuet samario'marnesha' pa'netsro o'ch e'noset muets allcha' çhap ñaña Jesús allcha' amesnom epuet pueyochresha'.

⁵³ Tarraña samario'marnesha'ñapa' ama mueneto o'ch agaparettet all pa'netsreto, tarro'mar ñetpa' eñoteñet arr sechenet o'ch ahuet Jerusaléño.*

⁵⁴ Ñeñto'marña Jacobo ñaña Juan ñetña' atet ochet Jesús:

—Partseshacha' ¿ama't pocte' penteñe yapa' o'ch yenam huapuepa' tso' entot? allochñapa' ñeñtcha' a'poyatatuerrahuet ñeñtcha' e'ñe a'chencatuerrahuet ñeñt atet pe't Elías ñeñt a'ntaye't Yompor po'ñoñ ahua't.

⁵⁵ Jesúsñapa' atta cohuanetpa' atet otanet:

—Ñeñt atet soctape'chatse'tyenpa' ama't mameshapa' ama pocteyaye. Ama't señoñeña Yomporpa' ama atteye' cotape'chatenyeña Puecamquëño't. Ñeñt semnen sapa' po'poña co'tapñats.

⁵⁶ Na Ñeñten e'ñe Acheñetosetspa' amaca'yeña añecop nohuapo o'ch na'chencatos acheñenesha'. Napa' añecopca'yeña nohuapa o'ch na'qeshpatos allohuen acheñenesha'.

Allempoñapa' o' metaçha'tet allo'tpa' ahuanmuet po'poñ anetso.

Allempo Jesús'pa' yeçhatan ñeñt muenene' o'ch coter

(Mt. 8.19-22)

* **9:53** Ñehua, yapa' yeñoteñ samario'marnesha'pa' ama mueno o'ch amo'tstana jerusaléño'marnesha' ñeñfara judionesha'.

57 Po'pocheñoñapa' allempo oñemyenet toño'mar allñapa' poctanet puesheñarr yacmapa' ñañapa' atet otapan Jesús:

—Na te'pa' nemneñ o'ch noctare'tyeseþ ama't errohuanencha' pechopeñe'chyes.

58 Jesúsñapa' atet och:

—Te'pa' napa' peñotencha' ama't nepaclapa' ama necheñe all neyçhenañ. Ro'queþpa' çhocma eñall pa'pon allecma yeçhena.† Oteçhnopa'çho'ña çhocma eñall pa'ma' allecma yeçha'yenet. Tarraña naña Ñeñten Acheñetosetspa' ama eñalle ñeñt e'ñe nepaquëll nepen allcha' neþanena.

59 Po'pocheñoña Jesúsapa' atet otarranerr po'psheñeñ acheñ:

—Te'pa' o'ch þoc'ta'n attoch po'ñoçh neyochresha' neperreþ.

Tarraña ñeñña acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho, o'chña nepampa'huera' apañpa' allempochña nohuerrapa' o'ch noctaþ.

60 Tarraña Jesúsapa' atet och:

—Acheñenesha' ñeñt ama yerpa'penaye Yompor, ñetñapa' pampanna'tetepa' parro arromñaæcmuet. Tarraña þocoppa' ñeñteþ o' peyerpuera Yompor añ poctetsa o'ch auyeseþ serrpare'tyese' Yompor po'cohuenña ñeñt atto atarr ayochreshattena ña.

61 Po'pocheño allempo serrpare'ten Jesús epuet ñeñt ame'ñenaya, ñeñña acheñerpa' atet otan Jesús:

—Napa' Ayochreshate po'ñoçhcha'ca'ye noctaþ. Te'pa' ato't nasuerra' nepacllo attoch neso'tera' namo'tsesha'; allempochña alla nohuerrerra' o'ch noctaþ.

62 Jesúsñapa' atet och:

—Ñeñt ama e'ñeye' ma'yoçhrenaye attoch torrenet e'ñe cohuen Yomporecop, ñeñña acheñerpa' amach e'ñe cohuenaye' sherbeno attoch e'ñe epatuan Yompor po'cohuenña ñeñt atto atarr ayochreshattena ña. Ñeñt acheñerpa' atetcha' netma'ntacha: Ñerra'm esesha' orrene' etamapets attoch etaman pats e'ñe cohuen paçharr pa'mro, ñerra'm pa'che'ñonña cohua'nom ama't mameshapa' amach etsotanoña etamapets attoch e'ñe paçharr etaman pats allcha' nare'tatse't pa'mro.

10

Atto Jesúsapa' mueñan pueyochresha' ñeñt cançhroch çharrasheña ñeñtcha' otatsa

1 Allempoña Partseshapa' alla llesenserranerr po'potantañ pueyochresha' cançhroch çharrasheña ñeñtcha' otrra'tatsa o'ch serrpare'tyesnomuet. Ñetpa' atetcha' þa'nmuet e'ñech epsheña'ttsocma tet. Arrcha' ta'yeset ora allohuen anetso'mar ñaña ama't allampaño'mar; allochñapa' allcha' oñem ñaña tsapatonet Jesús.

2 Ama ahuaneneta' Jesúsñapa' atet otanet:

—Shonte' narmets ñeñt nanac ellomre'tets ñeñtcha' a'yapaçhetañ. Tarraña ataruasaña ñeñtcha' a'yapaçhe'pa' ama atarr atonayaye. Te'pa' añcha'ña sanamoñ pamo'mte' mueñanepa'ña ñeñtcha' a'yapaçherrets pa'mro. Ñeñtpa' atet toma'ntatanet Jesús atto atarr shonte' acheñenesha' ñeñtcha' ame'ñerrtsañ tarraña ñeñtcha' ame'ñaterrahuetpa' ama atarr atonayaye. Añcha'ña yenam Yompor ñeñt Yamo'mte' yepen mueñanepa'ña pa'taruasañer ñeñtcha' torra'yerrtsa ñocop allemeñ anetso'mar.

† 9:58 Ñehua, Jesús añ toma'ntacha zorra ñeñt berrotets all pa'nyo.

³ Ñaña sapa' ñerra'm o'ch ahues te'pa' señoachcha' po'ño'ch chocmach eñall ñeñtcha' se'moñe'te' ama't sapa' amach cho errof sepenanetañe ñet. Ñeñto'marña notenes te'pa' o'ch nemñas e'ñech attes ñerra'm carrnero o'ch ahuo' allo'tsen ma'yarro'chno.

⁴ Ñaña amach sanmatsto quelle, ama't sebolsa, ama't po'ptaña sesap-atpa' amach sanmatsche. O'ch ahues sema'yorñecma. Ama't esesha'ch sehuomñcha'tyesnom toño'marpa' amach alla so'chtatsto.

⁵ Allempoch se'chap ama't erra'tsena anetsro all sesen, ama't erra'tsena pocoll allcha' se'chappa' ñanomcha' atet se'posa. E'ñe sehuomñcha'teñoñ ñeñt'apacllatesha'pa' o'ch senamatosñañ Yompor pa'nateña. Ñerra'm ñetña po'ño'ch e'neññañet Yompor pa'nateña, Yomporñapa' a'natenanetcha'.

⁶ Tarraña ñerra'm ñetña ama e'neññañeto Yompor pa'nateñapa' Yomporñapa' o'ch alla apuerres sa pa'nateña.

⁷ Ñeñte pocollo allcha' e'ñe cohuen agapaset allach sa'posa. Ñeñt' rrenet ñet ñeñtcha' rratapaset, ñeñt'ach serros saña. Tarro'mar ñeñtes torretsa e'ñe pocte' atetcha' tsa'tenset. Amach sommare'tyesatsto allemeñ pocollo'mar, allach e'ñe sommosa puepahuarro.

⁸ Ama't erra'tsena anetsro allcha' se'cherrerr allcha' e'ñe cohuen aguërrseterr, ama't errotena rreñets apasetpa' ñeñt'ach serros.

⁹ Allñapa' sa'crratyesoscha' ñaña ñeñt' atсна'tyets. Allcha' seser-ppare'tatyesosanet, atetcha' sotos: "Te'pa' o' ye'chapatonas Yompor po'cohuenña ñeñt' atto ayochreshattena ña. Aña palltetsa o'ch same'ñera attoch e'ñe 'chaponasa seyo'chro."

¹⁰ Tarraña ñerra'm erra anetsro allcha' se'chap ñeñt' allo'marnesha'ña ama cohuenaye' agapaseto, allña toño allecma chopeñe'chyenet ñet o'ch señoatnomanet. Ñeñt'pa' atetcha' sotnomanet:

¹¹ "Ama't pats ñeñt' o' cheta yetco arr sa'netsro, te'ñapa' o'ch yepa'shetca'tyesnoma attoch seño'ch sapa' ama't mameshapa' ama pocteye' entenso Yompor. Tarraña ama't atteñpa' te'pa' o'ch neñotatnomues Yompor po'cohuenña autsa 'chaponasañ ñeñt' atto ayochreshattena ña."

¹² Allempoña Jesús'pa' alla oterranerr pueyochresha' allempo ama seneta':
—Po'ño'ch te'pa' o'ch notas, esempohuañen allempoch a'crare'tetuerra allohuen acheñenesha'pa' añ anetso'marnesha' ñeñt' ama cohuenaye' sagapaye te', nanaccha' yoro'cheno'tsenterret allempo. Ama't sodomo'marnesha'pa' amach tama yoro'cheno'tsenterreto atet ñerra'm ñeñt' anetso'marnesha' ñeñt' ama cohuenaye' sagapaye te'.

*Atto Jesús'pa' eños epo'mar anetsocop all ama ame'ñyeto
(Mt. 11.20-24)*

¹³ Allempoña Jesús'pa' alla oterrer:

—Nanaccha' llequëñtso'tsa'yenes coraziño'marneshacha'; nanaccha' llequëñtso'tsa'yenes saña betsaido'marneshacha'. Tarro'mar ama't atarr norrtatyennaseñ nepartsoña sesho, sañapa' amaña soctape'chuerroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuatoteñte' coctape'cherretañ e'ñe cohuen Yomporecop. Ñetpa' attochña e'ñe orrtetañ 'cha llecatenanet po'chñar, cotnashe'mach chorra'yeseañ, tsapñach epachshema'tyenetañ all anorr'cha'tyenet puellquëño'fet.

¹⁴ Ñeñto'marña te'pa' notenes, esempohuañen allempoch a'crare'tetuerra allohuen acheñenesha'pa' tiro'marnesha' ñaña sidóno'marnesha' ñetñapa'

amach tama a'coñchatare'tterreto allempo. Coraziño'marneshacha' ñaña betsaido'marneshacha' saña allempopa' atarrcha' coñchaterrset.

¹⁵ Ñaña sa capernaumo'marneshacha' çhate' sotenapañ atto e'ñe cohuen sentyena sañeña, Yomporñapa' allentach a'tapaterres pue'ntaño. Ñeñtpa' amachca'ye atteye' perrsoña Yompor, allachca'ye huapore'terres o'pono coñcha'puetso.

¹⁶ Jesúsña allempo ama sena' pueyochresha' o'ch serrpare'tyeneta' anetso'mar ñaña'apa' alla o'terraneterr:

—Ñerra'm esesha'ch se'mñotapue' sa, na'naña e'mñotenet. Tarraña ñerra'm esesha'ch ama sagapaye sa, na'naña ama aguëneto. Ñaña ñerra'm esesha' ama mueno o'ch agapnet na, Nompore'naña ama mueneñeto o'ch agapet tarro'mar ñapa' ña nellsensene'.

Arrpa' allohua ñeñt atet otan pueyochreshachno ñeñt cançhroch çharrasheña. Allempoñapa' mueñanet allcha' serrpare'tatiesnomuet.

Atto huaçherra Jesús pueyochresha' ñeñt cançhroch çharrasheña

¹⁷ E'ñe allponmatatsapa' o' alla huaçherra pueyochresha' ñeñt cançhroch çharrasheña. Ñetñapa' e'ñe pocsheñeshocmañen huaçhenet Jesúsesho. Atet serrpare'tatueñet:

—Partseshacha' ama't oneñeñeçhnopa' e'ñe yeçha'nmaçha'tatue e'ñe yeçhore'teñoť pa peso'chño.

¹⁸ Ñaña'apa' otapuenanet:

—Napa' neñchca'ye oneñeñ allempo aprratamñpsaretta po'huamenc. E'ñe attema't ñerra'm ñapa' o' çha'nmachet entoť atet pena meratste' huetsa entoť o'ch çhap aña patsro.

¹⁹ Po'ñoçhca'ye napa' atarr ahuamencat neña'yesapas. Ama't allohuen ñeñt se'moñe'tyene' sañapa' ñeñtecopña nellsensa'yesas allochñapa' attoch e'ñe sa'mchechatyesuena' allohuen pa'namen, ama't shechpeçhno ñaña yellasoçhno, e'ñe satmama'teñoťpa' e'ñe sa'peptse'tatse'tueña'. Allochñapa' amach eñalleterre'te ñeñtcha' semueroçhtate' ama't patrra.

²⁰ Ama't atarr ahuamencateseñ atto o' sa'mchechatyesuahue oneñeñeçhno, amachña ñeñña atarr socshatsto. Añcha'ña e'ñe socshena atto aque-lca'yesaretes seso'cheñ Yomporesho ñeñt pue'ntaño'tsen.

*Atto Jesús'apa' atarr pocsheñesha' ma'yochena
(Mt. 11.25-27; 13.16-17)*

²¹ E'ñe allempoña Jesús'apa' atarr coshateñ Parets Puecamquëñ. Ñeñto'marña ñapa' e'ñe pocsheñeshoť ma'yochenana Pompor, ñeñtpa' atet oten:

—Na Apacha' o'ch na'ye'choçhtatonap, p'apa' pa ñeñtep atarr ayochreshattetsa pe'ntaño ama't ñaña arr patsro. Na'ye'choçhtatonap tarro'mar ora añaçhno ñeñt pecohuenña pepen, ñeñtpa' ama arreye' peçhapateñe pueyoçhro ñeñt atarr eñotañ entyetsa. Papa' aña peçhapaten pueyoçhreto ñeñt ama eñotañeye' entetso. Tarro'mar Apa e'ñe pemuereñoť ñeñtpa' atetña e'ñe pocte' penten pa. Arrpa' allohua ñeñt atet ma'yochenana Pompor.

²² 'Nomp'or allohuen po'cohuenña e'ñe eñotatuenen. Na ñeñten Puechemerenpa' ama po'ñoçh eseshaye' neñotenaye, ñapñaña Nomp'or eñotenen. Nomp'orpa'çho'ña ama po'ñoçh eseshaye' eñotenaye, napñaña na ñeñten Puechemeren e'ñe neñoteñ Nomp'or, ñaña erra'tsencha' ñeñt e'ñe pocte' nenten na ñeñten Puechemeren ñeñtñapa' o'ch neñotater Nomp'or.

²³ Allempoñapa' alla cohueranerr pueyochresha'pa' atet otanet e'ñe ñocpueta:

—Atarr cosheñtso'tsa'yenes sa tarro'mar e'ñe sa seclloyotpa' o' senterrñañ Yompor po'cohuenña.

²⁴ Po'ñoçhca'ye notenes e'ñe ahuatoteñpa' shonte' ñeñt a'mta'yesaye't Yompor po'ñoñ ama't ñaña ñeñt añcha'tarettatse't allempo, ñetñapa' atarr muenetañe't o'ch enterrñañetañ Yompor po'cohuenña ñeñt o' senterr sa te'. Tarraña allempo ñetpa' amaña eseshaye'ña enterrapaye Yompor po'cohuenña. Ama't atarr muenetañe't o'ch e'ññoterrñañet Yompor po'ñoñ ñeñt o' se'muerr sa te' tarraña allempo ñetpa' amaña eseshaye'ña e'muerrapayeña Yompor po'ñoñ.

Atto atarr cohuen orrtatos puesheñarr samario'marnesha'

²⁵ Allempoña puesheñarr ñeñt atarr etsotene' ñoñets ñeñt atet anaret judioneshacop, ñaña tantapa' atet otan Jesús attoch eñoch erroñente' yeçhaten ña, ñeñtpa' atet och:

—Maestrocha' ta', ¿erroñena'tcha' nepañña na e'ñe cohuen attoch napa' corretsanach e'ñe tayoteñ ama't errponañohuen?

²⁶ Jesúsña anaþpa' atet och:

—¿Erroñena't otenña ñoñets ñeñt atet anaret ahuatoteñ? ¿Eso'tña ñoñtsor pelleyenña þa ñeñt anaret all?

²⁷ Ñañaapa' atet och:

—Ñeñt ñoñetspa' atet oten: “Atarrcha' yemorrenteña Yeyomporer ñeñt Yepartseshar yepen e'ñe yeyoçhrocmañen. Ñaña e'ñe yecamquëño't yemorreñchach e'ñe yehuamencohuen, ama't ñaña ora yocþañohuen.” Ellonet po'poñpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.”

²⁸ Jesúsñaapa' atet och:

—Atetca'ye e'ñe atet þoten. Ñerra'm atetcha' e'ñe peþohuapa' þañaapa' corretsaþach e'ñe tayoteñ ama't errponañohuen.

²⁹ Ñeñtña acheñerpa' aña atarr muenen o'ch e'ñe cohuen enteñ Jesús ñaña allohuen acheñenesha'. Ñeñto'marña alla a'þto'terranerr Jesús:

—Ñehua, te'pa' o'ch þoten ¿eseshatña ñeñt e'ñe po'ñoçh namo'ts nepen?

³⁰ Attoch eñotach ñeñt e'ñe po'ñoçh amotso't entetsa ñeñt e'ñe pamo'ts þannena, Jesúsñaapa' atet toma'ntacha, ñeñtpa' atet serrpare'tach:

—Eñall puesheñarr judionesha' ñeñt huetsa Jerusaléño't, ñapa' arr sen Jericó. Toñoñapa' alla rromaþ eñe't e'ñe puerratañþsatsre'tuet ama't pa'shtam. Atarr atserrpet. Autsa muetsapuetañ allempoña ñeñt atserrþapue'pa' ahuanerret.

³¹ Allempoña tematenpa' puesheñarr judionesha' ñeñt cornesha' ñapa'cho'ña all oñem. Ñañaapa' ama't entospa' atta oñmatse'tañpesya a'yo'marpa' o' metane.

³² Allempoña tematenpa' huapa ñaña po'psheñeñ judionesha' ñeñt levitaneshatets. Ñapa'cho'ña ama't entospa' atta oñmatse'tañpesya a'yo'mar o' metane ñaña.

³³ Allempoña tematerrerr o' huapa ñaña puesheñarr ñeñt ama judioneshayaye ñeñtpa' samario'marnesha'. Ñapa' ñeñt pamo'tsesha' pen ama amo'tstenano judionesha'. Tarraña ñapa' allempo entosan puesheñarr judionesha' ñeñt atserrpenetpa' atarr muerosya.

³⁴ Allenta ponmosya, shosñañ olivose* ñaña vino allo partosñañ all atserpeñet.

Allempoñapa' huanquerrñañ all atserrpeñet. Tantaterpa' montacha pashanoropa' anem' allcha' mos. Allñaapa' all cohuanpsos.

³⁵ Tsapañña' cheta'muenan epa denario apa'muenan apacllatesha' atet ota'mueñ: "Te'pa' pecuanpescha', errponcha' pa'gasta' ello peçllayor, napa' netsa'tuerrpach esempoch nehuerra."

³⁶ Jesúsña' alla oterranerr ñeñt'acheñer:

—Ma'psheño'maretpa' papa' ¿erra'tsena'tña pentenña ñeñt' atarr amo'tsot entetsa ñeñt' e'ñe pamo'ts pene' ñeñt' rroma' eñet?

³⁷ Ñeñtña'acheñerpa' atet oterranerr Jesús:

—Añca'ye e'ñe pamo'ts pene' ñeñt' e'ñe puemuereno' partatse'terre'.

Jesúsña' atet och:

—Te'pa' atetcha' peperra pama. O'ch ahuerreppa' atarrcha' pemorrentera ora allohuen acheñenesha'.

Allempo Jesúsapa' chap pocollo all yeçhena Marta epuet pa'mo'nerr María

³⁸ All oñen Jesúsapa' o' chap paterr anetso. Allña puesheñarr coyanesha' añ pa'so'cheñ Marta, ñañaapa' e'ñe cohuen agapapan Jesús pa'paclo.

³⁹ Ñeñtña' Martapa' eñall ñaña pa'mo'nerr ñeñtapa' añ pa'so'cheñ María. Maríaña' all anen Partsesha' Jesús pa'rrpõt allot e'mñoteññañ ñeñt' atet serrpare'tatenanet.

⁴⁰ Pa'mo'nerrña Martapa' aña e'ñe ma'yoçhrena a'toramps'e' all puetare'tallme'chen. Ñañaapa' ponmana Jesúsapa' atet otos:

—Ayochreshate, amate' pocte' penteñe napta neptare'tallme'chen; nemo'nerrña' ama yenpuenno. Te'pa' o'ch p'och a'torampsapretnepa' natar.

⁴¹ Jesúsña' atet och:

—Nocha Marta, shonte' pa'namen ñeñt' petorra'yena, papa' ñeñtña' atarr pelcatene'.

⁴² Tarraña e'ñe patrraña ñeñt' atarr sherbets; ñeñtapa' atto e'ñe cohuen socshennana neñoñ. Pemo'nerr María' ñapa' ñeñtña' atarr e'nen. Ñeñtapa' ama't e'ñe esesha amach erroteno' puerratañpereto.

11

Atto Jesúsapa' yeçhatan pueyochresha' atetcha' ma'yochet

(Mt. 6.9-15; 7.7-11)

¹ Po'pocheño Jesúsapa' alla ma'yocherrerr. O' ma'yochuapa' puesheñarrña pueyochresha'pa' atet och:

—Partseshacha' te'pa' o'ch peyçhatey ma'yochatsa atet pe't Juanañ, ñapa' çhocma yeçhatane't ña pueyochresha' atetcha' ma'yochet.

² Jesúsña' atet otanet:

—Ñehua, ñerra'm esempoch sema'yochena atetcha' sot:

Yompore Partso ñeñte' pe'ntaño'tsen, yentapepa'ch pa' atarr Partso'p. Chapuepa'ch Nompore allempoch atarr pa'yochreshatterra arr pat-sro. Yetsotonapepa'ch arr patsro ñeñt' atet pemnen pa' Nompore atet penet ñaña pe'ntaño.

³ Chocmuepa'ch Nompore papuene' ñaña yocrram' ñeñt' allpon yepallta'yena pate'tets yet.

* 10:34 Olivo ñeñt' tsach allot yoreñet puerets pue'merot.

4 Peṗretna'huonayepa'ch Nompore allohuen yo'chñar ñeñt ama pocteye' pentapretenye, atto Nompore yapa'cho'ña yeṗretnannena ñerra'm esempo errot yeṗannena. Ñaña amach Nompore pemnatatsche sosya'tañ o'ch atarr topateney. Añcha'ña čhoch Nompore ṗa'ypo'ñataterrey allohuen sosya'tsañečno.

5 Elloñapa' alla yečhaterraneterr ñeñt atto e'ñe yenamueñoť Yompor apuecha'. Ñeñtapa' atet serrpare'taterraneterr toma'nteñtso.

—Ñerra'm eñall puesheñarr ñeñt e'ñe cohuen yeyemtenaya, ama't rročh tsapo o'ch ahuey pa'paclo yečhore'teñoťpa' atetcha' yotos: “Napa' masheñcha' añecop nohuena o'ch ṗapuen ama't coñe'ta rreñets,

6 tarro'mar o' čhap puesheñarr namo'ts ñeñt huetsa bačhayot, napa' ama es necheno ama't coñe'ta alloch neyema'cha.”

7 Tarraña ñapa' po'ponroťpa' ñato' čhach otapuey: “Amach ṗa'tsrre'močhtana'tatstosno tarro'mar o' e'ñe echarr neyottamṗesuenta, allohuen nacñeñaretolleshohuenpa' o' yemanrra'tuen. Ñeñto'marña ama eshcaye' atantenno o'ch neča'nmonaṗa attoch es napaṗ.”

8 Tarraña napa' o'ch notas, ama't ñeñt atarr yeyemtenaña' ñerra'm ama čha'nmaponayopa' yañapa' ñerra'm alla yenamuere'tpa' čha'nmaponayach attoch apapuey ama't erra'tsena ñeñt atarr yenamueñ attoch amach alla ya'tsrre'močhtana'tneñe es enamare'te'.

9 Ñeñto'marña napa' o'ch notas: E'ñe senamueñoť, Yomporñaapa' apascha'. Se'name'teñoťpa' señchcha', sečhore'teñoť, Yomporñaapa' e'ñe pue'mñoteñoťespa' e'ñech cohuen toramṗsapas.

10 Tarro'mar ñeñt es enamare'tetspa' ñetña es aguětset; ñaña erra'tsen ñeñt es e'nyetspa' ñetñaapa' enteretcha', ñaña erra'tsen ñeñt čhore'tyene' ñetñaapa' e'ñech e'mñotenanet Yompor.

11-13 'Yompor ñeñt pue'ntaño'tsen čhocmach e'ñe cohuenare' es apa'yeney ñerra'm esempo es yenamueñ. Ñapa' amach aña apuenye ñeñt ama cohuenaye' yenteno ya. Ama't sa ñeñtes arromñaťes atet sepeñ saña sechemer, e'ñech cohuen es sapueñ ñerra'm esempo es enamuenes. Atet ñerra'm allempo pa'chporrñoť es enamuenes, o'ch enamas mam* ñeñtcha' rra', sapa' ama't puesheñarroťesapa' amach aña sapueñeña sechemer mapue' ñeñt ama arrapahuoyaye. Amapa' ñerra'm cac enamuenes sañapa' ama't puesheñarroťesapa' ama aña sapueñeña sechemer shecheṗ ñeñt atarr amueročhtatañ. Amapa' ñerra'm pa'me' enamuenes sañapa' ama't puesheñarroťesapa' ama aña sapueñeña sechemer yellas. Ñeñto'marña sa ama't arromñaťes ama't ñaña atsrre'mñaťes sapa' e'ñe señoťeñ apa'yese' sechemerasha' e'ñe cohuenare'. Añña ñeñt Seyomporer sepen saña ñeñt pue'ntaño'tsen elloña ñapa' e'ñe eñoteñ atto e'ñe cohuenare' es apa'yenes saña. Ama't Puecamquēñ ñeñt e'ñe cohuen Parets attoña e'ñe cohuen chorratensa allohuenes ñeñtes enemyene' ña.

Atto puesheña'tets oteñet Jesús ñapa' oneñeťo' po'huamencot cačhpatenanña po'potantañ oneñeťečno acheñenesha'

(Mt. 12.22-30; Mr. 3.19-27)

14 Po'pocheño allo'tsen puesheñarr acheñ ñeñt chorrena oneñeť, čha opanatateñ. Allempoña Jesúsapa' cačhpatosan oneñeť atto chorrenana acheñ. Atto cačhpa'ner oneñeť ñeñtña opanpa' o' alla eñorerra. Acheñenesha'ña allpa' atta cohuanrrorteñet, atarr cohuen enteñet.

* 11:11-13 Ñehua, Jesús añ toma'ntatanet pan ñeñt puerrar penet all pa'nyo.

15 Tarraña po'potantañechnoña acheñenesha'pa' ama't mameshapa' ama pocteye' eñcheto. Ñetña'pa' atet otyeñet:

—Atto caçhpatatenan oneñeñt' acheñpa' añaca'ye ahuamencat' pene' Beelzebú ñeñt' pompor pen allohuen oneñeñechno.

16 Po'potantañ acheñenesha' ñetña'pa' cha mueneñet o'ch topachet Jesús. Ñetpa' atet ochet:

—Yapa' añ yemnen o'ch pegatey peparsoña entoñt' allochña'pa' attoch yeñotañ po'ñoçh pa'pa' Parets Puechemereñ.

17 Jesúsña'pa' eñotanet ñeñt' atet coñape'chatse'tyenet pueyoçhreto ñocop ñeñt' atto otyeñet ñapa' oneñeña pompor po'huamencoñt' caçhpatatenanetña oneñeñechno. Ñeñto'marña ñapa' atet otanet:

—Ñerra'm puesheñarr amcha'taret elloptannena pa'cheñer e'ñe ñagattsetapa' e'ñech poctacma a'cclatanna'tuerret. Attecmach pañnerra ama't ñeñt' e'ñe pamo'tsna'tarecmuet ñerra'm elloptannerret e'ñe ñagattsetpa' e'ñech a'cclatanna'tuerret.

18 Attecmach pañnerra ñaña oneñeñt' pueyochresha'chno ñerra'm oneñeñechno e'moñe'tannenet e'ñe ñagattseta, ñetña atto huomencatenetpa' çhach huañerrets amach allo'na huomencatneneto. Ñeñt'pa' atet o' notuas tarro'mar sapa' cha sotenen napa' Beelzebo' po'huamencoñt' necaçhpatateññañ e'ñe ña pueyochresha' ñeñt' pompor pen allohuen oneñeñechno. Po'ñoçh oneñeñt'pa' amaca'ye huapore'tanneno.

19 Sapa' atet sotenen napa' Beelzebo' po'huamencoñt' necaçhpatateññañ e'ñe ña pueyochresha', ñehua, te'pa' o'ch notas: Ñeñt' seyochresha' sepen sa ñeñt' eñotene' ñamet o'ch caçhpatachet oneñeñt' acheñenesha' ñetpa'cho'ña amaña Beezebú po'huamencoñt' caçhpatateñetoña oneñeñt' acheñenesha'. Ñetpa'cho'ña Yomporoña po'huamencoñt' caçhpatatenetña oneñeñt'. Ñeñt'ña o' eñotatas ñeñt' atet sotenoñ ñeñt'pa' amaca'ye po'ñoçh atteyaye.

20 Po'ñoçhca'ye Yompor po'huamencoñt' necaçhpatateñña oneñeñechno acheñenesha' ñeñt'cha'ña señoñtate' te'pa' o' neçhapatonas Yompor po'cohuenña ñeñt' atto po'ñoçh atarr ayochreshatena ña.

21 'Ñeñt'pa' o' e'ñe notuas atet tarro'mar yeñoteñ ñeñt' atarr ahuamencattetsa atto atarr ahuamencattena oneñeñt', ñaña'pa' e'ñe po'huamencoñt' cohuañpesyenan allohuen e'ñe cohuen ñeñt' pa'paquell pa'yen. Ñapa' po'huamencocmañen na'yenan ñeñt'cha' e'ñe cohuañpene' all amcha'tarettena ña.

22 Tarraña ñerra'm esempo o'ch huapoña ñeñt' atarr ahuamencatesha' ñeñt'cha' ello metanose'ña po'huamenc atet ñerra'm na Nompör, ñeñt'cha'ña e'ñe a'mchechatose'. Attoña e'ñe puerratañpsosñañ ñeñt' allpon moñenaya ñeñt' atarr yemuetyena ña. Allochña'pa' o'ch be'tosos all ñeñt' pa'paquell pa'yen o'ch e'ñe puerratañpeshuos ñeñt' allpon o'patyena ña.

23 'Ñeñto'marña te'pa' o'ch notas allohuenes: Ñerra'm eseshas ñeñtes ama netorrapretenaye ñeñt'ña acheñerpa' çhaca'ye epatare'tennan ñeñt' atet netorra'yena na. Ñeñt'pa' o'ch netma'ntatasa atet: Ñerra'm esesha' ama na'yapaçhapretenaye ñeñt' na'yapaçhen na, ñeñt'ña'pa' cha a'parratse'tamñepen a'yeneñt'.

*Atto Jesús'pa' eñotatanet ñato' oneñeñt'pa' o'ch alla chorreranerr acheñ allot cha'nom ahuaña
(Mt. 12.43-45)*

24 'Ellonetpa' o'ch alla neñotaterrser po'poñoneñ: Oneñeñ ñerra'm esempo cha'nom acheñeshot, ñeñña oneñetpa' o'ch auyes erraparen ama't amayo'mar e'nyese' po'psheñeñ allcha' yeçherrerr allcha' e'ñe amesurrerr cohuen. Tarraña ñerra'm amach erra eñchepa' atteñapa' o'ch ot: "Napa' o'ch alla ahuerren nepaclo allot necha'nom ahuaña."

25 Atetcha'cho' pa. O'ch alla ahuer allot cha'nom ahuaña. Allña o'ch çherra' e'ñech cohuen entuerran pa'paquell, e'ñech cohuen atarrapo'tuaret, e'ñech cohuen añño'tyesaret.

26 Allempoñapa' o'ch alla ahuer allotsa'yen pamo'tsesha'pa' o'ch enana' po'poñ cançherrsheña oneñeteçhno ñeññ nanac sosyare', ñeññ ello metana'tuene' ñeññ atet sosyaten ñeññ hua'ñene' o'ch yeçhaprecha. Allohuenetña' o'ch chorreñet ñeññ acheñer. Allempoña tsapatonetpa' allo'nach sen ñeññ acheñer sosyatnomuets huomenc. Elloch metanerran ñeññ atet patse'tyese't ñenmañ.

27 Jesús allempo atet serrpare'tatenan acheñenesha'pa' puesheñarrña coyanesha'pa' machayotepa'tcha' rrana, ñeñtpa' atet ot:

—Ama't ñeññ p'achor pepen papa' atarr cosheñtso'tsen tarro'mar ñapa' ñeññ pe'ñalletate' pa ñeñtepa' atarr cohuen es peyeçcaten ñaña ñapa' e'ñe cohuen cohuañpsañ allempo cheshatollenpa'.

28 Jesúsña' atet och:

—Elloña allohuenetpa' atarr cosheñtso'tsa'yenet ñeññ pue'mñoteñoñet Yompor po'ñoñ e'ñe atet pohuenet.

Atto Jesús'pa' otan acheñenesha' ñeññ ama cohuenaye' cotape'chetso ñetña'pa' çhocma e'nenet partsoteñets

(Mt. 12.38-42; Mr. 8.12)

29 Allempoña acheñenesha' emchorreñet Jesús, ñaña'pa' atet otanet:

—Acheñenesha' ñeññ corra'yetsa te' ñetña'pa' ama cohuenaye' cotape'chyeneto. Tarro'mar ñetpa' aña e'nenet ahuo'ch norrtatanet nepartsoteña atto'chña eñotnet napa' po'ñocho'te' Parets Puechemeren ñeññeno'te' Cristotosets. Tarraña amach es norrtataneto. Napa' añach paterr neñotatanet atet eñotatane't Jonás ahuañ nínivo'marnesha' allempo a'mítane't Yompor po'ñoñ.

30 Tarro'mar atto eñotatane't Jonás nínivo'marnesha' ahuañ ñapa' Yomporeshot huena, napa'cho'ña te'pa' atetcha' neñotach naña acheñenesha' ñeññ corretsa te' napa'cho'ña Yomporeshot nohuena.

31-32 Tarro'mar ahuañ allempo serrpare'tatane't Jonás nínivo'marnesha' ñetña'pa' allempocma cotape'cherret ello e'ñe cohuen Yomporecop. Te'ña arr seshopa' allo'tsenen na ñeññen ello metanene' ñeññ atet serrpare'tate't Jonás. Tarraña sañapa' amaña soctape'chenoña ello cohuen Yomporecop. Ñeñño'marña esempohuañen allempoch a'crare'tetuerra allohuen acheñenesha', ñeññña nínivo'marnesha' ñeññ e'ñe cohuen cotape'cherrets Yomporecop ahuañ, ñetpa'cho'ña orrterretcha', ñeññcha'ña señotaterre'ña sapa' ama't mamesha' ama pocteyayeña ñeññ atet sepa'yese't tarro'mar sapa' ama soctape'cherro ello cohuen Yomporecop. Ñaña te'pa' o'ch neyerpatasa ñeññ atet pa ahuañ puesheñarr coyanesha' ñeññ amcha'tarettatse't atarr ðachayo allohuanen pats sa'ponet. Ñeññña coyanesha'pa' alloteñ on o'ch e'mñotenana' Salomón pueserrpareñ ñeññ atet atarr eñotañte't. Te'ña arr e'ñe seshopa' allo'tsenen ñeññen puesheñarrana ñeññen atarr es neñoten naña, ello nemítaneñ atto eñotañte't Salomón. Tarraña sañapa' amaña es soctapotenno. Ñeñño'marña esempohuañen allempoch a'crare'tetuerra allohuen

acheñenesha', ñeñña coyanesha' ñeñ e'ñe cohuen e'mñotatset ñapa'cho'ña orrtarrach, ñeñcha'ña señotaterre' sapa' ama pocteyayeña ñeñ atet sepa'yese't tarro'mar sapa' ama es sotapote'te ama't e'ñe mamesha.

Atto yecle'pa' añ toma'ntena ñeñ po'lampareñ pen allohuen yechets
(Mt. 5.15; 6.22-23)

³³ Jesúsapa' alla serrpare'taterraneterr, ñeñtpa' atet oterraneterr:

—Ñerra'm esempo ya'llchaten lampareñ, ñeñtpa' ama tarrecpaye' ya'huortateñe o'ch yene' o'pono e'ñe a'nareto. Ñaña ama añecpaye' ya'llchateñe o'ch ye'rramañpes coymño. Ñeñtpa' añecopña ya'huortatenña lampareñ o'ch yene' enonet attochña e'ñech choyo'tamñpesuan allohuen acheñenesha' ñeñ be'toschets all pocollo.

³⁴⁻³⁵ Yecle'pa' añ toma'ntena atet ñerra'm ñeñ po'lampareñ pen allohuen yechets. Ñerra'm e'ñe cohuen huomech yecle'pa' e'ñech cohuen entateney puetare' allochñapa' attoch e'ñe cohuen torratyenanana allemeñ yechets tarro'mar e'ñe cohuen a'puetarsamñpsarettenet. Tarraña yecle'ña ñerra'm ama e'ñe cohuen huomñcheyayepa' amach e'ñe cohuenaye' entateney puetare' attochña amach eshcaye' torratyenanano allemeñ yechets tarro'mar cha ottena ñerra'mrrate' checmeto'tsa'yeneta. Attecma pena ñaña yeyocher. Ñerra'm e'ñe cohuen yoctape'chyen yeyochropa' attoña chennayaña yeyochro e'ñe ora allohuen Yompor poctapña ñeñ po'cohuenña pen. Attoña ora yoctapñapa' e'ñech a'puetarsamñpsarettena Yomporeshot. Tarraña o'ch yeñota e'ñe yañeña tarro'mar ñerra'm ama cohuenaye' yoctape'cheno yeyochro, ñeñtpa' amach errotentot a'puetarsamñpenyeña ñeñ yoctapña yepen. Ñeñña yoctapña yepenpa' chach a'checmetañpennay yeyocher.

³⁶ Tarraña ñerra'm po'ñoch e'ñe cohuen yoctape'chen yeyochro, attoña chennayaña yeyochro e'ñe ora allohuen Yompor poctapña attochña yeñoteñ orrtatyese' ñeñ e'ñe cohuen enten ña. Attoña e'ñech cohuen es ye'pa'yen atet ñerra'mrrate' lampareñ e'ñe cohuen choyo'tamñpeney attoch e'ñe cohuen es yentyen. Allempopa' o'huañcha' allo'na yechecmetañpesnen.

Atto Jesúsapa' a'metare'tenan fariseonesha' ñeñ atet ye'chenet ñetpa' ñeñtpa' ama cohuenaye' entapretenaneto Yompor
(Mt. 23.1-36; Mr. 12.38-40; Lc. 20.45-47)

³⁷ O' serrpare'tatuanet Jesúsapa' puesheñarrña fariseonesha'pa' hua'ña'nerran Jesús o'ch rrallme'chapreteña' pa'paclo. Allempo chap Jesús allpa' be'tosos anorros allcha' rrallme'chapretosan ñeñ hua'ñene'.

³⁸ Ñeñña fariseopa' entenan Jesús atto ñapa' ama e'pota'to ñeñ atet ye'chena judionesha'. Ñehua, ñetpa' atet ye'chenet, amach rrallme'cheneta'pa' o'ch e'pota'tyeset Partsocop. Ñeñto'marña fariseopa' atet co'tape'ch Jesúsocop:

—Ta'm, eso'marte'ca'ye amaña e'pota'tenoña ñeñ atet poctetsa Partsocop.

³⁹ Partseshaña Jesúsapa' atet toma'ntatana ñeñ atet pena allohuen fariseonesha', ñeñtpa' atet otan ñeñ hua'ñene':

—Ñeñtes fariseoneshas sapa' e'ñe se'pame'teneña setaza eno'tpa' o'ponotñapa' ama se'parro'teñe. Seplatopa'cho'ña enota e'ñe se'pata'teñ o'ponotñapa' ama se'pata'teñe. E'ñe atet sepena saña. E'ñe sa'cohuentatena ñeñ eno'mar ñeñ atet sey'chena sa allochñapa' attoch entenes allohuen acheñenesha' sapa' e'ño' cohuenes, tarraña o'ponot seyochropa' ama sa'cohuentateñe, allña' e'ñe chorren shonte' sosya'tsañechno ñeñ atto

e'ñe seshquëñoť čhocma es seprratam̄pesyen, seshonten pa'namen ñeñť ama pocteye' entapretenso Yompor.

⁴⁰ Čha sottena ñerra'm erra'tsen puesheñarr acheñ ñeñť ama es eñoteno. Ama't señoťeñña Yomporña ñeñť yečcatyene' allohuen ñeñť allpon yentyen arr patsro, ñeñť a'yote'tsa'yen yeshoť ñeñťara Yompor ñeñť yečcate' ñaña yeyočer alloch e'ñe cohuen yoctape'chen o'pono yeyočhro.

⁴¹ Ñerra'm o'ch po'ñočh soctape'cherr cohuen seyočhro Yomporecop attochña e'ñe cohuen seyočhrocmañen es sapa'yen attoch seyempa'yeñ po'potantañ. Ñerra'm atetcha' seperrapa' Yomporña' e'ñech cohuenare' enterres.

⁴² 'Atarr llequëñtso'tsenes sa ñeñťes fariseoneshas țarro'mar ama atteye' sepene ñeñť atet o' notuas. Ora allohuen ñeñť senarem̄ sepen ama't čhocma sapueñeñ Yompor allpon ñeñť poctetsa ñocop—mentapan ñaña rudapan. Tarraña añña ñeñť nanac sherbets Yomporecop e'ñech pocte' es yepeññañ po'psheñeñ ñaña e'ñech cohuen yemorrenteña Yompor. Ñeñť atetpa' sañapa' ama soctape'cheñe ama't mamesha. Sapa' ñeñťña sepalltena o'ch e'ñe atet seřohua. Tarraña ñeñť atto čhocma es sapa'yen Yomporecop ñeñťpa'čo'ña amach secačhpsatsche.

⁴³ 'Atarr llequëñtso'tsa'yenes sa ñeñťes fariseoneshas țarro'mar sapa' e'ñe sommo'cheñoť atarr semneñ allohuen acheñenesha'pa' o'ch e'ñe cohuen entenset. Ñeñťo'marña sapa' añña atarr semnen o'ch sanorrčha'tyen judionesha' po'prahuo allecma anorryen ñeñť atarr am̄cha'na'tpo' enten allohuen acheñenesha'. Ñaña sapa' añña atarr semnen allohuen acheñenesha'pa' o'ch huom̄cha'tenset pueñcha'nañoť ñerra'm esempo sechopeñe'chen toño'mar allecma chopeñe'chyen allohuen acheñenesha'.

⁴⁴ 'Atarr llequëñets socop, țarro'mar sapa' e'ñe attes ñerra'mrrate' apampaña ñeñť amach orrteno enoť all apamparettena arromñať o'pono patso. Ñeñťo'marña acheñenesha'pa' allach chopeñe'chyenet all ama esesha' eñotenaye o'ponopa' allo'tsa'yen arromñaťap all e'ñe chorren sosya'tsañ.

⁴⁵ Allempoña puesheñarr ñeñť atarr etsotenayeñ ñoñets ñeñť atet anaret judioneshacop, ñaña'pa' atet otan Jesús:

—Maestro, ñeñť atet řoten ya'naña čha muene' pepencaten.

⁴⁶ Jesúsña'pa' atet och:

—Sapa' ñeñťes atarr etsotenayeñ ñoñets ñeñť atet anaret judioneshacop, sapa'čo'ña atarr llequëñets socop, țarro'mar sapa' atarr es sena'yeññañ acheñenesha' ñeñť atarr echarrare' entyenet ñet, po'ñočhpa' amach erroťenoť e'ñe atet řohueto. Sapa' ama't mameshapa' ama ayenpuyenaye' sentpenaneto.

⁴⁷ 'Llequëñtsa ñaña socop țarro'mar sa te'pa' sařomaten enoť ñeñť atarr cohuen senten sa all pampa'yesete'ť ñeñť a'm̄ta'yesaye'ť Yompor po'ñoñ ahuat ñeñť muetsanatyese'ť ñeñť satañneshañ sepe'ť.

⁴⁸ Sapa' e'ñe señoťeññañ sa'tañneshañ atto ñetpa' muetsanachete'ť ñeñť a'm̄ta'yesaye'ť Yompor po'ñoñ tarraña sapa'čo'ña ñeñťaña e'ñe pocte' senten sam̄a ñeñťo'mar te'pa' e'ñe sa'cohuentam̄penanet all apamparettenet.

⁴⁹ 'Ama't Yompor ahuat, e'ñe pueñoteñoťpa' atet ote'ť: “Napa' o'ch nemñe acheñeneshesho ñeñťcha' a'm̄tene' neñoñ ñaña ñeñť nellsensarnesia' neřa'yen. Tarraña patantarrña acheñenesha'ña'pa' čha muetsanatanet, po'potantañña'pa' čha cofare'tyeset.”

⁵⁰ Attoña e'ñe allempoteñ ayečcataretta añ pats, ora allohuen ñeñť a'm̄ta'yesaye'ť Yompor po'ñoñ allpon ñeñť amtsanatyeseřtatset'ť

ashataretetyesete't po'rras, sañapa' allempoteñ e'ñe sa'yohuarettena teme'ttsen sa ñeñtes corretsa te'.

⁵¹ E'ñe allempoteñ muetseret Abel tarremphua allempo muetseret ñaña Zacarías ñeñtpa' alla semtser Parets po'ponro puecha'petarot allo'tsen altar allotecma sherbete't Yompor. Po'ñoçca'ye notenes añenesha' ñeñt corretsa te' atarr ayohuarettenet.

⁵² 'Llequëntsá socop ñeñtescha' e'ñe etsotenayeñ ñoñets ñeñt atet anaret judioneshacop tarro'mar sapa' cha seprratampeñ acheñenesha' ñeñt alloch enteret ñeñt e'ñe po'ñoçh alloch queshperret. Tarro'mar ama't sapa' amaca'ye senteññañeña Yompor po'cohuenña, ellonetpa'cho'ña chocma separe'teñña po'potantañ ñeñt e'nene' Yompor po'cohuenña.

⁵³ Allempoña ñetpa' e'ñe pa'tsre'mueño't atarr es a'p'to'tare'tyeset Jesús.

⁵⁴ Ñetpa' añ atarr e'nenet attoch otatse'tachet allochñapa' ñato' po'tatse'tateño'tetpa' attoch otteñe'cheñet.

12

Atto Jesús'pa' yeçhatan pueyochresha' amach eñotatstoñeto fariseonesha' pommo'cheña

¹ Shonte' acheñenesha' ñeñt huachenoya Jesús, shonte' nanac patoner. Cha che'muechoset Jesúsesho atta atmatca'tanna'tyesoset. Jesúsña ñanompa' alla serrpare'taterranerr pueyochresha', ñeñtpa' atet otanet:

—E'ñech seño'ta ñato't semeñe'teña' fariseonesha' poçta'pña, tarraña ñeñt poçta'pña penet ñetpa' ñeñtpa' ommo'cheñtsa. Ñeñtpa' mametollapa' o'ch epa'hua erraparen e'ñe atet pena ñerra'mrrate' chase' mametollapa' o'ch e'ñe es a'chasa'hua.

² Tarro'mar yapa' yeño'teñ allohuen ñeñt allo e'ñe a'nahua shecare'tyenet te' esempohuañeñña'pa' a'metam'psare'tterretcha'. Ama't allohuen ñeñt e'ñe a'nasotyenet te'pa' esempohuañeñña'pa' e'ñech eñotataretetuerret.

³ Ñeño'tamarña ama't erra'tsena seserrparen e'ñe a'nahua te' esempopa' seño'tatuercha' ora allohuen acheñenesha'. Ama't erra'tsena ñeñt atet seserrpare'tyen te' e'ñe a'nahua o'pono pocollo, esempopa' seserrpare'tatcha' allcha' e'ñe cohuen e'mhuerres allohuen acheñenesha' atet ñerra'mrrate' enot seserrpare'ten shelletot.

Atto amach yem'cha'tatsto ñeñt'cha' muetse' yechets, añcha'ña yem'cha'na't Yompor

(Mt. 10.28-31)

⁴ Te'pa' o'ch notas masheñneshacha', amach añña sem'cha'tatsto ñeñt'cha' semtse'. Tarro'mar añach muetsonaset sechets, secamquëñña'pa' amach erro'teno't muetsonaseto.

⁵ Añcha'ña sem'cha'na't Yompor tarro'mar ñerra'm ñña muenats e'ñe ñña po'huamenco'tpa' o'ch a'chencatonay ye'chets, yecamquëñpa'cho'ña o'ch mueño'nay coñcheñtso all parraren tso'. E'ñe po'ñoçh notenes, Yomporcha'ña sem'cha'na'ten.

⁶⁻⁷ Elloña te'pa' napa' o'ch notas, chocmach seyemcha Yompor, po'ñoçh ñapa' ñach secuam'pene'. Ama't otetollesha'pa'cho'ña chocma cohuan'peñ. Ñehua, ama't yapa' yeño'teñ otetollpa' ama tama sherbena. Ama't yepomatset, amnar otetollesha'pa' ñeñtpa' ama tsa'teyaye, e'ñe eptallatolla centavo tsa'tena. Tarraña ama't atteñ Yomporña ama't patrra otetollpa' ama pueseñe. Ñeño'tamarña notenes, ama't mameshapa' amach sem'cha'tatsto, Yomporcha'ña e'ñe seyemta. Atto atarr morrentenana otetollesha' elloña

sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

*Atto ama a' nasotpahuo Jesucristo acheñesho'mar
(Mt. 10.32-33; 12.32; 10.19-20)*

⁸ Elloña napa' o'ch noterrser, allohuen ama't erra'tsencha' ñeñtcha' ama na' nasotenaye acheñeneshesho, napa'cho'ña Ñeñten Acheñetosetspa' amach na' nasotueraneto namña Nomporecho allo'tsa'yen epuet po'mllañoñeñaneshar.

⁹ Tarraña ñerra'm esesha' na' nasotenaya na arr patsro acheñeneshesho, napa'cho'ña na' nasoterranetcha' Nomporecho allo'tsa'yen epuet po'mllañoñeñaneshar.

¹⁰ Ñerra'm esesha' nesasene' na Ñeñten Acheñetosets ñeñtpa' apretna'po' nenteñ. Tarraña ñerra'm esesha' añ achmāre'tenet Parets Puecamquēñ ñeññapa' ama apretna'pahuoye' nenteñe.

¹¹ Namña o'ch noterrser, ñerra'm esepoch anmaset judionesha' po'prahuo allcha' a'metare'tam̄psaset añcha'taretesho, sañapa' amach cha sellca'psatsto, amach cha sota'psa'tatsto: Errotuachca'ye notoste' attoch cohuen nanapos, esuachca'ye notte'.

¹² Sapa' añcha'ña se'ñoratose' Parets Puecamquēñ e'ñe allempo a'p̄to'tare'tenset all.

Ñeñt e'ñe añña muenen o'ch esocmañen echyes, ñeñtpa' atarr yoro'cheno'tsen

¹³ All che'muechen shonte' acheñenesho' Jesúsesho, puesheñarrñapa' atet otan Jesús:

—Maestro, te'pa' o'ch p̄oton nemo'nasheñ nepo'nar apuerrnepa'ñaca'yeña namña ñeñt allpon o'patatnomna nomporeñ.

¹⁴ Tarraña Jesúsñapa' atet och:

—Masheñcha' napa' ama eseshaye' nenaye ñeñtencha' a'pocstatene' ñoñets attoch soten o'ch napa'yesas allpon o'patatyenset.

¹⁵ Alla oterraneterr Jesús:

—E'ñech señota sañeña, ama't seyo'chrapa' amach es seye'chapretanna'tatsto ama't e'ñe coñe'ta tarro'mar atto yocrrena arr cohuen añe patsropa' ñeñtpa' ama añecpayaye alloch esocmañen es yechyerr ñeñtcha' atarr yocshaterre' tsapa'onet.

¹⁶ Ñeñtpa' atet otanet toma'nteñtso:

—Eñall puesheñarr acheñ atarr nanac eçllayoret. Allña po'patsñopa' shonte' nanac aton a'yechcaten.

¹⁷ Ñeñña eçllayoretpa' atet cotape'chen pueyo'chropa' atet oten: “Errotuachca'ye ne'pa'ña, ñeñt atarr nanac aton netotaten amaca'ye eñalleña allcha' e'ñe nañño'tue.”

¹⁸ Allempo atet cotape'chenpa' alla oterrer: “Te'pa' o'ca' neñoch atetcha'ca'ye ne'pa. O'chca'ye na'materrña pocollashe'm allecma nañño'te't coñe'ta'tets te'ñapa' o'ch alla natomaterr atarrpo' allcha' e'ñe nañño'tua allohuen ñeñt allpon netotaten ama't ñamña allohuen ñeñt allpon pa'namen esocmañen nechyen.

¹⁹ Allempoñapa' atetcha' not neyo'chro: Napa' ama es nepallteno ama't e'ñe mamesha. Ñeñt allpon shonte' o' nañño'tuapa' atarrcha' atomat char amach es nepallterre'te. Te'pa' o'ch names e'ñe pocacma. Nellapene'tcha' rrats, nellapene'tcha' orrare'tats; ñeñtcha'ña e'ñe nocshatene'ña na.”

20 Tarraña ñeñt' acheñerpa' Yomporpa' atet och: "Papa' atarr otatsñaṭeṭ, ama es peñoteno ama't mamesha. Te'pa' añe tsaprocmach o'ch perromuen. Ñeñña shonte' o' p'pañño'tuapa' te'ñapa' esesha'huachñaca'ye o'paterraya."

21 Ñeñto'mar yeñoteñ, ñeñt' añño'tene' shonte' esocmañen ñeñt' e'ñe ñocpa, ñeñña acheñer atetpa' ama echenanoña ñeñt' sherbets Yomporecop.

Atto Yomporpa' ñach e'ñe cohuen cohuanṭpene' ñeñt' puechemerasha' pen (Mt. 6.25-34)

22 Allempoña Jesúsapa' alla oterranerr pueyochresha':

—Ñeñto'marña te'pa' o'ch noterrser, amach aña sellcatsto ñeñt' atto yeychena arr patsro. Ama't seyoçhra amach sotatsto, esuachca'ye yerrerrrte' tsapaṭonet. Ñaña amach aña sellcatsto ñeñt' e'ñe sechtsocpa, amach sotatsto, esuachca'ye yechorrate'.

23 Tarro'mar Yomporpa' ña yapuene' yo'rrerrña allo yocrrena ñeñña atarr nanac sherbets. Ñeñto'marña yeñoteñ ña yapuene' ñaña yerrar, ñeñña ñocoppa' ama esoye' enteñe. Ñaña ña yeçcatene' yechets ñeñt' atarr sherbets. Ñeñto'marña yeñoteñ ña yapuene' ñaña ama't ñeñt' yechorra'yena, ñeñña ñocop ama esoye' enteñe.

24 Sentente' atto correna pa'namen otneshaçhno. Ñetpa' ama çhoye' nare'tatse'teneto ñaña ama çhoye' apçha'yeneto puerrrar ñeñt'cha' rra'yenet. Ñetpa' ama es echenaye allcha' es añño'tyenet. Ama't atto correnetpa' Yomporña e'ñe yeçcatyesuanet ñeñt'cha' puerrrar p'a'yenet. Elloña sa Yomporpa' atarr morrentensa sa; ello semtaneñ ñeñt' atto atarr morrentenana otneshaçhno.

25 Ñaña amach sellcatsto attoch amach serromo, tarro'mar ama't sellquëñañ attoch atarr atomat socrra arr patsro tarraña ama't e'ñe puesheñarrotésapa' amate' errotenot so'chtatoña socrraña ama't e'ñe pamtarra.

26 Ñehua, atto ama't e'ñe sellquëñoña sa ama erroṭ es sepeno, ñeñt'epñapa' amach pa'namena es sellca'yestatsto tarro'mar ñeñt'pa' e'ñech orrena es sellca'yena.

27 Ñaña sentente' atet yeçquëna roreçhno. Ñetpa' ama çhoye' taruasa'yeneto ama't mamesha, ama çhoye' taneneto ñeñt' chorra'yenet atto e'ñe cohuen orreyenet. Tarraña napa' o'ch notas, ama't añcha'taret Salomón atto e'ñe a'cohuentate't ahuat, ama't ñapa' ama chorrane'teña ñeñt' atarr cohuen ñeñt' atet atarr cohuentena ror.

28 Ñeñt' ror pue'chorpa' ñeñt'ara ta'te' ñeñt' chepyets allemeñ ñeñt' sentyen te' tarraña ñeñt'pa' mamecpa. Ama't cohuen chepyeneñ te'pa' tsapaṭonetñapa' o'ch etomanṭperetpa' e'ñech colla'huerra o'huañcha' cohuenta. Ñehua, Yompor atto cohuentatyenan ama't ñeñt' e'ñe mamecpa, elloña sapa' atarr chorratyensañ saña; sañapa' eso'marte'ña amaña e'ñeye' seyemteño.

29 Amach e'ñe patrra se'nenno ñeñt' atto serren ñaña ñeñt' atto es sorryen. Amach ñeññaña e'ñe paterr sellca'yestatsto.

30 Tarro'mar allohuen acheñenesha' arr patsro ñeñt' ama ame'ña'yetso, ñetpa' ñeññaña e'ñe paterr e'nenet. Ñehua, Somporña ñeñt' pue'ntaño'tsen ñapa' e'ñe entuenes ñeñt' allpon pa'namen sepallta'yena arr patsro.

31 Sapa' añcha'ña e'ñe ñanom sema'yochrena Yomporecop attoch atarr ayochreshaterra ña allochñapa' ñachña sapa'yene' ñeñt' allpon sepallta'yena saña.

Atto ñeñtcha' seshonterr ñeñt atarr sherbets arrcha'ca'ye seshonteñ all Yompor pue'ntaño

(Mt. 6.19-21)

³² 'Amach neyochreneshachnocha' es sellcatsto ama't ama atarr shonteyayso, Yomporña atarr cohuen secuanpene' atet ñerra'mrrate' e'ñe po'carrneror penes. E'ñe pocsheñesho'pa' apascha' attoch e'ñe cohuen socshapreterrñaña po'cohuenña attoch atarr ayochreshatterra.

³³ Te'pa' o'ch sepomyen ñeñt allpon sechyen allochñapa' o'ch sapa'yes ñaña ñeñt atarr es pallta'yetsa. Ñerra'm atet sepena allo'nach atarr aton seshonta'nen ñeñt e'ñe po'ño'ch atarr sherbets Yomporecop. Ñeñt'pa' ama atteyaye ñerra'mrrate' ñeñt seçllayepo'rer sepen arr patsro, ñeñt'pa' atarr amllasha'tña. Tarraña ñeñt seshonta'nen ñeñt atarr sherbets ñeñt ama ahuañaño, ñeñt'pa' arr seshonteñ Yompor pue'ntaño. Allña ama't eñetapa' amach çheno o'ch etatsre'tas ñaña ama't pom'papa' amach eñalle ñeñtcha' rrrerre' ñeñt seshonten all.

³⁴ Tarro'mar ñerra'm all pue'ntaño seshonta'nen ñeñt atarr cohuen senten, yeñoteñ e'ñe ñeñta paterr senen seyo'chro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñta paterr senen seyo'chro ñeñtña'pa' ama es sherbenoña Yomporecop.

Atto çhocmach yeñose'rteña Yepartseshar Cristo esempoch huerra

³⁵⁻³⁶ Te'pa' o'ch notas po'poñ: Chocmuepa'ch señosere'tna esempohuañenpa' o'ch alla nohuerra. Ñato' o'ch netma'ntatasa atet ñerra'mrrate' puesheñarr yacma ñeñt atarr ayochreshat. Ñapa' ahuo' allcha' rrallme'chapretenana' pacma ñeñt sena'tetsa. Pueyochresha'ñapa' alla cohuet pa'paclo esempoch huerra. Allempoña ñetpa' a'huortatyaset po'lampareñ allochñapa' attoch ñerra'm esempoch huerra ñeñt pamo'mte' penet ñerra'm o'ch çhore'tuenanetpa' ñetña'pa' allorocmach toram'psapueñet attoch sher'apueñet.

³⁷ Atarr cosheñtso'tsa'yen pueyochresha' ñerra'm esempoch huerret pamo'mte' allña'pa' entuenanet çho atarr eñose'rteñet. Po'ño'chpa' napa' o'ch notas, ñachca'yeña sher'ba'huene'ña ñeñt pueyochresha' pen ña. O'ch chana'huena ñaña'pa' o'ch anorr'cha'tatuenanet allcha' rrallme'chatuenanet.

³⁸ Ñeñt'pa' atet'cha' perranet ama't rro'ch tsapopa' o'ch huenanet amapa' o'ch puetarenmochpa' o'ch huenanet. Ñeñto'marña notenes, ñerra'm alla entuenanet çho atarr eñose'rteñet, ñeñtña atarr eñose'retyenayapa' atarr'cha' cosheñtso'tsa'yenet.

³⁹ E'ñech machayota nohuerra atet pena eñet allempo atta es sep'cha'yena machayotach huaponasa o'ch yoratsre'tensa'. Tarraña sa ñeñtes apaçlales ñerra'm seño'teñeñ e'ñech esempo huaponasa eñet amach çha semanrra'teno attoch amach semnacheña o'ch toram'psas sepaclo o'ch be'tosam'psasa o'ch yoruennasa' ñeñt allpon semorrentyena.

⁴⁰ Ñeñto'mar notenes, sapa'çho'ña çhocmuepa'chña señoser'tenna tarro'mar ñerra'm allempo atta es sep'cha'yenapa' allempochña nohuerra na Ñeñten Acheñetosets.

Atet'cha' a'paretterra ataruasañ ñeñt e'ñe cohuen etsotene' atet yecheña pamo'mte' ñaña atet'cha' a'paretterra po'poñ ataruasañ ñeñt ama etsotaye ñeñt atet yecheña pamo'mte'

(Mt. 24.45-51)

41 Allempoña Pedropa' atet a'pto'ch:

—Partseshacha' ñeñt atet petma'ntatena te' ñeñtpa' ¿seseshacpa'tña, ñato' yocpate' ñeñtey peyochreshay pepeney amapa' ñato' allohuenacpa'nate'?

42 Partsesha'ñapa' alla toma'ntaterraneterr po'poñonet, atet oterraneterr:

—Allohuenespa' atetcha' sepa e'ñe cohuen atet ñerra'mrrate' puesheñarr yacma ñeñt yechena ñeñt pamo'mte' pen all pa'paclo. Ñeñtcha' po'taruas pene' chocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa puesheña'ttsocop. Ñapa' attecmach pena chocmach apuenanet ñerra'm esempoch cherrerr allempo atet anaret ñocop o'ch alla apa'yerraneterr po'pocheño. Ñapa' chocmach atet pena amach caçhpueere tarro'mar ñapa' eñoteñ attoch e'ñe coshatenan pamo'mte'.

43 Ñeñtña ataruasaña' atarrcha' coshatueñ pamo'mte'; ñerra'm esempoch huerrapa' alla entuenan pa'taruasañer ama cho caçhpuenano ñeñt po'taruas apa'neñ ahuañmo'choñeñ.

44 Po'ñoçh o'ch notas, atarrcha' coshatueñ. Añcha' coshaterre' o'ch no-huer pamo'mte' añcha'taret ñeñtcha' cohuañpsaprete' ñeñt allpon echyen pamo'mte'.

45 Tarraña ñeñt ataruasañer allempo ama huerra' pamo'mte' ñerra'm ñapa' atta oten pueyoçhro, namo'mte'pa' amach ahuen huerro, allempoña ñapa' çhach ashtapechyenan ataruasañeçhno ñeñtcha' rratañ ama't ñaña coyaneshohuen. Ñaña' attach allemeñ rrapretyen ñaña attach orrare'tapretyen allcha' atarr posa'tare'tyen.

46 Ñeñtña ataruasañer ñerra'm ñapa' attach ottatse'tyena amach es puecha'yeno amach eñoteñe ñeñte yetaroch huerra pamo'mte' ama't erro'tsencha' yetro huena. Machayotachña huerra pamo'mte'pa' atarrcha' coñchatuer, allach mueñuer all ñeñt o'patenaya allohuen ñeñt ama es otapotetso ama't mamesha.

47 'Elloña napa' o'ch notas, ama't erra'tsena ataruasañer ñerra'm eñotenan ñeñt atet muenen pamo'mte' tarraña ñerra'm ama cohuen ame'ñenano pamo'mte' ñerra'm ama e'ñe cohuenaye' es pa'yeno attoch e'ñe cohuen aguërran pamo'mte' esempoch huerra, ama't erra'tsena ataruasañerpa' ñeñt atet petsapa' atarrcha' ashtaretterret.

48 Tarraña erra'tsencha' ataruasañer ñeñt ama eñotano ñeñt atet muenen pamo'mte' ama't ñetpa'cho'ña aña atet pa'yenet ñeñt ama cohuenayaye ama't e'ñe poctet attecmach ashtaretterretañ ñamet, tarraña ñetpa' mamesha'ttsach ashtapecharetetyerret tarro'mar ñetpa' ama eñoteneto ñeñt atet muenen pamo'mte'. Allohueney erra'tsenotey ñeñtey atarr aparetey attoch atarr yeñoterrñañ ñeñt atarr sherbets Yomporecop, ñeñteycha'ña atarrcha' cohueney Yompor o'ch e'ñe yesherbatoñ shonte' allohuen ñeñt atarr eñotateney. Ñaña allohueney erra'tsenotey ñeñtey atarr yemtenya Yompor elloña allempopa' atarrcha' cohueney o'ch allo'na e'ñe cohuen yesherba'neñ.

*Atto Jesúsapa' orrtatosan e'ñe ño'mar elloptanna'teñets
(Mt. 10.34-36)*

49 'Te'pa' o'ch neñotaterrser po'poñ. Napa' atto nohuena arr patsro o'ch norrtatos elloptanna'teñets ñeñt atarr huomenc atet ñerra'm tso' atarr atser-tetsa. Pocte' nenteñ o'ch orrtet e'ñe tayecma.

50 Ñaña nocoppa' e'ñe atet anaret na'mueroçhtataretterrach e'ñe atarr huomenc atet ñerra'mrrate' cho chorratennet ñeñtcha' atarr nemueroçhtaterre'. Ñeñto'mar napa' ñeñtña atarr nellcatene' te' atta atarr na'huanteñ esempoch e'ñech etsotuerra.

⁵¹ Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñenesha' arr patsro. Ñeñtpa' ama atteyaye. Añecpa'naña nohuapa allochñapa' e'ñe no'marpa' acheñenesha'ñapa' o'ch atta elloptanna'tyeset.

⁵² Nehua, ñeñt noten te' e'ñe tayoteñ ñato' all yeçhena amnarsheña puepahuarro pocolopa' ñato' ñetpa' o'ch ellopa'tetstatet poçtañña. Ñato' allo'tsen ma'psheña ñeñtcha' name'ñerraya, ñato' epsheñañapa' amach mueno o'ch ame'ñerrnet. Amapa' ñato' epsheñach allo'tsen ñeñtcha' name'ñerraya, ma'psheñañapa' amach mueno o'ch ame'ñerrnet.

⁵³ Ñato' e'ñe no'marpa' o'ch ellopa'tetstatenet poçtañña. Ñato' pompor o'ch epatare'tenan puechemer, amapa' ñato' puechemerñapa' o'ch epatare'tenan ñaña pompor, ñaña ñato' pachorpa' o'ch epatare'tenan puechoyor amapa' puechoyor o'ch epatare'tenan pachor, ñaña ñato' pa'so'mue o'ch epatare'tenan pa'to'ñen amapa' ñato' pa'to'ñenñapa' o'ch epatare'tenan pa'so'mue.

Atto Jesúsapa' orrtatosan ñeñtcha' eñotatahuet o' çhapanet Yompor po'cohuenña

(Mt. 16.1-4; Mr. 8.11-13)

⁵⁴ Allempoña Jesúsapa' atet yerpatana acheñenesha' ñeñt atet otyenet ñet pa'nyeto:

—Sapa' ñerra'm esempo senten arr chorren os all emuena atsne', sañapa' çhocmach atet sotyen: “Te'pa' çhach huatena.” Atetcha'cho' pa, o'chcho' huatena.

⁵⁵ Ñaña ñerra'm esempo senten huena mōrr topofof, ñeñtpa'cho'ña atetcha' sotyen: “Te'pa' o' charenmoch.” Atetcha'cho' pa, o'chcho' huoraterr huomenc.

⁵⁶ Sapa' atarr seño'teneñña ñeñt sentyen ento ñeñtña seño'tatene'; ama't ñaña ñeñt atet sentyen ñaña arr patsro ñeñtpa' e'ñe seño'tueñeñ. Tarraña ñeñt atet norrtatyennas nepartsoteña, eso'marte'ña ñeñtñapa' amaña eñotatensoña ñeñt atet pennas Yompor te' o'ch orrtatonas po'cohuenña. Ñeñtpa' attate' seshquëñ.

Atto eñotatanet çhoyach amo'tsterraya e'ñe mamecma ñeñt ye'moñe'tene'

(Mt. 5.25-26)

⁵⁷ 'Elloña e'ñe soña seño'tepa'chña ñeñt pocte' enten Yompor socop ñeñtcha' atet sepanna.

⁵⁸ Ñato' o'ch netma'ntatasa atet ñerra'mrrate' esesha' setmantene' ñeñtcha' sanmue' amcha'taretesho allcha' sa'poctaterr señoñ. Añ poc'tetsa allempo ama seçhena' amcha'taretesho o'ch poch ñeñt petmantene': “O'ch ya'poctaterr yeñoñ e'ñe cohuen tayecma tayepa'tña ama yeçhena' amcha'taretesho.” Tarro'mar ñeñt petmantene' ñerra'm o'ch çhapatap amcha'taretesho, amcha'taretñapa' çhate' pomap policeyaneshesho, ñetñapa' çhate' abe'tapet cárcelo allcha' mueroçhtaterrpet.

⁵⁹ O'ch notas, ñerra'm çhoch yottam̄psasetpa' allasach o'pono, allo'tñapa' amach ahuen çha'nmaterrseto. Esemphuañencha' çhoch seçha'nmaterrseto ñerra'm allempoch e'ñe setsa'tuerra ora allohuen ñeñt allpon quelle muenenet. Ama't e'ñe eptalla centavotollña ñerra'm ama setsa'tueña' amachca'ye çha'nmaterrseto allot. Ñeñto'marña notenes o'ch e'ñe cohuen samo'tstera ñeñt se'moñe'tene' tayepa'tñapa' ama çhennasa' ñeñt atarr yoroçhen senten socop.

13

Añ poctetsa yocop o'ch yoctape'cherr ello cohuen Yomporecop

¹ Allempo huapa puesheña'tets acheñenesha' Jesúsesho, ñetñapa' serpare'tatoset Jesús atet entenet ñet; ñeñtpa' atet otoset:

—Allpónsheña ñeñt galileo'marnesha' allo'tsa'yenet allecma muetsatenet berr ñeñt Yomporecop. Allempoñapa' huapanet ñeñt mueñen amcha'taret Pilato ñetñapa' cha muetsanatosanet e'ñe all allempo muetsatenet berr ñeñt Yomporecop. Attoña ñetpa' allña atsetatse'tatarettet ñet po'rras epuet pueberroret po'rras.

² Jesúsñapa' atet otanet:

—Sapa' cha'te' sotenapañ ñeñt galileo'marnesha' allempo atet a'parettet ñato' ñetpa' atarrte' nanac ochña'tet ellote' metana'tueñet allohuen po'potantañ galileo'marnesha' po'chñaret. Cha'te' sotenapañ ñeñto'marte'ña atet a'parettet ñeñt atarr sosey apenco'chen.

³ Tarraña napa' o'ch notas: Ama't allohuenes samña ñerra'm amach e'ñe cohuen soctape'cherro ello Yomporecop, sapa'cho'ña attecma'ch seperra sechenca'huerrach e'ñe poctacma.

⁴ Ñaña ñeñt charra' ñeñt puechetsa posocsheña ñeñt colla'huatsa ahuaña ñeñt a'tpsete't pocoll torre'po' allempo mata'nerr Jerusaléño e'ñe all oteñet Siloé. Nehua, sapa' cha'te' sotenapañ ñeñt a'cllaterr torre'pa' ñetpa' atarrte' atparña'tet ellote' metana'tueñet allohuen po'potantañ ñeñt atto atpare'tena jerusaléño'marnesha'.

⁵ Tarraña napa' o'ch notas: Ama't allohuenes samña ñerra'm amach e'ñe cohuen soctape'cherro ello Yomporecop, sapa'cho'ña attecma'ch seperra sechenca'huerrach e'ñe poctacma.

Arrpa' all toma'ntatanet Jesús atet pena partech ñeñt ama me'tetso

⁶ Allempoña Jesús'pa' alla toma'ntaterraneterr po'pocheño, ñeñtpa' atet oterraneterr:

—Puesheñarr acheñ all puenarenmopa' allña'pa' ahuañmo'choteñ nare'tatenan ñaña puecharr partech.* Atteñapa' chap allempo huapa e'nosñañ pue'mer. Tarraña ama't puenarrapa' ama entosñañe pue'mer. Partayechpa' ama me'teno.

⁷ Allempoñapa' atet otan ñeñt cohuanmpene' puenarenma': "Te'pa' o' met ma'pa char chocma nohuena e'nene' partech pue'mer. Teme'ttsen ama't puenarra pue'merpa' ama nenteññañe. Te'pa' o'ch pa'mater tarro'mar e'ñe orrena quechcare'tennay yepatseñ atto ama yenare'teno po'poñ narmets all."

⁸ Tarraña ñeñt cohuanmpene' narmetspa' atet otan pamo'mte': "Allach nomporcha' añ char ñeñt o' huerrerrpa' napa' o'ch na'mueñtsetam'pes pats o'ch nenoñ amar.

⁹ Ñato'rraña atet nepe'pa' o'ch cohuen me't tsapa't charo. Tarraña ñerra'm ama me'topa' pocte'ña'cho' allempopa' o'ch pa'matater."

Atto Jesús'pa' a'crraterran coyanesha' ñeñt atta mo'quëtsa ama't añe yetro allempocma amesenet

¹⁰ Allempo chapa'muenerr allempo amesenet, Jesúsñapa' ye'chatenanet judionesha' po'prahueto.

* **13:6** Nehua, Jesús añ toma'ntatanet higo ñeñt puenarenm' penet all pa'nyo.

¹¹ Allña'pa' allo'tsen puesheñarr coyanesha' ñeñt' cha mo'quëna, ama eshcaye' pa'charrteno. Ñeñt'pa' oneñe' atet' patene'. Ahua'fo'teñ at'a pena o' charren char puechena posoc at'a mo'quëna.

¹² Jesúsña'pa' all eñchpa' o' chore'tospa' atet' och:

—No'cha te'pa' pasaterre'pcha' ñeñt' atto atarr pemuero'chtana.

¹³ Allempoña'pa' a'p'llamco'ch. A'p'llamco'tue'pa' allorocma e'ñe cohuen pa'charrtterra. Ñaña'pa' atarr aye'cho'chtaterran Yompor.

¹⁴ Allempoña ñeñt' am'cha'tare'ttetsa all judionesha' po'prahuo, ñapa' allempo entan atet' o' a'crratan Jesús atsnañe', ñaña'pa' ñeñt'a atarr at'srre'mate'. Ama't mameshapa' ama pocteye' eñche o'ch a'crratan acheñ ñeñte yetro allempo amesenet. Ñeñt'o'marña ñapa' atet' otan acheñenesha':

—Eñall pechapmat yet' allempo pocte' o'ch yetaruasen. Ñeñt'pa' pocte' o'ch sehuapa allempo attoch sa'crrater atsnañe'. Tarraña añ yetro allempo yamesen amach sehuapatsto a'crrate' atsnañe'.

¹⁵ Partsesha'ña'pa' atet' och:

—Sapa' ñeñtes e'ñe sommo'cheño'tpa' atarr seshcare'ten. Sapa'cho'ña ama't añe yetro allempocma yamesen chocma setaruasen saña. Sepyam'peñ sehuacsher, sashanor allecma serrateñ o'ch sanem' ñaña oño allcha' sonayeñ oñ.

¹⁶ Añ coyanesha' ama't ñeñt' po'm'reneñ pen yatañ Abraham ama't charra' puechena posoc char ñeñt' allponmat o' huanquër oneñe', pocte'ca'ye o'ch ya'rroyatater ama't añe yetro allempo yamesen.

¹⁷ Acheñenesha' allohuen ñeñt' e'moñe'tene' ñetpa' ñeñt'ña atarr pen-catahuet. Po'potantaña acheñenesha'chnopa' ñetña'pa' atarr nanac coshenet. Atarr nanac cohuen entenet ñeñt' atet' pa Jesús.

Atto Jesús'pa' toma'ntaterranet atet' pena pue'llomer ñeñt' otenet mostazllomí (Mt. 13.31-32; Mr. 4.30-32)

¹⁸ Ñeñt'o'marña allempo'pa' alla o'terraneterr:

—Añ Yompor po'cohuenña ñeñt' atto ayochreshattena ña, ñanompa' e'ñech puesheña'ttsa ame'ña'yetsa, allempoteñña'pa' allo'nach sen atonetnomtsa ñeñt'cha' ame'ñerrtsa attochña e'ñe epa'huerra erracmañen Yompor po'cohuenña. Ñeñt'ña te'pa' o'ch netma'ntatasa ñeñt' atet' pena ña.

¹⁹ Ñehua, ñeñt'pa' atet' pena ñerra'mrrate' pue'llomer ñeñt' atarr añe'tolleshallmerr ñeñt' otenet mostazllomí. Ñeñt' pue'llomíretollpa' puesheñarrña'pa' o' anem' pa'mro allcha' nare'teña'. E'ñe allponmatatsapa' o' chop, ñeñt'ña'pa' allo'na sen rrorranmats e'ñe cohuen atarrchetnom. Ñeñt'ña narmetsocherpa' o'ch hua'cha'toña o'te'chno ñeñt'cha' ama'tanatyesosets puetacro'mar.

Atto Jesús'pa' toma'ntaterranet ñeñt' atet' pena chase' (Mt. 13.33)

²⁰ Elloña alla o'terraneterr:

—Po'poñone' o'ch netma'ntatasa ñeñt' atet' pena Yompor po'cohuenña ñeñt' atto atarr ayochreshattena ña. Ñeñt'pa' ama'tcha' añe'tolla ñeñt'cha' ñanom orrtatsa tarraña e'ñe ña po'huamenco'tpa' mametollapa' o'ch e'ñe epa'hua ora erra'paren.

²¹ Ñeñt'pa' añ toma'ntaterraneterr atet' pena chase':

—Ñeñt' chase'pa' allo tsetenan coyanesha' harina' ñeñt' oñetsetstaten attoch a'chasatan harina' esheccha' e'ñe a'muesatue. Ñeñt'ña chase'pa' ama'tcha'

añeñolla net, ama'tcha' aton harina' ñeñt ma'pa arroga, mameñolla' o'ch e'ñe a'muesatuanña ama't atarr aton harina'.

Atto Jesús pa' toma'ntaterraneterr ñerra'mrrate' yetarroto llo yebe'ten esheccha' ye'chap Yomporesho

(Mt. 7.13-14, 21-23)

²² All oñemyen Jesús e'ñe ora asuahuanom allohuen anetso'mar all shonta'yena acheñenesha' ama't ñaña all ama tama eñalleyaye acheñenesha'. Allña e'ñe serrpare'tatyesnomanet. Allempo oñemyen allemeñ anetso'mar ñapa' arr sen Jerusaléño all sechena.

²³ All oñen toñopa' allempoña puesheñarrpa' a'p'to'tnom, atet och:

—Ayochreshate, ñeñtcha' allpon a'queshpataretterrtsapa' ta'm ñetpa' ¿puesheña'ttsetate' ñato' amapa' atarrcha' shonte'?

Jesúsñapa' atet och:

²⁴ —Sapa' añcha'ña e'ñe cohuen sema'yo'hrena ñeñt cohuen enten Yompor attochña sesuanom ñeñt ama cohuenaye' enteno ña. Ñeñt pa' o'ch netma'ntacha atet ñerra'mrrate' allcha' yebe'tos esheccha' ye'chap ñesho ñeñt pa' atarr añeñoll, atarr torrapo' o'ch yebe'tos all. Ñaña o'ch notas esempohuañen ama'tcha' shonte' acheñenesha' ñeñtcha' atarr muenatseñ o'ch be'terretañ all attoch cherretañ Yomporesho tarraña allempopa' amach eshec be'terreto attoch cherret all tarro'mar allempopa' o'ch huañerr atto atarr cohueney Yompor.

²⁵ Ñeñt pa' o'ch netma'ntacha atet ñerra'mrrate' esempo o'ch chen ñeñt apaclatesha' ñaña pa' o'ch tantuena o'ch e'ñe echarr yottam pesuena. Allempopa' ama't e'ñe eseshapa' amach eshec be'tosoña all. Allempoña ama'tcha' shonteseñ o'ch sehua'cha'ta all petotach sechorros allotcha' se'chore'tos apaclatesha'. Allña sapa' atetcha' sotos: “Ayochreshate petoram'psapuey.” Ñapa' atetcha' otapas: “Ñapa' ama nentarse, erro'tte' sehuenaña sa.”

²⁶ Sañapa' atetcha' sotererr: “Ama't parrocmá yerrallme'chyese'teña ahuañmo'cha ñaña ama't ya ya'netsro'mar allecma chopeñe'chyenet allca'yeña pey'chatyese't.”

²⁷ Tarraña ñapa' atetcha' oterrserr: “Te'pa' o'ch notas, napa' amaca'ye po'ño'ch nentarse, erro'tte' sehuenaña sa. Te'pa' orrerres arro't nesho't allohuenes ñeñtes ma'yo'hrenaya ñeñt ama pocte' enteno Yompor.”

²⁸ O'ch ahues all ñeñt o'patatenset sa. Allña pa' allcha' seyahuanrrortosa, sanmueño't aterrpa' serraso'tyesoscha' sas. Allotcha'ña sentosña satañneshachno—Abraham ñaña Isaac ñaña Jacob ñaña allohuen ñeñt a'mta'yese't Yompor po'ño'ñ. Ñetña pa' e'ñe Yomporesho'tsa'yenet all añcha'tare'ttena ña. Sañapa' cha'petotaña huapore'tenset.

²⁹ Allña pa' allemateñcha' hua'cha'ta shonte' ñeñt ama judioneshayaye ñeñtcha' anorr'cha'tyesosets all e'ñe Yomporesho all añcha'tare'ttena ña allcha' rrallme'choset all e'ñe cohuentena Yompor.

³⁰ Te'pa' seño'chcha' eñall acheñenesha' ñeñt ama asherbenaye' senteno sa te' tarraña allempoña ñetpa' atarrcha' asherben enterranet Yompor. Ñaña eñall acheñenesha' ñeñt atarr asherben sentyen sa te', tarraña allempoña ñetpa' amach asherbenaye' enterraneto Yompor.

Atto Jesús pa' puellquëño'tan jerusaléño'marnesha' atarr ya'na'tenanet

(Mt. 23.37-39)

³¹ E'ñe ñeñte yetrocma allempo hua'cha'toña patantarr fariseonesha'. Ñetña pa' atet otoset Jesús:

–Te'pa' o'ch peyeta arroṭ tarro'mar añcha'tareṭ Herodespa' o'patenṭa ahuo'ch muetsataṭ.

³² Jesúsñapa' atet otapanet:

–O'ch ahuerrespa' atetcha' sotuer Herodes ñeñṭ atarr eñotene' shequēñets: “Te'pa' o'ch peñoḥ, napa' atterach necaḥpatateññañ acheñenesha' po'neñeṭer ñaña atterach shonte' na'crratyes ñeñṭ atsna'tyets. Atet nepena ṭe', tsapaṭonetpa'ḥo'ña attecmaḥ nepena, o'chña tsapaṭonterrerrpa' o'ch e'ñe netsotatue allohuen.”

³³ Nocoppa' añ poctetsa ḥocmaḥ nesen ama't ṭe', ama't tsapaṭonetpa'ḥo'ña, ama't ñaña o'ch tsapaṭonterrerrpa' ḥocmaḥ nesen. Attotach neḥerr Jerusaléño, tarro'mar allpa' allecma ḥocma muetsayeseṭ ṭe' ñeñṭ a'mta'yesayeṭ Yompor po'ñoñ.

³⁴ Allempoña Jesús e'ñe puellquēñoṭ judionesha'pa' atet eñorena ñocpuet, ñeñṭo'marña atet otanet:

–Sa jerusaléño'marneshacha' ñeñṭes muetsanatyeseṭ ṭe' ñeñṭ a'mta'yesayeṭ Yompor po'ñoñ, sa ñeñṭes rrollapeḥyeseṭ ṭe' ñeñṭ añareṭ sesho. Atarr atonoche'tats nemneñeñ o'ch na'yapaḥa'huerrsoñ allohuenes nesho attoḥ e'ñe cohuen necuamṭpensoñ. Nemneñeñ o'ch na'yapaḥa'huerrres atet ñerra'mrrate' atollop a'yapaḥene' puechoyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno.

³⁵ Te'ñapa' all seyḥena sa, Yomporñapa' o'ch a'ypo'ñerres. Tarro'mar te'pa' o'ch alla noterrser: Na po'pocheño'pa' amach alla senterno ṭe'. Esemphuañenñapa' senterrencha' allempoñapa' atetcha' soterren: “Aye'ḥoḥtatpahuēpa'ḥ Jesucristo ñeñṭ huapatsa ñeñṭ llesensen Yeyomporer.”

14

Atto Jesús'pa' a'crraterran puesheñarr yacma ñeñṭ ḥa ananen

¹ Allempoña ḥerrerr pamṭarr allempo amesenet. Jesúsñapa' ahuo' allcha' rrallme'chapretenana' puesheñarr fariseo ñeñṭ atarr añcha'tareṭtetsa. Chap all pa'paclopa' po'potantañña fariseonesha' ñetñapa' atarr cohuaña'tyesapet Jesús.

² Allñapa' allo'tsen puesheñarr yacma ñeñṭ ḥa ananen.

³ Jesúsñapa' all serrpare'tos epuet fariseonesha' ñaña ñeñṭ allo'tsa'yen ñeñṭ atarr etsotene' ñoñets ñeñṭ atet anareṭ judionesha'cop. Ñaña'atta a'ṭto'tosanet e'ñe po'tomña, allochñapa' o'ch eñoḥ ñato' errotencha' anapet. Ñeñṭpa' atet otosanet:

–¿Erroṭena'tña sotenna sa, ta'm pocte'ṭe' o'ch na'crratos atsnañeṭ añe yetro allempo yamesen? ¿Atṭe't otenña ñoñets ñeñṭ atet anareṭ, ñato' amate'?

⁴ Fariseonesha'ñapa' ama eseshaye' anapuetso ama't puesheñarroña. Allempoña Jesús'pa' a'ṭlamco'tosan atsnañeṭ. E'ñe a'ṭlamco'tue'pa' ḥa corrrerṭsa allenta mueñer pa'paclo.

⁵ Allempoña Jesús'pa' alla oterranerr fariseonesha':

–Sapa' ñerra'm sashanor amapa' sehuacsher shora'nets aroroṭo all chorren oñ, ama'tḥa'ña seḥtereña allot e'ñe allorocma ama't añe yetro allempo yamesen.

⁶ Ñetñapa' ama errotenaye' otenaye' enteñeto ama't e'ñe puesheñarroña.

Atto ahua'ñareṭtet o'ch rrallme'chapreteñeta' ñeñṭ sena'tetsa

⁷ Allempoña ñeñt ahua'ñareñsha' ñetñapa' aña atarr muenenet o'ch anor-
ryesoset allecma anen ñeñt atarr amcha'na'tpo' entyenet. Jesúsñapa' enta-
panet ñeñt atet muenenet ñet o'ch cha ommo'chyesoset. Allempoñapa' atet
otapanet:

⁸ –Ñerra'm esempo ahua'ñaretes o'ch serrallme'chapreteña' ñeñt
sena'tetsa, sommo'cheñoñpa' amach arra sanorratsetyesoso allecma anen
ñeñt atarr amcha'na'tpo' entyenet. Ñetña chenta'pa' o'ch huapuet ñamet.

⁹ Ane'tañ ñeñt sehua'ñene' allohuenes ñañapa' o'ch huapa pesho o'ch otaþ:
“Te'pa' o'ch petanterra arroñ, all þanen te'pa' o' huapaña ñeñt panorrrpue'
pene' all þanen ñeñt atarr amcha'na'tpo' entyenet.” Paña allempopa' atar-
rcha' pepenquëñoñ petanterra o'ch ahueþ allcha' þanorros allecma anorryen
ñeñt ama esoshe'maye' entyenet.

¹⁰ Sapa' atetcha'ña seþa ñerra'm esempo hua'ñenset. Allempo seþhap
all hua'ñenset sapa' allach sanorros allecma anorrcha'tyen ñeñt ama es-
oshe'maye' entyenet. Allñapa' o'ch huapa ane'tañ, ñapa' atetcha' otoseþ:
“Masheñcha' þapa' arrcha' þanorros allecma anen ñeñt atarr amcha'na'tpo'
entyenet.” Attochña allohuen ahua'ñareñsha'pa' o'ch entapet þapa' atarr
amcha'na'tpo' entyenet.

¹¹ Tarro'mar allohuen ñeñt e'ñe cohuen entetsa e'ñe pommo'cheñoñ ñetña
tsapañonetpa' amach esoshe'maye' entereto. Tarraña allohuen ñeñt ama
esoshe'maye' entetso te', ñeñtña tsapañonetpa' atarrcha' cohuen enteret.

¹² Allempoñapa' atet otan ane'tañ ñeñt hua'ñene':

–Ñerra'm esempoch þorrtaten rreñets ñeñtcha' serra'muen aromtaña
amapa' ellerronet amach e'ñe aña pehua'ñatsto ñeñt e'ñe parro peyemtena
ñaña ñeñt pemo'nasheñ pepen ñaña po'potantañ ñeñt e'ñe þamo'tsesha'
pepen ama't ñaña allo'marnesha' ñeñt atarr eçllayoretet. Tarro'mar ñerra'm
ñeñt pehua'ñenpa' ñetpa'cho'ña tsapañonet o'ch alla hua'ñerrpet þaña.
Attoch tsa'terrpet.

¹³ Tarraña ñerra'm esempoch þorrtat rreñets aña'nachña pehua'ña'yes ñeñt
atarr huocchañetyets ñaña achocrañaçhno ñaña ñeñt checa're'paçhno ñaña
aporo'yeteçhno.

¹⁴ Attochña þapa' atarrcha' cosheñtso'tseneþ tarro'mar ñetpa' amach er-
rotenoñ alla tsa'terrpeto. Papa' esempohuañencha'ña atsa'tareteþ allempoch
atantataretterra allohuen ñeñt e'ñe pocte' es þa'yestse't.

Arrpa' all atma'ntatarettena ane'tañ ñeñt atarr aton yeçcatatene' rreñets

¹⁵ Allempo e'mueñet Jesús atet serrpare'tatuanet, puesheñarrña ñeñt parro
anorrchenet ñeñt parro rrallme'chenet, ñañapa' atet otan Jesús:

–Atarrcha' cosheñtso'tseney allohueney ñeñteycha' rrallme'chapreterre'
Yompor all amcha'tarettena pue'ntaño.

¹⁶ Jesúsñapa' toma'ntaterraneterr, ñeñtapa' atet oterraneterr:

–Eñall puesheñarr ane'tañ ñañapa' o'ch yeçcatatan atarr shonte'
aton rreñets. Allempoñapa' otyesan shonte' acheñenesha' ñeñtcha'
rrallme'chapretenaya' esempoch e'ñe a'potatuan rreñets.

¹⁷ O'ña çhap allempo e'ñe a'potatuan rreñetspa' ñañapa' mueñan
pa'taruasañer ñeñtcha' hua'ña'yenaya' allohuen acheñenesha' ñeñt
otarettatsa ahuaña. Ñeñtña pa'taruasañerpa' atet otosan acheñenesha':

–Te'pa' o'ca'ye e'ñe a'potaretetuaña rreñets sonaça't o'ch ser-
rallme'chapretena'.

18 Tarraña ñeñt ahua'ñaretechnopa' ñetñaapa' ama esesha' tatso. Ñehua, ñeñt ñanom puesheñarrpa' atet ot: "Napa' te'pa' o'ca'ye nerañta pats, o'chca'ye ahuen o'ch necua'yeña'. Potuercha' pamo'mte' peretnerrnepa', napa' amachca'ye neto."

19 Po'psheñeñpa'cho'ña atet ot: "Napa'cho'ña o'ca'ye nerañta charrana toro po'yuntohuen e'ñe epna'ttsocma; o'chca'ye ahuen o'ch netpach taruasate'. Potuercha' pamo'mte' peretnerrnepa', napa' amachca'ye neto."

20 Po'psheñeñpa'cho'ña atet ot: "Napa' errtenca'ye sena'tetsa ñeñto'marña napa' amachca'ye eshec neto."

21 Ñeñtña ataruasañer atet otyes acheñenesha'pa' ñañaapa' ahuer pamo'mtayesho, serrpare'tatuerran pamo'mte' atet otyeset ñeñt hua'ña'yeseñ. Ane'taññaapa' ñeñtña atarr atsrre'mate'. Patsrre'mueño'tpa' atet oterranerr pa'taruasañer: "Te'pa' o'ch ahuerperr e'ñe tayecma ñaña all anetso allecma atarr chopeñe'chyen shonte' acheñenesha'. Allotcha'ña pehuapaterr huocchañnesha'chno ñaña achocrañachno ñaña aporo'yetechno ñaña checa'repa'chno."

22 Pa'taruasañerñaapa' atetcho' perrerr. Allempo huerra atet otuerranerr pamo'mte': "Nompocha' ñeñt atet pōtenpa' te'pa' o' e'ñe atet nepohua. Tarraña allcha' anorrcha'tyes ñeñtcha' rrallme'chosetspa' orameñ."

23 Pamo'mte'ñaapa' atet otererr: "Te'pa' o'ch alla ahuerperr allampaño'mar all shonte' toñe'chno allecma chopeñe'chyen acheñenesha'. Allñaapa' atarr rcha' pōtare'tyes acheñenesha' onetepa' arr nepacillo attoch e'ñe chorra acheñenesha' arr nepacillo."

24 Po'ño'ch te' napa' o'ch notas, ñeñt ñanom nehua'ñatyeseñpa' ñetña te'ñaapa' ama't e'ñe puesheñarrofetapa' amach rrallme'chapreterrneto attoch cosherret nesho."

Añ poctetsa o'ch e'ñe yesuanem ñeñt e'ñe yocpa attoch yocter Cristo e'ñe poctacma

25 All oñemyen Jesúsapa' shonte' acheñenesha' co'ta'huanene'. Ñañaapa' cohua'nmanet allenet shontenetpa' atet otnomanet:

26 —Ñerra'm esesha' muene' o'ch coterrren e'ñe po'ño'ch, añ nemnen o'ch atarr nanac morrentennet. Elloch metaneñet atto atarr morrenteñet pompor, ama't ñaña pachor, ama't ñaña puetapor ñaña puechemeresha', pa'mo'nasheñnesha', po'chanesha'. Atto atarr morrentennet ello metaneñet atto atarr morrentenet ñañeñeta ñeñt atto correnet arr patsro. Ñerra'm erra'tsen ama atteye' nemorrentenayepa' ñañaapa' amach errotenot neyochresha' neperraneto.

27 Tarro'mar ñerra'm erra'tsen ama e'ñeye' sehuanmaye ñeñt atet muenenet e'ñe ñocpueta attoch coterrnet e'ñe poctacma, ñañaapa' amach errotenot neyochresha' neperraneto. Ñeñtapa' añ toma'ntena atet ñerra'mrrate' cho sechechnen secorsoch allcha' semuero'chta saña.

28 Ñeñto'marña ñerra'm erra'tsenotes muenene' o'ch neyochresha' neperres, añ poctetsa choch ñanom soctape'ch, e'ñe'e' pocte' senteñ o'ch sesuanom ora allohuen ñeñt atet notenes. Ñeñtapa' atetcha' netma'ntacha atet ñerra'mrrate' eseshas muenene' o'ch sa'tomat sepaquell atarrpo'pa' añ sepaltena choch ñanom sanorr allcha' soctape'ch errponte' tsa'tena. Ñato' e'ñall'e' allpon quelle attoch mameshapa' o'ch sa'pue'.

29 Ñerra'm ama atet ñanom soctape'chenopa' ñato' o'ch sa'tomatañ ñanom alloch echarr sorrat sepaquell, ñerra'm cha sehuañapes quelle attoch sa'pañ

sepaquëllpa' attach secaçhpue'. Acheñenesha'ña ñeñt sentene'pa' çhach che'tatsetaset;

³⁰ ñetñapa' atetcha' otyeset: "Añ acheñerpa' o' tomataneña atarrpo' pa'paquëll, alla huañapes quellepa' ama esoye' a'patano pa'paquëll."

³¹ Ñeñtara cotapñatser o'ch alla netma'ntacha po'poñoneñ. Atet ñerra'mrrate' puesheñarr amcha'taret ñerra'm añ cotape'chen o'ch quellaran po'solltarer epuet po'psheñeñ amcha'taret po'solltarer çhoch ñanom anorr allcha' e'ñe cohuen cotape'ch. Allempopa' atetcha' ot: "Napa' e'ñeca' çharra' mila nechen nesolltarer; po'psheñeña amcha'taretpa' echenan po'solltarer epoch çharra' mil. Ta'm, pocte'te' o'ch nemñe çharra' mil nesolltarer ñeñtcha' poctapue' epoch çharra' mil solltarnesha' ñeñtcha' yehuapoya. Ta'mca'ye a'mchechatuette'ca'ye—shonte'."

³² Allempoña o'ch atet cotape'chuapa' ñerra'm ama errof apenaye' eñchepa' allempo ama aponmareñteneta' ñañapa' o'ch mueñan allponsheña ñeñtcha' atet otosahuet: "Yapa' añecop yen o'ch ya'poctaterr ñoñets e'ñe cohuen e'ñe atta, amach yeçllaranna'tatsto."

³³ Ñeñto'mar notenes, ñerra'm eseshas ama e'ñe pocteye' senteñe o'ch sesuanom ora ñeñt allpon sechen, nañapa' amach errotenoñ neyochresha' neperrso.

Arrpa' all atma'ntatarettet atet ñerra'm pos o'ch huañ po'poserrteña o'huañcha' sherba' (Mt. 5.13; Mr. 9.50)

³⁴ 'Ñehua, yapa' yeñoteñ pospa' atarr cohuen sherbenan allohuen acheñenesha' arr patsro. (Allohuen ñeñt po'ñoçh neyochresha' nepen ñetñapa' atarr sherbenet attet ñerra'mrrate' pos atarr cohuen sherbeney.) Tarraña pospa' ñerra'm o'ch huañerr po'poserrteña amach errotenoñ ellopa' ya'poserrtatere.

³⁵ Attoña amach es sherberro ama't e'ñe coñe'ta. Ama't attoch yet-narrataterr allo patspa' ama't ñeñtecpapa' amach sherberro; ñeñto'marña ama't ñeñtecpapa' amach yañño'tatsche. Ñeñto'marña o'ch yehuapore'ter a'yo. Ñerra'm eseshaste' ne'mñotene'pa' çhaponasepa'ch seyoçhro ñeñt atet neyçhatenes.

15

Acheñ ñeñt ama ame'ñetsopa' arrpa' all atma'ntatarettet atet ñerra'm carnero ñeñt chenquëtsa (Mt. 18.10-14)

¹ Shonte' ñeñt cobrets quelle gobiernocop ñeñtara ñeñt atarr she-care'tyets ñaña shonte' ochñañenesha', ñetñapa' huaçha'tet Jesúsesho o'ch e'mñoteññañeta' ñeñt atet serrpare'tatenan allohuen acheñenesha'.

² Añña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop, ñetñapa' ama't mameshapa' ama pocteye' enteñeto. Ñetñapa' atta sasare'teñet Jesúsapa' ñeñtapa' atet otanna'tyenet:

—Añ acheñer ama't ñeñt atarr ochñañenesha'pa' eso'marte'ña e'ñe cohuen agapyenanet, ñaña alla rrallme'chapreteñet.

³ Ñeñto'mar Jesúsapa' alla toma'ntaterraneterr; ñeñtapa' atet oterraneterr:

⁴ —Sapa' ñerra'm eseshas echene' shonte' secarrneror, çharroch çharra' sechen tarraña ñerra'm pomocarrña machayoña sa'chencachpa' ama't atet sepeno. O'ch sesa'nom allohuen po'potantañ ñeñt o' noventa nueñaña all

amayo ama't atarr a'yopa' o'ch ahues e'nerraya' pomocarr ñeñt chenquëtsa. Allcha' se' name'tyera'pa' attotach senter.

⁵ Allña senterpa' o'ch senatner, e'ñech socsheñeshocmañen saner.

⁶ O'chña se'chapater sepacllopa' allñapa' o'ch se'chore'tuer samo'tsesha' o'ch ona'cha'tet. Allñapa' o'ch sotuerr: "Te'pa' o'ch socshapreterrna necarrneror, te'pa' o' nenterrña ñeñt na'chencaten."

⁷ Ñeñto'marña te'pa' notenes: Yamo'mte' ñeñt pue'tañotsen attec mach atarr nanac cosherrana ama't pue'sheñarra acheñ ñeñt atarr ochñañ ñerra'm esempoch o'ch cotape'cherret ello e'ñe cohuen ñocop. Elloch metana'tuerran ñeñt atto coshenana po'potantañ ñeñt shonte' ñeñt e'ñe pocte' es pa'yenet ñocop ama't ñetpa' shontet atet ñerra'm noventa nueve carrnero ñaña ñetpa' ama't ama pallteneto o'ch cotape'cherret ello cohuen.

Arrpa' all atma'ntatare'ttena puetallarr quelle ñeñt a'chencaten pamo'mte'

⁸ Ñeñtara cotapñats, te'pa' ñato' atet'cha' netma'ntacha po'poñone't atet ñerra'm pue'sheñarr coyanesha' ñerra'm echenan çharratlla po'çllayor ñeñt atarr morrentena. Ñerra'm çho a'chencach puetallarrpa' ama't'cha' a'llchatanoña po'lampareñ attoch tarrapo'tenan pa'paquëll allcha' e' name'tyerran puetallarr po'çllayor. Attot'cha'ña enter.

⁹ O'chña enterpa' allempoñapa' o'ch agotan pamo'tsesha' e'ñe pacmaneshoche', atet'cha' otanet: "Te'pa' o'ch socshapreterrna ñeñt puetallarr neçllayor ñeñt na'chencat, te'pa' o' nenter."

¹⁰ Te'pa' o'ch noterrser, elloña atarrcha' nanac coshateret Yompor po'mllaño'teñreneshohuen ñerra'm esempo ama't pue'sheñarra acheñ ñeñt atarr ochñañpa' o'ch cotape'cherret ello e'ñe cohuen Yomporecop.

Arrpa' all atma'ntatare'ttena pue'sheñarr yacma puechemer ñeñt atarr otatsña't

¹¹ Elloña Jesúsapa' alla toma'ntaterraneterr, ñeñt'pa' atet oterraneterr:

—Eñall pue'sheñarr acheñ echenan epsheña puechemer.

¹² Ñeñña puechoyomer penpa' atet otan pompor: "Apacha' ñeñt ora allpon pechen te' napa' nemneñ o'ch papuen e'ñe tayecma ñeñt allpon po'patatenna." Allempoña pompor ora ñeñt allpon echyenpa' o' apa'yesan epsheño'mar puechemerasha' ñeñt allpon o'patatyenanet e'ñe pue'sheña'ttset.

¹³ E'ñe allponmatatsa ñeñña puechoyomer penpa' o' e'ñe pomhuahuanman ora allohuen ñeñt allpon ap pompor allo agapan shonte' quelle attoch ta ba'chayo po'poñ anetso. Allempoña çhap ba'chayopa' allñapa' sosya'tsañe'chna atet pa'yesos. Attoña ama't shonte' po'çllayor ñeñt anem o' e'ñe a'gasta'huahue e'ñe pottatse'teño't.

¹⁴ O' e'ñe a'gasta'huan ora po'çllayorpa' allempoña allpa' o' orrta mue'cheñets all ñeñte anetsro. Ñaña'pa' o'huañ erraye' entan puerrar ñeñt'cha' rren.

¹⁵ Allempoña ñapa' o' ahuo' allo'tsen ane'tañ all e'nyenan taruas. Ane'tañ'apa' aña ap po'taruas o'ch auyesos a'yenet allcha' cohuan'pesyesoñ po'chañchor.

¹⁶ Ña pa'chporrño'tpa' atarr mueneñ o'ch rrapretosan chañcho puerrar attoch yetosa. Ama't chañchopa' pa'talle'tsa puerrar pen ñapa'çho'ña ñeñt'ña atarr muenen o'ch rros tarraña ama't chañcho ama eseshaye' apuenaye puerrar ñeñt'cha' rra'.

17 Atteñapa' machayoṭa ḥapona pueyoḥro, atet ot: "Apa pa'taruasañer ama't shontetpa' ehyenet puerrar, ello puechare'tyena. Naña arrpa' o' nerromuerrmoch nachporrñoṭ.

18 Te'pa' o'ch ahuerren apuesho; te' napa' atetcha' notuer: Apacha' napa' o' neṭohua ñeñt ama cohuenayaye Yomporecop ama't ñaña ṗocop.

19 Napa' ama cohuenayayno attoch pechemer peṗapuerren. Te' napa' aña poctetsa nocop ṗapa' ṗa'taruasañrach peṗapuerren."

20 O'ña atet coṭape'chua ello e'ñe cohuen Yomporecoppa' allempoñapa' ahuen pomproesho.

'Ama't atarr ellaṗarmeñ allempo entapueñ pompor e'ñe puemuereñoṭ mata poctapueñpa' a'ḥono'tapueñ, tso'tstsapa'tapueñ. Ñeñtpa' atet huomñcha'tapuenan puechemer atto e'ñe cohuen agapapueñ.

21 Puechemerñapa' atet otueñ: "Apacha' napa' o' neṭohua ñeñt ama cohuenayaye Yomporecop ama't ñaña ṗocop. Na te'pa' ama cohuenayayno attoch pechemer peṗapuerren."

22 Tarraña pomporñapa' e'ñe allorocma otan pueñañreshaḥno: "O'ch sena' e'ñe ṭayecma shetamuets ñeñt atarr cohuen coḥnesha', o'ch sechorratapuennana nechemer. O'ch senatapueñ ñaña anillo potaṗo, o'ch senatapueñ ñaña sapatets pa'tco.

23 O'ch sennana' ñaña nehuacsher ñeñt atarr ne'soya'taten o'ch semtse o'ch yerrallme'ch o'ch yocshame'tamṗsapueña.

24 Tarro'mar añ nechemer ama't o' rromhuañ, te'ñapa' o' alla tanterra. Ama't o' chenca'huañpa' te'ñapa' o' alla nenter." Allempoñapa' atarr nanac coshame'tamṗsapueñet.

25 'Ñehua, po'psheñeñ puechemer ñeñt popo'nar ñaña'pa' pa'mro'tsen allempo ḥen puechoyomer. Allempoña err pa'mroṭ e'ñe ya'rroterrtsa pocolopa' o' e'mhuerran coshamñats all requerquenet ñaña ashe'rarañ.

26 Allempoñapa' ḥore'tuerran cheshachorpa' a'ṗto'tuer: "¿Eso'mare'tña coshame'tenet? ¿Eso'tña atarr coshame'tamṗpenet?"

27 Cheshachorñapa' atet otapuer: "O' huena pemo'nasheñ, ṗomporpa' o' muetsatan becer ñeñt se'soya'taten tarro'mar atarr coshapuenana puechemer. Ama ḥoye' rromueno, e'ñe huomech agapapueñ."

28 Ñaña'pa' ñeñta atarr atsrre'matuerre' ama mueno o'ch be'tosuerr all o' ḥen pa'mo'nasheñ. Atteñapa' ḥa'nom pomporpa' allach otere't: "Pebe'tosuerr." Ñaña'pa' ama mueno o'ch be'tosuerr.

29 Ñaña'pa' atet otuerran pompor: "Napa' peñotenen o' shonte' char e'ñe cohuen name'ñenṗa; napa' ama't parrochapa' ama esempo natpare'tenpe. Tarraña ama't atet nepenpeñpa' ñaña'pa' ama't esempapa' ama ṗapuennoña ama't paṭrra cabra attoch nocshame'ta ñaña epan ñeñt parro neyemuetyena na.

30 Te'ña o' huena ñeñt pechemerma't pepen ama't ora o' a'gasta'huonaṗ peḥllayor e'ñe puecañoresha'teñoṭ, te'ña ṗapa' o' pemtsatapueñ becer ñeñt ye'soya'taten."

31 Pomporñapa' atet otererr: "Po'ñoḥ nechemercha' ṗapa' ḥocma arro'tseney parro. Amahuaca'ye nechemercha' peñoteñeṭe' ñeñt allpon nechenpa' e'ñerramche' ṗocma.

32 Ñeñto'marña te'pa' añ poctetsa o'ch yocshame'tamṗsapueña pemo'nasheñ, o'ch atarr nanac yocshena tarro'mar ama't o' rromhuañ te'ñapa' o' alla tanterra; ama't o' chenca'huañ te'ñapa' o' alla yenter."

16

Atet atma'ntatarettena atet pena ñeñt cohuañpsatsre'tene' pamo'mte'

¹ Elloña Jesús'pa' alla toma'ntaterranerr pueyochresha', ñeñt'pa' atet serpare'taterraneterr:

—Eñall yacma puesheñarr ñeñt atarr eçllayoret. Ñapa' echenan pa'cheñer ñeñt po'taruas pene' o'ch cohuañpsan ora allpon ñeñt echyen pamo'mte'. Ñaña ñach quellquëne' po'potantañ ñeñt allpon teña'yeññañet pamo'mte'. Atteña allempoña puesheña'tets acheñenesha'pa' a'metampeñeta' pamo'mtayesho, atet otoñet pamo'mte': "O'ca'ye atta a'chencatatsre'ta'pña ñeñt penen ñeñtcha' pecuañpsatsre'tene'."

² Allempoña pamo'mte' atet e'mare'chpa' allenta agotach. Allempoña huapapa' atet otap: "Eso'maruañaca'yeña atet pa'chencatatsre'tenen. Te'pa' o'ch peñotatnomuen e'ñe ora allohuen ñeñt allpon petaruasen tarro'mar te'pa' ama nemno o'ch allo'na pecuañpsatsre'tenen." O' atet otue pamo'mte', ñaña'pa' allenta ahuerr.

³ Allempoña pa'taruasañer ñap'topa' atet cotape'chen: "Te'pa' amach allo'na netaruasa'nenonamo'mtayesho; o'ca'ye mopa'tamperrenña allo neganena. Te'pa' erro'tenuachñaca'ye ne'pate'. Napa' ama necheno nehua-menc attoch namre't ñeñtcha' netaruas neperreñ, ñaña ama nemno o'ch netaruas ne'pa' o'ch atta nenamare'tyen quelle atet pa'yena po'psheñne'chno ñeñt po'taruas pene' o'ch enamare'tyeset quelle, tarro'mar na ñeñt'pa' atarr apenco'chen nenteñ."

⁴ Allempoña o' e'ñe cotape'chuepa' atet ot: "Te'ña po'ño'chpa' o'ca'ye ne'ño'ch atet'cha'ca'ye ne'pa' attoch acheñenesha'pa' e'ñech cohuen agapnet pa'pacillo tsapa'onet allempoch huañ neçllayor ñeñt allpon naguën te'netaruasot."

⁵ Allempoña atet cotape'chenpa' atet'cho' pa. Ñeñto'marña agotatan allohuen allponsheña ñeñt teña'yets pamo'mtayesho. E'ñe puesheña'ttsa ñanom a'p'to'tyesap, atet otapanet: "Papa' ¿errpona't petebeñña namo'mte'?"

⁶ Ñaña'pa' atet otos: "Napa' netebeñca'ye çharroch çharra' cilindro aceite'." Ñeñt patron pa'cheñerña'pa' ap' allo quellquëññañ ñeñt allpon teben ahuatoteñ. Allempoña'pa' atet otererr: "Te'pa' o'ch panorr tecmapa' o'ch pe'sherrña ñeñt çharroch çharra' cilindro o'ch pequellquërr amnaroch çharra' o'ca'ye allponamaña ñeñt peteben."

⁷ Allempoña'pa' otterrannerr ñaña po'psheñeñ: "Papa'cho'ña ¿errpona't petebeñña namo'mte'?" Ñaña'pa' atet otos: "Napa' netebeñ çharroch çharra' arroga trigo." Ñeñt patron pa'cheñerña'pa' ap' ñaña allo quellquëññañ ñeñt allpon teben ahuatoteñ allempoña ñapa'cho'ña atet otererr: "Papa'cho'ña panorr tecma o'ch pe'sherrña ñeñt çharroch çharra' arroga o'ch pequellquërr poscoch çharra'; te'pa' o'ca'ye allponamaña ñeñt allpon petebeñ namo'mte'."

⁸ Allempo pamo'mte' eñotan ñeñt pa'taruasañer atta shecare'teñ, ñaña'pa' atet oten: "Añ acheñer ama't puehquëño'p'a' e'ñe eñoteñ o'ch entan ñeñtcha' atarr sherberre' ñocop tsapa'onet." Po'ño'ch acheñenesha' arr patsro ñeñt ama ame'ñetso ñetña'pa' atarr eñoteñet attoch e'ñech aña e'nenet ñeñtcha' atarr sherberrets ñocpuet tsapa'onet. Tarraña ñeñtña ame'ñetsapa' ama tama eñoteñeto, ama es cotape'cheneto o'ch e'nenet ñeñtcha' atarr sherberrahuet ñamet tsapa'onet.

⁹ Ñeñto'marña te'pa' o'ch notenes:

—Ñeñt allpon pa'namen sechyen seçllayorohuen ñeñt'pa' añecpuepa'chña sherbenes alloch seyenpueñ po'potantañ allochña'pa' attochña e'ñech cohuen

muererrset. Sapa' añecpuepa'chña setaruasatña sa seçllayor ñeñt atarr sherbets Yomporecop ama't yeñoteñ quellepa' atarr a'gasta'po' ama't ñaña añecop ñeñt ama pocteye' enteno Yompor. Allochñapa' eñallcha' socop ñeñtcha' e'ñe cohuen sagüerre' e'ñe all Yomporepahuo esempoch sechacherr all, allempopa' o'huañcha' allo'na sherbenes quelle ñeñt patso'marecpa. Attoch allohuenes e'ñech cohuen socrra'huerra Yomporepahuo ñeñtpa' ama ahuañaño.

¹⁰ 'Elloña o'ch notas:

–Ama't e'ñe coñe'ta yechen ñerra'm añecop yesherbateñ ñeñt cohuen enten Yompor, ñaña'pa' eñoteny atet ñerra'm ama't atarr aton yechen atterach yesherbateñ ñocop. Tarraña ama't e'ñe coñe'ta yechen ñerra'm ama añecpaye' yesherbateñe ñocop, ñaña'pa' e'ñech eñoteny attoña ama'tcha' atarr aton yecheneña'pa' atterach amach es yesherbateñe ñocop.

¹¹ Ñaña ama't e'ñe allpona quelle yechen arr patsro ama't e'ñe patso'marecpa tarraña ñerra'm ama añecop yesherbateñe ñeñt cohuen enten Yompor allempopa' amach errotenot alla apuerryerroña ñeñt po'ñoch atarr sherbets ñeñt apueney ña.

¹² Ñaña ñerra'm ama es yesherbateññañe ñeñt po'psheñño atet ñerra'm ñeñt Yomporo, allempopa' amach errotenot apyeña ñaña ñeñt e'ñe yocop ñeñtcha' e'ñe cohuen yocshatene'.

¹³ 'Ñeñtpa' atetcha' netma'ntacha:

–Ama't puesheñarrofeyapa' amach errotenot e'ñe cohuen yetaruasoña epsheño'mar yamo'mtayecop. Tarro'mar ñerra'm atet ye'papa' puesheñarr e'ñech cohuen yemorrenteño't yocsheñeshocmañen yesherbeñ, po'psheñeñña'pa' amach e'ñeye' yemorrenteño; çhach yottena ñerra'm cha yetsena'teñ. Ñeñto'mar atetpa' amach cohuenaye' yesherbeñe. Ñerra'm aña e'ñe sema'yochrena ñeñt e'ñe socpa attoch segana aton quelle, ñeñt atetpa' amach errotenot sema'yochroña ñaña añecop ñeñt atarr sherbets Yomporecop.

¹⁴ Añña fariseonesha' ñeñt e'muene' Jesús ñeñt atet serrpare'tatenan acheñenesha', ñetña'pa' aña atarr ye'chapretenet quelle. Ñeñto'marña ñet allempopa' puesasare'teño'tet Jesús'pa' cha atarr che'tatseteñet.

¹⁵ Jesús'ña'pa' atet otanet:

–Sapa' cha sottenañ ñerra'mrrate' atarr cohuensoñ attoña acheñenesha'pa' e'ñe cohuen entyensetañ. Tarraña Yomporña'pa' e'ñe eñotennas seyoçher ñeñt atto sapa' atarr seshcare'tyeñ acheñenesha'. Tarraña ñeñt e'ñe ñañañeta atarr cohuen entyetsat arr patsro, ñetña'pa' atarr tsena'tenanet Yompor.

Moisés po'ñoñpa' ñeñt atet anaret ñeñtpa' ñeñtaña e'ñe yemtete't tarrempohua allempo orrtterra Yompor po'cohuenña ñeñt atto ayochreshattena ña

¹⁶ Allempoña Jesús'pa' atet serrpare'taterranerr acheñenesha' po'poñone't:

–Añña ñoñets Moisés po'ñoñ ñeñt atet anaret ñaña añ ñoñets ñeñt quellca'yese't ñeñt a'mta'yese't Yompor po'ñoñ, ñetpa' ñeñta e'ñe serrpare'tete't tarrempohua allempo orrtosa Juan. Allempoteñ serrpare'tatosanet Juan'pa' ñapa' añ serrpare'tatosanet atet penaña Yompor po'cohuenña atto atarr ayochreshattena ña, ñeñtara cohuen ñoñets alloch sequeshperra. Ñaña allohuen acheñenesha' e'ñe pueyoçhrocmañenet ñeñta atarr müenenet.

¹⁷ 'Tarraña ama't atteña'pa' ñeñt atet anaret Yompor po'ñoñ ama't patrra quelled puehempotollohuenpa' amach chenquërro. Tarro'mar Yompor

po'ñoñpa' amach erroteno ya'huañatere ñeñt atto sherbeney. Patsña epuet enet ñeñt'pa' huañerrcha'.

*Atto Jesús'pa' ye'chatosanet ama asanna'tpahuoyaye
(Mt. 19.1-12; Mr. 10.1-12)*

18 'Ama a'huañatpahuoyaye Yompor po'ñoñ ñeñt atet yotene' ama asa'pahuo ye'tapor tarro'mar ñerra'm esesha' serre' puetapor o'ch yorerran po'psheñeñ coyanesha' ñeñt'cha' puetapor perret'pa' ñeñt'ña'pa' 'chach ochña'tam'perrana puetaporeshe'mañ; ñeñt'pa' ama cohuenaye' enteñe Yompor. Ñaña ñeñt'cha' yorerre' coyanesha' asaret, ñeñt yacmarpa' 'chach chetapreten taporets; ñeñt'pa'cho'ña ama cohuenaye' enteñe Yompor.

Atet a'paretta puesheñarr yacma ñeñt atarr e'cllayoret; atet a'paretta ñaña po'psheñeñ yacma ñeñt atarr huocchañetets, ñeñt'pa' añ pa'so'cheñ Lázaro

19 Elloña Jesús'pa' atet serrpare'tatanet:

—Eñall puesheñarr ñeñt atarr e'cllayoret ñeñt chorrenaya shetamuets atarr co'chneshare' ñeñt atarr cohuen apomotyese't. Epaye' coshatse'tatyeyñ ñeñt allpon echyen. E'ñe pocsheñot'pa' e'ñe ellapene't rrallme'chats.

20 Eñall ñaña puesheñarr ñeñt atarr huocchañetets ñeñt'ña'pa' 'cha ora puet-saren, ñeñt'pa' añ pa'so'cheñ Lázaro. Ñaña'pa' allach ellapene't a'yot yetarrot allotecma be'ten e'cllayoret pa'pacillo.

21 Ñapa' añach atarr ye'chena o'ch rra'yasan ama't coñe'ta'ttsa rreñets ñeñt a'shore'tatyeyñ e'cllayoret po'mesa'pna'cho. Allña ochecpa' o'ch huapoña o'ch tso'na'teñña'ña' pueptsarña.

22 Atteña o' 'chap pam'tarr allempo rroma ñeñt huocchañeshar. O' rroma mellaño'teñnesha'ña hua'cha'tapa' o' aneret e'ñe Abrahamuesho, allña'pa' o' 'chapachet atarr cosheñtso. Atteña'pa' 'chap allempo rroma ñaña ñeñt atarr e'cllayoret, ñeñt'ña'pa' pampueñeta'.

23 Ñaña'pa' alla 'chap coñcha'puetso ñeñt o'patenaya ñeñt rromuets ñeñt ama ame'ñetso. Allña'pa' atarr muero'chtosa all coñchosa. Atteña'pa' cohua' enonet'pa' allotña entosan Abraham alla'paro'tsen ento. Allña'pa' allo'tsen epuet Lázaro.

24 Ñeñt'ña e'cllayoret allenta 'chore'tan Abraham, ñeñt'pa' atet och: “Nompore Abrahama pemueraye'chna, pemñaye'chon Lázaro o'ch huapa arr attoch esha'tosan pota'p oño, ama't pota'p'otapa' o'ch onenapna' oñ attoch a'yamoserrapona' neñeñ o' e'ñe neporrarra'nmahuap. Atarr nanac o' ne-muero'chtosa arr tso.”

25 Abraham'ña'pa' atet och: “Nechemerñecha' te'pa' o'ch peyerposa ora allpon pa'namen ñeñt pechyese't ñeñt atarr co'chneshare' pentyese't allempo pocrre't patso. Lázaro'ña'pa' ama es eche'te ama't coñe'ta ñeñt atarr cohuen enten ñaña. Te'ña ñapa' o' atarr acshatare'terra, pa'ña'pa' o' atarr pa'coñchatare'terra.

26 Elloña te'pa' ama't e'ñe eseshapa' amach errotenot 'chapam'psapeto allo'tsene'p tarro'mar pa'pa' atsereto'tsenpa yon'ta'n. Sapa'cho'ña te'pa' ama't e'ñe puesheñarro'tesapa' amach errotenot se'chapan'pesyo yaña. Amate' erro't yepere'te ñeñt'pa' atet anaret attoch yello'tsentatare'terra.”

27 Allempoña e'cllayoret'pa' atet otarranerr Abraham: “Tarraña ama't atteñ nomporepa' te'pa' o'ch notap o'ch pemñer Lázaro all patsro nompore pa'pacillo.

28 Tarro'mar all napa' nechen amnarsheña nemo'nasheñ. Ñeñto'marña nemneñ o'ch ahuer o'ch cotape'chaterraneta' e'ñe cohuen te't ñet'pa'cho'ña esempopa' alla 'chapuet arr coñcha'puetso.”

²⁹ Abrahamñapa' alla otererr: "Ñetpa' echenet Yompör po'ñoñ ñeñt' quelquë't Moisés ñaña allohuen ñeñt' a'mtaye't Yompör po'ñoñ ahua't. Te'pa' e'mñoterrñañetepa' Yompör po'ñoñ ñeñt' echenet."

³⁰ Ñaña'papa' atet oterranerr Abraham: "Ñato' amach e'mñoterrñañeto Yompör po'ñoñ, tarraña nompore Abraham ñerra'm esesha' tanterrtsa rromot' ñeñt'cha' orrtarrahuet allempoñapa' po'ñoñ ñeñt'cha'ña cotape'chaterrahuet ello e'ñe cohuen Yomporecop."

³¹ Abrahamñapa' alla otererr: "Ñerra'm amach e'mñoterrñañeto Yompör po'ñoñ ñeñt' atet quellquë't Moisés ñaña allohuen ñeñt' a'mtaye't Yompör po'ñoñ ahua't, te'ña ama't esesha'ch tanterrtsa rromot'pa' amach eshec çhapanetoña pueyoçhreto attoch cotape'cherret ello e'ñe cohuen Yomporecop."

17

Atto çhocmach huaponaya ñeñt'cha' yetpatyene' o'ch atet p'atyese'y ñeñt' ama pocteye' enteno Yompör

(Mt. 18.6-7, 21-22; Mr. 9.42)

¹ Allempoña Jesúsapa' alla serrpare'taterranerr pueyoçhresha', ñeñt'pa' atet otanet:

—Chocmach huaponaya ñeñt'cha' yetpatyene' o'ch atet p'atey ñeñt' ama pocteye' enteno Yompör. Tarraña napa' o'ch notas, atarrcha' yoroçheno'tsen ama't erra'tsena acheñer ñeñt' orrtatene' ñeñt'cha' topatyene' po'psheñeñ ñeñt' name'ñenaya o'ch atet p'atyenanet ñamet ñeñt' ama't mamesha ama pocteye' enteno Yompör.

² Ama't ñeñt' e'ñe errte' name'ñenaya ñerra'm esesha' o'ch orrtatanet attoch o'ch atet p'atachet ñeñt' ama pocteye' enteno Yompör, ñeñt'ña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt' atarr huomenc. Ama't ñocoppa' ama tama yoroçhenayayñe ñerra'm ama atet p'atenana' po'psheñeñ, e'ñech allorocma çharachetañ mapue' añecmuen pa'çhnoço allpon ñerra'm puetse'tamets o'ch huapore'chet oño epo allcha' ño'shach mapue'.

³ Ñeñto'marña sapa' e'ñech seño'ta, amach sorrtatatsto attoch sa'shoratach po'psheñeñ ama't erra'tsena.

'Elloña napa' o'ch alla noterrser, ñerra'm esempo samo'ts erro't p'onas sa ñeñt' ama pocteye' enteno Yompör, socoppa' añ poctetsa o'ch soctape'chater e'ñe cohuen o'ch p'oter ñeñt' atet o' p'ohuona'ppa' ama't mameshapa' ama pocteye' enteñe Yompör. Allochñapa' ñerra'm o'ch alla cotape'cherran cohuen Yomporecop, sañapa' añ poctetsa o'ch alla e'ñe cohuen sepretner.

⁴ Ama'tcha' atonoche'tats atet penset, ama'tcha' pam'tarrpa' cançhroche'tatscha' atet penset ñerra'm o'ch alla llequërrana ñeñt' atet pennaset, ñerra'm ama't pam'tarr cançhroche'tats o'ch alla oterrsset: "Napa' o' atet nepona'p ñeñt' ama pocteyaye tarraña te'ña ellopa' amach alla atet neperre'te", socoppa'cho'ña aña e'ñe poctetsa o'ch alla e'ñe cohuen sepretner ñeñt' atet sepene'.

E'ñe yeyemteño't Jesús ñeñt' ahuamencat' yepene' attoch es yorrtatyen ñocop

⁵ Allempo atet otarettenet aña puellsensarnesha'ñapa' atet ochet Po'partsesharet Jesús:

—Elloña yapa' ahuamencatcha' pe'pa'y allochñapa' e'ñech cohuen yeyemter'pa'.

⁶ Partsesha'ñapa' alla oterraneterr:

—Ñerra'm po'ñoch e'ñe na seyemtenañ napa' e'ñeca'ye na'pochtatenña neñoñ ñeñt atet notenes, ama'tcha' allponatolloña seyemtenna ñerra'mrrate' mosta-zllometoll, sañapa' ama't erra'tsena senamuennenña ama't ñeñt atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot añ tsachecop sicómo'rech: “Bera'nmuepa'ch arroñ all ten, arropa'chña tomhuerrerr a'yo sa'po”, tsachñapa' atetcha'cho'ña pañ e'ñe atet soteñ.

Atto atma'ntatarettena ataruasañpa' añ poctetsa ñocop e'ñech etsotenan ñeñt atet muenateñ pamo'mte'

⁷ Ellopa' alla toma'ntaterraneterr, ñeñtpa' atet oterraneterr:

—Ñerra'm eseshas echene' sa'taruasañer, ñato' ñapa' ellapene'tcha' llampue' sechamuellen amapa' ñato' ellapene'tcha' cohuanmpene' sayara'chno eller-ronetña allempoch huerra po'taruasotpa' sañapa' ama't puesheñarrotesapa' amach sotapuerena señañra: “Te'pa' o'ch pebe'tosuerr o'ch yerrallme'chnen parro.”

⁸ Elloña ñeñtpa' o'chcho' alla sotapuererr: “Te'ñapa' o'ch peptare'tuerren ñeñtcha' nerra'nen, alloñapa' o'ch pa'cohuetuerr peshtam attoch e'ñe cohuen pesherba'huerren cho'pcha'ña naphuerre' nerrar ñeñtcha' nerra'nen. O'chña nerruanen napa' allempoñapa' cho'pcha'ña rrallme'chnets paña.”

⁹ Ama'tña sapa' atetca'ye sepene. Ñaña sa'taruasañer ñerra'm esempoch e'nuan ora po'taruas ñeñt seyecheña, sañapa' ama't puesheñarrotesapa' amach sotereña: “Parasyos o' pe'nuon netaruas.” Ama't ama atarr socshateñe ñeñtpa' e'ñe pocte' ñocop tarro'mar ñapa' allpona o' e'nua ñeñt allpon seyecheña.

¹⁰ Sapa'cho'ña Yompor pa'taruasañer sepene'. Ñaña ama't allempoch setsotuen ora allohuen ñeñt atet otenes Yompor atterepa'chña sentena ama atarr atonaye' sesherbeno. Aña setsoten ñeñt e'ñe poctetsa allohuen añecop ñeñt pa'taruasañer pen Yompor.

Atto Jesús pa' e'ñe po'ñoñoña a'crratyesapan aptsarñaite'chno ñeñt charrasheña

¹¹ Allempo sechena Jesús Jerusaléno arr oñem allohua temuena Samaria epuet Galilea.

¹² Allempoñapa' chap paterr anetso. Allñapa' hua'cha'toña charrasheña ñeñt osyen puetsarñats ñeñt otenet lepra. Ñeñtña aptsarñaite'chno a'yota tom'cha'tyesoset.

¹³ Ñetñapa' alloñña rranare'tyesosetpa' atet ochet Jesús:

—Maestro Jesúsocha' pemueraye'chosya yaña.

¹⁴ Jesúsñapa' allenta cohuosanetpa' atet otosanet:

—Te'pa' o'ch ahues o'ch segatyena' sañeña judionesha' po'cornanesharesho attoch ñetpa' o'ch eñotaset te'pa' o' socrrerra.

Atet otanet Jesús, ñetña ahuanmatsetpa' e'ñe allorocma acrra'yueserrochet.

¹⁵ Puesheñarrña allempo eñota o' correrrapa' alla puetallerrapa' o' alla ahuerr Jesúseshoneñ atarr nanac pocsheñesha' aye'cho'chtatnerran Yompor.

¹⁶ E'ñe pueparasyoso'teñesha' rromosa Jesús pa'rrpōt. Ñehua, ñeñt atet patsapa' ñeñtpa' ñeñtña samario'marnesha'.

¹⁷ Allempoña Jesús pa' atet otan acheñenesha' ñeñt allo'tsa'yen:

—Ama't charrasheña ñeñt o' na'crratyesua te'. ¿Po'potantañña esconsheñapa'? Ñetñapa' ama es yerpa'pesnomayeña attoch aye'cho'chtatoñet Yompor.

18 E'ñe puesheñarraña ñeñt puerrerrtsa attoch atarr aye'chochtatan Yompor ama't ñapa' ama judioneshayaye.

19 Allempoña Jesús'pa' atet otan ñeñt a'crraterr:

—Te'ñapa' o'ch petanterra, e'ñech cohuen peserr tarro'mar p'apa' e'ñe peyemteñoñen na o' p'ocrrerra.

Atto fariseonesha'pa' a'p'to'chet Jesús: ¿Esempo'tcha' orrterraña Yompor po'cohuenña allempoch atarr añcha'tareterra ña?

(Mt. 24.23-28, 36-41)

20 Parrochña fariseonesha'pa' a'p'to'chet Jesús:

—¿Esempo'tcha' orrterraña Yompor po'cohuenña allempoch atarr añcha'tareterra ña?

Jesús'ñapa' atet otanet:

—Yompor po'cohuenña atto ayochreshattena ñapa' ñeñt'pa' ama atteyaye ñerra'mrrate' ñeñt es yentyen yecloyot.

21 Ñeñto'marña amach erroñenoñ oteto: “Arrca'yeña añcha'tarettenaña Yompor”, amapa' “Tarroca'yeña añcha'tarettenaña Yompor.” Tarro'mar Yompor po'cohuenña ñeñt atto ayochreshattena ñapa' ñeñt'pa' o'ca'ye moñetnoma orrtatsa e'ñe sesho ama't seyoçhro.

22 Elloña ñapa' atet oterranerr pueyochresha':

—Cherrcha' esempohuañen allempoch atarr se'nerren atarrcha' semnerren Ñeñten Acheñetostse't o'ch norrterrnsa ama't e'ñe pamtarra. Tarraña ama't e'ñe allempa amach senterrno.

23 Saña allempopa' atet'cha' otasetañ: “Te'pa' o' orrterraña Cristo allo'tsenca'ye”, amapa' “Tarro'tsenca'yeña Cristo.” Saña'pa' amach setatstoña all, amach soçtatscheña ñeñt sets all.

24 Tarro'mar ñerra'm esempo çherr allempoch nohuerra na Ñeñten Acheñetosets e'ñe allohuen acheñenesha'pa' e'ñech entuapuerrnet tarro'mar allempopa' atet'cha' perra ñerra'mrrate' meratste', o'ch meratsta huomencpa' e'ñech a'puetaresuan ora enet erraparen.

25 Ñehua, na te' ñeñt atet anaret nocop ñanompa' atarrcha' na'mueroçhtatareña, ama't namo'tsesha' ñeñt corretsa te'pa' amach eseshaye' naguënaye.

26 Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't ahuañ allempo corre't Noé.

27 Allempopa' ama es puecha'yeneto aña e'ñe coñape'chete't atto atarr pa'namen muenenet ñeñt'cha' rra'yenet, orrare'tyesete't, sena'tanatyena yacmaneshaçhno, coyaneshaçhnopa'cho'ña apanatyesete't ñeñt yoranatyehahuete't. Ñet'ña'pa' ñeñta e'ñe cohuen entete't. Atte'ña'pa' çhap allempo be'tosos Noé po'huarcopahuo. Allempo'ña'pa' huata, cho'pa oñ erracmañen, e'ñe a'cclatuan allohuen acheñenesha' erraparen.

28 Attecmach perreterr allempo corre't Lot, aña e'ñe coñape'chyerreterr shonte' rrallme'chyesete't ñaña shonte' orrare'tyesete't, atarr es raña'yese't, ñaña pomatsre'tyesete't. Shonte' esocmañen ñeñt pa'namen nare'tyesete't, tomatyesete't ñaña shonte' pocollaçhno. Ñet'ña'pa' e'ñe ñeñta cohuen entete't.

29 Atte'ña'pa' çhap allempo cha'nom Lot ñeñt anetsroñ. E'ñe ñeñte yetrocma allempo cha'nom Lot allot, Yomporña pue'ntañoñ a'shoranet tso' ñeñt she-mashrepñeño' huorten, ñeñt'ña e'ñe a'cclatuerrahueter allempo.

30 Attecmach perreterr allempoch norretuerra na Ñeñten Acheñetosets.

³¹ 'Tarraña allempoch norrterra na sapa' arepa'chña aña soctape'cheno ñeñt patso'marecpa, atet ñerra'mrrate' puesheñarr ñato' a'yote'tsenach pa'pacloŧ arepa'chña be'ŧosatsterro ama't e'ñe mamesha pa'paclo attoch yoratsre'tnoma. Amapa' ñerra'm puesheñarr pa'mro'tsenpa' arepa'chña onatsterro.

³² Seyerpuepa'chña atet pa' ahuaŧ Lot puetapor ñeñt atarr morrentnomaya ñeñt patso'marecpa.

³³ Ñaña ñerra'm esesha' e'ñe aña e'nenet o'ch correna atomat attoch e'ñe coshenet arr patsro, ñetña'pa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet ñeñt atet muenenet ñeñt e'ñe ñocpueta arr patsro ñeñtña acheñerpa' corretsach pocsheñeshocmañen e'ñe ŧayoŧeñ errponañohuen.

³⁴ 'Po'ñoçhca'ye o'ch notas atetcha'ca'ye perra allempoch nohuerra, puesheña'tetspa' anmare'tterretcha'; ama't ñeñt e'ñe pamo'ts pene', ñeñtña'pa' allach asa'nmare'tterra. Atet ñerra'm tsapo all manrrenet epsheño'maret, puesheñarrpa' anmare'tterrach, po'psheñeñña'pa' allach asa'nmare'tterra.

³⁵ Amapa' ñato' allempopa' allo'tsencha' epsheña coyanesha' ñeñt parro puetse'tets mapyo ñeñt'pa'cho'ña puesheñarrpa' anmare'tterrach ñaña po'psheñeñña'pa' allach asa'nmare'tterra.

³⁶ Amapa' ñato' allempopa' allo'tsencha' ñaña epsheña ñeñt e'ñe parro taruasenet pa'mro. Puesheñarrña'pa' anmare'tterrach, po'psheñeñña'pa' allach asa'nmare'tterra.

³⁷ Allempoña pueyochresha'pa' a'pŧo'chet, atet ochet:

—Partseshacha' ñeñt'pa' ¿erra'tcha'ña atet perra?

Jesúsña'pa' atet otanet toma'nteñtso:

—Ñerra'm erro'tsencha' ñeñt rromue'pa' allcha'ña shontaña tse'm.

18

Atto atma'ntatare'ttena rretorrnanasha' ñeñt çhocma enamare'tene' juez attoch yenpue'

¹ Allempoña Jesús'pa' alla serrpare'taterraneterr toma'nteñtso attoch eñochet ñeñt poctetsa yocop çhocmach yema'yochena amach yemuenme'chatsche ma'yochatsa.

² Ñeñto'marña allempopa' atet otanet:

—Paterr anetso allo'tsen puesheñarr juez ñeñt po'taruas pene' o'ch e'ñe cohuen a'poctatan ñoñets acheñeneshap cop ñerra'm esempo e'moñe'tannenet. Tarraña ñeñtña juezpa' atarr atsrre'mñaŧ. Ama't Yomporpa' ama añcha'na'tpahuoye' enteñe ama't e'ñe mamesha. Acheñenesha'pa'cho'ña ama't puesheñarrapa' ama acua'penaye' entenaneto.

³ Ñeñtña anetsropa' all yeçhena ñaña puesheñarr rretorrnanasha'. Ñaña'pa' eñall po'psheñeñ ñeñt e'moñe'tene', çhocmach erroŧ peññañ ñeñt ama pocteyaye. Rretorrnanasha'ña'pa' çhocmach sene't juezesho. Allcha' çhocma atet otare'tenan juez: "Te'pa' nemneñ o'ch e'ñe cohuen peyenpa'n attoch pa'poctaton cohuen ñoñets añecop ñeñt ne'moñe'tene'."

⁴ Juezña'pa' ama't allponmat ama mueno o'ch yenpue'. Tarraña rretorrnanasha' ñapa' çhocmach sen juezesho enamare'tene' attoch a'poctatoñ ñoñets añecop ñeñt e'moñe'tene'. Atteña'pa' çhap allempo cotape'ch juezpa' atet ot: "Napa' po'ñoçh ama't Parets ama nemcha'teñe; acheñenesha'pa'cho'ña ama't mameshapa' ama acua'penaye' nentaneto.

⁵ Tarraña añ rretorranesharpa' atarr atsrre'moçhtana'tenen, epaye' hua-pame'tennana, o'ca'ye atarr a'mñechna. Ñeñto'marña te'pa' o'ch neyenpue' allochñapa' amach alla huerrnane'te."

⁶ Allempoña Jesúsapa' atet oterrerr:

—Ama't se'mueñeña ñeñt atet oten juez ñeñt atarr atsrre'mñañ. Te'pa' oten ahuo'ch a'pocatan rretorraneshacop ama't ñapa' ñeñt acheñer ñeñt atarr atsrre'mñañ.

⁷⁻⁸ Ñeñto'marña te'pa' o'ch noterrser: Yomporpa' elloña nanaccha' cohuen a'pocatonay ñeñtey o' acrerrey ya ñeñteycha' e'ñe puechemer pen ñerra'm yapa' çhocmach yeçhore'teñ ama't ye'to ama't ñaña tsapo. Napa' po'ñoçh o'ch notas, Yomporñaapa' amach atomato, çhoch ye'mñote'; ñapa' e'ñechna'ye allorocma e'mñotey o'ch e'ñe cohuen a'pocatonay ñeñt yocop. Tarraña te'pa' o'ch notas, ñerra'm esempoch nehuerra Ñeñten Acheñetosets, errpon-sheña'te'ña nentuerrña arr patsro ñeñt e'ñe cohuen name'ñenaya.

Atet ma'yochena fariseonesha' ñeñt e'ñe cohuen entetsa, all ma'yocha ñaña po'psheñeñ e'ñe puellquëñsha' ñeñt atarr ochñañ entetsa

⁹ Po'pocheñoña Jesúsapa' atet serrpare'tatan allpon acheñenesha' ñeñt e'ñe ñeta yemtetset tarro'mar ñetpa' e'ñe cohuen entyenet e'ñe ñañeñeta. Ñetñaapa' ama't mameshapa' ama cohuenaye' enteñetoña po'potantañ acheñenesha'. Ñeñto'marña Jesúsapa' alla toma'ntatanet, ñeñtapa' atet otanet:

¹⁰ —Eñall epsheña acheñ ñeñt sets Parets pa'paclo allcha' ma'yochoset. Puesheñarr ñeñtapa' fariseo ñeñt e'ñe ñañeña cohuen entetsa; po'psheñeññaapa' ñeñt puehquëño'te'na cobra'yenan acheñenesha' quelle ñeñt gobiernocop.

¹¹ Ñeñtña fariseopa' tomos all ma'yochosañ, ñeñtapa' atet otos: “Nompore, napa' o'ch neparasyoso'tosep tarro'mar napa' atarr cohuen acheñren, napa' ama atteyayno Nompore ñerra'm po'potantañ acheñenesha'. Ñetpa' atarr es puerratañpsanna'tyenet, ama pocteye' es panna'tyeneto, atarrcha' cheta'yeñet coyaneshachno ñeñt ama puetaporeyaye. Napa' ama atteye' Nompore nepeno. Napa' ama neshcare'teno atet pena añ acheñer ñeñt puehquëño'te'na cobra'yene' acheñenesha' quelle gobiernocop.

¹² Napa' pate'tets semanapa' epochcha' ne'tore'tena Nompore pocop, ñaña ama't ora ñeñt allpon naguën çhocma napuenep allpon poctetsa pocop ama't nediezmo Nompore.” Allohua huañ atet ma'yochena fariseo.

¹³ Po'psheñeñña ñeñt cobrets quelle ñañaapa' alla tomos a'yot. Ñapa' eñotena atarr ochñañ ñeñto'marña ñapa' ama cohuoso enonet Yomporeshonet. Ña puellquëño'tpa' nosan pot puesomapo. Ña puema'yocheno't atet otos: “Nompore, te'pa' o'ch pemorrenterrna attoch e'ñe pe'pretna'huerrnan allohuen no'chñar tarro'mar napa' atarrca'ye ochñañen.”

¹⁴ Jesúsñaapa' atet oterranneterr:

—Napa' o'ch notas, ñeñtña atet a'metene' po'chñar ñeñtña acheñerpa' e'ñe pocte' enteñ Yompor. Ñeñto'marña allempo ma'yochuapa' o' ahuerr pa'paclo e'ñe cohuen ap'retna'huare'terra po'chñar. Po'psheñeñña fariseo ñeñt ama a'metosaye po'chñar, Yomporñaapa' arepa'tcha' pocteye' eñche. Tarro'mar allohuen ñeñt e'ñe cohuen entetsa e'ñe pommo'cheño't ñeñtña tsapa'tonetpa' amach esoshe'maye' entereto. Tarraña allohuen ñeñt ama esoshe'maye' entetso te', ñeñtña tsapa'tonetpa' atarrcha' cohuen enteret.

Atto Jesúsapa' bensare'tañpsapan cheshaneshha' ñeñt huapatoñet (Mt. 19.13-15; Mr. 10.13-16)

15 Ñaña allempopa' shonte' hua'cha'tachet cheshatollesha' Jesúsesho. Ñetpa' añecopña hua'cha'tachet o'ch a'p'lla'yesapanet Jesús attoch bensare'tam'psapanet. Jesúsña pueyochresha' allempo entapan ñeñ hua'cha'tate' cheshaneshachno, ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataretapueto.

16 Tarraña Jesúsñapa' allenta chore'tapanet, atet otapanet:

—Pocte'ña'cho' semnachñaca'yeña cheshanesho' onosetepa' e'ñe nesho. Amachca'ye cha sepatare'tatstapaneto tarro'mar allohuen ñeñt atarr neyemtenaya na e'ñe atet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochreshattena ña pue'ntañot.

17 Po'ño'chpa' o'ch notas, ñerra'm esesha' ama e'ñeye' pueyemteño'feye' aguëññañeto Yompor po'cohuenña amach atet perreto ñerra'm cheshatoll e'ñech yemtenana ñeñt cohuan'pene', ñetñapa' amach pueyochreshaye' per-raneto Yompor atto atarr ayochreshattena ña.

Atto puesheñarr ñeñt hupueshameñ ñeñt atarr eçllayoret ñañapa' eñorana'tosana Jesús

(Mt. 19.16-30; Mr. 10.17-31)

18 Po'pocheñoña puesheñarr ñeñt atarr añcha'taretetsa a'p'to'tosan Jesús, atet otos:

—Maestro, papa' atarr cohuen acheñre'p, te'pa' o'ch potapuen çerrofena'tcha' ne'paña na e'ñe cohuen attochña napa' corretsanach e'ñe tayoteñ ama't errponañohuen?

19 Jesúsñapa' atet ota'p:

—Eso'mare't potenenña napa' atarro' cohuen acheñren. Arr arromñatenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñapñaña Yompor ñeñt e'ñe po'ño'ch cohuen.

20 Papa' e'ñe peñotuen Yompor po'ño'ñ all otene' ñeñt'cha' atet yepena e'ñe cohuen; ñeñt'pa' atet otene': "Amach yechtapretyesatsto taporets; amach yemtsanna'tatsto; amach yetyesatsto; amach yetoma'tam'psatsche yamo'ts e'ñe atta; ñaña yemorrenteño'tpa' yem'cha'na'chcha' yompor ñaña yachor."

21 Ñeñtña a'p'to'tene'pa' atet otererr:

—Napa' e'ñeca'ye cheshoteñ ora añe'chnopa' e'ñeca'ye netsotueñ.

22 O'ña atet otua Jesúsñapa' alla otererr:

—Eñallmeñca'ye paterr ñeñt pepalltena ñeñt ama atteye' pepena'. Te'pa' añcha'ña atet pe'pa o'ch e'ñe pepomhuerr ora allpon ñeñt pechyen o'ch papa'yera' huocchañneshachno ñeñt atarr es pallta'yetsa attochña papa' pecherrcha' ñeñt atarr nanac sherbets Yompor pue'ntañot. Allempochña pehuerrapa' o'ch pocterren attoch e'ñe neyochresha' neperre'p e'ñe poctacma.

23 O'ña e'mhuan ñeñt atet och Jesús'pa' ñañapa' cha atarr lleca tarro'mar ñapa' atarr eçllayoret, shonte' pa'namen echyen.

24 Jesúsña eñch ñeñt atet atarr llecapa' ñañapa' puellcapreteño'tpa' atet ot:

—Ñeñt atarr eçllayoret'pa' atarr nanac echarr attoch agapoñet Yompor po'cohuenña ñeñt atto ayochreshattena ña.

25 Ñehua, ñeñt'pa' atet'cha' netma'ntacha. Po'ño'ch yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añetollponatollo atet ñerra'mrrate' acosh puetatollo. Ñeñt'pa' atetca'ye penaña acheñ ñeñt eçllayoret ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto

* 18:25 Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

o'ch sehuanmuet ñeñt atarr morrentenet ñet attoch pueyochresha' perranetañ Yompör).

²⁶ Ñeñña e' muene' atet oten Jesús ñetña' atet ochet:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteñca'ye huaquëshpa' amaca'ye esho'tenoña acshequeto.

²⁷ Jesúsña' atet oterraneterr:

—Sa arromñañeneshaspa' amach es errotenaye' apen senteno. Tarraña Yompörpa' ama eñalle ñocöp ñeñt atarr torrapo' enten.

²⁸ Pedroña' atet och:

—Partseshacha' po'ñoçh yapa' o' e'ñe yesuanom ora allohuen ama't yepaclohuen attoch e'ñe yoc'terreḡ.

²⁹ Jesúsña' alla oterraneterr:

—Po'ñoçhpa' o'ch notas, allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ñato' puetapor, pa'mo'nasheñnesha' ñato' pompor, pachor, ñato' ama't ñaña puechemerasha' attoch e'ñe cohuen sherbaterrñañet Yompör po'cohuenña atto ayochreshattena ña,

³⁰ ama't erra'tsencha' ñeñtcha' sohuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen ama't te' allempo e'ñe correnet, elloña tsapa'toneñña' o'ch aguërret ñeñt alloch ñetpa' corretsetach beñecpuen.

Allempo Jesús'pa' alla eñotaterraneterr ñapa' çhocmach amsaretterra (Mt. 20.17-19; Mr. 10.32-34)

³¹ Ñeñt pueyochresha' ñeñt çharra' puechena epsheña, Jesúsña' ahuanmanet ellonet, allña' atet otosonet:

—Te' po'ñoçhpa' o'ch ahueney Jerusaléno. All ora allpon quellca'yesone't ñeñt a'mta'yesaye't Yompör po'ñoñ ahua't ñeñtcha' atet na'paretterra na Ñeñtencha' Acheñetosets, te'ña'pa' o'ch e'ñe etsotuerra ñeñt atet anaret nocöp.

³² Tarro'mar te'pa' pomuerrnetcha' po'poñ acheñesho ñeñt ama judioneshayaye. Allohuen acheñenesha'pa' o'ch achmãare'ternnet, o'ch at-serrpãtse'ternnet, pue'moñe'teñoñetanpa' o'ch a'coshare'ternnet.

³³ O'ch nashtaretterra, attotcha'ña muetserrnet. Tarraña poma'pamtañoña'pa' o'ch alla netanterra.

³⁴ Ama't atet otuanet, ñetña'pa' ama eseshaye' eñotaye ñeñt atet serrpare'tatanet. Ama't puesheñarroñetapa' ama't mameshapa' ama çhapanetoña pueyochreto ñeñt atet otenanet.

Atto Jesús'pa' cohuaterran puesheñarr aporo'yet ñeñt jericó'marnesha' (Mt. 20.29-34; Mr. 10.46-52)

³⁵ All oñenet o'ña çhãpochet anetso Jericópa' allña e'ñe toñetopño'pa' all anen puesheñarr aporo'yet ñeñt çhocma enamuetts quelle.

³⁶ Ñeñña aporo'yetpa' o' e'mapan shonte' acheñenesha' ñeñt metaçhets all toño, ñaña'pa' allenta a'ḡto'tanet:

—¿Eso'mare't shonte' metaçhenña acheñenesha'?

³⁷ Ñetña'pa' atet ochet:

—Añca'ye huetsa Jesús ñeñt nazareto'marnesha'.

³⁸ Ñaña'pa' allenta rrana huomencpa' atet otapan Jesús:

—Pemueraye'chnomna Jesúsocha' naña. Papa' ñeñteḡ Davidna'tareḡ.

³⁹ Acheñenesha' ñeñt otachetsa ñetña'pa' çha muene' che'ptare'tnomet, atet otoset:

—O'hua pemma.

Aporo'yetñapa' elloña alla rranerrerr atet oterranerr Jesús:

—Ñeñteḡ Davidna'tareḡ, pemueraye'chnomnañaca'ye.

⁴⁰ Allempoña Jesús alla tomos otosan acheñenesha':

—Sanmon arr nesho.

O' huapapa' Jesúsñapa' atet otaḡ:

⁴¹ —¿Eso'tña penmen ñeñtcha' atet neḡoseḡ?

Ñañaapa' atet och:

—Añca'ye Ayochreshate nemnen o'ch pecuatnomuen attoch o'ch cohuen nenterrapa.

⁴² Jesúsñapa' alla otererr:

—Pecuerrepa'ch, tarro'mar atto atarr peyemtapna na ñeñtca'yeña o' e'ñe a'crraterreḡ.

⁴³ E'ñepa'tcha' allorocma e'ñe cohuen enterra. E'ñe cohuerrtsapa' cha coḡa'nmue' ñaña Jesús, allenta atarr aye'chochtatnoman Yompor all coḡa'nenan Jesús. Atto' enteñ allohuen acheñenesha' ñetpa'cho'ña e'ñe cohuen aye'chochtatneññañet Yompor.

19

Atto Jesús epuet ñaña Zaqueo eñorana'tannenet

¹ Allempoña Jesúsapa' chap all anetso Jericó, all oñmos anetso'mar.

² Allñaapa' allo'tsen puesheñarr yacma ñeñt sochetsa Zaqueo ñeñt pa'mcha'tareter peñ allohuen ñeñt cobra'yene' acheñenesha' quelle gobiernocop. Ñañaapa' atarr ecñlayoret.

³ Zaqueoñapa' atarr mueneñ o'ch entapan ñeñt otenet Jesús. Ñehua, ñapa' amach errotenoḡ entapano Jesús tarro'mar shonte' acheñ ñeñt emchorra'nenaya all oñen ñaña Zaqueopa' allponmetolla.

⁴ Ñeñto'marña ñapa' mata allenetcha' oñem, a'tapos tsacho ñeñt pa'so'cheñ sicómo'rech allotcha' entapan Jesús tarro'mar allcha' oñem.

⁵ Allempoña chap Jesús e'ñe ñesho, cohuostsa enonetpa' alla entos, ñañaapa' atet otos:

—Zaqueo, pesuerra tecma. Te' napa' e'ñe poctennana o'ch nechap pepacillo.

⁶ Ñañaapa' allenta sohuerra tecma e'ñe pocsheñesha' agapaḡ.

⁷ Allempoña acheñenesha' atet eñchet, ñetñaapa' ama't mameshapa' ama pocteye' es entaye. Ñetpa' atet otanna'tyeset:

—Eso'marcha'ca'yeña be'tososña Jesús allcha' mos añ acheñer pa'pacillo ñeñt atarr nanac ochñañ.

⁸ Zaqueoñapa' allenta tomhuerrpa' atet otapan Partsesha':

—Te'pa' o'ch pe'mñotosen Ayochreshate. Ñeñt ora allpon nechyen, te'ñapa' o'ch napa'yer pueshmet huocchañnesha'chno. Po'ñoch allempo es neprratañpesyese't puesheña'tetspa' te'ñapa' pa'tatsoche'tatscha' napuerañet.

⁹ Jesúsñapa' atet otos:

—Te'ñapa' o' chapanet allohuenacop ñeñt yeçhetsa añ pocollro alloch a'queshḡataretterret. Ama't ñapa'cho'ña Abrahamca'ye po'mreñeñ.

¹⁰ Na Ñeñten Acheñetosets ñeñto'marña nohuapa añe patsro o'ch ne'nyesos acheñenesha' ñeñt chenquetsa ñeñtcha'ña na'queshḡatyesos.

Arrpa' all atma'ntatarettena çharrasheña ñeñt aparettatsa quelle e'ñe allponeshapa'ttsoçma

¹¹ Acheñenesha' o' e'mñotenet shonte' ñeñt atet serrpare'tatanet Jesús ñeñt atet pena Yompor po'cohuenña, ñaña Jesúsapa' o' chapmoch Jerusaléño.

Ñeñto'marña ñetñapa' cha otenapuetañ allempocmach etsota allempopa' ñach amcha'tarettatsa Yomporeshot arr patsro. Ñeñto'marña elloña ñapa' toma'ntatanet po'poñ.

12 Ñeñtpa' atet otanet:

—Eñall puesheñarr acheñ ñeñt e'ñe cohuen amcha'na'tpo' entyen allohuen acheñenesha' ama't e'ñe pamo'tseshohuen. Ñeñña acheñerpa' arr sechena ñachayo po'poñ anetso allotcha' apet llesens attoch esempoch huerrapa' o'ch amcha'taretetuerra all pa'nyo.

13 Allempo ama sena'pa' agotatnoman çharrasheña pa'taruasañer ñeñtcha' apa'yesnom allponeshapa'tets quelle e'ñe puesheña'ttsocmuet. Allempo apa'yesnomanetpa' atet otyesnomanet: “Añ quellepa' o'ch setaruasach nocop. EsemPOCH nehuerrapa' allempochña e'ñe neñotuerrnas e'ñe puesheña'ttsos errponte' quelle segana'yesa ñeñt nocop.”

14 Tarraña patantarr acheñenesha' ñeñt pa'nyo'marnesha', ñetñapa' atarr e'moñe'teñet. Ñeñto'mar allempo ta ñeñt anetsro, ñetñapa' mueñet allponsheña ñeñtcha' eñososets all sen o'ch oteñeta' allo'marnesha': “Yapa' ama yemno o'ch sene' añ acheñer o'ch amcha'taretta yocop.”

15 Tarraña ama't atet petañ ñocopñapa' çhocmach apet llesens attoch huerra o'ch amcha'taretetuerra all pa'nyo pamo'tseshacop. Allempoña çherrpa' agotatuerran pa'taruasañrenesha' ñeñt apa'yesnom quelle ahuaña. Ñapa' añecopña agotatyessuerranet o'ch eñotuerranet errponte' quelle ganatyessñañet po'çllayor e'ñe puesheña'ttset.

16 Attoña apcha'huerranet ñeshopa' ñeñt ñanom huapatsapa' atet otos: “Ayochreshate, ñeñt allpon ñapa'nmuen ahuaña quelle, nañapa' ello neganater- rnaperr peçllayor çharroch.”

17 Pamo'mte'ñapa' atet otuer: “E'ñe pocte', ñapa' atarr cohuen pesherenen. Ama't allponatolla napa'nmañ ahuaña, ñapa' atarr cohuen pesherbaton. Ñeñto'marña te'pa' o'ch nenuerreñ çharracop anets allcha' pa'mcha'taretterra ña.”

18 Allempoñapa' o' huapa ñaña po'psheñeñ pa'taruasañerpa' ñapa'cho'ña atet otos: “Ayochreshate, na ñeñt allpon ñapa'nmuen ahuaña quelle, nañapa' ello neganater- rnaperr peçllayor anmaroch.”

19 Pamo'mte'ñapa' atet otuer: “E'ñe pocte', te'pa' o'ch nenuerreñ ñaña amnarecop anets allcha' ña'mcha'taretterra ñaña.”

20 Allempoñapa' huapa po'psheñeñ pa'taruasañer, ñapa'cho'ña atet otos: “Ayochreshate, arrpa' ñeñta allponara ñeñt e'ñe allpona ñapa'nmuen ahuaña quelle. Napa' alla nañño'tennañ e'ñe cohuen nepennañ pañello.

21 Napa' cha nemcha'teneñ tarro'mar neñoteneñ ñapa' amaca'ye matsrre'mñañe. Papa' çhocmaca'ye pepratanñesyen ama't ñeñtpa' ama ñoyaye, ñaña çhocmaca'ye petotatyenneña ñeñt ama ñaye' nare'tatyenaye.”

22 Pamo'mte'ñapa' atet otuer: “Paña po'ñoçhpa' amaca'ye cohuenaye' pesherbenno ama't e'ñe mamesha. E'ñe atet ñotenen napa' atarro' atsrre'mñañen te'ñapa' po'ñoçh atetcha'ca'ye natsrre'moçhtana'tuerreñcha'. Ñerra'm po'ñoçh peñotennoñ napa' atarr atsrre'mñañeneñ, ñerra'm po'ñoçh çhocma nepratanñesyeneñ ñeñt ama noyaye, ñaña napa' ñerra'm po'ñoçh çhocma neñotatyeneñ ñeñt ama naye' nare'tatyenaye,

23 ñerra'm po'ñoçh atet pentennoñpa', eso'maruaña'yeña ama bancoye' penennanoña neçllayor allochñapa' te'ña o' nehuerrapa' nagapuerreñcha' neçllayor allo atontateñet.”

24 Allempoña pamo'mte'pa' atet otan ñeñt tomcha'tyets all: "Te'pa' o'ch seprratam'pesuer quelle, o'ch sapuer ñeñt ganatene' charroch neçllayor."

25 Ñetñapa' atet ochet: "Ayochreshate, ñapa' echenanca'yeña shonte' quelle ñeñt ganena charroch."

26 Pamo'mte'ñapa' atet otarraneterr: "Tarraña ama't atteñpa' te'pa' o'ch notas, ñeñt es echets shonte' e'ñe puesherbateño'fet pamo'mte' ñetña ellonetpa' o'ch alla aparetterret po'poñ aton. Tarraña ñeñt ama es echetsopa' ama't allponatolla ñeñt echyenetañ aprratam'psaretterretcha'.

27 Ñaña te'pa' añña ñeñt ne'moñe'tene' ñeñt ama muenenaye o'ch na'mcha'tare'ta ñocpuet, te'ña sapa' o'ch sehuapatamet attoch semtsanatosanet e'ñe arr nesho."

Allempo chap Jesús Jerusaléño

(Mt. 21.1-11; Mr. 11.1-11; Jn. 12.12-19)

28 Allempoñapa' ahuererr Jesús Jerusaléñonet.

29 Chapmochet aspeno ñeñt pa'so'cheñ Olivopen allo'tsen anets ñeñt Betfagé ñaña Betania. O' chapmochet all Jesúsñapa'

30 atet otosan epsheña pueyochresha':

—Sapa' o'ch sota o'ch sechap a'yente'ye' e'ñe allara anetso. O'ch sechap allpa' allcha' sentos ashen rre'ptor all huanquëñet; ñeñtpa' ama't puesheñarra acheñ ama monteña'. Ñeñtña ashenpa' o'ch sepyam'psospa' o'ch sanerrnan arr.

31 Ñerra'm esesha'ch sotapue': "¿Eso'mare't sepyam'peñña ashen?" sañapa' atetcha' sotosanet: "Yepartsesharca'ye muenene'ña añ ashen."

32 Allempoña ñeñt mueñapa' ñetñapa' ahuanmuet all anetso. Allñapa' atetcho' entoset e'ñe atet otanet Jesús, allo'tsenca'ye ashen rre'ptor all huanquëñet.

33 Allempo pueyam'psosetpa' pamo'mte'ñapa' atet otapanet:

—¿Eso'mare'tcha'ña sepyam'psosnayña yashanor?

34 Ñetñapa' atet otosñañetña ashen pamo'mte':

—Yepartsesharca'ye muenene'ña añ ashen.

35 Allempoñapa' anerretña ashen Jesúsesho. Nohuerret pa'shtam ash-nache'ñopa' montatueret Jesús.

36 Allempo monta'nma Jesús allenet sen, acheñenesha'ñapa' totma'tyesoñet pa'shtam foño allcha' oñem.

37 Atteñapa' o' chapmochet Jerusaléño. Allempo a'nososet Olivo'pnot shonte' acheñenesha' ñeñt ame'ñenaya Jesús'pa' ñetñapa' alloteñ e'ñe cosha'rrtoset. E'ñe pocsheñesha' ahuanenet, pano'tatse'teñesha' aye'choçhtatneññañet Yompor, tarro'mar atarr cohuen entnenet atto Jesús'pa' atarr orrtatenanet Pompor po'partsoña.

38 Ñetñapa' atet otyesnenet:

—¡Aye'choçhtaterrapo'ch Ancha'taret Jesús ñeñt llesensen Yompor! ¡Cosh-erretepa'ch ama't ñeñt pue'ntaño'tsen! ¡Aye'choçhtaterrapo'ch ñaña Yompor Parets ñeñt pue'ntaño'tsen!

39 Fariseonesha'ña puesheña'tets ñeñt allo'tsa'yen ñeñt ama ame'ñenaye Jesús, ñetñapa' atet otapet Jesús:

—Maestro, peche'ptare'taye'chyesnomñaca'yeña peyochresha'chno attoch amach allo'na atta açhotatsetnenpeto.

40 Tarraña Jesúsñapa' atet otosanet:

—Napa' o'ch notas, ama'tcha' atet notatstanetañpa' muema'rrtetañcha', mapyeçhnoñapa' puerranare'teño'fetpa' načhotenayach.

⁴¹ Allempo o' e'ñe çhapmochet atto entosan anets Jerusaléñ, Jesúsñapa' atarr ya'na'tosan jerusaléño'marnesha'.

⁴² Allpa' atet eñorosa ñocpuet:

—Atarr nemneñeñ ama't e'ñe ñayecma po'ñoçh sapa'çho'ña o'te' señotereñ errotencha' seperra attoch Yomporpa' o'ch a'queshpaterrosoñ e'ñech socsheñesha' socrrerrañ. Tarraña saña teme'ttsen ñeññapa' ama't mameshapa' ama çhennaso seyoçhro.

⁴³ Tarro'mar napa' o'ch notas, po'ñoçh o'ch çhap allempoch ñeññ se'moñe'tene'pa' concha'tam̄perrnasetcha' sa'netser attoch e'ñe rroçhtam̄perrset allemateñ satepōtpa' huaçha'tonasetcha', attoch amach errenet seyeterro ama't e'ñe puesheñarrotesa.

⁴⁴ A'mata'tuerrnasetcha' ora allohuen sa'netser attoch sepacle'nachña e'ñe sa'tpetse'tuerre' allohuenes ama't sacñeñaretolleshohuen. Allo sorraten sepaquëll ama't patrra mapue'pa' amach a'puerro, tarro'mar sapa' ama semno o'ch saguërrñañ Yompor puemuerena allempo mueneñeñ o'ch yenuerrsoñ saña.

Atto Jesúsapa' a'cohuentatosan Parets pa'paquëll
(Mt. 21.12-17; Mr. 11.15-19; Jn. 2.13-22)

⁴⁵ Allempo çhap Jerusaléño Jesúsñapa' ahuos Parets pa'paclo. Be'tosospa' allotñapa' çha'nmaçha'tatuosan ñeññ pomatsre'tyetsa all.

⁴⁶ Allñapa' atet otosan ñeññ pomatsre'tyetsa:

—Yompor po'ñoñ ñeññ atet anuaret ahuatoteñ, allñapa' atet oten Yompor: “Añ ñeññ nepaquëll nepenpa' añeçpaca'yeña sherben allecmach ma'yochennet”; tarraña sañapa' atet sepeññañña Yompor pa'paquëll atet ñerra'mrrate' eñeñ ñeññ e'potyetsa mapuetpono'mar.

⁴⁷ Pate'tets yet Jesúsapa' çhocmach sene't Parets pa'paclo all yeçhatenanete't Yompor po'ñoñ. Añña ñeññ pa'm̄cha'tareñnesha' pen allohuen judionesha' po'cornaneshar ñaña añ ñeññ atarr etsotayenayeñ ñoñets ñeññ atet anaret ñaña po'potantañ ñeññ añcha'tare'tetyetsa all anetso, ñetñapa' Jesúsapa' atarr o'patyenet attoch muetsatachet.

⁴⁸ Tarraña ñetpa' ama erro't peto tarro'mar allohuen acheñenesha'pa' atarr yemteññañet Jesús atto atarr cohuen serrpare'tatenanet Yompor po'ñoñ. Ñetpa' ñeññña atarr cohuen entyenet.

20

Atto allsensare'ttena Jesús
(Mt. 21.23-27; Mr. 11.27-33)

¹ Po'pocheño pam̄tarr Jesúsñapa' alla yeçhaterranerr acheñenesha' Parets pa'paclo. Allpa' añ serrpare'tatenanet cohuen ñoñets alloch yequeshperra. Atteñapa' huaçha'toña shonte' añcha'tareñnesha' —ñeññ pa'm̄cha'tareñnesha' pen allohuen judionesha' po'cornaneshar ñaña allponsheña ñeññ atarr etsotayenayeñ ñoñets ñeññ atet anaret ñaña po'potantañ ñeññ pompornesha' pa'yen allohuen judionesha'.

² Ñetñapa' atet otoset Jesús:

—Ñehua, yapa' añecop yehuena yemneñ o'ch pōtey ¿erro'te't apuenpetña llesens? ¿Esesha'tña p̄apuene'ña llesens attot porrtatyenna ñeññ çhocma attecma pe'pa'yena?

³ Jesúsñapa' atet otapanet:

—Ñehua, napa'çho'ña nemneñ o'ch na'p̄to'tapas saña ama't patrra ñoñets. Sapa'çho'ña o'ch sotosen,

4 ahuañmo'cha allempo apate't Juanañ Yomporecop ñeñtpa' ¿eseshatña llesense' ñato' Yompore amapa' acheñaite' apueña llesens? Nemnen o'ch sotosen ñeñt atet soctape'chen sa.

5 Ñetña' e'ñe a'nahua otanna'tyeset:

—Ta'm errotcha'ca'ye yochte'. Ñerra'm cha yoch Yomporesho'tca'ye apetña llesens, ñaña'pa' chate'ca'ye otey: “Ñehua, saña'pa' eso'mare'tña ama se'mñocheña ahuaña allempo serrpare'tatosan acheñenesha'.”

6 Elloña ñerra'm cha yoch acheñesho'fa apet llesenspa' acheñenesha'ña'pa' chate' e'moñe'tyet. Pue'moñe'teño'tetaypa' chate' rrollapechyet tarro'mar ñetpa' e'ñe cohuen eñchete't Juanañ, chocma otyenet ñapa' ñeñtca'yeña a'mtose' Yompore po'ñoñ.

7 Ñeño'marña ñetpa' atet ochet Jesús:

—Ta'm yapa' amaca'yeña yeñoteñe; errotte' huapaña Juan, errotte' apetña ñaña llesens.

8 Allempoña Jesús'pa' atet oterraneterr:

—Napa'cho'ña te'pa' amach notaso samã allot aparetēña namã llesens attot atet ne'pa'yena.

*Atet atma'ntatarettena ñeñt ataruasañechno ñeñt ama cohuenayaye
(Mt. 21.33-44; Mr. 12.1-11)*

9 Allempoña Jesús'pa' alla serrpare'taterranerr acheñenesha' toma'nteñtso, Ñeñtpa' atet otanet:

—Eñall puesheñarr acheñ ñeñtña nare'tanatatnomue' shonte' uvach, pa'muerña'pa' e'ñe ora uvachmatatue. E'ñe allponmatatsapa' o' na'nman po'potantañ ñeñtcha' taruasatats uvachmo ñeñtcha' coyerrahuet allpon ñerra'm esempoch toteñet. Allempoña ñapa' ahua' ñachayo po'poñ anetso alla atomat.

10 Chap allempo yen uvachllom'pa' ñaña'pa' mueñerran po'psheñeñ pa'taruasañer o'ch enamuerra' uvachllom' po'psheñeñ pa'taruasañesho ñeñt cohuañpene' uvachma'. Allempoña chen allpa' enamhuenan ñeñt allpon o'patena pamo'mtayet arepa'tcha'ña es apapuenayeña uvachllom', elloña ñeñtpa' cha nalle'tapueñet, o' alla mueño'teret e'ñe atta.

11 Allempoña ñeñt pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr allpa' ñapa'cho'ña cha es otnare'tapetpa' o'cho' nalle'tapet o' matateret e'ñe atta.

12 Allempo poma'pocheño o' alla mueñerranerr po'psheñeñ pa'taruasañer. Ñeñtpa'cho'ña allempo chenerr ñaña allpa' ñaña'pa' cha atarr atserrpatse'tapetpa' o'cho' alla matateret.

13 'Allempoña ñeñt pamo'mte' penetpa' atet ot: “Te'pa' erro'tuachñaca'yeña nepe'te'. Te'pa' o'ch nemñe ñeñt e'ñe na nechemer ñeñt atarr nemorrentena. Ñato'rraña ñeñtpa' mecha'na'tapetcha'.”

14 Arepa'tcha'ña ama't mameshapa' mecha'na'tapeto. Allempo entapoñet puechemerpa' atet otanna'tyeset: “Añmapa' ñeñtca'yeña puechemer ñeñtcha' o'paterraya pompor puenarem' esempo. Ñapa'cho'ña te'pa' o'chca'ye yemtsa'p allochña'pa' yachca'yeña e'ñe o'paterrayaña pompor puenarem'.”

15 Allempoña'pa' o' rromapet o' chetare'tnomet narmetsmo a'yot, allña muetsapoñetña ñaña puechemer. Arrpa' allohua atet toma'ntata Jesús e'ñe ñañaña.

Jesús'ña'pa' atet oterranerr acheñenesha':

—Ñehua, te'pa' o'ch notas, ñeñt pamo'mte' pen ataruasañechnopa' atetcha' pohuerranet.

16 Ñerra'm esempoch huerranet, pamo'mtayetpa' a'cllatuerranetcha', narmetsma'ña o'ch apuerran po'potantañ.

Acheñenesha'ñapa' allempo e'mueñet Jesús atet oten, ñetñapa' atet ochet:

—¡Ñeñtpa' arepa'chña atteye' p̄atsterro, Neyompor-re!

17 Jesúsña atta cohuanetpa' atet otanet:

—Ñerra'm ama atet pueperra'chepa' eso'mare'tña otenña Yompor po'ñoñ ñeñt anuaret ahuatoteñ, ñeñtpa' e'ñechca'ye po'ñoñ atet perra. Tarro'mar ñeñtpa' atet oten nocop, all atma'ntatareñen mapue'. Ñeñtpa' e'ñe atet anuaret Yompor po'ñoñ ahuatoteñ:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

18 Elloñapa' atet otanet:

—Allohuen ñeñt epoto'tetsa añ mapyopa' atarrcha' atserrpenanet, ñaña añ mapue'pa' ñerra'm eseshesho mata'nompa' e'ñech a'tpetse'tuosanet.

Atto a'p̄to'chet Jesús, pocte'te' o'ch tsa'tet impuesto

(Mt. 21.45-46; 22.15-22; Mr. 12.12-17)

19 Añña ñeñt atarr etsotayenayeñ ñoñets ñeñt atet anaret ñaña ñeñt pa'mcha'tareternesha' pen allohuen judionesha' po'cornaneshar, ñetña allempopa' o' eñochet ñetca'ye atma'ntatareñtenet, ñeñtpa' ñocpuetca'ye atet eñoreñaña Jesús. Allempoña ñetpa' atarr mueneñetañ o'ch rremuet Jesús e'ñe allorocma tarraña ama eseshaye' rromaye tarro'mar ñetpa' mecha'teñet acheñenesha'. Ñehua, acheñenesha' e'ñeca'ye cohuen enteñet Jesús.

20 Tarraña ñetpa' añña atarr e'nenet attoch ama't parrochapa' o'ch eñorachet ñeñt ama pocteyaye ama't ñaña gobiernocop, allochñapa' attoch rremuet o'ch pomueñeta' añcha'taretesho ñeñt nen gobierno' Romot ñeñt añcha'tarettetsa allo'marecop. Atteña ñetñapa' e'ñe a'nahua mueñet allponsheña acheñ Jesúsesho ñeñt ottetsañ ñerra'mrrate' atarr cohuen acheñ, tarraña ñetpa' añecpa amñareñtet attoch e'ñe pueshquëñoñ po'ñoñotetpa' o'ch eñorachet ñeñt ama cohuenayaye.

21 Allempoña chapuet ñeshopa' atet otoset:

—Maestrocha' yapa' yeñoteneñ ñeñt atet peñen ñaña atto peychatyen Yompor pocta'ña ñeñtpa' e'ñe cohuenacma. Papa' allohuen acheñ e'ñe cohuen pentueñ; ama añña ñapueñ pemorrenteno ñeñt atarr añcha'na'tpo' entyen allohuen acheñenesha'.

22 Ñeñto'marña te'pa' yemneñ o'ch peñotatapuey erra'tsente'ña e'ñe po'ñoñ cohuentetsa. ¿Pocte'te' o'ch yetsa'ta impuestos añecop ñeñt añcha'tarettetsa Romo, ñeñt ama judioneshayaye? Ñato' amate' pocteyaye yocop ñeñtey judioneshay o'ch yetsa'ta añcha'tareñt romo'marnesha' ñeñt ama judioneshayaye.

23 Jesúsñapa' eñotanet ñeñt atet shecare'teñetañ, ñañaapa' atet otanet:

24 —Ñehua, segaten puettallarr quelle.

Gatuetpa' atet otanet:

—Ñehua, sapa' o'ch soten, ¿eseshat sentenña ñeñt atma'ntatareñtetsa all? ¿Eseshat pa'so'cheñ ñeñt aquellcareñtetsaña all?

Ñetñapa' atet ochet:

—Añcha'tareñca'ye atma'ntatareñtetsaña all ñaña ñoca'yeña pa'so'cheñ ñeñt aquellcareñtetsa all.

25 Jesúsñapa' alla oterraneterr:

—Ñeñtēpñapa' añ poctetsa o'ch yaḡ añcha'taret ñeñt ño ñeñt atet poctetsa gobiernocop; tarraña ellonet ñeñt Yomporo o'ch yaḡ ñaña ñeñt atet poctetsa ñocop.

²⁶ Attoña ama't puehquēñoḡet atet otyenetpa' ama errotenoḡ eñoracheto ñeñt ama pocteyaye ama't ñaña gobiernocop tarro'mar allohuen acheñenesha' ñeñt allo'tsa'yen e'ñe cohuen enteñet atet anapuenanet Jesús. Ñeñtña ashcañnesha'pa' atta cohuanrrorteñet tarro'mar atarr cohuen anapuenanet Jesús. Ñeñto'marña ñetpa' ama errotenaye' otenaye' entereterro.

Atto a'ḡto'chet Jesús, ñerra'm po'ñoḡhte' atanterrapo' rromoḡ, ta'm, allem-popa' errotēncha'ña yeperra

(Mt. 22.23-33; Mr. 12.18-27)

²⁷ Allempoñapa' huaḡha'toña ñaña patantarr ñeñt saduceoneshatets. Ñehua, ñeñt saduceoneshatets ñetñapa' ellonet echenet poctapña ñeñto'mar atet otenet amate' errotenoḡ yetanterroña rromoḡ ama't errponaña.

²⁸ Ñetñapa' atet otoset Jesús:

—Maestrocha' ahuat Moiséspa' atet quellconay ñoñets ñeñt poctetsa ñeñtcha' atet yeḡa. Ñeñtpa' atet otenña Moisés po'ñoñ: Ñerra'm es-empo rroma yacma o'ch sa'nman puetapor tarraña ama chemere'tnomopa' añ poctetsa pa'mo'nasheñcha' alla yorerre'ña po'norrar allochñapa' attoch eñalletterraña ñeñtcha' puechemer perr pa'mo'nasheñeñ. Ñeñtpa' atetca'ye quellca'nmonayña Moisés ahuat.

²⁹ Ñehua, te'pa' eñall canḡherrsheña ñeñt e'ñe poctacma pa'mo'nasheñecmuet. Ñeñt pueheñarr popo'naretpa' o' yoran coyanesha' ñeñt puetapor ḡa'. E'ñe allponmatatsapa' o' rromaña, yacma ama chemere'tnomo.

³⁰ Allempoña ñeñt po'rroḡho'merpa' o' yorreran pa'mo'nasheñeñ puetapor. E'ñe allponmatatsapa' ñapa'ḡho'ña o' rromuerrerr ñaña, ñeñtpa'ḡho'ña ama chemere'tnomo.

³¹ Allempoña po'psheñeñ pa'mo'nasheñpa' o' alla yorreranerr ñaña po'norrar. E'ñe allponmaterrtsapa' ñapa'ḡho'ña o' rromuerrerr ñaña, ñeñtpa'ḡho'ña ama chemere'tnerrerro o' atta rromuerrerr. E'ñe attecma ḡohuet canḡherrsheño'maretpa' e'ñe pueyoruaroḡet ñeñtara pueheñarr coyanesha'. E'ñe allohuenetpa' e'ñe attecma pet colla'huet ama't pueheñarroḡetapa' ama chemere'tnomueto.

³² Allempoña o' rromaña ñaña coyanesha'.

³³ Te'ña ñerra'm po'ñoḡhte' yetantena yerromñoḡtpa' añña coyanesha' allempopa' ḡessha'tcha'ña puetapor perre' tarro'mar allohuenet canḡherrsheño'maretpa' e'ñe pueyoruaroḡet?

³⁴ Allempoña Jesús otanet:

—Ñehua, atet yeḡhen acheñenesha' arr patsro, ḡhocmach sena'tenet, coyanesha'paḡho'ña apueñet ñeñtcha' puerrollar ḡa'.

³⁵ Tarraña esempohuañen allempoḡ tanterret po'pocheño allohuen ñeñtcha' e'ñe pocte' entuerr Yompor allochñapa' attoch o'ch alla correrret po'pocheño, ñetña allempopa' ama't pueheñarroḡeta amach sena'terreto, ama't coyanesha'pa'ḡho' amach eseshaye' apuerraye ñeñtcha' yorrerhuet.

³⁶ Tarro'mar allempopa' amach arromña'tterreto ama't ahuata attoch e'ñech atet perret ñerra'm mellañoḡeññanesha'. Yomporñapa' o'ch e'ñe puechemer perranet e'ñe poctacma tarro'mar allempopa' o' tanterret rromoḡpa' o'huañcha' arromña'tterret ama't errponaña.

37 Elloña ama't Moisés atet eñotatane't acheñenesha' po'ñoçh ñeñt colla'huatsa allempto, ñetña' corretseta. Ñehua, all aquellcare't tsachmo'r ñeñt e'ñe ñoña huortets. Alotñaca'yeña Yomporpa' eñorana'tanaña Moisés; ñeñtpa' atetca' otña Yompor allempto: "Napa' ñeñten Po'yomporer pen Abraham ñaña Isaac, ñaña Jacob."

38 Jesúsña' alla otterrane'terr:

—Ñehua, yapa' yeñoteñ Yomporpa' ama aye' Po'yomporer penaye ñeñt rromuets e'ñe poctacma ñapa' añca'yeña Po'yomporer pene' acheñ ñeñt corretsach. Yomporña' e'ñe entenent allohuenetpa' e'ñe corretseta.

39 Aña pueheña'tets ñeñt atarr etsotene' ñoñets ñeñt atet anaret, ñetña' atet ochet:

—E'ñe Maestrocha' e'ñe po'ñoçh atet poten.

40 Ñeño'mar allemptoteña' ama't pueheñarotetapa' ama eseshaye' a'pto'tenaye' enterraye.

Atto Cristo ñeñt Po'partseshar pe't David, elloña' o' alla po'mreneñ per (Mt. 22.41-46; Mr. 12.35-37)

41 Allemptona Jesús' atet otan ñeñt atarr etsotayenayeñ ñoñets ñeñt atet anaret:

—Eso'mare'tña otyenet ñeñtcha' Cristotosets ñapa' aña po'mreneñ pene' David tarro'mar ñeñtcha' Cristoterrets ama aña po'mreneñ peñe David tarro'mar ñapa' Po'partseshare'ñaña pe't David.

42 Tarro'mar ama't Davidpa' allempto quellquë't all libro Salmo allemptopa' atetca'ye eñose'tña añecop ñeñtcha' Cristoterrets:

Yompor Paretpa' atet otentan ñeñt Nepartseshar nepen na (ñeñtara ñeñtcha' Cristoterrets): "Te'pa' o'ch panorruerr arr necohuenrot allcha' pecohuentapreterra.

43 Attochña ama't ñeñt pe'moñe'tene' napa' o'ch name'ñatuerranet allochña' o'ch atet perret ñeñt pemnen pa."

44 Ñeñtpa' atetca'ye ote'tña David ñeñtcha' Cristoterretspa' ñeñtca'yeña Po'partseshar pe'tña ama't allemptoteñ. Ñehua, ama't señoñeña Cristo ñeñt Po'partseshar pe't David ñeñtña te'pa' o' alla po'mreneñ per ñaña.

Atto Jesús' a'metare'tenan ñeñt etsotayenayeñ ñoñets ñeñt atet anaret, ñeñt atet yeçhenet ñetpa' ñeñtpa' ama cohuenaye' entapretenaneto Yompor (Mt. 23.1-36; Mr. 12.38-40; Lc. 11.37-54)

45 Elloña shonte' acheñenesha' ñeñt e'mño'tene' allempto atet otentan Jesús pueyochresha':

46 —Amach semeñe'tapretatsche ommoñañenesha' poctapña ñeñtareta ñeñtet atarr etsotayenayeñ ñoñets ñeñt atet anaret. Tarro'mar ñetpa' aña'ña atarr cohuen entenent o'ch chorrenet atarrom shetamuets o'ch atfa yorma'tatsetenet pa'shtam. Ñaña pommo'cheño'tetpa' atarrcha' mueneñet o'ch e'ñe puencha'na'teño' e'ñech cohuen huomcha'tenanet acheñenesha' all chopeñe'chyenet. Ñaña ñetpa' aña'nach atarr muenenet o'ch anorrcha'tyenet judionesha' po'prahuo allecma anorryen ñeñt atarr amcha'na'tpo' entyent allohuen acheñenesha' ñaña e'ñe atecma penet ñaña all rrallme'chapretenet.

47 Tarraña ñetña' rretorrnanesha'ñaña puerratanpesyenetña pa'paquell. Elloña e'ñe pommo'cheño'tetpa' aña atarr muenenet o'ch atet penet ñerra'mrate' ñetpa' atarro' cohuen acheñret ñeño'marña arrcha' ma'yochenet all shontena acheñenesha', amach tematenayaya ma'yocheneto.

Ñeñto'marña te' napa' o'ch notas, ñeñt atet petsa pommo'cheñoŧpa' elloña atarrcha' a'coñcha'tareŧterret.

21

Atto rretorrnanasha' ñeñt atarr huocchañetets ñapa'cho'ña nosan quelle ñeñt Yomporecop

(Mr. 12.41-44)

¹ Allempo allo'tsen Jesús Parets pa'paclo, ñañaapa' arrenet cohuen allecma nenet quelle Partsocop. Allñaapa' entenan eçllayoreŧenasha' ñeñt na'yene' shonte' po'çllayor Partsocop.

² Jesúsña allpa' atta cohuenanet, huapa ñaña puesheñarr rretorrnanasha' ñeñt atarr huocchañetets. Ñapa'cho'ña nosan eptallaŧoll quellayetoll ñeñt cobretall.

³ Jesúsñaapa' atet ot:

—Te'pa' o'ch notas, añ rretorrnanasha' ama't atarr huocchañ ñapa' po'ñoçhca'ye atarr aton nosan quelle, ello metana'tuosan allohuen po'potantañeçhno allpon quelle ñeñt na'yenet ñet.

⁴ Tarro'mar allohuenet ñeñt na'yenet quelle, añaca'ye na'yenet ñeñt a'pchatyenet, ñañaapa' ama't atarr huocchañpa' e'ñe pomhuahuospan allohuen ñeñt echyen ñeñt muenatenaneñ allo'ch yoran attoch correna arr patsro.

Atto Jesúsapa' eñotatanet e'ñech a'mata'tareŧetuerra Partsopo'

(Mt. 24.1-2; Mr. 13.1-2)

⁵ Allempoña puesheña'ttets ñetñaapa' aña atarr serrpare'tyenet atto Parets pa'paquëllpa' atarr a'cohuentateñ. Mapyet ñeñt allo orratenet Part-sopo' ñeñtapa' atarr coçhneshare' a'pa'yeseŧet. Shonte' coçhneshare' ñaña allo'tsa'yen ñeñt pomyen acheñenasha' all Partsocop. Jesúsñaapa' atet otanet:

⁶—Ora ñeñt allpon e'ñe coçhneshare' sentyen te' çherrcha' allempoch e'ñe a'mata'tareŧetuerra. Ama't pueñarra mapyetpa' amach a'puerroña all allo orratenet Partsopo'.

Atto Jesúsapa' eñotatanet shonte'ch entyerret pa'namen ñeñtcha' eñotatterahuet o' çherrmoch allempoch mellapoterra

(Mt. 24.3-28; Mr. 13.3-23)

⁷ Pueyochresha'ñaapa' a'pŧo'chet:

—Maestro, ñeñtapa' ¿esempo'tcha'ña atet perra? Ñaña allempopa' ¿eso'tcha'ña yentyerr ñeñtcha' yeñotaterre' po'ñoçhpa' o'ch çherrmoch allempoch e'ñe etsotuerra ñeñt atet pŧoteneŧe'?

⁸ Jesúsñaapa' otanet:

—E'ñech señoŧerra, allochñaapa' amach esesha' seshquërraye. Tarro'mar shonte'ch orrterrtsa ñeñtcha' ayçha'nataterre' neso'cheñ, ñeñtcha' otyerrets: “Napa' ñeñtenca'yeña Cristotets; te'pa' o'ca'ye çherr allempoch norrterra na ñeñten Cristotets.” Tarraña sañaapa' ñato'tña se'mñotenaneta'.

⁹ Ñaña allempopa' o'ch se'mare'tyerr o' quellareñtsotyerr allemeñ anetso'mar ñaña o'ch se'mare'tyerr o' orrterra ñaña a'parñats erra'paren, saña allempopa' amach çha seyorenatsto ama't e'ñe mamesha. Ñeñtapa' atetcha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra.

¹⁰ Jesúsñaapa' alla otterraneterr:

—Pa'namen achen ñeñ e'ñe po'poñe'ttsocma mereñtsoret ñetpa' quelaranna'terretcha'. Ñaña pa'namen anetsoť am'cha'tareťechnopa' quelaraterrancha' pueyochreneshačno.

11 Pella'yerrach pats huomenc ora errařaren, ñaña orrterrach allemeñ muecheñets o'ch e'ñe chaporrñatsotyerr errařaren. Orrterrach ñaña pa'namen atsnañtsočno ñeñ atarr apatanna'tpo'. Allempopa' atarrcha' am'cha'nočterra entoť. Orrterrach ento ñeñ ama't ahuatapa' ama puentareto ñeñtcha'ña eñotaterrahuet o' e'ñe čherrmoch allempoch melapoterra.

12 'Ñehua, allempoch ama orrtena' atetpa' saña allempopa' rremanaterrsetcha' attoch mueročtaterrset, sanmareťterrach judionesha' po'prahuo allcha'ña e'ñe otteñe'cherrset, attochña abe'terrset cárcelo allcha' coñchaterrset. E'ñe same'ñeñoťen na sapa' sanmareťterrach am'cha'tareťneshesho'mar ñaña allo'tsa'yen ñeñ nanac am'cha'tareťnesha'.

13 Tarraña allempopa' atarrcha' cohuen attoch sa'metosnanña neñoñ.

14 Ñeño'marña allempo sanmareťetyesa allcha' otteñe'cherrset ama't mameshapa' amach sellca'psatsto, amach sotařsa'tatsto, erroťuachca'ye notoste' am'cha'tareťesho allempoch a'řto'tare'tapuen.

15 Tarro'mar allempopa' nachca'yeña se'ñoratos'e'ña all attoch e'ñe cohuen señoťyesña atetcha' sanapyesosanet. Allochñapa' ñeñ se'moñe'tene'pa' amach erroťenaye' otenaye' entenseto. Ñaña amach erroťenoť otaseto ñeñ atet soten sapa' ñeñtpa' amaca' po'ñočhaye' atet soteno.

16 Elloña allempoch atet perrsetpa' ñeñ e'ñe sompor sepen ñaña sachor ñato' ñeñtacha'ye sepomuerre' tarro'mar ñapa' amaca'ye ame'ñenno, amapa' ñato' semo'nasheñ, amapa' ñato' po'potantañ samo'tsesha', amapa' ñato' ñeñ e'ñe parro seyemtena ñeñtacha'ye sepomuerre' tarro'mar ñetpa' ama parrocma'ye' attecma soctape'cheno. Ñaña patanta'ttsospa' muetsatyerrsetcha'.

17 Shonte'ch achenesha' ñeñtcha' se'moñe'terre' tarro'mar sapa' naca'ye e'ñe same'ñena.

18 Napa' atarrcha' necuanmpenes attoch amach erroťenoť sechenquerro ama't e'ñe ahuata. Attoña ama't e'ñe pueřarra sechpa' ñeñtpa'cho'ña amach na'chencaterrnaso.

19 Tarraña ama'tcha' atarr mueročtaterrset čhocmachña e'ñe seyemteñoťen napa' e'ñech sa'huinta'huanomña allohuen mueročhteñets. Attochña sapa' corretsasach e'ñe po'ñočh.

20 'Ñerra'm esempoch senterr añ anetser Jerusaléñpa' o'ch e'ñe rročhtampera solltarnesha' allempoña sapa' señoche'pa'ch o' čherrmoch attoch e'ñe a'mata'tareťetuerra ñeñ anetser Jerusaléñ.

21 Allempoña ñeñ allpon Judeo'tsa'yenpa' ñetñapa' allorocmuepa'ch yetrra'tuerret ahuanerretepa'ña aspentareronet. Ñaña ñeñ allpon anetso'tsa'yen Jerusaléño, ñetpa'cho'ña ahuanemyesetepa'ch ñamet allot. Ñaña ñeñ allpon allampaño'tsa'yen all arepa'chña tatsterretoña all Jerusaléño.

22 Tarro'mar allempopa' Yomporcha'ña tsa'taterrayaña allohuen israelena'tarnesha', tarro'mar allempopa' o'ch e'ñe etsoterra ora allpon ñeñ atet anuareťtatse't atetcha' perra allempo.

23 Allempopa' atarrcha' llequēñets añecop ñeñ ačhomenare' coyanesha' ñaña ñeñ allohuen emareťetolleshačno. (Tarro'mar ñocpuetpa' atarr torrapo' attoch yetrra'tet ñamet.) Tarro'mar allempopa' o'ch orrterra

ñeñtcha' atarr muerochtaterrahuet arr patsro. Atarrcha' a'coñchatareñterra allohuen acheñenesha' allempo.

24 Ñaña allempo shonte' acheñpa' e'ñech muetsanatuerranet ñeñtcha' quellarrahuet. Po'potantañña' rremanatuerranetcha' ñeñt quellarenahuet o'ch anmaretterret po'poñ anetso ñachayo all ye'cha'yena pa'namen acheñ. Acheñenesha' ñeñt ama judioneshayayepa' ñeñtcha'ña e'ñe a'mtsoññetuerre'ña jerusaléño'marnesha', attoch e'ñe a'mama'tueretña ñeñt anetser Jerusaléñ. Atetcha'ca'ye perra ñeñt allponmat onañcharéñ ñeñt ama judioneshayaye o'ch añcha'nochterret all Jerusaléño.

Atetcha' perra allempoch huerra Cristo Ñeñt Acheñetosets

(Mt. 24.29-35, 42-44; Mr. 13.24-37)

25 'Allempopa' orrterrach ento ñeñt ama't ahua'apa' ama sentare ñeñtcha'ña seño'taterre', ñeñt'pa' e'ñech atsnesho, orrterra ñaña arorrosho ñaña ranto'chnesho. Ñaña arr patsro ora allpon pa'namen acheñenesha' pueyorño'tetpa' atarrcha' nanac lleca'rrterret. Añcha' atarr yore'tame'terrahuet atto ñeñt añecmuen sa'ppa' o'ch emo'yarterra, atarrcha' huomenc ma'moreterr allempo.

26 Acheñenesha' e'ñe pon'chaño'tetpa' 'chach muene' o'tanatyerret tarro'mar allempopa' o'ch eñoterret atarrcha' muerochterret allohuenet arr patsro. Ñaña ñeñt huomenc orra'yetsa ento te', allempoña ama't ñeñt'pa' pella'yerrach.

27 Allempoñapa' entapuerrnetcha' na Ñeñten Acheñetosets o'ch nesuan'perra oso e'ñe nepartsoteño'huen e'ñe necohuenteñesha'.

28 Ñerra'm esempoch senterr o' motetnerra orretyetsa ñeñt allpon o' notuas, allempoña sapa' e'ñech socsheñesha' secuanrrorterr enonet tarro'mar allempo o'ch 'cherrmoch allempoch sa'queshpataretterra e'ñe poctacma.

29 Allempoña Jesús'pa' alla serrpare'taterraneterr toma'nteñtso, ñeñt'pa' atet o'terraneterr:

—Señotenté' atet pena tsach, higoch.

30 O'ch senteñ allempo tapna'tyen pasopanerpa' sañapa' ñeñt'ña seño'tatene'ña o' 'chenmoch allempoch huorateterrerr.

31 Attecmach perra ñerra'm esempoch sentyerr ñaña allpon ñeñt o' notuas sapa' ñeñtcha'ña seño'taterre' po'ño'ch o'ca'ye 'cherrmoch allempoch e'ñe et-soterra allempoch añcha'taretterra Yompor.

32 'Napa' po'ño'ch o'ch notas, acheñenesha' ñeñt corretsa te' ñetpa' amach e'ñe rromhueneta'pa' allempocmach e'ñech etsoterra allohuen añe'chno.

33 Eempopa' añ enet ñeñt sentenpa' e'ñech chenca'huerra; patspa'cho'ña attecmach perra e'ñech chenca'huerra. Tarraña ñaña neño'ñpa' amach chen-querro ama't e'ñe errponaña.

34 'Tarraña te'pa' o'ch notas, sapa' 'chocmachña e'ñe seño'tnoma attoch sapa' amach añña soctape'chatsto ñeñt sosya'tsañe'chno, posa'tare'teñets, ñaña atto e'ñe cohuen socrena añ patsro. Tarro'mar ñerra'm ñeñt'ña e'ñe soctape'chenpa' machayotach huaponasa añ yeter

35 atet ñerra'mrrate' tamell e'ñech machayota rreman ñeñt'ecop amencareñ. Ñeñte yetarocmach 'cherrana ora allohuen ñeñt ye'cha'yetsa añe patsro er-ra'paren.

36 Añcha'ña sapa' 'chocmachña seño's'rtena ñaña añcha'ña senamuen Yompor attoch sa'huanta'huanom allohuen ñeñtcha' sehuapoya pa'namen muerochteñtso'chno allochñapa' sañapa' e'ñech seño'mañesha' sa'tomhuerr nesho na Ñeñten Acheñetosets.

³⁷ Chocma atet pe't Jesús, ellapene'tcha' ye'chatats Parets pa'paclo, elleronetñapa' o'ch ahuerr Olivo'ño ñapa' allca'ye e'ñe a'pue't.

³⁸ Tsapa't puetaren ahuatecmach huapa'muene't ñaña shonte' acheñenesha' ñeñt e'mñotyeyaye't all serrpare'tatanete't Yompor po'ñoñ all Parets pa'paclo.

22

Atto atarr o'pateñet Jesús o'ch muetsatateret

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Allempoña chapmoch allempoch cherrerr pascuapo, allempoch rrerranerr judionesha' pan ñeñt ama anareteyaye chase'.

² Tarraña allohuen ñeñt pa'mcha'tareternesha' pen allohuen judionesha' po'cornaneshar ñaña allohuen ñeñt atarr etsotayenayeñ ñoñets ñeñt atet anaretet ñocpuet, ñetñapa' Jesús a atarr o'patenet o'ch muetsatachet tarraña ñetpa' aña mecha'na'tenet acheñenesha'.

³ Allempoña oneñetpa' chorrenana Judas ñeñtara ñeñt sochetsa Iscariote. Ñehua, añ ñeñt Judaspa' Jesús pueyochresha' ñeñt parro yemtena po'potantañ ñeñt llesensen Jesús ñeñt allohuenet charrasheñet puechenet epsheña.

⁴ Ñeñtña Judaspa' ahua' allo'tsa'yen ñeñt pa'mcha'tareternesha' pen allohuen judionesha' po'cornaneshar ñaña allo'tsa'yen judionesha' po'guardiarnesha' ñeñt cohuanpene' Parets pa'paquell. Allempo chap allpa' Judasñapa' serrpare'tos epuet ñeñt amcha'taretnesha'. Attoña eñotatosanet ñapa' mueneñca'ye o'ch poman Jesús attoch rromuet. Allempo ñetñapa' otanna'tyeset:

—Te'pa' errotuachñaca'ye yepe'te' attoch yerrmue'.

⁵ Allempoña ñeñt atarr amcha'taretnesha'pa' atarr coshenet, ñetñapa' a'pochtchet chochca'ye tsa'chetña Judas allpon quelle.

⁶ Ñapa' e'ñe pocte' eñch. Allempoña ñapa' aña atarr e'nen errotenotcha' pomanña Jesús e'ñe a'nahua attoch amach eñche allohuen acheñenesha'.

Atto Jesús pa' rrallme'chatnenan pueyochresha' attoch chocmach yerpueret ñeñt yoten te' Santa Cena

(Mt. 26.17-29; Mr. 14.12-25; Jn. 13.21-30; 1Co. 11.23-26)

⁷ Allempoña chapa'muen ñeñt yetñatsro allempoch rrerretterr pan ñeñt ama anareteyaye chase' allempoch muetserreterr ñaña carrnero; ñeñt pa' pascuapo.

⁸ Chapa'muen ñeñt yeterpa' Jesúsñapa' atet ota'muenan pueyochresha' epsheña Pedro ñaña Juan:

—Sa te'pa' o'ch ahues allcha' sa'potos rreñets ñeñtcha' yerra' pascuapo.

⁹ Ñetñapa' atet ochet:

—¿Erra'tña pocollro pemneñña allcha' ya'pota'ña rreñets?

¹⁰ Ñaña'pa' atet oterraneterr:

—Te'pa' o'ch ahua'muenes anetso allcha' sepocete' puesheñarr yacma ñeñt anmanpene' oñ porrto. Ñeñtña acheñerpa' o'ch socta'ner; allcha' be'tosuerr pocollopa' allcha'ña sebe'tosos samña.

¹¹ Allña'pa' atetcha' sotos ñeñt apacllatesha': "Yemaestrorpa' atet otene'y atetcha' yotosep: '¿Erro'tsena'tña pecuarto allcha' nerrallme'chos pascuapo epan neyochresha'?' "

¹² Ñeñt apacllatesha'pa' gatapascha' eno po'cuarto ñeñt atarr a'yohuen e'ñe cohuen a'paret. Allcha'ña sañño'tosña ñeñtcha' yerra' pascuapo.

13 Allempo atet otuanet Jesús pa' pueyochresha' ñapa' atetcho' pet, cha ahuanmatset. E'ñe atet otapanet, ñetñapa' e'ñe'cho' atet entoset. Allcha' año'tosñañetña rreñets allcha' rrallme'chenet ñeñte pascuapo.

14 O'ña chap allempoch rrallme'chet. Jesúsña pa' allña anorros epuet allohuen pueyochresha'.

15 Allña pa' atet otosan pueyochresha':

—Napa' atarr cohuen nenteñ o'ch yerrallme'chen parro añ pascuapo tayepa'tñapa' ama chena' allempoch muetsaterrnet.

16 Tarro'mar napa' o'ch notas, napa' po'pocheño amach alla nerrallme'cherre'te pascuapo. Esemphuañencha' etsoterra ñeñt po'ño'ch toma'ntenaya pascuapo e'ñech allempocma añcha'taretetuerra Yompor. Allempoñapa' e'ñech parrocmá o'ch alla yocsherrerr.

17 Jesúsña allempopa' chetan orramets, parasyoso'tan pompor, allempoñapa' atet otanet:

—Añ orrapo'pa' o'ch saga'pa' o'ch sepatanna'ta sa allohuenes.

18 Te'pa' o'ch notas, tayoteñ napa' amach alla norrerre'te añ orrapo' ñeñt narmetsos tarremphuach allempoch ello norrererr esempohuañencha' añcha'taretetuerra Yompor.

19 Allempoñapa' cheterranerr ñaña pan, parasyoso'terranerr pompor. Chetan panpa' shota'ch. Shotatuepa' apa'yesan pueyochresha' ñeñtpa' atet otanet:

—Añpa' ñeñtcha' nechets sepen ñeñtcha' e'ñe nepom attoch e'ñe nerroma socop. Ñerra'm esempoch serren añ pan e'ñech seyerpueño'ten na o'ch serreñ.

20 Allempoña rrohuet o' chetan ñaña orramets, ñeñtpa'cho'ña atet oterraneterr Jesús:

—Añpa'cho'ña ñeñtcha' nerras sepen ñeñtcha' ashatarettatsa socop. Ñeñtpa' alloch na'pocatonas e'ñe cohuen etserra Nomporesho.

21 Te'pa' o'ch seño'ch ñaña ñeñtcha' nepomuerre'pa' e'ñeca'ye parro yer-rallme'chen.

22 Po'ño'chca'ye te'pa' allo'na sen etsotnomtsa ñeñt atet onañchare't nocop, na Ñeñten Acheñetosets, attotcha' muetsaterrnet. Tarraña nocoppa' e'ñe pocte'; añña po'ño'ch acheñer ñeñtcha' nepomuerre' ñocoppa' atarr llequëñets.

23 Allempoña atet otua Jesús, pueyochresha' ñapa' allenta otanna'tyeset e'ñe ñañeñeta:

—Ta'm, eseshaycha'ca'ye pomuerre'ña Ya'yochresha'ter.

Atto pommo'cheño'tetpa' otanna'tyenet erra'tsenoteyte'ña ñeñtey atarr asherben enten allohuen acheñenesha'

24 Allempoña pueyochresha' e'ñe pommo'cheño'tetpa' atet otanna'tyenet e'ñe ñagattseta:

—Erra'tsenoteyte'ña ñeñtey atarr asherben enten allohuen acheñenesha' ñato'na, ñato'pa.

25 Allempoña Jesús pa' atet otanet:

—Sapa' seño'te'ñe' ñeñt atet pena po'poñ acheñenesha' ñeñt ama judione-shayaye. Ñet ñeñt pa'm'cha'tare'ter penet e'ñech pa'm'cha'no'chteñocmañen pomnaren pa'yanan allohuen pueyochresha'chno. Tarraña ama't atet pentañ pommo'cheño'tpa' añach atarr muenen allohuen acheñenesha'pa' e'ñech mecha'na'tuenanet ñaña ñetpa' mueneñet acheñenesha'pa' o'ch entenanet, atarro' sherba'yananet.

26 Sapa' arepa'chña atteye' sepanna'tatsto e'ñe sommo'cheño't. Ñerra'm erra'tsenotes ñeñtes atarr añcha'tare'toyen entetsa, ñeñtes acheñespa' socoppa' añ pocetsa o'ch atet senterra ñerra'm ama esoshe'mayaso atet

ñerra'm ñeñt atarr huepuesha'. Ñaña ñerra'm erra'tsenotes ñeñtes muenene' o'ch atarr asherben entenset, ñeñtesña acheñrespa' añ poctetsa o'ch atet senterra ñerra'm ama esoyayso, allochñapa' attoch e'ñe cohuen se'orraña po'potantañecop.

²⁷ Ñehua, yeñoteñ acheñenesha' arr patsro añca'ye atarr añcha'na'tpo' entenet ñeñt e'ñe cohueno anorrcha'tyets all rrallme'chenet, amaña aye'ña añcha'na'tpoye' enteneto ñeñt puesherbeño' epatyene' rreñets ñeñt anorrchets ñeñt rrallme'chets. Tarraña napa' o'ch notas: Ñeñtecopca'yeña nohuapaña sesho attoch nema'yochrena torraya ñeñtcha' po'ño'ch atarr sherberrets socop.

²⁸ 'Tarraña sañapa' ñeñtes atarr nellcapretenaya ñeñt atarr llequëñets nenten na.

²⁹ Ñeñto'marña te'pa' o'ch nena'nerres sa ñeñtescha'ña napuerr attoch sa'mcha'tarettapreterrna e'ñe atet pena Nompore o' na'n naña ñeñtencha' añcha'tarettapreterraya.

³⁰ Allcha' sanorrcha'tyesuerr e'ñe sa seconaño allcha' e'ñe sa'mcha'tarettapreterrna. E'ñe puesheña'ttsos añecopcha'ña sa'mcha'tarettapreterrna ñeñt mereñtsorecop israelena'tar ñeñt çharra' mereñtsor ñeñt puechetsa epsheña. Attoña allpa' o'ch na'mcha'taretterra e'ñe necohuenño e'ñech cohuen yeparrocmatuerr, allña' e'ñech yocsheñeshocmañen yerrallme'chuerr e'ñe parro.

*Atto Jesús'pa' eñotatan Pedro ñapa' çhocmach a'nasocha
(Mt. 26.31-35; Mr. 14.27-31; Jn. 13.36-38)*

³¹ 'Simón, po'ño'ch te'pa' o'ch nota'p, oneñe'tpa' atarrca'ye enamuenen na socop, añ muenen o'ch topatenes o'ch atet patenes ñeñt atet cotape'chen ña ñeñt ama pocteye' enteno Yompor. O'ch atarr huomenc topatenes atet ñerra'm ñeñt shoshnene' po'trigo e'ñech huomenc pa'shmuenan puehoshnat.

³² Tarraña Simón o'ch nota'p, te'pa' napa' o' nema'yochua p'ocop attoch amach e'ñe poctacma a'huaña'm'psonapeña pa' atto atarr peyemtena. Tarraña ama'tcha' huapona'ña topateñets ñeñt atarr huomenc, paña allem'papa' o'ch alla p'ocape'cherr cohuen Yomporecop. Allem'papa' o'ch alla e'ñe cohuen peyempuer pemo'nasheñnesha' attoch ñetpa'cho'ña o'ch alla huomenc perret pueyo'cher Yomporecop.

³³ Pedroña'pa' atet och:

—Partseshacha' napa' amach na'ypo'ñape, çhocmach nocta'p ama't errach anmapet; ñerra'm cárceloch anmapet allcha' mueroçhtatapet, napa'cho'ña nemnen allcha' yemueroçhta parro. Ama'tcha' cho muetsapetpa' yerromuepa' parro.

³⁴ Jesúsña'pa' atet otererr:

—Pedro, o'ch nota'p, e'ñech añe tsaprocma amach eñena' atollop, paña'pa' o'ch ma'poch pa'nasotenna. Ñeñt'pa' atet'cha' p'oten, napa' año' pentarno.

Atto çhapmoch allem'poch atarr atserr'paretterra Jesús ñeñt atarr topateñets enten

³⁵ Elloña Jesús'pa' yerpaterrana pueyochresha'; ñeñt'pa' atet oterraneterr:

—Ñehua, ahuaña allem'po nemñas atet notapas amach es sanmatsto ama't coñe'ta, ama't sebol'sa, ama't seçllayor ama't ñaña sesapat. Ñehua allem'papa' çeñalle'tña ñeñt sepalltena?

Ñetña'pa' atet ochet:

—Allem'papa' amaca'ye cho es yepallto ama't e'ñe mamesha.

36 Jesúsñapa' alla oterraneterr:

—Tarraña te'pa' o'ch notas po'poñ, ñerra'm eseshaste' ñeñtes echene' seçllayor te'pa' o'chca'ye sanem all sechopeñe'chyen ama't ñaña sebolsa. Ñaña ñerra'm ama secheno socchellpa' pocte'ca'ye o'ch sepom seshtam alloch seyora socchell.

37 Tarro'mar te'pa' o'ch alla noterrser: Te'pa' o'chca'ye e'ñe etsoterra ñeñt atet anuaret Yompor po'ñoñ nocop. Allca'yeña oten napa' erroñuanencha' perrnet atet ñerra'mrrate' napa' ñeñten amtsañen. Te'pa' ñeñtca'ye o' etsotmocha ñeñt e'ñe atet anaret nocop.

38 Allempoña ñetñapa' atet otereterr:

—Partseshacha' yapa' yechenca'yeña epmeta cochell.

Jesúsñapa' atet otanet:

—Ñeñtachca'ye.

Atto Jesúsapa' ma'yochuena all oteñet Getsemaní

(Mt. 26.36-46; Mr. 14.32-42)

39 Allempoñapa' o' rrallme'chuanenet ñeñte pascuapo, Jesúsñapa' cha'nerrpa' ahuenerr Olivopno; ñapa' attecma pena çhocmach sen all. Pueyochresha'ñapa' coña'huaneñet.

40 Allempoña çhenet allpa' Jesúsñapa' atet otuenan pueyochresha':

—Te'pa' arrcha' sema'yochuena attoch e'ñe sa'huanta' ñeñtcha' sehuapoya te' ñeñtcha' atarr huomenc setpate'.

41 Allempoña ñapa' ahuo' mame' a'yenteye'. Ñaña' all concorpa'huena o' ma'yochuena.

42 Puema'yocheñoñ atet otuen:

—Apa, ñerra'm p'ach pocte' ente' arepa'chña pemnatatsche o'ch çhapona ñeñt atarr amuroçhtatañ nenten.* Tarraña ñerra'm p'ach muenats añcha'ña atet pepaton ñeñt pemnen pa, amachña aneyaye ñeñt nemnen na.

43 Allempoñapa' huapoña mellañoñeñ Yompor pue'ntañoñ ñeñña ahuañenca' pose' attoch ahuantan puellquëña.

44 Ñapa' atarr nanac puellquëñsha' ma'yochena; puema'yocheñoñpa' atarr nanac ñorra'ten. Po'ñorrñapa' cha huatena atet ñerra'mrrate' errasats tsopsa'tets patso.

45 Allempoña ma'yochuapa' tanterra, ahuer pueyochreshesho. All entueranet ñetñapa' cha atarr manrrenet ama't e'ñe puellquëñeshet.

46 Ñaña' atet otueranet:

—Sapa' eso'mare'tña cha atarr semanrra'ten. Te'pa' o'ch setanterra'pa' çhoña sema'yochrra'ta attoch sa'huanta' ñeñtcha' sehuapoya topateñets atarr huomenc.

Allempo rromoset Jesús

(Mt. 26.47-56; Mr. 14.43-50; Jn. 18.2-11)

47 All atet otyenan pueyochresha'pa' allempoñapa' huacha'toña shonte' acheñenesha'. Ñeñt huacha'tatahuet ñeñt'pa' ñeñt soçhetsa Judas ñeñtara ñeñt pueyochresha' peneñ ñeñt çharrasheña ñeñt a'pchenahuet epsheña. Ñaña'pa' cha ponmosaya Jesús, puetso'tstsapa'teñoñ huom'cha'tos.

48 Jesúsñapa' atet ota'p:

—E'ñe'tcha' petso'tstsapa'teñoñen pepomuerren na Ñeñten Acheñetosets.

* 22:42 Ñeñt amuroçhtatañ ñeñt'pa' po'ñoçh arr atma'ntataret ñerra'mrrate' ñeñt atarr pesherr yorren orrañtso.

⁴⁹ Añña ñeñt yemtenaya Jesús allempo atet eñchet o'ch rromoset Jesús, ñetñapa' atet ochet:

—Ayochreshate ¿amafe' pocto o'ch yemoñsaña yocchello?

⁵⁰ Puesheñarrña pueyochresha' allenta chetan po'cchell ahuo'ch chonto'tapan cornesha' pa'cheñer puetepa'tcha' tsorroñ po'cohuenrot. Ñeñtpa' año pa'cheñer ñeñt pa'mcha'tareter pen allohuen judionesha' po'cornaneshar.

⁵¹ Jesúsña allempo entan pueyochresha' atet p'apa' ñañapa' otanet:

—Ñeñtepa'ta, amach atet sepatsto.

Allempoña ñeñt tsorrqueta'tetpa' alla a'plerrñañ puet o' alla orrater o' e'ñe correrra.

⁵² Ñeñt hua'cha'toya ñeñtcha' rremose' Jesúsapa' ñeñtpa' añca'ye ñeñt pa'mcha'tareternesha' p'a'yen allohuen judionesha' po'cornaneshar, ñaña ñeñt judionesha' po'guardianeshar ñeñt cohuanpene' Parets pa'paquell ñaña ñeñt pompornesha' pen allohuen judionesha'. Allempo hua'cha'toñetpa' Jesúsñapa' atet otapanet:

—Eso'mare't sehua'cha'tennanaña e'ñe occhelletareroches ñaña etsach-peretareroches attoch serrma'n. Napa' ¿e'ñe't atet sentenen ñerra'mrate' eñeten?

⁵³ Napa' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaye'ña serrma'ne'te. Tarro'mar te' o' chap allempo ñeñt poctetsa socop ñeñto'mar te' o' chap allempoch oneñetpa' o'ch orrtatennas po'huamenc, ñeñtpa' e'ñe atet ñerra'm checmete'.

Atto Pedropa' a' nasotana Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Allempoñapa' rremoset Jesúsapa' arr aneret añcha'taret pa'paclo ñeñt pa'mcha'tareter pen allohuen judionesha' po'cornaneshar. Pedroñapa' ñapa'cho'ña cote' tarraña ñapa' chenta' en a'yo't.

⁵⁵ Petoña rro'ch pampopa' all a'torenet tso' all anorrcha'tyen acheñenesha' ñeñt shotetsa. Pedroñapa' all anorros ñaña all shotosa.

⁵⁶ Allempoña huapa coyanesha' ñeñt añcha'taret pueñañra. Entosan Pedro all shotenapa' alla cohuos, atet otos:

—Añpa'cho'ña encanesharpa' ñeñttramtso yemtaye'tña Jesús.

⁵⁷ Tarraña Pedroña cha a'nasochapa' atet otanña coyanesha':

—Napa' amaca'ye nentare.

⁵⁸ E'ñe o'chtapa' huapa ñaña po'psheñeñ entuererrpa' ñapa'cho'ña atet otuererr:

—Papa'cho'ña parroca'ye e'ñe peyemtena.

Pedroñapa' atet otan ñeñt yacmar:

—Napa' amarramche' erra neyemtenoña na epan ña.

⁵⁹ O' tama o'chterrerrpa' o' alla huerrerr po'psheñeñ, ñapa'cho'ña atet otuererr:

—Po'ño'chca'ye añmapa' ñeñtca'ye e'ñe yemtenaya tarro'mar ñapa'cho'ña galileo'marnesha'ca'ye atet ñerra'm Jesús.

⁶⁰ Pedroñapa' alla oterranerr ñeñt yacmar:

—Amarramche' neñoteñeña este'ña atarr p'otenen.

E'ñe allempo atet eñorena Pedro, e'ñepa'tcha' allempocma eñeña atollop.

⁶¹ Allempoña Partsesha' Jesúsapa' cohua' allente'tsen Pedro. Pedroñapa' allenta yerpuerrana atet o'neñ Partsesha': “Amach eñena' atollop ñeñte tsaprocma pañapa' o'ch ma'poch pa'nasotenna.”

62 Allempoña Pedropa' ahuo' a'yo all e'ñe puellquëñsha' yahuosa huomenc.

*Atto atarr achmare'teñet Jesús
(Mt. 26.67-68; Mr. 14.65)*

63 All yottam̄psateñet Jesús am̄cha'tareť pa'paclo añña solltarnesha' ñeñť cohuan̄psachet ñetñapa' atarr achmare'teñet Jesús all cohuan̄peñet. Atarr čhota'teñet.

64 Huancacalle'cheñet, pachmare'teñoťetpa' atet oteñet:

—Ñehua, te'ña eñoratenperrepa' Parets allochñapa' attoch p̄otey esesha'te'ña pečhota'tyene'.

65 Elloña pachmare'teñoťetpa' pa'namen esocmañen otyeñet, sochatse'tyeneñet.

*Allempo čhapata'mueñet Jesús all ap̄cha'muena allohuen judionesha' pa'm̄cha'tareťernesha' ñeñť a'pocatyene' ñoñets
(Mt. 26.59-66; Mr. 14.55-64; Jn. 18.19-24)*

66 Tsapaña allempo puetarenpa' ap̄cha'muena allohuen ñeñť pomporne-sha' pen judionesha' epuet ñaña ñeñť pa'm̄cha'tareťernesha' pen allohuen judionesha' po'cornaneshar epuet ñaña ñeñť atarr etsotayenayeñ ñoñets ñeñť atet anareť. All ap̄cha'muena allohuen judionesha' pa'm̄cha'tareťernesha' ñeñť a'pocatyene' ñoñets, all anma'mueñetña Jesús. Allñapa' a'p̄to'tare'tapet, atet otapet:

67 —Yapa' te'pa' yemneñ o'ch p̄otosey ñerra'm po'ñočhte' p̄a ñeñťep̄ Cristotets.

Jesúsñapa' atet otosanet:

—Ama't notatstas na po'ñočh ñeñťen Cristotets sañapa' amachca'ye pocteye' sentno attoch same'ña'na.

68 Ñaña napa'cho'ña ama't o'ch es na'p̄to'tas saña sañapa' amachca'ye sanapnoña naña. Tarro'mar sapa' amachca'ye semno sa'rroyerren.

69 Tarraña te'pa' ama'tcha' atet sepa'noñ te'ñapa' o' e'ñe čhap allempoch o'ch alla nanorruerr Nomp̄or po'cohuenroť ñeñť atarr ahuanenat̄tetsa, ama't na Ñeñťen Acheñetosets.

70 Allempoña allohuenet atet oteñet:

—Ñeñťep̄ñapa' ¿p̄a'tarraña Puechemer penña Yompor?

Jesúsñapa' atet oterraneterr:

—E'ñeca'ye po'ñočh ñeñť atet sotenen sa.

71 Allempoña ñetpa' atet otanna'tyeset:

—Te' yapa' ama yemneñe po'potantañ ñeñťcha' a'metare'tam̄p̄sose' tarro'mar te' yapa' allohueney e'ñe ye'mhuen ñeñť atet otena añ acheñer, ñapa' Yomporo' Puechemer. Ñapa' čhaca'ye atarr achmare'tenan Yompor.

23

*Allempo čhapata'mueñet Jesús allo'tsen am̄cha'tareť Pilato
(Mt. 27.1-2, 11-14; Mr. 15.1-5; Jn. 18.28-38)*

1 Allempoña allohuenet tantrra'tuet, e'ñe parrocm̄a anmet Jesús allo'tsen am̄cha'tareť Pilato (ñeñť nen gobierno Romoť ñeñť am̄cha'tareťtetsa allo'marneshacop).

2 Allñapa' atarr otteñe'choset, toma'tam̄pesyesoset, ñeñťpa' atet otyesoset:

—Ya añ acheñer čhocma yenteñ yečhatyenan yamo'tseshačhno judionesha' ñeñť ama't mameshapa' ama cohuenayaye, ñaña atet oteney año'ch

yetsa'tatsto impuesto ñeñt romo'marneshacop ñeñt nen amcha'taref Romot. Ama't ñapa' atef otena ñapa' ño' Cristotets ño' atarr amcha'tarettetsa arr.

³ Allempoña amcha'taref Pilatopa' a'p̄to'tapan Jesús:

–Papa' ¿pa'tña judionesha' pa'mcha'taretereþ?

Jesúsñapa' atef och:

–Atetca'ye atef þotenen.

⁴ Añña ñeñt pa'mcha'tareternesha' pen allohuen judionesha' po'cornaneshar ñaña acheñeneshaçhno, ñetñapa' atef otanet Pilato:

–Ñehua, napa' amaca'yeña nentoñeña ñeñt atto ama pocteye' es penoña añ acheñer.

⁵ Judionesha'ña pa'mcha'tareternesha'pa' alla otereterr Pilato:

–Tarraña yañapa' chocmaña yenteñ ñeñt atef yeçhatyenan acheñenesha' attoch atpare'tatenanet gobierno. E'ñe Galileoteñ atef pena, ama't te'pa' o' çhap ñaña arr Judeo e'ñe attecma o' yeçhatuerrerr ñeñt ama cohuenaye' yenteno ya.

Allempo çhapata'mueñet Jesús allo'tsen ñaña amcha'taref Herodes

⁶ Atto' e'mñnotenán judionesha' atef otyenet e'ñe Galileoteñ yeçhaten, allempoña Pilatopa' atef a'p̄to'tanet:

–Jesúsapa' ñapa' ¿galileo'marnesha'tña?

⁷ Allempoña eñotachet ñapa' po'ñoçhca'ye galileo'marnesha' allempoña Pilatopa' atef cotape'ch ñeñtpa' Herodesocpaca'ye tarro'mar ñapa' ñeñt amcha'tarettetsa galileo'marneshacop. Ñeñto'marña ñapa' mueñan Jesús Herodesesho tarro'mar Herodespa' allempo çhap Jerusaléño all emo'ten.

⁸ Herodesñapa' e'ñe pocsheñesha' agapaneñ Jesús tarro'mar ahuatoteñ atarr mueneñ o'ch eñch tarro'mar ñapa' atef e'mare'tenan Jesús ñeñt atef pa'yena. Ñapa' añecopña atarr mueneñ o'ch orrtatoñ ñaña ñeñt atef pa'yena orrtatyese' ñeñt ama puentareto.

⁹ Atarr es a'p̄to'tare'tapaneneña Jesús tarraña ñapa' ama anapanoña Herodes ama't e'ñe parrocha.

¹⁰ All tomcha'toset ñaña allohuen amcha'taretnesha' ñeñt pa'mcha'tareternesha' pen allohuen judionesha' po'cornaneshar ñaña allo'tsen ñeñt atarr etsotayenayeñ ñoñets, ñetña allpa' otteñe'chuereterr Jesús all Herodesesho, pa'namen otyesuerreterr.

¹¹ Allempo Herodes ñaña allohuen po'solltarneshar ñetpa'çho'ña puer-raþsoñet ñamet. Achñare'chet all che'tatseteñet. Pueche'tatseteñoñet chorra-chet amcha'taref pa'shtam ñeñt atarr cohuen. Allempoña Herodespa' o' alla mueño'ter Pilatesho.

¹² Ñeñto'marña Herodes epuet Pilatopa' e'ñe allempocma amo'tstannerret tarro'mar ahuañmo'çhapa' çha e'moñe'tannenet.

Atto amcha'taref Pilatopa' otanet ama'tpa' çhosa muetse' Jesús

(Mt. 27.15-26; Mr. 15.6-15; Jn. 18.39-19.16)

¹³ Allempoña Pilatopa' alla apçhaterran ora allohuen judionesha' pa'mcha'tareternesha' ñeñt po'cornaneshar pa'mcha'tareternesha' ñaña po'potantañ judionesha' pa'mcha'tareternesha' ama't ñaña allohuen acheñenesha'.

¹⁴ Pilatoñapa' alla otapuerraneterr:

–Añ acheñer ñeñt sehuapatennan ñeñt soten sa ahuo' yeçhatyesan acheñenesha' ñeñt ama cohuenaye' senteno sa, te'ña napa' o' na'p̄to'tare'tue ama't allempo allo'tsa'yenes tarraña nañapa' ama't parrochapa' ama nentoñeña ñeñt atef sotyen atto' pena ñeñt ama cohuenayaye.

15 Ama't ñaña Herodespa' ama entoñeña ñeñt ama pocteye' yečcateno, ñeñto'marña o' alla mueñer nesho. Po'ñočpa' amaca'ye eñalleña ñeñt atet pen ñeñt ama cohuenaye' yenteno allohueney attotcha' yemtsatach.

16 Ñeñto'marña na te'pa' attachca'ye necoñchach mame'pa' o'ch alla na'rroyer.

17-19 Tarraña allohuen judionesha' puerrannarteñoet atet ochet Pilato:

—Pemtsatachñaca'ye, añcha'ña pa'rroyerrnay Barrabás.

Ñehua, ñeñt Barrabás ahuañmo'choñeñ yottampeñet tarro'mar ña yečcatene' acheñenesha' atpare'chetepa' amcha'taret ñeñt nen gobierno' Romot. E'ñe patpare'teño o' muetsan acheñ. Ñehua, ñetpa' atet yečchenet. Pate'tets pascuapo ñeñt amcha'taret ñeñt nen gobierno' Romotpa' o'ch a'rroyerrñañet judionesha' puesheñarr pamo'ts ñeñt ayottamñsarettetsa ñerra'm erra'tsen muenenet ñet, ñeñtpa' añecop a'rroyenanet attoch coshatenan judionesha'.

20 Ñeñto'marña Pilatopa' atarr mueneñeñ o'ch a'rroyerranet Jesús, ñeñto'marña alla a'p'to'terranerr allohuen acheñenesha'.

21 Tarraña ñetña'pa' ama't mameshapa' amaña pocteye' enteñeto. Elloña ñeñtpa' rrannartet allohuenet, atet oterete't:

—¡Pecorso'tamñsach! ¡Pecorso'tamñsachñaca'ye!

22 Poma'pocheño Pilatopa' alla otterraneterr:

—¿Eso'mare'tña semneñña o'ch necorso'tamñsach? Napa' amaca'ye nenteññañeña ñeñt atto ama pocteye' es peno attoch yemtsatach. Ñeñto'marña napa' attachca'ye, necoñchach mame' allempopa' o'ch alla na'rroyer.

23 Tarraña ñetpa' ama cačhpueñeto otare'tet. Elloña ñetpa' e'ñe puerrannarteñoet atarr enamueñet attoch corso'tamñsach.

24 Ñeñto'marña Pilatopa' ame'ñachet. Attoña ñapa' atet eñora:

—Te'pa' o'ch atet neponas ñeñt atet atarr semnen sa.

25 Ñeñto'mar allempo a'rroyanet Barrabás ñeñt enamueñet ama't ñeñt patparño yottampeñet ñaña puentseño'acheñ. Tarraña Jesúsña'pa' o'apanet attoch muetsat ñeñt atarr muenenet ñet.

Atto corso'tamñsoset Jesús

(Mt. 27.32-44; Mr. 15.21-32; Jn. 19.17-27)

26 Allempo anmet Jesús a'yo allcha' corso'tamñsoset. Allña oñenetpa' allña'pa' poctet puesheñarr yacma ñeñt cireneo'marnesha' ñeñtpa' añ pa'so'cheñ Simón ñeñt errete' huerrtsa a'yo't. Ñeñña rremapetpa' o' chechatnomet Jesús po'corsoch ñeñña anmue'ña chenta'.

27 Allña'pa' co'ta'huanem' shonte' acheñenesha', shonte' coyanesha'čno ñeñt atarr ya'na'tnene' Jesús chenta', atarr gogaretyesnenet puellquëñoet.

28 Tarraña Jesús'pa' allenta cohua'nmanet, atet otnomanet:

—Nočhanesha ñeñtes jerusaléño'marneshas, amach atarr seya'na'tatsteno na. E'ñe socpa atarr seyahuena sacñeñaretolleshohuen.

29 Tarro'mar esempopa' čhocmach huaponasa ñeñtcha' atarr sellcaterre'. Allempoña coyanesha' ñeñt ama achoyore'tñepa' ñocpuetña'pa' e'ñech cohuen entaretterret allempo tarro'mar ñetpa' ama eñalleto puechoyoreshet ñeñtcha' atarr mueročhterrtsa. Ñeñto'marña allempopa' otyerrcha' allohuen acheñenesha': “O' atarr cosheñtso'tsenterra muečhoñnesha', ama't allohuen ñeñt ama achoyore'tñe, ama't allohuen ñeñt ama es moma'yeneto.”

30 Tarro'mar allempo puemuročhteñoet e'ñe puellquëñoetpa' atarrcha' ya'ñameterret. Pueya'ñameteñoetpa' e'ñech pocte' entyerret

ñegatamperretepa'to' attoch pampuerranet e'ñe poctacma. Allochñapa' o'huañcha' allo'na atarr nanac muerochtetenet.

³¹ Tarro'mar te'pa' atto muerochtatenet na ama't napa' e'ñe cohuen es norrtatyleneñ, e'ñe atteneñ ñerra'm tsach e'ñe cohuen emmo'rate'. Ñeñto'mar te' napa' neñoteñ elloña atarrcha' amuerochtataretterra ñeñt ama cohuenaye' es orrtateno; ñeñtñapa' e'ñe atet pena ñerra'm tsach rromuech. Arrpa' allohua atet otnomanet Jesús allempo aneñet allcha' corso'tam̃psoset.

³² All aneñet ñaña epsheña ñeñt amtsañ ñeñtcha' epuet corso'tam̃psoset.

³³ Allempoña chapachet all oteñet Poñetallepno, allña corso'tam̃psosetña epuet ñaña epsheña ñeñt amtsañ, puesheñarr nosñañet po'cohuenrot, po'psheñeñapa' nosñañet pue'chcoferot.

³⁴ E'ñe allempo corso'tam̃psosetpa' Jesúsñapa' atet ma'yocham̃psosana ñeñt e'moñe'tene', ñeñtpa' atet ot:

—Nomparcha' te'pa' pepretnanetepa'ch tarro'mar ñetpa' po'ñoçhpa' ama eñoteneto ñeñt atet yeçhcatenet, ñeñt ama pocteyaye.

Allempoña solltarnesha'pa' yellsheñe'chatoñet pa'shtam po'suertot attoch orrta puesheña'tets ñeñtcha' yorayese' puema'tets.

³⁵ Acheñenesha'ñapa' atta cohuanrrorteñet all tomchenet a'yeneñ. Pa'm̃cha'tareterneshet ñetñapa' atarr es otnare'teñet, atet otatse'tyeñet.

—Te'ña p̃apa' o' p̃a'queshp̃atyes po'potantañ, te'ñapa' p̃a'queshp̃aterra e'ñe p̃añeña ñerra'm po'ñoçhte' ñeñtep̃ acren Yompor ñeñtcha' Cristotosets.

³⁶ Solltarnesha'pa'cho'ña atarr achm̃are'teñet, che'tatseteñet. Pueche'tatseteñoñetpa' ponem̃yetpa' aposet vinos ñeñt atarr chella'se'.

³⁷ Pachm̃are'teñoñetpa' atet otyeñet:

—Ñerra'm p̃a po'ñoçhte' ñeñtep̃ pa'm̃cha'tareter pen judionesha', te'ñapa' p̃a'queshp̃aterra p̃añeña.

³⁸ Ñehua, poñot all corsocho all noñet tsachtall aquellcareñ ñeñtña quellecpa' atet oten: “Añpa' ñeñtca'ye judionesha' Pa'm̃cha'tareter.” Ñeñtña quellecpa' ñeñt anareñ ma'po'mar ñoñets—griegach, latinaçh ñaña hebreyach, e'ñe attecma oten.

³⁹ Puesheñarrña amtsañ ñeñt parro corso'tam̃peñet, ñapa'cho'ña achm̃are'ch. Potnare'teñoñetpa' atet oteñ:

—Ñerra'm po'ñoçhte' Cristoṽpa' p̃a'queshp̃aterra p̃añeña, yapa'cho'ña o'ch p̃a'queshp̃aterrey.

⁴⁰ Po'psheñeñ amtsañpa' che'ptare'ch. Pueche'ptare'teñoñetpa' atet och:

Papa' eso'mare'tña ama pencha'na'teñeña Yompor, ama't parro amue-rochtatareñey.

⁴¹ Tarraña yocoppa' e'ñeca'ye pocte' yemuerochtena tarro'mar ñeñtpa' añ tsa'tatenyet ñeñt allpon yeyeçhcatyen ñeñt ama cohuenayaye ama't e'ñe mamesha. Tarraña añ acheñer ñeñt parro muerochtatenyet ñapa' ama es yeçhcateno ama't mamesha ñeñt ama pocteyaye.

⁴² Allempoña ñapa' atet otan Jesús:

—Napa' peyerpa'huerrno'tach allcha' p̃a'm̃cha'taretetuerra.

⁴³ Jesúsñapa' atet och:

—Napa' po'ñoçhca'ye notaṽ, e'ñe tayecma parro'tseneycha' cosheñtso.

Atto rroma Jesús all po'corsocho

(Mt. 27.45-56; Mr. 15.33-41; Jn. 19.28-30; Heb. 9.11-14)

44-45 Allempoña chap pocto atsne'pa' o'huañ atsnom, o' e'ñe checmetua errañaren añe patsro. O'ña ellerrotnenmochapa' o' alla puetarerr. Allempoña ñeñt besom allo yottampeññañet Parets pa'paquëll po'ponro ahuepa't rrrarra'nom e'ñe poctacma, o' e'ñe ellopa'tetsta.

46 Allempoña Jesús pa' rrana. Puerranarotpa' atet ot:

—Nompurcha' te'pa' o' nepomuerra e'ñe p̄ocop e'ñe necamquëñohuen.

E'ñe ñeñña otuapa' o' rroma.

47 Solltar po'cap'táner ñeñt romo'marnesha' ñeñt corso'tam̄pse', allempo atet ent atet o' pa, ñaña pa' allenta aye'chochtatan Yomporpa' ñapa' atet ot:

—Añ yacmarpa' po'ño'chuaca'ye e'ñe attota o' yemtsatater, amaca'yeña eñalleña attoch yemtsataterëñ.

48 Ñaña allohuen acheñenesha' ñeñt allo'tsa'yen ñeñt ente' ñeñt atet o' p̄ach o' yoroçhtach, ñetña pa' puellquëñesha' na'yesnerret pot puesomapo ahuanerret.

49 Allohuen ñeñt atarr yemtaye't Jesús ahuañoñeñ ñaña allohuen coyane-sha'čno ñeñt co'ta'huanmue' Galileo't ahuañoñeñ, ñetña pa' alla tom'cha'tyenet a'yenet allot atta cohuanrrorteñet ñamet.

Atto pampuet Jesús

(Mt. 27.57-61; Mr. 15.42-47; Jn. 19.38-42)

50 Eñall puesheñarr yacma ñeñtara judionesha' ñeñt e'ñe cohuen acheñ e'ñe pocte' es pa'yen, ñeñt pa' añ pa'so'cheñ José ñeñt arimateo'marnesha'. Ñapa'cho'ña puesheñarr ñeñt pa'm'cha'tareter pen allohuen judionesha' ñeñt parrocmā chocmach ap'chenet epuet po'potantañ am'cha'tareñesha' attoch a'poctatenet ñeñt llequëna allohuen judionesha'.

51 Ñehua, ña ahuaña allempo ap'chenet parro po'potantañ am'cha'tareñesha' atto o'pateñet Jesús o'ch muetsatachet, ñaña pa' ama't mameshapa' ama pocteye' eñche. Tarro'mar ñapa' ñeñt atarr cohueñe' Yompor esempohuañencha' o'ch atarr ayochreshaterra.

52 Ñeñtña José pa' o' ahuo' Pilatesho o'ch oteña' pocte'ch eñch ñach a'suatose' Jesús ñeñt rromuets corsocho.

53 Pilatoña pa' e'ñe pocte' eñch, ñeñto'marña ñapa' a'suater corsocho't allempoña pa' ep'atse'ch shetamtso ñeñt e'ñe cohuen, allempoña pa' anemñ allcha' pampueña'. All eñareñ mapuetpon all ama apampare'ttena' po'poñ arromña't, allca'yeña nenana'ña Jesús.

54 Ñehua, allempo pampuet Jesús pa' ñeñt pa' añe yetro allempo chocma añño'tena judionesha' ñeñt tsapa'tecop allempoch ameserreter. Ñehua, allempo pampa'huet Jesús pa' o' ellerren, ñeñto'mar judionesha' pa' o' mottan ñeñt tsapa'tecop allempoch amesa'muenet e'ñe poctacma.

55 Ñeñtña coyanesha'čno ñeñt atarr yemtenaya Jesús ñeñt co'ta'huanmue' ahuañoñeñ Galileo't, ñetña pa' co'ta'huanmet all pampueñeta' attoch eñchet allcha' neret Jesús.

56 Allempoña ñet ona'cherret allotpa' o' cha'cherret pocollo, ñetña pa' allohuenetpa' yorayesuerret ñeñt atarr eñmosa'te'čno alloch a'yana'tereta' Jesús ora po'chtsohuen attoch e'ñe cohuen eñmosa'tatereta'. Ñeñt pa' e'ñeca'ye atet ye'chenaña judionesha'. Ñetpa' alla añño'tuaneñetña eñmosa'te'čno tarro'mar tsapa'tpa' amach serreto puepampro tarro'mar tsapa'tcha' chapa'muen ñeñte yetro allempo chocma amesen judionesha' ñeñt atet anare'ttenet ñocpuet.

24

Atto tanterra Jesús

(Mt. 28.1-10; Mr. 16.1-8; Jn. 20.1-10)

¹ Allempo o' huañ yetñats allempo amesenet, allempo motta'muena yetñats temenc coyaneshačhnoñapa' e'ñe ahuatēcma ahuanma'muenet all pampueñet Jesús. Anma'mueññañet eñmosañečhno ñeñt o'patateñet alloch a'yana'toset. Allñapa' coťa'nma'muenanet po'potantañ coyaneshačhno.

² O'ña čhača'ta'muenet allpa' mapue'ña ñeñt allo mopam̄pset Jesús ñeñt puepampuer p̄achet ama atteraye' entoseto ñeñt atet p̄am̄pset po'poñ ellerro. Entoset mapue' o' a'rrote'tarettena a'yenet.

³ Allempoña ñetpa' esho'trra'toset mapuetpono ñeñt puepampuer p̄achet amaña esesha' entosayeña arromñañ all net.

⁴ Ñetñapa' čha muene' yoruoset ama eñoteñeto erroťcha'ña p̄oset. E'ñe allempo atet coťape'chyenet ahuepa'tcha' orrtapanet epsheña yacma alla tomčha'toset e'ñe allo'tsa'yenet, atarr cohuen popuetyenet pa'shtamuet.

⁵ Ñetña pueyorñoťetpa' atta mo'crra'tyeset patso. Pom̄chañotet ama esh-caye' cohua'p̄seto allenet ten. Ñeñtña yacma epsheña' atet otosanet:

–Ñeñt ama arromñañeshayaye, eso'mare'tña se'name'teñña arr allecma nannena arromñañenesha'.

⁶ Te' ñapa' amaca'ye allo'tsenarayaye arr, o'ca'ye tanterra. Ama't seyer-pueñoña ñeñt atet otase't ama't ahuañmo'choťeñ allempo Galileo'tsenmeñ.

⁷ Ñeñtapa' atetca'ye otase't ñapa' ña Ñeñt Acheñetosets čhocmach pomueret attoch erroťuanen per po'poñ acheñ ñeñt atarr ochñañenesha' attoch corso'tañperet, tarraña poma'pamtañoñapa' čhocmach tanterra.

⁸ Allempoña ñetpa'čo'ña allenta yerpueret atet otanete't ahuañmo'choťeñ Jesús.

⁹ Allempoña coyaneshačhno'pa' onacherret puepamproť, čhačerret pocollopa' serrpare'tatueret Jesús puellsensarnesha' ñeñt čharrasheña ñeñt puesheñarraña o' puecherra ñaña po'potantañečhno ñeñt pueyochresha' pen. Coyaneshačhnoñapa' serrpare'tueret allohuen ñeñt atet enta'muenet Jesús puepampro.

¹⁰ Ñeñt serrpare'tatenaya' Jesús puellsensarnesha' ñeñtapa' añ María Magdalena ñaña Juana ñaña po'psheñeñ María ñeñt Jacobo pachor ñaña po'poñečhno coyaneshačhno.

¹¹ Tarraña Jesús puellsensarnesha' allempo serrpare'tatosanet coyaneshačhno ñeñt atet entua'muenet, ñetñapa' ama't mameshapa' ama ame'ñyetoña coyaneshačhno, čha otenapuetañ attate' otatse'tyen coyaneshačhno.

¹² Tarraña Pedroñapa' allenta ta e'ñe matenacma. O'ña čhap ñaña puepampropa' mo'cosa, cohuos o'pononet all net. Ñapa'čo'ña ama entose, shetamtsa entos allo ep̄atse'chet alla o'shshe'ma'yena a'yenet. Ñapa'čo'ña ahuer pocollo ama eñoteñe ñato' erro'tsente'.

Atto Jesúsapa' rremuerrana' epsheña pueyochresha' toño allempo senet Emaúso

(Mr. 16.12-13)

¹³ Ñeñte yetrocma epsheña pueyochresha' ñetñapa' arr senet anetso ñeñt pa'so'cheñ Emaús. Ñehua, ñeñt pa'so'cheñ anets Emaúspa' Jerusaléñoťeñpa' allo'tsente' čharra' puechena paťerr kilómetro čoycha' čhapats anets Emaúso.

14 Ñetñapa' e'ñe pueserrparñesha' senet, añ serrpare'tyesnenet ñeñt allpon atet o' pohua.

15 All senet e'ñe pueserrpare'teñeshetpa' anapanna'tyesnenet Jesúsñapa' alla rremuerraneta'. Allempoñapa' chope'chnomuet e'ñe parro o' ahuanmuet anetsonet.

16 Tarraña ama't entapetañña Jesúsapa' ñetñapa' cha ottenet ñerra'mrrate' ama amnataretteneto attoch cheme'tapet, ama esesha' cheme'taye.

17 Jesúsñapa' atet otosan pueyochresha':

—¿Eso'tña seserrpare'tyesnen? ¿Eso'mare'tña cha atarr sellca'nena?

18 Puesheñarrña ñeñt sochetsa Cleofas, ñañaapa' och:

—¿Ama't peñoteñeña allohuen ñeñt Jerusaléno'tsen ahuañoñeñ o' e'ñe e'mare'tuet ñeñt atet o' metua all? Papa' ¿paptate'ña ñeñteñ taya chapats all Jerusaléno ñeñteñ ama eñotosaye ñeñt atet o' pohuerret Jerusaléno?

19 Ñañaapa' atet otnomanet:

—¿Eso'tña ñeñt atet o' pohuerretña all?

Ñetñapa' alla otnereterr:

—Añca'ye yeserrpare'tnen Jesús ñeñt nazareto'marnesha' ñeñt a'mtene' Yompor po'ñoñ ahuaña. Po'huamencot orrtatennay po'partsoña ñeñt ama't ahuaña yapa' ama yentare. Ñaña atet yechatyese't ñeñtapa' atarr cohuen. Ñeñtapa' e'ñe pocte' entapreteñ Yompor; acheñenesha'pa'cho'ña e'ñe pocte' enteñet.

20 Tarraña ya'micha'tareternesha' ñaña ñeñt pa'micha'tareternesha' pen allohuen judionesha' po'cornaneshar, ñetñapa' o' pomueret Jesús attotca'yeña o' muetsatateret, ñeñto'marña o' corso'tamperet.

21 Tarraña yapa' ñeñtca'yeña atarr yemneneñ ñato' ñach ya'rroyatatosayeña allohueneñ ñeñteñ israelena'tarey (atto amcha'nochtana'tenya romo'marnesha' ya ya'netsro). Tarraña te'ñapa' chaña o' muetseret. Te'pa' o'ca'ye ma'pamta'muen.

22-23 Ñaña te'ña coyanesha'chnoña ñeñt parro yeyemtena, ñetñapa' ahuatecma ahuanma'muenet o'ch enta'mueñet puepampro ñetñapa' año' eseshaye' entosayeña puepampro all neretañ. Allempoña huacherret puepampro't atet serrpare'tatuerryet, allñapa' año' orrtahuet mellañoñeñ ñeñto'ña otahuet Jesúsapa' o'ca'ye tanterra o' alla betterra. Ñeñto'marña yapa' ñeñtña atarr yeyore'tene'.

24 Allempoña ñaña allponsheña ñeñt parro yeyemtena, ñetpa'cho'ña alenta ahuanmuet ñamet puepampro. E'ñe atet otuerrey coyanesha'chno, ñetpa'cho'ña ama eseshaye' entosaye.

25 Jesúsñapa' alla otnerraneterr:

—Sapa' ama es sechenoyoña seyo'chro, atarr se'charrtaten seyo'cher attoch e'ñe same'ña'huaña ora ñeñt atet eñosyese't Cristocop allohuen ñeñt a'mta'yese't Yompor po'ñoñ ahuañoñeñ.

26 Ama't señoñeña ñeñtcha' Cristotatspa' atetca'ye anareña ñocop ñapa' atarrcha'ca'ye amuro'chtataretetuanena choch rromats. Elloñapa' o'ch alla cherr esempo allempochña e'ñe cohuen a'cohuentataretterra.

27 Allempoña Jesúsapa' o' yerpatnerraneterr ora allohuen ñeñt atet anareñ añecop ñeñtcha' Cristotats. E'ñe Moisés po'ñoñoñeñ yerpatnomanet ñaña po'potantañe'chno po'ñoñ ñeñt eñosyestse't Cristocop, ñeñtara ñeñt a'mta'yese't Yompor po'ñoñ ahuañ.

28 Allempoñapa' chapmochet anetso all sechenet. Jesúsñapa' cha otetnena ñerra'm ñapa' amtoche'ch.

29 Ñetña alla puepateñoŕetpa' atet ochet:

—Allachca'ye yeŕhap arr parro o'ca'ye tsapuenmoch.

Allempoña Jesúsŕa' be'ŕosos allcha' ŕhapuet.

30 Allempoña anorrŕha'toset allcha' rrallme'choset. Jesúsñapa' chetosan pan, parasyoso'tamŕpsosan pan, shota'tospa' apa'yesosanet.

31 Allempo atet ŕosa, pueyochresha'ña epsheñapa' ŕha e'ñe cheme'toset añpa' ñeñŕepa'tca'yeña Jesús. E'ñe allorocma ñetpa' o' amnatareŕterret attoch e'ñe cheme'teret. E'ñe cheme'terretpa' allepa'tcha' ma'natañperranet.

32 Allempoña ñetpa' atet otanna'tyeset:

—Ñeñŕo'marepa'tca'yeña atarr nanac coshatosey ñorra' ama't ŕha yellquëna yeyochro allempo serrpare'tatnomuey toño all yerpatnomya Yompor po'ñoñ ñeñŕ atet ana'yesareŕ e'ñe ñocop.

33 Ñetña e'ñe allorocma tanrra'terretpa' o' alla ahuanerret Jerusaléño. Allñapa' o' ŕherret allo'tsa'yen po'potantañ puellsensarnesha' ñeñŕ o' ŕharrasheñaña puechena puesheñarr. Allo'tsen ñaña po'potantañechno.

34 Allña ñetpa' atet otueret po'potantañ:

—Po'ñoŕhca'ye o' tanterraña Yepartseshar. Elloneñña' orrterrana ñaña Simón.

35 Allempoña ñetpa' serrpare'tueret ñeñŕ atet enteret toño ñaña all shota'tosan pan, attoña ñetpa' allña e'ñe cheme'tosetña Jesús.

Atto Jesúsŕa' orrterrana allohuen pueyochresha'

(Mt. 28.16-20; Mr. 16.14-18; Jn. 20.19-23)

36 Ñeñŕa atarr otatsetyenetpa' Jesúsñapa' ŕhepa'tcha' tomhuets e'ñe all chorren allohuen pueyochresha'chno. Alla huomŕha'tuenanet, puehuomŕha'tueñoŕanetpa' atet otuenanet:

—Te'pa' ŕhosaña e'ñe cosherrtsa seyochro.

37 Tarraña ñetñapa' ŕha atarr yore'tuenanet, ŕha atarr mecha'trra'tet, ŕha otenapuetañ choyeshe'matŕe' orrterranel.

38 Jesúsñapa' atet otuenanet:

—Eso'mare'tña sañapa' ŕhaña seyoren. Eso'mare'tña sañapa' ŕhaña atarr se'charrtatenña seyocher.

39 Te'pa' o'ch secuapuennan not ama't ñaña netac attoch e'ñe señoŕapuerren naca'ye. Sa'ŕllapuennan nechets, secua'yesapuennan nechets allochñapa' o'ch e'ñe señoŕapuenen. Napa' ñeñŕen echtsoŕen, choyeshe'matŕpa' amaca'yeña echtsoŕeyayeto ñaña amaca'ye anpaŕeyaye atet o' sentapuenen napa' echtsoŕenca'ye ñaña anpaŕenca'ye.

40 Allempoñapa' gatuenanet pot ñaña pa'tac.

41 Ñetñapa' atta cohuanrrortapueñet. Ama't atarr coshapueñetañpa' amaña e'ñeye' ame'ñapueñeto ñato' po'ñoŕhte' Jesús. Atta echarrtatenet pueyocher tarraña Jesúsñapa' atet oterraneterr:

—¿Arrpa' ama't secheno ama't coñe'ta rreñets?

42 Ñetñapa' aña apapueñet pasheŕarr cac achmareŕ ñaña pets pocoyemñ all nenan po'moñ.

43 Ñeñŕa agaphuenpa' o' rrohueñ all chorrenet attoña ñetpa' entapueñet.

44 Allempoñapa' atet oterraneterr:

—Ñeñŕ atet notase't allempo orameñ allo'tseney e'ñe parro, ora allohuen ñeñŕ atet anareŕ ahuatoteñ Yompor po'ñoño nocop, ñeñŕña te'pa' o' e'ñe etsotuerra—e'ñe Moisésoteñ po'ñoñ ñeñŕ atet anareŕ ama't ñaña ora allohuen ñeñŕ quellca'yesone't ñeñŕ a'mta'yesaye't Yompor po'ñoñ, ama't ñaña ñeñŕ

aquellcarettatset libro Salmos, te'pa' ñeñña o' e'ñe etsotuerra ñeññ atet ana'yesaret nocop ahuatoteñ.

⁴⁵ Allempoñapa' o' chapatanet pueyoçhreto allohuen ñoñtsoçhno ñeññ aquellca'yesaret ñocop.

⁴⁶ Jesúsñapa' alla oterraneterr:

—Po'ñoçhpa' allohuen ñoñets ñeññ aquellca'yesaret atetca'ye oten ñeññcha' Cristotosetspa' çhocmach po'ñoçh rromos, tarraña poma'pamtañoñapa' o'ch alla tanterra.

⁴⁷ Attochña serrpare'teret Cristo e'ñe Jerusaléñoñeñ errañaren ora allemeñ allohuanen acheñeneshesho'mar. Attotcha'ña acheñeneshapa' o'ch cotape'cherret ello e'ñe cohuen Yomporecop allochñapa' attochña o'ch e'ñe açpretna'huaretterret allohuenet po'chñaret.

⁴⁸ Jesúsñapa' atet oterraneterr:

—Te'ña sapa' o'ch sa'poterrnan ora ñeññ allpon atet sentyesne't ama't teme'ttsen.

⁴⁹ Naña sa te'pa' ellonet o'ch atet notnerres, po'ñoçhca'ye napa' nemñoahuernnascha' Yompor Puecamquëñ entot ñeññcha' e'ñe sechorra'yesaya e'ñe puesheña'ttsos ñeññ atet oten Yompor ñeññcha' e'ñe apa'yerres. Tarraña sañapa' allasach anetso Jerusaléño, esempohuach chorrata Paretso Puecamquëñ ñeññcha'ña ahuañenat sepa'yesose' ñeññcha' apuerres Yompor pue'ntañoñ.

Allempo a'terr Jesús pue'ntaño

(Mr. 16.19-20)

⁵⁰ Allempoña Jesús err Jerusaléñoñ, ahuanerran pueyoçhreshaçhno a'yo anetso Betanio. Allñapa' echantosan potpa' bensare'tam̄pesyesosanet.

⁵¹ E'ñe puebensare'tam̄peñoñanetpa' allñapa' a'tenoche' pue'ntaño o' sohuananña pueyoçhreshaçhno.

⁵² Ñetña allempo atet entapueret Jesús ahuer pue'ntaño'pa' pa'ye'choçhtateñesha' ma'yochnerretpa' ahuanerret Jerusaléño e'ñe pocsheñeshocmañenet.

⁵³ Ñetña allempopa' ellapenete't Paretso pa'paclo all atarr aye'choçhtateññañet Yompor. Ñeññpa' attetepa'ch Nompore. Allohua.

COHUEN ÑOÑETS ÑEÑT̃ QUELLCA' SAN JUAN

Ñeñt̃ Po'ñoñ pen Parets ñeñña acheñetosets ñeñtara ñeñt̃ Cristoterrets

¹ Ahuatoteñ e'ñe ñanom pa'motroteñ Cristoñapa' eñalla epuet Pompor Parets. Ñañaapa' ñeñtara ñeñtcha' Po'ñoñ ña' Parets tarro'mar ñach eñotaterre' acheñenesha' atet oteñ Yompor Parets. Tarraña ñapa'cho'ña e'ñe attecma partsoten atet partsoten Pompor ñeñt̃ atarr nanac Parets.

² Allempo errte' ayeçcataretta pats, ñañaapa' e'ñe parro allo'tsen epuet Pompor Parets.

³ Ñeñto'marña allohuen esocmañen ñeñt̃ eñall, ñapa' ña e'ñe yeçcatue' ñeñt̃ atet muenet epuet Pompor. Ñeñt̃ allpon eñallpa' ama eñalle ñeñt̃ ama yeçcato ña, ama't esoñolla, ñocma pueyeçcatar.

⁴ Ñañaapa' añepa't ñeñt̃ alloch e'ñe yocrrena. Ñeñt̃ña alloch e'ñe yocrenapa' ñeñt̃cha' yeñotaterre' allohuen ñeñt̃ cohuen enten Pompor Parets. Ñeñto'mar ñapa' atet pena ñerra'mrrate' puetare'tarro'mar ñapa' ñach a'puetarsañperre' allohuen yoçtañña.

⁵ Ama't atet pena sosya'tsañeçhno añe patsro ñerra'mrrate' checmete', ñañaapa' e'ñe a'puetaresuos. Checmete'ñapa' ama't ahuatapa' amach errotenot a'checmetañperrano ñeñt̃ puetarñatsar ñeñt̃ Yompor po'cohuenña.

⁶ Ama't allempo ama orrtena' Cristo ñeñt̃cha' puetarñatsotosets arr patsro, ñanempa' añ orrtatsa puesheñarr yacma ñeñt̃pa' añ pa'so'cheñ Juan; ñapa' Yompor llesense'.

⁷ Ñapa' añecop huapa ñach a'poçose' attoch huapa Cristo arr patsro ñeñt̃cha' a'puetarsañperre' allohuen yoçtañña. Attoña ña po'ñoñoçpa' ame'ñatosana acheñenesha'.

⁸ Tarraña Juanpa' ama añeyaye ñeñt̃cha' puetarñatsotosets arr patsro; ñapa' añecpa huapa attoch a'potosan ñeñt̃cha' a'puetarsañpsañtosta.

⁹ Allempoña çhap añe patsro ñeñt̃ puetarñatsotosets tarro'mar añ puetarñatsar ñeñt̃ e'ñe po'ñoçh ñeñt̃cha' a'puetarsañpçose' allohuen acheñenesha' poçtañña, ñeñt̃pa' alletsa, o'ch orrtosa añe patsro.

¹⁰ Ama't añ patspa' ño pueyeçcatareñ, acheñenesha'ña arr patsropa' arepa'tcha' cohuenaye' agapapeto tarro'mar ama eseshaye' eñotapaye.

¹¹ Ama't arr çhapañ e'ñe ña pamo'tseshesho, pamo'tsesha'ñapa' arepa'tcha' cohuenaye' agapapeto.

¹² Tarraña puesheña'tets ñeñt̃ e'ñe cohuen agapyesapue', ama't allohuen ñeñt̃cha' ame'ñerraya ña, ñetñapa' apuerranet llesens attoch e'ñe puechemer perranet Yompor Parets.

¹³ Ñeñt̃ atto puechemer perrey Yompor ñeñt̃pa' ama atteyaye atet ye'ñalletena ya ñeñt̃ey arromñaey. Tarro'mar ñeñt̃ atto ye'ñalletena arr patsropa' ñeñt̃pa' atet anaretey ya ñeñt̃ey arromñaey. Ñaña atto puechemer o' perrey Yompor, ñeñt̃pa' ama añoteyaye ñeñt̃ atet coçape'chateney po'psheñeñ aheñ poçtañña. Yapa' añotña o' puechemer perrey Yompor atto o' muenaterrey e'ñe ña poçtañña.

¹⁴ Cristoña ñeñt̃ Po'ñoñ pen Yompor o' acheñetos arr patsro, o' yeyçhañ e'ñe parro mame' añe patsro. Ñapa' atarr amuerañtosa. Ñaña atto yeçhatosey Yompor po'ñoñ ñeñt̃ña ñoñetspa' e'ñe po'ñoçh atet, ama shequëñtsoyaye

ama't mamesha. Ñaña yapa' chocma yentoñe't po'cohuenña. Ñeñña po'cohuenña' atet ñerra'm Pompor ñeññ po'patror pene' ña.

¹⁵ Allempoña Juan puerranarotpa' a'potan Cristo, ñeñtpa' atet eñora ñocop:

—Añmapa' ñeñca'yeña notase't ahuaña, ñeñtcha' huapatsa chenta' ñapa' atarr ahuamencatesha', ñaña' ama tama ahuamencateyayno, tarro'mar ñapa' ahuatoteñ eñalla. Ama't allempo ne'ñalleta na, ñaña' eñalla. Ñeñtpa' allohua atet ot Juan ñenmañ Cristocop.

¹⁶ Ñapa' atarr amuerañtosa ñeñto'marña allohueneypa' atarr bensare'tampeney. Allo'na sen yebensare'tam pesnene'.

¹⁷ Ñoñets ñeññ atet anaret ahuatoteñpa' ñeññ quellconay Moisés ahuañ. Tarraña Jesucristopa' ñaña orrtatose'ña muereñets ñaña ñapa' añ orrtatonay ñoñets ñeññ e'ñe po'ñoñ Yompor po'ñoñ alloch yequeshperra.

¹⁸ Yompor Paretpa' ama't ahuatapa' ama eseshaye' puentare. Po'patrorña ñeññ Cristotosets ñeñtpa'cho'ña Parets ñeññ e'ñe parro atecmuet; ñapa' ña yeñotaterre'ña atet penaña Pompor Parets.

Juan ñeññ apatañtetsa Yomporecop, ñapa' atarr cohuentatosan Jesucristo (Mt. 3.11-12; Mr. 1.7-8; Lc. 3.15-17)

¹⁹ Allempo judionesha' pa'mcha'tareternesha' ñetña' mueñet acheñ Jerusaléñoñ ñeñtcha' ahuanmatsa Juanesho. Añ mueñet judionesha' po'cornaneshar ñaña levitanesha' ñeññ po'taruas pene' o'ch torrenet Parets pa'paclo. Ñetpa' añecop amñare'ttet ñetcha' a'p'to'toset Juan ñapa' esesha'te'ña. O'ña chapuet ñeshopa' atet otoset:

—Papa' ¿eseshape'tña, ama't añeyaype ñeñte'pcha' Cristoterrets?

²⁰ Juanña' ama a'nasoto; atto a'metapa' ñapa' atet otapanet:

—Napa' amaca'ye añeyayno ñeñtcha' Cristoterrets.

²¹ Ñetña' alla otereterr:

—Ñeñte'pña' ¿eseshape'tña, ama't añeyaype Elías ñeññ a'mtaye't ahuañ Yompor po'ñoñ?

Ñaña' atet oterraneterr:

—Amaca'ye ñeñteyayno.

Ñetña' alla a'p'to'tereterr:

—Amapa' ñato' ¿añe'p'te' ñeñte'pcha' a'mterre' Yompor po'ñoñ ñeññ yecuen?

Ñaña' alla oterraneterr:

—Amaca'ye ñeñteyayno.

²² Ñetña' alla otereterr:

—Ñeñte'pña' ¿eseshape'tña pa? Yapa' yemneñca'ye o'ch potey allochña' o'ch yotera' ñeññ yemñene'. ¿Erro'tena'tcha'ña poteyña pocop?

²³ Ñaña' atet oterraneterr:

—Napa' nocopca'ye eñose'tña Isaías ñeññ a'mtaye't Yompor po'ñoñ ahuañ. Allempopa' atetca' ote't:

E'morrterrach puesheñarr po'ñoñ all amayo allcha' serrpare'taterranña acheñenesha'. Puerranarotpa' añcha' toma'ntaterranet toñ ñapa' atetcha'ca'ye oterranet: “Sa'cohuenetyes toñ allcha' oñmos Partsesha' o'ch e'ñe sa'pa'charretyesoñ pa'te'p.”

²⁴ Ñehua, ñeññ amñare'ttatsa Juanesho, ñetpa' añca'ye mueñenahuet ñeññ fariseonesha' ñeñtara judionesha' pa'mcha'tareternesha'.

²⁵ Ñetña' alla otereterr Juan:

—Arep'a't Cristoyaypepa' eso'maruañaca'yeña papatenña Yomporecop, arepa't Elíasoyaype, arepa't añeyaype ñeñtcha' a'mterre' Yompor po'ñoñ.

26 Juanñapa' atet oterraneterr:

—Napa' ama't napatyen Yomporecoppa' e'ñeca'ye oñochaya napatyenanet. Tarraña o' chap sesho po'psheñeñ ñeñt ello atarr sherbets, tarraña sapa' amaca'ye señoñeña sa.

27 Ñapa' ama'tcha' chenta huapapa' ñapa' ñeñtca'yeña ello atarr sherbets; nañapa' ama es nesherbena attoch ama't po'sapatrechapa' o'ch nepyanñpes.

28 Ñehua, allpa' atetca'ye penet all oteñet Betábara allara Jordanaso yonñta'n tarro'mar Juanpa' allca'ye apatyenanña acheñenesha' Yomporecop.

Jesuspa' ñeñt atma'ntataret carrnero ñeñt amtsarettatse't ochñartsocop

29 Tsapatña Juan allempo entapan Jesús ñeshoneñ en, ñaña'apa' atet otan acheñenesha':

—Añca'yeña ñeñt o' llesenserr Yompor ñeñtcha' Po'carrneror pen, ñach yahuanmanñperre' yo'chñar allohueney ñeñtey aña patsro'tsa'yeney, tarro'mar ñach rromuerrets yo'chñarecop atetcha' perra atet amtsarettena carrnero ochñartsocop.

30 Añmapa' ñeñtca'yeña notase't ahuaña: “Ñeñtcha' huapatsa chenta'pa' ñapa' atarr ahuañencatesha', nañapa' ama tama ahuañencateyayno, tarro'mar ñapa' ahuañoteñ eñalla. Ama't allempo ne'ñalleta na, ñaña'apa' eñalla.”

31 Ama't na ahuañmo'chapa' ama neñoteñe esesha'te'ña ñeñtcha' huapatsa chenta' ñeñtcha' Cristoterrets. Tarraña napa' añecpaña nohuena nach apatyeshomue' acheñenesha' oño, attochña norrtaterrñañ israelena'tarneshacop ñeñt po'ño'ch Puechemer pen Yompor.

32 Allempoña Juanpa' eñotatan acheñenesha' ñapa' atet otanet:

—Na ahuaña allempo napatañ Jesús'pa' Yomporña Puecamquëñ e'ñe atet nentañ ñerra'mrrate' yeñ o' sohua'nma entoñ, chap e'ñe Jesúsesho.

33 Ama't allempo napa' ama neñoteñe ñeñte'ña Yompor Puechemer tarraña Yompor ñeñt o' llesenserren attoch napatyesho acheñenesha' oño, ñapa' atetca'ye otenen: “Esempoch pent o' sohua'nma Necamquëñ o'ch chap e'ñe ñesho ñeñtcha' chorrosaya, ñapa' ñeñtcha'ca'yeña chorraterrahuetña Parets Puecamquëñ.”

34 Na po'ño'chpa' o'ca'ye neñch ñeñto'mar te'pa' neñotatenes ñeñtca'yeña Yompor Puechemer.

Ñeñt ñanom pueyochresha' pa' Jesús

35 Tsapatña'po' pocheño all ten Juan epuet epsheña pueyochresha'.

36 Cohuanan Jesús all chopeñe'chen a'yeneñ, alla oterraneterr:

—Añca'yeña ñeñt Po'carrneror pen Yompor.

37 Ñeñtña epsheña pueyochresha' allempo e'met atet oteñ Juan, ñetña'apa' allenta co'ta'nmet Jesús.

38 Puetallesnomtsaña Jesús'pa' entapanet co'ta'neñet chenta' ñaña'apa' atet otapanet:

—¿Eso'tña semnen?

Ñetña'apa' atet ochet:

—Maestro, ¿erra'tña pe'chap?

39 Ñaña'apa' atet otanet:

—Socterrenca'ye o'ch senteña'.

Ñetña'apa' allenta co'ta'neret Jesús o'ch enteñeta' all a'posa. Alla a'poset ñamet ñeñte yetro tarro'mar allempopa' o' manñamena o'ch ellerren.

40 Ñehua, ñeñtña epsheño'maret ñeñt e'mue' atet oten Juan ñeñt cote' Jesús, puesheñarr ñeñtpa' Andrés ñeñt Simón Pedro pa'mo'nasheñ.

⁴¹ Andrésñapa' allorocma ahuer e'nerraya' Simón; o'ña entera'pa' atet otuerr:

—Yapa' o'ca'ye yenter Mesías. (Ñehua, ñeñtña ñoñets Mesías añca'ye otenet ñeñtcha' Cristoterrets.)

⁴² Andrésñapa' allenta anerran pa'mo'nasheñ Simón Jesúsesho. Jesúsñapa' cohuapue'pa' atet otaþ:

—Pa'tña Simón, ñeñteþ puechemer pen Jonás. Te'pa' nesocherreþcha' Cefas (ñeñtara so'chñets ñeñt otenet griegaþho Pedro).

Atto Jesúsapa' chore'tan Felipe ñaña Natanael atoch pueyochresha' perranet

⁴³ Tsapa'tña Jesúsapa' sechena o'ch ahuer Galileo. Allña entuenan Felipe ñaña'pa' atet otueñ:

—Ama't pemno o'ch þoctenen.

⁴⁴ Ñehua, Felipepa'cho'ña galileo'marnesha', ña pa'netserpa' añ pa'so'cheñ Betsaida ñeñtara ñaña Andrés pa'netser ñaña Pedro.

⁴⁵ Felipeñapa' entuenan Natanaelpa' atet otueñ:

—Yapa' o'ca'ye yenter ñeñt ñocop quellquë't Moisés all orrtatan ñoñets ñeñt atet anaret, ñaña ñocop quellquë't ñeñt a'mta'yesaye't Yompor po'ñoñ. Añepa'tca'ye Jesús ñeñt huetsa Nazaretot ñeñt José puechemer.

⁴⁶ Natanaelñapa' atet otapan Felipe:

—Nazaretotpa' ama't ahuatapa' amaca'ye huenoña ñeñt e'ñe cohuen acheñ. Felipeñapa' atet otererr:

—Po'ñoçh orraca'ye o'ch penteña'.

⁴⁷ Natanaelpa' allenta ahuo' o'ch entenana' Jesús. Jesúsñapa' entapan Natanaelpa' ñaña'pa' atet eñora ñocop:

—Añca'yeña po'ñoçh puesheñarr israelnesha' ñapa' amaca'ye shequëno ama't mamesha.

⁴⁸ Natanaelñapa' atet otosan Jesús:

—Napa' ¿erroteno'te'tña peñotenen? Amaca'ye pentarno.

Jesúsñapa' atet otererr:

—Allempo ama a'sechenþa' Felipe nesho, allempo þapa' alla þanen mañto higocho ñaña'pa' nenteneþca'ye.

⁴⁹ Natanaelñapa' atet otererr:

—Maestrocha' pepa'tña Yompor Puechemereþ. Pepa'tña Añcha'taret ñeñt atarr cohuen allohuen israelnesha'.

⁵⁰ Jesúsñapa' otererr:

—Napa' o' notaþ napa' nenteneþ allempo þanen mañto higocho, ñeñto'marte'ña o' þame'ña'na. Te'ñapa' o'ch notas, elloña te'pa' nanaccha' senterrnan nepartsoña ñeñt ama tama sentennana'.

⁵¹ Jesúsñapa' alla otererr:

—Po'ñoçhca' notenes, senterrcha' enet atoraret ñaña Yompor po'mllaño'eñrenesha' a'tachenet ñaña sohuachenet e'ñe nesho, na Ñeñten Acheñetosets.

2

Allempo sena'ta puesheñarr yacma all anetso añ pa'so'cheñ Caná allara Galileo

¹ O'ña ma'pamuetuerr allempo çherr Jesús Galileo, allña anetso Caná atarr coshaprechet puesheñarr yacma ñeñt sena'tetsa. Jesúsña pachorpa' allo'tsen.

² Jesúsña epuet pueyochresha'pa' ñetpa'cho'ña ahua'ñarettet allcha' rrallme'chapreteneta'.

³ Allña'pa' cha huañapset vinos. Jesúsñapa' atet och pachor:

–Te'pa' ama eñalle vinos, o'cha huañapset.

⁴ Jesúsñapa' atet otan pachor:

–Achocha' eso'mare'tña atet pōtenenña na. Nocoppa' amaca'ye čhena' allempoch es norrtatyés.

⁵ Tarraña ama't atet otañpa' pachorñapa' atet otan ñeñt sherbets all:

–Ñerra'm errotencha' otas nechoyorpa' sañapa' e'ñech atet sepa.

⁶ Ñehua, allpa' allo'tsen pechapña orrot mapyem. Ñeñña orrotechnopa' tama ateshamerr, pueña'ttso orrotpa' ñato' sente' oñ epa galon amapa' ma'pate' galon sets oñ attoch chorraresua. Ñeñt orrotechnopa' allecma nenet oñ alloña a'cohuentatena judionesha' Partsocop ñeñt atet anarettenet ñocpuet.

⁷ Allñapa' atet otan Jesús ñeñt sherbets all:

–Te'pa' o'ch se'chorrayes oñ orroto.

Ñetñapa' atetcho' pet e'ñe e'chorraresuahuet oñ.

⁸ Allempoña o' e'chorraresuetpa' Jesúsñapa' atet oterraneterr:

–Te'ñapa' o'ch seshe' coñe'tpa' o'ch sanem allo'tsen ane'tañ.

Ñetñapa' atetcho' pet.

⁹ Allempoña ane'tañpa' allenta amllan oñ ñeñt a'pnasaret vinos ñañapa' ama eñoche errofte' o' huapatetña vinos. Aña eñotene' ñeñt sherbenuhuet all ñeñt etasote' oñ. Allempoña amlla'huan vinospa' ñañapa' allenta agotan ñeñt sena'tetsa.

¹⁰ Ñeñtpa' atet och:

–Ñerra'm cho yorrrpa' añcha'ña ñanom yorrtat ñeñt e'ñe cohuen vinos. O'chña yonuahue ahua'ñaref e'ñe cohuen vinospa' allempochña yapanet ñaña ñeñt ama e'ñe cohuenayaye. Tarraña pañapa' amaña atteye' pepeno. Ñeñtapa' cha'tña pañño'tuaña vinos ñeñt e'ñe cohuen tayaño' porrtach. (Ane'taññapa' atet otan ñeñt sena'tetsa tarro'mar ñapa' ama eñoteñe.)

¹¹ All ñanom entatanet Jesús po'partsoñapa' ñeñtpa' arr Cano allara Galileo. Attocha'yeña orrtatanetña Jesús po'partsoteña. Allempoña pueyochresha'pa' o' eñochet po'ñoche'pa't ñapa' Parets attoña e'ñe ame'nyet.

¹² Allempoña Jesús'pa' ahuo' Capernaumo pachore'na ñaña pa'mo'nasheñechno, ñaña allohuen pueyochresha'. Allñapa' alla allponmateneta'.

Atto Jesús'pa' a'cohuentatosan Parets pa'paquell

(Mt. 21.12-13; Mr. 11.15-18; Lc. 19.45-46)

¹³ Allempoña chapmoch pascuapo allempoch alla cosherrerr judionesha'. Jesúsñapa' ahuer Jerusalem.

¹⁴ Allña Parets pa'paclopa' entuenan ñeñt pomuene' po'huacsher, ñaña carrnero, ñaña yeř; ñaña ñeñt cañya'yenuhuet po'čllayoretpa' ñetpa'cho'ña alla anorchenet.

¹⁵ Allñapa' pella'tosan apech pashtarech. E'ñe matatuosan allohuen ñeñt pomatsre'tyetsa Parets pa'paclo, e'ñe ahuanerret po'huacsher ñaña po'carrneroret. Ñaña ñeñt cañya'yenuhuet po'čllayoretpa' e'ñe yo'patsetamipesuosanet po'čllayoret patso. E'ñe a'coye'tamipesuosanet all na'yenet po'čllayoret.

¹⁶ Allpa' atet otosan ñeñt pomuene' yeř:

–Te'pa' sahaner añ arroť. Amach atet sepatstono Nompōr pa'paquell atet ñerra'mrrate' ñeñt e'ñe pocollenochaya allecma pomatsre'tyenet.

17 Allempoña pueyochresha'pa' allenta yerpuet ñoñets ñeñt̃ anaret̃ ahuatoteñ ñocop, ñeñt̃pa' atet̃ oten: "Napa' atarrcha' nempa'tonaḡ pepaquell̃ ama'tcha' ñeñto'mare'na muetserrnetañ."

18 Allempoña judionesha' pa'micha'tareternesha'pa' atet̃ ochet:

—Añña ḡorrtatosnay peparsoña allochñapa' attochña yeñotaḡ po'ñoçhpa' ḡapa' allsensareteḡte', te'ñapa' atto' peḡosnayte' añeçhno.

19 Jesúsñapa' atet̃ oterraneterr:

—Sapa' ama'tcha' sa'matoñ añ Parets pa'paquellpa' poma'pamtañoña napa' o'ch alla natomater.

20 Judionesha'ñapa' alla otereterr:

—Añ atto e'nuoñet Parets pa'paquellpa' atarr atomat aḡorrareḡta e'ñe pa'tatsoch çharrohua char puechena pechap. Ta', ḡañaapa' çpo'ñoçhcha' e'ñech poma'pamtañoçma yetpa' o'ch alla ḡatomatuer?

21 Ñehua, Jesúsapa' añeḡa't otanet ña po'chets ñeñt̃eḡa't pa'paquell̃ pen Parets.

22 Ñehua, çhap allempo muetseret Jesús allempoña tanterrapa' pueyochreshaçhnoñapa' allenta yerpuerret̃ ñeñt̃ atet̃ ote't̃ Jesús allempo. Ñeñto'marña allempo Jesús pueyochreshaçhnopa' atarr yemterrñañet Yompor po'ñoñ ñeñt̃ anuaret̃ ahuatoteñ, ama't̃ ñaña Jesús po'ñoñ atarr ame'ñeret.

Jesúsapa' e'ñe eñotueney allohueney ñeñt̃ atet̃ yoctape'chyen yeyoçhro

23 Allempoña allo'tsen Jesús Jerusaléño, all coshapretenet pascuapo shonte' acheñenesha' enteññañet ñeñt̃ atto orrtatenanet po'partsoña all, ñeñto'marña allpa' shonte' ame'ñaya.

24 Tarraña Jesúsapa' ama yemtanete'te ñet, tarro'mar ñapa' eñotanete't̃ atet̃ allohueney acheñey çhocma yoctape'chyen ñeñt̃ yemnen ya.

25 Ñapa' ama e'nenano ama't̃ puesheñarra ñeñt̃cha' ote' ñeñt̃ atet̃ yoctape'chyen allohueney acheñey. Tarro'mar ñapa' çhocma eñoteny atet̃ yoctape'chyen allohueney acheñey.

3

Allempo Nicodemopa' huapa Jesúsesho

1 Allempopa' eñall puesheñarr yacma ñeñt̃ fariseo ñeñt̃ soçheta Nicodemo. Ñeñt̃ñaḡa' puesheñarr ñeñt̃ añcha'tarettetsa judioneshaçop.

2 Ñañaapa' huapa Jesúsesho tsapopa' atet̃ otos:

—Maestrocha' yeñoteneḡ ḡapa' añ pellsensene' Yompor attoch peyçhatosey cohuen tarro'mar yapa' yeñoteñ añach orrtatyene' partsoteñets ñeñt̃ ahua-mencaḡ pen Yompor.

3 Jesúsñapa' atet̃ otaḡ:

—E'ñe po'ñoçh notaḡ, esesha'ch ama eñalleterrtso ello ñetñaḡa' amach errotenoḡ pueyochresha' perraneto Yompor.

4 Nicodemoñaḡa' atet̃ otererr:

—Amate' errotenoḡ ye'ñalletterroña po'pocheñoña' o'ca'ye yepo'nme'ten. Errotenoḡate'ñaca' yeçherrerrña yachor pa'to attotcha' ye'ñalletterrerr po'pocheño.

5 Jesúsñapa' atet̃ otererr:

—E'ñe po'ñoçh noteneḡ, erra'tsencha' ama eñalleterrtso oñoḡ ñaña Yompor Puecamquëñoḡ, amate' errotenoḡ pueyochresha' perraneto Yompor ñeñto'marña amach eshec o'patapreteretoña Yompor po'cohuenña ñeñt̃ atto ayochreshaḡtena ña.

6 Ñeñt̄ atto eñalletena arromñatesha'pa' ñeñt̄pa' arromñata. Tarraña ñeñt̄cha' eñalleterrtsa Parets Puecamquēñoť, ñeñt̄pa' ñeñt̄ña camuecñetsotets ñeñt̄ñapa' ama arromñateshayaye.

7 Ñeñt̄ atet̄ noteneḡ, “allohuenespa' añ sepalltena o'ch se'ñalleterrerr̄ ello”, ḡapa' amach̄ cha pe'charrtatsto peyočhro, amach̄ cha ḡotatsto año'te' errotenot̄ pe'ñalleterrerroña ello po'pocheño.

8 Ñeñt̄pa' e'ñe atet̄ pena ñerra'mrrate' mōrr. Morrpa' erra muene'pa' allcha' mōrraren. Pe'muente' atet̄ ma'moreten, ama peñoteñe erroťte'ña huena ñaña errate'ña sen. Atet̄cha' perra ñaña allohuen erra'tsencha' eñalleterrtsa Yompor Puecamquēñoť.

9 Nicodemoñapa' alla a'ḡto'tererr:

–Ñeñt̄pa' ¿erroťena'tña añ?

10 Jesúsñapa' atet̄ otererr:

–Papa' ama't añepeñ israelnesha' po'maestror, ama't peñotenoña añ.

11 E'ñe po'ñočh noteneḡ: Allohueney ya ñeñt̄ yeñotenpa' ñeñt̄cha'ña yeserprare'ten ñaña ñeñt̄ yentyenpa' ñeñt̄cha'ña ya'poten tarraña sapa' ama chennasoña seyočhro añ ñeñt̄ ya'poten.

12 Ñerra'm añña notenes ñeñt̄ atet̄ yeyčhena añe patsro, saña ñerra'm ama same'ñennopa' erroťenotuate'ñaca'ye notasña ñaña ento'mar ñeñt̄ Yomporecop.

13 'Ama eñalle ama't puesheñarra ñeñt̄cha' a'tapuets ento ñaña ñeñt̄cha' sohuerrtsa ñeñt̄ara entot̄. Naptaña na Ñeñten Acheñetosets ñeñten sohuatsa entot̄, napta nentar Nompor pue'ntaño tarro'mar napa' ñeñt̄ na'netser nepen.

14 Ñehua, ahuať Moiséspa' yečhcatan ñeñt̄ atma'ntataret shecheḡ all amayo, ñeñt̄ñapa' huanquē' tsachopa' o' echantam̄pes enonet̄. Atto Moisés echantam̄psan shecheḡ all amayopa', napa'cho'ña ñeñt̄ poctetsa nocop atet̄cha' perrnet̄ nam̄ña, corsochoťcha' echantam̄psareten.

15 Allochñapa' allohuen ama't erra'tsena ñeñt̄cha' name'ñerraya na, ñetñapa' amach̄ chenquērreto, e'ñech corretseta pocsheñeshocmañen e'ñe tayoteñ erponañohuen.

Atto atarr morrentenya Yompor allohueney acheñeneshay

16 'Atto atarr morrentenya Yompor allohueney acheñeneshay arr patsro ñeñto'marña apuey Puechemer ñeñt̄ po'patror pen, allochñapa' allohuen ñerra'm esesha' ame'ñerraya ña amach̄ chenquērreto, ñetñapa' corretsetach pocsheñeshocmañen e'ñe tayoteñ erponañohuen.

17 Yomporpa' amaca'ye añecpaye' mueñanoña Puechemer arr patsro attoch mueñosan acheñenesha' coñcheñtso. Ñapa' añecopña mueñe attoch ñach a'qushḡatose'ña acheñenesha' arr patsro.

18 'Erra'tsencha' ame'ñerraya ña ñetñapa' amach̄ amñareťterreto coñcheñtso. Tarraña ñeñt̄cha' ama ame'ñerrayo ñocpuetñapa' anareťtet attoch amñareťterret coñcheñtso tarro'mar ñetpa' ama ame'ñoñeto Yompor Puechemer ñeñt̄ po'patror pen.

19 Ñaña'pa' o' huapa arr patsro attoch yečhatosey ñeñt̄ e'ñe cohuen enten Yompor, attoña a'puetarsam̄psosnay yocḡañña. Tarraña shonte' acheñenesha' ñetñapa' ama mueneto o'ch a'puetarsam̄psareťtet poctañet̄. Ñetpa' añña muenenet̄ checmete' tarro'mar amaca'ye masosyaye' cotape'chyeneto. Ñeñto'marña ñetpa' attoťcha'ña amñareťterret coñcheñtso.

20 Allohuen ñeñt ama masosyaye' cotape'chyeneto ñetpa' ama cohuenaye' enteñetoña Cristo ñeñt a'puetarsam̄pene' allohueney yoc̄taṗña. Ñeñto'marña ama eneto allo'tsen ñeñt a'puetarsam̄psañtetsa t̄aye'to'te' orrtatarettet poct̄aṗñet ñeñt ama masosyo.

21 Añña ñeñt e'ñe atet pene' ñeñt po'ñoçh cohuen enten Yompor, ñetpa' e'ñe pocte' enteñet o'ch onet allo'tsen ñeñt a'puetarsam̄psañtetsa t̄arro'mar ñetpa' añ muenenet o'ch eñotateret po'potantañ ñetpa' Yompor ahuamencat penahuet ñeñto'marña ñetpa' añ orrtatyenet ñeñt cohuen enten Yompor.

Allempo Juan ñeñt apatañtetsa Yomporecop, ñapa' alla cohuentaterranerr Jesús

22 Allempoña Jesúsapa' ahuerrerr Judeo epuet pueyochresha'. Allñaapa' alla allponmat epuet pueyochresha'. Allña Jesúsapa' apatyesan acheñenesha' Yomporecop.

23 Ñaña allempo Juanpa'cho'ña arr apatyenan acheñenesha' all oteñet Enón e'ñe alla allame'tets Salimo, t̄arro'mar allpa' shonte' oñeçhno. Acheñenesha'pa'cho'ña shonte' huacha'tyeset attoch apataretetyeset Yomporecop.

24 Ñehua, allempopa' ama yottam̄peñeta' Juan.

25 Allempoña Juan pueyochresha'pa' serrpare'tet epuet judionesha'. Allpa' añ serrpare'tatanna'tet este' poctetsaña attoch ya'cohuentataretta Partso-cop, añte' ñeñt atto apatyen Juan amapa' ñato' añte' atto apatyen Jesús.

26 Ñeñto'marña ahuanmuet Juaneshopa' ñetñapa' atet otoset:

—Maestrocha' ñeñt epaṗ ahuaña yom̄ta'n Jordanaso, ñeñt peserrpare'tatosey, ñapa'cho'ña ñepa'tca'yeña apatyets ñaña. Ñeñto'marña allohuenetpa' o'ca'ye ahuanmuet ñesho.

27 Juanñapa' atet otapanet:

—Ama't puesheñarroṗeyapa' ama ahuamencateyayye ñerra'm ama Yompor ahuamencat yeṗaye.

28 Sapa' ama't señoñe ñeñt atet notuanmas ahuaña, napa' ama añeyayno ñeñtencha' Cristoterrets. Napa' at̄ta mueñan nanom attoch nota.

29 Jesúsapa' e'ñech atet netma'ntacha atet ñerra'mrrate' yacma ñeñt sena'tetsa. Ñehua, ñeñt sena'tetsa ñeñtñaca'yeña aguëne'ña coyanesha' ñeñtcha' puetapor ṗa'. Tarraña ñeñtña pueyempa' ñeñt parro epuet ten ñerra'm añ e'm pueyem po'ñoñ ñeñt sena'tetsapa' ñañapa' atarrcha' coshapretana pueyem. Ñeñto'marña na te'pa' atarr nocshapreteña Jesús.

30 Jesúsapa' e'ñe pocte' allo'nepa'ñaca'yeña enteñet po'ñoçhpa' ñaca'yeña atarr sherbets. Nañapa' e'ñe pocte' allo'nepa'ña entennet napa' ama e'ñeye' nesherbena. Arrpa' allohua atet ot Juan Cristocop.

Atto yeñoteñ ñeñt huetsa entot Yomporeshot ñeñtca'yeña atarr sherbets

31 Ñehua, yeñoteñ ñeñt huetsa entot Yomporeshot eñchetepa' ñapa' atarrca'ye añcha'taret. Tarraña ñeñt patso'marnesha' ñeñtapa' alla eñorena patso'mar. Ñeñt huetsa entot Yomporeshot eñchetepa' ñapa' atarrca'ye añcha'taret.

32 Tarro'mar allohuen ñeñt entyen Pomporesho ñaña ñeñt allpon e'myen all, ñapa' ñeñtca'yeña serrpare'tateney, tarraña ama't puesheñarroṗapa' ama eseshaye' çhapahuetoña pueyoçhreto ñeñt atet otenanet.

33 Ñeñt çhapa pueyoçhro ñeñt atet serrpare'tatenanet ñeñt huapatsa Yomporeshot ñetñapa' atet otet: Yomporpa' e'ñe'e' po'ñoçh atet oten Puechemerecop.

³⁴ Tarro'mar ñeñt llesensa' Yomporpa' Yomporo po'ñoño eñorena tarro'mar Yomporpa' ama atparetayaya chorratenanetoña Puecamquëñ.

³⁵ Yomporpa' atarrca'ye nanac muerenanaña Puechemer. Ñeñto'marña aphuahueñ allohuen allpon eñall allochñapa' ñach pomnaren penahuet.

³⁶ Esesha'ch ame'ñenaya Yompor Puechemer ñetpa' corretsetach pocsheñeshocmañen tayoteñ ama't errponañohuen. Añña ñeñt atpare'tene' Yompor Puechemer ñetpa' amach enterreto ñeñt correñtsor. Ñetñapa' chachca'ye coñchaterranet Yompor.

4

Allempo Jesúsapa' serrpare't epuet coyanesha' samario'marnesha'

¹⁻³ Allempoña Jesúsapa' atarr ayochreshatta nanac, ello metanenan atto yochresha'ten Juan. Ñaña atarr apatyenan acheñenesha' Yomporcop. Ñehua, ama ñaye' apatenahueto, aña apatenahueto pueyochresha'. Ñeñto'marña allempo e'mare'ch fariseonesha' ñeñtara judionesha' pa'mcha'tareternesha'. Jesúsña allempo eñoch atto fariseonesha' o' eñochet ña atarr nanac ayochreshatta, ñañaapa' allenta quechpa'nerran Judea, o' alla ahuer Galileo.

⁴ Toññapa' e'ñe arr oñen Samario'mar, ñeñto'marña all oñerrña Jesús.

⁵ O'ña chap Samariopa' alloñña' o' ahuen paterr anetso ñeñtapa' añ pa'so'cheñ Sicar. Añña anets Sicarpa' allame'ttso'tsena Jacob po'patseñ ñeñt apa'nman puechemer José ahuat.

⁶ Allñapa' all poten oñ ñeñt po'ñeñ pe't Jacob. Jesúsñaapa' nanac tsanom puechop'echeñoñ ñeñto'marña anorros e'ñe allame'tets apco'sato. Allempopa' e'ñe pocto'tsen atsne'.

⁷⁻⁸ Allñapa' machayota huapa puesheñarr coyanesha' ñeñt samario'marnesha' ñeñtcha' etenaya' oñ. Jesúsñaapa' atet otaḡ:

—Napa' nemneñ o'ch ḡaposen oñ.

Ñehua, allempopa' pueyochrenesha'ñapa' o' ahuanmuet anetso o'ch rañteneta' ñeñtcha' rret.

⁹ Coyanesha'ña samario'marnesha'pa' atet otos:

—Papa' judioneshaḡpa' eso'mare'tcha'ña penamapuenña oñ o'ch napaḡ. Papa' peñotenen napa' ñeñten samario'marneshan.

(Ñeñto'marña atet otos tarro'mar judionesha'pa' ama amo'tstanneneto epuet samario'marnesha'.)

¹⁰ Jesúsñaapa' atet otererr:

—Ñerra'm peñoteñeñ ñeñt e'ñe atta apueney Yompor, ñaña ñerra'm peñotenoñ na ñeñten ḡotene' ḡapuen oñ, ḡapa' o'ch penamuennoñ na nañapa' o'ch napospeñ oñ cohuen alloch e'ñe ḡocrañ.

Ñeñt oteñ o'ch aḡ cohuen oñ, añ oteñ Yompor po'cohuenña, tarraña coyanesha'ñapa' ama eñoch,

¹¹ ñeñto'marña atet otererr:

—Ama Ayochreshate pecheno alloch pet oñ. Oñpa' nanacramtso o'pono'tsen. Errotuamtsoch peyoraña oñ ñeñt e'ñe cohuen alloch e'ñe yocra.

¹² Ahuat yatañ Jacoboñ ñeñt yapa'nmue' añ oñ ñapa' ñeñt orre't ñaña puechemerneshañ ñaña po'huacsherneshañ. Papa' añeḡhuate'ca'ye ñeñteḡ ello metanene' yatañ Jacoboñ atto amcha'tarette't ña.

¹³ Jesúsñaapa' atet otererr:

—Allohuen ñeñt orrene' añ oñpa' elloch alla oñpa'terretter.

¹⁴ Tarraña ñerra'm esesha' orre' oñ ñeñtcha' napanet na ama't ahuatapa' amach oñpa'terreto. Ñeñtcha' napanet na oñ, e'ñe pueyoçhretopa' puenasanetcha' atet ñerra'mrrate' allot' poten oñ, amach huañerro ama't ahuata. Attochña ñetpa' corretsetach tayoteñ ama't errponañohuen.

¹⁵ Coyanesha'ñapa' alla otererr:

—Ñeñtēpñapa' Ayochreshate p̄apuen ñeñt oñer allochñapa' amach alla no'ñpa'terrorro allochñapa' amach alla nohuerre'te eterrayerr arr oñ.

¹⁶ Jesúsñapa' atet otererr:

—Te'pa' orrerreḡ, o'ch peçhore'tera' perrollar, allempochña alla pehuerra arr.

¹⁷ Coyanesha'ñapa' atet otererr:

—Napa' amarramtso arrollareteno.

Jesúsñapa' atet otererr:

—E'ñe po'ñoçh atet p̄oten año' arrollareteyaype.

¹⁸ Tarro'mar amnarsheña perrollareshe'mañ ñeñt pueyoruareḡ. Ñaña ñeñt peyorene' te'pa'çho'ña ama perrollareyaye. Ñeñt̄pa' e'ñe po'ñoçh atet p̄oten.

¹⁹ Allempoña e'man atet oteñpa' coyanesha'ñapa' atet otererr:

—Ayochreshate, te'ña po'ñoçhpa' o' neñotaḡ p̄apa' añepepa't ñeñtēḡ a'm̄tene' Yepapar po'ñoñ.

²⁰ Yatañneshañ samario'marnesha'pa' ñetpa' concorpuete't ma'yochatset arr añ aspen̄tero. Tarraña sa ñeñtes judioneshaspa' sapa' çha soten añ pa'terr poctetsa Jerusaléno'çña yeconcorpuena' allohueney.

²¹ Jesúsñapa' alla otererr:

—Noçheshacha' p̄ame'ñona ñeñt atet noteneḡ tarro'mar te'pa' o' çhap ñerra'm esempoch sema'yocheña Yompor, ama sepallteno o'ch seconcorpueña Apa añ aspen̄tero ama't ñaña Jerusaléno.

²² Saña ñeñtes samario'marneshas añ semchatse'tyen ñeñt ama seño'teno. Yaña ñeñtey judioneshay añ yeconcorpana'tena ñeñt e'ñe po'ñoçh yeñoten, tarro'mar judionesha'pa' ñetpa' o' orrtateret ñeñtcha' a'qeshp̄atañterrtsa.

²³ Tarro'mar te'pa' o' çhap ñeñtcha' e'ñe po'ñoçh aye'choçhtaterre' Yompor, arrcha'ca'ye aye'choçhtatoñet e'ñe ñet pueyoçhreto. Ñeñtcha' atet aye'choçhtaterrñañet ñeñtña e'ñe po'ñoçh atet muenen Yompor.

²⁴ Yompor Parets̄pa' ñapa' ña camuecñetsotets amaca'ye entpahuoyaye. Ñeñto'marña ñeñtcha' e'ñe po'ñoçh aye'choçhtaterre' ña, arrcha'ca'ye aye'choçhtatoñet e'ñe ñet pueyoçhreto, ñeñt̄pa'çho'ña amaca'ye entpahuoyaye. Tarro'mar ñeñtcha' atet aye'choçhtaterrñañet ñeñtña po'ñoçh atet muenen Yompor.

²⁵ Coyanesha'ñapa' alla otererr:

—Napa' neñoteñ añ Mesíaspa' huapach ñeñtara ñeñt yoten Cristo. Ñerra'm ña huapatsapa' e'ñech serrpare'tatuerrey ora allohuen ñeñt esocmañen eñall.

²⁶ Jesúsñapa' alla otererr:

—Napa' naca'ye ñeñten peserrpare'tatene'.

²⁷ E'ñe allempo atet otenpa' pueyoçhresha'ñapa' huaçherret. Ñetñapa' atta cohuanrroretueret all serrpare'tatenan coyanesha'. Tarraña ñetpa' ama't puesheñarrotapa' ama eseshaye' otuerraye ¿eso'tña pemnen? Ama't puesheñarrotetapa' ama otuereto ¿eso'mare't peserrparenña epaḡ coyanesha'?

²⁸ Coyanesha'ñapa' alla na'nerran porreḡpa' o' ahuerr alla pa'netsro. Allñapa' otuerran pamo'tsesha':

29 —Te'pa' socterren o'ch senteña' puesheñarr encanesha' ñeñt' o' serrpare'tatuosen ora allpon ñeñt' atet ne'pa'yesara. Ñato' ñeñte'ña Cristotets ñeñt' atarr yecuen o'ch huapa.

30 Ñetñapa' allenta ona'cha'tet anetso'tpa' o' ahuanmuet Jesúsesho.

31 Allempo ama 'cha'cheneta' ñesho pueyochresha'ñapa' atet otyeñet:

—Maestro ma'mate'tach rreñets.

32 Tarraña ñapa' atet otanet:

—Napa' nechenca'ye ñeñt' nerrar nepen ñeñt'ña sapa' amaca'ye seño'teñe.

33 Pueyochresha'ñapa' atet otanna'tyeset:

—Amate' esesha' huapatoyeña puerrar.

34 Jesúsñapa' alla oterraneterr:

—Añca'yeña nerrar nepen o'ch ne'pa' atet muenen Nomp'or ñeñt' nellensene', tarro'mar ñeñt'pa' atto'chña e'ñe netsotuoñ po'taruas.

35 Ama't sotenña sa: "Palltenmeñ pa'tatsña arorr o'ch e'ñe ya'yapa'cha'hua yenareñ." Te'ñapa' o'ch notas: Te'pa' secue'ca'ye a'yo o'ch sentap shonte' acheñ ñeñt' ona'chets, o'ca'ye 'chap allempoch ame'ñerrnet. Te'ñetpa' e'ñeca'ye atet nentenanet ñerra'm yenareñpa' o' pomella'huen o'ca'ye 'chap allempoch yap'cha'hue.

36 Ñeñt' ap'chets nocop ñeñt'pa' atsa'tare'ttetcha' ñeñt'cha'ña atarr coshaterahuet. Ñaña allohuen ñeñt' ame'ñatenet ñetñapa' napanetcha' alloch e'ñe correrret tayoteñ ama't errponañohuen. Ñeñto'marña añ ñeñt' nare'tets ñaña ñeñt' ap'chets nocoppa' e'ñech parrocmá coshapretannenet, ama't ñeñt' ñanom epatue' neñoñ ñaña ñeñt'cha' torratta chenta' ñeñt' nocop.

37 Tarro'mar ñeñt'pa' e'ñe po'ño'ch atet yepena ñeñt' atet oten añ ñoñets ñeñt' 'chocma yotanna'tyena ya: "Puesheñarrpa' o'ch nare'tatse'tyes, po'psheñeñña' ñeñt'cha' ap'cha'yesets."

38 Ñaña sapa'cho'ña o'ch nemñas saña o'ch same'ñatera acheñenesha' ama't ama sanmaye' ñanom torratto all nocop, po'psheñeñña ñeñt' ñanom torrattse't all. Tarraña te'pa' sach ame'ñaterrahuet atto'ch setorrappretera ñeñt' ñanom torrattse't all nocop. Te'pa' sach ap'cherrets all ama't ama saye' nare'tatse'ttse'te all. Ama't po'psheñeñ nare'tatse'ttse't, te'ñapa' sach taruasapreterahuet all.

39 Coyanesha'pa' e'ñe po'ñoñoña ame'ñatana pamo'tsesha' samario'marnesha' allempo serrpare'tatuerranet atto Jesúsapa' o' serrpare'tatos ora allpon ñeñt' atet pue'pa'yesara.

40 Ñeñto'marña samario'marnesha' allempo hua'cha'tet ñeshopa' atarr nanac a'patare'tapet Jesús a'posanetepa'to' all pa'netsreto. Ñaña'pa' e'ñe epomta a'posa all.

41 Po'potantañe'chnopa' shonte' ñeñt' ame'ñapaya atto serrpare'tatosanet Jesús all pa'netsreto.

42 Ñetñapa' atet oteñet coyanesha':

—Te'ñapa' ama e'ñe pa' peñoño'teye' yame'ñeno. Te'pa' e'ñe ya e'muene' yaña allohueney. Ñeñto'marña te' yapa' o' yeño'ch po'ño'ch ñapa' ñach ya'queshp'aterre' allohueney ñeñt'ey añe patsro'tseney.

Puesheñarr yacma ñeñt' sherbene' añcha'taret ñeñt'ña puechemer a'crraterrña Jesús

43 Allempoña epomta'muen Samario Jesúsñapa' o' alla ahuen Galileo all pa'ney peñ ña.

⁴⁴ Tarro'mar e'ñe po'ñoch atet eñorena Jesús ñocop, ñeñtpa' atet ot: Ñeñña a'mtene' Yompor po'ñoñ pa'nyo'marnesha'ñapa' ama't mameshapa' ama mecha'na'teñeto.

⁴⁵ Allempoña çherrerr Jesús Galileo allohuenña galileo'marnesha'pa' e'ñe cohuen agapapueñet tarro'mar ñetpa' e'ñe entuoñet allohuen ñeññ atet pa'yesos Jerusaléño allempo entapreteneta' pascua all. Ñetpa'cho'ña allempopa' all ahuanmuet ñamet o'ch entapreteneta' pascua.

⁴⁶ Jesúsñapa' alla ahuererr po'pocheño Cano e'ñe allara Galileo all e'ñe ñanem a'pnasenana' oñ vinos. Allñapa' allo'tsen puesheñarr ñeññ sherbene' amcha'taret. Ñaña puechemerpa' cha atsna'ten all anetso Capernaumo.

⁴⁷ Allempoña e'mare'tan Jesús o' huapa Judeot o' çhenerr Galileo, ñaña'papa' allenta ahuo' o'ch enteña' attoch oteña' coterepa' pa'paclo attoch a'crraterrñaña' puechemer, o' rromamoch.

⁴⁸ Jesúsñapa' atet och:

—Ñerra'm ama nentatasñe nepartsoña ñaña ñeññ ama sentarepa' ama'e' same'ñennañe.

⁴⁹ Ñeñña sherbene' amcha'taretpa' o' alla otererr:

—O'ch Ayochreshate pöcterren tayepa'tñapa' ama rromuena' nacñe'ter.

⁵⁰ Jesúsñapa' atet otererr:

—Te'pa' ahuerreþ, pechemerpa' o'ca'ye alla correrra.

Yacmañapa' e'ñe ame'ñana Jesús po'ñoñ ñeññ atet och, ñaña'papa' allenta ahuer.

⁵¹ Allempoña ahuen toñoñapa' poctenan pueñañresha'. Ñetñapa' atet otapueñet:

—Pacñe'terpa' o'ca'ye correna.

⁵² Ñaña'papa' allenta otapanet:

—¿Esempo'tña pasateñ?

Ñetñapa' atet otereterr:

—Ellerro allempo coyatse'ten atsne' mame'pa' allempoca'yeña metueñña po'urateña.

⁵³ Allempoña pomporpa' o' yerepya ñaña'papa' atet ot:

—Ellerropa' allponca'yeña atsne' otenña Jesús nechemerpa' o'ca'ye correrra.

Ñapa' ñeñña ame'ñate' ama't ñaña allohuen pamo'tsesha' ñeññ parro pa'paclo'tsa'yenet e'ñe ame'ña'huet ñamet.

⁵⁴ Arrpa' atto puepocheño Jesús'pa' entatanet po'partsoña allempo huapa Judeot o' alla çherrerr Galileo.

5

Atto Jesús'pa' a'crraterran puesheñarr atsnañe't all Betesdaso

¹ Allempoña o' alla çherrerr allempoch alla cosherrerr allohuen judionesha' ñeññ atet anaretet ñocpuet. Jesúsñapa' alla ahuererr ñaña Jerusaléño.

² All Jerusaléño e'ñe allame'tets allotecma a'be'teñet carrnero allñapa' allo'tsen oñ apco'sattataret ñeññ sochen hebreonesha' po'ñoño Betesda. Ñeñña'papa' eñall amnar puecha'petar.

³ Allña puecha'petarotpa' shonte' atsnañeñnesha' ñeññ pena'rrartetsa all — ñeññ aporo'yeteçhno ñaña ñeññ che'ca'repaçhno ñaña ñeññ echarretyetsa. Ñetñapa' añ cohuenet ñerra'm esempoch pelle'llchena oñ.

⁴ Tarro'mar ñerra'm esempoch pelle'llchena ñeññ oñerpa' mellaño'teño'ch sohuetsa all o'ch pelle'llchatosan oñ. Ñerra'm esesha' ñanom esha'tostsa

all oño allempo pelle'llchena ñeñña atснаñe'terpa' accrrerrochayo'ch, ama't erra'tsena atснаñtsor rromuenahuē.

⁵ Allñapa' allo'tsen puesheñarr yacma ñeñ ma'poch charra' puechena posoc char atсна'ten.

⁶ Allempoña entos Jesús alla ñanena ñaña'pa' eñotos shonte' char atсна'ten ñeñño'marña atet otos:

—¿Ama't pemno o'ch pocrterra?

⁷ Atснаñeñña'pa' atet otan Jesús:

—Amaca'ye Ayochreshate eñalle ñeñtcha' neshate' oño allempo pelle'llchena. Napa' o'ch taya ahuen po'psheñeñña'pa' ahuo'tcha' esha'tosa ñanom.

⁸ Jesúsñapa' atet otererr:

—Te'pa' o'ch notosep: Petantena, pechta'nen allo pemuen, pechope'chen tayecma.

⁹ Yacmañapa' allorocmuepa'tcha' correna, ñaña'pa' allenta chetenan allo muenpa' allenta chope'chne. Ñehua, ñeñña yetropa' allempo amesen judionesha'.

¹⁰ Ñeñño'marña judionesha'pa' atet ochet ñeñ o' correrra:

—Te' aña yetro allempocma yamesen. Amaca'ye pocteyaye o'ch ñanen pemue'.

¹¹ Tarraña ñapa' atet otanet:

—Ñeñ o' a'crratosenpa' atetca' otosen: “Pechta'nen pemue'pa' pechope'chne.”

¹² Ñetñapa' allenta a'p'to'chet:

—¿Esha'tña p'tose'ña, “O'ch pechta'nen pemue'pa' o'ch pechope'chen?”

¹³ Tarraña ñeñ a'crrataretterrtsapa' ama eñoteñe esha'te'ña a'crraterre' tarro'mar Jesús'pa' ama allo'tsenaro, ñapa' o' ahuer a'nahua, tarro'mar all shontosa acheñenesha' ñeñtcha' entenaya'.

¹⁴ O'ña atarr o'chetpa' Jesúsñapa' alla enterran ñeñ a'crraterr ñorra' e'ñe alla Parets pa'paclo. Allñapa' atet oter:

—Te'pa' o' pocrterra. Te'ñapa' amach alla po'chña'tatsterrerro ñato'rraña alla nanac pemuero'chterrerr.

¹⁵ Yacmañapa' o' ahuer, atet otuerran judionesha':

—Jesúsepa'tca'yeña ñeñ na'crraterre'.

¹⁶ Atet pena Jesús aña yetro allempo amesen judionesha' ñeñño'marña ñetpa' o'pateñet Jesús.

¹⁷ Jesúsñapa' atet otanet:

—Nomp or e'ñe teme'ttsen atarr torrena ñeñño'marña napa'cho'ña atarr nemneñ o'ch ne'torra naña.

¹⁸ Ñeñño'marña judionesha' pa'm'cha'tareternesha'pa' ello atarr nanac o'pateñet o'ch muetset, tarro'mar ñetpa' atet otyeset:

—Ñapa' ama ñap'taye' aña yeter o' puesuerro allempocma yamesen, ñapa' aña'naña oten e'ño' Pomp or penan Parets, ñapa' attaca'ye mueneñ o'ch Partsocoptartena.

Atto atarr ahua mencatena Jesús ñeñ Yomp or Puechemer

¹⁹ Jesúsñapa' atet oterraneterr:

—E'ñe po'ño'ch notenes, na ñeñten Puechemer pen Yomp or amate' er-rotenot es ne'poña e'ñe nota. Napa' aña atet ne'pa'yen atet nenteññañ Apa, tarro'mar ñeñ atet pen Apapa' napa'cho'ña ñeñten Puechemerenpa' atetcha' es ne'pa'yen naña.

²⁰ Apapa' atarr muerenna tarro' mar napa' e'ñeca' ye po'ñoçh Puechemeren, ñeñto' marña gatyenen ora allohuen ñeñt' atet pa'yen ña. Elloña ñapa' añ gatyenen ñeñt' nanac torrapotyets ñeñt' atet etsotayen ña; ñeñtpa' añecop atet pennan attoña sapa' atarrcha' secuanrrortenen.

²¹ Ñehua, yeñoteñ Apapa' tantaterran arromñañenesha'pa' apuerranet allochña ñetpa' corretsetach. Napa' cho'ña e'ñeca' ye atet nepenaña namña ñeñten Puechemeren. Ñerra'm erra'tsencha' nemna' na o'ch napanet allochña ñetpa' corretsetach atetcha'ca'ye napuerranet.

²² Apapa' ama't puesheñarrapa' amach a'metanperraneto errotencha' entyesuerranet. Naña apuen llesens ñeñten Puechemeren nachña a'metanperrahuet errotencha' nentyesuerranet e'ñe puesheña'ttset.

²³ Allochña' attochña allohuenet mecha'na'tennetcha' namña ñeñten Puechemeren e'ñe atet mecha'na'tennanet Nompore Parets. Ñerra'm esesha' ama nemcha'na'tenaye na ñeñten Puechemeren, Nompore'naca'yeña ama mecha'na'teneto ñeñt' nellensene'.

²⁴ 'Napa' e'ñe po'ñoçh atet notenes: Ñerra'm esesha' e'mñote' neñoñ ñaña ñerra'm yemterrnanet Nompore ñeñt' nellensene' ñetña'pa' corretsetach pocsheñeshocmañen tayoteñ errponañohuen. Amach a'coñchatare'tterreto ama't errponaña. Tarro' marña ñetpa' o' metanerretña ñeñt' e'ñe po'ñoçh rromueñets, o' çherret allña ñetpa' corretsetach tayoten errponañohuen.

²⁵ E'ñe po'ñoçh o'ch noterrser: O' çherrmoch allempoch atet perra, ñeñt' arromñañenesha'pa' ñetña'pa' e' muerrnanetcha' neñoñ ñeñten Yompore Puechemeren. Ñeñt'cha' e'mñoterre' na neñoñ ñetña'pa' corretsetach.

²⁶ Ñehua, Apapa' e'ñe ñoña correna, ña napuene'ña attoch napa'cho'ña corretsanch namña ñeñten Puechemeren.

²⁷ Naña ña napuene'ña llesens attoch nemñe patanta'tets acheñenesha' coñcheñtso, po'potantañña'pa' amach nemñerraneto coñcheñtso. Atetca'ye allsensaretenña na Ñeñten e'ñe Acheñetosets.

²⁸ Ñeñt' atet o' notuaspa' amach cha semoññe'tatsche tarro' mar esempopa' çherrcha' ama't ñeñt' puepampro'tsa'yenpa' e' muerrnanetcha' neñoñ.

²⁹ Cha'nmaçherretcha' allot apampare'ttete't. Ñeñt' atet pa'yesaye't e'ñe cohuen ñeñt' poctetsa ñetña'pa' añecopcha' tanterret attoch ello alla correrret. Ñeñt'ña pa'yesaye't ñeñt' ama pocteyaye ñetña'pa' añecpach tanterret attoch ello alla amñare'tterret coñcheñtso.

Atto Jesús eñotatanet ñapa' Yomporeshot apareta llesens

³⁰ 'Amate' erroteno't es nepa'yenoña e'ñe noña. Atet eñotatenen Nompore'pa' attochña nemñe patanta'tets acheñenesha' coñcheñtso, po'potantañña'pa' amach. Naña errotencha' nentyesuerranetpa' ñeñtpa' e'ñe pocte' tarro' mar ama e'ñe na nemnenño'teye' es nepa'yeno. Nompore'ña puemnenño't es nepa'yen tarro' mar ña nellensene'.

³¹ Ñerra'm e'ñe nañeña a'potetsa, ñeñt' atto na'potenapa' amate' es sherbeno.

³² Eñallña po'psheñeñ ñeñt' e'ñe no Nompore ñeñt'ña na'potene'ña na. Naña neñoteñ ñerra'm ña na'pote'pa' ñeñt' atto a'potenen ñeñt'ña e'ñe po'ñoçh sherbets.

³³ Naña sa ahuañmo'chapa' semñe acheñ Juanesho ñeñt' a'pto'tose' nocop. Juanña atto a'potanpa' ñeñt'ña e'ñe po'ñoçh atet.

³⁴ Napa' ama e'ñe nocpa ne'nenno ñeñt' na'pote'; añecpa'naña notenes sa ñato' sapa' same'ñoña'te' Juan po'ñoñ atto a'potan na, allochña'pa' attoch sequeshperra same'ñeño'ten.

³⁵ Juanpa' e'ñe atet pe't ñerra'mrrate' lampareñ corretsa, attoña choyo'te't. Sañapa' sa muenatse't o'ch socshame'ta mame' all a'puetarsañpsas.

³⁶ Tarraña atet na'poten napa' ñeñña nanac sherbets. Ello metanenan ñeñt atet a'potan na Juan. Allohuen es nepa'yen ñeñt atet yechenna Apa o'ch e'ñe netsotoñ, añ netsotateña' ñeñña o' eñotatanet napa' Apa nellsensene'.

³⁷ Ñaña Apa ñeñt nellsensene' ñapa'cho'ña ñaca'yeña na'potene'. Sapa' ama't ahua'apa' ama se'maroneña po'ñoñ atet e'morrtena, ñaña ama sentareña atet orrtena ña.

³⁸ Sapa' ama't po'ñoñapa' ama chennasoña seyo'chro tarro'mar na ñeñten llesensen Apa, sañapa' ama same'ñenno.

³⁹ Sapa' añcha' setorra'yesa Yompor po'ñoñ ñeñt atet anuaret ahuatoteñ tarro'mar sapa' chate' sotenapañ e'ñe ñoñsochayotapa' sapa' corretsasate' errponohuañen. Tarraña Yompor po'ñoñ ñeñt anuaret ahuatoteñ ñeñtpa' naca'yeña a'pote't.

⁴⁰ Sañapa' amaña semnoña o'ch same'ñerrna attochña e'ñe socrrerañ.

⁴¹ Tarraña napa' ama aye' ne'nenno attoch aye'chochtatennan acheñenesha'.

⁴² Tarro'mar napa' neñotenes sapa' ama't mameshapa' ama semorrenteño Yompor ama't seyo'chra.

⁴³ Napa' atto nohuapa Nomporña nellsensene' tarraña sapa' amaña same'ñenno. Ñerra'm esesha'chña huapatsañ ñeñt e'ñe ñoña huena saña ñeñtpa' atarrte' same'ñyañ.

⁴⁴ Sapa' tarro'marña ama same'ñenno sapa' añaca'ye se'nen o'ch e'ñe sañeña aye'chochtatannetsa, amaca'yeña aye'ña se'nenno attoch e'ñe cohuen entas ñapu'e't Yompor.

⁴⁵ Amach soctape'chatsche ñato' nach sotteñe'cherre' esempohuañen Apusho. Tarraña eñalca'yeña po'psheñeñ ñeñtcha' sotteñe'cherre' ñeñtpa' añca'ye Moisés, sañapa' ñeñña atarr nanac seyemtena.

⁴⁶ Ñerra'm po'ño'ch same'ñeñañ Moiséspa' napa'cho'ña same'ñennañcha' tarro'mar ñapa' nocopca'ye quellconas.

⁴⁷ Tarraña ñerra'm ama same'ñeñaño ñeñt atet quellconase't ña, ñeñfo'marña napa'cho'ña amach errotenot same'ñonoña naña neñoñ.

6

Allempo Jesúsapa' rratenan shonte' acheñenesha'; ñeñña acheñenesha'pa' allo'tsen amnaroch mil

(Mt. 14.13-21; Mr. 6.30-44; Lc. 9.10-17)

¹ Allempoña Jesúsapa' ahuo' yom'ta'n sa'p Galileaso, ñeñtara sa'p otenet Tiberias.

² Allña'pa' co'ta'neñ shonte' acheñenesha' tarro'mar ñetpa' o' entuoñet po'partsoña atto a'crratyerran allohuen ñeñt atsna'tyets.

³ O'ña chap yom'ta'n Jesúsña'pa' ahuos aspeno, allña anorros epuet pueyochresha'.

⁴ Allempopa' o' chapmoch pascuapo allempoch alla cosherrerr judionesha'.

⁵ Jesúsña cohuatsa a'yopa' entapan shonte' acheñenesha' ñeñt onachets ñeshone't. Allempoña'pa' atet otan Felipe:

—Errahuachca' yerañña pante' ñeñtcha' rros acheñenesha' ñeñt o' hua'cha'ta.

⁶ Ñehua, Jesúsapa' e'ñe po'tomña atet ot tarro'mar ñapa' eñoteñ atetcha' pa.

⁷ Felipeña'pa' atet och:

–Ama't epoch çharroch çharra' denario* alloch yerañta panpa' ama't puehmetafollapa' amate' rra'yeseto.

⁸ Pueyochresha'ña Andrés ñeñt pa'mo'nasheñ Simóm Pedropa' ñaña'pa' atet och:

⁹ –Arr pueheñarr huepuehachorpa' echenanca'ye amnar pan ñeñt cebada ñaña epa cac. Attapa' amate' yepataneto, acheñpa' shonte'ca'ye.

¹⁰ Jesúsña'pa' atet otanet:

–Te'pa' sotanet anorrcha'tetepa'.

Ñehua, allpa' e'ñe cohuen emmo'raten pasetma'. Ñetña'pa' anorrcha'tet. Yacmanesha'pa' ñato' amnarochte' mil eñall.

¹¹ Jesúsña'pa' chetan panpa' parasyoso'tam̄pes, allempoñapa' apan pueyochresha'. Pueyochresha'ña'pa' epatyaset allohuen acheñenesha' ñeñt anorrchets all. Attecma ãa allempo apa'yesanet ñaña cac. Allohuenetpa' e'ñe agaphuahuet ñeñt allpon muena'yeset.

¹² Allempoña o' rrallme'chuetpa' allohuenetpa' e'ñepa'tcha' yetrra'tuahuet. E'ñe yetuahuetpa' Jesúsña'pa' atet oterranerr pueyochresha':

–Te'pa' o'ch sa'yapaçherr ñeñt shotna'tyets ñeñt sa'pchatyes allochña'pa' amach es pertatso.

¹³ Allempoña a'yapaçherret ñeñt shota'tatyaset çhepa'tcha' chorrats çharra' puechena epa cañter ñeñt a'pchatet all rratanet amnar pan cebada.

¹⁴ Atto orrtatanet po'partsoña acheñenesha'ña'pa' atet otyeset:

–Añña po'ñoçhpa' ñeñtca'ye a'm̄tene' Yompor po'ñoñ ñeñt atarr yecuen o'ch huapa aña patsro.

¹⁵ Jesúsña'pa' eñotanet ñetpa' añ muenenet o'ch huapoñetpa' o'ch rromoset o'ch noset ñeñtcha' pa'm̄cha'tareter pet. Ñeñto'marña Jesús'pa' a'nahua ahuer all aspeno e'ñe ñapueñ.

Atto Jesús'pa' e'ñe cohuen chope'chnen enot oño

(Mt. 14.22-27; Mr. 6.45-52)

¹⁶ Allempoña ellerren pueyochrenesha'ña'pa' ahuanerret sa'patopño.

¹⁷ A'taça'tuerret po'noñtopa' o'ch ahuan̄perret yom̄ta'n, Capernaumonet. Allña'pa' alla checmetam̄pset. Jesúsña'pa' ama huerra' all allo'tsa'yenet.

¹⁸ Allña'pa' orrnotam̄pesnomuet, sa'pña'pa' cha emo'yarerta.

¹⁹ Ñetña'pa' echotnomuet sa'p amnar amapa' pechapte' kilómetro allña'pa' machayotepa'tcha' entapet Jesús chope'chnen enot oño. O' allame'ttsañña ãan noñt. Ñetña'pa' çhepa'tcha' mecha'tapet.

²⁰ Tarraña ñapa' atet otosanet:

–Naca'ye o' nohuapa, amach atta sem̄cha'tatstapno.

²¹ Ñetña'pa' mueneñetañ o'ch agapapet noñtoñ, eñotostsetpa' o' çhapña noñt yom̄ta'n all sechenet.

Allempo acheñenesha'pa' e'nereta' Jesús

²² Tsapatña acheñenesha' ñeñt alla a'patsa yom̄ta'n ñetpa' eñoteñet e'ñe patrre noñt allo a'taça't Jesús pueyochresha' ñaña Jesús'pa' enteñet amaca' a'tapo noñto epuet pueyochresha' e'ñe ñapfochayeta ahuanmuet.

²³ Tarraña noñteçhnoñapa' çhocma huachena Tiberiasot, o' çhapuet al-lame'tets all rret ellerro pan ñeñt parasyoso'tam̄pes Partsesha' Jesús.

* 6:7 Denariopa' quelle ñeñt allpon tsa'tenet pam̄tarr ñeñt taruaset all pa'nyo.

²⁴ Allempoña acheñenesha' ñeñt allo'tsen ñetñapa' o'huañ eñchet Jesús puey-ochreshohuen. Ñetpa'cho'ña allenta a'ta'cha'tet ñamet noñto, ahuañpset Capernaumone't, o'ch e'nereta' Jesús.

Jesús pa' ña yocrram yepen yecamquëñecop alloch e'ñe yocrrena

²⁵ Allempoña entoset yomña'npa' atet otoset:

—Maestro, ¿esempo'tña pe'cherrña pa' arrma?

²⁶ Jesúsñapa' atet otapanet:

—Na po'ño'chpa' o'ch notapas, sapa' amaca'ye añecpaye' se'nenno atto o' norrtatonas nepartsoña. Sapa' añecpacayaña se'nenen atto o' nerratuas pan o' e'ñe seyeta.

²⁷ Te'pa' o'ch notas, sapa' amach aña sema'yo'chratsto yocrram ñeñt e'nuapo'. Añcha'ña sema'yo'chra socrram ñeñt ama e'nuapahuoyaye; ñeñtña alloch sapa' corretsasach socsheñeshocmañen e'ñe tayoteñ ama't errponañohuen. Ñeñtña socrram'pa' nach sapuerre' Ñeñten Acheñetosets tarro'mar Apapa' o' llesenserren na Ñeñten Acheñetosets arr patsro.

²⁸ Acheñenesha'ñapa' atet otereterr:

—Errotenuachca' yepaña ñeñt cohuen enten Yompor.

²⁹ Jesúsñapa' atet oterraneterr:

—Ñeñt cohuen enten Yomporpa' o'ch same'ña'na na ñeñten llesensen.

³⁰ Ñetñapa' atet otereterr:

—Errotenuachca' pegateyña pepartsoña ñeñtcha' yentpa' atto'tcha' yame'ña'pa. Papa' esuañaca' petsoten.

³¹ Ya yatañnesha'ñapa' rra'yese'te' ñeñt maná all amayo atetca'ye anuaret Yompor po'ñoñ ahua'toteñ: “Rratyesanete't pan ñeñt apanete't Yompor pue'ntañot.”

³² Jesúsñapa' alla oterraneterr:

—E'ñe po'ño'ch o'ch notas: Ama Moisésoye' apahuete'teña pan ñeñt huetsa entot. Naca'ye Nompor sapuene'ña ñeñt e'ñe po'ño'ch socrram sepen. Añ socrram'pa' entotña huena.

³³ Naña socrram sepen ñeñten o' apuerres Nompor, napa'cho'ña entot nohuapa Yomporeshot allochñapa' acheñenesha'ña arr patsropa' ñetñapa' corretsetach.

³⁴ Ñetñapa' atet otereterr:

—Ayochreshate yapa'cho'ña chocmach papuey ñeñt corramets.

³⁵ Jesúsñapa' alla oterraneterr:

—Napa' na corramtsotets alloch e'ñe socrra. Esha'ch huapatsa nesho ñetña ama't ahua'tapa' amach alla cheporrerrete'te. Esha'ch name'ñerraya na ñetña ama't ahua'tapa' amach alla oñpa'terrete'te. Ñehua, ñeñt'pa' añ notenes, esha'ch name'ñerraya na ñetñapa' chocmach e'ñe cosherret pueyo'chreto, ama't ahua'tapa' amach alla es e'nerrete'te.

³⁶ Tarraña napa' o' notuas: Sapa' o' sentnoñ amaña same'ñenno.

³⁷ Allohuen acheñenesha' ñeñt o'patatenna Apapa' ñetñapa' ame'ñernetcha'. Esha'ch name'ñerraya ñetñapa' amach alla nehuapore'terraneto.

³⁸ Tarro'mar napa' ama añecpaye' nohuapoña entot attoch o'ch aña atet ne'pos ñeñt nemnen na. Napa' añecopña nohuapa o'ch atet neperr ñeñt atet muenen Nompor ñeñt nellsenserre'.

³⁹ Ñeñt'pa' atet muenen Nompor ñeñt nellsenserre': Amachña cha na'chencatereña acheñenesha' ñeñt ora allpon o'patatenna na, chocña ello netantaterrñañ esempohuañen.

40 Añmapa' ñeñña muenen Nompör: Erra'tsencha' neñterre' ñerra'm ame'ñerrnetcha' na ñeññen Yompör Puechemeren, ñetña' corretsetach pocsheñeshocmañen tayoteñ ama't errponañohuen. Ñetña' chocmach netantaterranet esempohuañen.

41 Atto Jesús'pa' otenanet, "Napa' na corramtsotets ñeññen huapatsa entoť", judionesha'ña' pocuana'teñoťet otatse'tyeñet.

42 Ñeñña' atet otyeset:

—Añmapa' añaca'ye Jesús, José puechemer, ñeññ pompor ñaña pachor e'ñeca'ye yechme'teñ. Te'ña' eso'mare'tña oten ñapa' entoťo' huapa.

43 Jesúsña' atet otanet:

—Sapa' amach atta sotatse'tanna'tyesatsto.

44 Ama't eseshapa' amach erroťenoť ame'ñerrneto ñerra'm Nompör ñeññ nellsensene' ñerra'm ña ama cotape'chaterrahuetu cohuen. Ñetña' netantaterranetcha' esempohuañen.

45 Atet quellquēť ñeññ a'mtayeť Yompör po'ñoñ ahuat, po'quellcopa' atet anuareť: "Allohuenetpa' Yompörcha'ña eñotaterrahuet." Allohuen ñeññcha' e'mñoterre' Nompör attoch cohuen cotape'chaterranet, ñetña' nachña ame'ñerret.

46 'Ama't eseshapa' ama puentareto Apa. Napña na ñeññen huapatsa Yompöreshoť nentarca'yeña Apa.

47 E'ñe po'ñoch notenes: Esha'ch name'ñerraya ñetña' corretsetach pocsheñeshocmañen tayoteñ e'ñe errponañohuen.

48 Napa' na corramtsotets alloch e'ñe socra.

49 Satañneshaña' ama't rra'yeseteť ñeññ maná all amayo, ñetña' o' colla'huenet.

50 Tarraña ñeññen sotene' te' ñeñña e'ñe po'ñoch socramñ ñeññen huapatsa entoť allochña' esesha'ch rre'pa' ñetña' corretsetach tayoteñ e'ñe errponañohuen.

51 E'ñe po'ñoch napa' na ñeññen corramtsotets alloch e'ñe socra ñeññen huapatsa entoť. Ñerra'm esesha' rre' añ corrametspa' ñetña' corretsetach tayoteñ e'ñe errponañohuen. Añ corramets ñeññcha' nepomuerr na acheñeshacop arr patsro alloch e'ñe correnet, ñeñña' añca'ye nechets.

52 Judionesha'ña' ñeñño'mara'cho' es otanna'tyeset. Ñetña' atet otyeset: —Erroťenoťuachñaca' apueyña e'ñe ña po'chets ñeññcha' yerra'.

53 Jesúsña' alla oterraneterr:

—Po'ñoch o'ch notas, ñerra'm ama serrerrnano nechets Ñeññen Acheñetosets, ñerra'm ama sorrerrnano ñaña nerras, sapa' amate' erroťenoť socroña sa.

54 Ñerra'm esesha' rrene' nechets ñaña ñerra'm orrennanet nerras, ñetña' corretsetach tayoten e'ñe errponañohuen, tarro'mar ñaña' netantaterranetcha' esempohuañen.

55 Tarro'mar nechets ñeññ e'ñe po'ñoch corramtsotets; ñerraspa'cho'ña ñeññ e'ñe po'ñoch orrapo'.

56 Ñeññcha' rrene' nechets ñaña ñerra'm orrennanet nerras ñetña' e'ñech parrocmatenet na, napa'cho'ña e'ñech neparrocmatenanet ñet.

57 Apa ñeññ nellsensene' ñapa' ama arromñañeshayaye, ñaca'yeña napuene'ña atto napa'cho'ña corretsanach. Atet nepena ñaña, allohuen ñeññ pocramñ nepene' napa'cho'ña añ napuananet attoch ñetpa'cho'ña corretsetach ñamet.

58 Na ñeññen socramñ sepen ñeññen huapatsa entoť. Ama atteyayno ñerra'mrrate' pan ñeññ rre't satañneshañ ahuat. Ñetpa' o' colla'huenet.

Esesha'ch e'ñe pocrramñ nepene' ñetñapa' corretsetach tayoteñ e'ñe erponañohuen.

⁵⁹ Arrpa' allohua ñeñt atet yeçhatenan acheñenesha' judionesha' po'prahuo all Capernaumo.

Jesús po'ñoñ ñeñtpa' alloch yocrrena tayoteñ errponañohuen

⁶⁰ Allempoña atet e'mueñet atet oten, shonte' pueyochreshačhno' atet otyeset:

—Añ ñoñetspa' amaca'ye e'ñeye' pocteyaye, amate' esesha' ame'ñayo.

⁶¹ Jesúsapa' e'ñe pueyočhro eñotanet čha otatse'tyen pueyochreshačhno, ñeñto'marña atet oterraneterr:

—Ñeñt atet notenespa' are't pocteye' senteñe.

⁶² Ta'm, ¿errotena'tcha' sotña ñerra'm po'ñočh sentennoñ na Ñeñten Acheñetsosets o'ch alla na'terreñ ento allot nohuapa ahuat?

⁶³ Yecamquëñ alloña e'ñe po'ñočh yocrrena. Yechetspa' ama't coñe'tapa' ama sherbeno. Neñoñ ñeñt neserrpare'tatenespa' e'ñe po'ñočh secamquëñecop ñeñtña po'ñočh alloch e'ñe socrra.

⁶⁴ Tarraña pantanta'ttsospa' amaña same'ñenno.

Ñehua, Jesúsapa' e'ñe allempoteñ eñotenan ñeñtcha' ama ame'ñerrtso. E'ñe eñotenan ñaña ñeñtcha' pomuerre'.

⁶⁵ Jesúsapa' alla oterraneterr:

—Ñeñto'marña napa' notase't, amach esesha' name'ñerrayo ñerra'm ama Apa cotape'chaterrahueto attoch coterrnet.

⁶⁶ Allempoteñña shonte' Jesús pueyochreshačhno puerračherret ñesho'tpa' o'huañ chopeñe'chenet parro.

⁶⁷ Allempoña Jesúsapa' atet otan pueyochresha' ñeñt čharrasheña puechena epa:

—Sapa'cho' ¿semneñe't o'ch sepurrerra saña?

⁶⁸ Simón Pedroñapa' atet och:

—Partseshacha', esesha'hua'te'ñaca'ye yoc'ta'. Paptaca'ye pechenña ñoñets attochña yapa' corretsayach tayoteñ errponañohuen.

⁶⁹ Yapa' o'ca'ye yame'ñaña. Yapa' yeñoteneñ papa' pepa'tca'ye Cristotets, ñeñteñ Yompör Puechemereñ.

⁷⁰ Jesúsña atet otanet:

—Napa' naca'yeña sa'crrer'eña sa, čharrasheñas sepchena epa. Ñeñtña puesheñarrpa' ñeñtpa' oneñetena'tar.

⁷¹ Ñehua, Judasocop atet eñora. Ñeñt Judaspa' ñeñt Simón Iscariote puechemer. Ama't ñeñt a'pchenahuetañ epa pueyochresha', puesheñarrpa' ñeñtcha' pomuerre'.

7

Ama't ñeñt pa'mo'nasheñnesha' pen Jesúsapa' ñetpa' ama eseshaye' ame'ñenayo

¹ Allempoña Jesúsapa' alla chopeñe'chyen e'ñe alla Galileo'mar. Ama mueno o'ch chopeñe'chen ñaña all Judeo'mar tarro'mar judionesha'pa' čha o'pateñet o'ch muetset.

² Allempopa' o' čherrmocherr allempoch cosherrerr judionesha'; ñeñtcha' cosherreterr añ pa'so'cheñ Manatpuetsopo', ñeñt atet yeçhenet ñet.

³ Allempoña Jesúsapa' atet och pa'mo'nasheñnesha':

—Te'pa' orrerreñ arro't, ahuerreñ alla Judeo allochñapa' peyochreshačhno ñeñt allo'tsa'yen o'ch porrtatuerranet ñamet pepartsoña ñeñt atet pe'pa'yena te' arrma.

4 Ñehua, ñerra'm yemneñ o'ch yorrta allohuenacoppa' ama't puesheñarrofeyapa' amachña a'nahua es yeþa'yeno. Ñerra'm po'ñoçh þorrtatyen peparsoña arrpa' þorrtachñaca'ye ñaña allohuen acheñeneshacop añ patsro.

5 Ama't pa'mo'nasheñnesha'pa'çho'ña tarro'mar atet ochet ñetpa'çho'ña amaca'ye ame'ñeñeto.

6 Jesúsñapa' atet otanet:

—Allempo ñeñt̃ poctetsa nocop o'ch norrta allohuenacoppa' amaca'ye e'ñeye' çhena'. Tarraña socoppa' e'ñeca'ye pocte' çhocmaca'ye eñall.

7 Tarro'mar acheñenesha'ña añ patsropa' amachca'ye errotenot e'moñe'tasoña sa, tarraña napa' çhocma e'moñe'tyennet tarro'mar napa' añca'ye neñotatyenanet ñeñt̃ atet þatse'tyenet ñeñt̃ ama pocteyaye.

8 Sapa' orras socshapretena'. Napa' e'ñe tayecmapa' amachca'ye neto coshapretatsa. Tarro'mar nocoppa' ama e'ñeye' çhena' allempoch e'ñe pocta'huona.

9 Atet otuanetpa' ñapa' alla a'pa mame' Galileo.

Allempo Jesús coshapretena' ñeñt̃ otenet Manatpuetsopo'

10 Allempoña pa'mo'nasheñeçhnopa' ñetñapa' ahuanmuet coshapretatset. O'ña tama o'chetpa' ahuo' ñaña, tarraña ñapa' ama orrtenaneto, a'nahua co'ta'nenanet chenta'.

11 Judionesha'ña all coshenetpa' ñetñapa' e'neñet atet otyenet:

—Ta'mca'ye ¿erro'tsente'ña Jesús?

12 Allña acheñenesha'pa' shonte' eñosyenet ñocop. Patanta'tetspa' atet otyenet: “Ñapa' e'ñe cohuen acheñer”; po'potantañeçhnopa' atet otyenet: “Amaca'ye cohuenayaye, atfaca'ye shecare'tyenan acheñenesha'.”

13 Ñetpa' atarr mecha'teñet judionesha' ñeñto'marña a'nahua atet otanna'tyenet.

14 O'ña patma'nma atto coshenet Jesúsñapa' be'tosos Parets pa'paclo, yeçhatosanet all.

15 Allñapa' epaye' cohuanrrorech judionesha'. Ñetñapa' atet otyeset:

—Ta', erro'tente'ca'yeña añ, ama't ama ayçhatarete quellecpa' atarrep'a't es eñotyen.

16 Jesúsñapa' otanet:

—Ñeñt̃ atto neyçhatyenes ñeñt̃pa' amaca'ye noyaye noctapña, ñeñt̃pa' Yomporoña poctapña ñeñt̃ nellensene'.

17 Ñerra'm esesha'ña muene' o'ch atet pet ñeñt̃ muenen Yompor ñetñapa' eñochetcha' neyçhateñpa' Yomporo amaca'ye notaye' neñeno.

18 Ñerra'm esesha' e'ñe ñofo'ta eñenpa' ñetñapa' añach e'nenet o'ch cohuentateññañ acheñenesha' e'ñe ñocop. Añña ñerra'm esesha' e'nene' o'ch cohuentatenan ñeñt̃ llesensene' ñapa' ñeñt̃ña eñetsña ñoñtso e'ñe po'ñoçh ama shequëñtsoyaye.

19 'Ama't apasoña Moisés ñoñets ñeñt̃ atet anaret. Tarraña ama't apaseñ, sañapa' ama't e'ñe puesheñarrofesapa' ama seþohuenoña ñeñt̃ atet oten añ ñoñets, ñeñt̃epña' eso'mare'tña te'pa' semneñña o'ch semtsan.

20 Acheñenesha'ñapa' atet otereterr:

—Papa' çhate' chorrenþa oneñeñ. Amarramche' esesha' þo'patenayeña o'ch muetsapet.

21 Jesúsñapa' alla oterraneterr:

—Napa' ama't parrocha norrtatonas nepartsoña añ yetro allempo yamesen saña allempopa' atarr secuanrroretnoñ tarraña sañapa' ama pocteye' senteñe.

²² Moiséspa' apa'nmas ñeñtcha' seycha' attoch setsorrannena. Ñehua, po'ñoçh ñeñtpa' ama ñanom Moisésoye' sapaye, ñeñtpa' satañneshañe'naña seychatnomue' ahuatoteñ. Ñeñto'marña sapa' chocmach setsorraten asheñorroñoll ñerra'm o'ch posocmata'muen ama't añ yetro allempocma yamesen chocmaña setsorratenña asheñorroñoll.

²³ Atto sapa' setsorraten asheñorroñoll ama't añ yetro allempocma yamesen attoch amach satpueno ñoñets ñeñt atet anaret Moisésot, ñeñtepñapa' eso'maruañaca'yeña se'moñe'tenenña na allempo e'ñe na'crraten puesheñarr acheñ añ yetro allempocma yamesen.

²⁴ Ñerra'm esempo senteñ po'psheñeñ ñeñt atet penpa' amachña ñeñfota sotteñe'chatsche año' cohuenaye' es yeçcateno. Chochña ñanom señoçh errotenñe'ña ñeñt po'ñoçh atet pena.

Atto Jesús pa' eñotatanet ñapa' Yomporeshot huapa

²⁵ Patanta'tets jerusaléño'marnesha'pa' atet otyenet:

—Ta'm amate' añeyayeña ñeñt o'patenet o'ch muetset.

²⁶ Ñapa'cho'ña allo'tsenepa't arr, atta ama es pueçheno eñosets, amaña erroteye'ña oteñeto. Ñato' tarro'marte'ña ama't añcha'tareñnesha'pa' o'ca'ye eñotuet po'ñoçh ñapa' ñeñtca'ye Cristotets.

²⁷ Tarraña añpa' yeñoteñca'ye allot huena. Tarraña esempoch huapa ñeñtcha' e'ñe po'ñoçh Cristotats ñapa' amach eseshaye' eñotapaye erroçha' huapa.

²⁸ Jesúsña allempo yeçhaten Parets pa'paclo, ñapa' puerranarot atet otanet:

—Sapa' sechme'tennoñe', señotennoñe'ña na erroñte' nohuapa. Tarraña napa' ama notaye' nohuapo, eñallña ñeñt nellense'; ñapa' e'ñe po'ñoçh ñerra'm erroñ ot, ama puenesho po'ñoñ. Ñeñtña sapa' ama señoteñeña sa.

²⁹ Nañapa' e'ñe neñoteñ, ñeshotca'ye nohuapa. Ñapa' ñeñtca'yeña nellenserre'.

³⁰ Allempocma atarr mueneñet o'ch rromuetañ tarraña ama esesha' rromaye. Tarro'mar ama çhena' allempo ñeñt poctetsa ñocop attoch rromuet.

³¹ Shonte' acheñenesha' ñeñt ame'ñaya. Ñetñapa' atet otyenet:

—Añte'ca'yeña po'ñoçh Cristo ñeñt yecuen o'ch huapa. Yapa' o'ca'ye ortatosnay po'partsoña, amate' errotenot huapo po'psheñeñ ñeñtcha' ello metanose' po'partsoteña ñeñt atet entatyeney añ yacmar.

Allempo fariseonesha'pa' mueñet guardianesha' ñeñtcha' rromuenayañ Jesús

³² Fariseonesha'ñapa' e'mare'teñet shonte' acheñenesha'pa' e'ñe cohuen eñosyenet Jesúsocop. Ñeñto'mar ñet ñaña ñeñt pa'mcha'tareñnesha' pen allohuen judionesha' po'cornaneshar, ñetñapa' mueñet guardianesha' ñeñtcha' rromuenayañ Jesús.

³³ Jesúsña'papa' alla otarraneterr:

—O' mameshaña e'ñe parro'tseney. O'chña mamerrerrpa' o'ch alla ahueren allo'tsen ñeñt nellensene'.

³⁴ Allempoña ama'tcha' se'name'terrenpa' amach senterrno. Allcha' neserr napa' sañapa' amate' errotenot seçhapo.

³⁵ Judionesha'ñapa' atet otanna'tyeset:

—Ta', ¿errach taña añma ñeñto'mar amach yentere? Ñato' arrcha' ta griegoneshesho all parratse'tyen yamo'tsesha' o'ch ye'chatenana' griegonesha' all.

³⁶ Ta', ¿esté'ña añma ñeñto'mar atet oten: “Ama'tcha' se'nerrna'pa' amach senterrno; allcha' neserr napa' sañapa' amach erroteno' se'chapo”?

Allohuen ñeñt ame'ñenaya Jesús, Parets Puecamquëñto'pa' e'ñe pueñmateño'tet pueyo'chreto atet penet ñerra'mrrate' allo't poten oñ ñeñt atarr cohuen

³⁷ O' e'ñe huañmoch all coshena judionesha'. Añe yetro allempo nanac coshenet, Jesúsñapa' tomos all, puerranaro't atet otosanet:

—Erra'tsente' acheñer oñpa'tets e'ñe pueyo'chreto, onetepa' nesho or-retepa'.

³⁸ Ñeñt name'ñenaya na e'ñe pueñmateño'tet pueyo'chretopa' atet pena ñerra'mrrate' allo't poten oñ aton ñeñt atarr cohuen, tarro'mar ñeñt'pa' atet oten Yompor po'ñoñ ñeñt anuaret ahuatoteñ.

³⁹ Ñehua, añ ñoñetspa' añecop serrpare'ten Yompor Puecamquëñecop ñeñt'cha' chorrerraya allohuen ñeñt'cha' ame'ñerraya ña. Tarraña allempopa' ama aparetteneta' Yompor Puecamquëñ, tarro'mar Jesús'pa' ama 'chena' allempoch alla ahuer Yompor pue'ntaño allcha' e'ñe cohuentaterrñañet.

Allempo acheñenesha'pa' ellopa'tetstatenet pocta'ña Jesúsocop

⁴⁰ Allempo e'mhuet ñeñt atet oten Jesús, patantarrña acheñenesha'pa' atet otyeset:

—Po'ño'ch añmapa' ñeñt'e'ca'ye a'mtene'ña Yompor po'ñoñ ñeñt 'chocma yecuen.

⁴¹ Po'potantañpa' atet otyeset:

—Añmapa' ñeñt'e'ca'yeña Cristotets ñeñt 'chocma yecuen.

Po'potantañpa' atet otyenet:

—Ñeñt'cha' Cristoterretspa' amate' arrota huapo Galileo't.

⁴² Ama't otenoña Yompor po'ñoñ ñeñt anuaret, David'cha' po'm'renño't huapaña ñeñt'cha' Cristoterrets; arro'tcha' huapa anetso't ñeñt Beléñ ñeñt pa'netser pe't David.

⁴³ Ñeñto'marña allohuen acheñenesha'pa' ellopa'tetstatenet pocta'ña Jesúsocop.

⁴⁴ Patanta'tetsñapa' atarr mueneñet o'ch rromuet, tarraña ama esesha' rromaye.

Atto judionesha' pa'm'cha'tare'ternesha' ama ame'ñeñeto Jesús

⁴⁵ Guardianesha'ñapa' puerra'cherret allo'tsen ñeñt pa'm'cha'tare'ternesha' pen allohuen judionesha' po'cornaneshar epuet ñaña fariseonesha'. Ñetñapa' atet otare'ttapuerret:

—Eso'maruañaca'yeña amaña sehuapatere.

⁴⁶ Guardianesha'ñapa' atet otuerret:

—Ama't eseshapa' ama pueñosaroña atarr cohuen atet eñen ña.

⁴⁷ Fariseonesha'ñapa' atet oterraneterr:

—Tarro'marte' ama sehuapatere sapa'cho'ña 'chote'ca'ye shecapas saña.

⁴⁸ Ama't ñaña patantarr añcha'tare'tnesha'pa' ama't o' 'cha ame'ñyeto ñamet. Ama't ñaña patantarr fariseonesha'pa'cho'ña o'te'ca'ye 'cha ame'ñyet.

⁴⁹ Tarraña ñeñt acheñeneshar ñeñt ama eñotenaye ñoñets ñeñt atet anaret ñetñapa' a'cmare'tet.

⁵⁰ Ñeñtña puesheñarr fariseo ñeñt Nicodemo ñeñt tatsa ahuaña Jesúsesho, ñaña'pa' atet otan pamo'tsesha' fariseonesha':

⁵¹ —Ñoñets ñeñt atet anaret yocoppa' atet oteneý, amach errotentot yecoñchache ama't puesheñarra achen e'ñe attota. Chochña ñanom ye'mñoch attoch yeñoch este' otatse'tyen ñeñt atarr sosey yenten esheccha'ña yecoñchach.

⁵² Ñetñapa' atet ochet:

—Eso'maruachca' pemoñesyaña galileo'marnesha', ñato' papa' galileo'marneshapte'. Papa' amarramche' galileo'marneshayaype. Te'pa' pelleya'yes Yompot po'ñoñ allochñapa' o'ch peñoch Galileo'tpa' ama't puesheñarrapa' amach huapoña ñeñtcha' a'mtene' Yompot po'ñoñ.

Allempo puesheñarr coyanesha' huapachet Jesúsesho ñeñt chetapretene' pacma puerrollar

⁵³ Allempoña allohuenet ahuanemyerret pa'pacleto.

8

¹ Jesúsñapa' ahuerri Olivo'pno.

² Tsapaña po'pocheño e'ñe ahuañecma alla chenerr Parets pa'paclo. Shonte' achenenesha' alla huacheneterr ñesho. Ñaña' anorros allña yechatenaneterr.

³ Ñeñña etsotayenayeñ ñoñets ñeñt atet anaret judioneshacop ñaña fariseonesha' ñetñapa' huapatoñet puesheñarr coyanesha' ñeñt rromuet all eñchet chetapretenan po'psheñeñ pacma puerrollar. Nosñañet e'ñe rrocho.

⁴ Allña' atet otoset:

—Maestro, añ coyanesha'pa' o' yentaprech e'ñe all chetapretenan pacma puerrollar.

⁵ Moisés po'ñoñ ñeñt atet anaret ñeñtpa' atet oteneý, aña' choch yarrolle'ch. Te'ña papa' ¿errote'tcha'ña poteyña pa'?

⁶ Ñeñtpa' tarro'mara atet otoset ñato'rraña eñorachet ñeñt ama pocteyaye allochñapa' attoch a'metampeñeta'. Jesúsñapa' allenta mo'capa' o' quellcan pats potapo.

⁷ Ñetñapa' alla a'pto'tereterr. Jesúsña echanterrtsapa' atet otanet:

—Ñerra'm erra'tsenoteste' ama eñalle so'chñarpa' sarrolle'chca'ye sanom.

⁸ Alla mo'querrerr o' alla quellquerranerr pats potapo.

⁹ Ñetñapa' o' e'met atet otanet Jesúsapa' e'ñe aco'poteñ ahuanemhuerret e'ñe puesheña'ttset. Añ ñanom ahuanerrtsa po'nmenesha'chno, attotapa' o' ñapñaña Jesús epuet coyanesha'.

¹⁰ Jesúsña echanterrrrpa' atet otan coyanesha':

—Nocheshacha' ¿erro'tsa'yeneta'tña? Ama't puesheñarro'teta ñetpa' are'tcha'ña coñchatape.

¹¹ Ñaña' atet otan Jesús:

—Ama Ayochreshate eseshaye' necoñchataye.

Jesúsñapa' alla otererr:

—Napa'cho'ña amach necoñchatape. Te'ña ñerra'm ahuerre'ppa' amach allo'na atet pe'pa'nen ñeñt ama't mamesha ama pocteyaye.

Jesúsapa' ña a'puetarsampene' achenenesha' poctapña aña patsro

¹² Jesúsña po'pocheño'pa' serrpare'taterranerr achenenesha', ñeñtpa' atet oterraneterr:

—Napa' na ñeñten a'puetarsampene' achenenesha' poctapña aña patsro. Esha'ch nocterre' o'huañcha' allo'na cotape'chatnenanet poctapña ñeñt atarr sosya'tsañ; ñeñtpa' checmeta chopeñe'chyenet. Ñetñapa' Yompotcha' po'cohuenño correrret ñeñtara ñeñt puetares.

13 Fariseonesha'ñapa' atet ochet:

—Papa' pañeña a'potetsa ñeñto'marña atto pa'potenapa' ama sherbeno.

14 Jesúsñapa' oterraneterr:

—Tarraña ama't nañeña a'potetsapa' atto na'potenapa' e'ñe sherben. Tarro'mar napa' neñoteñ allot nohuapa ñaña neñoteñ allcha' neserr. Sañapa' ama señotheno allot nohuapa ñeñto'marña ama señotheñe allcha' neserr.

15 Sa sotatseña' e'ñe orrena atet sepena, arromñañeneshasa atet petsa. Napa' ama't puesheñarrapa' ama notatse'tenaneto e'ñe atfa.

16 Tarraña ñerra'm esempo na'metenanet ñeñt atet nentapretyenanet ñeñtpa' e'ñe po'ñoçh atet tarro'mar napa' ama napteye' es neña'yeno, napa' çhocmaña epan Apa ñeñt nellsensene'.

17 Ñoñets ñeñt atet anaret ñeñt sechen sa, ñeñtpa' atet oten: Ñerra'm epsheña a'potene' e'ñe attecma ñeñtpa' e'ñeca'ye po'ñoçh otenet.

18 Napa' ñeñt atet na'potena na, Apaña ñeñt nellsensene' ñaca'yeña na'potene'ña nocop.

19 Ñetñapa' atet otereterr:

—¿Erro'tsena'tña pa Pompor?

Jesúsñapa' atet oterraneterr:

—Ama't napa' ama señotheno, Apapa'çho' ama señotheñe. Ñerra'm señothenoñ na Nompore'nate' señotheñe.

20 Allempopa' atet otanet Jesús all allecma añño'tenet quelle ñeñt Yomporecop allempo yeçhatanet allara Parets pa'paclo. Tarraña ama't puesheñarra ama eseshaye' rromaye tarro'mar ama çchena' allempoch ñeñt poctetsa ñocop o'ch rromuet.

Allempo Jesús otanet allcha' serr ñapa' acheñenesha'ñapa' amach errotentot çchapueto e'ñe allempocma

21 Allempoña Jesúsapa' atet oterraneterr:

—Napa' o'ch ahuerren, sapa' se'nerrencha'. Sapa' orach ochñaretes serromhua. Allcha' neserrpa' sañapa' amach seçhapano.

22 Judionesha'ñapa' atet otanna'tyeset:

—Ta'm ñapa' o'ch muetsa ñañeña, ¿ñeñto'marte' atet oten allcha' serrpa' yañapa' año'ch yeçhapano?

23 Ñaña' alla oterraneterr:

—Sapa' alla ayeçhcañas arr patsro. Nañapa' ento'marneshan. Sapa' patso'marneshasa, nañapa' ama patso'marneshayayno.

24 Napa' o' notas sapa' orach ochñaretes serromhua tarro'mar ñerra'm amach same'ñerrno na ñeñten peretnene' ochñarets, po'ñoçh sapa' orach ochñaretes serromhua.

25 Ñetñapa' atet otereterr:

—Papa' po'ñoçh ¿eseshape'tña?

Jesúsñapa' alla oterraneterr:

—Napa' ñeñtenca'ye po'ñoçh çhocma sotene'.

26 Atarr nanac palltena çhocmach notenes atet sepena sa, shonte'ch neños añecop atet nentyen. Tarraña ñeñt nellsensene' ñapa' e'ñe po'ñoçh atet oten ña. Napa' añca'yeña ne'ñoreññaña acheñenesha' arr patsro ñeñt atet ne'mueññañ Apa.

27 Ñetñapa' ama esesha' çchapahueto pueyoçhreto ñeñt atet otenanet Pom-porecop ñeñt atarr Parets.

28 Jesúsñapa' alla oterraneterr:

—Ñerra'm esempoch sapa' sechantam̄psen eno corsocho na Ñeñten Acheñetosetspa' allempochña chaponasa seyoçhro napa' ñeñten e'ñe po'ñoçh çhocma sotene'. Chaponasach ñaña napa' ama es nepeno e'ñe nota, añña ne'ñorena atet yeçhatenen Apa.

²⁹ Ñeñt nellsensene' ñapa' e'ñe parro'tsenen. Ama a'montsenno, tarro'mar napa' e'ñe çhocma atet nepena ñeñt muenen ña.

³⁰ Allempo atet serrpare'tatenanet allempopa' shonte' ame'ñaya all.

Atto ñeñt puechemer pen Yompor ñetñapa' atarr cohueno'tsa'yenet; ñeñtña ama puechemer peno Yompor, ñetñapa' po'chñara taruasatenahuet e'ñe atta

³¹ Allempoña Jesúsapa' atet otan judionesha' ñeñt ame'ñenaya ña:

—Ñerra'm çhocma soçtape'chon neñoñ po'ñoçhpa' neyochresha'ch nepenes.

³² Allempopa' señoterrcha' ñoñets ñeñt e'ñe po'ñoçh Yompor po'ñoñ. Ñeñtña ñoñets po'ñoçhpa' toram̄perrescha' e'ñech cohueno'tsenes.

³³ Ñetñapa' atet otereterr:

—Yapa' Abrahamca'ye po'mrenñey. Ama't ahuata yapa' ama't puesheñarrofeyapa' ama ehucarefeyeye attoch esesha' yetaruasate' e'ñe atta. Eso'marte' pañapa' poteneyña atoram̄psarefeyo'ch.

³⁴ Jesúsñapa' alla oterraneterr:

—Po'ñoçhca'ye notenes: Allohuen ñeñt ochña'tare'tetspa' po'chñara huanquēnahuet, ñetñapa' po'chñara taruasatenahuet e'ñe atta.

³⁵ Ñeñt ataruasatare' e'ñe atta amach çhocmaye' yeçherro e'ñe parro'epuet pamo'mte'. Tarraña na ñeñten Puechemeren çhocma e'ñe neyçhena epan Namomte' errponañohuen.

³⁶ Ñeñto'marña na ñeñten Puechemeren ñerra'm na setoram̄perre' sapa' atoram̄psaretescha' e'ñe po'ñoçh, amach alla taruasaterrese'te so'chñar.

³⁷ Na po'ñoçhpa' neñotenes sapa' po'mrenñeseñ Abrahampa' tarraña sapa' aña semnen o'ch semtsan. Tarro'mar neñoñpa' ama't mameshapa' ama çhennaso sa seyoçhro.

³⁸ Napa' añ neñeñ ñeñt atet nentapreteñ Apa. Sapa'cho'ña aña atet sepen ñeñt atet se'mapreteñ ñeñt sompor sepen.

³⁹ Alla otereterr:

—Ya yatañpa' Abrahamca'ye.

Jesúsñapa' atet oterraneterr:

—Sapa' ñerra'm po'ñoçh Abraham po'mrenñeseñ soçtape'cheneñte' atet e'ñe cohuen coçtape'che't Abraham.

⁴⁰ Tarraña sa te'pa' cha so'patenna o'ch semtsan na ñeñten seserrpare'tatene' ñoñets ñeñt e'ñe po'ñoçh ñeñt atet ne'mueññañ Yompor. Abrahampa' amaca' atfeye' pe'te.

⁴¹ Sapa' e'ñe aña soçtape'chen atet pena sompor.

Ñetñapa' alla otereterr:

—Yapa' amaca'ye ellapnaneshoteye' ye'ñallete. E'ñe ñapña Yompor yepen ñeñtara Parets.

⁴² Jesúsñapa' alla oterraneterr:

—Ñerra'm po'ñoçh Sompor sepeñeñ Parets atarrte' semorrentennañ na tarro'mar napa' Partseshotca'ye nohuapa o' neçhap arr. Napa' amaca'ye notaye' nohuapo, napa' Yomporña nellsense'.

⁴³ Eso'mare'tña sapa' ama çhennasoña seyoçhro ñeñt notenes. Ñato' tarro'marte'ña ama semno o'ch se'mñoten ñeñt atet notenes.

⁴⁴ Sapa' oneñetaca'ye ñeñt sompor sepen. Ñeñto'marña sapa' aña semnen o'ch sepa ñeñt muenen sompor. Ñapa' ahuaťoteñ e'ñe pa'motroteñ amtsañta. Ñapa' ama't mameshapa' ama eñora'penoña Yompor po'ñoñ ñeñt e'ñe po'ñočh tarro'mar ñoñets ñeñt e'ñe po'ñočhpa' amaca'ye atanenoña ña pueyočhro. Ñerra'm čho eñorenapa', shequēñtsach eñorena tarro'mar ñapa' e'ñe shequēñtsa eñoten. Po'ñočh sequēñetspa' pomporca' penanña oneñet.

⁴⁵ Tarro'mar napa' añ notenes ñeñt e'ñe po'ñočh sañapa' amaña same'ñenno.

⁴⁶ Ama't puesheñarroťesa sa, napa' amach erroťenoť sotno napa' eñallo' no'chñar. Atto napa' añ notenes ñeñt e'ñe po'ñočh eso'mare'tña sañapa' ama same'ñenno.

⁴⁷ Erra'tsente' Yomporena'tarpa' ñetñapa' čhochca'ye e'mñoteññañet Yompor po'ñoñ. Ñeñto'marña sapa' ama se'mñoteññañe po'ñoñ, amaca'ye Yomporena'tareyayso.

Allempo Cristopa' atet otanet: Allempo ama eñalletena' Abraham, nañapa' eñallana

⁴⁸ Judionesha'ñapa' atet otereterr:

—E'ñe po'ñočh atet yoteneþ, þapa' samario'marneshap, oneñeta pechorrenaya.

⁴⁹ Jesúsñapa' oterraneterr:

—Napa' ama čhoye' chorrenno oneñet. Napa' atarr nanac nemčha'na'teñ Nompore Parets. Sañapa' ama semčha'na'tenno na.

⁵⁰ Napa' ama añeye' ne'nenno attoch necohuentata nañeña. Eñallña ñeñt necohuentatene' na. Ña eñoretsa atet es entyen arr patsro.

⁵¹ Po'ñočhca' notenes: Ñerra'm esesha' e'ñe cotape'cherre' neñoñpa' ñetña ama't ahuaťapa' amach e'ñe poctacma rromuerreto.

⁵² Judionesha'ñapa' alla otereterr:

—Te'ña po'ñočh yapa' o' yeñotaþ þapa' čha chorrenþa oneñet. Ama't Abrahamapa' o' rromuen ñaña ñeñt a'mta'yesaye't Yompor po'ñoñ ñeñtþa'čho'ña o' colla'huenet. Te'ña þapa' atet þoteny esesho'ch cotape'cherre' peñoñpa' ama't ahuaťapa' año'ch rromuerreto.

⁵³ Papa' čhate' þotenapañ ellote' pemtaneñ atto amčha'tarette't Abraham ama't ñapa' o'ca'ye rromuen. Ñeñt a'mta'yesaye't Yompor po'ñoñpa' ñetpa'čho'ña o' colla'huenet. Papa' čhate' þotenapañ amate' arromñatēshayaype.

⁵⁴ Jesúsapa' atet oterraneterr:

—Ñerra'm na cohuentatetsa nañeña, necohuentateña e'ñe napa' amate' es sherbeno. Nomporepa' ña necohuentatene' ñeñtara ñeñt soteneñ Seyomporro' sepeñ samā.

⁵⁵ Sapa' amaca'ye señoteñe tarraña napa' neñoteñca'ye. Ñerra'm na otetseñ ama neñoteñe napa'čho'ña atteneñte' ñerra'm sa, čhate' neshcare'tensoñ. Napa' e'ñe po'ñočh neñoteñ ñeñto'mar čhocma noctape'cheññañ po'ñoñ.

⁵⁶ Abraham ñeñt sa satañpa' atarr nanac cosha allempo eñoch o' čhap allempo ñeñt poctetsa nocop o'ch nohuapa arr patsro. Allempoña eñoch napa' o' nečhap arr patsro atarr nanac cosha.

⁵⁷ Judionesha'ñapa' alla otereterr:

—Papa' ama pechena' amnaroch čharra' pecharña þañaapa' eso'mare'tña þotenyña þapa' pentero' Abraham, ñeñtþa' ahuaťramche' corre't.

⁵⁸ Jesúsñapa' alla oterraneterr:

—Po'ñočhca' napa' o'ch notas: Ama eñalletena'ña Abraham, nañapa' eñallana.

⁵⁹ Ñetñapa' allenta chetet mapue'pa' o'ch rrolle'chetañ tarraña Jesúsña a'nahua cha'nerr Parets pa'paclo'pa' o' ahuerr o' sohanerranet.

9

Allempo Jesúsapa' a'crraterran puesheñarr aporo'yet ñeññ atta eñalletña

¹ All oñen Jesúsapa' allña entnoman puesheñarr yacma aporo'yet. Ñeñña aporo'yetpa' atta eñalletña.

² Pueyochresha'ñapa' allenta a'p'to'chet:

—Maestro, ¿eseshatña ochña'tats ñato' ña amapa' pamo'mte'te' ñeñño'mar eñalletaña atet aporo'yet?

³ Jesúsñapa' atet otanet:

—Amaca'ye po'chñaro'teyaye ama't ñaña pamo'mte'; ñeñtpa' añecopña allochñapa' o'ch norrtatoñ Yompor po'partsoña ñesho.

⁴ Ñeññ poctetsa o'ch norrtatoñ po'partsoña ñeññ nellsense' tayepa'tñapa' puetarmeñ. Ñerra'm o'ch checmetenpa' amach eshcaye' yetaruaso.

⁵ Tayepa'tña aña patsro'tsenmeñenpa' na ñeñten a'puetarsañpene' acheñenesha' poctapña aña patsro.

⁶ Allempoña atet otuapa' allenta a'chonan pa'snom patso o' a'cha'cha'tach. Ñeñña cha'cha'te'pa' alloña a'yacle'chanña aporo'yet.

⁷ O'ña a'yacle'chuepa' atet och:

—Te'pa' orrap oño all apco'sattatareto ñeñtpa' añ pa'so'cheñ Siloés. Allcha' pe'pacle'cha. (Ñehua, aña'ye otenetña Siloés ñeññ oñ ahua'ñareñ.)

Ñañaapa' allenta ahua' oño allcha' e'pacle'chena'. E'pacle'chuatsapa' e'ñe errtsapa' allentepa'tcha' cohuenterraña pa'c'le' e'ñe cohuen enterra.

⁸ Pamo'tsesha'ña ñaña po'poñe'chno acheñ ñeññ e'ñe cheme'tene' all allempo enamaren quelle, ñetñapa' atet otyeset:

—Añpa' ¿ama't aña'yeña ñeññ anorrse't ñeññ enamare'tatse't quelle?

⁹ Patantarr acheñenesha'pa' atet otyenet:

—Ñeññca'ye.

Po'potantañe'chnopa' atet otyenet:

—Amaca'ye ñeñteyaye, attaca' ñeññema'ttena.

Aporo'yetñapa' atet otanet:

—Napa' ñeññenca'ye.

¹⁰ Ñetñapa' atet otyeset:

—¿Erro'tenote'tña o' pecuerr?

¹¹ Ñañaapa' atet oterraneterr:

—Añ yacmar ñeññ otenet Jesús ñaca'ye a'cha'cha'te'ña pa'snomo patspa' alloca'yeña a'yacle'chen. Allempoñapa' oten nepacle'chenepa'to' oño Siloéso. Nañapa' allña ne'pacle'chena'. E'ñe e'pacle'chuatsanpa' allentepa'tcha' necuerr.

¹² Ñetñapa' alla otereterr:

—¿Erro'tsena'tña ñeññ yacmar?

Ñañaapa' ot:

—Ta'm, amaca'ye neñoteñe.

Atto fariseonesha'pa' a'p'to'tare'tenan aporo'yet ñeññ a'crraterr Jesús

¹³ Allempoña ñeññ poro'ye'chatse'tpa' anmet allo'tsen fariseonesha'.

¹⁴ Ñehua, allempo a'cha'cha'tan Jesús pa'snomo pats allo a'yacle'chan aporo'yet ñeññ cohua'terre' allempopa' añ yetro allempo amesenet.

¹⁵ Fariseonesha'ñapa' ello alla otereterr:

—¿Erroñenoñe'tña o' cohuaterrpet?

Ñaña'pa' atet otosanet:

—Añoca'ye a'yacлле'cherrnet senmatso ñeññ a'cha'cha'tareñ epuet pats o'ña ne'pacлле'cherrapa' allenta necuerr.

¹⁶ Patantarrña fariseonesha'pa' atet otyeset:

—Ñeññ yacmarpa' amate'ca'ye Partseshoteye' huapo ñeñño'mar ama esoye' entenanoña ñeññ anareñ paterr yet allempocma yamesen.

Po'potantañña'pa' atet otyeset:

—Ta', elloña ñerra'm ochñañ acheñ amate' erroñenoñ orrtatonayeña part-soteñets.

Attoña e'ñe all ellopa'tetstatet pocta'ña ñocop.

¹⁷ Ellopa' alla otereterr ñeññ poro'ye'chatse't:

—¿Erroñena't pōtenña pa añecop ñeññ o' cohuaterrep?

Ñaña'pa' atet ot:

—Ñapa' ñeññca'ye a'mtene' Yompor po'ñoñ.

¹⁸ Judionesha'ñapa' atet otyeset:

—Ñapa' amaca'ye po'ño'ch aporo'yetye'ye, e'ñeca'ye cohuen entena.

Allempoñapa' chore'toñet pamo'mte' ñeññ o' cohuerr.

¹⁹ Ñetñapa' atet otapoñet pamo'mte':

—Añpa' ¿añe'tña sacñe'ter ñeññ sotyese't ahuo' eñalletaña sacñe'ter aporo'yet? Te'ñapa' ¿erroñenoñe'tña o' cohuerr?

²⁰ Pamo'mte'ñapa' atet otosanet:

—Po'ño'ch añca'yeña yacñe'ter ñeññ atta eñalletatsa aporo'yet.

²¹ Atto o' cohuerrpa' yapa' amaca'yeña yeñoteñe. Ta', esesha'te' o' cohuater, yapa' ama yeñoteñe. Sa'p'to'ch e'ñe ña, ñapa' o'ca'ye atta po'napen, ñoñachca'ye eñora.

Judionesha'ña allempopa' atet otyeset:

—Po'ño'chepa'tca'ye aporo'yet o' cohuerr.

²² Ñehua, pamo'mte' atet otanet tarro'mar ñetpa' mecha'teñet judionesha'. Ñehua, judionesha' ñetpa' atet a'poc'tatenet ñerra'm esesha' otets: Jesús'pa' ñeññca'ye Cristotets, ñeññña atet otetspa' o'ch mueño'chet ñet po'prahuoñ.

²³ Ñeñño'marña pamo'mte'pa' atet otanet:

—Ñapa' o'ca'ye atta po'napen, ñoñachca'ye eñora.

²⁴ Puepocheñopa' alla chore'tereterr ñeññ poro'ye'chatse't atet otapet:

—Te' p'apa' o'ch pecohuentaterrñañ Yompor. Yapa' yeñoteñ añ yacmapa' atarrca'ye ochñañ.

²⁵ Ñaña'pa' atet oterraneterr:

—Ta', ñato' ochñañeñte' napa' ama neñoteñe. Napa' añaca'ye neñoten napa' aporo'yeten te'ñapa' o' cohuen necuerr.

²⁶ Ñetñapa' alla otereterr:

—¿Erroñe'tña perrep? ¿Erroñenoñe'tña o' cohuaterrep?

²⁷ Ñaña'pa' oterraneterr:

—Ama'tña napa' o'ca'ye notuas sañapa' are'tña señoteñe. ¿Eso'mare'tña semneñ o'ch alla noterrser? Ñato' ¿añecop'te' semneñ o'ch yochresha'tasa saña?

²⁸ Ñetña allenta otnare'chetpa' atet otereterr:

—Papa' pueyochresha' peneñ ñeññ yacmar, yañapa' Moisésca'ye pueyochreshay.

29 Yapa' yeñoteñ Paretspa' eñorana'tana Moisés, tarraña ñeñt̃ yacmarpa' ama yeñoteñe errof̃te'ña huapa.

30 Ñeñt̃ poro'ye'chatse'tpa' atet̃ oterraneterr:

—Errotenotuaca'ye ama señoteñe'te'ña errof̃te' huapaña ama't napa' o'ca'ye e'ñe cohuen cohua'terren.

31 Yapa' yeñoteñ ñeñt̃ ochñañt̃ acheñpa' amaca'ye e'mñoteñe Yompor, tarraña ñerra'm ya yem̃cha'na'teñoñ Yompor atet̃ yepena ñeñt̃ muenen ñapa' chocmach e'mñoteny.

32 Ya ama't ahua'tapa' ama ye'mareña esesha'pa' o' cohua'terranña ñeñt̃ atta eñallet̃ña aporo'yet̃.

33 Ñerra'm ñapa' ama Yomporeshot̃ huapañe amate' errotenot̃ cohua'ter-rnoñe.

34 Ñet̃ña'papa' alla otereterr:

—Papa' pe'ñalleta e'ñe ochñañartsot̃. Te'ñapa' cha pemneñ o'ch peychatey ya. Allenta muevo'chet e'ñe ñet̃ po'prahuot̃.

Ñeñt̃ ama ame'ñetso Jesúsñapa' atet̃ entenanet̃ ñerra'm aporo'yet̃

35 Jesúsñapa' o' e'mare'ch ñeñt̃ aporo'yettatse'tpa' o' muevo'chet. Allem-poña enter Jesús'apa' atet̃ oter:

—¿Pame'ñeña't ñeñt̃ Yompor Puechemer?

36 Ñaña'apa' atet̃ och:

—Ayochreshate, ¿esesha'tña ñeñt̃ Yompor Puechemer ñeñt̃cha' name'ña?

37 Jesúsñapa' atet̃ otererr:

—Ñeñt̃ pecuen, ñeñten atet̃ potene', naca'ye.

38 Ñaña'apa' allenta concorpa ñeshopa' atet̃ otererr:

—Name'ñerrpach Partseshacha'.

39 Jesúsñapa' alla otererr:

—Napa' añecopña nohuapa arr patsro allochña'apa' attoch acrare'terra acheñenesha' errotencha' nentyesanet, allochña'apa' ñeñt̃ ama entetsopa' o'ch e'ñe cohuen enterra. Ñeñt̃ña entetsañpa' o'ch alla aporo'yetterra.

Ñeñt̃pa' añ toma'ntata, ñeñt̃ atarr ochñañt̃ entetsa ñerra'm ame'ñerrana Jesús, ñetpa' cherranetcha' Yompor po'cohuenña pueyo'chreto. Ñeñt̃ña ama ochña'teye' entetsañe ñeñto'marña ñetpa' amach ame'ñereto Jesús, ñetñapa' amach cherraneto Yompor po'cohuenña pueyo'chreto.

40 Patanta'tetsña fariseonesha' ñeñt̃ allame'ttso'tsa'yenet ñesho, ñetñapa' e'mueñet ñeñt̃ atet̃ oten Jesús. Ñetpa' atet̃ ochet:

—Ta'm yapa' ¿amate' aporo'yete'ye' pentenye?

41 Jesúsñapa' atet̃ otanet:

—Ñerra'm po'ño'ch sa aporo'yet̃ sentenañ amate' eñallmeñeña so'chñar. Tarraña sapa' atet̃ soten, sapa' año' aporo'yete'yayso, e'ño' cohuen secuen, ñeñto'marña te'pa' o'ch notas, so'chñarpa' chocma eñall.

10

Atto Jesús'apa' añ toma'ntatanet̃ all yottam̃peñet carrnero

1 Allempoña Jesús'apa' alla ye'chaterraneterr, ñeñt̃pa' atet̃ toma'ntaterraneterr:

—Po'ño'chca' notenes: All yottam̃peñet carrnero ñerra'm esesha' ama be'tetso allotecma be'tenet ñerra'm po'pshem̃tañoña a'tenet, ñeñt̃ña po'ño'chpa' eñetca'ye ñeñt̃ aprratam̃psañtetsa.

² Tarraña ñerra'm esesha' be'tets e'ñe allotecma be'tenet ñeñña po'ñoçhpa' ñeññ cohuañpene' carrnero.

³ Ñeññ cohuañpene' yetarrpa' ñerra'm esempo huaçherra ñeññ cohuañpene' carrnero ñapa' çhocmach torañpsapuerranet. Carrneropa' e'ñe eñoteññañet pamo'mte' po'ñoñ. Ñaña'pa' o'ch çhore'tyesan po'carrneror pa'so'chñopa' o'ch çha'nmaçha'tatan po'carrneror.

⁴ Allempoña çha'nmatue allohuen a'yo'tpa' ñaña'pa' o'ch ota. Po'carrnerorñapa' allentach co'ta'huanemñ chenta'. Ñetña'pa' e'ñe cheme'teññañet pamo'mte' po'ñoñ.

⁵ Tarraña ahuapña' ama co'teñe, çhach matañpesya tarro'mar ama eñotenano ahuapña po'ñoñ.

⁶ Ñeñña'pa' atet o'terranerr fariseonesha' toma'nteñtso tarraña ñetña'pa' ama eñotoñeto ñeññ otenanet.

Atto Jesús'pa' añ toma'ntena ñeññ e'ñe cohuen cohuañpene' po'carrneror

⁷ Allo'tña'pa' alla o'terraneterr Jesús:

—Po'ñoçhca' notenes: Napa' na yetarrotets allotcha' be'ten carrnero.

⁸ Allohuen ashcañnesha' ñeññ huapyestse't allempo ama nohuena' na, ñetpa' eñe'fareret ñeññet aprratamñsañtetsa, tarraña ñetpa' ama e'ññotenanetoña carrnero.

⁹ Napa' na yetarrotets. Ñerra'm esesha'ch be'tets nesho ñeñña'pa' queshper-rach, be'terretcha' ñaña çha'nerretcha' enterretcha' e'ñe cohuen puerrar.

Ñehua, ñeñña'pa' añ otenanet: Ñerra'm esesha'ch ame'ñaya ña ñetña'pa' quesh-perretcha'. Ñachña cohuañperrahuet e'ñe cohuen amach es pallterreto.

¹⁰ Jesús'ña'pa' alla o'terraneterr:

—Eñe'ña'pa' amaca'ye huenoña e'ñe atta, añecopña huena o'ch etyes, o'ch es muetsa, o'ch es a'chencatua. Tarraña napa' añecopña nohuapa attochña sapa' corretsasach socsheñeshocmañen e'ñe tayoteñ errponañohuen.

¹¹ Napa' na ñeññen cohuen cohuañpene' carrnero. Ñeññ e'ñe cohuen cohuañpene' carrnero ñapa' e'ñe ñañaña a'rroyeretsa o'ch rroma po'carrnerorecop.

¹² Tarraña po'psheñeñ ñeññ atsa'tarettatsa attoch cohuañpenan carrnero ñeñña'pa' ama pamo'mtayeyaye; ñaña'pa' ñerra'm entapan ma'yarrpa' çhach mata o'ch sa'nmanña carrnero. Ma'yarrña'pa' o'ch rroma'yesosan carrnero, patantarrña carrneropa' o'ch atta a'parratse'tach.

¹³ Ñeññ atta atsa'tarettetsapa' po'ñoçhpa' ama lleca'penanoña carrnero ama't mamesha. Ñeñño'marña çhach sa'nmanña carrnero.

¹⁴ Napa' na ñeññen cohuen cohuañpene' carrnero. Napa' e'ñe nechme'teñ ñeññ necarrneror. Ñeñña'pa' e'ñe cheme'tenen naña.

¹⁵ Atet pena Apa e'ñe eñotenen, ñaña'pa' e'ñe neñoteñ naña Apa. Napa' e'ñe nañaña o'ch na'rroyerra attoch nerroma necarrnerorecop.

¹⁶ Eñall po'poñeçhño ñeñña'pa' necarrneror neperr, ñetpa' ama parrocmateneto arr allo'tsen ñeññ necarrneror nepen te'. Añ poctetsa o'ch nerraneta' attoch e'ññoterrnanet neñoñ, allochña'pa' o'ch e'ñe parrocmaterret. Puesheñarrana ñeññencha' cohuañperrahuet.

¹⁷ Apapa' ello atarr morrentenna tarro'mar napa' na'rroyena nañaña o'ch nerroma acheñeneshacop, elloña'pa' o'ch alla netanterra.

¹⁸ Ama't eseshapa' amach puerratanñpesnoña nocreña, napa' na ñeññen a'rroyetsa e'ñe nañaña. Napa' anareñen attoch na'rroya o'ch nerroma; anareñen ñaña attoch ello'pa' o'ch alla netanterra. Ñeñña'pa' Apaña notene'

atetcha' neḡa. Arrpa' allohua atet toma'ntatenanet allohuen ñeñtcha' ame'ñerraya ñeñtña po'carrneror pen ñeñtcha' atarr cohuen cohuanḡpen.

19 Ñeñt atto serrpare'tatenanet Jesús, allña judionesha'pa' el-
lopa'tetstatenet poḡtaḡña Jesúsocop.

20 Shonte' acheñenesha' ñeñt atet otyesets:

—Añmapa' ḡhaca'ye chorreña oneñeñ, ḡhaca'ye mospuena. Eso'mare'tña se'mñoteñ.

21 Po'potantañeḡhnoñapa' ñetpa' atet otyenet:

Ñerra'm ḡho chorreña oneñeñpa' amate' errotenoḡ eñosoña atet e'ñe cohuen. Oneñeñpa' amate' errotenoḡ cohuaterranoña aporo'yet.

Allempo judionesha'pa' achm̄are'teñet Jesús

22 Allempoñapa' ḡherrerr allempo alla cosherrerr judionesha' Jerusaléño allempoch yerpuerret ñeñt atto nete't ahuat Parets pa'paquell ñocop. Allempo alla cosherreterrrpa' allempopa' huapo.

23 Jesúsñapa' alla chopeñen Parets pa'paclo all oteñet Salomón puecha'petaro.

24 Allñapa' arrotam̄pesya judionesha'pa' atet ochet:

—Esempohuachñaca'ye pe'nuaña ñeñt atto pemoñne'tatenya. Ñerra'm po'ñoḡhte' ḡa Cristotetspa' ḡteyñaca'ye e'ñe po'ñoḡh.

25 Jesúsñapa' atet otanet:

—Ama't notatstas sapa' amachca' same'ña'no. Napa' e'ñe neyemteñoḡ Apa atet es neḡa'yen. Ñeñt norrtatyenpa' ñeñtcha'ña señoate' napa' ñeñten Cristotets.

26 Tarraña sapa' ama same'ñenno tarro'mar sapa' ama necarrneroreyayso ñeñt atet o' notuas.

27 Ñeñt po'ñoḡh necarrnerorpa' e'mñotennanet neñoñ, nañapa' neñotenanet. Ñetñapa' coḡtennet.

28 Nañapa' napuerranetcha' attoḡña ñetpa' corretsetach tayoteñ er-
rponañohuen, ñetñapa' ama't ahuatapa' amach chenquërreto. Ama't eseshapa' amach puerraterrnetoña e'ñe na notoḡ.

29 Nomporpora' ña napuene'ña ñeñt name'ñenaya. Ñapa' atarr ahuaamen-
caḡesha'. Ña po'huamencpa' ama eseshaye' metanenaye. Ama't eseshapa' amate' errotenoḡ puerratam̄ḡsetoña Nompopor e'ñe ña potoḡ.

30 Napa' e'ñe parro attecman epan ña.

31 Ñeño'marña allempo judionesha' ñetpa' chetet mapue' allo'ch rrolle'chet.

32 Jesúsñapa' atet oterraneterr:

—Shonte' coḡhnesha' norrtatyesonas Nompopor po'huamencoḡ. ¿Erra'tsenote'tña añ ñeñt e'ñe coḡhnesharoḡ sapa' semneñ o'ch sarrolla'n?

33 Judionesha'ñapa' atet otereterr:

—Ama ḡorrtateñoḡeye' coḡhnesha' yemneñe o'ch yarroḡle'taḡ. Yapa' añecopña yemneñ o'ch yarroḡle'taḡ atto ḡapa' atarr ḡachm̄are'teñ Parets. Papa' acheñoḡaca'ye pemneñ o'ch pepartsocoptarta.

34 Jesúsñapa' alla oterraneterr:

—Ñoñets ñeñt atet anareḡ ahuatoteñ socop allpa' atetca'ye anuareḡ añecop ñeñt e'ñe ñenmaḡ a'pote' Yompopor po'ñoñ, ñeñtapa' atet otanete't Yompopor: “Sapa' atetcha' entenes acheñenesha' ñerra'mrrate' yompores.”

35 Yompopor po'ñoñ ñeñt anuareḡ ahuatoteñ ama puenesho. Atet otanete't ñetpa' yomporo'ch entenanet acheñenesha',

³⁶ naña ñeñten o' nerren Yompor ñeñten o' mueñerren arr patsro, sapa' achmãrñatach sepenen tarro'marotña napa' noten Yompor Puechemeren.

³⁷ Ñerra'm amate' aÑeye' norrtateno Yompor po'partsoña ñeñtepnãpa' amach same'ñatsetno.

³⁸ Tarraña atto po'ñoçh norrtateññañ po'partsoña ama't ñeñtapa' same'ñya, ama't napa' ama ame'ñoyen sentenno. Attochña po'ñoçh çhaponasa seyoçhro atto Apapa' e'ñe parrocmatenna, napa'çho'ña neparrocmaten epan Apa.

³⁹ Ellopa' mueneñetañ o'ch rromuet tarraña ñet allempopa' çha a'queshpachet.

⁴⁰ Allempoña Jesúsapa' ahuerri yomita'n Jordanaso all e'ñe ñenmañ apatyese't Juan Yomporcop. Allñapa' alla a'pa.

⁴¹ Shonte' huaçha'tyestsã ñeshopa' ñetñapa' atet otyesoset:

—Juanpa' ama't coñe'ta ama orrtatano partsoteñets, tarraña allohuen allpon otyesye't Juan añecop ñeñtcha' Cristoterrets ñeñña te'pa' e'ñe po'ñoçh atet pena.

⁴² Allñapa' shonte' acheñenesha' ñeñt ame'ñaya Jesús.

11

Allempo rroma Lázaro

¹ Allempo atsna'ten puesheñarr yacma ñeñtapa' añ pa'so'cheñ Lázaro ñeñt yeçhetsã anetso Betania epuet epsheño'mar po'çh, puesheñarrpa' María, po'psheñeña' Marta.

² Ñehua, ñeñña Mariãpa' ña a'yatcate'ña Partsessa' eñmosafo pa'tco allempoña e'ñe ña pue'chopa' alloña a'porrarra'tquër, ña po'se Lázaropa' çha atsna'ten.

³ Po'çhanesha'ñapa' allenta mueñet acheñ Jesúsesho, ñetñapa' atet otoset Jesús:

—Partseshacha', ñeñt atarr pemorrentenapa' çha atsna'ten.

⁴ Jesúsña e'mare'çpa' ñapa' atet otapanet:

—Ñã amaca'ye añecpaye' atsna'teno o'ch rroma, tarrecpa atet pena allcha' norrtatoñ Yompor po'partsoña, allochñapa' o'ch cohuentatennanet na ñeñten Yompor Puechemeren.

⁵ Jesúsapa' ama't atarr morrentenanañ Marta ñaña pa'mo'nerr ñaña Lázaro,

⁶ tarraña allempoña e'mare'tan Lázaropa' çha atsna'ten, ñapa' amaña allorocmaye' to, ñapa' alla epomterr e'ñe all allo'tsen.

⁷ Allempoña epomta'muenpa' atet ota'muenan pueyochresha':

—Te'pa' o'ch ahuerrey alla Judeo allo'tsen Lázaro.

⁸ Pueyochresha'ñapa' atet ochet:

—Maestrocha' allpa' çhaca'ye o'patenpa judionesha' o'ch rrolle'tapet attoch muetsapet. Ta'm, ¿pañã te'pa' o'ch alla pesechenerr o'ch alla ahuerperr?

⁹ Jesúsñapa' atet otan pueyochresha':

—Ama'tña yetpa' o'ca'ye ellapen puetarsats. Ñerra'm yeçhope'ch yeto amach yepoto'teno tarro'mar e'ñe yenten puetare' aÑe patsro.

¹⁰ Añña ñerra'm yeçhope'ch tsapo yepoto'tena tarro'mar ama a'puetarsamñpsareteye. (Atto Jesúsapa' e'ñe eñotatenanet allponmatmeñ ñocop attoch e'ñe etsotuan Yompor po'taruas tarro'mar ama çhena' allempo ñeñt poctetsã ñocop attoch muetsat.)

¹¹ Allempo otua atetpa' o' alla oterranerr pueyochresha':

—Lázaro ñeñtey e'ñe parrocmã atarr yemorrentannena ñã te'pa' çhaca'ye muen, ñeñto'marña te' napa' o'ch ahuen o'ch alla nopuera'.

¹² Allempoña pueyochresha' ñetñapa' atet otereterr:

—Ñerra'm Partseshacha' čate' e'ñe cohuen muenpa' ñeñtepnapa' cor-rerrach.

¹³ Ñehua, Jesús pa' añ otenanet atto Lázaroñ pa' čhoca'ye rromuen; ñetñapa' čha otenapuetañ añte' otenanet ñeñt' atto čhocma e'ñe yemuen betnatotey.

¹⁴ Allempoña Jesús pa' alla oterraneterr attoch e'ñe eñochet:

—Te'pa' po'ñočhca'ye o' rroma Lázaroñ.

¹⁵ Napa' te'pa' atarr nocshena tarro'mar ama allo'tsenno all. Atarr cohuen nenteñ socop allochñapa' attoch e'ñe cohuen same'ñiernna. Ama'tpa' te'pa' o'ch ahuey Lázaroñesho, o'ch yenteña'.

¹⁶ Tomásña ñeñt' otenet Epanesha' ñapa' atet otan po'potantañ ñeñt' parro yochreshatsocmuet:

—Ama'tpa' ahuanmapo'ch yerromuepa' yama epay Jesús.

Allempo Jesús eñotatanet ñapa' ña atantatañtetsa alloch e'ñe yocrrena

¹⁷ Allempoña čhap Jesús all, ñapa' eñotos o'ca'ye pa'tatsmat pampa'huet.

¹⁸ Ñehua, Betania allame'ttsañña Jerusalén —o' ma'pañña kilómetro attoch yečhap Jerusaléño.

¹⁹ Allñapa' shonte' judionesha' ñeñt' huáčheta allo'tsen Marta epuet pa'mo'nerr María ñeñt'cha' emya'tenahuet atto ya'na'teñet po'sayañet Lázaroñ ñeñt' o' rromuerr.

²⁰ Allempoña Martapa' e'mare'tan Jesús o' huena ñañapa' allenta ahuo' o'ch poctenan Jesús. Maríañapa' allo'tsena pocollo all anen.

²¹ Martaña allempo poctenan Jesús atet otapueñ:

—Ñerra'm Partseshacha' arro'tsenpeñcha' amate' rromuerrñeña nesayañ.

²² Ama't te'pa' napa' neñoteneñ ñerra'm erra'tsencha' penam' Yepapar, ñapa' čhocmach atet ponañ.

²³ Jesúsñapa' atet och:

—Po'ñočhpa' tanterrach pesayañ.

²⁴ Martañapa' atet otererr:

—Po'ñočh napa' neñoteñ tanterrach esempohuañen allempoch atantatare'tey allohueny.

²⁵ Jesúsñapa' atet otererr:

—Napa' na ñeñten e'ñe po'ñočh atantatañen, napa' ñeñten alloch e'ñe socrena. Erra'tsencha' name'ñenaya na ama'tcha' rromuenetañpa' ñetpa' ellochña alla correrret.

²⁶ Ama't ñaña allohuen ñeñt' corra'yetsa te' erra'tsencha' name'ñerraya na ñetñapa' corretsetach tayoteñ e'ñe errponañohuen. Papa' ¿pame'ñenna't ñeñt' atet noteneñ?

²⁷ Martañapa' atet otererr:

—Partseshacha' napa' neñoteneñ e'ñe po'ñočh papa' ñeñteñ Cristotosets, papa' Yepapar Puechemereñ, pa' atarr yecuen ahuañoteñ o'ch pehuapa arr pa'sro.

Allempo Jesús yahuosa Lázaroñ puepampro

²⁸ Allempo atet otuepa' ñapa' allenta ahuer pocollo, atet otuerran pa'mo'nerr María, ñeñt'pa' atet och a'nahua:

—Te'pa' o' huena Maestro, o' agotatueneñ.

²⁹ Maríaña e'mare'te'pa' atantoche' allenta ahuo' ñaña o'ch poctenan Jesús.

³⁰ Ñehua, Jesús pa' ama čhena' anetso, allo'tsenara all pocten Marta.

31 Judionesha'ña ñeñt' allo'tsa'yen pocollo ñeñt' emya'tene' ñetñapa' enteñet atantoche' María puema'yoreñ čha'nem ñetñapa' allenta coťa'huanmet. Ñetpa' čha otenapuetañ arrcha' ta po'sayañ puepampro o'ch ya'na'teña'.

32 Allempoña čhap María allo'tsen Jesús, all entospa' concorposa pa'rrpõt. Ñapa'čho'ña atet otos:

—Ñerra'm Partseshacha' arro'tsenpeñcha'pa' amate' rromuerrñeña ne-sayañ.

33 Allempo entosan Jesús all atarr yahuena María ñaña judionesha' ñeñt' cotose' ñetpa'čho'ña e'ñe parro attecma yahuanrrortenet, ñaña'pa' pueyočhropa' atarr llecapretosanet ñeñt'o'marña čha enarosa.

34 Ñaña'pa' atet otapanet:

—¿Erra'tña sepampuer?

Ñetñapa' atet ochet:

—Ñehua, Ayochreshate o'ch ahuey o'ch penteña'.

35 Allempoña Jesús'pa' yahuosa ñaña.

36 Judionesha'ñapa' otyeset:

—Ñapa'čho' atarropa'tca'ye morrenteña.

37 Puesheña'tetsñapa' atet otyeset:

—Añmapa' ñeñt'ca'ye cohuaterre'ña aporo'yet. Ñerra'm arro'tseneñcha'pa' amachca'ye muenacheñe o'ch rromuerreñña Lázaroñ.

Allempo Jesús tantaterran Lázaroñ

38 Jesúsña e'ñe puellquëño'pa' enarerrerr. Allempoñapa' čhap puepampro all mapuetpono e'ñe all yottam'peñet mapyo.

39 Allñapa' atet otosanet Jesús:

—Te'pa' sa'rrote't mapue' a'yeneñ.

Martaña ñeñt' arromña't po'čhpa' atet oterranerr Jesús:

—Partseshacha' o'te' čha poñaña' o' pa'tatsmat pampa'huet.

40 Jesúsñapa' otererr:

—Ama'tña napa' o'ca'ye notuosep ñerra'm pame'ña'nachpa' pentoñcha' Yompör po'partsoña.

41 Allempoñapa' a'rrote'tet mapue' a'yeneñ, Jesúsñapa' cohua' enoneñ atet ot:

—Apa, neparasyoso'tap' tarro'mar te' p'apa' pe'mñnoten ñeñt' atet nenueneñ.

42 Ñehua, napa' neñoteñ čhocma pe'mñnoten. Añña acheñenesha' ñeñt' tomčha'tets arr ñocpuet neparasyoso'teneñ allochñapa' attoch eñotenpet pa' ñeñteñ nellsensene'.

43 Ñeñta otuapa' allempoñapa' rrana huomencpa' atet ot:

—¡Lázaroñe, te'pa' o'ch nota'p petantena, pečha'nen!

44 Allempoñapa' čhepa'tcha' čha'netsña Lázaro ñeñt' o' rromhua, epota'taret potō ñaña pa'rrpõt, ñaña pa'clloyotpa' e'tacalle'charet pañello. Jesúsñapa' atet oterraneterr:

—Te'pa' čhosañaca'ye toram'perre' esheccha' chope'chnerr o'ch ahuerr.

Atto atarr o'pateñet Jesús o'ch muetsatateret

(Mt. 26.1-5; Mr. 14.1-2; Lc. 22.1-2)

45 Allempoña shonte' judionesha' ñeñt' cotose' María ñeñt' ente' Jesús atto ortatosanet po'partsoña ñetpa'čho'ña e'ñe allempocma ame'ñeret ñamet Jesús.

46 Tarraña po'potantañečhnoñapa' ahuanmuet fariseoneshesho ñetñapa' serrpare'tatoset fariseonesha' ñeñt' atet o' p'ohua Jesús.

⁴⁷ Allempoña fariseonesha' ñaña ñeñt pa'mcha'tareternesha' pen allohuen judionesha' po'cornaneshar, ñetña' apchachet allohuen ñeñt a'pocstatene' ñoñets judioneshacop. Ñetña allempopa' atet otyeset:

—Errotuachña' yepe'ña, ñeñt yacmarpa' chocmaca'ye orrtatyenanet partsoteñets.

⁴⁸ Ñerra'm atta yequechpue' allohuenña acheñenesha'pa' chate' ame'nyet ña, allempoña po'ño'chpa' chate' huapa amcha'taretnesha' romo'marnesha' chate' puerratañpsosyet Parets pa'paquell ama't ñeñt anaret Partsocop, ama't e'ñe ya ya'netserpa' chate' puerratañpsosyet.

⁴⁹ Puesheñarrña' ñeñt sochetsa Caifás allempopa' ñeñt pa'mcha'tareter pen allohuen judionesha' po'cornaneshar ñaña'pa' atet otanet:

—Sapa' ama es señoteno, ama't coñe'ta.

⁵⁰ Ama't pocte' senteñeña ñerra'm puesheñarr yacmapa' o'ch rroma allohuen acheñeneshacop, allochña' allohuen yamo'tsna'tarpa' amach chenca'huerreto.

⁵¹ Ñapa' ama ñoñaye' eñosoña atet. Ña allempopa' ñeñt pa'mcha'tareter pen allohuen judionesha' po'cornaneshar ñeñto'marña ñapa' Parets eñosate'. Ñapa' añ a'potanet atto Jesús'pa' ñach rromuerrets allohuen pamo'tsna'tarneshacop.

⁵² Amach e'ñe ñapña pamo'tsna'tarecpayaya rromoña Jesús, añecpa'nachña rroma allohuenacop ama't erra'tsencha' puechemer perr Yompor arr patsro, ñachña parrocmata'errahuet.

⁵³ E'ñe allempoteñña atarr o'pateñet Jesús o'ch muetsatachet.

⁵⁴ Ñeñto'marña Jesús'pa' o'huañ chopeñe'ch allo'tsa'yen judionesha' all Judeo. O' ahuo' amayarero'mar, chap paterr anetso ñeñt pa'so'cheñ Efraín. Allña'pa' alla a'posa epuet pueyochresha'.

⁵⁵ Allempoña o' cherrmocherr pascuapo allempoch alla cosherrerr judionesha'. Allampaño'marnesha' ñeñt allo'tsa'yenet shontet ahuanmuet Jerusaléño. Ama chena' pascuapo ñetpa' añecopña ahuanmuet attoch a'cohuentatoset e'ñe ñetañeña Partsocop.

⁵⁶ Ñetña'pa' Jesús'a e'noset, a'p'to'tanna'tyesoset allempo tomcha'toset Parets pa'paclo; allña'pa' otanna'tyenet:

—¿Erroñena't sotenña sa, ta'm huapachña Jesús, ñato' amach huapoña arr?

⁵⁷ Ñehua, ñeñt pa'mcha'tareternesha' pen allohuen judionesha' po'cornaneshar ñaña fariseonesha' ñetpa' atet otyeset acheñenesha':

—Ñerra'm eseshascha' eñote' erro'tsente'ña Jesús'pa' o'ch sotey ya allochña'pa' o'ch yerrmach.

12

*Atto puesheñarr coyanesha'pa' a'yatca'tosan Jesús eñmosaño
(Mt. 26.6-13; Mr. 14.3-9)*

¹ O' pechapmataña o'ch chapa'muen pascuapo, Jesús'pa' alla cherr Betanio. Allña'pa' allo'tsen Lázaro ñeñt romats ahuaña ñeñt alla tantaterr Jesús.

² Allña'pa' all rrallme'chatneñet. Martaña'pa' ña nenahuet rreñets. Lázaroña'pa' ña rrets epuet Jesús ñaña po'potantañechno.

³ Allña Mariapa' chetan puenarr eñmosañ ñeñt otenet nardo puese' e'ñe ñeñtoche' ñeñtña'pa' atarr tsa'te'. Ñaña'pa' alloña a'yatca'tan Jesús. E'ñe ña pue'chopa' alloña a'porrarra'tquër. Ñeñtña'pa' ora eñmosañtatan pocollohuen.

⁴ Judas Iscariote ñeñt Simón puechemer ñeñfara pueyochreshar ñeñtcha' pomuerre' ñaña'pa' atet ot:

5 –Eso'marte'ña añ eñmosa'pa' ama çhoye'ña yepome, çhochña'cho' yepome'ña' yegana'cha' shonte' quelle ñeñt' trescientos denario allemppa' yapa'yese'ña' huoccha'ñneshach'no ñeñt' atarr es pallta'yetsa.

6 Ñapa' ama puellquëño'feye' huoccha'ñneshach'nocop atet oto. Ñapa' tarro'mara atet ot, ñapa' atarrca'ye eñeñ. Ñapa' e'ñe ñacma anma'ñpene' quellayepo'r ñeñt' allohuenacop, ñapa' allotña etenña quelle ñeñt' esha'tenet all.

7 Tarraña Jesús'ña'pa' atet otanet:

–Semnach'ñaca'yeña coyanesha' ñeñt' atet penen. Ñapa' añecop añño'tennan ahuatoteñ eñmosa' tarremphua allemppoch a'yana'terrneterr ñeñt'cha' epuet pampa'pesnet.

8 Tarraña ama'tcha' çho pomosaneñ eñmosa' alloch es apa'yese'ña' huoccha'ñneshach'no, tarraña çhocmachca'ye eñallña huoccha'ñneshach'no arr pat-sro. Tarraña na'ñapa' po'ño'chpa' amachca'ye allo'na sentenno arr patsro.

Allempo o'pateñet Lázaro o'ch alla muetseret

9 Shonte' judionesha' allempo e'mare'chet o' alla çherr Jesús all Betanio, ñet'ña'pa' hua'cha'tet. Ama e'ñe ñap'tecpa Jesúsocop hua'cha'teto o'ch enteñeta', añecpa'naña hua'cha'tet o'ch enteñeta' ñaña Lázaro ñeñt' rromats ahuaña ñeñt' tantaterr Jesús.

10 Ñeñt'ña'pa' m'cha'tare'ternesha' pen allohuen judionesha' po'cornaneshar ñet'ña'pa' añe'na o'patenet Lázaro ña'nach muetset.

11 Tarro'mar allempo tanterra Lázaro shonte' judionesha' ñeñt' ame'ñaya Jesús ñeñto'marña ñetpa' o' que'chpa'hueretña ñet po'cornaneshar.

Allempo çhap Jesús Jerusaléno

(Mt. 21.1-11; Mr. 11.1-11; Lc. 19.28-40)

12 Tsapatña shonte' acheñenesha' ñeñt' shontetsa pascuacop Jerusaléno, ñet'ña'pa' e'mare'teñet Jesús o' çhappmoch ñaña Jerusaléno.

13 Ñet'ña'pa' tsorro'tyesnomuet shequëpan ñeñt' anemyeset allo topane'tyesnomuet toñ allcha' oñmos Jesús. Ñet'ña'pa' puerranarshet ahuanmuet o'ch poctet Jesús ñeñt'pa' atet o'tyesnomuet:

–¡Acsherrapo'ch allohueney! ¡Aye'cho'chtaterrapo'ch Jesús ñeñt' llesensen Yompor! ¡Aye'cho'chtaterrapo'ch Jesús ñeñt'cha' Pa'm'cha'tare'ter perr israel-neshar'!

14 Ñehua, Jesús'ña'pa' all entnoman paterr ashnatollpa' allenta monta'nma allo. Ñeñt'pa' añecop atet pa' ñeñt' atet anuaret ahuatoteñ e'ñe ñocop, ñeñt'ña'pa' atet oten:

15 Amach çha sem'cha'tatsto síono'marneshacha' ñeñt'arasa jerusaléno'marneshas. Secue'tach te'chca'yeña huaponasaña ñeñt'cha' Sa'm'cha'tare'ter seperr. Ñapa' añaca'ye monta'nena ashen rre'ptorechor.

16 Ñehua, ñeñt' ñoñets allemppaña pueyochresha'pa' ama çhapaneto pueyochreto. Tarraña tsapatoneña allempo rroma Jesús, o' alla tanterra alla ahuer pue'ntaño all atarr cohuentatapuer Pompor, ñet'ña'pa' allempaña çherranetña pueyochreto te'ña po'ño'chpa' o'ca'ye etsoterra e'ñe atet anuaret ñocop ama't ahuototeñ.

17 Acheñenesha' ñeñt' allo'tsa'yen allempo çhore'tenan Lázaroñ puepampro't atto tantater, ñet'ña'pa' ñeñt' a'potayeset.

18 Ñeñto'mare'naña ahuanmaña shonte' acheñenesha' o'ch poctet tarro'mar ñetpa' o' e'mare'chet ñamet ñapa' orrtatenanet po'partsoña.

19 Allempoña fariseonesha'pa' atet otanna'tyeset:

–Señch̄te'ca'ye'm yapa' amate' erroṭ es yeṑo ama't coñe'ta. Secue' shonte'ca'ye ñaña acheñenesha' erraṑarenot' o' e'ñe coṭa'huanmet.

Allempo griegonesha'pa' mueneñet o'ch eñchet Jesús

²⁰ Patanta'tets griegonesha'pa' ahuanmuet ñamet o'ch coshapreteneta' pas-cua; ñetpa' añecop ahuanmuet o'ch concorposet all.

²¹ Ñetñapa' ponmosyet Felipe ñeññ̄ betsaido'marnesha' ñeññara galileo'marnesha'. Ñeññapa' atet otoset:

–Nompurcha' yapa' añca'ye yemnen o'ch yeserrpare'tos epay Jesús.

²² Felipeñapa' allenta otenana' Andrés. Ñetña e'ñe epsheño'maretpa' ahuanmuet o'ch oteñeta' Jesús.

²³ Jesúsñapa' atet otapanet:

–Te'ña po'ñoçhpa' o' etsoterra allempoch na Ñeññen Acheñetosetspa' o'ch alla cohuentaterran Nompurcha'.

²⁴ Ñeññapa' e'ñech po'ñoçh atet netma'ntatasa atet pena puerets. Ama't erra'tsena puertsor ama' cho pampallme'cho patso allcha' puetsohua pa'tall ñeññach patrara pue'llomer. Tarraña ñerra'm cho pampallme'cha patso allcha' puetsa' pa'tall attochña chop. Ama't puellñarra pampallme'chatsa atarrcha' aton ellom̄re'terr. Ñeññapa' añ notenes e'ñe pocte' o'ch nerroma na ñeññen pueñeñarrana attochña shonterra ñeññcha' name'ñerraya.

²⁵ Ñeñño'marña notenes: Ñeññ̄ atarr morrentenaya atto coshena arr patsro, ama pocteye' entenano o'ch es sohuanom Yomporecop, ñeññña pocreña atarr morrentena, ñeññ̄ atet petsapa' çhach a'chencatena e'ñe ñañeña. Tarraña ñeññ̄ ama morrentenaye atto coshena arr patsro, e'ñe pocte' enteñ o'ch es sohuanom Yomporecop ama't pocreñohuen, ñeññ̄ atet petsa ñetñapa' corretsetach pocsheñeshocmañen tayofeñ e'ñe errponañohuen.

²⁶ Ñerra'm esesha' muenats o'ch torrenet nocop, coṭa'netepa' attochña e'ñe neyochresha' neperranet. Tarro'mar ñerra'm erro'tsenencha' na ñeññ̄ torretsa nocop ñetpa'cho'ña allo'tsenetcha' ñamet. E'ñe allohuen erra'tsencha' torrerrtsa nocop, Nompurcha' atarrcha' cohuentaterranet.

Allempo Jesús eñotatanet ñapa' çhoch muetseret

²⁷ "Te' na neyoçhropa' çha atarr nellquëna. Tarraña ama't atteñpa' Nompurcha' napa' amach çha notatsche amach muenatano o'ch huapona ñeññ̄ atarr amuroçhtatañ nenten. Ñeññ̄ atetpa' amach notatsche tarro'marña napa' ñeññ̄ecopca'yeña nohuapa nach amuroçhtatarettertsa. Añcha'ña noch Nompurcha':

²⁸ –Te'pa' pepa'chña Apa aye'choçhtatarettertsa.

Allempoñapa' çha e'morrtatsa ñoñets entoṭ, Yompurcha' atet ot:

–Napa' o' necohuentatua, elloña o'ch alla necohuentaterran nañeña.

²⁹ Shonte' acheñenesha' ñeññ̄ tomçhets all, ñetña atet e'mueñetpa' atet otyeset:

–Chote'ca'ye tecorena.

Po'potantaññapa' atet otyeset:

–Añca'ye eñorana'tenaya Yompurcha' po'mllañoñeñer.

³⁰ Jesúsñapa' atet oterraneterr:

–Ama nocpaye' huenoña añ ñoñets. Ñeññapa' e'ñe socop huena.

³¹ Te'pa' o' anareṭta allohuen acheñenesha' arr patsro ñeññ̄ ama name'ñenaye ñetpa' amñareñterretcha' coñcheñtso. Ñaña oneñeñ̄ ñeññ̄ pa'mcha'tareter pen acheñenesha' arr patsro, te' ñocoppa' o' anareṭta ahupore'tarettarrach esempohuañen.

³² Na ñerra'm esempoch echantam̄perrnet corsocho allempoña napa' neçhore'tercha' allohuen pa'namen acheñ attoch ame'ñernnet.

³³ Ñapa' añecopña eñorana'tenanet attoch eñotatanet ñapa' corsochoch rromuerr.

³⁴ Acheñenesha'ñapa' atet otyeset:

—Yapa' yeñoteñ añ ñoñets ñeñt̄ atet anaret ahuatoteñ, ñeñtpa' atet oten ñeñt̄cha' Cristoterrets ñapa' ama arromña'teshayaye ama't errponaña. Ta', ¿eso'marte' pañapa' p̄oten ñeñt̄ep̄ o' Acheñetosetspa' echantam̄psaretepo'ch corsocho allcha' perromuerr? Ta', ¿essha'te'ña ñeñt̄ po'ñoçh Acheñetosets? amapa' ¿ñeñtarate' ñeñt̄cha' Cristoterrets?

³⁵ Jesúsñapa' atet oterranneterr:

—Mameshaña palltena arro'tsenmeñen na ñeñten a'puetarsam̄psañtetsa. Soçtape'cherrnan e'ñe tayecma neñoñ tayepa'tña arro'tsenmeñen ñeñtencha' a'puetarsam̄perre' soçtañña allochñapa' attoch amach çha sechencia'huerro. Po'ñoçh ñeñt̄ ama ame'ñetso ñetpa' ama eñoteñeto attoch chenca'huerret. Ñeño'marña ñetpa' e'ñe atet penet ñerra'mrrate' checmeta chope'chenet ama eñoteñeto errenet̄cha' tet.

³⁶ Na ñeñten sa'puetarsam̄pene' soçtañña' te'pa' arro'tsenmeñen. Soçtape'cherrnan neñoñ tayepa'tña' arro'tsenmeñen. Allochñapa' o'ch seyeçhquerra sa acheñres ñeñtescha' atarr cohuen orrtatyerre' ñeñt̄ cohuen enten Yompor tarro'mar sapa' e'ñech puetarro socrena.

Otua Jesús atetpa' ahuer a'nahua; acheñenesha'ñapa' ama eñocheto errate' ahuer.

Atto judionesha'pa' ama ame'nyeto Jesús ñeñtpa' añ etsoterrtsa ñoñets ñeñt̄ anaret̄et ñocpuet

³⁷ Jesúsapa' ama't shonte' orrtatyenanet po'partsoña tarraña amaña eseshaye' ame'ñenayoña ña.

³⁸ Ñeñtpa' attoca'yeña etsotaña Isaías po'ñoñ ñeñt̄ a'mtaye't̄ ahuat Yompor po'ñoñ. Ñeñtpa' atet ote't̄ ñocop:

Amach Nomporcha' eseshaye' yame'ñayo ñeñt̄cha' atet yeserrpare't. Ama Nomporcha' eseshaye' poctenaye pa'pehuamenc.

³⁹ Ñeño'marña amate' errotent̄ ame'ñeto. Tarro'mar ellonet̄ Isaíasapa' atet ote't̄:

⁴⁰ E'ñe patpare'teñoçet Yomporñapa' muenatanet o'ch echarrtet pueyoçhret. Attochña ñetpa' çhach ottenet ñerra'm aporo'yetet ñeñt̄ ama es enteno. Ñeño'marña ama muenatenaneto o'ch es entet taye'to'te' çhapanet pueyoçhreto. Ñeño'marña ama't mameshapa' amach es coçape'cheneto nocop attoch na'queshp̄aterranetañ.

⁴¹ Isaíasapa' tarro'mar atet ote't̄ ñapa' e'ñe entane't̄ Cristo po'cohuenña ñeño'marña eñose'tña ñocop.

⁴² Tarraña shonte' acheñenesha' ñeñt̄ ame'ñaya Jesús ama't ñaña am̄cha'tareteçhno. Tarraña ñetpa' mecha'chete't̄ fariseonesha' ñeño'marña ama a'metete'te. Añ mecha'tenet taye'to'te' muevo'tanet judionesha' po'prahuot̄.

⁴³ Tarro'mar ñeñt̄ ame'ñetsañ ñetpa' añe'na muenenet o'ch e'ñe cohuen entenanet acheñenesha'. Ama añeye'ña mueneneto o'ch e'ñe cohuen entanet Parets.

Atto Jesús po'ñoñ ñeñt̄cha'ña otteñe'cherre' acheñenesha' esempohuañen

⁴⁴ Jesúsña rranapa' atet oterrerr:

—Ñerra'm esesha' name'ñenaya na, ama naptaye' ame'ñenneto. Añe'naña ame'ñenet Nompör ñeñt' nellensene'.

⁴⁵ Esesha' nentene' napa' añe'naña entenet ñaña Nompör ñeñt' nellensene'.

⁴⁶ Napa' añecopña nohuapa arr patsro nach a'puetarsamipene' acheñenesha' poctapña, allochñapa' ñerra'm esesha'ch name'ñaya na amach allo'tsenareto checmeto. Ñeñt' checmeto'tsena ñetpa' ama eñoteñeto ñeñt' cohuen enten Yompör.

⁴⁷ Ñerra'm esesha' e'mue' neñoñ tarraña ama't ama ame'ñerrnaneto neñoñ, napa' amach naye' mueñenahueto coñcheñtso. Tarro'mar napa' ama añecpaye' nohuapo arr patsro attoch nemños acheñenesha' coñcheñtso. Napa' añecopña nohuapa o'ch na'queshpatos acheñenesha' arr patsro.

⁴⁸ Esesha'chña nachmene' ñeñt'cha' ama ame'ñerraye neñoñ, ñocpuetñapa' eñall attoch amñareñterret coñcheñtso. Ñeñt'ara añ ñoñets ñeñt' neñen na te'pa' ñeñt'cha'ña mueñaterrahuetña coñcheñtso esempohuañen.

⁴⁹ Tarro'mar napa' ama e'ñe notaye' neñeno. Apaña ñeñt' nellensene' ñapa' ñaña notene' atet'cha' notas ñaña atet'cha' ne'ñorana'tasa.

⁵⁰ Napa' neñoteñ ñeñt' atet' otenen ña ñeñt'pa' ñeñt'cha'ña allochña sapa' corretsasach socsheñeshocmañen tayoteñ e'ñe errponañohuen. Ñeñt' atet' neñen napa' añca'ye neñen ñeñt' atet' otenen Apa.

13

Allempo Jesús'pa' e'patca'tyesan pueyochresha'

¹ Ama't ama chena' pascuapo allempoch cosherrerr judionesha', Jesúsñapa' eñoteñ e'ñech ñeñt'eshaña allo'tsen arr patsro o'ch ahuerr Pomporesho. Ñapa' chocma atarr morrentenana allohuen ñeñt' pueyochresha' pen arr patsro. Ñeñto'marña allempopa' e'ñe poctacma morrentuenanet.

²⁻⁴ Ñehua, Judas Iscariote ñeñt' Simón puechemer, oneñeñña' ahuepa't cotape'chach pueyoçhro o'ch pomuerran Jesús. Jesúsñapa' e'ñe eñoteñ ñapa' tarro'mar llesenserña Pompor allohuenacop. Tarro'mar ñapa' e'ñe eñoteñ Yomporeshotca'ye huapa, elloñapa' o'ch alla ahuerr ñesho. Ñeñto'marña allempo rrallme'chneñet Jesúsña o'tompa' rrotana paterr pa'shtam ñeñt' nen enoñ o' chetan paterr e'shmoco'tametspa' o' chana allo.

⁵ Alloñapa' o' shan oñ huantejo alloña e'patca'tyesanña pueyochresha'. E'shmoco'tamñtsoñapa' alloña a'porrarra'tcayerranet ñeñt' allo chanena.

⁶ Atteñapa' ponmana Simón Pedro, ñaña'pa' atet' och:

—Partseshacha' amaca'ye pocteyaye o'ch pe'patca'tonña netac. Tarro'mar p'apa' p'a atarr sherbets, napa' amaca'ye esoyayno.

⁷ Jesúsñapa' atet' och:

—Ñeñt' atet' nepenes te' sapa' amach señoche. Esemppopa' chaponasach seyoçhro.

⁸ Pedroñapa' atet' otererr:

—Ama't ahuata napa' amach nemnatape o'ch pe'patca'tenña na tarro'mar napa' amaca'ye nemno o'ch nepencna'ntatap.

Jesúsñapa' atet' otererr:

—Ñerra'm amach ne'patca'tapepa' amach erroñenoñ e'ñeye' peyemtenno.

⁹ Simónña Pedropa' atet' otererr:

—Ñerra'm po'ñoçhte' atet' Partseshacha' amachña ñapña netac pe'patca'tono nota'nachña e'ñe ora noñohuen.

¹⁰ Jesúsñapa' atet' otererr:

—Ñeñt' o' apuapa' amaca'ye es pallteneto, añaca'yeña palltenet o'ch e'patca'chet. Ateť sepena sa a'cohuentatuaretes sa soctapñoť. Sapa' e'ñe cohuen a'cohuentatuaretesen țarraña ama allohuenacmaye' a'cohuentatuareteso.

¹¹ Ñehua, Jesúsapa' e'ñe eñotenan ñeñtcha' pomuerre' ñeñto'marña atet otanet: "Ama allohuenacmaye' a'cohuentatuareteso."

¹² Allempoña e'patca'tuanet pa'tacpa' cheterran pa'shtampa' o' alla anerr. Allempoñapa' atet oterraneterr:

—Te'pa' o'ch neñotatas ñeñt neychatenes ñeñt atto ne'patca'tenes.

¹³ Ñehua, sapa' sotenen Maestro, ñaña sotenen Partsasha'. E'ñe pocte' po'ñočh sotenen țarro'mar po'ñočhpa' ñeñtenca'ye.

¹⁴ Atto na ne'patca'tas sa, ama't na ñeñten Separtseshar sepen ñaña Semae-
stror sepenen, sapa'cho'ña ñeñt e'ñe poctetsa socop se'patca'tanna'tepa'ch
saña. Ñehua, ñeñt po'ñočh notenes, ñeñtpa' atet: Amach sañeña atarr cohuen
entetso, attochña e'ñe cohuen sesherbannena.

¹⁵ O' neñotatas atetcha' sepa saña. Sapa'cho'ña attepa'ch sepa atet o'
nepohuas sa.

¹⁶ Po'ñočhca'ye o'ch notas: Ñeñt ayochreshat ñerra'm ama esoye' en-
teno ñañeña ama't e'ñe mamesha, ñeñtña pueyochreshachno pen e'ñepa'ch
attecmuet amach esoye' enteneto e'ñe ñañeñeta. Ama't na ñeñten allsen-
sareten ama esoye' nenteno ama't mamesha, ñeñtcha' nellsensa'yes nañapa'
amuepa'chña esoye' enteneto e'ñe ñañeñeta.

¹⁷ Ñerra'm ñeñtña sechapoya seyočhropa' ñeñt atet neychatenes, sañapa'
atarrcha' cosheñtso'tsenes ñerra'm e'ñe po'ñočh atet sephua.

¹⁸ 'Ama allohuenacpayaysoye' neñeno. Napa' neñotenes e'ñe
puesheña'ttsospa' atet soctape'chyen seyočhro. Ama't neñotensoñ ateseñpa'
țarraña e'ñe atta na'creres allochñapa' attoch etsoterra Yompor po'ñoñ
ñeñt atet anuaret nocop ahuatoteñ, ñeñtpa' atet oten: "Ñeñt parro
yerrallme'chenpa' ñepa'tcha'ña tanterrtsa nocop."

¹⁹ E'ñe tayoteñpa' atet notenes ama't ama etsotena' allochñapa' esempoch
etsoterra, sapa' same'ñach napa' ñeñten po'ñočh Cristotets.

²⁰ Po'ñočhca'ye o'ch notas: Ñerra'm esesha' e'ñe cohuen aguene' ñeñt
nellsensen na ñetpa' na'naca'yeña aguënet e'ñe cohuen. Ñaña ñeñt e'ñe
cohuen naguene' na, ñetpa' Nompore'naca'yeña aguënet ñeñt nellsensene' na.

Allempo Jesúsapa' eñotatanet Judaspa' ñach pomuerre'

(Mt. 26.20-25; Mr. 14.17-21; Lc. 22.21-23)

²¹ Jesúsña allempo atet otuapa' pueyočhroñapa' čha lleca'huenta. Allempo-
ñapa' atet otanet:

—Po'ñočh te'pa' o'ch notas, puesheñarrotes sapa' ñeñtescha' nepomuerre'.

²² Pueyochresha'ñapa' allența cohuanña'tyeset. Amaña esesha' eñotaye
erra'tsenacopte'ña eñen.

²³ Puesheñarrña pueyochresha' ñeñt atarr muerena Jesús, ñañaapa' e'ñe
epuet Jesús anen all rrallme'chenet parro.

²⁴ Ñeñto'marña Simón Pedropa' agotan ñeñt anets epuet Jesús, ñeñtpa' atet
och:

—Ñehua, pa'pto'ch yemaestrer erra'tsenacopte'ña eñorena ñeñtcha' po-
muerre'.

²⁵ Ñañaapa' e'ñe allame'ttsa atet otan Jesús:

—Partseshacha' țerra'tsenacpa'tña pe'ñorena ñeñtcha' pepomuerre'?

²⁶ Jesúsñaapa' atet och:

—Ñeñtcha' nap añ pan ñeñtcha' ne'choma' ñeñtcha'ca'yeña nepomuerre'.

Allempoña e'choman panpa' apan Judas Iscariote ñeñt Simón puechemer.

²⁷ Allempoña aphue panpa' allempocmuepa't chorrya oneñeñ. Jesúsñapa' atet och:

—Errotente' peña'chpa' e'ñeñaca'yeña tayecma atet pepe'.

²⁸ Pueyochresha'ñapa' ama't puesheñarra ñeñtet allo'tsa'yenet, ñetñapa' ama eseshaye' eñotaye esocopte' atet otenan Judas.

²⁹ Puesheña'ttsetpa' cha otapuetañ Jesúsapa' ñato' añte' oteñ o'ch rañtenana' ñeñt muenenet allcha' coshapretet, tarro'mar Judaspa' ñaca'ye anmape'cham'pene'ña quellayepo'r. Amapa' ñato' añte' oteñ o'ch es apa'yesan huocchañneshachno.

³⁰ Allempoña Judaspa' agapuan panpa' allenta cha'nerr. Allempopa' o' tsapuen.

Atetcha' yeña ñeñt e'ñe etserra, yemueranna'tepa'ch

³¹ Allempoña Jesús cha'nompa' atet oterraneterr:

—Te'ña po'ño'chpa' e'ñe chapmoch allempoch cohuentaterrnan Parets na Ñeñten Acheñetosets. Attochña napa'cho'ña necohuentaterrñañcha' Nomp'or Parets.

³² Atto napa' necohuentaterrñañ Nomp'or Parets, ñapa'cho'ña cohuentaterrnancha' na, ñeñt'pa' e'ñech mametolla o'ch e'ñe cohuentaterrnan.

³³ Jesúsñapa' alla oterraneterr:

—Na'cñeñarneshacha' o' e'ñe coñe'tañña pallta allo'tsenmeñencha' na e'ñe arr parro. Napa' o'ch ahuerren. Allempoña sapa' se'nerrna'ch. Atet noteñ ahuaña judionesha', allcha' neserr napa' sañapa' amach errotenoñ se'chapo, te'pa'cho' sapa' e'ñe atet notenes.

³⁴ Ñaña o'ch notas atetcha' se'pannena ñeñt e'ñe etserra: Semueranna'tepa'ch. Atet nepenes sa atarr nemuerensa, sapa'cho'ña atarropa'chña semuerannena.

³⁵ Allochñapa' e'ñe semorrentanna'teño'tpa' eñotasetcha' sapa' sa e'ñe po'ño'ch neyochreshas.

Atto Jesúsapa' eñotatan Pedro ñapa' chocmach a'nasocha (Mt. 26.31-35; Mr. 14.27-31; Lc. 22.31-34)

³⁶ Simónña Pedropa' atet och:

—Partseshacha' p'apa' ¿erra'tcha'ña peserr?

Jesúsñapa' atet och:

—Allcha' neserr napa' p'apa' amach errotenoñ pocta'noña na te'. Esemppoña po'ño'chpa' ama't chenta seserrcha' saña.

³⁷ Pedroñapa' atet otererr:

—Partseshacha' ¿eso'mare'tcha'ña ama tayecma nocterrpe? Napa' e'ñe pocte' nenteñ yerromuepa' e'ñe parro.

³⁸ Jesúsñapa' atet otererr:

—¿Po'ño'cha't e'ñe pocte' penteñ o'ch yerroma parro? Po'ño'chca'ye te' napa' o'ch nota'p: Amach eñena' atollop pañapa' o'ch ma'poch pa'nasotenna.

14

Jesúsapa' ña toñetets alloch ye'cherr Yomporesho

¹ Jesúsapa' alla oterraneterr:

—Seyochropa' amach cha sellcatsto. Atto seyemteña Yompor napa'cho'ña choña seyemterrna.

2 Nompör pa'netsro all pue'ntaño allpa' shonte' pocoll allcha' seyčha'huerra. Ñerra'm ama atteñepa' napa' amate' notasñe. Ñeñto'marña napa' o'ch ahuerren attoch nañño'tuerrnas allcha' seyčha'huerra.

3 Ñerra'm o'ch ahuerren napa' nañño'tuerrnascha' allcha' seyčha'huerra. Ellochña nohuerrerrpa' allempochña e'ñe nahuerrsa' nesho allochñapa' allo'tseneycha' e'ñe parro.

4 Sapa' e'ñe señoñeñ allcha' neserr ñaña e'ñe señoñeñ attoch sečherr saña all.

5 Tomásñapa' atet och:

—Ayochreshate yapa' amaca'ye yeñotenpe errachña peserr. Er-rotenotuachca'ye yeñoçhte' attoch yečherr yaña.

6 Jesúsñapa' atet och:

—Napa' na toñetets ñeñten alloch sečherr Yomporesho, napa' na ñeñten sotene' ñeñt e'ñe po'ñoçh Yompör po'ñoñ, napa' na ñeñten alloch e'ñe socr-rena. Amach esesha' çhertso Yomporesho ñerra'm ama nanom ame'ñerreto.

7 Ñerra'm o' señoñerñoñ na, Nompore'nate'ña señoñerñe. Tayoteñña e'ñe po'ñoçhpa' o'ch señoñer tarro'mar te'pa' o' senter.

8 Felipeñapa' atet och:

—Partseshacha' pegatey ñeñt Apa, yapa' o' ñeñtaña yepallta o'ch yeñoçh.

9 Jesúsñapa' atet och:

—Felipe, ahuatoteñ napa' allo'tseney parro. Pañapa' ¿ama't peñoñtenno? Ñeñt puentaren napa' Apa'naca'yeña o' enterret. Eso'mare'tña pötenen o'ch negatañ Apa.

10 Papa' ama'tña pame'ñenno napa' e'ñe neparrocmaten epan Apa, Apapa'çho'ña e'ñe parrocmatenna. Ñeñt atet notenespa' ama notaye' atet notenso. Apaña ñeñt neparrocmaten, ñapa' e'ñe etsotatennan ñeñt atet neña'yen.

11 Same'ña'na ñeñt notenes, napa' e'ñe neparrocmaten epan Apa, Apapa'çho'ña e'ñe parrocmatenna. Ama't napa' ama ame'ña'poye' sentenno tarraña atto po'ñoçh norrtatyeññañ Nompör po'partsoña ama't ñeñtapa' same'ñyañaca'ye.

12 Po'ñoçhca'ye o'ch notas, ñerra'm esesha' name'ñerraya ñetpa'çho'ña elloch atarr cohuen orrtatyerret ñeñt atet norrtatyen te'. Tarro'mar na te'pa' o'ch ahuerren Apuesho.

13 Ñerra'm escha' senamuen e'ñe na neso'chño e'ñe seyemteñoñen na, napa' e'ñech atet nepennas. Attochña na ñeñten Yompör Puechemerenpa' neco-huentateññañcha' Apa.

14 Ñerra'm es senamuen e'ñe neso'chño e'ñe seyemteñoñen na, napa' e'ñech atet nepennas.

Atto Jesúsapa' oñerranet o'ch mueñuerranet Parets Puecamquëñ

15 Ñerra'm sa po'ñoçh semorrennate'pa' o'ch same'ñerrnana neñoñ ñeñt atet notenes.

16 Napa' nenamonascha' Apa ñapa' apascha' po'psheñeñ ñeñtcha' soçtape'çatterre' ñeñtcha'ña sechorrerraya errponañohuen.

17 Ñeñtña Yompör Puecamquëñ ñeñtcha'ña señoñterre' ñeñt e'ñe po'ñoçh Yompör poçtañña. Ñeñtña ama ame'ñetso arr patsropa' ñetpa' amach er-rotenot chorreranetoña Yompör Puecamquëñ tarro'mar ñetpa' ama enteñeto ñaña amach eñoteñeto. Tarraña sapa' o' señoñer tarro'mar ñapa' allo'tsenes parro epas allcha' chorrerrsa.

18 Napa' amach čha nehuocchapotatnerrso. Ellochña alla nohuerrerr sesho.

19 O' mameshamerra palltenmeñ ñeñña ama ame'ñetso arr patsro ñetña' amach eseshaye' nenterraye, tarraña sapa' čhocmach senterren. Tarro'mar napa' corretsana, ñeñto'marña sapa'čo'ña corretasach.

20 Allempoch chorrerrsa Yompor Puecamquëñ allempochña señoter napa' e'ñe po'ñočh neparrocmaten epan Apa, sañapa' separrocmaternach, nañapa' neparrocmatenasach.

21 Ñerra'm esesha' e'mñoterre' neñoñ ñaña e'ñech atet perret ñeñ atet notenanet ñetña' ñeñtet e'ñe po'ñočh nemorrentenaya. Ñeñña nemorrentenaya napa' ñetña' Apach atarr morrentenahuet. Napa'čo'ña atarr nemorrentenanet, nañapa' neñotaterranetcha' e'ñe po'ñočh ñeñ atet nepena na.

22 Allempoña po'psheñeñ Judas ñeñ ama añeyaye Iscariote, ñaña' atet och:

—Partseshacha' yapa' ¿eso'mare'tcha'ña te'pa' o'ch peñotatey ya ñeñ atet pepena amachña añeye'ña peñotato ñeñ ama ame'ñetso arr patsro?

23 Jesúsña' atet otarraneterr:

—Ñerra'm esesha'ch nemorrentaya na e'ñechña atet perret ñeñ atet notenanet. Apañapa' atarrcha' morrentenanet. Ñeshetoña' yečhapcha' attoch yeycherra ñet pueyočhreto.

24 Ñeñto'marña ñerra'm esesha' ama nemorrentayo amach atet perreto ñeñ notenanet. Añ ñoñets ñeñ atet se'muennan ñeñtpa' ama noyaye neñoñ, ñeñtpa' Apoña po'ñoñ ñeñ nellsensene'.

25 'Añmapa' tarro'mar atet notenes tayepa'tña' allo'tsenmeñen na arr e'ñe sesho.

26 Tarraña Parets Puecamquëñ ñeñcha' soctape'chatterre', Apapa' mueñerrnascha' e'ñe na neso'chño e'ñe seyemteñoñen na. Ñapa' ñeñcha' señotaterre'ña seyočhro ora allohuen ñeñ čhocma neyčhatenes te'. Ñaña ñeñcha' seyerpaterraya allohuen ñeñ atet notyesase't.

27 'Nocshateña nena'nerrnascha' alloch e'ñe socsherra seyočhro, napa' čhochña atarr nocshatterres seyočhro. Ñeñ atet nocshatenes na seyočhro ñeñtpa' ama atteyaye ñerra'mrrate' añ patso'mar cosheñets. Ñeñto'marña seyočhropa' amach čha sellca'peno ama't mamesha, amach čha es semcha'teno.

28 Te'pa' o' se'mhue atet o' notuas, na o'ch ahuerren, ellochña alla nohuerrerr sesho. Ñerra'm po'ñočh semorrentennañ o'te' socshañ tarro'mar napa' o'ch ahuerren Apuesho. Tarro'mar ñapa' nanac ahuamencatesha', ello metanenen na.

29 Te'pa' ama't ama etsotena', napa' o' notuas, allochña' ñerra'm esempoch etsoterra, sañapa' same'ñerach.

30 'Te' e'ñe parro'tseneypa' o'huañcha' allo'na neñosnen shonte' tarro'mar o' huapmocha oneñeñ ñeñ pa'mcha'tareter pen acheñenesha' arr patsro. Tarraña ama't o' huapañpa' e'ñe ñoñapa' amach erroť posno.

31 Napa' añcha'ña atet neña ñeñ atet otenen Apa. Attochña acheñenesha' arr patsropa' eñochetcha' na po'ñočhpa' e'ñe nemorrenteña Apa. Te'pa' satomcha't o'ch ahuey arroť.

15

Jesúspa' toma'ntata ñapa' ña uvachrečhmo'retets

1 Jesúsñapa' alla yečhaterraneterr ñapa' añ toma'ntata ña uvachrečhmo'retets. Ñeñto'marña atet otanet:

—Napa' na atten ñerra'mrrate' ñeñten uvachrečhmo'retets ñeñt e'ñe po'ñočh cohuen sherbets. Nomporna'ña amre'tene' ñeñt uvachrečhmo'r.

2 Sa ñeñtes neyemtenaya na sapa' attes ñerra'mrrate' uvachmo'r puetaquër. Allohuen puetaquër erra'tsen ñeñt ama me'tetso, Nomporna'ña čhochña pecham̃psoñ puetaquër. Ñaña allohuen ñeñt me'tetspa' čhochña pechtacre'tyeset mamesha'tets attoch e'ñe cohuen e'shtacre'chet allochña' attoch atarrcha' nanac me'ten.

3 Ñeñt atet neserrpare'tatenes ñeñt neñoñpa' alloña o' sa'cohuentataretetua atet ñerra'mrrate' uvach o' e'ñe e'shtacre'tuet e'ñe cohuen.

4 Te'pa' attoña separrocmatenna attoña napa'čo'ña neparrocmatennasa. Atet pena tsachtaquër ñerra'm ama parrocmateno pue'choroť amach me'to e'ñe ñoña, sapa'čo'ña ñerra'm ama separrocmatenno amach errotenoť seme'toña saña e'ñe sota.

5 'Napa' na atten ñerra'mrrate' uvachrečhmo'r pue'chor, sapa' sa puetacres. Esha' neparrocmaterre' ñaña napa' e'ñech neparrocmatenanet, ñeñtcha'ña nanac me'tats. Ñerra'm a'yo'tsensa neshoť amate' errotenoť sorrtatyesoña ñeñt cohuen enten Yompor.

6 Esha'ch ama neparrocmaterre' ahuapore'tareťcha' atet ñerra'mrrate' tsachtaquër ñeñt ama me'tetso čhochña pecha'tam̃psetña puetaquër o'ch e'ñe porrarrque'chua allempochña a'yapačhetpa' o'ch chamuet tso allcha' poyua.

7 'Ñerra'm separrocmaterrna ñerra'm čhocma soctape'chennan neñoñ escha' senamuen napa' napascha'.

8 Atto nanac cohuen seme'tenpa' ñeñtpa' allochña secohuentateññañ Nomp por tarro'mar sapa' aňcha' sorrtatyen ñeñt cohuen enten ña. Ñaña sapa' attochña eñoterres acheñenesha' po'ñočh ñeñtes neyochreshas.

9 Atto Apapa' atarr nanac muerenna na, napa'čo'ña atarr nanac nemuerensa saña. Chocmuepa'ch seyemtennana ñeñt atto napa' čhocma nemorrentensa.

10 Ñerra'm same'ñennana neñoñ ñeñt atet notenes e'ñech señotenen napa' atarr nemorrentensa. Atet nepena na e'ñe name'ñeññaña Nomp por po'ñoñ ñeñt atet otenen, ñeñto'marña napa' e'ñe neñoteñ ñapa' atarr morrentenna naña.

11 'Añmapa' tarro'mar atet notenes allochña' ñeñt nocsheña napa' coshaterrescha' saña. Allochña' sapa' o'ch e'ñe socsherra e'ñe poctacma.

12 Añña ñeñt notenes: Atarrepa'ch semorrentannena allohuenes atet nepena naña atarr nemorrentensa saña.

13 Añmapa' ñeñtña e'ñe po'ñočh morrenteñets, o'ch ya'rroya yañeña o'ch yerroma añecop ñeñt atarr yemorrentyena.

14 Ñerra'm e'ñe atet seřohuen ñeñt atet notenes sañapa' ñeñtes e'ñe neyemtena.

15 Te'pa' o'huañ atteye' nentenes ñerra'mrrate' ñeñt ya'taruasañer yepen, tarro'mar ñeñt ya'taruasañer yepen ñapa' ama eñotenanoña ñeñt atet coťape'chen pamo'mte'. Tarraña na te'pa' e'ñe neyem nepenes tarro'mar ñeñt atet ne'mueññañ Apapa' sapa'čo'ña o' neñotaterres.

16 Sapa' ama saye' na'crraye, napa' naña sa'crrerña sa. Attoña o' napuerresña llesens attoch seta me'tarsats attoch e'ñe cohuen es sorrtatyen ñeñt cohuen enten Yompor. Ñeñtpa' ñeñtcha' se'mer seperr ñeñtña se'merpa' amach ahuañañaterro ama't ahuaťa. Allochña' ama't erra'tsena senamueñ Apa e'ñe na neso'chño e'ñe seyemteñoťen na, ñapa' apascha'.

17 Añca'yeña notenes: Chocmuepa'ch atarr cohuen semorrentannena.

*Allempo Jesúsapa' eñotatan pueyochresha' chomach e'moñe'tenonet
acheñenesha' arr patsro*

18 Jesúsñapa' alla oterraneterr:

—Ñerra'm acheñenesha' añ patsro e'moñe'tenset sapa' señochepa'ch na e'ñe nanom e'moñe'tenet.

19 Ñerra'm sa e'ñe parro attecmañeñ ñeñt'ama ame'ñetso arr patsro, ñetñapa' e'ñeñe' cohuen muerensetañ tarro'mar e'ñeca'ye ñeñt'ena'tarecmas. Tarraña sapa' ama e'ñe attecmañe' separro'marneshacmateno atet pena allohuen acheñenesha' ñeñt'ama ame'ñetso arr patsro. Sañapa' o' na'crreres ellonet nocop. Ñeñto'marña acheñenesha' añ patsropa' o' e'moñe'taset saña.

20 Seyerpach añ ñoñtor ñeñt' o' notuas: “Allohuen ñeñt' yochreshats errotencha' perrñañet ñeñt' yochresha'tenahuet, ñetpa'cho'ña e'ñech attecma aparetterret ñamet.” Atto napa' cotare'tennet pue'moñe'teñoñetan, sapa'cho'ña pue'moñe'teñoñetaspa' cotare'tasetcha' saña. Atto napa' ama ame'ñerrnaneto neñoñ, sapa'cho'ña amach ame'ñerrnaseto saña señoñ.

21 Ñeñtpa' atetcha' perrset tarro'mar sapa' naca'ye same'ñena tarro'mar ama eseshaye' eñotenaye Yompor ñeñt' nellsensene'.

22 Ñerra'm ama nohuapañe amach neserrpare'tatosanetañe, amate' eñallñeña attoch neyohua'yesanet po'chñaroñet. Ñeñto'mar te'pa' ama eñalle attoch a'nasotet po'chñaret.

23 Ñeñto'marña ñerra'm esesha' ne'moñe'tene' na, Nompore'naña e'moñe'tennanet.

24 Ñerra'm amach norrtatanetañe cohuenñats ñeñt'ama't ahuata po'psheññechnopa' ama orrtatanete'te e'ñe attotapa' amate' eñallñeña attoch neyohua'yesanet po'chñaroñet. Tarraña te'ña ñetpa' ama't e'ñe entennetañpa' chaña e'moñe'tennet ñaña Nompore'na e'moñe'tennanet.

25 Tarraña ñeñtpa' tarro'mara atet penet allochñapa' attoch etsoterra ñoñets ñeñt' e'ñe atet anuaret ahuatoteñ, ñeñtpa' atet oten nocop: “E'ñech attota e'moñe'terrnet.”

26 Ñeñtcha' soctape'chaterre' e'ñe cohuen seyoçhro ñeñtcha' nemñohuerrnas Apueshot. Ñeñtpa' ñeñtña Apa Puecamquëñ ñeñtcha'ña señoñtaterre'ña ñeñt' e'ñe po'ñoçh Yompor poctapña tarro'mar ñeñtpa' Apueshot huena. Ñerra'm esempoch çhaponasa ñachña na'potose'.

27 Sapa'cho'ña sa'potancha' tarro'mar e'ñe allempoteñ netorrosa, sapa' e'ñe allempoteñ parro'tseney.

16

1 Ñeñtpa' tarro'marña o' atet notuas allochñapa' amach alla ello sepuererro.

2 Tarro'mar esempopa' çhapcha' allempoch huapore'tas judionesha' po'prahuot. Po'ñoçh çhapcha' allempo esesha'pa' ñato' o'ch muetsaset çhach otenapuetañ ñetpa' allot'e' sherbeñetña Yompor.

3 Ñeñtpa' tarro'marcha' atet paset ñetpa' ama eseshaye' eñotenaye Apa ama't napa' ama eñotenneto.

4 Añechnopa' o' notuas allochñapa' ñerra'm esempoch çhap, sapa' seyerpuerrnanach ñeñt' atet notase't.

Atto Parets Puecamquëñ ñach yoctape'chatyese' e'ñe cohuen

'Ahuañmo'cha añechnopa' ama notase'te tarro'mar allempoteña' e'ñe parrocma allo'tseney.

5 Na te'pa' o'ch ahuerren allo'tsen ñeñt' nellsense'. Saña ama't puesheñarrotesapa' amaña sa'pto'tenno, errachña neserr.

6 Te'ña ñeñt' atet notenes saña seyočhropa' čhaña atarr sellquëna.

7 Te'pa' añ notenes ñeñt' e'ñe po'ñočh. Socoppa' añ nanac poctetsa napa' o'ch ahuerren. Tarro'mar ñerra'm amach neserro amate' errotent' huaponasoña Yompor Puecamquëñ ñeñt'cha' soctape'chaterre' cohuen. Tarraña ñerra'm neserrcha' napa' añcha' nemñahuernnas Yompor Puecamquëñ ñeñt'cha' soctape'chaterre' cohuen seyočhro.

8 Ñerra'm esempoch huapa Yompor Puecamquëñ acheñenesha'ña arr pat-sropa' ñachña čhapatahuetña pueyočhreto attoch eñochet ñet po'ñočhepa't eñallet po'chñaret. Ñaña añcha'ña čapatamet pueyočhreto ñeñt' e'ñe pocte' entyen Yompor. Ñaña añcha'ña čapatamet pueyočhreto attoch ñetpa' eñoteretcha' po'ñočhpa' coñcheñtsach amñareñterret ñeñt' ama name'ñenayo na ñeñten Yompor Puechemeren.

9 Yompor Puecamquëñpa' eñotaterrancha' acheñenesha' po'ñočh ñetpa' ama pocteye' entenaneto Yompor tarro'mar ama ame'ñenneto na ñeñten Yompor Puechemeren.

10 Ñaña ñach eñotaterrahuet ñeñt' e'ñe pocte' entyen Yompor tarro'mar napa' amach allo'tsenarano sesho. Napa' o'ch ahuerren Apuesho amach alla senterrne'te.

11 Paretsña Puecamquëñpa' ñachña eñotaterrahuet po'ñočhpa' coñcheñtsach amñareñterret ñeñt' ama ame'ñetso tarro'mar oneñeñt' ñeñt' pa'mcha'tareter pen shonte' acheñenesha' arr patsro, ñocoppa' e'ñe po'ñočh anuaret amñareñterrach coñcheñtso.

12 'Shontemeñ ñeñt'cha' notaseñ tarraña te' sapa' amate' errotent' čhaponaso seyočhro.

13 Tarraña ñerra'm esempoch huaponasa Parets Puecamquëñ, ñeñt'cha'ña señotaterre' ñeñt' e'ñe po'ñočh Yompor po'ñoñ tarro'mar ñapa' ñachca'ye señotatene' ñeñt' e'ñe po'ñočh Yompor po'ñoñ ñeñt' ama shequëñtsoyaye. Ñapa' amaca'ye e'ñe ñoña eñeno. Añca'yeña eñen ñeñt' atet e'muen Partsesho. Ñapa' añcha' serrpare'tatas ñeñt'cha' atet perra tsapa'tonet.

14 Ñapa' nachca'ye cohuentaterre'; e'ñe eñotennan ñeñt' atet nepena na, ñapa' ñeñt'cha'ña eñotatyeres.

15 Ora allohuen ñeñt' atet pena Apapa' napa'cho'ña e'ñe atet nepena namã. Ñeñto'marña napa' notenes eñotenan ñeñt' atet nepena na, ñapa' ñeñt'cha' señotatyerre'ña samã.

Ñeñña sellquëñapa' puenaserrach socsheña

16 Jesúsñaapa' atet oterraneterr:

—Te'pa' mameshamã o'huañcha' allo'na sentnenen tarro'mar napa' o'ch ahuerren Apuesho. Tarraña sapa' e'ñe mameshapa' o'ch alla yentannerra.

17 Pueyočhresha'ñapa' atet otanna'tyeset:

—¿Errotente'ña añ ñeñto'mar atet oteneý, mameshamãapa' o'huaño'ch allo'na yentneñ tarraña mameshapa' ahuo'ch alla yentannerra? ¿Errotente'ña añ ñeñto'mar ñapa' atet oteneý, ñapa' ahuo'ch ahuer Pampopresho?

18 Alla otanna'tyenet:

—¿Eso'marte'ña atet oteneý, mameshamãapa' o'huañcha' allo'na yentneñ? Amaca'yeña yeñoteñe este'ña oteneý.

19 Jesúsña eñotanet ñetpa' cho mueneñetañ o'ch a'pto'chet. Ñañaapa' otanet:

—¿Ñeñte'tña sotannena ñeñt' atet notenes, o' mameshamã o'huañcha' allo'na sentnenen, tarraña mameshapa' o'ch alla yentannerra?

20 Po'ñoçhca'ye o'ch notas: Sapa' sellquëño'õpa' seyahuerrach. Acheñenesha'ña arr patsro ñeñt' ama ame'ñetso ñetña'pa' çhach atarr coshet. Sapa' sellquërrach ñarraña sellquëña sapa' puenaserrnasach socsheña.

21 Ñeñt'pa' o'ch netma'ntatasa ñerra'mrrate' coyanesha' allempo cheññaña allempoch emare'ten, çhach lleca ñarro'mar o' çhapaña allempoch atsotennana puechoyoretoll. Tarraña allempochña eñalletatuepa' o'ch alla atarr cosherra o'ch pueherranña atto atarr llecach pue'maretoll, elloñapa' atarrcha' cosherra ñarro'mar o' eñalletatuan pue'maretoll arr patsro.

22 Jesúsña alla otterrannerr pueyochresha':

—Te'ña sapa' nanac llequëntso'tsenes, ñarraña elloñapa' o'ch alla yentannerra. Allempoña sapa' o'ch alla atarr socsherra seyoçhro. Ñeñña socsheña'pa' ama't e'ñe puecheñarra amach erroteno' puerratanperrseto.

23 'Allempopa' amach sepallteno o'ch alla es sa'p'to'terrnerr. E'ñe po'ñoçh te'pa' o'ch notas: Ñerra'm es senamueñ Apa e'ñe na neso'chño e'ñe seyemteño'ten na ñaña'pa' apascha' ñeñt' senamueñ.

24 Sa teme'ttsenpa' ama es senamueno e'ñe seyemteño'ten na e'ñe neso'chño. Te'ña ñerra'm senampa' saga'p'cha' allochña'pa' o'ch socsha e'ñe poctacma.

Atto Jesucristo a'mchechatuerran allohuen ñeñt' e'moñe'tene' Yompor arr patsro

25 'Ñeñt' allpon neserrpare'tatiesase't ñeñt'pa' e'ñe toma'nteñtsoçhno notyesase't. Tarraña çhapa' esempo allempopa' amach alla neserrpare'taterrserro toma'nteñtso. Allempopa' añcha' neserrpare'tatas Apacop ñeñt'pa' amach toma'nteñtsoyaye, allochña'pa' e'ñech seño'tue.

26 Allempopa' senamueñcha' Apa e'ñe seyemteño'ten na e'ñe neso'chño. Allempopa' amach pallteno o'ch nema'yocham'pena Apuesho.

27 Apañapa' atarrcha' morrentensa atto sapa' semorrentenna, e'ñe seyemtenna atto napa' Apuesho' nohuapa.

28 Po'ñoçh napa' Apuesho' nohuapa, o' neçhap a'ne patsro. Elloñapa' o'ch alla nesa'nerr añ pats, o'ch alla ahuerren Apuesho.

29 Pueyochresha'ña'pa' atet ochet:

—Te'ñapa' ama toma'nteñtsoye' peñeno ñeñto'marña yapa' e'ñech yeño'tue.

30 Te'pa' yeñotene'p' papa' ñeñte'p' eño'tuene' ora allohuen esocmañen. Ñeñto'marña yapa' amaca'ye pallteno o'ch alla ya'p'to'terrperr po'poñone't. Tarro'mar te'pa' yeñotene'p' papa' Partsesho' pehuapa.

31 Jesúsña'pa' atet otterrannerr:

—Sapa' taya'tña o' same'ña'na.

32 Te'pa' o' e'ñe çhampoch sa ama't puecheña'ttsospa' o' çhaponasañ çhach sematrra'tyesa allemeñ. Chach sahanomyesa allcha' semna'yesa. Nañapa' sa'ypo'ña'huanmuencha'. Tarraña napa' ama e'ñe napteyaye, epanña Apa.

33 Ora allohuen añeçhnopa' o' e'ñe notuas allochña'pa' e'ñe seyemteño'ten napa' çhocmach socshena seyoçhro. Po'ñoçh añ patsropa' çhocmach semue-roçhtena. Tarraña e'ñe seyoçhro sapa' çhocmuepa'chña socshena ñarro'mar napa' o' na'mchechatue allohuen ñeñt' e'moñe'tene' Yompor añe patsro't.

17

Allempo Jesús'pa' ma'yocham'penana pueyochreshachno

1 Allempoña atet otuanet añeçhno Jesús'pa' allenta cohua' enonetpa', ñeñt'pa' atet otan Pompor poema'yocheño't:

—Apacha' te'pa' o' chapona allempoch etsota ñeñt nocop. Te'pa' pecohuentatonepa'ch na tarro'mar Pechemer pepenen allochña napa'cho'ña necohuentatonaṗcha' ṗaña.

² Atto ṗapuen llesenspa' alloña pomnaren nepeñña allohuen acheñenesha'. Allochñapa' allohuen acheñ ñeñt ṗo'patatenna, naña ñetpa' napuenanetcha' alloch ñetpa' corretsetach pocsheñeshocmañen tayoteñ e'ñe errponañohuen.

³ Añmapa' ñeñtña alloch ñetpa' corretsetach tayoteñ e'ñe errponañohuen ñerra'm esempo eñoterrpet ṗa ñeñteṗ ṗapuet e'ñe po'ñoçh Yomporetets ñaña ñerra'm eñoterrnet na ñeñten Jesucristo ṗa pellsensaren.

⁴ 'Napa' o' e'ñe necohuentatuonaṗ arr patsro. O' e'ñe netsotuonaṗ ñaña petaruas ñeñt atet ṗoten.

⁵ Te'ña Apacha', pecohuentaterrnanepa'ch e'ñe alla pesho e'ñe atet allempo atarr a'cohuentatareten pesho ahuaṗ allempo ama eñalletena' añ pats.

⁶ 'Allohuen acheñ ñeñt neyochresha' peṗatenen nañapa' añ neñotatenanet ñeñt atet pepena ṗa tarro'mar ñetpa' ñeñtet e'ñe allpona ṗo'patatna arr patsro. Ñetñapa' pepa'tña o'patenahuet ñeñtcha' neyochresha' peṗaten naña. Te'ña ñetpa' e'ñe ame'ñernapet peñoñ.

⁷ Ñaña ñetpa' e'ñe eñotueñet allohuen ñeñt atet ne'ñorenanet ñaña ñeñt es norrtatyenanetpa' ñeñtṗa' e'ñe ora peshotecma huena.

⁸ Napa' añña ne'ñorenanet ñeñt atet ṗotenen ṗa. Te'ña ñetpa' e'ñe cohuen ame'ñennet. Ñaña e'ñe po'ñoçh eñoteñet napa' e'ñe pesho nohuapa, ṗa ñeñteṗ nellsenserre'.

⁹ 'Te'ña napa' o'ch nema'yochamṗesnomanet ñet. Ama allohuenacpaye' acheñenesha' arr patsro nema'yochenṗo, e'ñe añecpa nema'yochenṗa ñeñt neyochresha' peṗatenen tarro'mar ñetpa' ñeñtareta peyochresha' pepen ṗaña.

¹⁰ Tarro'mar allohuen ñeñt e'ñe nocmapa' ṗapa'cho'ña e'ñe ṗocma. Ñeñtña e'ñe ṗocmapa' napa'cho'ña e'ñe nocma. Ñetña te'pa' e'ñe cohuentatapretenet.

¹¹ 'Te'ña nocoppa' o' cherrmoch e'ñech ñeñteshaña añe patsro'tsenen tarro'mar napa' o'ch alla ahuerren pesho. Tarraña ñetpa' allo'tsenaretach arr patsro. Pa Apa Partso, pecuamṗsepa'ch allohuen ñeñt neyochresha' peṗatenen. Pehuamencotcha'ña pecuamṗsanet. Allochña ñetpa' o'ch e'ñe parrocmatet e'ñe atet yepena yaña.

¹² Allempoteñ e'ñe parro'tseney ṗoña pehuamencot necuamṗsanete't. Napa' chocma nemoñenanet. Ñeñto'marña ama't puesheñarroṗeta ñetpa' ama na'chencataneto, ñapñaña chenca añ ñeñt o'patena chenquëñets. Ñeñtṗa' attochña Apa etsoterra peñoñ ñeñt anuaṗet ahuaṗoteñ.

¹³ 'Tarraña te' napa' o'ch ahuerren pesho. Napa' añecopña neñen añechno añ patsro attoch ñetpa' atarrcha' cosherret pueyoçhreto e'ñe atet nocshena na.

¹⁴ Napa' añ ne'ñorana'tenanet ñeñt e'ñe ṗo peñoñ. Acheñenesha'ña ñeñt ama ame'ñetso añ patsro, ñetñapa' cha e'moñe'tenanet tarro'mar ñetpa' ama allo'na parro'marneshateneto ñeñt ama ame'ñetso, atet nepena naña ama neparro'marneshatenaneto.

¹⁵ Ama aṗeye' nenamuenpe attoch ṗahuenaneta' añ patsroṗ, añña nenamuenep o'ch pecuamṗsanet. Amach pemnatatsche oneñet o'ch alla a'puerrataterranet.

¹⁶ Ñetpa' ama allo'na parro'marneshateñeto ñeñt ama ame'ñetso arr patsro atet nepena naña ama neparro'marneshatenaneto.

17 Pame'ñeño'tet p̄a peñoñ p̄a'cohuentam̄psanetepa'ch e'ñe p̄ocop. Pa peñoñpa' ñeñña e'ñe po'ño'ch ama shequëñtsoyaye.

18 Atto p̄a pemñan na arr patsro, te'ña napa' o'ch nemñanet ñamet attoch serrpare'tatyaset acheñenesha' arr patsro.

19 Ñeñto'marña ñocpuet nañapa' o' na'rroyerra p̄ocop, attochña ñetpa'cho'ña a'cohuentataretterretcha' Partsocop. Ñeñtpa' e'ñe po'ño'ch atet p̄oteny p̄a peñoño't ama shequëñtsoyaye.

20 'Tarraña amach e'ñe añecpa nema'yoch ñeñt e'ñe neyochresha' nepen te', añecpa'nachña nema'yocham̄pesnoma allohuen ñeñtcha' name'ñerraya tsapaonet e'ñe neyochresha' po'ño'ño't.

21 Allochña allohuenetpa' parrocmatetcha' atet pepena p̄a Apa e'ñe peparrocmatennana ñaña napa' e'ñe neparrocmatenna'p̄a. Allochña ñetpa' o'ch e'ñe parrocmaterryet e'ñe parro epay. Attochña acheñenesha'ña arr patsropa' ñetñapa' eñoteretcha' p̄a ñeñte'p̄ nellsenserre'.

22 Atet pepena p̄a pecohuentapretenna napa'cho'ña e'ñe necohuentapretenanet ñet, atto'cha'ña ñetpa' e'ñech parrocmatet atet yepena yaña e'ñe yeparrocmaten.

23 Napa' neparrocmatenanet, p̄añapa' peparrocmatenna. Allochña allohuenetpa' e'ñech parrocmatuenet e'ñe poctacma. Attoch acheñenesha' arr patsro ñetpa' eñoteretcha' p̄apa' p̄a nellsenserre'. Ñaña eñoteretepa'ch p̄apa' atarr pemorrentenanet e'ñe atet atarr pemorrentenna na.

24 'Apacha' allohuen ñeñt peyochresha'tatenna na, napa' añ nemnen erro'tsenencha' ñetpa'cho'ña allo'tsenacmayepa'chña e'ñe parro. Allochñapa' attoch enterrnanet necohuenña allo o' alla pecohuentaterren na, tarro'mar p̄apa' pemorrentenna allempoteñ ama aye'chcatarettena' añ patser.

25 Apa, p̄a ñeñte'p̄ e'ñe pocte' es pets, acheñenesha' ñeñt ama ame'ñetso arr patsro ñetpa' ama eñotenpeto. Nañapa' e'ñe po'ño'ch neñotene'p̄. Añña ñeñt e'ñe neyemtenaya ñetñapa' eñotenpet p̄apa' p̄a nellsensene'.

26 Napa' naña e'ñe eñotatenahuet ñet ñeñt atet pepena p̄a. Ellopa' allach neñotaterraneterr. Allochñapa' ñetpa'cho'ña e'ñech morrentanna'terret e'ñe atet pepena p̄a atarr pemorrentenna na. Attochña napa' e'ñech neparrocmatenanet ñet. Ñeñtpa' allohuach nema'yocha'p̄a Nompore.

18

Allempo rromoset Jesús

(Mt. 26.47-56; Mr. 14.43-50; Lc. 22.47-53)

1 Jesúsña allempo ma'yochuanmapa' allenta ahuanman pueyochresha' o'ch ahuanmuet yom̄ta'n amañesre'to. Ñeñt amañesre'te'pa' añ pa'so'cheñ Cedrón. Allña yom̄ta'npa' allo'tsen narmetsma', all chapña Jesús epuet pueyochresha'.

2 Ñehua, Judas ñeñtcha' pomuerre' Jesús ñapa' e'ñe puentarña all, tarro'mar ahuañmo'cho'teñ Jesúsapa' allecma apchatenan pueyochresha'.

3 Judasñaapa' allenta anman solltarnesha' ñaña guardianesha' ñeñt mueñen fariseonesha' ñaña ñeñt pa'm̄cha'tareternesha' pen allohuen judionesha' po'cornaneshar. Ñetñapa' cha'cha'tet all elampañet̄areret. Orra'yenesnet ñaña po'urare. Orra'yenesnet ñaña alloch quellaret.

4 Jesúsñaapa' e'ñe eñoteñ ora ñeñtcha' chapoya allempo. Ñaña poctanetpa' atet otapanet:

—Sapa' ¿eseshatña se'nen?

5 Ñetñapa' atet otoset:

—Añca'ye ye'nen Jesús ñeñt nazareto'marnesha'.

Ñaña'pa' alla oterraneterr:

—Napa' añenca'ye.

Judas ñeñt pomue'pa' ñapa'cho'ña allo'tsen.

⁶ Allempo otenanet Jesús: “Napa' añenca'ye”, ñetñapa' o' cheterret pa'che'ñone'pa' allepa'tcha' a'trra'tet.

⁷ Elloñapa' alla oterraneterr:

—¿Esesha'tña se'nen?

Ñetñapa' alla otereterr:

—Yapa' añ ye'nen Jesús ñeñt nazareto'marnesha'.

⁸ Jesúsñapa' alla oterraneterr:

—Napa' o'ca'ye notuapas napa' añen. Ñerra'm nate' se'nenpa' neyochresha'ñapa' semnatanet ñetpa' o'ch ahuanerret.

⁹ Ñeñt'pa' tarro'mar atet ot allochñapa' attoch etsota Jesús po'ñoñ atet o' otuanom: “Ñeñt allpon neyochresha' pe'patenen napa' ama't puesheñarrapa' amach na'chencache.”

¹⁰ Allempoña Simón Pedro ñeñt occhelle'pa' ñaña'pa' po'cchella cheta'pa' o'ch chonto'tapaneñ cornesha' pueñañra puetepa'tcha' tsorroñ. Ñeñt'pa' añ pa'so'cheñ Malco, ñeñt'pa' año pueñañra ñeñt pa'm'cha'tareter pen allohuen judionesha' po'cornaneshar.

¹¹ Tarraña Jesús'pa' atet otan Pedro:

—Peshaterr p'occhell allecma peneñ. Pocte'ca'ye o'ch chapona ñeñt amue-rochtatañ* tarro'mar ñeñt'pa' atet muenatenen Nompör.

Allempo anmet Jesús allo'tsen ñeñt pa'm'cha'tareter pen allohuen judionesha' po'cornaneshar

(Mt. 26.57-58; Mr. 14.53-54; Lc. 22.54)

¹² Allempoña solltarnesha' epuet po'ca'ptáner ñaña judionesha' po'guardianeshar ñetñapa' rromoset Jesús'pa' o' huanquët.

¹³ Ñanompa' arr anmet allo'tsen Anás, tarro'mar ñapa' ñeñt Caifás pa'go'. Ñeñtña Caifás'pa' ña pa'm'cha'tareter pen allohuen judionesha' po'cornaneshar allempo ñeñte chararo.

¹⁴ Caifás'pa' ñapa' ñeñtña co'tape'chataye't judionesha' allempoteñ o'pateñet Jesús, ñeñt'pa' atet otanete't: Añ poctetsa puesheñarr ñeñt acheñerpa' o'ch rroma allohuen acheñeneshacop.

Atto Pedropa' a'nasotana Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro ñaña po'psheñeñ pueyochresha' ñetñapa' co'ta'nmet ñamet Jesús chenta'. Ñeñtña puesheñarrpa' e'ñe cheme'teñ cornesha' ñeñt nanac añcha'tarettetsa allempo. Ñapa'cho'ña o' be'tososet epuet Jesús all aconcha'tam'psare'ttena cornesha' po'pamp.

¹⁶ Pedroñapa' alla tomos a'yo't allot be'tenet. Po'psheñeñña pueyochresha' ñeñt e'ñe cheme'ten cornesha' ñeñt nanac añcha'tare't, ñaña'pa' cha'nerr a'yo't, allñapa' e'ñosuerr epuet coyanesha' ñeñt cohuene' yetarr. Allempoñapa' errana' ñaña Pedro.

¹⁷ Coyanesha'ña ñeñt cohuene' yetarrpa' atet otapan Pedro:

—¿Ama't p'apa'cho'ña pueyochresha'te'ca' pene'ña añ encaneshar?

Ñaña'pa' atet otos:

* **18:11** Ñeñt amue-rochtatañ ñeñt'pa' po'ño'ch ñeñt'pa' añ atma'ntataret ñerra'mrrate' ñeñt atarr pesherr yorren orran'itso.

—Napa' amaca'ye pueyochreshayayno.

¹⁸ Ñeñña taruaset all epuet guardianesha' ñetña' all tsoma'tenet quellmesha, a'huortatenet tarro'mar allpa' nanac senteten. Allña tomchenet all shotenet. Pedropa'cho'ña allo'tsen all shotena ñaña.

Allempo Jesús'pa' a'p'to'tare'teñ cornesha' ñeññ nanac amcha'tarettetsa
(Mt. 26.59-66; Mr. 14.55-64; Lc. 22.66-71)

¹⁹ Cornesha'ña ñeññ nanac amcha'tarettetsa, ñapa' allenta a'p'to'tapan Jesús pueyochreshacop ñaña añecop ñeññ atet yechatyen.

²⁰ Jesúsña'pa' atet otos:

—Napa' ama a'nahuayaya neserrpare'tateñe acheñenesha' arr patsro. Chocma neychatyen judionesha' po'prahuo'mar ñaña Parets pa'paclo allecma shontena judionesha'. Ama't parrochapa' ama esempo neñosoña a'nahua.

²¹ Eso'mare'tña nañeña pa'p'to'ten. Añcha'ña pa'p'to'tyes ñeññ ne'maye't erroten'te' neserrpare'tatyesanete't. Ñetpa' eñoteñette'ña ñeññ atet notyesanete't.

²² Allempoña atet otuanet Jesús'pa' puesheñarrña guardia ñeññ allame'tso'tsenapa' ñaña'pa' allenta tacle', atet och:

—Amarramch' atteye' yanapueñeña cornesha' ñeññ nanac amcha'tare't.

²³ Jesúsña'pa' atet och:

—Ñerra'm añte' neñen ñeññ ama cohuenayayepa' p'toten all ama cohuenaye' neñeno. Ñerra'm cohuent'e' neñenpa' eso'marte'ña petacllenen.

²⁴ Allempoña Anás'pa' allenta mueñe e'ñe ehucaret pa'ñachoresho Caifásesho. Ñeñña Caifás'pa' ñeññ e'ñe pa'm'cha'tare'ter pen allohuen judionesha' po'cornaneshar.

Allempo Pedropa' alla a'nasoterranerr Jesús
(Mt. 26.71-75; Mr. 14.69-72; Lc. 22.58-62)

²⁵ Simón Pedroña'pa' alla ten all shotena. Ñetña'pa' atet ochet:

—Papa'cho'ña ¿ama't pueyochresha' penpe?

Ñaña'pa' cha a'nasochapa' atet ot:

—Napa' amaca'ye.

²⁶ Cornesha'ña ñeññ nanac amcha'tare't puesheñarrña ñeññ pa'taruasañer ñeññ pamo'ts tsorrqueta't Simón Pedro, ñaña'pa' atet och:

—Napa' ¿ama't pa nentoña narmetsmo? Papa' allo'tsenepca'ye.

²⁷ Pedroña'pa' alla a'nasotererr. E'ñe allempocmaña eñen atollop.

Allempo chapata'mueñet Jesús allo'tsen amcha'tare't Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Allempoña Jesús'pa' anereter Caifásesho't. E'ñe ahuatecma anma'mueñet amcha'tare't po'palaciopahuo. Ñeñña amcha'tare'tpa' ñeññ nen gobierno' Romo't ñeññ amcha'tare'tetsa allo'marneshacop. Allohuen judionesha' ñetña'pa' ama be'tososeto amcha'tare't pa'paclo tarro'mar ñeññ amcha'tare'tpa' romo'marnesha' ama judioneshayaye allochña ñetpa' año'ch cha a'sosyateto ñañeñeta Partsocop esheccha' e'ñe cohuen rrallme'chet pascuapo.

²⁹ Ñeñto'marña Pilatopa' cha'nmanet a'yo't allo'tsa'yenet, atet otapanet:

—¿Errotenote'tña sottene'cheñña añ acheñer?

³⁰ Ñetña'pa' atet otyesoset:

—Ñerra'm ama añ pa'yeno ñeññ ama pocteyayepa' amate' erroteno't o' yehuapacheñeña pesho.

31 Pilatoñapa' atet oterraneterr:

—Chosa sañeña anmue' sachña ente' errofente' ñeñt atet pena ñeñt atet anaret ñoñets socop attotcha' sottene'ch.

Judionesha'ñapa' atet otyeset:

—Yocop ñeñtey judioneshaypa' ama pocteyaye o'ch yemtsach acheñ ama't puesheñarra.

32 Ñeñto'marña ñetpa' atet otyeset allochñapa' attoch etsota Jesús po'ñoñ atet otuanet ahuaña allempo ñanom eñotatanet ñapa' corsochoch rroma.

33 Allempoña Pilatopa' alla be'terrerr pocollo. Ñañaapa' agotatan Jesúsapa' atet och:

—Papa' ¿pa't amcha'tarettetsaña judioneshacop?

34 Jesúsñapa atet och:

—Añpa' ¿e'ñe't pōta pōtenña atet, ñato' esesha'te' pōtene'ña añ nocop?

35 Pilatoñapa' atet otererr:

—Napa' amaca'ye judioneshayayno, ama es neñotenoña socop. Paña pamo'tsna'tar ñaña ñeñt pa'mcha'tarefernesha' pen judionesha' po'cornaneshar ñetña te'pa' o' pomuerrpet nesho. ¿Eso'tña pepen ñeñt ama't mameshapa' ama pocteye' entapretenpeto?

36 Jesúsñapa' atet otererr:

—Atto na'mcha'tarettena napa' ama añe patsroyaye. Ñerra'm añe patsrach na'mcha'tarettenañpa' allempoña neyochreshachnopa' moñsa'netañcha', allempopa' amach pomnoñeña judionesha'. Tarraña atto na'mcha'tarettena napa' ama arro'marecpayaye.

37 Pilatoñapa' atet otererr:

—Ñeñtepñapa' pepa'tca'yeña amcha'taret.

Jesúsñapa' atet otererr:

—Na po'ñoçhpa' amcha'taretenca'ye e'ñe atet pōtenen pa. Napa' ñeñto'marña ne'ñalletosa añe patsro attoch nach a'pōtose' ñeñt e'ñe po'ñoçh Yompor poçtañña. Allohuen ñeñt muenene' ñeñt e'ñe po'ñoçh Yompor poçtañña, ñetñapa' e'mñotennet.

38 Pilatoñapa' alla otererr:

—¿Erra'tsena'tña ñoñets ñeñt e'ñe po'ñoçh?

*Atto amcha'taret Pilatopa' otanet ama'tpa' çhosa muetse'ña Jesús
(Mt. 27.15-31; Mr. 15.6-20; Lc. 23.13-25)*

Ñeñta otuapa' o' alla çha'nerrerr allo'tsa'yen judionesha'. Allñapa' atet otuerranerr judionesha':

—Napa' amaca'ye nenteññañeña ñeñt atto ama pocteye' es peno attoch yemtsatach.

39 Tarraña atet seyçhenpa' e'ñe pate'tets char allempoch çherrerr pascuapo nañapa' çhocmach na'rroyerrnas puesheñarr socop ñeñt ayottamñpsarettetsa allempo, ñeñtara ñeñt samo'ts sepen. Te'pa' ¿añe't semnen o'ch na'rroyerrnas ñeñt Sa'mcha'tareter sepen sa ñeñtes judioneshas?

40 Allempoña ñetpa' puerrannarteñotetpa' atet otyeset:

—Tarraña Jesúsapa' amach pa'rroyatsche, añcha'ña pa'rroyerrnay Barrabás. Ñeñña Barrabásapa' ñeñt atarr aprratamñpsañtetsa.

19

1 Allempoña Pilatopa' atet otan po'solltar-renesha':

—Te'pa' o'ch sanemñ Jesús allcha' sashte'.

2 Solltarnesha'ña pa'llocchame'teñoŕet Jesús'pa' pellta'toñet choyo'mets agrech ñeñña choyo'mtachtet ñeññ atet choyo'mtena ñeññ po'ñoçh añcha'tarettetsa. Chorrachet ñaña shetamuets ñeññ quelluemamueno tsamamtena ñeññ pa'shtam pen ñeññ po'ñoçh añcha'tarettetsa.

3 Pa'llocchame'teñoŕet'pa' e'ñe atet p̄achet ñerra'mrrate' ñeññ po'ñoçh añcha'tarettetsa. Allña ponem̄yet'pa' pachm̄are'teñoŕet'pa' atet oteñet:

—Puetare' añcha'taretecha', atarruaca' cohuenep̄te' p̄a ñeññep̄ judione-sha' pa'm̄cha'taretereŋ.

Allña'pa' taclapecheñet.

4 Pilatoña'pa' alla cha'nerrerr allo'tsa'yen judionesha'. Allña'pa' atet oterraneterr:

—Secue', te'pa' o'ca'ye alla nehuapaterrnaserr Jesús allochña'pa' o'ch señoçh napa' amaca'ye nenteññañeña ñeññ atto ama pocteye' es peno attoch yemtsatach.

5 Allempoña cha'nom ñaña Jesús achoyo'mtataret agrech ñeññ apellta'taret, achorratareta ñaña shetamuets ñeññ quelluemamueno tsamamtena. Pilatoña'pa' atet oterraneterr:

—Secue' añca'yeña ñeññ yacmar.

6 Ñeñña pa'm̄cha'tareternesha' pen allohuen judionesha' po'cornaneshar ñaña guardianesha' allempoña ñetña eñchet'pa' puerranarotet'pa' atet otyeset:

—Ñapa' ¡pecorso'tam̄psachñaca'ye!

Alla oterete't:

¡Pecorso'tam̄psachñaca'ye!

Pilatoña'pa' oterraneterr:

—Añca'ye seña', sañeña corso'tam̄pse' tarro'mar napa' amaca'ye nenteññañeña ñeññ atto ama pocteye' es peno attoch yemtsatach.

7 Judionesha'ña'pa' atet otereterr:

—Yapa' yechenca'ye paterr ñoñets ñeññ atet anaret. Ñeñña ñoñets'pa' atet oteney añ poctetsa ñapa' chocmach rroma tarro'mar ñapa' pachm̄are'teñoŕ oten ñapa' ño' Parets Puechemer.

8 Allempoña Pilato e'man atet ñoñets'pa' cha yoruen.

9 Alla be'terrerr pocollo atet otuerranerr Jesús:

—Papa' ¿erro'marneshape'tña p̄a?

Jesúsña'pa' ama anape.

10 Pilatoña'pa' alla otererr:

—Amahuachñaca'yeña p̄anapnote'. ¿Ama't peñoteñeña napa' allsensareten attoch na'rroyerrep̄, allsensareten ñaña attoch necorso'tam̄perrep̄?

11 Jesúsña'pa' atet otererr:

—Amach errotent̄ pepa'noñeña ñerra'm ama Yompor p̄apayñe llesens atet. Ñeñto'marña ñeññ nepomue' peshopa' ñet'pa' ello metanennapet p̄o'chñar.

12 Elloña Pilato atarr mueneñeñ o'ch a'rroyerran Jesús tarraña judionesha'ña'pa' puerranarotet'pa' atet otyerreterr:

—Ñerra'm añ p̄a'rroyerrpa' p̄apa' ama pemno o'ch p̄a'm̄cha'tareter pepe' ñeññ atarr añcha'tarettetsa Romo. Tarro'mar allohuen ñeññ ñañeña netsa añcha'taretpa' chocma mueneñ o'ch atpare'teñet ñeññ atarr añcha'tarettetsa Romo.

13 Pilatoña allempo e'man ñeññ atet otenet allenta cha'nmaterran Jesús a'yoŕ ñaña'pa' anorruerr all po'conaño allecma a'poctatenan ñoñets, ñeññ otenet Mapyetaten. Hebreyachopa' oteñet Gabata.

14 Allempopa' añe yetro allempo añña'tena judionesha' ñeññ attecma penet pascuapo. O'ña chap poctopa', Pilatoña'pa' atet oterranerr judionesha':

—Secue'ñaca'yeña añ ñeñt sa'mcha'tareter sepen.

¹⁵ Ñetñapa' alla rrannarterreterrrpa' atet otyerreterrr:

—¡Ñapa' chepa' rromats! ¡Pecorso'tam̄psachñaca'ye allcha' rroma!

Pilatoñapa' atet oterraneterrr:

—Sapa' ¿atfe't semnen o'ch necorso'tam̄psonas sa'mcha'tareter?

Ñeñña pa'mcha'tareternesha' pen allohuen judionesha' po'cornaneshar ñetñapa' atet otyeset:

—Yapa' amaca'ye eñalleña po'poñ ya'mcha'tareter, ñapñaña ya'mcha'tareter yepañ ñeñt atarr amcha'tarettetsa Romo.

¹⁶ Allempoña Pilatopa' apanet Jesús attoch corso'tam̄pset. Ñetñapa' anmet allcha' corso'tam̄peñeta'.

Atto corso'tam̄psoset Jesús

(Mt. 27.32-44; Mr. 15.21-32; Lc. 23.26-43)

¹⁷ Atto sen Jesús allpa' anenan po'corsoch. Chapachet all oteñet Poñetallepno, ñeñt otenet hebreyachó Gólgota.

¹⁸ Allña corso'tam̄psoset epuet ñaña epsheña acheñ. All corso'tam̄psetpa' rrochtam̄psatoset epsheña.

¹⁹ Pilatoñapa' quellcatan ñoñets ñeñtpa' atet ot: “Añmapa' Jesús ñeñt nazareto'marnesha' ñeñt Pa'mcha'tareter pen judionesha'.” Ñeñña ñoñetspa' e'ñe corsocho ne'.

²⁰ Shonte' judionesha' ñeñt lleya'yese' ñeñt quelled tarro'mar all corso'tam̄psetpa' e'ñe allame'ttsa anetso. Ñeñña quelledpa' e'ñe mapo'mar ñoñets aquellcaretta —hebreyach, griegaach ñaña latinaach, e'ñe attecma oten.

²¹ Ñeñña pa'mcha'tareternesha' pen allohuen judionesha' po'cornaneshar ñetñapa' atet ochet Pilato:

—Amachca' pequellcatstoña atet. Añcha'ña pequellca' ñocop, “ñapa' ñañeñaca'ye otetsa judionesho' Pa'mcha'tareter.”

²² Pilatoñapa' atet otanet:

—Ñeñt o' nequellcatuapa' o'ca'ye aquellca'huaretta.

²³ Allempoña corso'tam̄pesuet Jesús pa' solltarnesha'ñapa' yoroñet ñeñt chorrena. Apanna'tyeset puema'tets pa'tatssheño'maret. Ñeñña pa'shtampa' ama eñalle all sepchena, ora apomotareter e'ñe patrra shetamuets e'ñe poñe'moteñ.

²⁴ Atet otanna'tyeset:

—Amachca'ye yerrarratsche, chochña yeyellsheñe'chatoñ pa'shtam yesuertot attoch orrra erra'tsenoteycha' yore'.

Ñeñtpa' tarro'mar atet pohuet allochñapa' attoch etsoterra Yompor po'ñoñ ñeñt atet anuareter ahuafoñeñ, ñeñtpa' atet oten: “Ñetpa' apanna'tyerretcha' ñeñt nechorrena. Neshtamñapa' yellsheñe'chatonetcha' po'suertot attoch orrra ñeñtcha' yore'.” Ñeñtpa' atet o' e'ñe perra solltarnesha'.

²⁵ Allña e'ñe allame'tets Jesús po'corsochopa' all tomchen coyanesha'. Allo'tsen pachor, ñaña pachor pa'mo'nerr, ñaña po'psheñeñ María ñeñt Cleofas puetapor, ñaña María Magdalena.

²⁶ Jesúsña entan pachor ñaña pueyochresha' ñeñt nanac morrentena all tomchenet allame'tets. Allña pa' atet otan pachor:

—Achocha' añca'yeña pechoyor.

²⁷ Allempoñapa' atet otan ñeñt pueyochresha':

—Añca'ye ñeñtcha' pachor pepa'.

Allempoña ñapa' anerran Jesús pachor e'ñe ña pa'paclo allcha' cohuañpes.

*Atto rroma Jesús all po'corsocho**(Mt. 27.45-56; Mr. 15.33-41; Lc. 23.44-49)*

²⁸ Allempoña Jesús pa' o' eñoch o' etsotua ora allohuen ñeñt ñocop, ñaña pa' atet ot:

—Cha no'ñ pa'ten.

Ñeñt pa' tarro'mar atet ot allochña pa' attoch etsoterra Yompor po'ñoñ ñeñt atet anuaret ahuatoteñ.

²⁹ Allña pa' allo'tsen pajo' all chorre' chase'. Allña e'chomuetña ñeñt atotso'tpo'. O'ña tsotso'tatuet ñeñtña pa' net tsachpo ñeñt otenet hisopochep alloña chapachet Jesús puenamo.

³⁰ Allempoña Jesús pa' agapan chase' ñaña pa' atet oterrerr:

—Te'ña pa' o' e'ñe etsotuerra allohuen ñeñt atet anaret nocop.

Allempoña o' epapa' cha rromats.

Allempo puesheñarr solltarpa' enos po'panmeto puepotot

³¹ Allempo pa' o' chap allempoch añño'terrerr judionesha' tsapatēcop allempocma amesenet. Ñeñto'marña ñetpa' ama pocteye' eñcheto o'ch alla ellapen ñeñtcha' rromanatats corsocho añ yetro allempo amesenet. Ñeñtña yetro allempo amesenet o'ch alla atarr cosherreterr ñaña pascua. Ñeñto'marña Pilatopa' enamueñeta' attoch cheno'tatoñet pa'tap o'ch rromuet e'ñe mamecma allochña pa' o'ch anmaretterret corsocho't.

³² Allempoña ponemña solltarpa' cheno'tosan pa'tap ñeñt parro corso'tampeñet e'ñe epsheño'mar.

³³ Allempoña ponemyet ñaña Jesús pa' ñaña pa' entoset o' rroma. Ñeñto'marña ñapa' ama chenam̄pseto pa'tap.

³⁴ Tarraña puesheñarrña solltarpa' chocma enos po'panmeto puepotot. Allotña atarr cha'nom po'rras ama't ñaña oñsasen.

³⁵ Ñeñtña ente'pa' ñapa' serrpare'tatanet atet ent. Ñapa' e'ñe eñoteñ e'ñe po'ñoch ñeñt atet oten. Ñeñto'marña yapa' yeñoteñ ñeñt atet serrpare'tenpa' e'ñe po'ñoch. Attochña sapa'cho'ña same'ñerach ñeñt atet oten ña.

³⁶ Ñeñt pa' atet pa' attoch etsoterra Yompor po'ñoñ ñeñt anuaret ahuatoteñ, ñeñt pa' atet oten: “Ña ama't patrra puenepa' amach chenam̄pereto.”

³⁷ Ama't ñaña Yompor po'ñoñ ellonetpa' atet ote't ahuat: “Ñetpa' enteretcha' ñeñtcha' enerret.”

*Atto pampuet Jesús**(Mt. 27.57-61; Mr. 15.42-47; Lc. 23.50-56)*

³⁸ Allempoña José ñeñt arimateo'marnesha' pa' ñaña pa' ahuos Pilatesho o'ch oteña' pocte'ch eñch ñach a'suatose' Jesús ñeñt rromuets corsocho. Ñehua, ñeñt José pa' cotenan ñaña Jesús tarraña e'ñe a'nahua, tarro'mar ñapa' mecha'tenan judionesha'. Allempo atet enamosan Pilato, Pilatoña pa' e'ñe pocte' eñch, ñeñto'marña alla ahuerr corsocho, cherr allpa' a'suatosan Jesús corsocho't all rromuen.

³⁹ Allña pa' huapa ñaña Nicodemo ñapa' añ huapatoñ eñmosa't, atsetaret ñeñt otenet mirra epuet ñaña áloe. Allo'tsente' ma'poch charra' kilo. Ñehua, ñeñt Nicodemopa' ñeñtara ñeñt huapatsa ñanom Jesúsesho tsapo.

⁴⁰ Ñetña anerretña Jesús rromue'. Allña pa' epatse'tueret shetamtsotomo epuet ñaña eñmosa't. Ñeñt pa' atet ye'chena judionesha' ñerra'm cho pampueñet arromña't.

⁴¹ E'ñe allame'tets all corso'tam̄pset allña pa' allo'tsen narmetsma'. Allña narmetsmopa' allo'tsen mapuetpon allña pampa'neretña Jesús allempo

rroma. Ñeñt mapuetponpa' e'ñe etserra eñaref, tarraña allpa' ama pam-pueñeta' ama't patrra arromñañ.

⁴² Allempopa' tarro'mara alla na'neret allame'tets tarro'mar allempopa' añ yetro allempoch añno'tena judionesha' tsapatecop allempocma amesenet.

20

Atto tanterra Jesús

(Mt. 28.1-10; Mr. 16.1-8; Lc. 24.1-12)

¹ Allempo motta'muenerr yetsñats temenc, Maríaña Magdalenapa' ahuatecma ahua'muen puepampro, allempopa' ama e'ñe puetaresuena'. Allñaapa' amuepa'tcha' atteraye' entosanoña mapue' allo yottam̄pset. Ama allo'tsenarayaye, atta apmesaref a'yenet mame'.

² Ñeñta pa'che'ñera alla materra o' ahuerri allo'tsen Simón Pedro ñaña po'psheñeñ pueyochresha' ñeñt atarr morrentena Jesús. Maríañapa' atef otuerranet:

—O' anerrnayette' Yepartseshareñ puepamprof. Ama yeñoteñe, errate'ña neret.

³ Allempoña Pedro epuet po'psheñeñ pueyochresha' ñetñapa' allenta ahuanmuet ñamet puepampro o'ch enteñeta'.

⁴ Epsheño'maretpa' matrra'tet all. Po'psheñeñña pueyochresha'pa' ñañaapa' ota, metanan Pedro. Ñañaapa' ñanmacma chap puepampro.

⁵ Epostsaña o'pononef o'ch cohuos all net Jesús ama entose, aña entosñañ allo epet alla o'yerrmuena. Tarraña ama be'toso.

⁶ Allempoña chap ñaña Simón Pedro ñeñt onets chenta'. Ñañaapa' allenta be'tosos puepampro ñapa'cho' aña entosñañ allo epet Jesús alla o'yerrmuena.

⁷ Añña allo huancoñet poñpa' ama parrocmaye' allo'tseno epuet allo epet. Ñeñtñapa' ñapuef a'tpuetena a'yenet.

⁸ Allempoñapa' be'tosos ñaña po'poñ pueyochresha' ñeñt ñanom chapats puepampro. Ñapa'cho'ña entos ama eñalle Jesús. Allempaña ame'ñya po'ñoche'pa't o' tanterraña Jesús rromof.

⁹ Tarro'mar ñet allempopa' ama chenaneoña ñeñt atef anuaref ahuateoteñ Jesúsocop all oten Jesúsapa' chocmach tanterra po'rromñoñ.

¹⁰ Allempoña pueyochresha'pa' ahuanerret pa'paclo.

Allempo tanterra Jesúsapa' añ ñanom orrterra María Magdalena

(Mr. 16.9-11)

¹¹ Maríañapa' allo'tsenara a'yot allame'tets puepampro all nanac yahuenana. Allña yahuenapa' o' epa, o' cohua' o'pononef puepampro all net Jesús.

¹² Allñaapa' aña ent epsheña mellañoñeñ, pa'shtamuet atarr hual-lama'tareret. E'ñe ñopa'tets anorryenet puesheñarrpa' poñoñ anen, po'psheñeññaapa' pa'rrpof anen all panet ahuaña Jesús.

¹³ Ñetñapa' atef ochet María:

—¿Eso'mare't nochesha nanac peyahuena?

Ñañaapa' atef otanet:

—Ahuo't anerrnayette' Nepartseshareñ ama neñoteñe errate'ña o' net.

¹⁴ Ñeñta otuapa' puetallerra pa'che'ñonef allente'pa'tcha' enterran ñaña Jesús e'ñe all. Tarraña ñapa' ama cheme'che.

¹⁵ Jesúsñapa' atef och:

—¿Eso'mare't nochesha atarr peyahuena? ¿Esesha'tña pe'nen?

Ñañaapa' cha otenapañ añte' ñeñt cohuan̄pene' narmetsma' all. Ñeñto'marña ñapa' atef och:

—Ayochreshate ñerra'm p̄ate' anmue'pa' pegaterren errate' peneña', ñachña erraya'.

¹⁶ Jesús'pa' atet otererr:

—¡María!

Ñaña puetallerrtserrpa' cha e'ñe cheme'terre' ñeñto'marña atet ot po'ñoño hebrea'cho:

—¡Raboni! —ñeñt atet otenet ñet Maestro.

¹⁷ Jesús'pa' atet otererr:

—Amach cha perrmatsetno, napa' ama na'tena' Apuesho. Arrña orraḡ masheñshesho o'ch p̄otenaneta' napa' o'ch na'terr Nomporesho ñeñt Neyomporer nepen ñeñtara ñeñt Seyomporer sepen samña.

¹⁸ Maríaña Magdalenapa' ahuerr serrpare'tatuerrñañ pueyochresha' ñeñt'pa' atet otuerranet:

—Napa' o'rramtso nenta'mueñña Yepartseshar.

Serrpare'tatuerranet ñeñt atet och Jesús.

Atto Jesús'pa' orrterrana allohuen pueyochresha'

(Mt. 28.16-20; Mr. 16.14-18; Lc. 24.36-49)

¹⁹ Ñeñte yetrocma allempo motta'muena yetñats temenc, ellerronetña pueyochresha'chnopa' apcha'nenet. Ñetpa' cha yore'tenanet judionesha' ñeñto'marña ñetpa' e'ñe echarr yottam̄penet. Ama't atet yottam̄penetañpa' Jesúsñapa' chepa'tcha' be'tosuets. E'ñe rrocho tomhuen allempoñapa' atet otuenanet:

—Te'ña po'ño'chpa' chosa cosherrtsa seyo'chro.

²⁰ Allempoña atet otuenanetpa' gatyuesuananet pot ñaña all enaret pueḡoto. Pueyochresha'ña atarr nanac coshapueñet allempo entapueñet Po'partsesharet.

²¹ Allempoña Jesús'pa' oterraneterr alla:

—Te'ña po'ño'chpa' chosa e'ñe cosherrtsa seyo'chro. Atto na mueñan Apa, napa'cho'ña te'pa' o'ch nemñas samña.

²² Allempoña otuenanet atetpa' allenña a'torahuenanet atet oterraneterr:

—Te'ñapa' chorrasespa'ch Parets Puecamquëñ.

²³ Ñerra'm esesha' seḡretnataten po'chñarpa' Yomporpa'cho'ña o' peretner. Ñerra'm esesha'ña ama seḡretnataten po'chñarpa' Yomporpa'cho'ña ama peretneñe.

Allempo Tomás'pa' entapuenan ñaña Jesús o' tanterra

²⁴ Pueyochresha'ña Tomás ñeñt otenet Epanesha' ñaña'pa' ama allo'tsenayaye all apchenet allempo huena Jesús.

²⁵ Ñapa' ataña serrpare'tater po'potantañ ñeñt parro yochreshatsocmuet, ñeñt'pa' atet ochet:

—Yapa' o'ca'ye yenterña Yepartseshar.

Ñaña'pa' cha otanet:

—Napa' ñerra'm amach nentoñe pot all patet clavo, ñerra'm amach cho na'ḡlloñe e'ñe na notot all patet, amach cho neno not pueḡotoḡ all enetpa' amate' errotenot name'ñaso.

²⁶ Allempoña posocmaterrpa' pueyochresha'ñapa' alla apcherreterr o'pono. Allempo'pa' allo'tsen ñaña Tomás. Ama't yetarrpa' e'ñe echarr ayotetuaret Jesúsñapa' all be'tosuenerr tomhuenerr e'ñe allpa' alla otuenaneterr:

—Te'ña po'ño'chpa' chosa cosherrtsa seyo'chro.

²⁷ Allempoñapa' atet otuenan Tomás:

—Pecumon not all pata'net, p̄a'p̄lle'ca'ye. Pa'p̄lla'n ñaña neṗotoṗ all enanet. Amachña čha pe'charrtatatsto peyočher čhoña p̄ame'ña.

²⁸ Allempoña Tomás'pa' atet och:

—¡Nepartseshare, te'ña po'ñočhpa' Neyomporer nepeneṗ!

²⁹ Jesús'ña'pa' alla otererr:

—Papa' čho e'ñe penterren ñeñto'maraña te'pa' p̄ame'ñenna. Tarraña elloña añ atarr cosheñtso'tsen ñeñt ama't ama čho entennopa' ame'ñennet.

Añ libropa' añecop anaret ñeñtcha' yame'ñatene'

³⁰ Po'ñočh shonte' po'poñečno ñeñt atet gatyesan Jesús pueyochresha' po'partsoña. Ñeñt'pa' ama aquellcareteyaye añ libro.

³¹ Allpon ñeñt aquellcarettatsa arr libro ñeñt'pa' añecop anaret ñeñtcha' same'ñate' po'ñočh Jesús'pa' ñeñt Cristotets, ña po'ñočh Yompor Puechemer. Tarro'mar e'ñe same'ñeñoča Cristo sañapa' corretsasach tayoteñ e'ñe erponañohuen.

21

Allempo Jesús'pa' orrterrana cančherrsheña pueyochresha'

¹ Allempoña Jesús'pa' orrterrannet pueyochresha' e'ñe sa'patopño Tiberiaso. Allpa' atet orrterrannet:

² Ñehua, allempo shontenet allpa' allo'tsen Simón Pedro ñaña Tomás ñeñt otenet Epanesha' ñaña Natanael ñeñt cano'marnesha' e'ñe allara Galileo. Ñaña allo'tsen Zebedeo puechemeresha' ñaña allo'tsen po'poñ epsheña pueyochresha'.

³ Simón'ña Pedropa' atet otanet:

—Napa' o'ch neterrayena'.

Po'potantañečno'pa'čho'ña atet ochet:

—Yapa'čho'ña o'ch yocṗ.

Allempoñapa' ahuanmuet a'tačha'toset noñto. Tarraña ama't arepenetañ terrayatsetpa' amaña es rromueneto.

⁴ Allempoña o' puetarenmoch Jesús'ña'pa' tomhuen pueme'taro. Tarraña pueyochresha'čno'ña'pa' ama esesha' cheme'tapaye.

⁵ Jesús'ña'pa' atet otosanet:

—Neyochreneshacha' ¿ama't eñalleña secacar ñeñtcha' serra'muen?

—Ñeñt'ña'pa' atet ochet:

—Amaca'ye eñalle.

⁶ Ñaña'pa' atet oterranneterr:

—Sehuapore't seterraya noñt po'cohuenrot allpa' serrmue'chca'ye.

Atet otanetpa' atetčho' pet. Arepa'tcha' eshcaye' chetterreto po'terraya o' rromuet nanac aton cac — shonte'.

⁷ Allempoña pueyochresha' ñeñt atarr morrentena Jesús'pa' ñaña'pa' atet otan Pedro:

—¡Yepartsesharepa'tca'ye!

Simón'ña Pedropa' allempo eñotan Partseshepa't huetsa ñaña'pa' puema'yoreñ chorrerrana pa'shtam tarro'mar ñapa' muelle'mcota terrayen. Ñaña'pa' puema'yoreñcma omacha oño'pa' ahua' Jesúsesho.

⁸ Po'potantañečnoña pueyochresha'pa' chenta' onačherret noñto. Ñato' cien metrote' allo'tsen attoch čherret topña'so. Chetare'tnerret po'terraya e'ñe chorre' cac.

⁹ Allempo sohua'rretuerret patsopa' all entuerret quellmesh all huorten all achmarettena cac; allo'tsen ñaña pan.

¹⁰ Jesúsñapa' atet oterraneterr:

—Sacra' patantarr cac ñeññ serrmuen e'ñe errte'.

¹¹ Allempoña Simón Pedropa' alla a'terr noñño, chetan terraya noññot o' ne' masto, e'ñe chorre' atesha' cacačhno — allo'tsen ciento cincuenta tres ñeññ allpon rromuet cac. Tarraña ama't shonte' rromuet cacpa' ama rrarratano terraya.

¹² Jesúsñapa' alla oterraneterr:

—Te'pa' sonačherr o'ch serra'muen.

Pueñcha'na'teñoñtet ama't puesheñarroñteta ama esesha' otenaye: ¿Ese-shape'tña ña? tarro'mar eñoteñet po'ñočhpa' Partsesha'ca'ye.

¹³ Allempoña huapanet Jesús allame'tets, chetosan pan apa'yesosanet. Apa'yesosanet ñaña cac.

¹⁴ Ñeññpa' allempo poma'pocheñoñhua orrterrana pueyochresha' allempo tanterra rromot.

Allempo Jesúsapa' otenan Simón Pedro atarrte' morrenteña

¹⁵ Allempoña rrohua'muenet Jesúsñapa' atet otan Simón Pedro:

—Simón, Jonás puechemere, ñapa' ¿atarrte' pemorrentenna, ellote' peñtana'tueñ añenesha'?

Ñañaapa' atet otan Jesús:

—Po'ñočhca'ye Partseshacha' peñotenen napa' nemorrentenña.

Jesúsñapa' atet otererr:

—Ñeññepña' e'ñech cohuen peserrpare'tatyes allohuen ñeññ name'ñenaya; ñetpa' e'ñe atet nentenanet ñerra'mrrate' necarrneroreñollesha'.

¹⁶ Puepocheñoñapa' alla otererr:

—Simón, Jonás puechemere, ¿po'ñočha't atarr pemorrentenna?

Ñañaapa' alla otererr:

—Po'ñočh Partseshacha' e'ñe peñotenen napa' nemorrentenña.

Ñañaapa' alla otererr:

—Ñeññepña' e'ñech cohuen pecuamñpson allohuen ñeññ name'ñenaya; ñet po'ñočhpa' e'ñe atet nentenanet ñerra'mrrate' necarrnerorečhno.

¹⁷ Poma'pocheñoñapa' alla otererr:

—Simón, Jonás puechemere, ¿ama't e'ñe mamecpa pemorrentenno?

Pedroñapa' llequënana atto alla poma'pocheño otererr e'ñe ñeññara, ¿pemorrentenna't?, ñeñño'marña ñapa' otererr:

—Partseshacha' allohuenpa' e'ñepa't peñotueñ. E'ñe peñotenen napa' nemorrentenña.

Jesúsñapa' alla otererr:

—Ñeññepña' e'ñech cohuen pecuamñpson necarrnerorečhno.

¹⁸ Po'ñočhca'ye te'pa' o'ch notañ, ña allempo huepueshenña' pechorre't e'ñe ñota, all peseche'tpa' all pechopeñe'chyese't. Tarraña esempoch pepo'nme'tenpa' ñaña' o'ch attaña peyopen peque' attochña o'ch po'psheñña' pechorratenaya allempopa' anerrpetcha' all ama pesecheno.

¹⁹ Ñeññpa' tarrecop atet eñorana'tenanet allochñapa' attoch eñochet er-rotenotcha' rromuerr Pedro atto'tcha' cohuentaterran Yompor. Ñeñña otuepa' alla oterran Pedro:

—Papa' chocmuepa'ch e'ñe ñoctenen.

Atto Jesús eños Juanacop ñeññ pueyochreshar atarr muerena

²⁰ Pedroñapa' puetallerrtsa entapan o' co'ta'neñ po'psheñeñ pueyochresha' ñeññ atarr morrentena Jesús, ñeññ e'ñe anorrse't epuet ahuañmo'cha

allempto rrallme'chete't ñeñtara pueyochresha' ñeñt otaye't ahuaña: "Part-seshacha' ¿erra'tsenacpa'tña pe'ñorena ñeñtcha' pepomuerre'?"

²¹ Allempoña entañ Pedro, ñaña'p' allenta otan Jesús:

—Partseshacha' ñocoppa' ¿ama't eñalleña ñeñtcha' huapoya ña?

²² Jesúsña'p' atet otererr:

—Ñerra'm na muenate' ñapa' allach a'pa esempohuañenña nohuerrapa' ñeñtpa' e'ñe pocte' ñocop, ñeñtpa' ama p'ocpayaye. Pocoppa' añ poctetsa chocmuepa'ch p'octenen.

²³ Ñeñto'marña epa'hua añ ñoñets errañaren allo'tsa'yen masheñnesha', ñeñto'marña ñetpa' atet otanna'tyenet, ñeñt pueyochresha'pa' año'ch rromuerro ama't errponaña. Tarraña Jesús'pa' ama ateye' oteno amach rromuerro. Ñapa' añ oteñ: "Ñerra'm na muenate' ñapa' allach a'pa esempohuañenña nohuerrapa' ñeñtpa' e'ñe pocte' ñocop, amaña po'psheññecpayaye."

²⁴ Napa' ñeñten pueyochreshan ñeñten atet eñotatets atet ñeñtarana quelquë' añ. Te'ña ya allohueney yeñoteñ ñeñt atet na'potapa' ñeñtpa' e'ñe po'ño'ch atet.

²⁵ Shonteñ po'ño'ne'chno ñeñt atet p'a'yesa Jesús. Ñerra'm e'ñech yequellca'hueñ ora allohuen ñeñt atet p'a'yese't Jesús eñalleñte' shonte' nanac libros. Napa' noten shonteñte' nanac libros'pa' e'ñech epa'huañ ora errañaren añe patsro ñerra'm allponcha' yequellcañ libros. Ñeñtpa' attetepa'ch Nompore. Allohua.

ATET PA'YESA JESÚS PUEYOCHRESHA' LOS HECHOS

Atet otnerranet Jesús huapanetcha' Parets Puecamquëñ

¹ Te'pa' masheñe Teófilo, nequellcoṭpa' o'ch neserrpare'taterrperr po'pocheño. Ahuaña ñeñt nequellconañ all neñotataṭ ora allpon atet pe't Jesús allempo añe patsro'tsenmeñ. Ñaña ora allpon ye'chate't Jesús, ñeñt'pa'cho' o' notuaṭ nequellcoṭ.

² Tarraña allempoteñ a'terr pue'ntañopa' palltena o'ch notaṭ ñaña. Te' añ nequellcoṭpa' o'ch notaṭ. Tarraña ama't allempo ama a'terra' Jesús'pa' añña ñeñt pueyochresha'pa' o' otuanet atetcha' pet. E'ñe Parets Puecamquëñoṭpa' o' llesensa'huanerran pueyochresha' ñeñt acra' ña.

³ Ama't pomuero'chteño' o' rromua ahuaña, allempoñapa' o' orrterrana pueyochresha' e'ñe beṭnaṭoṭ. Ñeñto'marña ñetpa' e'ñochet e'ñe po'ño'ch añpa' ñeñtara Jesús ñeñt rromats ahuaña. Tarro'mar pa'tatsoch charramatnerr atto orrtame'tnerranet mamesha'tets. Ñaña chocma eñchete't allame'tets. Allempoña ñapa' a'poṭanet atet penaña Parets po'cohuenña atto ayochresha'ttena ña.

⁴ Allempo allo'tsenet e'ñe parro epuet pueyochresha'pa' atet otanet:

—Amach erra setatsto arroṭ, allasach arrma Jerusaléño. O'ch secueñ esempoch chaponasa ñeñt Parets Puecamquëñ. Tarro'mar Parets'pa' o' otuas o'ch mueñonas Puecamquëñ. Ñeñto'mar napa' o' na'poṭuonas Parets po'ñoñ ahuaña.

⁵ Allempopa' añña ñeñt notuas: Juanañpa' añoñña apate't oño, tarraña na tsapaṭoneṭpa' añcha'ña nechorratasa Parets Puecamquëñ. Añpa' allohua atet ot Jesús.

⁶ Po'pocheño all ap'chenet aspenṭo pa'so'cheñ Olivopen. Pueyochresha'ñapa' atet a'p'to'chet Jesús:

—Te'pa' Partseshacha' ñato' pocte' penteñ o'ch p'apaterrey ñeñtey israelne-shay yepatseñ. Allochñapa' amach esesha' poñeña yeyore'tame'tenaye.

⁷ Jesúsñapa' atet otanet:

—Ñeñt socoppa' ama pocteyaye o'ch seño'ch. Añña Yompor po'partsoteño' e'ñe eñotueñ. Ñapa' o' ne' allempoch etsotueria ora allohuen añe'chno.

⁸ Jesús'pa' alla oterranelerr:

—Añña pocte' o'ch seño'ch, ñerra'm esempoch huaponasa Parets Puecamquëñ sesho, ñach ahuamencat sepose'. Allempopa' sa'poṭoncha' neñoñ errañaren—Jerusaléño, ñaña ora Judeo, ñaña Samario, ñaña ora allohuanen pats.

Arrpa' atet perra Jesús allempo a'terr pue'ntañ

⁹ Ñeñta otuanenanetpa' allempoñapa' a'tenochayo' enonet. Añña pueyochresha' pocuanrrorteño'etpa' o' ma'natena oso. O'huañ orrta, ama't mamesha.

¹⁰ Ama't allempo o'huañ orrta Jesús, ñetpa' allo' cohuanrrortenet enonet allenet o' chenca'huanena Jesús. Allempoñapa' cohuerretset patsonetpa' alla entet epsheña yacma o' tom'cha'toset e'ñe parro. Pa'shtamuetpa' nanaco' huallama'tareret.

¹¹ Ñetñapa' atet otosanet:

—Esuañaca' galileo'marneshacha' secuanrrortenña enonet. Añ Jesús ñeñt' o' a'terr entopa' huerrerrcha' po'pocheño atet senteñ o' ahuerrento.

¹² Allempoña o' a'ten Jesús'pa' añña pueyochresha'pa' o' ahuanerret alla Jerusaléño. O' onacherret Olivopnot' allo' a'terr Jesús. Tarro'mar ñeñt' aspenet Olivopenpa' allame'ttso'tsena Jerusaléño't, Olivopnotpa' ñato' allo'tsente' paterr kilómetro attoch ye'chap Jerusaléño.

¹³ O'ña 'chacherret anetso Jerusaléño all pocollo allecma a'puenetpa' o' be'toscha'tuerret, a'tapuet eno all tama a'yohuen bat. Allñapa' ap'chet allo'huenet. Ñeñt' ap'chatsa ñeñt'pa' añe'chno: Pedro, ñaña Jacobo*, ñaña Juan, ñaña Andrés, ñaña Felipe, ñaña Tomás, ñaña Bartolomé, ñaña Mateo, ñaña Jacobo ñeñt' Alfeo puechemer, ñaña Simón ñeñt' cananistanesha' ñeñt' atarr 'torratset' pa'netsrecop, ñaña allo'tsen Judas ñeñt' Jacobo pa'mo'nasheñ.

¹⁴ Allña ap'chenetpa' e'ñe ñeñta nete't pueyo'chro cohuen ñoñets. Allo'tpa' e'ñe poma'yo'chreño'tet cohuenpa' 'chocma ma'yochete't. Allo'tsen ñaña coy-aneshachno, ama't Jesús pachor María, ñaña pa'mo'nasheñnesha' allo'tsenet ñamet.

Atet pa Jesús puellsensarnesha' allempo net Matías ñeñt'cha' epuet a'po'ñoñet Yompor po'ñoñ

¹⁵ Parrochña Pedropa' o' 'tomos o'ch serrpare'tatanet. Allempopa' ñato' allo'tsente' ciento veinte acheñenesha'. Allempoñapa' otanet:

¹⁶ —O'ch masheñneshacha' notas: Po'ño'ch o' etsotua Yompor po'ñoñ ñeñt' anaret' ahua'toteñ. Tarro'mar Parets Puecamquëño't eñose't David. Ama't ahua'tpa' ote't David atet'cha' pa Judasoñ ñeñt' anmue' ñeñt' rromue' Jesús. Ñehua, pocte'ña'cho' o'ch etsota Yompor po'ñoñ.

¹⁷ Judasoñpa' ahuaña allempo allo'tseney e'ñe parro ñapa'cho'ña acreñña Jesús o'ch pueyochresha' pe'.

¹⁸⁻¹⁹ Ñehua, Judasoñpa' tsa'chet allpon quelle atto poman Jesús. Tarraña ñeñt' quellepa' allo rañtet pats. Tarraña allempo shora'nom Judasoñ 'chap patsopa' potsa'nmos pa't, o' yo'pahua ora. Allempoña e'mare'ch allohuen jerusaléño'marnesha' atto Judasoñpa' o' rroma. Añña pats ñeñt' rañtet Judasoñ po'çllayoro'tpa' o' sochet Acéldama. Añ ñoñets ñeñt' otenet Acéldama ya yeñoño yoteñ Errasatsotnanen.

²⁰ Añña ñeñt' quellquë't ahua't David ñeñt'pa' anuaretta añ libro Salmos. Añña ñeñt' atet oteney:

All ye'chena, puenasepa'ch amara't, all amach eseshaye' ye'chatstatso. Ñeñt' po'taruas pa' attoch sher'baneñ Yomporpa' tarraña ñeñt'pa' apanepa'ch po'psheñeñ. Atet oten añ libro Salmos.

²¹⁻²² Alla o'terraneterr Pedro:

—Ñeñto'mar te'pa' añ poctetsa o'ch ye'ñ po'psheñeñ ñeñt'cha' parro ya'pota atto Jesús'pa' o' tanerra. O'ch ye'ner puesheñarr ñeñt' 'chocma parro yechopeñe'che't ahuaña allempo arro'tsenmeñ Yepartseshar Jesús. O'ch ye'ner puesheñarr ñeñt' 'chocma yoctaye't ama't allempoteñ Juanañpa' apatapan Jesús tarremphua allempo a'terr Jesús.

²³ Allempoñapa' o' neñet epsheña, puesheñarr añ pa'so'cheñ José Justo, ñeñt'ara José oteñet ñaña Barsabás. Po'psheñeñpa' añ pa'so'cheñ Matías.

²⁴ Allempoñapa' o' ma'yochet. Puema'yocheño'tetpa' atet otet:

—Yompore, ñeñte'p entene' allohueney yeyo'cher. Te'pa' o'ch peñotatet erra'tsente' pemnen pa ñeñt'cha' ello alla sherberrets 'pocop atet ñerra'm pellsensar.

* **1:13** Jacobopa' ñeñt'ara ñeñt' sochenet Santiago.

²⁵ Judasoñpa' o' sa'nmuey o' ahuo' all ñeñt' o'patatarettena ña e'ñe ña po'chñarot'.

²⁶ Allempoñapa' yellsheñe'chet e'ñe ñet po'suertoť attoch eñochet erra'tsente' muenenña Yompor ñeñt'cha' alla sherberrayerr. Allempoña yellsheñe'chenet aña orrtatsa Matías ñeñt'epa't muenenña Yompor. Allempoteñ Matíaspa' ahuo' aguëñ po'poñechno ñeñt' charrasheña puechetsa paterr ñeñt' puellsensar Jesús.

2

Allempo chapanet Parets Puecamquëñ

¹ Allempoñapa' o' meterrerr allponmat amnaroch charramat, o' chap allempo coshena judionesha' ñeñt' otenet Pentecostepo. Allempoña ñetpa' alla apcherretterr e'ñe parro ñeñt'et ame'ñetset.

² Allempoñapa' machayota e'mapuet atet ñerra'm huomenquësha' ma'more'tos entot. Allohuenet ñeñt' allo'tsa'yen pocollo e'ñe e'mhuet.

³ Añña ñeñt'et apchetsetpa' o' huapanet atet ñerra'm tso'. Huapapa' cha chapa'rrtosa po'huorter ñesheto. Chapyesanet e'ñe puesheña'ttsocmuet atet ñerra'm huorte'. Añña huorte'pa' alla a'prra'ta ñesheto.

⁴ Añña ñeñt' chapyesahuet e'ñe puesheña'ttsocmuetpa' añepa't Parets Puecamquëñ ñeñt'cha' chorrahuet. Allempoñapa' allorocma eñosyaset po'poñ ñoñtso ñeñt' ama eñosete'te ahuaña. Añña Parets Puecamquëñpa' ahuo' eñoratyasanet po'poñe'ttsocma attoch serrpare'tachet pa'namen acheñ e'ñe ñet po'ñoñeto.

⁵ Allempo Jerusaléñopa' allo'tsa'yen shonte' judionesha' ñeñt' huachetsa pa'namen anetsot. Ñetpa' cohuen cotape'chete't Partsocop.

⁶ Allempoña e'marettet cha ano'tenetpa' o' matrra'tosa shonte' pa'namen acheñenesha' o'ch enteñeta' ñeñt' ano'tatsets. Chapuet all ano'tatsenetpa' o' entoset ñeñt' ame'ñetsapa' año eñosyenet e'ñe ñet po'ñoñeto. Allempoñapa' atta cohuanrrortoset.

⁷ Puemoññe'teñoťetpa' atet otyeset:

—Ta', errotente'ca' e'myennayetña yeñoñ. Yapa' yeñotenanet ñetpa' galileo'marnesheta.

⁸ Ama't po'poñ ñeñt' yenyoma' ñoñetspa' e'mueñet. Allohueneypa' o' e'ñe ye'myes atet eñosyenet e'ñe cohuen yeñoño.

⁹ Allempopa' alla otanna'tyerretterr:

—Yapa' yeñen po'poñe'ttsocma ñoñets tarro'mar yapa' pa'namen anetsot yehuena. Allot anetsrot yehuapyena ñeñt'pa' pa'namen pa'so'chñechno—ama't Partioť ñaña Medioť ñaña Elamoť ñaña Mesopotamioť, Judeoť, Capadocioť, Pontoť, Asioť,

¹⁰ Frigioť, Panfilioť, Egiptoť ñaña Africo'maroť, alla allame'tets Cireneo. Ñaña ñeñt' huetsa Romoť ñeñt' chocma a'puetsa arr.

¹¹ Ama't ñaña judionesha' shonte', ñaña ama't ñeñt' ame'ñaten judionesha'. Ñaña ñeñt' huetsa Cretoť ñaña Arabioť. Ya te'pa' o' e'ñe ye'myes e'ñe yocma yeñoño atet aye'chochtateññañet Parets po'cohuenña e'ñe yeñoño.

¹² Otanna'tyerretterr alla:

—Ta'm, ñetpa' errotenette'ca'yete'. Yapa' ama't ahuatapa' ama yentareña galileo'marnesha'pa' o'ch eñosyesña e'ñe cohuen yeñoño. Ta', esocopte'.

¹³ Añña po'potantañ acheñenesha'pa' o' achm'are'tanet atet otarettet:

—Tarro'mar ottenetña' choca'ye posa'tyenet.

Atto Pedropa' serrpare'tatan acheñenesha'

14 Añña Pedropa' tanta o' tom e'ñe alla epuet po'poñechno yochreshats. Eñora huomenc, otanet:

—Masheñe judioneshacha' ñaña allohuenes ñeñtes arro'tsenes Jerusaléño, te' o'ch notas: Se'mñoten o'ch neñotatas atfoť atet yepena ya.

15 Yapa' ama yeposañoťeye' o' yo'notařsa'mueno atet soteney sa, řarro'mar ama čhoye' o' yarepeno orrats.

16 Añña ñeñť sentyen te' ñeñťpa' añ o' etsota ñeñť atet ote't Joel ñeñť a'mťaye't Yompor po'ñoñ ahuat. Añña ñeñť quellquē't ahuat Joel:

17 Añ atet oteney Yompor: Allempoch mellapoterrmocha, atetcha' perra, o'ch nenanet Necamquēñ pueyočhreto, allohuen arromñaťenesha' o'ch nechorratanet Necamquēñ. Añña pemřeneñpa' ñetcha' a'poterret neñoñ ñeñťcha' neñotatuanet, ama't ñaña coyaneshačhno a'poterrnancha' neñoñ. Añña ñeñť huepueshare' čhocmach es norrtatyesanet ñeñťcha' entyesonet neshoť. Añña ñeñť po'nmeneshare'pa' es norrtatyesanetcha' puečhopoñeto.

18 Ama't allohuen ñeñť nesherbene', ñaña ama't coyaneshačhno nenuanetcha' Necamquēñ pueyočhreto atfoch a'poťonet neñoñ.

19 Allempoña enopa' o'ch nentatyesanet ñeñť ama't ahuatapa' ama puentareto. Patsopa'čho'ña o'ch norrtatyesanet ñeñťcha' eñotaterrahuet. Quellareñťsoťpa' norrtatcha' errasats. Puetomañřsanna'teñoťet pa'netserpa' orrterrach tso' erracmañen, chepoterrcha' amos ñaña errařaren.

20 Ama't ñeñť yečhoyo'tamřpene' te' allempopa' puenaserrach checmete'. Arrorřpa'čho'ña allempopa' tsama'tterrach atet ñerra'mrrate' errasats. Atetcha' yoročhterra allempoch huerrmocha Yompor.

21 Allempopa' ama't erra'tsena čhore'te' Yompor pueyočhrocmañen atfoch a'queshřachpa', Yomporñapa' a'queshřatanetcha'. Arrpa' allohua atet quellquē't ahuat Joel.

22 Añpa' ñeñťara alla oterraneterr Pedro:

—O'ch masheñe judioneshacha' noterršerr: Sapa' señoťeñ ahuañapa' orrte't Jesús ñeñť nazareto'marnesha'. Ñapa' čhocma orrtatonase't po'partsoteña, ñaña čhocma orrtatyesonase't ñeñť ama sentare ñeñťcha' señoťate' ñapa'čho'ña nanac Parets. Pompor apuene'ña po'partsoña atfoch señoťoñ Puechemer ña nanac Parets.

23 Añña ñeñťara Jesús sañapa' o' sepomhuer atfoch corso'tamřřset. Sañapa' o' sař po'poñ acheñenesha' ñeñť atpare'tene' Yompor atfoch ñetpa' o'ch muetset. Atet o' seřohua, Yomporpa' ahuatoteñ eñotuase't atetcha' seřa, řarro'mar atet muene't ña.

24 Tarraña ama't rromuapa' Pomporpa' o' alla tantater. Tarro'mar amaťe' erroťeno te'pa' alla a'po rromue'.

25 Ama't atet ote't David ahuat, atet ñerra'm Jesús eñoratse't. Atet ote't:

Napa' neñoťeñ Nompor čhocma allo'tsenen parro epan. Ñach nanac ahua-mencať nepe' atfoch amach neñcha'to.

26 Ñeñťo'marña nanac nocshena neyočhro, nocsheñeshocma neñen. Ama't nerromapa' neñoťeñ amach alla na'po rromue'.

27 Napa' neñoťeñ amach a'ypo'ñoño necamquēñ alla o'pono. Nomporpa' amach mueno o'ch puetsohua alla nechets řarro'mar ñapa' entenen e'ñe cohuenare' es nepen ñocop.

28 Añcha'ña o'ch entatterren atfoch yocrrerra e'ñe cohuen. Poparrocmateñoť epan ñapa' ñach nocshatterre' nanac. Allohua atet ote't David ahuat atet ñerra'm Jesús eñostse't.

29 Allempopa' alla oterraneterr Pedro:

—O'ch masheñneshacha' noterrser, añ poctetsa e'ñe eñotochen o'ch notas: Yatañ David ahuatpa' rroma. Rromapa' pampuet. All pampuetpa' yenteñ ama't teme'ttsen. Ñeñto'mar yeñoteñ ahuat allempo ote't añ ñoñetspa' ama añecpaye' serrpare'te'te e'ñe ñocop, añecopña serrpare'te't Jesúsocop.

30-31 Tarro'mar David ñapa' ña a'mtaye't ahuat Yompore po'ñoñ. Ñapa' e'ñe eñotue't atetcha' pa ñeñtcha' Cristotats allempoch chap añe patsro. Ñeñto'mar ama't ahuatoteñpa' eñose't atetcha' tanterra ñeñtcha' Cristotats. Pomporpa' amach a'ypo'ñano Puechemer o'pono. Amach muenatoñe o'ch puetsohua po'chets. Yomporepa' ama't ahuatpa' atet otan David o'ch noñ puesheñarr po'mrenño't ñeñtcha' añcha'tarettatsa esempo. Davidpa' eñotane't Yompore ñapa' ama pueno po'ñoñ.

32 Te'ña yapa' o' yeñch Yomporepa' o' tantaterran Puechemer Jesús.

33 Te'ña ñapa' e'ñe allo'tsen epuet Pompor Parets all partsoten ento. Pomporpa' o' e'ñe aphue Puecamquëñ. Te'ñaapa' añ ñeñtara Puecamquëñ o' chorratya yañña atet oterrey ahuaña. Ñeñto'marña o' orrtonaya atet sentyees ñorra', ñaña atet se'myes cohuen ñoñets e'ñe sa señoño.

34 Ñeñto'marña yeñoteñ ama añecpaye' serrpare'te'te David e'ñe ñocop, tarro'mar ñapa' rromapa' ama tanterro allo'tpa' ama a'terro ento atet ñerra'm Jesús. Ñaña po'pocheño ahuatpa' eñose't David, atto' ote't:

Yompore Paretspa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets): “Te'pa' o'ch panorruerr arr necohuenrot allcha' pecohuentapreterrna.

35 Attochña ama't ñeñt pe'moñe'tene' napa' o'ch e'ñe name'ñatuerranet allochñapa' o'ch atet perret ñeñt pemnen pa.” Añpa' allohua atet ote't David ahuat.

36 Allempoñapa' alla oterraneterr Pedro:

—Sapa' israelena'tares. Ñeñto'marña señoche'pa'ch e'ñe eñotochen atto Yompore Parets o' nan Puechemer Jesús. Ñapa' ña Partseshatets, ñeñtara Cristotats. Añ ñeñt Jesús sañapa' o' secorso'tam'psach. Añpa' ñeñta allohua serrpare'tatanet Pedro.

37 Allempoñapa' ñeñt matrra'tatsa allpa' o' chap Janet pueyo'chro añ ñoñets. Nanac llecanrrortet. Atet ochet Pedro ñaña po'potantañe'chno Jesús puellsensar. E'ñe puellquëño'tet atet otet:

—Masheñneshacha', erro'tenuachca'ye yeperraña te'.

38 Pedroñapa' atet otanet:

—Te'pa' añña poctetsa ñeñtcha' seperra allohuenes. Te' sellquëño't o'ch soctape'cherr ello cohuen Yomporecop. Allochñapa' Yomporepa' peretna'huernascha' so'chñar. E'ñe same'ñeño't Jesucristo añ pocte'te' o'ch sapataretterra Partsocop. Allochñapa' Paretspa' chorraterr'sach Puecamquëñ.

39 Ñeñtapa' pocte' atetcha' sepa, tarro'mar atet oterrey Jesús o'ch chorratuerrya e'ñe puesheña'ttsoy Puecamquëñ, allohueney ñeñtey o' hua'ñerrey Yeyompore Parets o'ch yame'ñera. Ñaña o'ch chorratuonasa ama't sa sechemerasha' Puecamquëñ, ñaña allohuen ama't ñeñt ella'paro'tsa'yenet.

40 Allempoñapa' o' alla serrpare'taterraneterr attoch otanet pa'namen ñoñets. Attoch co'tape'chatanetpa' atet otanet:

—Amach soctape'chatsto atet co'tape'chen po'poñ acheñenesha' ñeñt ama ame'ñetso. Attotcha' sequeshperrach.

⁴¹ Allempoña allohuen ñeñt ame'ñaya Pedro atet otanetpa' o' apatarettet. Allempopa' ñato' allpon ame'ñatsa ma'pa mil acheñenesha'. Cha shontena ñeñt ame'ñatsa.

⁴² Allempoteñ ñeñt ame'ñatsapa' e'ñe ma'yoçhrenet atet yeçhatanete't Jesús puellsensar. Nanac cohuen entanna'tete't allecma apçhete't parro. Puey-erpueñoŕet Jesús o' toma'ntatet pan atet ñerra'm Jesús po'chets. Nanac ma'yoçhete't e'ñe parro.

Atet corre't ahuat ñeñt ame'ñatse't

⁴³ Ñeñt Jesús puellsensarpa' orrtatanete't shonte' pa'namen ñeñt ama puentareto, orrtatanete't partsoteñets attoch eñoçhet añmapa' Partsepa't. Ñeñto'marña allohuen acheñenesha'pa' nanac mecha'na'tete't.

⁴⁴ Ñeñt ame'ñatsapa' çhocma apçhete't parro, pocsheñoŕ apanna'tyesete't ñeñt es palltatse't.

⁴⁵ O'ch venda'yesete't ñeñt eçhyenet ñaña allpon ñeñt o'patyesete't ñeñtpa'çho'ña venda'yesete't. Allpon gana'yesete'tpa' o'ch apanna'tyesete't ñerra'm esesha' es palltatse't.

⁴⁶ Pate'tets yetpa' o'ch ahuanenet e'ñe parro Parets pa'paclo. Errotenopa' pueyerpueñoŕet Jesús o'ch toma'ntachete't pan atet ñerra'm Jesús po'chets. Ñaña çhocmach rrallme'chapretanna'tete't pa'pacleto. E'ñe pocsheñeshet pueyoçhretopa' çhocmach rrallme'çhete't. Allempopa' nanac amueraañterret.

⁴⁷ Ñaña çhocmach aye'choçhtatoñete't Yompor. Allohuen acheñenesha'pa' e'ñe cohuen entapretanete't ñeñt atet pete't. Pate'tets yet Yomporo'tpa' çhocmach ame'ñachete't po'poñeçhno acheñenesha'. Atteñapa' o' çha shonta ñeñtcha' a'qeshpatarettatsa.

3

Atto Pedropa' a'crraterran ñeñt echarrtetsa

¹ Pamtarrpa' çhap allempocma ma'yoçhenet Parets pa'paclo, atet ñerra'm allempopa' ñato' o' ellerrenmoch. Pedroñapa' ahuo' Parets pa'paclo epuet Juan, o'ch ma'yoçhose't all.

² O'ña çhapuet allpa' a'tapose't Parets pa'paclo. Allempoña a'tapmochet allpa', allempocma huapachet ñaña puesheñarr ñeñt echarrtetsa pa'tcoŕ, ama eshcaye' chope'cheno. Allempoteñ eñalleta ama chope'cheno. Chocmach pamo'tsesha'pa' o'ch aneñet allecma be'tenet Parets pa'paclo. O'ch na'nmet alloŕtecma be'tosete't ñeñt otete't Ama Macohueno. Allñapa' allcha' enamare'tyenana quelle ñeñt be'tostse't Parets pa'paclo.

³ Ñeñtña echarrtetsapa' entapan Pedro epuet Juan. Ñetpa'çho'ña be'tosmochet Parets pa'paclo. Ñañaapa' enamapanet quelle.

⁴ Pedroñapa' alla o'chet cohue' epuet Juan. Allempoña Pedropa' atet otan ñeñt ama chope'chetso:

—Ñehua, pecua'y alla.

⁵ Ñeñtña echarrtetsapa' alla e'ñe cohuanet, ñapa' otapañte' o'ch apet quelle.

⁶ Tarraña Pedroñapa' atet och:

—Napa' ama necheno quelle, tarraña ñeñt nechenpa' ñeñtcha'ña napaŕ. O'ch notaŕ, e'ñe po'partsoteñoŕ Jesucristo ñeñt nazareto'marnesha' o'ch notaŕ, peçhpe'cherrepa'.

⁷ Pedroñapa' çhete' potot po'cohuenro'tpa' o' echañch. Allempocma corra'huena pa'tcoŕ, ama't all meya'nen yetacpa' o' corra'huena poctacma.

⁸ Corra'huetsa pa'tco'tpa' pocsheñoŕpa' omacha enone't, o'ten e'ñe cohuen. Allempoñapa' chopeñe'chen. Ama't all chopeñe'chen omachme'tetsa all

aye'chochtatenan Yompor. Atteñapa' be'tos Parets pa'paclo epuet Pedro ñaña Juan.

⁹ Allohuen acheñenesha' ñeññ allo'tsa'yen, ñetpa'cho' enteñet atto pa'ye'chochtateñesha' Yompor all chopeñe'chen.

¹⁰ Ñetpa' cheme'teñet añmapa' ñeññara ñeññ anorrtese't allotecma be'tosete't Parets pa'paclo, ñeññ otenet Ama Macohueno, allecma enamare'te't quelle. Ñetñapa' atta cohuanrrorteñet.

Atto Pedropa' serrpare'tatan acheñenesha' Parets pa'paclo

¹¹ Añña ñeññ correrrtsapa' ama a'rroyen enterrano Pedro ñaña Juan. Allempoña all tomchenet all oteñet Salomón Popellrraro. Acheñenesha' po'yorñotetpa' matrra'tet allo'tsen Pedro ñaña Juan ñaña ñeññ a'crraterr Pedro.

¹² Allempoña cha'cha'tet all tomchenetpa', añña Pedropa' otapanet, atet ot: O'ch masheñe israelneshacha' notas, eso'marte' secuanrrortene. Chate' sotenapañ e'ñete' ya yehuamenco't yechope'chater, amapa' cha'te' sotenapañ e'ñete' ya, ya'cohuentateñot' yechope'chater. Añmapa' ama atteyaye.

¹³ Añcha'ña o'ch notas: Añmapa' Yompor orrtatene' ñeññ o' sentua. Añña Yomporpa' ñeññara Po'yomporer pe't ama't Abraham ñaña Isaac ñaña Jacob, ñaña allohuen yatañneshañ. Yomporpa' e'ñe pocte' eñch o'ch cohuentatan Puechemer Jesús. Ñeñño'marña o' orrtatonas ñeññ o' sentua. Tarraña sa ñeññara Jesúsapa' o' sepomhue. Ama't allempo Pilatopa' pocte' enteñeñ o'ch a'rroyereñ, tarraña sañapa' cha sa'nasotañpesya allohuenes.

¹⁴ Ama't ñeññ nanac Parets, ñaña ama't ñeññ e'ñe pocte' es pets, sañapa' cha sa'nasotañpesya. Allempo Pilatopa' ama't mueneñ o'ch a'rroyer, sañapa' añña sanañ ñeññ amtsañ ñeññcha' a'rroyonaset.

¹⁵ Ñaña'ña chaña semtsach ñeññ alloch e'ñe yocrra. Tarraña ama't muetseta'ña' añña Pomporpa' o' alla tantater. Tarro'mar yapa' yeñoteñ yapa' yenter ama't allempo tantuerra.

¹⁶ Ya yeyemteñot' e'ñe Jesús o' correrra ñeññ ama chope'chetso ñorra'. Ama't sapa' seño'teñ atto ahuañapa' ama chope'che'te. Tarraña te'pa' o' senter o' chopeñe'cherr. Yapa' o' yame'ñera Jesús ñeññ o' a'crrataterran ñeññ echarrtatse't ahuaña. Te'ña ama't sapa' o' sentuer allohuenes.

¹⁷ Te'ña masheñneshacha' napa' neñotenes ahuaña sapa' ama es se'chapoyo seyo'chro allempo semtsach Jesús. Ama't ñeññ sa'm'cha'tare'ternesha' ama es chapahueto pueyo'chreto ñamet.

¹⁸ Tarraña ñeññ atet se'pohua te'pa' o' etsoterra Yompor po'ñoñ. Tarro'mar allohuen ñeññ a'm'taye't Yompor po'ñoñpa' attecma otete't, ñeññcha' Cristotats Partsocoppa' muero'chtachetcha' esempo. Ñeñño'marña te'pa' o' etsota Yompor po'ñoñ ñeññ aquellcare't.

¹⁹ Ñeñño'marña te'pa' añ poctetsa e'ñe sa sellquëño'tpa' o'ch soctape'cherr ello cohuen Yomporecop. O'ch sesuanom ñeññ ahua'toteñ socta'ña. Attotcha' Yomporpa' e'shohuerrnascha' so'chñar.

²⁰ Attochña separrocmateñot' epas Yomporpa' socsherrach seyo'chro. Ñaña Yomporpa' o'ch alla mueñernaserr Cristo Jesús ñeññ anarettatsa ñaña socop.

²¹ Tarraña te'pa' e'ñe pocte' allach pue'ntaño tarremphua esempohuañencha' a'pocataretetua ora allohuen ñeññ atet eñose't Yompor ahua't. Ama't ahua't Yomporpa' eñorana'tane't acheñ ñeññ e'ñe pocte' ente't Parets ñeññcha' a'm'te' po'ñoñ, ñeññcha' etsoterrtsa esempohuañen.

²² Añmapa' ñeñt atet ote't ahuat Moisés: "Yompor Paretspa' orrtatonascha' ñeñtcha' a'pote' po'ñoñ, ñeñtara sa samo'tsna'tarotpa' orrtatonascha', atet ñerra'm na, Yomporpa' o' orrtaterren na namo'tsna'tarneshacop. Tarraña socoppa' añ poctetsa chocmach se'mñoter errottencha' oterres.

²³ Tarraña ñerra'm esesha' amach e'mñoterraye ñeñtcha' orrterrtsa, ñeñña acheñerpa' ahuo'ch a'chencataretterrach. Pamo'tsesha'ña israelnesha'pa' amach allo'na entneñeto." Añpa' allohua atet ote't Moisés ahuat.

²⁴ Alla oterrer Pedro:

—Ama't allohuen ñeñt a'mtaye't Yompor po'ñoñ ahuatpa', eñosete't ñeñt o' etsotuerra te'. Ama't Samuel ñeñt a'mtaye't Yompor po'ñoñ ahuat, ñaña allohuen ñeñt allempoteñ a'mtaye't Yompor po'ñoñ, añña eñosete't ñeñt o' etsotuerra te'.

²⁵ Añña ñeñt a'mtaye't Yompor po'ñoñ ahuatpa' ñeñtara samo'tsna'tar sepe't ama't sa. Atet Yompor a'pocatan ñoñets ahuat satañneshacoppa' añ ñeñtara ñoñets attecma a'pocatareta ñaña socop. Atet ñerra'm ahuat atet otan Yompor sato' Abraham: "Ñeñt puesheñarrot penrenñotpa' norrtatanetcha' ñeñtcha' ama't allohuen pa'namen acheñenesha'pa' coshaprechetcha'."

²⁶ Yomporpa' o' orrtatonay Puechemer o' mueñonay ñeñtey judioneshay yanom. Allochñapa' ña o'ch coshaterrey nanac atet ñerra'm allempo o' cotape'chaterrey e'ñe cohuen, ñaña allempoteñ o' yequechpa'huerr ñeñt ama pocteyaye Yomporecop.

4

Allempo anmet Pedro ñaña Juan allo'tsa'yen a'mcha'taretnesha'

¹ Allempoña serrpare'tatenanet Pedro epuet Juanpa' machayota huacha'toña a'mcha'taretnesha'. O' huapa cornanesha', huapa ñaña guardia pa'mcha'tareter ñeñt cohuanpene' Parets pa'paquell. O' huapoña ñaña saduceonesha' ñeñt otets e'ñe ñet poctapñotpa' amach errottenot yetanterro.

² O' huacha'tetpa' cha e'moñetotet, tarro'mar Pedro ñaña Juanpa' añ serrpare'tatenan acheñenesha' atto ñerra'm e'ñe yame'ñera Cristo ama't yerroma, yame'ñeñotpa' yetanerrach.

³ Pa'tsrre'mueñotetpa' o' armmarettet epsheño'maret, abe'tarettet cárcel. Allempopa' o' ellerren ñeñto'marña tsapa'tach a'p'to'tyesarettet errottenotte' serrpare'tenet atet.

⁴ Tarraña ama't atet a'parettetpa' añña ñeñt e'mue' atet serrpare'tatanetpa' shonte' ame'ñyet. Allempoña ñeñt ame'ñetsa ahuañohuenpa' o' chap allempo amnaroch mil ñeñt ame'ñatsa.

⁵ Tsapañapa' o' apcha amcha'taretnesha' ama't ñaña ñeñt pompornesha' penet ama't ñaña ñeñt etsotene' ñoñets ñeñt atet anaret. Ñeñtpa' arr apchet e'ñe alla Jerusaléño.

⁶ Allempopa' allo'tsen ñaña cornesha' ñeñt nanac amcha'tarete ñeñt pa'so'cheñ Anás. Allo'tsen ñaña Caifás, ñaña Juan, ñaña Alejandro ñaña po'poñechno amcha'taretnesha' ñeñt e'ñe pamo'tsna'tarecma cornesha' ñeñt nanac amcha'tarete.

⁷ Allempoña e'ñe apcha'huetpa' huapachet Pedro ñaña Juan e'ñe all apchena amcha'taretnesha'. Allempoñapa' a'p'to'tarettet epsheño'maret. Atet otanet amcha'tarete:

—Sapa' ¿sesho'tña po'huamencot o' sa'crraterña acheñ? ¿Esesha'tña sa-puene'ña llesens attot atet sepena?

⁸ Allempoña Pedro e'ñe ahuamencat puepeñoť Parets Puecamquëña' atet otanet:

—Amicha'taretneshacha' ñaña ñeñtes pompornesha' penet, te'pa' o'ch notas:

⁹ Sapa' atto sa'pťo'teney errotenette' o' yeņa ya cohuen añecop ñeñť mue-rochtetsa, ñaña atto sa'pťo'teney errotenotte' o' ya'crrater,

¹⁰ ñehua, te'pa' o'ch se'mñoten attoch neñotatas sa ama't ñaña allo-huen israelnesha'. E'ñe añ Jesucristo ñeñť nazareto'marnesha', ñeñťña ña po'huamencot te'pa' arr ten e'ñe huomech, ñeñť ahuaña čha echarrtena. Añ ñeñťara Jesús sañapa' čhaña secorso'tamĭpes attoch rroma. Tarraña Pomporpa' o' tantater ama't rroma.

¹¹ Sapa' čha sottena atet ñerra'm acheñ ñeñť tomatene' pocoll. Ñeñťña acheñ ñeñť tomatene' pocollpa' čha huapore'tan mapue' ñeñť nanac sher-bets, tarro'mar ama es čapahueto pueyočhro. Tarraña Jesús'pa' ama't atteñ ñerra'm mapue' ñeñť ahupore'tareť ñeñťara Jesús ñeñťña nanac sherbets atet ñerra'm mapue' alloch orratet pocoll nanac echarr.

¹² Po'psheñeña' ama eñalle alloch yequeshperra, tarro'mar ama eñalle po'psheñeñ ñeñť anareť ñeñťcha' yečhore't attoch o'ch a'queshpatey. Ama't ora erracmañen añe patsro ama eñalle attoch yequeshperra, ñapťaña Jesús. Ñeñťpa' allohua atet otanet Pedro.

¹³ Añña Pedro ñaña Juanpa' ama puemicha'nañoťeye' eñoseto. Ama't mame-shapa' ama mecha'teneto. Allempoña amicha'taretečhnopa' o' eñochet ama puemicha'nañoťeye' eñenetopa' ñetpa' atet otet:

—Errotenotuaca'ye eñenetña atet. Yapa' yeñotenanet ñetpa' ama ayčhatareteteto attoch eñotet quelled huomenc. Ñetpa' atteta ñerra'm po'potantañ acheñenesha' ñeñť ama tama es eñotetso. Errotenotuañaca'ye eñenetña atet ñerra'm ayčhataretet.

Allempoñapa' o' čhapanet pueyočhro atto Pedro ñaña Juanpa' ahuaña čhocma chopeñe'cheť epuet Jesús.

¹⁴ Añña ñeñť correrrtsapa' ñapa'čho' e'ñe alla ten allame'tets. Ñeñťo'marña amicha'taretnesha'pa' ama errotenoť che'ptare'taneto.

¹⁵ Allempoñapa' mueñerranet a'yenet. Allempoña amicha'taretnesha'pa' serrpare'tatanna'tet e'ñe ñañeñeta.

¹⁶ Atet otanna'tyeset:

—Errotenuachñaca' yeņanetña te'te'. Ama't arr ora Jerusaléñopa' o' e'ñe eñotuarettet atto ñetpa' orrtatet ñeñť ama't yapa' ama yentare. Ñeñťo'marña te' yapa' amach erroteno ya'nasochoña', e'ñe po'ñočh atet.

¹⁷ Tarraña ama'tcha' ama erroť yeņanetopa' te'pa' añ poctetsa o'ch yeche'ptare'tyesanet o'ch yotanet amach allo'na serrpare'tnenetonia ñeñť atet pena Jesús. Tarro'mar yapa' ama yemno allohuen acheñenesha' o'ch e'mare'tareťetuet ñeñť atet penet te' ñet arr. O'ch yotanet ama't puesheñarra acheñ amach serrpare'tatatscheto.

¹⁸ Allempoñapa' alla agotaretterret. Atet otarettapuerret e'ñe eche'čharro, atet otet:

—Te'pa' amach seserrpare'tatatsto ñeñť atet pena Jesús, ama't e'ñe mame-sha. Ñaña amach seyčhatatsto ama't mamesha atet yečhateť Jesús ahuaña.

¹⁹ Allempoña Pedro ñaña Juanpa' atet otanet:

—Ñehua, te'pa' o'ch soctape'ch sa, allotpa' o'ch sotey, erra'tsente' pocte' enten Yompor, ñato' o'ch yame'ñasa sa amapa' o'ch yame'ñya Yompor.

²⁰ Yapa' amach errotenoť yemmo. Añña pocte' čhocmach ya'pota ñeñť o' yentua ñaña ñeñť o' ye'mua.

21 Allempoñapa' atta che'ptare'tuapuenanet po'pocheño, alloñapa' a'rroyare'ttenet. An'cha'tare'tnesha'pa' ama't mueneñetañ o'ch castiganetaña'p' tarraña ama erro'teno, tarro'mar allohuen acheñenesha'pa' e'ñe pocte' enteñet. Acheñenesha'pa' nanac aye'cho'chtatoñet Yompor añecop ñeñt' o' entuet atto Yompor orrtatanet po'partsoña.

22 Tarro'mar añ yacma ñeñt' o' correrrapa' ñapa' o' pa'tatsoch çharra' po'charña.

Ñeñt' ame'ñetsapa' atet pet allempo enamet Yompor po'huamenc

23 Allempoña a'rroyeret Pedro ñaña Juanpa' ahuanmuet allo'tsen ñeñt' parro ame'ñenet. Allempoña çhapuet allpa' serrpare'tatosanet atet otanet ñeñt' pa'm'cha'tare'tnesha' pen allohuen judionesha' po'cornaneshar ñaña ñeñt' pompornesha' penet.

24 Allempoña serrpare'tatuosetpa' ñetña allohuenet parropa' o' ma'yocheret Yompor. Puema'yocheno'tpa' atet otet:

—Yompore, ñeñte'p' nanac Partso'p, p'a ñeñte'p' ye'chcatue' enet ñaña ama't añ pats, ñaña ora erracmañen sa'p p'a ye'chcatue', ñaña ama't ora esocmañen ñeñt' yentyen e'ñe alla e'ñe p'ocma peye'chcatuar.

25 Ahua't yatañ Davidpa' nanac sher'ba'pe't. E'ñe Pecamquëño' pe'ñorache't, ñeñto'mar atet ote't' ña ahua't:

Erro'tenote' atsrre'muenaña po'poñ acheñenesha' ñeñt' ama ame'ñetso. Erro'tenote' o' pateñetña ama't Parets, ñeñtpa' e'ñe orrena atet penet.

26 Ñeñt' am'cha'tare'ttetsa arr patsro ñetpa' ap'chet attoch o'pachet Yompor, o'pachet ñaña ñeñt' llesensa' ñeñt'ara Cristo. Añpa' allohua atet ote't' David ahua't.

27-28 Alla ma'yochereterr Yompor, atet oterretter:

—Ñeñto'marña te'pa' po'ño'ch o' etsota atto arr Jerusaléño o' ap'chet attoch o'patonapet Pechemer Jesús ama't ñeñt' e'ñe cohuen Parets penten p'a, ñeñt'ña Jesús ñeñt' e'ñe cohuen pesher'baye't' ñeñt' e'ñe p'o pellsensar. Atet ahua'toteñ e'ñe peñotuanete't' ñetpa' o'ch etsotaterrnapet peñoñ atet ñerra'm Herodes, ñaña Poncio Pilato, ñaña po'poñe'ch'no acheñ ñeñt' ama ame'ñetso, ama't ñaña israelnesha'. Tarraña ñeñt' atet o'pachetpa' te'pa' o' etsotuerra peñoñ.

29 Ama't te'pa' Yompore peñoteny ñetpa' nanac mueneñet o'ch yore'tame'tyet yaña. Te'pa' o'ch yenama'p' ahua'menca't pe'pa'yepa'ch ñeñte'y torretsa p'ocop attoch amach yem'cha'tatsto. E'ñepa'ch huomencocma yeserrpare'tona'p' peñoñ.

30 Porrtatonayepa'ch pehuamenc attoch corra'huerra ñeñt' atsna'tyets. E'ñe ye'chore'teño't Jesús porrtatonayepa'ch pepartsoña, ñaña ñeñt' ama yentare porrtatanetcha' attoch eño'chet p'apa' ñeñte'p' nanac Partso'p—e'ñe ye'chore'teño't Pechemer Jesús, ñeñt' e'ñe cohuen Parets penten p'a, ñeñt' e'ñe cohuen pesherbene'. Añpa' allohua atet ma'yochet.

31 Allempoña ma'yochuetpa' allña ap'chenetpa' o' pella ora all anorr'chenet. Allempocma allohuenetpa' o' chorraret Parets Puecamquëñ, attoch e'ñe huomencocma o'ch serrpare'toñet Yompor po'ñoñ.

Atto es apanna'tyesete't pame'ñeño'et Yompor

32 Allempoteñña ñet ñeñtet ame'ñatsete'tpa' o' parrocmatuet e'ñe cohuen. E'ñe parra co'pa'ñnats anmuete't pueyo'chreto ñeñt' amuerañtetsa. Ama eseshaye' otatsete' ñeñtpa' ñap'tetach es o'patet, añña çhocma apanna'tyesete't ñerra'm esesha' es palltatsete't.

³³ Jesús puellsensarnesha'pa' e'ñe po'huamencocmañen a'potoñete't atto tanterra Yepartseshar Jesús. Yomporpa' nanac mueranete't, ñaña nanac ahuamencat panete't.

³⁴ E'ñe ñeshetopa' ama esesha' es palltatse'te. Añña ñeñt allpon echyese'te't po'patseñ, amapa' pa'paquëllpa' o'ch venda'yesete't. Ñeñña allpon gana'yesete'tpa' o'ch huapachet

³⁵ allo'tsen allsensare't. Alloñña'pa' o'ch aposet ñeñt allsensare't. Allsensare'tña'pa' o'ch apa'yesan ñeñt es palltatse't.

³⁶ Añpa' ñeñt atet pe't puesheñarr añ pa'so'cheñ José, ñeñt chipro'marnesha' ñaña ñeñtara levitana'tar. Añña ñeñt allsensare'tnesha'pa' o' socheret José Bernabé. Añña so'chñets Bernabé'pa' ñeñt otets yeñoño amuerañana'tar.

³⁷ Ñaña'pa' echane't allpon pats. Allempoñña'pa' venda'huepa' o' huapatan allpon quelle ñeñt ganapa' o' aposan ñeñt allsensare'tnesha'.

5

Atet pa Ananías epuet puetapor Safira

¹ Tarraña eñall po'psheñeñ ñeñt atet patse't po'poñ, ñeñt'pa' añ pa'so'cheñ Ananías epuet puetapor ñeñt pa'so'cheñ Safira. Añña Ananías'pa' o' vendan allpon po'patseñpa'

² o' huapatan quelle, aposan ñeñt allsensare't. Tarraña ama oraye' huapatuano quelle chach shequënet. Tarro'mar ñet epuet puetaporpa' atet a'pochtachet o'ch yoret allpon quelle e'ñe ñocpuet.

³ Allempoña aposan allsensare't ñeñt o' allponaña quellepa', Pedroña'pa' atet och:

—Eso'mare't pemnateñ oneñeñ o'ch cotape'chatap po'poñ peyo'chro. Papa' pemneñeñ o'ch peshquëñ ama't Parets Puecamquëñ atto papa' ahuo't peyorañ allpon quelle.

⁴ Ñeñt pepatseñpa' e'ñe po'ño'ch ñeñt'pa' po. Tarraña ñerra'm ama pa muenatsñe o'ch pevendeñpa' ñeñt'pa' e'ñe pocten. Ñaña ama'tcha' pevendeñpa' ñerra'm ama pa muenatsñe o'ch papyeñ ora allpon quelle ñeñt pagappa', ñeñt e'ñe pocten ñaña. ¿Errotenote'ña poctape'chña atet peyo'chro? Ama yapteye' pemnenñe o'ch peshca'yey, Yompore'ñaña pemneñeñ o'ch peshquëñ ñaña.

⁵ Allempoña Ananías'pa' ñeñta e'muapa' atac'o'roche' e'ñe allpa' o' rroma. Añña po'potantañ acheñenesha' allempo e'mare'chetpa' nanac yorenet huomenc.

⁶ Añña yacmanesha' ñeñt po'nare'pa' o' huapuetpa' ñetña'pa' epatse'chet ñeñt rromats o' anmet a'yo all pampueñeta'.

⁷ Tematenpa' o' huapa ñaña puetapor ñeñt rromats. Ñapa' ama eñoteñe o'te' rroma puerrollar.

⁸ Allempo huapa Pedroña'pa' o' a'pto'tap:

—Ñehua, poten, ¿po'ño'chte' allpona quelle sagap allempo sevenda'hua sepatseñ?

Puetaporña'pa' atet och:

—Allponaca'ye quelle ñeñt yagap.

⁹ Pedroña'pa' atet otererr:

—Tarraña sapa' ahuo't sa'pochtach epap perrollareñ atet'cha' sepa. Cha't sotapañ ñato' o'ch seshquëñ ñaña ama't Parets Puecamquëñ. Pecue' o' be'toscha'tuerrmoch ñeñt o' pampa'huenna'pa' errete' perrollareñ. Papa'cho' attecmapa' anmapet'cha' a'yo.

¹⁰ E'ñe allempocma puetaporpa'cho'ña o' t'aco'ra ñaña e'ñe alla Pedresho, o' rroma ñaña. Allempo be'tos'cha'tuerr ñeñt' anmue' puerrollareñ, allña'pa' entuerrñañet puetaporpa'cho'ña o' rroma. Ñapa'cho'ña anmetpa' o' pam-pueñeta' a'yo epuet puerrollareñ.

¹¹ Atarr mecha'na'tet allohuenet ñeñt' pame'ñeño't ap'chetsa, ama't allo-huen ñeñt' e'mare'te'pa' cha yoren et nanac. Añpa' ñeñta allohua atet pa Ananíasoñ.

Atto Jesús puellsensarnesha'pa' orrtatete't Yompor po'partsoña

¹² Añña ñeñt' Jesús puellsensarpa' nanac orrtatete't Yompor po'partsoña, ama't ñeñt' acheñenesha'pa' ama puentare attoch eñochet añmapa' Partsepa't. Añña ñeñt' parro ame'ñenetpa' arr ap'chenet all ochete't Salomón Popellraro.

¹³ Po'potantañ acheñenesha' ama't e'ñe pocte' eñchete't ñeñt' ame'ñetsapa', allempoña ñet pueñchaño'tetpa' ama ap'cherreto parro.

¹⁴ Allempoñapa' allo'na atonetnena po'poñe'chno acheñenesha' ñeñt' o' ame'ña. Shonte' o' ame'ñana Yompor, ama't coyaneshachno ñaña yacmaneshachno.

¹⁵ Añña ñeñt' atsna'tyetspa' o' anmet a'yenet allecma chopeñe'chenet. Allña'pa' o' panrra'tyesoset topantso, ñaña puesheña'tetspa' ñato' ora po'maye'na. Tarro'mar anmare'tetyeset allecma chopeñe'chenet allochñapa' ñerra'm mache' huena Pedropa' esheccha' ama't pa'choyeshe'ma po'poma'mteñapa' chapcha' ñesheto, ñato' attotpa' o'ch correrret.

¹⁶ Ñaña ama't allampaño't Jerusaléño'tpa' huapatoñ acheñenesha' at-sñañe'te'chno ñaña ama't ñeñt' chorrena oneñe't. Allochñapa' allohuenetpa' o'ch corra'huerret.

Allempo Pedro ñaña Juanpa' abe'tare'ttet cárcelo

¹⁷ Allempoñapa' ñeñt' cornesha' ñeñt' nanac añcha'tare'tpa' e'moñe'tan allo-huen ñeñt' ame'ñetsa. Ñaña allohuen ñeñt' parro e'ñe atecmuet cotape'chenet ñeñt' otenet saduceonesha'pa' o' e'moñe'chet ñeñt' ame'ñetsa. Tarro'mar sopenchapretenetña', acheñenesha'pa' e'ñe cohuen enteñet ñeñt' ame'ñetsa.

¹⁸ Allempoña allsensare'tnesha'pa' rromueñetpa' o' abe'tare'ttet cárcelo e'ñe allecma abe'teñet acheñenesha'.

¹⁹ Tarraña ama't abe'tare'ttetpa' tsapoñapa' o' huapanet Yompor po'mllaño'teñer ñeñt' huetsa pue'ntaño't o' toram'perranet, o' chapaterranet a'yenetpa' atet otanet:

²⁰ —Añ poctetsa o'ch ahues Parets pa'paclopa' o'ch satomos all o'ch seser-ppare'tach allohuen acheñenesha' ora atet yocrrena etserra cohuen Partso-cop.

²¹ Allempoña ñeñta e'mhuetpa' e'ñe ahua'tecma ahua'muenet Parets pa'paclo, o' be'tos'cha'toset, allña ye'chata'muenet.

Añña ñeñt' cornesha' ñeñt' nanac añcha'tare'tpa' o' chapamuen ñaña ellonet allotcha' agotatan añcha'tare'tnesha'. O'ch chapamuen ñaña allohuen ñeñt' cotene'. Allotcha' agotatan allohuen añcha'tare'tnesha' ñeñt' chocma a'poctatyene' ñoñets ñeñt' pompornesha' penet israelena'tarnesha'. O'ña cha'cha'tuetpa' o' serrpare'tatanna'tet attoch a'poctachet atetcha' pet. Allempoñapa' o' agotachet ñeñt' abe'tatenet cárcelo.

²² Tarraña allempoña chap cárcelo ñeñt' mueñenetpa' ama es entosetoña cárcelo. O' puerrerretpa' atet otueret añcha'tare'tnesha':

²³ —Yapa' allempo ye'chap cárcelopa' o' yentos cárcel e'ñe poctacma echarr ayotta'm'psare't, ñaña ñeñt' cohua'm'pene'pa' alla tom'chenet allot

be'tenet. Tarraña allempoña toretpa', o'ponoñapa' ama esesha' eñalle ama't puesheñarra.

²⁴ Allempoña ñeñta e'mua amcha'taretnesha' ñeñt po'cap'taner penet ñeñt cohuanmpene' Parets pa'paquell ñaña ñeñt pa'mcha'taretnesha' pen allohuen judionesha' po'cornanesharpa' ñetñapa' atet otet:

—Esocopte'ca'ye o' cha'nmaçhenette'. Te'pa' erro'tuanencha' pette' tsapa'tonēt.

²⁵ Allempoñapa' huapa puesheñarr atet otosanet:

—Añña ñeñt sabe'tat ellerro cárcelopa' te'ñapa' alla tomçhenet Parets pa'paclo yeçhatetset all.

²⁶ Allempoña añña capitán ñaña ñeñtcha' yempue'pa' o' ahuanmuet allo'tsen allsensaretnesha'. O'ña çhapuetpa' o' ahuenaneta' e'ñe cohuenacma. Tarraña ama erro't paneto tarro'mar capitánpa' çha mecha'tenan acheñenesha'. Ñato' çho'te' rrolle'chet.

²⁷ O'ña çchapaterranetpa' nosanet e'ñe allo'tsa'yen ñeñt çhocma a'pocatyene' ñoñets. Añña cornesha' ñeñt nanac amcha'taretpa' atet otanet:

²⁸ —Ahuañapa' ama't e'ñe eche'çharro yotuas amach seserrpare'tatsterrero ñeñt pocap'ña Jesús. Tarraña sapa' ahuo't alla seserrpare'tatuerrero ñeñt so socap'ña. Ama't allohuen ñeñt yeçhetsa arr Jerusaléño o' alla seserrpare'tatuerrero. Te'ñapa' allo' seyohuerryerr ahuo' yemtsach añ Jesús.

²⁹ Allempoñapa' otanet Pedro ñaña ñeñt epuet, ñetñapa' atet ochet:

—Añña e'ñe pocte' amach acheña yame'ño, añña Yomporcha'ña yame'ña.

³⁰ Sapa' o' sepata'pes Jesús tsacho attoña o' semtsatach. Tarraña Pomporpa' ña tantaterre'. Añpa' ñeñtara Yompor ñeñt Po'yomporer pete't ñaña ahua't yatañneshañ.

³¹ Te'ña Pomporpa' o' nanac ahuamencat pe', e'ñe po'cohuenrotpa' all partstoten. Allochñapa' attoch cotape'chaterran israelena'tarnesha' ñaña attoch cotape'cherret cohuen e'ñe etserra attoch peretnerranet po'chñar. Ñeñto'marña Yomporpa' nan Jesús ñeñtcha' Ya'queshpatañer yepen.

³² Ñeñto'marña te'ña yapa' ya'poteññañ atet pena Yompor. Yompor Puecamquēñpa'çho'ña ñeñt eñotatets. Ñeñtara Puecamquēñ ñeñt nennay yeyoçhro, allohueney ñeñtey ame'ñenaya ña. Añpa' allohua atet otanet Pedro.

³³ Allempoña ñeñta e'mhuet ñeñt atet ot Pedropa' añña amcha'taretnesha' nanac atsrre'matanet, atarr mueneñetañ ahuo'ch muetsuet ñeñt allsensaretnesha'.

³⁴ Allempoñapa' añña puesheñarr fariseo ñeñt e'ñe parro a'pocatyene' ñoñetspa' o' tomos attoch eños. Ñeñt tomosetspa' añ pa'so'cheñ Gamaliel, ñapa' ña ñeñt yeçhatets ñoñets ñeñt atet anare't, tarro'mar ñeñt po'taruas pen. Ña allohuen acheñenesha'pa' e'ñe cohuen enteñet. Gamalielñapa' o' mueñatuerran allsensaretnesha' mame' a'yenet.

³⁵ Ñeñt epuet cotape'chatannenetpa' atet otanet:

—Masheñe israelneshacha' o'ch notas: E'ñech cohuenacma ya'pocach ñeñt atetcha' yeçpanet.

³⁶ Sapa' ama't seyerpueñoña atto ahuaña o' orrta puesheñarr ñeñt pa'so'cheñ Teudas. Ñapa' atarr muene't o'ch ayochreshatta. Shonto' acheñenesha' ñato' allo'tseno'te' cuatrocientos ñeñt ame'ñata. Allempoñapa' allponmaterrerrpa' o' muetset. Ñeñtña pueyochresha'pa' o' ahuanomyerret ñopa'ttsocmuet. Allempoñapa' o'huañ es cotape'chet.

³⁷ Allempoña allponmaterrerrpa' orrta ñaña po'psheñeñ ñeñt pa'so'cheñ Judas ñeñt galileo'marnesha'. Ñapa' tarrepo orrta allempo quellcatyenet pa'so'chñechno añcha'taretesho. Ñapa'cho'ña tama yochresha'tana allpon acheñenesha'. Allponmaterrerrpa' ñapa'cho'ña o' chenca. Añña ñeñt pueyochresha'pa' o' parratse'tuerret.

³⁸ Ñeñto'marña te'pa' o'ch notas, o'ch sa'rroyer ñeñt serrpare'tene' ñeñt atet pena Jesús. Amach erroť seřatstaneto, tarro'mar ñerra'm e'ñe ñoťoteta poctapñoť atet penetpa' ñeñtpa' mameshapa' o'ch huañerr.

³⁹ Tarraña ñerra'm poctapñetpa' Yomporeshoť huenapa' amach erroťenot sehuapore'tache. Nato' sapa' cha se'moñe'teññañ ama't Yompor poctapña. Añpa' ñeñt atet otan Gamaliel añcha'taretnesha'.

⁴⁰ Atet cotape'chatanet Gamalielpa' e'ñe pocte' eñchet. Allempoñapa' alla agotaterran allsensaretnesha'. Allempoña huaçherretpa' o' nalle'tatanet añcha'taretnesha'. O' nalle'tatuanet añcha'taretnesha'pa' allotñapa' otarettet ñaña e'ñe eche'charro:

—Te'pa' amach seserrpare'tatsterrerro ñeñt atet pena Jesús. Allempoñapa' a'rroyare'ttenet.

⁴¹ Allempoñapa' o' ahuanenet, o' sa'neñet ñeñt chocma a'poctatyene' ñoñets. E'ñe pocsheñeshocmañen ahuanenet tarro'mar Yompor e'ñe pocte' entanet ñeñto'mar muenatanet o'ch mueroçhtet ñocop.

⁴² Allempoteñ pate'tets yetpa' chocmach yeçhatete't Parets pa'paclo ama't ñaña e'ñe alla pa'pacleto. Nanac serrpare'tete't atto Jesúspa' ña Cristotats.

6

Arrpa' allempo net cançherrsheña ñeñtcha' epatyeshuet rreñets

¹ Allempoteñña' allo'na sen atonetnomtsa ñeñt ame'ñetsa. Tarraña e'ñe allempopa' o' sope'channa'tet. Ñehua, tarro'mar allempopa' atet pete't. Pate'tets yet Jesús pueyochresha'pa' o'ch apa'yesan allohuen rreťorranesha' rreñets ñeñt pallta'yesatse't rreñets. Ñeñt e'muene' grie-gaçhpa' ñetpa' atet otyeset:

—Ñeñt yamo'ts rreťorranesha'pa' ñetpa' ama allponeshacmaye' rreñets agapueto allpon agapyes ñeñt e'muene' hebryaçh. Yamo'ts rreťorranesha'pa' coñe'ta agapyeset. Ñeñtña rreťorranesha' ñeñt e'muene' hebryaçhpa' shonte' rreñets agapyeset. Atťotña sope'channa'tet.

² Allempoñapa' ñeñt çharrasheña puechena epa ñeñtara Jesús puellsensarpa' ñetñapa' agotatueto allohuen ñeñt ame'ñetsa. O'ña apçha'huetpa' atet otarettapuet:

—Yapa' ama tama pocteye' yenteñe ama't mameshapa' o'ch ya'rroya serrpare'te' Yompor po'ñoñ. Shonte' yet ya'pertaten atťoch yapa'yes allohuen rreťorranesha' rreñets.

³ Añña pocte' masheñeshacha', o'ch se'ñ cançherrsheña ñeñtara ñeñtey ame'ñetsa arr parro—erra'tsente' cohuen acheñ senten ñaña ñeñt chorrena Parets Puecamquëñ ñaña ñeñt atarr eñotene' ñeñt cohuentetsa Yomporcop. Añ ñeñtara cançherrsheña ñeñtcha' po'taruas pet atťoch epatyeseť ñeñt pallta'yetsa rreñets.

⁴ Allochñapa' yapa' añach yema'yochra ma'yochatsa ñaña o'ch ya'potoñ Yompor po'ñoñ. Ñeñtach paterr yetorrena. Atet otanet Jesús pueyochresha'.

⁵ Allempoña acheñenesha'pa' e'ñe pocte' eñchet allohuenet. Allempoñapa' o' neñet Esteban ñeñt nanac ame'ñetsa ñeñt e'ñe chorrena Parets Puecamquëñ. Alloťpa' neñet ñaña Felipe, ñaña Prócoro ñaña Nicanor ñaña Timón ñaña

Parmenas ñaña Nicolás ñeñt antioquio'marnesha' ñeñt ahuatoteñ ame'ñate't judionesha'.

⁶ Añña ñeñt cancherrsheña acheñpa' o' ahupatarettet allo'tsen Jesús puellsensarnesha'. Añña allsensareñnesha'pa' allenta ma'yochanpesyet, o' net pot ñesheto, atet otarettet ñeñtcha' po'taruas pet.

⁷ Allempoñapa' o' e'ñe epa'hua Yompor po'ñoñ ora. Allempoñapa' allo'na sen shonta'nmatsa ñeñt ame'ñetsa all Jerusaléño. Allempopa' shonte' judionesha' po'cornaneshar ame'ñatsa.

Allempo rromuet Esteban

⁸ Añña Estebanpa' Yompor pomuereño'tpa' nanac amuerañta. E'ñe Parets po'huamenco'tpa' orrtatanet ñeñt ama puentareto atto eñochet añmapa' po'ño'ch Parets po'huamenco't orrtena.

⁹ Allempoñapa' puesheña'tets judionesha' o' achmeñet Esteban po'ñoñ. Añña judionesha' ñeñtara oteñet libertinanesha'. Ñetñapa' alla apchenet po'prahuo. Ñaña po'potantañ judionesha' ñeñt huetsa Cireneo't ñaña Alejandrío't ñaña Cilicio't ñaña Asio'tpa'—ora allohuenetpa' e'ñe parrocmachmāre'toñet Esteban po'ñoñ.

¹⁰ Tarraña Estebanpa' nanac es eñot atto serrpare'ten. Ñetpa' ama erroteno't anapeto. Estebanpa' añ chorraye't Parets Puecamquēñ, ñeñto'marña ama erroteno't anapete'te.

¹¹ Allempoñapa' tsa'chet po'potantañ acheñ añecop attoch toma'tatoñet Esteban po'ñoñ. Ñeñt atsa'tare'tpa' atet otet:

—Yapa' o' ye'mñ Esteban añ achmāre'ten Moisés po'ñoñ ama't ñaña Yomporpa' achmeñ. Atet toma'tatoñet Esteban po'ñoñ.

¹² Allempoña acheñenesha' atet e'muetpa' o' e'moñe'chet Esteban. O' huapa ñeñt pompornesha' pen judionesha', huapa ñaña ñeñt etsotene' Moisés po'ñoñ. Huapapa' o' rromueñeta' Esteban o' anmet añcha'tareñeshesho allecma a'pocpatenet ñoñets.

¹³ Chapuet allpa' alla toma'tatuerrñañeterr Esteban po'ñoñ, atet otoset:

—Añ Estebanpa' chocma achmāre'tenan Parets pa'paquell ñaña chocma achmāre'tenan Moisés po'ñoñ.

¹⁴ Alla oterretter ñeñt atsa'tare't:

—Yapa' o' ye'mñ Esteban atet oten añ Jesús ñeñt nazareto'marnesha'pa' o'ch a'matanpsey Parets pa'paquellpa' o'ch huapore'tatonay atet ye'chatye't Moisés.

¹⁵ Allempoñapa' allohuenet ñeñt allo'tsa'yen o' cohuanrrorchet Esteban. Tarraña o' eñchet e'ñe cohuen orrtena pa'clloyo't atet orrtena ñerra'mrrate' Yompor po'mllaño'teñer ñeñt huetsa ento't.

7

Atto Estebanpa' serrpare'tatan añcha'tareñnesha'

¹ Allempoñapa' añña cornesha' ñeñt nanac añcha'tare'tpa' a'p'to'tan Esteban, atet och:

—¿Po'ño'cha't atet?

² Estebanñapa' atet och:

—Ñehua, masheñneshacha' allohuenes nomporneshacha' o'ch se'mñoten, o'ch notas ñeñt atet pa'yese't ahua't yatañneshañ. Ahua'tpa' Yompor ñeñt nanac Paretspa' orrtane't yatañ Abraham all anetso Mesopotamia. Allempopa' ama chena' Haráno allcha' ye'cherra.

³ Allempo orrtana Abrahampa' atet och ñeñtcha' atet pa: "Te'pa' o'ch ahuep̄ arroṭ o'ch pesa'nom añ peney, o'ch pesa'nem̄ ñaña p̄amo'tsesha', o'ch ahuep̄ allcha' notap̄." Atet och Yompor, atetcho' p̄a yatañ Abraham.

⁴ Allempoñapa' a'ypo'ña'nman all yecheṭ all yechanateṭ ñaña caldeo'marnesha' atto chap allo'tsen anets Harán all yeçherra. Allempo o' rroma pomporeña' Yomporpa' o' alla anererr arma Canaáno all yeyçhena ya te'.

⁵ Tarraña allempo chap arr ahuatpa' Yomporpa' ama apueña' añ pats, ama't coñe'ta. Tarraña Yomporpa' ahuo't och esempohuañen o'ch ap̄ añ pats, e'ñe ñocop, ama't puechemerecop, ñaña po'mrenñecop. Tarraña allempopa' yatañ Abrahampa' ama chemere'tena'.

⁶ Allempocma Yomporpa' o' eñotatan Abraham attoch esempo po'mreneña' ahuanmuetcha' arroṭ, chapuetcha' po'poñ anetso Egipto all ama pa'nyempañoayaye, allcha' yeçha'huerret, allña'pa' mueroçhtatapanetcha' allo'marnesha' acheñ. Ñaña añ eñotatan Abraham attoch ataruasatarettach e'ñe atta po'mreneñ, e'ñe cuatrocientos char amueroçhtatarettet.

⁷ Tarraña Yomporpa' o' eñotatan Abraham ñaña po'poñ. Ahuo't och Yompor: "Tarraña napa' netsa'taterach ñeñtcha' mueroçhtate' penreneñ. Allempoñapa' huaçherretcha' alla arr Canaáno allcha' ma'yocherrnet."

⁸ Ñaña allempo Yomporpa' ahuo't otan Abraham po'poñ ñeñtcha' atet yeçha' judionesha' allempoteñ errponohuañen, attoch eñoçhet Yomporpa' ama pueno po'ñoñ. Añmapa' ñeñt atet otan Abraham: "Añ poçte' o'ch setsorre allohuen asheñorroṭollesha'." Ñeñto'mar allempo chemere't Abrahampa' puechemeretoll ñeñt soch Isaacpa' ahuo't tsorreñ. Po'psocmatño'pa' o' tsorre. Isaacña'pa' allempo o' po'npa' o' chemere'tana Jacob. Jacobña'pa' chemere'tana çharrasheña pueçhena epa ñeñtara yatañneshañ yepen ya ñeñtey israelena'tarey.

⁹ Tarraña allempopa' añña ñeñt yatañneshañ yepenpa' o' sope'cheñet pa'mo'nasheñ José. Ñeñto'marña o' pomet pa'mo'nasheñ. Ñeñña agapue'pa' o' anem̄ baçhayo all anets Egipto.

¹⁰ Tarraña Yompor ña a'nataya. Yomporpa' o' a'pocstatuon ora allohuen atto mueroçhtacheteṭ. Añña ñeñt añcha'tarettatseṭ Egiptopa' e'ñe cohuen entaneṭ José. Añ ñeñt añcha'tarettatseṭ Egipto ñeñtpa' oteñet Faraón. Faraónpa' eñotan José ñapa' nanac es eñoten. Ñeñto'mar añcha'taret Faraónpa' o' nan José ñeñtcha' añcha'tarettapretaya all Egipto. Ñaña ora allpon ñeñt taruaset Faraón pa'paclo'marpa' o' nan José ñeñtcha' yechenahuet.

¹¹ Allempoñapa' orrta muecheñets. Ora allohuen egipto'marnesha' nanac cheporrare'tet. Ñaña ora allohuen canaáno'marnesha'pa'cho'ña nanac cheporrare'tet. Pa'chporrñoçtetpa' nanac mueroçhteteṭ. Yatañneshañpa' ama echete'te pocrramet ama't coñe'ta.

¹² Allempoñapa' yatañ Jacobpa' o' e'mare'tan orameñ rreñets Egipto. Ñeñto'marña mueñan puechemeresh'a' ñeñtara yatañneshañ yepen ya. Netpa' o' ahuanmuet Egipto o'ch rañteneta' rreñets.

¹³ Rañta'hueneta' rreñetspa' o' puerraçherret. Atomatpa' o' huañaperret pocrrañpa' o' alla ahuanerreterr Egipto. Allempoña çhaçherreterr Egipto pa'mo'nasheñet Josépa' atet otanet ñapa' ñaña pa'mo'nasheñ penet. Allempoñapa' o' cheme'chet pa'mo'nasheñ José. Pa'mo'nasheñña'pa' o' anmanet añcha'taretesho attoch cheme'tatanet.

¹⁴ Cheme'tatuanetpa' allempoña Josépa' o' mueñerranet pa'nyeto añecop attoch ereta' pompor Jacob ñaña allohuen pamo'tsesha', atet ot José:

“Onetepa’ allohuenet Egipto.” Ñeñto’marña allohuen cançhroch çharra’ puechena amnarsheña pamo’tsesha’ ñetñapa’ ahuanmuet Egipto allo’tsen José.

¹⁵ Allempoñapa’ çhaçha’tet Egipto. O’ met allpon charpa’ o’ rroma yatañ Jacoboñ all Egipto. Meterrerr allpon charpa’ o’ colla’hua ñaña puechemere-shañ ñeñtara yatañneshañ yepen. Colla’huetpa’ alla apamparettet all Egipto.

¹⁶ Ñehua, meterrerr allpon charpa’ o’ ahuanmaretterret puenpa’ts anetso Sicño allcha’ apamparetterret ello puenpa’ts. All apamparetterretpa’ ñeñtpa’ ñeñtara pats ñeñt’ o’ rañta’hua Abrahamañ ahuañ. Añña patspa’ ñeñto’ vendoñ Hamor puechemereshañ ahuañ all Sicño.

¹⁷ Alla oterraneterr Esteban, atet ot:

–Allponerrerr charpa’ çhachmoch allempo o’ch etsota atet Yomporpa’ otane’t ahuañ Abraham allempo huomenc nane’t po’ñoñ. Ñetpa’ allempo nanac merete’t all Egipto.

¹⁸ Atteñapa’ o’ met shonte’ charpa’ o’ orrta po’poñ añcha’taret Egipto ñeñt’ ama puentarano José, tarro’mar Josépa’ ahuañoteñ o’ rroma.

¹⁹ Añña añcha’taretpa’ nanac mueroçhtatyesonay yatañneshañ. O’ nanet ñoñets attoch pamo’mtayetpa’ o’ch a’ypo’ñet puechemeretoll a’yo. Añecpo’ch atet peñet attoch muetsatachet puechemeretoll. Allochñapa’ amach nanac mereto.

²⁰ E’ñe allempopa’ o’ eñalleta Moisés tarraña Yomporpa’ e’ñe cohuen entane’t Moisés. Pamo’mte’pa’ e’ñe a’nahua cohue’ ma’pña arrorr all pa’paclo.

²¹ Allempoñapa’ o’ çhap allempo amach erroteno cohueñeto pa’paclo a’nahua. Allempopa’ a’ypo’ñet a’yeneñ. Añña añcha’taret Faraón po’sañpa’ ahua’ huapa all neñet ahua’ entos, nanac amurochen eñch, allenta aner attoch ñañrecha. Atteñapa’ o’ atarrtach pa’paclo atet ñerra’m puechoyor e’ñe ño.

²² Ñeñto’marña Moiséspa’ ayçhataretta ora allpon ñeñt’ atet eñotyese’t egipto’marnesha’. Nanac eñotañte’t ñerra’m allempo eñose’t, nanac eñotañte’t ñerra’m allempo es pa’yese’t.

²³ Allempo çhap pa’tatsoch çharra’ po’charña Moiséspa’ nanac yerpane’t pamo’tsesha’ ñeñtara israelena’tarnesha’. Atarr seche’t o’ch a’bchenaneta’. Allempoña parrochpa’ o’ ahua’ allo’tsa’yen pamo’tsesha’.

²⁴ O’ña çhap allpa’ all entosan puesheñarr egipto’marnesha’ nanac coñchatenan puesheñarr israelena’tar. Ñaña’pa’ o’ moñsosana pamo’ts. O’ çhote huomencpa’ çha rroma. Atto chemnatanaña pamo’ts.

²⁵ Añña Moiséspa’ otapañ pamo’tsesha’pa’ e’ñech cohuen entapet. Otapañ o’te’ eñochet Yompor mueñe’ attoch a’queshpatan pamo’tsesha’. Tarraña ñetpa’ ama eseshaye’ pocte’ entaye.

²⁶ Tarro’mar tsapañña’ alla ahuenerr, allempopa’ o’ entuenanerr epsheña pamo’tsesha’ çho’ orrotenet e’ñe ñañeñeta. Ñaña’pa’ mueneñ o’ch amo’tstateranet, atet otanet: “Esuañaca’ masheñeshacha’ sottenña arr. Añña pocte’ e’ñech semo’nasheñ sepannena.”

²⁷ Ñeñt’ chetene’ pamo’tspa’ o’ a’mchech Moiséspa’ ñaña’pa’ atet ot: “Ese-sha’huañaca’ penene’ña pa’ añcha’taret arr yocop. Esesha’huañaca’ potene’ o’ch pa’tsrre’moçhta arr.

²⁸ Ñato’ añte’ pemnen o’ch pemtsan naña atet pepe’ muetse’ egipto’marnesha’ ellerro.”

²⁹ Allempoña o’ e’man añ ñoñets Moisésña’pa’ o’ yeta puerñchañoñ. O’ ahua’ a’yo allo’tsen pats pa’so’cheñ Madián. O’ yeçha’huerra allapar. Allña’pa’ all sena’tapa’ o’ chemere’t epsheña.

30 O' alla oterraneterr Esteban, atet ot:

—Allempoñapa' o' meterrerr pa'tatsoch charra' char. Parrochpa' amara'tsen Moisés allame'tets aspeno Sinaíño. Allña' entosan tsachmatoll all ñoña huorten. E'ñe huortot tso'pa' allot orrtña Parets po'millañoñer.

31 Ñeñ entos Moisés'pa' atet ot: “¿Esté' huortetsña tarro?” E'ñe chapatsa allame'tets o'ch enteña'pa' o' e'man ñoñets. Partsepa't eñets, atet och:

32 “Napa' ñeñten Po'yomporer pen ama't patañneshañ ñeñtara Abraham ñaña Isaac ñaña Jacob.” Moisés'pa' cha yoren. Puenchaño'pa' ama cohuan huorte'.

33 Yomporña'pa' atet otererr: “Pencha'na'teño'pa' perrote't pesapat tarro'mar all p'atenpa' ñeñ'pa'cho' nanac Parets tarro'mar allo'tsenen na.”

34 O' alla otererr Yompor: “Napa' nenteñ atto muerochtatennanet ñeñ nechemerasha' nepen ñeñtara israelena'tar. Napa' ne'muenanet atet yahuanrrortenet. Ñeño'marña te'pa' o' nohuapa o'ch na'queshp'atanet. Te'ñapa' o'ch nemña' p'a Egipto.” Añpa' ñeñta atet otan Yompor Moisés.

35 'Añña Yompor po'millañoñer ñeñ orrtetsa all huorten tsachmopa' ñeñña eñotate' Moisés atet muenen Yompor. Ñeño'mar yeñoteñ Yomporpa' ahuo't llesensan Moisés o' alla mueñer pamo'tseshesho ñeñcha' añcha'tarettatsa ñocpuet ñaña ñeñcha' a'queshp'atahuet allot amurochtatarettete't. Añ ñeñtara Moisés ñeñ ama pocteye' ento ahuaña pamo'ts ñeñ otet ahuaña: “Esesha'huañaca' penene' p'a añcha'tare't arr yocop. Esesha'huañaca' potene' o'ch p'a'tsre'mochta arr.”

36 Añ ñeñtara Moisés ñeñ anerrahuet Egiptot. Ñeñtara Moisés'pa' ortatanet ñeñ ama puentareto all Egipto. Ñaña sa'pot ñeñ Tsasasen all ortatanet ñeñ ama puentareto, atto eñotatanet añmapa' ñeñ atet pena Parets. Ñaña all chopeñe'chen amara'to'mar pa'tatsoch charra' char Moisés'pa' all ortatyesanet ñeñ ama puentareto. Añpa' ñeñ eñotatanet atet penaña Parets.

37 Añ ñeñtara Moisés ahuatpa' o' otan israelnesha' atet: “Yomporpa' ortaterrnascha' puesheñarr ñeñcha' a'm'erre' Parets po'ñoñ, ñeñtara ñeñ e'ñe samo'ts sepen e'ñech atecma orrtaterr e'ñe atet orrtatenen ñaña. Ñeñcha'ña chocma se'mñoterrña sa.”

38 Ama't allempo yatañneshañ chopeñe'chete't amara'tareropa' añña Moisés allo'tseneta parro ama't allpa' chocmach ap'chete't Yomporecop. Ñapa' allo'tsena aspeno Sinaíño allempo orrtña Yompor po'millañoñer ñeñ eñorana'taya ñaña o' ye'chach ñoñets alloch e'ñe yocra Partsocop. Ñeñña ñoñets allempo puerrerra Moisés aspenotpa' o' ye'chatuerran ñaña pamo'tsesha'.

39 'Tarraña ama't atet pe't Moisés'pa' yatañneshañpa' ama muenete'te o'ch ame'nyet Moisés. Ama eseshaye' pocteye' entaye'te. E'ñe pueyo'chretopa' atarro' muenete't o'ch alla puerrerrret Egipto.

40 Ama't allempo aspeno'tsen Moisés'pa' yatañneshañpa' atet otoñet pa'mo'nasheñ Aarón: “Te'pa' o'ch peye'chcatonay ñeñcha' yeyoser yeperr ñeñcha' yanerre' alla Egipto. Añ Moisés ñeñ yanmue' Egiptotpa' yapa' ama yeñoteñe, ta', ¿errafe' o' ahuo'?”

41 Allempoñapa' o' ye'chcatanet ñeñ atet ñerra'mrrate' añ aye'chcatare't oro. O' muetset carrnero o' neññañeta' e'ñe ñesho. Nanac cohuen entet ñeñ ye'chcatet e'ñe potot.

42 Allempoña Yomporpa' o' a'ypo'ña'nmanet, o' muenatanet attoch muechatsetet ñeñ ye'choyo'tam'pene' ama't arorr ñaña ranto. O' pet

atef quellquë't ñeñt a'mtaye't Yompör po'ñoñ ahuat. Añmapa' ñeñt quellquë't ahuat, atef ñerra'm Yompör otets:

Napa' o'ch notas israelena'tarneshacha', ama't o' semtsa carrnero, amapa' huaquësh, tarraña ama nocpaye' semtso, ñeñtpa' ama neshoye' sehuapache. Ama't ora añ pa'tatsoch çharra' char all sechopeñe'chen amaratarero atef es sepa'yen.

43 Añ seyompörer sepen po'poñ, ñeñt ayeçhcataret ñeñt soten allo' yeçhena seyoser ñeñt sesochen Moloc. Amapa' atef ñerra'm ayeçhcataret rantoma't ñeñt soten añmapa' seyosro' ñeñt sesochen ñaña Refán. Shonte' ayeçhcatareteçhno ñeñt seconcorpana'tena. Ñeñto'marña te'pa' o'ch nemñas nanac allapar, all Babilonio. Añpa' allohua ñeñt atef quellquë't ahuat ñeñt a'mtaye't Yompör po'ñoñ.

44 O' alla oterraneterr Esteban, atef ot:

—Ahuat yatañneshañpa' allempo chopeñe'chete't amaratareropa' anmuete't pocoll shetamtsopo' allecma apçhete't Yomporecop. O'ponopa' all nete't mapuettall allo' aquellcare't ñoñets ñeñt poctetsa Yomporecop. Añ pocoll shetamtsopo' Moiséspa' ña yeçhcataye't e'ñe atef oche't Yompör po'mllañoñeñer e'ñe atef gache't Yompör.

45 Allempo rromanom Moisés puechope'chpayopa' o' na'nmet Josué ñeñtcha' anmue' yatañneshañ. Apa'nmet ñaña shetamtsopo' ñeñtñapa' çhapachet allo'tseno' pats ñeñt otanete't Yompör ahuatoteñ o'ch ap Janet. Po'poñ acheñenesha' ñeñt yeçhetsa allpa' Yompörpa' o' muevo'tuerranet attoch yatañneshañpa' o'ch yeçha'huerret all. Allempopa' o' çapatet all shetamtsopo' allecma apçhenet Yomporecop. Shetamtsopahuopa' allecma apçhete't tarremphua allempo orrta David.

46 Allempo orrta Davidpa' ñapa' e'ñe cohuen enteñ Yompör. Ñaña'pa' o' enaman Yompör pocte'te' enteñ o'ch yeçhcatoñ pa'paquëll ñeñt e'ñe cohuen echarr. Mueneñ o'ch yeçhcatan Yompör pa'paquëll, ñeñtara Po'yompörer pe't ñaña pa'tañ Jacoboñ.

47 Tarraña ama't mueneñeñ ñapa' Yompörpa' ama mueno. Añña muenatoñ puechemer Salomón, ñach tomate' pa'paquëll.

48 Tarraña Ñeñt nanac Paretspa' ama yeçheno pocollo ñeñt yeyeçhcaten ya, arromñaey. Ama't atef ote't ñeñt a'mtaye't Yompör po'ñoñ, atef ñerra'm Yompör eñets, atef oten:

49 Napa' nanac Partson. Napa' nenten enet atef ñerra'm neconañ, patsñapa' nenteñ atef ñerra'm allcha' nenen netac. Errotenohuachñaca' seyeçhcatonña pocoll allcha' neyçha. Ama nepallteno allcha' neyçha, atef oten Yompör.

50 Napa' nehuamenco't neyeçhcatua ora allohuen ñeñt sentyen. Añpa' allohua atef ot Yompör.

51 Alla oterraneterr Esteban:

—Sapa' nanac se'charrtena, seyoçhropa' ama soçtape'cheno atef ñerra'm Yomporena'tares. Ama semno o'ch se'mñotoñ Yompör po'ñoñ. Chocma satpare'teññañ Paretspuecamquëñ. Atef pe't satañneshañ ahuat te'pa' atefçho' sepena samña.

52 Ama't allohuen ñeñt a'mtaye't Yompör po'ñoñ ahuat satañneshaññapa' çha mueroçhtatyesanete't. Ama't ahuat allempo ama orrtena' Jesúsapa' ñeñt a'potaye't atto esempohuañen o'ch huapa Cristo ñeñt e'ñe pocte' es pets, ñeñtpa'çho'ña satañneshañpa' çha muetse. Te'pa'çho'ña añ Cristo ñeñt e'ñe pocte' es petspa' ahuo' seponñ samña attoch semtsach.

53 Alla oterraneterr Esteban:

—Ama't Parets po'mllañoñeñer ñeñt señoate' ñeñt poctetsa Yomporecop sañapa' satpare'toñ Yompor po'ñoñ. Añmapa' allohua ñeñt atet serrpare'tatanet Esteban.

Allempo muetset Esteban

⁵⁴ Allempoña ñeñña e'mhuet atet ot Estebanpa' nanac atsrre'matanet. Pa'tsrre'mueñoñetpa' cha rraso'tyeset pa's.

⁵⁵ Allempo Estebanpa' e'ñe chorreña Parets Puecamquëñ. Ñañapa' o' cohua' enonet, allñapa' all entan Yompor po'cohuenña. Entan Jesús e'ñe po'partsoteñoñ all ten Pompor po'cohuenrot.

⁵⁶ Allempoñapa' oterrerr Esteban:

—Napa' o' nent enet atorareñ. O' nent ñaña allo'tsen Ñeñt Acheñetosets, po'partsoteñoñpa' all ten Parets po'cohuenrot.

⁵⁷ Acheñenesha'ña pa'tsrre'mueñoñetpa' rranare'tet. Puerranare'teñoñetpa' mopaqueta'tyeset, o' matrra'tet ñesho attoch o'ch rromuet.

⁵⁸ O' rromuetpa' o' anmet a'yenet all ama eñalle pocoll allcha' rrolle'chet. Ñeñtcha' rrolle'te'pa' o' rrotrra'tyeset pa'shtam, o' na'yaset e'ñe allo'tsen puesheñarr yacma ñeñt huepueshameñ ñeñt pa'so'cheñ Saulo.

⁵⁹ Allempoñapa' rrolle'chet. Rrolle'chetpa' Estebanñapa' o' ma'yochapa', atet ot:

—Nepartseshare Jesús, pagaponcha' necamquëñ.

⁶⁰ Allempoñapa' concorpa. Concorpapa' eñora huomenc, atet ot:

—Amach Nepartseshare petsa'tatatstaneto.

Allempoñapa' ñeñña otuapa' o' muechecha, o' rroma.

8

Allempo Saulopa' nanac mueneñ ahuo'ch a'cllatuan ñeñt ame'ñetsa

¹⁻² Allempopa' añña Saulopa'* e'ñe pocte' eñch muetsetepa' Esteban.

Añña puesheña'tets ñeñt nanac ame'ñenaya Yomporpa' puellquëñeshetpa' o' huapuet, o'ch eñeta' arromñañ attoch pampueñeta'. Nanac ya'na'teñet Estebanañ. Allempoteñ nanac muerochtachete't ñeñt pame'ñeñoñet Cristopa' apchete't Jerusaléño. Ñeñto'marña shonte' acheñenesha' ñeñt yetrra'tatsa po'poñ añetso'mar. O' parratse'tuet allemeña—Judeo'mar ñaña Samario'mar. Tarraña añña Jesús puellsensarnesha'pa' ama esesha' yetatso ama't puesheñarra.

³ Sauloñapa' nanac mueneñ o'ch a'cllatuan allohuen ñeñt ame'ñetsa. O'ch be'tosamñsanet pa'pacletopa' o'ch rromanet, o'chcho' chetare'tnerranet. O'chcho' be'tosuerrerr ñaña po'ppauñopa' o'chcho' rroma'huerraneterr; o'chcho' chetare'tnerraneterr, o'ch anmanet cárcelo allcha' abe'tatuanet. Ama't coyanshačno e'ñe abe'tatuanete't cárcelo.

Atto Felipepa' serrpare'tatanete't Samario

⁴ Añña ñeñt yetrra'tatsa Jerusaléño'tpa' all chapyeset, erra ta'yenetpa' allcha' serrpare'teññañet Yompor po'ñoñ.

⁵ Atet ñerra'm Felipe. Ñapa' o' ahuo', o' chap anetso ñeñt pa'so'cheñ Samaria. Allñapa' all serrpare'tatosanet añepa't Cristotats ñeñfara Jesús.

⁶ Felipepa' orrtatanet ñeñt ama puentareto. Atet eñchetpa' o' eñochet añpa' po'ñoñ Parets po'huamenc orrtaten. Ñeñto'marña allohuen acheñenesha'pa' e'ñeñoteñet e'ñe cohuen atet otanet.

* **8:1-2** Saulopa' ñeñfara Pablo.

7 Shonte' acheñ ñeñt chorra'yese't oneñe't allempopa' e'ñe quechpatyesueretña oneñe't atto chorrenana acheñ. Allempo quechpatyesueret oneñe'tñapa' o'ch rranare'tnoma. Ñaña shonte' acheñ ñeñt echarreyestse'tpa' o' corra'huerret. Ama't ñeñt checare'payestse'tpa' o' a'crratyesuaherranet Felipe.

8 Ñeñto'marña nanac coshyete't Samario.

9 Allempopa' allo'tsen puesheñarr ñeñt achyo'tañ ahuaña ñeñt'pa' añ pa'so'cheñ Simón. Allohuenet samario'marnesha' ama't ahua'toteñ'pa' cohuanrrortoñete't atet orrtate't ñeñt ama puentareto. Ñapa' o'ch shequënanet. Ñetñapa' cha otenapuetañ ñapa' nanacte' po'ño'ch ahua'mencat, atet oten ña.

10 Allohuen acheñ'pa' e'mñochete't atet ote't ahuaña —ama't ñeñt amñcha'tarettetsa ñaña ñeñt ama esoshe'mayaye acheñ. Ochete't:

—Po'ño'ch añ acheñ'pa' ñeñt Partsocoptartetsa.

11 Ñeñto'marña acheñenesha'pa' nanac ame'ñyete't. Ama't ahua'toteñ cohuanrrortoñete't atet orrtate't ñeñt ama puentareto.

12 Tarraña allempo serrpare'tatanet Felipe cohuen ñoñets o' ame'ñatanet allohuen—yacmanesha'chno ñaña allohuenet coyaneshohuen. Serrpare'tatanet atet penaña Yompor po'cohuenña ñeñt atto atarr ayochreshattena ña, ñaña atet pena Jesús ñeñt Cristotats. O' ame'ñatuanet allempoñapa' apatare'ttet Yomporecop.

13 Ama't achyo'tañ ñeñt sochetsa Simón'pa' o' ame'ñerra ñaña. Ñapa'cho'ña apatare'tta Yomporecop. Apatare'tetuapa' allempoteñ'ñapa' yemterrana Felipe errohuanen chopeñe'chen. All orrtatanet Felipe ñeñt ama puentareto attoch eñochet añmapa' ñeñt po'ño'ch huetsa Partseshot. Simón'ñapa' o'ch entan atet'pa' atet'cha' ot:

—Erroteno'tuañaca' atet penate'.

14 Allempoña Jesús puellsensarnesha'pa' e'mare'chet Jerusaléño't shonte' samario'marnesha' ame'ñeññañet Yompor po'ño'ña'pa' o' mueñet Pedro ñaña Juan all Samario.

15 Allempo chap Pedro ñaña Juan Samariopa' ma'yochañ'psosyet samario'marnesha' ñeñt ame'ñetsa. Enamet Yompor chorratanetepa' Parets Puecamquëñ.

16 Tarro'mar allempopa' ama chorrenaneta' Parets Puecamquëñ. O'ña apatare'tetuet pame'ñeño'tet Yepartseshar Jesús.

17 Allempoña Pedro ñaña Juan'pa' o' net pot ñesheto ñeñt ame'ñetsa. Nohuet pot ñeshetopa' Yomporña Puecamquëñ'pa' ahuepa't chorraret.

18-19 Añña Simón ñeñt achyo'tañtetsa ahuaña o' chapoña pueyo'chropa' atet ot:

—Añecpuepa't nenet pot attoch chorraret Parets Puecamquëñ.

Allempoñapa' atet otanet Simón:

—Llesenscha' nomporneshacha' o'ch nenanet namña not attoch chorraret Parets Puecamquëñ. O'ch napas quelle attoch sapuen llesens.

20 Pedroñapa' atet och:

—Peçllayorpa' chenquëpa' alla, allo'tpa' pechenquëpa' pama tarro'mar papa' potenapañ o'ch perañtoña Parets Puecamquëñ. Ñeñt'pa' amach errotenot petsa'cho. Añña Yomporpa' o'ch apuey e'ñe atta.

21 Ama pocteyaye o'ch pagap pa llesens tarro'mar Yomporpa' ama pocteye' entennape peyo'cher.

22 Te'pa' aña poctetsa o'ch p̄octape'cherr ello cohuen, o'ch pequechpuerr añ sosya'tsañ o'ch penamuer Yompor peretneñets. Ñato' Yomporpa' o'ch peretnerrnañ atto p̄octape'chen sosya'tsañ.

23 Pedropa' alla otererr:

—Napa' neñoteneñ nanac sosey p̄octape'chen peyočhro, čha p̄ottena atet ñerra'm p̄o'chñarpa' huanqueneñ.

24 Simónñaapa' alla otererr:

—O'ch sanamon Yompor nocop attoch amach es netantoyo atet sotenen. Añpa' allohua atet pena Simón.

25 Pedro ñaña Juanpa' nanac a'potoñet Yompor po'ñoñ all Samario. Ser- rpare'tueneta'pa' alla ahuanerret Jerusaléño. All oñenet samario'marpa' ñeñt yečheta toño'marpa' e'ñe acopoteñ serrpare'tatiesuaneret.

Allempo Felipepa' ame'ñatana etiopo'marnesha'

26 Allempoña añ Felipepa' orrtoña Yompor po'mllañoñeñer atet otos:

—O'ch čhampoch poctopa' o'ch ahuep̄ a'yo, o'ch pečhap amaraño allo'tsen toñ ñeñt sets Jerusaléñoť attoch yečhap anetso añ pa'so'cheñ Gaza.

27 Ñañaapa' atet och Yompor po'mllañoñeñerpa' atetcho' p̄a. Allempoñapa' o' ahuo'. O' čhap all toño ñeñt sets Gazopa' o' entosan puesheñarr etiopo'marnesha'. Añ etiopo'marnesha' ñeñt̄pa' ñeñt̄ amčha'tareť aña po'taruas pen o'ch cohuanmpenan ora allpon quelle ñeñt̄ gobiernocop alla pa'nyo. Pa'neypa' añ pa'so'cheñ Etiopía. Ñeñt̄ nanac amčha'tareťtetsa all pa'nyopa' añ pa'so'cheñ Candace ñeñt̄pa' coyanesha'. Añ yacma ñeñt̄ entos Felipepa' ñeñt̄pa' acapareť acheñ. Añña etiopo'marnesha'pa' errete' asuena' Jerusaléño allempo entos Felipe. Tarro'mar ta all o'ch ma'yochenana' Yompor.

28 Allempoña o' alla puerrerra pa'nyo. Ñapa' alla anen po'carro. Ñeñt̄ña carropa' cahualla matatene'. All anenpa' all lleyen an Yompor po'ñoñ ñeñt̄ara ñoñets lleyen ñeñt̄ quellquē't̄ ahuat̄ Isaías ñeñt̄ a'mtaye't̄ Yompor po'ñoñ.

29 Añña Parets Puecamquēñpa' eñotatan Felipe, ñeñt̄ña ote':

—O'ch penteña' ñeñt̄ anets tarro e'ñe all carro.

30 Felipeñapa' o' mata. Matapa' čhap allame'tetspa' o' e'mosan čho' lleyen an Yompor po'ñoñ ñeñt̄ara ñoñets ñeñt̄ quellquē't̄ Isaías ñeñt̄ a'mtaye't̄ Yompor po'ñoñ ahuat̄. E'mos Felipepa' atet otos:

—¿Eñotočhena't̄ penteñ ñeñt̄ atet oten ñeñt̄ pelleyen?

31 Ñañaapa' atet och:

—Errotenohuate'ca'ye neñochña' amaca'ye eñalle ñeñt̄cha' neñotate'. Ñato' o'ch p̄a'tap̄ p̄a o'ch yanorr parro.

32 O' a'tap̄ Felipepa' o' cohuos all lleyen. Añ lleyen Yompor po'ñoño ñeñt̄pa' añ ñoñets ñeñt̄ quellquē't̄ Isaías:

Atetcha' p̄a ña atet ñerra'm carrnero. Ñehua, carrneropa' o'ch yanem̄ allcha' yemtsepa' amach ama'točto. Amapa' ñerra'm yetsorroñ pue'čpa' amach ama'točto. Atetcha' p̄a ña, amach es oto.

33 Nanac mueročhtachet, ama pocteye' ñeñt̄ atet p̄oñet. Ama erroteno o'ch yotua ora allohuen ñeñt̄ atet sosey p̄a'yes pamo'tsna'tarnesha'. O' muetsetpa', o'huañ corra añe patsro. Añpa' allohua atet quellquē't̄ Isaías.

34 Allempoña ñeñt̄ etiopo'marnesha'pa' o' a'p̄to'ch Felipe:

—Ñehua, p̄oten, ¿eseshocpa't̄ña eñen arr Isaías, ñato' ñocpaťe' amapa' po'psheññecopťe'?

³⁵ Allempoña Felipepa' o' serrpare'tach cohuen ñoñets atet pena Jesús. Eñotach añ ñeñtara Isaías po'ñoñpa' eñen Jesúsocop. Allempoñapa' o' eñotach ñaña po'poñ Yompopor po'ñoñ ñeñtara ñeñt atet pena Jesús.

³⁶ Allña allenet matampenetpa' o' entoset oñ, atet ot etiopo'marnesha':

—Ta'm, ¿pocte'te'te' o'ch napataretta Partsocop?

³⁷ Felipeñapa' atet och:

—Ñehua, ñerra'm po'ñoñch pame'ñena peyoçhrocmañenpa' e'ñe pocte' o'ch p̄apataretta Partsocop.

Etiopo'marnesha'ñapa' atet ot:

—Napa' po'ñoñch name'ñena. Te'pa' neñoteñ Jesucristo ñeñt̄pa' ñeñt̄ Yompopor Puechemer.

³⁸ Allempoñapa' o' tomatoset po'carro sohua'rrtosetpa' o' ahuanmuet oño. Allña apatos Felipe.

³⁹ O' cha'nerret oñoṭpa' Yompopor Puecamquẽñña' o' anman Felipe a'yo. Allña' machayota ma'nata alla. Ñeñt̄ etiopo'marnesha'pa' ama enterrano Felipe. Allempopa' o' ahuerret etiopo'marnesha' e'ñe pocsheñesha'. Añpa' allohua ñeñt̄ atet p̄a etiopo'marnesha'.

⁴⁰ All anetso Azotopa' all orrtierraña Felipe. Allña' serrpare'tatosanet cohuen ñoñets alloch yequeshpa. Allempoñapa' o' ahuo' ñaña anetso Cesareo, nanac serrpare'tyesnom ora anetso'mar all oñomyes.

9

Allempo Saulopa' cotape'cherr ello cohuen Yomporecop (Hch. 22.6-16; 26.12-18)

¹ Allempoña Saulopa' nanac e'moñe'tenan ñeñt̄ ame'ñenaya Yepartseshar Jesús. Pa'tsrre'mueñoṭpa' atet ot:

—Napa' o'ch na'cclatueña' ñeñt̄ ame'ñenaya Jesús.

Ñeñto'marña o' ahuo' allo'tsen ñeñt̄ nanac am̄cha'taret cornesha' e'ñe all Jerusaléño.

² Chap allo'tsenpa' o' enamos orden attoch a'cclatuan ñeñt̄ ame'ñetsa. O' enam orden ñeñt̄cha' anom a'yo anetso Damasco allecma apchenet judionesha' po'prahuo. O'ch chap allpa' o'ch aposan ñeñt̄ am̄cha'tarettetsa puerahuo. Attoch apet all llesens attoch rromanatan acheñ ñeñt̄ cotene' Jesús poctaṭña. Ama't coyaneshaçhno ñaña yacmaneshaçhno o'ch rromanatanet o'ch huancatanet o'ch anmare'tterret Jerusaléño. Atet cotape'chña Saulo.

³ Allempoña agapuan orden allempoñapa' o' ahuo'. O' chap allame'tets Damascopa' machayota ñeñt̄ nanac poptetsa entoṭpa' o' çoyo'tam̄pes e'ñe ñesho.

⁴ O' çoyo'tam̄pespa' ñaña'p̄a' alla rromopra patso. Chap patsopa' e'man ñoñets ñeñt̄ atet oten:

—Esomare't Saule pemueroçhtatennanña ñeñt̄ name'ñenaya.

⁵ Sauloñapa' atet ot:

—¿Eshape't Ayochreshate eñets?

Ñeñt̄ eñetspa' alla otererr:

—Napa' ñeñten Jesús, ñeñtara ñeñten pemueroçhtaten. Añpa' p̄añeña mueroçhtatetsa. Tarro'mar cha p̄ottena ñerra'mrrate' ashen ñeñt̄ e'ñe patpare'teñoñ ñañeñachña atserrpatetsa.

⁶ Sauloñapa' po'yorñoṭpa' cha pa'shmuena allempoñapa' atet ot:

—Partseshacha' te'pa' ¿errofena't penmen ñeñt̄cha' atet nepena?

Partsesha'ña Jesúsapa' atet otererr:

—Te'ñapa' o'ch petanta, ahueḗ Damasco. Allcha'ña otapet ñeñtcha' atet peḗa.

⁷ Ñeñt parro epuet sen Saulo ñetñapa' atta cohuanrrortenet. Pocuanrrorteñoḗtetpa' ama erroḗ oteto. Ñetpa'cho'ña e'muet ñeñt e'morrtatsa tarraña ama es enfeto.

⁸ Allempoña Saulopa' o' tanta. Tantapa' o'ch cohua'yespa' ama ento. Ñeñto'marña atta echa'nmet pototpa' o' anmet Damasco.

⁹ O' chap Damascopa' ma'pamuet Sauloñapa' ama enteno, ñaña ama es rreno, ñaña ama es orreno, ama't coñe'ta.

¹⁰ Damascoñapa' allo'tsen puesheñarr ñeñt nanac ame'ñenaya Yepartseshar Jesús. Ñaña'pa' añ pa'so'cheñ Ananías. Añña Ananíaspa' Yepartseshar Jesús orroña atet ñerra'm puechopoñoḗ o' chore'chpa' atet och:

—¡Ananías!

Ananíasña anaḗpa', atet ot:

—Napa' Nepartseshare añen.

¹¹ Yepartsesharñapa' alla otererr:

—O'ch notapḗ atetcha' peḗa. O'ch ahueḗ allo'tsen toñ ñeñt nanac pa'charr allcha' pentos Judas pa'paquell. Pe'chap all pa'paclopa' o'ch pa'ḗto'tos erro'tsenḗña ñeñt Saulo ñeñt tarso'marnesha'.

Alla otererr Yepartseshar:

—O'ch notapḗ ñaña, añ ñeñtara Saulo e'ñe te'pa' allo'tsen ma'yochetsa.

¹² Napa' o' norrtatuoñ ñeñt o' entua neshoḗ. O' entuan atet ñerra'mrrate' achen añ pa'so'cheñ Ananías huapatsa. O' huapa ñeshopa' o' nosan pot ñesho o'ch alla cohuerr.

¹³ Ananíasña'pa' alla anapuererr:

—Parteshacha' napa' o' ne'mare'ch atet o' pa' añ ñeñtara Saulo. Shonte' achen o' e'mare'tatnet atto ñapa' nanac muero'chtatenan ñeñt pame'ñenaya Jerusaléño.

¹⁴ Te'pa' ñapa' echenan orden o'ch huancatyese'y allohuene'y ñeñte'y pame'ñenaya, o'ch anmatey cárcelo. Ñeñt pa'mcha'tare'ternesha' pen allohuen judionesha' po'cornanesharpa' o' apet Saulo añ orden.

¹⁵ Yepartsesharñapa' alla otererr:

—Tarraña ama't atet te'pa' o'ch ahueḗ all, ñeñt atet o' notuaḗ. Te'pa' o' nene' Saulo ñeñtcha' na'potene' neñoñ amcha'tare'tneshesho. Ama't po'poñe'chno acheneshopa' ñapa' a'po'toncha' neñoñ. Ñaña ama't israelena'tarneshopa' o'ch a'po'ton neñoñ.

¹⁶ Ñaña o'ch neñotach Saulo ñapa' o'ch muero'chta nanac nocop, tarro'mar te'pa' o'ch ame'ña'na na. Añpa' allohua ñeñt atet serrpare't Yepartseshar epuet Ananías.

¹⁷ Allempoñapa' o' ahuo' Ananías o'ch entenana' Saulo. Chap allpa' o' be'tosos pocollo allo'tsen Saulo. O' ponmosyapa' o' nosan pot e'ñe ñesho. Nohuan pot e'ñe ñeshopa' otosan Saulo, atet och:

—Masheñe Saule, Yepartseshar Jesús ñeñtca'ye porrtoya allempo poñen toño. Te'pa' añ ñeñtara Yepartseshar Jesús o' mueñan na o'ch non attoch alla pecuerr, ñaña attoch chorraḗa Parets Puecamquëñ.

¹⁸ Ñeñta otuapa' allorocma rrata'nom pa'clloyoḗ ñeñt atet ñerra'mrrate' es pa'tall, o' alla cohuerr e'ñe cohuen. Alla cohuerr e'ñe cohuenpa' allempoñapa' apatare'tta Yomporecop.

¹⁹ O' apatare'tetuapa' o' rrallme'cherr. O' alla cherr po'huamenc. Allempoñapa' allponmatererr alla Damascopa' o' serrpare't epuet ñeñt ame'ñetsa.

Allempo Saulopa' e'ñe ñenmañ serrpare'terr all Damasco

²⁰ Ñaña Saulopa' chocma sen judionesha' po'prahuo allcha' serrpare'tatenanet atet pena Jesús. Otanet añ Jesúspa' po'ñoçh ñeñtpa' ñeñña Parets Puechemer.

²¹ Allohuenet ñeñt e'muene'pa' otyeset:

—Ta', errotenuañaca'yeña te' ñeñt yacmar. Añmapa' ñeñtca'ye mue-roçhtataye't ahuaña ñeñt ame'ñenaya Jesús all Jerusaléño. Ñeñto'marña te'pa' huena arr; mueneñ o'ch rromanatenana' ñeñt ame'ñetsa o'ch an-marettet cornaneshesho ñeñt pa'mñcha'tareternesha' pen allohuen judione-sha' po'cornaneshar.

²² Saulopa' allo'na sen huomenc pa'nmue' pueyoçher attoch serrpare'tan Yompor po'ñoñ. Nanac serrpare'tatanet atto po'ñoçh Jesúspa' ñeñtara Cristo-tats. Ama't judionesha' ñeñt yeçhetsa Damascopa' ama erroteno anapeto.

Allempo Saulopa' a'yetater judionesha'

²³ Atteña o' allponmatpa' añña judionesha'pa' o'pachet o'ch muetset.

²⁴ Saulopa' e'mare'ch o' o'pachet, o'ch cohuet attoch o'ch muetset. Arr cohuet allotecma be'tenet all aconcha'tamñsaret ora anets. Ellapenete't cohuae'tet ñaña arepenete't.

²⁵ Tarraña ñeñt pueyochresha' Saulopa' o' anmet tsapo allo'tsen pocoll e'ñe all aconcha'tamñsaret anets, allñapa' eñall ventana allot a'suatañperet atarret cañrot.

Allempo Saulopa' puerrerra alla Jerusaléño

²⁶ Allempoñapa' ahuer Jerusalem. Cherr Jerusaléño'pa' atarr mueneñ o'ch entenana' ñeñt ame'ñetsa. Ñeñña ame'ñetsapa' ama mueneto o'ch entenaneta' tarro'mar nanac mecha'teñet, otenapuetañ atto'te' shequënanet o' ame'ña.

²⁷ Añña puesheñarr ñeñt pa'so'cheñ Bernabépa' ñaña'pa' o' anemñ allo'tsen Jesús puellsensarnesha', o' otosanet:

—Añ Saulopa' o' entan Yepartseshar Jesús allempo sen Damasconet. Yepartsesharepa't epuet serrpare't. Ñaña'pa' ama mecha'to ñeñto'mar atarr serrpare't Damasco atet pena Jesús.

²⁸ Allempoteñña'pa' e'ñe pocte' eñchet, allempoñapa' o' e'ñe parrocmatuet. Ñapa' ama mecha'teno ama't mamesha. Atarr nanac serrpare'tan Jesús po'ñoñ.

²⁹ Chocmach serrpare'ten epuet judionesha' ñeñt e'muene' griegaçhpa' tarraña amach pocteye' enteñeto. Allempoñapa' o'pachet ñaña all o'ch muet-set.

³⁰ Allempoña ñeñt parro ame'ñenetpa' anmet Saulo po'poñ anetso Cesareo. Allotpa' o' mueñet ñaña anetso Tarso.

Atto Pedropa' orrtatan Yompor po'partsoña all oteñet Lido

³¹ Atteñapa' o' muetsoñeñtuerra ñeñt amueroçhtatañ. All Judeo ñaña Galileo ñaña Samariopa' o'huañ amueroçhtatarettet atet pete't ahuaña. Allohuen ñeñt ame'ñetsa allo'na senet huomenc pa'nmuet pueyoçhret. Atteñapa' o' shonta'nma ñeñt ame'ñetsa. Pame'ñeñotetpa' allo'na senet mecha'na'tnomuet Yompor. Ñaña allo'na Parets Puecamquëñpa' nanac coshatenanet.

³² Atteña Pedropa' chocmach ta'yena emo'tyese' ñeñt ame'ñetsa. Par-rochpa' o' çhap allo'tsen ñeñt ame'ñetsa all anetso pa'so'cheñ Lida.

³³ Allñapa' entosan puesheñarr yacma añ pa'so'cheñ Eneas. Ñapa' ahuañoteñ echarrtena alla panena o' posoc char.

³⁴ O' entos Pedropa' atet otos:

—O'ch Eneaso notap, Jesucristopa' o'ch a'crraterrep. Te'ñapa' o'ch petanta o'ch pañño'ten pemue'.

Allorocma correna, o' tantena.

³⁵ Allohuen ñeñt yeçheta Lido ñaña Sarónopa' allempoña eñchetpa' cha puesuerret ñeñt ahuat poçtañet o' ame'ñerrñañet Yompor po'ñoñ.

Allempo Pedropa' tantaterran Tabita allempo rroma

³⁶ Eñall puesheñarr coyanesha' ñeñt ame'ñetsa añ pa'so'cheñ Tabita, añ ñeñtara so'chñets Tabita ñeñt otenet griegaçho Dorcas. Ñapa' arr yeçhena anetso ñeñt pa'so'cheñ Jope e'ñe alla allame'tets Lido. Ñaña' nanac amueraña, çhocmach yenpuenan ñeñt huocchañetyets.

³⁷ Allempopa' o' atsna't. Atsna'tpa' atteñapa' o' rroma. Rromapa' pamo'tsesha'ñapa' o' apach atet yeçhenet ñet. Apatuetpa' o' ñanet enonet all tama a'yohuen ñat.

³⁸ Allempoña ñeñt ame'ñetsa allpa' o' e'mare'chet Pedro allame'ttso'tsena all anets Lido. O' e'mare'chetpa' o' mueñet epsheña yacma attoch oteñeta' onepa' all allorocma.

Allempoña çhapuet Pedreshopa'

³⁹ Pedroñapa' o' coterranet. Chap allpa' o' anmet all cuarto eno allo'tsen arromñañ. All tomçhen shonte' rretorrnanesha' ñeñt llecanrortetsa. Allña' all gatanna'tyenet ñeñt chorra'yenet ñeñt sepeçyesanet ahuaña Tabitañ.

⁴⁰ Pedroñapa' mueñuanet allohuenet a'yenet. O' mueñuanet a'yenetpa' o' concorposa, o' ma'yocha. Ma'yochuapa' o' puetallsa arromñañeshonetpa' atet och:

—O'ch Tabita notap, petanterra.

Allempoñapa' acuerroche'. O' enterran Pedropa' cha anerrets.

⁴¹ Pedroñapa' cheter pototpa' echanter attoch terr. Allempoñapa' o' çhore'terran ñeñt ame'ñetsa ñaña rretorrnaneshachno. O' be'tosçha'terretpa' o' gaterranet o' tanterra ñeñt rromats.

⁴² Allohuenet ñeñt yeçheta all Jopopa' o' e'mare'chet atet pena Pedro. Ñeñto'marña shonte' acheñ o' ame'ñeret Yepartseshar Jesús.

⁴³ Pedroñapa' alla a'pa atomat alla Jopo. O' a'pa all Simón pa'paclo. Ñeñt Simónpa' añ po'taruas pen o'ch a'cohuenetyesan pa'rrom.

10

Atet pa capitán Cornelio epuet Pedro

¹ Eñall puesheñarr capitán, añ soche't Cornelio. Ñaña' allo'tsen anetso añ pa'so'cheñ Cesarea. Allña' ña mueñanatene' çharroch çharra' guardiane-sha' ñeñt oteñet Guardia Italiana.

² Aña Cornelioñapa' nanac cohuen cotape'che't Partsocop, ñaña nanac mecha'na'teñ. Ama't ñeñt yeçheta e'ñe parro ñetpa'çho'ña cotape'chete't cohuen Partsocop. Ñapa' nanac amueraña, shonte' es apa'yese'ñe't ñeñt es palltatse't. Ñaña çhocmach ma'yochenana Parets.

³ Atta yeçhena ama't ahuatoteñ. Parrochpa' o' coya'nen atsne'pa' orrtoña ñeñt Yompor po'mllaño'teñer. Orrtoña atet ñerra'm pueçhopoño't, tarraña ama çhoye' çhopo'teñe. Tarraña o' orrtoñapa' e'ñe cohuen eñch. O' huapapa' atet otos:

—¡Cornelio!

⁴ Ñaña' puerñcha'naño'tpa' atta cohue', alloñapa' atet otap:

—¿Eso'tña Partseshacha' pemnen?

Mellañoñeñapa' alla otererr:

—Pema'yocheñoñ te'pa' o' yerpaña Yompor. E'ñe pocte' entennañ atto es ñapa'yeñ ñeñ es paltetsa.

⁵ Te'ñapa' añ pocte' o'ch pemñe acheñ Jopo o'ch ñagotach puesheñarr añ pa'so'cheñ Simón, ñeñtara oteñet Pedro.

⁶ Ñapa' all a'puena po'psheñeñ Simón pa'paclo. Te'pa' ñachña ñoterre' ñeñtcha' atet peperra. Ñehua, ñeñt Simón all a'puena Pedro ñeñtca'ye a'cohuenetyene'ña pa'rrom. Pa'paquëllpa' ontapo'tsen. Añpa' allohua atet ot Yompor po'mllañoñeñer.

⁷ Ñeñta otuapa' o' ahuer. Ahuerrpa' Cornelioñapa' chore'tan epsheña ñeñt taruaset e'ñe alla pocollo, chore'tan ñaña puesheñarr po'solltarer ñeñt'pa' añ po'taruas penet attoch cohuanñpeñet po'cañtánret. Añpa' ñeñt cohuen coñape'chets Partsocop ñaña.

⁸ Alloñpa' o' serrpare'tatanet ora atto orroña Yompor po'mllañoñeñer. Ñeñta serrpare'tatuanetpa' o' mueñanet Jopo. Allempoñapa' ahuanmuet.

⁹ Tsapañña' o' chapmochet Jopo. O' chapmochetpa' Pedroña e'ñe alla pocolopa' o' a'tap eno allcha' ma'yochosa. Allempopa' chapmoch pocto.

¹⁰ O' chapmoch poctopa' cheporra Pedro. Atarro' mueneñeñ o'ch rra'pa' tarraña ama potena'ña rreñets. Alla cohuenpa' o' huapoña ñeñt atet ñerra'm cho' es chopo'ten.

¹¹ Entoñapa' o' entan ñeñt atet ñerra'm atarr shetamuets. Enoñpa' cha sohuanñpesnena, a'charamñsaret pa'tats po'topñe'marot. Añña ñeñt a'charamñsaretpa' sohua'netsa patsonet e'ñe ñeshonet.

¹² Allña shetamtso e'ñe o'ponopa' allo'tsa'yen shonte' pa'namen berro'chno, ama't po'poñ berro'chno ñeñt ama arrapoye' eñche'te judionesha'. Ñaña allo'tsa'yen pa'namen shechpe'chno ñaña pa'namen ote'chno.

¹³ O' chap allame'tets ñesho, Pedroñapa' e'man ñoñets, atet oten:

—Pedro o'ch pemtsa añ berr o'ch perre'.

¹⁴ Pedroñapa' atet ot:

—Ama Nomporkha', nerreñe. Napa' ama't ahuatapa' ama nerrare ñeñt ama arrapahuoyaye atet yey'chena ya ñeñtey judioneshay.

¹⁵ Allempoñapa' o' alla otererr ñeñt eñets, atet ot:

—Ñeñt o' a'cohuentatua Yomporpa' ñapa' amach ñotatsto añmapa' ama cohuenayaye.

¹⁶ Añpa' e'ñe ma'pocha e'ñpa' allempoñapa' o' alla a'terr enonet, o' alla chenquerra.

¹⁷ Allempoñapa' Pedropa' nanac moñne'tacha, o' coñape'chpa' atet ot:

—Esuañaca' otenenña ñeñt o' nentua.

Ñeñt nanac moñne'tenapa' allempocma chap ñaña ñeñt mueñen Cornelio. Ñetpa' o' a'p'to'tnomuet errate' ye'chenaña Simón. Allempoña entoñet Simón pa'paquëllpa', o' chapuet alloñ be'tenetpa'

¹⁸ o' chore'toset atet otoset:

—¿Arre't a'puenaña ñeñt sochetsa Simón ñeñtara ñeñt otenet Pedro?

¹⁹ Pedroñapa' e'ñe alla enopa' ama't orameñ moñne'tenana ñeñt o' entuapa' añña Parets Puecamquëñpa' atet och:

—O' chap ma'psheña acheñ ñeñt pe'nene'.

²⁰ Te'pa' o'ch pesuerra tayecma o'ch pocterranet. Amach pemcha'tatsto. Napa' na mueñenahuet atto huapuet arr. Añpa' atet ot Parets Puecamquëñ.

²¹ Ñeñta otuepa' Pedroñapa' asuerroche' patso. O' chap allo'tsen añ ma'psheña atet otapanet:

—Napa' naña ñeñten se'nen. ¿Esocpa'tña sehuena?

²² Ñetñapa' atet ochet:

—Yapa' añ yemñene' capitán Cornelio. Capitánpa' oten ñonepa'to'. Ñapa' orrtoña Parets po'mllañoñeñer atet och: “Pagotach Pedro onepa'. Ñaña pocte' o'ch pe'mñoñoch ñeñtcha' atet otaḥ.” Atet och Parets po'mllañoñeñer. Ñeñto'marña yapa' o' yehuapa. Tarro'mar capitán Corneliopa' ñapa' e'ñe cohuen coḥape'chen Partsocop ñaña nanac mecha'na'teñ. E'ñe cohuen enteñ allohuen judionesha'.

²³ Allempoña Pedropa' atet otapanet:

—Ñehua, sebe'tos allach sa'pa, tsapañachña ahuey parro.

Allñapa' alla moset, tsapañapa' ahuanenet. Po'potantañpa'cho'ña ñeñt ame'ñetsa e'ñe alla Jopopa' o' coḥa'huanmuet ñamet.

²⁴ Tsapañapa' o' chapuet Cesareo. Cornelioñapa' alla cohueñan Pedro o'ch huapa. Ñapa' o' hua'ña'huan pamo'tsesha' ñaña po'potantañ ñeñt epuet yemtena. Ñetñapa' all cohueñet e'ñe parro.

²⁵ O' huapa Pedro. O' huapapa' Cornelioñapa' o' tantnoma attoch o'ch poctaḥ. O' concorposñaña o'ch ma'yochaḥya.

²⁶ Tarraña Pedroñapa' o' cheterpa' atet och:

—Petanterra, amach pema'yochatsetno. Napa'cho'ña arromñañena.

²⁷ O' tanterrapa' serrpare'tatanna'tet mame'pa' alloñapa' o' be'toscha'tet pocollo. Allñapa' o' entosan shonte' acheñ ñeñt o' cha'cha't.

²⁸ Allempoñapa' otanet Pedro:

—Sapa' señoñeñ ya judioneshaypa' ama pocteye' yenteñe o'ch yeyemcha po'poñ acheñ ñeñt ama judioneshayaye. Tarro'mar yapa' atet yeychena amach yeya'rrotatsche acheñ ñeñt ama judioneshayaye. Tarraña te' Yomporpa' o' ye'chatuan amach yentatsche po'psheñeñ atet ñerra'mrrate' ñeñt ama cohuenayaye.

²⁹ Ñeñto'marña te'pa' o' nohuapa arr tayecma allempo agotatenet. Te'ñapa' o'ch na'ḥto'taḥ ¿esocopte' ḥagotatenen?

³⁰ Allempoñapa' Cornelioñapa' atet ot:

—Ahuaña o' taya pa'tatsmat met, napa' alla nema'yochena, ñaña nema'yochenoñ o' neque'chpa' nerrar mame'. Ñeñt attecma nepena allempocma nema'yochena nepaclo atet ñerra'm te' coya'nen atsne'. Allempopa' machayota orrtona puesheñarr yacma e'ñe allame'tets. Pa'shtampa' añ chorrena ñeñt nanac cohuen poḥtetsa.

³¹ Ñaña'pa' otosen: “Cornelio, pema'yochenoñ te'pa' e'muenep Yompor. E'ñe pocte' entennaḥ atto es ḥapa'yeñ ñeñt es palltetsa. Ñeñto'marña te'pa' o' yerpaḥa.

³² Te'ñapa' o'ch pemñe acheñ Jopo o'ch ḥagotach puesheñarr ñeñt pa'so'cheñ Simón ñeñtara ñeñt otenet Pedro. Ñapa' alla a'puena po'psheñeñ Simón pa'paclo. Ñach huapatsapa' ñapa' serrpare'tatoseḥcha'. Ñehua, ñeñt Simón all a'puena Pedro ñeñtca'ye a'cohuenetyene'ña pa'rrom. Pa'paquellpa' ontapo'tsen.” Añpa' allohua atet oten ñeñt norrtoya.

³³ Ñeñto'marña nagotatenep. Te'pa' e'ñe pocte' o' pehuapa. Te'pa' Yompor eñoteney ñeñtey arro'tsa'yeney yemneñ o'ch ye'mñoḥtaḥ o'ch peserrpare'tatey errponte' Yompor ye'chateneḥ.

Allempo Pedropa' serrpare'tatosanet Cornelio pa'paclo

³⁴ Pedroñapa' alla oterrerr:

—Po'ñooh te'pa' o' neñooh tarro'mar o' chapona neyoohro, ama ñap̄ta judionesha' morrentenoña Yompor.

³⁵ Añña ama't erra'tsen pa'namen acheñ, eñallcha'ña puesheña'tets ñeñtcha' mecha'na'tene' Yompor ñaña ñeñtcha' e'ñe cohuen es pets Yomporecop. Ñeñtpa' e'ñech pocte' enteñ Yompor, ama't erra'tsena acheñer.

³⁶⁻³⁷ Alla oterrerr Pedro:

—Sapa' señoñe'tña Yomporpa' o' muevoñay Puechemer Jesucristo, ñeñtey judioneshapay. Añ ñeñtara Jesús'pa' o' a'pocatuonay e'ñe cohuen Partsocop attoch cosheñtso'tseneycha'. Te'ñapa' ñach Yepartseshar yeperr allohueney. Añ cohuen ñoñetspa' o' serrpare'tuet erracmañen Judeo'mar. Ñanompa' serrpare'chete't Galileo allempo apate't Juanañ.

³⁸ Alla oterranneterr Pedro:

—Señoñe'te' Yomporpa' o' nan Puechemer Jesús ñeñt nazareto'marnesha'. O' chorracha Parets Puecamquëñ ñaña nanac ahuañencat pe'. Allotpa' all chopeñe'chyese'tpa' nanac amuerañte't. A'crratyeseñe't allohuen ñeñt muerochtatyese't oneñe't, tarro'mar Pomporpa' nanac yenpue't.

³⁹ Alla oterranneterr Pedro:

—Yapa' o' yentuoñ ora allpon atet pa'yese't all yeçhena judionesha' ñaña all Jerusaléño. Yapa' o' yentue ñeñto'marña te'pa' o' ya'potoñ ñeñt atet pa'yese't. Alloñapa' o' corso'tam̄pset tsacho, atto muetset.

⁴⁰ Tarraña poma'pamtañopa' tantater Pompor. Allempoña Pomporpa' orrtaterrnay e'ñe ya yocop.

⁴¹ Tarraña ama allohuenacpaye' orrterro, e'ñe yañeñacpa ñeñtey na' Yompor o'ch ya'potoñ ñeñt atet pe't Jesús. Allempoña tanterrapa' yapa' yerrallme'chapretuer ñaña yorruerr coñe'ta'tets parro.

⁴² Alla oterrerr Pedro:

—Ñapa' o' otey o'ch yeserrpare'tach acheñenesha', o'ch ya'potoñ atto yeñooh Yomporpa' o' nan Puechemer Jesús ñach acre' allohuen acheñenesha' —errofencha' corret puesheña'ttset. Acrancha' allohuen acheñenesha' ama't ñeñt corretsa ñaña ama't ñeñt o' colla'huen.

⁴³ Alla oterrerr Pedro:

—Ñeñt ama't ahuañ ñeñt a'mtaye't Yompor po'ñoñpa' ñeñtara Jesús a'potete't. Ama't ahuañ ñetpa' otete't ñerra'm yame'ñera ña Pomporpa' e'ñech peretna'huerrnay yo'chñar.

Allempo ñanom chorrannet Parets Puecamquëñ ñeñt ama judioneshayaye

⁴⁴ Ama't allempo serrpare'ten Pedropa' añña Parets Puecamquëñpa' ahuepa't chorrannet allohuenet ñeñtet e'mñote'.

⁴⁵ Añña judionesha' ñeñt ame'ñetsa ñeñt parro huapa Pedro, ñetñapa' atta cohuanrrortenet, o' otet:

—Errotenotuäte'ca'ye chorrannet ñamet Parets Puecamquëñ e'ñe attota, ñetpa' amaca'ye judioneshayayeto. Atet otet ñet.

⁴⁶ Tarraña po'ñoohpa' ahuepa't chorrannet ñamet Parets Puecamquëñ tarro'mar ñetpa'cho'ña ahuepa't eñosyaset po'poñ ñoñtso. E'ñe po'poñ ñoñtso aye'chochtachet Yompor. Atto e'manet judionesha'. Allempoñapa' atet ot Pedro:

⁴⁷ —Ama't pocte' senteñe o'ch apatare'ttet Partsocop. Tarro'mar o' chorrannet Parets Puecamquëñ e'ñe atet ñerra'm ya.

⁴⁸ Allempoñapa' otanet Pedro:

—Te'pa' e'ñe pocte' same'ñeñoñ Jesucristo o'ch sapatare'tta.

Allempoña apatare'ttuetpa' atet ochet Pedro a'puepa'to' alla allponmat.

11

Allempo Pedropa' serrpare'tatuerranet Jerusaléño

¹ O' allponmat Jesúsña puellsensarnesha' o' e'mare'chet atto po'poñ acheñ ñeñt ama judioneshayaye o' ame'ñerrñañet ñamet Yompor po'ñoñ. Atto e'mare'ch Jesús puellsensarnesha' ñaña po'poñechno acheñ ñeñt ame'ñetsa all Judeo.

² Allempoña ahuerr Pedro. Allempo cherr Jerusaléño'pa' judionesha' ñeñt ame'ñetsa allpa' o' che'ptare'tapueret Pedro.

³ O' che'ptare'chet Pedro, atet ochet:

—Eso'mare'tña petaña allo'tsen ñeñt ama judioneshayaye, ama't allpa' o'te' cha perrallme'chapretos—anet.

⁴ Allempoña Pedropa' o' serrpare'tatuerranet ñeñt e'ñe atet pa;

⁵ atet otanet:

—Napa' allo'tsenen Jopo. Allempo nema'yochena huapona ñeñt atet ñerra'm cho' es ye'chopo'ten. Entoñapa' o' nent ñeñt atet ñerra'mrrate' sheta-muets. Enotpa' cha sohua'nena acharampsaret e'ñe pa'tats po'toñe'marot. Añña ñeñt acharampsaretpa' sohua'netsa patsonet e'ñe neshonet.

⁶ Napa' o' necue'pa' allña o'ponopa' nent pa'namen berrochno ñaña ñeñt puetsato'mar, ama't po'poñ berrochno ñeñt ama arrapahuoye' yenteno ya ñeñtey judioneshay. Nent ñaña pa'namen shechpechno, ama't ñaña pa'namen otechno.

⁷ Allempoñapa' ne'm ñoñets, atet oten: “Pedro o'ch pemtsa añ berr o'ch perre'.”

⁸ Tarraña napa' not: “Ama Nomporcha' nerreñe. Napa' ama't ahuatapa' ama nerrare ñeñt ama arrapahuoyaye atet yeychena ya judioneshay.”

⁹ Allempoñapa' alla otterrerr ñeñt eñets entoñ, atet ot: “Ñeñt o' a'cohuentatua Yomporpa' papa' amach potatsto añmapa' ama cohuenayaye.”

¹⁰ Añpa' e'ñe ma'pocha ne'ñpa' allempoñapa' o' alla a'terr enonet o' alla chenquerra—ora.

¹¹ Allempocma o' chap ñaña ma'psheña acheñ. Chapuet all pocollo all nommuena. Añ ma'psheña acheñpa' arroñ mueñonet Cesareot.

¹² Añña Yompor Puecamquëñña'pa' oten o'ch nocterranet. Oten amach nemcha'tatsto. Añ pechapsheña ñeñt arro'tsen te' o' yahuanma parro. Allempoñapa' ye'chap pa'pacillo ñeñt nagotatene'.

¹³ Allempoña o' ye'chap pa'pacillo'pa' ñaña'pa' o' serrpare'tatapuey atto' orrtoña Yompor po'millañoñeñer. Orrtoñapa' atet otos: “Añ pocte' o'ch pemñe acheñ Jopo o'ch pagotach puesheñarr añ pa'so'cheñ Simón ñeñtara ñeñt otenet Pedro.

¹⁴ Añña Pedropa' ñeñtcha' peñotate' attoch pequeshperra ñaña allohuen pamo'tsesha'.” Atet oten Yompor po'millañoñeñer.

¹⁵ Nañapa' o' neserrpare'tosñañ Yompor po'ñoñ. Allempo neserrpare'tenpa' añña Parets Puecamquëñña' ahuepa't chorraret. O' chorraret ñet e'ñe attecma chorra'ya ahuaña yaña.

¹⁶ Allempoñapa' o' neyerepya atet otey ahuaña Yepartseshar Jesús: “Juanña' e'ñe oñochaya apate't tarraña na añcha'ña nechorrasa Parets Puecamquëñ.”

¹⁷ Nehua, Yomporpa' e'ñe pocte' enteñ o'ch chorraret ñet e'ñe attecma atet chorra'ya ya allempo yame'ñya Yepartseshar Jesucristo. Nehua, ñerra'm e'ñe pocte' enteñ Yomporpa' nañapa' erroñenoñate'ca'ye neche'ptare'chña Yompor.

¹⁸Ñeñta otuapa' allempoñapa' alla moma'huet allohuenet. Allempoñapa' o' aye'chochtatoñet Yompor, atet otet:

—Ama't po'poñ acheñ ñeñt ama judioneshayaye Yomporpa' mueneñ o'ch cotape'cherret ello cohuen alloch ñetpa'cho'ña corretsetach pocsheñeshocmañen e'ñe tayoteñ errponañohuen. Allohua ñeñt atet pa Pedro ñaña Cornelio.

Atto epa'hua Yompor po'ñoñ erraparen

¹⁹Allempo muetset Estebanpa' allempoteñña orrta muerochteñets. Nanac muerochtachete't ñeñt ame'ñetsa. Ñeñto'marña yetrra'tyeset allemeña, par-ratse'tyeset po'poñ anetso'mar. Puesheña'tetspa' ahuanmuet Fenicio'mar; po'potantañña' ahuanmuet Chipro, po'potantaña' ahuanomyeset Antioquío. All chopeñe'chyesnomuetpa' all serrpare'tyesnomuet Yompor po'ñoñ, tarraña aña serrpare'tatnomuet ñapuet judionesha'.

²⁰Tarraña puesheña'tets chipro'marnesha' ñaña cireneo'marnesha' ñeñt ame'ñetsapa' o' chapuet Antioquío. Allña' aña serrpare'tatoset ñeñt griegonesha'. Añ serrpare'tet ñeñt atet pena Yepartseshar Jesús.

²¹Yomporpa' nanac ahuamencat panet. Ñeñto'marña shonte' acheñ ame'ñachet Yepartseshar Jesús, o' a'ypo'ña'huerret ñeñt ahua't poctapñet.

²²Añña ñeñt ame'ñetsa Jerusaléño'pa' o' e'mare'chet atto shonte' ame'ñetsa Antioquío. Ñeñto'marña mueñet Bernabé Antioquío, o'ch yenpuenaneta'.

²³Allempo chap Bernabé allpa' entosan po'ño'ch o' orrta Yompor puemuereña all. Ñeñto'marña nanac coshosa. O' cotape'chatosanet, atet otanet:

—Amach sequechpatstere Yompor po'ñoñ. Huomenccha' sepa' seyo'cher.

²⁴Añña Bernabépa' ñapa' nanac amueraña, nanac chorreña Parets Puecamquëñ. Atarr ame'ñena. Ñeñto'marña shonte' ame'ñatana acheñenesha' attoch coteret Yepartseshar.

²⁵Allempoña ahua' Bernabé. O' chap Tarso allcha' e'nerrana' Saulo. Allña entospa' a'secher o'ch aner Antioquío.

²⁶Épsheño'maret alla a'puet paterr char Antioquío. Allña' nanac yechachete't ñeñt a'pchatse't all pame'ñeño'fet Yompor. Shonte' acheñ ame'ñatsa all. All Antioquíopa' añ asocharettet ñeñt ame'ñetsa "Cristona'tarnesha'." Ñanom arr Antioquío asocharettet atet.

²⁷Allempoña Jerusaléño'pa' allo'tsen puesheña'tets ñeñt a'mtene' Yompor po'ñoñ. Parrochpa' onacha'tet. Chapuet Antioquíopa'

²⁸añña ñeñt pa'so'cheñ Agabopa' o' tomospa' serrpare'tatosanet, atet otanet:

—Orrtach muecheñets esempo erraparen patso. Añpa' allohua ñeñt atet ot Agabo.

Añ eñotate' Yompor Puecamquëñ, ama't allempopa' ama orrtena' muecheñets. Allempo añcha'tare'tta Claudiopa' allempoña orrta muecheñets.

²⁹Ñeñto'marña allohuen ñeñt ame'ñetsa Antioquíopa' o' a'pochachet o'ch mueñet ñeñtcha' yenpue' pa'mo'nasheñnesha' ñeñt yechetsa Judeo.

³⁰Allpon echyenetpa' allpon apa'yeset. Atet a'pochachetpa' atet'cho' pet. O' apueñet Bernabé ñaña Saulo, ñetñapa' anmet Jerusaléño, allña' aposet ñeñt pompornesha' pen ñeñt ame'ñetsa Jerusaléño.

12

Allempo añcha'taret Herodes muetsaterran Jacobo, yottam̄psatan ñaña Pedro

¹ Allempopa' añña añcha'taret Herodespa' rromatan puesheña'tets ñeñt ame'ñetsa attoch muerochtachet.

² Rromuet Jacobo o' muetset. Añ Jacoboñpa' ñeñtara ñeñt Juan pa'mo'nasheñ. Atto muetsetpa' cho pechoñet poñ.

³ Ñeñña muetse'pa' nanac coshatan judionesha' ñeñt ama ame'ñetso. Allempoña añcha'taretpa' nanac mueneñ o'ch alla coshaterranerr judionesha'. Ñeñto'marña pascuapopa' allempoch rrerretterr pan ñeñt ama a'chasareteyayepa' o' alla rromaterranerr ñaña Pedro.

⁴ Rromuet Pedropa' o' abe'tet cárcelo. Net çharra' puechena pechap solltarnesha' ñeñtcha' cohuañpse'. Ñanompa' o'ch neñet pa'tatsheña solltarnesha' ñeñtcha' cohuañpene'. Allotpa' o'chña muenme'cheñetpa' o'ch huena po'potantañ pa'tatsheña ñeñtcha' cohuañpene' ñaña. Ñeñña çharra' puechena pechap solltarpa' atfach penet, çhach camyannenet. Añ cotape'chña Herodes o'ch metua pascuapopa' o'ch orrtatan Pedro allo'tsa'yen acheñenesha'.

⁵ Atteñapa' nanac huomenc cohueñet Pedro cárcelo. Tarraña ñeñt ame'ñetsapa' atarr ma'yochañpeñet Pedro.

Atto Yompor po'mllañoñeñerpa' cha'nmaterran Pedro cárcelo

⁶ Atteñapa' allponmat o' çhap allempoch tsapaçha' Herodespa' o'ch ortata'muenan Pedro allo'tsa'yen acheñenesha'. Tsapoña Pedropa' all muenpa' all rroçhtam̄peñ epsheña guardia all rromañpeñet allo ehucare't cadeno epo'mar pueçot. Ñaña a'yotpa' all cohuañpeñ po'potantañ solltar e'ñe allot be'tenet.

⁷ Atteñapa' machayo'ta puetaresua e'ñe alla o'pono. Orrtoña Yompor po'mllañoñeñer. Añña mellañoñeñpa' o' a'p'llan Pedro puepototpa' o' opuepa' atet och:

—Petanta tecma.

Añña cadena allo' huanquëñetpa' çha pueya'nets e'ñe ñoña.

⁸ Añña mellañoñeñpa' atet och:

—Pechana'pena peshtam, o'ch penen ñaña pesapat.

Atet och mellañoñeñpa' atto'cho' pa. Allempoñapa' alla otererr:

—Te'pa' pechorrena ñaña peshtam ñeñt penen enot. Allempoñapa' o'ch poctenen.

⁹ Allempoñapa' o' çha'nen cota'nenan mellañoñeñ. Pedroñapa' çha otenapañ attate' çhopo'teñ, tarraña ama çhoye' çhopo'teñe. Allempoñapa' o' ahuanenet.

¹⁰ Ahuanenetpa' o' metenet all cohuen puesheñarr guardia. Ahuerretterr allponpa' o' meterretterr all cohuen po'psheñeñ guardia. Allempoñapa' o' çhenet allot e'ñe çha'nenet allecma chopeñe'chen acheñenesha'. Chenet yetarropa' ñeñña yetarropa' asret nanac echarr. O' çhenet e'ñe allpa' añña yetarropa' o' tora'nom e'ñe ñoña. Tora'nenpa' ñetñapa' o' çha'nenet. Chenet a'yotpa' allña' all chope'chnomuet e'ñe parro mame'pa' allotña'pa' o' ahuerña Yompor po'mllañoñeñer allotña'pa' o' ñapñamena Pedro.

¹¹ Allempoñapa' çhapoña Pedro pueyoçhro, atet ot:

—Po'ñoçhepa't ama çhoye' neçhopo'teñe. Yomporepa't mueñene' po'mllañoñeñer attoch a'qeshpaten. Te'pa' Herodespa' amach erro't pa'no. Judionesha'pa'cho'ña e'ñe orrena o'patenna.

12 O' çhapaña pueyoçhro tematenñapa' o' çhap allo'tsen María pa'paquëll. Añña Mariápa' ñeñt pachor Juan Marcos. Chap all pa'paclopa' allñapa' allo'tsa'yen shonte' acheñ all ma'yochenet o'pono.

13 O' çhap allot be'tenetpa' çhore'tosanet. O'ponoñña' çha'nom puesheñarr shopshesha' añ pa'so'cheñ Rode.

14 Huapapa' o' cheme'tan Pedro po'ñoñ. Pocsheñesha' materra o'pono o'ch oterrana' acheñenesha' ñeñt o'pono'tsa'yen. Tarraña ama toramñpsano Pedro. Cherr o'ponopa' atet otanet:

—Pedrepa't o' huena, allo'tsena a'yot.

15 Ñetñapa' çha otet:

—Amate'ca'ye ñeñteyaye, atta potyen çhate' pemospuena.

Ñañaapa' alla oterrerr:

—Po'ñoçhca'ye Pedro.

Ñetñapa' oterreterr:

—Amate' Pedroyaye. Ñato' añte' Yompor po'mllañoñeñer ñeñtcha' cohuamñpse' Pedro.

16 Atteñapa' Pedroñapa' alla çhore'terraneterr yetarroñ. Allempoñapa' toramñpset. Toramñsetpa' añepa't Pedro. Allempoñapa' atta cohuanrrortet.

17 Pedroñapa' o' echantan pot attoch o'ch muetsoñeñtet allochñapa' o'ch serrpare'tatuenanet. Allempoña o' muetsoñeñtuetpa' atet otanet atto Yomporpa' o' çha'nmater cárceloñ. Otanet ñaña:

—O'ch soteña' Jacobo ñaña po'potantañ masheñnesha' atto çha'nmaterren Yompor po'mllañoñeñer.

Allempoñapa' alla ahuer Pedro.

18 Atteñapa' o' puetaren. Arrña cárcelo solltarnesha'ñapa' puenñchañoñetpa' otanna'tyeset:

—Errotenoñuañaca'ye çha'nenña Pedro. Errahuañaca'ye o' ahuen.

19 Atteñapa' o' e'nater Herodespa' ama esesha' entaye. O' alla a'pto'tare'tereter solltarnesha' ñeñt cohuene' cárcel ama esesha' entaye errotenoñe' o' ahuen. Allempoña Herodesñapa' o' muevo'tuan solltarnesha' a'yo allcha' muetsanatatanet. O' allponmat Herodesñapa' o'cho' ahuo' Judeot o'ch ahuo' Cesareo allñapa' allach allponmatena'.

20 Allempoña Herodesñapa' nanac e'moñe'tenan tiro'marnesha' ñaña sidóno'marnesha'. Ñeñto'marña o'huañ apanet rreñets ñeñt nanac palltenet pa'nyeto. Ñeñto'marña ñetpa' mueneñet o'ch alla amo'tsteret Herodes attoch o'ch alla apuerranet ñeñt palltenet. Ñeñto'marña huaçha'ta shonte' tiro'marnesha' ñaña sidóno'marnesha' o'ch enteñeta' Herodes. Añña Herodes pa'taruasañer añ pa'so'cheñ Blastopa' e'ñe cohuen entapanet. Ñañaapa' o' a'pocatanet attoch ñetpa' serrpare'tet epuet añcha'tareñ.

21 Chap allempo'ch serrpare'tet epuet añcha'tareñpa' Herodesñapa' o' chorrana nanac coçhnesha' pa'shtampa' anorros po'conaño'pa' eñosos. O' eños atet ñerra'm ñeñt añcha'tareñ nanac.

22 O'ña eñosua acheñenesha'ñapa' o' rrannartetpa' atet otyeset:

—Ama acheñenocheye' eñetso, Partsepa't eñets.

23 E'ñepa'tcha' allempocma huapona Yompor po'mllañoñeñer o' atsna'tatosan Herodes. O' atsna'tpa' e'ñe rrohue pueñpa' o' rroma. Tarro'mar Herodespa' mueneñ o'ch Partsocoptarta. Acheñenesha'ñapa' o' aye'choçhtatoñet atet ñerra'm Parets. Amaña çhoye' otaneto eñallña paterr Yompor. Añpa' allohua atet pe't Herodesoñ.

24 Allempoñapa' o' epa'hua Yompor po'ñoñ erracmañen. Allo'na ame'ña'huanena shonte' acheñenesha'.

²⁵ Añña Bernabé epuet Saulopa' o' asueneta' Jerusaléño, pomhueneta' quelle. Pomhueneta' quella' o' puerraçherret Jerusaléño. Añña Juan Marcospa' o' coterranet.

13

Allempo Pablo ñaña Bernabépa' ahuo't serrpare'tatoset anetso Chipro

¹ Ñeñt pame'ñeñoŕet apçhatse't Antioquíopa' allo'tsen puesheña'tets acheñ ñeñt a'mtene' Parets po'ñoñ, ñaña allo'tsen ñeñt nanac cohuen yeçhatatse't Yompor po'ñoñ ñeñt atet ñerra'm añ: Bernabé, ñaña Simón, ñeñt Simónpa' oteñet ñaña Negro, ñaña allo'tsen Lucio ñeñt cireneo'marnesha' ñaña allo'tsen Manaén ñeñt parro cheshat Herodes ñeñt añcha'tarettetsa all Galileo, ñaña allo'tsen Saulo.

² Allempo çhocma cohuentatoñete't Yompor, ñaña errotenopa' çhoch tore'tete't.* Atteña añña Parets Puecamquëñpa' eñotatanet, atet otanet:

—Añ pocte' o'ch sene' Bernabé ñaña Saulo ñetpa' o'ch senanet nocop. Napa' o'ch napanet ñeñtcha' po'taruas pet nocop.

³ E'ñe allempopa' tore'tetset. Allempoñapa' ma'yochet. Ma'yochuetpa' o' net pot ñeshetopa' allsensarettet allcha' torroñet Yompor po'taruas.

⁴ Allsensarettet e'ñe Parets Puecamquëñoŕpa' ahuanmuet Seleucio. Seleucioñapa' ahuanpset boto, o' çhapuet Chipro.

⁵ Allña pueblo all çhapuetpa' añ pa'so'cheñ Salamina. Çhapuet Salaminopa' o' ahuanmuet judionesha' po'prahuo allcha' serrpare'tosñañet Yompor po'ñoñ. Ñaña cotenanet Juan Marcos ñeñtcha' yenspahuet.

⁶ Atteñapa' o' ahuanmuet serrpare'tats erracmañen all oteñet Chipre. Çhapuet po'poñ anetso añ pa'so'cheñ Pafos. Allñapa' entoset puesheñarr judionesha' ñeñtpa' achyo'tañ añ pa'so'cheñ Barjesús. Ñaña' nanac serrpare'taten, tarraña ama Yomporeye' po'ñoñ a'mteno.

⁷ Ñaña' çhocma yemtenana ñeñt añcha'tarettetsa atet ñerra'm gobierno' ñeñt allo'tsen. Añña añcha'taretpa' añ pa'so'cheñ Sergio Paulo, ñeñtpa' nanac es eñot. Añña añcha'taretpa' o' agotatan Bernabé ñaña Saulo. Ñapa' mueneñ o'ch e'man Yompor po'ñoñ atet serrpare'tenet.

⁸ Tarraña ñeñt achyo'tañpa' ama muenatano añcha'taret o'ch ame'ña. Ñaña' mueneñ o'ch a'mçettanet attoch amach ame'ñacheto añcha'taret. Añ ñeñt achyo'tañpa' ñeñtara oteñet ñaña Elimas.

⁹ Allempoña Saulopa' o' huomenc cohuanan ñeñt achyo'tañ. Ñehua, Saulopa' ñeñtara oteñet ñaña Pablo. Ñaña' e'ñe chorreña Parets Puecamquëñ.

¹⁰ O' cohuan achyo'tañpa' atet och:

—Papa' nanac peshquëñ acheñ, nanac peyeçcaten ñeñt ama cohuenayaye. Aña ppor pepen oneñe't. Nanac pe'moñe'teñ ñeñt poctetsa Yomporecop. Esemphuachñaca' peuna'ña atto p'oten ama cohuenaye Yompor po'ñoñ. Añpa' ñeñtña po'ñoçh ñeñt cohuentetsa.

¹¹ Te'ña Yomporpa' o'ch tsa'tatapa. Te'pa' amach pecuerro. Allponmatcha' amach penterro puetare'.

Allempocma o' checmetmara enta. All chopeñe'chenpa' attach otyenanet:

—Sanmuen, o'ch secha'nmuen.

¹² O' entan añcha'taret atetpa' o' ame'ña. Atarr huomenc entan Yompor po'ñoñ. Allohua atet pete't all Pafoso.

* **13:2** Añ tore'teñetspa' añecop o'ch yetorra Yomporecop. Amach añecpayaye atomat, ñeñtpa' añecpa mameshacop o'ch yequeçhpa' yerrar.

Allempo ñanom asena' Pablo Asio

¹³ Allempoña Pablo ñaña ñeñt cotene'pa' o' ahuanpset boto o' chapuet Pergo ñeñt allara Panfilio. Chapuet Pergopa' Juanña Marcospa' o' sa'nerranet. O' alla ahuer Jerusaléño.

¹⁴ Allempoña Pablo ñaña Bernabépa' ahuanerreterr, o' chapuet anetso ñeñt pa'so'cheñ ñaña Antioquía ñeñt allara Pisidio. Allempopa' o' chapa'muen allempo amesen judionesha' Pabloña ñaña Bernabépa' o' ahuanmuet judionesha' po'prahuo. Allñapa' anorrcha'toset ñamet.

¹⁵ Allña judionesha' po'prahuopa' o' lleyoñet Moisés po'ñoñ ñaña po'poñ ñeñt a'mtaye't ahua't Yompor po'ñoñ. Allempoña o' lleya'huetpa' añña ñeñt amcha'tarettetsa puerahuopa' atet otanet:

—Eseshaste' masheñneshare echene' ñoñets attoch soctape'chateypa' ñato' o'ch seserrpare'tatey.

¹⁶ Allempoña Pablopa' o' tomospa' echantan pot attoch muetsoñeñtuet atet otanet:

—Masheñneshash judioneshacha' ñaña allohuenes ñeñtes mecha'na'tene' Yompor, se'mñoten, o'ch notas:

¹⁷ Yapa' israelena'tarey ahua't Yomporpa' e'ñe pocte' entane't yatañneshañ. Nanac a'mratanet allempo a'puete't Egipto. E'ñe Yompor po'huamenco'tpa' o' ahuanerranet Egiptot.

¹⁸ Ama't atomat char allempo chopeñe'chete't amaratareropa' chocma cohuanpsetanet e'ñe cohuen, ñato' pa'tatsoch charra' char'te' cohuanpsetanet.

¹⁹ Allempoña cha'cherret alla Canaáno Yomporpa' o' huapore'tatuerran cancherr po'poñe'ttsochma acheñ ñeñt ye'cha'yestse't all attoch apa'yerran yatañneshañ po'patseñ, e'ñe ñocpuet ama't ñaña puechemereshacpuet.

²⁰ Allempoteñ ñato' cuatrocientos cincuenta char'te' o' nanet ñeñtcha' amcha'tarettatsa ñocpuet. Atteñapa' o' chap allempo orrta ñeñt a'mtaye't Yompor po'ñoñ ahua't, añ pa'so'cheñ Samuel.

²¹ Allempoña acheñneshapa' enamet Yompor o'ch apanet puesheñarr rey ñeñtcha' nanac amcha'tarettatsa. O' nanet añ pa'so'cheñ Saúl ñeñt Cis puechemer ñeñtara pamo'tsna'tar Benjamín. Añña Saúlpa' o' amcha'tare'ta pa'tatsoch charra' char.

²² Allempoña Yomporpa' o' puerratañper attoch o'huañ amcha'tare'ta Saúlpa' o' alla nerran po'psheñeñ ñeñt pa'so'cheñ David ñeñtara Isaí† puechemer. Añ Davidpa' e'ñe pocte' eñch Yompor ñeñto'marña atet ot ñocop: “Davidpa' e'ñe attecma cotape'chen atet noctape'chen na neyo'chro. Ñeñto'mar neñoteñ ñapa' o'ch ame'ña'na na e'ñe poctacma.”

²³ Alla oterraneterr Pablo:

—Ñeñt puesheñarr David po'mrenño't Yomporpa' o' orrtatonay yocop ñeñtey israelena'tarey ñeñtcha' ya'queshpaterre'. Añ pa'so'cheñ Jesús. Te'pa' o' etsota atet otye't Yompor ahua't.

²⁴ Tarraña ama chena' allempoch serrpare'tos Jesúsapa' añ ñanom orrtatsa Juanañ. Ñapa' serrpare'te't atet oche't, añ pocte' o'ch yoctape'cherr ello cohuen etserra allempoñapa' o'ch yapatare'ta Partsocop. Atet serrpare'tatey allohueney ñeñtey israelena'tarey.

²⁵ O' e'nuamochan ñeñt po'taruas pa'pa' Juanañña' atet otanet: “Napa' ama aneyayno ñeñt soten ñeñtcha' Cristotats. Ñapa' te'pa' ñeñtña nocta'nene' chenta'. Napa' ama esoshe'mano attoch ama't po'sapatre'chapa' o'ch nepyoñ.”

²⁶ Alla oterraneterr Pablo:

† 13:22 Isaípa' ñeñtara ñeñt sochenet Jesús.

—Sapa'cho'ña masheñneshacha' pamo'tsna'tarecmas penes Abraham. Ñaña arro'tsa'yen puesheña'tets acheñ ñeñt mecha'na'tene' Yompor. O'ch notas allohuenes, Yompor o' mueñonay cohuen ñoñets alloch yequeshperra allohueney.

²⁷ Ama't o' chap ñeñt Cristotatspa' añña ñeñt jerusaléno'marnesha', ñaña ñeñt pa'mcha'tareternesha' penet, ñetñapa' ama esesha' eñotaye. Ama chapaneto pueyo'chreto atet ote't ahuat ñeñt a'mtaye't Yompor po'ñoñ ñeñt chocma lleyenet añ yetro allem pocma amesenet. Ñeñto'mar te'ñapa' o' etsotatoñet Yompor po'ñoñ. Te'ñapa' o' pomet Jesús attoch muetset.

²⁸ Ñapa' ama't ama eñalle po'chñar atta otteñe'chet attoch muetsachet. E'ñe attota enamet Pilato muetsachepa'to'.

²⁹ Allempoña o' etsotatuñet ora allpon atet aquellcare't ahuatoteñ ñocoppa' o' a'suachet corsocho'tpa' o' net mapuetpono.

³⁰ Tarraña Yomporpa' o' tantater ama't o' rromua.

³¹ Allempoña tantaterpa' allponmat orrtame'tnerrana ñeñt ñanom cota'nmue' Galileo't allem po on Jerusaléno. Te'pa' ñetpa' o' a'potoñet atto tanterra Jesús, o' a'potoñet allohuen acheñeneshesho.

³² Yapa'cho'ña te'pa' o'ch yeserrpare'tatas saña añ ñeñtara cohuen ñoñets. Ama't ahuat Yomporpa' otane't yatañneshañ atetcha' pa' esempo

³³ te'ñapa' o'cho' etsota yocop ñeñtey yatañneshañ po'mrenñey. O' etsota po'ñoñ allem po tantaterran Puechemer Jesús, tarro'mar atet oteney ñeñt Salmos 2, atet Yompor otan Puechemer: “Papa' Nechemerep, te'ñapa' o'ch neñotach acheñenesha' po'ño'ch pa'pa' Nechemer nepenep.”

³⁴ Ama't ahuat Yomporpa' ote't o'ch tantaterpa' amach alla rromuerre'te. Ñeñtpa' atet oteney añ ñoñets ñeñt ahuatoteñ aquellcare't: “Po'ño'ch o'ch na'natapa' paña atet na'nacha David.”

³⁵ Ñaña po'poñ capítulo Salmos all oten atet: “Yomporpa' amach muenatano Puechemer ñeñt nanac Parets o'ch puetsohua po'chets.”

³⁶ Añ ñoñetspa' yeñoteñ ama añecpayaye David tarro'mar yeñoteñ David allem po e'nuan allpon atet muenach Yompor pamo'tsna'tarecoppa' allem poña' o' rroma. Allempo rromapa' o' pampuet allo'tsen pa'tañneshañ, po'chetspa' o' puetsohua epuet.

³⁷ Tarraña Jesús po'chetspa' ama puetsa ama't coñe'ta tarro'mar Pomporpa' o' tantater.

³⁸ Ñeñto'marña añ poctetsa o'ch masheñneshacha' seño'ch añ Jesús ñeñt atet pena. Ñach ye'pre'tnerre' yo'chñar. Ñeñto'mar te'pa' o' neserrpare'tatas.

³⁹ Añ Moisés po'ñoñ ñeñt anaret ahuatoteñpa' amach erro'tenot ye'pre'tnaterro allo yo'chñar. Tarraña te'pa' añña yame'ñeño' Jesús pa' añepa't alloch e'ñe a'pre'tna'huare'tterra yo'chñar.

⁴⁰ Alla o'terrerr Pablo:

—Te'pa' secuach, o'ch soctape'ch cohuen te't huaponasa ñeñt atet ote't ñeñt a'mtaye't ahuat Yompor po'ñoñ. Atet otete't ahuat:

⁴¹ Se'mñot ñeñtes achm'are'tets, te't secuanrrorteño'ta sechenca'huerra. Te'pa' allem po ora socrenmeñpa' napa' o'ch norrtatonas ñeñt ama sentare. Tarraña ñato' sapa' amach same'ñyo ama'tcha' serrpare'tataset. Añpa' allohua huañ atet serrpare'tatanet Pablo.

⁴² Allempoña cha'nma'cherret acheñenesha'ñapa' atet ochet Pablo hua-puepa'to' po'poñ semana o'ch serrpare'taterraneterr po'pocheño añ yetro allem pocma amesenet.

⁴³ Allempo ahuanerretpa' shonte' judionesha' o' co'a'huanerret Pablo ñaña Bernabé. Ñaña o' co'a'huaner shonte' ñeñt' ama judioneshayaye tarraña ñetpa' o' ame'ñatanet judionesha' ahuañacma. Añña Pablo ñaña Bernabé serrpare'tatanet o' cotape'chatanet attoch chocma o'ch cotape'choñet Yompor pomuereña.

⁴⁴ Po'poñ semana o' cherrerr allempo amesenet. Huaçhenerr shonte' acheñenesha' o'ch e'mñoteneterr Yompor po'ñoñ. Autsa ora allohuen acheñenesha' ñeñt' yeçhetsa all e'ñe huaçha'tuet.

⁴⁵ Allempoña judionesha' ñeñt' ama ame'ñetsopa' o' eñchet shonte' acheñ huaçha'tatsapa', puesope'cheñofteta' o' cohuaña'chet Pablo. Ñeñt' atet oten Pablopá' ñetñapa' o'ch otenet ama atteyaye. Nanac achmāre'chet.

⁴⁶ Tarraña ama mecha'to Pablo ñaña Bernabé. O' serrpare'tet huomenc, atet otet:

—Añ poctetsa o'ch yeserrpare'tatas sanom Yompor po'ñoñ, tarro'mar sapa' judioneshas. Tarraña ñerra'm sapa' ama semno, ñerra'm ama pocteye' señche attoch sapa' corretsasach e'ñe tayoteñ errponañohuen, amach erroť yeřaso. Te'pa' añach yeserrpare'tat ñeñt' ama judioneshayaye.

⁴⁷ Tarro'mar atet oteney Yompor po'ñoñ, arr oteney atet:

Napa' o'ch nenas sa atet ñerra'm puetare', sach a'puetarsamřsats. O'ch sa'puetarsamřsoñ po'poñ acheñ poctapña ñeñt' ama judioneshayaye. Ama't allohuen acheñenesha' ora allohuanen patspa' o'ch peñotatuanet attoch qeshperret.

⁴⁸ Allempoña ñeñta e'mhuet añ ñoñetspa' añña ñeñt' ama judioneshayaye atarr coshet, nanac cohuen eñchet Yompor po'ñoñ. Allempoñapa' o' ame'ñenet allohuen ñeñt' o' anaretta attoch ñetpa' corretsetach tayoteñ e'ñe errponañohuen.

⁴⁹ Atteñapa' o' epa'hua Yompor po'ñoñ erracmañen.

⁵⁰ Tarraña puesheña'tets judionesha' o' cotape'chachet acheñenesha' attoch o'ch huapore'tateret Pablo ñaña Bernabé. Añña ñeñt' atet cotape'ch coy- aneshaçhno ñeñt' cohuen entaprete' acheñenesha' tarro'mar añ coyanesha' e'ñe cohuen cotape'che't Partsocop. Ñaña ñeñt' amcha'tarettetsa all, judionesha'pa' o' e'moñe'tachet Pablo ñaña Bernabé. Ñeñto'marña orrtatet atsrre'mueñets o' huapore'tateret Pablo ñaña Bernabé.

⁵¹ Ahuanenetpa' o' pa'shetca'tnenet po'patser pa'tcoť attoch eñoch judionesha' ama pocteye' entaretteto ñeñt' atet o' pohuet, te'ñapa' amach alla huaçherrete'te. Allempoñapa' ahuanmuet ñaña Iconio.

⁵² Tarraña ñeñt' o' ame'ña'hua all Antioquíopa', ñetñapa' nanac coshenet, ñaña o' chorr Janet Parets Puecamquēñ.

14

Allempo çhapuet ñaña anetso pa'so'cheñ Iconio

¹ Allempoña çhapuet Iconiopa' o' be'tosçha'tet parro judionesha' po'prahuopa' o' serrpare'tatoset all. Nanac cohuen serrpare'tatet ñeñto'marña ame'ñachet shonte' acheñenesha' —ama't judionesha' ñaña ama't ñeñt' griegonesha'.

² Añña judionesha' ñeñt' atpare'tene' Yompor po'ñoñ ñetñapa' toma'tamřset Pablo ñaña Bernabé. Nanac sasare'teñet taye'to' acheñenesha' ñeñt' ama judioneshayayepa' cohuen enteññañet atto serrpare'ten.

³ Tarraña ama't e'moñe'tanet patantarr acheñenesha'pa' ñetñapa' ama mecha'teto. Alla atomatet serrpare'tet Yompor po'ñoñ. Orrtatet

ñeñt' acheñenesha' ama puentareto ñeñtña eñotatahuet po'ñoçh atto serrpare'tenetpa' añmapa' Yompor pomuereñoť huapanet añ ñoñets. Yomporpa' nanac ahuamencat' pñanet.

⁴ Atteñapa' añña patantarr acheñenesha'pa' e'ñe cohuen enteñet atet serrpare'tatanet Pablo ñaña Bernabé. Tarraña po'potantañña' ama. Ñetñapa' añña ame'ñatahuet judionesha'. Ñeñto'marña ama patrraye' cotape'chenoña acheñenesha' all.

⁵ Atteñapa' o'pacha shonte' judionesha' ama't ñaña ñeñt' ama judioneshayaye ñaña ñeñt' añcha'tareteçhnopa' o'pacha o'ch rromuet huomencpa' o'ch rrolle'chet.

⁶ O' e'mare'chet čha o'patarettenetpa' añña Pablo ñaña Bernabépa' o'yeterretpa' ahuanmuet ñaña Listro. Chapuet Listropa' čha asuanmuetpa' o' metet ñaña Derbo. Añpa' ñeñtara anets all otenet Licaonia. Erracmañen chopeñe'chet allo'mar.

⁷ All chopeñe'chneñetpa' all serrpare'tnenet Yompor po'ñoñ.

Allempo chapuet ñaña anetso pa'so'cheñ Listra

⁸ Allempo Listro'tsenetpa' allña' allo'tsen puesheñarr acheñ, čha echartena pa'tac, ama eshcaye' chope'cheno, ama't ahuatoteñ ñapa' atta eñalletña. Ñaña' alla anen.

⁹ Allña anenpa' alla e'mñnotenat' atet serrpare'ten Pablo. Pabloñapa' cohue' allapa' o' eñoçh añ acheñpa' o'yemtana Yompor ñapa' o'ch a'crrater.

¹⁰ Ñeñto'marña Pablop' atet och huomenc:

—O'ch notaṣ, o'ch pñaten.

Ahuepa'tcha' tanta allempocma allorocma čha chope'chnets.

¹¹ Allempo eñch allohuen acheñenesha'pa' čha rrannartet. Pocsheñoťetpa' atet otet:

—¡Partsepa't! Ñeñt' Parets yepen ñeñt'epa't puenasetsa acheñ. Te'pa' o' chap e'ñe yesho. Añpa' atet otet po'ñoñeto ñeñt' Licaonačh.

¹² Añña Bernabépa' o' sochet, atet otet:

—Añepa't ñeñt' yeyomporer Júpiter.

Pabloñapa' sochet ñapa' añ ñeñt' po'yompor-ret Mercurio. Tarro'mar sochet atet ñapa' nanac serrpare'ten cohuen atet ñerra'm po'yompor-ret Mercurio.

¹³ Ñehua, acheñenesha' allpa' echenet po'prahua' allecmach ma'yochyeteť po'yompor-ret ñeñt' otenet Júpiter. Ñeñt'pa' e'ñe ñehuapoť anaret allempopa' o'ch taya yerrota'nmos pa'netsreto. Ñeñt' corneshatets puerahuopa' o' huapa. Huapatan huaquësh, huapatan ñaña shonte' ror. Mueneñ o'ch muetset huaquësh Pablocop ñaña Bernabécop tarro'mar čhocma muetseteť huaquësh po'yompor-recop. Ñaña tarro'mar atet muenen acheñenesha'. Ñetpa' čha otenapuetañ Pablo ñaña Bernabépa' añte' ñeñt' po'yomporer penet.

¹⁴ Allempoña eñoçh Pablo ñaña Bernabé ñeñt' atet pena acheñenesha'pa' nanac lleca'rrtet. Puellquëñoťetpa' o' rrarre'tet pa'shtampa' o' matra'tet allo'tsa'yen acheñenesha'. O' rrannaretnomuet, puerranarotetpa'

¹⁵ atet otet:

—Eso'marte'ca'ye masheñneshacha' atet sepena. Yapa'cho' arromñaťeya attey ñerra'm sa. Ñeñto'marña o'yerrpare'tatas cohuen ñoñets attoťcha' sequeçpuerr ñeñt' atet sepena ñeñt' e'ñe orrena. Te'pa' añña poctetsa o'ch same'ñera Yompor ñeñt' ama arromñaťeshayaye, ñeñtara Yompor ñeñt' yeçcate' enet ñaña pats ñaña ñeñt' añecmuen sa'p. Ñaña ora allohuen ñeñt'

yentyen ento ñaña ñeñt yentyen patsopa' ña yečhcatue' ñaña ñeñt sapo'tsen ña yečhcatue'.

¹⁶ Alla oterranelerr Pablo:

—Ahuat Yomporpa' muenatan acheñenesha' o'ch pa'yaset ñeñt atet muena'yenet e'ñe ñañeñeta.

¹⁷ Tarraña ama a'ypo'ñano acheñenesha'. Chocma apanete't attoch eñochet po'ñočh eñall Yompor. Chocma mueranete't ñeñto'marña chocma huatache't ñocpuet attoč yečhcanete't puenarmet, atto eñalletete't puerraret atto coshete't. Añpa' ñeñta ñeñt atet otan Pablo allohuen acheñenesha'.

¹⁸ Tarraña ama't atet otan acheñenesha'pa' o' alla muenereterr o'ch muetset huaquesh ñocpuet atet pete't po'yompor-recop. Tarraña Pablo ñaña Bernabépa' ama muenataneto.

¹⁹ O' atomatpa' huača'ta puesheña'tets judionesha' ñeñt huetsa Antioquío ñaña Iconioč. Coťape'chatoset acheñenesha' po'poñ. E'moñe'tachet Pablo. Atteñapa' rrolle'chet Pablo. Rrolle'tuetpa' čha otapuetañ o'te' rroma. Chetare'tnomet pueblot a'yenet.

²⁰ Ñeñña ame'ñatsapa' alla arrotampeñet alla cohueñetpa' ñañapa' ahuepa'tcha' alla tanterra, o' alla ahuererr pueblo. Tsapañapa' Pablo ñaña Bernabépa' ahuanerret alla Derbo.

²¹ Chapuet Derbopa' serrpare'tuerreterr Yompor po'ñoñ ñaña all. Shonte' acheñ ñeñt allo'tsen ame'ñenet ñamet. Allempoñapa' ahuanerreterr Listro, ñaña asuerreta' Iconio ñaña Antioquío.

²² Ora allohuanen ta'yaset yenpuet ñeñt ame'ñetsa attotcha' huomenc pet pueyočher. O' coťape'chatanet ñaña attoch chocma yemchet Yompor ama't esempo huapanet muerochteñets. Tarro'mar e'ñe yemuerochteñoč yečhapcha' all añcha'tarettena Yompor.

²³ O' na'yaset puesheña'tets acheñ ñeñtcha' pompor pa'yes ñeñt pame'ñeñoč apča'yetsa. Puetore'teñočetpa' o' ma'yochampesyet ñeñtcha' pompornesha' pa'yaset, atet ochet:

—Yomporepa'ch seyempue', ñeñtara Yompor ñeñt o' same'ña'huerra.

Atet pa'yaset ora allohuen anetso all ame'ña'yesa acheñenesha'.

Allempo čhačherret alla Antioquío alloč ahuanmuet ahuaña

²⁴ Allempoñapa' asuanerret Pisidio'mar alločpa' ahuanerret Panfilio. Cherret anetso ñeñt pa'so'cheñ Perge.

²⁵ Serrpare'tuerreterr Yompor po'ñoñ all Pergo, allempoñapa' ahuanmuet ñaña Atalio.

²⁶ Chapuet Ataliopa' alločña' ahuanm̄pset boto, o' alla čhačherret Antioquío ñeñtara anets alloč ahuaña ñeñt ame'ñetsa all ma'yocham̄psapanet attoch yenpanet Yompor esheccha' etsotoñet po'taruas. Te'ñapa' o' e'nuet.

²⁷ O' čhačherret allpa' apčachet allohuen ñeñt ame'ñetsapa' serrpare'tatueret ora allohuen atto Yomporpa' yenpanet. O' serrpare'tatanet atto Yompor a'pochtatanet, aña'na serrpare'tatet ñeñt ama judioneshayaye, añecop attoch ame'ñerret ñamet.

²⁸ Alla atomatet parro epuet ñeñt ame'ñetsa.

15

Allempo a'pochtachet Jerusaléño ñeñtcha' atet pet

¹ Atteñapa' čhap ñaña acheñ ñeñt huetsa Judeoč. Chapuetpa' o' yečhatoset ñeñt ame'ñetsa all, atet otosanet:

—Te'pa' aña sepalltena attoch sequeshperra o'ch setsorranna'ta ñeñtes asheñorres atet yeychena ya allempoteñ atet yeçhaterrey Moisés.

² Añña Pablo ñaña Bernabépa' ama pocteye' eñcheto atet. Ñetpa' atet otet:

—Ama po'ñoçhaye' añ palltetso o'ch yetsorranna'ta ñeñtey asheñorrey.

Ñetñapa' alla nanac es otanna'tet. Ama a'poctacheto. Ñeñto'marña allem-popa' o' net Pablo ñaña Bernabé ñaña po'poñeçhno acheñ attoch ñetpa' o'ch ahuanmuet Jerusaléno o'ch enteñeta' Jesús puellsensarnesha' ñaña ñeñt pompornesha' pen ñeñt ame'ñetsa all. Añecop tet attoch o'ch a'pto'teneta' erra'tsente' pocte' ñeñtcha' atet pet.

³ O' so'tuanma ñeñt ame'ñetsapa' ahuanmuet. Arr oñmuet Fenicio'mar allotñapa' ahuanmuet Samario'mar. Allña oñemuanmueta' all serrpare'tyesnomuet. Añ serrpare'tyesnomuet atto o' ame'ña ñeñt ama judioneshayaye. Pame'ñeñoçtetpa' o' a'ypo'ña'huerret ñeñt ahuaç poctapñet. Ñeñña nanac coshate'ña allohuen ñeñt ame'ñetsa.

⁴ O' çhapuet Jerusaléno'pa' e'ñe cohuen agapanet Jesús puellsensarnesha' ñaña ñeñt pompornesha' pen ñeñt ame'ñetsa all. Ñaña allohuen ñeñt ame'ñetsa allpa' o' agapanet e'ñe cohuen. Allempoñapa' serrpare'tatoset ora allohuen atet yenpanet Yompor.

⁵ Tarraña patantarr fariseonesha' ñeñt ame'ñetsapa' o' tantapa' atet ot:

—Acheñ ñeñt ama't ama judioneshayaye, añ palltetsa o'ch atsorrareña allohuen asheñornesha', ñaña allohuenetpa' otarettetepa' añ palltetsa o'ch ame'ñeññañet ñaña Moisés po'ñoñ ñeñt atet anaret ahuaçoteñ.

⁶ Ñeñto'marña Jesús puellsensarnesha', ñaña ñeñt pompornesha' pen ñeñt ame'ñetsa allpa' o' apçhet attoch a'poctachet este' poctetsa ñeñtcha' atet pet.

⁷ Ñeñto'marña alla nanac es otanna'tyeset. Allempoñapa' o' tanta Pedro. Tantapa' atet otanet:

—Sapa' señoçe'ña masheñeshacha' ahuaña Yomporpa' o' na'n na. Añecop na'n o'ch neserrpare'tach ama't ñeñt ama judioneshayaye. O'ch neserrpare'tatanet Yompor po'ñoñ attoch ame'ñerret ñamet.

⁸ Ñehua, Yomporpa' entennay yeyoçher. Ñapa' eñoçet ama't añ ñeñt ama judioneshayaye o' ame'nyet pueyoçhreto. Ñeñto'marña o' chorratanet Puecamquëñ atecma atet chorrenya yaña. Attoña eñotatey e'ñe pocte' entenanet ñamet.

⁹ Ñeñto'mar yeñoçet ama yapçayaya morrentenyo Yompor. Añña ama't ñetpa' morrentenanet ama't ñeñt ama judioneshayaye. Pame'ñeñoçtetpa' ahuaç e'shohuerranet po'chñar ñeñt pueyoçhro'tsa'yenet.

¹⁰ Te'ñapa' eso'mare'tña ama pocteye' senteñe ñeñt atet o' pøhua Yompor. Añecop ñeñt ame'ñetsapa' eso'mare'tña semneñ o'ch senanet ñeñt nanac torrapo' entenet. Ama't ya judioneshaypa' amach erroçeno o'ch yetsotua allohuen ñeñt atet anaret. Ama't yatañeshañpa'çho'ña ama etsotete'te.

¹¹ Añcha'ña yeñot e'ñe Yepartseshar Jesús pomuereñoçpa' o'ch yequeshpa, atecmach queshpet ñamet.

¹² Ñeñña e'm allohuen ñeñt apçhatsa allpa' alla moma'rrtet. Atto e'mñoçet. Bernabé ñaña Pablo'pa' ña nanac serrpare'tatahuet. Añ serrpare'tatanet atto Yomporpa' nanac ahuaçmencaç panet ahuaña allempo serrpare'teneta' allo'tsa'yen ñeñt ama judioneshayaye. Ñeñto'marña orrtatanet ñeñt ama puentareto ñeñtcha' eñotatahuet aña'pa' po'ñoçh Yomporeshoç huena.

¹³ O' serrpare'tuetpa' allempoñapa' atet ot ñaña Jacobo.

—O'ch masheñeshacha' se'mñoçten naña.

14 Simón Pedropa' o' serrpare'tatuas atet Yompor te'pa' o' orrtatan pomuereña añecop ñeñt' ama't ama judioneshayaye. Ñaña ahuo't orrtatan pomuereña añecop ñeñt'cha' ame'ñatahuet attoch aye'chochtatoñet Yompor pa'so'cheñ ñamet.

15 Po'ñoçh te'pa' o' etsota ñeñt' atet oteney ñeñt' a'mítaye't Yompor po'ñoñ ahuat. Añpa' ñeñt' atet quellquë't ahuat atet ñerra'm Yompor otatse't:

16 Allempo o'ch meten shonte' charpa' napa' o'ch alla norrtaterr puesheñarr ñeñt' David po'mrenño't ñeñt'cha' ahuaamencattatsa atet ahuaamencatte't ahuat pa'tañ David. Tarro'mar shonte' char ama't puesheñarrapa' ama orrteno David po'mrenño't ñeñt' nanac ahuaamencat.

17 Añecopcha' norrtater allochñapa' ama't po'poñeçhno acheñenesha' ama't ñeñt' ama judioneshayaye o'ch ame'ña'hueret ñamet Yompor; ñaña allohuen erra'tsencha' muenats.

18 Atet ot Yompor ñeñt'ara ñeñt' eñotatay ahuatoteñ ñeñt'cha' atet pa. Añpa' allohua ot ñeñt' a'mítaye't Yompor po'ñoñ ahuat.

19 Alla oterrerr Jacobo:

—Te'pa' añña e'ñe pocte' nenten na amach ya'mñechatatsche ñeñt' ama judioneshayaye ñeñt' o' puesuerran ñeñt' ahuat poçta'ña attoch ame'ñeret Yompor.

20 Te'pa' añña pocte' o'ch yequellcanet ñeñt'cha' ama p'atsteto ñeñt'pa' añ: Amach rratsteto po'chets ñeñt' muetsenet ayeçhcataretocop ñeñt' po'yomporer pen ñeñt' ama judioneshayaye ñeñt'ara ñeñt' ama ame'ñetso. Ñaña o'ch yotamet amach chetapretatsteto taporets. Ñaña o'ch yotamet amach rratsteto ñeñt' muetsenet ñeñt' atta a'pañare't, ñaña amach rratsteto ñeñt' ño'shetsa oño. Ñaña amach es rratsteto es po'rras.

21 Alla oterrerr Jacobo:

—Añpa' ñeñt'ach atet yequellcanet. Tarro'mar ahuatoteñ o' serrpare'tuoñet Moisés po'ñoñ ora allohuen anetso'mar. Ñaña pate'tets semana añ judionesha'pa' çhocma lleyeññañet Moisés po'ñoñ all po'prahuet. Añpa' allohua atet otanet Jacobo.

22 Allempoñapa' o' a'poctachet o'ch net puesheña'tets ñeñt' e'ñe allo'marnesha' ñeñt'cha' mueñet Antioquío, o'ch coferet Pablo ñaña Bernabé. Atetpa' e'ñe pocte' eñch allohuen—Jesús puellsensarnesha' ñaña ñeñt' pompornesha' penet, ama't ñaña allohuen ñeñt' ame'ñetsa all. Añ net Judas Barsabás ñaña Silas. Añña epsheña acheñpa' e'ñe cohuen eñch allohuen ñeñt' ame'ñetsa.

23 Ñetpa' o' anmuet, ñeñt' atet oten carta:

“Masheñeshacha' ñeñtes yeçhetsa anetso Antioquío ñaña Sirio ñaña Cilio: Allohueney ñeñtey ame'ñetsa o'ch yehuom'cha'tas sa añ yecarto't—ñeñtey Jesús puellsensarneshay ñaña ñeñtey pompornesha' pen ñeñt' ame'ñetsa arr. O'ch yehuom'cha'tas sa ñeñtes ame'ñetsa saña ñaña ama't ñeñtes ama judioneshayayso.

24 O'ch yotas, yapa' o' ye'mare'ch o' çhap sesho puesheña'tets acheñ arro't ñeñt' muenets o'ch a'mñechatasa. Ñetñapa' o' nanac moñne'tatasa soçta'ña. Tarraña te'ñapa' o'ch yotas, añ acheñpa' ama yaye' mueñenaye.

25 Ñeñto'mar pocte' yenteñ allohueney o'ch yene' epsheña acheñ ñeñt'cha' yemñonas epuet Bernabé ñaña Pablo ñeñt' nanac yemuerena.

²⁶ Tarro'mar nanac yemorrentenanet ahuañapa' all serrpare'teneta' aut-sañ muene' amtsanatare'tetuet all. Tarro'mar e'ñe puemorrenteño'tet Yepart-seshar Jesucristo atet a'pare'ttet.

²⁷ Añ yemñonas Judas ñaña Silas. Ñetpa' o'ch serrpare'tatenseta' ora atet yoten ya arr.

²⁸ Parets Puecamquëñpa' o' eñotatey ñeñt e'ñe pocte' yenten ñeñtcha' yenonas. Amach aña yenonaso ñeñt nanac torrapo'. Te'pa' añ palltetsa ñeñtcha' atet se'pa.

²⁹ Amach serratsto po'chets ñeñt muetsenet aye'chcatare'tecop ñeñt po'yomporer penet. Ñaña amach serratsto ñeñt muetsenet ñeñt at'a a'pañare't. Ñaña amach serratsto es po'rras. Ñaña amach sechtapretatsto taporets. Ñerra'm amach atet se'po ñeñt'pa' e'ñech pocte'. Añpa' ñeñt'ach yotas. Yomporepa'ch sa'nataya." Añpa' allohua huañ ñeñt atet oten carta.

³⁰ Allempoñapa' o' mueñet Judas ñaña Silas epuet Pablo ñaña Bernabé. O' ahuanerret Antioquíó. Cha'cherret Antioquíopa' o' ap'chatuet allohuen acheñenesha'pa' o' aposanet añ carta.

³¹ Ñeñt ap'chatsapa' o' lleyet añ carta. Lleya'huetpa' nanac coshatanet ñeñt atet actape'chatare'ttet cartot.

³² Añña Judas ñaña Silas, ñetpa'cho'ña nanac a'poñoñet Yompor po'ñoñ ñamet. Ñetpa'cho'ña a'mitenet Yompor po'ñoñ. Nanac serrpare'tatet. O' co'tape'chachet e'ñe cohuen ñeñt ame'ñetsa allochñapa' huomenccha' pet pueyo'cher.

³³ O' allponmatet allpa' allempoñapa' secherret allot amñare'ttet ahuaña. Ñeñt ame'ñetsa Antioquíopa' o' so'tneret e'ñe cohuen, otanet:

—Yomporepa'chña ya'nataya parro allohueney.

³⁴ Tarraña Silaspa' mueneñ o'ch a'pa all, Judaspa' o'ch ahuer.

³⁵ Añña Pablo ñaña Bernabé allponmaterret Antioquíó. Ye'chatapretereta' epuet po'poñe'chno ñeñt ye'chatets all. Serrpare'tapretereta' Yompor poñoñ epuet po'poñe'chno.

Allempo puepocheño ahuererr Pablo serrpare'tats allemeñ anetso'mar

³⁶ Atteñapa' o' atomat Pabloñapa' otan Bernabé:

—O'ch ahuerrey, o'ch yab'chera' ñeñt ame'ñetsa ora allohuen anetso all yeserrpare'toñ Yompor po'ñoñ ahuaña attoch yeño'ch errotenette'ña te'.

³⁷ Bernabéñapa' aña e'ñe pocte' ent o'ch co'ta'ner Juan Marcos.

³⁸ Tarraña Pablopa' ama pocteye' eñche tarro'mar ahuaña allempo chapuet Panfilio, Juan Marcospa' cha sa'nerranet, o' puerrerra. Ama allo'na yen-puenaneto all serrpare'tyeset.

³⁹ Ama erroteno a'pochtacheto, cha sa'nannerret. Bernabépa' aña aner Marcos. O' ahuan'pset boto, cha'cherret Chipro.

⁴⁰ Pabloñapa' aña e'ñe pocte' ent o'ch anerran Silas. Ñeñt ame'ñetsa allpa' o' so'tneret, e'ñe cohuen otneret:

—Yompor e'ñe pomuereño'tpa' a'natyepa'ch.

Allempoñapa' ahuanenet.

⁴¹ Asueneta' Sirio'mar ñaña Cilicio'mar. Alloñapa' yenpuet allohuen ñeñt pame'ñeño't ap'chetsa parro. O' yenpuet añecop attoch huomenccha' pet pueyo'cher.

16

Allempo Timoteopa' cota'nerran Pablo ñaña Silas

¹ Pablo ñaña Silaspa' asuerreta' anetso añ pa'so'cheñ Derbe. Alloñapa' ahuanerret alla Listro. Allñapa' allo'tsen puesheñarr acheñ ñeñt ame'ñetsa añ pa'so'cheñ Timoteo. Ñeñt Timoteopa' añ pachor pen judionesha' ñeñt ame'ñetsa. Pomporñapa' ama judioneshayaye añ griegonesha'.

² Ñeñt ame'ñetsa Listro ñaña Iconiopa' nanac cohuen enteñet Timoteo.

³ Ñeñto'marña e'ñe pocte' eñch Pablo o'ch cota'nerranet Timoteo. Tarraña ato'tña anemhueta' allcha' tsorreñet atet yeçhena joreyonesha', tarro'mar allcha' tetpa' shonte' judionesha'. (Ñehua, Pablopa' ama mueno o'ch at-srre'mach judionesha'.) Allohuenetpa' o' eñotuet ñeñt Timoteo pomporpa' ñeñt ama judioneshayaye añ griegonesha'.

⁴ All oñomyeset allemeñ añetsopa' otuosanet añ ñoñets atet a'pocstat Jesús puellsensarnesha' ñaña ñeñt pompornesha' penet Jerusaléño. Añ eñotatuosanet ñeñtcha' atet pet.

⁵ Atteñapa' allohuen ñeñt ame'ñetsapa' e'ñe pame'ñeñotet allo'na senet huomenc pa'nmuert pueyoçher. Pate'tets yetpa' allo'na sen atonetnomtsa ñeñt ame'ñetsa.

Allempo Pablop' entan macedonio'marnesha' atet ñerra'm çho çhopo'teñ

⁶ Allempoñapa' arr asuerreta' ñaña Frigio'mar ñaña Galacio'mar tarro'mar Parets Puecamquëñpa' ama muenataneto o'ch serrpare'toñet Yompor po'ñoñ all Asio'mar.

⁷ Allempoñapa' ahuanmuert ñaña tenonet, çhappochet Misio ñaña arr sechet Bitinio'mar, tarraña Jesús Puecamquëñpa' ama muenataneto.

⁸ Atteñapa' metuet Misio'mar o' çhaçha'tet Troaso.

⁹ Chaçha'tet Troaso tsapoñapa' añña Pablopa' orrtoña atet ñerra'm çho es yeçhopo'ten. Atet ñerra'm pueçhopoñoñpa' o' entan puesheñarr acheñ macedonio'marnesha' alla ten, atet otare'ch: "O'ch sonaçha't arr Macedonio, o'ch seyenpuenya'."

¹⁰ Allempoña errte' orretuoña macedonio'marnesha'pa' yañapa'* o' yesecha o'ch ahuey Macedonio, tarro'mar yoten po'ñoçhte' çhore'teney Yompor allochñapa' o'ch yeserrpare'teññaña' po'ñoñ all Macedonio.

Allempo çhap Pablo ñaña Silas Filiposo

¹¹ Allempoña Troasotpa' año ahuanñsey boto. E'ñe paçharra yepe' o'ch yeçhap anetso añ pa'so'cheñ Samotracia. Allñapa' all yetsotnoma. Yahuanerrerr allotpa' tsapatñapa' o' yeçhap ñaña anetso Neápoliso. Allñapa' all yetsotuerrerr.

¹² Yahuanerrerr allotpa' o' yeçhap ñaña anetso añ pa'so'cheñ Filipos allpa'çho' all yetsotosa. Añ anets Filipospa' nanac atarr anets. Po'poñeçhno anets alla Macedonio'marpa' ama atarroyaye. Allñapa' allo'tsa'yen shonte' solltarnesha' ñeñt romo'marnesha'. Yapa' alla ya'llponmatoes all.

¹³ Allempoña çhap allempo amesen judionesha'pa' yañapa' yahuanma anetsot a'yo. O' yeçhap ontapo all ye'nen ñato' allcha' ma'yochet. Yaña allpa' yentos puesheña'tets coyaneshaçhno all anorrçhenet. Yañapa' o'çho' yanorrçha'tos yaña. Allempoña yapa' yeserrpare'tatanet Yompor po'ñoñ.

¹⁴ Puesheñarr coyanesha' ñeñt allo'tsen añ pa'so'cheñ Lidia ñeñt huetsa anetsot añ pa'so'cheñ Tiatira. Ñañaapa' añ po'taruas pen atto vendenan sheta-muets yetsñorromamuen. Ñañaapa' ame'ñenana Parets. Allempoña e'mñotan Pablo ñeñt atet serrpare'ten añña Yomporpa' o' çhapatoñ pueyoçhro ñeñt atet serrpare'ten Pablo.

* **16:10** Ñehua, e'ñe allempocmapa' o' cota'nmanet ñaña Lucas, ñeñfara ñeñt quellquë' añ ñoñets.

15 Lidiaña pame'ñeñoŕpa' allenta apatareŕta, ñaña o' apatareŕta ñeñŕ parro yeŕchenet pocollo. Ñañaŕpa' o'ŕho' hua'ña'nerrey pa'paclo, atet ot:

—Ñerra'm e'ñe pocte' sentenen atto name'ñera Yepapar, o'ch sehuapa nepaclo ñato' allcha' sommosa.

Ñañaŕpa' otare'tey yonepa'to' ñeñŕo'marña yapa' o' ahuey.

16 Parrochñaŕpa' allempo yeta ontapo allecma ma'yochenet toñoñaŕpa' yentnomŕ puesheñarr shopshesha' ñeñŕ chorrena oneñeñ. Añaña oneñeñŕpa' ñach eñoratene' shopshesha' ñeñŕo'marña ñerra'm erroten otanetpa' atto'chŕho' ŕpa. Amach pueno po'ñoñ ama't mamesha. Añaña shopshesha'pa' eñall ñeñŕ pamo'mte' pen po'poñeŕhno acheñ. Ñetñaŕpa' nanaccha' ganatenanet quelle atto eñotañtena.

17 Ñañaŕpa' ŕhocmach coŕa'nomye't epay Pablo. O'ch coŕa'nmueyŕpa' o'ch rranare'tnoma chenta'pa' atetŕha' ot:

—Añ encaneshachnopa' añ sherbenet Yepapar Ñeñŕ Nanac Parets. Arrŕpa' añecop huenet attoch o'ch serrpare'tataset attoch sequeshperra.

18 Atteñaŕpa' ama't atomatpa' attecmaŕ pena. Atteñaŕpa' o' a'mñeŕchatana Pablo. Pabloñaŕpa' allenta puetallsapa' o' otan oneñeñ:

—Te'pa' e'ñe po'huamencot Jesucristopa' o'ch notaŕ, pequeŕhpa'ner shopshesha'.

Allempocmuepa'tcha' queŕhpa'nerran shopshesha'.

19 Añaña pamo'mtaynesha'pa' coŕape'chetpa' otet:

—Te'pa' llequēñtsa, o' huañerr allo yeganena quelle.

Allempoña pa'tsrre'mueñoŕetpa' o' rromuet Pablo ñaña Silaspa' anmarettet e'ñe po'huamencocma, o' aŕhapatareŕtet allo'tsa'yen añcha'tareŕnesha' allecma a'pocŕtatenet ñoñets.

20 Allempoña aŕhapatareŕtet allo'tsa'yen guardia pa'mcha'tareŕnesha'pa' o' otoset:

—Añmapa' ñeñŕ judionesha'. Nanac atsrre'moŕhtenet arr ya'netsro.

21 Ñetpa' yeŕchatenyet atet yeŕchenet ñet ñeñŕpa' ama pocteye' yenteñe ya. Yapa' romo'marneshaypa' ama cohuen yenteñe o'ch atet yeŕpa.

22 Allohuen acheñenesha'pa' nanac atsrre'mateñet. Ñeñŕña guardia pa'mcha'tareŕnesha'pa' atet otan pueyochresha':

—Te'pa' o'ch serrotanetpa' o'ch senallanet.

23 Allempoñaŕpa' o' nallet Pablo ñaña Silas nanac huomenc. Allempoña o' anallareŕtetuetpa' o' abe'tareŕtet ñaña cárcel; atet ochet ñeñŕ cohuañpene' cárcel:

—O'ch secuañŕsanet e'ñe huomenc.

24 Allempoña atet otareŕtetuetpa' añaña ñeñŕ cohuañpene' cárcelpa' o' abe'tanet nanac o'pono. Allñaŕpa' nanac echarr ŕamñŕsanet ñaña o' armatamñŕsareŕtet pa'tcoŕ tablat e'ñe echarr.

25-26 Atteñaŕpa' o' ma'yocha Pablo ñaña Silas. Ñaña o' morrechet, puemorrecheñoŕetpa' nanac aye'choŕhtateññañet Yompor. Añaña po'poñeŕhno acheñ ñeñŕ abe'tareŕt ñaña allpa' ñetñaŕpa' o' e'mñotanet. Allempoña ŕhap rroŕh tsappa' machayoŕetpa'tcha' pella pats nanac huomenc, ama't allo' tomatenet echarr cárcelepopa' ŕha pa'shma huomenc. Puepelleñoŕ pats huomencpa' o' torna'tua ora allpon all ayottamñŕsareŕttenet. Ñaña ora allpon allo huanquēñet acheñpa' o' pueyna'tuen.

27 Allempoña ahuo't e'mansa ñeñŕ cohuañpene' cárcelepopa' ahuo't entan o' torna'tuen allo ayottamñŕsareŕttenetpa' o' chetan po'cchell o'ch muetsa ñañaña. Ñapa' ŕho' otapañ ñeñŕ ayottamñŕsareŕtpa' o'te' yetuena.

28 Añaña Pabloŕpa' o' ŕhore'ch huomencpa' atet och:

—Amach erroŧ peŧatsto ama't mamesha. Yapa' allo'tsa'yenya allohueney.

²⁹ Allempoña pa' aña enamnom lampareña pa' mata allo'tsen Pablo ñaña Silas. Puenchañoŧpa' čha pa'shmuena ñaña e'ñe puencha'na'teñoŧpa' o' concorposa e'ñe ñesheto.

³⁰ O' čha'nmačha'tatanetpa' atet otanet:

—Nomporneshacha' ¿ešte'ña pocte' te' ñeñtcha' atet neŧa attoch nequeshperra naña?

³¹ Ñetña pa' atet ochet:

—Añ pocte' o'ch pame'ñera Yepartseshar Jesucristo, allochña pa' attoch pequeshperra. Ñaña attoch queshperra ñeñt parro peychena pepaclo.

³² Allempoña ñeñt cohuanpene' cárcelepopa' o' a'secherranet pa'paclo, allña pa' serrpare'tachet Yompor po'ñoñ, ñaña allohuen ñeñt pa'paclo'tsen o' e'mñotet ñamet.

³³ Allempocma ñeñte tsaprocma o' e'pana'tyerranet all atserrparettet. Allempoña pa' o' apatareŧta ña, ñaña allohuen ñeñt pa'paclo'tsa'yenpa'čho'ña o' apatareŧtet ñamet.

³⁴ A'tapatanet pa'paclo pa' rratanet. Pame'ñeñoŧ Yompor atarr nanac cosha. Ñaña allohuen ñeñt pa'paclo'tsen pa' atarr coshet ñamet.

³⁵ Tsapaŧ puetarenpa' aña guardia pa'mcha'tareŧnesha' o' mueñet puesheñarr guardia, ñeñtcha' otosets:

—O'ch sa'rroyer Pablo ñaña Silas.

³⁶ Ñeñt cohuanpene' cárcelpa' atet otan Pablo:

—Oten añcha'tareŧ secha'nerrepa'to'. Te'ña pa' orrerres, Yompor'e'pach sa'nataya.

³⁷ Tarraña Pabloña pa' atet otanet:

—Yapa' romanona'tarey yaña. Ñeñt ñoñets anareŧ Romoŧpa' oten ama pocteyaye o'ch yecoñchach acheñ ñerra'm ama yeñoteña' po'ñočhte' eñall atto otteñe'cheñet acheñ. Tarraña aña añcha'tareŧnesha' ama e'nano ñeñt e'ñe po'ñoč atet yepena. Atta nallatyet allo'tsa'yen shonte' acheñenesha' allotña pa' o'čho' atta yottamŧsatyet arr cárcelo. Te'ña ñetpa' mueneñet o'ch čha'nmaterryet e'ñe a'nahua. Ñeñt pa' ama pocteyaye atet. Te'pa' o'ch sotuer añcha'tareŧ huapuetepa' arr čha'nmaterryetepa' e'ñe ñet.

³⁸ Aña guardiapa' otuerran pa'mcha'tareŧnesha' atet oten Pablo. Ñetña pa' čha yorenat allempo e'mare'chet ñetpa'čho'ña romanona'tareŧ ñamet.

³⁹ Allempoña huačha'tetpa' enamareŧterret peretneñets. Allempoña čha'nmatenanetpa' atet otanet:

—Te'pa' orrerres, sahanerra bačhayo.

⁴⁰ Allempoña čha'nenet cárceloŧpa' ahuanerret o'ch alla ačchereta' Lidia. Allempoña pa' serrpare'tuerret parro ñeñt ame'ñetsa, coŧape'chatuanerret cohuen, allempoña pa' ahuanerret allot.

17

Allempo čhap Pablo ñaña Silas Tesalónico

¹ Allempoña ahuanerret allotpa' ahuanmuet anetso Anfípoliso, allotña pa' ahuanmuet ñaña anetso Apolonio. Allotña pa' o' čhapuet ñaña anetso ñeñt pa'so'cheñ Tesalónica. Allña pa' allo'tsen judionesha' po'prahua'.

² Pabloña pa' o' be'tosos ñeñt attecma pena. Allña pa' serrpare'tatosanet Yompor po'ñoñ. Allña pa' ma'panerr semana. Allempoña čhen yet allempo amesenetpa' o'ččho' serrpare'tatanet Yompor po'ñoñ ñeñt atet aquellcareŧ.

³ Allpa' añ yečhatanet atet anarettā ñeñtcha' Cristotats ñerra'm esempoch huapa añ patsropa' nanaccha' mueročhtachet. Tarraña o'ch mueročhtatuetpa' elloch alla tanterra ama'tcha' rroma. Atet otanet:

—Te'ñapa' o'ch notas, añ Jesús ñeñtara ñeñt o' neserrpare'tatuaspa' ñeñña Cristotets.

⁴ Puesheña'tetspa' poctey' eñchet o' ame'ñyet Jesús ñeñto'mar ñetpa' yemteñet Pablo ñaña Silas. Ñaña shonte' griegonesha' ñeñt ahuatoteñ cohuen cotape'chets Partsocoppa' o' ame'ñeñet Jesús. Ñaña shonte' coyaneshačno ñeñt e'ñe cohuen entyen acheñenesha' ñetpa'cho'ña o' ame'ñerret ñañet.

⁵ Judionesha'ña ñeñt ama ame'ñetsopa' ama poctey' enteñeto attoch acheñenesha'pa' o'ch yemchet Pablo, ñeñto'marña puesope'cheñotetpa' o' e'moñe'chet. Ñeñto'marña a'sechet puesheña'tets acheñ ñeñt ama tama es sherbetso ñeñt atta ellapetset anorrets all shontena acheñenesha'. A'sechet o'ch apčhachet shonte' acheñ attoch e'moñe'tachet Pablo. Ñetña pa'tsrre'mueñotetpa' ahuanmuet Jasón pa'paclo all a'posa Pablo ñaña Silas. O'pachet errotenotpa' o'te' cha'nmačha'tet a'yot attoch acheñenesha'pa' o'ch rromuet.

⁶ Allempoña čhačha'tet Jasón pa'paclopa' tarraña ama entaretteto. Ñapña rromuet Jasón ñaña po'poñečno acheñenesha' ñeñt ame'ñetsa. Ñetaña anmarettatset añcha'taretesho. Pa'tsrre'mueñotetpa' nanac ama'točetnomuet attočacho' chapuet allo'tsen añcha'taretnesha'. Allñapa' atet otoset:

—O' chap acheñ ñeñt muenene' o'ch a'po'poñeterrnay yocapña. Atto' pohuanmuet ama't po'poñ anetso'mar, te'pa' o' chapuet ñaña arr.

O' alla oterreterr:

—Añ Jasónpa' o' agapanet e'ñe cohuen te'pa' ñaña pa'paclo a'puenet.

⁷ Ñetpa' ama poctey' enteñeto atto añcha'taret o'ch nan ñoñets all anetso Romo. Ñetpa' añña otenet eñallo' po'poñ añcha'taret ñeñt nanac ahuanencat ñeñtpa' año' pa'so'cheñ Jesús.

⁸ Acheñenesha'ñapa' ñeñta e'muetpa' nanac atsrre'muet ñaña ama't añcha'taretnesha'.

⁹ Allempoña Jasón ñaña po'poñečno acheñpa' o' ayorañpsarettet allpon po'čllayoret. Allo'tpa' otarettet:

—Añ quellepa' allach yapuerres ato't ahuerria' Pablo ñaña Silas.

Allempoñapa' a'rroyeret Jasón ñaña po'poñečno acheñ.

Allempo chap Pablo ñaña Silas anetso Bereo

¹⁰ Allempoña acheñenesha' ñeñt ame'ñetsapa' o' mueñeret Pablo ñaña Silas Bereo. Tsapocma amñareñtenet a'nahua. O' chapuet Bereopa' be'tosčha'toset judionesha' po'prahuo.

¹¹ Añña judionesha' ñeñt Bereo'tsa'yenpa' ñetñapa' e'ñe cohuen cotape'chenet ama atteyayeto atet ñerra'm judionesha' ñeñt Tesalónico'tsa'yen. E'ñe pocsheñesha' e'mñotoñet Yompor po'ñoñ, allotña ñetpa' o' e'nyeset Yompor po'ñoño all aquellcaret ahuatoteñ. Tarro'mar ñetpa' mueneñet o'ch eñochet ñato' po'ñočhte' atet serrpare'ten Pablo ñaña Silas. Pate'tets yetpa' attecma pete't.

¹² Ñeñto'marña shonte' acheñenesha' ñeñt ame'ñetsa. Shonte' ñaña coyaneshačno ñeñt griegonesha' ñeñt nanac sherbetspa' o' ame'ñenet ñañet. Ñaña po'potantañ shonte' yacmanesha' o' ame'ñenet.

13 Añña judionesha' ñeñt yeçhetsy Tesalónicopa' o' e'mare'chet Pablo o' alla serrpare'tuerranerr Yompor po'ñoñ ñaña Bereo. Ñeñto'marña huaçha'tet ñamet all attoch atsrre'matachet acheñenesha' o'ch e'moñe'tachet Pablo.

14 Añña acheñenesha' ñeñt o' ame'ñapa' o' mueñet Pablo tepa'to' ontapo allo'tsen sa'p atarr. Añña Silas ñaña Timoteopa' alla a'pa Bereo.

15 Puesheña'tets acheñpa' o' co'a'nmet Pablo. Ñetpa' alla neñeta' Pablo anetso ñeñt pa'so'cheñ Atenas. Allña so'tanna'tuet Pabloñapa' atet otanet:

—O'ch sotuer Silas ñaña Timoteo onetepa' ñamet e'ñe tayecma.

Allempo çhap Pablo ñaña Silas Atenso

16 Pabloñapa' alla cohuanet Atenso. Allña cohuanetpa' shonte' entosan ayeçhcatareteçhno all Atenso, ñeñt po'yomporer pa'yen acheñenesha'. Ñaña' nanac llecacet.

17 Pabloñapa' mueneñ o'ch be'tos judionesha' po'prahuo attoch serrpare't epuet parro judionesha' ñaña po'poñeçhno acheñ ñeñt cohuen co'tape'chets Partsocop. Pate'tets yetpa' o'chçho' ahuo' all shontena acheñenesha' pueblo allña'pa' o'chçho' serrpare'tet parro ñeñt allo'tsa'yen.

18 Parrochpa' aña huapatsa ñeñt ame'ñenaya Epicuro poçta'pña, allotpa' o' huapa ñaña ñeñt ame'ñenaya po'poñ co'ta'pñats ñeñt otenet estoico. Ñetña'pa' atet otet:

—¿Es'te'ca'ye co'tape'chenña añ acheñ ñeñt atta nanac eñets?

Po'potantañña'pa' atet otet:

—Ñato' aña'e' muenen o'ch yeçhatey po'poñ po'yomporer ñeñt ama yentare ya.

Tarro'mar Pablo'pa' añ serrpare'tatenanet atet pena Jesús ñaña ama't atto tanterra Jesús.

19 Ñetña'pa' o' anmet Pablo all oteñet Areópago allecma apçhena eñotañnesha'. Allña'pa' otoset:

—Ñehua, te'pa' o'ch pötey este'ña pöçtape'chen pa. Yapa' te'pa' yemneñ o'ch yeñoch.

20 Tarro'mar ñeñt peserrpare'tenpa' ama ye'mare. Yapa' yemneñ o'ch yeñoch este' nanac pöten.

21 Ñehua, allohuen atenso'marnesha' ñerra'm añ serrpare'tats ñeñt ama puentaretopa' ellapenetcha' e'mñotet. Ñeñtach pa'terr ma'yöçhret. Ñaña ñeñt yeçha'huerra Atensopa' ñeñt huapyetsa po'poñ anetsotpa' te'pa' atta penet ñamet.

22 Allempoña Pablo'pa' tomos rroçho all oteñet Areópagopa' atet otanet:

—Atenso'marneshacha' napa' neñotenes sapa' aña atarr sema'yöçhrena ñeñt seyomporer sepa'yen.

23 All nasuanempa' shonte' nentyesnom ñeñt sema'yöchyena ñeñt seyomporer sepen. Pa'terr allecma sema'yöchenapa' napa' nent all oten añ ñoñets: "Añpa' añecop Yompor ñeñt ama yeñotena'." Ñeñt sema'yöchena ñeñt ama señotena'pa' ñeñtara Yompor te'pa' ñeñtcha'ña neserrpare'tatas.

24 'Añ ñeñtara Yompor ñeñt yeçhcate' añ pats. Ñaña yeçhcatan allohuen ñeñt yentyen aña patsro. Ña Pamo'mte' pen enet ñaña pats. Ñeñto'marña ya ñeñtey arromña'teypa' ama pallteno o'ch yeyeçhcaton allcha' yeçha.

25 Ñaña ama pallteno o'ch es ya'p. Ñocop ama es palltetso. Elloña ñaña yapuene' allohueney atto yocrrrena, apuene' ñaña atto yo'rrerrena. Ñapa' apuene' ora esocmañen.

26 'Ora allpon pa'namen acheñ ñeñt ye'cha'yetsa añe patsro Yomporpa' ña ye'chcatue' e'ñe puesheñarroña acheñ. Ñapa' o' nohuanet e'ñech allempohua corra'yaset. Ñaña o' na'yesianet e'ñech erra ye'cha'yaset añe patsro.

27 Tarro'mar Yomporpa' ye'chcatan pa'namen acheñ tarro'mar añ cotape'ch allochñapa' allohuen acheñpa' ñerra'm e'ñe aco'pa e'neretpa' po'ño'chpa' enteretcha'. Ñapa' allame'ttso'tsenate' yeshot.

28 Tarro'mar e'ñe ñeshot te'pa' yocrrena ñaña e'ñe ñeshotpa' ye'chope'chen, ñaña e'ñe ñeshotpa' ye'ñalleta. Ama't atet quellquë't ahua't puesheñarr samo'ts sa ñeñt etsotaye't ñoñets. Añmapa' ñeñt quellquë't samo'ts ahua't: "Te'ña po'ño'ch Yomporpa' puechemerasha' peney."

29 Alla oterrer Pablo:

—Ñehua, ñerra'm po'ño'ch Yompor puechemerasha' peney ya, ama pocteyaye o'ch yoch Yomporpa' arro't aye'chcataret orot, amapa' arro't aye'chcataret asretot, amapa' arro't aye'chcataret mapyot. Añmapa' ñeñt aye'chcataretpa' e'ñe ya yoc'apñoña aye'chcataret, atet es yetma'ntatena ya.

30 Ahua't acheñpa' ama't ama eñotenano ñeñt cohuentetsa Yomporecop, Yomporpa' amach erro't p'paneto. Tarraña te'ñapa' oteney yoc'ape'cherrepa' ello cohuen Yomporecop, allohueney acheñey ñeñt ey corra'yetsa añe patsro.

31 Yomporpa' tarro'mar mueneñ o'ch yoc'ape'cherr etserra tarro'mar ñapa' o' ne' esempoch allohueneypa' yorrterrach ñesho. Te'pa' o' nan Jesús ñach acrerre' allohuen acheñ ñeñt e'ñe po'ño'ch atet pete't. Acrancha' ñeñt cohuen acheñ ñaña ama't ñeñt ama cohueno acheñ. Ñeñto'marña te'pa' o' eñotatuay Jesús pa' ñach acrerrets tarro'mar Pomporpa' o' tantater ama't o' rromua ñaña Jesús pa' e'ñe pocte' es pen. Te'pa' o' eñotatuay allohueney acheñey.

32 Allempoña serrpare'tan Pablo attoch yetanterra ello pa' añña puesheña'tets acheñpa' o' achm'are'chet. Tarraña po'potantañña' atet otet:

—Ñehua, ñato' esempochña ye'mñoterrperr po'pocheño.

33 Allempoñapa' ahuer Pablo.

34 Tarraña puesheña'tetspa' yemchet Pablo ñaña o' ame'ñet. Añña puesheñarr ñeñt ame'ñatsa añ pa'so'cheñ Dionisio ñeñtara ñeñt añcha'tarettetsa ñeñt a'poc'atene' ñoñets all oteñet Areópago. Ñapa' o' ame'ña, ñaña po'psheñey coyanesha' ñeñt pa'so'cheñ Dámaris. Ñaña po'poñe'chno acheñ o' ame'ñet ñamet.

18

Allempo chap Pablo Corinto

1 Allempo ahua' ñaña anetso all oteñet Corinto.

2 Chap Corintopa' entosan puesheñarr judionesha' añ pa'so'cheñ Aquila. Ñapa' errte' huetsa Italiot epuet puetapor ñeñt pa'so'cheñ Priscila. Año'mar huenet Italiot tarro'mar añcha'taret Claudiopa' o' nan paterr ñoñets all Italo. Ñeñt pa' atet ot: Allohuen judionesha' pa' ahuanerretepa'to' Romot. Aquilapa' arr eñalletña Ponto. Pabloñapa' ahua' o'ch entenana' Aquila epuet puetapor.

3 Ñetpa' ñeñt po'taruas penet atto ye'chcatenet shetamtsopo'. Pabloñapa' alla a'pa epuet attoch taruaset parro.

4 Pate'tets semana allempo chen yet allempo amesenet Pabloñapa' o'ch'cho' ahua' judionesha' po'prahua. Allña' allcha' serrpare't epuet judionesha' ñaña ñeñt ama judioneshayaye. Ñapa' atarr mueneñ o'ch ame'ñatanet.

⁵ Allempoñapa' huapa ñaña Silas epuet Timoteo. Taya huapuet Macedonio. Allempopa' añ nanac torrena Pablo serrpare'te'. Ñapa' añ eñotatenan judionesha' Jesús pa' ñeñfaraca'ye Cristoterrets ñeññ atarr cohuenet ahuañoteñ.

⁶ Judionesha' ñapa' nanac e'moñe'chet Pablo, o' achmāre'chet. Allempoña Pablopa' o' pa'shman pa'shtam attoch eñochet nanac atpare'tenet. Allempoñapa' atet otanet:

—Sapa' sañeñach a'chencatuerrtsa. Tarraña napa' amach es seyohua'no. Te'pa' tayoteñ añach neserrpare'tat ñeññ ama judioneshayaye.

⁷ Allempoñapa' ahuer. Chap añ ñeññ pa'so'cheñ Justo pa'paclo ñeññ ame'ñenaya Yompor. Pa'paquēllpa' allame'ttso'tsen allo'tsen judionesha' po'prahua'.

⁸ Ñeññ amcha'tarettetsa judionesha' po'prahuo ñeññpa' añ pa'so'cheñ Crispo. Crispopa' o' ame'ñerrana Yepartseshar Cristo ñaña allohuen ñeññ pa'paclo'tsen. Shonte' corinto'marnesha' e'mñotoñet Yompor po'ñoñ, o' ame'ñerret ñaña o' apatarettet Yomporecop.

⁹ Atteñapa' orrtña Pablo atet ñerra'm cho es ye'chopo'ten. Yomporpa' ahuo't otan Pablo:

—Amach peñcha'tatsto, chocmach peserrpare't, amach atta pemamtetatsto.

¹⁰ Napa' o'ch necuam̄peneḡ attoch amach esesha' erroḡ es peḡaye. Tarro'mar napa' nechen shonte' acheñ añ anetsroḡ ñeññcha' name'ñaya.

¹¹ Allña' allena alla pater char ñaña meterrerr pechapña arrorr. Allpa' nanac ye'chatanet Yompor po'ñoñ.

¹² Allempoña amcha'taretteta Galión e'ñe alla Acayopa' judionesha'ña o' ap'chetpa', o' pachet Pablo. Allempoña o' rromuetpa' anmet amcha'taretesho allecma a'pocatenet ñoñets.

¹³ Chapuet allpa' atet otoset:

—Añ acheñpa' añ ye'chatenan acheñenesha' atto'ch ame'ñyet Yompor, tarraña ñeññpa' ama atteyaye atet oteney Moisés po'ñoñ ñeññ atet anareḡ.

¹⁴ Ahuo'ch eñoseñ Pablopa' Galiónña' atet otanet:

—O'ch notas ñeññes judioneshas, ñerra'm añ acheñ añte' o' ḡohua ñeññ ama cohuenopa' amapa' atet ñerra'm cho muetsenan acheñ, ñehua, pocte' napa' o'ch ne'mñnotas atto sottene'cheñ.

¹⁵ Tarraña ñerra'm amate' atteyaye, añpa' e'ñe socpa—atet sey'chaten sa ñeññes judioneshas, amapa' esesha'te' same'ñena, amapa' ñeññ atet oten ñoñets ñeññ atet anareḡ socop. Ñeñño'marña napa' notenes ñeññpa' socpa. Ñeñño'marña napa' amach neñoso añecop ñeññ e'ñe socpa.

¹⁶ Allempoñapa' o' cha'nma'cha'taterranet.

¹⁷ Allempoña acheñenesha' añ rromuet Sóstenes. Sóstenespa' ñeññ amcha'tarettetsa judionesha' po'prahuo. O' rromuetpa' o' nalle'chet e'ñe alla allame'tets amcha'taretesho. Amcha'tareḡ Galiónpa' ama cohua'ḡsaneto.

Allempo cherrerr Pablo Antioquío

¹⁸ O' atomaterrerr Pablo alla Corinto allempoñapa' o' so'tnerran ñeññ ame'ñetsa. Aña coterre' Priscila ñaña Aquila. Allotpa' año ahuañḡset boto, arrcha' tet Sirio'mar. Arr asuanmuet anets Cencrea. Allña'pa' o' shopena'tatosa Pablo. Añecop shopena'tata attoch eñochet o' etsotuan po'ñoñ ña ñeññ atet otan ahuaña Yompor ñeññcha' atet ḡa Yomporecop.

¹⁹ Allempoña chapuet Efesopa' allña'pa' o' sa'nerran Aquila ñaña Priscila. Ñaña'pa' o' ahuo' judionesha' po'prahuo allcha' serrpare'tet parro judionesha'.

²⁰ Allña'pa' otare'chet Pablo a'puepa'to' alla atomat, tarraña Pablo'pa' amo' mueno.

²¹ Allempoña so'tnerranetpa' atet otanet:

—Napa' o'ch alla ahuerren Jerusaléño allcha' nocshapretuerra añ yeter ñeñt anaret Partsocop allempoch alla cosherrerr judionesha'. Ñerra'm Yomporcha' muenatspa' ñato' o'ch nohuerrerr esempo.

Allempoña'pa' ahuañperrerr boto.

²² Allempoña'pa' arr etsotam̃psosa Cesareo. Cesareoñapa' asuanom Jerusaléño allcha' abechnoman ñeñt ame'ñetsa all. Allempoña'pa' o' alla ahuer Antioquíu.

Allempo poma'pocheño ahuererr Pablo serrpare'tats allemeñ anetso'mar

²³ Antioquíopa' alla allponmatnerr, allotña'pa' o' ahuererr. Arr asuanerr Galacio'mar allotpa' ahuer Frigio'mar. Ñeñt ame'ña'yetsa allpa' o' yenpanet attoch huomenc perret pueyo'cher.

Allempo Apolos atarr cohuen serrpare'tatosanet all anetso Efeso

²⁴ Ñehua, allempopa' eñall puesheñarr judionesha' añ pa'so'cheñ Apolos ñeñt huetsa Alejandriot. Ñaña'pa' o' chap Efeso. Atarr cohuen serrpare'tenan Yompor po'ñoñ, atarr etsotenan Yompor po'ñoñ ñeñt atet aquellcaret ahua'otoñ.

²⁵ Napa' ay'chataret ñeñt atet'cha' perra Yepartseshar ñeñtara ñeñt Cristotats. Napa' e'ñe po'ño'ch serrpare't huomenc, ye'chatanet ñeñt'cha' atet perra Jesús. Añaña ama e'ñe eñotueno ora atet pena Jesús. Aña eñoten atet ye'chate't Juanañ ñaña atet apate't Juanañ.

²⁶ Napa' serrpare'te't huomenc judionesha' po'prahuo. Allempoña e'm̃ Priscila ñaña Aquila, ñetña'pa' anmet ellonet allcha' eñotachet e'ñe ora ñeñt atet pa' Yompor ñeñt'ña palltena o'ch eñoch e'ñe p'octacma.

²⁷ Allempoña'pa' secha Apolos Acayo. Añaña ñeñt ame'ñetsapa' o' yenpuet. Ñetpa' o' quellquët carta añecop ñeñt ame'ñetsa all Acayo attoch ñetpa' o'ch agapet Apolos e'ñe cohuen. Allempoña o' chap all Acayopa' nanac yenpan ñeñt ame'ñenaya cohuen ñoñets all.

²⁸ O' eñotatanet po'ño'ch Jesús'pa' ñeñtca'yeña Cristoterrets ñeñt atarr cohuenet ahua'otoñ. Yompor po'ño'ñoñ ñeñt aquellcaret ahua'otoñ o' gatyesanet atto Jesús o' etsotatuan ñeñt aquellcaret ahua'otoñ. Ñeñt allo'tsa'yen allohuen acheña'pa' e'ñe po'huamencocma ye'chatanet. Allempoña ama't puesheñarra judionesha'pa' ama erro't otenaye' enteto.

19

Allempo cherrerr Pablo Efeso

¹ Allempo Corinto'tsenmeñ Apolos, Pabloña'pa' alla chopeñe'chen aspentarero. Atteña'pa' o' alla cherr Efeso. Allña'pa' all entosan allponsheña ñeñt ame'ñetsa. Tarraña ñetpa' allpon eñotenet allpon serrpare'tate't Juanañ.

² Pabloña'pa' a'p'to'tan ñeñt ame'ñetsa, atet otanet:

—Sapa' allempoteñ same'ña, ¿ahuo't chorrasaña Parets Puecamquëñ?

Ñetña'pa' o' anapuet:

—Yapa' ama ye'mareña ñato' eñallte' Parets Puecamquëñ.

³ Pabloña'pa' alla oterrerr:

—¿Erro'fenote'tña sapatare'tta?

Ñetña'pa' atet otet:

—Yapa' yame'ñeñoñ atet otye't Juanañ attoña yapatare'tta.

⁴ Pabloñapa' alla oterrerr:

—Añoñña apaten Juanañ atto o' cotape'cherret ello cohuen Yomporecop allotñapa' o'ch apatarettet attoch ame'ñeret ñeñtcha' huapatsa chenta'. Añoñña ñeñt huapatsa chenta'pa' añepa't Jesús.

⁵ E'muet atetpa' apatarettet pame'ñeñofet Yepartseshar Jesús.

⁶ Allempoña Pablopa' o' a'pñlanet potot. Allempoñapa' ahuepa't chorranet Parets Puecamquëñ. Allempoñapa' o' eñosyeset po'poñ ñoñtso, o' a'potoñet atto eñorana'tanet Yompor.

⁷ Ñeñt eñosyesets po'poñ ñoñtsopa' allo'tsen ñato' çharrasheña puechena epsheña.

⁸ Pablopa' nanac serrpare'tate't all Efeso. Pate'tets semana o'chcho' be'tosos judionesha' po'prahuo o'chcho' serrpare'tatanet atet pena Yompor po'cohuenña ñeñt atto atarr ayochreshattena ña. Ama mecha'te'te ama't mamesha. O'chcho' yeçhatanet allochñapa' o'ch ame'ñatanet. Atteñapa' o' ma'pñña arrorr.

⁹ Tarraña puesheña'tets acheñpa' nanac atpare'chete't ama ame'nyeto atet serrpare'tatanet Pablo. Patpare'teñofetpa' ama't all shontena acheñenesha'pa' o' sasare'toñet Jesús poçta'pña. Allempoñapa' ahuer Pablo. Ñeñtña ame'ñetsapa' o' coteret. O' ahuanmuet allo'tsen Tiranno pue'scuela. Allñapa' pate'tets yetpa' añoñña Pablopa' o'chcho' serrpare'tatanet pue'scuelpahuo.

¹⁰ Atteñapa' o' met epa char. Allohuen asio'marnesha' o' e'mare'toñet Yompor po'ñoñ—allohuen judionesha' ama't ñaña allohuen ñeñt ama judioneshayaye.

¹¹ Yomporpa' nanac ahuamencat pan Pablo. Ñeñto'marña nanac ortatanet Yompor po'partsoña ñeñt ama puentareto.

¹² Atteñapa' añoñña acheñenesha'pa' o'chcho' anerret ñeñt es a'pñla'yen Pablo, atet ñerra'm es pañell amapa' pañoshe'm. O'chcho' anmet allo'tsen ñeñt atsna'tets. O'ch çhapachet allpa' o'chcho' correrraña atsnañe't. Ama't po'neñe'tetpa' o'chcho' queçhpa'nerranet.

¹³⁻¹⁴ E'ñe allempopa' allo'tsen puesheña'tets judionesha' ñeñt achyo'tañnesha' ñeñt çhocma chopeñe'chets erracmañen. Ñehua, ñetpa' añ puechemereshanet ñeñt puesheñarr judionesha' ñeñtara ñeñt cornesha' nanac amcha'taret añ pa'so'cheñ Esceva. Allo'tsen cançherrsheña puechemerasha'. Ñetpa'cho'ña o' topachet ahuo'ch queçhpatachet ñamet acheñenesha' po'neñe'ter e'ñe pa'so'chño Yepartseshar Jesús. Ahuo'ch pet atet pena Pablo. Puesheñarrña ñeñt chorrena oneñe'tpa' otoñet po'neñe'ter:

—Napa' o'ch nota'p, e'ñe pa'so'chño Jesús ñeñt serrpare'ten Pablo o'ch pequeçhpa'ner añ acheñer.

¹⁵ Allempoña atet ochet oneñe'tpa' ahuepa'tcha' eñoraña, oneñe'tpa' atet ot:

—Jesúspa' neñoteññañ po'huamenc, Pablopa'cho'ña neñoteññañ atet po'huamenc echen. Tarraña sapa' eseshasuañaca'ye. Ama neñotennaso sehuamenc.

¹⁶ Allempoña acheñ ñeñt chorrena oneñe'tpa' omachana'tanet, orrotet parro epuet achyo'tañnesha'. Oneñe'tpa' nanac atserrpatse'tanet allohuenet. Muelle'mco't atserrpatse'tuanet o' matrra'tuet pocollot.

¹⁷ Añoñña allohuen efeso'marnesha'pa' o' e'mare'chet atet o' pet—allohuen judionesha' ñaña ñeñt ama judioneshayaye. Atarr yore'tanet. Allempoñapa' amcha'na'tpo' enteñet Yepartseshar Jesús.

¹⁸ Shonte' acheñ ñeñt ame'ñetset allempoñapa' huapyeset, o' a'meta'yesoset atto achyo'tyesete't.

¹⁹ Patantarrpa' o' huapatyeset po'libro ñeñt allo eñotet achyo'tatset. E'ñe all shontena acheñenesha' o' chama'tuet po'libro. Allempoñapa' o' somuerret errponte' tsa'tena allpon libropa' o' sala amnaroch çharra' mil poçllayoret. Ñeñt allpon tsa'tena allohuen libro.

²⁰ Ñeñto'marña atarr añcha'na'tpo' entoñet Yompor po'ñoñ. Atarr ame'ñet.

²¹ Allempoña e'ñe Yompor Puecamquẽño'tpa' o' secherrerr Pablo o'ch ahuererr Macedonio ñaña Acayo, alloña o'ch asuanerrpa' o'ch ahuer ñaña Jerusaléño. Alloña' atet ot Pablo:

—Te'pa' aña palltetsa o'ch ahuen ñaña Romo.

²² O' mueñan epsheña acheñ ñeñt yenpuene' ñeñtcha' ñanom tatsa Macedonio. Aña ñeñt epsheñapa' añ pa'so'cheñ Timoteo ñaña Erasto. Pabloñapa' o' a'pohuerra allponmat Asio.

Allempo nanac ama'toçhtena acheñenesha' all Efeso

²³ Allempopa' o' atsrre'ma puesheña'tets acheñ. Añ atsrre'matahuet atto' pena ñeñt ame'ñetsa.

²⁴ Allo'tsen puesheñarr añ pa'so'cheñ Demetrio ñeñt ñanom e'moñe'te' ñeñt ame'ñetsa. Ñapa' añ po'taruas pen o'ch yeçcatyesan pocollatollesha' añ toma'ntatena pocoll ñeñt allecma muechatse'tenet ñeñt po'yachorer penet ñeñt otenet yachor Diana. Añ pocollatollesha'pa' arroto' ayeçcataretta asertallo't. Shonte' acheñ ñeñtara po'taruas penet, Demetrio ña apahuete't po'taruas atet. Shonte' quelle ganete't po'taruasot.

²⁵ Atteñapa' Demetriopa' o' apçhatuan allohuen pa'taruasañer ñaña po'psheñeçhno, ñetpa'cho'ña ñeñtara po'taruas penet. Apçhatuanetpa' atet otanet:

—Masheñeshacha' sapa' señoñeñ añ yetaruas ñeñtapa' alloch yegana shonte' quelle.

²⁶ Te'pa' señoñeñ ñaña añ ñeñt otenet Pablopa' ahuo't otuan acheñenesha' añ ñeñt yeyoser ñeñt yeyeçcaten yapa' ñapa' oten amo' Partsoyaye. Ñapa' o' cotape'chatuan shonte' acheñenesha', te'pa' shonte' o' ame'ñatua. Ñetpa' o' huapore'tuerret shonte' ñeñt yapuenanet ñeñtcha' ma'yochet. Sapa' o' sentue atet penet arr Efeso ñaña o' se'mare'ch atet pa'yenet ora erraparen Asio'mar.

²⁷ Alla oterraneterr Demetrio:

—Ñeñto'mar te'pa' o'ch notas, ñato' o'ch huañerr yetaruas alloch yeganerra quelle. Tarraña ñeñtapa' ama pocteyaye. Ñato' ellopa' o'ch a'ypo'ña'hueret ñaña yachor Diana ñeñt puerahuo'tsen. Ñato' allempopa' ama't yachor Dianapa' o'huañcha' añcha'na'tpo' eñchet, ama't ñaña ora allohuen asio'marnesha' ñeñt po'yachorer pene'.

²⁸ Ñeñña e'm allohuen acheñenesha'pa' nanac atsrre'matanet. Pa'tsrre'mueño'tetpa' o' rranare'tyeset, alla oterrete't:

—¡Paretsña'cho' yachor Diana!

²⁹ Shonte' acheñ nanac ama'toçhtenet allohuenet. O' rromuet Gayo ñaña Aristarco ñeñt macedonio'marnesha' ñeñt parro chopeñe'chen Pablo. O' matrra'tet allo'tsen pocoll atarrpo' allecma apçhena acheñenesha'.

³⁰ Pabloñapa' mueneñeñ o'ch be'tos ñaña all ama'toçhtenetpa' tarraña aña ñeñt ame'ñetsapa' ama muenacheto.

³¹ Ñaña puesheña'tets ñeñt añcha'tarettetsa all Asio ñeñt muerenaya Pablopa' o' mueñoñet ñoñets attoch amach tatsto all apçhenet te't muetseñet.

³² Allña apchenetpa' atta rranare'tyenet. Puesheña'tetspa' atet otyeset atet coťape'chyenet ñet, po'potantañña'pa' atet otyeset po'poñ ñeñt atet coťape'chyenet ñamet. Allohuenet ama't ama eñotueñeto esocopte'ña apchenet, tarraña ataña nanac ama'toçhtenet.

³³ Puesheña'tets judionesha' o' cheta'nmet Alejandro o' huapachet attoch eñosachet. Ñaña'pa' o' echantosán pot attoch o'ch muetsoñeñtet añecop attoch o'ch a'pocatan ñoñets judioneshacop.

³⁴ Tarraña allempo acheñenesha' ñeñt ama judioneshayaye o' eñchet Alejandro ñapa' judionesha' ñetña'pa' alla rranare'terreterr. Atarr tematen rranartenet. O'chcho' alla oterret allohuenet parro:

—¡Paretsña'cho' yachor Diana! ¡Paretsña'cho' yachor Diana!

³⁵ Allempoñapa' puesheñarr añcha'tareť ñeñt taruaset gobiernocoppa' o' emma'huanet, atet otanet:

—Masheñeshacha', o'ch notas ñeñtes yeçhetsa arr Efeso. Ama't allohuen acheñenesha' erraparen e'ñe eñotueñet efeso'marneshaypa' yapa' ñeñtey cohuanpene' yachor Diana ñeñt puerahuo'tsen, ñeñtara yachor Diana ñeñt nanac Parets, ñeñt sohuatsa entot.

³⁶ Ñeñtpa' yeñotueñ allohueney acheñey. Amate' errotenot yoto ama atteyaye. Ñeñto'marña e'ñe pocte' o'ch semtsoñeñta. Amachña ÷ha sama'toçhtatsto.

³⁷ O' alla oterraneterr añcha'tareť, atet otanet:

—Secua' ahuo't sehuapach arr añ epsheña acheñ. Tarraña ñetpa' ama es yoreneto yachor po'prahuot ñaña ama achñare'teñeto yachor.

³⁸ Ñeñto'marña te'pa' o'ch notas, ñerra'm mueneñ Demetrio ñaña pa'taruasañreçhno o'ch otteñe'chatanetpa' te'pa' e'ñe pocte' temantanetepa'. Tarro'mar te'pa' atorareť allcha' a'pocatatet ñoñets. Ñeñtcha' a'pocotate' ñoñetspa' allo'tsena.

³⁹ Tarraña ñerra'm este' semnen o'ch sa'pocatat po'poñpa' ñeñtpa' añ pocte' o'ch sa'pocatach allecma apçhena ñeñt nanac añcha'tareteçhno.

⁴⁰ Ñato' temanta'yeta ya tarro'mar yapa' e'ñe attota yama'toçhtena.

⁴¹ Ñeñta otuanetpa' o' mueñhuerranet. Allempoñapa' ahuanomhuerret.

20

Allempo ÷herrerr Pablo alla Macedonio

¹ Allempoña o' muetsoñeñtuerret Pabloñapa' agotatuan ñeñt ame'ñetsa. O' coťape'chatnenanet e'ñe cohuen. Allempoña e'ñe puemorrenteñoñanet e'ñe cohuen so'tuanenanetpa' o' ahuen, o'ch ahuer Macedonio.

²⁻³ All oñerr Macedonio'marpa' nanac serrpare'tatnerranet Yompor po'ñoñ. Atteñapa' o' ÷herr Grecio ñeñtara all oteñet Acayo. Allpa' alla a'pohuerra ma'pma arrorr. Autsaño' tampsatsañ ñaña Sirio botopa' tarraña o' e'mare'ch allpa' ÷ha o'pateña judionesha' o'ch rromapet. Ñeñto'marña alla secherra Macedonio (tarro'mar allpa' patso'marach chope'chnerr).

⁴ Allempoña ahuer Macedoniopa' allpon acheñ o' coteret. Ñeñtpa' ñeñtara añeçhno: Sópater ñeñt bereo'marnesha', allotpa' ñaña Aristarco ñaña Segundo ñeñt tesalónico'marnesha', allotpa' ñaña Gayo ñeñt derbo'marnesha', allotpa' ñaña Timoteo, ñaña allo'tsen Tíquico ñaña Trófimo ñeñt asio'marnesha'. Allpon acheñ coterre'.

5-6 Arr čhačha'tet Filiposo. Allempoña ñetpa' ahuanmuet o'ch otet, ar- rcha' cohuosyet Troaso. Yapa' alla ya'pa Filiposo epan Pablo allpon- mat.* Allempoña o' huañ allempo coshenet allempo rrenet pan ñeñt ama achasareteyaye allempoñapa' o' yahuanma yaña. Allempo ahuañpsey botopa' pa'mnarmatñoñapa' o' yečhap yaña Troaso. Allñaapa' allo'tsa'yen ñeñt otatsa ahuaña. Allñaapa' alla ya'posa cančherrmat.

Allempo Pablopa' emo'tnom anetso Troaso

7 Allempoña čhap allempo mo'tta'muena yeñats temencpa' yapčha allo- hueney ñeñtey ame'ñetsa. Yeyerpueñoť Yepartseshar Jesúsapa' o' yerra' pan ñeñt ashota'tareť ñeñt atet anaret Yomporecop. Allempoña Pablopa' nanac serrpare'tatanet. Ñapa' otanet:

—O'ch ahuenen tsapať.

Ñeñto'marña ama't o' rročh tsapuenpa' alla serrpare'tatenanet.

8 Allña yapčhena pocollo enopa' nanac a'yohuen bať. Allpa' shonte' lam- pareñ ñeñt corra'yetsa.

9 Allñaapa' allo'tsen puesheñarr huepuesha' añ pa'so'cheñ Eutico. Ñañaapa' alla anen ventanoť. Atto nanac serrpare'ten Pablopa' Euticoñapa' ahuo't alla ma' anatof. Ahuo't alla ma'pa' machayoťa shora'nom patso. Ma'pa piso allot shora'nom. Allempoña echantoseťpa' o' rroma.

10 Allempoña sohuerra ñaña Pablo. O' huapa o' mo'capa' a'čhono'tos allempoñapa' otanet:

—Amach sellcatsto, Yomporpa' o'ch alla tantater.

11-12 Añña huepuesha'ña ñeñt o' shora'nemuapa' o' alla aneret e'ñe huomech. Allempoña allohuenetpa' atarrepa'tcha' coshet. Allempoñapa' o' alla a'terr Pablo. Allñaapa' o' rrallme'chet. O'ña rrallme'chuetpa' o' huañ tematen all serrpare'tatannenet. Atteñapa' o' puetarespenet. O'ña puetare- suenpa' o' ahuen Pablo.

Allempo ahuanerret Troasoť arr čhačha'tet anetso Mileto

13 Allempoña yapa' o' yahuanma o'ch yota o'ch yerrma' añecmuen noñt ñeñt otenet bote o'ch ahuañpsey Asóno allcha' yecuos Pablo. Tarro'mar otey Pablopa' ñapa' arro'ch oñom patso'mar o'ch čhap Asóno. Alloťñaapa' o'ch a'tap ñaña boto, tarro'mar atet o' ya'pocťat epay Pablo ahuañacma.

14 Atteñapa' o' yečhap Asóno. Allñaapa' all yentanna'ta epay Pablo. Alloťñaapa' a'tap ñaña boto, alloťñaapa' ahuañpsey parro. Atteñapa' o' yečhap Mitileneo.

15 Mitileneoťñaapa' o' alla ahuañperryerr boto. Tsapaťñaapa' a'yo'mara yoñem Quío. Alloťña tsapaťenerrpa' alla yetsotosa Samsó. Yenťerrerr Sam- soťpa' alla yamesuerrerr Trogilio. Alloťña tsapaťenerrpa' alla yetsotuerrerr Mileto.

16 Allñaapa' ot Pablo amach yetatsto Efeso tarro'mar ñapa' ama mueno o'ch alla yatoma'tare'tnom Asio'mar. Ñapa' aña mueneñ o'ch yečhap tecma Jerusaléno añecop o'ch yentapreterra' Pentecostepo.

Allempo e'ñe ñeñteshaña serrpare'tatnerranet Pablo Efeso

17 Ñeñto'marña allempo Mileto'tseneypa' Pabloñapa' agotatan ñeñt pom- pornesha' pen ñeñt ame'ñetsa Efeso, onetepa' Mileto all o' yečhap ya.

18 Allempoña o' huačha'tet Pabloñapa' o' serrpare'tatanet, atet otanet:

—Sapa' señotenen atet o' ne'pohuanma sesho, ama't ahuaťoteñ allempo ñanom nečhap Asio all seyčhena.

* 20:5-6 Lucas ñeñt quellquē' añ ñoñets ñapa' coťa'nman ñaña Pablo.

¹⁹ Sapa' señothenen añecop netorrena Yomporecop ama añecpaye' netorreno attoch acheñenesha'pa' o'ch entenen e'ñe cohuen ñeñt e'ñe orrena. Napa' ama't neya'chpeñesha' netorrena Yomporecop tarraña judionesha'pa' nanac o'patennet. Ama't pa'namen nehuapoya e'ñe nemuerochteño'pa' chocma netorrena Yomporecop.

²⁰ Señothenen ñaña napa' o' neserrpare'tatuas ora allohuen ñeñt poctetsa socop. Ama es na'nasotam'psaso ama't coñe'ta. Napa' o' ney'chatuas allohuenes parro allempo sap'chena ñaña o' ney'chatyesnomues e'ñe sepa'cillo'mar.

²¹ O' neserrpare'tatuas añ pocte' o'ch soctape'cherr ello cohuen Yomporecop ñaña añ pocte' o'ch same'ñera Yepartseshar Jesucristo. Ñeñt'pa' atet' o' notuas allohuenes ñeñtes judioneshas ñaña ama't ñeñtes griegoneshas.

²² Te'pa' o'ch ahuerren Jerusaléño, tarro'mar o' sechaterren Yompor Puecamquëñ. Tarraña o'ch necherr Jerusaléño'pa' ama neñoteña' ñeñt'cha' allohuen nehuapoya all.

²³ Aña neñoten o' eñotaten Parets Puecamquëñ ñeñt'cha' atet' pa'net o'ch yottam'pesnet'pa' o'ch muerochtatnet. Ora allpon anetso attec'mach pa'net.

²⁴ Tarraña ama't atet'pa' napa' ama neñt'cha'teno. Ama't'cha' nerromapa' pocte' nenteñ o'ch nerroma. Te'pa' añ palltetsa o'ch ne'nua netaruas. O'ch netsotatuon ora allohuen ñeñt atet' llesensa'n Yepartseshar Jesús. Ñeñt atet' llesensa'n Yepartseshar Jesús'pa' ñeñt'pa' attoch neserrpare'tach acheñenesha' ñeñt cohuen ñoñets atto Yompor pomuereño'pa' a'queshp'aterrey'cha'.

²⁵ O' alla oterraneterr Pablo:

—Te'pa' neñoteñ sapa' amach senterrno po'pocheño, ama't allohuenes allo' nechopeñe'chuanom serrpare'tnomue' Yompor po'cohuenña. Aña neñoten amach senterrno.

²⁶ Neñto'marña te'pa' o'ch neñotatas ñerra'm eseshas chenquërrtsapa' tarraña napa' ama es na'chencatam'psase'te tarro'mar napa' chocma neserrpare'tatase't attoch amach sechenquërrro.

²⁷ O' neserrpare'tatuas ora allohuen atet' cotape'chateney Yompor. Ama es na'nasotam'psaso ama't coñe'ta.

²⁸ Allempoñapa' alla oterraneterr ñeñt' pompornesha' penet:

—Te'pa' seño'tach. Te'pa' añ pocte' o'ch secuam'peñ cohuen allohuen ñeñt ame'ñenaya Yompor. Atet'cha' sepa' atet' ñerra'm ñeñt cohuan'pene' po'carrneror. Sapa'cho'ña atet'cha' sepa' saña o'ch secuam'peñ ñeñt ame'ñetsa. Ñeñt'cha' setaruas sepa' atet' llesenses Parets Puecamquëño'. Tarro'mar Yepartseshar Jesús'pa' o' rroma ño'cquet ñamet.

²⁹ Napa' neñoteñ allempoch ama allo'tsennopa' o'ch huaponasa ñeñt'cha' seshquë', ñapa' mueneñt'cha' o'ch a'psatas Yompor po'ñoñ. Atet'cha' huapuet atet' ñerra'm ma'yarrpa' ñerra'm huapapa' o'ch a'chencatuan allohuen carrnero.

³⁰ Ama't e'ñe sagattsapa' orrtet'cha' ñeñt'cha' seshquë', ñeñt ama Yomporeyaye po'ñoñ'pa' ñeñt'pa' serrpare'tatase't'cha'. Tarro'mar ñet'pa' mueneñt'cha' o'ch ame'ñat'uset e'ñe ñet poctap'ña.

³¹ O' alla oterraneterr Pablo:

—Te'pa' seño'tach. Chocmach seyerpa'na tarro'mar sapa' seño'teñ o' ma'pa char chocma noctape'chatas cohuen—ama't ye'to, ama't ñaña tsapo. Ama't neya'chpeñesha' chocma noctape'chatase't.

³² Te' Yomporpa' cohuan'psasepa'ch. Yomporepa'chña po'ñoñ seño'tate' puemuereña. Yomporepa'chña po'ñoñ sey'chate' attoch huomenc sepa' seyocher. Yomporepa'chña po'ñoñ sa'queshp'aterre' atet' ñerra'm ñeñt allohuen ñeñt pame'ñeñotet o' a'cohuentatuare'tterret.

³³ Ñaña napa' ama neye'chapreto po'psheñeñ po'çllayor, amapa' pa'shtam ama neye'chapreto.

³⁴ Sapa' señotenen ñeññ allpon nepalltenapa' e'ñe notoñ netaruasa' atto nechen ñeññ nepallta'yena. Ñaña e'ñe na netaruaso'tpa' es napa'yeñ ñaña ñeññ noctene'.

³⁵ E'ñe na netaruaso'tpa' çhocma neñotatenes ñeññ poctetsa o'ch yetaruasa' attoch es yechyes alloch yeyenpue' ñaña po'psheñeñ ñeññ es palltetsa. Añ pocte' o'ch yeyerpueña atet otye't Yepartseshar Jesús. Ñapa' atet ote't: "Nanac yocshena ñerra'm esempo es yapa'yeñ po'psheñeñechno, añña ama tama yocsheno ñerra'm esempo po'psheñeñpa' o'ch es apueney ya."

³⁶ Ñeñña otuapa' o' concorpa o' ma'yochatnenanet.

³⁷ Añña acheñenesha'pa' pomorrenteño'tet Pablopa' o' yahuanrrortet. A'çhono'chetpa' o' tso'tsapa'chet.

³⁸ Atarr llequët nanac. Atet o' otanet Pablo ñeññña nanac llecatahuet tarro'mar ñapa' otanet "amach senterrno arr patsro." Allempoñapa' o' co'ta'neñet Pablo arrohua allo'tsen bote.

21

Allempo o'ch alla çherrerr Pablo Jerusaléño

¹ Allempoña o' yesa'nenanetpa' o' ahuañperryerr boto. Alloñña'pa' paçharra yepe'pa' o' yeçhap Coso. Tsapañña'pa' arr yeçhap Rodaso. Alloñña'pa' arr yetsotosa Pátaro.

² Pátaroñña'pa' o' yentos po'poñ bote ñeññcha' tatsa Fenicio. Yañapa' o'çho' ya'tapos alloñña'pa' ahuañperryerr boto.

³ Allempoña yetam'pena sa'popa' yentnom coñe't pats ñeññ pa'so'cheñ Chipre, e'ñe arro't yentnom ye'chcoterot. Atteñña'pa' o'çho' yemtam'pes boto, arr yesechena Sirio. Allempoñapa' arr yetsotosa all oteñet Tiro, tarro'mar allpa' o'ch a'suatatsre'tet boto't.

⁴ Yañapa' o' yesua attoch yentnom ñeññ ame'ñetsa all. Allña'pa' alla ya'posa cançherrmat. Ñeññña ame'ñetsa allpa', ñetñapa' ochet Pablo:

—Amach petatsto Jerusaléño.

Tarro'mar Parets Puecamquëñpa' ahuo't eñotatanet atetcha' pet Pablo all Jerusaléño.

⁵ Tarraña allempoña o' met cançherrmatpa' o' alla yahuanerrerr. Allempoña allohuen yacmanesha'pa' co'ta'nemyet pueblot a'yene't, ñaña puetaporeshohuenet ñaña puechemerneshet. Allña'pa' all yeconcorposa ontapopa' o' yema'yochosa all.

⁶ Allempoña o' yema'yochuapa' o' yeso'tenanet. Allempoña yapa' o' ya'tenerr boto, ñetñapa' o' ahuanerret pa'paclo.

⁷ Allempoña o' yenerr Tiro'tpa' arr yetsotuenerr Tolemaido. Allña'pa' all yehuom'cha'tnom ñeññ ame'ñetsa. Allña'pa' all yepatrranom ye't.

⁸ Tsapañña'pa' o' yahuanenerr, allempoñapa' arr yeçhap Cesareo. Allña'pa' o' yebe'tosos Felipe pa'paclo, allpa' allcha' yommosa. Añ Felipepa' ñeññ serrpare'tene' cohuen ñoñets. Ñaña ñeññara Felipe ñeññ net ahuaña ñach epatyesahuet rreñets epuet po'psheñeñechno pechapsheña.

⁹ Añ ñeññara Felipepa' echenan pa'tatssheña po'sñesha'. Ñetpa' ama arrol-lareteto. Ñetñapa' nanac a'poteññañet ñamet Yompor po'ñoñ.

¹⁰ Allempoña ya'llponmatos allpa' o' huapa ñeññ a'mtene' Yompor po'ñoñ añ pa'so'cheñ Agabo. Ñapa' Judeot huapa.

11 Allempo huapapa' o' pueyosan Pablo po'chanar. Añña chanaretspa' Agabo ñañeña huancatatsa e'ñe potot ñaña pa'tcof. O' huanca'huapa' atet otan Pablo:

—Ñeñtpa' atet oten Parets Puecamquëñ, ñeñteþ echene' añ chanaretspa' judionesha' ñeñt Jerusaléño'tsa'yenpa' atetcha' huancapet atet nehuanca te' ñañeña. Ehuancarecha' o'ch pomapet allo'tsen acheñenesha' ñeñt ama judioneshayayeto.

12 Ñeñña atet ye'mpa' yotare'ch Pablo:

—Amach petatsterro Jerusaléño.

Ñaña ñeñt acheñenesha' ñeñt allo'tsa'yenpa' atet otare'chet Pablo ñamet.

13 Allempoña Pablopa' otanet:

—Eso'mare'tña nanac seyahuenta, te'pa' o'ch sellcaten. Napa' e'ñe pocte' nenteñ huanca'netepa'. Ñaña e'ñe pocte' nenteñ nerromuepa' Jerusaléño, attoch nerroma e'ñe neserrpare'teño Yepartseshar Jesús po'ñoñ.

14 Pabloñaapa' ama e'mñotye. Allempoña ama errof yepepa' o'huañ errof yoch, aña yoter:

—Ñehua, ñerra'm atette' muenen Yomporpa' ama'tpa' attepa'ch.

15 Allempoñaapa' o' yañño'tatsre'tena. Allempoña o' yañño'tatsre'tuapa' yahuanenerr Jerusaléño.

16 Añña puesheña'tets cesareo'marnesha' ñeñt ame'ñetsapa' allenta co'a'nenyet, arr nehuerryeta' all yeçhena Mnasón ñeñtara ñeñt chipro'marnesha'. Ñañaapa' ahuatoteñ ame'ña'hua. Pa'pacloñaapa' all ya'posa.

Allempo Pablopa' emo'tuerr Jacobo ñeñt Jesús pa'mo'nasheñ

17 Allempoña o' yeçherr Jerusaléñoapa' añña ñeñt ame'ñetsa allpa' e'ñe pocsheñesha' agapyet.

18 Tsapaña puetarenpa' yahuanma parrocmá Pablo o'ch yenteña' Jacobo. Añña allohuen ñeñt pompornesha' pen acheñenesha' ñetpa'cho'ña alla yentosanet, allo'tsa'yenet ñamet.

19 Pabloñaapa' o' huomcha'tosanet allohuenet. Huomcha'tuanetpa' allempoñaapa' serrpare'tatuerranet e'ñe ora allpon Yompor po'huamenco'f o' et-sotuoñ e'ñe ñocop. Serrpare'tatuerranet atto acheñenesha' ama't ñeñt ama judioneshayayetopa' o' ame'ñatuanet ñamet.

20 Ñeñña e'mhuetpa' nanac aye'choçhtatoñet Yompor. Tarraña allempoñaapa' atet ochet:

—Tarraña masheñe, ahuo't peñoçh te'pa' shonte' mil judionesha' o' ame'ñenet ñamet. Ñetpa' e'ñe huomenco otenet añ palltetsa allohueney ñeñtey judioneshay o'ch yeþohua atet otye't Moisés.

21 Ñetpa' o' e'mare'tonapet peñoñ añe'no' peyçhaten judionesha' ñeñt yeçha'yetsa po'poñ anetso all yeçha'yena ñeñt ama judioneshayaye atto año' pocte' o'ch puesuerret Moisés po'ñoñ. Ñaña o' e'mare'tapet ahuo' þotuanet amach tsorratsteto puechemeretollesha', ñaña amo'ch þatsteto atet yeyçhena ahuatoteñ.

22 Allempoñaapa' alla otereterr Pablo:

—Ñehua, te'pa' ¿errote'tcha'ña yeþaña te' tarro'mar po'ñoçhpa' o'ch e'mare'tapet o' peçherr arr?

23 Ñehua, te'pa' o'ch pe'mñotey o'ch yotaþ ñeñtcha' atet peþa. Ñehua, arrpa' arro'tsen pa'tatssheña ñeñt netset ñetañeña ñeñtcha' atet pet Yomporecop, ñeñt atet yeyçhena ya ñeñtey judioneshay.

24 Te'pa' aña pocte' ñeñtcha' atet peḡa. O'ch ḡanemñ añ pa'tatssheña e'ñe epaspa' o'ch sa'cohuentatena' ñeñt atet anaret Yomporecop ñeñt atet yeychena ya ñeñtey judioneshay. Ñaña añ pa'tatssheña'pa' o'ch petsa'tanet attoch shopena'tatet, ñaña ora ñeñt palltetsapa' o'ch petsa'tanet. Allochña'pa' allohuen judionesha' o'ch eñochet po'ñochpa' ama atteyaye ñeñt atet e'mare'tet ḡocop, tarro'mar allempopa' o'ch eñotapet ḡapa'cho'ña o' peḡohua ñeñt atet oteney Moisés po'ñoño.

25 Tarraña añecop ñeñt ama judioneshayaye ñeñt o' ame'ña'pa' yapa' o' yemñanet carta, o' yotuanet cartot ñeñt pocte' yenten ñocpuet ñeñtcha' atet pet. Ñeñtpa' añechno: Amach rratsteto po'chets ñeñt muetsenet ayeḡcataretocop ñeñt po'yomporer penet. Ñaña o' yotuanet amach rratsteto es po'rراس, ñaña amach rratsteto ñeñt muetsenet ñeñt atta a'pañaret. Ñaña o' yotuanet amach chetapretatsteto taporets. Ñeñta yotanut yecartot.

Allempo rromapueret Pablo all Parets pa'paclo

26 Allempoña Pablopa' o' anman añ pa'tatssheña. Tsapañña'pa' o' a'cohuentatet e'ñe parro, ñeñt atet yechena judionesha'. Allempoña'pa' ahuanmuet Parets pa'paclo o'ch eñotatenaneta' esempoch o'ch met allponmat e'ñe allempoch o'ch a'cohuentatuet. Allempochña Pablopa' o'ch muetsatanet Partsocop carrnero puesheña'tsocmuet, ñeñtpa' atet pena judionesha' Yomporecop.

27 Tarraña o' taya ḡhapmoch canḡherrmat allempoch o'ch a'cohuentatuetpa' añña judionesha' ñeñt huetsa Asioḡpa' o' eñchet Pablo all Parets pa'paclo. Ñetña'pa' o' atsrre'matachet acheñenesha' attoch o'ch e'moñe'chet Pablo. Allempoña'pa' o'ch rromuet Pablo.

28 Pa'tsrre'mueñoḡetpa' o' rranare'tyeset, otyeset:

—Masheñnesha judioneshacha' o'ch seyenpa'y. Te'pa' o' yenter añ acheñ ñeñt ye'moñe'tene' ñeñtey judioneshay ñeñtara ñeñt o' puesuerran Moisés po'ñoñ ñaña ñeñt o' a'sosyatuan Parets pa'paquell. Te'pa' o' erracmañen atet o' yeḡchatyesuan acheñenesha'. Elloña te'pa' o' abe'tatan ñaña acheñ ñeñt ama judioneshayaye arr Parets pa'paclo. Allochña'pa' ahuo'ch a'sosyatuan Parets pa'paquell.

29 Tarro'mar atet otet o' eñchet Pablo epuet Tróximo all chopeñe'chen epuet Jerusaléño. Tróximo ñeñtpa' efeso'marnesha', ama judioneshayaye. Ñetpa' ḡho' otenapuetañ ñato' Pablopa' o'te' abe'tatan Tróximo all Parets pa'paclo ñeñt ama pocteye' enteno judionesha'.

30 Allempoña'pa' allohuen acheñenesha'pa' o' atsrre'muetpa' matrra'tet allo'tsen Pablo o' rromuetpa' o' cheta'nmet a'yenet Parets pa'paclo. Al-lorocma yotetuet Parets pa'paclo.

31 O' muetsamochet Pablopa' añña ñeñt solltarnesha' pa'mñcha'tareḡterpa' o' e'manet atet nanac ama'toḡhtena allohuen acheñenesha' all Jerusaléño.

32 Ñaña'pa' o' anman allpon solltarnesha' ñaña allpon capitánnesha'pa' o' matrra'tet allo'tsa'yen acheñenesha'. Allempoña acheñenesha'pa' o' entapan solltarnesha' epuet pa'mñcha'tareḡterpa' o'huañ ḡhota'chet Pablo.

33 Allempoña ḡhap añcha'tareḡtpa' o' rromatan Pablopa' o' huanquēt epa cadeno. Allempoña'pa' a'ḡto'tanet:

—¿Eso'tña pa'so'cheñ añ acheñer?

Ñaña o' a'ḡto'tanet:

—¿Eḡte'ña o' ḡohua ña?

³⁴ O' anapyeset po'poñe'ttsocma. Puesheña'tets acheñpa' otyeset atet cotape'chet ñet, po'potantañña' atet otet po'poñ ñeñt atet cotape'chenet ñamet. Nanac ama'tochtenet ñeñto'marña ama eñocheto e'ñe po'ñoçh ñeñt atet o' ðohua Pablo. Ñeñto'marña amcha'taretpa' anmatan Pablo pocollo all shontena solltarnesha'.

³⁵ Allempoña o' çhapuet allot a'tenet pocollopa' añña solltarnesha'pa' o' enatnomet Pablo eno, tarro'mar taye'to' acheñenesha' pa'tsrre'mueño'tpa' muetseñet.

³⁶ Tarro'mar acheñenesha'pa' o' co'ta'huanmet. Puerranare'teño't otyesno-muet:

—¡Semtseñaca'ye!

Allempo Pablopa' e'ñe cohuen eños ñocop allo'tsa'yen ñeñt e'moñe'tene'

³⁷ A'tapachet pocollopa' Pabloña'pa' otosan solltarnesha' pa'mcha'tareter, eños griegaçho, ot:

—Te' napa' nemneñ o'ch notap' paterr ñoñets.

Amcha'tareñña' och:

—¿Po'ñoçha't pe'muen griegaçh?

³⁸ Alla otererr amcha'taret:

—Papa' ¿ama't aneyaype egipto'marnesha' ñeñt atsrre'mate' ahuaña acheñenesha' atto ñetpa' atpare'chet gobierno', ñeñtara ñeñt ahuanmue' pa'tatsoch mil amtsañnesha' a'yo amarato?

³⁹ Pabloña'pa' alla otererr:

—Napa' amaca'ye ñeñteyayno, napa' judioneshan ñeñten tarso'marneshan, ñeñtara anets nanac atarr ñeñt allara Cilicia. Napa' o'ch notare'tap' attoch pemnaten o'ch neños acheñenesha'cop.

⁴⁰ Allempoña'pa' o' muenatan Pablo o'ch eños. Pabloña'pa' alla tomos allotecma a'tenetpa' echantos pot attoch muetsoñeñtua acheñenesha'. Allempoña o' muetsoñeñtuetpa' Pabloña'pa' o' eños hebreaçho, atet otanet:

22

¹ —Masheñneshacha' ñaña nomporneshacha', o'ch se'mñnoten ñeñtcha' atet neños e'ñe nocop.

² Allempoña e'mhuet atto o' serrpare'tatanet e'ñe ñet po'ñoñetopa', allempoña'pa' o' e'ñe muetsoñeñtuet poctacma. Pabloña'pa' alla oterraneterr:

³ —Napa' judioneshan, arr ne'ñalleta Tarso e'ñe alla Cilicia. Tarraña arrña e'ñe eñotñan Jerusaléno. Ñeñt neyçhate' napa' ñeñtpa' Gamaliel. E'ñe ña pueyçhateño'tenpa' netsotuoñ e'ñe poctacma ñeñt Moisés po'ñoñ ñeñt atet anaret ñeñtcha' atet pa' yatañneshañ. Nanac nema'yoçhra ñeñt Yomporecop ñeñt atet sepena te' sa.

⁴ Napa'çho'ña ahuañmo'chapa' nanac nemueroçhtache't ñeñt cotene' Jesús poctapña. Napa' o'ch nerrmanatanet, allotña'pa' o'chçho' nehuancatanet, ñaña o'chçho' nabe'tatanet ñaña cárcelo. Ñaña nemtsatatie't—yacmanesha' ama't ñaña coyaneshaçhno.

⁵ Ama't cornesha' ñeñt nanac amcha'taretpa' eñotuane't ñeñt atet nepe't. Ñaña allohuen ñeñt pompornesha' penetpa' e'ñe eñotuennet ñamet ñeñt atet nepe't. Ñet allempopa' ahuo't apnet orden ñeñtcha' napueña' yamo'ts judionesha' ñeñt Damasco'tsa'yen. Añ orden ñeñtpa' alloch mueñanet attoch o'ch nerrmanatie' ñeñt ame'ñaye't Jesús. Ehuancaretetpa' o'ch nahuanmanet Jerusaléno allcha' yecoñchatuanet.

Allempo Pablopa' serrpare'tatanet atto ello cotape'cherran cohuen Yomporecop

(Hch. 9.1-19; 26.12-18)

⁶ 'Atteñapa' o'cho' ahuen Damasco. Allempoña nechapmoch Damascopa' allempo o' chapmoch pocto. Ñeñña nanac poptetsa ento'pa' machayotepa'tcha' choyo'tam'psapuen.

⁷ Allempoña choyo'tam'psen e'ñe neshopa' nañapa' alla nerrmopra patso. Allempoña nechap patsopa' ne'm ñoñets ñeññ atet oten: "¿Eso'mare't Saule, pemuerochtatennanña ñeññ name'ñenaya?"

⁸ Nañapa' o' not: "¿Eshape't Ayochreshate eñets?" Ñeññ eñetspa' alla oterrerr. "Napa' ñeññen Jesús en ñeññen nazareto'marneshan, narramche'ña atarr pemuerochtaten."

⁹ Ñeñña allo'tsenen e'ñe parropa' ñetpa'cho'ña entetca'yeña ñeññ nechoyo'te' ñeñña' cha yore'tanet tarraña ñetña' ama eñochetoña ñeññ atet notaretta.

¹⁰ Nañapa' o' alla noterrerr: "¿Est'e' Partseshacha' poctetsa ñeññcha' atet ne'pa?" Partseshanña Jesús pa' alla oterrerr: "Te'ñapa' o'ch petanta o'ch ahue'p Damasco. Allcha'ña otapet allohuen ñeññ anaret ñeññcha' atet pe'pa."

¹¹ Allempoñapa' o'huañ nenta tarro'mar o' rrechaten ñeññ po'ptetsa ñeññ nechoyo'tam'pse'. Ñeñña noctene' ñetña' echa'nomnet notot. Attoña chapatnet Damasco.

¹²⁻¹³ 'Ye'chap Damascopa' allempoñapa' huapa puesheñarr añ pa'so'cheñ Ananías. Añña Ananías pa' nanac ame'ñenana ora allohuen ñoñets ñeññ atet anaret yocop ñeññey judioneshapay ñeññcha' atet ye'pa. Añña judionesha' ñeññ ye'cha'yetsa Damascopa' nanac cohuen enteñet Ananías. Nañapa' huapa neshopa' allenta ponmosnapa' otosen: "Te'pa' masheñe Saule pecuerre'pa'ch." Nañapa' allorocmuepa'tcha' necuerr, allempoñapa' neñch Ananías.

¹⁴ O' alla oterrerr Ananías: "Añ Yompor ñeññ Po'yomporer pe't yatañneshañ, ñaca'yeña pa'crerre'ña pa' ama't ahuatoteñ añecop o'ch peñotuerrñañ atet muenen ña. O' muenata'p ñaña o'ch penterrñañ pa'ña Puechemer ñeññ e'ñe pocte' es pets. Ñaña o' muenata'p o'ch pe'mñotoñ e'ñe ña po'ñoñ ñeññ atet o' otua'p.

¹⁵ Te'pa' ñeñña' atetcha' pe'pa, o'ch pa'potoñ Jesús po'ñoñ erracmañen ñeññ atet o' pentua ñaña ñeññ atet o' pe'mua.

¹⁶ Te'pa' añ palltetsa o'ch petanta, e'ñe pame'ñeño' Yepartseshar Jesús pa' o'ch papataretterra, attochña e'shohuaretterra po'chñar." Neñña' allohua atet oten Ananías.

Atto Pablopa' eñotatanet ñapa' ña serrpare'tatene' ñeññ ama judioneshayaye

¹⁷ O' alla oterrerr Pablo:

—Allempoña o' met allponmatpa' o' nohuerrerr arr Jerusaléño. Parrochña allempo nema'yochena Parets pa'paclopa' allña' orrtona atet ñerra'm cho es ye'chopo'ten.

¹⁸ Allempoña o' orrtona Yepartsesharpa' atet oten: "Tayecma o'ch ahuerre'p arro't Jerusaléño, tarro'mar arropa' amach esesha' pe'mñotaye allempoch pa'potoñ neñoñ."

¹⁹ Nañapa' alla notererr: "Partseshacha' ama't atetpa' allohuen achenesha'pa' e'ñe eñotuennet atet o' nepohua. Eñotuennet atto napa' nebe'tose't judionesha' po'prahuo atto nenalle'tache't ñeññ pame'ñenaya, ñaña atto nabe'tatanete't cárcelo.

²⁰ Ama't allempo muetset Estebanañ ñeññ pa'potaye't peñoñpa' napa'cho'ña allempopa' e'ñe pocte' neñch muetsetepa'. Napa' allña necuam'psanet

pa'shtam ñeñt rrolle'te'. All necuapretpa' napa'cho'ña e'ñe pocte' neñch atepa'ña pet."

²¹ O' alla oterrerr Yepartseshar: "Ama't atetpa' te'pa' o'ch ahuep o'ch nemñañ allañar allo'tsa'yen acheñenesha' ñeñt ama judioneshayayeto."

Allempo solltarnesha' pa'mcha'tareterpa' abe'tatan Pablo o'pono

²² Ñeñta otua Pablopa' añña acheñenesha' ñeñta e'muetpa' o'huañ e'mñochet. O' alla rrannarterreterr, atet otet:

—¡Semtseñaca'ye! Ama pocteyaye o'ch corra ñeñt atet acheñ arr patsro.

²³ Pa'tsrre'mueño'tetpa' alla rrannarterreterrrpa', o' gogo'tyeset pa'shtam enonet, allo'tpa' a'rrotsetyeset ñaña patspa' o' huapore'tyeset enonet.

²⁴ Allempoñapa' añña ñeñt solltarnesha' pa'mcha'tareterpa' o' abe'tatan Pablo o'pono. O'ch ashtet attotcha' a'meta'huan ñeñt atet o' pohua. Ñapa' mueneñ o'ch eñoch esocopte' nanac ama'tochtenet ñocop.

²⁵ Allempoñapa' o' huanquët Pablo attoch ashtet. Huanca'huet Pabloñapa' otan capitán ñeñt tets allame'tets:

—Ta', ¿pocte't senteñ o'ch sashte' acheñ ñeñt romanona'tar, ñaña ama señoteña' ñeñt atet pena? Ñoñets ñeñt atet anaret Romotpa' ta', ¿pocte'te'?

²⁶ Ñeñta e'm capitánpa' o' ahuo' allo'tsen pa'mcha'tareterpa' atet otos:

—¿Erroñena't poctape'cheññañ añ acheñer? Añpa' romanona'tarca'ye.

²⁷ Añña ñeñt solltarnesha' pa'mcha'tareterpa' o' huapapa' atet otosan Pablo:

—¿Po'ñocha't romanona'tarep?

Pabloñapa' o' anañ:

—Napa' ñeñtenca'ye.

²⁸ Ñeñña añcha'taretpa' alla oterrerr Pablo:

—Napa' o' netsa'ta shonte' quelle attoch a'punta'net attoch napa' romanona'tar pennet.

Pabloñapa' alla otererr:

—Napa' attot ne'ñalleta, tarro'mar na nomporpa' romanona'tar.

²⁹ Añña solltarnesha' ñeñt autsa ashtayen Pablopa', allorocmo' alla cheta'yerret a'yenet. Ñeñt pa'mcha'tareterpa' ñapa'cho'ña cha yoren, tarro'mar o' chapoña pueyoçhro o' huanca'huet acheñ ñeñt romanona'tar.

Allempo eños Pablo allo'tsa'yen ñeñt çhocma a'poctatyene' ñoñets

³⁰ Tsapaña puetarenpa' añña añcha'taretpa' o' agotatan cornanesha' ñeñt pa'mcha'tareternesha' pen allohuen judionesha' po'cornaneshar, ñaña o' agotatan ñeñt çhocma a'poctatyene' ñoñets judioneshacop. Allempoña apçhetpa' o' pueyanperet Pablo allo huanquëtpa' o' anmet allo'tsa'yen añcha'taretnesha'. O' chapachetpa' o' tomatoset e'ñe allame'tets. Añña añcha'taret romanonesha'pa' mueneñ o'ch eñoch e'ñe po'ñoçh esocopte' otteñe'cheñ judionesha'.

23

¹ Pabloñapa' o' cohua'yesan allohuen ñeñt çhocma a'poctatyene' ñoñets. Allempoñapa' atet otanet:

—Masheñeshacha', napa' çhocma nocrrena cohuen Yomporecop, ama't ahuatoteñ ama't ñaña teme'ttsen. Yomporpa' entennante' e'ñe cohuen neyoçher.

² Añña cornesha' Ananías ñeñtara ñeñt nanac añcha'taretpa' atet otan ñeñt tets e'ñe allame'tets Pableshe, atet otanet:

—Chosañaca'ye asnama'te'.

³ Allempoña Pablopa' otan amcha'taret, atet och:

—Yomporpa' tsa'tatuerrpepa'ch, tarro'mar ama't porrtenañ e'ñe cohuenpa' peyočhropa' ama masosyape. Ñaña ñeñto'marña anareteḡ pa arr attoch papa' peñotaten ñato' čhate' nepena ñeñt ama pocteyaye ñeñt atet oteneñ ñoñets ñeñt atet anaret. Tarraña pañapa' o' atta pasnama'taten. Tarraña ñeñtpa' ama pocteyaye ñeñt atet oteneñ ñoñets ñeñt atet anaret.

⁴ Añña ñeñt tomča'tets allame'tetspa' o' che'ptare'chet Pablopa' atet ochet:

—Papa' atarro't cohuen penteña o'ch pesochatse'ch cornesha' ñeñt nanac amcha'taret ñeñt nen Yompor.

⁵ Pabloñapa' anapanetpa' atet otanet:

—Napa' ama masheñneshacha' neñoteñe añmapa' ñeñtē' cornesha' ñeñt nanac amcha'taret. Ñerra'm neñoteñeñpa' amach nochñe atet, tarro'mar anaret Yompor po'ñoño atet: “Ama asochatse'tpahuo acheñ ñeñt amcha'tarettetsa socop.”

⁶ Allempoñapa' o' cotape'ch Pablo. Añña ñeñt chocma a'poctatyene' ñoñets patantarrñapa' saduceonesha', po'potantañña' fariseonesha'. Allempoña Pablopa' o' eñoch atetpa' allempoñapa' o' eños huomencpa', atet otanet:

—Masheñneshacha', napa'čo'ña fariseoneshan. Natañneshañpa'čo'ña fariseoneshet. Ñeñto'marña te'pa' otteñe'chennet tarro'mar napa' name'ñena atto ñerra'm yerroma, Yomporpa' tantatterreycha' esempohuañen.

⁷ Ñeñta otua Pablopa' allempoñapa' ama patrraye' cotape'cheto ñeñt actape'chatañnesha'. Añña ñeñt fariseonesha' ñetpa'čo'ña cotape'chet paterr, po'potantañña ñeñt saduceonesha'pa', ñetpa'čo'ña o' cotape'chet po'poñ. Amaña patrraye' cotape'cheto.

⁸ Ama patrraye' cotape'cheto tarro'mar saduceonesha' ñetpa' cotape'chenet ñerra'm yerromapa' amach yetanterro. Ñaña ñetpa' otenet ama eñalle Yompor po'mllañoñeñer ñeñt huetsa entoť, ñaña ñetpa' otenet ama eñalle yecamquēñ. Tarraña fariseonesha' ñetpa' cotape'cheñet po'ñočh ñerra'm yerromapa' yetanerrach. Ñaña ñetpa' otenet po'ñočh eñall Yompor po'mllañoñeñer ñeñt huetsa entoť, ñaña po'ñočh eñall yecamquēñ.

⁹ Allempoñapa' ñetañeño' nanac ama'toçhtet. Atteñapa' puesheña'tets fariseonesha' ñeñt nanac etsotene' ñoñets ñeñt atet anaret o' tomosetpa' eñosotet Pablocop, atet otet:

—Añ acheñer yapa' ama yenteññañe erra'tsente'ña po'chñar. Po'ñočhpa' ñato' orrtoña Yompor po'mllañoñeñer ñeñt huetsa entoť amapa' ñato' es ñeñt camquēñets ñato' ñeñt orrtenoya. Ñeñto'marña yapa' amachña čha yepatare'tatsche Yompor ñerra'm ñate' atet muenatene'.

¹⁰ Allempo nanac ama'toçhtenetpa' añña solltarnesha' pa'mcha'tareterpa' o' cotape'ch, atet ot:

—Ñato' o'ch rraquēt Pablo.

Ñeñto'mar o' chore'tan po'poñ solltarnesha' o'ch huapuet o'ch chetereta' Pablo allotpa' o'ch aneret pocollo all shontena solltarnesha'.

¹¹ Tsapatña tsapopa' o' alla orrteññañerr Pablo Yepartseshar, atet otos:

—Amach pellcatsto, tarro'mar Romopa'čo'ña all palltena o'ch pa'poton neñoñ atet o' pa'potuon arr Jerusaléño.

Allempo judionesha'pa' atarr o'pachet Pablo o'ch muetset

¹² Tsapatña puetarenpa' añña judionesha'pa' atarr o'pachet Pablo ahuo'ch muetset. Ñetpa' o' a'poctachet, atet otet:

—Yapa' amach yerrerroña' ñerra'm amach o' yemtso Pablo ñaña amach es yorrerro. Atteña ñerra'm amach attetopa' ama'tpa' esepa' yetantoya.

¹³ Ñeñña o'patenayapa' ñato' metente' pa'tatsot çharrasheña.

¹⁴ Allempoña o' a'pochtuetpa' ahuanmuet ñaña allo'tsa'yen cornanesha' ñeñ pa'mcha'tareternesha' pen allohuen judionesha' po'cornaneshar ñaña allo'tsa'yen ñeñ pompornesha' penet. O' çhapuet allpa' atet otoset:

—Yapa' o' ya'pochtue atet: Yapa' yoten ñerra'm amach o' yemtso Pablopa' amach yerrerro. O' ya'pochtat ñaña atet: Atteña ñerra'm amach attetopa' ama'tpa' esepa' yetantoya.

¹⁵ Alla oterreterr:

—Ñehua, te'pa' o'ch yotas ñeñcha' atet sepa. O'ch soteña' ñaña ñeñ çhocma a'pochtatyene' ñoñets allo'tpa' e'ñe parrocmapa' o'ch semña ñoñets allo'tsen solltarnesha' pa'mcha'tareter, o'ch soch huapachetepa' Pablo sesho attoch o'ch señoñ este' o' ðohua. Tarraña ama'tcha' atet seshcanetpa' yañapa' allo'tsa'yeneycha' toño attoch yapa' o'ch yerrmað.

¹⁶ Añña Pablo pa'ñachorpa' o' e'mare'ch çha o'pateññañet pa'go'pa' o' ahuo' solltarnesha' pa'paclopa' o' otenana' pa'go' Pablo.

¹⁷ Alotña Pablopa' o' çhore'tan puesheñarr capitán, atet och:

—Añ huepuesha'pa' o'ch ðanem' allo'tsen ða'mcha'tareter tarro'mar ñapa' atarr mueneñ o'ch es a'metena'.

¹⁸ Capitánña' o'cho'ña anman huepuesha' allo'tsen pa'mcha'tareter. Allempoña çhappa' atet otosan pa'mcha'tareter:

—Añ Pablo ñeñ ehuancare'tpa' ahuo't çhore'ten allo'tpa' oten ahuo'ch nanem' añ huepuesha' pesho tarro'mar ñapa' nanac mueneñ o'ch es a'metena' pesho.

¹⁹ Añña amcha'tare'tpa' o' echa'nman huepuesha' pototpa' o' anem' a'yene'tpa' atet otos:

—Ñehua, o'ch ðoten este' pemnen o'ch ðoten.

²⁰ Huepuesha'ña'pa' atet och:

—Añña judionesha'pa' o' a'pochtachet attoch o'ch enamapet o'ch pemñe Pablo tsapa't allo'tsa'yen ñeñ çhocma a'pochtatyene' ñoñets. Ñaña o'ch otapet añepo'ch pemñe atto'ch eñoçhet e'ñe po'ñoçh este' o' ðohua.

²¹ Tarraña amach ðame'ñatstaneto errotencia' otospet tarro'mar metente' pa'tatsot çharrasheña judionesha' ñeñcha' camroya toño ñeñcha' rromapue' go'. Ñetpa' o' a'pochtachet amach rrerreto ñaña amach es orreto ñerra'm amo'ch muetseto go'. Ñaña o' a'pochtachet ñerra'm amo'ch attetopa' ama'tpa' esepa'to' tantahuet. Te'pa' añ palltetsa ñeñcha' atet ðotanet.

²² Amcha'tare'tña'pa' atet otan huepuesha':

—Tarraña amach esesha' ðotatsto ðapa' o' ðotuenna'.

Ñeña otuepa' allempoña'pa' o' mueñer.

Allempo çhapachet Pablo allo'tsen gobernador Félix

²³⁻²⁴ Allempoña amcha'tare'tpa' agotatan epsheña po'cañtáner. Allempoña o' çhapuetpa' atet otapanet:

—Cherra'ch a las nueve tsappa' o'ch secamrat doscientos solltarnesha' ñaña setenta ñeñ montenaya cahuall, allo'tpa' ñaña doscientos ñeñ orrene' muetsamets alloch quellaret. Allo'tpa' o'ch sanem paterr cahuall amapa' epa alloch monta'nma Pablo. Alotña'pa' o'ch sahanma Cesareo attoch seçhapach cohuen Pablo allo'tsen gobernador Félix.

²⁵ Alotpa' quellcan ñaña carta ñeñtpa' atet ot:

26 “Gobernador Félix ñeñteḡ nanac cohuenepḡ am̄cha'taretḡ, na Claudio Lisiaspa' o'ch nehuom̄cha'tapḡ añ necartoḡ.

27 Añ yacmapa' ahuo't rromue' judionesha' o'ch muetsetañpa' nañapa' o' neñoç ñapa' romanona'tar. Nañapa' nehuapa epan nesolltarnesharpa' o' na'rroyatatos.

28 Napa' nemneñ o'ch neñoç esocopte' nanac otteñe'cheñet, ñeñto'marña napa' o' nanemñ allo'tsa'yen ñeñt̄ çhocma a'pocatyene' ñoñets ñeñt̄ atet yeçhenet ñet.

29 Tarraña napa' neñotoñ ñeñtecop otteñe'cheñet, tarro'mar ñetpa' otenet ama atteye' peno atet anaretet ñocpuet. Ñeñtecpañña otteñe'cheñet tarraña ama añecpayaye attoch o'ch yemtsach amapa' o'ch yeyottam̄psach.

30 Allempoña napa' o' ne'mare'ch judionesha'pa' çha o'pateña o'ch muetset. Ñeñto'mar te'pa' o'ch nemñe pesho tayecma. Ñaña o' notueña ñeñt̄ otteñe'chene' arrpa', te'pa' a'meteñetepa' pesho esocopte' otteñe'cheñet. Te'pa' ñeñt̄ach notapḡ.” Allohua huañ po'carta.

31 Allempo atet otanet pa'm̄cha'tareterpa' añña solltarnesha'pa' e'ñe a'nahua anmet Pablo tsapocma. Alloñapa' o' çhapuet all anetso pa'so'cheñ Antípatris.

32 Tsapaña añña solltarnesha' ñeñt̄ chope'chets pa'tcopa' alloḡa pueracherret Antípatrisoḡ. Alloḡpa' añña anmue'ña Pablo Cesareohua ñeñt̄ montetsa cahuallo.

33 Allempoña çhapuet Cesareopa' o' aposet gobernador carta. Ñaña o' çhapachet Pablo e'ñe ñesho.

34 Allempoña gobernadorpa' o' lleya'huan cartapa' a'p̄to'tan Pablo:

—¿Erra'tsena'tña anetsrot pehuapa?

Ñaña'pa' atet och:

—Arrot nehuapa Cilicioḡ.

Allempoña gobernadorpa' o' eñoç alloḡ huapa

35 allempoña'pa' otan Pablo:

—Te'pa' allach ya'pocachña' ato't huaçha'ta' ñeñt̄ potteñe'chene'.

Allempoña'pa' o' mueñan po'solltarneshar cohuan̄pssetepa' Pablo allara am̄cha'taret Herodes po'palaciopahuo.

24

Allempo judionesha'pa' otteñe'choset Pablo allo'tsen am̄cha'taret Félix

1 Pa'mnarmatñoñapa' huapa ñeñt̄ pa'm̄cha'tareter pen allohuen judionesha' po'cornaneshar, ñeñt̄pa' añ pa'so'cheñ Ananías. O' huapa ñaña allponsheña ñeñt̄ pompornesha' penet. Alloḡpa' huapa ñaña puesheñarr ñeñt̄ pa'so'cheñ Tértulo ñeñt̄pa' ñeñt̄cha' eñosapretahuet. Allempoña huapuetpa' o' ahuanmuet allo'tsen gobernador attoch otteñe'choset Pablo.

2 Allempoña'pa' huapachet ñaña Pablop'a' o' çhore'chet ñanom Tértulo attoch eños ñanom. Ñaña'pa' añecpa eños attoch otteñe'chet Pablo. Ñanomp'a' o' eños e'ñe cohuen gobernadorocop ñeñt̄ Félix, atet ot:

3—Pa gobernadoro, nanac cohuen yenteneḡ tarro'mar e'ñe p̄otot yocrrena e'ne cohuen ama eñalle attoch yeçllaranna'ta. Ñaña p̄apa' o' p̄a'pocatonay e'ñe cohuen ñeñt̄ yepalltena arr yenyo. Ñeñto'mar ya te'pa' yemneñ o'ch yeparasyoso't p̄ocop attoch çhocma peyenpueney cohuen.

4 Te'pa' attoch amach alla nellaḡso eñosetspa' napa' nemneñ e'ñe pemorrenteñoḡpa' o'ch pe'm̄ñoten mame' ñeñt̄cha' notapḡ.

5 Yapa' yeñoteñ añ yacmapa' nanac atsrre'moçhtena, nanac moñne'tatyenana ora allohuen judionesha' atto te'pa' ama patrraye' coťape'cheneto. Ñaña añmapa' ñeñt pompor pen allohuen ñeñt coťene' poctapña ñeñt huapatsa Nazaretot.

6 Elloña te'pa' mueneñeñ o'ch a'sosyatuanen ñaña Parets pa'paquell, tarraña yañapa' o' yerrmue'. Ñaña yapa' yemneñeñ o'ch ya'pocťacheñ atet anaret yocoppa'

7 tarraña o' huapa añcha'taret Lisias epuet po'solltarnesharpa' e'ñe po'huamencocma o' puerratanpenyeta'.

8 Alloñapa' atet otey ñeñtey otteñe'chene' yehuapuepa'to' pesho. Te'pa' p'achña a'p'to'tare'te' attoch peñoch p'aña ora allohuen attot yotteñe'cheñ. Añpa' allohua atet eños Tértulo ñeñt eñosapretahuet.

9 Judionesha'pa'cho'ña atet otet:

—Po'ñoçhca'ye atet.

10 Allempoña gobernadorpa' o' yochan Pablo attoch eños ñaña. Allempoña Pablopa' atet ot:

—Napa' e'ñe nocsheñesha' o'ch neños pesho e'ñe nocop, tarro'mar napa' neñoteneñ o' shonte' char atto p'a'm'cha'tare'tena arr yenyo.

11 E'ñe taya o' met çharramat puechena epomuet atto o' nema'yochuena' Parets pa'paclo all Jerusaléño. Ama't esesha' p'a'p'to'tpa' atet'cha' otapet.

12 Tarraña allempo ñetpa' ama entneto o' esesha' notnare't, ñaña ama na'tsrre'moçhtana'che acheñenesha'. Ñaña ama na'tsrre'moçhto ama't Parets pa'paclo, ama't ñaña judionesha' po'prahuo, ñaña ama't all chopeñe'chyen acheñenesha'.

13 Ñeñto'marña te'pa' amate' erroten eñotatapeto añmapa' ñeñt e'ñe po'ñoçh attota otteñe'chennet.

14 Napa' te'pa' añach na'meta' pesho, napa' name'ñena ñeñt e'ñe alloch yequeshperra. Po'ñoçh napa' añ name'ñena ñeñtara Yompor ñeñt Po'yomporer pe't yatañeshañ. Ñaña añ name'ñena ora allohuen ñoñets ñeñt atet anaret judioneshacop. Ñaña añ name'ñena ñeñt atet quellquë't ahuat ñeñt a'm'taye't Yompor po'ñoñ.

15 Ñaña napa' añ name'ñena ñeñt attoch esempohuañen Yomporpa' tantaterrancha' allohuen a'cheñ—ñeñt e'ñe cohuen a'cheñ ñaña ama't ñeñt ama cohuenayaye a'cheñ. Netpa'cho'ña ñeñtara ame'ñenet.

16 Ñeñto'marña napa' çhocma nema'yochrena attoch Yomporpa' enten e'ñe cohuen, ñaña attoch a'cheñenesha'pa'cho'ña o'ch entennet e'ñe cohuen ñamet.

17 'Napa' shonte' char çhocma nechopeñen erraparen anetso'mar. Te'pa' o' taya nohuerra arr attoch napa'yesuer namo'tsesha' quelle ñeñt huoc'chañneshaçhno. Añ quellepa' ñeñtara apa'yesen ñeñt ame'ñenaya Yompor. Napa'cho'ña eñalleñ ñeñt'cha' nepomañ Yomporcop.

18 O' taya çhapmochañ allempoch o'ch na'cohuentatuañ Yomporcoppa' judionesha'ñapa' o' entnet all Parets pa'paclo. Tarraña allempopa' ama tama shonteyaye a'cheñ ñeñto'mar ama tama esesha' ama'toçhtetso.

19 Tarraña e'ñe allempopa' o' çhaçha't ñaña judionesha' ñeñt huachetsa Asioť. Ta', te'ñapa' eso'marte'ña ama ñetaye'ña huapatseto arr attoch ñerra'm po'ñoçh mueneñet o'ch otteñe'chnet na.

20 Tarraña te'pa' ama huapueto ñetpa' ñehua, te'pa' otetepa' ñeñt huacha'tatsa te'. A'metetepa' ñerra'm po'ñoçhte' este' nepanta' allempo naťomos allo'tsa'yen ñeñt çhocma a'pocťatyene' ñoñets.

21 Allempopa' aña neños paterr huomenc atto notanet. Añecop napa' otteñe'chennet tarro'mar napa' name'ñena atto ñerra'm yerromapa' yetanter-rach esempo. Ñehua, ñato' ñeñtecpate' otteñe'chennetña te'.

22 Ñeñta otua Pablopa' aña Félixpa' ama mueno o'ch alla serrpare'terretter; tarro'mar ñapa' o' eñotmoch atet ame'ñena ñeñt cotene' Cristo. Ñeño'marña atet otanet:

–Ñehua, te'pa' ñeñtach yot. EsemPOCHña huapa ñaña amcha'taret Lisiaspa' allempochña ya'pocstat ñoñets.

23 Allempoña atet oterran po'cap'táner:

–Te'pa' allach secuanpererr Pablo. Amach tama sa'montsatsche. Ñaña chocmach semnach ñeñt yemtenaya o'ch es aþ ñeñt palltena.

24 Allponmaterrerrpa' o' huerra Félix Cesareo epuet puetapor ñeñt pa'so'cheñ Drusila, ñeñtpa' judionesha'. O'ña cherr Félix o' agotatuenan Pablo tarro'mar ñetpa' mueneñet o'ch serrpare'tatanet ñamet Pablo er-roñente' ame'ñenana Jesucristo.

25 Allempoña chap Pablopa' o' serrpare'tatanet cohuen ñeñt atet yepena ya ñeñtey ame'ñetsa. Ñaña atet otanet aña' yema'yo'chra attoch e'ñe pocte' es yeþa'yen, ñaña amach yeþatsto ñeñt ama cohuenayaye tarro'mar Yomporpa' tsa'tatuerryach allempoch acerrran allohuen acheñenesha'. Ñeñta otua Pablopa' aña Félixpa' cha yoren. Allempopa' alla oter:

–Te'pa' orrerreþ, esempochña e'ñe pocta'huerrnanerrpa' o'ch alla neçhore'taterrperr.

26 Félixña'atta cohuenan Pablo ñato' o'ch aþ quelle añecop attoch a'rroyer. Ñeño'mar errotenopa' o'chcho'ña agotach attoch serrpare'tet epuet.

27 Atteñapa' o' met epa charpa' o' canyerra gobernador, huapa po'psheñeñ amcha'taret añ pa'so'cheñ Porcio Festo. Ñaña' nanac mueneñ o'ch coshatan judionesha' ñeño'marña ama a'rroyerrano Pablo, atet ot:

–Allepa' preso.

25

Allempo chapachet Pablo allo'tsen amcha'taret Festo

1 Allempoña amcha'tare'tta Festo all Cesareopa' poma'pamtañoña' o' ahuo' Jerusaléño.

2 O' chap Jerusaléño'pa' aña cornanesha' ñeñt nanac amcha'tare'tnesha' ñaña epuet ñeñt nanac sherbets judioneshacoppa', o' serrpare'tatapet Festo atto otteñe'cheñet Pablo.

3 Ñetpa' atet ochet Festo agotatanepa'to' Pablo attoch huapa Jerusaléño, tarro'mar ñetpa' ahuañacma a'pocstatuet o'ch cohuet Pablo toño attoch muet-sapueret all.

4 Festoña'pa' atet otanet:

–Pablopa' allo'tsena all yottampeñet Cesareo. Napa' o' nesecherra o'ch ahuerren Cesareo. Ñato' e'ñech na'llponmatena o'ch ahuerren.

5 Te'pa' ñeñt nanac amcha'tare'ttetsa socoppa' co'a'nerrnetepa' allochña'pa' otteñe'cheñetepa' Pablo all, ñerra'm po'ño'chte' eñall alloch otteñe'chet.

6 Festoña'pa' alla a'pa Jerusaléño allponmat. Ñato' po'psocmatño amapa' po'charramatño'pa' o' ahuerren Cesareo. Cherr Cesareopa' tsapa'tña e'ñe ahuatecmapa' o' anorros allecma a'pocstatenet ñoñets. Alloña agotatan Pablo.

7 Allempoña huapachet Pablopa', aña judionesha' ñeñt hua'cha'tatsa allpa' cha arrotampesyet. Allempoña'pa' otteñe'choset. Shonte' esocmañen

nanac sosey toma'tam̄pesyesoset Pablo, tarraña ama errotenoť eñotacheto am̄cha'tareť Festo attoch otoset e'ñe po'ñočh.

⁸ Pabloña'pa' o' eños ñaña ñocop atet ot:

–Napa' ama čho nachm̄are'teno ñoñets ñeñť atet anaret judioneshacop. Ñaña napa' ama čho na'sosyateññañe Parets pa'paquell. Ñaña napa' ama čho natpare'teno ñoñets ñeñť nen am̄cha'tareť Romoť.

⁹ Tarraña Festopa' nanac mueneñ o'ch coshatan judionesha', ñeñťo'marña otan Pablo:

–¿Pocte't penteñ o'ch ahuep̄ Jerusaléño allña'pa' allcha' nentonap̄ atto po'ñočhte' alloch otteñe'chapet?

¹⁰⁻¹¹ Pabloña'pa' alla anapuererrr, atet ot:

–Napa' añña pocte' nenten o'ch a'poc̄tatón am̄cha'tareť ñoñets ñeñť romo'marnesha', tarro'mar amate' errotenoť neto Jerusaléño, tarro'mar ama erroť nepeñeña judionesha', ama't papa' peñotueñ. Ñeñťo'mar añña pocte' nenten o'ch a'poc̄tatón am̄cha'tareť ñoñets ñeñť romo'marnesha'. Te'pa' arro'tsenen pesho ñeñťep̄ eñets epap̄ am̄cha'tareť romo'marnesha' ñeñť pocte' nenten na, ñach a'poc̄tate'ña ñoñets nocop. Tarraña ñerra'm po'ñočhte' añ o' nep̄ohua ñeñť ama poc̄teyaye amapa' atet ñerra'm alloch muetsanet ñeñťpa' e'ñe pocte' muetsanetepa'. Tarro'mar ama nemno o'ch na'queshp̄ata nañeña. Tarraña ñerra'm e'ñe attoťapa' ama poc̄teyaye o'ch pepomuen judioneshesho. Ñeñťo'mar napa' nemneñ o'ch a'poc̄tatón am̄cha'tareť ñoñets ñeñť romo'marnesha' e'ñe ñapueť.

¹² Allempoña Festopa' o' serrpare'tet epuet ñeñť parro cotape'chatannenet. Allempoña'pa' atet otan Pablo:

–Te'pa' nanac am̄cha'tareťesho pesechenapa' ama'tpa' allcha'ca'ye peta.

Atto eños Pablo allempo huapa am̄cha'tareť Agripa

¹³ O' allponmaterrerrpa' huapa am̄cha'tareť Agripa epuet po'ch Berenice. O' chapuet Cesareo all emo'teñeta' am̄cha'tareť Festo.

¹⁴ O' allponmatosetpa' allempoña Festopa' serrpare'tatanet atto otteñe'cheñet Pablo, atet otanet: Arrpa' allo'tsen puesheñarr yacma ñeñť na'nom Félix ahuaña all yottam̄peñet.

¹⁵ Allempoña napa' Jerusaléño'tsenenpa', añña cornanesha' ñeñť pa'm̄cha'tareťernesha' pen allohuen judionesha' po'cornaneshar, ñaña po'potantañ ñeñť pompornesha' penet, ñetñapa' o' serrpare'tatnet attoť otteñe'cheñet Pablo, ñaña otnet napa' nemtsachepa'to' Pablo.

¹⁶ Nañapa' atet notanet: “Ñeñť ñoñets anaret Romoťpa' ama poc̄teyaye o'ch yemtsach acheñ ñerra'm ama eñorena' e'ñe ñocop attoch eñotatanet attoť otteñe'cheñet.”

¹⁷ Ñeñťo'marña allempo huačha'ta judionesha' nesho, allempoña na tsapañña'pa' o' nanorros allecma ya'poc̄taten ñoñets. Allempoña napa' o' nagotach Pablo.

¹⁸ Añña ñeñť huačha'tatsapa' allenta tomčha'toset attoch o'ch alla otteñe'chueñeterr Pablo, tarraña amaña añeye' a'meta'yeseto atto ñeñť poc̄tetsa o'ch yemtsach acheñ.

¹⁹ Aña a'meta'yeset ñeñť e'ñe ñocpueta atet yečhenet ñet judioneshet. Ñaña añña a'meta'yeset ñeñť poc̄tañña puesheñarr ñeñť pa'so'cheñ Jesús, tarraña ñeñťpa' o' rroma, tarraña Pablo'pa' čha oten ñeñťpa' o' tanterra.

²⁰ Ñeñťo'marña napa' ama tama neñoche attoch na'poc̄tat ñoñets ñocpuet. Ñeñťo'marña atet noch Pablo po'tomña: “¿Pocte'te' penteñ o'ch ahuep̄ Jerusaléño allcha' ya'poc̄tatena' ñoñets?”

21 Tarraña Pablopa' ama mueno. Ñapa' aña muena' allach arr, allotcha'ña esempopa' entateñetepa'to' amcha'taret Augusto all Romo. Ñeñto'marña napa' not: "Te'pa' allepa' arrma, esempochña napa' o'ch nemñe amcha'taretesho Romo."

22 Allempoña amcha'taret Agripapa' atet otan Festo:

—Napa' atarr nemneñ o'ch ne'mñ namña errotente' serrpare'ten Pablo.

Allempoña Festopa' atet och:

—Tsapatcha'ña pe'mñota'mueñ.

23 Tsapatñapa' huapa'muena amcha'taret Agripa epuet ñaña po'ch Berenice. Ñetñapa' cha cohuenetyesoset. Allempoñapa' be'toscha'toset allecma serrpare'tatannena amcha'taretnesha'. O' be'toscha'tet epuet ñaña solltarnesha' pa'mcha'taretnesha' ñaña po'poñechno acheñenesha' ñeññ nanac sherbets all anetso. Allempoña Festopa' o' agotatenanerr Pablo.

24 Allempoña huapa Pablopa' Festoñapa' eñoratsapa' atet ot:

—Amcha'tarete Agripa, ñaña allohuenes ñeñtes arro'tsa'yenes: Te'pa' o' sentue añ yacma ñeññ nanac e'moñe'ten allohuen judionesha'. Ñetpa' o' otteñe'chuet e'ñe nesho allempo Jerusaléño'tsenen ñaña arrpa' o' otteñe'chueñeta' allempo ne'cherr ñaña arr. Ama't arrpa' o' che'chame'tueñeta', atet otyeset: "Chosa muetse', tarro'mar añ acheñerpa' ama pocteyaye o'ch alla corra."

25 Tarraña allempoña napa' na'p'to'tare'chpa' ama nentoñeña ñeññ atto pocte' o'ch nemtsach. Ñaña e'ñe ña muenats o'ch entateñeta' amcha'taret Augusto all Romo ñeñto'marña napa' pocte' nenteñ o'ch nemñe all.

26 Tarraña napa' ama neñoteñe ñeññcha' atet nequellcoñ ya'mcha'tareter ñocop tarro'mar ama eñalle errotentocha' yotteñe'cheñ. Ñeñto'marña te'pa' o' ne'chore'tach arr all seshontena te'.

Allotña Festopa' atet otan amcha'taret Agripa:

—Te'pa' p'ach ñanom a'p'to'tare'te' attoch napa' o'ch neñoch errotentcha' nequellca' carta amcha'taretocop.

27 Napa' noctape'cheñ ama pocteyaye o'ch yemñe acheñ ehucaret ñerra'm ama eñalle errotent o'ch yotteñe'cheñ.

26

1 Allempoña amcha'taret Agripapa' atet otan Pablo:

—Ñehua, te'pa' pocte' nenteñ o'ch peños p'ama p'ocop.

Allempoña Pablo e'ñe puehuomcha'teño'tpa' o' echantan pot, allempoñapa' eños ñocop, atet ot:

2 —Te'pa' nocshena amcha'tarete Agripa tarro'mar eñall attotcha' neños pesho nocop, añecop tarro'mar cha otteñe'chenen judionesha'.

3 Napa' nocshena tarro'mar te'pa' o' peñoch p'ama atet yey'chena ya ñeñtey judioneshay. Ñaña o' peñoch attot ama patrraye' yoctape'chyeno. Ñeñto'marña te'pa' o'ch nenama'p' attoch pe'mñoten cohuen.

Atet atarr cotape'che't Pablo allempo ama ame'ñerra'

4 'Allohuen judionesha'pa' eñotuennet atet nocre't ahua't, ama't allempoteñ ne'ñalleta nenyoy, ñaña ama't allempo cheshenna' allempo yey'che't Jerusaléño epan namo'tsna'tarnesha'.

5 Ama't ahua'to'teñpa' eñotuanete't napa' fariseoneshan ñeñfara ñeññ nanac etsotene' cotapñats nanac echarr allo yoctape'chen Partsocop. Ñeññ atet entnete't atet nocre'tpa', atetcha'ña'cho' a'meta'netañ.

⁶ Ñeñto'mar te'pa' arro'tsenen attoch sa'pto'tare'ten, atto napa' name'ñena ñerra'm yerromapa' Yomporpa' tantaterreycha' esempohuañen. Añmapa' ñeñtara atet otane't ahuat Yompor yatañneshañ.

⁷ Ama't charrasheña puechena epa ñeñtara ñeñt yatañneshañ yepen ñeñt chemere'tyesahuetpa', ñeñtña po'mrenñetpa' e'ñe ame'ña'huenet ñeñt atet o' notuas. Ñeñto'marña ñet te'pa' nanac ma'yoçhrenet Yomporecop—yeto ama't ñaña tsapo. Tarraña ama't atet penetañ allohuen judionesha'pa' te'ñapa' e'moñe'tennet ama't napa' ñeñtara name'ñena atet ame'ñenet ñamet. Attoña amcha'tarete Agripa otteñe'chennetña te'.

⁸ ¿Eso'marte' sapa' soten amach errotenot tantaterrano Yompor arromñañnesha'?

Atto Pablop' atarr mueroçhtatane't ñeñt ame'ñenaya Cristo

⁹ 'Napa'cho'ña ahuañmo'chapa' notenapañ ñato' ñeñte' poctetsa o'ch yemueroçhtach ñeñt cotene' Jesús poctaþña ñeñtara Jesús ñeñt nazareto'marnesha'.

¹⁰ Ñeñto'marña napa' nanac nemueroçhtatyese't acheñ Jerusaléño ñeñt ame'ñaye't Jesús poctaþña. Shonte' acheñ ñeñt nabe'tate't cárcelo, tarro'mar cornanesha' ñeñt pa'mcha'tareternesha' pen allohuen judionesha' po'cornaneshar, ñetñapa' o' apnet orden ñeñtecop. Ñaña allempo otyese't amcha'taretnesha' ahuo'ch muetsachet ñeñt ame'ñenaya Jesús poctaþña'pa', napa'cho'ña o'chcho' not, pocte'ñaçho' muetsetepa'.

¹¹ Chocma nemueroçhtatanete't ama't judionesha' po'prahuo'mar, ñaña nanaccha' nemne't o'ch nachmñare'tach ñeñt ame'ñatse't. Nanac nat-srre'mueñoþpa' noctare'tanete't erracmañen anetso'mar.

Allempo Pablop' ello serrpare'taterraneterr atto ello cotape'cherran co-huen Yomporecop

(Hch. 9.1-19; 22.6-16)

¹² Alla oterraneterr Pablo:

—Atteñapa' o'cho' ahuen ñaña Damasco. Allempopa' napa' nechen orden ñeñt apuen ñeñt pa'mcha'tareternesha' pen allohuen judionesha' po'cornaneshar.

¹³ Ñaña amcha'tarete te'pa' o'ch notaþ ñeñt atet norrtoya allempo. Allempoña o' yeçhapmoch Damasco allempopa' o' çhap pocto. Ñeñtña nanac poptetsa entoþpa' machayotepa'tcha' çhoyo'tamþsapuen ama't ñeñt epan nesen. Atet poptenapa' metanenan atsne'.

¹⁴ Allempoña yapa' alla yerrmopra'yesa patso. Allempoña alla yerrmopra'yena patsopa', nañapa' o' ne'm ñoñets hebreaçho ñeñtþa' atet oten: “Eso'mare't Saule pemueroçhtatennanña ñeñt name'ñenaya. Añpa' pañeña mueroçhtatetsa. Tarro'mar çha þottena ñerra'mrrate' ashen ñeñt e'ñe paþpare'teñoñ ñañeñachña atserrþatetsa.” Añpa' atet oten ñeñt norrtoya.

¹⁵ Nañapa' not: “¿Eseshape'tña Ayochreshate eñets?” Ñañapa' alla otnerrerr: “Napa' ñeñten Jesús en ñeñtara pemueroçhtaten.

¹⁶ Te'pa' petanterra alla, ñeñto'mar te'pa' o' norrta pesho attoch o'ch nenaþ þa, þach torratsa nocop, ñaña þach a'pote' ñeñt o' pentua te' ñaña ñeñtcha' neñotataþ allempoch norrtterrerr pesho.

¹⁷ Te'pa' o'ch nemñaþ allo'tsa'yen ñeñt ama judioneshayayeto, tarraña napa' çhocmach necuamþsaþ ñerra'm esempo o'pataþa judionesha' ñaña ama't ñeñt ama judioneshayaye.

¹⁸ Tarro'marcha' nemñaþ allo'tsa'yen ñeñt ama judioneshayayeña' allochñapa' attoch peserrpare'tatuanet attoch çhapanet pueyoçhro, attoch

o'huañcha' chope'chet checmeto. Añcha'ña o'ch alla chope'cherret puetaro. Ñaña attoch o'huañcha' ahuaencañ pñanet oneñeñ, añcha'ña ahuaencañ penahuet Yompor. Allochñapa' o'ch ame'ña'huerrnet na, allempoñapa' nepretna'huerranetcha' po'chñar, attoch o'ch parrocmatuerret e'ñe attecma atet ñerra'm ñeñt o' na'cohuentatua."

Atto Pablopa' ama atpare'tenano ñeñt atet gateñ Partsessa' Jesús

¹⁹ Alla oterraneterr Pablo:

—Ñeñto'marña añcha'tarete Agripa te' napa' ama natpare'teñe Jesús ñeñtara ñeñt norrtoya entoñ.

²⁰ Ñanompa' o' neserrpare'tatanet Damasco attoch cotape'cherret ello cohuen Yomporecop. Allochñapa' o'ch pa'yenet ñeñt cohuentetsa Yomporecop, attoch yeñoch po'ñoñ o' cotape'cherret etserra. Attecma neserrpare'tatanet ama't Jerusaléño, ñaña ora erracmañen Judeo'mar, ama't ñaña allo'tsa'yen ñeñt ama judioneshayaye.

²¹ Attoña judionesha'pa' o' rroma'net Parets pa'paclo o'ch muetsanetañ.

²² Tarraña Yomporpa' ahuo't a'natna nanac atto teme'ttsen nocrena, attoch neserrpare'tach allohuen acheñenesha' —ama't ñeñt ama esoshe'mayaye, ñaña ama't ñeñt añcha'taretnesha'. Tarraña ama añeye' neychatenaneto ñeñt ama cohuenayaye. Añña attecma neychatenanet atet serrpare'te't ama't ñeñt a'mtaye't Yompor po'ñoñ ahuañ. Ñeñtpa' ama't Moiséspa' atet ote't ñeñtcha' atet perra esempo.

²³ Ñeñtara serrpare'tatanete't ahuo'ch huapa Cristo añ patsropa' nanaco'ch muerochtachet, allo'tpa' ahuo'ch rroma, tarraña ñapa' tanterrach. Atto'chña tanterra ñanompa' o'ch a'puetarsamñsanet pueyocher allohuen judionesha', ñaña ama't po'poñechno acheñ.

Allempo Pablopa' atarr mueneñ o'ch ame'ñatana añcha'tareñ Agripa

²⁴ Allempoña atet eñen Pablo ñocoppa', Festoñapa' atet och e'ñe huomenco:

—Chate' Pablo pemospuena tarro'mar nanac es pōctape'chenpa' ñato' ñeñtite' o' mospaterreñ.

²⁵ Pabloñapa' atet och:

—Ama Ayochreshate Festo choye' nemospueno. Añña neserrpare'tatenes ñeñt e'ñe po'ñoñ.

²⁶ Ama't añcha'tareñ Agripapa' e'ñe eñotueñ atet noten. Ñeñto'marña te'pa' o' neyemcha ña tarro'mar napa' neñoteñ, ñapa' o' entuon ñeñt atet nepena, ñaña tarro'mar ama a'nahua es neña'yeno.

²⁷ Añcha'tarete Agripa, pñapa' ¿pame'ñeña't ñeñt a'mtaye't ahuañ Yompor po'ñoñ? Napa' neñoteneñ pñapa' pame'ñeña.

²⁸ Allempoña Agripapa' atet otan Pablo:

—Cha't pōtenapañ tayecmapa' o'ch pame'ñatna Cristo.

²⁹ Pabloñapa' alla otererr: Ama't tayecma amapa' tsapaonetpa' napa' atarr nemneñ Yomporpa' o'ch ame'ñaterrpa, ñaña ama't allohuenes ñeñtes ne'mñotene' te'. Atarr nemneñ o'ch same'ñerra allohuenes atet ñerra'm na, tarraña ama'tcha' atteseñ ñerra'm na, sapa' amuepa'chña ehuanca'reteyayso.

³⁰ Allempoñapa' o' tomcha'terret allohuenet—añcha'tareñ Agripa, ñaña gobernador Festo, ñaña Berenice ñaña allohuen ñeñt allo'tsa'yen.

³¹ Allempoña ahuanerretpa' atet otanna'tyeset:

—Añ yacmapa' ama es peno attoch o'ch yemtsach amapa' attoch yemñe cárcelo.

³² Allempoña añcha'tareñ Agripa otan Festo:

—Amach ña muenetsñe o'ch a'pocatenana' ñoñets am'cha'taretesho Romopa' yapa' o'te' ya'rroyereñ e'ñe ñayecma.

27

Allempo anmet Pablo Romo

¹ Allempoña o' a'pocatuget o'ch mueñet Pablo anetso Romo allara Italiapa' o' anmet allo'tsen capitán ñeñ pa'so'cheñ Julio, ñeñ po'cañtaner penet ñeñ emchorrenaya am'cha'tareñ Augusto. Ñaña o' anmet po'poñechno ñeñ ayottam'psaretechno o' apueñeta' Julio, allñaapa' ñach cohuañpesnomahuet.

² Allempopa' allo'tsen ñaña Aristarco ñeñ macedonio'marnesha' ñeñ huetsa Tesalónicoñ. Ñeñcha' parro yocta'neñ Pablo.* Allempoñapa' o'cho' yebe'toscha't boto ñeñ huetsa anetsot Adramitioñ, ñeñña botepa' o'ch et-sotyeshnoma allemeña sohua'puetso'mar ora Asio'mar. Allempoñapa' o'cho' ahuañpsey boto.

³ Tsapañapa' arr yetsotosa all oteñet Sidóno. Allña capitán Juliopa' morrentnomana Pablo ñeñto'mar o' muenach o'ch emo'tnoman pamo'tsesha', ñeñ ye'cha'yetsa all Sidóno, attoch ñetpa' o'ch apapet Pablo ñeñ palltena.

⁴ Allempoña ahuañperryerrpa' nanac yorrnotam'pesnoma. Morrpa' ama muenaty e' o'ch yemet attoch o'ch ahuey e'ñe pa'charr all oñenet, ñeñto'marña yepotesam'pesuanma coñe't pats ñeñ pa'so'cheñ Chipre. Tarro'mar yepotesuanma attoch ñeñ patspa' o'ch a'npam'psey mōrr.

⁵ Allempoñapa' arr yoñemuanom allame'tets Cilicio'mar, ñaña allame'tets Panfilio'mar. Allempoñapa' ye'chap ñaña Miro all yetsotosa, allara ñeñ pa'netser Licia.

⁶ Allña capitán Juliopa' entosan po'poñ bote ñeñ huetsa Alejandriot ñeñcha' tatsa Italio. Ñaña allempopa' otey ahuo'ch ya'ta'cha't all.

⁷ Allempoña o' allponmat ahuañpsey e'ñe aco'papa' e'ñe yemuerochenñoña yemet ñaña Gnidot. Allo'tpa'cho'ña ama muenaterryerro mōrr o'ch ahuer-ryerr e'ñe pa'charr, ñeñto'marña yepotesam'pesuanerrerr coñe't pats ñeñ pa'so'cheñ Creta attoch ñeñ patspa' o'ch a'npam'psey mōrr. Allñaapa' allpono'mar yoñom allecma etsotenet ñeñ pa'so'cheñ Salmón.

⁸ Yemuerochenñoña yemetua ñaña allot e'ñe aco'pa. Atteñapa' ye'chap ñaña all oteñet Cohuen Sohua'puetso. Allo'tpa' e'ñe allame'ttsa anetso Lasea.

⁹ Yemuerochtame'teño'tpa' o' ya'llponmatnom ñeñto'mar allempopa' o' chen allempo nanac am'cha'no'chtana o'ch ahuañpsey sapo'mar. Ñaña o' met allempo anareñ judioneshacop allempocma ahuantenet pa'chporrña Yomporecop, ñeñto'marña yapa' o' yeñoch o' chen allempo nanac orrnotena sapo'mar. Ñeñto'marña Pablopa' o' yerpatanet,

¹⁰ atet otanet:

—Masheñeshacha', napa' noctape'chen arepoña es yehuapoya toño allempoch ahuañperryerr. Napa' noctape'cheñ ñato' o'ch yechencatsre'tnoma, ama't ñaña ye'botepa' chach chenca; ama't yapa'cho'ña arepoña cha yechenca.

¹¹ Tarraña capitánñaapa' o' ame'ñenana atet otanet ñeñ maneja'nene' bote ñaña ñeñ atet otanet ñeñ pamo'mte' pen bote. Ama ame'ñyeto atet otanet Pablo.

¹² Ñaña all Sohua'puetso Cohuenpa', ama tama cohuenayaye o'ch allaya allempo chen orrnoteñtsopo. Ñaña allohuenetpa' o' e'ñe pocte' entuet o'ch ahuañperryerr allot. Arro'chña ye'chap sohua'puetso all oteñet Fenice,

* 27:2 Lucas ñeñ quellquë' añ ñoñets ñapa' co'ta'nman ñaña Pablo.

tarraña allara anetso Creta. O' sechet Sohua'puetso Feniceo tarro'mar allpa' ama tama orrnoteno. Allña' allach ya'posa tarrempohua o'ch metuen orrnoteñtsopo.

Allempo huomenquëshatañpesnomuet sapo'mar

¹³ Allempoñapa' o' huapa mōrr po'pshemñtañoť, tarraña ñeñťpa' mamesha mōrraren. Allempoñapa' otyeset:

—Te'pa' pocte' o'ch ahuerryerr.

Allempoñapa' o'cho' cheterret ñeñť rremuene' botepa' o'cho' ahuanperryerr. Alloťña' e'ñe to'pña'so'mara yoñmañpes allara anetso Creta.

¹⁴ Tarraña e'ñe o'chtapa' ahuepa'tcha' huapa ñaña mōrr onnatōť al-lente'tsen anets Creta. Allempoñapa' o'cho' yorrnotañpesnoma nanac huomenc.

¹⁵ Botepa' ama eshcaye' to allenet anmanñpenyet allempoña ama errot yepepa' o' anmanñsey orrno a'yenet.

¹⁶ Orrnoñapa' o' chapatey po'pshemñtañoť allo'tsen coñe't rrochpe'chañ añ pa'so'cheñ Claudia. O' chapatey alloťemñta'n ama tama hueno mōrr. Allña e'ñe yemuerochenñōťa yechant noñť ñeñť cheta'nen atarr bote. Alloťpa' yesha'ch atarr boto.

¹⁷ Allempoña o' yesha'tua noñťpa' ñetñapa' huancatse'tet atarr bote attoch amach tare'che orrno. Ñaña ñetpa' añ mecha'tet ñato' botepa' o'ch chap muelle'sato allo'tsen mueñ ñeñť ama echarroyaye ñeñť otenet Sirte. Ñeñťo'marña o' pueyhuet enoť shetamuets ñeñť chope'chatene' bote attoch botepa' amach errenet to.

¹⁸ Allempoñapa' ahuepa'tcha' yorrnotañpes nanac huomenc. Tsapaťña' chetanatet cargapa' saprrochet sa'po.

¹⁹ Poma'pamtañoñapa' o' saprrotet ñaña ñeñť allpon echyen bote.

²⁰ Allempopa' allponmat ama orrterro atsne' ama't ñaña rantočno, ama't mamesha. Nanac yorrnotañpsa. Atteñapa' yot:

—Te'pa' amach erroteno yequeshperro.

²¹ Ñaña allponmat ama es yerro. Allempoña Pablopa' tompa' ot:

—Ñerra'm amach masheñeshacha' saťpa'noñe atet notaseñ, amach yonñe Cretōť, te'pa' amate' es yeyore'tenayñe ñaña allempopa' amate' yechencatsre'tañe.

²² Tarraña te'pa' o'ch notas, amach sellcatsto tarro'mar yapa' yequeshpach allohueney. Añachña chencatsre'tatsa bote.

²³ Napa' neñoteñ tarro'mar tsapopa' orrtona mellañoťeñ ñeñť huetsa Yomporeshoť ñeñťara Yompor ñeñť puechemer nepene', ñaña ñeñťara ñocop neťorrena.

²⁴ Ñeñť norrtoyapa' atet oten: “Amach Pablo pelcatsto tarro'mar pechapcha' allo'tsen añcha'taret all Romo. E'ñe pōťpa' Yomporpa' o'ch a'natana allohuen ñeñť epa' sechope'chanñpen boto.”

²⁵ Ñeñťo'marña notenes amach sellcatsto. Tarro'mar napa' neyemteña Yompor, ñerra'm erroten otenpa' atet'cha' pa.

²⁶ Tarraña ama't atetpa' chocmach yepotañpsa allempo o'ch yechapmoch patso. Añpa' allohua atet otanet Pablo.

²⁷ Allempoña o' met charramat puechena pa'tatsmat, atfa yetañpena sa'po ñeñť otenet Adria. Allempopa'cho'ña yorrnotañpesnoma. Allempo chap rroch tsapopa' añña ñeñť taruaset botopa' atet otet:

—Ñato' o' yechapmoch allo'tsen pats.

28 Allempoñapa' o' topaso'tet sa'p. Allempoñapa' ahuo't eñochet allo'tsen ma'poch çharra' puechena pechap metro. Allempoñapa' o'çho' ahuerryerr allpononetpa' allpa'cho'ña o'çho' topaso'tuereterr. Allña'pa' otet allo'tsen epoch çharra' puechena cançherr metro. Allempoñapa' añ mecha'tet taye'to' yeto'mañpsa mapyo.

29 Allempoñapa' o'çho' a'shore'tet puequë'nare'tot pa'tatsmaga ñeñtcha' rremue' bote. Allempoña a'shore'tuetpa' o' cohuet ato't puetarena'.

30 Añña ñeñt taruaset botopa' a'suaterret e'ñe a'nahua noñt tarro'mar ñetpa' añ muenenet o'ch caçhpa'nmuet alla bote. Ama't ahuepa't a'suaterret noñtpa' ñetpa' çha ottenet ñerra'mrrate' po'poñ a'shore'tenet ñeñtcha' rromue' bote poñe'magoť.

31 Allempoña Pablopa' eñotanet atet coťape'chen ñeñt taruaset botopa' atet otan capitán ñaña po'poñeçhno solltarnesha' atet otanet:

–Ñerra'm ama alla a'pueto botopa' sapa' amaťe' erroťenot sequesperro ama't puesheñarroťesa.

32 Allempoña solltarnesha'pa' o' tsorramñset noñt poçhar attoch ahuo' a'yenet.

33 E'ñe puetaresuanetsapa' añña Pablopa' atet otanet allohuenet:

–Te'pa o'ch serra'muen tarro'mar o' çharramat puechena pa'tatsmat sema'yochreñot po'poñpa' ama semueno, ama es serreno.

34 Ñeñto'marña o' nota'muenes serra'muen attoch çherr sehuamenc, tarro'mar amach eseshas chencatso, ama't puesheñarroťesa.

35 Ñeñta otuanet o' chetan panpa' o' ma'yocha e'ñe alla all shontena acheñenesha'. Alloťpa' shotan panpa' o' rre'.

36 Allempoñapa' o' ye'chatanetpa' o' rret ñamet.

37 Ñeñtey boto'tseney allohueneypa' allo'tsen doscientos setenta seis acheñenesha'.

38 Allempoña ocha'huanet puerrarpa' alla saprroteneterr trigopo'r oño attoch o'huañcha' tama eñerrta bote.

Allempo taramñsanet sa'p po'bote

39 Allempoña e'ñe puetaresuenpa' o' entet pats, tarraña ama puentareto ñeñt pats, tarraña allempo o' entet ñaña a'yohuen mueyapo's allña'pa' a'yohuen ñaña pueme'tar. Allempoñapa' coťape'chetpa' otet:

–Ñato' ye'chapcha' all allochñapa' allcha' yetsotosa cohuen.

40 Alloťña'pa' tsorro'tet ñaña ñeñt rromuene' botepa' o' a'ypo'ña'nmet alla sa'po. Allempoñapa' o' pueyamñperet allo huanquët ahuaña bote puepopať. Allempoñapa' echantet ñaña poñe'magoť shetamuets attoch mörppa' o'ch matatan bote. Allempoñapa' o'çho' ahuanñpsey pueme'taronet.

41 Allempoñapa' o' çhap bote all epchacra'stena sa'p all nanac epopa' rroçhoñapa' çha muelle'sattena. Chap all botepa' çha açhtosa poñe'magoť, ama erroť yepere. Arroťña puequë'nare'tot nanac emo'yarertena sa'p. Po'huamencpa' o' taranñpsey yebote.

42 Allempoña solltarnesha'pa' mueneñ o'ch muetsanatuan ñeñt ayotamñpsareť taye'to' ñerra'm paťetpa' ahuo'te' yetet.

43 Tarraña capitánpa' nanac mueneñ o'ch a'queshpatan Pablo ñeñto'marña ama muenataneto o'ch muetsanachet. Ateť otanet:

–Ñerra'm esesha'te' eñotene' paťatsapa' o'ch sepaťa sanom attoch seťchata yomñta'n.

44 Alloťña'pa' samña ñeñtes ama eñotenaye paťatsapa' ñato' o'ch sanemyes tabla amapa' po'poñeçhno ñeñt echyen bote, allochñapa' attoch seťchata samña.

Allempoñapa' o'cho' pechatuet allohuenet.

28

Allempo chapuet coñe't pats pa'so'cheñ Malta

¹ Allempoña o' yequeshpa'hua allohueneypa' allempoñapa' otyet añ coñe't patspa' año' pa'so'cheñ Malta.

² Añña acheñenesha' ñeñt yeçhetsa allpa' nanac muerapyet ñeñto'marña a'toronayet tso' allcha' yeshotosa, tarro'mar allempopa' cha huatena o' yesnate't. Tarraña e'ñe cohuen agapapuey allohuen acheñenesha'.

³ Pabloñapa' allenta tsella'tpechospa' o' a'tamo'ye' tso. Allempoñapa' machayo'ta cha'nom shechep e'ñe tso't. Ahuo't atserr e'man tso'pa' o' cha'nompa', cha a'chan Pablo pototpa' alla a'sope'ch.

⁴ Acheñenesha' ñeñt yeçhetsa allpa' eñchet Pablo cha a'sope'cheñ shechep pototpa' atet otanna'tyeset:

—Añ acheñpa' amtsañte'ca'ye ñeñto'mar te'pa' ama't o' qeshpa'hua sa'potpa' te'ña Yomporpa' o'ch tsa'tacha.

⁵ Tarraña Pablopa' pa'shque'cherra shechepñapa' o' shora'nerr tso, amaña erro'teye' pe ama't mamesha.

⁶ Allempoña acheñenesha'pa' atta cohueñet Pablo ñato' machayo'tach añecmuenta potpa' o'ch taso'ra rromue'. Allempoñapa' o' cohua'huet o'chet ama es atsoto, allempoñapa' o' cotape'cherret po'poñ, atet otet:

—Añpa' po'ño'ch Paretste'.

⁷ Ñeñtña ane'tañtetsa allpa' añ pa'so'cheñ Publio. All ye'chap yapa' allotpa' allame'ttsa all ye'chena Publio, allpa' allo'tsen po'patseñ. Ñapa' o' agapapuey e'ñe cohuen ñeñto'mar allpa' yema'pamuetnom pa'paclo.

⁸ E'ñe allempopa' añña Publio pomporpa' cha atsna'ten, nanac huoraten ñaña cha chemotse'ten, ama achñeno. Allempoña Pablopa' o' ahuo' o'ch enteña'. Allempoña chap Pablopa' ñaña' ma'yocham'psosya. Allempoña Pablopa' o' a'p'llana'chpa' añña ñeñt atsna'tetspa' allenta correna.

⁹ Allempoña e'mare'ch allohuen acheñenesha' atet o' posa Pablopa' huapyesa acheñenesha' ñeñt atsna'tyets. Ñetpa'cho'ña e'ñe a'crratyesuanet Pablo.

¹⁰ Ñeñto'marña acheñenesha'pa' shonte' regala'yesyet pa'namen. Ñaña allempo ahuan'perryerr botopa' nonayet allpon ñeñt yepalltena.

¹¹ Allempoña o' met ma'p'ma' arrorrrpa' o' alla ahuan'perryerr po'pnañ boto. Ñeñtña botepa' ñeñt cohue'ne' o'ch metuen allempo orrnoteñtsopoten. Añ botepa' ñeñt huapatsa ahuaña Alejandriot. Ñaña añ botepa' echenan poñe'm'agot acheñma't ñeñt epuesha' ñeñt toma'ntatenet po'yosret; ñeñt'pa' añ pa'so'cheñ Cástor; po'psheñeñpa' añ pa'so'cheñ Pólux.

¹² Allempopa' arr yetsotnoma all oteñet Siracusa. Allña'p' alla yema'pamuetnom.

¹³ Allotpa' allampaño'mara yoctato'p'ne'ch pats, atteñapa' ye'chap all oteñet Regio. Allpa'cho' all yetsotnoma. Tsapa'tña'p' o' m'orrarenerr mamesha'tets. Morrrpa' arro't huena yecha'ñe'm'ta'no't. Allempoñapa' o'cho' alla ahuan'penyerr. Allotña'p' e'ñe puepomtañocma ye'chap all oteñet Puteoli. Allpa' all yetsotosa.

¹⁴ Allña'p' yentos ñeñt ame'ñetsa. Ñetpa' a'patapyet all ye'chenet, ñeñto'marña yapa' alla yecan'cherrmatnom ñesheto. Atto'tapa' o'cho' yeya'rrota ñaña Romo.

¹⁵ Añña ñeñt ame'ñetsa all Romopa' ahuo't e'mare'tyet o' yečhap allampañopa' allenta't onača'tet o'ch poctapyet. Puesheña'tetspa' o' čhapuet all oteñet Foro ñeñfara Apio. Po'potantañña' alla't čhapyeset rrocho all oteñet Ma'ppahua Pocoll. Allña' all pocta'yet. Allña' all entosanet Pablopa' nanac parasyoso'tan Yompor tarro'mar allempopa' nanac coshatapet Pablo.

¹⁶ Allempoña o' yečhap Romopa' atet otapet Pablo yečhosepa'to' ellonet, tarraña čhocma net solltar ñeñtcha' cohuanpse'.

Allempo Pablopa' serrpare'tatosanet allempo čhap anetso Romo

¹⁷ Poma'pamtañoña' añña ñeñt amča'tarettetsa judioneshacop allpa' Pabloña' agotatanet allohuenet. Allempoña o' e'ñe apča'huetpa' Pabloña' atet otanet:

—Masheñeshacha', ama't napa' ama erroť nepeñeña judionesha' ñaña ama čho nehuapore'tateno ñeñt atet yeče't yatañneshañpa'te'ña judionesha'pa' o' atta rroma'net all Jerusaléno, o' pomnet allo'tsen romanonesha'.

¹⁸ Ñetpa' a'pťo'tare'tnet, tarraña amaña entoneto atto alloch muetsatnet, ñeñto'mar ñetpa' mueneñetañ o'ch a'rroyerrnetañ.

¹⁹ Tarraña judionesha'pa' ama pocteye' eñcheto o'ch a'rroyerrnet. Ñeñto'marña napa' nesecha o'ch entatenneta' amča'taret arr Romo. Tarraña napa' ama čho notteñe'cheñe namo'tsna'tar.

²⁰ Ñeñto'marña te'pa' o' nagotatuas allochña'pa' o'ch neserrpare'tatuas ñeñt atet pennet. Ñaña napa' name'ñena atto ñerra'm yerromapa' Yomporpa' o'ch tantaterrey esempohuañen. Ñeñto'marña te'pa' o' sentuan napa' ehuan-careten, tarraña ama't allohuen judionesha'pa' attecma ame'ñenetañ.

²¹ Ñetña'pa' atet ochet Pablo:

—Tarraña yapa' ama yaguëna' carta Judeoť ñeñt atet otenet pćocop. Ñaña ñeñt ame'ñetsa ama't huapyenet arrpa' ama esesha' erroť otetso pćocop ñeñt ama cohuenayaye.

²² Yapa' aña yeñoten po'ñoč čhocma e'moñe'teñet erracmañen ñeñt coťene' Jesús poctapña. Ñeñto'marña yapa'čho'ña yemneñ te'pa' o'ch ye'mñotať yaña erroťente' pćotape'chen pa.

²³ Allempoña'pa' a'poctachet allempoch huača'tet allo'tsen Pablo allempo'ch serrpare'tatanet. Allempoña o' čhap allempoch huača'tetpa' allempopa' shonte' ačeñ huača'tatsa Pablesħo. Allempoña Pablopa' e'ñe ellapen serrpare'tatahuet; a'poťanet atet pena Yompor po'cohuenña ñeñt atto ayochreshattena ña. Ñaña lleyatyesanet Moisés po'ñoñ all oten atetča' pa ñeñtcha' Cristotats. Ñaña lleyatyesanet po'ñoñ ñeñt a'mťaye't ahuať Yompor po'ñoñ all oten ñaña atetča' pa ñeñtcha' Cristotats. Ñapa' nanac mueneñ o'ch ame'ñatanet atto Jesús'pa' po'ñoč ñeñt Cristotats.

²⁴ E'ñe allempopa' ame'ña'yesyet puesheña'tets, tarraña po'potantaña'pa' ama es ame'ñatso.

²⁵ Atteña'pa' ñañeñeta achmāre'tanna'tyeset. Allempo ahuanerrmochetpa' allempoña Pablopa' otanet:

—E'ñe po'ñoč atet ote't Isaiás ahuať allempo Parets Puecamquëñoťpa' otan satañneshañ:

²⁶ O'ch soteña' judionesha' añ ñoñets: Ama'tcha' čhocma e'mñotenetpa' ama't ahuaťapa' amach čhapaneto pueyočhreto. Ñaña ama'tcha' čho es entuetpa' amach čhapaneto pueyočhreto.

²⁷ Alloťpa' o'ch sotenaneta', te'pa' pueyočhretopa' nanac echarrtenet attoch amach es čhapaneto pueyočhreto. Te'pa' amach mueneto o'ch es e'mñotet taye'to' čhapanet pueyočhreto. Te'pa' amach mueneto

o'ch es entet taye'to' çhapanet pueyoçhreto. Attetach amach es co'tape'cherreto nocop ama't mamesha attoch na'queshpatterranet.

Añpa' allohua atet ote't Isaiás ñeñt a'mtaye't Yompor po'ñoñ ahuat.

²⁸ Allempopa' alla o'terraneterr Pablo:

—Te'pa' o'ch neñotatas añ, tayoteñ Yompor po'ñoñpa' o'ch yeserrpare'tach po'poñ acheñ ñeñt ama judioneshayaye. Tarro'mar ñetpa' ñerra'm e'moñet Yompor po'ñoñpa' o'ch ame'ñet. E'ñe pame'ñeño'tetpa' qeshperretcha'.

²⁹ Ñeña otuanet Pablopa' añña judionesha'pa' e'ñe pachmãare'tanna'teño'tetpa' o' ahuanerret.

³⁰ E'ñe epa char all ye'cha Pablo Romo. Allpon pallta'yese'tpa' e'ñe tsa'tuauye't. Ñaña e'ñe cohuen agapyesane't ñeñt huapyestse't.

³¹ Ñaña e'ñe cohuen serrpare'tatanete't atet pena Yompor po'cohuenña atto ayochreshattena ña, ñaña ye'chatanete't atet pena Yepartseshar Jesu-cristo. Tarro'mar allpa' ama esesha' epatare'taye'te. Allohua.

AÑ SAN PABLO PO' CARTA ÑEÑT̃ QUELLCAN ROMO' MARNESHA' ROMANOS

Atto Pablopá' quellcanet carta añecop ñeñt̃ ame'ñetsa netso Romo

¹ Masheñeshacha' ñaña nochaneshacha' ñeñtes allohuenes yeçheta anetso ñeñt̃ añ pa'so'cheñ Roma ñeñtes Yomporpa' ahuo't nanac muererrsa, attoña o' hua'ñerres attoch sapa'cho'ña o'ch e'ñe poctacma pueyochresha' perres. Na Pablon sequellquene'ña añ carta, ñeñten nanac torretsa Jesucristo cop tarro'mar ñeñtecopña llesenserrenña Yompor, nach ma'yoçhrerraya serrpare'tyene' añ cohuen ñoñets ñeñt̃ huetsa Yomporeshot alloch po'ñoçh yequeshperra.

² Añ cohuen ñoñetspa' ñeñtara ñoñtsor ñeñt̃ ama't ahua't Yomporpa' e'ñe eñotatuane't̃ ñeñt̃ a'mta'yesaye't̃ po'ñoñ ñeñt̃cha' atet perrnay te' añeño. Ñeñto'marña ñetpa' quellca'yesete't̃ ñeñt̃ atet otanete't̃ Parets.

³ Ñaña añ cohuen ñoñets alloch yequeshperra, ñeñt̃pa' añ serrpare'ten Jesucristo ñeñt̃ Puechemer pen Yompor. Tarraña allempo acheñetos arr patsropa' ñapa' e'ñe David po'mrenñoñ eñalleta, ñeñtara David ñeñt̃ amcha'tarettatse't̃ ahua't.

⁴ Tarraña Parets Puecamquëño'tpa' nanac ahua mencattache't̃ añecop ñeñt̃ cohuenetyetsa Partsocop. Ñaña chemerrña allempo Pomporpa' ahuo't tantater po'rromño'tpa' allempoña e'ñe eñotuarë'ta ñapa' po'ñoçh Yompor Puechemer ñeñtara Jesucristo ñeñt̃ Yepartseshar yepen.

⁵ Ñaña yame'ñeño't̃ ñeñtara Jesucristo, Pomporña e'ñe puemuereño'teypa' ahuo't apuey llesens, allochñapa' yach ame'ñatyenuhuet ama't errañaren allohuen anetso'mar. Attochña e'ñe cosha'yeññañet Yompor Puechemer.

⁶ Atet ñerra'm sa ñeñtes yeçheta Romo, sapa'cho'ña ahuo't sa'hua'ñare'terra attoch soçter Jesucristo.

⁷ Te'pa' e'ñe nehuomcha'teño'tes sa, napa' o'ch notas: Yomporepa'chña sebensare'tam'pene' ñeñt̃ nanac Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyoçhro allohuenes.

Atto Pablopá' mueneñ o'ch emo'tenana' romo'marnesha'

⁸ Ñehua, e'ñe ñanompa' añcha' notas, e'ñe neyemteño't̃ Jesucristopa' çhocma neparasyoso'teñ Yompor allohuenacpas, tarro'mar ora allemeñ anetso'marpa' çhocma serrpare'tyenet atto sapa' ahuo' e'ñe cohuen same'ñena.

⁹ Yomporpa' e'ñe eñotenen, napa' çhocma nema'yochena socop. Ñaña añ Yomporpa' ñeñt̃ña nanac nesherven, e'ñe neyoçhrocmañen neserrpare'tateño't̃ po'ñoñ, ñeñt̃ atet perrnay Jesucristo ñeñtara ñeñt̃ Puechemer pen ña.

¹⁰ Napa' çhocma nenamueñ Yompor attoch ama't esempopa' o'ch nabchensa' ñerra'm ñach muenats.

¹¹ Napa' atarr nemneñ o'ch nabchensa', o'ch neyçhatensa' attoch Parets Puecamquëño'tpa' allo'te' sesen huomenctatsa ñocop.

¹² Ñehua, añ noten, e'ñe yame'ñeño't̃ parropa' e'ñe pocte' o'ch yeyçhatanna'ta ñeñt̃ cohuentetsa Yomporecop attoch yeyenpanna e'ñe yame'ñeño't̃ Yompor.

13 Ñaña te'pa' o'ch masheñeshacha' ñaña nochaneshacha' notas, ama't ahuañmo'choñ nesechenañ o'ch nabchensa' tarraña teme'ttsenpa' ama erroť nepeñe. Napa' añecop nesechena ñaña attoch seshopa'cho'ña o'te' name'ñateña' acheñenesha' atet nepa'yena po'poñ anetso'mar.

14 Tarro'mar ñeñť poctetsa nocoppa' o'ch neñotach allohuen acheñenesha' añ cohuen ñoñets attoch yequeshperra, ama't griegonesha' ñeñť nanac ay'chatarettsa amapa' ñaña acheñenesha' ñeñť ama ay'chatareteyaye, ama't ñaña acheñenesha' ñeñť nanac es eñotenet amapa' ñaña ñeñť ama es eñotetso.

15 Ñeñto'marña e'ñe nocsheñeshocmañen nemneñ o'ch neserrpare'tatas samña añ cohuen ñoñets alloch yequeshperra ñeñtes ye'chetsa anetso Romo.

E'ñe añ yame'ñeñot ñeñť cohuen ñoñets, ñeñťpa' allochña Yomporpa' a'queshpaterrey

16 Tarro'mar napa' ama apenca'pahuoye' nenteno añ cohuen ñoñets atto Jesucristo rroma yocop alloch yequeshperra, tarro'mar ñerra'm esesha' ame'ñenaya añ cohuen ñoñets, ñeñťpa' ñeñťña Yompor po'huamenc alloch a'queshpaterrey allohueney ñeñtey ame'ñenaya ña, ñeñtey judioneshay e'ñe yanom allotpa' ñaña ñeñť ama judioneshayaye.

17 Ñaña añ ñeñťara cohuen ñoñetspa' eñotateney, e'ñe yeyemteñoña Jesucristopa' Pomporñapa' e'ñech pocte' enteney, allochñapa' allo'nach yesen e'ñe yemtenaya ña. Tarro'mar añpa' ñeñťara anuaret' ahuatoteñ e'ñe Yompor po'ñoño allohuenacpay, ñeñť otets atet: Ñeñtey ame'ñenaya Yomporpa' e'ñech pocte' entueney ñaña e'ñe yeyemteñoñ ñapa' yañapa' corretsayach, ama't tayoten errponohuañen.

Atto allohuen acheñenesha' atpare'chete't Yompor

18 Tarro'mar yapa' yeñoteñ Yompor ñeñť pue'ntaño'tsen e'ñe po'yoro'chenño'tsa'yena allohuen acheñenesha' ñeñť ama pocteye' es peneto ñocop, ñeñť sosya'tsañach eñotyenet. Ñaña e'ñe atet puepatse'teñoťtpa' ñeñťaña ama muenatenahueto o'ch orrtanet Yompor po'cohuenña ñeñť e'ñe po'ño'ch.

19 Ñehua, ama't sosya'tsañach eñotyenetpa' tarraña ñetpa' e'ñe eñotueñet ñaña atet penaña Yompor, tarro'mar ñapa' ñaña eñotatenahuet e'ñe pueyo'chreto ñeñť atet penaña ña.

20 Ama't yeñoteñ Yomporpa' ama entpahuoyaye tarraña yenteññañ pueye'chcatarot' po'partsoña ñaña allotña yenteññañña po'huomenc atarr. Ama't ahuatoteñ allempo e'ñe errte' ye'chcatene' pats, allotña yenteññañña po'ño'ch po'partsoteña ñeñťña' errponohuañen. Ñeñto'marña acheñenesha' ñeñť ye'chene' sosya'tsañpa' amate' errotenot oteto amo' eñoteñetoña ñeñť atet penaña Yompor po'partsoteña.

21 Ñaña ama't eñoteñetañ ñeñť atet penaña Yomporpa' tarraña ama mecha'na'teñetoña Parets, ñaña ama coshateñeto ñeñť ora añecop. Attoña o'huañcha' cotape'chenet ñeñť sherbets Partsocop. Ñeñto'marña pueyo'chretopa' o'huañcha' eñoteñet ñeñť cohuentetsa Yomporcop; atet ñerra'm pueyo'chretpa' nanac a'checmetañpsaret.

22 Ama't otenetañ atarro' es eñotenet, tarraña po'ño'ch ñetpa' ahuo't atta allo'na otatsñatetnenet.

23 O'huañcha' cosheñet ñeñť po'ño'ch Parets ñeñť ama arromña'feshayaye. Añachña e'ñe coshenet ñeñť ye'chcatyenet ñet. Tarraña ñetpa' e'ñe arromña'foña atet es ye'chcatyenet atet ñerra'm acheñma't ñaña otma't, ñaña

po'yallopma't ñaña es berrma't. Ñetñapa' ñeñtach e'ñe ma'yochyenet ñeñto'ña e'ñe po'yomporer penet.

Atto acheñenesha' allo'na senet muenatse'tyese' ñeññ nanac sosey enten Yompor

²⁴⁻²⁵ Attoña o'huañcha' ame'ñeñet ñeññ po'ñoch Parets, añachña ame'ñenet ñeññ ama po'ñochoyaye. O'huañcha' ma'yocheñet ñeññ e'ñe Yompora', añachña ma'yocheññañet ñeññ e'ñe ña pueyeçhcatuar. Ñaña o'huañcha' sherbeñet ñeññ e'ñe Yompora', añachña sherbeññañet ñeññ e'ñe ña pueyeçhcatar. Tarraña Yomporepa'chña ñapueñ aye'choçhtatarettatsa tayoteñ ama't erponohuañen. Ñeñtpa' attetepa'ch. Tarraña atto a'ypo'ñeñet Yomporpa' ñapa'cho'ña e'ñe pa'ypo'ñeñotanet ñañaapa' ahuo't muenatyesanet o'ch allo'na senet muenatse'tyeset ñeññ nanac sosey enten Yompor. Ñeññ atto muenatse'tyenet atto o'ch agapannenet, ñeñto'pa' nanaccha' apencoçhen yeçhenet.

²⁶ Ñeñto'marña Yompor e'ñe pa'ypo'ñeñotanetpa' ahuo't muenatanet o'ch allo'na senet muenatse'tyestset ñeññ nanac apencoçhen enten ña. Attoña ama't coyanesha'pa' o'huañcha' aguënan puerrollar atto ñeññ e'ñe poçte' atet anareteyeñ. Ñagattsetach muenannetset o'ch agapanna'tyenet ñeññ e'ñe parro pacmacmuet. Ama't ñeñtpa' ama atteye' anareteye.

²⁷ Ñaña ama't yacmapa' attecmaçh penet. O'huañcha' aguënan puetapor atto ñeññ e'ñe poçte' atet anareteyeñ. Añachña atarr muenen o'ch aguënan pacma e'ñe ñagattsa pacmacma, ama't ñeñtpa' ama atteye' anareteye. Ñeññ atet pannenet yacma parro yacmacmapa' ñeñtpa' nanac apencoçhen enteñ Yompor. Ñañeñetach coñchatetset ñeññ atet pätse'tyenet.

²⁸ Attoña ama't mamesha o'huañcha' mueneñet o'ch yerpa'pesyet Yompor. Ñeñto'marña Yomporña'pa' pa'ypo'ñeñotanetpa' ahuo't muenatanet o'ch coçape'chatse'tyeset ñeññ ama poçteye' enteno ña. Añachña pätse'tyenet ñeññ ama apapahuoyaye.

²⁹ Añachña nenet pueyoçhreto ñeññ esocmañen ñeññ ama't mameshapa' ama poçteyaye ñeññtara pa'namen sosya'tsañeçhno. Ñeñtpa' añeçhno: agapanneñets ñeññ ama puerrollareyaye ñaña ñeññ ama puetaporeyaye, ñaña coçape'chatse'tyeñets ñeññ ama cohuenayaye, ñaña ye'chatse'tyeñets, ñaña ye'moñe'tanneño'pa' o'ch erroç ye'poñ po'psheñeñ, ñaña yeye'chapreteño'pa' o'ch ye'moñe'ch po'psheñeñ, ñaña muetsanna'teñets, eñoseñe'cheñets, ñaña shecanna'teñets, ñaña atsrre'moçhen entanna'tueñets, ñaña a'metanipsare'tanna'teñets,

³⁰ ñaña sasare'tanna'teñets, ama't Yomporpa' ello e'moñe'teñet, ñaña ama't po'psheñeñpa' amach mecha'na'teñeto ama't mamesha, attachña e'ñe ñañeñapa' cohuen entetset, ellopa' ommo'chenetcha'. Añach e'nyenet ñeññ ama cohuenayaye, attoçha'ña ama ame'ñeñeto ama't pomporet ama't ñaña pachoret.

³¹ Amach çhenaneto pueyoçhreto ñeññ cohuentetsa Yomporecop, amach a'poçtateneto po'ñoñ ñeññ atet otenet. Amach es amorrentenaye' enteneto ama't mamesha, amach es apretenenaye' enteneto ama't mamesha, ñaña amach es amuerenaye' enteneto ama't memesha.

³² Ñeññ pätse'tyetsa atetpa' ama't eñoteñetañ e'ñe Yomporeshoç anaretetua ama't coñcheñets añecop ñeññ pätse'tyetsa atetpa' tarraña ñetñapa' ñeññtarach atet pätse'tyesnenet. Ama't pamo'tseshetpa' ñerra'm e'ñe attecma pohuenet ñametpa' chemerrña allempopa' ñeññtach erronaye' coshapretannenet.

2

Atto ama't judionesha'pa'cho'ña atpare'toñete't Yompor po'ñoñ

¹ Ñeñto'mar te'pa' o'ch notas allohuenes ñeñtes judioneshas, ñato' sapa' çhate' sotenapañ sapa'cho'ña año'te' atteye' seyçheno sosya'tsañ atet pena po'potantañ. Tarraña amate' errotenoť soto atet tarro'mar allohueneypa' e'ñe attecma yepena. Ñerra'm çha yoten po'psheñeñpa' ama cohuenayaye, tarraña atetpa' yañeña atet otetsa ama't erra'tsenoťeya ñeñtey atet otets.

² Tarraña ama't atetpa' yeñoteñ Yomporpa' çhocmach tsa'taterrana allohuen ñeñt atet es p̄atse'tyets, errotencha' e'ñe pocte' ent ña.

³ Sapa' çhate' sotenapañ saptate' atarr morrentensa Yompor, amachña tsa'taterrso sa, ama't sapa'cho'ña attecma sepatse'tyen sosya'tsañ ñeñt atet pena po'potantañ, tarraña sapa' çha sotenanet ñetpa' amo' cohuenayayeto.

⁴ Amapa' sapa' çhate' sotenapañ Yompor pueuereñoť nanacpa' amach tsa'taterrso tarro'mar teme'ttsen ama erroť penso, atta cohuenes. Ama't señoťeñe añecopña teme'ttsen muerensa Yompor attoch ellopa' o'ch e'ñe soctape'chuerr cohuen allohuenes.

⁵ Tarraña ñerra'm atta se'charrtena seyoçhro, amachña soctape'chuerro cohuen, allempochña allo'nach sesen atontatnomue' attoch tsa'tatuerrsa Yompor esempohuañencha' tsa'tatuerrya allohueney errotencha' e'ñe pocte' entyesuerrey e'ñe puesheña'ttsoy. Allempoña allohuen acheñenesha'pa' o'ch e'ñe eñotueret ñeñtcha' e'ñe atet tsa'tatuerrya e'ñe puesheña'ttsoy, ñeñtpa' e'ñech pocte'.

⁶ Ñaña tsa'tuerryach allohueney ñeñtey corra'yetsa arr patsro erroťente' ye'pa'yena e'ñe ñocop.

⁷ Ñerra'm çhocma yoctape'chen e'ñe cohuen Yomporecop, ñaña ñerra'm çhocma yocteññañ po'cohuenña, ñaña ñerra'm añ ye'nen attoch ñapa' e'ñech cohuen entuerrey, ñaña attoch aphuerreycha' ñeñt alloch yocrrerra erponohuañen, allempoña po'ñoçhpa' aphuerreycha' attoch yapa' corretsayach yocsheñeshocmañen tayoten e'ñe errponañohuen.

⁸ Tarraña ñerra'm yapa' aña cohuen yenten ñeñt yemnen ya, Yomporña po'ñoñña'pa' ñerra'm çha yatpare'teñ, aña yocten ñeñt ama cohuenayaye Yomporecoppa' ñaña po'yoroçhenñoť po'ñoçhpa' çhocmach tsa'tatuerrya.

⁹ A'coñchatareťterrach allohuen ñeñt cotene' ñeñt ama cohuenayaye arr patsro, amuroçhtatareťterretcha' allohuenet ñeñt atet petset, ama't ñanom atet ñerra'm judionesha' allotpa' ñaña ñeñt ama judioneshayaye.

¹⁰ Tarraña allohuen ñeñt cotene' ñeñt cohuentetsa Yomporecop arr patsropa' Yomporña'pa' cohuencha' enterranet, aphuerranetcha' alloch e'ñe cohuentapreteret, aphuerranetcha' ñaña attoch cosha'huerret e'ñe cohuen pueyoçhreto. Atetcha' perran allohuen ñeñt e'ñe cohuen corra'yetsa, ama't ñanom atet ñerra'm judionesha' allotpa' ñaña ñeñt ama judioneshayaye.

¹¹ Tarro'mar Yomporpa' ama ñap̄ta judionesha' morrenteno, añña ñaña allohuen acheñenesha'pa' e'ñe morrentueña. Ñaña attecma Yomporpa' ama ñap̄ta coñchatenano ñeñt ama judioneshayaye, ñapa' ama't judionesha'pa' e'ñech coñchatuer.

¹² Ama't atet ñerra'm ñeñt ama judioneshayaye ñeñt ama echenaye Moisés po'ñoñ, ñerra'm añ cotenet ñeñt ama cohuenayayepa' elloña ñetpa' chenca'huerretcha', tarraña ñetpa' amach aye'e' a'chencaterrahueto Moisés po'ñoñ. Tarraña judionesha'ña'pa' ama't echeññañetañ Moisés po'ñoñ, tarraña ñerra'm attera, añach cotape'chyenet ñeñt ama cohuenayaye, ñetpa' añachña a'chencaterrahuet ñeñtara Moisés po'ñoñ.

13 Tarro'mar Yomporpa' ama pocteye' entenano ñeñt'atta e'muene' orrena po'ñoñ all serrpare'teññañet. Añña pocte' enten Yompor, o'ch atet penet ñeñt' e'ñe atet oten po'ñoñ.

14 Ñehua, o'ch yoctape'ch ñeñt' atet pena acheñenesha' ñeñt' ama judioneshayaye, añenesha' ñeñt' ama echenaye Yompor po'ñoñ. Ñetpa' ama't ama echeneto Yompor po'ñoñpa' errotenopa' e'ñe pueyočhretoť poctape'cheñoťetpa' ahuo'tcha' atet pa'yenet ñeñt' e'ñe cohuentetsa Yomporecop, ñeñt' e'ñe atet o' anuaretetua Yompor po'ñoño ñeñt' atet poctetsa ñocop. Ama't ama echeneto Yompor po'ñoñ ñeñt' atet aquellcareťpa' tarraña pueyočhretoña' e'ñe eñoteñet erra'tsent'e' ñeñt' cohuentetsa.

15 Ñeñt' atet pa'yene' ñeñt' cohuentetsa, yapa' yeñoteñ pueyočhretoña eñoteñet ñeñt' atet cohuentetsa, ñeñt'ara ñeñt' atet oten Yompor po'ñoñ ñeñt' o' anaretetua. Ñehua, o'ch yetma'ntacha atet ñerra'mrrate' Yompor po'ñoñpa' e'ñech pueyočhreto aquellcareťtena. Tarro'mar e'ñe ñet pueyočhretoťpa' eñotenet ñerra'm esempopa' o'ch pohuerret ñeñt' ama cohuenayaye, ñaña eñotenet ñerra'm esempopa' o'ch atet penet ñaña ñeñt' e'ñe cohuen.

16 Tarro'mar yeñoteñ esempohuañen Yomporpa' eñotatuerreycha' ñeñt' ora allpon ya'nasotena te'. Yompor Puechemerña ñeñt' Jesucristo ñach otats attoch tsa'tatya. Ñeñt'pa' e'ñe atet ñeñt' o' notuas ñeñt'ara noten allempo neserrpare'ten añ cohuen ñoñets alloch yequeshperra.

Atto judionesha' ama't echenetañ Yompor po'ñoñ patpare'teñoťetpa' nanac ayohuarettenet

17 Te'pa' o'ch alla neserrpare'taterrser ñeñtes judioneshas. Ñehua, sapa' čha soten sapa' judioneshaso' ñaña aña atarr seyemtena ñeñt' nonaseť Moisés, ñaña atarr sommo'chena tarro'mar sapa' soteneñ e'ño' puechemer penes Yompor.

18 Ñaña soteneñ e'ño' señoťueñ ñeñt' atet muenen ña. Ñaña po'ñoñ ñeñt' atet anaretpa' ñeñt'o'ña seyčhatene' ñeñt' atarr cohuentetsa Yomporecop.

19 Ñeñt'o'marña sapa' soteneñ, po'ñočh atarro' es señoťen, attoch seyčhateñ po'potantañ ñeñt' ama es eñoteneto. Cha sottena ñerra'm ñeñteso' echa'nene' ñeñt' ama entetso, amapa' ñerra'm ñeñteso' čhoyo'tam̄pene' ñeñt' chopeñe'chets checmeto.

20 Ñaña sapa' čhate' sotenapañ po'ñočh atarrte' cohuen seyčhateñ po'potantañ ñeñt' ama eñotenaye ñeñt' cohuentetsa, ñeñt' atet petsa ñerra'mrrate' cheshatollesha' ñeñt' ama eñotenana' ñeñt' cohuentetsa. Ñaña sapa' soteneñ po'ñočho' esocmañeno' señoťuahuen, ora ama't allpon ñeñt' po'ñočhotets, tarro'mar sapa' secheññaño' Yompor po'ñoñ ñeñt'o'ña esocmañen señoťatene'.

21 Ñehua, te'pa' o'ch notas, sapa' ama't o' atarr seyčhateñ po'potantañpa' tarraña amaña seyčhatenoña e'ñe sañeña ñeñt' cohuentetsa Yomporecop. Ñaña sapa' ama't o' atarr seserrpare'ten atto ama etanna'tpahuo, tarraña sañapa' chocma setanna'tyena.

22 Ñaña sapa' ama't seserrpareñeñ atto amo' achtapretpahuo taporets, tarraña elloña sapa' chocma sapretannena setapor. Ñaña sapa' ama't set-sena'teneñ ñeñt' ayečhcataret, tarraña sañapa' ahuo't seyorayesña puerahuot ñeñt' atarr cočhnesha' ñeñt' allo arca'tam̄penet ñeñt' po'yoser penet. Ñeñt' atet etetspa' ñeñt'pa'čho'ña attecma enteñ Yompor ama ařapahuoyaye atet.

23 Ñaña sapa' nanac sommo'chena tarro'mar sapa' secheññaño' Yompor po'ñoñ ñeñt' atet anaret ama't ahuaťoteñ. Tarraña ama't atteñpa' amaña

atteye'ña sepeno ñeñt atet oteney añ ñoñets ñeñtcha' atet sepa. Yomporñapa' cha sottatateñ ñerra'mrrate' ñapa' ama es eñotpeno ama't mamesha.

²⁴ Ama't atet oten Yompor po'ñoñ ñeñt atet anuaret ahuatoteñ, ñeñtpa' atet oten: "Ama't ñeñt ama judioneshayayepa' achm̄are'teñet Yompor e'ñe sesharrmorot, e'ñe sepatse'tyeñoñ ñeñt ama't mameshapa' ama pocteye' enteneto ama't ñame'ttseta."

Atto ñeñt po'ñoñ puechemer pen Yompor

²⁵ Po'ñoñña ñerra'm añ semnen o'ch setsoteññañ Moisés po'ñoñ ñeñt atet anuaretpa' añ poctetsañ o'ch setsorrannena, tarro'mar ñeñtpa' sherbeneñ. Tarraña ñerra'm elloña satpare'teññañ po'poñ Moisés po'ñoñ ñeñt atet oteney ñeñtcha' atet yeppa' ama't atto o' sa'tsorrare'tetuapa' ñeñtpa' e'ñe orrena, attecma ñerra'm ama atsorrare'teyayye.

²⁶ Ñeñto'marña yeñoteñ ñaña, ama't ñeñt ama atsorrare'teyayepa' ñerra'm añ atet penet ñeñt atet oteney Yompor po'ñoño'tpa' ama't ama atsorrare'teyayye, Yomporñapa' atetcha' enteney ñerra'm e'ñe puechemer peney po'ñoñ. Attecmach enteney ñerra'mrrate' ñeñt atsorrare't, tarraña e'ñech puechemer perrey po'ñoñ.

²⁷ Ñeñto'marña yeñoteñ ama't ñeñt atta corretsa atet eñalleta, ama atsorrare'teyaye, ñerra'm añ atet penet po'ñoñ ñeñt atet oteney Yompor po'ñoño'tpa' ñetñapa' pencaterrsetcha', tarro'mar ñetpa' ello metanennaset ñeñt allpon cohuen o' sephua Yomporecop. Tarro'mar sapa' satpare'teññañ po'ñoñ ñeñt atet anaret. Metanenset sa, ama't sapa' secheññañeñ Yompor po'ñoñ ahuatoteñ, ñaña ama't sapa' e'ñe atsorruare'teseñ.

²⁸⁻²⁹ Ñeñt e'ñe po'ñoñ puechemer pen Yomporpa' ama ñapfayaye ñeñt eñalletetsa judionesheshot. Añña po'ñoñ e'ñe puechemer pen ñeñt e'ñech cohuen cotape'chenet pueyo'chreto ñocop. Ñaña tsorranneñets e'ñe atta yechsopa' ama esoyaye Yomporecop. Añña sherbets Yomporecop atto cohuen es yoctape'chen e'ñe yeyo'chrot. Ñaña ñeñtpa' huena e'ñe Parets Puecamquëñoñ, ama año'teye' hueno o'ch e'ñe ye'pa'yesua ñeñt aque'llca'yesaret esheccha'ña puechemer perrey Yompor. Ñerra'm atetcha' yoctape'cherr cohuen yeyo'chro Yomporecoppa' attochña Yomporpa' e'ñech pocte' entuerrey, ama'tcha' acheñenesha'pa' ama pocteye' entenyeto.

3

¹ Te'ña sapa' chate' sotenapañ judionesha'pa' amate' atarr sherbeno amapa' chate' sotenapañ ñeñt atto tsorrannenetpa' amate' es sherbeno. Tarraña ñeñtpa' ama atteyaye. Po'ñoñca'ye atarr sherba'yen judionesha'.

² Ñehua, o'ch yot ñanom ñeñt atto sherbenet. Ñetña aparetet Yompor po'ñoñ ñanom atto ñetcha' a'potenet ñeñtara ñoñets.

³⁻⁴ Tarraña ama allohuenacmaye' ame'ñeneto ñeñt atet oteney Yompor po'ñoñoñ. Tarraña ama't atet pohuanenetpa' amate' errotenot a'psateretoña Yompor ñeñt atet oteney po'ñoñoñ, ama't mamesha. Ñapa' chocmach a'poctatuonay po'ñoñ ñeñt atet o' otueney. Ama't allohuen erra'tsen acheñerpa' ama'tcha' ama a'poctatueneto ñeñt atet eñorenepa' tarraña señoche'pa'ch, Yompora e'ñe ñapfa, ama puenesho po'ñoñ. Ama't atet oteney Yompor po'ñoñ ñeñt atet aquellca'huaret ahuatoteñ, ñeñtpa' all atet oteney: Allohuen acheñenesha'pa' eñotetepa'ña atto Yomporpa' ama puenesho po'ñoñ, ñaña ñerra'm esesha' atta otatse'tyets atto Yomporpa' año' pocteye' es peno, tarraña eñochetepa'ña Yomporña e'ñe pocte' es pets.

⁵ Ñeñto'mar napa' o'ch notas, e'ñe ya yepeñoť ñeñť ama cohuenayaye, attoña yorrtateññañ Yompor ñapa' ñaña e'ñe cohuenare' es pa'yets. Ñehua, ñerra'm yo'chñaroť atet yeyenpapreteñ Yompor orrtate' po'cohuenñapa' sañapa' čhate' sotenapañ, Yomporpa' amate' pocteyayeña o'ch tsa'taterrya yo'chñaro'mar. Ñehua, aña' atfa notenes atet tarro'mar ñeñťpa' atet eñosatse'tyen acheñenesha'.

⁶ Po'ñočh yeñoteñ e'ñe pocte' atetcha' tsa'taterrya Yompor. Tarro'mar ñerra'm ama pocteyaye ñeñť atet pena Yomporpa' ñeñťepñapa' amate'cho' erroteno eñoteñe ñaña atetcha' entyesuerrey allohueney esempohuañen.

⁷ Ñaña yaña ñerra'm esempo yeñosatse'tyen es ñeñť ama atteyayepa' attoña yorrtateññañ Yompor ñapa' ñaña e'ñe po'ñočhare' ñeñť atet es otyen. Ama't e'ñe yeñosatse'teñoťpa' nanaccha' yecohuentateññañ Yompor. Ñehua, ñato' sapa' čhate' atet soten, ñerra'm atet yeyenpapreteñ orrtate' Yompor po'cohuenña, amate' pocteyayeña o'ch attera enteney Yompor ñerra'm ñeñťey atarr sosey es pa'yets.

⁸ Sapa' aña sotatse'tyen, ama'tpa' ařapo'ch ñeñť ama cohuentetsonña allochñapa' e'ñe attoťpa' o'ch yorrtaten ñeñť cohuentetsa. Puesheña'tets acheñ e'ñe pueyllatase'teñme'chatset neñoñpa' otyenet, ñeñťñačo' atarr otenña Pablo. Tarraña Yomporcha'ña tsa'taterrahuet ñeñť atet otatse'tyenet. Ñaña ñeñťpa' e'ñe pocte' atsa'tatareťterreťpa'chña.

Atto allohueney ñeñťey acheñey čhocma ochñaťecmay

⁹ Ñehua, sapa' čhate' sotenapañ yapa' po'ñočhte' Yomporpa' enteney ñeñťey judioneshay e'ñe cohuenare' es yeřa'yen. Ñaña čhate' sotenapañ po'potantañ ñeñť ama judioneshayayepa' ñetñapa' amo' atteye' entenaneto Yompor. Tarraña ama't mameshapa' ama atteyaye. Tarro'mar napa' o' neñotatuanmas atto ama't allohueney ñeñťey acheñey čhocma ochñaťecmay ama't ñeñťey judioneshay. Ama't ñaña ñeñť ama judioneshayayepa' e'ñe attecmay ochñaťecmay.

¹⁰ Ama't Yompor po'ñoñ ñeñť atet aquellca'huareť ahuaťoteñpa' e'ñe attecma oteney, ñeñťpa' atet oten:

Ama't puesheñarroťeyapa' ama eñallyeña ñeñťey e'ñe pocte' pene' ñeñť poctetsa Yomporecop.

¹¹ Ñaña ama't puesheñarroťeya ama čhennayo yeyočhro attoch yeñotoñ Yompor po'cohuenña. Amachña añeye' ye'nen ñeñť atet muenen Yompor, ama't puesheñarroťeya.

¹² Ama't allohueney ahuo't yesa'neñ Yompor, ama't mamesha o'huañ yesherđa' ñocop, ama't allohueney. Ama't puesheñarroťeya ama eñallyeña ñeñťey e'ñe cohuen es pets Yomporecop.

¹³ Atto e'ñe ya yeñosatse'teñoť sosya'tsañečno yeñyařñapa' čha ottena ñerra'mrrate' apampaña ñeñť atoramřsareť. Atto yeñen yenamotpa' nanaccha' yeshcannena. Atto yeshquēñ yamo'ts yenamotpa' čhach yottena ñerra'mrrate' shecheř amtsañeř atserr yepene' puenamoť.

¹⁴ Ñaña ñetpa' añach eñotenet parrnomarña, ñaña čhach chemama'tannenet.

¹⁵ Ñaña pa'tsrre'mueñoťetpa' machayoťach muetseñet acheñ.

¹⁶ Pottatse'teñoťetpa' čhach nanac mueročhtatyēnet acheñenesha', nanaccha' llecatyēnet.

¹⁷ Ama't ahuaťoteñpa' ama añeye' yečheneto attoch e'ñe muetsoññeñoťpa' cohuen yemtannenet.

18 Ñaña ama't mameshapa' amach am'cha'na'tpahuoye' enteñeto Yompor. Arrpa' allohua ñeñt notenes e'ñe Yompor po'ñoñoñ ñeñt atet aque-llca'huaret ahuatoteñ.

19 Ñaña yapa' yeñoteñ ñeñt atet otyen Yompor po'ñoñ ñeñt aquellca'huaret ahuatoteñpa' añecopña oten ñeñt echene' po'ñoñ, amaña añecpayaye ñeñt ama echaye'te po'ñoñ allempo. (Atet ñerra'm judionesha'pa' ama't ahuatoteñ echeññañet Yompor po'ñoñ, ñeñtara ñoñets ñeñt o' notuanmas ñorra' arr.) Ñeñto'marña ama't puesheñarrotesa sa ama't ñeñtes judioneshaspa' amate' errotenot soto, sapa' e'ño' cohuen entenes Yompor. Attoña yeñoteñ ama't allohueney ñeñtey corretsa añe patsropa' ama pocteye' entenye Yompor ñeñt atet yeña'yena.

20 Tarro'mar yeñoteñ e'ñe yetsotateñoña añ ñoñets ñeñt atet anaret ahuatoteñpa' amach errotenot ama't puesheñarroteya e'ñe ya'pocatoña yañeña attoch e'ñe pocte' enteney Yompor. Añecpaña sherbeney añ ñoñets ñeñt atet anaret, ñeñtcha' yeñotatene' po'ñoñch yapa' nanac ochñañ enteney Yompor.

Atto Yomporpa' e'ñech pocte' entuency, e'ñe yeyemteñoña Jesucristo

21 Tarraña te'ña Yomporpa' o' eñotatay atto ellonetpa' eñall po'poñ attoch pocte' entuency Yompor, ñeñtpa' ama añeyaye o'ch yetsotatuen ora ñoñets ñeñt atet anaret ahuatoteñ. Tarraña Yompor po'ñoñ ñeñt anuaret ama't ahuatoteñpa' ñeñtarecpa eñen añecop.

22 Attochña Yomporpa' e'ñech pocte' entenanet ama't allohuen erra'tsencha' yemtenaya Puechemer ñeñtara Jesucristo. Ama't allohueney attecnoch e'ñe pocte' entuency, e'ñe yeyemteñoña Jesucristo.

23 Tarro'mar allohueney attecnoch e'ñe yo'chña'tuen. Ama yetsoteññañe Yompor po'cohuenña ñeñt e'ñe atet muenen ña.

24 Ñeñt attoch e'ñe pocte' enteney Yomporpa' ñeñtpa' atet: E'ñe puemuereñoñey ahuo't apuey Puechemer ñeñt Cristo Jesús atto ñachña e'ñe yetsa'tuoya allohuen yo'chñar. Ñeñtpa' e'ñe atta apuey Yompor, ama eso yetsa'teño ama't coñe'ta.

25 Ñaña Yomporpa' ahuo't orrtatan Puechemer Cristo ñeñtcha' rromosets añe patsro, o'ch ashataretta po'rras e'ñe yocop. Allochña'pa' e'ñech e'shohuaretterra yo'chñar ñerra'm yeyemterach ña. Ñaña ahuo't atet pa Yompor attoch yeñoñ, ñapa' e'ñe pocte' atet pe't ahuañ, tarro'mar acheñenesha' ñeñt corratset ahuañpa' Yomporpa' atta ahuantenanet po'chñar, ama ahuenaye' atsa'tatarettuerreto po'chñaret. (Tarro'mar ñapa' e'ñe eñoteñ, Cristochña tsa'tuerrahuet po'chñaret ñamet ñeñt allpon ame'ñaye't ña ahuañ.)

26 Ñaña ahuo't atet pa Yompor allochña'pa' attoch yeñoñ ñapa' e'ñe pocte' atet pena; teme'ttsen attochña e'ñech pocte' enteney e'ñe yeyemteñoñ Jesús.

Atto e'ñe yeña'yeñoña yañeña ñeñt cohuen yenten ya, Yomporña'pa' amach cohuenaye' entenye

27 Ñehua, atto e'ñe yeyemteñoña Cristo Yomporña'pa' e'ñech pocte' enteney, ñeñto'marña o'huañcha' eñalleta ñeñt allo yommo'chena e'ñe yañeña, ñeñt e'ñe yetsotateñoñ. Tarro'mar e'ñe yeña'yeñoña yañeña ñeñt e'ñe cohuen yenten ya, Yomporña'pa' amach pocteye' entenye.

28 Ñeñto'marña te'pa' e'ñe po'ñoñch yeñoteñ e'ñe yeyemteñoña Cristopa' e'ñech pocte' enteney Yompor ama't ama yetsoteno ñoñets ñeñt atet anaret ahuatoteñ.

29 Ñehua, o'ch noterrser masheñnesha judioneshacha', ñato' sapa' chate' sotenapañ Yomporpa' saptate' Seyomporer sepeñ ñeñtes judioneshas, amate'ña añecpa'nayaye ñeñt ama judioneshayaye. Tarraña napa' o'ch notas, ama't ñeñt ama judioneshayayepa' ñetpa'cho'ña Po'yomporer peñet.

30 Tarro'mar e'ñe patrra Yompor. Ñaña ama't erra'tsena judionesha' ñeñtcha' ame'ñerraya Cristopa' Yomporñapa' e'ñech pocte' entenanet. Ñaña attecma ama't erra'tsena ñeñt ama judioneshayaye ñeñtcha' yemterrera Cristo, ñetpa'cho'ña e'ñech pocte' entenanet Yompor.

31 Ñato' sa te'pa' chate' sotenapañ yeyemteñoñ Cristo, te'pa' Yompor po'ñoñ ñeñt atet anaret ahuatoteña' o'ch yehuapore'ch, o'huañcha' sherba'y. Tarraña o'ch notas, elloña attoña e'ñe yeñoten, ñeñto'marña Yompor po'ñoña' atarr sherbeney.

4

Atto Yompor ahuatpa' e'ñe pocte' entane't Abraham

1-2 Ñehua, te'pa' o'ch neyerpatasa ñeñt atet pe't ahuañ yatañ Abraham. Ñapa' ama añoñeye' pocte' eñche'teña Yompor e'ñe ñañeña puetsotateñoñ ñeñt cohuen ente't ña. Ñeñto'mar yatañ Abrahampa' ama eñalle ama't mamesha attoch ommo'chena ama't Yomporesho.

3 Tarro'mar yeñoteñ ñeñt atet oten Yompor po'ñoñ ñeñt aquellca'huaret ahuatoteñ. Ñeñtpa' atet oten: "Abrahampa' e'ñe atta yemtane't ñeñt atet oche't Yompor, ñeñto'mar allempoteñña Yomporpa' e'ñe pocte' eñche't e'ñe atta."

4-5 Ñeñto'marña yeñoteñ yapa'cho'ña ama añoñeye' e'ñe pocte' enteney Yompor e'ñe yetorreñoñ ñeñt cohuen yenten yañeña. Añoñcha'ña e'ñech pocte' enteney Yompor e'ñe atta, ñerra'm esempo yapa' o'ch e'ñe yeyemtera ñeñt atet oteney; allochñapa' attoch e'ñech pocte' entueney ya ñeñtey ochñañey. Tarro'mar e'ñe pocte' enteney e'ñe atta, ama es yetorreñoñeye' ñeñt cohuen yenten yañeña. Ñehua, ñato' o'ch yetma'ntacha atet. Ñerra'm esempo yetaruasen yepatronaresho, ñerra'm allempoch tsa'tyet yetaruaso'tpa' ama yoteno e'ñe atta apuenyet quelle, yetaruaso'tña tsa'tenyet. Tarraña attoch pocte' enterrey Yomporpa' ama atteyaye. Ñapa' e'ñe atta pocte' enteney, ama e'ñe ya yetorreñoñeye' ñeñt cohuen yenten ya attoch pocte' enteney Yompor.

6 Ñaña ama't yatañ Davidpa' ñeñtcepaña eñose't ahuañ. Ñapa' atet ote't nanac cosheñtso'tseney ñeñtey e'ñe pocte' enteney Yompor e'ñe atta, ñeñtpa' ama añoñeyaye o'ch es cohuen ye'pa'yes e'ñe yañeña.

7 Ñeñtpa' atet ote't David:

Nanac cosheñtso'tseney ñeñtey o' a'pretna'huareterra yo'chñar, ñeñtey amach allo'na yerpuernaye'te Yompor yo'chñar.

8 Ñaña nanac cosheñtso'tseney ñeñtey Yomporpa' amach allo'na otteñe'chnenye yo'chñaro'mar. Arrpa' allohua ñeñt atet ot ahuañ yatañ David.

9 Ñaña añ cosheñetspa' yeñoteñ ama ñapñecpayaya ñeñt judioneshacop ñeñtara ñeñt atsorraretnesha'. Añoñpa'ñaña ñeñt ama judioneshayaye ñeñt ama atsorrareteyayeto. Ñehua, ñeñtpa' attotña yeñoteñ. O' notuanmas atto Abrahampa' e'ñe atta yemtane't ñeñt atet oche't Yompor, ñeñto'marña Yomporpa' e'ñe pocte' eñche't e'ñe atta.

¹⁰ Ñehua, te'pa' o'ch yoctape'ch allempo Yomporpa' e'ñe pocte' entane't Abrahampa' allempo Abrahampa' ama atsorrare'ttena', tarro'mar allem-popa' ama orrtena' atfeñats.

¹¹ Tarraña elloñapa' ahua't tsorratena Abraham; ñeñtpa' ñeñtcha' eñotaterrahuet po'ñoçh Yomporpa' o' pocte' entenan Abraham e'ñe pueyemteño'ta, ama't allempo ama atsorrare'ttena'. Ñeñto'marña atef pa' ahua't attoch pompor pohueret ama't ñaña allohuenet ñeñt ama atsorrare'teyaye; tarraña ama't ama atsorrare'teyayeto, e'ñe pueyemteño'teta Yomporpa' e'ñech pocte' entenanet e'ñe atfa.

¹² Ñaña ñeñto'mar atef pa' attoch pompor pohuer allohuen ñeñt atsor-rare't, tarraña añach ñapue't pompor perre' ñeñt po'ñoçh yemtenaya Yompor. Tarro'mar ama añecpaye' pompor peñeto atto atsorrare'ttenet, añecopña pompor peñet e'ñe pueyemteño'teta Yompor ñeñt e'ñe atef pete't pompor et Abraham, ama't allempo ama atsorrare'ttena'.

¹³ Yapa' yeñoteñ ahua't Yomporpa' ahua't otan Abraham o'ch apuer er-racmañen pats allohuen puechemereshohuen esempohuañen. Ñaña atef otan Yompor Abrahampa' ama puetsotateño'teye' añ ñoñets ñeñt atef anaret ocheña Yompor. Añña e'ñe pueyemteño'ta Yompor atef och, tarro'mar Yomporpa' e'ñe pocte' eñch.

¹⁴ Ñerra'm po'ñoçh yetsotateño'ta añ ñoñets ñeñt atef anaret aphuerryeñ añ patspa' yapa' e'ñe'te' orrena yeyemteñañ Yompor; tarro'mar ñerra'm atfeñpa' Yomporpa' amate' a'pocatanñeña po'ñoñ ñeñt atef otan ahua't Abraham.

¹⁵ Ñaña ñerra'm añ yocten añ ñoñets ñeñt atef anare'tpa' nanaccha' a'coñchatare'tey ñerra'm ama yetsotueno ora allpon ñoñets. Ñaña ñerra'm ama eñallñe añ ñoñets ñeñt atef anare'tpa' amate' errotent coñchatyeto tarro'mar amate' eñallñe ñoñets ñeñtcha' ya'pote' ñeñt ochñartsotets.

Attoch a'naterrya Yomporpa' ñeñtpa' e'ñech yeyemteño'ta ña

¹⁶ Ñeñto'marña yeñoteñ attoch a'naterrya Yompor ñeñt atef otahuapa' ñeñt po'ñoçhpa' e'ñech yeyemteño'ta ña attochña e'ñe puemuereno'tey e'ñech a'natuerrya allohueney. Amach ñap'tayaya judionesha' ñeñt cotene' añ ñoñtsor ñeñt atef anaret, añecpa'naña allohueney ñeñteycha' yemterraya Yompor e'ñe atfecoptar atef pe't ahua't yatañ Abraham. Tarro'mar ñapa' po'ñoçh yatañ yepen allohueney.

¹⁷ Ama't Yompor po'ñoño ñeñt atef anuaret ahua'toteñpa' all orrtena ñeñt atef Yomporpa' otan ahua't Abraham, ñeñtpa' atef oche't: "Shonte' pa'namen acheñpa' ñetñapa' pomporcha' pohuerrpet. Añpa' e'ñe na atef o' nepona'p." Ñeñto'mar yeñoteñ Abraham e'ñe pueyemteño't Yomporpa' atef eñche't Yompor ñapa' pomporcha' per shonte' pa'namen acheñ. Ñeñtñapa' ñeñtara Yompor ñeñt nanac ahua'mencat ñeñt eñotene' o'ch tantaterran ama't ñeñt rromuets, ñaña ñeñt eñotene' e'ñe po'ñoño'tpa' o'ch orrtatan ama't ñeñt ama eñalle te'.

¹⁸⁻¹⁹ Allempo Yomporpa' atef otan Abraham "peshotpa' merenach shonte' pa'namen acheñ ñeñtcha' pomporterraya" allempo Abrahampa' o' nanac po'nme'ten—charroch charra' charte' echen. Tarraña Abrahampa' ama't eñotena o' nanac po'nme'ten, o' meten allempo attoch chemere'ten, ñaña pue'tapor Sarapa'cho'ña o' nanac po'nme'ten, amate' errotent cheyore'terro, tarraña Abrahampa' ama que'chpuenano atto yemtenana ñeñt atef otue Yompor. E'ñe pueyemteño't Yomporpa' allo'na sen cohuene' Yompor o'ch a'p ama't pa'trra puechemer.

20 Ama echarrteno pueyoöchro ama't mamesha añecop ñeñt atet o' otue Yompor. Allo'na sen yemuetnomaya Yompor ñeñt nanac ahuaamencat pene'. E'ñe pueyemteñoñan Yompor, ñapa' chocmach otaþsa'tyesanete't Yomporpa' ñapfa atarr ahuaamencat.

21 Tarro'mar eñochet e'ñe Yompor po'huamenco't, po'ñoçhpa' o'ch aþ ama't patrra puechemer ñeñt atet o' otue.

22 Ñeñto'marña Abraham e'ñe pueyemteñoñan Yompor Yomporña' e'ñe pocte' eñche't.

23 Tarraña añ ñoñetspa' ama ñaptecpayaye Abrahamacop anarete'.

24-25 Yocpa'naña anarette't allohueney ñeñtey yemtenaya Yompor, atto ñapa' a'rroyonay Puechemer ñeñt Jesús ñeñtcha' rromats e'ñe ya yo'chñarecop, ñeñtara Jesús ñeñt Yepartseshar yepen, ñaña atto Yomporpa' tantaterran Puechemer po'rromño't, attoch yeñoch yo'chñarpa' o' e'ñe atsa'taretetua. Ñeñto'marña te'pa' e'ñe yeyemteñoñ Yompor ñeñt atto a'pocatonay, yapa'cho'ña e'ñech pocte' enteney yaña.

5

Atto e'ñe yeyemteñoñ Yompor, e'ñech pocte' enteney, atarrcha' cosheñtso'tseney

1 Ñeñto'marña te'pa' yeñoteñ e'ñe yeyemteñoña Jesucristo, Yomporña' e'ñe pocte' enteney, o'huañcha' yoroçheno'tseney Yomporesho't, tarro'mar Yepartseshar Jesucristopa' ahuo't a'pocatuerrnay yo'chñar Yomporesho'.

2 E'ñe attoña Cristopa' chapaterrey Yompor puemuereño attoch chocma bensare'tampeney; ñeñtapa' e'ñe yeyemteñoñ Cristo. Ñaña yapa' e'ñech yocsheñsha' yecueñ esempohuañencha' e'ñe pocacma yecohuentapretera Yompor.

3 Ñaña ama't yemueroçhteñoñ o'ch yocshena tarro'mar yeñoteñ e'ñe yemueroçhteñoñpa' allempoña yocape'chen attoch ahuaamencat þa'y Yompor attochña ya'huanten allohuen ñeñt echarr yentyen.

4 Ñaña attoña ya'huanten allohuen ñeñt echarr yentyenpa' yapa' yeñoteñ Yomporña' e'ñech cohuen entuerrey. Ñaña ñerra'm yeñoteñ Yomporpa' e'ñe cohuen enterrey, yapa' e'ñe yeyemteñoñ o'ch yecuerr ñeñt o'patatenya Yompor.

5 Ñaña e'ñe yecueñoñ ñeñt o'patatenya Yompor ñapa' chocmach a'pocatenan po'ñoñ ñeñt atet oten yocop. Yapa' ama't esempapa' amach es ye'naterraye'te po'poñ, tarro'mar Yomporpa' ahuo't apuey Puecamquëñ ñeñtcha' yeçhetsa yeyoöchro ñeñtcha'ña yeñotatene' atto Yomporpa' nanac morrentenya.

6 Yapa' yeñoteñ nanac morrentenya Yompor tarro'mar ahuatpa' ama es yocape'chpeno ama't mamesha Yomporecop attoch yequeshperrañ. Tarraña Yomporña' e'ñe allempocmapa' ahuo't mueñan Puechemer Cristo añe patsro ñeñtcha' rromosets e'ñe yocop ñeñtey ama es cotape'chetso cohuen ama't mamesha Yomporecop.

7 Ñehua, yapa' arromña'teypa' yeñoteñ atarr torrapo' attoch yerroma po'psheñecop, ama't añ acheñrecop ñeñt atarr cohuen. Tarraña errotenopa' ama tama torrapahuoye' yenteno o'ch yerroma añ acheñrecop ñeñt atarr amueraña.

8 Tarraña yapa' ama't allempo ora yeþatse'tyen sosya'tsañpa' e'ñe allem-pocmaña Cristopa' ahuo't rroma yocop. Attoña Yomporpa' eñotaterrey yapa' nanac morrentenya.

9 Ñeñto'marña te'pa' e'ñe pocte' enteney Yompor tarro'mar Cristopa' ahuo't rroma yocop. Elloña attotña a'queshpatey allochñapa' amach a'coñchatareñeye ama't errponaña.

10 Ama't allempo ora ye'moñe'teñ Yomporpa' Puechemerña po'rromñoŕpa' ahuo't e'ñe yamo'tstannerra epay Pompor. Elloña te'pa' atto correna Cristopa' attotña yapa'cho'ña a'queshpaterreycha'.

11 Elloña te'pa' e'ñe yocsheña Yompor tarro'mar Puechemer ñeñtara Yepartseshar Jesucristopa' ahuo't amo'tstatterya e'ñe ña Pompor.

Atto yamo'mte' Adánpa' ñapa' cha a'chencatey; Yamo'mte'ña Cristopa' ñaña ya'queshpaterre'

12 Ahuat puesheñarr yacma ñeñt pa'so'cheñ Adánpa' ahuo't orrtatan atpare'teñets añe patsro Yomporecop. Ñeñto'marña allempoteñ allohueney ñeñtey acheñeypa' e'ñe attecma yeŕohua. Ñaña allempopa' ahuo't anare'tta attoch yo'chñaroŕpa' o'ch yerroma. Ñeñto'marña allohueney ñeñtey acheñeypa' o'patuaya rromueñets tarro'mar allohueneypa' ñeñta yeñot ñeñt atet pa' ñanom yamo'mte' Adán.

13 Ñaña allempoteñ corre't Adán, acheñenesha' arr patsropa' ñeñta eñotet ñeñt atet atpare'tan Adán Yompor. Tarraña allempopa' ama eñalletena' ñoñets ñeñt atet anare't alloch a'coñchatare'tterret.

14 Tarraña attera o'patenanet rromueñets e'ñe allempoteñ corre't Adán ñeñta attera ñaña tarrempohua allempo corre't ñaña Moisés ñeñt nahuet ñoñets. Ama't ama atpare'teññañeto Yompor po'ñoñ e'ñe atet atpare'te't Adán, tarraña attera o'patenanet rromueñets. (Ñeñto'mar yeñoteñ Adán po'chñaroŕpa' ahuo't anare'tta attoch o'patuaya allohueney rromueñets.) Ñeñtña yamo'mte' Adánpa' ña o'patatuaya ñeñt ama cohuenayaye, tarraña Yamo'mte'ña Cristopa' allempo huapapa' ñapa' añña o'patatosya ñeñt e'ñe cohuenare'.

15 Tarro'mar e'ñe patparñesharmorot Adánpa' ama atteyaye ñerra'm ñeñt atet atarr muerenya Cristo. Tarro'mar e'ñe puesheñarra po'chñaroŕ o'patya rromueñets allohueney pa'namen acheñey. Tarraña elloñapa' eñall po'psheñeñ, ñeñtara Jesucristo ñeñt yemuererraya. Attoña Yomporpa' orrtatonay puemuerena yocop alloña nanac cohuen es apatuene y e'ñe atta allohueney pa'namen ñeñtey acheñey.

16 Ñaña ñeñt atet muererrya Yompor, ñeñtapa' ama atteyaye ñerra'm ñeñt atet o'patuaya ochñarets ama't e'ñe puesheñarroŕa. Tarro'mar ñeñt atet pa' Adán ama't parrochapa' ñeñtña yo'patatuenaya coñcheñets. Tarraña ñeñt atet a'queshpaterrey Yomporpa' ñeñtapa' atet pa'. Ama't shonteñ yo'chñarpa' ñaña' e'ñech pocte' enteney e'ñe atta tarro'mar ñeñtapa' o' a'pocatuonay Cristo.

17 Ñaña atto e'ñe puesheñarroŕa po'chñaroŕ o'patenya rromueñets, tarraña elloña nanac muererrya Yompor attotña a'rroyerrnay Puechemer ñeñtara Jesucristo ñeñt o' a'pocatuerrnay yo'chñar Yomporesho attochña yapa' corretsayach.

18 Ñeñto'marña yeñoteñ atto e'ñe puesheñarroŕa po'chñaroŕ ahuo't o'patatyet coñcheñets, attecma ñaña puesheñarr ñeñt Jesucristopa' ahuo't ŕohua ñeñt e'ñe cohuen, alloña a'pocaterrey, attochña yapa' corretsayach yocsheñeshocmañen tayoteñ errponohuañen.

19 Atto e'ñe puesheñarra ñeñt Adán ñeñt atpare'tene' Yompor, ñeñto'marña ñesharmorot Yomporña' e'ñe ochñaŕoche' entuene y ama't shonte' pa'namena'ttsocmay ñeñtey acheñey. Tarraña puesheñarr ñeñt Cristo

ñeñt e'ñe cohuen ame'ñenaya Yompor, ñeñtñapa' alloch e'ñe pocte' enteney Yompor, ama't shontey pa'namena'ttsocmay ñeñtey acheñey.

²⁰ Ñaña allempo chap allempoch anareta ñoñets ñeñtcha' eñotaterrahuet ñeñtcha' atet pet ñaña ñeñtcha' ama atet aþapahuo elloña allempopa' ñetpa' o' eñoterret atarr atparña'tterret. Tarraña ama't atto nanac yatpare'tena elloña Yomporpa' nanac muererrya.

²¹ Attoña e'ñe yeþatse'tyeñoñ ñeñt ama cohuenayayepa' ahuo't anareta rromueñets ñeñtcha' yo'patenaya ñeñtñapa' coñcheñets. Tarraña elloña Jesucristo ñeñt Yepartseshar yepen ahuo't orrtatonay atto Yomporpa' nanac muererrya attoña a'pocatuerrnay yo'chñar. Attochña yapa' corretsayach yocsheñeshocmañen tayoteñ errponohuañen.

6

Atto ñeñt toma'ntena allempo yapatareta Cristocop

¹ Te'pa' e'ñe yeñoteñ ama't atet yeþatse'tyese't ñeñt ama cohuenayaye, Yomporpa' elloña nanac muererrya, atto peretna'huerrnay yo'chñar. Tarraña ama't atteñpa' amach yotaþsa'tatsto "ñeñtepñapa' o'ch allo'na yeþatse'tyesnena ñeñt sosya'tsañ tarro'mar Yomporpa' nanquëpa't muerenana ñeñt þatse'tyene' ñeñt ama cohuenayaye ñaña ellopa' o'chcho' alla muererrya."

² Tarraña amach errotenoñ allo'na yeseno þatse'tyesnomue' ñeñt ama cohuenayaye tarro'mar o' ya'ypo'ñerr yo'chñar allempoteñ o' yaguër Cristo.

³ Ama't señoñeña ñeñt toma'ntena allempo yapatareta Cristocop. Añ toma'ntena atto o' yeparrocmaterr epay Cristo, atet ñerra'mrrate' cho yerromapreteña Cristo allohueney ñeñtey apatarettetsa e'ñe yame'ñeñoñ Cristo Jesús.

⁴ Allempo yapatarettapa' e'ñe atet ñerra'mrrate' cho yerromapreteña Cristo ñaña atet ñerra'm cho yepampapreteña Cristo. Allempoña Yomporpa' ahuo't tantaterran Puechemer e'ñe po'huamencoñ ñeñt atarr cohuen, yapa'cho'ña ñeñtara po'huamencaroñña e'ñe cohuen o' etserrataterrnay yoctapña, ñeñtcha' atet yocrrena.

⁵ Tarro'mar e'ñe yeparrocmateñoñ epay Cristo o' yerromaprecha. (Attochña ya'ypo'ñerr ñeñt ama cohuenaye' entapretenye Cristo.) Ñaña ñerra'm yerromapreteña Cristo yeñoteñ o' yetantapretera attochña yocrrera e'ñe cohuen ñocop.

⁶ Tarro'mar yeñoteñ ñeñtey acheñey ñeñt yeyoçhro'tsen ñeñt yoctape'chataye't sosya'tsañ ahuañ ñeñtapa' o' a'mchechataretetuerra atet ñerra'mrrate' acorso'tamþsaretta epuet Cristo. Attochña o'huañcha' coñape'chatse'tatnened yo'chñarañeña. Amach allo'na taruasatnened yo'chñar.

⁷ Nato' o'ch yetma'ntacha atet pena arromñañ. Ñehua, yapa' yeñoteñ ñerra'm esesha' rromatspa' amach errotenoñ allo'na coñape'chyesnenano sosya'tsañ. Yapa'cho'ña atetcha' yentena ñerra'mrrate' cho yerromuen, amach errotenoñ allo'na yoctape'chyesneno ñeñt sosya'tsañ enten Yompor.

⁸ Ñaña atto o' yerromaprecha Cristo, yapa' yeñoteñ ñaña e'ñe yeparrocmateñoñ Cristopa' alloña corretsayach, atet pena ñapa' e'ñe corretsa.

⁹ Tarro'mar yapa' yeñoteñ Cristopa' o' tanterra po'rromñoñ, amach alla rromuerre'te. Amach errotenoñ alla o'patere'te rromueñets.

¹⁰ Tarro'mar ñapa' atto rroma yo'chñarecoppa' ñeñtapa' e'ñe parrocha rroma ama't allohuenacop. Ñaña atto correna te' ñeñtapa' e'ñe ora Pomporecpa.

11 Yapa'cho'ña attecmuepa'ch yentena yaña yañeña. E'ñe yerromapreteñoŋ Cristo Jesúspa' o'ch ya'ypo'ñerr yo'chñar ñeñto'marña amach errotenoŋ alla taruasaterryerro yo'chñar. Ñaña te'pa' e'ñe yeparrocmateñoŋ Yepartseshar Cristopa' o'ch yocrraprecha e'ñe cohuen Yomporecop.

Attoch amach semnatatsche so'chñar o'ch alla taruasaterrnaserr sa'rromñatechets

12 Ñeñto'marña te'pa' o'ch notas, amach semnatatsche so'chñarpa' o'ch alla taruasaterrnaserr sa'rromñatechets. Allochñapa' amach allo'na seŋatse'tyesneno ñeñŋ atet muenatse'tatyenes sechets.

13 Amach semnatatsche sechets o'ch aña torrena ñeñŋ ama cohuenaye' enteno Yompor. Añcha'ña o'ch saphuer Yompor sechets allochñapa' ñachña torratenaya añecop ñeñŋ e'ñe cohuen enten ña. Ñato' o'ch yetma'ntacha atet ñerra'mrrate' cho yerrromuen tarraña te'pa' o'ch alla yocrrerra cohuen Yomporecop.

14 Tarro'mar te'pa' amach errotenoŋ allo'na taruasatnenye yo'chñar, tarro'mar te'pa' añ yeyemtena Yompor atto muerenyapa' ahuo't a'pocatonay yo'chñar. Ama aÑeye' yeyemteno ñoñets ñeñŋ atet anaret ñeñŋcha' atet yeŋohua esheccha' cohuen enteney Yompor.

15 Te'pa' yeñoteñ ama aÑeye' yeyemteno ñoñets ñeñŋ atet anaret. Añña yeyemtena Yompor puemuereñoŋ e'ñe yenpueney. Tarraña ama't atteña' ama pocteyaye o'ch allo'na yesen ŋatse'tyerrayerr ñeñŋ ama cohuenaye' enteno Yompor ama't mamesha.

16 Ñato' o'ch yetma'ntacha atet. Ñehua, yapa' yeñoteñ ñerra'm esesha' yemnen ñeñŋcha' yetaruasatene' aÑe patsro, ñeñŋpa' po'ñoŋ ñeñŋcha' yepatronar yepen, ñaña e'ñech pauner yentatena attochña ñeñŋach yame'ñena ñeñŋ yepatronar yepen. Ñaña attec mach yepena ñerra'm añ yemnen yo'chñarach yetaruasatene', tarraña ñerra'm añ yetaruasatene' yo'chñarpa' ñeñŋpa' tsa'taterryach rromueñtso ñeñŋara coñcheñtso. Tarraña ñerra'm añ yame'ñena Yompor ñeñŋ atet oteney po'ñoñoŋ, ñeñŋpa' alloch yorrtatyen e'ñe cohuen ñeñŋ e'ñe atet muenen ña.

17 Ñaña sapa' ahuatpa' aña setaruasataye't so'chñar, tarraña te'ñapa' e'ñe seyoŋhrocmañen o' same'ñera ora ñeñŋ atet pena Yompor pa'poteñ ñeñŋara ñeñŋ serrpare'tatase't. Ñeñto'marña te'pa' napa' atarr nocshena, atarr neparasyoso'teñ Yompor socop.

18 Ñaña te'pa' o'huañcha' taruasaterrnserr so'chñar. Añcha'ña setaruasaterre' Yompor erra'tsente' muenen ña.

19 Ñehua, Yompor pocŋaŋñoŋpa' atet netma'ntatensa atto yocrrena acheñey arr patsro allochñapa' cohuencha' çhaponasa seyoŋhro Yompor pocŋaŋña. Ñeñŋ notenes po'ñoŋhpa' ñeñŋpa' atet sepe't ahuat e'ñe pocŋe' sente't e'ñe ora sechtsohuen allo'na sete't ŋatse'tnomue' sosya'tsañ ñeñŋ ama cohuenaye' enteno Yompor. Te'pa'cho'ña attecmuepa'ch e'ñe pocŋe' senteñ ora sechtsohuen o'ch sepomuerra Yomporecop, allochñapa' attoch sa'cohuentataretterra e'ñe cohuen Partsocop ñeñŋ e'ñe atet muenen ña.

20 Ñehua, ahuat allempo aña setaruasataye't so'chñarpa' ama aÑeye' soctape'che'te ñeñŋ e'ñe cohuen enten Yompor.

21 Tarraña ñeñŋ atet seŋatse'tyese't sosya'tsañ ahuatpa' ama es sherbase'te ama't mamesha, ñeñŋara ama't te'pa' pencna'ntatenes. Yapa' yeñoteñ ñeñŋpa' allach tsa'taterryañ rromueñtso, ñeñŋara coñcheñtso.

22 Tarraña te'pa' o'huañcha' alla taruasaterryerr yo'chñar. Añcha'ña yetorratene' Yompor po'taruas attoch yesherbeñ. Allochñapa' ñach

yetsa'tenaya alloch ya'cohuentataretterra e'ñe cohuen ñocop aña patsro. Allochñapa' attochña aphuerrey allochña yapa' corretsayach yocsheñeshocmañen ñayoteñ errponañohuen.

²³ Tarro'mar yo'chñarpa' allach tsa'taterrya rromueñtso, ñeñtara coñcheñtso. Tarraña e'ñe yeparrocmateñoť epay Yepartseshar Cristo Jesúsapa' Yomporñapa' aphuerreycha' e'ñe atta allochña yapa' corretsayach yocsheñeshocmañen ñayoteñ errponañohuen.

7

Atto o'huañ amcha'nochtana'tenya añ ñoñets ñeñť atet anaret ahuat Moiséseshoť

¹ Te'pa' o'ch masheñeshacha' ñaña nochaneshacha' netma'ntatasa po'poñ coťapñats. Ñehua, sapa' o' e'ñe señoťueñ atet pena ñoñets ñeñť atet anaret arr patsro ñeñťcha' atet yepena. Sapa' señoťen añ ñoñetspa' sherben tarremphuach allempo yocrrena aña patsro. Tarraña ñerra'm esempo yerromapa' añ ñoñetspa' amach errotenoť allo'na yame'ña'neño. O'huañcha' yame'ñeña.

²⁻³ Atet ñerra'mrrate' ñeñť oteney paterr ñoñets ñeñť atet anaret. Ñeñťpa' atet oteney: Coyanasha' arrollare'tañpa' amach satstano puerrollar allempo correna aña patsro. Ñaña ñerra'm allempo correna puerrollar, ñerra'm o'ch yorer po'psheñeñ ñeñťcha' puerrollar perrpa' ñeñťpa' ama pocteyaye tarro'mar ñeñťpa' o'chña'tampeñets enteñ Yompor. Tarraña ñerra'm esempoch rromapes puerrollarpa' allempoñapa' o'huañcha' ame'ñatacha añ ñoñets ñeñť atet anaret puerrollarecop. Ñaña ñerra'm allempo yorer po'psheñeñ ñeñťcha' puerrollar perrpa' allempo ñeñťpa' e'ñe pocte' tarro'mar allempo, ñeñťpa' ama o'chña'tampeñtsoye' enteñe Yompor.

⁴ Ñeñťo'marña o'ch masheñesha ñaña nochanesha notas, yapa'cho'ña o'huañcha' amcha'nochtana'tenya añ ñoñets ñeñť atet anaret ahuat Moiséseshoť, tarro'mar ñeñťey o' yame'ñerrapa' o' yerromapretera Cristo. Ñeñťo'marña te'pa' e'ñe pocte' o'ch yo'patera po'psheñeñ. Ñaña ñeñť o' yo'patera te', ñeñťpa' Cristo ñeñťara ñeñť tanterrtsa rromoť. Allochñapa' attoch yorrtatyen ñeñť e'ñe cohuen atet muenen Yompor.

⁵ Tarro'mar ahuat allempo e'ñe yañeña yocťapña ora yocťenpa' ama't yeñoteneñ añ ñoñets ñeñť atet anaretpa' attera muenateney o'ch allo'na taruasatneney yo'chñar. Attoña allach chapaterryeñ rromueñtso attoch e'ñe yechenca'huerrañ.

⁶ Tarraña te'pa' e'ñe yerromapreteñoť Cristo añ ñoñets ñeñť atet anaretpa' o'huañ amcha'nochtana'tenya atet ñerra'm ahuat. Ñeñťo'marña te'pa' e'ñe cohuen yocrrena Yomporecop. Te'pa' ama añecpayaye ñeñť atet yepe't ahuat attoch e'ñe ya'muerochtame'teñoť yetsotatuañ ñeñť atet otye't ñoñets ñeñť atet anaret. Añecopña yocrrena e'ñe cohuen Yomporecop tarro'mar te' Parets Puecamquẽñpa' o' etserrataterrnay yocťapña.

Atto yo'chñarpa' atarr mopa'teney; amach muenatenye o'ch atet yeťohua ñeñť atet oteney ñoñets ñeñť atet anaret

⁷ Ñehua, ñato' sapa' chate' sotenapañ napa' noteneste' Yompor po'ñoñ ñeñť atet anaretpa' ñeñťpa' amate' cohuenayaye. Tarraña ñeñťpa' ama atteye' notenso ama't mamesha. Atet napa' ñerra'm ama eñallñeña añ ñoñets ñeñť atet anaret, napa' amate' chaponañeña neyo'chro ñeñť ama pocteye' enteno Yompor. Atet ñerra'm ama eñallñeña añ ñoñets ñeñť yotene' "amach

yeye'chapretanna'tatsto", napa' amate' chaponañeña neyoçhro ñeñt ama pocteye' enteno Yompor ñerra'm esempo es yeye'chapretannena.

⁸ Tarraña allempo chapona neyoçhro po'ñoçh atet oteneñ ñoñets ñeñt atet anaret ama es aye'chapretanna'tpahuo, no'chñar ñeñt neyoçhro'tsenpa' elloña nanaccha' es ye'chatse'tatyenen. Ñerra'm ama neñotenñe añ ñoñets ñeñt yotene' ama es aye'chapretanna'tpahuo, ñerra'mañpa' amate' neñotenñe ñeñt atet neye'chapreteña po'psheñeñ ñeñtpa' ñeñtña po'ñoçh no'chñar entapretenen Yompor.

⁹ Ahuañ napa' allempo ama neñotena' ñoñets ñeñt atet anaret, nañapa' nanac cosheñtso'tsennoñ allempo. Tarraña allempoña neñoter ñeñt atet oteneñ ñeñtcha' atet yeña cohuen ñaña ñeñt ama atet apapahuopa' allempoteñña napa' neñotena po'ñoçhpa' shonte' no'chñar ñeñt neyoçhro'tsen. Allempoteñña napa' atarr nellquerra nanac. Neñoteñ añ no'patenaya rromueñets ñeñtara coñcheñets.

¹⁰ Ñaña añ ñeñtara ñoñets ñeñt atet anaret allo'ch yocrrenañ e'ñe cohuenpa' tarraña arepa't ateyaye, ñaña no'chñar allo natpare'ten ñoñets ñeñt atet anaret ñeñtach nanmayeñ rromueñtso.

¹¹⁻¹² Tarro'mar allempoteñ neñoterr añ ñoñets ñeñt atet anaretpa' no'chñar ñeñt neyoçhro'tsenpa' elloña nanac cotape'chatse'tatenen sosey. Ama't nanac cohueney Parets po'ñoñ ñeñt atet anareteñ, ñaña atet oteneñ Parets ñeñtcha' atet yeña' cohuen, ñaña ñeñtcha' ama atet apapahuoyaye, ñeñtpa' e'ñe cohuen, poctey. Tarraña na no'chñarpa' ama muenatenno o'ch cohuen es neña', ñeñtpa' atepa't sheca'ne't. Napa' ama erroñ nepeno, neñoteñ añ no'patenaya rromueñets ñeñtara coñcheñets.

¹³ Te'ña sapa' chate' sotenapañ añ ñoñets ñeñt e'ñe otets cohuenpa' ñeñtepa'tña yo'patatenaya rromueñets. Tarraña ñeñtpa' ama ateyaye. Añña ñeñt yo'patatenaya rromueñets, ñeñtpa' yo'chñar. Ñaña Yompor po'ñoñ ñeñt atet anaret ñeñt e'ñe cohuenpa' ñeñtña o' a'poterrnay yo'chñar. Attochña yeñoterr yo'chñarpa' nanac sosey entapreteney Yompor.

Atto eñall epa ñeñt huomenc yepene' yeyoçhro

¹⁴ Yapa' yeñoteñ añ ñoñets ñeñt atet anaretpa' Partseshoñ e'ñe cohuen anareteñ, tarraña atet ñerra'm napa' arromñafoña atet nepena, chocmach nepatse'tyen ñeñt ama cohuenaye' enteno Yompor. E'ñe atet nepena ñerra'mrrate' añ netaruasatene' no'chñar.

¹⁵ Ama neñoteñe eso'marte'ña atet nepena, tarro'mar ama't ñeñtcha' atet o' nepohuapa' ama't napa' amach e'ñe pocteye' nenteñe. Tarro'mar ama't nemneñeñ añte' atet nepohua ñeñt e'ñe cohuen enten Yompor, tarraña arepa'tña ateye' nepeno. Añepa't atet nepen ñeñt ama nemnenñe, ñeñt po'ñoçh ama cohuenaye' enteno Yompor.

¹⁶ Ñaña esempo o'ch nepohua ñeñt ama cohuenayaye, ñeñt ama't napa' ama nemnenñe, nañapa' neñoteñ attotña o' natpare'tua ñoñets ñeñt atet anaret ñeñt e'ñe cohuen.

¹⁷ Neñto'marña neñoteñ ñerra'm esempo o' atet nepohua ñeñt ama't napa' netsena'ten, ñeñtpa' neñoteñ ama e'ñe naye' atet petso. Añña atet nepatene' no'chñar ñeñt allo'tsenara neyoçhro.

¹⁸ Napa' neñotena e'ñe atta eñalletñan, neyoçhroñapa' ama eñalle attoch cohuen enten Yompor, ama't coñe'ta. Ama't nemneñeñ o'ch atet neñañ ñeñt e'ñe cohuen enten Yompor, tarraña ama erroñ nepeñe atet patsa ñeñt atet cohuentetsa.

19 Ñeñt atet nepenapa' ama't napa' ama pocteye' nenteñe. Tarro'mar ama't nemneñeñ o'te' atet nepohua ñeñt e'ñe cohuen enten Yompor, tarraña arepa'tña atteye' nepeno. Añach atet nepena ñeñt ama nemnenñe ñeñt po'ñoçhpa' ama cohuenaye' enteno Yompor.

20 Ñeñto'marña neñoteñ, ñerra'm esempo o' atet nepohua ñeñt ama't napa' ama nemnenñe, ñeñtpa' neñoteñ ama e'ñe naye' atet petso. Añña atet neřatene' no'chñar ñeñt allo'tsenara neyoçhro.

21 Ñeñto'marña te'pa' neñotena ñerra'm esempo yemneñeñ o'te' atet yeřañ ñeñt e'ñe cohuen enten Yompor, tarraña yo'chñar ñeñt yeyoçhro'tsenpa' çhocmach cotape'chateney ñeñt ama cohuenaye' enteno Yompor.

22 Tarraña atto Yompor o' cotape'çhaterrey cohuen yeyoçhropa' ñeñtpa' alloch e'ñe yocsheññaña po'ñoñ.

23 Tarraña ama't atetpa' yapa' yeñotena eñall po'poñ ñeñt huomenc yepene' yeyoçhro ñeñt çhocmach e'moñe'tenan ñeñt atet yotape'chen cohuen Yomporecop. Ñaña yo'chñar ñeñt huomenc yepene' yeyoçhropa' ñeñtña nanac mopa'tene' yechets.

24 ¡Ee-say! Nanac llequëntso'tseney ya. Esesha'huachca' ya'huañañperre'te' yo'chñar ñeñt nanac yemueroçhtatene' ñeñtcha' yanerre'te' rromueñtso.

25 Nanac neparasyoso'teñ Yompor tarro'mar neñoteññañ Puechemer ñeñt Yepartseshar Jesucristo ñepa'tña e'ñe ya'huañañperre' yo'chñar. Ñeñto'marña e'ñe yeyoçhropa' yemneñeñ o'ch yotape'çherrñañeñ Yompor po'ñoñ, tarraña yo'chñarña' ñeñtñaña çhocmach yetaruasatene' e'ñe yechtso.

8

Atto Parets Puecamquëñpa' ñeñtña huomenc yepene' yeyoçhro

1 Ñeñto'marña te'pa' yeñoteñ amach a'coñchatarëteye ama't puesheñarrotëya ñeñtey o' yeparrocmaterra Cristo Jesús. Ñehua, ñeñtey o' yeparrocmaterra Cristo, ñeñtpa' añ, atto o' cotape'çhaterrey Parets Puecamquëñ, amaña añeye' yotape'chatenaye yo'chñar ñeñt yeyoçhro'tsen.

2 Tarro'mar te'pa' atet ñerra'm napa' e'ñe neparrocmateñoñ Cristopa' añña Parets Puecamquëñpa' ñeñtña huomenc nepene' neyoçhro, allochña napa' corretsanach tayoteñ ama't ñaña errponohuañen. Attoña o' a'huañañperren atto no'chñarpa' ñeñtña huomenc neřaye't neyoçhro, ñeñtcha' nanmayeñ rromueñtso, ñeñtara coñcheñets.

3 Ñehua, añ ñoñets ñeñt atet anaret ñeñtcha' yetsotateneñpa' amach errotenoñ a'queshpaterreye, tarro'mar ya arromñañey yo'chñarpa' ama muenatenye o'ch atet yepohua ora ñeñt atet oteneý añ ñoñets. Tarro'mar añ ñoñetspa' ama eñalle attoch huomenc řonay yeyoçher esheccha' yetsotue ora allpon ñeñt atet oteneý ñeñtcha' atet yepohueneñ. Tarraña atto Yomporpa' ahuo't a'pocatuonay yo'chñar ñeñtpa' atet řa. Ñapa' ahuo't mueñonay e'ñe ña Puechemer ñeñtcha' eñalletostsa arr patsro e'ñe atet ñerra'm ya ñeñtey arromñañey, ñeñtey ochñañey. Allochña' ñach rromosets yo'chñarecop; allochña' attoch tsa'tuonaya yo'chñar. Attochña a'huañañperrey atto yo'chñara ñeñtña huomenc yepene' yeyoçhro.

4 Atet o' řonay Yompor attoch te' yapa' o'ch atet yeřa cohuen ñeñt atet oteneý Yompor po'ñoñ, allohueneý ñeñtey atet petsa atet cotape'chateney Parets Puecamquëñ, ñeñtey o'huañ atet yeřatse'tyesa ñeñt atet cotape'chatse'tateney yo'chñar ñeñt yeyoçhro'tsen.

5 Tarro'mar ñeñt atet petsa ñeñt atet cotape'chatenanet sosya'tsañ ñeñt pueyoçhro'tsenetpa' añachña e'nenet ñeñt atet muenatse'tatenanet po'chets. Tarraña ñeñt atet petsa ñeñt atet cotape'chatenanet Parets Puecamquëña' añcha'ña e'mñotenet ñeñt atet muenatenanet Parets Puecamquëñ.

6 Tarro'mar ñerra'm añach ye'nen ñeñt atet muenatse'tateney yechetspa' ñeñtpa' ñeñtcha'ña yanerre' rromueñtso ñeñtara coñcheñtso. Tarraña ñerra'm añ ye'mñoten ñeñt atet cotape'chateney Parets Puecamquëña' ñeñtpa' ñeñtcha'ña allochña yapa' corretsayach e'ñe cohuen yocsheñeshocmañen.

Atto ñerra'm añach ye'nen ñeñt muenatse'tateney yechetspa' amach errotentoyame'ñeroña Yompor

7-8 Tarro'mar ñerra'm añach ye'nen ñeñt atet muenatse'tateney yechetspa' ñeñtpa' atet yepena ñerra'mrrate' cha ye'moñe'teñ Yompor, ñeñto'marña çhach yatpare'teññañ po'ñoñ. Amach errotentoyame'ñeroña Yompor ñerra'm añach ye'nen ñeñt atet muenatse'tateney yechets. Ñaña ñerra'm attach yepenapa' amach errotentoyocshacheña Yompor.

9 Tarraña sapa' ama añeye' soctape'chatenaye sechets; añña soctape'chatene' Parets Puecamquëñ ñerra'm po'ñoçh Puecamquëña' o' yeçherra seyoçhro. Tarraña ñerra'm eseshas ama echenaye Cristo Puecamquëñ seyoçhropa' ñeñtesña po'ñoçhpa' ama puechemereyayso Yompor.

10 Ñehua, ya arromñaateypa' çhocmach yerroma arr patsro ochñartso'marecop. Tarraña ñerra'm Cristo yeçhena yeyoçhro yecamquëñoñpa' çhocmach yocrrena tarro'mar Yomporpa' e'ñe pocte' enteney.

11 Yapa' yeñoteñ Yomporpa' ahuo't tantaterran Puechemer ñeñt Cristo Jesús po'rromñoñ. Ñaña ñerra'm Yompor Puecamquëñ yeçhena ya yeyoçhro, ama't arromñaateypa' yapa'cho'ña tantatuerreycha' yerromñoñ. Parets Puecamquëñoñña' yocrra'huerrach, ñeñtara Puecamquëñ ñeñt yeçheta te' yeyoçhro.

12 Ñeñto'marña masheñnesha ñaña noçhanesha, te'pa' añ e'ñe poctetsa o'ch e'ñe atet yepena ñeñt atet cotape'chateney Parets Puecamquëñ, ama pocteyaye o'ch atet yepena ñeñt atet cotape'chateney yechets.

13 Tarro'mar ñerra'm allo'na yocrra'nena ñeñt atet cotape'chateney yechetspa' ñerra'm yerromapa' yeçhena'huerrach yo'çhñaroñ, tarraña ñerra'm Parets Puecamquëñoñ o'ch ya'ypo'ñerr ñeñt atet patse'tateney yechetspa' yañapa' corretsayach.

Atto ñeñtey e'mñotene' ñeñt atet cotape'chateney Parets Puecamquëñ, ñeñteyña'pa' o' po'ñoçh puechemer perrey Yompor

14 Tarro'mar allohueney ñeñtey e'mñotene' ñeñt atet cotape'chateney Parets Puecamquëñ, ñeñteyña'pa' o' po'ñoçh puechemer perrey Yompor.

15 Ñeñto'marña amach alla yeñcha'terrero atet ñerra'mrrate' ñeñt ñañrets, atarrcha' mecha'tenan pamo'mte'. Tarro'mar yapa' allempoteñ o' yaguërrñañ Yompor Puecamquëñ yañapa' o' puechemer perrey po'ñoçh. Ñeñto'marña amach yeñcha'nañoteye' yema'yocheñoñpa' o'ch yeçhore'ch, o'ch yoch: "Apa."

16 Tarro'mar ñeñtara Parets Puecamquëñ ñeñtña yeñotatene' yeyoçhro po'ñoçhpa' o' puechemer perrey Yompor.

17 Ñaña yapa' yeñoteñ atto o' puechemer perrey Yomporpa' yapa'cho'ña yagapapretercha' Cristo ora ñeñt allpon o'patatenya Yompor. Ñerra'm çho

yemueroçhta Cristo'marecop te', atet pe't ña atarr mueroçhte't ahuat aña patsro, esempohuañen yapa'cho'ña yecohuentapreterach.

Atto ama't yemueroçhetuanena aña patsro, ñeñtpa' ama esoye' yenteñe

¹⁸ Ama't yemueroçhetuanena aña patsro, ñeñtpa' ama esoye' nenteñe. Tarro'mar neñoteñ esempohuañenpa' ellochña nanac yecohuentapretera Cristo.

¹⁹ Ama't ora allpon ñeñt yentyen arr patsro ñeñt yeçcatua Yomporpa' ñetpa'cho'ña elloña atarr cohueñet esempohuañencha' Yomporpa' orrtatuerr-eycha' ñeñtey o' puechemerasha' perrey, attoch allempochña o'ch yecohuentapretera Cristo.

²⁰ Tarro'mar ahuat allempo atpare'te't Adán, Yomporñaapa' ahuo't a'huañatan atto atarr sherbañ nanac ñeñt ora allpon pueyeçcatar. Allempoñaapa' o'huañ tama sherba'. Tarraña pueyeçcatarpa' ama errot po, tarro'mar atet muenen Yompor. Tarraña ama't atet panetaña' elloña te'pa' chocma cohueñet attoch esempohuañen Yomporpa' o'ch alla a'cohuentatuerranet.

²¹ Tarro'mar ora allpon ñeñt yentyen aña patsropa' atet anaretet ñamet chocmach mellasha'tuet, allempoñaapa' o'huañcha' sherbet. Tarraña ñerra'm esempohuañencha', ñeñtey o' puechemer perrey Yompor o'ch yecohuentapretera Cristo, ñaña allempoña ora allpon Yompor pueyeçcatarpa' ñetpa'cho'ña o'ch alla a'cohuentataretetuerret ñamet.

²² Yapa' yeñoteñ ora allpon ñeñt yentyen aña patsropa' chocma mueroçhe'tyenet ama't teme'ttsen, tarro'mar ama a'cohuentatuaretterra'. Nanac llecanrroreyenet atet ñerra'mrate' coyanasha' ñerra'm o' chap allempoch cheyore'ten nanaccha' atsotenana pue'mar. Nanac llequëntso'tsen tarremphuach allempoch eñalletatuan pue'mar. Allempoñaapa' nanaccha' cosheñtso'tsen, tarro'mar o' eñalletatuan pue'maretoll. Atetcha' perraña ñaña Yompor pueyeçcatareçhno, nanaccha' cosha'rterret esempohuañencha' allempoch a'cohuentataretetuerret.

²³ Ama ñapñayaya Yompor pueyeçcatar mueroçhtetso. Yapa'cho'ña chocma yemueroçhetyena arr patsro, amach e'ñeye' yeñmateno yeyoçhro. Tarraña ama't atetpa' o' yechen Parets Puecamquëñ ñeñt yeçhetsa yeyoçhro ñeñt ñanom apueney Yompor, allotñaapa' orameñ ñaña ñeñt o'patatenya pa'namen. Neñto'marña yeñoteñ esempohuañenpa' aphuerreycha' ora allpon ñeñt o'patatenya. Neñto'marña yecueñ esempohuañen Yomporpa' o'ch orrtatuerrnay ñaña atto yapa' o' puechemerasha' perrey. Allempoña ya yechetspa' a'po'poñetuerrnaycha' attochña yecohuentapretera Cristo.

²⁴ Allempoteñ o' yaguërrñañ Yompor Puechemer ñeñt Cristo yapa' yeyemteññaña ñeñt o'patatenya ñeñtcha' atet perrnay esempohuañen. Neñto'marña allempoteñ o' ya'queshpataretterra chocmach yecueñ esempohuañen allempoch a'po'poñetuerrnay yechets attochña yecohuentapretera Cristo. Po'ñoçhpa' ama a'po'poñetuerrnaya' yechets, ñeñto'marña teme'ttsen yecueñ. Ñerra'm o' a'po'poñetuerrnayeñ yechetspa' allempoñaapa' amate' palltenañe o'ch yeyemteññaña ñeñt atet muenateney ña.

²⁵ Tarraña ñerra'm chocma yeyemteña Yompor ñeñt atet oteneñ yeñoteñ atetcha'ña perrnay esempohuañen. Ñehua, ama't ama orrtena', te'pa' yeyemteñot ñapa' e'ñepa'chña yocsheñeshocmañen yecueñ. Amachña cha yemuenme'chatsche.

Atto enamuenay Parets Puecamquëñ Yomporeshot

26 Ñaña attecma Yompor Puecamquëñ ñach yeyenpuene' ñerra'm esempo ama erroť es apen yenteno. Ñehua, atet ñerra'mrrate' allempo yellquëñsha' yema'yochena ñato' ama yeñoteñe escha'ña yenamña Yompor ñeñť e'ñe pocte' enten ña. Allempoña Parets Puecamquëñpa' ñachña enamats yocop e'ñe puellcapreteñoťey ya, e'ñech pue'narña'teñoť, amach čoye' eñoreno attoña enamatenay Yompor yocop.

27 Tarraña Yomporpa' cohuennay allohueney ñeñť atet yocťape'chen yeyočhro, ñeñťo'marña ñapa' eñoteñ ñeñť atet enamuennay Puecamquëñ, țarro'mar Puecamquëñpa' añach enamuennay ñeñť e'ñe pocte' enten Yompor yocop ñeñťey o' pueyochresha' perrey Parets.

Ñeñťey e'ñe eñotuaye't ahuat Yomporpa' ñapa' atarr cočhnesha' o'patatenya

28 Ñaña ama't es yehuapoya, yapa' yeñoteñ Yomporpa' ñach a'pocťatene' yocop, allohueney ñeñťey morrentenaya ña, ñeñťey acrareťey o'ch atet yepeññañ ñeñť atet muenen ña.

29 Tarro'mar allohueney ñeñťey e'ñe eñotuaye't Yompor ahuat, ñeñťeycha' ame'ñerraya esempo, ñaña'apa' coťape'che't ahuat yocop ñeñťcha' atet muenatey, allochña'apa' yach coťape'cherrets cohuen atťochña yeyečhquerra e'ñe ora atet ñerra'm Puechemer ñeñť Cristotets. Allochña'apa' allohueney yepo'narcha' yepeñ Cristo ama't shontey ñeñťey ame'ñetsa.

30 Ñehua, allohuen ñeñť atet coťape'che't Yompor yocop ahuatpa' allempoña ahuo't čhap allempoch čhore'terrey o'ch yame'ñera. Allochña ñeñťey ačhore'tareťeypa' ñaña'apa' oten yocop e'ño' pocte' enteney e'ñe yeyemteñoť Cristo. Allochña'apa' allohueney ñeñťey e'ñe pocte' enteney, Yomporña'apa' oten yocop yecohuentapretero'ch Cristo esempohuañen.

31 Ñeñťo'mar te'pa' o'ch notas, Yomporpa' atarr cohuen morrentenya. Ñaña yapa' yeñoteñ atťo nanac morrentenya Yomporpa' ama't eseshapa' amach erroťenoť a'huaña'mperetoña atťo morrentenya.

32 E'ñe puemorrenteñoťey ya ama't e'ñe ña Puechemerpa' ama mopa'tamřesyey, elloña a'rroyonay Puechemer ñach rromosets yocop allohuenacpay. Atťo atarr morrentenya atťoña yapa' yeñoteñ elloña attecma esocmañencha' apa'yeney e'ñe allempoteñ apuerrey ñaña Puechemer Cristo.

33 Ñeñťey acrrer Yompor ñeñťeycha' puechemer perr; ama't esesha' muenenayeñ o'ch otteñe'chenyetañ, țarraña ñeñťpa' ama esoye' yenteñe yocop, țarro'mar Yomporpa' oten e'ño' pocte' enteney. Amach erroťenoť esesha' yetsa'taterrayo yo'chñar,

34 țarro'mar Cristo Jesús'pa' ña rromats yo'chñarecop, elloña ñaña tantertsa po'rromñoť, ñaña te'pa' ña partsotapretenaya Pompor po'cohuenroť; alloťeñña ñapa' eñorena yocop Pomporesho atťoch es e'ñe a'pocťatennay.

35 Atarr nanac morrentenya Cristo. Ama't eseshapa' amach erroťenoť puerrata'mřesyetoña atťo nanac morrentenya Cristo. Ñaña ama't erroťeno'tsenya amach huañerroña atťo nanac morrentenya Cristo. Ama'tcha' añ yečhapoya mueročhteñets, ama'tcha' nanac llequëñťso'tseney, ama'tcha' ñerra'm esempo pue'moñe'teñoťetay coťare'tenyet, ama'tcha' ñerra'm esempo yepallta'yena ñeñťcha' yerren, ama'tcha' ñerra'm esempo yepallta'yena ñeñťcha' yechorrena, ama't ñerra'm esempo añcha'nočheno'tseney, ama'tcha' ñaña allempoch muetsayet, amach erroťenoť puerrata'mřesyetoña atťo nanac morrentenya Cristo.

³⁶ Atetcha' perryetña ya esempo e'ñe atet anaret Yompor po'ñoño ñeñt aquellca'huaret ahuatoteñ. All anuaret ñeñt atto puesheñarr ñeñt ame'ñatse'tpa' otane't Yompor, ñeñtpa' e'ñe atet ot:

E'ñe yame'ñeño'tep̄ papa' yellapene'tcha' e'ñe autsa yemtsanate' ñeñt ye'moñe'tene'. Ñetpa' e'ñe amtsen entenyet e'ñe atet ñerra'm carrnero ñeñt chocmach aneñet allcha' muetsanachet.

³⁷ Ama't yemuerochetuhuapa' elloña nanaccha' ahuamencat perrey Cristo ñeñt nanac amorrentña yenten.

³⁸ Ñeñto'marña napa' neñoteñ, ñeñtey ame'ñenaya Cristo Jesús ñeñt Yepartseshar yepenpa' ama't erroteno'tsenya amach errotenot huañerroña ñeñt atto nanac morrentenya Yompor. Ama't allempoch yerroma, ama't allempo ñaña yocrrenmeñpa' chocmachña morrentenya. Ama't Yompor po'mllaño'teñnaneshar ñeñt huetsa pue'ntaño'tpa' amach errotenot puerratañpesyetoña ñeñt atto morrentenya. Ama't ora allpon ñeñt añcha'no'chetetyetsa, ama't ñaña ora allpon ñeñt añcha'tare'tetyetsa arr patsropa' ñetpa'cho'ña amach errotenot puerratañpesyetoña ñeñt atto Yomporpa' nanac morrentenya. Ama't ñeñtcha' yehuapoya te' ama't ñaña ñeñtcha' yehuapoya tsapa'tonet, ñeñtpa'cho'ña amach errotenot a'huañañpesyetoña atto Yomporpa' atarr morrentenya.

³⁹ Ama't errponenaparen yetuanena atarr eno, amapa' ñaña o'pono patso ama't ñaña oño o'pono, allpa'cho'ña amach errotenot yesa'nmoña atto Yomporpa' nanac morrentenya. Ama't ora allpon ñeñt ye'chcatua Yompor añe patsropa' ñetpa'cho'ña amach errotenot a'huañañpesyetoña ñeñt atto nanac morrentenya Yompor, allohueney ñeñtey ame'ñenaya Puechemer ñeñt Cristo Jesús ñeñt Yepartseshar yepen.

9

Atto Pablopa' atarr llequënana pamo'tsna'tarnesha' ñeñt israelnesha' ñeñt acrañ Yompor ñeñtcha' pueyochresha' pañ

¹ Ñaña ñeñtcha' notas te'pa' ñeñtpa' e'ñe po'ño'ch atet, ama choye' neshquënso, tarro'mar napa' o' name'ñera Cristo. Ñaña Parets Puecamquëñ ñeñt ye'chetsa neyo'chro, ñeñtña e'ñe eñotenen ñeñtcha' atet notas ñeñtpa' e'ñe po'ño'ch atet.

²⁻³ Napa' atarr nanac nellquëña nemo'nasheñnesha' ñeñtara judionesha' tarro'mar ñetpa' shontetañpa' ama ame'ñeñeto Cristo. Ñeñta nenen neyo'chro atto atarr nellquënanet. Ñerra'm errotenot na'queshpattanet o'te' na'queshpatterranetañ. Ama't pocte' nenteñeñ o'ch na'cmare'ttañ nañeña attoch nechenquërra allochñapa' amach nentere Cristo, ñerra'm atet ne'papa' ñetpa' ñato' o'te' na'queshpatterranetañ. Tarraña ama't atet ne'patstañpa' amach errotenot na'queshpatterraneto.

⁴ Ñaña namo'tsesha' judionesha' ñeñtara israelena'tarnesha' ñeñt acrañ Yompor ahua't ñeñtcha' puechemeresha' pañ, ñaña ñetpa' chocma entoñetañe't Yompor po'partsoña ahua't. Ñaña ñet Yomporpa' chocma a'pocatanetañe't ahua't attoch chocmach a'natenanet. Ñaña ñetpa' apantañe't Yompor po'ñoñ ahua't, ñeñtña eñotatahuet'e't ñeñt atet pocte' enten Yompor. Ñaña ñeñtara judionesha' ñeñt eñotaye't attoch nanac e'ñe co'chneshot sherbeñetañ Yompor pa'paclo. Ñaña ñeñtara judionesha' Yompor ahua'tpa' ahuo't otanetañ ñeñtcha' atet apuerranet esempohuañen.

5 Ñaña ñeñt ñanom yamo'mtayñeneshañ* yepe't ñeñt nanac sherbaye't Yompor ahuatpa' ñetpa' ñeñtara judionesha' pamo'tsna'tarneshañ. Ñaña ama't judiona'tareshotpa' ahuo't eñalletosa Cristo arr patsro ñeñtara ñeñt nanac Partsotets ñeñt pomnaren pene' allohuen esocmañen. Ya'ye'chochtatoñepa'ch tayoteñ ama't errponohuañen. Ñeñtapa' attetepa'ch Nompore.

6 Tarraña ama't allohuen judionesha'ña ama'tcha' ama ame'ñereto Cristopa' Yomporñaapa' amach errotenot huañerroña po'ñoñ ñeñt atet otanete't ahuat; ñeñtapa' chocmach etsota ñeñt atet otanet, tarro'mar ñapa' ama puenesho po'ñoñ. Ñaña allohuen ñeñt israelena'tarpa' ama allohuenacmaye' Yomporena'tareyayeto.

7 Ñaña ora allpon po'mrenña Abrahampa' ama allohuenacmaye' po'noch Abraham puechemer entapreteñe Yompor. "Aña e'ñe puechemer entapreteñ Yompor ñeñt Isaac po'mrenña", ñeñt atet otan Yompor Abraham ahuat.

8 Ñeñto'marña yeñoteñ allohuen Abraham po'mreneña' ama allohuenacmaye' po'noch puechemer penaneto Yompor. Añachña puechemer pen ñeñt yemtenaya Yompor ñeñt atet otenanet.

9 Ñehua, yapa' yeñoteñ atet ahuat Yomporpa' otan Abraham ñeñtcha' aþ, ñeñtapa' atet ot: "Tsapat charo atet ñerra'm te' añempo, o'ch nohuerra allempoñapa' petapor Sarapa' cheyore'tcha' ñeñtapa' asheñorrcha' ñeñtcha' Isaacatats." Arrpa' allohua ñeñt atet Yomporpa' otan Abraham.

10-13 Elloña te'pa' o'ch alla neyerpaterrser attto yatañ Isaacpa' ahuo't yoran Rebeca ñeñtcha' puetapor þa'. Ñaña allempo Rebecapa' totana Isaac puechemer ñeñt epuesha' Yomporñaapa' otan Rebeca, atet och: "Ñeñtcha' eñalletatsa ñanom pechoyorpa' añcha' pomnaren pene' ñeñtcha' eñalletatsa chenta'." Arrpa' allohua ñeñt atet Yomporpa' otan Rebeca. Ñaña allempo ama eñalletena' pechoyoresha' Yomporñaapa' ahuo't ye'choña paterr pechoyor ñeñt muenen ña, ama't allempopa' ama es yeçcateneta' ama't ñeñt cohuen enten Yompor amapa' ñeñt ama cohuenayaye. E'ñe atta ahuo't ye'chana puesheñarr ñeñt muenen ña; cheshatollpa' ama pueyeçcateñofoye' cohuen ye'chyona Yompor, tarro'mar cheshatollesha'pa' ama es yeçcateneta' ama't coñe'ta. Attoña ahuo't etsota Yompor po'ñoñ ñeñt atet aquellca'huaret ahuatoteñ, ñeñtapa' atet oten Yompor: "Jacobpa' atarr nemorrenteña, pa'mo'nasheñña Esaúpa' ama tama nemorrenteño." Atet þa attoch yeñoch Paretspa' ña acrañtetsa ñapueñ añecop ñeñt e'ñe ye'chena ña.

Atto Yomporpa' e'ñe pocte' entan o'ch puechemer þan ñaña ñeñt ama judioneshayaye

14 Te'ña ñato' sapa' cháte' sotenapañ ñeñt atet ote't Yompor, ñeñtapa' amate' pocteyaye. Tarraña o'ch notas ñeñtapa' e'ñe pocte' atet ote't Yompor.

15 Tarro'mar yapa' yeñoteñ atet Yomporpa' otan ahuat Moisés, ñeñtapa' atet och: "Ñerra'm esesha' neye'cha na ñeñtcha'ña neyenpa'. Ñaña ñerra'm esesha' neye'cha na ñeñtcha'ña atarr nemorrentena."

16 Ñeñto'marña yapa' yeñoteñ ñerra'm esesha' muenen Yompor ñeñtcha'ña a'natena, ñeñtapa' e'ñe pocte'. Ñeñtapa' ama añofoyaye ñeñt atet yemnen ya acheñey, ñaña ama ya'mueroçhtame'teñofo ye'chenyoña Yompor. E'ñechña puemuereñofo ye'chenana erra'tsen muenen ña.

* 9:5 Pablo otatse't yamo'mtayneshañ tarro'mar ñapa' judionesha'.

17 Ñaña yeñoteñ ñeñt atet Yomporpa' otan ahuať ñeñt añcha'tarettatset Egipto. Ñeñtapa' atet otan añcha'taret Faraón: "Na pene', ñeñteř añcha'tarettetsa, attoch peshoch norrtat nehuamenc acheñenesesho. Attochña ñetpa' o'ch serrpare'tyesonet erracmañen atto na ñeñten nanac ahuañencattetsa."

18 Ñeñto'marña yapa' yeñoteñ ñerra'm esesha' muenen Yompor o'ch a'natanetpa' ñeñtcha'ña a'natena. Ñaña ñerra'm esesha' muenen Yompor o'ch echarrtenet pueyočhreto, ñachña muenatenahuet.

19 Te'ña ñato' sapa' čhate' sotenapañ: "Ñerra'm Yompor ñach yemnatene' ñeñt e'ñe atet muenen ñapa', yapa' amach erroť yepe, ñeñto'marña amate' pocteyaye o'ch enteney yapa' amo' cohuenayayye, ñerra'm ña yemnatatene' o'ch es atet yeřa." Ñato' sapa' attate' soctape'chatse'tyen seyočhro.

20-21 Tarraña masheñneshacha' ñaña nočhaneshacha', o'ch notas, Yomporpa' ama asasare'tpahuoyaye. Ñato' o'ch netma'ntatasa atet: Ñato' esesha'pa' o'ch yečcatan coyemñ ñeñt patsrro'. Ñeñt e'ñe atet muenen ña, ñapa' ñeñtcha' atet yečcat. Ñato' o'ch yečcatan eprroga coyemñ, puerrogarrpa' atarrcha' cohuen, e'ñech cohuenoť sherbenan pamo'mte'. Alotñapa' ñeñt a'pchat patspa' o'ch alla yečcaterranerr po'prroguēñ puecoyemñ. Ñato' ñeñtapa' amach tama cohuenaye' pe, tarro'mar ñeñt yečcate'pa' ama mueno o'ch orrtach acheñenesesho. Tarraña coyemñpa' ñerra'm eñoreña'pa' amach sasare'tanoña pamo'mte', amach oche: "Eso'marte' peyečcaten atet, ama cohuenaye' peřa'no." Tarro'mar ñerra'm pamo'mte' muenets atetcha' řan puecoyemñ, coyemñapa' amach erroť es řo. Ñeñto'marña yeñoteñ Yomporpa' ama't erroťen muena' o'ch atet řonay, ñeñtapa' e'ñe pocte' ñocop, tarro'mar Parets añecoppa' ña otets ñapueť. Ñaña yapa' amach yesasare'che, tarro'mar Paretspa' ama asasare'tpahuoyaye.

22 Ama't atteñpa' elloña Yompor ahuaťpa' atarr ahuantane't atto nanac atpare'che't ñeñt o'pate't chenquēñets. Ñerra'm ña muenatseñ e'ñe pocteñ attoch tsa'taterranetañ e'ñe allempocma po'yoročhenñoť. Attochña entatanetañ po'huamenc tarraña ama atteye' řaneto, attaña ahuantanete't po'chñaret.

23 Allochñapa' attoch esempopa' čhap o'ch orrtaterrnay allohueney po'cohuenña, ñeñtey o' muererrya yaña, ñeñtey ahuať Yomporpa' cotape'chonaye't yecohuentapretero'ch esempohuañen.

24 Atet ñerra'm ya ñeñtey judioneshay, ama't ñaña ñeñt ama judioneshayaye, tarro'mar ama judioneshayaya ñapueť chore'tenoña Yompor ñeñtcha' ame'ñaya. Allohueneyña te'pa' o' chore'terrey o'ch e'ñe yame'ña'huera.

25 Ama't atet ote'teña Yompor ahuať, allempo otan Oseas ñach serrpare'te' ñeñt atet och Yompor, ñeñtapa' atet ot Yompor:

Ama't ñeñt ama nechemereyaye te'pa' tsapaťonetñapa' e'ñech nechemer nepohuerranet. Ama't po'poñ acheñ ñeñt ama nemorrenteno te'pa' tsapaťonetñapa' e'ñech nemorrentuerranet ñamet.

26 Ama't e'ñe all ahuať Yomporpa' otanete't: "Sapa' ama nechemereyayso", te'ña allpa' o'ch eñotueret, te'ñapa' e'ño' puechemerasha' o' řohuerranet Yompor, ñeñt Yompor ñeñt ama arromñateřhayaye ama't ahuaťa.

27 Elloña Isaías ñeñt a'mñtaye't Yompor po'ñoñ ahuaťpa' ñapa'cho'ña atet eñose't, ñeñtcha' atet perra israelena'tarnesha', ñeñtapa' atet ot: "Israelena'tarnesha'pa' merenach nanac shonte' atet ñerra'mrrate' atet yenteññañ ontap po'mñer nanac shonte'. Tarraña ama'tcha' shontetañpa'

amachña allohuenacmaye' a'qeshp̄atare'tterreto; patanta'ttsachña ñeñtcha' a'qeshp̄atare'tterrtsa.

²⁸ Tarro'mar Yomporpa' e'ñech tsa'tatuerrana shonte' acheñ arr patsro ñeñt atet otane't ñeñt e'maye't po'ñoñ. Amach allo'na ahuanta'nenaneto po'chñar."

²⁹ Ñeñtpa' e'ñech atet perra ñeñt atet ote't Isaiás, ñeñtpa' atet ot:

Ñeñt nanac Paretpa' ahua't a'qeshp̄aterrey ama't puesheña'ttso'teya.

Ñerra'm ama atet pa'yeñepa' allohueneypa' e'ñech yoclla'huerrañ e'ñe poctacma, atet panet ahua't allempo a'cllatuare'tta allohuenet ñeñt ye'chatse't añetso Sodomo ñaña Gomorro.

Arrpa' atto Yomporpa' ama pocteye' entenano judionesha'

³⁰ Ñeñto'marña te'pa' yeñoteñ acheñenesha' ñeñt ama judioneshayaye ama't ama e'neñeto attoch e'ñe pocte' entanet Yomporpa' ñetñapa' ahuepa't enteret ñeñt e'ñe atto pocte' enteney Yompor allohueney ñeñtpa' ñeñtña atto yeyemteña ñeñt atet oteney Yompor.

³¹ Tarraña judionesha' ama't e'neñetañ attoch pocte' entanet Yomporpa' tarraña ñetñapa' ama entereto, tarro'mar ñaña e'ñe yemtenet o'ch e'ñe etsotuetañ ora allpon ñoñets ñeñt atet anarettenet; tarraña ama es etsotuenaye ora allohuen.

³²⁻³³ Yeñoteñ ama enterreto attoch pocte' entanet Yompor, tarro'mar ama yemteñeto Yompor ñeñt atet otenanet. Ñetpa' ñaña e'ñe yemtenet o'ch ye'chcatyenet ñeñt e'ñe cohuen entenet ñet. Ñeñtpa' e'ñe atet pohuet ñeñt atet oten Yompor po'ñoñ, ñeñt anua'ret ahua'toteñ, ñeñtpa' atet ot Yompor ahua't: Napa' o'ch nemñanet puesheñarr ñeñtcha' atarr sherberrets all añetso ñeñt pa'so'cheñ Sión ñeñtara Jerusaléñ. Tarraña ñetpa' chach tsena'chet. Puetsena'teño'tetpa' o'huañ yemtenanet ñeñt atet noctape'chatanetañ. Tarraña ama't erra'tsena ñeñtcha' ame'ñerraya ñapa' ñetñapa' ellopa' amach alla es e'nerrete'te.

Ñeñtpa' atet toma'ntachet ahua't: Cristopa' ñach anare'ttatsa arr patso atet ñerra'mrrate' mapue' ñeñt atarrcha' sherben. Tarraña judionesha'ñapa' ama asherbenaye' eñcheto ama't mamesha, cha ottet ñerra'mrrate' atta epo'to'tatse'tyeset ñesho ñeñt atma'ntatare't mapue'.

10

¹ O'ch masheñneshacha' ñaña no'chaneshacha' notas, napa' neyo'chrocmañen nemneñ namo'tsesha' ñeñtara israelena'tarpa' o'te' qeshp̄a'huerret ñamet. Ñeñto'marña ñocpuetpa' chocma nema'yocham̄penanet Yompor.

² Napa' neñnotenetañ e'ñe po'ño'ch mueneñetañ o'ch e'ñe sherberet Yompor, tarraña ama't atet muenenetañpa' po'ño'chpa' ama chenane'toña pueyo'chreto ñeñt po'ño'ch atet muenen Yompor.

³ Po'ño'chpa' ama chenane'to pueyo'chreto ñeñt atet muenen Yompor atetcha' ye'pa attoch pocte' enteney ama't e'ñe allohueney. Ñetpa' otenapuetañ e'ñe pueye'chcateño'tet ñeñt cohuen entenet ñetpa' Yomporñapa' pocte'te' entapretenanet. Elloña ñetpa' ama mueneñeto o'ch yemterrñañet ñeñt atet oteney Yompor, ñeñtcha' attoch e'ñe po'ño'ch pocte' enterrey ña.

⁴ Tarro'mar te'pa' o' huapa Cristo ñaña atet oteney Yompor ñerra'm yame'ñerrñaña Puechemer ñeñt Cristotetspa' attochña e'ñech pocte' enterreyña, ama't erra'tsena ñeñtcha' ame'ñerraya. Allochñapa' o'huañcha' ñaña yeyemtena o'ch atet yepohuen e'ñe cohuen ora allpon ñoñets ñeñt atet anaret attochña pocte' enterryeñ Yompor.

Arrpa' attoch e'ñe pocte' enteney Yompor ama't eseshaya

⁵ Ama't Moiséspa' atet ote't ahuat: "Ñerra'm yepohuenach e'ñe poctacma ñeñt atet anaretpa' esheccha'ña corretsayach errponohuañen."

⁶ Tarraña attoch po'ñoçh pocte' enteney Yompor ñeñtpa' e'ñech yeyemteñoñ ña ñeñt atet oteney: "Amach yoctape'chatsto yeyoçhro, ñato' este' yepalltena tarro'mar ama yepallteno o'ch ahuey ento attoch ya'suater Cristo arr patsro.

⁷ Amaña yepallteno o'ch ahuey ñaña arromñañeshesho ñeñt o'pono'tsa'yen patso o'ch yetantatera' Cristo tarro'mar ñapa' ahuatoteñ o' tanterra, ama arromñañesho'tsenayaye."

⁸ Tarro'mar Yompor po'ñoña' atet oten: "Añ cohuen ñoñets alloch yequeshperra, ñeñtpa' ama torrapahuoyaye attoch yenter, tarro'mar ñeñtpa' e'ñe yesho'tsen. Ñaña ama echarroyaye attoch ye'ñoroña, tarro'mar ñeñtpa' e'ñe yeyoçhro'tsen." Ñeñtpa' ñeñtara ñoñets ñeñt o' neserrpare'tatas atet añ poctetsa o'ch yame'ñera Cristo.

⁹ Tarro'mar ñerra'm çho ye'ñorena atto Jesúsapa' Yepartseshar yepeñ, ñaña ñerra'm e'ñe yeyoçhrocmañen yame'ñeña atto Yomporpa' ahuo't tantater po'rromño'tpa', allochña' yapa'çho'ña a'queshpatareteycha'.

¹⁰ Tarro'mar ñerra'm yame'ñera Cristo yeyoçhrocmañen, Pomporña' e'ñech pocte' enteney, ñaña ñerra'm çochña ye'ñorena atto o' yame'ñera Cristo, attochña yapa' a'queshpatareteycha'.

¹¹ Ñaña Yompor po'ñoñ ñeñt aquellca'huaret ahuatoteñ, ñeñtpa' atet oten: "Ama't erra'tsena ñeñtcha' ame'ñerraya Yomporpa' ñetña ellopa' amach alla es e'nerrete'te."

¹² Tarro'mar ama judioneshayaya ñapueñ ame'ñenayoña Yompor. Ama't ñeñt ama judioneshayaye, ñetpa'çho'ña attecma ame'ñeñet Yompor. Tarro'mar e'ñe patra Yepartseshar ñeñt e'ñe allohuenacpay. Shonte'ch esocmañen apa'yesuay ama't eseshaycha' ñeñtey enamuene'.

¹³ Tarro'mar atet oten Yompor po'ñoñ: "Allohuenoteypa' ama't erra'tsenoteta çhore'te' Yompor pueyoçhrocmañen attoch a'queshpataretterretpa' Yomporña' a'queshpaterranetcha'."

¹⁴ Tarraña amach errotenot yeçhore'cheña Cristo ñerra'm ama çho yeyemteño. Ñaña amate' errotenot yeyemteroña ñerra'm ama es ye'mare'tperro Cristocop. Ñaña amach errotenot ye'mare'che ñerra'm ama eñalle ñeñtcha' a'pote' po'ñoñ.

¹⁵ Ñaña amach errotenot a'poteññañetoña Yompor po'ñoñ, ñerra'm ama ña llesensenahueto. "Nanac cosheñtso'tseney ñerra'm esempo huapa ñeñtcha' a'potose' cohuen ñoñets ñeñt huetsa Yomporeshot alloch yocsherra e'ñe cohuen yeyoçhro." Añpa' allohua ñeñt e'ñe atet aquellca'huaret Yompor po'ñoño ahuatoteñ.

¹⁶ Tarraña ama't ñeñt pue'maran Yompor po'ñoñ amaña allohuenacmaye' ame'ñereto añ cohuen ñoñets ñeñt huetsa Yomporeshot. Ama't atet ote't Isaías ahuat, ñeñtpa' atet ot: "Ama Nompore eseshaye' ame'ñenayo ñeñt atet o' neserrpare'tatuanet." Arrpa' allohua ñeñt atet ote't Isaías ahuat.

¹⁷ Tarraña ama't atteña' elloña napa' o'ch notas, e'ñe yeserrpare'teñoñ Cristo po'ñoñ, acheñenesha'ñapa' o'ch e'mñoteñet. Allochña' e'ñe pue'mñoteño'tetpa' o'ch ame'ñeret Cristo.

¹⁸ Ñato' sapa' çhate' sotenapañ judionesha'pa' ñato' amate' pue'mareto añ cohuen ñoñets ñeñt huetsa Yomporeshot. Tarraña napa' o'ch notas, po'ñoçhca'ye pue'maret tarro'mar atet oten Yompor po'ñoñ:

Ñeñt a'potene' Yompor po'ñoñpa' o' eñotatyaset erracmañen arr patsro, o' epa'huamocha Yompor po'ñoñ errañaren.

19 Te'ña sapa' ñato' čhate' sotenapañ judionesha' ñeñtara israelena'tarpa' ñato' amate' čhenaneto pueyochreto ñeñt atet cotape'chen Yompor. Tarraña napa' o'ch notas, po'ñočhca'ye eñoteñetañ Yomporñapa' o'ch ame'ñaterrana ñaña po'poñ acheñ ñeñt ama judioneshayaye. Ñehua, ñanompa' o'ch neyerpaterrsa ñeñt atet ote't Moisés. Moisés ahua'tpa' ahuo't quellcanet añ ñoñets ñeñt atet och Yompor, ñeñtpa' atet ot Yompor:

Napa' o'ch name'ñatera po'poñ acheñenesha' ñeñt sapa' atta senteñ atet ñerra'mrrate' ama nechemereye' nepenaneto ñaña atta senteñ ñerra'mrrate' ama es eñoteneto. Tarraña napa' o'ch name'ñatuerranet ñetpa' sañapa' e'ñe sempa'teñoñenpa' o'ch se'moñe'terranet, tarro'mar allempo ñetpa' o'ch nechemeresha' neperranet ñamet. Arrpa' allohua ñeñt Moisés po'ñoñ ñeñt atet och Yompor ahua't.

20 Allo'tpa' ñaña Isaías ahua't ñaña'apa' ama mecha'tenano judionesha'. Ñapa' ahuo't eñotatanet ñeñt atet och Yompor, ñeñtpa' atet ot Yompor:

Po'poñ acheñ ñeñt ama judioneshayaye ama't ñetpa' ama eseshaye' ne'nenaye, ñetñapa' o' enterrnet. Ama't ama eseshaye' na'p'to'tenaye errotenente'ña na ñeñt atet nepena, tarraña nañapa' o'ch neñotaterranet ñeñt atet nepena.

21 Ñaña ellonet Isaíaspa' serrpare'te't atet'cha' perra judionesha' ñeñt atet eñorena Yompor ñocpuet, ñeñtpa' atet ot Yompor: "Napa' nellapene'tcha' chore'tame'tene' añ acheñeneshar attoch ñetpa' o'ch ame'ñerrnet. Tarraña amachña eseshaye' name'ñenayo, čhachña po'poñ entuennet allohuenet."

11

Atto judionesha'pa' a'ypo'ñare'ttenetañ, tarraña ama poctacmaye' a'ypo'ñenanetoña Yompor

¹ Tarraña ama't atteñ, napa' o'ch notas, po'ñočh Yomporpa' ama e'ñe poctacmo' a'ypo'ña'huerrano pueyochreshačhno, ñeñtareta ñeñtet israelena'tarnesha'. Atet ñerra'm na, napa'čho'ña israelena'taren tarro'mar napa' po'mrenñen Abrahamañ ñeñtara Benjamíñeñ mereñtsoren.

² Yomporpa' ama a'ypo'ña'huerrano pueyochreshačhno. Ñetpa' e'ñe eñotuanete't ahua't ñeñt'cha' pueyochreneshačhno pa'. Ñaña napa' neñoteñ amach a'ypo'ña'huerraneto, tarro'mar ñeñtpa' atet aquellca'huaret Yompor po'ñoño ama't ahua'toteñ. Sapa' ama't seyerpuenoña ñeñt atet pe't Elías ahua't. Ñapa' ahuo't otteñe'chan israelnesha' e'ñe puema'yocheñoñ Yompor.

³ Ñeñtpa' atet otan Yompor ahua't: "Nompore, namo'tsesha' ñeñtara israelena'tarpa' epaye' muetsanatennapet ñeñt pa'mtene' peñoñ. Ama't ñaña Nompore ñeñt altar ñeñt allot yesherbepenpa' o' e'ñe tore'tatuonapet. Ama't napa' o' e'ñe naptama ñeñten pame'ñenaya. Ama't te' Nompore napa'čho'ña o'patennet ahuo'ch muetsanet naña." Arrpa' allohua ñeñt atet otteñe'chane't Elías pamo'tsesha' Yomporesho ahua't.

⁴ Arrñapa' atto eñorana'tana Yompor Elías ñeñtpa' atet och: "Amaca' paptayaya ñeñtep name'ñenaya, elloña eñallmeñ cančhroch mil israelena'tarnesha' ñeñt name'ñenaya ñeñt ama concorpana'tenana' ma'yochaya ñeñt ayečhcataret ñeñt sochenet Baal. Ñetñapa' nenenanet ellonet nocop." Arrpa' allohua ñeñt atet neyerpatensa atet ote't ahua't Yompor allempo eñorana'tana Elías.

⁵ Ñaña atet ñerra'm te'pa' attecma pena Yompor. Ama allohuenacmaye' a'ypo'ñenanetoña Yompor. Ñaña'p' ama't puesheña'ttsapa' ahuo't ye'cherranet allochña'p' attochña e'ñe puemuereñoñanetpa' o'ch a'queshp'aterranet.

⁶ Tarraña e'ñe puemuereñoñanet ahuo't a'queshp'atanet. Amaña añoñeyaye atto cohuen es ye'chcatyenet ñet. Tarro'mar ñeñ' cohuen ye'chcatyenet ñerra'm allo a'queshp'atenetaña'p' Yomporña puemuereña'p' amate' a'queshp'atane'ye' yenteñe.

⁷ Ñeñto'marña yeñoteñ, israelena'tarpa' ama allohuenacmaye' enterreto ñeñ' e'nenet. Ñehua, ñeñ' e'nenetpa' ñeñ'p' attoch e'ñe pocte' enter-ranet Yompor. Puesheña'ttsa enterre' ñeñ' ye'chena Yompor. Tarraña po'potantañña'p' ama enterreto ñeñ' atet muenen Yompor ñeñ' attoch e'ñe pocte' entuerrey tarro'mar ñetpa' chocma echarrtenanet pueyo'chreto o'ch pet ñeñ' atet muenen Yompor.

⁸ Ñetña'p' o' e'ñe atet p'ohuet ñeñ' e'ñe atet anuaret Yompor po'ñoño ama't ahua'toteñ. Ñeñ'p' atet oten: "Yomporpa' ñach ama muenatahueto o'ch es chapahuet pueyo'chreto. Ama'tcha' cho es entenetañ ñeñ' atet pena Yomporpa' amach chenaneo pueyo'chreto ñeñ' atet muenen Yompor. Ñaña ama'tcha' e'mñoteññañetañ Yompor po'ñoña'p' amach chapaneto pueyo'chreto ama't ahua'ta ñeñ' atet muenen Yompor. Ama't teme'ttsenpa' attecma penet." Arrpa' allohua ñeñ' atet ote't Isaías ñeñ'cha' atet perra judionesha'.

⁹ Elloña Davidpa'cho'ña ñapa' atet ote't ahua't, ñeñ'p' atet ot:

Judionesha'p' nanac a'nateña Yompor. Shonte' esocmañen echenet ñeñ' alloch rrallme'chapretannenet. Tarraña ñeñ'p' cha shequënanet tarro'mar ñetpa' otenapuetañ Yomporpa' e'ñe'te' pocte' entenanet. Tarraña ñeñ'p' ama atteyaye. Ñeñ'p' ñeñ'cha'ña a'chencaterrahuet. Attoch e'ñe tsa'tatuerranet.

¹⁰ Ellopa' alla oterrerr David ñocpuet, ñeñ'p' atet ot:

Arepa'ch es chapahueto pueyo'chreto ñeñ' atet muenen Yompor, attetach ñerra'mrrate' aporo'ye't ñeñ' amach enteno. Chocmuepa'ch amue-ro'chtatarettenet e'ñech attet ñerra'mrrate' eñerr a'mo'ca'nenahuet ñeñ' nanac amue-ro'chtatañ.

Atto Yomporpa' a'ypo'ñaneñ judionesha', ñeñ'p' añecop attoch a'queshp'aterran ñaña ñeñ' ama judioneshayaye

¹¹ Tarraña ama't atarr atpare'tena judionesha', napa' o'ch notas, amach e'ñe a'ypo'ña'huereto poctacma Yompor. Tarro'mar e'ñe patpare'teño'tet ñetpa' attoña Yomporpa' ahuo't ame'ñaterrana po'poñ acheñ ñeñ' ama judioneshayaye attoch a'queshp'aterranet ñamet. Attochña judionesha'pa'cho'ña e'ñe puempa'teño'tet Yomporpa' ñato' o'ch alla ame'ñeret Yompor e'ñe cohuen.

¹² Atto atpare'tenan judionesha' Yomporpa' po'poñe'chnoña acheñenesha' arr patsropa' ahuo't chapanet attoch ame'ñeret ñamet Yompor. Ñehua, atto ama't patpare'teño'tetpa' yenpueñet po'poñ acheñ ñeñ' ama judioneshayaye, yapa' yeñoteñ esempohuañen allempoch alla ame'ña'hueret Yomporpa' elloña pame'ña'hueño'tetpa' nanaccha' yenpueret po'poñ acheñ ñeñ' ama ju-dioneshayaye.

13 Ñeñt'pa' atet notenes ñeñtes ama judioneshayayso tarro'mar napa' allsensareten nach serrpare'tene' Yompor po'ñoñ socop ñeñtes ama judioneshayayso. Ñeñto'marña napa' nocshena, atarr cohuen asherben nenteñ ñeñt atet llesensenen Yompor.

14 Tarro'mar allochñapa' attoch name'ñatera ñeñt ama't ama judioneshayaye. Attochña ñato' judionesha' ñeñt e'ñe namo'tsna'taranetpa' e'ñe puempa'teño'tet Yomporpa' o'ch alla mueneret o'ch ame'ñerret ello atet sepena sa. Allochñapa' attochña a'queshpataretterret ñamet, ama't puesheña'ttso'a.

15 Tarro'mar ñeñt atto Yomporpa' ahuo't a'ypo'ñan judionesha', ñeñt'pa' añecop attoch amo'tsterrana po'poñechno acheñenesha' arr patsro ñeñt ama judioneshayaye. Ñaña yapa' yeñoteñ ñerra'm esempohuañen allempoch judionesha'pa' o'ch alla ame'ña'hueret Yompor, attochña o'ch alla aguërranet; ñetña allempopa' chach otterret ñerra'mrrate' rromot o' tantuerret.

16 Tarro'mar atto ñeñt ñanom judioneshatatset' ahua'tpa' ñetpa' anarettete't Partsocop, allochñapa' po'ñrenñenesha'pa'cho'ña ñetpa' acraretterretcha' ñamet e'ñe attecma. Ñato' o'ch yetma'ntacha atet pete't ahua't pocrramñ ñeñt nete't Partsocop. Ñeñt ñenma't pocrrametpa' ahuo'ch yoreñet coñe't ñeñt nanac cohuen ñeñt'cha' nenet Yomporecop. Ñaña atto ñeñt ñanom pocrramñ yorenet Partsocoppa' ñeñt'pa' e'ñe cohuen, añña allot yoret pocrrametpa' ñeñtña pocrramet orapa' e'ñech cohuenare'. Ñaña ñato' o'ch yetma'ntacha po'poñ ñeñt atet pena tsachrech. Ñehua, ñerra'm erra'tsen tsach ñerra'm puerchochno e'ñe cohuenare' puetacrechnopa'cho'ña e'ñech cohuenare'.

17 Te'pa' ñeñtes ama judioneshayayso napa' o'ch notas, Yomporpa' ahuo't ellopa'tetstatan patantarr judionesha' ñeñt atpare'tene' ña. Allochñapa' attoch sapa' o'ch separrocmaterr epas ñeñt ame'ñenaya Yompor. Ñato' o'ch netma'ntacha atet pena tsach ñeñt otenet olivoch. Ñehua, judionesha'pa' ñetpa' attet ñerra'mrrate' olivoch ñeñt e'ñe cohuen narmets. Tarraña ñato' ñeñt allpon puetaquërpa' ahuo't pecha'tam'psset ahuo't huapore'chet. Allochñapa' attoch a'tapa'llateret epuet ñeñt puetsato'mar olivochtaquër ñeñt ama narmetsoyaye. Sa ñeñtes ama judioneshayaysopa' sapa' aña puetaquër sepene' ñeñt puetsato'mar olivochtaquër. Te'ñapa' o' a'tapa'llataterretset olivochtacro allot apecha'taret ñeñt huapore'taret. Allochñapa' attochña sapa'cho'ña o'ch separrocmaterr epas ñeñt ame'ñenaya Yompor, ñaña attoch sagapapreter Yompor pa'nateña ñeñt atet otane't Yompor judionesha' pa'tañneshañ ahua't.

18 Tarraña ama't atteñpa' sapa' amach sañeña nanac asherben sentatsterro. Ñaña amach sotatsto o'huañte' sherbenña añ judionesha' ñeñt toma'ntenaya olivochtaquër ñeñt huapore'taret, tarro'mar sapa' señoche'pa'ch allotca'yeña huenaña sa sehuamenc tsachrechot ñeñt atma'ntataret judionesha' pa'tañneshañ ahua't. Ama atteyayso ñerra'm ñeñt e'ñe puetacres o'ch ahuamencat sepoñ puerech, tarro'mar ama atteyaye, puerechña e'ñe ahuamencat sepene'ña sa.

19 Ñeñtes ama judioneshayayso, sapa' chate' sotenapañ so'te'ña nanac sherbets ñeñto'maro' Yomporpa' ahuo't pecha'tam'psan judionesha' olivochtacro't allochñapa' atto'ch sapa' o'ch e'ñe separrocmaterr.

20 Tarraña napa' o'ch notas, ama't po'ño'ch o' a'ypo'ñare'tta judionesha' añecopña a'ypo'ñare'tterret e'ñe patpare'teño'tet Yompor. Ñehua, te'ña sapa' e'ñe seyemteño'ta Yompor o' separrocmaterr sa. Ñeñto'marña o'ch notas,

amach sommo'chatsto, e'ñepa'chña semcha'na'teñoť same'ñeña Yompor.

21 Tarro'mar atto Yomporpa' ahuo't huapore'tan olivochtaquër ñeñť e'ñe puetacra ñeñť toma'ntenaya judionesha' ñeñť ama ame'ñenayo ña, sapa'cho'ña ñerra'm attach sepena sañaapa' ahupore'taretescha' saña.

22 Señoche'pa'ch po'ño'ch Yomporpa' atarr cohuen amueraña. Tarraña ama't amueraña'pa' ama allocchama'metsoyaye, tarro'mar ñapa' chocmach tsa'taterrana ñeñť ama ame'ñenayo ña. Ñerra'm chocmach seyemteña atto nanac muerensa ñaña'pa' e'ñech cohuen entenes. Ñerra'm amach atet seřopa' sapa'cho'ña ahupore'taretescha' atet ñerra'm tsachtaquër.

23 Ñaña ama't judionesha' ñeñť a'ypo'ñarettetsapa' ñerra'm o'ch alla ame'ña'hueret Yompor, ñaña'pa' o'ch alla parrocmataterranet po'pocheño. Tarro'mar Yomporpa' nanac ahua'mencat, ña po'huamencotpa' o'ch alla parrocmataterranet po'pocheño.

24 Tarro'mar sa ñeñtes ama judioneshayayso Yomporpa' e'ñe pocte' eñch o'ch parrocmataterres, ama't sapa' atet entenes ñerra'mrate' nanac al-laparo'tsenes atet pena ñeñť puetsato'mar olivoch. Ñaña sapa' apech-tacre'charetes po'pchañoť, ñaña'pa' ahuo't a'parrocmaterres olivochtacro ñeñť narmets olivoch ama't sapa' ama e'ñe puetacreyayso ñeñť narmets olivoch. Atto pocte' eñch Yompor ñeñť atet ponas sa, elloña judione-sha'pa' nanaccha' cohuen enterranet o'ch alla parrocmataterranet, o'ch alla puetaquër paterranet olivoch ñeñť e'ñe ño puetaquër.

Atto judionesha'pa' a'queshpataretterretcha' ñamet esempohuañen

25 Te'pa' o'ch masheñeshacha' ñaña nochaneshacha' neñotatas ñeñť ahuatoteñ ama eñotpahuoyaye. Ñeñtes ama judioneshayayso napa' nemneñ o'ch e'ñe seño'ch allochña'pa' attoch amach sotařsa'tatsto sapa' atarro' es señoten. Ñeñť atet atpare'tena patantarr israelena'tarpa' ñeñťpa' mamecpa atet muenatenanet Yompor tarremphuach allempoch e'ñe etsotua attoch ame'ña'huerra allpon acheñenesha' ñeñť ama judioneshayaye.

26 Allempochña allohuen israelena'tarnesha'pa' a'queshpataretterretcha' ñamet. O'ch etsoterra e'ñe atet aquellca'huaret Yompor po'ñoñ ahuatoteñ, ñeñťpa' atet ote't Yompor:

Ñeñťcha' a'queshpaterahuetpa' huapach. Arroťcha' huapa ñeñť anet-serpa' añ pa'so'cheñ Sión. Ñeñťo'marña pamo'tsna'tarcha' posan israelena'tarnesha'. O'ch huapapa' a'huañañperrancha' Jacoboñ po'mreñeñ* ñeñť atto nanac atpare'teñet Yompor.

27 Allempochña nahuanmamperranet po'chñaretpa' allempochña etsoterra ñeñť atet notanete't ahuať ñeñťcha' atet neperranet esempo. Arrpa' allohua ñeñť atet ot Yompor ahuať.

28 Tarraña te' Yomporpa' atet entenanet ñerra'mrate' ñeñť e'moñe'tene' tarro'mar ñetpa' ama mueneto o'ch ame'ñeññañet po'ñoñ ñeñť alloch po'ño'ch yequeshperra. Tarro'mar atet pena allochña'pa' o'ch sa'queshpataretterra saña ñeñtes ama judioneshayayso. Tarro'mar Yomporpa' ahuatoteñ acrane't judionesha' ñeñťcha' atarr morrentena tarro'mar ñeñť pa'tañneshañ pete'tpa' ña a'crahuete't ahuať ñeñťcha' atarr morrentena.

29 Tarro'mar Yomporpa' ama puenesho po'ñoñ. Atet otanete't ahuať ñeñťcha' o'pataterranetpa' e'ñech etsotuerra. Ñaña atet otanete't ñeñťcha'

* 11:26 Ñeñť otenet israelena'tarnesha', ñaña síono'marnesha', ñaña Jacob po'mreñeñ, ñaña jerusaléño'marnesha' ñetpa' ñeñfaret judioneshet.

atet chore'terranet attoch e'ñe ame'ña'hueretpa' ñeñtpa'cho'ña e'ñech et-sotuerra.

³⁰ Ahuat sapa' atarr satpare'che't Yompor, te'ñapa' judionesha' atet petsa atet satpare'te't sa ahuat. Tarraña te'pa' allempo atpare'ta judionesha'pa' ñeñtpa' attoch Yomporpa' o'ch muererrsa samña.

³¹ Ñaña te'pa' atto judionesha' attecma atpare'teñet Yompor atet satpare'che't samña ahuat, ñetpa'cho'ña muererranetcha' atet muerensa samña te'.

³² Tarro'mar atet penaña Yompor. Ñapa' muenatenan ora pa'namen acheñ o'ch atpare'tyeñet allochñapa' attochña ellopa' o'ch alla muererraneterr allo-huenet.

Atto Yomporpa' ama eñotpahuoyaye ñeñt e'ñe atet cotape'chen ña

³³ Yomporpa' puemorrenteño'tpa' esocmañen apa'yeney, ñeñtara Parets ñeñt atarr eñotañtetsa. Shonte' esocmañen eñoten pa'namen. Ya arromña'eypa' amate' errotenot yeñotuoñeña ñeñt atet penaña ña. Ñaña ama't mameshapa' amate' errotenot chaponayoña ya yeyochro ñeñt ora allpon ñeñt atet cotape'chyen ña.

³⁴ "Tarro'mar yapa' ama't puesheñarrofeya amate' errotenot yeñotuoña ora ñeñt atet cotape'chen Yompor. Ñaña yapa' ama't puesheñarrofeya amate' errotenot yoctape'chacheña Parets.

³⁵ Ñaña yapa' ama't puesheñarrofeyapa' amate' errotenot yetsa'choña Yompor attoch aphuerrey ñeñt yemnen ya."

³⁶ Tarro'mar ama't allohuen ñeñt allpon es eñalletyetsa e'ñe Yomporeshotecma huena, e'ñe ña po'huamencot eñalletena, ñaña e'ñe ñocop ye'chcatue. E'ñepa'ch ya'ye'chochtateññañ tayoteñ ama't errponañohuen. Ñeñtpa' attetepa'ch Nompore.

12

Atto añ poctetsa o'ch e'ñe yaphuer Yompor yechets

¹ Ñeñto'marña te'pa' o'ch masheñneshacha' ñaña no'chaneshacha' notas, atto Yomporpa' atarr muerenya, yapa' añ e'ñe poctetsa o'ch yaphuer Yompor yechets. O'ch yaphuer allohuen yechets atet ñerra'mrrate' ñeñt muetsete't ahuat Yomporecop ñeñtcha' nenet ñocop. Tarraña ya yechets e'ñech betna'tot yaphuer Yompor tarro'mar ñeñtpa' e'ñech ñocpa, ñeñtcha' nanac coshatene' ña. Attochña e'ñech yeyochrocmañen cohuen yoc'ter Yompor.

² Allochñapa' amach allo'na atet es yepatse'tyesneno ñeñt atet yeychen ya añe patsro, ellochña yoctape'cherr etserra attoch etserrataterrnay Yompor yocta'ña. Attochña e'ñe cohuen seño'ch erra'tsente'ña muenen Yompor ñeñt e'ñe cohuen enten ña, ñaña ñeñtcha'ña coshatene' e'ñe poctacma.

Atto Yomporpa' ama pocteye' entenye o'ch yot yañeña yo'ña nanac sherbets

³ Yompor puemuereño'tenpa' ahuo't llesensenen attoch nach torretsa ñocop. Ñeñto'marña te'pa' notenes ñeñt atet muenen Yompor. Ama't puesheñarrofesapa' amach sentatsto sañeña ñeñteso' ello nanac sherbets. Añcha'ña pocte' sentena allpon sesherven atto puesheña'ttsos Yomporpa' ahuo't apa'yesas attoch e'ñe seyemteño't setorra'yesa ñocop.

⁴ Ñato' o'ch yetma'ntacha ñeñt atet pena yechets. Ñehua, yechetspa' ama e'ñe patrrayaya, atet ñerra'm ye'clle' ñaña yot ñaña yetac. Ñaña ama e'ñe patrrayaye sherbenye, e'ñe po'poñe'ttsocma sherbeney. Tarraña ama't

po'poñe'ttsocma sherbeneypa' e'ñe yocma yechets yeḡohueñ, tarro'mar e'ñe paḡrra yechets atet petsa.

⁵ Ñaña attecma yepena allohueneŷ ñeñḡey ame'ñenaya Cristo. Ama't shonteyeñ ñaña ama'tcha' po'poñe'ttsocma yetorra'yesa ñocoppa' ñaña'apa' e'ñech paḡrra enteney, atet ñerra'mrrate' e'ñe po'chets peney. Attochña e'ñech yeparrocmaten e'ñe puesheña'ttsoy epay Cristo. Attoña e'ñe yeparrocmateñoŷ Cristopa' o'ch yeparrocmatuahua allohueneŷ ñeñḡey ame'ñenaya Cristo.

⁶ E'ñech po'poñe'ttsocma yetorra'yena Yomporecop, tarro'mar ñapa' ahuo't apa'yeseŷ e'ñe po'poñe'ttsocma ñeñḡcha' atet yesherbe' e'ñe cohuen. Ñehua, ñerra'm añ apueneŷ alloch ya'potoñ po'ñoñpa' ya'potepa'ch errponcha' yematenya.

⁷ Amapa' ñerra'm añ apueneŷ attoch yesherbe' po'psheññechno e'ñepa'chña cohuen yesherenanet. Amapa' ñerra'm añ apueneŷ attoch yeyḡhateñ po'psheññechno e'ñepa'chña cohuen yeyḡhatyenanet.

⁸ Amapa' ñerra'm añ yeñoten attoch yocḡape'chatyesanet ñeñḡ cohuentetsa Yomporecop, e'ñepa'chña cohuen yocḡape'chateñ acheñenesha'. Amapa' ñerra'm añ yeñoten attoch es yapa'yes acheñenesha' ñeñḡ es pallta'yetsapa' e'ñepa'chña yeñmañeshocmañen es yapa'yenanet, amachña ḡha yempa'tana'tatsche. Amapa' ñerra'm añ yeñoten attoch ya'mḡcha'tareḡtena, e'ñepa'chña yocsheñeshocmañen ya'mḡcha'tareḡtena, amachña ḡha yemuenme'chatsche. Amapa' ñerra'm añ yeñoten attoch yeyenpue' ñeñḡ mueroḡhtetsa, e'ñepa'chña yocsheñesha' yeyenpuenanet.

Atetcha' ḡa'yesa ñeñḡ pueyochresha' pen Cristo

⁹ Amorrentanna'tpahuepa'ch yentannena e'ñe yeñmañeshocmañen. Ñaña allohuen ñeñḡ ama cohuenaye' enteno Yompor o'ch e'ñe ya'mñechya nanac attoch ya'ypo'ñe'. Tarraña allohuen ñeñḡ e'ñe cohuen enten Yomporpa' amach ḡha ya'ypo'ñatsche.

¹⁰ Ñaña añ poḡtetsa amorrentanna'tpo'ch yentannena allohueneŷ atet ñerra'm po'ñoḡh e'ñe yemo'nasheñ yeḡannena. O'ch atet yeñch po'psheñeñ ñapa' atarr sherben, amachña yañeña nanac asherben entetso.

¹¹ Amach ḡha seḡllana'tatsto torraya ñeñḡ cohuen enten Yompor. Añcha'ña e'ñech seyoḡhrocmañen sesherbe' Yepartseshar atto ahua mencaḡ penes Parets Puecamquēñ.

¹² Ñaña e'ñepa'ch socshena tarro'mar yapa' e'ñe yeyemteñoŷ yecuenña ñeñḡ o'patatenya Yompor. Ñaña ñerra'm esempo huaponasa mueroḡchteñets e'ñepa'chña sa'huante'. Ñaña ḡhocmuepa'chña sema'yocheña Yompor.

¹³ Ñaña ñeñḡ pueyochresha' pen Yompor ñerra'm esempo es pallta'yenet, sañapa' sapa'yesanetcha' ñeñḡ pallta'yenet. Ñaña e'ñepa'chña cohuen sapa'pannena sepaḡcillo.

¹⁴ Ñaña añ poḡtetsa o'ch senamoñ Yompor attoch a'natana ñeñḡ se'moñe'tene'. Amachña ḡha sarrnomare'tatscho.

¹⁵ Ñaña ñerra'm esempo esesha' atarr coshetsa, sapa'ḡho'ña socshapretanetepa'ch. Ñaña ñerra'm esempo esesha' yahuetḡsa puellquēñoŷ, sapa'ḡho'ña sellcapretanetepa'ch.

¹⁶ Amachña ḡha atsrre'moḡhen sentanna'teno. Ñaña amach añ se'natsto attoch sommo'chena. Añcha'ña poḡte' senten o'ch seyemteña ñeñḡ ama esoshe'maye' entyeneto. Ñaña amach sentatsto sañeña, so'ña e'ñe sapuet atarro' es señoten.

17 Ñaña ñerra'm po'psheñeñ erroten p̄aspa' sapa' amach setsa'tatatsche ama't coñe'ta. Sapa' añcha'ña e'ñe sema'yochra ñeñt̄ chocma sepena ñeñt̄ cohuen enten allohuen acheñenesha'.

18 E'ñe puesheña'ttsospa' chochña se'nyes ñeñt̄cha' atet sepa'yey ñeñt̄ pocte' enten allohuen acheñenesha'; attochña e'ñe cohuen sentannena. Allochñapa' o'ch socrrena e'ñe cohuen muechet e'ñe sagattsa ñeñt̄ parro'marneshas.

19 Te' o'ch masheñeshacha' ñaña nochaneshacha' e'ñe nemorrenteño'tespa' o'ch notas, ñerra'm esempo po'psheñeñ erro't p̄aspa' sañapa' ama't coñe'tapa' amach setsa'tatatsche. Añcha'ña semnat Yompor atto ñapa' tsa'taterranetcha'. Tarro'mar ñeñt̄pa' atet oten Yompor po'ñoñ ñeñt̄ anuare't ahuato'teñ. Allempo atet otanete't Yompor, ñeñt̄pa' atet ot: "Napa' naña ñeñten atsa'tatañen, napa' nach tsa'tatuerrahuet." Arrpa' allohua ñeñt̄ atet ote't Yompor.

20 Añcha'ña atet sepoñ ñeñt̄ se'moñe'tene' ñeñt̄ e'ñe atet oteney Yompor po'ñoñ. Ñehua, ñeñt̄pa' atet oten: "Ñeñt̄ se'moñe'tene' ñerra'm esempo cheporrenapa' sañapa' sapepa'ch ñeñt̄cha' rra'. Ñaña ñerra'm esempo oñpa'ten sañapa' sapepa'ch ñeñt̄cha' orr. Ñerra'm atetcha' sepe'pa' ñaña'pa' o'ch penquëna nanac. Atarrcha' atserr e'man atto penquëna. Allempoñapa' ñato' e'ñe puepenquëño'tpa' ñeñt̄cha'ña cotape'chaterre' cohuen."

21 Ñeñto'marña notas, ñerra'm esempo po'psheñeñ erro't p̄aspa' sapa' amach sañeña muenatstaye o'ch alla setsa'tatera. Añcha'ña atet sepa' ñeñt̄ e'ñe cohuentetsa. Ñerra'm atet yepenapa' e'ñe yepeño't cohuenpa' o'ch ya'huañat ñeñt̄ ama cohuenayaye.

13

Atto añ poctetsa o'ch yame'ñeña ñeñt̄ amcha'taretetyetsa añe patsro allochñapa' attoch yocrrena e'ñe cohuen muechet

1 Ñaña añ poctetsa e'ñe puesheña'ttsoypa' o'ch yame'ña ñeñt̄ amcha'taretetyetsa ñeñt̄ pueyochresha' pen gobierno'. Tarro'mar amach eñallñeña ñeñt̄cha' amcha'taretetyetsa ñerra'm ama Yompor muenatenahueto o'ch atet pet. Tarro'mar ñeñt̄ amcha'taretetyetsa arr patsropa' ñetpa' Yompor muenatenahuet o'ch atet pet.

2 Ñeñto'marña yeñoteñ ñerra'm esesha' atpare'tene' ñeñt̄ amcha'tarettetsa arr patsro ñapa' añe'na atpare'ten Yompor, tarro'mar Yomporpa' ña muenatenahuet o'ch amcha'taretetyenet arr patsro. Ñaña ñeñt̄ atpare'tene' ñeñt̄ amcha'tarettetsa arr patsro ñapa' e'ñe ñañeña patpare'teño't atsa'tatarettach.

3 Ñaña ñerra'm chocma yepa'yen ñeñt̄ cohuen enten amcha'taretpa' amach amcha'nochenaye' yenteñeña ñeñt̄ amcha'tarettetsa, tarro'mar e'ñe attotapa' amach erro't p̄a'ye. Tarraña ñeñt̄ atpare'tene' ñeñt̄ atet muenen amcha'taretpa' ñetñapa' atarrcha' amcha'nochen enteñetña amcha'tare't tarro'mar amcha'taretpa' chocmach tsa'taterranaña ñeñt̄ atpare'tene' ña. Ñehua, ñerra'm ama semno o'ch amcha'nochen señch amcha'taretpa' e'ñechña cohuen es sepa'yen, attochña amcha'taretpa' e'ñech cohuen entenes, amach erro't p̄aso ama't mamesha.

4 Tarro'mar ñeñt̄ amcha'tarettetsa arr patsropa' añ torrenet ñeñt̄ atet muenatenanet Yompor, allochñapa' attoch a'poctatenet esheccha' e'ñe cohuen yocrrena arr patsro. Tarraña ñerra'm añ atet sepen ñeñt̄ ama cohuenayayepa' pocte'ñacho'ña allochñapa' attoch semcha'teñ amcha'tare't, tarro'mar ñapa' ama orrena amcha'tare'tteno, chocmach tsa'tatana ñeñt̄

atpare'tene'. Tarro'mar ñapa' Yompor muenatene' ñapa' ñach tsa'tatenaya allohuen ñeñt atet pene' ñeñt ama cohuenayaye.

⁵ Ñeñto'marña añ pocte' o'ch yame'ñya ñeñt amcha'tarettetsa arr patsro, allochñapa' attoch amach tsa'taterrye Yompor e'ñe ya yatparñoť. Elloña ñeñt atet yame'ñena, tarro'mar e'ñe yeyochropa' yeñotena ñeñtpa' e'ñe pocte' o'ch e'ñe yame'ñena.

⁶ Ñeñto'marña ñaña añ poctetsa o'ch yetsa'ta impuesto, ñeñt atet anaret ñoñets ñeñt cobrenyet amcha'tareteshot tarro'mar ñeñt amcha'tarefetyetsa añ patsro, ñeñtpa' atet muenatenanet Yompor ñeñtcha' atet torrenet ñeñt po'taruas penet.

⁷ Chocmach setsa'ta allohuen ñeñt atet anaret ñoñets atto cobrenyet atet ñerra'm allpon quelle ñeñt enamueney amcha'taretnesha' atet ñerra'm impuestočno, chocmach setsa'cha. Ñaña achen ñeñt amcha'na'tpo' entenetpa' chocmuepa'ch semcha'na'tueñ. Ñaña achen ñeñt atarr amorrentareta'pa' chocmuepa'ch semorrentueña.

⁸ Amach esesha' setebatsto, ama't puesheñarra. Añcha'ña sepa ñeñt poctetsa socop, o'ch semorreñcha samo'ts. Tarro'mar ñerra'm e'ñe yemorrenteña yamo'tspa' attochña yetsotua ora Yompor po'ñoñ ñeñt atet anaret ñeñtcha' atet yepenat e'ñe cohuen.

⁹ Atet ñerra'm pa'terr ñoñets ñeñt atet anaret ñeñtpa' atet oten: "Amach sechtapretanna'tatsto setapor." Po'poñ ñoñetspa' ñeñtpa' atet oten: "Amach semtsanna'tatsto." Po'poñpa' atet oten: "Amach setyesatsto"; po'poñpa' atet oten: "Amach setoma'tamšatsche samo'ts." Po'poñpa' atet oten: "Amach seye'chapretanna'tatsto", ñaña eñall po'poñečno ñoñets ñeñt atet yechateney. Allohuen añ ñoñets ama't po'poñe'ttsocma atet yechateneyñ, tarraña po'ñoçhpa' e'ñe pa'trra oteney, ñeñtpa' atet oteney: "Atarrepa'chña yemorrenteña yamo'ts e'ñe atet atarr yemorrentena yañeña." Ñerra'm chocma yemorrenteña yamo'tspa' allempoña po'ñoçhpa' yetsotuach ora allohuen ñeñt atet yechatyeny po'poñe'ttsocma ñoñets ñeñt atet anaret.

¹⁰ Tarro'mar ñerra'm po'ñoçh chocma yemorrenteña yamo'tspa' amach yemno o'ch errot yeñanet te't cha yelcatenanet. Añečno atetpa' ama morrenteñtsoyaye. Ñeñto'marña yeñoteñ ñerra'm po'ñoçh chocma yemorrenteña yamo'tspa' ñeñtpa' attochña e'ñe yetsotua ora allohuen ñoñets ñeñt atet anaret ahuaťoteñ Yomporeshot.

¹¹ Atetcha' sephua ñeñt atet o' notuas, tarro'mar yeñoteñ o' chapmoch allempoch huerra Cristo, ñeñto'mar socoppa' añ poctetsa o'ch alla setanterra Cristocop amachña seçllañoña es sepa'yeno atet ñerra'm cha semuen. Tarro'mar ahuañmo'cha allempo ñanom yame'ñera Cristopa' allempo atarr atomat palltenmeñ attoch ya'qeshpataretterra. Tarraña te'pa' ama atarr atomatmeñeyaye. O' mameshamerra attoch ya'qeshpataretterra.

¹² Arr patsropa' eñall shonte' sosya'tsañečno. Ñato' o'ch yetma'ntacha atet ñerra'mrrate' yapa' checmeta yeyçhena. Tarraña te'pa' e'ñe atet pena ñerra'mrrate' o' metuamoch checmete' o' puetarenmoch, tarro'mar yapa' yeñoteñ o' chapmoch allempoch huerra Cristo. Ñeñto'marña añ poctetsa o'ch yesuanom allohuen ñeñt ama cohuenayaye ñeñt atet atma'ntataret checmete'. Añcha'ña atet ye'pa'yen ñeñt cohuen enten Yompor ñeñt atet atma'ntataret puetare'. Attochña yetorrena Yomporecop atet ñerra'mrrate' cho yeçllarena ñocop.

¹³ Añepa'chña ye'pa'yen cohuen ñeñt atet penet yeťo, ñeñt ama apencoçhenayaye ñeñtpa' ama atteyaye ñerra'm ñeñt atet penet

tsapo. Amach yoc̄tapretatsto all nanac coshena aposañētēchno, ēñe porrare'teñōtet all atarr pa'namen coshatse'tyenet. Ñaña amach yechta'yesatsto coyaneshāchno, amach atet̄ yep̄atsto ñeñ̄t pa'namen sosya'tsañēchno. Amach ye'natsto atsrre'mōchen, ñaña amach ye'mōne'tanna'tatsto ēñe yesope'cheñōt.

¹⁴ Añcha'ña ahuañencāt sepene' Yepartseshar Jesucristo, allochñapa' attoch amach semnatatsto sechets o'ch muenatse'tatas ñeñ̄t ama cohueñayaye.

14

Atto eñall ñeñ̄t epuoye' ame'ñenayañ Cristo tarro'mar ama huomencaye' penano pueyōcher Yomporecop

¹ Ñaña te'pa' o'ch notas po'poñ ñeñ̄tcha' atet̄ sepa. Ñerra'm eñall sesho acheñ ñeñ̄t ame'ñetsañ tarraña ñapa' ama huomencaye' penano pueyōcher Yomporecop tarro'mar ama e'ñe eñoteñe po'ñōch atet̄ yeyemteña Cristo, sañapa' o'ch sagāp̄ e'ñe cohuen attochña e'ñech parrocm̄a seyemteña Cristo. Tarraña amach añēcpa sagape attoch sapa' o'ch sotnare'ch tarro'mar ñapa' po'poñonēt̄ cotape'chyen.

² Atet̄ ñato' eñall acheñ ñeñ̄t ama huomencaye' penano pueyōcher Yomporecop tarro'mar ama e'ñe eñoteñe ñeñ̄t atet̄ po'ñōch yeyemteña Cristo; ñeñ̄to'marña ñapa' chach oten ama pocteyaye o'ch yerra'yes berr po'chets, añach pāterr yerren narmetsōchno. Elloña po'psheñēchno e'ñe pueyemteñōtet̄ Cristo ñetña'pa' otenet e'ñe pocte' o'ch yerra'yes ama't̄ erra'tsena rreñets.

³ Ñeñ̄tey pa'namen es rra'yetspa' amuepa'ch yentatsche ñeñ̄t̄ tōre'tetsa ñapa' ama es eñoto. Ñaña ñeñ̄t̄ es tōre'tetsapa' amuepa'ch otatsetye ya ñeñ̄tey pa'namen es rra'yets ama pocteyaye o'ch yerratse'tyes pa'namen ñeñ̄t̄ ama arrapahuoyaye. Tarro'mar Yomp̄orpa' ñaña o' agūerrey attoch pueyochresha' perrey.

⁴ Ñeñ̄to'marña yapa' yeñoteñ ama pocteyaye o'ch yotanna'tena e'ñe ya-gattsa Yomp̄or pueyochresha'pa' ama pocteyaye ñeñ̄t̄ atet̄ penet. Tarro'mar ñetpa' Ayochreshatecpuet tarro'mar ñapa' ñaña ñapuēt̄ otets atto pocte' enten̄nan pueyochresha' amapa' ñerra'm ama pocteye' entenano pueyochresha'. Ñaña Ayochreshat̄ Cristopa' chocmach e'ñe pocte' enten̄nan pueyochresha' tarro'mar ñapa' ñach ahuañencāt̄ pāhuet̄ pueyōchro.

⁵ Ñaña ñato' eñall acheñ ñeñ̄t̄ ama e'ñe eñotenaye ñeñ̄t̄ atet̄ e'ñe po'ñōch yeyemteña Cristo, ñeñ̄to'marña ñetpa' cha otenet añ̄ poctetsa o'ch yonañcha'yen pāte'tets̄ yet̄ ñeñ̄t̄cha' atet̄ yetsotayes attochña e'ñe pocte' enteney Yomp̄or. Ñaña ñato' po'psheñēchno ñeñ̄t̄ atet̄ ñerra'm yapa' otenet ama yepallteno o'ch yonañcha'yen pāte'tets̄ yet̄ ñeñ̄t̄cha' atet̄ yetsotayes tarro'mar allpon yet̄pa' Yomp̄orecma pueyēchcatuar. Tarraña puesheña'ttsoypa' yeñoche'pa'ch ñeñ̄t̄ e'ñe pocte' yentyen ya e'ñe yeyōchro ñeñ̄t̄cha' atet̄ yepa.

⁶ Tarro'mar ñerra'm esesha' onañcha'yene' yet̄ ñeñ̄t̄cha' atet̄ etsotayes, ñapa' atet̄ oten ñeñ̄t̄pa' atet̄ yame'ñeña ya Yomp̄or. Attecma yepena yaña ñeñ̄tey ama onañcha'yenaye yet̄, yapa'cho'ña atet̄ yame'ñeña Yomp̄or. Ñaña ñeñ̄tey pa'namen es rra'yetspa' yapa'cho'ña atet̄ yame'ñeña Yomp̄or, tarro'mar yeparasyoso'teñesha' Yomp̄or es yerra'yen. Attecma pena ñaña ñeñ̄t̄ es tōre'tetsa, ñetpa'cho'ña atet̄ ame'ñeñ̄et̄ Yomp̄or ñaña ñetpa' e'ñe pueparasyoso'teñeshet̄ Yomp̄or es tōre'tyenet.

⁷ Tarro'mar ama e'ñe ya yemneññoŕeye' atet es yeŕa'yeno a'ne patsro. Atto yocrrena a'ne patsropa' ñeñt'pa' ama e'ñe yaptecpayaye, ñaña allempoch yerromapa' ñeñt'pa'cho'ña ama yemneññoŕeye' yerromueno.

⁸ Tarro'mar atto yocrrena allponmat a'ne patsro ñeñt'pa' añecop attoch yesherbey Yepartseshar. Ñaña allempo yerromuenpa' ñeñt'pa' tarro'mar atet muenateney Yepartseshar. Ñeñto'marña yapa' yoten allempo yocrrena a'ne patsro ñeñt'pa' ama yaptecpaye' yocrreno, ñeñt'pa' Yepartsesharecop. Ñaña allempo yerromuen, ñeñt'pa'cho'ña ama yaptecpayaye, ñeñt'pa'cho'ña Yepartsesharecop. Ñeñto'marña ñeñt'pa' chocma atet pena tarro'mar ñapa' e'ñe o'paterrya ñaña e'ñe ñocpay.

⁹ Tarro'mar Cristopa' ñeñtecop rroma, elloñapa' alla corrrera attochña ñapa' ñach yamo'mte' yepen allohueney. Ama't allempo yocrrenmeñ, ama't ñaña allempo yerromuen, atterach yamo'mte' yepen, tarro'mar ñapa' pueñotuaran atet peney rromueñets ñaña atto yocrrena ñeñtey arromñatey.

¹⁰ Ñeñto'marña amach yotatsche yemo'nasheñ ñeñt' atet pena ñapa' ñeñt'pa' ama pocteyaye. Ñaña amach yotatsche ñapa' ama es eñoteno. Tarro'mar Cristo ñapa' ñach yoterre' errotentcha' entyerrey esempohuañen allempoch yapcherra allohueney ñesho.

¹¹ Tarro'mar Yompor po'ñoñ ñeñt' anuaret ahuatoteñpa' ñeñt' allpa' Yompor otatset' atet:

Napa' na ñeñten ama arromñateshayayno ñaña ama puenesho neñoñ. Po'ñoçhpa' atetcha' perra esempohuañen. Ora allohuen achenesha'pa' concorpanrrorterrnetcha'. Allña'pa' otuerrnetcha':
"Pa Yomporep' ñeñtep' atarr Partsop'."

¹² Attoña yeñoteñ allohueney puesheña'ttsoy Yomporpa' a'metaterreycha' ñeñt' atet o' yeñohuahuaena arr patsro.

Atto ama pocteyaye e'ñe atet yepeñoŕ ya o'ch alla ya'puerratater yemo'nasheñ

¹³ Ñeñto'mar ama pocteyaye o'ch yañeña yotanna'ta ñeñt' atet yentannena arr patsro. Añcha'ña yañeña e'ñech yeñotena ñeñt' atet yeŕa'yena ya tarro'mar ñeñt' atet yeŕa'yena yapa' ñato'rraña chate' ya'puerratater yemo'nasheñ ñerra'm ñapa' ama pocteye' entenano ñeñt' atet yeŕa'yen ya.

¹⁴ Napa' e'ñe neyemteñoŕ Yepartseshar Jesús neñoteñ e'ñe pocte' o'ch es yerra'yes tarro'mar neñoten allohuen rreñetspa' e'ñe arrapahuocma Yomporecop. Tarraña ñerra'm esesha' ama arrapahuoye' entenaye ñeñt' allohuen rreñetspa' e'ñe ñocoppa' ama pocteyaye o'ch rrenan ñeñt' rreñets.

¹⁵ Ama't e'ñe poctey o'ch yerra'yes, tarraña ñerra'm yemo'nasheñpa' ama arrapahuoye' enteñe, yapa' e'ñe ya yerreñoŕpa' ñato' o'ch yeye'chateña allempoñapa' o'ch rre' ñaña, ñaña'pa' chach enteñ ñeñt'pa' ochña'teñets Yomporecop. Atteñapa' ñato' o'ch alla puesuerran Yompor. Ñato' yerreñoŕ ama't e'ñe cohueneñpa' o'te' yequeçhpatater yemo'nasheñ Yompor. Ñeñto'marña notenes, amach yerratsto allempo, te't ñeñto'mara yequeçhpatater yemo'nasheñ Yompor. Ñaña ñerra'm atet yepeñ yemo'nasheñpa' po'ñoçhpa' ama yemorrenteño, ñeñtara yemo'nasheñ ama't Cristopa' ñocpa'na rroma.

¹⁶ Ñeñto'marña notenes, ama't poctey ñeñt' atet yeŕa'yena, tarraña ñerra'm yemo'nasheñpa' ama pocteye' enteñe, ñaña'pa' ñeñtoŕtach sasare'teney. Ñehua, ama't e'ñe poctey o'ch atet yepenañ, tarraña amach atet yeŕatsche.

17 Tarro'mar ñerra'm añ yoctenñañ Yompor po'cohuenña atto pueyochresha' peney, ñeñt'atto es yerra'yen amapa' atto es yefore'tyena, ñeñtpa' ama esoyayeña Yomporecop. Añña ñeñt'nanac sherbets attoch yoctenñañ Yompor po'cohuenña, ñeñtpa' atto e'ñe pocte' es yeßannena añe patsro, ñaña atto e'ñe cohuen yentannena attochña yocrrena e'ñe cohuen muechet, ñaña attochña Parets Puecamquëña' çhocmach coshateney yeyochro.

18 Ñerra'm atetcha' yame'ñeña Cristo, Pomporñapa' e'ñech cohuen enteney, ama't allohuen acheñenesha'pa'cho'ña e'ñech cohuen entenyet.

19 Ñeñto'marña napa' notenes, añepa'chña ye'nen ñeñt'attoch e'ñe yeparrocmaterr allohueney ñaña attochña e'ñe cohuen yeyenpannena. Allochñapa' allo'nach e'ñe huomenc yeßanna'tnena yeyocher Yomporecop.

20 E'ñe ya yerreño't po'chetspa' amach ya'huañatatsterrñañe po'psheñeñ ñeñt'atet ame'ñenanañ Yompor. Ama't allohuen rreñtsoçhno cohuenacmañ ñeñt'cha' yerra'yeneñ, tarraña ñerra'm yerreño't o'ch alla ya'puerratater po'psheñeñ attoch o'huañcha' ame'ñenana Cristo, ñeñtepñapa' e'ñe pocte' amach yerratsto ñeñt'cha' a'puerrataterre' po'psheñeñ, tarro'mar atetpa' ama cohuenaye' enteñe Yompor.

21 Ñeñto'marña notenes, ama't erra'tsena ñeñt'atet yepeño't po'psheñeñpa' o'ch alla ya'puerratater, ñeñtepñapa' amach atet yeßatsto, allochñapa' amach puerrerro ama't puesheñarra ñeñt'ame'ñenaya Cristo. Atet ñerra'm allempo yerren berr po'chets ñaña allempo yorren co'nes,* ñerra'm atet yepeño't o'ch alla ya'puerratater yemo'nasheñ, ñeñtepñapa' añ poctetsa amach yerratsto berr po'chets, amach yorratsto ñaña co'nes, tarro'mar allempopa' ama cohuenaye' enteñe Yompor.

22 Ñerra'm e'ñe pame'ñeño't Yompor peñotena ñeñt'atet peña'yena ñeñtpa' e'ñe pocte' entapreteneß Yompor, tarraña papa' e'ñech peyoçhro poctape'cheñ Yompor atet, amachña cha pe'matare'tatstoña allo. Nanac cosheñtso'tseney ñerra'm yeñotena po'ñoçh e'ñe pocte' entapreteney Yompor ñeñt'atet es yeña'yen, tarro'mar yeyochropa' ama epuoye' es yeña'yeno.

23 Tarraña ñerra'm esesha' ñeñt'epuoye' es rra'yenpa' ñocoppa' ama pocteyaye o'ch rren, ñañaapa' ñeñtaña po'chñar pen. Tarro'mar ama pueñmañeshocmañenaye' es rreno, ñaña yapa' yeñoteñ ñerra'm ama yeñmañeshocmañenaye' es yeña'yeno, ñeñtpa' ñeñta yo'chñar entennay Yompor.

15

Atto añcha'ña ye'nen ñeñt' e'ñe pocte' enten yemo'nasheñ

1 Ñeñto'marña napa' notenes, ñeñtey e'ñe huomenc pene' yeyocher Yomporecop, ñeñtey ama epuoye' yame'ñeño Yompor, añña poctetsa o'ch yeyenpueñ yemo'nasheñ ñeñt'ama huomencaye' penaye pueyocher Yomporecop ñeñt'çhocma epuoye' ame'ñenana Yompor. Ñeñtpa' atetcha' yeyenpueñ, amachña añña atet es yeña'yeno ñeñt'atet yemnen ya.

2 Añcha'ña ye'nen o'ch atet yepen ñeñt'e'ñe pocte' enten yemo'nasheñ. Ñeñtpa' atetcha' yeyenpueñ allochñapa' o'ch e'ñe huomenc pa'nman ñaña pueyocher Yomporecop, allochñapa' amach allo'na epuoye' ame'ñenano Yompor.

3 Amach añña atet es yeña'yeno ñeñt'atet yemnen ya tarro'mar Cristopa' ama añña atet pa'yese'te ñeñt'atet muene't e'ñe ñañaña. Añña pa'yese't ñeñt'

* 14:21 Ñehua, Pablo añ toma'ntatanet vino ñeñt'poco'nes penet all pa'nyo.

muenache't Pompor. Tarro'mar ñapa' ñeñtecopña muerochte't ñeñt atet muenache't Pompor. Ñeñto'marña Cristopa' atet otane't Pompor, ñeñtpa' atet och: "Pa e'moñe'tetañpa' attoña sasare'tennet." Attoña e'ñe etsoterra ñoñets ñeñt atet aquellca'huaret ama't ahuatoteñ.

⁴ Ñaña allohuen añ ñoñets ñeñt atet aquellca'huaret ahuatoteñ, ñeñtpa' yocpa'naña atet anaret. Allochñapa' attoch yapa'cho'ña o'ch yeçhaterryet ñeñt atet muenen Yompor. Allochñapa' attochña huomenc yepen yeyoçher Yomporecop. Ñaña añ ñoñets ñeñt atet aquellca'huaret ahuatoteñpa' nanaccha' coshaterrey allochñapa' attotcha'ña e'ñe yocsheñesha' yeyemteññaña Yompor ñeñt o'patatenya.

⁵ Yompor ñapa' ñeñt ahuamencat yepene' ñaña ñapa' ñeñtña yocshatene' yeyoçhro. Ñaña ñepa'chña e'ñe señotaterre', allochñapa' attoch e'ñe cohuen seyçherr ñeñt atet muenen Cristo Jesús, allochñapa' e'ñech cohuen sentanena.

⁶ Allochñapa' allohuenespa' e'ñech parrocoma sa'ye'choçhtateññañ Yompor, ñeñtara Yepartseshar Jesucristo Pompor.

Atto ama't ñeñt ama judioneshayayepa' ahuo't aserrpare'tatarettet añ cohuen ñoñets alloch yequeshperra

⁷ Ñeñto'marña napa' notenes, e'ñech cohuen es sepanna'tyena allohuenes e'ñe atet cohuen o' perrey Cristo, allochñapa' attoch seyemteñoñ parro cohuencha' sa'cshapretarettena Yompor.

⁸ Ñaña te'pa' o'ch notas, Cristopa' ahuo't huapa arr patsro attoch torrosa judioneshacop. Allochñapa' attoch allohuen acheñenesha'pa' o'ch çhapanet pueyoçhreto, Yomporpa' ama puenesho po'ñoñ. Ñeñt e'ñe atet otane't judionesha' pa'tañneshañ ahuatpa' ñeñtcha' atet muenaterranet esempo, ñeñtpa' çhocmachña e'ñe etsoterra poctacma.

⁹ Ñeñtecopña huapa ñaña attochña acheñenesha' ñeñt ama judioneshayaye ñetpa'cho'ña o'ch aye'choçhtatoñet ñamet Yompor tarro'mar Yomporpa' ahuo't muerenanet ñamet. Attoña etsoterra ñoñets ñeñt quellca'huet ahuat atet ñerra'mrrate' e'ñe Cristo ote' Pompor, ñeñtpa' atet ot:

Ñeñto'marña napa' o'ch na'ye'choçhtatonap allo'tsa'yen acheñenesha' ñeñt ama judioneshayaye, allñapa' na'çhoteneçcha' nemorreñesha'.

¹⁰ Ñaña po'poñ ñoñets ñeñt atet aquellca'huaret ahuatoteñ, ñeñtpa' atet oten: Ñaña sa ñeñtes po'poñ acheñes ñeñtes ama judioneshayaysopa' socshepa'ch samña, atet coshena judionesha' ñeñt pueyoçhresha' pen Yompor.

¹¹ Ñaña po'poñ ñoñets ñeñtpa' atet oten:

Ñeñtes ama judioneshayaysopa' sa'ye'choçhtatoñepa'ch Yompor, ama't allohuenes pa'namen acheñes sa'ye'choçhtatoñepa'ch Yompor.

¹² Elloña Isaíaspa'cho'ña atet ote't ahuat:

Esempopa' orrterrach pueheñarr ñeñt Isai* po'mreñeñ. Ñapa' orrterrach allochñapa' ñeñtcha' pa'mcha'tareter perr allohuen pa'namen acheñenesha', ñaña allohuenet ñachña atarr yemterret. Arrpa' allohua ñeñt atet a'potete't Cristo ahuat.

¹³ Yomporpa' ñachña atarr ayemuetpoterrtsa. Ñaña ñepa'chña socshatene' e'ñe poctacma. Allochñapa' amach eñalle ama't coñe'ta ñeñtcha' sellcatene' atto same'ñeña ña. Allochñapa' Paretsña Puecamquëñpa' ñachña ahuamencat sepene'. Attochña e'ñech socsheñesha' secuen ñeñt o'patatensa Yompor.

* **15:12** Isaípa' ñeñtara Jesé. Ñehua, ñapa' ñeñt puechemeran David ñeñt amcha'tarettatse't Jerusaléño.

Atto Pablopa' ahuo't llesenseñ Jesucristo attoch amach pueñcha'ñoŕeye' alla yerpaterraneto ñeñt e'ñe pocte' enten Yompor

¹⁴ Ñaña te'pa' o'ch masheñnesha ñaña nočhanesha notas, napa' neñotenes sapa' atarr semorrentannena ñaña neñotenes o' e'ñe čhaponasa seyočhro ñeñt atet muenatenes Yompor. Allochñapa' attochña e'ñe cohuen soctape'chatannena erra'tsente' cohuentetsa Yomporecop.

¹⁵ Tarraña ama't atetpa' ama nemčhañoŕeye' o' notuanmaso pa'namen arr necartot ñeñt atet pocte' enten Yompor. Attoña o' alla neyerpaterrser ñeñt atet muenen Yompor. Ñeñto'marña atet nepenes, tarro'mar e'ñe Yompor puemuereñoŕenpa'

¹⁶ ahuo't muenatenen nach torretsa Jesucristocop. Erracmañen allemeñ anetso'mar netorrena, allo'tsa'yen acheñenesha' ñeñt ama judioneshayaye. Napa' na a'potenahuet Yompor po'ñoñ ñeñt po'ñočh alloch yequeshperra. O'ch name'ñatuera ñeñt ama judioneshayaye, allempoñapa' attochña nehuapat Janet Yomporesho atet ñerra'mrrate' čho es yapueñ Yompor, ñañaapa' ñeñtcha'ña atarr coshatene'. Allo'tñaapa' Paretsña Puecamquēññaapa' ñachña a'cohuentatuerrahuet. Attochña e'ñe cohuen enteñet Yompor.

¹⁷ Ñeñto'marña te'pa' e'ñe neyemteñoŕ Cristopa' e'ñe pocte' nenteñ o'ch e'ñe nocsheña ñeñt allo netorrena Yomporecop.

¹⁸ Napa' aña paterr noten atto Cristopa' e'ñe ahua mencat penen, ñeñto'marña čhocma name'ñateña ama't ñeñt ama judioneshayaye. Atto neserrpare'tatanet Yompor po'ñoñ, ñetñaapa' ahuo't e'ñe name'ñatuanet. Ñaña atto napa' e'ñe cohuenare' es norrtatyen, ñetñaapa' ahuo't e'ñe cohuen ame'ñeñet Yompor.

¹⁹ Ñaña ñetpa' añña ame'ñatahuet ñeñt atto e'ñe ahua mencat penen Cristo attoña norrtatanet Yompor po'partsoña ñeñt ama puentareto. Ñetpa' ñeñña eñotatuahuet, ñeñtpa' po'ñočh e'ñe Parets Puecamquēñoŕ ñeñt e'ñe ahua mencat yepene'. Atteñapa' ora erracmañen o' neserrpare'tua añ cohuen ñoñets atto e'ñe yame'ñeñoŕ Cristopa' o'ch yequeshperra. Atetña neserrpare'tyesnom allemeñ anetso'mar e'ñe Jerusaléñoŕeñ Ilírico'marohuen.

²⁰ Napa' añña atarr nemnen o'ch neserrpare'tyen añ cohuen ñoñets erraparen bačhayo'mar all ama pue'mareto ñeñt Cristotets. Attochña napa' amach arra neseno serrpare'tats all o' serrpare'tatuahua po'psheñe.

²¹ Attochña etsoterra añ ñoñets ñeñt atet aquellca'huaret ahuaŕoten, ñeñtpa' atet oten Cristocop:

Acheñenesha' ñeñt ama't ahuaŕapa' ama aserrpare'tatareñteneto ñeñt atet pena ña, ñetñaapa' enteretcha'. Ñeñtara acheñer ñeñt ama pue'marano ñeñt atet pena ña, ñetñaapa' čherranetcha' pueyočhreto ñeñt atet pena ña.

Atto Pablopa' atarr sechena o'ch ahuo' anetso Romo o'ch emo'tenana' ñeñt ame'ñetsa all

²² Napa' shonte' neserrpare'tatyen erracmañen arr, ñeñto'marña ama eshcaye' neseno sesho. Ama't ahuañoŕeñ atarr nesechenañ o'ch nabchensa', ama erroŕ nepeñe.

²³ Tarraña na te'pa' o' ne'nua netaruas ñeñt atto neserrpare'tyen arro'mar allemeña. Ñaña napa' ahuaŕoteñ nesechena o'ch nabchensa'.

²⁴ Ñeñto'marña te'pa' e'ñe po'ñočh nesechena o'ch ahuen sesho o'ch nabchensa'. Allochñapa' o'ch yabčhanna'ta allponmat, allempoñapa' ñato' attoŕpa' o'ch seyenpa'n attoch nečhap ñaña Españo.

²⁵ Ñehua, te'pa' ñanomcha' Jerusaléño neta, attoch nanmanet allpon ofrenda masheñshacop ñeñt' ame'ñetsa all.

²⁶ Tarro'mar allpon ñeñt' ame'ñetsa Macedonio ñaña Acayo, ñetpa' e'ñe pocte' enteñet o'ch apuet allpon ofrenda, ñeñt'cha' oñmachtet masheñnesha' Jerusaléño ñeñt' nanac es pallta'yenet.

²⁷ Macedonio'marnesha' ñaña Acayo'marnesha' ñetpa' ama judioneshayayeto. Tarraña e'ñe pocte' enteñet o'ch yenpueñet judionesha' ñeñt' Jerusaléño'tsa'yen ñeñt' nanac es pallta'yenet. Napa'cho'ña e'ñe pocte' nenteñ tarro'marña ñeñt' judionesha' ñetpa' ñetña serrpare'taterret ñanom ñeñt' ama judioneshayaye Yompor po'ñoñ. Ñeñt' atet a'parettet ñetpa' ñeñt'pa' puecamquëñecop. Ñeñto'marña te'pa' e'ñe pocte', ñeñt' ama judioneshayayepa' o'ch alla yenpuerran ñaña ñeñt' judionesha' ñeñt' poctetsa po'chtsocpuet alloch correnet arr patsro.

²⁸ Allempoch neçhap Jerusaléño o'ch napos masheñnesha' ofrenda. O'ch naphuerranet attochña e'ñe ne'nua ñeñt' netaruas nepen. Allempoñapa' o'ch ahuen ñaña Español. Ñehua, amach neçhena' Españolpa' o'ch nemo'tnomues allponmat, allotcha' nem'terrerr sesho'tpa' allempochña o'ch ahuen Español.

²⁹ Ñaña neñoteñ ñerra'm esempoch neçhap sesho e'ñe neserrpare'tateño'tes Cristo po'ñoñ, sapa' nanaccha' nocshatterres e'ñe nanac Yompor pa'nateño't.

³⁰ Ñaña te'pa' o'ch masheñnesha' notas, e'ñe seyemteño't Yepartseshar Jesucristo, ñaña attoch apueney Parets Puecamquëñ alloch e'ñe yemorrentanena, sapa' çhocmach sema'yocham'pesna. Nanaccha' sema'yochapretna,

³¹ o'ch senamaton Yompor attoch cohuan'psen allochñapa' amach çha rromapno judionesha' ñeñt' ama ame'ñetso all Judeo. Ñaña o'ch senamaton Yompor añecop judionesha' ñeñt' ame'ñetsa Jerusaléño, attoch e'ñe cohuen entapretapnet ñeñt'cha' naponanet.

³² Allochñapa' ñerra'm Yompor muenatspa' e'ñech nocsheñnesha' neçhap sesho. Allñapa' namesoste' e'ñe cohuen allponmat, ñaña e'ñe ya'channa'teño'tpa' o'te' alla e'ñe nocsherra neyo'çhro.

³³ Yomporepa'chña e'ñe cohuen sa'nataya allohuenes, ñeñt'ara Yompor ñeñt' e'ñe cohuen yocshatene' yeyo'çhro. Ñeñt'pa' attetepa'ch Nompore.

16

Atto Pablo arr po'carto'tpa' e'ñe huom'cha'tuan ora allohuen ñeñt' ame'ñenaya Cristo all anetso Romo

¹ Ñaña te'pa' añ necarto'tpa' nemneñ o'ch neñotatas ñeñt' yo'ch yepen ya arr ñeñt'pa' añ pa'so'cheñ Febe. Ñapa' ña sherbets Yompor pa'pacillo allecma ap'çhenet Yomporecop añ anetso Cencreo.

² Ñapa' mueneñ ahuo'ch ahuo' sesho. Ñerra'm esempo çhap seshopa' o'ch saga'p cohuen, ñeñt' atet poctetsa o'ch yagapannena e'ñe cohuen, ñeñtey ame'ñenaya Yepartseshar Cristo. Ñaña ñerra'm o'ch çhap sesho, ñerra'm escha' palltosa ama't erra'tsena, añ poctetsa sapa' o'ch seyempueñ tarro'mar ñapa' atarr cohuen ayenpañ; ama't napa' nanac yenpuenen.

³ Napa' nemneñ añ necarto't o'ch nehuom'cha'ch noch Priscila puerrol-lare'na ñeñt'ara masheñ Aquila, ñeñt' parro netorrena ahuañmo'cha Cristo Jesúsocop.

⁴ Ñetpa' nanac yenpuennet ahuañmo'cha allempo muene' muetsanetañ. Ñetñapa' autsa rromatsetañ atto't a'queshp'atnet na allempo muene' muetsaneñ ñeñt' ne'moñe'tene'. Ñeñto'marña napa' atarr neparasyoso'tenanet

ñaña ama naptayaya añña ñaña ñeñt allohuen ñeñt ama judioneshayaye, ñeñt e'ñe pame'ñeño'tet ap'cha'yenet allemeñ anetso'mar, ñetpa'cho'ña atarr parasyoso'teñet no'ch Priscila ñaña masheñ Aquila, tarro'mar ñetpa' ahuo't a'queshp'atnet, attot ellopa' o' alla neserrpare'tatererr ñeñt ama judioneshayaye.

⁵ Ñaña te'pa' o'ch nehuom'cha'ch allohuen masheñnesha' ñeñt pame'ñeño'tet chocma ap'chenet masheñ Aquila pa'paclo, all ye'chena epuet puetapor Priscila. Ñaña arr necartotpa' nemneñ o'ch nehuom'cha'ch masheñ Epeneto ñeñt nanac nemorrentena. Ñapa' ña ñanom ame'ñenaya Cristo all anetso Acayo.

⁶ Allostpa' o'ch nehuom'cha'ch ñaña no'ch María ñeñt nanac torretsa sesho parro.

⁷ Te'ñapa' o'ch nehuom'cha'ch ñaña namo'ts ñeñtara masheñ Andrónico ñaña masheñ Junias, tarro'mar ñet ahuañmo'chapa' ñeñt parro ehuan-caretey. Ñetpa' ama't allsensareñnesha'pa' nanac asherben entarettet, tarro'mar ñetpa' ahuatoteñ ame'ñeret Cristo. Ama't allempo napa' ama name'ñena' ñetñapa' o' ame'ña'huet ñanom.

⁸ Allostpa' nemneñ o'ch nehuom'cha'ch ñaña masheñ Amplias ñeñt atarr nemuerena e'ñe yame'ñeño't Yepartseshar parro.

⁹ Allostpa' ñaña masheñ Urbano, o'ch nehuom'cha'ch ñaña ñeñt parro yetorrena ñeñt po'taruas pen Cristo Jesús. Allostpa' e'ñe nemorrenteño'tpa' o'ch nehuom'cha'ch ñaña masheñ Estaquis.

¹⁰ O'ch nehuom'cha'ch ñaña masheñ Apeles ñeñt chocma ahuantene' allohuen pa'namen topateñets attoña e'ñe cohuen cotenan Cristo. Allostpa' ñaña o'ch nehuom'cha'ch allohuen ñeñt pamo'ts pen Aristóbulo.

¹¹ Allostpa' ñaña namo'ts Herodión, allostpa' ñaña ñeñt pamo'tsesha' pen Narciso. Ñetpa' atarr ame'ñeñet Yepartseshar.

¹² Te'ñapa' nemneñ o'ch nehuom'cha'ch ñaña no'ch Trifena ñaña no'ch Trifosa. Ñetñapa' nanac torreññañet Yepartseshar po'taruas, allostpa' no'ch Pérsida ñapa'cho'ña nanac yemorrenteña atto nanac torrena ñaña Yepartsharecop.

¹³ Ñaña arrpa' o'ch nehuom'cha'ch ñaña po'psheñeñ masheñ Rufo ñeñt pame'ñeño't nanac asherben yenteñ Yepartsesharecop. Ñaña pachore'na o'ch nehuom'cha'ch, tarro'mar ñapa' e'ñe atet nenteñ ñerra'mrrate' ñeñt e'ñe nachor nepen.

¹⁴ Te'ñapa' o'ch nehuom'cha'tererr po'potantañ masheñnesha' ñeñt añ Asíncrito, ñaña Flegonte ñaña Hermas, ñaña Patrobas, allostpa' ñaña Hermes, ñaña po'potantañ masheñnesha' ñeñt parrompañ'o'tsa'yenet.

¹⁵ Te'pa' o'ch alla nehuom'cha'tererr ñeñt masheñ Filólogo ñaña no'ch Julia, allostpa' ñaña masheñ Nereo epuet ñaña po'ch, allostpa' ñaña Olimpas, ñaña ama't allohuenet masheñnesha' ñeñt parrompañ'o'tsa'yenet.

¹⁶ E'ñe semorrentanna'teño'tpa' atet'cha' sehuom'cha'tanna'tena* ñeñt atet poctetsa Partsocop. Ñaña allohuenet masheñnesha' ñeñt ap'cha'yetset allemeñ anetso'mar e'ñe pame'ñeño'tet Cristo, ñetpa'cho'ña mueneñet o'ch huom'cha'taset ñaña arr necartot.

Atto Pablo arr po'cartotpa' o' alla cotape'chaterraneterr po'pocheño

* **16:16** Po'ño'ch oteneý, "E'ñe semorrentanna'teño't choc setso'ttsa'pa'tannena ñerra'm esempo sehuom'cha'tanna'tena." Ñeñ'pa' atet ye'chete't ahuat.

17 O'ch masheñneshacha' ñaña nochaneshacha' noterrserr po'poñ añ necartot. Señotcha' añ acheñeneshar ñeññ muenene' o'ch ellopa'tetstatonaset soctapña ñeññ atto same'ñeña Cristo, tarro'mar ñetpa' mueneñet o'ch cotape'chataset ñeññ ama atteyaye ñeññ atet o' yeychatuas. Ñeññ acheñer atetpa' o'ch sello'tsentach seshot, amach seyemtataneto ñeññ atet ye'chatenet.

18 Tarro'mar ñetpa' ama añeye' sherbeneto Yepartseshar Jesucristo. Aña cotape'chenet ñeññ atet muenenet ñet po'chets atto correnet. Atto ser- rpare'tenet co'chnesha' ñoñets, ñeññtpa' atfa shequëñet acheñenesha' ñeññ ama huomencaye' penaye pueyo'cher.

19 Ñehua, allohueney yeñotenes sapa' o' same'ñera Cristo ñeñño'marña napa' atarr nocshensa. Añña nemnen o'ch e'ñe señoñ ñeññ e'ñe cohuentetsa Yomporecop. Allochñapa' amach soctape'chatsto ñeññ ama cohuenayaye.

20 Allochñapa' Yomporpa' ahuencha' a'huañam'psonas ñeññ atto atarr she- quënes oneñeñ, ñeññara Yompor ñeññ e'ñe cohuen yocshatene' yeyochro. Yepartsesharepa'chña Jesucristo e'ñe sa'natenaya.

21 Te'pa' o'ch alla neñotaterrserr añ necartot, masheñ Timoteopa'cho'ña mueneñ o'ch huom'cha'tas ñaña, ñapa' ñeññ epan netorrena. Allotpa' ñaña añ namo'ts ma'psheño'maret ñetpa'cho'ña mueneñet o'ch huom'cha'taset ñamet. Puesheñarrpa' añ masheñ Lucio, allotpa' ñaña masheñ Jasón, ñaña masheñ Sosípater.

22 Napa'cho'ña ñeññen sochetsa Tercio, e'ñe name'ñeñoñ Yepartseshar nem- neñ o'ch nehuom'cha'tas añ masheñ Pablo po'cartot. Napa' ñeññen quellcaten masheñ Pablo.

23 Masheñ Gayopa'cho'ña muenen o'ch huom'cha'tas ñaña. Na te'pa' e'ñe pa'paclo'tsenen ña, tarro'mar all nechap. Ñapa' atet otenanet chocmach ap'chenet allohuenet pa'paclo ñeññ ame'ñetsa arr. Ñaña masheñ Erasto mueneñ o'ch huom'cha'tas ñaña. Ñapa' ña tesorerotets arr Corinto, ña añño'tene' quelle anetsocop. Ñaña masheñ Cuartopa'cho'ña mueneñ o'ch huom'cha'tas ñeññara añ necartot.

24 Yepartsesharepa'chña Jesucristo sa'nataya allohuenes. Ñeññtpa' attetepa'ch Nompore.

Atto all huañen Yompor po'ñoñ añ cartotpa' ya'ye'cho'chtatoñepa'ch ora allohueney

25 Te'ñapa' ya'ye'cho'chtatoñepa'ch Yompor tarro'mar ñapa' ñach ahuaamen- cañ sepene', ñeññ e'ñe atet oten añ cohuen ñoñets alloch yequeshperra. Ñeññara añ cohuen cotapñats ñeññ neserrpare'tatenes ñeññ e'ñe atet pena Jesucristo ñeññ ahuatoteñ ama eñotpahuo.

26 Tarraña te'pa' Yompor ñeññ ama arromñateshayayepa' muenaterrey o'ch yeñoter ñeññ ama eñotpahuo ahuatoteñ. Ñehua, ñapa' ahuatpa' añ eñotate't ñeññ a'ñta'yesaye't po'ñoñ, ñetñapa' ahuo'ch quellquënet ñeññ atet eñotatenanet Yompor. Attochña yeñoter yaña, ama't ñaña allohuen pa'namen acheñenesha'; allochñapa' attoch e'ñe yame'ña'huerra ora er- raparen, ñeññey pa'namen acheñey.

27 E'ñe puemuereñotey Jesucristo aye'cho'chtatarettepa'ch Yompor er- rponohuañen, ñeññara Yompor ñeññ ñapueñ e'ñe eñotañtetsa. Ñeññtpa' attetepa'ch Nompore. Allohua huañ añ necarta.

Pablo

AÑ ÑANOM SAN PABLO PO' CARTA ÑEÑÑ QUELLCAN CORINTO' MARNESHA' 1 CORINTIOS

Atto Pablopá' quellcan carta añecop ñeññ ame'ñetsa anetso Corinto

1-2 Masheñeshacha' ñaña nochaneshacha' ñeñtes allohuenes e'ñe same'ñeñot Yompor chocma sapchena parro all anetso Corinto, ñeñtes o' hua'ñerres Parets attoch pueyochresha' perres atto e'ñe separrocmateñot epas Cristo Jesúsapa' sañapa' sa'cohuentataretterra Partsocop. E'ñe parrocmá hua'ñerres Parets attoch pueyochresha' perres, e'ñe attecma o' hua'ñerran allohuen ama't erra'tsena acheñer ñeñt e'ñe pame'ñeñot chore'tene' Yepartseshar Jesucristo ama't errate' ye'cha'yenet. Ñeñña Jesucristo ñeñt Yepartseshar yepen ora allohueney ñeñtey ame'ñenaya. Na Pablón sequellquene'ña añ carta epan masheñ Sóstenes. Napa' Jesucristo puellsensaren tarro'mar Yomporpa' ñeñtecopña o' chore'terren attoch nesherber.

³ Te'ña e'ñe nehuom'cha'teño'tespa' o'ch notas: Yomporepa'chña seben-sare'tañpene' ñeñtara Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyo'chro allohuenes.

Arrpa' all parasyoso'tañpsanet

4-5 Te'pa' o'ch notas, napa' chocma neparasyoso'teñ Yompor socop tarro'mar ña puemuereño'tpa' atarr bensare'tañpenes. E'ñe separrocmateñot Cristo Jesúsapa' o' eñotaterres pa'namen co'chnesha' cotaññats seyo'chro. Ñeñto'mar te'pa' ama't ora allpon señosyen e'ñe ñesho'tpa' e'ñech cohuenare' señosyen. Ñaña ama't allohuen cohuen cotaññatspa' o' seño'tuer.

⁶ Ñeñt atet yotuanmas ñeñt'cha' atet ñonas Cristo, te'pa' atet'cho' o' etso-tatuonas.

⁷ Ñeñto'marña te'pa' ama es palltetso ñeñt'cha' apuerr'serr po'poñ Yompor. Te'pa' aña palltetsa o'ch secuame'teñ esempohuañencha' huerra Yepartse-shar Jesucristo.

⁸ Ñeñtara Jesús ñeñt'cha' allo'na huomenc se'pa'nene' seyo'cher. Attotach chap allempoch huerra Yepartseshar Jesucristo. Attochña allempopa' amach eñalle alloch otteñe'charetés ama't mamesha.

⁹ Tarro'mar Yomporpa' ama puenesho po'ñoñ, erro't otpa' atet'cha' ña. Ñeñtara Yompor ñeñt o' hua'ñerrey o'ch yeyemterrñaña Puechemer ñeñtara Yepartseshar Jesucristo.

Arrpa' all ye'chatanet attoch e'ñe patrra cotaññats anmuet

¹⁰ Te'pa' o'ch masheñeshacha' ñaña nochaneshacha' notas ñeñt'cha' atet se'pa, e'ñech patrra soctape'ch allohuenes. Amach allo'na soctape'chyesatsto po'poñe'ttsocma. E'ñech patrra cotaññats soctape'ch allohuenes; erra'tsen soctape'chpa' ñeñtach cohuen sent allohuenes. E'ñe patrra soctañño'tpa' o'ch separrocmatua allohuenes. E'ñe yame'ñeñot Yepartseshar Jesucristo ñeñto'marña notenes ñeñt'cha' atet se'pa.

¹¹ Tarro'mar ñeñt parro ye'chena Cloépa' ñetpa' e'mare'tatnet atto' sepena. Ñeñtpa' atet otnet atto sa masheñeshacha' chocma po'poñ sentanna'tyena.

¹² Ñeñt notenespa' ñeñtpa' atet sepena: Puesheña'ttsospa' atet sotyen: "Napa' aña' name'ña masheñ Pablo." Po'potantañña' ñeñtpa' atet

otyenet: “Napa’ añcha’ name’ña masheñ Apolos.” Po’potantaññapa’ ñeñtapa’ atet otyenet: “Napa’ añcha’ name’ña masheñ Pedro.”* Po’poñechnoñapa’ atet otyenet: “Napa’ añcha’ name’ña Cristo.”

¹³ Ñehua, ama’t señoñeña, po’ñoçhpa’ ama eñalle attoch yellopa’tetstach Cristo. Po’ñoçhpa’ amaca’ye naye’ corso’tam̄pseto ñeñt e’ñe socop attoch na’qeshp̄atas. Ñaña ama naye’ same’ñeñoñ o’ sapatare’tterroña Partsocop.

¹⁴ Napa’ atarr neparasyoso’tañ Yompor tarro’mar napa’ ama muenatno o’ch napatas ama’t puesheñarroñesa Partsocop. Ñehua, napa’ e’ñe epsheña napat Partsocop, ñeñtapa’ masheñ Crispo ñaña masheñ Gayo.

¹⁵ Napa’ e’ñe nocshena tarro’mar te’pa’ amach errotenoñ sotno e’ño’ na same’ñeñoñ sapatare’tterra.

¹⁶ Ñehua, po’ñoçh ellopa’ napach masheñ Estéfanos epuet pamo’tsesha’. Ñerra’m eñallte’ po’poñechno ñeñt napatpa’ tarraña ñeñtapa’ ama neñoñe.

¹⁷ Napa’ ama añecpaye’ llesensa’noña Cristo o’ch napatyes Partsocop ñeñt allpon ame’ñetsa, añecpaña llesensa’n attoch o’ch neserrpare’t cohuen ñoñets alloch yequeshperra. Ñaña ama añeye’ coçhnesha’ na neñoñ neserrpare’tatenso, tarro’mar ñerra’m añña neserrpare’tatenes coçhnesha’ neñoñ name’ñatasapa’ çhate’ soten atto rroma Cristo corsochopa’ ñeñtapa’ amaca’ye es sherbeno attoch yame’ñera Cristo.

Añ ñoñets atto rroma Cristo corsocho, ñeñtña ñoñets Yomporo po’huamenc alloch a’qeshp̄atyerran acheñenesha’

¹⁸ Po’ñoçh ñerra’m esempo yeserrparen atto Cristo rroma corsocho e’ñe ya yo’chñaro’tpa’ añña acheñenesha’ ñeñt chenquetsapa’ çhach otenapuetañ attate’ yotatse’tyen. Tarraña ya ñeñtey a’qeshp̄atare’tteypa’ añña ñoñets atto rroma Cristo corsochopa’ ñeñtña ñoñetspa’ yeñoñeñ allotña huena Yompor po’huamenc attoch a’qeshp̄atyerran acheñenesha’.

¹⁹ Tarro’mar añ ñoñetspa’ e’ñe anuare’t ama’t ahuatoteñ, ñeñtapa’ atet oten Yompor:

Ñeñt entetsa ñapa’ nanaco’ es eñoten patso’marecoppa’ napa’ o’ch na’huañañpesuanet ñeñt pueñoñeñ. Ñaña ama’t ñeñt entetsa ñapa’ nanaco’ eñotañtenapa’ napa’ o’ch nehuapore’tam̄pes atto es eñotatse’tyenet.

²⁰ Ñehua, ama’t señoñeña, ama’t ñeñt nanac es eñotatse’tyets arr patsro ama eñalleña ñeñt atarr asherben enten Yompor. Ñaña ñeñt atarr etsotayenayeñ ñoñets ñeñt atet anuare’t ahuatoteñ ñaña ñeñt nanac eño’ñañtetsañ añe patsro ama eñalleña ñeñt atarr asherben enten Yompor. Ñetpa’ çhate’ otenapuetañ atarrte’ es eñotenet tarraña Yompor o’ eñotatuay po’ñoçh ñeñtapa’ e’ñeca’ye orrena atet otatse’tyenet arr patsro.

²¹ Tarro’mar Yomporpa’ e’ñe pueñoñeñoñ ñapa’ ama pocteye’ enteñe e’ñe ya yocp̄año’tpa’ o’ch yenter Yompor; ama’t yapa’ yoteneñ atarrte’ es yeñoten. Añmapa’ ñeñtña pocte’ enten Yompor: ñeñtara cotap̄ñats ñeñt atto rroma Jesucristo yocop ñeñt çhach enteñet ñerra’mrrate’ atta yotatse’tyen, añ ñeñtara cotap̄ñats ñeñtña muenen Yompor o’ch yeserrpare’toñ alloch a’qeshp̄aterrey allohueney ñeñtey ame’ñenaya.

²² Ñerra’m esempo yeserrpare’tach judionesha’ atto Cristo rroma yocop, ñetñapa’ amach asherbenaye’ entenetoña yocp̄añña tarro’mar ñetpa’ añach

* **1:12** Añ Pedropa’ ñeñtara otenet Cefas.

muenet yorrtatanetepa'to' Cristo po'partsoña. Ñaña ñerra'm esempo yeser-
rpare'tateñ ñeñt ama judioneshayeyeto atto Cristo rroma yocop ñetpa'cho'ña
amach asherbenaye' entonayetoña yocpañña tarro'mar ñetpa' añach muenet
yorrtatanetepa'to' ñeñtcha' eñotatahuet e'ñete' po'ñoçh atet yoten.

²³ Tarraña yapa' añcha'ña yeserrpare'tatanet atto Cristo rroma corso-
cho yocop. Tarraña añña judionesha' puetsena'teño'tetpa' amach cohue-
naye' enteñeto. Ñaña ñeñt ama judioneshayaye ñetpa'cho'ña attach enteñet
ñerra'mrrate' atta yotatse'tyen.

²⁴ Tarraña acheñenesha' ñeñt o' ame'ñerra ñetpa' o' çhapanet pueyoçhreto
po'ñoçhpa' Cristo e'ñe Pompor po'huamenco'tpa' o'ch a'queshpaterrey, ñaña
e'ñe Pompor pueño'teño'tpa' o'ch a'queshpaterrey. Attecma o' çhapanet
pueyoçhreto ñeñt o' ame'ñerra ama't ñeñt judionesha' ñaña ama't ñeñt ama
judioneshayaye.

²⁵ Ñeñt ama ame'ñetsopa' ama't otenapuetañ Yompor poçpañña' attate'
otatse'tyen, tarraña ñeñtara poçpañña e'ñe ña pueño'teñ ñeñtña nanac sher-
bets. Acheñpa' ama't atarr es eñoteneñpa' tarraña poçpañña' ama tama
sherbeno tarro'mar acheñpa' ama tama es eñoteneto. Ñaña ama't otenetañ
Yompor po'huamencpa' ama a'ñshe'maye' orrtenopa' tarraña yocoppa' ello
metanennay allohueney yehuamenc tarro'mar yapa' arromñataya.

²⁶ Ñehua, masheñeshacha' ñaña noçhaneshacha' soçtape'ch allempo
hua'ñerres Cristo o'ch same'ñera. Allempo ama't acheñenesha'pa' entasete't
sapa' ama esoye' seño'te tarraña Yomporpa' o' hua'ñerres, ñaña ama't ama
sesherbeno, ñaña ama't ama añeyayso puechemeres añcha'tare't. Ñehua,
ñato' puesheña'ttsospa' ñeñtes, tarraña ama allohuenacmaye' attecmaso.

²⁷ Añña poçte' enten Yompor o'ch a'queshpatan acheñ ñeñt acheñenesha'pa'
çhach otenapuetañ ñeñt'pa' amate' es eñoteno. Tarrecop poçte' enteñ
Yompor allochñapa' o'ch pencatan acheñenesha' ñeñt nanac es eñotatse'tyets.
Añpa'cho'ña poçte' enteñ Yompor o'ch a'queshpatan acheñ ñeñt
acheñenesha'pa' çhach otenapuetañ ñeñt'pa' amate' esoyaye. Tarrecop poçte'
enteñ Yompor allochñapa' o'ch pencatan acheñenesha' ñeñt çhach otenapañ
ñetpa' atarrte' es sherbenet.

²⁸ Añpa'cho'ña poçte' enteñ Yompor o'ch a'queshpatan acheñenesha' ñeñt
entenet ñeñt ama esoshe'mayaye ñaña ñeñt atsena'tare't. Ñaña añ acheñer
muenen Yompor ñeñt ama es echeno attoch sherba' ama't mamesha.
Tarrecop mueneñ Yompor allochñapa' ño'tetpa' o'ch huapore'tañpsan acheñ
poçpañña ñeñt aña patso'mara. E'ñech orrena enteret acheñ poçpañña.

²⁹ Ñeñto'marña ya acheñeypa' ama't puesheñarro'teya ama poçteyaye o'ch
e'ñe yañeña cohuen yentena tarro'mar Yomporpa' ama atteye' entenye.

³⁰ Tarro'mar ñapña Yompor yapuene'ña attoch yapa' corretsayach. E'ñe
yeparrocmateño't Cristo Jesús a'crrateney Pompor. Ñaña Yomporpa' atto
nan Puechemer Cristo ñach yeñotaterre' ñeñt cohuentetsa Yeyompor-recop,
ñaña ñeñtara Cristo ñeñtcha' e'ñe cohuen a'poçtatene' yocop attoch cohuen
entueney Pompor ñaña ñeñtara Cristo ñeñtña a'cohuentaterrey Partsocop,
ñaña ñeñtara Cristo ñeñt yetsa'terroya yo'chñar attoch yequeshperra.

³¹ Ñeñto'mar atet anuare'tta Yompor po'ñoñ ahuat: "Ñerra'm eseshaycha' es
aye'choçhtatetspa' Yomporecpuepa'chña es ya'ye'choçhtaten."

Arrpa' all yerpaterranet atet serrpare'tatenaneta' ahuaña ñeñt atto Jesucristo rroma yocop corsocho

¹ O'ch notas masheñneshacha' ñaña nochaneshacha', ahuaña allempo nechap seshopa' neserrpare'tatoses cohuen allempo na'potonas Yompor poctaþña. Allempopa' ama cochneshoteye' neñoñoť na'potonaso Yompor po'ñoñ atet noñets cochnesha' entyen acheñenesha'. Ñaña ama cochneshoteye' noctaþñoť na'potonaso Yompor poctaþña atet ñerra'mrrate' acheñ ñeñt nanac eñotañ entueñ allohuen acheñenesha'.

² Añña e'ñe patrra coþaññats neserrpare'tatenes ñeñt atto Jesucristopa' rroma yocop corsocho. Tarro'mar allempopa' atet noten neyočhro ñeñtach paťerr o'ch neserrpare'tatanet.

³ Ama't allempopa' ama asherbenoteye' norrtoso sesho. Ñaña allempopa' atarr nemcha'ten, čha neyoruos nellquēñoť.

⁴ Ñaña ama ne'ñoreñoťeye' e'ñe cohuen neserrpare'tatasa attoch same'ña'na e'ñe neñoñoťa ñeñt atet pena ñeñt čhach otenapañ ñapa' nanacte' es eñoten. Añña e'ñe neserrpare'teñoťa norrtatonas ñeñt atet þonay Parets Puecamquēñ e'ñe po'huamencoť Yompor.

⁵ Ñaña ya acheñeypa' ama't cochnesha'tatsta yocþañña' tarraña napa' ama nemno e'ñe na neñoteñoťpa' o'ch name'ñatasa. Napa' añña nemnen o'ch name'ñatasa e'ñe Yompor po'huamencoť.

Yompor Puecamquēñpa' ñeñña es yeñotatene'

⁶ Tarraña ama't atetpa' esempopa' o'ch neserrpare'tach ñeñt o' ame'ñerra huomenc. O'ch neserrpare'tatanet e'ñe cochnesha' coþaññats, ñeñtara Yompor poctaþña ñeñt atarr es eñotets. Tarraña añ coþaññatspa' amach patso'mareyaye, ñaña amach aňeyaye aňcha'taretečhno poctaþña ñeñt aňe patsro'tsen. Tarro'mar ñetpa'čho'ña huañerretcha' esempo.

⁷ Yomporepa'chña poctaþña ya'poťa ñeñt atarr es eñotets, ñeñtara ama't ahuaťoteñpa' ama eñotpahuo poctaþña. Tarraña ama't allempo ama ayečhcatarettena' patspa' ñeñtñapa' o' anaretetua attoch cohuencha' ya'quesþataretterra esempohuañen.

⁸ Añña aňcha'taretnesha' ñeñt aňe patsro'tsa'yenpa' ama čhapaneto Yompor poctaþña. Ñerra'm čhapanetañcha' ahuaña pueyočhretopa' amaťe' corso'tañperetañeña Yepartseshar ñeñt atarr nanac cohuen.

⁹ Tarro'mar atet anuaretta Yompor po'ñoñ ahuať, ñeñtpa' atet oten: Ama't ahuaťa ya ñeñtey arromñaťeypa' ama yentare ñeñt o'patatenya Yompor ñeñt cochnesha'tetsa yocop, ñaña ama ye'mare, ñaña ama čhaponaye'te yeyočhro ñeñt o'patatenya Yompor ñeñteycha' morrenterraya ña.

¹⁰ Tarraña ñeñteyña ame'ñerraya ñeñtey allohueneypa' o' eñotaterrey Yompor e'ñe ña Puecamquēñoť ñeñt chorratenya. Po'ñočh yeñoteñ Yompor Puecamquēñpa' ña eñotuene' allohuen Yompor poctaþña ñaña ama't ñeñt ama eñotpahuooyaye.

¹¹ Attećma yepena yaña ñeñtey acheñey. Amach errotenoť po'psheñeñpa' eñotonay atet yocťape'chen ya yeyočhro, e'ñech yapta yeñoteñ. Attećma pena ñaña po'potantañ amach errotenoť eñotano Yompor poctaþña, e'ñech Yompore ñapueť Puecamquēñ eñotene'.

¹² Yapa' o' yagapoñ Yompor Puecamquēñ, amaña acheña poctaþña yaguerro ñeñt patso'marećpa. Ñeñtara Yompor Puecamquēñ ñeñt čhapatene'

yeyochro ñaña ñeñt yeñotatene' atto ña muerenya. E'ñe puemuereñoŧey shonte' es apa'yeney.

¹³ Ñaña ñeñt ñoñets ñeñt yeçhateney Yompor Puecamquëñpa' ñeñtara ñoñets o'ch yeserrpare'tatas samã ama't ñaña po'potantañechno. Ñeñtpa' ama añeyaye ñoñets ñeñt atet yeçhatyen acheñenesha' ñeñt eñotañetyetsa. Ñaña ñeñt ñoñets atto yeçhateney Yompor Puecamquëñoŧpa' ñeñt yeyçhatenes samã ñeñtes o' chorrersa samã Yompor Puecamquëñ.

¹⁴ Tarraña acheñenesha' ñeñt ama chorreña' Yompor Puecamquëñpa' amach errotenoŧ çhapaneto Yompor poçtaŧña ñaña amach errotenoŧ agapoñeto ñeñtcha' apanetañ Yompor Puecamquëñoŧ. Ñerra'm yeserrpare'tatanet atto es apueney Yompor Puecamquëñoŧpa' ñetpa' çhach otyeset atto' yotatse'tyen. Tarro'mar ñapŧa çhenana pueyoçhro ñeñt chorrena Yompor Puecamquëñ.

¹⁵ Tarraña añña ñeñt chorrena Yompor Puecamquëñpa' ñetpa' çhenanet pueyoçhreto ora ñeñt atet pena Yompor. Tarraña ñeñt ama chorreno Yompor Puecamquëñ, ñetñaŧa' amach errotenoŧ çhapaneto pueyoçhro esocopte' atet penaña ñeñt chorrena Yompor Puecamquëñ.

¹⁶ E'ñe attecma oteney Yompor po'ñoñ ñeñt anuaret ahuatoteñ, ñeñtpa' atet oten: "Esesha'huate'ca' eñote'ña ñeñt atet coŧape'chen Yompor attoch ñetpa' o'ch coŧape'chateret ñamet Yompor." Tarraña te'ña yapa' attecma yoçtape'chen atet coŧape'chen Cristo.

3

Arrpa' all ama patrraye' coŧape'cheno corinto'marnesha'

¹ Ñaña o'ch notas masheñeshacha' ñaña noçhaneshacha' ama't ahuañoŧeñ noteneñ o'ch noctape'chatas e'ñe cohuen, atet noctape'chateñ acheñ ñeñt e'ñe chorrena Yompor Puecamquëñ. Tarraña amach errotenoŧ noctape'chataso tarro'mar sapa' atŧa socrena atet muenatenes sechets. Cha sottena atet ñerra'm cheshaŧoll ñeñt ama eñotena'. Sapa' ama e'ñe çhennasa' ñeñt cohuentetsa Cristocop. Ñeño'mar teme'ttsen atŧa noctape'chatenes atet ñerra'm cheshaŧolleshasa.

² Ñeño'marña ahuañoŧeñ atŧa neñotatenes ñeñt ama torrapahuoyaye Yomporecop. Ñeño'marña amach erroteno noctape'chaterrserro ello ñeñt nanac echarr coŧaŧñats. Atŧa sottena ñerra'mrrate' ematoŧoll, napa' attach nemomatenes semomos atet peñet ematoŧoll, ñeñtara yoten coŧaŧñats Yomporecop ñeñt ama echarro. Ñaña ama echarroye' serrar napuenso, tarro'mar amate' erroteno setsoto, ama't teme'ttsenpa' ama setsoteññañe Yompor poçtaŧña ñeñt nanac echarr.

³ Tarro'mar teme'ttsen atŧa socrena atet muenatenes sechets. Po'ñoçh ñerra'm esempo es yeye'chapretannena, amapa' ñerra'm çho ye'moñe'tannena, ñeñtpa' atŧa yocrena atet muenateney yechets. Ñeñtpa' ama'tña atŧera sorrteno atet pena acheñ ñeñt ama ame'ñenayo Cristo.

⁴ Tarro'mar ñerra'm çha yotyen: "Napa' añcha' name'ña Pablo", po'psheneññaŧa' ñato' oten: "Napa' añcha' name'ña Apolos." Ñeñt atet sepena çhachca'ye sottena ñerra'mrrate' ñeñt ama Cristona'tareyaye.

Puesheña'ttsoypa' añ yetorra'yena Yomporecop ñeñt atet yechyenya

⁵ Ñaña o'ch notas, yapa' ama esoyaye ama't Apolos, ama't na, añayaca'ye ñeñt y torretsa Yomporecop. Yapa' amñareŧeya attoch o'ch yame'ñatasa. Puesheña'ttsoypa' añ yetorra'yena Yomporecop ñeñt atet yechyenya.

⁶ Atet ñerra'm napa' na ñanom same'ñate' Yompor po'ñoñ. Alotñapa' ahuo't huapa ñaña Apolos, ñapa' ña seserrpare'tate' attoch allo'na sesen huomenc ña'nmue' seyocher. O'ch netma'ntacha atet: Napa' atten ñerra'mrrate' ñeñt nare'tets. Alotñapa' o'ch huapa po'psheñeñ ñeñtcha' she'tamo're'tosets, Yomporñapa' ñach a'chpate' narmets.

⁷ Ñeñto'mar yeñoteñ ñeñt nare'tetspa' ama esoyaye, ama't ñaña ñeñt she'tamo're'tetspa' ama esoyaye. Aña Yompor ñeñtña es a'chpatets ñaña sherbets.

⁸ Ñeñto'marña yeñoteñ ñeñtey nare'tets ñaña ñeñtey she'tamo're'tetspa' e'ñe parrocmayetorrena Yomporecop. Elloña Yomporpa' apa'yerreycha' puesheña'ttsoy cohuen ñeñtcha' atarr yocshatterre'. Apa'yerreycha' errotente' yetorra'yesnoma ñocop.

⁹ Yomporpa' enteney atet ñerra'mrrate' parro yetaruasen ñocop. Sapa' Yomporpa' entenes atet ñerra'm ña pa'mres, allcha' nanac torrena ña.

Ñaña Yomporpa' entenes atet ñerra'm pocoll o'ch tomatey ña.

¹⁰ Atet ñerra'm na, Yompor puemuereño'tpa' o' yechaten na o'ch neñoche e'ñe huomenc, attoch nanomcha' ame'ñaterraya acheñenesha' Jesucristo. Ñehua, o'ch netma'ntacha atet ñerra'm Yomporpa' o' yechatenen attoch o'ch neñoche tomate' pocoll e'ñe huomenc. E'ñe neñoteño't o'ch natomat ñanom quellpach e'ñe echarr. Alotñapa' o'ch huapa po'psheñeñ ñeñtcha' allo'na yeçcatnomue'. Tarraña ñeñtcha' allo'na yeçcatnomue'pa' cotape'chepa' ñanom, pocte'te' atet peñ, ñato' amate'.

¹¹ Ñehua, añ quellpach ñeñt anaret ñanompa' ñeñt toma'ntenaya atet ñerra'm ya ñanompa' o'ch yame'ñera Jesucristo. Ñap'fach Cristo yame'ñerra. Ama eñalle po'poñ ñeñtcha' yame'ñerra, tarro'mar amach errotentoyame'ñyo po'poñ ñeñt ama Cristoyaye, añcha'ña ñeñtara Cristo ñeñt o' yotuanmas.

¹² Ñeñt o' yame'ñata Cristo, ñetpa' allo'nach yeychatnenanet aco'pa attoch huomenc ña'nmuet pueyo'cher. Ñehua, o'ch netma'ntacha atet: Ñerra'm cho yeyeçcaten pocoll ñanemcha' quellpach yatomat. O'chña echarr yatomatua quellpachpa' allo'nachña yesen yeçcatnomue' pocoll. Erra'tsenpa' ñato' o'ch yeçcatenan oropo' pocoll ñeñt atarr nanac cohuen, ñato' po'psheñeñpa' o'ch yeçcatan asrepo' ñeñt nanac cohuen ñaña, po'psheñeñña'pa' o'ch yeçcatan cohuen mapyepo' ñeñt nanac tsa'te'. Tarraña ñato' po'psheñeñña'pa' o'ch tomatan tablapo' ñeñt ama tama cohuenayaye, ñato' po'psheñeñpa' aspanapo'ch, ñeñt'pa'cho'ña amach tama cohuenayaye, ñato' po'psheñeñpa' attach yeçcatan atet ñerra'mrrate' posho'llpo' ñeñt ama cohuenayaye ama't mamesha.

¹³⁻¹⁴ Esemphuañeñña allemphoch huerra Cristopa' entatuareteycha' allo-hueneñ ñato' espo'te' yeyeçcatyes yepaquell, ñato' oropo', ñato' tablapo' amapa' ñato' atet ñerra'm posho'llpo'. Ñehua, añcha'ña yeñotate' tso'. Yompor poyoro'chenño'tpa' o'ch etomam'pesyesonay yepacla'chno. Ñehua, yeñoteñ ñeñt oropo' amach poyo, asrepo'pa'cho'ña amach poyo, mapyepo'pa'cho'ña amach poyo. Tarro'mar ñeñt'pa' ama acraño, ñeñto'marña nanac sherben. Tarraña tablapo'pa' ñeñt'pa' poyuach, aspanapo'pa'cho'ña poyuach, posho'llpo'pa'cho'ña poyuach. Tarro'mar ñeñt'pa' ama es sherbeno, attochña eñotuarateycha' e'ñe puesheña'ttsoy errotente' yeyeçcatyes, ñato' cohente' ñato' amate' cohuenayaye allempho es yetorra'yesnoma Cristocop. Ñerra'm es-empoch etomam'pesyesonay yeyeçcatar ñerra'm amach poyo yeyeçcatar, allemphochña yeñoche atto es yetorra'yesnoma Cristocoppa' ñeñt'pa' e'ñe cohuen. Ñeñto'marña allemphopa' aphuerreycha' e'ñe puesheña'ttsoy ñeñtcha'

atarr yocshaterre’.

¹⁵ Tarraña ñerra’m yeyeçcatarña ÷ha poyuapa’ o’ch yeñoch atto yeforra’yesnoma Cristocoppa’ ama es sherbeno, ÷hach a’chencatonay yeyeçcatar ñeññ Cristocpañ. Tarraña ama’tcha’ a’chencatonay yeyeçcatar, yaña yecamquëñpa’ queshperrach. Tarraña e’ñech yemuerochenñofa yequeshperra atet ñerra’m ÷ho poyen pocoll yañapa’ o’ch yequeshpa.

¹⁶ Te’pa’ o’ch notas po’poñ: Sapa’ ama’t señotheñña Paretspa’ o’ pa’paquëll perres allohuenes ñeññes ame’ñetsa. Yeparrocmatueñoť allohueneypa’ te’pa’ e’ñe atet enterrey atet ñerra’m pa’paquëll, allcha’ yeçhena Puecamquëñ ña.

¹⁷ Tarraña ñerra’m esesha’ alla soctape’chaterre’ ñeññ ama cohuenaye’ enteno Yompor ñeññña atet petsa ÷hach ottena ñerra’mrrate’ ÷ho a’matenan Parets pa’paquëll. Ñerra’m esesha’ña a’matene’ Parets pa’paquëll ñeññña Yomporpa’ ÷hocmach a’chencater. Tarro’mar Parets pa’paquëllpa’ ñeññpa’ Partsocpa, saca’yeña o’ pa’paquëll perresña Parets ñeññ e’ñe ñocpa.

¹⁸ O’ch noterrser po’poñ: E’ñech señotheñña. Ñerra’m eseshas otets, napa’ atarr es neñoten aña patsro, añ pocte’ o’huañepa’ch es eñotatse’tyes e’ñe patso’mara. Añña pocte’ o’ch orrta atet ñerra’mrrate’ ama es eñoteno. Añepa’chña eñot ñeññ huetsa Yomporeshoť.

¹⁹ Tarro’mar ñerra’m esempo ñeññey acheñey aña patsro ñerra’m ÷ha yotepañ yapa’ atarrte’ es yeñoten, Yomporñapa’ atet enteney ñerra’mrrate’ ÷ha yotatse’tyen. Ñeññpa’ anuaret ñaña ahuatoteñ Yompor po’ñoño, ñeññpa’ atet oten: “Ama’t atto es eñotatse’tyenetpa’ Yomporñapa’ o’ch eñotanet atta otatse’tyenet, ama’t ñetpa’ otenapuetañ nanacte’ es eñotenet tarraña ñeññpa’ shequëñtsa.”

²⁰ Añ ñoñetspa’÷ho’ña anuaret ahuatoteñ, ñeññpa’ atet oten: “Ñeññ ÷ha otenapañ nanacte’ es eñotenpa’ añña Yomporpa’ eñotenanet ñeññ atet coťape’chenet ñetpa’ e’ñe orrena.”

²¹ Ñeñño’marña te’pa’ o’ch alla noterrser: Amach ellocma sa’ye’choçhtatanna’tyesatsto atet yocťape’chen ya ñeññey arromñañey. Tarro’mar allohuen ñeññ apuenes Yompor ñeññcha’ soctape’chate’ cohuen.

²² Ama’t na Pablonpa’ Yompor o’ na’n ñeññten allohuenacpas, ñaña ama’t masheñ Apolos, ñaña ama’t masheñ Pedro. Yomporpa’ apueney allohuen ama’t ñeññ yentyes aña patsro ñeññcha’ yeyenpue’ ñeññ alloch yocsheña Yompor. Yocsheñepa’ch ama’t allempo yocrrena, ñaña ama’t allempoch yerroma, ñaña ama’t ora allpon ñeññ eñall te’ ÷hocmuepa’ch coshateney. Ñaña ora allpon ñeññcha’ eñalletatsa tsapatonetpa’ ñeññpa’÷ho’ña coshatasepa’ch. Ama’t allohuen ñeññ pa’namen esoçhno ñeññpa’ yocop ñeññcha’ yeyenpue’.

²³ Elloña yapa’ e’ñe pueyochresha’ ÷ohueney Cristo allohueney, Cristoñapa’ Parets Puechemer pene’.

4

Atet pena ñeññ torretsa Cristocop

¹ Ñeñño’marña te’pa’ notenes, epsheño’marey na epan masheñ Apolos, añ pocte’ o’ch senteney atet ñerra’m ñeññey torretsa Cristocop. Ñaña añ pocte’ o’ch senteney atet ñerra’m yapa’ eyechareťey o’ch ya’poťoñ Yompor po’cohuenña.

² Ñehua, yeñoteñ ñerra’m erra’tseney eyechareťeypa’ añcha’ña atet yepena atet yechenyet.

³ Ñato' sapa' sentenente' napa' nepena atet eyechareten ñato' amate', ñeñtpa' ama añecpayaye ñeñt atet nellquëna na. Ama't acheñenesha' ñeñt amcha'tarefetyetsa, ñerra'm errofente' entennet ñeñt atet nepenapa' ñeñtpa'cho'ña ama añeyaye ñeñt atet nellquëna na. Ama't napa'cho'ña ama neyemteno ñeñt atet nentena e'ñe nañeña.

⁴ Ñehua, e'ñe cohuenare' nenteñeñ allohuen ñeñt atet es nepa'yen, tarraña ñeñtpa' ama añeyaye alloch yeñoch e'ñete' cohuenare' es yeña'yen. Añña e'ñe pocte' nenten Yepartsesharcha'ña otats e'ñete' pocte' entenen, amapa' ñato' amate'.

⁵ Ñeñto'marña notenes, amach sotatsto atet: añ acheñer nanac cohuen, po'psheñeña' ama cohuenayaye. Te'pa' amach sotatsto atet, tarro'mar esempohuañencha' huerra Yepartseshar. Allempopa' ñachña eñotatuerrrets ñeñt ya'nasotyena te'. Ñaña ñachña eñotatuerrrets ama't ñeñt atet yemna'yen yeyochro. Errponeycha' ñeñtey cohuen entuerr Yomporpa' allponeycha'cho' aye'chochtatuerr.

⁶ O' notuas ñeñt poctetsa ñeñtcha' atet sentey ya epan masheñ Apolos. Masheñeshacha' ñaña nochaneshacha' tarro'mar atet notenes, allochñapa' attoch señocho añ pocte' e'ñech attecma senteñ ama't allohuen acheñ, e'ñe atet oteney Yompor po'ñoñ ñeñt atet anuaret ahuatoteñ. Allochñapa' amach yommo'chatsche acheñ ñeñt cohuen yenten e'ñe yañeña.

⁷ Sapa' atarr cohuen sentena sañeña tarraña amaña po'psheñeñeye' atarr eñotañ sentenaye ama't puesheñarra. Ama't allpon señoftenpa' amaca'ye e'ñe soñaye' es señofteno; Yomporca'ye señofteno'. Po'ñoçhpa' atto Yompor es eñotatenespa' eso'mare'tña sommo'chyenaña atet ñerra'm e'ñe soña es señoften.

⁸ Cha't sotenapañ o'te' nanac setsotoñ Yompor poctañña. Cha sottena atet ñerra'm ama es sepallteno ama't coñe'ta Yomporshot. Yañapa' o'huañ acua'psenaye' senterrey. Sañapa' o' cha amcha'tarefoyen sorrtena. Ñehua, e'ñe pocte' sa'mcha'tarefitepa' tarro'mar ñerra'm po'ñoçh o'ch sa'mcha'tarefiteppa' ñato' attotpa' o'ch semnatey yaña o'ch ya'mcha'tarefiteppa'.

⁹ Tarraña napa' noctape'chen ñato' ya ñeñtey allsensareteypa' Yomporpa' ñato' o'ch muenatan acheñenesha' yapa' o'ch a'ypo'ñerryet. Acheñenesha'ñapa' çhach amtsen entenyet. Attach cohuana'tyeney allohuen acheñenesha' arr patsro, ama't ñaña ñeñt Yompor po'millañoñeñneshar o'ch cohuana'tyet ñamet.

¹⁰ E'ñe yame'ñeñoñ Cristopa' añña acheñenesha'pa' çhach otenet yapa' amo' es yeñoteno, tarraña sapa' chaña atet sentena ñerra'mrate' atarr nanac eñotañes. Ñaña yapa' çhach otenyet amo' esoshe'mayayye, tarraña sañapa' atña ahuamencatoyen sentena. Ñaña sapa' nanac amcha'na'tpo' entenset, yañapa' amach acua'psenaye' entenyeto.

¹¹ Yañapa' teme'ttsen yemuerochttena ama't yachporrñoñ, yo'ñpañoñe'na yemuerochttena ñaña yemuelleñoñe'na. Atña epaye' atserrpenyet, ñaña ama yecheno allcha' yeycha.

¹² E'ñe yetorreñoñ nanac yetaruasen e'ñe ya yotoñ. Ñaña ñerra'm esempo sasare'tenyetpa' yañapa' o'ch yenamatenanet Yompor pa'nateña ñocpuet. Ñaña ñerra'm esempo pue'moñe'teñoñet cotare'tenyetpa' yañapa' attach ya'huantenanet.

¹³ Ñaña ñerra'm esempo sochatse'tenyetpa' yañapa' çhach yamo'tstanet cohuen. Ñaña ama't teme'ttsen entenyet atet ñerra'mrate' es ahuapore'taref,

ñeñt ama es sherbetso ama't mamesha arr patsro.

¹⁴ Napa' ama añecpaye' nequellquënnaso añ ñoñets attoch o'ch nepencatas, añecopña nequellquënnas attoch noctape'chaterres e'ñe cohuen atet ñerra'm e'ñe nechemereshas.

¹⁵ Na po'ñoçhpa' atet nentenes ñerra'mrrate' e'ñe nechemereshas. Tarro'mar ahuaña allempo neserrpare'tatoses cohuen ñoñets ñeñt Yomporeshotpa' o' name'ñatasa Cristo Jesús, ñeñtpa' atet ñerra'm cho nechemere'tensa Cristocop. Ñeñto'marña te'pa' notenes, ama't eñall shonte' acheñ ñeñtcha' soctape'chaterre' ñeñt cohuentetsa Cristocop, tarraña e'ñe patrra sompor sepen ñeñt ñanom same'ñate', ñeñtpa' atet ñerra'm na.

¹⁶ Ñeñto'marña napa' notenes: Atet sentenen atet nepena na e'ñe cohuen, sapa'cho'ña atetcha' sepa samia.

¹⁷ Ñeñto'marña nemñonas masheñ Timoteo; ñapa'cho'ña nechemer nepen. Ñapa' nanac nemorrenteña, ñapa' chocma ame'ñenana Yepartseshar. Ñapa' ñach seyerpate' Cristo poctapña ñeñtara coñapñats neychatyes erracmañen errate' pame'ñeñoñet apchenet Yomporecop.

¹⁸ Patanta'ttsospa' nanac sommo'chena atto es señoñtyen. Sapa' cha't sotenapañ ñato' napa' amach nechapoña sesho.

¹⁹ Tarraña po'ñoçhcha' nechap sesho ñerra'm Yomporcha' muenats. Ama't tayecmapa' pocte' o'ch ahuen ñerra'm ña muenats. Esemepoch necherrerrpa' allempochña neñotos ñeñt ommo'chetsa, ñato' po'ñoçhte' ahuañencatet Yomporecop, amapa' ñato' attate' ommo'chenet.

²⁰ Amaña e'ñe ñapña yeserrpare'teñoñ yorrtateññañeña Yompor po'cohuenña attoch atarr ayochreshattena ña; po'huamencote'nachña yorrtateññañ po'cohuenña.

²¹ Ñehua, te'pa' o'ch na'p'to'tas: ¿Erroñena't semnen ñeñtcha' atet neñoses allempoch nechap sesho? Ñato' o'ch necoñchatoses, ñato' o'ch soctape'cherr cohuen tayecma attoch esempoch nechappa' amach eñalle attoch o'ch necoñchatoses. Allempopa' ñato'ellochña chach nemuerossa e'ñe cohuen.

5

Atto Pablopa' ama pocteye' entano atto puesheñarr corinto'marnesha' ortatan ñeñt ama pocteyaye tarraña pamo'tsesha'ñapa' ama erroteye' oteñeto

¹ Ñehua, te'pa' o'ch notas po'poñ. Tarro'mar atet otyenet, po'ñoçh eñallo' sesho puesheñarr yacma ahua' yorerran pachoretsore'. Ñeñtpa' nanac ochña'teñets atet, tarro'mar ama't ñeñt ama ame'ñetsopa' ama pocteye' entenetoña atet.

² Tarraña sapa' chocmo' cohuen senteñ ñeñt atet sepena. Eso'mare'tña ama choye'ña llecatenso. Tarro'mar ñeñt ochña'tets atetpa' amach allo'na senteñe attoch o'ch allo'na separrocmatnen epas.

³⁻⁴ Ama't napa' ama allo'tsenno parro, tarraña e'ñe neyerpueñoñespa' allo'tseney parro. Ama't ama allo'tsennopa' napa' o'ch notas necartot ñeñt pocte' nenten na, attecma ñerra'm allo'tseney parro. Napa' o' neñoçh ñeñtcha' atet sepe' ñeñt ochña'tets atet. O'ch notas ñeñtcha' atet sepe': O'ch sapcha' allohuenes e'ñe same'ñeñoñ Yepartseshar Jesús; napa'cho'ña e'ñe neyerpueñoñespa' allo'tseneycha' parro. Allochñapa' e'ñe Yepartseshar Jesús po'huamenco'tpa'

⁵ o'ch seponñ ñeñt yacmar o'ch sapuer oneñeñ attoch a'coñchatoñ po'chets. Allochñapa' puecamquëñpa' queshperrach esempohuañencha' huerra Yepartseshar Jesús.

⁶ O'ch alla noterrser: Sapa' ama't sommo'chenañ atto e'ñe cohuenare' es sepeneñpa' tarraña ñeñtpa' ama pocteyaye, tarro'mar atta e'ñe semnateñ achen o'ch allo'na ochña'tnen. Ama't señoñe ñerra'm allo'na yemnatneñ o'ch ochña't ama't e'ñe puesheñarroñapa' tsapatonetpa' o'ch pet allohuenet atet. Ñato' o'ch netma'ntacha atet: "Ñerra'm yena' coñe't chase' allempo yeyeçcaten pan, ama't e'ñe coñe'ta yena'pa' o'ch epa'hua ora, attoch e'ñe rropa'ptatuan ora pan."

⁷ Ñeñto'marña o' notas o'ch sa'ypo'ñerr ñeñt ahuat soctapña ñeñt nanac sosey. Añcha'ña o'ch setserrataterr soctapña. Tarro'mar po'ñoç etserra o' yeçcaterres Yompor. O'ch netma'ntacha atet pete't ahuat allempo o'ch çherr pascuapo çhocmach huapore'tuet allohuen pan ñeñt a'chasaret. O'ch yeçcatet etserra pan ñeñt ama a'chasareteyaye. Ñaña pascuapopa' çhocmach muetsete't carrnerotoll, tarraña te'pa' Cristoña o' amtsareta yocop.

⁸ Ñaña ahuat pascuapo añ coshatahuate't pan ñeñt ama a'chasareteyaye tarraña te'pa' añcha'ña yocshatterre' attoch o'ch ya'ypo'ña'huerr ñeñt ahuat yoctapña ñeñt allo yo'chña'tare'te't ñaña ñeñt nanac sosey Yomporecop. Añcha'ña o'ch yoctape'çherr etserra ñeñt e'ñe cohuenare' coñapñats Yomporecop ñeñtara coñapñats ñeñt e'ñe po'ñoç cohuen.

⁹⁻¹⁰ Te'pa' o'ch notas po'poñ. Ahuaña po'poñ necartotpa' atet notuas: Amach seyemtatscho ñeñt cheta'yene' coyanesha' amach puetaporeyaye. Ñehua, allempo notas necartotpa' añecop noten ñeñt ame'ñetsa tarro'mar ñerra'm attera cheta'yenan coyanesha', amach seyemtatsche achen ñeñt atet petsa. Tarraña ama añecpaye' atet noteno ñeñt ama ame'ñetso ñeñt atet pet-sapa' amach seyemtatsche. Tarro'mar añe patsropa' çhocmach yeyemcha ama't ñeñt ama ame'ñetso, atet ñerra'm ñeñt cheta'yene' coyanesha' ñeñt ama puetaporeyaye, ñaña atet ñerra'm ñeñt atarr es ye'chapretetsa, amapa' ñaña eñe't, ñaña ñeñt ma'yochenaya ayeçcataret. Ñerra'm ama yeyemtanetopa' amate' erroteno yocroña añe patsro.

¹¹ Añña notenes amach seyemtatsche ñeñt otets ame'ñenano' Cristo tarraña ñeñt attera cheta'yene' coyanesha' ñeñt ama puetaporeyaye, amapa' ñeñt attera es ye'chapretyetsa, amapa' ñeñt attera ma'yochenaya ayeçcataret, amapa' ñeñt attera sasare'tets, amapa' ñeñt attera posa'tarets, amapa' ñeñt attera etyets. Ñeñt atet pa'yetsapa' amach seyematstero, ñaña ama't atapa' amach serrallme'cherro epas.

¹² Ñehua, añecop atet o' notuas, tarro'mar yocoppa' ama pocteyaye o'ch yotte'ne'cheñ ñeñt ama ame'ñetso. Yocoppa' añña e'ñe pocte' o'ch yotte'ne'cheñ ñeñt pame'ñeñotet atterach es pantenet.

¹³ Yomporpa' ñachña otte'ne'cherre' ñeñt ama ame'ñetso. Sapa' añña poctetsa socop sehuapore'ch ñeñt atterach sosya'tsañach orrtatyenet.

6

Atto ama pocteyaye o'ch yetmantanna'ta

¹ Te'pa' o'ch noterrser po'poñ. Ñaña o' ne'mare'tas atto sapa' çhocmo' setmantannena ñerra'm esempo erro't sepannena, ñaña ama't ñeñteso' pueyochresha' o' perrsoñ Parets. Eso'mare't çhocma soteñña amcha'taret ñeñt ama ame'ñetso o'ch a'poctatonas ñeñt atto se'moñe'tannena. Socoppa' añña pocte' o'ch soch puesheñarr ñeñt e'ñe parrocmá same'ñena ñetcha'ña a'poctate' ñeñt atet sepannena.

² Ama't seño'teñe ya ñeñ'tey o' pueyochresha' perrey Paretspa' yach am'cha'tare'ttertsa allohuen acheñeneshacop arr patsro esempohuañen. Ñehua, ñerra'm po'ño'ch yeñoteñ o'ch ya'm'cha'tare'tterra allohuen acheñeneshacop arr patsro esempohuañenpa' eso'mare'tña ama seño'teñe o'ch sa'poc'tat ñoñets e'ñe sañeña ñeñ't ama torrapahuoyaye.

³ Ñaña ama't seño'teñe esempohuañenpa' yach am'cha'tare'ttertsa ama't Yompor po'm'llaño'teñnanesharecop. Ñeñ'to'marña te'pa' notenes e'ñe poc'te' o'ch ya'poc'tatanna'ta ya yeñoñ ñeñ't atet yey'chena te' arr.

⁴ Ñerra'm esempo esocop setmantannenapa' eso'mare'tña o'ch sene' puesheñarr ñeñ't ama cohuenaye' enteno ñeñ't ame'ñetsa, ñach a'poc'tate' señoñ socop.

⁵ E'ñe nepencna'ntateño'tes sapa' ñeñ'to'marña atet notenes: Seshopa' ¿ama'tña eñalleña ama't puesheñarra ñeñ't ame'ñetsa ñeñ't eñotene' o'ch a'poc'tatan ñoñets? Ñeñ't eñotene'pa' e'ñe poc'te' ñach a'poc'tatene' señoñ ñeñ'tes parro same'ñena.

⁶ Tarraña te'pa' ama atteye' sepeno. Chocmo' setmantannena ama't ñeñ'teso' parro same'ñenañ. Sapa' ahuo'ch'cho' ahues tomantanna'ttsa a'yo allo'tsen acheñ ñeñ't ama ame'ñetso, ñapa' ahuo'ch'cho' a'poc'tatonas señoñ socop.

⁷ Tarraña ñeñ'tpa' ama poc'teyaye ama't mamesha o'ch setmantannena. Tarro'mar ñerra'm chocma yetmantannenapa' ñeñ'tpa' ama añeye' yepeno atet muenen Yompor. Añña ñerra'm esempo erro't p'onas po'psheñeñpa' eso'mare'tña amaña alla sa'huantannenoña ñeñ't atto erro't es se'panna'tyena. Ñaña ñerra'm esempo es puerratan'pense'tpa' eso'mare'tña amaña alla sa'huantenaneto. Añ poc'tetsa o'ch alla ya'huantenanet alla.

⁸ Tarraña sañapa' ama atteye'ña sepeno. Añña sapa' chocmo' erro't se'pannena, ñaña chocmo' es seprratam'psannena ama't e'ñe sagattsa ñeñ'tes ame'ñetsañ.

⁹ Ama't seño'teñeña ñeñ't ama cohuen es petsopa' amach es o'paterroña all am'cha'tare'ttena Yompor. Amach semnatatsche po'psheñeñ o'ch atta she-care'tas. Po'ño'ch atet notenes, ñeñ't cañoresha'tetspa' amach es o'paterro all am'cha'tare'ttena Yompor. Ñaña ñeñ't po'yomporer pa'yene' aye'chcateretpa' ñetpa'cho'ña amach es o'patatare'tterretoña all am'cha'tare'ttena Yompor, ñaña ama't ñeñ't apretets taporets, ñaña yacmanesha' ñeñ't agapannetsa e'ñe ñagattset.

¹⁰ Allo'tpa' ñaña ñeñ't etyets ñaña ñeñ't atarr es ye'chapretyetsa, ñaña ñeñ't posa'tare'tyets, ñeñ't atet pa'yetsapa' amach es o'patatare'tterreto all am'cha'tare'ttena Yompor. Allo'tpa' ñaña ñeñ't achm'are'tets ñaña ñeñ't puer-ratan'pesyets ñetpa'cho'ña amach es o'patatare'tterreto all am'cha'tare'ttena Yompor.

¹¹ Sapa'cho'ña puesheña'ttsos attecma sepe't saña ahuaña. Tarraña te'pa' o' e'shohuare'tterra so'chñar, attoña o' sa'cohuentatare'tterra Partsocop. E'ñe seyemteño't Yepartseshar Jesucristo te'ña Pomporpa' o' poc'te' enterres. Ñaña e'ñe puechorreño'tes Yompor Puecamquēñpa' o' poc'te' enterres Yompor.

Añ poc'te' o'ch e'ñe yecuen cohuen yechets tarro'mar ñeñ'tara yechetspa' po'chets peñ ñaña Cristo

¹² Te'pa' o'ch noterr'serr po'poñ. Ñehua, napa' neñotenes puesheña'ttsospa' atet sotatse'tyen, "e'ño' poc'te' ye'pa'yes ama't erra'tsente' yemnen." Ñehua, yapa' yeñoteñ Yompor po'ñoñpa' ama't ama atet otenyeñe amach es ye'pa'yesatsto, ñeñ'to'marña "e'ñe poc'teñ allohuenpa' o'ch es ye'pa'yeneñ."

Tarraña ama't e'ñe pocten o'ch atet es ye'pa'yeneñ allohuenpa' tarraña ñerra'm ñeñtpa' ama añecpayaye alloch yeyenpueñ yamo'ts attoch e'ñe huomenc ye'panna yeyo'cher Yomporecoppa' ñehua, ñeñtepñapa' amach atet ye'patsto. Ñaña ama't pocten allohuenpa' o'ch es ye'pa'yespa', tarraña ama pocteyaye o'ch nanac es yayom'atse'tyesa tarro'mar ñerra'm es nanac yayomenapa' ñeññaña pomnaren pene'ña yechets.

¹³ Ñaña neñotenes puesheña'ttsospa' atet sotatse'tyen, e'ño' pocte' senten o'ch señmatat sechets e'ñe sa secañoresha'teñoñ tarro'mar ñeñtecpo' ye'chquënaña sechets o'ch atet se'pateñ. Ñeñto'marña atet setma'ntatenaña sechets ñerra'mrrate' allempo sachporrena choch serra' serrar attochña e'ñe señmatat sañ e'ñe ora sechtsohuen tarro'mar satpa' ñeñtecpo' ye'chquëna. Tarraña te' napa' o'ch notas, ama't pocten o'ch yeñmatateneñ yañ arr pat-sropa' chapcha' esempohuañen allempopa' o'huañcha' yemna' yañ ñaña yer-rar, tarro'mar atet ne' Yompor. Tarraña ama't pocten o'ch yeñmatateneñ yañpa' tarraña ama pocteyaye o'ch e'ñe yeñmataten yechets yecañoresha'teñoñ tarro'mar ama añecpaye' aye'chcatareña yechets attoch yecañoresha'ten. Yechetspa' añecopña aye'chcatareñ attoch yetorra'yesa Yepartsesharecop. Ñaña ñapa' ñach yecuañpene'ña yechets.

¹⁴ Ñeñto'mar Yomporpa' o' tantaterran Puechemer ñeñt Yepartseshar yepen ya. Ñeñto'marña yeñoteñ yapa'cho'ña esempohuañenpa' tantaterrnaya'cha' yaña yechets. E'ñe po'huamenco'pa' tantatuerreycha'.

¹⁵ Ama't seño'teña e'ñe yeparrocmateñoñ Cristopa' ñeñt ya yechetspa' po'ño'chpa' ñeñtara po'chets pen ñaña Cristo. Ñeñto'marña notenes, atto ñeñt po'chets pen Cristo ñeñtara ya yechetspa' eso'mare'tña e'ñe pocte' sentenña e'ñe ya yechtso'pa' o'ch yecañoresha'tach Cristo. Amaca'ye pocteyaye o'ch yetsetach Cristo po'chets epuet yecañoresha'.

¹⁶ Ñehua, ama't seño'teña ñerra'm esempo yo'chña't epay ottatsña'pa' epsheño'marey o'ch e'ñe yeparrocmatatach yechtso. Po'ño'ch atet enteney Yompor atet oteney po'ño'ñoñ ñeñt anuaret ahuatoteñ, añmapa' ñeñt atet oten: "ñeñt epsheño'maretpa' e'ñech pa'rra po'chets penet."

¹⁷ Tarro'mar e'ñe yeparrocmateñoñ Yepartsesharpa' epsheño'mareypa' e'ñech pa'rra yoc'tape'chen yeyo'chro ñeñt yecamquëñecop.

¹⁸ Ñeñto'marña notenes añ pocte' o'ch sa'ypo'ñer cañoresha'teñets. Po'po'ne'chno ñeñt ye'pa'yen soseypa' ñeñtpa' ama yechtsoye' ya'sosyateno. Tarraña añña cañoresha'teñetspa' ñeñtpa' e'ñe ya yechets ya'sosyaten.

¹⁹ Ama't seño'teña ye'narpa' ñeñtara pa'paquëll pen Parets Puecamquëñ ñeñt chorratenya Yompor. Ñeñto'mar yeñoteñ yechetspa' ama yoyaye, ñeñtpa' Yomporo tarro'mar

²⁰ ñapa' ahuo't rañterrya. Atto rañterryapa' nanac muero'chta Puechemer attoch tsa'tuerrnaya yo'chñar. Ñeñto'marña notenes, ama't atto yocr-rena yechtso'pa' Yomporepa'chña yecohuentaten e'ñe yecamquëñohuen tarro'mar ñeñt epo'marpa' Yomporo.

7

Atetcha' ye'pa' ñerra'm yemneñ o'ch yesna'ta

¹ Te'pa' o'ch neserrpare'tatas ñeñt atet sa'p'to'ten ahuaña secartoñ. Ahuo't sa'p'to'ten pocte'te' o'ch yesna'ta. Ñehua, ñanom o'ch notas atet, e'ñe pocten amate' yeyoratsche coyanesha' ñeñtcha' yetapor ye'pa'.

² Tarraña ellopa' añ pocte' ñaña allohueney yacmaneshay o'ch yeyore puesheñarr coyanesha' ñeñtcha' yetapor ye'pa'. Coyanesha'pa'cho'ña pocte' ñaña echanepa' e'ñe ña puerrollar. O' notas atet tarro'mar ñerra'm ama cho seyoro puesheñarr ñeñtcha' setapor se'pa'pa' attate' allo'na secañoresha'tnen.

³ E'ñe pocte' epas setaporpa' sagapanna'tepa'ch.

⁴ Tarro'mar coyanesha' ñeñt arrollaretpa' ama e'ñe ñap̄tayaye po'chets, ñeñtpa' puerrollaro'nach. Ñaña yacmapa'cho'ña amach ñap̄tayaye po'chets, ñeñtpa' puetaporo'nach.

⁵ E'ñe pocte' chocmach sagapannena. Tarraña ñerra'm erroteno esempo pocte' senteñ epsheño'mares o'ch sa'pocmat ñoñets e'ñe sañeña amach sagapanna'terro allponmat attoch añach sema'yochra ma'yochatsa. Tarraña ñerra'm o' met allponmat allempo o' sa'pocmatuepa' pocte' o'ch alla sagapannerra. Tarro'mar ñerra'm ama ahuen sagapannerropa' chate' oneñetpa' topatas amate' sa'huanto.

⁶ Tarraña ama notenso ñeñtach paterr pocetsa o'ch yesna'ta, añpa' atfa notenes ñerra'm semneñ o'ch sesna'tapa' pocte' sena'tepa'.

⁷ Tarraña napa' e'ñe pocte' nenteñ ñerra'm allohuenes atteseñ ñerra'm na.* (Tarro'mar Yomporpa' ahuo't apuen attoch amach nemno coyanesha'.) Tarraña allohueneypa' ama attecmayayye. Tarro'mar Yomporpa' ahuo't apa'yesey ellocma atetcha' yesherbe' e'ñe cohuen.

⁸ Ñaña o'ch notas, ñeñtes ama ataporetosopa' e'ñe pocteñ amate' sesna'tatsto. Ñaña ñeñtes rretorrnaneshaspa' e'ñe pocteñ ñaña amate' sesome'terro. E'ñe pocteñ o'te' socrañ e'ñe atfa atet nepena na.

⁹ Tarraña ama't notensoñ atetpa' ñerra'm ama erroteno sa'huantopa' e'ñe pocte' sesna'tepa'. Ama pocmeyaye o'ch atfa nanac yemneñ coyanesha'. Añña pocte' yesna'tepa'. Tarraña añña nanac cohuen ñaña amach yesna'to.

¹⁰ Te'pa' o'ch notas ñeñtes arrollaretes ñeñtcha' atet se'pa. Ñehua, po'ño'ch ama naye' otetso, añña Yepartsesharña otets. Añ pocte' amach sesatstere serrollar.

¹¹ Tarraña ñerra'm eseshas serre' serrollarpa' añ pocte' amach sesome'tatsterro ello, amapa' o'ch alla samo'tstera serrollareshe'mañ. Ñaña o'ch notas samña ñeñtes ataporetos, amach sesatstere setapor.

¹² Te'pa' o'ch notas ñeñt atet pocte' nenten na. Ama't Yepartsesharpa' ama otenñe ñeñt pocetsa añecop, tarraña napa' o'ch neñotatas ñeñt pocte' nenten na. Ñerra'm puesheñarr yacma ñeñt o' ame'ñerra ñeñt atapore'tañ, tarraña ñerra'm puetaporpa' ama ame'ñeno, añ pocte' amach satsterrano puetapor ñerra'm puetaporpa' ama mueno o'ch ahuer.

¹³ Attecma ñaña puesheñarr coyanesha' ñeñt o' ame'ñerra ñeñt arrollare'tañ, tarraña ñerra'm puerrollarpa' ama ame'ñeno, añña pocte' amach satsterrano puerrollar ñerra'm puerrollarpa' ama mueno o'ch ser.

¹⁴ Tarro'mar ñerra'm puetaporpa' ame'ñena, chocma eñall attoch o'ch ame'ñatana puerrollar. Attecma ñaña ñerra'm puesheñarr yacma ñeñt ame'ñetsa, chocma eñall attoch ame'ñatana ñaña puetapor. Ñaña ñerra'm sesannenapa' ñato' sechemeresha'pa' amach es eñoterro Partsocop. Tarraña ñerra'm ama sesannerropa' sacñeñarnesha'ñapa' o'ch so'patacha ñaña Parets.

¹⁵ Tarraña ñerra'm puesheñarr yacma ñeñt ama ame'ñetso, ñerra'm mueneñ o'ch serran puetapor ñeñt ame'ñetsa, ñehua, pocte' serepa'. Tarro'mar puetapor ñeñt ame'ñetsapa' ama es palltetso puerrollarecop. Ñaña Yomporpa' ama mueno ellopa' o'ch allo'na ye'moñe'tanna'tnena

* 7:7 Ñehua, Pablopa' ama eñalle puetapor.

yerrollarecop. Attecma ñerra'm puesheñarr coyanesha' ñeñt ama ame'ñetso, ñerra'm mueneñ o'ch serran puerrollar ñeñt ame'ñetsa, ñehua, pocte' serepa'.

¹⁶ Atet notenes sesannerrepa' tarro'mar ñeñtes arrollaretespa' po'ñoçpa' amach erroteno señoche ñato' sa'queshpachcha' serrollar, ñato' amate'. Ñaña ñeñtes ataporetespa' amach erroteno señoche ñato' sa'queshpachcha' setapor, ñato' amate'.

¹⁷ Ñeñto'mar te'pa' o'ch noterrser, erroteno'tseneste' ama't allempo errote' same'ñera Yepartsesharpa' atterasepa'ch. Ñaña atet muenatyeney Yomporpa' attepa'ch yepena puesheña'ttsoy. Ñeñtpa' attecmaç neyçhatyey ama't ñaña ora allohuen ñeñt pame'ñeñoft apçha'yetsa allemeñ anetso'mar.

¹⁸ Atet ñaña ñerra'm puesheñarr yacma allempo errote' ame'ñerrtset, ñerra'm allempopa' o' atorraretetuet atet yeche't judionesha'pa' te'pa' ama pallteno o'ch a'huañerran all tsorret ahuat. Attecma ñaña po'psheñeñ allempo errote' ame'ñerrtset, ñerra'm ñetpa' ama atorrarefeto, te'pa' ama pallteno o'ch atorrarefttet atet yeçhena judionesha'.

¹⁹ Ama't ya'tsorrarettatstapa' ñeñtpa' ama es sherbeno. Ñaña ama't ama ya'tsorrarettatstopa' ñeñtpa'çho'ña ama es sherbeno. Añña nanac sherbets o'ch yeça ñeñt atet oteney Yompor.

²⁰ Ñeñtpa' o'ch alla noterrser, añ pocte', ama't erroteno'tseneste' allempo errote' same'ñerrapa' atterasepa'ch.

²¹ Ama't allempo errote' pame'ñerra, ama't añepte' ñeñt ataruasataret e'ñe attapa' e'ñe pocte', amach pellcatsto. Atterach petaruasen pepatronarecop, tarraña ñerra'm errotent o'ch pa'rroyaterra pepatronareshotpa' e'ñech pocte' a'rroyerrpetepa' allot taruasatenpet e'ñe atta.

²² Ñato' o'ch netma'ntacha atet: Eñall puesheñarr yacma ñeñt ataruasataret e'ñe atta, tarraña o' chap allempo agapan Yepartseshar ñeñtcha' Pamo'mte' perr. Allempopa' ama't attera taruasateñeñ ñeñt po'patronar pen arr pat-sopa' tarraña te'ña Cristopa' a'rroyatamper po'chñar ñeñt nanac taruasataye't ahuaña. Te'pa' añcha'ña taruasaterre' Cristo ñeñt Yepartseshar yepen. Ñaña eñall puesheñarr yacma ñeñtñapa' cohuen'tsen ñeñt ama ataruasatareteyaye. Ñapa'çho'ña o' chap allempoch aguerran Yepartseshar Cristo ñeñtcha' Pamo'mte' perr. Te'ña Pamo'mte' Cristopa' ñachña taruasaterre' e'ñe cohuen ñeñt ahuañapa' ama ataruasatarete e'ñe atta.

²³ Cristopa' o' rañterrya. Atto rañterryapa' nanac mueroçhta attoch tsa'tuerrnaya yo'chñar. Ñeñto'marña notenes, amach acheña ñapue't samo'mte' sepatsto, añña e'ñe po'ñoçh Yamo'mte' yepen Cristo.

²⁴ Ñeñto'marña masheñeshacha' ñaña noçhaneshacha' o'ch noterrserr alla, ama't erroteno'tseneste' allempo errote' same'ñera Cristopa' pocte' atterasepa'ch. Tarraña Yomporepa'chña seyempue'.

²⁵ Te'pa' o'ch noterrserr po'poñ. Añpa' ñeñt atet sa'p'to'ten ahuaña ñato' pocto'te' ahuo'ch some'ta ñeñt shopsheshare'. Ñehua, napa' o'ch notas, Yepartsesharpa' ama otenyeñe ñeñtcha' atet yepe' shopshesharecop, tarraña napa' o'ch neñotatas ñeñt pocte' nenten e'ñe na, tarro'mar Yepartseshar puemuereño'tpa' ahuo't eñoña pa'n attoch sapa' seyemuetna.

²⁶ Ñehua, ñanompa' o'ch notas: Ama't te'pa' çhocma huennaya shonte' esocmañen ñeñt echarr yentyen ñeñto'marña pocte' nenteñ amate' sesome'to, ñaña amate' sesna'to. Añña poctetsa attate' yocrra.

²⁷ Tarraña ñerra'm o' seyore coyanesha'pa' e'ñe pocte'; te'pa' amach sesastere. Atteña ñerra'm ama seyoreña' coyanesha'pa' pocte' ñaña; te'pa' amach

seyoratsche.

²⁸ Tarraña ñerra'm esempo semne' o'ch sesna'tapa' e'ñe pocte'. Ñaña ñerra'm esempo coyanesha'pa' mueneñ o'ch some'ta, ñeñtpa'cho'ña e'ñe pocte', tarro'mar ñeñtpa' ama ochña'teñtsoyaye Yomporecop. Tarraña ñerra'm yacmapa' o'ch sena'ta, ñaña ñerra'm coyanesha'pa' o'ch some'ta ñaña, allempopa' o'ch echan shonte' ñeñtcha' llecatyese' attoch corret arr patsro. Ñeñto'marña notenes amach sesna'tatsto, coyanesha'pa'cho'ña amach some'tatsto, tarro'mar napa' ama nemno o'ch sechen shonte' ñeñtcha' sellcatyene'.

²⁹ Ñeñto'marña masheñneshacha' ñaña nochaneshacha' nemneñ o'ch alla noterrser. Te'pa' ama atonaye' pallteno char attoch yetorrena Yomporecop. Ñeñto'marña o'ch notas ñeñtes o' setapore't, ama't o' setapore'tpa' añña poctetsa e'ñe tayoteñ amach patrra sellcatsto ñeñt setaporecpa. Añecpa'nachña setorrena Yomporecop.

³⁰ Ñaña ñerra'm esempo huaponasa llequëñetspa' amach ñeñtota yequechpatsterro atto yetorrena Yomporecop. Ñaña ama't esempo es nanac yocshatene'pa' amach ñeñtota yepsatstere Yompor. Ñaña ñerra'm esempo yapa' esocmañen yechenpa' tarraña amach ñeñtota yepsatstere Yompor.

³¹ Ñaña ñerra'm esempo es ye'pa'yen ñeñt patso'marecpapa' amach e'ñe ñeñta yocshatsto ñeñt patso'marecpa. Tarro'mar ñeñt atet yeychen añ patso'marpa' ñeñtpa' huañerrcha' esempo.

³² Ñeñto'marña notenes añechno, tarro'mar nemneñ sapa' amach eñalletatsto po'poñ ñeñtcha' nanac sellcate'. Atet pena yacma ñeñt ama ataporetepa' añach e'ñe llequëna ñeñt Yomporecop. E'ñech ma'yoçhrenana attoch coshatenan Yepartseshar.

³³ Tarraña yacmaña ñeñt ataporetpa' añach e'ñe llequëna ñeñt atto yocrrena añe patsro. Ñaña añach ma'yoçhrena attoch coshatenan puetapor.

³⁴ Ñeñto'marña amach errotenot patrra ma'yoçhreno ñeñt Yomporecop. Attecma pena ñaña coyanesha' ñeñt ama arrollarete. Añach ma'yoçhrena ñeñt Yomporecop. E'ñe po'chtsohuenpa' mueneñcha' o'ch a'rroya Partsocop. Ñaña ama't ora pocta'ño'huenpa' o'ch ma'yoçhrena Partsocop. Tarraña coyanesha' ñeñt arrollaretpa' añach lleca ñeñt atto yocrrena añe patsro, ñaña añach lleca attoch coshatan puerrollar.

³⁵ Ñeñt notenespa' ama añecpayaye attoch o'ch nompata's amach sesna'tatsto. Añecopña atet notenes attoch napa' neyenpas, attoch çhocma cohuenare' es sorratyen. Ñaña çhocmach socsheñesha'pa' o'ch sema'yoçhrena Yomporecop, amach eñalletatsto ñeñtcha' sepatene'.

³⁶ Te'pa' o'ch noterrser po'poñ: Ñerra'm eseshas echene' seseñ ñeñt o' po'natuena, ñaña ñerra'm pocte' senteñ o'ch some'tapa' ñehua, pocte' some'tepa'. E'ñe pocte' o'ch semnach some'tepa' tarro'mar ñeñtpa' ama ochña'teñtsoyaye Yomporecop.

³⁷ Tarraña ñerra'm erra'tsenotespa' sechen seseñ, ñaña ñerra'm ama semno o'ch some'ta, ñaña ñerra'm seseñpa' e'ñe pocte' enteñ amach some'tatstopa' ñehua, pocte' ñaña amach sesome'tatatsche. Ñerra'm po'ñoçh señoeteñ seyoçhro añpa' e'ñe pocte' atet, ñehua, amach sesome'tatatsche. Elloña ñeñtpa' nanac cohuen.

³⁸ Ñeñto'marña te'pa' o' notas: Ñerra'm erra'tsenotes muenate' seseñ o'ch some'tapa' ñeñtpa' pocte'. Tarraña ñerra'm erra'tsenotes ama some'tataye seseñpa' elloña ñeñtpa' nanac cohuen.

³⁹ Te'pa' o'ch noterrrerr po'poñ. Ama't esempapa' ama pocteyaye coyane-sha'pa' o'ch serran puerrollar. Ama't errponmatcha' correna puerrollarpa' amach satstere. Tarraña ñerra'm esempo rroma puerrollar, allempopa' e'ñe pocte' o'ch some'terra ello, tarraña ñerra'm erra'tsencha' muenerr ñeñtcha' yorerre' ñeñt'pa' ame'ñenach ñaña.

⁴⁰ Tarraña ama't o' notuaseñ e'ñe pocte' o'ch some'terra rretorrnanesha', elloña napa' noctape'cheñ ñerra'm o'ch some'terra, ñato' allempopa' cosh-errañcha' mame'. Tarraña ñerra'm amach some'terro, napa' noctape'cheñ ñato' allempopa' ellochña nanaccha' cosherra ñapue't. Napa' noten Yompor Puecamquëñot neñnoten atet.

8

Arrpa' all cotape'chatan corinto'marnesha' añecop ñeñt amsaret aye'chcataretecop

¹ Te'pa' o'ch neserrpare'tatas po'poñ ñeñt atet sa'p'to'tenen ahuaña, ñeñt'pa' atet sotenen: Ñeñtey ame'ñenaya Cristopa' ñato' ¿pocto'te' o'ch serra' po'chets ñeñt muetsenet aye'chcataretecop? Napa' neñotenes puesheña'ttsospa' so-tyen sapa' señoteno' ñeñt cohuentetsa Yomporecop. Ñehua, po'ño'ch allo-hueneypa' yeñoteñ ñeñt cohuentetsa Yomporecop. Tarraña ñerra'm esempo yoten: "Napa' e'ñe neñotuen ñeñt cohuentetsa Yomporecop", ñerra'm e'ñe yommo'cheñoña yotenpa' ñeñt'pa' e'ñech orrena atet yoten. Yommo'cheño'tpa' amach çho'ye' yeyenpannenno attoch huomenc ye'pa' yeyo'cher Yomporecop. Yemorrentanna'teño'tpa' çhochña yeyenpanna'ta.

² Tarro'mar ñerra'm esempopa' çhach yotenapañ o'te' e'ñe es yeñotua poctacma, tarraña yeñoteñ po'ño'chpa' çhocma yepalltena o'ch e'ñe yeñotua poctacma ñeñt cohuentetsa.

³ Tarraña e'ñe yemorrenteño't Yomporpa' ñapa' eñoteny yapa'çho'ña yeñoteñ ñeñt cohuentetsa ñocop.

⁴ Te'pa' o' notuas atet te'ñapa' o'ch neserrpare'tatas ñeñt cohuentetsa Yomporecop. Ñeñtey ame'ñenaya Cristopa' pocte'te' o'ch yerren po'chets ñeñt amsaret aye'chcataretecop, ñato' amate' pocteyaye. Ñehua, yeñoteñ ñeñt aye'chcatare't ñeñt toma'ntatenet ñetpa' po'ño'chpa' ama eñalle Yompor ñeñt atet. Yapa' yeñoteñ Yomporpa' e'ñe pa'trra.

⁵ Po'ño'chpa' ñetpa' pa'namen po'yomporer pa'yenet ama't atet ñerra'm ñeñt ento'tsa'yen, ñaña ama't ñeñt añe patsro'tsa'yen. Ñetpa' pa'namen po'yomporer pa'yenet, ñaña pa'namen po'partseshar pa'yenet.

⁶ Tarraña ya yocoppa' yeñoteñ Yompor Apapa' e'ñe pa'trra, ñeñt Yompor ñeñt ye'chcatue' allohuen ñeñt yentyen, ñaña yapa' ahuo't ye'chcatey e'ñe ñocop. Ñaña yeñoteñ Yepartsesharpa' e'ñe pa'trra ñeñtara Jesucristo ñeñt ye'chcate' allohuen ñeñt yentyen. Te' yapa'çho'ña apuene' atto yocrena.

⁷ Tarraña acheñenesha'pa' ama allohuenacmaye' yoc'tape'chueno atet. Ñeñto'marña puesheña'tetspa' ahuatoteñ ye'chete't o'ch nenet es po'chets aye'chcataretecop. Ñeñto'marña ñerra'm esempo rrenet ñeñt po'chets ñeñt muetsenet aye'chcataretecoppa' e'ñech atta rreñet po'tomña. E'ñe po'tomña'pa' otenet ñato' ama pocteyaye o'ch yerren po'chets ñeñt nenet aye'chcataretecop. Ñetpa' atta enteñet ama arrapahuoyaye ñeñt Yomporecop. Tarro'mar ama çhenaneto pueyo'çhro atto ñeñt e'ñe poctetsa Yomporecop.

⁸ Ñehua, yapa' yeñoteñ ñeñt' yerrenpa' ama añecpayaye attoch e'ñe cohuen entey Yompor. Ama't yerreñ, ñaña ama't ama yerreñe ñehua, e'ñe attecma enteney Yompor.

⁹ Tarraña e'ñech señoa: E'ñech acoña es seña'yes. Ama't yapa' yeñoteñ Yomporpa' e'ñe pocte' enteñeñ o'ch yerren po'chets ñeñt' anaret ayečcataretēcoppa' tarraña ñato' yerreñoñ añechnopa' čate' alla ya'puerratatuer ñeñt' ama tama huomenc penaye pueyočher Yomporecop.

¹⁰ Tarro'mar ñato' sapa' atette' sepene. Ñato' o'ch ahuenes puerahuo allo'tsen ayečcataret, allñapa' ñato' o'chčo' serros po'chets ñeñt' amtsaret ayečcataretēcop. Ñaña ñato' sapa' e'ñech socsheñesha' serreñ tarro'mar sapa' señoa ñeñt'pa' ama esoye' enteñe Yompor. Tarraña ñato' e'ñe allempoña serreñpa' ñato' o'ch entas po'psheñeñ ñeñt' parro same'ñena. Tarraña ñapa' ñato' ama pocteye' enteñe o'ch yerren po'chets ñeñt' amtsaret ayečcataretēcop. Ñato' o'ch peye'chateña ñaña pemo'nasheñ o'ch rreñ ñaña ñato' ama't ñapa' ama pocteye' enteñe.

¹¹ Tarraña ñerra'm ñapa' o'ch rrenan po'chets ñeñt' anaret ayečcataretēcoppa' ñapa' o'ch enteñ atetpa' ochña'teñets Yomporecop. Atteñapa' ñato' o'ch alla puesuerran Yompor. Ñeño'marña notenes, ñato' e'ñe yeñoteñoñ ñeñt' cohuentetsa Yomporecoppa' o'te' ya'chencatach yemo'nasheñ ñeñtecop Jesúsapa' rroma ñaña.

¹² Ñerra'm esempo atet yeñapa' čate' yeyora yo'chñar yemo'nasheñecop tarro'mar o' yeye'chatera o'ch perra ñeñt' ama pocteye' enteno ña. Ñehua, ñerra'm esempo yeyora yo'chñar yemo'nasheñecoppa' e'ñe ño'tpa' o'ch yo'chña't ñaña Cristocop.

¹³ Ñeño'marña te'pa' o'ch notas atet, ñerra'm esempo yerren po'chets ñeñt' anaret ayečcataretēcop, ñerra'm yerreño'tpa' ñato' ya'puerratater yemo'nasheñpa' e'ñe pocteñ amach yerratsto ñeñt' po'chets. Ñeño'marña napa' ama't esempapa' amach nerratsto ñeñt' po'chets te'ta' neyoren no'chñar nemo'nasheñecop atto'tcha' na'puerratater.

9

Atto e'ñe pocteñ ñeñt' torretsa Yomporecoppa' o'ch es yesherbeñ

¹ Te'pa' o'ch neñotatas po'poñ ñeñt' atet nepena na. Napa' e'ñe pocteñ o'ch neña'yes e'ñe erra'tsencha' nemnen na tarro'mar sapa' señoatenen atto napa' ama eñalle ñeñt' neyechare'tenaya na, tarro'mar napa' allsensareten Yomporeshot. Ñaña señoatenen napa' o' orrterrana Yepartseshar Jesús, ñaña señoatenen ña ahuaenca't nepene' tarro'mar e'ñe na netorreñoñ ñocop attoña same'ñerra saña.

² Ñehua, ama't po'potantañpa' otyenetañ napa' amo' allsensareteyayno tarraña sapa' señoatenen po'ñočh napa' allsensaretenca'ye tarro'mar napa' ñeñten same'ñaterraya saña. Atto sapa' e'ñe cohuen same'ñera Yompor, attoña señoateñña allohuen po'ñočh napa' Yomporeshot allsensareten. Ñeño'marña e'ñe pocteñ o'ch neña'yes e'ñe erra'tsencha' nemnen na ñeñten allsensareten, tarraña ñeñt'pa' ama atteye' nepeno tarro'mar napa' ama nemno e'ñe atet nepeñoñ o'ch nepatare't cohuen ñoñets alloch Cristopa' a'queshpaterres.

³ Ñeño'marña te'pa' o'ch notas ñeñt'cha' atet nanapanet ñerra'm esempo a'p'to'tare'tnet, pocto'te' ñeñt' atet neña'yena.

⁴ Po'ñoçhpa' e'ñe pocten nocop o'ch serratallme'chennoñ allempo neserppare'tatenes. Ñaña pocten sapa' o'ch sapnoñ ñeñtcha' norryen.

⁵ Ñaña nocop e'ñe pocten ñerra'm eñalleñ netapor o'ch nanemñ ñeñt parro yame'ñena all nechopeñe'chyen. Atet pena po'potantañ allsensareñnesha', ñaña atet pena Yepartseshar pa'mo'nasheñnesha', ñaña ñeñt atet pena Pedro.

⁶ Ñaña sapa' ñato' çhate' soten e'ñe pocte' e'ñe epsheño'marey epan masheñ Bernabé yaptach yetaruasen attoch yechen ñeñtcha' yerren. Po'ñoçhpa' po'potantañechno ñeñt torra'yetsa Yomporecoppa' ñetñapa' arratareñtenet e'ñe atta.

⁷ Po'ñoçhpa' ñeñt atet pena solltarnesha'pa' ñetpa' e'ñe atta apareñtenet ñeñt palltenet, amach es tsa'teneto. Ñaña atet pena ñeñt nare'tene' narmets. Ñetpa' e'ñe puenare'teño'tpa' çhocmach tsumueññañet puenaremñ pue'mer. Ñaña atet pena ñeñt po'taruas pene' o'ch cohuañpenan carrnero ñaña cabra. Ñetñapa' çhocmach orreññañet puemomos.

⁸ Sapa' çhate' sotenapañ ñeñt atet notenes, ñeñtpa' e'ñe'e' ñañeña noctañño't atet notyenes ñeñt atet yocape'chyen ya allohueney ñeñtey aromña'tey. Tarraña ñeñtpa' amaca'ye atteyaye tarro'mar ñeñtpa' ñeñtara ñoñets ñeñt atet anaret ahuatoteñ.

⁹ Tarro'mar Moisés po'ñoñ ñeñt atet anuaret ahuatoteñ, ñeñtpa' atet oten: "Ñerra'm esempo satmama'tateñ huaquësh attoch es serrocllome'chach pa'tcot allempopa' amach sempanma'tatsche attoch ñapa'cho' rranepa'ña ñeñt serrocllome'chateñ." Ñehua, yapa' yeñoteñ Yomporpa' ama e'ñe ñap'tecpa huacshecop eñose'te.

¹⁰ Po'ñoçhpa' yocpa'ñaña eñose't ñeñtey torra'yetsa ñocop. Tarro'mar e'ñe puemorrenteño'tey yapa' Yomporpa' e'ñe pocte' enteñ arratareñteycha' yaña all yetorra'yena ñocop. O'ch netma'ntacha atet: Ñerra'm çho yetamuenpa' çhocmach yeyemtena ñeñtcha' yenare't all, o'ch choppa' ñeñtcha'ña yetso-muerr. Ñaña ñerra'm çho es yerrocllome'chenpa' çhocmach yeyemtena ñeñt yerrocllome'chen, tarro'mar yapa' yeñoteñ çhocmach apuerryet allpon.

¹¹ Ñehua, o'ch alla netma'ntatererr po'poñ. Allempo yeserppare'tatenes Yompor po'ñoñ ñeñtpa' attecma ñerra'm çho yenare'ten narmets pue'llomer sesho. Ñeñt atet nare'teñetspa' sherben attoch e'ñe yocrra Yomporecop. Ñehua, ñerra'm yapa' o' yeñotatas ñeñt sherbets errponohuañen yecamquëñecoppa' ama'tña pocte' senteñeña sapa' o'ch sapueneñ ama't coñe'ta ñeñt yepalltena alloch yocrra añe patsro.

¹² Po'ñoçhpa' po'potantañechno ñeñt seserppare'tatene', ñetpa' enamuenset o'ch sapanet ñeñt alloch correnet. Ñehua, ñeñtpa' e'ñe pocte'. Atto ñetpa' es enamuensetpa' elloña yocoppa'cho'ña e'ñe pocte' o'ch es yenamas yaña.

Tarraña ama't e'ñe pocten o'ch es yenamaseña' po'ñoçhpa' ama't coñe'ta ama es yenamuenso. Chocma ya'huanteñ ñeñt echarr yenten yocop. Ama't e'ñe pocten o'ch es yenamuenspa' tarraña amaña es yenamuenso tarro'mar ñerra'm ama pocteye' señchepa' yeñoteñ amate' se'mñoto Yompor po'ñoñ ñeñt atet yeserppare'tatenes. Yapa' ama yemno o'ch yepatare't cohuen ñoñets alloch Cristopa' a'queshpaterres.

¹³ Elloña sapa' seño'teñ ñeñt torretsa Parets pa'paclopa' e'ñe allara Parets pa'paclopa' çhocmach entenet puerrar. Ñaña añ cornesha' ñeñt muetsene' huaquësh amapa' carrnero Yomporecoppa' ñetpa'cho'ña e'ñe allotpa' rrenet ñeñt amsaret Yomporecop.

14 Attecma ñaña Yepartsesharpa' nan po'ñoñ. Ñeñtpa' atet ot: Ñeñt ser-
rpare'tene' cohuen ñoñets alloch sequeshpapa' e'ñe pocte' pueserrpare'teñoť
ñeñt e'mñotene'pa' pocte' o'ch apueñet ñeñt palltena alloch corra.

15 Ñehua, ama't e'ñe pocten o'ch sapuenñoñ ñeñt nepalltenapa' tarraña
napa' ama't ahuatapa' ama es notase'te o'ch es sapuen. Ama't te'pa' ama
ñeñtecpaye' nequellquënnaso atet. Tarro'mar ama nemno o'ch huañ atto
neserrpare'tatenes e'ñe atta. E'ñechña nocsheñsha' neserrpare'tatenes e'ñe
atta. Ñerra'm o'ch huañ atto neserrpare'tatenes e'ñe attapa' aña'te' pocte'
nenten o'ch nerroma. Tarro'mar napa' ama nemno ama't eseshapa' o'ch
puerratañpsenña ñeñt allo e'ñe nocshena.

16 Ñaña e'ñe neserrpare'teñoť cohuen ñoñets napa' ama'te' errotenoť e'ñe
atta nommo'cho, tarro'mar napa' e'ñe atet eyechareten. Ñerra'm ama atet
neřopa' napa' nanacte' llequëñtso'tsenen.

17 Ñerra'm e'ñe na nemneññoña neserrpare'teneñpa' ñehua, pocten
o'ch tsa'tenna Yompor attoch coshaterren. Tarraña ñerra'm atet otenen
Yomporpa' ñeñtpa' ama nañeña nemneññoťeye' neserrpare'teno. Po'ñočhpa'
allsensareten ñeñto'marña neserrpare'taterña acheñenesha'.

18 Ñeñt ellonet apuenen Yompor ñeñtcha' atarr nocshate' na, ñeñtpa'
attoť neserrpare'tatenes cohuen ñoñets e'ñe atta. Ama't e'ñe pocten o'ch
setsa'tnapa' tarraña napa' ama nemnoña atet.

19 Ñaña ama't ama eñalle puesheñarr ñeñtcha' neyechayapa' po'ñočhpa'
añña nanac netorratenaya allohuen acheñenesha' tarro'mar na atet muenets.
Ñaña tarro'mar netorrena ñocpuet attoch name'ñacha shonte' acheñenesha'.

20 Ñaña allempo allo'tsenen parro epan namo'tsesha' judionesha'pa' napa'
o'ch nepena atet yečhenet ñet. Allochñapa' ñetpa' o'ch e'mñoterrnet; e'ñe
pue'mñoteñoťetpa' ñato'rraña o'ch name'ñatera namo'tsesha' judionesha'.
Ñerra'm esempo allo'tsenen parro epan ñeñt cotene' Moisés po'ñoñ ñeñt atet
anaretpa' napa' ama'tcha' ama nocteno ñeñt atet cotape'chenet ñetpa' tarraña
napa' amach nachñare'taneto ñeñt atet penet ñet, allochñapa' ñato' attotpa'
o'ch name'ñatanet ñamet.

21 Ñaña ñerra'm allempo allo'tsenen parro epan ñeñt ama cotape'chenaye
ñoñets ñeñt atet anaret Partsocop, napa'cho'ña o'ch nepena atet ñerra'mrrate'
ama nocteno ñoñets ñeñt atet anaret Partsocop. Ñehua, po'ñočhpa'
nocteneñña ñeñt ñoñets ñeñt atet anaret Partsocop tarro'mar añcha'ña e'ñe
nocten Cristo po'ñoñ. Atetcha' nepeñña ñeñt ama es cotape'chetso Part-
socop allochñapa' attotcha' name'ñaterranet ñamet Cristo ama't ñeñt ama es
cotape'cheno Partsocop ama't mamesha.

22 Ñaña ñerra'm esempo allo'tsenen parro epan ñeñt ama huomenc penaye
pueyočher Yomporecoppa' napa'cho'ña o'ch nepena atet ñerra'mrrate'
ama huomencayaye namña neyočher Yomporecop, allochñapa' attoch
noctape'chach cohuen ñeñt ama huomenc penaye pueyočher Yomporecop.
Ñaña ama't erra'tsena acheñ errotencho' cotape'chenpa' napa'cho'ña
allempo allo'tsenen parro epan atetcha' nepena namña atet pocte' entenet
ñet, allochñapa' attoch ama't errotenette' attochña na'queshpatteranetcha'
ama't patanta'ttsa.

23 Atetcha' nepena attoch name'ñatanet ñerra'm esempo neserrpare'tatanet
cohuen ñoñets atto Cristopa' ñach ya'queshpattere'. Attoch napa'cho'ña e'ñe
name'ñeñoť Cristopa' nocshapretanetcha' ñerra'm ame'ñeret ñamet Cristo.

24 Te'pa' o'ch noterrser po'poñ, ñato' o'ch netma'ntacha atet. Ñehua,

po'ñoch sapa' señoñeñ ñerra'm esempo o'ch eñochet esesha'te' nanac matet-sapa' shonte'ch acheñ matatsa. Allohuenetpa' mueneñetcha' o'ch meshe'tuet po'poñechno acheñ attoch ganet premio. Tarraña ama'tcha' shonte' matat-sapa' eñallachña puesheñarr ñeñtcha' ganatanuaya allohuen ñeñt parro matacha'tet. Ñeñto'marña te'pa' añ poctetsa o'ch yetorra yaña e'ñe cohuen Yomporecop attoch yegana ñeñt o'patatenya ña.

²⁵ Ñaña yeñoteñ allohuen ñeñt po'taruas pene' johueñetspa' ñetpa' o'ch pohuanmuet ora ñeñt atet poctetsa attoch echet po'huamenc esheccha' ganet. Ñeñto'marña ñetpa' o'ch quechpa'huet ñeñt ayorampsañ yehuamenc. Ñeñtpa' añecop atet penet attoch ganet premio atet ñerra'm copa.* Ñehua, ñeñt atet penet ñet attoch ganet copa, ama't ñeñt copapa' ahuañaña, ñeñtepñapa' yapa' o'ch yetorra yaña Yomporecop attoch yegana ñeñt o'patatenya ñeñt ama ahuañaño.

²⁶ Atet pena ñeñt matetsapa' e'ñech pa'charr matena. Ñehua, napa'cho'ña e'ñech patrira nema'yo'chra Yomporecop. Atet ñaña ñerra'm esempo ye'chotna'tena, ñerra'm atta ya'mtapechpa' amach errotentot yegano. Ñeñtepñapa' napa' amach atta na'mtapechatsto ñeñt Yomporecop.

²⁷ Chochña neunat nañeña nechets. E'ñe nach taruasate' nechets Yomporecop. Atetcha' ne'pa tarro'mar ama't na serrpare'tate' po'psheñne'chnopa' ñato'rraña ellopa' te't alla ahupore'tareten nañeña tarro'mar ama netsotoñe ñeñt muenen Yompor.

10

Arrpa' all yerpatanet ñeñt atet p'atse'tyese't ahua't israelena'tarnesha'

¹ Ñeñto'mar te'pa' masheñeshacha' ñaña no'chaneshacha' o'ch noterrserer po'poñ. Nemneñ o'ch neñotatas ñeñt atet pe't ahua't yatañeshañ. Allempo chopeñe'chyesete't amaretarero'marpa' añ anmahuete't os ñeñt cohuanpsatanete't Yompor e'ñe allohuenet. Ñaña Yomporpa' ellopa'tetstatan sa'p attoña orrtatanet toñ allcha' e'ñe cohuen oñmuet patso. Attoña metanuet sa'p ñeñt otenet Sa'p Tsasasen.

² Ñaña ahua' na'nmet Moisés ñeñtcha' pa'mcha'tareter pet. Ñaña e'ñe pame'ñeñotet Moisés allohuenetpa' ahua't a'natenanet os. Ñato' o'ch netma'ntacha atet, ñetpa' allohuenet apatarettet oñoñ ñaña oso't e'ñe pueyemteñotet Moisés.

³ Ñaña allohuenet Paretspa' apanete't puerrar ñeñt rrete't allohuenet ñeñt mueñanete't entot.

⁴ Ñaña allohuenetpa' chocmo' apanete't Parets ñeñt orrete't allohuenet. Tarro'mar ahua't allempo potanet oñ e'ñe mapueto't allot orrete'pa' ñeñtña mapue'pa' toma'ntenana Cristo ñeñt Partsotets ñaña. Po'ñoch Cristo ñeñt onahuete't ñaña ñeñtara ñapa' ña co'ta'nmahuete't.

⁵ Ama't Yomporpa' nanaco' a'natanetañe'tpa' tarraña ñapa' amo' pocteye' entane'te atto ñetpa' atpare'tyese'te't. Ñeñto'marña ahua' a'cllatatuanet e'ñe alla amarato. Puesheña'ttso' pocte' ente't Yompor ñeñt e'ñe cohuen co'tape'chyestse't.

⁶ Ñaña ñeñt atet p'atse't ñeñt ama pocteyayepa' añ ye'chateney yaña amach yeye'chapretatsto yaña atet.

⁷ Ñaña amach yeyomporer ye'patsche ñeñt aye'chcataret ñeñt ma'yo'chyesete't ñet patanta'tets. Yapa' yeñoteñ añecop atet pete't, tarro'mar

* 9:25 Po'ñoch añpa' oten choyo'mets tarro'mar ñeñt po'premio pete't ahua't.

atet anuaret Yompör po'ñoñ, ñeñtpa' atet oten: "Acheñenesha'pa' o' anorrcha'tet, o'ña anorrcha'tuetpa' o' rrallme'chapretet. Allotpa' orryeset ñaña. Allempoña o' rrallme'chapretuetpa' o' tantrra'terret o'cho' alla coshame'tamperret pueyeçhcatar."

⁸ Ñaña ama pocteyaye o'ch yecañoresha'ten atet pete't ñet patanta'tets. Ñeñto'marña shonte' acheñenesha' colla'huatsa allempo, e'ñe vientitrés mil acheñenesha' rromats e'ñe pamtarrocma.

⁹ Ñaña ama pocteyaye e'ñe po'tomñapa' o'ch ya'llocchame'ch Yompör. Ñeñt atet pe't patanta'tets acheñenesha'pa' ñeñto'maro'ña shonte' acheñenesha' ñeñt açhanatyeshcheppa' e'ñe colla'huet.

¹⁰ Ñaña ama pocteyaye o'ch yetanmare'cha Yompör. Ñeñt atet pe't ñaña patanta'tets acheñenesha'pa' ñeñto'maro'ña amñarettet ñeñt amtsañpa' o' a'cllatuanet.

¹¹ Tarro'mar ñetpa' atet huapyesanete't pa'namen allochña yapa'cho'ña o'ch yeñoch yamã ama pocteyaye o'ch atet yeþa yamã. Ñeñto'marña ama't ahuaþpa' atet quellquët atet pete't allempo, ñeñtpa' e'ñe yocpa'naña ñeñtey te'pa'cho'ña huaponayach allempoch mellapoterra. Añpa' ñeñt atet yeçhateney yamã amach yeþatsto atet pete't ñet.

¹² Ñeñto'marña te'pa' o'ch notas, e'ñech señota. Amach sotaþsa'tatsto, napa' amach neþo ñeñt atet pete't ahuaþ. Tarro'mar ñerra'm esempo yot atetpa' ñato'rraña machayota alla atet yeperra yamã ñeñt ama pocteyaye.

¹³ Tarro'mar allohueneypa' çhocmach huaponaya topateñets, ñeñtara topateñets ñeñt yeçhenoya allohueney ñeñtey arromñaþey. Tarraña Yompörpa' çhocmach yeyomcha tarro'mar ñapa' ama muenatenye o'ch topatey attoch metanonay yehuamenc. Tarraña ñerra'm esempoch çhaponaya topateñetspa' ñapa' çhocmach orrtatonay attoch ya'huante' attoch amach metanonaye yehuamenc.

¹⁴ Ñeñto'marña masheñneshacha' ñaña noçhaneshacha' notenes, e'ñe pocte' o'ch sa'ypo'ña'huerr ñeñt ayeçhcatareteçhno ñeñt po'yompörer penet ñet.

¹⁵ Sapa' señotueñ ñeñt cohuentetsa Yompörecop. Ñeñto'marña o'ch notas, çama't pocte' senteñe ñeñt o' notuas?

¹⁶ Ñeñto'marña allempo yorreññañ ñeñt toma'ntenaya Cristo po'rras ñeñt atet anaret Yompörecoppa', çhoch ñanom yema'yochañpesya attoch yeparasyoso'ch Yompör. Allempo yorreñ allohueneypa' e'ñech yeyemteñoñ Cristo ñeñt rromats yocop po'ñoçhpa' o'ch yeparrocmatua allohueney ama't ñaña Cristo. Ñaña attecmach yepena ñerra'm esempo yerren pan ñeñt toma'ntenaya Cristo po'chets. Allempo yeshota'ten pan, o'ch yerreñ parro allohueneypa' e'ñech yeyemteñoñ Cristo ñeñt a'rroye' po'chets yocop po'ñoçh allempopa' e'ñe yeparrocmatuen allohueney ama't ñaña Cristo.

¹⁷ Ñaña ama'tcha' shonteypa' e'ñech patrra pan yeshota't ñeñtcha' yerra'yes ama't allohueney. Ñeñto'marña yeñoteñ ama't shonteypa' e'ñe yeparrocmateñoñ Cristopa' e'ñe patrra enteney allohueney, ñaña ñeñtara e'ñech po'chets peney.

¹⁸ Ñehua, o'ch yoctape'ch ñaña ñeñt atet pe't israelena'tarnesha'. Ñetpa' o'ch muetset huaquësh amapa' carrnero Yompörecop. Alloñapa' o'ch rrenet ñeñt puecha'yetsa. Allempo rreñetpa' po'ñoçh e'ñech pueyemteñoñet Yompörpa' o'ch parrocmattet epuet Parets.

¹⁹⁻²⁰ Ñehua, po'ñoçhpa' ama notenso ñerra'm esempo serren po'chets ñeñt amtsaret ayeçhcataretecoppa' o'ch separrocmat epas, tarro'mar ama't

toma'ntateñetañ Paretspa' ama Partsoyaye. Añña notenes ñerra'm esempo ñeñt ama ame'ñenayo Cristopa' o'ch es muetset ayečcataretecop, tarraña po'ñočpa' añecpa muetseñet oneñećecop, ama añecpaye' muetseñeto Yomporecop. Ñeñto'marña napa' notenes ñato' amach serratsche tarro'mar ama nemno e'ñe serreñoćpa' te't separrocmaten epas oneñeć.

²¹ Po'ñočpa' amate' erroćenof yeparrocmatona epay Yepartseshar Cristo ñerra'm čha yeparrocmaten epay oneñeć. Ñeñto'marña notenes amate' erroćenof e'ñe yeyemteñoć Cristopa' o'ch yorr ñeñt ñocop, ñaña ñerra'm aña yetsoten ñeñt oneñećecop. Ñaña amate' erroćeno yerroña parro ñeñt anaret Yepartsesharecop, ñaña ñerra'm aña yetsoten ñeñt oneñećecop.

²² Ñerra'm atet yeřapa' čate' ya'locchame'ch Yompor ñaña e'ñe puempa'teñoćeypa' čate' ya'tsrre'mach. Čate' yotta ñerra'm yapa' nanac ahuamencatey, ñaña'apa' amate' ahuamencateye' yenteñe.

Atto ama't e'ñe poćeñ o'ch es yeřa'yeseñpa' tarraña amach yeřatsto

²³ Ñeñto'mar te'pa' o'ch alla noterrserri, e'ñe poćeñ o'ch yerreneñ po'čets ñeñt amtsaret ayečcataretecop, tarro'mar Yompor po'ñoñpa' ama otenñe amach yeřatsto atet. Tarraña ama't eñalleñ pa'namen ñeñt e'ñe poćeñ o'ch yeřapa' tarraña ñerra'm ñeñćpa' ama añecpayaye alloch huomenc yeřa' yeyoćher Yomporecoppa' ñehua, ñeñćepñapa' amach atet yeřatsto. Ama't eñalleñ pa'namen ñeñt e'ñe poćeñ o'ch yeřapa' tarraña ñerra'm ñeñćpa' ama añecpayaye alloch yeyenpue' po'psheñeñ attoch huomenc řan pueyoćher Yomporecoppa' ñehua, ñeñćepñapa' amach atet yeřatsto.

²⁴ Añcha'ña o'ch yepena attoch yeyenpue' yamo'ts attoch o'ch huomenc pet pueyoćher. Amachña aña yellcatsto ñeñt e'ñe yocpa.

²⁵ Ñaña o'ch notas ñeñćha' atet seřa: Ñerra'm esempo seta allecma vendenet po'četspa' amach sa'řto'tatsche ñeñt vendets, amach sotatsche atet: "Añ po'četspa' ¿añe't ñeñt amtsaret ayečcataretecop?" Amach sa'řto'tatsto allochñapa' esheccha' serre' e'ñe cohuen.

²⁶ E'ñe poće' o'ch yerren ama't erra'tsente' po'čets tarro'mar allohuen es yentyen arr patsro ñeñćpa' Yomporo pueyečcatuar. Ñaña ama't ora patspa' e'ñe ñocma.

²⁷ Te'pa' o'ch notas po'poñ ñeñćha' atet seřa. Ñerra'm esempo ñeñt ama ame'ñenaye Cristopa' o'ch hua'ñas o'ch serrallme'chapreteña' ñaña ñerra'm sapa' sesečapa', e'ñe poće' o'ch ahues ñaña o'ch serra' ama't erra'tsencha' po'čets apaset. Po'tomña amach sotatsto atet: "Ta', ¿poće'te' o'ch yerren añ po'čets? Ñato' ñeñćara añ po'čets ñeñćte' amtsaret ayečcataretecop."

²⁸⁻²⁹ Tarraña o'ch notas po'poñoneć: Ñerra'm allo'tsen puešeñarr ñeñt ama poćeye' entenaye o'ch yerren po'čets ñeñt amtsaret ayečcataretecoppa' ñerra'm ñapa' o'ch otas: "Añ po'četspa' ñeñt amtsaret ayečcataretecop", ñehua, allempopa' añ poće' amach serratsche. Amach yerratsche tarro'mar añ poće' amach yeřatsto ñeñt ama poćeye' enteno po'psheñeñ, ñato' ama't yapa' e'ñe poće' yenteñeñ o'ch yerre'.

Ñehua, ñato' sapa' o'ch sot: "Ta', ¿eso'marte' poće' yapa' o'ch yeřa ñeñt atet poće' enten po'psheñeñ? ¿Eso'marte'ña ama poćeyaye o'ch yeřa ñeñt atet poće' yenten ya?"

³⁰ Ñaña ñato' o'ch sot atet: "Ñerra'm po'ñoč neparasyoso'teñoćpa' nerren nerrarpa' ¿eso'marte'ña otenet ama poćeyaye o'ch nerra' ñeñt o' neparasyoso'tamřesua?"

³¹ Ñeñto'mar te'pa' o'ch notas: Ama't erra'tsena es ye'pa'yenpa' añ pocte' o'ch yorrtena e'ñe cohuen, attoch acheñenesha' o'ch aye'chochtateññañet ñamet Yompor. Ama't allempo es yerra'yen, ñaña ama't allempo es yor-ryenpa' añ pocte' o'ch yorrdaten e'ñe cohuen Yomporecop.

³² Añ pocte' amach ye'patsto ñeñt ama pocteye' enteno judionesha'. Ñaña añ pocte' amach ye'patsto ñeñt ama pocteye' enteno ñeñt ama judioneshayaye. Ñaña amach ye'patsto ñeñt ama pocteye' enteno allohuen acheñenesha' ñeñt ame'ñenaya Yompor. Tarro'mar ñerra'm atet ye'pa ñeñt ama pocteye' entenetopa' 'chate' ya'psatateranet Yompor.

³³ Ñeñto'marña napa' ama't erra'tsena ne'pa'yenpa' añña nemneñ o'ch nocshach allohuen acheñ ñeñt atet pocte' entenet ñet. Tarro'mar napa' ama ne'nen ñeñt e'ñe nocpa, añña ne'nen ñeñt sherbets allohuen acheñenesha'cop. Tarro'marña napa' 'chocma ne'nen atet, allochñapa' attoch na'queshpateranet.

11

¹ Ñeñto'marña napa' notenes: Atet sentenen ñeñt atet nepena napa' ñeñtpa' e'ñe pocte' ñeñtcha' atet se'pa saña, tarro'mar napa' añ nepena ñeñt atet pena ñaña Cristo.

Ñeñt poctetsa ñeñtcha' atet pa coyanesha'chno allempo yap'chena Parets pa'paclo

² Te'pa' o'ch masheñneshacha' ñaña no'chaneshacha' notas po'poñ. Napa' e'ñe pocte' nentenes atto sapa' ama sepseno ñeñt atet ney'chatuanmas ñeñtcha' atet se'pa, ñaña atto 'chocma seyerpuenna.

³ Te'ña añmapa' ñeñt nemneñ o'ch seño'ch saña, atto ya allohueney ñeñtey asheñorreypa' añ pomnaren yepene' Cristo. Añña coyanesha'pa' añ pomnaren penahuet puerrollar. Cristoñapa' añ pomnaren pene' Pompor.

⁴ Ñeñto'marña yoten ama pocteyaye ya ñeñtey asheñorreypa' o'ch yeca'mataño'ta allempo yema'yochena, amapa' allempo ya'poteññañ Yompor po'ñoñ. Tarro'mar ñerra'm esempo yeca'mataño'tenapa' 'chach yottena ñerra'mrrate' po'psheñña acheñ pomnaren yepene', amach a'ñey' pomnaren yepenaye Cristo. Atteñapa' o'ch 'cha yepencna'ntach Cristo ñeñt po'ño'ch pomnaren yepene'.

⁵ Yapa' añña yoten coyanesha'pa' e'ñe pocte' o'ch ca'mataño'ta ñerra'm esempo ma'yochena, amapa' ñerra'm allempo a'potenan Yompor po'ñoñ. Tarro'mar ñerra'm ama ca'mataño'topa' 'chach ottena ñerra'mrrate' ama puerrollareye' pomnaren penaye. Ñeñto'marña yapa' atarrcha' pencna'ntateney poñ tarro'mar ama 'choye' ca'mataño'teno. Ñerra'm ama ca'mataño'topa' añ poctetsa penqu'epa' tarro'mar 'cha ottena atette'ña ñerra'm ashopena'tareñ.

⁶ Atteña ñerra'm coyanesha' ama mueno o'ch ca'mataño'tapa' ñehua, ama'tpa' shopena'tatepa'. Attochña ñerra'm o'ch 'cha pencana atto shopena'tenapa' ñehua, ama'tpa' ca'mataño'tepa'. Ñaña ñerra'm puetsorrmo'tateño'tpa' o'ch pencapa' ñehua, ama'tpa' ca'mataño'tepa' ñaña.

⁷ Yocopña ama pocteyaye ñeñtey asheñorreypa' o'ch yeca'mataño'ta, allempo yeserrpare'ten Yompor pa'paclo tarro'mar ya Yomporpa' puetma'ntatarey ña, ñaña yapa' 'chocma po'cohuenña peney. Tarraña coyanesha'pa' añ po'cohuenña pene' puerrollar.

⁸ Ñehua, tarro'mar ahuañ Yomporpa' asheñorroñ ye'chcatan coyanesha'. Asheñorrpa' ama coyanesho'teye' ye'chcache.

9 Ñaña yeñoteñ asheñorrapa' ama añecpaye' yečhcache coyaneshacop. Añecopña yečhcatan coyanesha' attoch o'ch yenpa'y ya ñeñtey asheñorrey.

10 Ñeñto'marña añ pocte' coyanesha'pa' o'ch ca'matamño'tena attoch ama't Yompor po'millaño'teñnanesharpa' o'ch eñochet añ po'ñoč pomnaren pene' puerrollar.

11 Tarraña e'ñe yame'ñeñoñ Yepartsesharpa' añ pocte' ya ñeñtey asheñorreypa' o'ch yeyenpueñ yaña coyanesha'. Coyanesha'pa'cho'ña pocte' o'ch yenpueney ya ñeñtey asheñorrey.

12 Ñeñto'marña yeñoteñ ahuať Yomporpa' asheñorroť yečhcatan coyane-sha'. Ñaña e'ñe allempoteñ ama't ya ñeñtey asheñorreypa' ahuo't eñalletateney coyanesha'. Tarraña po'ñočhpa' yeñoteñ ñeñtpa' e'ñe Yomporeshotecma huena.

13 Ñehua, o'ch na'p̄to'tas: Ñeñť atet seyčhena sa ¿ama't pocteye' senteñeña coyanesha'pa' o'ch ma'yochenana Yompor ñerra'm ama ca'matamño'teno?

14 Ñeñť atet yeyčhena yapa' ñeñtpa' añ yeñotatene' ñerra'm ya ñeñtey asheñorreypa' esempo atesha'ta yechpa' o'ch pencateney.

15 Tarraña ñerra'm coyanesha'ña atesha'tatsa pue'chpa' e'ñech cohuen entapreteñ allohuen acheñenesha'. Ñaña ñerra'm ateshet pue'chpa' ñeñtpa' alloch ca'matamño'tenet, tarro'mar ñetpa' atet yečhcatanet Yompor.

16 Ñehua, ñerra'm eseshas ama pocteye' entaye ñeñť atet o' notuaspa' ñehua, pocte' o'ch alla noterrser, tarro'mar ñeñť atet o' notuaspa' ñeñtpa' atetcha' sepa tarro'mar ama eñalle po'poñ ñeñť pocte' yenten. Ama't ñaña allohuen ñeñť pame'ñeñoťet Yompor ñeñť apcha'yetsapa' ñetpa'cho'ña pocte' enteñet ñeñť atet o' notuas.

Añpa' ñeñť ama ařapahuo allempo yorren ñeñť toma'ntenaya Cristo po'rras

17-18 Te'pa' o'ch notas po'poñ ñeñťcha' atet sepa allempocma sapčhena. Tarraña ñanompa' o'ch notas, ama pocteye' nentenso ñeñť atet sepena te' allempocma sapčhena. Tarro'mar ñeñť atet sepenapa' ama añecpayaye attoch seyenpannena e'ñe cohuen, elloña ñeñtpa' cha epatenes. Tarro'mar napa' o' ne'mare'tas ñeñť atet sepena. Ñerra'm esempo sapčhena e'ñe same'ñeñoťpa' amo'ch patrraye' soctape'cheno. Elloña sapa' atto'ch nanac es sotnare'tannena. Ñeñto'marña napa' noten ñato' po'ñočhte' atet sepena.

19 Po'ñočh ñeñtey ame'ñetsapa' chocmach eñall ñeñťcha' ama pačharroye' ame'ñatso, ñeñto'marña ya allempopa' o'ch yeñoch ñeñť e'ñe pačharr cotape'chets, ñaña o'ch yeñoch ñeñťcha' ama pačharroye' cotape'chatso.

20 Ñaña ñerra'm esempo sapčhenapa' e'ñe seyerpueñoñ Yepartsesharpa' ahuo'ch serrallme'chen, tarraña po'ñočhpa' ama Yepartsesharecpaye' serrallme'cheno.

21 Tarro'mar puesheña'tets e'ñe pa'chporrñoťetpa' ahuo'chcho' rrenet ñanmacma, amo'chña parrocmaye' serrallme'cheno. Ñeñto'marña ñato' puesheña'tetspa' ahuo'ch atta nanac cheporrena, ñato' po'psheñeñña' ahuo'ch cha posa'tyes.

22 Ñeñť atet sepenapa' ama pocteyaye tarro'mar sapa' sechenca'yeña sepaquëll allcha' serren ñaña allcha' es sorryen. Eso'mare'tña amaña añcha'na'tpahuoye' senteññañeña Yompor pa'paquëll. Allñapa' o'ch atta sepencateñ ñaña ñeñť ama es echetso. Te'ña po'ñočh napa' o'ch notas, amaca'ye nocshapretensoña sa ñeñť atet sepena.

Atet řa Jesús allempo ñanom toma'ntatana po'rras orrapo'
(Mt. 26.26-29; Mr. 14.22-25; Lc. 22.14-20)

²³ Añmapa' ñeñña atet yechatnerrey Yepartseshar ñeñtcha' attoch yeyerpueña. Ñeñtara ñoñets sapa' o' neñotatuas ahuañacma. Ñeñtapa' atet oten: Ñeñte tsaprocma allempo Judaspa' pomuerran Yepartseshar Jesús, ñañapa' chetan pan. Chetan panpa'

²⁴ parasyoso'tam̄pes allotñapa' shota'chpa' atet otanet: "Añmapa' ñeñt toma'ntenaya nechets ñeñtcha' atserrparetterra socop. Añmapa' ñeñtcha' atet sepa. Ñerra'm esempo serren pan atetpa' e'ñech seyerpueñoñen napa' o'ch serre'."

²⁵ Allempoña o' rrohuetpa' attecma pa' o' chetan ñaña orramets allocma orrete'tpa' atet otanet: "Añ ñeñtcha' sorrpa' ñeñt toma'ntenaya nerras ñeñtcha' etserra anaret allochñapa' attoch apretna'huareterra so'chñar. Añmapa' ñeñtcha' atet sepa: Ñerra'm esempoch sorren ñeñt toma'ntenaya nerraspa' e'ñech seyerpueñoñen napa' sorreñcha'." Añpa' allohua ñeñt atet otnerrey Yepartseshar.

²⁶ Ñeñto'marña te'pa' ñerra'm esempo yerren añ pan, ñaña yorren añ orrapo'pa' chocmach yeñotach acheñenesha' atto rroma Yepartseshar yocop. Ñeñtapa' e'ñech tayoteñ atet yeña tarrempohuach esempohuañencha' huerra.

Añpa' ñeñtcha' atet yeña allempo yorren ñeñt toma'ntenaya Cristo po'rras

²⁷ Tarraña ñerra'm yapa' ama yeyerpueñoñeye' e'ñe ña yerreno pan, ñaña o'ch yorr ñeñt toma'ntatana Yepartseshar po'rraspa' yapa' chate' yeyora yo'chñar e'ñe ya'llocchame'teñoñ Yepartseshar po'chets ñaña po'rras.

²⁸ Ñeñto'marña te'pa' o'ch notas, amach sorreña'pa' o'ch soctape'ch ñanom, o'ch señoña sañeña ñeñt atet o' sephua.

²⁹ Tarraña ñerra'm atta ama es yepcheno rre', ama yocape'cho ñanom ñeñt toma'ntatana Yepartseshar po'chetspa' ñerra'm atta yerre' ñaña atta yorrapa' e'ñe yerreñoñ ñaña yorreño'tpa' atsa'tatareycha'.

³⁰ Ñeñto'marña seshopa' shonte' acheñenesha' ñeñt ama a'ñshe'mtetso, ñaña po'potantañpa' cha atsna'tyeset, po'potantaññapa' o' rromayeset.

³¹ Tarraña ñerra'm cho ñanom yocape'ch e'ñe cohuen, o'ch yeñota yañeña ñanempa' allempoña po'ño'chpa' amach atsa'tatareyeye.

³² Tarraña ñeñtcha' atet tsa'tatya te' Yomporpa' ñeñtapa' añecop attoch cotape'chaterrey e'ñe cohuen attoch esempohuañenpa' amach a'coñchatareyeye epay ñeñt ama ame'ñetso arr patsro.

³³ Ñeñto'marña masheñneshacha' ñaña nochaneshacha' te'pa' o'ch noterrser: Ñerra'm esempo sapcha allohuenes o'ch serra' ñeñt anaret Yepartsesharecoppa' añ pocte' choch ñanom secuanna'ta attoch o'ch serreñ e'ñe parrocmá.

³⁴ Tarraña ñerra'm eseshas cheporratsapa' e'ñe pocte' o'ch serrerra' sepacllo. Tarro'mar ama pocteyaye e'ñe sapcheño'tpa' o'ch secoñchatanna'ta. Ñaña po'poñe'chno ñeñt palltetsapa' allach neserrpare'tatoses ñerra'm esempoch nechap sesho.

12

Atto Parets Puecamquëñpa' apayeney po'poñe'ttsocma attoch yetorra'yesa Yomporecop

¹ Te'pa' masheñneshacha' ñaña nochaneshacha' o'ch yeserrpare't ñaña atto Parets Puecamquëñpa' ñach ahuañencha' yeña'yese' attoch yetorra'yesa po'poñe'ttsocma Yomporecop. Tarro'mar napa' nemneñ o'ch señoñ ñeñt e'ñe atet pennay Parets Puecamquëñ.

² Ama't sapa' señoñeñ ahuañmo'cha allempo ama same'ñerra'pa' atta sema'yochatse'tyese't aye'chcatarete'chno. Ñaña aye'chcatarete'chnopa' ama't ama eñorenopa' atta nanac ame'ñatase't, ama't all seta'yese't.

³ Tarraña ñerra'm machaya esesha' eñoratsa, napa' nemneñ chochña e'ñe señoñ ñato' po'ño'chte' añ eñoratene' Parets Puecamquëñ, ñato' amate'. Ñeño'marña o'ch neñotatas atet attoch sapa' señoñ: Ñerra'm esesha' achm'are'tene' Jesús'pa' ñeñña sapa' o'ch señoñ ama a'ñeye' eñoratene' Yomp'or Puecamquëñ. Tarraña ñerra'm esesha'ña otets: "Jesús'pa' ñeñ po'ño'ch Yepartseshar yepen", ñeñña po'ño'ch'pa' o'ch señoñ añ eñoratene' Parets Puecamquëñ.

⁴ Ñaña Yomp'or'pa' ama't e'ñe patrra Puecamquëñ'pa' tarraña ñapa' o'ch ahuañmencat'pa'yese'y attoch yetorra'yesa e'ñe po'po'ñe'ttsocma Yomp'orecop.

⁵ Ama't'cha' po'po'ñe'ttsocma yetorra'yesa'ña'pa' tarraña ñeñ'ar'ach paterr Yepartseshar yesh'er'ba'huen allohuene'y.

⁶ Ñaña ama't eñalleñ po'po'ñe'ttsocma atto ahuañmencat' p'ohuene'y allohuene'y tarraña e'ñe patrra Yomp'or ñeñ' ahuañmencat' yepene' allohuene'y.

⁷ Ñaña allohuene'y Parets Puecamquëñ'pa' ahua't apa'yese'y attoch yorrtatyesoñ Yomp'or po'huamenc. Ñeñ'pa' añecop'aparete'y attoch yeyenpanna'ta alloch huomenc yepa'yese'yeyo'cher Yomp'orecop.

⁸ Atet ñerra'm ñato' pue'sheñ'ar Parets Puecamquëñ'o't'pa' o'ch a'p attoch e'ñe eñotan ñeñ' cohuentetsa Yomp'orecop, attoch ñapa' o'ch co'tape'chatan pamo'tsesha'. Ñato' po'psheñeñ añ Parets Puecamquëñ'pa' o'ch nanac chapatoñ pueyo'chro ñeñ' cohuentetsa Yomp'orecop, attoch ñapa'cho'ña o'ch yenpan pamo'tsesha'. Tarraña ñeñ'ara Parets Puecamquëñ ñeñ'ña eñotatenahuet.

⁹ Ñato' po'psheñeñ'pa' nanac'cha' yemtenana Yomp'or. Ñeñ'ara Parets Puecamquëñ'pa' o'ch a'p attoch yem'cha nanac. Ñato' po'psheñeñ'pa' o'ch a'p po'huamenc attoch a'crratyesan atsnañe'te'chno. Tarraña ñeñ'ara Parets Puecamquëñ ñeñ'ña apuene' attoch a'crratyes.

¹⁰ Ñato' po'psheñeñ'pa' o'ch a'p attoch orrtatyesan Yomp'or po'partsoña. Ñato' po'psheñeñ'pa' nanac'cha' cohuen a'potan Yomp'or po'ñoñ. Ñato' po'psheñeñ'pa' o'ch eñotyesan pa'namen co'ta'p'ñats, attoch ñapa' o'ch eño'ch erro'te' huena ñeñ' co'ta'p'ñats, ñato' Parets Puecamquëñ'o't' amapa' oneñe'tate' po'c'ta'p'ña. Ñato' po'psheñeñ'pa' Parets Puecamquëñ'cha' eñotatene' eñosyese'ts po'poñ ñoñ'tso. Amapa' ñato' po'psheñeñ'pa' o'ch a'm'tan ñoñets atet eñenet po'poñ ñoñ'tso.

¹¹ Tarraña allohuene'ypa' e'ñe patrra Parets Puecamquëñ ñeñ'cha' yeñotatene' ñeñ'ara ñeñ'cha' yapa'yese' pue'sheña'ttsoy erra'tsencha' muena'ña attoch yetorra'yesa pa'namen ñocop.

Ama't e'ñe po'po'ñe'ttsocma yetorra'yena Yomp'orecop'pa' tarraña ñapa' e'ñe attecma cohuen entene'y

¹² Ñato' o'ch netma'ntacha ñeñ' atet ye'chquëna yechets. Ñehua, allemeñ yechets'pa' ama't'cha' ellopa'tetstenañ'pa' tarraña allohuena'pa' e'ñe patrra yech'tso't. Attecma yepena yaña allohuene'y ñeñ'ey ame'ña'yenaya Cristo. Ama't shonteyeñ po'po'ñe'ttsocmay'pa' tarraña e'ñe yame'ñeñ'o't' Cristopa' o'ch yeparrocmatuahua allohuene'y.

¹³ Tarro'mar allempo o' yapatare'tetuapa' Parets Puecamquëñ'pa' o'ch parrocmatatuerrey allohuene'y. Ama't ñaña po'po'ñe'ttsocmay' acheñey atet

ñerra'm patanta'ttsoypa' judioneshay, ñato' po'potantañpa' amach judioneshayaye. Tarraña allohueney e'ñe puechorreñoŕey Parets Puecamquëñpa' e'ñe allempoteñpa' o'ch yeparrocmatua allohueney. Ama't ñaña acheñ ñeñŕ ataruasatareŕ e'ñe atta ñeñŕ ama esoye' enteñeto ñaña acheñ ñeñŕ e'ñe cohueno'tsen. Tarraña e'ñe puechorreñoŕey Parets Puecamquëñ ñeñŕ e'ñe patrrapa' e'ñe allempoteñpa' o'ch yeparrocmatua allohueney.

14 O'ch alla netma'ntatererr ñeñŕ atet yeçhquëna yechets. Ñehua, atet ñerra'm allemeñ yechetspa' ama patrraye' yeçhquëtso, shonte'ca'ye yeçhquëtso. Tarraña ama't shonte' yeçhquënañ yechetspa' e'ñe patrra yechets ottetsa. Attecma yepena yaña allohueney ñeñŕey ame'ña'yenaya Cristo. Ama't shonteyeñ po'poñe'ttsocmaypa' tarraña e'ñe yame'ñeñoŕ Cristopa' o'ch yeparrocmatuahua.

15 Ñehua, o'ch netma'ntatererr po'poñ: Ñato' atet ñerra'm yetacpa' o'ch ot: "Napa' ama es nesherbena atet sherben otats, ñeñŕo'marña ama pocteye' nenteñe o'ch neparrocmat epan ye'nar." Tarraña ama't atet oteneñ yetacpa' ñeñŕpa' ama atteyaye, çhocma parrocmaten.

16 Amapa' ñato' atet ñerra'm yetpa' o'ch ot: "Napa' ama es nesherbena atet sherben quëllo'yets ñeñŕo'marña napa' ama pocteye' nenteñe o'ch neparrocmat epan ye'nar." Tarraña ama't atet oteneñ yetpa' ñeñŕpa' ama atteyaye, çhocma parrocmaten ñaña.

17 Ñerra'm yechetspa' e'ñe yeçlloyochayapa' amaŕe' erroteno ye'mueno. Ñaña ñerra'm yechetspa' e'ñe yetochayapa' amaŕe' erroteno es yemosyeno.

18 Tarraña po'ñoçhpa' ama atteye' yeçhcatye Yompor. Ñapa' ahuo't ne' attoch yeçhca'yesa allemeñ yechets ñeñŕ atet pocte' ent ña. Ñeñŕo'marña yeñoteñ ama't errotençho' yetorra'yesa Yomporecop puesheña'ttsoypa' ñeñŕpa' çhocma sherba'yen.

19 Po'ñoçhpa' ñerra'm yechetspa' aña yeçhcatsa paŕerr atet ñerra'm e'ñe yeçlloyochayapa' amaŕe' errotenoŕ orroña e'ñe cohuen ora yechets.

20 Tarraña po'ñoçhpa' ama atteye' ayeçhcatareŕeye. Aña çhocma eñalleyesa allemeñ yechets. Tarraña ama't ellopa'tetstenañpa' e'ñe patrra yechets ottetsa. Ñeñŕpa' attecma yepena yaña allohueney ñeñŕey ame'ña'yenaya Cristo. Ama't po'poñe'ttsocma yetorra'yesa Yomporecoppa' tarraña e'ñe yame'ñeñoŕ Cristopa' o'ch yeparrocmatuahua allohueney.

21 Ñato' o'ch netma'ntatererr po'poñ: Atet ñerra'm yeçlle'pa' ama pocteyaye o'ch otan yot: "Napa' ama nepallteno ñeñŕ atet pesherben pa." Ñaña yoñpa' ama pocteyaye o'ch otan yetac: "Napa' ama nepallteno ñeñŕ atet pesherben pa."

22 Ñeñŕo'marña ama pocteyaye o'ch yoctape'chyes atet, tarro'mar ora allohuen yechetspa' e'ñe sherba'huen. Ñato' yapa' çhach yotenapañ ñato' erra'tsen yechetspa' amaŕe' es sherbeno. Tarraña ñato' ñeñŕara yechetspa' ello metana'tuenan atto sherben po'poñeçhno yechets. Attecma yepena yaña allohueney ñeñŕey ame'ña'yenaya Cristo. Ñato' yapa' çhach yotenapañ ñato' erra'tsen acheñpa' amaŕe' es sherbeno. Tarraña ñato' ñeñŕña acheñpa' ello metana'tuenan atto sherben po'poñeçhno acheñ.

23 Ñaña ñerra'm erra'tsen yechets ama tama cohuenaye' yentenopa' ñato' o'ch yechorrataña e'ñe cohuen attoch ellopa' o'ch yorrta nanac cohuen. Ñaña ñato' erra'tsen yechets ñeñŕ yepencatene'pa' ñato' o'ch ya'nach e'ñe cohuen.

24 Tarraña ñeñŕ e'ñe cohuen yechetspa' amach yemno o'ch ya'nach, aña çhocña yorrtañ. Atet yeçhcatonay Yompor yechets attoch ama't ñeñŕ ama

tama cohuenaye' yentenopa' o'ch yañño'teñ e'ñe cohuen attoch ellopa' o'ch orrta nanac cohuen.

²⁵ Allempoña allemeñ yechetspa' o'ch parrocmatet e'ñe cohuen, ñaña allempopa' o'ch e'ñe cohuen yenpannenet.

²⁶ Ñeñto'marña ñerra'm esempo paterr yechetspa' atserrena allohuen yechetspa'cho' o'ch atsoapretannenet. Ñaña ñerra'm paterr yechetspa' o'ch orrta e'ñe cohuen allohuen yechetspa'cho' o'ch coshapretannenet. Attecma yepena yama ñeñtey ame'ña'yenaya Cristo. E'ñe yeparrocmatanna'teñoñ ñerra'm puesheñarr yamo'ts cha llequëna ñeñt parro yame'ñenapa' allohueney ñeñtey ame'ñetsapa' o'ch yellcapretannena. Amapa' ñerra'm puesheñarroteypa' nanac yocshenapa' allohueneypa'cho'ña o'ch yocshapretannena.

²⁷ Ñehua, añ yechets ñeñt o' notuapa' añ toma'ntena ya allohueney ñeñtey o' yame'ñera, Cristopa' o' enterrey atet ñerra'm e'ñe ña po'chtsoy, tarro'mar o' yeparrocmat epay Cristo. Ñaña ama't shonteyeñ e'ñe po'poñe'ttsocmaypa' tarraña e'ñe yeparrocmateñoñpa' o' atet yeperra atet ñerra'm Cristo po'chtsoy.

²⁸ Ñaña allohueney e'ñe yame'ñeñoñ Yomporpa' e'ñe po'poñe'ttsocma yetorra'yena Yomporecop. Tarro'mar Yomporpa' atto na'yesonay pa'namen attoch yetorra'yesa ñocop. Ñanompa' ahuo't nan puesheña'tets allsensareñesha'. Allotpa' ahuo't nan po'poñe'chno ñeñtcha' a'pote' po'ñoñ. Allotpa' ahuo't nan ñaña po'potantañ ñeñtcha' ye'chatenahuet Yompor po'ñoñ. Allotpa' ahuo't nan po'potantañ ñeñtcha' orrtate' po'partsoña. Allotpa' ahuo't nan po'potantañ ñeñtcha' torratta attoch a'crratyaset ñeñt atsna'tyets. Po'potantaññapa' ahuo't ne' ñeñtcha' torratta yenpue' allohuen achenesha'. Po'potantaññapa' ahuo't ne' ñeñtcha' yechenahuet allohuenet. Po'potantaññapa' ahuo't ne' ñeñtcha' e'ñosyets pa'namen ñoñtso.

²⁹ Po'ño'chpa' ama allohuenacmaye' allsensareteye. Ñaña ama allohuenacmaye' ya'poteno Yompor po'ñoñ. Ñaña ama allohuenacmaye' yey'chateno. Ñaña ama allohuenacmaye' yorrtateññañe Yompor po'partsoña.

³⁰ Ñaña ama allohuenacmaye' ya'crratyene' atsnañe'ete'chno. Ñaña ama allohuenacmaye' ye'ñosyeno po'poñ ñoñtso. Ñaña ama allohuenacmaye' ya'mteno ñoñets ñeñt e'ñets po'poñ ñoñtso.

³¹ Tarraña ama't ama allohuenacma atteyepa' e'ñe pocte' o'ch yeye'chena ñeñtcha' yetorra'yena e'ñe cohuen puesheña'ttsoy Yomporecop. Tarraña ellopa' o'ch neñotatas po'poñ ñeñt nanac sherbets Yomporecop.

13

Eñall paterr ñeñt nanac sherbets, ñeñtpa' añ: atto amorrentanna'tpahuepa'ch allohueney

¹ Ama't ye'ñosyetsatset e'ñe cohuen pa'namen achen po'ñoñetoña' ñerra'm ama yemorrencho yamo'tspa' e'ñe ye'ñosyeñoñpa' añña Yomporpa' attach enteney atet ñerra'mrrate' con ñeñt atta ama'to'chtetsa. Tarro'mar ama yemorreneteñoñeye' ye'ñosyeno pa'namen ñoñets. Nato' ama't yapa' ye'ñosatsetyes e'ñe cohuen atet ñerra'm Yompor po'mllañoñeñnanesharña' ñerra'mña ama yamo'ts yemorrenenopa' e'ñe ye'ñosyeñoñ Yomporpa' attach enteney atet ñerra'mrrate' patashtalla challachallatspenet. Tarro'mar ama yemorreneteñoñeye' ye'ño.

² Ñaña ama't yapa' ye'ñotatset a'mte' Yompor po'ñoñ, tarraña ñerra'm ama yemorrencho yamo'ts, atetpa' amach esoye' entenye. Ñaña ama't

yeñotatset o'ch ya'poŧa ñeñŧ ñapŧa eñoten Yompor tarraña ñerra'm ama yemorrencho yamo'tspa' ñeñŧpa'cho'ña amach esoye' entenye Yompor. Ñaña ama't yeñotatset ora allpon ñeñŧ eñall, tarraña ñerra'm ama yemorrencho yamo'ts, ñeñŧpa'cho'ña amach esoye' entenye Yompor. Ñaña ñato' nanac yeyemteñoŧ Yomporpa' aphueney allohuen ñeñŧ yenamueñ, ama't ñeñŧ echarr yentyen. Ñato' o'ch netma'ntacha atet: Ñato' o'ch yoch Yompor, añ aspenetpa' chenuëpa'. Ñato' e'ñe yeyemteñoŧ Yomporpa' o'chcho' chenca. Tarraña ama't yeyemteñoŧ Yomporpa' o' yeŧohua atet, tarraña ñerra'm ama yemorrencho yamo'tspa' attecma enteney Yompor, ama esoyaye.

³ Ñaña ama't es yapa'yesatsech huocchañnesha' ora allohuen ñeñŧ yechyenña', ñerra'm ama yemorrenteñoŧeye' es yapa'yenanetopa' ama't atet yeŧatstapa' Yomporpa' amach cohuenaye' entenye. Ñaña ama't e'ñe yame'ñeñoŧ pocte' yentatsech pue'moñe'teñoŧetay o'ch chamayet ora beñnatoteypa' tarraña ñerra'm ama yemorrenteño yamo'ts, ama't atet yeŧatstapa' Yomporpa' atterach amach cohuenaye' entenye.

⁴ Tarraña ñerra'm esempo po'ñoŧh cho yemorrenteña yamo'tspa' e'ñech acoŧa es yeŧa'yenanet, atŧach ya'huantenanet ñaña chochña ya'muerañtena. Ñaña amach cha es yeye'chapretyenaneto, ñaña amach cha yommo'chana'tatstaneto.

⁵ Ñaña amach yañeña entatstatso e'ñe cohueney. Ñaña ñerra'm esempo po'ñoŧh cho yemorrenteña yamo'tspa' e'ñechña pocte' es yeŧa'yenanet, ñaña amach aña ye'natsto ñeñŧ e'ñe atet yemnen ya. Añcha'ña ye'nen ñeñŧ atet muenen po'psheñeñ. Ñaña ñerra'm esempo po'ñoŧh cho yemorrenteña yamo'tspa' amach cha ye'moñe'tyenaneto, ñaña amach cha atsrre'moŧhen yentuenaneto.

⁶ Ñaña ñerra'm esempo es ŧohua po'psheñeñ ñeñŧ ama pocteye' enteno Yomporpa' ñerra'm po'ñoŧh amuerañaypa' yapa' amach cha yocshatsto. Añcha'ña yocshapretena ñerra'm esempo e'ñe cohuenare' es penet.

⁷ Ñerra'm po'ñoŧh cho yemorrenteña yamo'tspa' ama't cho errot ŧonaypa' yapa' chocmach ya'huantoñ. Ñaña ñerra'm po'ñoŧh cho yemorrenteña yamo'tspa' chocmach yeyemcha ñeñŧ atet pena amapa' ñeñŧ atet oten. Ñaña ñerra'm po'ñoŧh cho yemorrenteña yamo'tspa' e'ñe yeyemteñoŧanet chocmach yeyenpuenanet attoch huomenc pet pueyoŧher ñamet Yomporecop. Ñaña ñerra'm po'ñoŧh cho yemorrenteña yamo'tspa' chocmach ya'huanta'hanom pa'namen topateñtsoŧhno.

⁸ Atto yemorrentannenapa' ñeñŧpa' amach ahuañañaatto ama't errponaña. Ñaña te'pa' ama't ya'poteññañeñ Yompor po'ñoñ tarraña esempohuañenpa' huañcha' atto ya'poteñ te'. Ñaña ama't atto te'pa' yeñosyen po'poñ ñoñtsopa' ñeñŧpa'cho'ña esempohuañenpa' huañcha'. Ñaña ama't atto yeñotañtena te'pa' ñeñŧpa'cho'ña esempohuañenpa' huañerrcha'.

⁹ Tarro'mar ama't allpon es yeñotyen te'pa' ama e'ñe yeñotueñe poctacma. Ñaña ama't te'pa' ya'poteññañ Yompor po'ñoñ ñeñŧpa'cho'ña ama e'ñe yeñotueñe poctacma.

¹⁰ Tarraña ñerra'm esempoch huerra Cristo ñeñŧ e'ñe eñotañtetsa pocŧacmapa' allempoña yapa' o'ch e'ñe es yeñotuahua yaña.

¹¹ Ñehua, ñato' o'ch netma'ntacha atet: Napa' allempo cheshenna'pa' atŧa neñosatse'tyese't atet eñen cheshatollesha'. Ñaña allempopa' atŧa noctape'chatse'tyese't atet cotape'chyen cheshaneshas'. Ñaña añach co-

huen nentapretyese't atet cohuen entyen cheshatollesha'. Tarraña te'pa' o' nepo'npa' o' huañ noctape'chatse'tyes atet pena cheshatollesha'.

¹² Ñaña yapa' ama yeñotueno e'ñe ora atet pena Parets. Ñehua, ñato' o'ch netma'ntatererr atet: Yapa' cha yottena atet ñerra'mrrate' rerpatota yecueñ Yompor, amach tama yechme'teñe. Tarraña esempohuañenpa' yentercha' e'ñe allame'tets. Ñaña te'pa' atto es yeñotyen mamesha'tets, tarraña esempohuañenpa' yeñotuerrcha' ñeñt e'ñe atet pena Parets, e'ñech yeñotañetuerra atet pena te' Yomporpa' e'ñe eñotueney ñeñt atet yepena.

¹³ Ñeñto'mar te'pa' yeñoteñ eñall ma'pa ñeñtcha' ama ahuañañañtatso ñeñtpa' añ: atto yeyemteña Yompor, ñaña atto yeyemteñoñ yecuame'teñ ñeñt o'patatenya, ñaña atto yemorrentannena. Tarraña añ ma'po'marpa' añña nanac sherbets Yomporecop atto yemorrenteña allohuen acheñenesha'.

14

Ama't yeñosatsetyes po'poñ ñoñtsopa' ñeñtpa' ama tama sherbeno

¹ Ñeñto'marña te'pa' añ poctetsa o'ch yema'yoçhrena attoch yemorrentanna'ta e'ñe poctacma. Ñaña añ pocte' o'ch yeye'chaprecha Yompor attoch o'ch apa'yese y e'ñe Puecamquëñoñ attoch yetorra'yesa ñocop. Añña e'ñe pocte' o'ch yeye'chaprecha nanac attoch apuey o'ch ya'potoñ po'ñoñ e'ñe eñotochen.

² Tarro'mar ñeñt eñets po'poñ ñoñtsopa' añecpa sherben attoch eñora epuet Yompor, tarro'mar añña acheñenesha' ñeñt e'mñnotenahuetañpa' amach esesha' eñotenaye ñeñt atet oten. Ama't añ ye'ñoratatste' Parets Puecamquëñ ñeñt ama eñotpahuo ñoñetsña' ñerra'm acheñenesha'pa' ama eñoteñeto atet yotyenanet, ñeñtpa' e'ñe Yompora ñapuef e'muene'.

³ Tarraña ñerra'm esempo ya'potoñ Yompor po'ñoñ e'ñe eñotochenpa' ñeñtpa' po'ñoçh çoch es yeñotatenanet attoch huomenc penet pueyoçher Yomporecop. Ñaña çoch yeñotatanet ñeñt atet oteney Yompor po'ñoñ ñeñtcha' atet ye'pa e'ñe cohuen. Ñaña çoch yeñotatanet Yompor po'ñoñ attoch ñetpa' coshenet Yomporecop.

⁴ Tarraña ñeñt eñets po'poñ ñoñtsopa' ñeñtpa' amach atteye' peno. Añecpach eñen e'ñe ñocpa attoch huomenc ñan pueyoçher e'ñe ñañeña. Tarraña ñerra'm esempoña ya'poteññañ Yompor po'ñoñ e'ñe eñotochenpa' ñeñtpa' çoch po'ñoçh es yeñotateñ allohuen ñeñt ame'ñetsa attoch huomenc penet pueyoçher Yomporecop.

⁵ Ñehua, po'ñoçhpa' pocte' nenteñ o'ch seños po'poñ ñoñtso allohuenes, tarraña ñeñt nanac nemnen o'ch señospa' ñeñtpa' añ: o'ch sa'potoñ Yompor po'ñoñ e'ñe eñotochen ñeñt allo yeñen. Tarro'mar ñerra'm esempo ya'potoñ Yompor po'ñoñ e'ñe eñotochenpa' nanaccha' yesherven Yomporecop. Tarraña ñerra'm esempoña yeñen po'poñ ñoñtsopa' amach tama yesherbena. Ñehua, pocte' enteñ Yompor ñerra'm po'ñoçh eñall puesheñarr ñeñt a'mtene' ñoñets e'ñe ya yeñoño, attoch allohueney ñeñtey ame'ñetsapa' o'ch çhaponaya Yompor po'ñoñ yeyoçhro attoch huomenc ye'pa' yeyoçher.

⁶ O'ch notas masheñeshacha' ñaña noçhaneshacha' ama't napa' ñerra'm machayota neçhap seshopa' ñerra'm nañapa' añña neserrpare'tatoses po'poñ ñoñtso ñeñt ama yeñenopa' errotenotuate'ñaca'yeña señoçh tarro'mar amaca'ye se'muenoña ñeñt ñoñtsor ñeñt atet notenes attoch e'ñe cohuen neyenpas. Tarraña añña pocte' socop napa' çhocmach na'potonas e'ñe eñotochen ama't coñeña'ttsa ñeñt atet eñotatenen Yompor. Ñaña napa' elloña çhocña es neñotatyesas po'poñ ñeñt ama señoteno sa. Ñaña napa' çhocña

na'pothonas mamesha'tets Yompor po'ñoñ, ñaña chochña es neyčhatas ñeññ cohuentetsa.

⁷ Ñato' o'ch netma'ntacha ñeññ atet pena pencoll, ama't pencollpa' ama acheñeyaye. Atet ñerra'm napa' esempo nepenclla'tenña' ñerra'm ama cohuenaye' na'poche'teno nepencollpa' amach esesha' eñotaye erroťente' nepchateñ. Amapa' atet ñerra'm napa' esempo netoca' yetarra,* ñerra' ama atteye' netoco atet toquēñetpa' amach esesha' eñotaye erroťente' nepchateñ.

⁸ Ñehua, ñato' o'ch netma'ntatererr po'poñ. Atet ñerra'm esempo o'ch ahuanmuet quellarsapa' choch ñanom puesheñarr solltarpa' o'ch corrnetat quellareñtsorecho, attoch solltarnesha'pa' o'ch eñoch o' chap allempoch ahuanmuet quellaratset. Tarraña ñerra'm solltarpa' ama cohuen a'poche'tano po'cornetpa' añña solltarnesha'pa' amach eñocheto ñato' añecopfe' a'toreñet attoch ahuanmuet quellaratset.

⁹ Attecma pena ñaña yocop ñerra'm esempo yeserrpare'ten po'poñ ñoñtso ñeññ ama allo eñeno acheñenesha', ñetpa' amach erroťenot chapaneto pueyočhreto ñeññ atet yotenanet. Atetpa' chach yottena atette'ña ama eñalle acheñenesha' ñeññ ye'mñotene'.

¹⁰ Po'ñočhpa' eñalleñcha' shonte' po'poñe'ttsocma ñoñets ñeññ atet yeñosyen añ patsro. Ñaña po'poñe'ttsocmay acheñey ñeñey eñotyene' ñeññ e'ñe yeñoñ allo yeñosyen.

¹¹ Tarraña ñerra'm po'psheñeñpa' o'ch serrpare'tatey e'ñe ña po'ñoño ñeññ ama allo yeñeno yapa', ñeñtpa' amach yeñoche erroťente' oteney ña po'ñoño. Yapa' attach ye'mueñ ñerra'mrrate' atta otatsen. Ñaña attecmay yaña ñerra'm yapa' o'ch yeserrpare'tach ñeññ ama eñetso yeñoñopa' amach eñoche erroťente' yoteñ yeñoño. Ñapa'cho'ña attach e'mueney ñerra'mrrate' atta yotatsen.

¹² Napa' tarro'mar atet notenes tarro'mar sapa' chocma seye'chyena atto Parets Puecamquēñpa' o'ch patyesas ñeññ atet semna'yen sa. Tarraña napa' añcha'ña o'ch notas, añña pocte' o'ch seye'chena attoch señot e'ñe cohuen alloch huomenc sepoñ pueyočher allohuen ñeññ ame'ñetsa.

¹³ Ñeñño'mar te'pa' o'ch notas: Ñerra'm esesha' eñosets po'poñ ñoñtsopa' añ pocte' ma'yochanepa' Yompor attoch eñotach o'ch a'mtan ñoñets e'ñe eñotochen añ ñeññara ñoñtso.

¹⁴ Tarro'mar ñerra'm esempo yema'yochena po'poñ ñoñtsopa' ama't e'ñe Parets Puecamquēñ yema'yochatatste'pa' tarraña allempo po'ñočhpa' amach añeye' yoctape'cheno attoch yeyenpue' yamo'ts.

¹⁵ Ñehua, ñeñño'marña te'pa' o'ch notas ñeññcha' atet ye'pa'yesa e'ñe cohuen. Po'ñočhpa' e'ñe pocte' o'ch ma'yochatey Parets Puecamquēñ po'poñ ñoñtso, tarraña añ e'ñe pocte' ñaña o'ch yema'yochena e'ñe eñotochen. Ñaña attecma e'ñe pocte' Parets Puecamquēñotpa' o'ch yemorreacha Yomporecop po'poñ ñoñtso, tarraña añ pocte' ñaña o'ch yemorreachena allo e'ñe yeñen.

¹⁶ Tarro'mar ñerra'm po'poñ ñoñtsa ya'ye'chočhtateññañ Yompor atet eñoratey Puecamquēñ, tarraña ñerra'm allo'tsa'yen po'poñečno acheñenesha' ñeññ e'ñe errte' e'mñotetspa' amach erroťenot pocte' entapretyeto atto ya'ye'chočhtateññañ Yompor, tarro'mar ama e'muennayeto yeñoñ.

¹⁷ Ñaña ama't e'ñe cohuen yeparasyoso'teñeñ Yomporpa' tarraña ñerra'm po'poñ ñoñtsa yema'yochena, ñeñtpa' ama añecpayaye alloch huomenc ye'poñ po'psheñeñ pueyočher, tarro'mar ama eñoteñeto erroťente' yoten.

* 14:7 Po'ñočh añpa' oten arpa.

¹⁸ Napa' atarr neparasyoso'teñ Yompor, tarro'mar ama't napa'cho' neñoteñ eñosets po'poñ ñoñtso. Ñato' ñeñtpa' ello metanennas allohuenes atto señosyen po'poñ ñoñtso.

¹⁹ Tarraña allempo yapčhena allohueney ñeñtey ame'ñetsapa' napa' añña pocte' nenten o'ch neserrpare't ama't e'ñe coñe'ta ñoñets ñeñt' eñotochen attoch e'ñe yeñotue. Añña ama tama cohuenaye' nenteno ama'tcha' neserrpare'ten shonte' ñoñets, tarraña ñerra'm po'poñ ñoñtsa neñenpa' ñeñtpa' amach čhoye' neyenpueñe namo'ts.

²⁰ Ñeñto'marña masheñneshacha' ñaña nočhaneshacha' amach soctape'chatsto atet cotape'chen cheshaneshacha' ñeñt' ama eñotenaye ñeñt' atet cohuentetsa. Ñehua, po'ñočh ñerra'm esempo yoctape'chyen sosya'tsañ allempoña pocte' o'ch yoctape'chen ñeñt' atet cotape'chen cheshatoll, tarro'mar cheshatollpa' ama tama cotape'cheneta' sosya'tsañ. Tarraña allempo yoctape'chen ñeñt' cohuentetsa Yomporecoppa' allempoña po'ñočhpa' o'ch yoctape'chen atet cotape'chen po'naneshacha' ñeñt' atarr es eñotets.

²¹ Añpa' ñeñt' Yompor po'ñoñ ñeñt' atet anaret ahuatoteñ allempo Yomporpa' atet otane't israelena'tarnesha'. Ñeñtpa' atet otanete't: "O'ch noñmatas po'poñ acheñ ñeñt'cha' seserrpare'tatene' e'ñe ñet po'ñoñeto tarraña ama'tcha' atet neponaspa' amach esesha' name'ñerraye tarro'mar amach eseshaye' eñotaye ñeñt' atet aserrpare'tatarettenet." Ñeñtpa' Yompor atet otahuete't ahua't.

²² Ñeñto'marña te'pa' atet notenes ama't yeserrpare'tatset po'poñ ñoñtsopa' ñeñtpa' ama añecpayaye attoch yame'ñacha ñeñt' ama ame'ñetso tarro'mar añ ñoñets ñeñt' ahuatoteñ anaret ñeñt'ña yeñotatene'ña ama'tcha' yeserrpare'tatset po'poñ ñoñtso amach esesha' yame'ñerrayo. Ñeñt'cha'ña yeñotate'ña erra'tsente' po'ñočh ñeñt' ama ame'ñetso. Tarraña ñerra'm esempo ya'poteññañ Yompor po'ñoñ e'ñe ya yeñoño ñeñt' atarr eñotochen, añña ñeñt' ame'ñetsa ñetñapa' e'ñech cohuen e'mñoteñet allochña huomenc yepenamet pueyočhret Yomporecop. Ñeñt'cha'ña yeñotate'ña ñetpa' po'ñočh ame'ñenet tarro'mar ñeñt' po'ñočh ama ame'ñetso, ñetpa' amach mueneñeto o'ch e'mñotet ama't ñeñt' atarr eñotochen ñoñets.

²³ Ñaña o'ch notas, ñerra'm esempo sapčhena allohuenes ñeñtes ame'ñetsa, ñerra'm allohuenespa' atto señosyen po'poñe'ttsoema ñoñtsopa' ñerra'mña machaya huapa ñaña ñeñt' ama ame'ñetso amapa' ñeñt' errte' e'mñotetspa' ñetpa' ama'tte'ña čha otaseto čho'te' semospuena.

²⁴ Tarraña ñerra'm esempoña sa'poten allohuenes Yompor po'ñoñ e'ñe eñotochen ñerra'm allempoña huapa ñeñt' ama ame'ñetso amapa' ñeñt' errte' e'mñotetspa' ñeñt'ña atet seserrpare'ten Yompor po'ñoñpa' ñato' allohuenetpa' o'ch čhapanet pueyočhro, o'ch eñotet ñañeñeta ñeñt' atet cotape'chyenet ñetpa' ñeñtpa' ama pocteyaye Yomporecop.

²⁵ Allempoñapa' ñato' o'ch yore'tanet po'chñaret ñeñt' cotape'chatyenahuet pueyočhro e'ñe a'nahua ñato' puellquëñofetpa' o'ch concorpuet ñato' o'ch aguëret ñamet Yompor. Tarro'mar ñato' allempopa' o'ch ot: "Po'ñočhepa't Yompor se'ñoratyene'."

Parets pa'pacllopa' ama aserrpare'tpahuo e'ñe parrocmá

²⁶ Ñehua, masheñneshacha' ñaña nočhaneshacha' ñeñt'cha' atet sepa cohuen ñeñtpa' atet: Sapa' allempo sapčhenapa' ñato' puesheña'ttsospa' o'ch semorrechena, ñato' po'psheñeñpa' o'ch yečhatenet, ñato' po'psheñeñpa' o'ch a'poťan ñeñt' atet eñotateñ Yompor, ñato' po'psheñeñpa' o'ch eños po'poñ

ñoñtso, ñato' po'psheñeñpa' o'chcho' a'mtan añ ñoñets. Tarraña ñeñtpa' añecopcha' atet sepa attoch huomenc sepoñ po'psheñeñ pueyoçher.

²⁷ Tarraña ñerra'm eseshas eñosets po'poñ ñoñtsopa' ama pocteyaye o'ch seños e'ñe allohuenes, ñato' e'ñech epsheña eñosets amapa' ma'psheña allotpa' ñeñfach. Ñaña añ pocte' ñeñtcha' eñosetspa' ñaptpa'tetscha' eñoset. Tarraña añ pocte' ñaña eñallcha' ñeñtcha' eñotatenahuet ñoñets ñeñt atet eñenet.

²⁸ Tarraña ñerra'm ama eñalle ñeñtcha' eñotatahuet ñoñetspa' amach eñosatsteto e'ñe alla allempo sapçhena allohuenes ñeñtes ame'ñetsa. Allempopa' eñorana'chetepa' Yompor e'ñe ñaptpeto e'ñe pueyoçhreto.

²⁹ Ñaña añ pocte' e'ñech epsheña, amapa' ma'psheña ñeñtcha' a'pote' Yompor po'ñoñ. Po'poñechno acheñenesha'pa' añ pocte' çhoch e'mñoçhet, ñaña çhoch cotape'chet po'ñoçhte' atet oteneý Yompor.

³⁰ Ñaña ñerra'm esempo po'psheñeñ mueneñ o'ch a'potan ñeñt eñotateñ ñaña Yompor Puecamquëñpa' añ pocte' allempopa' amach serrpare'tatsto ñeñt ñanom serrpare'tets.

³¹ Attochña o'ch sa'potuoñ allohuenes Yompor po'ñoñ e'ñe saptpa'tets, ñaña attoch allohuenespa' o'ch e'ñe señoch, ñaña attoch allo'na coshatnenes Yompor po'ñoñ.

³² Tarro'mar ñeñtey a'potene' Yompor po'ñoñpa' çhocmach eñall attoch yeunata yañeña ñanom attoch çhocma yemnatannena.

³³ Yomporpa' ama mueno o'ch atta yano'tatseten allohueney, añña muenen o'ch yesen e'ñe cohuen.

Ñaña atet pena allemeñ anetso ñeñt apcha'yetsa ñeñt pueyochresha' pen Parets. Ñaña allempo sapçhena allohuenes ñeñtes ame'ñetsapa'

³⁴ coyaneshachnopa' amach serrpare'tatsteto, tarro'mar ñeñtpa' ama pocteyaye. Añña pocte' çhoch ame'ñyet ñeñt añcha'tarettetsa, ñeñtpa' atet oteneý ñoñets ñeñt atet anaret ahuatoteñ.

³⁵ Ñehua, ñerra'm mueñenet o'ch es eñotetpa' a'poto'chetepa' puerrollaret allempo çherret pa'paclo, tarro'mar ama pocteyaye coyanesha'pa' o'ch serrpare't allempo yapçhena ñeñtey ame'ñetsa.

³⁶ Ñehua, ñerra'm ama pocteye' senteñe ñeñt atet o' notuaspas' ñehua, o'ch notas atet: Yompor po'ñoñpa' ama e'ñe sa soctapñoçtey' hueno, ñaña ama e'ñe saptecpa hueno.

³⁷ Ñaña ñerra'm esesha' otats, "napa'cho'ña na'poteññañ Yompor po'ñoñ", ñehua, eñotanepa' ñeñt atet noten necartotpa' ñeñtpa' po'ñoçh atet oteneý Yepartseshar ñeñtcha' atet yeþa. Ñaña ñerra'm esesha' otats, "napa'cho'ña chorrenna Parets Puecamquëñ", ñehua, ñapa'cho'ña eñotanepa' ñeñt atet noten necartot ñeñtpa' po'ñoçh atet oteneý Yompor ñeñtcha' atet yeþa.

³⁸ Tarraña ñerra'm esesha' ama name'ñayo ñeñt atet o' notuaspas' ñehua, ñapa' amach se'mñoçtatsche.

³⁹ Ñeñto'marña te' masheñeshacha' ñaña noçhaneshacha' o'ch noterrser: Añ pocte' o'ch sema'yoçhrena a'pote' Yompor po'ñoñ e'ñe eñotoçhen ñoñtso, tarraña pocte' o'ch semnatamet eñosetepa' po'poñ ñoñtso.

⁴⁰ Tarraña ama't erra'tsencha' seþa'yespa' e'ñech cohuen sesen ñeñt poctetsa, ñaña çhocmach semnatanna'ta o'ch es seþa'yes e'ñe saptpa'tets.

15

Allempo tanterra Cristopa' ahuo't orrterrana shonte' acheñenesha'

¹ Te'pa' o'ch masheñeshacha' ñaña noçhaneshacha' notas po'poñ. Napa' nemneñ ellopa' o'ch alla neyerpaterrser e'ñe errotente'ña ñeñt e'ñe atet

pena cohuen ñoñets ñeñt neserrpare'tatuanmas, ama't ahuatoteñ. Ñeñtpa' ñeñtara cohuen ñoñets ñeñt o' same'ñerra, ñaña ñeñtara ñoñets ñeñt allo o' huomenc seperr seyoher.

² Ñaña ñeñtara ñoñets allo o' sa'queshpataretterra ñerra'm amach sequechpuere, tarraña ñato' po'ñoçhpa' ama çhoje' same'ñeno.

³ Ñaña ñeñt neserrpare'tatas ama't ahuatoteñpa' ñeñtara cotapñats ñeñt atet eñotatenet naña, ñeñt nanac sherbets, ñaña ñeñtara ñoñets ñeñt atet anuaret Yompor po'ñoño ama't ahuatoteñ. Ñeñtpa' atet o' neserrpare'tatuas: Cristopa' rroma yo'chñarecop,

⁴ allotpa' apampareta, tarraña poma'pamtañopa' alla tanterra. Ñeñtpa' attecma oten ñaña ñeñt atet anuaret ahuatoteñ Yompor po'ñoño.

⁵ Allempo tanterrapa' ñanempa' orrterrana Pedro, allotpa' orrterrana allohuen pueyochresha'.

⁶ Allotpa' orrterrana ñaña shonte' acheñenesha' ñeñt ame'ñetsa. Ñato' metanente' quinientos acheñenesha' ñeñt enterre' allempo e'ñe parrocmuet. Ñeñt enterre' allempopa' ama't teme'ttsen shontet corra'yenet. Tarraña puesheña'tetspa' o' colla'huenet.

⁷ Alloñapa' orrterrana ñaña Jacobo, allotpa' orrterrana ñaña allohuen po'poñechno ñeñt allsensaretnesha'.

⁸ E'ñe chenta'ñapa' orrtona naña, ama't napa' ama esoyayno. Atta nentena ñerra'mrrate' sapeñtsoma'tota ne'ñalleterra Yomporecop.

⁹ Po'poñechno allsensaretnesha'pa' ñetpa' nanac sherbenet, tarraña napa' ama't allsensareteneñpa' ama tama nesherbena. Ñaña napa' pocte' nenteñ amach otatsetneto allsensareten, tarro'mar napa' nanac na'mueroçhtache't ñeñt ame'ñenaya Yompor.

¹⁰ Tarraña ama't atet nepe'tpa' Yomporpa' atarr morrentna. E'ñe puemuereño'tpa' attoña a'pnaserren ñeñt nanac sherbets ñocop. Tarraña ama orrena morrentno Yompor, tarro'mar te'pa' nanac netorrena Yomporecop. Po'potantañ allsensaretnesha'pa' ama't torra'yenet Yomporecoppa' tarraña napa' ello nanac netorrena atet torrenet ñet. Ñehua, ama't noteneñ napa' netorrena Yomporecop, po'ñoçhpa' ama naye' torretso, añña Yompor puemuereño'tpa' ñeñtña torretsa na nechtsot.

¹¹ Ñehua, amach yoto ñeñtey nanac sherbets, ñato' na amapa' po'poñechno allsensaretnesha'. Añcha'ña yot ñerra'm ya po'ñoçh yeserrpare'teño't o' same'ña'huerrapa' ñeñtña nanac sherbets.

Atto esempohuañenpa' yetantuerrach rromot

¹² Ñehua, ñerra'm po'ñoçh o' same'ñerra ñeñt atet yeserrpare'tatenes atto Cristopa' o' tanterra allempo rroma, eso'mare'tña soten ñerra'm yerromapa' amach errotenot yetanterro. Po'ñoçh ñeñtpa' atet oten puesheña'tets ñeñt sesho'tsen.

¹³ Ñehua, ñerra'm po'ñoçh ama eñalle attoch yetanterra yapa', Cristopa'cho'ña amate' tanterrañe ama't teme'ttsen.

¹⁴ Ñerra'm po'ñoçh Cristopa' teme'ttsen rromueneñpa' ñeñt atet yeserrpare'tatenes te'pa' amate' es sherbenne. Ñaña ñerra'm po'ñoçh ama tanterrañe Cristopa' te'pa' e'ñe'e' orrena yeyemteñañ.

¹⁵ Ñaña ñerra'm po'ñoçh ama tanterrañe Cristopa' yapa' attate' yeshquënsoñ atto' pena po'ñoçh Yompor, tarro'mar yapa' o' yeserrpare'tuoñ Yompor atto ñapa' o' tantaterran Puechemer Cristo. Tarraña ñerra'm po'ñoçh

ama eñallñe attoch yetanterra rromotpa' ñeñña atet o' yeserrpare'tatuas atto Yomporpa' o' tantaterran Puechemer Cristo, ñeñtpa' amate' po'ñochoyayñe.

16 Po'ñocho'pa' ñerra'm amach yetanterro yapa', Cristopa'cho'ña teme'ttsente' ama tanterrañe.

17 Ñaña ñerra'm po'ño'ch teme'ttsen amach tanterrañe Cristopa' e'ñe'e' orrena seyemteñañ, ñaña so'chñarpa' amate' ap'retnareteñe teme'ttsen.

18 Ñaña allohuen ñeñt' o' colla'huena ñeñt' ame'ña'nmaya Cristopa' ñetpa' o'te' e'ñe poctacma chenca'huerretañ.

19 Ñaña ñerra'm añecpa yeyemteñañ Cristo allempo huom'chenya', ñaña ñerra'm po'ño'ch amach yetanterro, ñerra'm atteña'pa' nanacte' llequëñtso'tsenyeñ. Ñeñt' llequëñetspa' ellote' metanenaneñ ñeñt' atet yellcatyene' añe patsro.

20 Tarraña ñeñtpa' ama atteyaye, tarro'mar po'ño'ch Cristopa' o' tanterra ñanom. Atto tanterrapa' amach alla rromuerre'te allochñapa' esempohuañen allohueney ñeñtey ame'ña'nmaya Cristopa' yapa'cho'ña attecma'ch yetanterra.

21 Atet pa' ñaña ahuañ Adán e'ñe ña po'chñaroñ o' anare'tta attoch yerroma, ama't e'ñe puesheñarroña. Te'pa'cho'ña e'ñe puesheñarro'pa' o' orrterra attoch yetanterra ama't esempoch yerroma.

22 Tarro'mar e'ñe po'chñaroñ Adán ñeñtey pamo'tsna'tareypa' yocoppa'cho'ña o' anare'tta attoch yerroma yaña allohueney. Tarraña te'pa' e'ñe yeparrocmateñoñ Cristopa' elloch alla yocrra'huerra allohueney.

23 Tarraña ñeñtpa' atetcha' perra: Cristo ñanom o' tanterra allochñapa' ñerra'm esempoch huerra, yapa'cho'ña ñeñtey ame'ñenayapa' attecma'ch yocrra'huerra allohueney.

24-28 Allempoña Cristopa' o'ch puerrata'mpesuan po'huamenc allohuen ñeñt' añcha'taretetyetsa, ama't ñaña ñeñt' añcha'no'chettyetsa, ñaña ñeñt' ahuamencatetyetsa. Tarro'mar añ poctetsa Cristopa' ñach añcha'tarettertsa e'ñe ñapueñ esempohuañencha' yoram'pesuan po'huamenc allohuen ñeñt' e'mo'ñe'tene'. Ñaña esempohuañen e'ñe chenta'pa' o'ch a'huaña'mperrey rromueñets ñeñt' o'patatare'tey te' allohueney. Tarro'mar Cristopa' o' aphue Pomp'or po'huamenc attoch pomnaren penan allohuen esocmañen. Ñehua, ama't oteneñ Yompor po'ño'ñ Cristopa' pomnaren penano' allohuen esocmañenpa' tarraña yeñoteñ amach pomnaren pano Pomp'or, tarro'mar Pomp'orpa' ña apuene' po'huamenc. Esemphuañencha'ña pomnaren pohuan allohuen esocmañen allempoña Cristopa' o'ch aphuerran Pomp'or ñeñt' nanac Parets atto añcha'tare'ttena. Allempoña Pomp'orpa' o'ch alla pomnaren perran Cristo ñeñt'ara Pomp'or ñeñt' o' ahuamencat' o' pohue. Allempoña Pomp'orpa' ñach añcha'tarettertsa, ñaña allempopa' ñach pomnaren perre' allohuen esocmañen. Allempopa' o'ch mellapoterra.

29 Te'pa' o'ch alla noterr'serr po'poñ. Ñerra'm po'ño'ch ama eñalle attoch yetanterra esempohuañenpa' eso'mare'tña puesheña'tets acheña'pa' apatare'ttenaña añecop ñeñt' o' rroma. Po'ño'ch ñerra'm amach erro'tenot tanterro ñeñt' o' rromapa' eso'mare'tña apatare'ttenetña ñeñte'cop.

30 Ñaña ñerra'm po'ño'ch amach erro'tenot yetanterropa' eso'mare'tña pocte' nenteñ e'ñe name'ñeño'pa' ama't chocma nemuero'chtana ñocoppa' e'ñe pocte' nenteñ.

31 Napa' atet noten tarro'mar pate'tets yetpa' e'ñe na'llpuepñoña ama muetsayenneto. Ñehua, neñoteñ ñeñtpa' attecma'ch pa'net. Tarraña

masheñneshacha' ñaña nochaneshacha' errponcha' nemuerochtapa' allponcha' nocshapretensa samña, tarro'mar e'ñe yeparrocmateñoť epay Yepartse-shar Jesucristo.

³² Ñaña arr Efesopa' e'ñe na'llpuepñoťa a'queshp̄atnet atet ñerra'mrrate' cho norrotena epan ma'yarr. Tarraña ñerra'm amach errotentot yetanterropa' ñeñña atto na'llpuepñoťa a'queshp̄atyennetpa' amach es sherba'no, tarro'mar ñeñť patso'marecpapa' ama sherbeno. Po'ñočhpa' ñerra'm amach eñallñe attoch yetanterraña' e'ñe pocte' o'ch yoteneñ: "Te'pa' acsha'yeshp̄ahuepa'ch, ñaña o'ch yotanna'ta arrallme'chapretyeshp̄ahuepa'ch, ñaña o'ch yotanna'ta orrare'tyeshp̄ahuepa'ch tayepa'tña'pa' huom̄chay. Tsapaťoneña o'ch yerromapa' amach allo'na atet yepa'nenno."

³³ Tarraña amach sotařsa'tatso atet, tarro'mar yeñoteñ "ñerra'm esempo yeyemteña ñeñť atta cotape'chatse'tyets ñeñť ama cohuenayaye Yomporecop yapa'cho'ña chach shequenyet tarro'mar tsapaťoneťpa' ñato' o'ch alla atet yeperra yaña atet řa'yenet ñet, ama't ře' yapa' e'ñe cohuen yotape'chen Yomporecop."

³⁴ Añaña pocte' o'ch soctape'cherr ello, ñaña o'ch sequechpuerr ñeñť atet seřa'yese't ñeñť ama pocteyaye Yomporecop. Te'pa' sepenquępa' tarro'mar ñato' po'ñočh ama señoťeñe Yompor allohuenes.

Atetcha'yepo'poñet allempoch yetanterra rromot

³⁵ Te'pa' o'ch notas po'poñ. Ñehua, ñato' puesheñarroťespa' atet sotenen: "Amate' errotentot yetanterroña rromot. Ñerra'm po'ñočh atanterra'po' rromot, yechetsña allempopa' ¿errotena'tcha'ña orrterra?"

³⁶ Sapa' are'tña es señoťeno. Ñehua, ñato' o'ch netma'ntacha atet: Yeñoteñ ñerra'm es yenare't pue'llomerpa' amach ahuen chopo. Choch ñanom puetsa' pa'tall esheccha'ña chop.

³⁷ Ñaña ama aņeye' yenare'teno narmets ora ñeñť e'ñe atet chopuets. Atet ñerra'm chop* yenare'tpa' pue'llom̄rach yenare'teññañ.

³⁸ Ñaña ñeñťpa' Yomporcha' a'chpate', tarraña ñeñťcha'ña chopatspa' o'ch po'poñet ñeñť atet orrtena ahuaña pue'llomer. Ñeñťpa'cho' Yompor a'po'poñetatene' tarro'mar atet muenen ña. Ñaña ñerra'm po'poñe'ttsocma es yenare't pue'llomerpa' e'ñech po'poñe'ttsocma chopyes ñaña narmets ñeñť e'ñe atet anareť.

³⁹ Añpa'cho' chetsotspa' e'ñe po'poñe'ttsocma chetsots, ama e'ñe attecmayaye. Atet ñerra'm ya acheņeypa' po'poñcho' yechets yechen. Ñaña es berrochnopa' po'poñcho' po'chets pen. Ñaña oťechnopa'cho' po'poñ po'chets pen ñaña. Cacachnopa'cho'ña po'poñcho' po'chets pen ñaña.

⁴⁰ Ñaña ñeñť allpon ento'marnesha' ama e'ñe attecmayayeto ñerra'm patso'marnesha'. Tarraña ñeñť ento'tsa'yenpa' ellonetcho' cochnesha'tyenet tarro'mar atet anareťet. Ñeñť patso'tsa'yenpa'cho'ña ellonetcho' cohuenetyenet ñamet tarro'mar ñetpa'cho'ña atet anareťet.

⁴¹ Ñaña atet cohuentena atsne'pa' ñeñťpa' po'poñ poptena tarro'mar atet anareť ñaña. Arrorrpa'cho'ña po'poñoneťcho' cohuentena tarro'mar atet anareť. Rantochnopa'cho'ña po'poñoneťcho' cohuenetyenet. Ñaña pate'tets rantopa' po'poñe'ttsocma cohuenetyenet ñamet tarro'mar atet anareťet.

⁴² Attecmach yeperra yaña ñerra'm esempohuañencha' yetanterra. Ñeñť atet orrtena ře' yechetspa' allempoch yetanterra'pa' amach atteraye'

* 15:37 Po'ñočh aña'pa' oten trigo.

yorrterro. Te'pa' arromñañayapa' chocmach yerroma allotpa' o'chcho' pampa'yet allcha' puetsohuerr yechets. Tarraña esempoch yetanterra' amach alla ya'rromñañterre'te.

⁴³ Ñaña te' yechetspa' atarr pencna'ntateney tarro'mar chocmach yatsna'ten. Ñerra'm yatsna'tpa' o'chcho' yerroma, allotñapa' o'chcho' pampa'yet. Tarraña ñerra'm esempoch yetanterra' allempo yechetspa' amach alla pencna'ntaterre'ye'te. Allempopa' e'ñech cohuen yorreyena. Ñaña te'pa' ama ahuamencateye ñeñto'marña chocma yerromuen, allotñapa' o'chcho' pampa'yet. Tarraña ñerra'm esempoch yetanterra' allempopa' nanaccha' ahuamencatey.

⁴⁴ Atet yeyeçhquëna te' arr patso'marpa' ñeñtpa' chocmach yerroma, allotñapa' o'chcho' pampa'yet. Tarraña ñerra'm esempoch yetanterra' allempopa' camuecñetsoñach yorrterra. Po'ñoçh yeñoteñ atet yorrtena te' yechtso'tpa' yeñoteñ ñaña yecamquëño'tpa'cho'ña yorrterrach esempohuañen.

⁴⁵ Ñeñto'marña ama't Yompor po'ñoño atet anuaret ahuatoteñ, ñeñtpa' atet oten: "Allempo Adánpa' yeçcach Yompor allempoñapa' ahuo't a'p po'rrerña attoch corra e'ñe po'chtso't. Ñeñto'mar Adánpa' ñeñt ñanom acheñetats." Tarraña chenta'ñapa' acheñetos ñaña Cristo attoch ñach yapuerre' ello o'ch alla yocrra'huerra yecamquëño't.

⁴⁶ Tarro'mar Yomporpa' atet na'y. Ñanompa' o'ch yocrra e'ñe yechtso't, esempohuañenñapa' o'ch alla yocrra'huerra ñaña yecamquëño't.

⁴⁷ Tarro'mar ñeñt ñanom acheñ ñeñtara Adánpa' patsa ayeçcataret, ñeñto'marña ñapa' atta patso'marneshat. Tarraña puepañ ñeñt acheñetosets ñeñtara Yepartseshar Jesucristo ñeñtpa' ento't huapa.

⁴⁸ Ñaña ñeñtey arromñañeneshaypa' yapa'cho'ña attaya ñerra'mrrate' Adán ñeñt ayeçcataret pats. Tarraña ñeñtey ame'ñenaya Cristo ñeñt huaptsa ento'tpa' yapa'cho'ña yocrra'huerrach yecamquëño't ento atet ñerra'mrrate' Cristo ñeñt huaptsa ento't.

⁴⁹ Atteña te'pa' atta yeyeçhquëna yechtso't atet ñerra'mrrate' Adán ñeñt ñanom ayeçcataret pats tarraña esempohuañenpa' yeyeçhquërrach ello atet ñerra'mrrate' Cristo ñeñt huaptsa ento't.

⁵⁰ Ñeñto'marña masheñneshacha' ñaña noçhaneshacha' notenes: E'ñe yechtso'tpa' amach es yo'pato all añcha'tare'ttena Yompor. Tarro'mar allempo arromñañayapa' amate' erro'teno't es yo'patoña ñeñt ama ahuañaño.

⁵¹ Ñehua, o'ch neñotatas ñeñtcha' atet perra esempo, ñeñt ñap'ta eñoteñ te' Yompor. Po'ñoçhpa' amach e'ñe allohueney yerromhuo. Tarro'mar ñeñtey orameñ corretsa allempoch huerra Cristopa' amach yerromo. Allempopa' attach yepo'poñet

⁵² e'ñech machayo'ta e'ñe allempocma esempoch e'morrterra Yompor po'poc'tor e'ñe allohuanen. Ñehua, ñeñtpa' atet'cha' perra allempo. Ñanompa' o'ch e'morrterra Yompor po'poc'tor. Allempoñapa' o'ch tanrra'tuena ñeñt colla'huatsa ahuatoteñ. Allempochña tanterre'tpa' amach alla arromñañterrete'ye. Yaña ñeñtey orameñ corretsapa' yapa'cho'ña o'ch yepo'poñet e'ñe allempocma.

⁵³ Tarro'mar yechets ñeñt aptsañapa' añ palltetsa o'ch puenasa ñeñt ama aptsaño. Tarro'mar ñeñtey arromñañeypa' añ palltetsa o'ch yepnasa ñeñt ama arromñañeyaye.

⁵⁴ Ñerra'm esempo yechets ñeñt aptsañapa' ñerra'm o'ch puenasa ñeñt ama aptsaño, ñaña ñerra'm esempoch ñeñtey arromñañeypa' o'ch yepnasa ñeñt

ama arromñaŕeyayepa' e'ñe allempopa' o'ch e'ñe etsotua ñoñets ñeñŕ atet anaret ahuatoteñ, ñeñŕpa' atet oten: "Allempo o'ch huañerrña ñeñŕ atto o'patenya rromueñets.

⁵⁵ Ñeñŕo'marña allempopa' amach yerromuerre'te, tarro'mar amach eñalleterre'teña ñeñŕcha' alla ya'tserrperrayerr ama't yerromñoŕa."

⁵⁶ Tarro'mar te'pa' yo'chñarof o'patenyaña rromueñets, tarraña allempopa' amach eñalle yo'chñar. Ñaña yatpare'teñoŕ ñoñets ñeñŕ atet anaretpa' ñeñŕña yo'patataye'tña rromueñets allempo nanac yeyore't yo'chñar.

⁵⁷ Ñeñŕo'marña te'pa' yeparasyoso'chepa'ch Yompor tarro'mar atto apuey Puechemer ñeñŕara Yepartseshar Jesucristo ñeñŕcha' chocma ya'pocstatene' allohuen pa'namen ñeñŕ yocop.

⁵⁸ Ñeñŕo'mar e'ñe nemorrenteñoŕpa' o'ch masheñneshacha' ñaña nochaneshacha' noterrser: Te'pa' huomenquëpa'ch sepa' seyocher, amach sequechpatstere. Ñaña chocmupa'ch setorrena Yomporecop. Ñaña sapa' señoche'pa'ch ñeñŕ atto yetorrena Yomporecoppa' ama orrena yetorreno.

16

Añ quellepa' ñeñŕ apete't huocchañneshachno

¹ Te'pa' o'ch notas po'poñ. Añ allpon quelle ñeñŕ chocma senen huocchañneshachnocop ñeñŕ ame'ñetsa, ñeñŕpa' atecmach sepa. Tarro'mar ñeñŕ ame'ñetsa Galaciopa' o' neñotatuanet ñeñŕcha' atet pet, ñeñŕo'marña sapa'cho'ña atetcha' sepa samã.

² Ñeñŕpa' atetcha' sepa: Pate'tets temencpa' añ pocte' chocmach sena'yes ellopa'tets errponcha' semna'yes o'ch sena'yes Yomporecop. Ñaña errponte'ña sechyen ñeñŕcha' sena'yes Yomporecop, ñato' aton amapa' ñato' coñe't. Ñeñŕpa' o'ch sañño'tue e'ñe ellocma attotach o'ch satontatyes. Allochñapa' ñerra'm esempoch nechap seshopa' amach pallteno e'ñe allempopa' o'ch taya sena'yes.

³ Ñaña ñerra'm esempoch nechap seshopa' o'ch nequellca' carta ñeñŕcha' nemña Jerusaléño. Ñaña o'ch nemñe acheñ ñeñŕcha' anmue' quelle, ama't erra'tsena acheñ ñeñŕcha' pocte' senten sa.

⁴ Ñaña ñerra'm pocte' senteñ o'ch ahuen nañapa' e'ñe pocte' o'ch yahua' nena e'ñe parro.

Allempo sechena Pablo o'ch ahuo' po'poñ anetso'mar

⁵ Ñaña ñerra'm esempoch ahuen arroŕ attoch nechap seshopa' napa' noctape'cheñ arrcha' noñem Macedonio'mar.

⁶⁻⁷ Añ atarr nemnen ñerra'm Yompor muenatspa' allate' na'llponmat sesho, ñato' allate' nechara'pena. Tarro'mar napa' ama nemno o'ch atta nepomuetnom sesho, añña napa' nemneñ ñerra'm Yompor muenatspa' allate' natomat. Ñaña ñato' e'ñe alloŕpa' o'te' sanemyesen errachcho' neshecha allempo.

⁸⁻⁹ Tarraña te'pa' amach erra neto. Allanach arr Efeso tarro'mar te'pa' eñall attoch o'ch neserrpare'tatyes shonte' Yompor po'ñoñ. Ñaña te'pa' neñoteñ ñato' o'ch ame'ñenna shonte' acheñ, tarraña chocma eñall ñaña shonte' ñeñŕcha' nepatare'tene'. Tarraña o'ch chap Pentecostepopa' o'ch ahuerren arroŕ.

Atet otanet Timoteocop

¹⁰ Ñaña o'ch notas, ñerra'm esempoch chap masheñ Timoteopa' o'ch sagaŕ e'ñe cohuen, allochñapa' amach cha llecoso sesho. Tarro'mar ñapa'cho'ña nanac torrena Yomporecop atet ñerra'm na.

11 Ñaña ñerra'm esempoch chap seshopa' añ pocte' chocmach se'mñoch e'ñe cohuen. Ñaña e'ñech cohuen seyenpue' allochñapa' ñerra'm esempo puerrerra allotpa' e'ñech pocsheñsha' cherr nesho. Tarro'mar napa' chocma necueñ masheñ Timoteo epan po'poñechno masheñneshačno.

12 Ñaña masheñ Apolospa' nanac nemñare'teñ o'ch emo'tensa' epuet po'poñechno masheñnesha'pa' tarraña te'pa' ñapa' ama mueno. Tarraña esempopa' chomach chap sesho ñerra'm esempoch pocta'huoña.

Allempo so'terranet po'cartot

13 E'ñe allohuanenpa' o'ch noterserr: Te'pa' e'ñech señoa, tarro'mar chocma eñall ñeñtcha' ya'psaterre' Yompor. Ñaña e'ñe same'ñeño'tpa' huomenquëpa'ch seña' seyo'cher. Ñaña amach sem'cha'tatsto, chochña seu-mencta Yomporecop.

14 Ñaña ora allpon ñeñt seña'yenpa' e'ñepa'ch semorrentanna'teño't es seña'yen.

15 Te'pa' o'ch masheñneshacha' ñaña no'chaneshacha' notas po'poñ. Sapa' seño'teñ ñaña atto masheñ Estéfanaspá' ña ñanom ame'ñer'tsa ahua't all Acayo. Ñaña ahua't ame'ñerret epuet pamo'tsesha'. E'ñe allempoteñ ñetpa' ahua't torra'yenet añecop attoch yenpuet allohuen ñeñt pueyochresha' o' perr te' Parets.

16 Ñeño'tmar te'pa' o'ch notas: E'ñe pocte' o'ch se'mñoch Estéfanas, ñaña ama't allohuen po'poñechno acheñ ñeñt chocma torrapretetsa Yomporecop.

17 Napa' te'pa' atarr nocshena tarro'mar o' huapa arr nesho masheñ Estéfanas ñaña Fortunato ñaña Acaico. Tarro'mar sapa' ama't ama se-huapopa' ñetpa' o' huapuet.

18 Ñetpa' atarr coshatosnet neyo'chrocmañen. Ñato' sapa'cho'ña o'te' coshataset. Cohuenepa'ch señch acheñ ñeñt atet petsa.

19 Ñaña allohuen ñeñt ame'ña'yetsa arr Asio'marpa' mueneñet o'ch huom'cha'taset ñamet añ necarto't. Masheñ Aquilapa'cho'ña mueneñ o'ch huom'cha'tas epuet puetapor Priscila. Ñaña allohuen masheñnesha' ñaña no'chaneshachno ñeñt pame'ñeño'tet ap'chetset Aquilapahua mueneñet o'ch huom'cha'taset ñamet. Tarro'mar e'ñe yeparrocmateño't epay Yepartse-sharpa' o' huom'cha'taset añ necarto't.

20 Ñaña allohuen masheñnesha'čno ñaña no'chaneshachno ñeñt arro'tsa'yenpa' mueneñet o'ch huom'cha'taset ñamet. E'ñe semor-rentanna'teño'tpa' atet'cha' sehuom'cha'tanna'tena ñeñt atet poctetsa Partsocop.*

21 Añ coñe'tpa' o'ch nequellca' ñaña e'ñe na notot, attoch o'ch ne-huom'cha'tas ñaña.

22 Ñerra'm esesha' ama morrentenaye Yepartseshar Jesucristo ñeñtña atet petsa a'coñchatare'tepa'ch. Te'pa' ñeñt'ach notas, huerrnayepa'te' ñeñt Yepartseshar yepen.

23 Yepartsesharepa'chña Jesucristo sa'natenaya allohuenes.

24 E'ñe name'ñeño't Cristo Jesús atarr nemorrentensa. Te'pa' ñeñt'ach notas, ñeñt'pa' attetepa'chña Nompore. Allohua.

Pablo

* **16:20** Po'ño'ch otene'y, "E'ñe semorrentanna'teño't choc setso'ttsa'pa'tannena ñerra'm esempo sehuom'cha'tanna'tena ñeñt atet poctetsa Partsocop." Ñeñt'pa' atet yechete't ahua't.

AÑ PUEPAÑ SAN PABLO PO' CARTA ÑEÑT QUELLQUËRRANERR CORINTO'MARNESHA' 2 CORINTIOS

Atto Pablopa' alla quellquërranerr carta añecop ñeñt ame'ñetsa anetso Corinto

¹ Masheñeshacha' ñaña nochaneshacha' ñeñtes allohuenes ame'ñenaya Yompor ñaña e'ñe same'ñeñoñ chocma sapçhena Yomporecop all anetso Corinto. Ñaña añ cartapa' añecpa'ñaña nequellquëñ allohuenacop ñeñt o' pueyochresha' perranet Parets ñeñt apçha'yetsa allemeñ anetso Acayo'mar. Na Pablon o'ch alla nequellquërrnaserr po'poñ carta epan masheñ Timoteo. Napa' ñeñten Jesucristo puellsensaren tarro'mar atet muenen Yompor.

² Te'pa' e'ñe nehuomñcha'teñotes sa napa' o'ch notas: Yomporepa'chña sebensare'tam'pene' ñeñt nanac Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyochro allohuenes.

Yomporpa' ñachña chocma yocshatene' allempo es yehuenoya

³ Aye'chochtaterrapo'ch Yompor, ñeñtara ñeñt Pompor pen Yepartseshar Jesucristo. Ñeñtara Yompor ñeñt atarr amueraña, ñeñtcha' chocma yocshaterre' allempo es yelcatene' yeyochro.

⁴ Ñerra'm esempo huennaya pa'namen ñeñt amuerochtatañtetsa ñapa' ñachña chocma yocshaterre'. Tarro'mar o' coshaterrey Yompor, allochña yapa'cho'ña attoch yeñoteñ o'ch yocshater yaña masheñesha' ñerra'm esempo huapanet ñamet ñeñtcha' muerochtatahuet. Añ poctetsa o'ch yocshaterranet ñet atto Yomporpa' o' coshaterrey yaña.

⁵ Atto nanac yemuerochtapreteña Cristo tarraña ñachña ello atarr yocshaterre'.

⁶ Ñeñto'marña te'pa' o'ch notas, ñerra'm esempo nemuerochtena na, ñeñtpa' e'ñe po'ñoñ socop, tarro'mar ñerra'm esempo nemuerochtena napa' ñeñtpa' alloch socsherra samña attotcha'ña sequespperra. Ñaña ñerra'm esempo coshaterren Yompor ñeñtpa'cho'ña alloch nocshaterres samña. Allochñapa' e'ñe socsheñeshocmañen chocmach sa'huanten allohuen muerochteñets ñeñt atet nepena na.

⁷ Ñeñto'mar napa' neñotenes chocmach sa'huanta' ñeñt echarr senten. Tarro'mar napa' neñoteñ ñerra'm allpon semuerochtapretna, elloña allempopa' o'ch alla e'ñe socshapreterrna atto Yomporpa' ñachña chocma yocshaterre'.

⁸ Ñehua, te'pa' nemneñ o'ch masheñeshacha' señoten ñeñt atet nemuerochtosa ahuaña all anetso Asia. Allempopa' napa' atarr nanac nellquëna. Napa' notapañ çhach nerroma, amach erroñ nepe o'ch na'queshpata ñañeña.

⁹ Po'ñoñ napa' neñoteñ neyoçhro te'pa' o' çhapon ñeñt nocop allempoch nerroma. Tarraña añecpa huapona echarrteñets atet, allochñapa' attoch e'ñe neñoteñ Yomporcha'ña neyemtena. Amachña ñañeña yemetso. Tarro'mar Yompor po'huamencoñ ama't arromña'pa' chocmach tantater.

¹⁰ Tarraña ama't muene' nerromañ Yomporpa' allorocma tantaterren po'huamencoñ attoch ama nerromo. Ñeñto'marña napa' neñoteñ Yomporpa' chocmach a'queshpaterrey. Ñeñto'marña te'pa' ñachña chocma neyemtena. Neñoteñ allo'na sen na'queshp'atnene' ñerra'm esempo es nohuerroyerr ñeñt atarr echarr.

11 Ñaña añ poctetsa o'ch sema'yochañpenna attoch seyempa'n. Ñaña shonte' acheñenesha' ñerra'm esempo eñotennet atto Yomporpa' chocma a'natenna e'ñe puema'yocheñoñet ñet, allempopa' chocmach parasyoso'teñet Yompor atto a'natenna.

Atto Pablopa' ama eñotenano pueshquëñ

12 Ñehua, te'pa' o'ch notas po'poñ ñeñt atet noctape'chen. Napa' ñeñña atarr nocshatene' nanac. Napa' ñeñotena neyoçhro po'ñoçh arr patsropa' chocma noctape'chen ñeñt atet pocte' enten Parets. E'ñe name'ñeñot Yompor, napa' ama nemno o'ch esesha' neshca'yes ama't mamesha. Elloña sapa' ama nemno o'ch neshcas ama't e'ñe mamesha. Ama ñaña neyemteno ñeñt atet yoctape'chen ya acheñey arr patsro, añcha'ña neyemteñoñ Yompor attoch ñach neyenpuene'. E'ñe puemuereñoñ ñachña neñotatene' ñeñt cohuen enten ña.

13 Ñehua, sapa' çhate' sotapañ napa' attate' neshquënes ñeñt notenes necartoñ. Tarraña ñeñt allpon notenes necarto'pa', o'ch selleye' allochñapa' esheccha' señoçh ñeñtpa' e'ñe po'ñoçh atet, añ ñoñetspa' ama shequëñtsoyaye. Napa' necuenes esempohuañen o'ch e'ñe seyemtenna e'ñe poctacma, o'ch e'ñe señoçh ñeñt atet notenes necartoñ ñeñtpa' e'ñe po'ñoçh atet. Napa' ama çho'ye' neshquënso.

14 Ama't te'pa' ama e'ñe poctacmaye' seyemtenno, tarraña ñerra'm seyemtenna e'ñe poctacma, allempoñapa' ñerra'm esempoch huerra Yepartseshar Jesúsapa' atto socshenna na, napa'çho'ña allempopa' nocsherrsach saña.

Atto Pablopa' sechenañ o'ch emo'tenana' corinto'marnesha'

15-16 Napa' notenapañ chocmate' seyemtenna, tarro'mar napa' ama çho'ye' neshquënso. Ñeñto'mar napa' ahuaña nesechena o'ch ahuen Macedonio, napa' noctape'cheñ o'ch nemo'tnomues. Choncha'ña metats ñaña Macedonio, allempoña noctape'cheñ o'ch nerr Macedonio'pa' o'ch alla nemo'tnerrser. Attoch puepocheño o'ch nocshatterres, ñaña attoch seyempa'n saña o'ch alla ahuerren Judeo.

17 Tarraña ama't atet noctape'cheneñ o'ch nemo'terrsañpa' tarraña ama neseno o'ch nabçherrs'a'; ñeñto'marña sapa' çhate' sotenapañ napa' epuote' noctape'chen cohuen. Sapa' attate' sentenen atet ñerra'm acheñ ñeñt attach es pueçhena arr patsro. Ama'tcha' otenan acheñenesha' ñeñtcha' atet pa, tarraña pueyoçhroñapa' cotape'chenayach po'poñ.

18 Tarraña napa' ama atteye' noctape'cheno. Ñerra'm es notenes ñeñtcha' atet ne'papa' neyoçhroñapa' ama esoye' noctape'cheno po'poñ. Tarro'mar Yompor ñerra'm es oteney ñeñtcha' atet p'onaypa' atetcha'cho' pennay tarro'mar ñapa' ama puenesho po'ñoñ.

19 Ñaña Yompor Puechemer ñeñtara Cristo Jesús ñerra'm es oteney ñeñtcha' atet p'onaypa' atetcha'cho' pennay, chocmach orrtateñ e'ñe po'ñoçh, tarro'mar ñapa'çho'ña ama puenesho po'ñoñ. Ñeñtara Jesucristo ñeñt chocma yeserrpare'tatenes epan masheñ Silvano ñaña masheñ Timoteo.

20 Tarro'mar allohuen ñeñt allpon atet oteney Yompor ñeñtcha' atet perrnay, Puechemerña ñeñt Cristo Jesús ñaña e'ñe etsotatuene' po'ñoñ. Ñeñto'mar ñerra'm esempo yoten "attetepa'ch Yompore yocop" yeñoteñ Cristopa' ñaña e'ñe etsotatuene' Pompore po'ñoñ yocop. Allochñapa' attoch e'ñe cohuen ya'ye'choçhtateññañ Yompor.

21 Ñeñtara Yompor ñeñt ahuamencat pene' allohueney yeyocher e'ñe yame'ñeñoñ Puechemer Cristo. Ñeñtara Yompor ñeñt yellsensene' attoch yeforra'yesa ñocop.

22 Ñaña ñapa' ahuo't apuerrey attoch yeñoter o' puechemer perrey ña. Ñeñtpa' ñato' o'ch netma'ntacha atet ñerra'mrrate' aynatuaretey Yomporecop. Ñaña ahuo't apuerrey Puecamquëñ ñeñtcha' yecherrtsa yeyochro ñeñtpa' ñeñtcha'ña yeñotatene' orameñ shonte' ñeñt o'patatenya Yompor.

23 Te'pa' o'ch neñotaterrser ñeñt atet noctape'chen ñeñto'marña ama nemo'terrso ahuaña. Yomporpa' eñotenen ñeñtcha' atet notas ñeñtpa' e'ñe po'ñoçh atet. E'ñe nemorrenteñoñes sapa' ama neçherro allseyçhena Corinto. Tarro'mar ama neto, ñerra'm netañ o'ch neçhap seshopa' çhate' muene' neche'ptare'tyesoses e'ñe sa satpare'teñoñen. Ñerra'm atetpa' çhate' alla nellcaterres. Ñeñto'mar te'pa' o'ch notas e'ñe nemorrenteñoñes sapa' attoña ama neçherro sesho. Ñerra'm po'ñoçhte' ama atteye' notensopa' Yomporepa'chña na'chencaterre'.

24 Ama añecpaye' notenso attoch sapa' o'ch sa'mcha'tareter seperren na, ñeñtes ame'ñenaya Yompor. Añcha'ña netorrapretasa attoch neyenpas. Ama't atto o' huomenc same'ñeñañ Yompor, napa' çhocmach netorrena socop allochñapa' attoch señmañeshocmañen socter Yompor e'ñe poctacma.

2

1 Ñehua, ama'tcha' nemneñeñ o'ch alla neçherrerr sesho tarraña napa' ahuo't alla noctape'cherr ello neyoçhro, noten amach neto tarro'mar ama nemno o'ch neçhap nellquëñesha' sesho te't sapa' o'te' alla nellcaterrser samña.

2 Tarro'mar noten ñerra'm ne'ñotare'teñoñes na o'ch alla nellcaterrespa' attoch nellcaterres sa, sellquëñapa' amach nocshapretaso, tarro'mar sapa' sañeña e'ñe nocshatene'.

3 Ñeñto'marña ama neçherro sesho ahuaña, añ nequellconas carta ñeñtcha' soctape'chaterre' e'ñe cohuen. Allochñapa' ñerra'm machayota neçherr sesho ñerra'm o'ch alla soctape'cherr cohuen, ñeñtcha'ña atarr nocshapretuerra. Allochñapa' amach tama nellquënso tarro'mar añ poctetsa socop çhocmachña e'ñe socshaterren. Ñaña neñotenes ñerra'm esempo nocshena na sapa'cho'ña allohuenespa' o'ch e'ñe socsherra.

4 Ñaña allempo nequellconas añ carta ahuañapa' e'ñe nellquëñesha' nequellquënnas. Ama neñmateno neyoçhro ama't mamesha, e'ñe ñeñta nenen neyoçhro. Elloñapa' e'ñe neya'chpeñesha' nequellquënnas ñeñt carta. Napa' ama añecpaye' nequellquënnaso carta attoch nellcatas sa; añecpaña nequellquënnas attoch sapa' o'ch señoçh atarr nanac nemorrentensa.

Arrpa' all cotape'chatanet attoch peretnet atparñañ

5 Ñaña añ acheñer ñeñt atpare'tetsa seshopa' ama naptayaya llecatenno na, añña ama't sapa'cho'ña allohuenespa' çhocma llecatenes. Ñehua, tarraña ama't atteñpa' ñato' o'ch notas ama allohuenacmas atet petso, te't atta atarr natontaten ñoñets ñeñt ama atteyaye po'ñoçh.

6 Ñaña te'pa' o'ch notas, e'ñe pocte' atto o' secoñchatue ñeñt acheñer, te'pa' allohuach. Ama't shonteseñ ñeñtes pocte' entenayeñ o'ch secoñchatererr ñeñt atparñañ, tarraña te'pa' ñeñtach.

7 Te'pa' añña poctetsa o'ch alla sepretner, allochñapa' attoch socshater, te't atta nanac llequëna, puellquëñoñpa' o'te' alla queçhuerran Yompor.

⁸ Ñeñto'mar te'pa' notenes añ poctetsa o'ch sorrtratoñ cohuen ñocop attoch eñoter po'ño'chpa' atarr semorrenteña.

⁹ Ñeñtecpaña noctape'chatas ahuaña necartoñ ñeñtcha' atet sepe' ñeñt atpare'tetsa attoch netpatenes o'ch neñotas ñerra'm po'ño'chte' e'ñe same'ñena ñeñt poctetsa Yomporecop, ama't erroteno'tsensa.

¹⁰ Ñaña o'ch noterserr, ñerra'm esesha' sepretnerr sa, napa'cho'ña e'ñech pocte' nenteñ ñaña apretnare'tterrepa'ch. Ñeñt chocma natpare'tene' ahuaña te'ña ñapa' o' nepretnerr, ñeñt'pa' e'ñe socop. Ama't Cristopa' e'ñe entenen.

¹¹ Ñaña añ e'ñe poctetsa o'ch yepretnannena. Allochñapa' ama't oneñt'pa' amach alla a'psaterrye Yompore. Tarro'mar ñapa' yeñoteñ chocma e'nenan attoch shequëney.

Atto Pablopá' atarr llequënana corinto'marnesha' allempo ama huerra' Tito Corinto'

¹² Te'pa' o'ch neñotaterrerserr ñeñt atet ne'pa' ahuaña. Ahuaña allempo necherr Troaso, napa' o'ch neserrpare'tatanetañ Cristo po'ñoñ ñeñt alloch yequeshperrapa' shonte' acheñenesha' mueneñetañ o'ch e'mñotoñet Yepart-seshar po'ñoñ,

¹³ tarraña napa' ama't mamesha' ama neñmateno neyo'chro tarro'mar allpa' ama nentose masheñ Tito. Ñeñto'mar ama na'po all, at'a neso'tnerranet, o'ch necherr all anetso Macedonia.

Yomporpa' chocma moñenya allempo es yehuenoya

¹⁴ Yeparasyoso'chepa'ch Yompore tarro'mar ñapa' chocma moñenya allempo es yehuenoya. Ñaña e'ñe yeyemteño' Puechemer Cristo Jesús'pa' chapaterreycha' cosheñtso. Ama't yapa' o' muenaterrey attoch ya'poterrñañ po'ñoñ erraparen, allochñapa' attoch epa'huerra po'cohuenña erracmañen. Ñato' o'ch netma'ntacha atet ñerra'mrrate' ñeñt atarr es eñmosañtetsa, chach epa'hua e'ñe cohuen erracmañen pue'ñmosañteña.

¹⁵ Tarro'mar ñeñtey a'potene' Cristo, Pomporñapa' e'ñe atet enteney ñerra'mrrate' ñeñt eñmosañtetsa e'ñe cohuen ñocop, ñeñtcha' epa'huerrtsa erracmañen allo'tsa'yen acheñenesha' añ patsro. Patanta'tetspa' pame'ñeñotetpa' a'queshpatare'tterretcha', patanta'tetsña ñeñtcha' ama ame'ñerrtsopa' ñetpa' chenca'huerretcha'.

¹⁶ Acheñenesha' ñeñtcha' chenquërrtsapa' e'ñech atet enteññañet Yompore po'ñoñ ñeñt yeserrpare'ten ñerra'mrrate' ñeñt amtsañtetsa, añña ñeñteycha' queshperrtsapa' yañapa' o' yenterrñañ Yompore po'ñoñ atet ñerra'm es ñeñt ama ahuañaño alloña yapa' corretsayach. Ñato' o'ch netma'ntacha ñerra'mrrate' ñeñt atarr eñmosañ ñeñtcha'ña ya'crraterre' errponohuañen. Esesha'huachñaca' pocte' enterrña Yompore ñeñtcha' serrpare'terre' po'ñoñ.

¹⁷ Añ pocte' enten Yompore ñeñtcha' serrpare'tene' po'ñoñ ñeñt e'ñe pueñmañeshocmañen serrpare'tene'. Atet ñerra'm ya, tarro'mar yapa' ama choye' yetseteno Yompore po'ñoñ acheñ poctapño ñeñt atet pena shonte' po'potantañ acheñenesha'. Ñetpa' atet penet attoch pocshateño' acheñenesha'pa' o'ch es apa'yenanet. Añcha'ña e'ñe yeñmañeshocmañen yeserrpare'teññañ po'ñoñ atet llesenseny Yompore. Ñapa' enteney ñeñt atet ye'ñorena ñocop e'ñe yeyemteño' Puechemer Cristo.

3

Atto Pablopá' ama pallteno o'ch quellcoñet carta attoch cohuen enteñ acheñenesha'

¹ Sapa' chate' sotenapañ napa' o' alla neñerrerr e'ñe cohuen, ñato' nocpate', ñato' chate' nommo'chena. Tarraña ñeñt'pa' ama atteyaye. Amapa' ñato' sapa' chate' sotenapañ añte' nepalltena carta ñeñt'cha' señotate' atto po'poñ anetso'marnesha'pa' e'ñech cohuen entapretennet atto napa' cohuen netorrena Yomporecop. Tarraña napa' ama es nepallteno. Ñehua, ñaña chate' sotenapañ añte' nepalltena carta ñeñt'cha' sequellcon sa alloch señotach po'potantañ acheñ atto e'ñe cohuen sentenen na, atet pena po'psheñnechno ñeñt' serrpare'tets attoch cohuen enteñ acheñenesha' e'ñe ñañeña.

² Tarraña napa' ama nepallteno ñeñt' po'poñ carta ñeñt'cha' eñotate' po'potantañ acheñenesha' ñeñt' atto netorrena na Yomporecoppa' ñeñt'ña atarr sherbets. Tarro'mar sapa' saña e'ñe sherbets atet ñerra'mrrate' necarta nepenes. Tarro'mar allempo acheñenesha' eñotenset sa atto te'pa' o' soctape'cherr cohuen Yomporecop, ñeñt'cha'ña eñotatenahuet ñeñt' atto netorrena na, ñeñt'pa' ñeñt'ña e'ñe sherbets Yomporecop. Ñato' o'ch netma'ntacha atet: Na necarta ñeñt'ña eñotatenahuet ñeñt'pa' all aquellcaret e'ñe neyo'chro ñeñt'cha' lleyen allohuen acheñenesha' ñeñt'cha'ña eñotatenahuet.

³ Ñaña sa atto te'pa' sorrdaten ñeñt' e'ñe cohuentetsa, acheñenesha'ñapa' o'ch eñotapretaset ñeñt'pa' po'ño'ch Cristo po'taruas pene'. Ñato' o'ch netma'ntacha atet: Sapa' atet sesherven ñerra'mrrate' yecarta ñeñt'cha' eñotatenahuet, ñeñt' cartapa' o' quellca'huonay Cristo e'ñe ña. Añ cartapa' ahuo't aquellca'huare'tta ahuañmo'choteñ allempo yapa' ye'chapatonas Yompor po'ñoñ ñeñt' same'ñatate' Yompor. Tarraña añ cartapa' ama añaoye' aquellcaretto tinto, añaña Yompor Puecamquëñoñ anare'tta, ñeñt'ara Yompor ñeñt' ama arromña'feshayaye. Tarraña añ cartapa' ama arreye' aquellcarete mapyettallo. Aña'p' arrña aquellcaret e'ñe ya yeyo'chro ama't ñeñt'ey arromña'tey.

Atto Yomporpa' a'poc'aterrnay e'ñe etserra

⁴⁻⁵ Napa' neñoteñ ama nepallteno po'poñ carta ñeñt'cha' eñotatenahuet. Saña ñeñtes e'ñe necarta nepenes. Ama notenso e'ñe ñañeña nohuamenco'f es ne'pa'yen. Añaña e'ñe neyemteñoñ Cristo napa' netorrena Pomporcop. Ora allohuen es ne'pa'yen Yomporña ahua'menca't nepene'.

⁶ Ñeñt'ara Yompor ñeñt' ahua'menca't yepene' allochñapa' attoch yeserrpare'terrñañ poc'at'ña ñeñt' atet a'poc'aterrnay e'ñe etserra. Aña'p' ama atteyaye atet pa' ahua't Yompor allempo apan Moisés po'ñoñ ñeñt' anare'ttate't ñeñt'cha' e'ñe yetsotuañ eshec'cha' a'queshp'ateney Yompor. Ñeñt' ama etsotaye'te, ñoc'puetpa' o' anare'ttet rromuetcha', chenquë'rretcha'. Tarraña ñeñt' atto a'poc'atuerrnay Yompor etserra, ñeñt'pa' atto apuene'y Puecamquëñ alloch yoc'ra'huerra, tayoteñ errponohuañen.

⁷ Añ ñoñets ñeñt' aquellcare'ttatsa mapyettallo, ñeñt' ama etsotenaye, ñoc'puetpa' o' anare'ttet rromuetcha', chenquë'rretcha'. Ñaña ahua't allempo Yomporpa' apan Moisés po'ñoñ atet, e'ñe po'cohuentañoñ apan Moisés. Moisés'pa' atet orrta pa'clloyo't cha'poptena, atarr a'rrechatañ. Ama't israelnesha'pa' ama eshcaye' cohua'c'le'cheto. Tarraña ama't atet pa'ña'p' aco'poteñ maya'huanerr ñeñt' atto poptena.

⁸⁻⁹ Ama't añ cotapñatser ñeñt'cha' ya'chencaterrayeñpa' tarraña Yomporpa' atarr cohueno't orrtach allempo. Te'ña e'ñe ellonetpa' o' alla orrtaterrnayerr ña' poc'at'ña attoch e'ñe pocte' entuerrey. Ñeñt'pa' e'ñe Parets Puecamquëñoñ orrtatuerrnay ñeñto'marña ñapa' ello cohuentena nanac.

¹⁰ Ñeñt atet popta ahuat Moisés pa'clloyot allempo aḡ Yompor po'ñoñ, te'ña ñeñtpa' o'huañ e'ñeye' cohuenaye' yeñch tarro'mar te'pa' eñall Cristo po'ñoñ ñeñt atarr cohuen yenten, ello metanenan atto cohuentet Moisés po'ñoñ.

¹¹ Tarro'mar ñeñt atet cohuentet Moisés ñeñtpa' acoḡoteñ maya'huanerr atto cohuentena. Tarraña te'pa' atto cohuentena Cristo po'ñoñ ñeñtpa' amach ahuañañaatterro, ñeñto'marña ñeñtpa' ello metanenan Moisés po'cohuenña.

Atto Cristo po'cohuenña ñeñtpa' amach ahuañañaatterro

¹² Yapa' o' yeñoterrñañ Cristo po'cohuenña ñeñtpa' amach ahuañañaatterro. Ñeñto'marña yapa' ama yepenquēñoḡeye' yeserrpare'teññañe po'ñoñ.

¹³ Yapa' ama atteye' yepeno atet ḡa ahuat Moisés. Ñapa' cha huañerr atto popta pa'clloyotpa' ahuo't ca'macлле'cha allochña israelnesha'pa' amach eñcheto pa'clloyot o' huañerr atto poptena.

¹⁴ Israelnesha'pa' ama chapaneto pueyoḡhreto attoch cotape'cherret cohuen Yomporecop. Ama't teme'ttsen ñerra'm esempo lleyeññañet ñeñt a'pocḡtat Yompor ahuat attaretach amach chapaneto pueyoḡhro ñeñt atet muenen Yompor. Po'ñoḡhpa' aḡoḡcha'ña chaponaya yeyoḡhro ñeñt atet muenen Yompor e'ñe yeyemteñoḡ Puechemer ñeñt Cristo. Israelnesha' ama cohuenaye' enteñeto Cristo ñeñto'mar noten ñetpa' teme'ttsen atet penet ñerra'mrrate' cho ca'macлле'chenet.

¹⁵ Po'ñoḡh ama't teme'ttsen ñerra'm esempo e'mñnotenet all lleyeññañet Moisés po'ñoñ amach es eñnoteneto. Chach ottenet ñerra'mrrate' cha es a'npuenahuet attoch amach eñotoñeto Yompor pocḡtaḡña.

¹⁶ Tarraña ama't puesheñarroḡeya ñeñḡey erra'tseney acheñrey, allempoteñ yaguēr Yepartseshar Cristo, allempoteñcha'ña chaponaya yeyoḡhro ñeñt atet muenen Yompor; Cristopa' ñachña yehuapore'tamḡse'ña ñeñt ya'npuenayeñ.

¹⁷ Ñeñt yoten Parets Puecamquēñ, ñeñtara Yepartseshar Cristo Puecamquēñ. Ñaña atarr cosheñtso'tseney ñerra'm esempoch chaponaya Cristo Puecamquēñ yeyoḡhro. O'huañcha' yemueroḡhtame'ta attoch puechemer perrey Yompor, e'ñech yocsheñesha' yocter Yompor.

¹⁸ Allohueney ñeñḡey ame'ñenaya Yepartseshar Cristo, ña Puecamquēñpa' ñachña ya'po'poñeterre', allochñapa' allo'nach yesen cohuentapretaya Cristo. Yapa' ama atteyayye ñerra'mrrate' ñeñt a'natacлле'charet attoch amach enteññañeto Cristo po'cohuenña. Yapa' e'ñe yecueñoḡ Cristo po'cohuenña, yapa'cho'ña o'ch yecohuentapreteña yamña, atet ñerra'mrrate' rerep poptetsa ñerra'm cho yecuach atsrretonet.

4

Atto Pablopa' atarr cohuen yeḡchatenanet Yompor po'ñoñ

¹ Yomporpa' e'ñe puemuereñoḡ muenatenen o'ch netorreññaña ñeñt nanac sherbets ñocop. Ñeñto'marña napa' ama nellquēñoḡeye' neserrpare'teññañe po'ñoñ.

² Ñeñt a'nahua es ḡa'yenet ñeñt apencoḡhen yenten yocop ya ñeñḡey torretsa Yomporecoppa' ñeñtña napa' o' na'ypo'ñaḡper. Ñaña napa' ama es neshquēñoḡ neḡa'yeno masheñeshacop. Ñaña napa' allempo neserrpare'tateñ acheñenesha' ama ḡoye' na'po'poñeteññañe Yompor po'ñoñ. Añcha'ña e'ñe na'poteññañ Yompor po'ñoñ e'ñe po'ñoḡh ñeñt atet oten po'ñoñ. Yomporpa' entenen ñeñt atet notenes ñeñtpa' e'ñe po'ñoḡh atet. Ñaña ama't

erra'tsena acheñer ñeñt eñotene' ñeñt e'ñe pocte' entenet ñet pueyočhretopa' ñetpa'cho'ña e'ñech cohuen entapretennet.

³ Atto yeserrpare'teññañ Yompor po'ñoñ ñeñt po'ñočh alloch yequeshperra tarraña patantarr acheñenesha'pa' amach čhapaneto pueyočhreto ñeñt alloch yequeshperra. Ñeñt atet petsapa' allo'na senet allcha' chenca'huerret.

⁴ Ñeñtara acheñenesha' ñeñt ama ame'ñetso, ñetpa' añña po'yomporer penet arr patsro ñeñt oneñet, ñeñtña ama muenatenaneto o'ch čhapanet pueyočhreto Yompor po'ñoñ; allochñapa' attotcha' amach eshcaye' cohuen enteññañeto Cristo po'cohuenña. Ñapa' attecma cohuentena ñerra'mrrate' Pompor Parets ñeñt ama entpahuoyaye. Ñeñt po'cohuenñapa' ñeñtara yoten cohuen ñoñets alloch yequeshperra. Ñato' o'ch netma'ntacha atto oneñetpa' a'natacle'chenanet attochña amach eshcaye' cohuen enteññañeto Cristo po'puetarenña.

⁵ Tarro'mar ñeñtey e'ñe yeñmañeshocmañen seserrpare'tatene'pa' ñeñtapa' ama añecpaye' atet yepeno attoch senteney ya ñerra'mrrate' samo'mte' sepeneý. Añcha'ña yeserrpare'tatenes Jesucristo, ñachña Separtseshar sepen. Yapa' añña atarr ye'torrena socop e'ñe yemorreneteñoť Jesús.

⁶ Ñehua, yapa' yeñoteñ atet ot ahuať Yompor, ñeñtapa' atet ot: "Eñalletepa'ch pueta're' allochñapa' o'huañcha' checmet." Ñeñtara Yompor te'ñapa' o' a'puetarsañperrnay yaña yeyočher allochñapa' attoch yeñotater po'potantañ acheñenesha' atto Cristopa' ña orrtatene' Pompor po'cohuenña.

Ama't ama esoshe'mayayye e'ñe yeyemteñoť Yomporpa' ñapa' čhocmach ahuañmencat peney

⁷ Ñeñtapa' atto Yomporpa' ahuať chorrerrya yeyočhro po'cohuenña, ama't yapa' arromñaťaya, ama esoshe'mayayye. Añecopña o' chorrerrya ya ama't ñeñtey ama esoshe'mayayye, allochñapa' attoch eñochet ñeñt atto atarr ahuañmencat yentenapa' ñeñtapa' ama yoyaye yehuomenc, ñeñtapa' Yomporeshot huena. Ñato' o'ch netma'ntacha atet ñerra'm ahuať po'poñ acheñ ñerra'm esempo atarr es morrentenetpa' o'ch esha'teñet patsrrogo ama't ñeñt coyempa' ama e'ñe cohuenayaye.

⁸ Ñehua, ama't allemateñcha' huaponaya ñeñtcha' atarr ya'llpatate', tarraña čhocmach eñall attoch yesuanem. Ñaña ama'tcha' atarr yellquëñañ nanacpa' tarraña čhocmach eñall attoch yesuanem allohuen ñeñt allcatañtetsa.

⁹ Ñehua, ama'tcha' cotare'teney ñeñt ye'moñe'tene' tarraña Yomporpa' amach a'ypo'ñenye ama't mamesha. Ama'tcha' o'shshe'mayet patsopa' čhocmach alla yetanterra.

¹⁰ Chocmach muene' yerromañ atet pete't Jesús. Tarraña atto Jesúsapa' o' alla tanterra yapa'cho'ña attoña o' a'queshpaterrey allempo es yehuenoya. Attochña yeñotach acheñenesha' atto Jesús te'pa' o' betterra.

¹¹ Atto allponmat yocrrena añe patsro yapa' čhocmach pomatatenyet yerromuepa'to'. E'ñe yemorreneteñoť Jesús atet penyet. Tarraña atto Jesúsapa' o' alla tanterra, yapa'cho'ña attoña a'queshpaterrey allempo es yehuenoya ama't yapa' arromñaťeneshaya. Attochña yeñotach acheñenesha' atto Jesús te'pa' o' betterra.

¹² E'ñe netorreñoť Cristocop čhocmach nanac nemueročhetuanena autsanča' rromuets. Tarraña ñeñtapa' atarr cohuen socop tarro'mar ñeñtapa' alloch e'ñe sequeshpa'huerra saña.

¹³ Añmapa' ñeñt atet oten Yompor po'ñoñ ñeñt atet anuaret ahuaťoteñ ñeñtapa' atet oten ñeñt quellquë' libro Salmos, "Napa' atarr neyemteña

Yompor ñeñto'mar atet ne'ñorena ñocop." Yapa'cho'ña e'ñe attecma yoc'tape'chen yaña. E'ñe attecma yeyemteña Yompor, ñeñto'mar yapa'cho'ña attecma ye'ñorena yaña.

¹⁴ Yapa' yeñoteñ Yomporpa' ahuo't tantaterran Puechemer ñeñtara Yepart-seshar Jesús. Ñeñto'mar yeñoteñ yapa'cho'ña tantatuerreycha' Yompor e'ñe atet ñan Puechemer Jesús, allochñapa' ama't sapa' o'ch chapatuerres allo-huenes e'ñe parro ñesho.

¹⁵ Ñeñto'marña napa' Yomporña nemnate' o'ch nemuerochtame'ta; ñeñtpa' e'ñe socop, allochñapa' attotcha' Yompor puemuerena chapcha' shonte' acheñenesesho, allochñapa' shonte'ch acheñenesha' allo'nach senet parasyoso'tnomuet Yompor, attochña e'ñe cohuen ya'ye'chochtateññañ Yompor.

¹⁶ Ñeñto'marña napa' ama nellquëñofoye' netorreññañoña Yompor po'taruas. Ama't nechetspa' allo'na sen huañuanmats atto noumencna'ntena, tarraña necamquëñña' allo'na sen huomencatnomuets e'ñe pate'tets ye't.

¹⁷ Tarro'mar ñeñt' atto allpon yemuerochtame'tyena aña patsro, ñeñtpa' ama esoyaye, e'ñe mamecpa. Ñeñtpa' añecpaña huennaya allochñapa' attoch huapatuerrnay ñeñt' atarr nanac cosheñets ñeñt' ama ahuañaño ama't er-rponaña, ñeñt' ello nanac atarr coçhnesha'tetsa, ñeñt' atarr nanac cohuen.

¹⁸ Tarro'mar yapa' ama añeye' yeyemteno ñeñt' allpon coçhnesha' yentyen arr patsro, tarro'mar añechno ñeñt' allpon yentyenpa' huañerrcha'. Yapa' añña yeyemtena añechno ñeñt' cohuentetsa Yomporecop ñeñtpa' ama ent-pahuoyaye ñaña ñeñtpa' amach huañerro ama't errponaña.

5

Atto Yomporpa' o' añño'terrnay ñeñtcha' yepaquëll yeperr all pue'ntaño

¹ Yapa' yeñoteñ ñeñtey arromñañey, yechetspa' chocmach huañerr. E'ñe mamecpa sherbeney aña patsro, atet ñerra'mrrate' yequërpachet ñeñt' pocollashe'm all yemanatena. Ñeñt' pocollashe'mpa' mamecpach sherba'y. Yechetspa'cho'ña mamecpa sherbeney atto yocrrena aña patsro ñeñt' yepaccllashe'm yepen. Tarraña yapa' o' yeñoter ñerra'm esempoçh yerrroma, Yomporpa' o' añño'terrnay ñeñtcha' yepaquëll yeperr all pue'ntaño allcha' yeycha'huerra, ñeñtpa' amach ahuañañaatterro. Ñeñtcha' yepaquëll yeperr allpa' ama arromñañeshaye' yeçcatenaye, Yomporña yeçcatene'.

² Po'ñoçh arr patsro yechets ñeñt' yepaquëll yepenpa' chocmach es e'mnatatuene'. Ñeñto'marña yapa' atarr yemneñ o'ch yechorrerra ñeñtcha' yepaquëll yeperr Yompor pue'ntaño.

³ Tarro'mar yemneñ yecamquëñpa' o'ch chorrerrana ñeñtcha' pa'shtam perr Yompor pue'ntaño, allochñapa' yecamquëñpa' amach atta huocchapoterro chocmach eñall ñeñtcha' chorrena.

⁴ Tarraña atet ñerra'm te' orameñ yechets ñeñt' yepaquëll yepen atto yocrrena arr patsro, chocmach eñall ñeñtcha' e'mnatatuene'. Ñeñto'marña yapa' atarr yemneñ ama't ama yerromuena', yechetspa' o'ch a'po'poñetermay Yompor tayoteñ ama't esempo huerra, ñeñtcha'ña pa'shtam perr yecamquëñ. Allochñapa' attoch yocrerra etserra correñets ñeñt' amach ahuañañaatterro, ñeñtcha'ña a'huañaterre'ña ñeñt' atto ya'rromñañete't. Ñato' o'ch netma'ntacha atet ñerra'mrrate' o'ch yechorra shetamuets ñeñt' e'ñe etserra emarr ñeñtcha' yena' enot' o'ch yepmata. Allochñapa' ñeñtcha'

yena' enot, ñeñtcha'ña a'natue'ña mellashañ ñeñt yechorre't ahuañoñ. Allochñapa' attoch eñall ñeñtcha' yechorratenaya.

⁵ Ñeñt yemnatene' e'ñe atet ñeñtpa' Yompor ña atet ye'patene', tarro'mar ñapa' chorrenya Puecamquëñ ñeñtña yeñotatene' orameñ eñall cohuenñats ñeñt o'patatenya ñeñtcha' aphuerrey Yompor.

⁶ Ñeñto'marña e'ñe yeyemteño't Yompor chocmach yecueñ ñeñtcha' atet perrnay esempo. Yeñoteñ yechets yepaquëll yepenmeñ arr patsro al-laparo'tsenmeñey attoch yeycha'huerra Yepartsesharesho.

⁷ E'ñe yeyemteño't Yomporpa' allo'nach yesen eñotnomue' ñeñtcha' atet perrnay ña, ama añeye' es yeñotatenaye ñeñt yentyen arr patsro.

⁸ E'ñe yeyemteño't Yompor chocmach yecuen ñeñtcha' atet perrnay ña. Ñaña yapa' añ atarr cohuen yenten o'ch huañ atto yocrrena arr patsro, o'ch yesa'nom yechets ñeñt yepaquëll yepen arr attoch ye'chap allcha' yocrra'huerra Yepartsesharesho.

⁹ Yapa' ñeñtach paterr yema'yo'chrena chocmuepa'chña yocshateñ Yepartseshar, ama't allempo orameñ yocrrena e'ñe yechtso arr patsro, ñaña ama't allempoch yerroma o'ch yesa'nom yechets e'ñepa'ch Yepartsesharesho'tseney attoch yocshateñ e'ñe all pue'ntaño.

¹⁰ Tarro'mar o' anare'tta allohuenacpay yehuapuepa'to' Cristesho allcha' eñotatare'fey e'ñe puesheña'ttsoy. Allochñapa' allcha'ña atet pa'yese'y erro'tencha' entapretuerrey, ñato' e'ñech cohuen entapretuerrey atto e'ñe cohuen es ye'pa'yen e'ñe yechtso't allempo yocrrena arr patsro, ñato' amach cohuenaye' entapretuerrye.

Atto Pablopa' e'ñe pueñmañesha' e'ñe cohuen es orrtatyen

¹¹ Ñeñtpa' ama't atarr yoro'chen yenteñeñña Yompor, tarraña nocoppa' ama yoro'chenayaye tarro'mar Yomporpa' entenen e'ñe cohuen ñeñt atet nepena. Te'pa' aña palltetsa o'ch noctape'chater allohuen acheñenesha' attoch ñetpa'cho'ña e'ñech cohuen entapretennet. Ama't sapa'cho'ña te'pa' necuenes, nemneñ o'ch seño'ter samña e'ñe seyo'chro atto e'ñe neñmañesha' cohuen es ne'pa'yen.

¹² Ñeñt atet notenes te'pa' ñeñtpa' ama añecpayaye o'ch alla neñerrerr cohuen ñeñt e'ñe nocpa. Añecopña o' alla neñerrerr atet allochñapa' o'ch alla socshapreterrna, allochñapa' attoch seño'ch ote' ñeñt e'ñe ñañeña cohuen entetsa e'ñe po'cta'pño'mara. Ama añeye' eñoteno pueyo'chro ñeñt cohuentetsa Yomporecop.

¹³ Ñehua, sapa' chate' sotenen napa' cho' muene' nemospuena. Ñerra'm po'ño'ch cha nemospuenapa' ñeñtpa' e'ñe pocte' Yomporecop. Ñaña ñerra'm ama cho'ye' nemospueno atto e'ñe cohuenare' es noctape'chen ñeñtpa'cho'ña e'ñe pocte' allo nesherbene'sa.

¹⁴⁻¹⁵ Ñaña atto Cristopa' atarr morrentenya ñeñtña ama yemnatenyaye o'ch allo'na yesen corratsa e'ñe yocpa. Ñaña atto te'pa' yeñoteñ Cristo ahuo't rroma allohuenacpay, allochñapa' atto yocrrena yapa' o'huañcha' yocrra e'ñe yocpa. Ñeñtpa' ñeñtara yoten o' yerromaprecha Cristo, allohueney ñeñtey ame'ñenaya. Añcha'ña atet yocrrena e'ñe ñocop, ñeñt rromats yocop, elloñapa' alla tanterra yocop.

¹⁶ Ñeñto'marña napa' ama't puesheñarrapa' o'huañcha' cohuen nenteñ ñeñt e'ñe cohuen enten po'potantañ acheñenesha' arr patsro e'ñe ñet po'cta'pño'maret, ñeñtpa' arromñaña po'cta'pña. Tarraña ama't na ahua'tpa'

cohuen nentapretanete't pocta'ña. Ñeñto'marña napa'cho'ña tsena'tatnete't Cristo allempo, tarraña te'pa' o' huañ atet neñch Cristo.

¹⁷ Ñeñto'marña ñeñtey o' yeyemtera Cristo, Yomporpa' o' etserrataterrnay yocta'ña e'ñe poctacma. Ñeñt atet yoctape'che't ahuat, ñeñtpa' o' huañerr, te'ñapa' o' e'ñe yoctape'cherr ñeñt e'ñe cohuenare' etserra.

¹⁸ Ñeñña o' atet perrnay Yompor ñeñt muenatan Puechemer Cristo, ñachña yamo'tstatterre' Pomporesho. Ñeñtara Yompor ama't napa' ahuo't llesensa'n attoch neñotach acheñenesha' allochñapa' ñetpa'cho'ña o'ch amo'tsterranet ñamet Yompor.

¹⁹ Ñaña atto Yomporpa' muenatan Puechemer Cristo allempopa' ñachña allo'na sets yamo'tstataya allohueney acheñeneshay Pomporesho. Allochñapa' o'huañcha' allo'na ochñañenesha' enteney Yompor. Attoña yapa' apuerrey llesens ellonet attoch yach eñotatyese' pa'namen acheñenesha' allochñapa' ñetpa'cho'ña attoch e'ñe amo'tsterranet Yompor.

²⁰ Ñeñto'marña yapa' allsensaretey ñeñtcha' yetaruas yeperr ñeñteycha' eñosets cohuen Cristocop attoch yame'ñacha allohuen acheñenesha'. Ñeñtpa' atto Yomporpa' o' hua'ñerres o'ch same'ñera, tarraña ñeñtpa' e'ñe ya yeser- rpare'tateñotes o' hua'ñerres Yompor. Ñeñto'mar te'pa' o'ch notas Cristocop, ñach same'ñerra allochñapa' attoch e'ñe amo'tsterrsa Yompor e'ñe poctacma.

²¹ Añ ñeñtara Cristo ñapa' ama't parrochapa' ama ñano ñeñt ama pocteye' enteno Pompor Parets, tarraña Pomporñapa' ahuo't muenateñ o'ch atet a'paretta ñerra'mrrate' acheñ ñeñt atarr ochñañ. Tarraña ñeñt atto a'parettapa' ñeñtpa' e'ñe yocop. Allochñapa' e'ñe yeyemteñot Puechemer Cristo, Pomporña yapuerre' alloch e'ñe pocte' enterrey.

6

Ñeñt torretsa Yomporecoppa' añ poctetsa ñocop chocmach orrtatenan ñeñt e'ñe pocte' enten Yompor

¹ Te'pa' atto yetorraprecha Yompor, napa' o'ch notas, amach e'ñe orrena sagapatstoñe Yompor puenueña.

² Ñehua, ñeñtpa' atet oteney Yompor po'ñon ñeñt anuaret ahuatoteñ, ñeñtpa' Yompor atet otets:

Allempo sechore'tenen napa' e'ñe ne'mñotenes ñeñt atet soteney, tarro'mar allempopa' o' chap ñeñt poctetsa o'ch saguërren. Nañapa' o'ch naguërres saña. Attoña napa' ahuo't neyenpas tarro'mar allempopa' o' chap ñeñt poctetsa attoch na'queshpaterres.

Ñeñto'marña na te'pa' o'ch notas, o' e'ñe chap allempo ñeñt poctetsa o'ch saguër Yompor, tarro'mar te'pa' o' chap allempoch a'queshpaterrey.

³ Ñehua, yapa' yeñoteñ ñeñtey ame'ñetsa ñerra'm o'ch ye'pa'yen ñeñt ama pocteyaye Yomporecop ñeñña ama ame'ñetsopa' chach ya'npare'teñ attoch ame'ñerret ñamet. Ñeñto'marña yapa' ama yemno ama't mamesha o'ch ya'npare'ch ama't puesheñarra allochñapa' attoch ame'ñeret ñamet Yompor. Ñaña ya atto yetorrena Yomporecoppa' ama yemno o'ch atet entapreyet ñeñt ama cohuenayaye. Allochñapa' amach achmāre'teññañeto Yompor po'taruas e'ñe ya atet ye'patse'tyeñot.

⁴ Yapa' añña yemnen ama't erroteno'tsenya chocmach yemneñ o'ch yeñotach acheñenesha' po'ño'ch e'ñe cohuen yetorrena Yomporecop ñeñt atet poctetsa yocop ñeñtey torretsa Yomporecop. Ñeñtpa' añechno ñeñtcha'ña eñotaterrahuet: allpon es yehuapoyapa' chocmach ya'huanteñ e'ñe cohuen,

ama't allpon atto yemuerochtame'tyena, ama't allpon ñeñt' yepallta'yena, chocmach ya'huanteñ allohuen. Ama't ora allohuen ñeñt' allpon ñeñt' allcatañtetsa, tarraña ñeñt'pa' chocmach ya'huanteñ.

⁵ Ñaña atto ashta'yenyet, atto yottañpenyet, atto ama'tochtana'tenyet pa'tsrre'mueño'tet, atto atarr nanac yetaruasen, atto yarepen torrata Yomporecop, atto yemuerochtana yachporrño't, ñeñt'ña eñotatene'ña allohuen acheñenesha' atto yapa' e'ñe cohuen yetorrena Yomporecop.

⁶ Ñaña atto yeñmañesha' yocrrena, ama sosya'tsañeye' yoctape'chyeno, ñaña atto yeñoten ñeñt' e'ñe po'ño'ch Yompor po'ñoñ ñeñt' ama shequëntsoyaye, ñaña atto es ya'huanta'yen, amachña cha atsrre'matenye, ñaña attochña e'ñe ya'muerañt'ena, ñaña atto chorrenya Parets Puecamquëñ, ñaña atto e'ñe cohuen yemorrenteña allohuen masheñeshachno, ñeñt'pa'cho'ña ñeñt'ña eñotatene'ña acheñenesha' atto yapa' e'ñe cohuen yetorrena Yomporecop.

⁷ Ñaña atto ye'ñorena ñeñt'pa' e'ñe po'ño'ch atet. Yomporña po'huamenc ñeñt' ahuamencat yepene'. Ñaña ñeñt' e'ñe pocte' enten Yompor, ñeñt'pa' ñeñt'ña allo chocma es yepa'yen, alloña yeçllarena Yomporecop, ñeñt'pa' alloña yemoñeññaña Yompor pocta'ña.

⁸ Erroteno e'ñech cohuen entapretenyet, tarraña errotenoñapa' amach cohuenaye' entapretenyeto; erroteno e'ñech cohuen eñosyenet yocop, errotenoñapa' chach sasare'tenyet. Errotenopa' attach entenyet ñerra'mrrate' atta yeshquën, ama't amach choye' yeshquëno.

⁹ Errotenopa' e'ñech cohuen emchorrenyet, errotenoñapa' amach acua'psenaye' entenyeto. Errotenopa' autsaycha' rromuets, tarraña chocmach allo'na yesen huonichetsa. Erroteno ama'tcha' a'coñchatare'ey, yañapa' corretsayach.

¹⁰ Ñaña erroteno ama'tcha' yellquënañpa' tarraña chocmach alla yocsherra. Ñaña ama't e'ñe huocchañeypa' shonte'ch coçhnesha' cotapñats yapa'yes po'potantañ. Ama't ama es yechenñe arr patsro, tarraña shonte' esocmañen es yechen Yomporeshot.

Atto Pablopa' e'ñe pueyoçhrocmañen morrentenana allohuen ñeñt' ame'ñenaya Yompor

¹¹ Te'pa' masheñeshacha' corinto'marnesha o' neñotatuas ora allpon ñeñt' atet noctape'chen neyoçhro. E'ñe neyoçhrocmañen nemorrentensa.

¹² Nocoppa' ama palltenmeñe ama't mamesha attoch nemorrenterrsa e'ñe poctacma. Añña sapa' chocmate' sepalltena attoch semorrenterrna ñaña.

¹³ Napa' e'ñe nechemeresha' nepenes. Ñeñto'marña o'ch nenamas, o'ch notas, atto napa' e'ñe neyoçhrocmañen nemorrentensa sa, sapa'cho'ña añ poctetsa e'ñe seyoçhrocmañenpa' o'ch semorrenterrna ñaña.

Atto ama ayemuetpahuo ñeñt' ama ame'ñetso

¹⁴ Te'pa' o'ch noterrser po'poñ, amach e'ñe seyemtatsche ñeñt' ama ame'ñetso, tarro'mar amach patrraye' soctape'chueno. Acheñ ñeñt' e'ñe pocte' es pa'yetspa' amate' errotenot yemtanoña acheñ ñeñt' ama cohuenaye' es pa'yetso, tarro'mar ama attecmaye' es pa'yeneto. Ñato' o'ch netma'ntacha atet ñerra'mrrate' checmete'pa' amate' errotenot alla epteto parro epuet puetare'.

¹⁵ Ñeñt' atet pena Cristo ñaña oneñeñ amate' errotenot cohuen amo'tstanna'teto. Attecma ñaña ñeñt' ame'ñetsapa' amach patrraye' cotape'chueneto epuet ñeñt' ama ame'ñetso.

Atto yapa' pa'paquëll peney Yompor

16 Ñaña ñeñt pa'paquëll pen Yomporpa' ama atteyaye ñerra'mrrate' ñeñt ayeçhcataret ñeñt po'yomporer pa'yen po'potantañ acheñenesha' arr patsro. Tarro'mar ama't yapa' allohueney ñeñtey ame'ñenaya, yañapa' pa'paquëll peney Yompor ñeñt ama arromñateshayaye. Añpa' ñeñt atet oten Yompor: Napa' çhocmach neyçhena e'ñe ñesheto parro allcha' nechopeñe'chen. Napa' Po'yomporer pennet, ñetpa'çho'ña e'ñe neyochrenesha' nepenanet.

17 Ñeñto'marña Yomporpa' oteney:

Añ poctetsa o'ch sesuanemñ ñeñt ama ame'ñetso, allochñapa' o'ch sell-opa'tetstatua soctapña. Amach seyçhapretatsto sosya'tsañ ñeñt ortatyenet. Allochñapa' attochña napa' o'ch naguërres e'ñe nocsheñesha'.

18 Allochña sapa' attochña e'ñe Sompör seperren na, napa'çho'ña o'ch nechemeresha' neçohuerres ama't ñaña allohuen nesñenesohuen. Ñeñtpa' atet ot Yompor ñeñt nanac partsotets.

7

1 Ñehua, e'ñe nemorrenteñoñes, masheñeshacha' ñaña noçhaneshacha' o' notuas atet oteney Yompor ñeñtcha' atet perrnay. Ñeñto'marña te'pa' añ poctetsa yocop yapa' o'ch yesuanem ora allohuen ñeñt çhocma a'sosyatene' yechets ñaña ñeñt çhocma a'sosyatene' ama't yecamquëñ. Añña e'ñe yem'cha'na'teñoñ Yomporpa' añcha'ña yema'yoçhrena ñeñt pocte' enten ña.

Atto Pablopa' o' alla atarr coshater corinto'marnesha' tarro'mar o' cotape'cherret cohuen e'ñe etserra

2 Napa' atarr nemneñ, masheñeshacha' o'ch alla semorrenterrna e'ñe seyoçhrocmañen. Napa' ama't puesheñarroñesapa' ama çho erroñ neçaso, ñaña ama't puesheñarroñesa ama añeye' neyçhataso ñeñt ama cohuenayaye, ñaña ama't puesheñarroñesapa' ama çhoye' neshcare'taso ama't e'ñe mamesha.

3 Ñeñtpa' ama añecpaye' notenso o'ch neyohuare'tasa. Añecopña o' alla noterrser e'ñe nemorrenteñoñes ñeñt atet o' notuanmas. Po'ñoçhpa' atarr nemorrentensa e'ñe neyoçhrocmañen. Ñeñto'marña napa' e'ñe pocte' nenteñ e'ñech parrocmayocrena ama't ñaña e'ñech parrocmayerrma.

4 Napa' neñotenes sapa' çhocmach sepa'yen ñeñt cohuentetsa Yomporecop. Ñeñto'marña napa' atarr nocshapretensa. Ama't nellquëñañ nemue-roçhteñoñpa' elloña o' alla nanac socshatterren.

5 Ama't allempo neçherr Macedoniopa' çhocma atarr nellca'huerrerr alla. Allpa'çho'ña çhocma es nehuapoya pa'namen ñeñtña ama't mameshapa' ama eshcaye' neñmatataye neyoçhro attoch e'ñe cohuen nellaçsos mueçet.

6 Atteñapa' o' çherr masheñ Tito. Atto çherr masheñ Titopa' allempoña Yomporpa' alla coshatterren neyoçhro, ñeñtara Yompor ñeñt çhocma yocshatene' allempo es yelcatene'.

7 Ama e'ñe aña nocshataye atto çherr Tito, añña atarr nocshatene' ñeñt atto e'ñe cohuen entapretensa', ñapa'çho'ña atarr socshater. Ñehua, ñapa' eñotatuerrren atto sapa' atarr o' seyerpuenna, ñaña o' eñotatuerrren atto sellquëñoñ sapa' o' alla same'ñerra e'ñe cohuen, ñaña o' eñotatuerrren atto o' alla sellcapreterrna ñeñt atto sellcatenen na. Ñeñt allpon serrpare'tatuerrren, napa' ñeñtña ello atarr nanac nocshatterre'.

8 Carta ñeñt nequellconas ahuaña, ñeñtpa' çha llecatas. Ñeñto'marña allempo napa'çho'ña çha muene' llecatna namña tarro'mar o' nemñonas atet carta. Ama't te'pa' neñoteñ añ necarta çha llecatenes tarraña ñeñtpa' e'ñe mamecpa, ñeñt e'ñe pocte' nenteñ.

⁹ Attoña te' napa' e'ñe cohuen nocshena. Ñeñtpa' ama añecpaye' nocsheno atto sapa' nellcatas. Te' napa' añecopña nocshena atto sapa' e'ñe sellquëñoť o' alla same'ñerra e'ñe cohuen. Tarraña atto sellquëna sapa' ñeñtpa' atet senteñ ñerra'm Yompor sellcatene' ñeñtcha'ña same'ñaterraya e'ñe cohuen ñocop. Ñeñto'marña ñeñť atet neponas, ñeñtpa' e'ñe cohuen socop, ñeñť allopa' ama čhoye' erroten nepenso ñeñť ama pocteyaye ama't mamesha.

¹⁰ Tarro'mar ñerra'm esempo atet yenteñ Yomporña atet yellcatene' ñeñtpa' e'ñech pocte' yenteñ tarro'mar ñeñtpa' alloch yoctape'cherr cohuen ñocop, allochñapa' attochña yequeshperra. Tarraña atto yellquëna arr patsro, ama Yomporecpaye' yellquëno ñeñtpa' ñeñña allo'na aneney rromueñtso, allcha' yechenquërra poctacma.

¹¹ Sa sellquëñapa' e'ñe atet senteñ ñerra'm Yompor e'ñe sellcatene'. Ñeñto'marña allempoteñ yoročhen senten sa so'chñar ñeñto'marña sapa' semneñ o'ch alla cohuen nentapreterres. Ñaña ñeñtpa' apencočhen senteñ ñeñť atarr atparñať. Ñeñto'marña semñchañoťpa' atarr semneñ o'ch alla senterren, attoch e'ñe cohuen na'poctatonas. Ñaña allempoteñña e'ñe pocte' senteñ o'ch secoñchach ñeñť atparñaťtetsa. Ñeñto'marña te'pa' atet o' seponhuerra ñeñť e'ñe pocte' nenten, allochñapa' amach allo'na sa'yohuaretteno.

¹² Ñaña o'ch notas, ahuaña allempo nequellquërrnaserr añ necartapa' ama atparñaťecpaye' nequellquërrnaserro ñaña ama nocpaye' nequellquërrnaserro ñeñten atarr atpare'tenet. Añecpa'ñaña nequellquërrnaserr carta allochñapa' attoch čhaponasa seyočhro po'ñočh sapa' atarr semorrentenna. Ama't Yomporpa' eñotenes.

¹³ Ñeñto'marña attoña o' alla atarr socshaterrey.

Elloña napa' añ atarr nocshaterre' atto nenter masheñ Tito atto ña ahuo't alla atarr socshater, e'ñe pueyočhrocmañen o' atarr cosherra.

¹⁴ Ñehua, ahuaña allempoch ahuo' masheñ Tito sesho, napa' atet noch sapa' atarrcha' cohuen same'ñya. Allempoña čhap seshopa' e'ñe atet same'ñya ñeñť atet noch. Ñeñto'marña napa' ama't mameshapa' amach errotenoť sepcatno, ama atta nommo'chenso. E'ñe po'ñočh atet seponhuena ñeñť atet noch Tito. Ñaña ñeñť ora allpon atet notas, ñeñtpa' e'ñe po'ñočh atet.

¹⁵ Ñaña e'ñe semñcha'na'teñoťpa' ahuo't sagať Tito e'ñe cohuen. Ñaña ñeñť ora allpon cotape'chatas Tito sapa' ahuo't e'ñe cohuen ame'ñaterrsa. Ñeñto'marña te' Titopa' e'ñe pueyerpueñoťes, ñapa' atarr morrentensa nanac.

¹⁶ Ñeñto'marña napa' atarr nocshena tarro'mar neñotenes sapa' o' same'ña'huerra e'ñe cohuen.

8

Atto macedonio'marnesha'pa' e'ñe pocsheñeshocmañen es apa'yenet Yomporecop

¹ Ñehua, te' masheñneshacha' ñaña nočhaneshacha' o'ch neñotaterrsserr atto Yomporpa' orrtaterranet puemuereña allohuenacop ñeñť pame'ñeñoťet čhocma apčha'yenet all anetso Macedonio'mar.

² Ñehua, macedonio'marnesha'pa' ama't shonte' pa'namen huenanet ñeñť atarr topatenahuet, tarraña ñetpa' čhocma atarr coshenet. Ñaña ama't atarr huocchañetyenet, tarraña ñetpa' čhocma apa'yeñet po'potantañ ñeñť atarr es nanac palltetsa. Apa'yeñet e'ñe pocsheñeshocmañen atet ñerra'mrrate' ñetpa' shonte' esocmañen echenet po'checom.

³ Napa' neñotenanet ñetpa' ahuo't pomyenet ñeñt allpon muena'yenet ñet puesheña'ttset. Ama't ñocpuetpa' palltenetañ tarraña ellonetña'pa' o' alla apa'yereterr po'psheñeñ po'pocheño, ama't ñocpuetpa' palltenetañ. Ñet e'ñe puemnenñotet atet penet.

⁴ Ñetpa' chocma a'p'to'tennet pocte'te' o'ch notanet attoch yenpuet ñamet ñeñt masheñneshaçhno huocchañneshaçhno.

⁵ Napa' e'ñe allpona notanet ñetña ellonetpa' atarr shonte' pomyeset, tarraña ama't allempo ama pomueneta' po'çllayor Yomporecop, ñetña'pa' ñanmacmuet o' e'ñe pomhuerret Yomporecop, allo'tpa' ñaña yocop ñeñt atet muenateney Yompor allohueney.

⁶ Atet nenteñ macedonio'marnesha' atarr es pomuenet Yomporecop, ñeñto'marña te'pa' o' alla notererr masheñ Tito o'ch alla ahuerterr sesho, allochña'pa' attoch allo'nach seño'tnen e'ñe cohuen pomuene' Yomporecop, ñeñt allpon ye'chatensa' ahuaña Tito.

⁷ Ñaña sapa' atarr setsoteññañ allohuen ñeñt cohuen enten Yompor. Ñanompa' atarr seyemteña Yompor, ñaña atarr cohuen seserrpare'teññañ po'ñoñ, pa'namen esocmañen es seño'tyen, ñaña e'ñe socsheñesha' es se'pa'yen Yomporecop, ñaña e'ñe cohuen semorrentenya. Ñaña e'ñe setsotuen ñeñt atet cohuentetsa Yomporecop. Ñeñto'marña te'pa' aña sepalltena paterr attoch o'ch setsota eñote' apa'yese' po'potantañ ñeñt es pallta'yetsa.

⁸ Napa' ama neyechare'teño'teye' notenso atet, aña nemnen o'ch neñotatas ñeñt atet pena po'potantañ ñeñt e'ñe pocsheñeshocmañen es apa'yenet ñeñt es pallta'yetsa. Allochña ñerra'm ñeñt seño't, napa' neñotenes atet'cha' se'pohuerra saña. Attoña neñotenes e'ñe po'ño'ch semueranna'tuena allohuenes.

⁹ Ñehua, sapa' o' seño'ter ñeñt atet pa' Yepartseshar Jesucristo. Ñapa' atarr amuerañtosa, ñapa' esocmañen echeneñ Pomporesho, tarraña e'ñe puemorrenteño'tey ya, ñaña'pa' atta huocchañetos. Allochña e'ñe puehuocchañeteño't yocop, yaña'pa' shonte'ch esocmañen yecherr Yomporesho't.

¹⁰⁻¹² Ñehua, sa ahuaña charopa' atarr semneñ o'ch es sapa'yeyñ acheñenesha' ñeñt es pallta'yetsa. E'ñe socsheñesha' sapa' ahuo't samotech es apa'yese' po'potantañ. Ñeñto'marña te'pa' añ e'ñe pocte' nenteñ socop. Te'pa' allo'nach sesen socsheñeshocmañen es apa'yeshahuet, e'ñe allpon semna'yen puesheña'ttsos, e'ñech allpon sapa'yesanet. Tarro'mar ñerra'm e'ñe yemneño't es yap Yomporecop, ñapa' e'ñech pocte' enteñ ama't e'ñe errpona yemneñ o'ch yap. Tarro'mar ñapa' amach enamyé aton ñerra'm ama yecheñe. Allochña'pa' o'ch senue e'ñe poctacma. Atto'tcha'ña setsotua allohuen ñeñt atet poctetsa Yomporecop.

¹³ Napa' ama notenso tarrecopcha' es sapa'yen allochña'pa' o'ch atta atarr es sepalltena sa.

¹⁴ Añecopña notenes o'ch sattecmatua. Atet ñerra'm te'pa' shonte' sechen, socoppa' añ poctetsa o'ch sapa'yeyñ ñeñt es pallta'yetsa te'. Allochña'pa' ñerra'm esempo es sepalltena saña'pa' añ poctetsa o'ch apuerrset ñamet, allochña'pa' attochña e'ñech sattecmaten.

¹⁵ Ñeñt'pa' atet oteney Yompor po'ñoñ ñeñt atet anuaret ahua'toteñ, ñeñt'pa' atet oten: "Ñeñt echene' shonte'pa' amach es a'pchateno. Ama't ñaña ñeñt echene' coñe'tpa' amach es pallteno."

Atto Titopa' alla ahuerterr po'pocheño Corinto

¹⁶ Napa' chocma neparasyoso'teñ Yompor tarro'mar añ nenan masheñ Tito pueyo'chro atto ñapa'cho'ña chocma llecpretensa atet ñerra'm na.

¹⁷ Ñeñto'marña allempo noteñ o'ch ahuerri sesho, ñapa' e'ñe pocte' enteñ. Elloña ñapa' e'ñe puenneññoñ atarr sechena o'ch alla ahuerrierr o'ch abcherrsa'.

¹⁸ Ñaña yapa' o'ch yemñererr masheñ Tito epuet ñaña po'psheñeñ masheñ. Ñehua, añ masheñerpa' allohuen ñeñt apcha'yetsa pame'ñeñotetpa' atarr cohuen enteñet atto serrpare'tatenanet añ cohuen ñoñets ñeñt alloch yequeshperra.

¹⁹ Elloña ñeñt masheñerpa' allohuen ñeñt apcha'yetsa pame'ñeñotetpa' o' net o'ch yechopeñe'ch parro attoch ñach yeyenpuene' ñeñt atto yetorrena o'ch yeyenpueñ po'potantañ. Ñeñtpa' añecop sherben attoch aye'chochtateññañet Yompor, ñaña añecop sherben attoch eñoteñet e'ñech yocsheñesha' yemneñ o'ch yeyenpannena e'ñe cohuen.

²⁰ Ñeñto'marña o' net ñaña po'psheñeñ masheñ allochñapa' atto yapchaten quellepa' amach cha sasare'tenyeto quellayo'mara.

²¹ Tarro'mar yapa' añña yema'yochrena o'ch yorrtat ñeñt e'ñe cohuen enten Yompor, ama't ñaña ñeñt cohuen enten acheñenesha'.

²² Ñehua, te'pa' o'ch yemñonas po'poñ masheñ ñeñtcha' tatsa, ma'psheña. Ñeñt po'psheñeñ masheñpa' napa' neñoteñ ñapa' e'ñe pocsheñeshocmañen atarr cohuen es ma'yochra'yena ñeñt cohuentetsa Yomporecop. Ñaña ama't te' atto e'mare'tenes sa e'ño' cohuen same'ñeña Yompor, elloña te' ñapa' atarr mueneñ o'ch allo'na sen torra'nmatsa e'ñe cohuen Yomporecop.

²³ Ñaña ñerra'm esesha' sa'pto'tene' o'ch otaset, "¿ama't se'mare'teñe masheñ Tito, erro'tsente'?" sañapa' o'ch soch "ñapa' añ epuet torrena masheñ Pablo taruasats Yomporecop attoña e'ñe sherbeney yaña." Amapa' ñerra'm a'pto'taset ñaña añ po'psheñeñ masheñecop, sañapa' o'ch señotatanet ñetpa' arroñ amñareñtenet all apchena allohuen masheñnesha'chno ñeñt ame'ñetsa all Macedonio. Ñetpa' e'ñe cohuen orrtatenet Cristo po'cohuenña.

²⁴ Ñeñto'marña te'pa' o'ch notas e'ñech cohuen sagañ añ masheñnesha', allochña ñetpa' esheccha' eñotaset sapa' po'ño'ch atarr semuerenanet, attochña eñotas ñaña allohuen masheñnesha' ñeñt pame'ñeñotet apcha'yetsa allot amñareñtenet. Allochñapa' o'ch eñotaset po'ño'ch e'ñe cohuen same'ñena ñeñt atet notenanet socop.

9

Yomporpa' añ atarr morrentena ñeñt e'ñe pocsheñeshocmañen es apa'yetsa ñocop

¹ Ñaña ñeñtcha' sapchen alloch seyempue' masheñnesha' ñeñt atarr es pallta'yetsa Jerusaléño, napa' neñotenes ama sepallteno o'ch alla noctape'chaterrerr necartoñ ñeñtcha' atet seña.

² Tarro'mar napa' neñotenes ñeñtpa' atet atarr semnen sa. Ñeñto'marña arr Macedonio chocma noteñ macedonio'marnesha' sapa' chocma semneñ o'ch es sapa'yes añecop ñeñt atarr es pallta'yetsa. Ñeñto'marña napa' e'ñe nosheñeshocmañen neñotateñ macedonio'marnesha' ñeñt atet sepena sa ñeñtes acayo'marneshas ñeñtarasa corinto'marneshas. Ñehua, napa' o' neñotatanet atto ahuaña charo sapa' semneñeñ o'ch e'ñe sa'pocstat attoch es sapa'yes ñeñt atarr es pallta'yetsa. Atto sapa' atarr semneñ o'ch seyempue' ñeñt atarr es pallta'yetsa, ñeñto'marña all Macedoniotpa'cho'ña te'pa' eñall shonte' ñeñt muenets o'ch es apa'yenet ñamet.

³ Tarraña ama't napa' neñotenes atarr semneñeñ o'ch seyempue' ñeñt atarr es pallta'yetsa, ñeñto'marña napa' o'ch nemñonas añ masheñnesha' ñeñtcha'

otatsa. Ñetpa' o'ch yenposset attoch sap'cha' añecop ñeñt' es pallta'yetsa. Allochñapa' ñerra'm e'ñe cohuen sañño'tue, attochña eñotaset ñeñt' e'ñe cohuen notenanet socop, ñeñt'pa' e'ñe po'ño'ch atet se'pohuena.

⁴ Allochñapa' ñerra'm esempo ne'chap naña sesho epan ñaña masheñnesha'chno macedonio'marnesha' ñerra'm yentoses ama sap'chatueña', allempoña yapa' 'chate' parrocmá yepencna'ntatanna'ta. Allempoña e'ñete' orrena neyemtensa.

⁵ Ñeñto'marña napa' añ pocte' nenten o'ch noch po'psheñeñ masheñnesha' ñetpa' otetepa' ñanmacmuet, ñeñt'cha' sab'cherraya' attoch ñetpa' o'ch yenposset attoch e'ñe sap'cha'hua ñeñt' semnen sa o'ch e'ñe saphue ñeñt' es pallta'yetsa Jerusaléño, ñeñt' atet sot ahuatoteñ. Tarro'mar napa' e'ñe pocte' nenteñ sa e'ñe semneñño't e'ñech señañesha' es sapa'yes ñeñt' atarr es pallta'yetsa. Amachña 'cha es enamare'tyenseto attoch es sapuenanet.

⁶ Chocmach seyerpuena añ ñoñets, ñeñt'pa' atet oten: Ñerra'm ya atarr coñe't es yapa'yen Yomporecop, yapa'cho'ña o'ch alla yaguërr ñeñt' atarr coñe't. Ñerra'm atarr aton es yapa'yen Yomporecop, yapa'cho'ña o'ch alla yaguërr ñeñt' atarr aton. Ñehua, ñato' o'ch netma'ntacha atet ñerra'mrrate' 'cho yenare'tatse'ten ya'mro. Ñerra'm atarr coñe't yenare'tatse'tpa' atarrcha' coñe't ya'yapa'cherr ñerra'm esempo po'nen. Ñerra'm atarr aton yenare'tatse'tpa' atarrcha' aton ya'yapa'cherr ñerra'm esempo po'nen.

⁷ Ñaña añ poctetsa e'ñe puesheña'ttsoy o'ch yapa'yen e'ñe allpon ñeñt' pocte' yentyen e'ñe ya yeyo'chro. Amachña yempaño'ta es yapa'yeno ñaña amachña puenamare'teño'teta es yapuenaneto. Tarro'mar Yomporpa' añña atarr morrentena ñeñt' e'ñe pocsheñeshocmañen es apa'yets.

⁸ Ñaña Yomporpa' shonte' esocmañen echen ñeñt'cha' apuerres allochñapa' attoch 'chocma sechencha' shonte' ñeñt' atarr cohuen socop, ñaña sechencha' shonte' attoch seyempuen pa'namenot' ñeñt' cohuentetsa Yomporecop.

⁹ Añpa' ñeñt' atet oten Yompor po'ñoñ ñeñt' anuaret' ahuatoteñ, ñeñt'pa' atet oten:

Ñeñt' atarr es apuene' huocchañnesha' ama't ahuatapa' amach apsare'tterro ñeñt' atto e'ñe cohuen es pen.

¹⁰ Yomporpa' apuenescha' shonte' esocmañen allochñapa' attoch 'chocma sechencha' shonte' attoch seyempuenanet pa'namenot' ñeñt' cohuentetsa Yomporecop. Ñaña ñapa' allo'nach sen es sapuene' pa'namen allochñapa' allo'nach sesen yenpuene' pa'namenot' ñeñt' cohuentetsa Yomporecop. Ñeñt'pa' ñerra'm netma'ntacha ñato' o'ch not: Ñeñt'ara Yompor ñeñt' yapuene' puerets ñeñt'cha' yenare'ten o'ch 'chap allempo po'nenpa' allempochña yeyoren ñeñt'cha' yerrar yepen, ñeñt'pa' Yomporña a'torene' attoch ya'yapa'cheñ o'ch yeshonteñ.

¹¹ Attochña sapa' sechencha' allohuen shonte' esocmañen allochñapa' attochña shonte'ch esocmañen sapa'yeñ ñeñt' es pa'namen pallta'yetsa. Ñerra'mña atet se'papa' yañapa' yach aphuerrahuet attochña ñetpa' 'chore'teñet Yompor o'ch ochet "Parasyos Nompore, 'pa yapuene' ora allohuen."

¹² Ñerra'm atet'cha' sepene es apa'yese' masheñnesha' ñeñt' ame'ñetsa, ama e'ñe añecpa sherbeno attoch es sapuenanet ñeñt' palltenet. Añecpa'ñaña sherben attoch ñetpa'cho'ña atarrcha' 'chore'chet Yompor o'ch ochet: "Parasyos Nompore, 'pa yapatene' ñeñt' allpon yepalltena."

¹³ Ñaña attoña ñetpa' aye'cho'chtateññañet'cha' Yompor, tarro'mar o'ch

eñotenset sapa' po'ño'ch attera same'ñeññaña Cristo po'ñoñ. Tarro'mare'naña ñetpa' aye'chochtateññañetcha' Yompor, atto sapa' sapuenanet pa'namen ñeññ allpon palltenet ñet, ñaña po'potantañecop.

¹⁴ E'ñech pueyerpueñoñetas sapa' ñetpa' atarrcha' nanac chore'tatonaset Yompor, tarro'mar sapa' o'ch sorratanet Yompor puemuereña allo atarr muerenya.

¹⁵ Yeparasyoso'chepa'ch Yompor tarro'mar ña yapuene' Puechemer, ñeshoña huena ora muereñets ñeññ atarr co'hneshare'. Ama't yemneñeñ o'ch ya'ye'chochtatue e'ñe poctacma, tarraña ya arromñañeypa' amach erroť yepe, ñaña ama yeno yeñoñ attoch ya'ye'chochtatuoñ e'ñe poctacma ñeññ atet yocshena yeyo'chro.

10

Atto Pablopa' eñotatan corinto'marnesha' ñapa' e'ñe po'ño'ch allsensaret Yomporeshot

¹⁻² Ñehua, te'pa' na Pablon o'ch alla noctape'chaterrser e'ñe nemuereñoñes atten ñerra'm Cristo ñeññ nanac amuerañtostsa. Puemuereñoñey ya ñapa' e'ñe pocte' eñche't o'ch atet enteñet ñerra'm ñapa' ama esoshe'mayaye. Ñehua, sapa' patanta'ttospa' attach sentenen ama erroť notenso atsrre'mo'chen ñerra'm esempo allo'tsenen sesho. Tarraña ñerra'm esempo allaparo'tsenen, allempo nequellquennas cartapa' allempoña sapa' atet sentenen ñerra'mrrate' ama choye' nem'cha'tenso ama't e'ñe mamesha, e'ñech eche'charr notenes necar-toť. Tarraña ñeññpa' ama atteyaye. Ama't allempo allo'tsenen sesho, ñerra'm nemneñeñ atet ne'ñoronasapa' e'ñe'e' eche'charr ne'ñorennasa. Ñeñto'marña te'pa' e'ñe neyo'chrocmañen o'ch notas, soctape'cherr cohuen e'ñe tayecma allochñapa' ñerra'm esempoch necherr seshopa' amach cha se'ñoratno eche'charr. Tarro'mar ñerra'm ama soctape'cherro cohuen, po'ño'ch ñerra'm esempo necherr seshopa' chach se'ñoraten eche'charr, ñeññes notene' napa' e'ño' ñañeña noctapñoť atet es ne'patse'tyen ñeññ atet pa'yena acheñenesha' arr patsro, ñeññpa' e'ñe ñocpueta sherben. Tarraña napa' ama atteye' nepeno.

³ Ñehua, ama't napa' nocrrrena arr patsro atet yocrrrena allohueney acheñey tarraña ñeññ atet nema'yo'chrena Yomporecop, ñeññpa' ama atteyaye ñeññ atet ma'yo'chrena acheñenesha' arr patsro.

⁴ Tarro'mar ñeññ atet yema'yo'chrena Yomporecoppa' ñeññpa' ama añeyaye ñeññ atet yoc'tape'chen ya acheñey arr patsro. Añña atto yema'yo'chrena ñocop, e'ñe ña po'huamencot atet yepena. Attochña yehuapore'toñ allohuen ñeññ epatare'tene' Yompor poctapña.

⁵ Ñaña allohuen serrparñatso'chno ñeññña epatare'tene' Yompor po'ñoñ ñeññcha'ña yehuapore'tua. Ñaña allohuen cotapñatso'chno atto nanac ommo'chenet, ñeññña ama muenatenahueto attoch enteret Yompor, ñeññpa'cho'ña Yomporcha'ña po'huamencot o'ch yehuapore'tue. Ñaña ñeññ allpon yoc'tape'chyen arr patsro ñeññña atpare'tatene' Yompor poctapña, ñeññcha'ña ya'meta'huerr Cristesho, allochñapa' attochña Cristopa' o'ch ame'ñatera.

⁶ Ñaña ñerra'm o' alla name'ñatuersa e'ñe cohuen, tarraña ñerra'm esesha' ora atpare'tetsa, napa' e'ñe pocte' nenteñ o'ch yecoñchach ñeññ atet atpare'tetsa.

⁷ Sapa' aña cohuen senten ñeññ allpon sentyen seclloyot. Ñerra'm esesha' entetsa atet ñapa' Cristo mueñene', ñeññ acheñerpa' eñoche'pa' napa'cho'ña Cristoña nemñene'.

8 Ama't atarr natontaten neñoñ atto alla noterrser napa' Cristo puellsensaren, tarraña napa' ama çhoye' neyllateno neñoñ attoch nepenca. Tarro'mar atto llesensa'n Yepartseshar Cristopa' ñeñtpa' añecopña attoch neyenpas attoch allo'na sesen huomenc pa'nmue' seyoçher Yomporecop. Ñeñtpa' ama añecpayaye alloch na'puerrataterres ñeñt atto same'ñena.

9 Napa' ama nemno o'ch añcha'noçhen sentenen e'ñe necartota.

10 Tarro'mar patanta'ttsos atet sentennan necarta ñerra'mrrate' atarr eche'çharrot es notenes ñeñt atarr echarr senten. Ñaña ñerra'm esempo allo'tsenen sesho sapa' ama ahuamencatoyenaye' sentenno ama't mamesha, ñaña atto neserrpare'tatenespa' ama't e'ñe mameshapa' ama asherbenaye' senteñe.

11 Tarraña acheñenesha' ñeñt atet otetspa' eñochetepa'ch ñerra'm erroç notas necartot ama't atarr allaparo'tsenen atetcha'cho' po'ñoç nepennas ñerra'm esepoch neçherr sesho.

Atto Yomporpa' ama pocteye' entenano acheñenesha' o'ch cohuen entenet e'ñe ñañeñeta

12 Napa' ama't mameshapa' ama nemno o'ch sentenen napa'cho'ña ñato' attente' ñeñt atet pena po'potantañ ñeñt atarr cohuen eñosyets e'ñe ñocpueta. Napa' ama nemno o'ch not napa' e'ñe attecma nepena atet penet ñet. Tarro'mar ñeñt atet penet ñetpa' ama cohuenayaye. Ñetpa' e'ñe ñañeñeta poçtañnetpa' coshapretannenet e'ñe ñagattseta. E'ñe ñañeñeta poçtañnetpa' cohuen entapretanna'tyenet, ñeñtpa' atta otatse'tyenet.

13 Tarro'mar yapa' ama yoyaye yoctañña ñeñt atarr yocshapretannena. Aña Yompor poçtañña ñeñtpa' allohua onañchareñ yocop ñeñtcha' e'ñe cohuen yocshapretannena. Ñaña Yompor poçtañña ñeñt atet onañchennaypa' ñeñtpa' añecpa'ñaña sherben attoch yeçhapatonas Yompor po'ñoñ e'ñe se-shohuen ñeñtes corinto'marneshas.

14 Ñeñto'marña yapa' ama çho yatontateññañe Yompor poçtañña tarro'mar ñeñt allpon onañchennay, ñeñtpa' e'ñech allohua yetorrena ñocop. Ñeñtpa' añecpa'ñaña sherben attoch yeçhapat Yompor po'ñoñ ama't seshohuen. Ñeñto'marña ya ahuatpa' yanom çhapatete' Yompor po'ñoñ sesho ñeñtara añ cohuen ñoñets alloch yequeshperra e'ñe yame'ñeñoça Cristo.

15 Ñaña ya e'ñe yocoppa' ama yemno o'ch yommo'choña po'psheñeñ po'taruas ñeñt ñanom torratta all Yomporecop. Tarraña yapa' yecuenes ñerra'm esempo sa o'ch allo'na sesen ame'ñetsa cohuenpa' allempoña napa' noctape'chen ellonet o'ch alla netorrerra sesho.

16 Attochña ama't allpon anetsoçhno ñeñt allemeñ allo'tsa'yen ellonet seshotpa' allña nesechena ñaña allcha'ña neserrpare'tatyesosonet Yompor po'ñoñ, ñeñtara cohuen ñoñets alloch yequeshperra. Nemneñ o'ch na'potoñ Yompor po'ñoñ all ama aserrpare'tataretteneta' allochñapa' amach çha nommo'choñe po'psheñeñ po'taruas ñeñt ñanom serrpare'tats all.

17 Ñerra'm esesha' muenetseñ o'ch e'ñe cohuen eños puesheñarrocop tarraña ñeñtpa' Yomporecopcha'ña e'ñe cohuen eñen.

18 Tarro'mar añ acheñer ñeñt eñoretsa e'ñe cohuen ñocpapa' ñeñtpa' ama pocteye' enteñe Yompor. Tarraña ama't erra'tsena acheñer Yomporcha' eñosets cohuen ñocop, ñeñtña e'ñe pocte' enten ña.

11

Atto ommoñañenesha'pa' ahuo't shequënan corinto'marnesha' ñetpa' allsen-sarefeto'

¹ Napa' atarr nemneñ o'ch se'mñoton atto čha muene' atfa es notatse'tyen. Po'ñočh o'ch notas, se'mñoton ñeñt atet es notatse'tyen, allochñapa' attoch neñotatas ñeñt atet noctape'chen.

² Tarro'mar napa' atarr necuenes atet ñerra'm Yompor ña secuene'. Tarro'mar napa' añ no'patatensa Cristo attoch allohuenes o'ch e'ñe napuas poctacma. Atto o'patataretes, napa' o'ch necuenes attoch amach yoratstaso po'psheñeñ. Ñehua, o'ch netma'ntatasa atet ñerra'mrrate' puesheñarr yacma ñeñt esñeť. Po'seññapa' o'ch o'patacha puesheñarr yacma ñeñtcha' puerrollar pa'. Ñapa' o'ch cohuanmpenan po'señ e'ñe cohuen tarrempohuach esempoch huapa ñeñt o'patenaya allempochña pomanña po'señ ñeñt ama a'pllareteyaye. Ñeñto'marña napa' e'ñe atet nentenes ñerra'mrrate' nesñenesha' nepenes attoch napuas Cristo ñeñt atet ñerra'mrrate' ñeñtcha' e'ñe serrollar sepa' ñapueť.

³ Tarraña napa' čha sellcatenen. Napa' noten sapa' o'te' čha semnatena o'ch shecaset samña, atet pa' ahuať shechep allempo shecan Eva tarro'mar ñeñt shecheppa' atarr etsotenan shequēñets. Ñerra'm sapa'cho'ña puehquēñoťetaspa' añach yečhatenset ñeñt ama cohuenayaye coťapñats, ñeñto'marña o'huañcha' allo'na sesen ame'ñenaya Cristo ñapueť ñeñt e'ñe cohuen.

⁴ Tarro'mar sapa' ñerra'm esempo huena po'potantañ sesho, ama't serrpare'tatensetañ ñeñt atet pe't Jesús tarraña ñeñtpa' ama atteyaye ñeñt atet yeyčhatuas ya ahuañmo'cha, sañapa' eso'mare'tña allorocma e'ñe socsheñesha' same'ñeña. Ama't serrpare'tatenset po'poñ coťapñats ñeñtpa' ama añeyaye Yompor poctapñña, sañapa' allorocma'tña e'ñe pocte' senteñ o'ch same'ñya. Ama't serrpare'tatensetañ po'poñ ñoñets alloch sequeshperrañ, ñeñtpa' ama añeyaye ñeñt e'ñe cohuen ñoñets ñeñt same'ña'hua ahuañmo'cha, tarraña sañapa' e'ñe't pocte' senteñ o'ch ame'ñataset po'poñ ñoñets.

⁵ Ñaña ñetpa' atfa ommo'chenet allsensareteto' Yomporeshoť, ñetpa' atarro' sherbenet. Tarraña napa' elloña atarr asherben nentena.

⁶ Ama't napa' ama ayčhatareteno attoch neserrpare't cočhneshare' ñoñets tarraña napa' e'ñe neñotueññañ Yompor po'ñoñ. Sapa' señotenen ñeñt atet notenes ñeñtpa' e'ñe po'ñočh atet tarro'mar shonte' pa'namen norrtatyen erracmañen ñeñtña e'ñe señotatene'.

⁷ Ñehua, sapa' amate' pocteye' sentenno tarro'mar ama't ahuañmo'chapa' ama čhoye' necobraso atto neserrpare'tatensa' Yompor po'ñoñ ñeñt alloch yequeshperra. Ñato' amate' asherbenaye' sentenno atto ama necobraso. Tarraña ñeñtpa' añecop sherben attoch sapa' o'ch tantaterres Yompor sosya'tsañoť allochñapa' o'ch puechemer perres samña.

⁸ Ñehua, po'poñ anetso all apčha'yenet pame'ñeñoťet Yompor, na errotenopa' čhocma naguēnanet ñeñt allpon muenenet o'ch tsa'tnet e'ñe ñet poctapñoťet. Ñeñto'marña ama pallteno o'ch setsa'tna samña atto neserrpare'tatenes. Ñeñt napa' atet nenteñ ñerra'mrrate' po'poñ anetso all apčha'yenet pame'ñeñoťet Yompor, napa' ahuo't neprratampsanet ñet attoch nesherbasa.

⁹ Ahuañmo'cha allempo na'posa seshopa' ñerra'm esempo nanac es nepalltena, sapa' ama't puesheñarroťesapa' ama na'tsrre'močhtana'taso es senamare'te' ñeñt nepalltena. Tarraña allempo atarr es nepalltenapa' o' huačha'ta masheñnesha' Macedonioť, ñetñapa' o' aposnet allpon ñeñt atarr nepalltena. Attoña allponmat na'puena sesho ahuañmo'cha, napa' ama't mameshapa' ama nemno o'ch na'tsrre'močhtana'tasa ama't e'ñe

puesheñarrotesa. Ñaña napa' chocmach atet nepena.

¹⁰ Napa' neñotena Cristopa' entenen e'ñe po'ñoçh cohuen ñeñt atet nepena, ñeñto'marña napa' ama't eseshapa' amate' errotenoñ queçhpatatnetoña atto e'ñe cohuen neserrpare'teññañ Yompor po'ñoñ e'ñe atta ñeñt allo atarr nocshena, ama't errañaren nesen Acayo'mar.

¹¹ ¿Eso'marte'ña atet notenes? ¿Ama't señoñe? Chate' sotenapañ amate' nemorrentenso. Tarraña ñeñtpa' ama atteyaye. Yomporña nentene' atar-rca'ye nemorrentensa.

¹² Napa' chocmach atet nepena amach necobrenso ñeñt atet pena po'potantañ ñeñt pommo'cheñoñeta serrpare'tatyenset. Allochña ñetpa' amach errotenoñ otneto napa'cho'ña ahuo' na'tsrre'moçhtana'ch naña acheñenesha' atet penet ñet. Tarro'mar napa' ama pocteye' nenteñe o'ch otet e'ño' attecma yetorrena Yomporecop.

¹³ Tarro'mar ñeñt atet acheñpa' ama Yomporeye' llesensenaye, ñetpa' aña po'taruas penet shequëñets attoch ganenet e'ñe atta. Atta mueneñet o'ch po'poñetet ahuo'ch orrtet atet ñerra'm Cristo puellsensar.

¹⁴⁻¹⁵ Ñehua, yapa' yeñoteñ oneñetpa' chocma atet pena ñaña o'ch po'poñet attotcha' shequëney. Oneñetpa' chocma orrtatennay ñeñtcha' cohuen yenten ya, o'ch orrtatennay atet ñerra'mrrate' ñapa' Yompor po'puetarenñoñ amñareñ ñeñt atarr cohuen. Ñeñto'marña yeñoteñ oneñet pueyochresha' ñeñt torretsa ñocoppa' ñetpa'cho'ña atarrcha' ashcañareret, mueneñet o'ch po'poñetet attotcha' orrtenet atet ñerra'm añ acheñer ñeñt e'ñe po'ñoçh torretsa Yomporecop. Tarraña ñeñt atet petsapa' añ o'patenahuet coñcheñets ñeñt poctetsa añecop ñeñt atet patse'tyetsa.

Atto Pablopa' pa'namenot mueroçhtateñet e'ñe pame'ñeñoñ Cristo

¹⁶ Ñehua, te'pa' o'ch alla noterrser. Amach sentatsetno napa' attate' notatse'tyen. Ñehua, ama't sentenen atet ñerra'm otatsñañenpa' notatse'teñoñña' se'mñoten. Tarro'mar napa'cho'ña o'ch e'ñe cohuen neños ñeñt e'ñe nocpa atet ñerra'mrrate' cho nommo'chena mame'.

¹⁷ Ñehua, ñeñt atet notenes te'pa' ama cohuenayaye tarro'mar ama añecpaye' llesensa'noña Yepartseshar o'ch e'ñe cohuen neñen ñeñt e'ñe nocpa. Te'pa' e'ñe na notatse'teñoñ e'ñe cohuen neñen ñeñt e'ñe nocpa atet ñerra'mrrate' cho nommo'chena. Tarraña ñeñt atet notenes neñoteñ ñeñtpa' e'ñe po'ñoçh netsotueñ.

¹⁸ Atto shonte' po'potantañ ommo'chyenet ñeñt atet etsotenet ñet arr patsro, napa'cho'ña o'ch neñosatse'tapretyesanet atet ñerra'mrrate' cho nommo'chapretyenanet.

¹⁹ Sapa' e'ñe atet sentena sañeña atarro' es señoten ñeñto'marña e'ñe pocte' senteñ o'ch se'mñoteññañ ama't otatsñañ ñeñt atto ommo'chena.

²⁰ Ama't ñet atto pomnaren penset, sañapa' e'ñech pocte' senteñ. Ama't es puerratañpsaset ñeñt allpon sechyen, sañapa' e'ñech pocte' senteñ. Ama't pa'namenot shecare'tenset, sañapa' e'ñech pocte' senteñ. Ama't atarr puet-sena'teñoñetaspa' sañapa' e'ñech pomnaren sepatena. Ñerra'm esempo ama't cho taçllapechenset, sañapa' e'ñech pocte' senteñ atto atarr pencna'ntatenset.

²¹ Napa' ama nepenquëñoñeye' notenso, napa' ama nemno nehuamen-coçpa' o'ch pomnaren nepenes, atet penes po'potantañ.

Ñehua, tarraña ama't errotente' ommo'chyenetpa' napa'cho'ña o'ch atet neñosatse'tapretyesanet. Notatse'teñoñpa' çhach nottena atet ñerra'mrrate' cho nommo'chapreteña ommoñañenesha'.

22 Ñetpa' pommo'cheñoťetpa' otenet ñetpa' hebreonesheto'. Ñehua, napa'cho'ña o'ch notas, hebreoneshan namña. Ñetpa' pommo'cheñoťet otenet israelena'tareto'. Ñehua, napa'cho'ña o'ch notas israelena'taren namña. Ñaña ñetpa' otenet po'mrenñaneto' yatañ Abraham. Ñehua, napa'cho'ña po'mrenñen yatañ Abraham.

23 Ñetpa' pommo'cheñoťet otenet ñetpa' atarro' torrenet Cristocop. Ñehua, napa'cho'ña elloña atarr nanac neťorrena Cristocop. Ama't e'ñe no-tatse'teñoťa noten, ñeñťpa' e'ñe po'ñočh atet. Ama't allpon torrenet ñet, elloña napa' atarr nanac neťorrena na. Ñaña ama't allpon amueročhtataretetyenet ñet elloña napa' atarr nanac amueročhtatareten. Allpon ayottam'psareten all coñchatennet, ñeñťpa'cho'ña nanac atonoche'tats. Ñaña allpon ashtennetpa' ñeñťpa'cho'ña atarr nanac atonoche'tats. Ñaña ñeñť allpon autsanča' rromuetseñ, ñeñťpa'cho'ña atarr nanac atonoche'tats.

24 Ñaña judionesha' e'ñe pue'moñe'teñoťetan napa' atet ashtennet e'ñe amnaroche'tats. Allempoña ashtennetpa' ma'poch čharra' puechena escon ñeñť atto pacapacatspennet.

25 Ñaña ellonetpa' o'chcho' alla nallerrneterr ñaña tsach'po, e'ñe ma'poche'ttsocma nallennet. Po'pocheño'pa'cho'ña parrochpa' o'cho' alla rrolle'terrneterr. Po'pocheño'pa'cho'ña allempo nesen noñto sapo'marpa' alla nepotam'perrerr ma'poche'ttsocma. Allempopa' alla narepen alla nellapen oño enopa'rrtatsa.

26 Napa' čhocma nechopeñe'chyen ellařar allo'tsa'yen pa'namen ñeñť atarr am'cha'nočhenare', atet ñerra'm allempo netam'pena noñto oño'mar, ñaña allempo nečhap all am'cha'nočhtena eñeťečhno, ñaña allempo am'cha'nočhtana'tenen namo'tsesha' ñaña po'poñ acheñ ñeñť ama judioneshayaye. Ñaña ñeñť am'cha'nočhetyetsa all anetso'mar, ñaña ñeñť am'cha'nočhetyetsa all puetsaťo'mar, ñaña ñeñť am'cha'nočhetyetsa all oño'mar. Ñaña ñeñť atto am'cha'nočhtena po'potantañ ama't otenetañ masheñpa' țarraña ama masheñeyayeto, ñetpa' ama ame'ñeñeto Yompor.

27 Elloña čhocma atarr netaruasen, ñaña shonte' ñeñť atarr echarr nentyen. Ñaña atonoche'tats atarr nanac na'huanten nemoñ țorratsa Yomporecop. Ñaña epaye' nemueročhtena nachporrñoť, ñaña no'ñpañoť țarro'mar ama eñalle ñeñťcha' nerren ñaña ñeñťcha' norren. Ñaña epaye' mueročhtatenen senet țarro'mar ama eñalle neshtam ñeñťcha' nechorra, o' e'ñe neptsapesua.

28 Ñaña ellonet napa' čhocma nellquëña ñeñť pame'ñeñoťet allemeñ ap'cha'yetsa. Napa' añe'naña čhocma nellcatene' ñeñť atarr țorrapo' nentyen pa'namen.

29 Ama't erra'tsena acheñer ñerra'm ama huomencaye' penano pueyočher Yomporecop, nañapa' atarrcha' nellcapreteña. Ñeñťña atet nellcapreteña nañapa' o'ch atet ne'muen neyočhro ñerra'mrrate' o'huañ huomenc ne'pa' neyočher Yomporecop. Ñaña ama't erra'tsena acheñer ñerra'm o'ch a'puerratateret o'ch atet perran ñeñť ama pocteye' enteno Yompor, naña nepencapreteñoťpa' ama't mameshapa' amach pocteye' nenteñe.

30 Ñato' te'pa' o'ch noterrser po'poñoneť coťa'pñats. Sapa' po'ñočh señosatse'tatyenen cohuen ñeñť e'ñe nocpa. Añña cohuen nenten attoch neños cohuen ñeñť e'ñe nocpa, ñeñťpa' atto ama ahuamencatoyenaye' entenno acheñenesha'.

31 Yomporpa' eñotenen ñeñť atet notenes, ñeñťpa' ama shequëñtsoyaye.

Ñeñtara Yompor ñeñt Pomp por pen ñaña Yepartseshar Jesucristo ñeñtcha'ña ya'ye'chochtaterr tayoteñ errponohuañen.

³² Ñehua, napa' o'ch neyerpatasa atet apeareten ahuañmo'cha allempo Damasco'tsenen. Ñehua, ñeñt amcha'tarettatse't all Damasco, ñeñtpa' ñeñtara amcha'taret Aretas pueyochresha'. Ñeñña nene'ña guardianesha' ñeñt camretsa allemeñ yetarroñ. Ñetpa' añecop camrenet attoch rroma'netaña' o'ch yottamipesnetañ allcha' coñchatnetañ.

³³ Tarraña napa' arr esha'tnet cañtro attoña cha'nmaterrnet ventanoñ alotoña a'suatañperrnet conchtot. Attoña e'ñe cohuen nequeshperra, ñeñto'marña ama eshcaye' rroma'ñoña guardia.

12

Atto Pablo pa' a'tapataretta Yompor pue'ntaño ñeñt e'ñe poma'ptaño hua

¹ Ñeñt atto señosatse'tatyenen e'ñe cohuen nocpa, ñeñtpa' ama es sherbeno. Tarraña ama't atteñpa' o'ch alla neserrpare'taterrser atto Yepartseshar ñaña es negatyene' ñeñña es neñotatyene'.

²⁻³ Ñehua, napa' neñoteñ na puesheñarrana ñeñten ame'ñenaya Cristo te'pa' o' met charra' puechena pa'tats char, allempoña napa' a'tapaten Yompor pue'ntaño ñeñt e'ñe poma'ptaño hua. Napa' ama neñoteñe, ñato' orate' nechtso a'tapataretten, amapa' ñato' necamquëñoñate' a'tapatnet. Ñeñtpa' Yomporña eñotene'. Napa' e'ñe neñoteñ po'ñoñ a'tapataretten Yompor pue'ntaño all atarr nanac cosheñtso'tsa'yenet.

⁴ Ñoñets ñeñt ne'muena' allpa' ama aserrpare'teno tarro'mar ya arromñañey ama pocteyaye o'ch yeserrpare't allo.

⁵ Ñeñt atet apeareteneñ allempo, ñeñtpa' e'ñe poctey o'ch cohuen neñoseñ e'ñe nocpa, tarraña amach atet neñatsto, añachña nocshena atto ama ahuañmencañoyenaye' entenno acheñenesha'.

⁶ Ñehua, ñeñt atet apeareteneñ allempo ñeñtpa' e'ñe poctey o'ch cohuen neñoseñ e'ñe nocop, ñeñtpa' ama choye' notatse'teno, tarro'mar ñeñtpa' e'ñe po'ñoñ atet apeareten. Tarraña napa' ama nemno o'ch cohuen neños e'ñe nocpa. Añachña nemnen ñeñtcha' cohuen entapretennet ñeñt e'ñe allpona entapretennet ñeñt atet es neña'yen cohuen ñaña ñeñt e'ñe allpona e'mñotapretennet ñeñt atet e'ñe cohuen neserrpare'ten.

⁷ Atto Yepartseshar ñaña es negatyene' ñeñña es neñotatyene' ñeñtpa' atarr cohuen nanac yenteñ. Tarraña napa' attoch amach nocsheno e'ñe nañeñapa' Yomporña nemnatene' e'ñe nechtso ñeñña atarr nemuerochtatame'tene' nanac. Ñeñt atto nanac nemuerochtana, napa' atet nenteñ ñerra'mrrate' aj nechtsoñpena ñeñtpa' oneñeñeshoña huennana ñeñña atarr atserr nepene'. Attoña Yomporpa' ama muenatenno o'ch nocshena e'ñe nañeña.

⁸ Napa' o' ma'poche'tats nenamueñ Yompor a'huañamñperrneta' ñeñt atarr nemuerochtatene'.

⁹ Tarraña ñapa' ahuo't otenen: "Amach na'huañamñpsatsterrpe, tarraña napa' atta chocma atarr nemuerenpa, papa' ñeñña pepalltena. Tarro'mar ñeñt ama eñalle e'ñe ña po'huamencpa' ñeñtcha'ña orrtatene' na nehuañmenc." Ñeñtpa' atet otenen Yompor. Ñeñto'marña atto napa' ama eñalle e'ñe na nehuañmenc, ñeñtpa' ñeñña atarr nocshatene' na, tarro'mar neñoteñ ñerra'm attenpa' Cristo po'huamencña ñeñt nechorenaya; ñeñña norrtatenpa', ama noyaye nehuañmenc, ñeñtpa' Cristo.

10 Ñeñto'marña napa' añ atarr nocshatene' atto napa' ama ahua-men-caŕoyenayayno ñaña atto atarr pencna'ntatennet tarro'mar ama esoye' entenneto. Ñaña napa' añña nocshatene' ñeñt allpon atarr echarrare' nentyen, ñaña atto chocmach coŕare'tennet, ñaña ama't allpon ñeñt nehuenoya ñeñtña atarr nocshatene'. E'ñe pocte' nenteñ o'ch nemueroçhta Cristocop. Tarro'mar neñoteñ ñerra'm esempo ama ahua-men-caŕoyenaye' yenteno e'ñe ya, allempoña Cristopa' ahua-men-caŕ peney.

Atto Pablopa' atarr llequënana corinto'marnesha' ñeñt ame'netsa

11 Sapa' atto señosatse'tatyenen e'ñe cohuen ñeñt e'ñe nocpa, tarraña ama't atteñpa' napa' e'ñe po'ñoçh notatse'tyenyen, tarro'mar napa' ama nepallteno o'ch neños e'ñe cohuen ñeñt e'ñe nocpa. Añña palltetsa sa o'ch señosapreten cohuen ñeñt e'ñe nocpa. Tarro'mar sapa' señoŕenen atarr asherboyenen. Ama't po'potantañ ñeñt atarr se'mñotatene' atarr ommo'chenetañ, ñetpa' allsensareŕeto' Yomporeshoŕ, ñetpa' atarro' nanac sherbenet, elloña napa' atarr asherben entenen Yompor, ama't napa' ama esoye' nenteno.

12 Tarro'mar ahuañmo'cha allempo na'puena sesho, napa' allña norrtatyesonas Yompor po'huamenc ñeñt atarr echarrare' ñeñt sapa' ama't ahuaŕapa' ama sentare ñeñtcha'ña señoŕate' ñeñtpa' Parets po'huamenc ñaña ñeñtcha' señoŕate' napa' po'ñoçh Yomporña nellsensene'. Ñeñto'marña e'ñe cohuen na'huantennas ñeñt atarr torrapo' sentyenyen.

13 Attecma es norrtatyennas ñeñt atet neŕa'yes po'potantañ ñeñt pame'ñeñoŕet apçha'yetsa allemeñ anetso'mar. Añña ama na'tsrre'moçhtana'taso es senamare'tyese'. Tarraña ñerra'm ama pocteye' sentono ñeñt cohuenare' neŕonaspá, ñehua, ñato' o'ch seŕreŕnerren.

14 Te'pa' poma'pocheñoŕa' o'ch ahuerŕnerr sesho. Attecmach neŕohuerŕerr, amach na'tsrre'moçhtana'taso es senamare'te' ñeñt nepalltena na. Tarro'mar napa' ama añeye' ne'nen ñeñtcha' es sapuen na; napa' añña nemnen o'ch sepomhua sañeña Cristesho. Tarro'mar napa' atet nentenes ñerra'mrŕate' po'ñoçh e'ñe nechemer nepenes. Ñehua, cheshaneshapa' ama añeye' pallteneto o'ch es a'yapaçhet ñeñtcha' añño'tet pamo'mtayecop. Añña nanac palltetsa, pamo'mte'chña es a'yapaçhets ñeñt puechemereshacop.

15 Ñeñto'marña e'ñe nocsheñesha' o'ch nepomhua e'ñe nañeña ñeñtpa' e'ñech socop. Allochñapa' attoch sequeshperra saña. Ñaña allpon nechyen, e'ñe nocsheñesha'pa' o'ch nepomyeñ e'ñe socop. Ama't napa' elloña atarr nemorrentensa sañapa' o'huañ e'ñeye' semorrentenna na.

16 Sapa' señoŕenen napa' ama na'tsrre'moçhtana'taso es senamare'te' ñeñt e'ñe nocop. Tarraña sapa' çhate' sotenapañ napa' atarrte' neñoteñ attoch neshcare'tas ñeñt e'ñe po'poñe'ttsoçma shecare'teñets.

17 Ñeñt nemña ahuañmo'cha epsheña sesho, çhate' sotenapañ ñeñtpa' tarreçpate' attoch shecare'taset.

18 Ñehua, na te'pa' o' nesechach masheñ Tito ñeñtcha' tatsa sesho, epuet po'psheñeñ masheñ o' nemñanet epsheño'maret sesho. Sapa' çhate' sotenapañ masheñ Titopa' o'ch shecare'tensa'. Ama't señoŕeñeña yapa' attecma cohuen yoçtape'chen yeyoçhro epan masheñ Tito ñaña attecma es yeŕa'yennas e'ñe cohuen.

19 Sapa' çhate' sotenapañ añeçpaŕe' neñen cohuen nocop allochñapa' attoch o'ch alla cohuen sentuerren. Tarraña e'ñe nemorrenteñotes masheñeshacha' ñaña noçhaneshacha' o'ch notas, ñeñtpa' ama nocpayaye. Añecopña notenes

ñeñt e'ñe socop allochñapa' o'ch alla huomenc seperr seyoçher Yomporecop. Napa' e'ñe neyemteñoť Cristo, Yomporñapa' entenen ñeñt atet notenes.

²⁰ Tarro'mar e'ñe nellquëñoťes sa noten, ñato' esempoch neçherr sesho, ñerra'm attera nentyesuerrerr ñeñt atet seřatse'tyena, napa' ñeñtcha'ña atarr nellcatuerrayerr sesho. Attoña ñerra'm sentapuerren nellquëñesha' neçherr seshopa' ñeñtcha'ña sellcate' samã. Ñato' o'ch nentuerrerr attera se'moñe'tannena, attera es seye'chapretannena, attera sa'tsrre'mare'tatannena sañeña attoch o'ch sa'mcha'tareťta; ñato' attera sesasare'tanna'tyena, attera sa'metare'tamřsannena, ñaña e'ñe puesheña'ttsos attera atarr cohuen sentena sañeña, ñato' attera se'moñe'tanna'teñoťpa' seche'çhame'tanna'tyena.

²¹ Ñaña napa' nellquëñoťes sa noten, ñerra'm esempo neçherrerr sesho po'pocheño'pa' ñato'rraña o'te' alla pencna'ntaterrnerr Yompor e'ñe so'mara. Tarro'mar ñato' patanta'ttsos ama sequeçhpueno ñeñt ama pocteye' enteno Yompor ñeñt atet seyçha'yen sa sosya'tsañeçhno, ñaña atto seçhta'yeñ coyaneshaçhno ñeñt ama setaporeyaye, ñaña coyanesha'pa'çho'ña aguënan yacma ñeñt ama puerrollareyaye, ñaña atto sayomãtse'tyena ñeñt po'ñoçh ama atet ařapahuoyaye. Ñato' attera seřatse'tyena atet sepe't ahuat ama llecatensoña so'chñar attoch soctape'cherr etserra cohuen. Ñeñto'marña ñerra'm esempo neçherrerr sesho ñerra'm attera nentuerrerr, nellquëñoťpa' çhate' neya'na'tuerres.

13

E'ñe allohuanen atet cotape'chatyesnerranet pa'namen esocmañen

¹ Ñato' poma'pocheño o'ch alla ahuerrnerr sesho. Ñaña o'ch notas po'poñ, ñeñt otteñe'chareťtetsa, ñerra'm epsheña a'metare'tamřpene' amapa' ma'psheña, allempopa' pocte' o'ch ye'mñoch ñato' po'ñoçhte' atet řatse'tyena.

² Ahuañmo'cha allempo puepocheño neçherr sesho, ñeñt attera řatse'tyetsa ñeñt ama pocteyaye, napa' o' notuanet allempo ñeñtcha' atet ařareťtet ñerra'm atteretach. Ñehua, te'pa' necartotpa' o'ch alla noterraneterr ñet, ama't e'ñe allohuenes o'ch notas, ñerra'm esempo neçherrerr po'pocheño'pa' o'ch ne'ñotare'tuerres allohuenes ñeñtes attera řatse'tyetsa.

³ Allochñapa' sapa' e'ñech señoťuenen po'ñoçh nach eñorostsa ñeñt atet muenatenen Cristo. Ñehua, ñeñtpa' tarro'mar sapa' çhocma senamuenen o'ch norrtatennasa' attoch señoťen napa' po'ñoçh Cristo ne'ñoratene'. Ñaña Cristopa' e'ñe po'huamencotña çhocmach erroťen es řa'yennas, ñaña atarr ahuamencat penes.

⁴ Ñehua, po'ñoçh yeñoteñ allempo corso'tamřset Cristopa' ama ahua-mencateye' enteñeto țarraña Pomporña e'ñe po'huamencot alla tantater. Yapa'çho'ña attecma yeñotena ama ahua-mencateye' yenteno ñerra'm ña, țarraña te'ña yapa' o' yocrrerra po'huamencot Yompor attey ñerra'm ña. Attoña po'huamencot Yompor e'ñe cohuen yesherbenes.

⁵ Te'pa' o'ch noterrerr, socoppa' añ poctetsa o'ch señoťa sañeña, ¿po'ñoçhte' same'ñena? O'ch señoťa esheccha' señoťch po'ñoçhte' sapa' same'ñena. Ama't señoťeñe Jesucristoña sechorrenaya. Ñehua, ñerra'm po'ñoçh ama same'ñeño, amachña erroťenoť chorraso.

⁶ Țarraña napa' çhocma necuenes o'ch çhaponasa seyoçhro attochña señoťen po'ñoçh napa' añ nellsensene' Yompor.

⁷ Napa' nema'yocheñoŧpa' čhocma nenamuennas Yompor socop attoch amach allo'na atet seŧatsto ñeñŧ ama cohuenayaye Yomporecop. Ñeñŧpa' ama añecpayaye attoch sapa' o'ch señoŧenen napa' po'ñočh allsensareŧen Yomporeshoŧ. Añecopña nenamuennas Yompor socop attoch sapa' čhocmach seŧa'yen ñeñŧ cohuen enten Yompor, tarro'mar ñeñŧpa' ñeñŧña e'ñe cohuentetsa Yomporecop. Ñeñŧpa' atetña nemnen socop ama't napa' atet sentennoñ atet ñerra'mrrate' ama allsensareteno Yomporeshoŧ.

⁸ Tarro'mar napa' ama nemno o'ch nepatare't ñeñŧ e'ñe po'ñočh cohuentetsa Yomporecop. Napa' añña atarr nemnen o'ch nepatuahuoñ ñeñŧ e'ñe po'ñočh cohuentetsa ñocop.

⁹ Ñerra'm soctape'cherr cohuen attochña huomenc seperr seyočher Yomporecop amach nepallteno o'ch norrtatonas nehuamenc atto allsensareŧen Yomporeshoŧ. Tarraña atetpa' e'ñe pocte'. Ama't napa' ama ahuamencatoyenaye' sentenno, tarraña ñerra'm sapa' ahuamencat perres Yompor, ñeñŧpa' e'ñe pocte' nenteñ. Ñaña atto nema'yochena socop allo'nepa'chña sesen e'ñe huomenc pa'nmue' seyočher Yomporecop.

¹⁰ Ama't ellaŧaro'tsenen o'ch nequellquèrrnaserr necarta, ama't ama nesena' sesho, allochñapa' o'ch alla soctape'cherr cohuen Yomporecop. Attochña ñerra'm esempo nečherr seshopa' amach čha muene' neche'chame'tyesuerrso attoch señoŧon ñeñŧ atet llesensenen Yepartseshar. Tarro'mar atet allsensareŧen, ñeñŧpa' ama añecpaye' sherbeno alloch na'puerratatuerres, ñeñŧpa' añecopña sherben attoch neyenpas huomenc pa'nmue' seyočher Yomporecop.

Arrpa' all e'ñe poctacma so'tnerranet po'cartoŧ

¹¹ Te' masheñeshacha' ñaña nočhaneshacha' allohuach notas añ necartoŧ. E'ñe neso'teñoŧespa' o'ch notas, Yomporepa'chña sa'nataya. Te'pa' ñeñŧach noterrser mame'. Allo'nepa'chña sesen coŧape'chnomue' ñeñŧ e'ñe cohuentetsa Yomporecop. Ñeñŧ atto o' noctape'chaterrser añ necartoŧ, se'mñotonepa'ch neñoñ attoch socsherra e'ñe poctacma. E'ñepa'chña patrra soctape'chuen allohuenes, attochña e'ñech cohuen sentannena. Yomporepa'ch sa'nataya ñeñŧara Yompor ñeñŧ atarr amorrentña ñeñŧña atarr yocshatene' yeyočhro.

¹² E'ñe semorrentanna'teñoŧpa' atetcha' sehuomñcha'tanna'tena ñeñŧ atet poctetsa Partsocop.*

¹³ Ñaña arrpa' allohuen ñeñŧ o' pueyochresha' perr Parets, ñetpa' mueneñet o'ch huomñcha'taset ñamet arr necartoŧ.

¹⁴ Yepartsesharepa'chña Jesucristo sebensare'tamñpene' allohuenes, ñaña Yomporepa'chña semorrentaya attoch semorrentannena samña, ñaña Puecamquëñepa'chña sechorrenaya attoch e'ñe separrocmatuahua allohuenes epas Cristo. Te'pa' ñeñŧach notas, ñeñŧpa' attetepa'chña Nompore. Allohua.

Pablo

* **13:12** Po'ñočh oteneŧ, "E'ñe semorrentanna'teñoŧ čhoch setso'tstsa'pa'tannena ñerra'm esempo sehuomñcha'tanna'tena ñeñŧ atet poctetsa Partsocop." Ñeñŧpa' atet yechete't ahuat.

AÑ SAN PABLO PO' CARTA ÑEÑT̃ QUELLCAN GALACIO' MARNESHA' GÁLATAS

Atto Pablopa' quellcan carta añecop ñeñt̃ ame'ñetsa anetso Galacio

¹⁻² Masheñneshacha' ñaña noçhaneshacha' ñeñtes allohuenes same'ñeñoŋ apçha'yetsa allemeñ anetso Galacio'mar. Na Pablon sequellquene'ña añ carta ñeñten Jesucristo puellsensaren. Napa' ama acheñeye' nellensenaye, Jesucristoña nellensene' epuet Pompore Paretts ñeñt̃ tantaterre' Puechemer rromot̃. Ñaña allohuen masheñneshachno ñeñt̃ parro arro'tsenen, ñetpa'çho'ña mueneñet o'ch huom̃cha'taset ñamet añ necartot̃.

³ Te'pa' e'ñe nehuom̃cha'teñotes o'ch notas: Yomporepa'chña sebensare'tam̃pene' ñeñt̃ atarr Paretts epuet Puechemer Jesucristo ñeñt̃ Yepartse-shar yepen. Ñetepa'chña socshatene' e'ñe sa seyoçhro allohuenes.

⁴ Ñeñt̃ara Jesucristo ñeñt̃ e'ñe pocte' ente' o'ch rroma yo'chñarecop attochña yapa' cohueno'tseneycha' ama't añ patsropa' sosya'tsaño'tsenya, tarro'mar ñeñt̃pa' atet pocte' eñch Pompore ñeñt̃ara Yompore ñeñt̃ nanac Paretts.

⁵ Ñeñt̃ara Paretspa' aye'choçhtaterrapo'ch e'ñe tayoteñ errponohuañen. Ñeñt̃pa' attetepa'ch Nompore.

All eñotatanet atto ama eñalle po'poñ alloch yequeshperra

⁶ Te' napa' o'ch notas: Eso'mare'tña e'ñe mamecmapa' o' alla soctape'chyerr po'poñ. Sapa' çha semneñ o'ch sequeçhpuer Yompore ñeñt̃ o' hua'ñerres o'ch same'ñerrñaña Puechemer Cristo ñeñt̃ rromats attoch sequeshperra. Tarraña sañapa' çha semneñ o'ch alla soctape'cherr po'poñ ñeñto'ch sa'queshpaterrayeñ.

⁷ Po'ñoçhpa' ama't ama eñalle po'poñ alloch yequeshperrapa' añña ñeñt̃ huapyetsa seshopa' ñetpa' çha mueneñet o'ch alla moññe'taterrset soctapña. Ñaña ñetpa' mueneñet o'ch a'po'poñetonaset soctapña ñeñt̃ cotapñats po'ñoçh alloch yequeshperra e'ñe yame'ñeñoŋa Cristo.

⁸⁻⁹ Tarraña napa' o'ch notas: Ama't erra'tsencha' seserrpare'tate' po'poñ cotapñats ñeñt̃ ama ñeñtarayaye ñeñt̃ atet o' same'ñerra ahuañapa' ñeñt̃ acheñerpa' amuepa'ch yenpueñe Yompore. Ama't yapa'çho'ña ñerra'm o'ch alla yeserrpare'taterrser ello ñeñt̃ ama ñeñtarayaye ñeñt̃ atet o' neserrpare'tatuas ahuaña ñeñt̃ po'ñoçh alloch yequeshperra yapa'çho'ña amuepa'ch allo'na yenpa'nenye Yompore. Ñaña ama't añ atet patsa ñeñt̃ Yompore po'millañoŋeñer entoŋpa' ama't ñapa'çho'ña amuepa'ch yenpueñe Yompore. Ama't ñeñt̃pa' o' notuaseñ ahuaŋoteñpa' tarraña te'pa' o'ch alla noterrser, amuepa'ch yenpueñe Yompore ñeñt̃ atet patsa.

¹⁰ Te' sapa' señotenen napa' ama añecpaye' notenso attoch cohuen entenen acheñ, añña nemnen o'ch cohuen entenen Yompore. Ñaña ama acheñeneshaye' nemneno o'ch nocshach tarro'mar ñerra'm añña orameñ nemneñ o'ch nocshach acheñpa' ñeñteñapa' amate' erroŋeno noto napa' pueyocher penen Cristo.

Atet pa Pablo allempo errte' allsensareterra

11 Napa' nemneñ masheñneshacha' ñaña noçhaneshacha' o'ch señoçh ñeñt atet neserrpare'tatas ahuañapa' ñeñtpa' ama acheñoyaye poçtaþña alloch yequeshperra.

12 Napa' ama acheña neñotatenaye atet, ñaña napa' ama esesha' neyçhatenaye. Añña e'ñe Jesucristo ñaña e'ñe neñotatene' atet.

13 Sapa' o' se'mare'tuan atet nepe't ahuañmo'cha allempo noctoñe't judionesha' poçtaþña. Napa' allempo nanac noctare'che't ñeñt ame'ñenaya Yompor. Napa' atarrcha' nemne't o'ch na'cclatuanet.

14 Napa' e'ñe netsotoñe't judionesha' poçtaþña. Napa' ello nemtana'tue't shonte' nacmanesha' judionesha' ñeñt parro neyemte't. Napa' nanac nema'yoçhroñe't judionesha' poçtaþña ñeñt atet yeche't ahuañneshañ, ñaña ñeñtara atet yeçhatyesete't ñaña puechemereshañ.

15-16 Tarraña Yomporpa' ahuo't acrerren ahuañoteñ ama't allempo ama ne'ñalletena'. Tarro'mar allempo çhap allempoch eñotaterrenpa' o' yemtater-rna Puechemer ñeñtara Jesús. E'ñe puemuereñoen nanacpa' o' çhore'terren attoch nach serrpare'te' po'ñoñ allo'tsa'yen ñeñt ama judioneshayaye. Ñaña allempo e'ñe pocte' enteñ Yompor o'ch eñotaten atetpa' napa' ama esesha' na'þto'to ama't puesheñarra.

17 Ñaña ama't Jerusaléñapa' ama neto o'ch nenteña' ñeñt allsensareñnesha' ahuañoteñ. Elloña napa' arra ahuen all oteñet Arabia, allpa' ama acheñempañooyaye. Allñapa' all na'llponmatena' e'ñe alla; allotñapa' alla nepuerrerra Damasco.

18 O'ña met ma'pa char allempañapa' ahuen Jerusaléño o'ch nenteña' masheñ Pedro.* Allñapa' alla na'pa ñesho çharramat puechena amnarmat.

19 Tarraña allempo allo'tsenenpa' ama nenteño po'psheññeçhno ñeñt allsensareñnesha', ñapña nenteña' masheñ Jacobo† ñeñtara ñeñt pa'mo'nasheñ pen Yepartseshar Jesús.

20 Po'ñoçhpa' ama't Yomporpa' eñotenen ñeñt atet notenespa' ñeñtpa' e'ñe po'ñoçh atet.

21 Allempoña nerr, arr nasuanerr Sirio'mar ñaña Cilicio'mar.

22 Tarraña ama't allempo ñeñt ame'ñenaya Cristo all Judeo'marpa' ñetñapa' ama eseshaye' nechme'tenaye.

23 Tarraña ahuo't e'mare'chet ñeñt coñare'tahuete't ahuaña te'ñapa' o' serrpare'terren attoch yame'ñerra ñeñtara coñapñats ñeñt çhocma mueneñ ahuaña o'ch huapore'tater.

24 Ñeñto'marña te'pa' e'ñe no'marpa' nanac aye'choçhtateññañet Yompor.

2

Atto po'psheññeçhno allsensareñnesha' e'ñe pocte' eñchet Pablo

1 Allempoña o' meterrerr çharra' char puechena pa'tatspa' o' alla ahuerrnerr Jerusaléño epan ñaña masheñ Bernabé. Ñaña o' nanem masheñ Tito.

2 Napa' ahuerrnerr alla tarro'mar atet oten Yompor. Allempoña neçhap Jerusaléñopa' neserrpare'tatosanet ora allohuen ñeñt atet o' neserrpare'tatue' ñeñt ama judioneshayaye. Neñotach ñaña jerusaléño'marnesha' ñeñt atet neserrpare'tatyeñ acheñenesha' e'ñe yame'ñeñoña Cristopa' o'ch yequeshperra. Nehua, ñanompa' neserrpare'tach ñeñt añcha'taretetyetsa Jerusaléño e'ñe ñapñeto. Napa' tarro'mar notanet

* 1:18 Añ Pedropa' ñeñtara otenet Cefas. † 1:19 Jacobopa' ñeñtara ñeñt sochenet Santiago.

atet allochñapa' attoch neño'ch ñato' pocte'ch entapretnet ñeñt atet nepena, allochñapa' atto neserrpare'tatyenpa' amate' e'ñe orrena neserrpare'tyeno.

³ Allempoña neserrpare'tatuanet atetpa' e'ñe pocte' eñchet ñeñt atet neserrpare'tyen. Ñeñto'marña ama't allo'tsen masheñ Tito ñeñt ama judioneshayayepa' ama't e'ñe puesheñarroñetapa' amaña eseshaye' notaye netsor-rachepa'to' masheñ Tito tarro'mar ñapa' ama judioneshayaye.*

⁴ Tarraña ama't allempopa' ama eñallñeña ñeñt torrapo' yentyenpa' añña puesheña'tetspa' o' huapyesa yesho. Ñaña ñetpa' ama't otenetañ ahuo' ame'ñerret atet ñerra'm ya tarraña e'ñe a'nahuapa' mueneñetañ ahuo'ch non-ayet ñoñets ñeñt nanac torrapo' yenten. Ñetpa' añecpa huapuet a'nahua o'ch e'monayet atto yapa' yoten e'ñe yame'ñeño'ta Cristo Jesús'pa' o'ch yequesh-perra. Tarraña ñetpa' añña mueneñetañ o'ch alla nerrnayet judionesha' pocta'ña ñeñt nanac torrapo' yenten.

⁵ Tarraña yapa' ama yemnataneto ama't e'ñe mamesha, tarro'mar yapa' ama yemno o'ch alla ya'po'poñeta'mperres ñeñt cohuen ñoñets ñeñt e'ñe po'ño'ch alloch yequeshperra.

⁶ Allempoña neñotach amcha'taretnesha' ñeñt Jerusaléno'tsa'yen ñeñt atet o' nepohuapa' tarraña amaña erro't otneto ñeñto' nepalltena ñeñtcha' atet neña. Ñehua, po'ño'ch napa' ama nepallteno o'ch e'mñotaten amcha'taret tarro'mar ama ñap'ta amcha'taret pocte' entenoña Yompor. Ñeñto'marña ñeñt pa'mcha'taretneshar penet ñeñt ame'ñetsa amaña erro't otneto ñeñto' nepalltenmeñ ñeñtcha' atet neña.

⁷ Añña ñetpa' e'ñe pocte' entnet, tarro'mar o' eñochet napa' po'ño'ch allsen-sareten o'ch neserrpare'tach acheñenesha' cohuen ñoñets, ama't ñeñt ama judioneshayaye. Attecma ñaña masheñ Pedro allsensaret o'ch serrpare'tan cohuen ñoñets judioneshacop, napa'cho'ña attecma allsensareten o'ch neserrpare't cohuen ñoñets añecop ñeñt ama judioneshayaye.

⁸ Tarro'mar ñeñtara Yompor ñeñt llesense' Pedro o'ch serrpare'tatan judionesha', napa'cho'ña ñeñtara Yompor ñeñt nellsense' namña o'ch neserrpare'tach ñeñt ama judioneshayaye.

⁹ Ñeñto'marña ñeñt amcha'taretetyetsa atet ñerra'm masheñ Jacobo ñaña masheñ Pedro ñaña masheñ Juanpa' ñetpa' e'ñe eñochet po'ño'ch napa' Yompor o' yenpuerren. Ñeñto'mar ñetpa' e'ñe cohuen agapyet epan masheñ Bernabé. Pagapueño'tetaypa' orratyet pot po'cohuenro't attoch yeñotanna'ta e'ñe attecma yoctape'chen Yomporcop. Allempoña ñetpa' e'ñe pocte' entyet yeserrpare'tachepa'to' ñeñt ama judioneshayaye, atet ñerra'm ñetpa' o'ch serrpare'tachet ñeñt judionesha'.

¹⁰ Ñetpa' añña paterr otyet, es yapa'yese'pa'to' huocchañneshachno; ñeñtña ama't napa' e'ñe pocte' neñch namña.

Allempo Pablos' muene' che'ptare'tan Pedro

¹¹ Tarraña allempo chap ñaña masheñ Pedro Antioquíopa' napa' cha muene' neche'ptare'ch allempo yeserrpare'ten parro, tarro'mar allempo ñapa' añ pa ñeñt ama pocteyaye. Ñeñt'pa' atet pa,

¹² allempo e'ñe erre't chets masheñ Pedro Antioquíopa' ñapa' allenta rrallme'chapretosan ñeñt ama judioneshayaye. Tarraña allempoña cha'cha't

* **2:3** Añ ñoñets "atsorret", añ ñeñt otets atet yeche't judionesha'. Ñeñt'pa' atet: Ñerra'm allempo eñalletena asheñorrofollesha' ñeñt e'ñe judionesha'pa' añña pomporpa' o'ch tsorrateñet po'chtso. Ñehua, ñeñt tsorratenetpa' ematollach o'ch chapa'muen po'psocmatño. Ñehua, po'chtso allcha' tsorret asheñorrofo'ppa' all e'ñech poteretollo e'ñe poñof pa'rmatollo.

ñaña puesheña'tets ñeñt huetsa masheñ Jacobueshotpa' allempoña masheñ Pedropa' o'huañ rrallme'chapretan ñeñt ama judioneshayaye, tarro'mar ñapa' añ mecha'ten ñeñt cotene' judionesha' poctapña. Ñeñto'marña e'ñe allempopa' o'huañ rrallme'chapretanet, ñaña o'huañ yemtanet.

¹³ Añpa'cho'ña judionesha' ñeñt ame'ñetsapa' ñetpa'cho'ña o' atet ña'yeset ñamet ñeñt atet pena masheñ Pedro. Ñeñto'marña allempopa' ama't masheñ Bernabépa' o' p̄achet ñaña ñeñt atet penet ñet. Po'ñoçhpa' ama't eñoteñetañ ama atet āpapahuo.

¹⁴ Tarraña allempo nentanet ama e'ñe paçharroye' peneto ñeñt cohuen ñoñets ñeñt po'ñoçh Yompor po'ñoñ allempoña napa' atet noch masheñ Pedro e'ñe allo'tsa'yen allohuen acheñenesha', ñeñtpa' atet noch: "Papa' ama't judioneshapeñpa' tarraña o' pēohua ñeñt atet pena ñeñt ama judioneshayaye, te'ñapa' eso'mare'tña p̄añapa' pemneñ o'ch penoñña ñeñt ama judioneshayaye añ ñoñets ñeñt atet anaret judioneshacop ñeñt ama't p̄apa' ama atteye' pepeno atet anaret añ ñoñets."

Ama't judionesha'pa' e'ñech attecma a'queshp̄atare'tterret ñerra'm ame'ñeretcha' Jesús

¹⁵ Yapa' e'ñe judiona'tareshot e'ñalletñay. Tarraña yapa' ama atteyayye ñerra'm ñeñt ama judioneshayaye ñeñt nanac ochñañ.

¹⁶ Tarro'mar ya ama't judioneshaypa' yeñoteñ e'ñe yame'ñeñoña Jesucristopa' o'ch pocte' enterrey Yompor, ñeñtpa' ama añoteyaye o'ch e'ñe yēohua ñeñt atet anaret judioneshacop. Añña e'ñe yame'ñeñoña Jesucristopa' o'ch pocte' enterrey Yompor, ñeñto'marña o' yame'ñera Cristo, tarro'mar yeñoteñ e'ñe yetsoteñoña ñeñt atet anaret judioneshacoppa' amach pocte' enterrye Yompor ama't puesheñarroteya.

¹⁷ Ñaña te' yapa' e'ñe yame'ñeñoñ Cristopa' yeñoteñ e'ñech pocte' enterrey Yompor. Tarraña ama't atarr yeyemteñapa' çhocmach yentena yapa' ochñaŕey. Ñeñto'marña sapa' çhate' sotenapañ Cristopa' ñeñtfe'ña ochña'tatañtetsa. Tarraña ñeñtpa' amaca'ye atteyaye.

¹⁸ Tarraña ñerra'm o'ch alla yoctape'cherrerr ora allohuen ñoñets ñeñt atet anaret judioneshacop ñeñt o' yepuesuanom ahuañapa' elloña allempopa' o'ch alla yenterra yapa' nanac ochñaŕey.

¹⁹ Tarro'mar ñeñt ñoñets ñeñt atet anaret judioneshacop ahuatpa' te' napa' neñoteñ ñeñtpa' ama añecpayaye attoch o'ch ya'queshp̄aterra yañeña. Ñeñto'marña ya ñeñtey o' yame'ñera Cristo yapa' o' ya'ypo'ñamper attochña te'pa' o'ch yocrrerra cohuen Yomporcop e'ñe yeyoçhrohuen.

²⁰ Ñeñto'marña yapa' o' yequeçhpa'huerr atet muenatse'tatyesye't yechets. Ñeñto'marña o' e'ñe atet yeperra ñerra'mrate' o' corso'tam̄perryet epay Cristo. Te'pa' ama't ora yocrrenañpa' tarraña ama yaye' corretso, añña Cristo ñeñt yechorrenayapa' ñeñtña corretsa te' yechtso. Te'pa' e'ñe yeyemteñoñ Yompor Puechemerpa' yocrrena e'ñe cohuen arr patsro, tarro'mar ña yemor-renterraya, ñaña ña rromats yocop.

²¹ Ñeñto'mar te'pa' ama yemno o'ch yehuapore'terrñañ Yompor puemuereña atto apuey Puechemer alloch yequeshperra. Tarro'mar ñerra'm eñalleñ attoch yequeshperrañ e'ñe yetsoteñoña ñoñets ñeñt atet anaretpa' ñeñtepnapa' atto rroma Cristopa' amate' es sherbeno.

3

E'ñe yame'ñeñoña Cristopa' o' yequeshperra, ama añ yetsoteñoñe ñoñets ñeñt atet anaret judioneshacop

¹ Sapa' nanac galacio'marneshacha' sepanteñ. Po'ñoçh sa o'ca'ye çha shecaset attoña te' sapa' o'huañ same'ñenaña ñeñt e'ñe po'ñoçh alloch yequeshperra. Ama't ahuaña allempo yeserrpare'tatensa'pa' yapa' añ yeñotatuas atto po'ñoçh Jesucristopa' o' acorso'tamñpsareta e'ñe yocop. Ñeñña po'ñoçh same'ñaña sa allempo.

² Ñeñto'marña te'pa' nemneñ o'ch neñotatas ama't añ pa'terr ñoñets: Sapa' e'ñe seyemteñoñ ñeñt Cristo po'ñoñ attoña chorrasaña Parets Puecamquëñ. Amaña añoñeye' chorraso e'ñe setsoteñoñ añ ñoñets ñeñt atet anaret judioneshacop.

³ Eso'mare'tña sapa' nanac sepanteñ. Atto sa ahuañapa' añ seyemtena Parets Puecamquëñ ñeñt ahuañencañ añaña' eso'mare'tña te'ñapa' o'ch alla seyemterrerr e'ñe sañaña setsotateñ.

⁴ E'ñehuachñaca' orrena atarr semueroçhetyesa. Po'ñoçh ñato' ñeñt'pa' amate' e'ñe orrenayaye ñerra'm o'ch alla soctape'cherr cohuen.

⁵ Ñaña allempo Yomporpa' chorrata Pucamquëñpa' ñapa' añ orrtatonas partsoteñets e'ñe sesho. Ñehua, ñeñt'pa' amaca'ye añoñeye' orrto e'ñe sa setsoteñoñ ñeñt atet anaret judioneshacop, ñeñt'pa' añoñca'yeña orrta e'ñe same'ñeñoña ñeñt atet yeserrpare'tatuas.

Abrahampa' e'ñe pueyemteñoñ Yomporpa' o' pocte' eñch Yompor

⁶ Ñehua, Abrahampa' nanac yemtane't ñeñt atet och Yompor, ñeñto'marña Yomporpa' e'ñe pocte' eñche't.

⁷ Ñeñto'marña yeñoteñ ñeñt nanac yemtenaya ñeñt atet oten Yompor ñeñña Yomporpa' e'ñe pocte' enteñ atet ñerra'm puechemereshanet Abraham.

⁸ Yomporpa' e'ñe eñotue't ahuañoteñ ama't ñeñt ama judioneshayayepa' o'ch ame'neret esempo, ñaña e'ñe pame'ñeñoñetpa' pocte'ch enterranet. Ñeñto'marña ama't ahuañoteñpa' e'ñe anuaret po'ñoño. Yomporpa' atet otan Abraham: "E'ñe peshotpa' o'ch nebensare'tamñpes allohuen pa'namen achen." Ñeñto'marña yeñoteñ ama't ahuañoteñ Yomporpa' serrpare'tatane't Abraham ñeñt cohuen ñoñets alloch yequeshperra.

⁹ Ñeñto'marña yeñoteñ te'pa' allohuen ñeñt ame'ñenaya Cristopa' e'ñe attecma cohueno'tsenacma atet ñerra'm Abraham ñeñt nanac ame'ñaye't Yompor ahuañ.

¹⁰ Tarraña allohuen ñeñt yemtenaya ñoñets ñeñt atet anaret judioneshacop o'ch e'ñe etsotuet ñetñapa' o' anarettet allohuenetpa' a'coñchatare'tetcha' tarro'mar atet anuaret Yompor po'ñoño ama't ahuañoteñ, ñeñt'pa' atet oten: "Allohuen ñeñt ama etsotuenaye e'ñe poctacma allohuen allpon ñoñets ñeñt atet anaret quellco, ñaña ñerra'm ama ñohueto allohuen ñeñt atet anaretpa' a'coñchatare'tetepa'ch."

¹¹ Ñeñto'marña yeñoteñ amach pocteye' enterrye Yompor e'ñe yemneññoña o'ch yetsotua añ ñoñets ñeñt atet anaret, tarro'mar amach errotenoñ yetsotuo ora allpon ñeñt atet anaret. Ñeñto'marña ama't puesheñarroñeyapa' amach pocteye' enterrye Yompor. Ñeñto'mar ama't Yompor po'ñoñopa' atet anuaret ahuañoteñ, ñeñt'pa' atet oten: "E'ñe yeyemteñoña Yompor ñapa' o'ch pocte' enterrey attoch ello yocrrerra errponhuañen."

12 Tarraña ñeñt ñoñets ñeñt atet anaret judioneshacoppa' ama atteye' oteno, ñeñtpa' atet oten: "Ñerra'm yepohuencha' e'ñe poctacma ñeñt atet anaretpa' esheccha' ello yocrrerra errronohuañen."

Cristopa' e'ñe pocte' eñch attoch ñach arrnomarettatsa yocop

13 Ñoñtsopa' ama't o'patatenyañ coñcheñets tarraña Cristopa' ñaña coñcherntsa e'ñe yocop attochña yapa' amach yecoñcherro. Ñeñtpa' yeñoteñ tarro'mar ama't ahuatoteñpa' atet anuaret Yompor po'ñoño, ñeñtpa' atet oten: "Ama't erra'tsena acheñer puepencateñme'chatset cho echañchet tsachopa' ñeñtpa' a'coñchatareñcha' entyes acheñenesha'."

14 Ñeñto'marña yeñoteñ e'ñe pame'ñeñotet Jesucristopa' o'ch eñalleta attoch Yomporpa' e'ñech pocte' entanet ñamet ñeñt ama't ama judioneshayaye, attecma pe't ahuatoteñ Yompor e'ñe pocte' entane't Abraham. Ñaña e'ñe yame'ñeñotpa' attoña eñall attoch chorrerrya allohueney Parets Puecamqueñ, atet Yomporpa' otan ahuat Abraham.

Ñeñt atet Yomporpa' otan ahuat Abraham ñeñtcha' atet poñ

15 Ñehua, masheñeshacha' ñaña nochaneshacha' te'pa' o'ch alla neñotaterrser po'poñ. Ñehua, ñato' o'ch netma'ntacha ñeñt atet yocrrena añ patsro. Atet ñerra'm puesheñarr yacmapa' o'ch a'poctachet epuet po'psheñeñ, o'ch quellcatet, allotpa' o'ch quellca'huet pa'so'cheñ all, allochñapa' amach errotenot esesha' a'po'poñeterroye po'ñoñ ñeñt atet o' quellcatuet, ñaña attoch amach esesha' huapore'terroye po'ñoñ. Atet yepena yaña ama't acheñaya atet petsa ellohuate'ñaca' Yomporpa' ama pueno po'ñoñ.

16 Yompor ahuatpa' atet otan Abraham ñeñtcha' atet poñ e'ñe puesheñarrof po'mrenñoñ. Tarraña ama allohuenaye' po'mrenñecop atet oche, e'ñe puesheñarrocpa atet och, ñeñtpa' yeñoteñ ñeñtara ñeñt Cristotats. Ñeñtpa' attecma oten ama't ahuatoteñ Yompor po'ñoñ.

17 Añmapa' ñeñtña atet neychatenes. Ñehua, yapa' yeñotueñ atto Yomporpa' a'poctachet ama't ahuatoteñ epuet Abraham. Alloñtña' allempo o' met cuatrocientos treinta charpa' allempoñapa' chap allempoch anaretta añ ñoñets judioneshacop ñeñt atet quellcanet Moisés. Tarraña ama't o' anaretta añ ñoñets ñeñt quellcanet Moiséspa' tarraña ñeñtpa' yeñoteñ amach erroteno huapore'tatereto ñeñt atet o' anaretetua ñeñt atet o' a'poctatua Yompor epuet Abraham ama't ahuatoteñ, tarro'mar Yomporpa' ama puenesho po'ñoñ.

18 Ñaña ñerra'm eñalleñ attoch yequeshperrañ e'ñe yetsoteñoña añ ñoñets ñeñt atet quellca' ahuat Moiséspa' ñeñtpeñapa' amate' palltenañe attoch Yomporpa' otan ahuat Abraham o'ch eñalleta e'ñe ña po'mrenñoñ puesheñarr ñeñtcha' ya'queshpaterre' e'ñe yame'ñeñoña ñeñt atet oteney.

19 Añ ñoñets ñeñt atet net allempopa' ñeñtpa' atet pa: Yomporpa' ahuo't mueñan po'mllañoñeñnashar attoch ñetpa' o'ch eñorana'chet Moisés attoch ñach a'mte' añ ñoñets judioneshacop. Tarraña añ ñoñetspa' e'ñe tarremphua sherba' allempo huapa Cristo atet Yompor otan ahuat Abraham. E'ñe po'ñoñch yame'ñeñoñ a'queshpaterreycha'. Te' ellonetpa' o'ch neñotatas ñeñtécop nanña ellonet Moisés po'ñoñ. Ñehua, ñeñtpa' añecpa anaretta attoch yeñoñch ñeñt allpon ochña'teñets enten Yompor ñaña attoch ñeñtcha' yeñotatene' ñerra'm esempo o' yepohua ñeñt ama pocteye' enteno Yompor.

20 Tarraña allempo Yomporpa' eñorana'tana Abraham ñeñtcha' atet poñpa' allempopa' e'ñe ña ote' allame'tets. Allempo Yomporpa' ama esesha' oto po'psheñeñ ñeñtcha' a'mtahuet añ ñoñets.

Añ ñoñets ñeñt atet anaret ahuatoteñ judioneshacop añecopña sherben ñeñtcha' yame'ñaterraya Cristo

²¹ Ñehua, ñato' sapa' o'ch soten, ñeñtepñapa' añ ñoñets ñeñt atet quellcanet Moiséspa' ta', cho'e' epatenan Yompor po'ñoñ ñeñt atet otan ahuañ Abraham. Ñeñtpa' amaca'ye atteyaye. Tarro'mar ñerra'm eñalleñ e'ñech ñoñtsoña ñeñt atet anaret o'ch etserrataterrnayeñ cohuen yeyo'cher Yomporecoppa' amate' palltenañeña po'poñ attoch pocte' enterrey Yompor; ñeñtpa' e'ñete' ñoñtsoña ñeñt atet anaretpa' o'ch pocte' enterryeñ Yompor, tarraña ñeñtpa' ama atteyaye.

²² Tarro'mar Yompor po'ñoñ ñeñt anuaret ahuatoteña' oteney, allohueneypa' e'ñe yo'chña'tuen, amach errotenoñ e'ñe yetsotuoñe ñeñt atet anaret Yomporecop. Ñeñto'marña ñeñtpa' ama añecpayaye alloch yequeshperra. Añña e'ñe yame'ñeñoña Jesucristopa' o'ch yequeshperra, ñeñtara Cristo ñeñt atet Yomporpa' otan ahuañ Abraham.

²³ Ahuañ allempo ama huena' Cristo ñeñtcha' yame'ñerrapa' amach errotenoñ ya'ypo'ñerro añ ñoñets ñeñt atet anaret. Atta yepe't tarremphua allempo huapa Cristo attoña e'ñe yame'ñeñoña ñapa' o'huañcha' allo'na añcha'noçhta ñoñets yocop.

²⁴ Ñehua, ñato' o'ch netma'ntacha atet. Añ ñoñets ñeñt atet anaret judioneshacoppa' ña yecuañpsaye't ahuañ. Ñeñtpa' tarremphua atet pa' allempo huapa Cristo, ñaña añ ñoñetspa' añecpa sherba' attoch ame'ñaterraya Cristo, allochñapa' e'ñe yame'ñeñoña ñapa' o'ch pocte' enterrey Yompor.

²⁵ Tarraña te'ña o' yame'ñera Cristopa' ama yepallteno ñeñtcha' allo'na yecuañpse'.

E'ñe yame'ñeñoña' atetcha' enterrey Yompor ñerra'mrrate' e'ñe puechemerey Abraham

²⁶ Tarro'mar te'pa' e'ñe yeparrocmateñoñ Cristo Jesúspa' o'ch puechemerperrey allohueney Pompor, tarro'mar e'ñe yame'ñeñoñ Puechemer.

²⁷ Ñaña allohuenes ñeñtes o' sapataretterra e'ñe same'ñeñoñ Cristopa' o' chorrerrsa Cristo.

²⁸ Ñaña te'pa' e'ñe yeparrocmateñoñ epay Cristo, Yomporpa' ama po'poñe'ttsoçmaye' entenye, e'ñe attecma enteney allohueney, ama't judionesha', amapa' ñeñt ama judioneshayaye, amapa' ñeñt ataruasataret e'ñe atta, amapa' ñeñt ama ataruasatareteye e'ñe atta. E'ñe attecma enteney allohueney ama't asheñorrey, ama't ñaña coyanesha'. Tarraña Yomporpa' e'ñe attecma enteney. Tarro'mar e'ñe yeparrocmateñoñ epay Cristo Jesús e'ñe puesheña'ttsoypa' o'ch e'ñe yeparrocmatua allohueney e'ñe parro.

²⁹ Ñaña ñerra'm yapa' Cristona'tareypa' añña Yomporpa' e'ñe atet enteney ñerra'mrrate' po'ñreneñ peney Abraham. Ñeñto'marña yapa' o'ch yagapapreter ñeñt atet Yomporpa' otan ahuañ Abraham ñeñtcha' atet a'nacha.

4

Atto Cristopa' a'huañamperran acheñenesha' atto añcha'noçhtanete't ahuañ ñoñets ñeñt atet anaret

¹⁻² Ñeñt notenespa' ñato' o'ch netma'ntacha atet. Ñerra'm puesheñarr yacma eñall puechemer, esempoña o'ch po'nerr allempoch o'paterrana ora allpon echen pompor. Ñehua, ama't yeñoteñ ñapa' o'ch o'paterrana ora allpon echen pomporpa' tarraña allempo ama po'nena'pa' amach es o'patena' ama't coñe'ta. Ñaña allempo ama po'nena'pa' amach errotenoñ es pa'yesoña e'ñe

ñoña, tarro'mar allempopa' chocma eñall puesheñarr ñeñt cohuanpene', ñaña allempopa' chocmach es tsa'teññañet ñeñt cheshar. Allempoña atet penapa' chach ottena ñerra'mrrate' atta ñañreteñet, ama't ora allpon echeneñ pomporpa' ñocpañ. Tarraña esempoña chap pompor ponañcho allempoch po'n puechemerpa' allempoñapa' o'ch agapan ora allpon echen pompor.

³ Ñeñtpa' atet yepe't yaña ahuať. Allempopa' atet yepe't ñerra'mrrate' cheshanasha'. Ñaña allempopa' aña yame'ñataye't ñeñt poctaþña þa'yese't ahuaťnanesha' arr patsro.

⁴ Tarraña allempoña o' etsota allempo onañche' ahuať Yomporpa' o' mueñonay Puechemer arr patsro. Arrñapa' eñalletach puesheñarr coyanesha' ñeñt judiona'tar. Añña ñoñets ñeñt atet anareť judioneshacoppa' nanac amcha'nochte't allempo ama't ñocop.

⁵ Tarraña Cristopa' añecop eñalleta attoch a'huañañperrey atto amcha'nochtena añ ñoñets yocop. Ñeñtpa' añecop atet þa attoch puechemer perrey Yompor.

⁶ Te'ña Yomporpa' o' puechemer perrey ñeñto'mar o' mueñernay Puecamquëñ ñeñtcha' yeçherrtsa yeyochro. Ñeñña Puechemer Puecamquëñpa' ñeñtcha' yeñotatene' ñerra'm esempo yeçhore'ch ama't Paretspa' e'ñe pocte' o'ch yoch, "Apa."

⁷ Ñeñto'marña te'pa' yeñoteñ o' puechemer perrey Yompor, ama pueñañrayaya penye. Ñeñto'mar yeñoteñ ñerra'm po'ñoçh o' puechemer perrey Yompor, yapa' yo'patapreterach ora allpon o'patatenya te' Yompor.

Ñerra'm yapa' o'ch alla yeyemterrerr añ ñoñets ñeñt atet anareť judioneshacoppa' ñeñtpa' e'ñech orrena nanac yetorrerra

⁸ Ahuať allempo ama señoterra' ñeñt e'ñe po'ñoçh Yomporpa' aña seyomporer sepe't ñeñt po'ñoçh ama Yomporeyaye. Sañapa' ñeñta nanac ame'ñatasete't.

⁹ Tarraña te'pa' o' senterr ñeñt e'ñe po'ñoçh Yompor, amapa' ñato' o'ch yot, Yomporpa' o' enterres sa. Te'ñapa' eso'mare'tña semneñ o'ch alla sepuerterra, o'ch alla same'ñerra añ coþañats ñeñt ama es sherbeno sañapa' allo'ch po'ñoçh sequeshperra. Eso'mare't semneñña o'ch alla seťorrerrerr nanac ñeñt e'ñe orrena.

¹⁰ Ñaña sapa' chocma sonañcha'yen yet ñeñtcha' atet setsotayen atto'ch sequeshperrañ—pueña'tets arrorr, ñaña pate'tets char, amapa' allempo chocma coshena judionesha'.

¹¹ Ñeñto'marña nellquëñoþpa' atet noten, ñeñt atto netorrrena ahuaña so-coppa' ñato' amach es sherberro.

Arrpa' all yerpatanet atto ñetpa' e'ñe cohuen agapet allempo ñanom asena' Galacio

¹² Te'pa' o'ch masheñneshacha' ñaña noçhaneshacha' notas, atarr nemneñ o'ch soctape'cherr atet noctape'chen na. Tarro'mar napa' o' na'ypo'ñerrñañ judionesha' poctaþña. Te'pa' o' noctape'cherr ñeñt atet sepe't ahuať sa, allempo ama soctape'cherrñaña' judionesha' poctaþña. Ahuañmo'cha allempo allo'tsenen seshopa' e'ñe cohuen semuera'ne't.

¹³ Sapa' seño tuenen atto napa' allempo ñanom neçhap seshopa' napa' cha natsna'tos ñeñto'mar allempopa' eñall attoch neserrpare'tatas añ ñoñets alloch yequeshperra.

¹⁴ Ñaña ama't añ atsnañsorpa' nanac sosey nenteña' tarraña sapa' ama setsena'tno, ñaña ama sa'ypo'ña'no. Elloña sapa' o' sagapuen e'ñe cohuen

atette'ña ñerra'm Yompor po'mllañoñeñer huetsa sesho, ñaña e'ñe atet saga-puen ñerra'mrrate' ñaña Jesucristotets.

¹⁵ Ñehua, te'pa' eso'mare'tña o'huañ tama socsha'na. Ahuañmo'chapa' nanac semuera'ne't, ñaña allempopa' ama't esa nepalltapa' sañapa' o'ch'cho' sapuen, ñaña ama't añcha' nepalltañe't necle'pa' napa' neñotenes ñerra'm errotenot serrotañ secle'pa' ama't ñeñtpa' ñeñfte' sapnoñe't.

¹⁶ Ñato' sapa' chate' sotenapañ chote' o' ne'moñe'tas, tarro'mar napa' o' neserrpare'tatas ñeñt e'ñe po'ñoçh atet noten.

¹⁷ Po'potantañ ñeñt seychatene' judionesha' pocta'ñapa' ama't nanac ma'yochrenetañ socoppa' tarraña ñeñtpa' ama añecpayaye attoch yenpaset e'ñe po'ñoçh. Ñetpa' añecpa mopa'tenset attoch o'ch socshapretanet nanac e'ñe ñañeñeta.

¹⁸ Ñehua, napa' e'ñe pocte' nenteñ o'ch yemneñ acheñenesha' o'ch coshapretenyet ñerra'm po'ñoçh añecop yema'yochrena attoch yeyenpanet e'ñe po'ñoçh. Atet napa'cho'ña nemneñ chocmach socshapretna ama't allempo ama allo'tsenye parro.

¹⁹ E'ñe nemorrenteñoñes atet nentenes ñerra'mrrate' nechemereshas, ñaña te'pa' alla nemueroçhterrerr socop. Atet nanen atserr atette'ña coyanesha' atsotenaya pue'mar. Tarraña napa' chocmach nemueroçhta esempohuach e'ñe chorrasa Cristo, attoch ñach soctape'chaterre' e'ñe poctacma cohuen.

²⁰ Esuaca' alla nene' tayecma sesho attote' neserrpare'tatas e'ñe cohuen, allochñapa' amate' cha muene' neche'ptare'taso. Tarraña ñeñtpa' amach errotenot, po'ñoçhpa' chocma sellcatenen.

Te'pa' e'ñe yame'ñeñoñ Cristopa' o'huañcha' yeyemta añ ñoñets ñeñt atet anaret; ñeñtpa' añ toma'ntena Agar ñaña Sara

²¹ Ñehua, te'pa' o'ch se'mñnoten sa ñeñtes muenets o'ch alla seyemterra añ ñoñets ñeñt atet anaret ahuatoteñ. Sapa' ama't señoñe ñeñt atet oten añ ñoñets ñeñt atet anaret.

²² Ñehua, te'pa' o'ch neñotatas ñeñt atet oten ñoñets ñeñt atet anaret Yompor po'ñoño ahuatoteñ. Ñeñtpa' atet oten: Abrahampa' eñall epsheña puechemer. Puesheñarrpa' arroñ chemere't pueñañreshoñ ñeñt pa'taruasañer pe't. Ñeñt coyanesha'pa' añ sochena Agar. Po'psheñeñña' e'ñe puetaporeshot chemere't ñeñt ama pa'taruasañreyaye.

²³ Ñeñt puechemer ñeñt eñalletatsa pueñañreshoñpa' atet eñalleta ñeñt e'ñe attecma yeyeçhquena allohueney acheñey. Tarraña po'poñ puechemer ñeñt eñalletatsa puetaporeshot ñeñt ama pa'taruasañreyaye ñeñtpa' añecop eñalleta attoch etsota Yompor po'ñoñ ñeñt atet otan ahuatoteñ Abraham.

²⁴ Ñeñt atet papa' ñeñtpa' añ yechateney tarro'mar añ epsheño'mar coyanesha'pa' añ toma'ntena atto Yomporpa' epsheñoñ a'poctatonay. Ñeñt Agarpa' añ toma'ntena atto Yomporpa' eñorana'tanet ahuañ Sinaíño. Allempoteñ anareta añ ñoñets ñeñticha' atet etsotetañ. Ñeñtña ñoñetspa' añ toma'ntena Agar, tarro'mar ña puechoyoresha'pa' añ añcha'noçhtana'tenahuet añ ñoñets ñeñt atet anaret.

²⁵ Agarpa' po'ñoçh shallchenana aspenet Sinaípen ñeñt Arabio'tsen. Ñaña ñeñtara Agarpa' toma'ntenana judionesha' ñeñt pa'netser pene' Jerusalén. Tarro'mar allohuen judiona'tarpa'teme'ttsen añ añcha'noçhtana'tenahuet añ ñoñets ñeñt atet anaret ahuatoteñ.

²⁶ Tarraña ñeñtey ame'ñenaya Cristopa' añ ñoñets ñeñt atet anaret ahuatoteñpa' ama añcha'noçhteno yocop. E'ñe yame'ñeñoña allohueney Cristopa' e'ñe cohueno'tseney. Ñaña ñeñtpa' e'ñe cohuen yenteñ atet

ñerra'mrrate' yachor. Ñaña ñeñtpa' atetcha' netma'ntatererr atet: E'ñe yeparrocmateñoť allohueney epay Cristopa' e'ñe attey ñerra'm Yompor pa'netser etserra Jerusalén, ñaña ñeñtpa' e'ñe atet yenteñ ñerra'mrrate' yachor.

²⁷ Ñeñto'marña atet anuaret Yompor po'ñoñ ahuatoteñ, ñeñtpa' atet oten toma'nteñtso:

Coshepa' coyanesha' muechoř ñeñť ama achyore'tño, ñaña pocsheñeshořpa' rranare'tepa' ñeñť ama't ahuatapa' ama patsotarano pue'mar, țarro'mar ama't añ coyanesha' ñeñť aquechpareť mame' (ñeñțara Sarapa') shonte'ch acheñenesha' pachor perre'. Elloch metanerran allpon puechoyor echen ñeñť agapue' puerrollar (ñeñțara Agar).

Ñeñť ñoñetspa' añ toma'ntena atto te'pa' yame'ñeñoť Cristo ñeñťña nanac sherbets attoch atonterra acheñ ñeñťcha' pueyochresha' perr Yompor. Tarraña ñoñets ñeñť atet anaret ahuatoteñpa' ñeñťpa' ama tama sherbeno attoch atonterra ñeñťcha' pueyochresha' perr Yompor.

²⁸ Ñehua, o'ch notas masheñeshacha' ñaña nochaneshacha', allohueney ñeñťey ame'ñenaya Cristo, yapa' attey ñerra'm Abraham puechemer ñeñť Isaac ñeñť eñalletatsa attoch etsota Yompor po'ñoñ ñeñť atet otoñ pompor Abraham. Tarro'mar yapa'cho'ña attoña ye'ñalleterra ello attoch etsota Yompor po'ñoñ ñeñť atet ote't ama't ahuatoteñ.

²⁹ Tarraña ñeñť eñalletatsa ahuat ñeñť e'ñe attecma yeyeçquëna allohueney acheñey (ñeñť sochet Ismael) ñapa' chocma e'moñe'tane't ñeñť eñalletatsa atto etsota Yompor po'ñoñ. Attecmach perra ñaña te'. Ñeñťcha' eñalleterrtsa ñeñť e'ñe attecma yeyeçquëna allohueney acheñey ñeñțara ñeñť muenene' o'ch etsotan judionesha' poctapña ñetpa' chocmach e'moñe'tenyet ñeñťey eñalleterrtsa Yompor Puecamquëñoť.

³⁰ Ñehua, ama't señoťeñeña ñeñť atet oteney Yompor po'ñoñ ñeñť anuaret ahuatoteñ. Po'ñoç oteney atto Yomporpa' otan ahuat Abraham ñeñťpa' atet och: "O'ch pehuapore'ch peñañra epuet puechoyor, țarro'mar ña puechoyorpa' amach es o'patapretařo, amach atteye' řo puechoyor ñeñť eñalletatsa petaporeshoť ñeñť ama řa'taruasañreyaye."

³¹ Ñeñto'marña te' masheñeshacha' ñaña nochaneshacha' o'ch alla noterrser: Ama pallteno o'ch yame'ña judionesha' poctapña. Ñato' o'ch netma'ntacha atet: Ama puechoyoreyaye Abraham pueñañra ñeñť pa'taruasañer e'ñe atta. Añña puechoyorey Abraham puetapor ñeñť ama pa'taruasañreyaye. Ñeñțara ñeñť yoten e'ñe yame'ñeñoťa Cristopa' e'ñech cohueno'tseney.

5

Atto te'pa' atarr cohueno'tseney, te'ñapa' amach yequeçpatstere

¹ Cristopa' o' a'poctaterrnay attoch e'ñe yame'ñeñořpa' cohueno'tseneycha'. Attoch yocoppa' amach añcha'noçhteno ñoñets ñeñť atet anaret judioneshap. Ñeñto'mar te'pa' amach allo'na same'ñatsterrero judionesha' poctapña ñeñť nanac amueroçhtatañ. E'ñepa'chña huomenc seřa' seyocher Cristocop.

² Ñehua, te'pa' o'ch se'mñoten na ñeñften allsensareten ñeñťcha' atet notas: Ñeñť atet seyemtenañ atto'ch sequestperra e'ñe setsorranna'teñořapa' țarraña ñeñťoť Cristopa' amach errotenoť yenpaso.*

* 5:2 O'ch secue' nota 2.3.

³ Tarraña te'pa' o'ch alla noterrser, ñeñt muenets o'ch atsorrarettapa' ñehua, po'ñoçh añ palltetsa ñaña o'ch e'ñe etsotuan ama't ñaña allohuen ñoñets ñeñt atet anaret judioneshacop.

⁴ Ñeñtes muenets o'ch pocte' entas Yompor e'ñe setsoteñoñ ñoñets ñeñt atet anaretpa' sañapa' o' alla sequeçhpuerña Cristo. Ñeñto'marña te'pa' amach errotenoñ muererrso Yompor.

⁵ Tarraña yapa' e'ñe yeyemteñoñ Cristopa' e'ñe yocsheñesha' yecuen esempohuañencha' yeçhacherr Yomporesho tarro'mar yeñoteñ o' pocte' entuerrey Yompor. Ñaña e'ñe ña Puecamquëñoñ te'pa' o' ya'pocataretterra.

⁶ Ñerra'm o' yeparrocmaterr epay Cristo Jesúsapa' ama sherbeno atto yetsorranna'tena, ñaña ama't ama atsorrareteyepa' ñeñtpa'çho'ña ama sherbeno Yomporcop. Aña ñapueñ sherbets e'ñe yame'ñeñoñ Cristopa' o'ch yemorrentanna'ta.

⁷ Sa ahuañmo'chapa' e'ñe cohuen same'nye't Cristo. Te'ñapa' po'ñoçhca'ye o'cha a'psaterrsetña añ ñoñets ñeñt e'ñe po'ñoçh Yompor po'ñoñ.

⁸ Ñeñtpa' ama Yompor-eye' sa'psatenaye, tarro'mar ñapa' o' hua'ñerres o'ch same'ñerrñaña Puechemer Cristo.

⁹ Ama't señoñe ama't puesheñarra yeçhatats po'poñ ñeñt ama po'ñoçhoyayepa' mameshapa' o'ch epa'hua erracmañen ñeñt atet yeçhaten. Ñato' o'ch netma'ntacha atet pena chase'. Ama'tcha' coñe'ta chasetoll yena'pa' mameshapa' o'ch a'chasa'huan emasa.

¹⁰ Tarraña ñeñt semoñne'tatene'pa' tsa'taterach Yompor, ama't erra'tsena atet petsa. Tarraña na e'ñe neyemteñoñ Yepartsesharpa' neñotenes te'pa' o'ch alla sequeçhpueñ ñeñt atet yeçhatenes po'psheñeñ, o'ch alla same'ñerra ñeñt neyçhatenes.

¹¹ Ñato' napa'çho'ña çhate' otyennet año' neserrpare'taten o'ch yetsorranna'ta attoch yequeshperra. Ñehua, masheñeshacha' ñaña noçhaneshacha' ñerra'm po'ñoçh ñeñtara neserrpare'tateneñ atetpa' amate' errotenoñ e'moñe'tennoñeña judionesha' ñeñt serrpare'tene' o'ch yetsorranna'ta. Tarraña po'ñoçhpa' ama atteye' neserrpare'tateno. Añña neserrpare'taten atto Cristopa' rroma corsocho yocop atto tsa'tuerrnaya yo'chñar, allochñapa' e'ñe yame'ñeñoña ñapa' o'ch yequeshperra. Ñeñña atet neserrpare'teñoñ añña ñeñt serrpare'tene' o'ch yetsorranna'tapa' ñetñapa' ñeñña nanac atsrre'matenahuet. Ñerra'm o'huañcha' atet neserrpare'tañpa' o'huañte' e'moñe'tnetañ.

¹² Napa' atarr nemneñ ñeñt çhocma semoñne'tatene'pa' o'te' alla queçhpa'nerres.

E'ñe yemorrenteñoñ yamo'tspa' o'ch e'ñe yetsotua allohuen ñoñets ñeñt atet anaret Yomporeshot

¹³ Tarro'mar sa masheñeshacha' ñaña noçhaneshacha' o' hua'ñerres Yompor attoch cohueno'tsenescha'. Ñapa' ama mueno o'ch añcha'noçhtena socop ñoñets ñeñt atet anaret. Tarraña ama't o' hua'ñerrey Yompor attoch cohueno'tseneypa' ñeñtpa' ama añecpayaye o'ch ye'pa'yesa nanac sosey ñeñt atet muenateney yechets. Ñapa' mueneñ e'ñe yemorrentanna'teñoñpa' o'ch yeyenpanna'ta, tarro'mar yapa' cohueno'tseney.

¹⁴ Ñerra'm çho yemorrencha yamo'tspa' ñeñtpa' attoch ama't e'ñe parrotapa' o'ch yetsotua ora allohuen ñoñets ñeñt atet anaret ahuatoteñ Yomporeshot, tarro'mar Yompor po'ñoñpa' oteneý: "Atarrepa'ch semorreñcha samo'ts e'ñe atet atarr semorrentena sañeña."

15 Tarro'mar ñerra'm sapa' chocma se'moñe'teñ samo'ts, amapa' cha amtsen senteñ samo'ts, ñeñt'pa' ama poyeyaye atet sepena, tarro'mar ñerra'm atet sepenapa' señoche'pa'ch atto'tcha'ña chach sa'chencatannerra e'ñe sagattsa.

Ñeñt' atet cotape'chateney Parets Puecamquëñ, ñaña ñeñt' atet muenateney yechets

16 Tarraña napa' o'ch notas ñeñt' poyetsa ñeñt'cha' atet sepa. E'ñepa'chña cohuen socrena Partsocop ñeñt' atet cotape'chatenes Parets Puecamquëñ. Allochñapa' amach allo'na sepa'yesneno ñeñt' atet muenatyenes sechets.

17 Tarro'mar ñeñt' atet muenatse'tateney yechetspa' ñeñt'pa' ama yemtenano ñeñt' atet cotape'chatyeny Parets Puecamquëñ. Añpa'cho'ña Parets Puecamquëñpa' ama yemtenano ñeñt' atet muenatse'tateney yechets. Ñeñto'marña amach errotenot yotape'cho e'ñe patrra cotapñats, tarro'mar ñetpa' cha e'moñe'tannenet.

18 Tarraña ñerra'm po'ño'ch ye'pa atet cotape'chateney Parets Puecamquëñpa' allempopa' amach errotenot añcha'no'cho yocop añ ñoñets ñeñt' atet anaret ahuatoteñ, tarro'mar ñapa' añcha' p'ateney ñeñt' atet muenen Yompor.

19 Ñehua, yapa' o' yeñotuer ñeñt' atet muenatse'tateney yechets. Ñeñt' allpon yemnatse'tyenpa' ñeñt'pa' atet ñerra'mrrate' erra'tsente' cheta'yene' coyanesha' ñeñt' amach puetapoyeyaye, atet ñaña erra'tsente' coyaneshar ñeñt' cheta'yene' yacma ñeñt' ama puerrollareyaye, ñaña atet ñerra'mrrate' ñeñt' nanac cotape'chyene' sosya'tsañ, ñaña ñeñt' nanac yomenaya ottatsñats.

20 Ñaña ñeñt' po'yomporer pa'yene' po'poñe'chno ñeñt' ama po'ño'ch Yompoyeyaye, ñaña atet pena achyo'tañe'chno, amapa' ñeñt' atet pena pa'llerrnanesha' ñaña ñeñt' atet pena amase'ñe'. Ñaña po'poñ ñeñt' atet muenatse'tyen yechetspa' ñeñt'pa' atet ñerra'mrrate' e'moñe'tanna'teñets, ñaña orroteñets, ñaña ye'chapretanna'teñets, ñaña atsrre'mare'teñets, ñaña moparrñats, ñaña elloptanneñets atto amach e'ñe amo'tstanneneto, ñaña atet pena ñeñt' cotape'chyene' po'poñ cotapñats ñeñt' ama po'ño'choyaye.

21 Ñaña po'poñe'chno ñeñt' atet muenatse'tyen yechetspa' atet ñerra'm ye'chapreteñets, ñaña muetsanna'teñets, ñaña posa'tarñats, ñaña arep-sarñats porrare'teño', ñaña eñallmeñ po'poñe'chno shonte' attema't ñeñt' atet o' notua. Te'pa' o' alla noctape'chaterrser ñeñt'ara atet notuanmas ama't ahuaña, ñeñt' atet petsapa' amach es o'patatereto all añcha'tare'tena Yompor.

22 Tarraña ñeñt' pene' cohuen ñeñt' atet ye'chateñ Parets Puecamquëñpa' ñeñt'pa' atet'cha' pena, o'ch morrentenana pamo'ts, ñaña e'ñech cosha'huen pueyo'chro Yomporecop, ñaña amach es llecatenaye ama't e'ñe mamesha, e'ñech ahuanta'huenan allohuen ñeñt' echarr entyen. Ñaña ñeñt' pene' cohuen ñeñt' atet ye'chateñ Parets Puecamquëñpa' o'ch amuerañtena, ñaña o'ch yenpa'yenan pamo'tsesha', ñaña erro't'otpa' atet'cha'cho' pena.

23 Ñaña amach atsrre'ma'peno ñaña e'ñech puetpara es pa'yen. Ñerra'm ñeñt'ña atet o' yepohuapa' o'ch yetsotua allohuen ñoñets ñeñt' atet anaret Yomporeshot.

24 Ñaña ñeñt' po'ño'ch o' pueyochresha' perr Cristo Jesús'pa' o' hueneran ñeñt' atet muenatse'tyen yechets ñeñt' atto es yeye'chyena ya acheñey. Ñeñt'pa' e'ñech atet yentena ñerra'm acorso'tam'psare'tey.

²⁵ Atto Parets Puecamquëñpa' o' apuerrey attoch yocrrerra e'ñe cohuen Yomporecop, te'pa' añ pocte' o'ch ye'pa'yena e'ñe cohuen ñeñt' atet co'fape'chateney Parets Puecamquëñ.

²⁶ Amachña 'cha yommo'chueno, ñaña amach 'cha es yotnare'tanna'tyeno, ñaña amach 'cha ye'ye'chapretanneno.

6

Añ pocte' 'chocmach yeyenpanna'ta attoch yemesha allohuen topateñets

¹ Ñaña o'ch masheñeshacha' ñaña no'chaneshacha' notas, ñerra'm esempo se'ñoteñ po'psheñeñ o' 'pohua ñeñt' ama pocteye' enteno Yomporpa' sa ñeñtes o' co'fape'chaterres cohuen Yompor Puecamquëñpa' sach alla co'fape'chatterahuet cohuen attoch alla tanterret Yomporecop. Tarraña e'ñe semuereño'pa' e'ñech aco'pa soctape'chatanet cohuen. Tarraña sapa'cho'ña e'ñech se'ñota, te't sapa'cho'ña attecma se'pa saña ñerra'm esempo topatenes oneñe' o'ch 'patenes ñeñt' ama pocteye' enteno Yompor.

² Ñaña añ poctetsa 'chocmach yeyenpanna'ta attoch ya'huanta'hua allohuen topateñets. Ñerra'm atetña ye'pohuapa' o'ch yetsotuoñ Cristo po'ñoñ ñeñt' atet otene' o'ch yemorrentanna'ta.

³ Ñerra'm esesha' pommo'cheño' ot'en, "napa' ama 'cho es neye'chcateno Yomporecop ñeñt' ama pocteyaye", ñeñt'pa' ñañeñach shequëtsa, tarro'mar po'ño'ch ñeñt' atet acheñpa' amach es sherbeno Yomporecop.

⁴ Tarro'mar puesheña'ttsoypa' 'choch ñanom ye'ñota erro'tente'ña yocrrera. Ñerra'm ye'ñotena e'ñe po'ño'ch cohuen yoc'tape'chen ye'yo'chropa' ñeñt'ña nanac acsha'po'. Tarro'mar ama acsha'pahuo ñerra'm esempo ye'ñich po'psheñeñpa' o' 'pohua ñeñt' ama pocteye' enteno Yompor.

⁵ Ñaña añ pocte' e'ñe puesheña'ttsoy o'ch ya'huanten topateñets ñeñt' yehuenoya.

⁶ Ñaña te'pa' o'ch notas po'poñ: Ñeñt' e'mñotene' Yompor po'ñoñpa' añ pocte' o'ch es cohuen apa'yaset ñeñt' ye'chatenahuet Yompor po'ñoñ.

⁷ Amach sepantatsche, o'ch se'ño'ch po'ño'ch Yomporpa' ama allocchame'tpahuo. Tarro'mar ñerra'm ye'ye'chcaten ñeñt' cohuentetsa Yomporecop arr partsropa' ñach yapuerre' ñeñt'cha' yocshatterre' tsapa'one't. Tarraña ñerra'm ye'pa'yese ñeñt' ama cohuenayaye, ñeñt'pa'cho'ña ñach yetsa'taterraya esempohuañen. Ñato' o'ch netma'ntacha atet. Ñerra'm es yenare'tpa' ñeñt'cha'cho' emere'tats tsapa'one't.

⁸ Attecma ñaña ñerra'm añ ye'patse'tyen ñeñt' atet muenatse'tyen yechetspa' ñeñt'ara ñeñt' ye'pa'yenapa' a'chencataterreycha'. Tarraña ñerra'm añ yoc'tape'chen cohuen ñeñt' atet co'fape'chateney Parets Puecamquëñpa' ñeñt'ara Puecamquëño'pa' yocrrerrach esempohuañen. Ñato' o'ch netma'ntatererr atet: Ñerra'm te'pa' e'ñe cohuen yenare'ten, tsapa'one'tpa' nanaccha' coshatterrey. Tarraña ñerra'm te'pa' ama cohuenaye' yenare'teno, tsapa'one'tña'pa' nanaccha' llecatterrey.

⁹ Ñaña amach yemuenme'chatsche 'pa'yese' ñeñt' cohuenetyetsa Yomporecop. Tarro'mar esempohuañen allempoch e'ñe pocte' enteñ Yomporpa' apuerreycha' ñeñt'cha' yocshatterre' ñerra'm amach 'cha ye'que'chpuere. Ñato' o'ch netma'ntatererr atet: Ñerra'm te'pa' ama yemuenme'che'ne nare'tatspa' tsapa'one'tña'pa' nanaccha' shonte' me'tarsats.

10 Ñeñto'marña te'pa' o'ch notas: Chocmach yeyenpa'yes allohuen yamo'tsesha' tayepa'tña orameñ attoch yeyenpanna'ta. Ñaña añña nanac cohuen ñerra'm cho yeyenpueñ yamo'ts ñeñt' parro o' yame'ñera Cristo.

Arrpa' all so'terranet añ cartot

11 Te'pa' e'ñe na nototpa' o'ch nequellconas mame'. Sapa' o'ch sent ñeñt' ateshaclo'yerr quellecpa' ñeñt'pa' na quellquene'.

12 O'ch alla noterrser: Ñeñt' muenene' o'ch tsorraspa' añecpa mueneñet attoch judionesha'pa' o'ch cohuen entanet. Tarro'mar ñetpa' ama mueneñeto o'ch e'moñe'tanet judionesha'. Ñetpa' eñoteñet ñerra'm o'ch serrpare'tet atto e'ñe yame'ñeñoña Cristo ñeñt' rromats yocop o'ch yequeshpapa' añña judionesha'pa' o'ch e'moñe'tanetpa' o'ch cotare'tanet.

13 Tarraña ama't ñeñt' o' atso'rre'tetuapa' ama ame'ña'hueneto allohuen ñoñets ñeñt' atet anaret' judioneshacop. Ñetpa' añña muenenet e'ñe same'ñeñoñ ñetpa' o'ch tsorratatenset attoch ñetpa' o'ch ommo'chuernaset judioneshesho sechets.

14 Tarraña napa' ama't ahua'tapa' ama nemno o'ch atet nommo'chena. Napa' añña nemnen chocmach na'ye'chochtatoñ Yepartseshar Jesucristo ñeñt' rromats corsocho yocop. Ñeñt'ña name'ñeñoñ o' neunerr ñeñt' atet nemnatse'tyese't ahuañmo'cha ñeñt' patso'marecpa. Te'pa' o'huañ nommo'cha ñeñt' patso'marecpa. Napa' atet nentena ñerra'm acorso'tam'psareten.

15 Ama't ya'tso'rre'ttatstapa' ñeñt'pa' ama es sherbeno. Ñaña ama't ama ya'tso'rre'ttatstopa' ñeñt'pa'cho'ña ama es sherbeno. Añña nanac sherbets Yomporecop, o'ch yeterrataterr yoc'tapña, o'ch yeye'chquerra etserra Yomporecop.

16 Yomporepa'chña sa'nataya allohuenes ñeñtes atet petsa ñeñt' atet o' notuas ñeñt' cohuentetsa Yomporecop. Ñaña Yomporepa'chña semueraya allohuenes ñeñtes po'ño'ch Yomporena'tares.

17 Te'pa' ama pocteyaye ama't puesheñarrapa' o'ch alla orrtaterrnanerr ñeñt' atarr echarr nenten nocop tarro'mar ñeñt' atet ney'chatenpa' ñeñt'ña po'ño'ch Yompor poctapña. Tarro'mar teme'ttsen orretyena nechets all mare'tayena all atserrpatse'tyesnet ahuañmo'cha. Te'pa' ñeñt'ña eñotatyenahuet po'ño'ch napa' netorrena Jesúsocop ñeñt' Yepartseshar yepen.

18 Te'pa' ñeñtach masheñeshacha' ñaña no'chaneshacha' notas, Yepartse-sharepa'chña sa'nataya, ñeñt'ara Jesucristopa' ñepa'chña semueraya. Ñeñt'pa' attetepa'chña Nompore. Allohua.

Pablo

AÑ SAN PABLO PO' CARTA ÑEÑÑ QUELLCAN EFESO' MARNESHA' EFESIOS

Atto Pablo pa' quellcan carta añecop ñeññ ame'ñetsa anetso Efeso

¹ Masheñeshacha' ñaña nochaneshacha' ñeñtes allohuenes pueyochresha' o' perres Parets ñeñtes ame'ñenaya Cristo Jesús all anetso Efeso. Na Pablon sequellquene'ña añ carta ñeñten Jesucristo puellsensaren tarro'mar ñeñtpa' atet muenen Yompor.

² Te'pa' e'ñe nehuom'cha'teñoñes sa, napa' o'ch notas: Yomporepa'chña sebensare'tam'pene' ñeññ nanac Parets epuet Puechemer Jesucristo ñeññ Yepartseshar yepen. Ñetepa'chña socshatene' e'ñe sa seyochro allohuenes.

Atto Yomporpa' e'ñe pa'nateñoñey chocma apueneñ ñeññ atarr cohuen sherbets yecamquene'cop

³ Te'pa' aye'chochtatpahuropa'ch Yompor ñeññ Pompor pen Yepartseshar Jesucristo. E'ñe yeparrocmateñoñ epay Cristo, Pomporñapa' e'ñe pa'nateñoñey chocma cotape'chateney ora allpon ñeññ esocmañen cochnesha'tetsa all pue'ntaño ñeññ atarr sherbets yecamquene'cop.

⁴ Atet ahuat pa'motroñeñ allempo ama aye'chcatare'tena' añe patserpa' Yomporñapa' allempoteñña acram'perrey parro epay Puechemer Cristo attoch yapa' a'parrocmataterreya' epay Puechemer. Tarro'mar añecop acram'perrey Puechemereshot allochña yapa' añach e'ñe yema'yochrena ñeññ cohuentetsa Partsocop. Allochñapa' attochña e'ñe pocte' entueney Yompor, amach eñalle attoch otteñe'cherrey ama't e'ñe mamesha.

⁵ Ñapa' atarr morrentenya; e'ñe puemorrenteñoñey pa' o' e'ñe a'pocatonay yocop ama't ahuatoteñ. Ñeñtpa' attochña e'ñe puechemer perrey. Ñeñtpa' añña e'ñe etsotatuere' Puechemer Jesucristo. Yomporpa' e'ñe atet a'pocatuonay tarro'mar ñeññ atto morrentya ñapa' atetña muenen.

⁶⁻⁷ Aye'chochtatpahuropa'ch Yompor atto ñapa' atarr nanac cohuen muerenya. Atto ñapa' ahua't mueñoñay Puechemer Cristo ñeññ rromosets yocop. Atto ashataretta po'rras ñeñtpa' alloña tsa'tuerrnaya yo'chñar. Te'ña ya e'ñe yeyemteñoñ Puechemer, Pomporñapa' attoña o' e'shohuerrnay ñeññ yo'chñar yepe't. Ñeñto'marña yapa' yeñoteñ ñapa' atarr morrentenya. Atto atarr morrentenana Puechemer Jesús pa' yapa'cho'ña attecma atarr morrentenya e'ñe yeparrocmateñoñ Yompor Puechemer.

⁸⁻¹⁰ Yapa' yeñoteñ Yomporpa' atarr morrentenya tarro'mar ña te'pa' o' eñotatuerey e'ñe ora ñeññ atet cotape'chen ña ama't ñeññ ama eñotpahu ahuatoteñ. Ñapa' o' e'ñe eñotaterrey yeyochro ñeññ atet muenen ña. Ñeñtpa' añña atet muenen ña: Ñerra'm esempoch chap allempoch etsoterra allempo onañche' ahuat Yomporpa', allempoña Cristo ñach etsotatuere' allohuen ñeññ allpon eñall, ama't ora allpon ñeññ pue'ntaño'tsa'yen ama't ñaña ora allpon ñeññ añe patsro'tsa'yen. E'ñech Cristesho a'yapa'cha'huerret allcha'ña e'ñe yeparrocmatuerr allohueney.

¹¹ Yomporpa' atarr cochnesha' o'patatenana Puechemer Cristo. Ya'naña e'ñe o'patatena atto e'ñe yeparrocmateñoñ Cristo. Ñehua, ñeñtpa' atet cotape'che't Yompor ahuat yocop. Ñeñto'marña te'pa' atetña o' perrnay ñeññ atet cotape'che't ña ñeññ e'ñe pocte' ente't e'ñe ña pomnenñoñ. Tarro'mar

Yomporpa' ama puenesho po'ñoñ, chocmach e'ñe etsotuerra ñeñt allpon atet onañchen ña.

12 Ñeñtpa' atet e'ñe cohuen ñonay Yompor allochñapa' attochña ya'ye'chochtaterrñañ ora allohuen ñeñt po'cohuenña pen ña, allohueney ya ñeñtey yanom o' yeyemterrñaña Puechemer ñeñtara Cristo.

13 Sapa'cho'ña te'pa' o' se'muerrñañ Yompor po'ñoñ ñeñt ñoñets e'ñe po'ñoñ alloch sequeshperra samã. Attoña sapa'cho'ña o' same'ñera Cristo. E'ñe seyemteñoña sa, Yomporñapa' o' chorraterrsa Puecamquëñ ñeñtcha' señoate' po'ñoñ o' puechemer perres. Ñehua, ñeñtpa' ñeñtara Parets Puecamquëñ ñeñt atet ote't ahuañ Yompor ñeñtcha' aphuerrey esempo.

14 Ñeñtara Puecamquëñ ñeñt apueney ñanom ñeñtpa' ñeñtcha'ña yeñotate' orameñ ñeñt o'patatenya Yompor. Attochña ñerra'm esempo a'queshpaterrey poctacma ñeñtey o'patatena, allempochña yaguërr ñeñt allpon orameñ o'patatenya. Ñeñto'marña añ poctetsa ya'ye'chochtatoñepa'ch ora allohuen ñeñt po'cohuenña pen ña.

Arrpa' atto ma'yochamñpenanet Pablo

15 Ñeñto'marña na te'pa' o'ch notas, napa' o' ne'mare'tas atto sapa' atarr same'ñeña Yepartseshar Jesús ñaña ne'mare'tenes atto sapa' e'ñe cohuen semuerannena allohuenes ñeñtes pueyochresha' perres Parets.

16 Ñeñto'marña napa' chocma neparasyoso'teñ Yompor allempo nema'yochamñpensa.

17 Ñaña nenamuennas Yompor ñeñt Pompor pen Jesucristo, ñeñtara Yompor ñeñt atarr cohuen Partsoets. Añ nenamuennas, Yompor Puecamquëño'tpa' eñotatasepa'ch ñeñt e'ñe atet pena ña pocta'ña. Attochña sapa' esheccha' señoterrña ñeñt atarr cohuen sherbets ñocop ñeñt ama't ahuaña sapa' ama señoñe.

18 Ñaña ñapa' chapatonascha' seyo'chro attochña señoterrñañ ora allpon ñeñt po'cohuenña ñeñt yecuen ñeñtcha' aphuerrey Yompor esempo tarro'mar yapa' ñeñtecopña chore'terrey ahuañoteñ. Ñaña o'ch señoñch atarr nanac cohuen ñeñtcha' aphuerrey Yompor, ñeñtpa' alloch yapa' corretsayach errponañohuen allohueney ñeñtey pueyochresha' pen.

19-20 Ñaña te'pa' o'ch señoterrñañ Yompor po'huamenc atarr nanac huomenc ama atpa'huapahuo ñeñt atet ahuamencat peney allohueney ñeñtey ame'ñenaya ña. Ñeñtpa' ñeñtara po'huamenc ñeñt atarr huomenc orrtatan allo tantaterran Puechemer Cristo allempo rroma. O' tantater ñeñtara po'huamencot attoña chapater ñesho allñapa' anorruerr Pompor po'cohuenrot all pue'ntañ allña e'ñe partsotuerr epuet Pompor.

21 Ña te'pa' atarr amcha'tare'ttena nanac. Atto amcha'tare'ttena ñapa' ñeñtpa' e'ñe metana'tuenan ora allpon allohuen ñeñt amcha'tare'tetyetsa ñaña ora allpon allohuen allsensare'tetyetsa ñaña ora allpon allohuen ñeñt ahuamencatetyetsa ñaña ora allpon allohuen ñeñt ayochreshatetyetsa ñaña ora allpon allohuen ñeñt cohuen entyetsa ama't allohuen so'chñetso'chno. Cristoña po'huamencot e'ñe metana'tuenanet allohuenet. Ñaña ñapa' ama mamecpayaya atet peno, ñapa' tayoteñña ñaña errponañohuencha' atet pena.

22 Ñaña Yomporpa' o' nan Puechemer Cristo allochñapa' ñach pomnaren pene' ora allpon ñeñt esocmañen eñall. Ñaña allohuen allpon ñeñt ame'ñenaya, Yomporpa' attoña apanet Puechemer allochñapa' ñach yochresha'tenahuet allohuenet.

23 Ñato' o'ch netma'ntacha atet: Allohueney allponey ñeñtey ame'ña'yenaya Cristo, Cristoñapa' e'ñe yeyoçher* yeðohueñ allohueney, yañapa' Cristo po'chets yepene' allohueney. Ñeñto'mar ñeñtey ame'ñenaya Cristo e'ñe allohueney e'ñe parrocmay, Cristoñapa' e'ñe ña yechorra'huenaya, tarro'mar ñapa' e'ñe po'chets ðohueney allohueney.

2

Atto Yomporpa' e'ñe puemuereñoŕey ya o' a'queshpaterrey

1 Ama't atet ñerra'm sa. Sapa'cho'ña ahuatpa' aña soctape'chyese't ñeñt' ama cohuenaye' enteno Yompor.

2 Aña seyche't ñeñt' atet p'atse'tyena acheñenesha' arr patsro ñeñt' ama ame'ñetso. Allempo sapa' aña same'ñataye't oneñet' ñeñt' pa'm'cha'tareter pen allohuen ñeñt' erracmañen am'cha'noçhetyetsa ento't ñeñt' ama entpahuoy-aye. Ñeñt'ña oneñet' poctap'ñapa' ñeñt' atarr coshatene' allohuen acheñenesha' ñeñt' atparña'ttetsa te' arr patsro.

3 Ñehua, ama't allohueney ahuatpa' e'ñe attecma yeyche't. Aña yoctape'chyese't ñeñt' e'ñe atet yemnatse'tyena ya, ñeñt' atet muenatse'tatene'y ya yechets ñaña ñeñt' cohuen yente't e'ñe yañeña yoctap'ño't. E'ñe ya yoctap'ño't ñeñt' atet yeyche'tpa' ñeñt'ña e'ñe yoctape'chatse'tatyese't. Ñeñto'marña Yomporpa' aña o'patatye't attoch coñchaterrey. Ñehua, ama't allohuen po'potantañ acheñenesha' ñeñt' atet p'atse'tyesete'tpa' Yomporñapa' e'ñe attecma o'patatanete't ñeñt'ara coñcheñets. Ñerra'm allempocmach yerromaña' e'ñech yechenca'huerrañ,

4 tarraña Yomporñapa' atarr nanac amorrentña, atarr muerenya. E'ñe ña puemuereñoŕepa' o' a'queshpaterrey.

5-6 Ñato' o'ch netma'ntacha atet ñerra'm o' yerroma yo'chñaro't tarraña Yomporpa' o' alla tantaterrey. Ñehua, allempo tantaterran Puechemer Cristopa' ya'ñaña tantaterr tarro'mar e'ñe yeparrocmaten epay Cristo. Ñaña atto çapaterran Po'cristor pue'ntaño allcha' atarr cosheñtso'tsen, ya'ñaña o' çapaterr allcha' atarr cosheñtso'tseney yama tarro'mar e'ñe yeparrocmaten epay Po'cristor. O'ch netma'ntacha atet ñerra'mrate' o' yeçhap Yompor pue'ntaño allcha' yecohuentapretera Cristo.

7 Attoña Yomporpa' çocmach orrtatennay puemuereña ama't errponañohuen. Attoña o' çaphuonaya yeyoçhro Yomporpa' atarr muerenya nanac. Atto atarr muerenana Po'cristor ya'ñaña atarr muerena tarro'mar yapa' yeparrocmaterrñaña Po'cristor ñeñt'ara Jesús.

8 Tarro'mar po'ñoçh e'ñe puemuereñoŕey Yomporñapa' a'queshpaterrey e'ñe yeyemteño'ta ña. Ama añoŕeye'ña a'queshpaterreye atto e'ñe cohuenare' es yeða'yen ya. Yomporpa' e'ñe atfa a'queshpaterrey.

9 Ñaña ama yetorreñoŕeye' ñocop a'queshpaterreyeña Yompor attoch tsa'terrya ñeñt' allpon yetorra ñocop. Tarro'mar ñerra'm e'ñe yetorreño'ta ya'queshpatenañ, yañapa' çate' atarr cohuen yentena yañeña ñeñt' atto ya'queshpatena. Allempoña Yomporpa' amate' a'queshpatañeye' yente'ne.

10 Tarraña Yomporpa' o' etserrataterrnay yoctap'ña allochñapa' attoch e'ñe cohuen es yeða'yen. Po'ñoçh e'ñe yeparrocmateño't Cristo, Yomporñapa' o' etserra yeçcaterrey. Tarro'mar ñapa' ama't ahuatoteñpa' atet cotape'che't yocop attochña yapa' e'ñepa'chña cohuenare' es yeða'yen.

* 1:23 Ñehua, po'ñoçh Cristopa' arr atma'ntataret atet ñerra'mrate' ñeñt' yoñ yepen.

Cristopa' e'ñe cohuen amo'tstatanna'tña allohuenacop

11 Ñehua, te'pa' o'ch alla seyerpuerra ñeñt atet sepe't ahuat. Allempopa' atarr allapa'ro'tsa'yenes Yomporeshot. Ñehua, sapa' atet eñalletñas ama judioneshayayso. Añña ñeñt atet eñalletena judionesha' ñetpa' aña ye'chenet o'ch tsorrannenet. Ñeñto'marña ñetpa' otarettenet atsorraretnesha'. Ñeñto'mar ñet sañapa' atta sochatse'tenset sapa' año' atsorrataretneshayayso año' puechemereyayso Yompor.

12 Po'ño'ch allempo sapa' atarr allapa'ro'tsa'yenes Cristeshot tarro'mar ama separrocmaterra' epas. Ñaña ama't israelena'tarnesha' ñeñt otenet Yompor pueyochresha', sañapa' ama parro'marneshayayso. Ñaña atto Yompor a'pocatan israelena'tar allempo otanete't ñeñtcha' atet yenpuerranet esempo, saña allempopa' ama't mameshapa' ama se'mare'tpera'. Ama es secueno ama't mamesha ñeñtcha' sa'qeshpaterre' tarro'mar allempo sapa' ama eñalle Seyomporer ñeñtcha' po'ño'ch seyemtena saña arr patsrot.

13 Tarraña te' sapa' o' señoter Cristo Jesús ñeñt rromats ñaña socpa'na. Ashataretta po'rras ama't saña so'chñarecpa'na. Ñeñto'marña yoten e'ñe po'rrasot attoña o' chapaterres saña Yomporesho ama't sa ñeñtes ahuat atarr allapa'ro'tsa'yenes Yomporeshot.

14 Tarro'mar Cristopa' atarr amo'tstatanna'tña allohuenacop. Ama't ya ñeñtey judioneshay ñaña sa ñeñtes ama judioneshayayso, Cristoñapa' ahuo't parro'marneshatatey allohueney. Ñaña ñeñt atto atsrre'mo'chen yentanna'tyese't ahuat ñaña'pa' o' huapore'tam'pesyeny ñeñt yellopa'tetstatyese't ahuat.

15 Ñeñt'pa' atet p'onay Cristo allempo rroma yocop. E'ñe ña po'chtso'tpa' o' a'huañam'peney atto am'cha'no'chen yenten añ ñoñets ñeñt atet anaret ahuat judioneshacop, ñeñtara pa'namen a'pocateñtsoñ ñeñt atet anaretetañ ñocpuet ñeñtcha' atet pohuetañ. Attoña allempoteñpa' o' e'ñe pa'rra yoctape'chen ñeñt atet co'tape'chateney Cristo. Allempoteñña amach alla atsrre'mo'chen yentanna'tyerre'te. Ñato' o'ch yot atto ahuat allohuen acheñenesha' ellopa'tetstete't e'ñe ñet poc'tapño'mareta, Cristoñapa' o' a'huañam'psanet attoña e'ñe parrocmatatuerrey, e'ñe cohuen yamo'tstanna'tuerra allohueney.

16 Attoña epotanto'marey e'ñe yeparrocmateño't, Cristoñapa' e'ñe cohuen amo'tstaterrya ñaña Pomporesho. E'ñe puerromño't corsochopa' ñaña'pa' o' a'pocatonay Pomporesho. Atto ñapa' o' a'huañam'perrey ñeñt ahuat atto chocma ye'mo'ne'tanna'tyese't.

17 Ñeñto'marña Cristopa' huapa. Ñach yeserrpare'tatose' cohuen ñoñets atto ñapa' ña amo'tstanna'tatañtetsa. Attecma serrpare'tatosey allohueney, ama't sa ñeñtes ama judioneshayayso ñeñtes atarr allapa'ro'tsa'yenes atet entyenesña Yompor. Attecma serrpare'tatosey ama't yaña ñeñtey judioneshay ñeñtey e'ñe allame'ttsa entyeny Yompor.

18 Attoña allohueney ama't ñeñtey judioneshatets ñaña ñeñt ama judioneshayaye e'ñe Cristeshotecma e'mñoteneyña Yompor tarro'mar Puecamquëñpa'cho'ña e'ñe pa'rra ñeñt yechorrenaya allohueney.

19 Ñeñto'marña te'pa' o'ch notas, sa ñeñtes ama judioneshayayso, te'pa' e'ñe parro'marneshacmay enteneyña Yompor, ama't allohuen ñeñt pueyochresha' pen Parets, tarro'mar allohueney e'ñe puechemerasha' peney Yompor. Ñeñto'marña te' sa ama atteye' entenso atet ñerra'mrrate' ñeñt ama puentareña, o'huañ atteye' entenes ñerra'mrrate' ñeñt atta huetsa po'poñ anetsot.

20-22 Ñeñt atet entenes te'pa' ñato' o'ch netma'ntacha ñeñt atto yatomatén pocoll. Ñehua, atto cohuen torra'yese't allohuen ñeñt allpon Yompor puellsensarnesha' epuet ñaña allohuen ñeñt allpon a'mta'yese't po'ñoñ, ñetpa' añ toma'ntete't ñeñt ñanom yatomatén allo echarr yepen yepaquëll. Ñaña Jesucristopa' añ toma'ntena pocoll po'quellpach ñeñt atarr echarr orrene' pocoll. Ñehua, sa ñeñt atto o' separrocmeta Yepartseshar Cristo, pueconer penes ñaña pueyo'pacher penes allohuenes ñeñtes e'ne huomenc rremuene' pocoll. Attoña e'ne cohuen sa'yechcataretterra puepahuarr pocoll, ñeñtes pa'paquëll o' perres Parets, attoña o' yecherra Puecamquëñ sesho.

3

Atto Pablopa' allsensaretterra o'ch serrpare'tatan ñeñt ama judioneshayaye

¹ Ñeñto'marña napa' chocma nema'yochena socop. Neserrpare'tateño'tes sa Cristo Jesús ñeñtes ama judioneshayayso ñeñto'marña na te'pa' yotampennet.

² Ñehua, sapa' o'te' se'mare'tuan atto Yomporpa' o' llesenserren e'ne puemuereño'ten, nach a'potene' po'ñoñ socop sa ñeñtes ama judioneshayayso.

³ Seño'teñte' ñaña atto gaterren Yompor atto te'pa' o' neñoterrñañ ñeñt ahuatoteñpa' ama eñotpahuoyaye. Ñehua, ñeñtpa' o' notuanmas mame' necarotot.

⁴ Ñerra'm esempo'ch selleyon ñeñt nequellquënnas allempochña seño'ch napa' po'ño'ch o' chapona neyo'chro e'ne ora ñeñt atet sherbeney Cristo, ñeñt ama't ahuatoteñ ama eñotpahuoyaye.

⁵ Tarro'mar ahuatpa' ama chena' allempo pocte' enteñ Parets o'ch eñotatey ya ñeñtey arromñateneshay ama't ñeñt corretsa allempo. Ñeñto'marña allempopa' ama e'neye' eñotatuanete'te atet ñerra'm te'pa' e'ne Puecamquëño't e'ne eñotatuenan allohuen ñeñt pueyochresha' pen ña atet ñerra'm ñeñt puellsensarnesha' pen ñaña ñeñt a'mtene' po'ñoñ.

⁶ Ñeñt eñotateney te'pa' ñeñtpa' atto ama't ñeñt ama judioneshayaye, ñetpa'cho'ña o'patapreteretcha' Yompor ñeñtcha' apuerranet atecma o'patatenya yaña ñeñtey judioneshay. Te'pa' e'ne separrocmateño't Cristo, te'ña sapa' e'ne po'chets penes atet ñerra'm ya ñeñtey judioneshay. Attoña o' e'ne yeparrocmatuahuerr allohueney. Ñaña atet ote't Yompor ahuat ñeñtcha' atet cohuen perrnay esempo e'ne Cristeshot attoch a'queshpaterreypa' ñeñtpa' añecpa'ñaña ñeñt ama judioneshayaye. Ñehua, ñet año't a'queshpataretterret atto e'ne pame'neño'tet añ cohuen ñoñets ñeñt alloch yequeshperra allohueney.

⁷ Ñeñto'marña napa' o' naparetterra llesens attoch nach torrerraya serrpare'terre' añ cohuen ñoñets ñeñt alloch yequeshperra. Napa' atto naparetterra amaña año'teye' o' naparetterro atto e'ne cohuen es ne'pa'yen ñeñt e'ne nocpa. Ñapa' e'ne puemuereño'ten o' ahuamencat perren,

⁸ ama't napa' ama esoyayno ama't mamesha, atarr coñe'tot nesherben. Ora allohuen allpon ñeñt pueyochresha' pen Parets ñeñt sherbene' ña, ñaña ellonetpa' e'ne atet nentena ñerra'mrrate' atarr coñe'tot nesherbeñ Parets. Tarraña ama't ama esoyaynopa' Yomporña puemuereño't o' muenaterren nach serrpare'tatyese' ñeñt ama judioneshayaye. Attochña nach

eñotatyenahuet atto Cristopa' shonte' esocmañen echyen pa'namen ñeñña yo'patapreteña ñeñey yemtenaya ña. Ama't ya arromñañaya amate' errotenoť e'ñe ċhaphuonayo yeyoċhro ñeñť ora allpon o'patatarey e'ñe yeyemteñoť Cristo.

⁹ Ñaña nach eñotatyene' ama't allohuen acheñenesha' ñeñť atet coťape'chennay Yompor. Tarro'mar ñeñťpa' ahuaťoteñ ama eñotpahuoyaye tarro'mar ama ċhena' allempoch a'poterrnay Yompor, ñeñťara Yompor ñeñť e'ñe yeċhcatuahue' ora allpon ñeñť yentyen.

¹⁰ Allochñapa' allohuen ñeñťcha' allpon ame'ñerrtsapa' ñetñapa' orrtateññañetcha' Yompor atto ñapa' atarr esocmañen es eñoten. Attochña ama't allohuen ñeñť amċha'taretetyetsa ñaña allohuen ñeñť allsensaretetyetsa all ento, ñetpa'ċho'ña eñotueñet atto Yomporpa' atarr esocmañen es eñoten ñeñť nanac sherbets yocop.

¹¹ Ñeñťpa' atet coťape'che't Yompor ahuať pueyochreshacop ñeñťcha' sherbats allempoteñ e'ñe errponañohuen. Ñaña añ onañche't ñeñťcha' eťsoterre' poctapña ñeñťpa' añ Cristo Jesús ñeñťara Yepartseshar yepen.

¹² Ñeñťo'marña yapa' e'ñe yame'ñeñoť Cristo e'ñech yeñmañesha' yeċhore'teñ Yompor. Amach yemċha'nañoteye' yeċhore'teñe tarro'mar añ yeyemteññaña Puechemer Cristo ñeñť o' a'poctaterrey Pomporesho.

¹³ Ñeñťo'marña napa' o'ch notas, atto señotenen napa' atarr nemueroċhtena socop, sapa' amach sellquēñoťa se'charrtatatsto seyoċher. E'ñepa'chña cohuen socshapretenna.

Atto Cristopa' atarr morrentenya

¹⁴ Ñeñťo'marña napa' ċhocma neconcorpuena Yomporeshonet allot nema'yochamñpensa.

¹⁵ Ñeñťara Yompor allot huena ora allpon pa'namen acheñenesha' ñeñť e'ñe pamo'tsna'tarecma ãannenet ama't ñeñť pue'ntaño'tsa'yen ama't ñaña allpon ñeñť patso'tsa'yen.

¹⁶ Atto Yomporpa' shonte' esocmañen echyen ñeñť atarr nanac cohuenñatsotets Puecamquēñoťpa' ñepa'chña atarr ahuaamencat sepene' e'ñe seyoċhro. Nema'yochēñoťpa' atet nenamuennas Yompor.

¹⁷ Ñaña ċhocmuepa'ch yeċhena Cristo e'ñe seyoċhro e'ñe seyemteñoť ña. Allochñapa' attochña e'ñe sagapoñ Yompor puemorrenteña attoch e'ñe huomenc sepa' seyoċher Yomporecop. Atet ñerra'mrrate' tsach ñeñť atarr erċhat e'ñech huomenc orrena patso, allochña pue'chorpa' e'ñech cohuen ten.

¹⁸⁻¹⁹ Allochñapa' attochña atarrcha' huomenc ċhaponasa seyoċhro atto Cristopa' atarr nanac morrentenya. Ñeñť allpon atto atarr morrentenyapa' ñeñťpa' ama ahuañaño. Ñato' o'ch netma'ntacha atto yeċhope'chen patso. O'ch ahuey tenonet, ama'tcha' yeċhap baċhayo amach yemťanhuoñeña ñeñť atto morrentenya Cristo. Attecma ñaña toponet ama'tcha' yeċhap baċhayo amach yemťanhuoñeña ñeñť atto morrentenya Cristo. Attecma ñaña onatonet ama'tcha' yeċhap baċhayo amach yemťanhuoñeña ñeñť atto morrentenya Cristo. Attecma ñaña enonet ñaña o'pononet, ama'tcha' yeċhap atarr allařarpa' amach yemťanhuoñeña ñeñť atto morrentenya Cristo. Ama't ñaña allohuen ñeñť allpon ñeñť ame'ñenayapa' eñochetepa'ch ñamet atto atarr morrentenya Cristo. Tarraña ama't ama e'ñeye' eñotpahuoyaye ora allpon ñeñť atet pena Cristo puemorrenteña yocop, tarraña sapa' señoċhepa'ch ama't e'ñe allpona. Ñeñťpa' atet nenamatennas Yompor. Allochñapa' attochña e'ñe poctacma chorrerrsa Yompor.

Aye'chochtatpahuépa'ch Yompor allohueney e'ñe yame'ñeñoť

20-21 Te'ñapa' aye'chochtatpahuépa'ch yenteñ Yompor tarro'mar ña ahua-mencat yepene'. Ña po'huamencotpa' atetcha' patonay ya ñeñť allpon yenamueñ, elloña ñapa' atetcha' pennay elloch metana'tuonay ñeñť allpon yenamueñ. Ñaña elloña metana'tuennay ñeñť allpon yoctape'chyen. Elloña nanacocmañen e'ñe cohuen es pennay e'ñe po'huamencot ña. Ya'ye'chochtatoñepa'ch Yompor allohueney ñeñťey yame'ñeñoť chocma yapcha'yena ñocop. Aye'chochtatpahuépa'ch tayoteñ ama't ñaña er-rponañohuen tarro'mar ña yapuerre' Puechemer ñeñť Cristo Jesús. Ñeñťpa' attetepa'ch Yompore yocop.

4

Attoch e'ñe yeparrocmatuen allohueney ñeñťey ame'ñenaya Cristo

¹ Ñeño'marña te'pa' añ notenes ama't na ñeñťen ayottam̄psareten e'ñe netorreñoť serrpare'te' Yepartseshar Cristo. Te'pa' o'ch notas: E'ñech cohuen es sorratyen ñeñť atet pochtetsa añecop ñeñť o' hua'ñerr Yompor ñeñťcha' pueyochresha' perr atet ñerra'm sa.

² Ama't mameshapa' amach sañeña entatstatso ñeñťeso' atarr nanac sherbets. E'ñe semorrentanna'teñoť e'ñech acoḗa es seḗanna'tyena. Chocmuepa'ch sa'huantannena ñerra'm erroť penes po'psheñeñ, amachña se'moñe'tatsche saña. Añcha'ña e'ñech cohuen semorrentanna'tuena allohuenes.

³ Añepa'chña se'nen attoch sepaterrtat soctapña allohuenes ñeñť e'ñe atet paterr cotape'chatenes Parets Puecamquēñ. Allochñapa' e'ñe separroc-mateñoť, e'ñech cohuen sentannena, amachña cha po'poñ sentanna'tueno.

⁴ Tarro'mar po'ñočhpa' e'ñe yeparrocmatuen allohueney ñeñťey ame'ñenaya Cristo ñaña ñeñťara paterr Parets Puecamquēñ ñeñť yechorra'yenaya allohueney. Ñaña ama't pa'nameney shontey ñeñťey o' chore'terrey Yompor tarraña e'ñe ñeñťara yeyemteñoť yecuen allohueney ñeñť o'patatenya Yompor ñeñťcha' apa'yesuerrey.

⁵ Po'ñočhpa' e'ñe patrra Yepartseshar Cristo ñaña ñeñťara patrra poctapña ñeñť yame'ña'huena allohueney, ñaña e'ñe allohueney attecma yapataretta e'ñe yame'ñeñoť Cristo.

⁶ Ñaña e'ñe patrra Parets ñeñť Yeyomporer yeḗohuen allohueney, ñeñťara ñeñť ya'mcha'tareter yeḗohuen allohueney. Ñaña ñeñťara Yompor ñeñť yetorratyenaya pa'namen allohueney ñaña ñeñťara Yompor ñeñť yechorra'yenaya yeyochro allohueney.

Atto Cristopa' apa'yeney allohueney attoch yetorra'yesa e'ñe po'poñe'ttsocma

⁷ Ñaña Cristopa' apa'yeney allohueney e'ñe po'poñe'ttsocma attoch yetorra'yesa Yomporecop e'ñe pa'namenot. Puesheña'ttsoypa' o'ch apa'yesey errponte' pocte' enten ña.

⁸ Ñehua, ñeñťpa' atet oteney Yompor po'ñoñ ñeñť aquellca'huaret ahuatoteñ, ñeñťpa' atet oten Cristocop:
Allempo a'terr pue'ntaño'pa' ahuanerran allohuen ñeñť e'moñe'tene' attotña a'mchechuahuerranet. Allempoñapa' e'ñe pocsheñeshoť shonte' es apa'yesnerran acheñenesha'.

⁹ Ñehua, all oten "a'terr pue'ntaño." Ñeño'marña yeñoteñ allempo ama a'terra'pa' ñapa' entoť asuaña, chap ama't allohuanen patso o'pono.

10 Ñeñtara ñeñt sohuatsa entoñ ñeñtpa' ñeñtara ñeñt a'terrets ama't e'ñe allohuanen ento. Attoña e'ñe erracmañen epa'huena Cristo.

11 Ñaña ñeñt atet oten ñoñets ñeñt anaret ahuatoteñ atto shonte' es apa'yenan acheñenesha' ñeñtpa' añ oten ñeñt atto ñapa' e'ñe po'huamencot es apa'yeney attoch yetorra'yesa po'poñe'ttsoema ñocop. Patantarr acheñpa' atet aparettet o'ch torrenet atet ñerra'm ñeñt allsensarettetsa Yomporecop; po'potantañña' añcha' torrenet o'ch a'mteññañet Yomporecop; po'potantañña' añcha' torrenet o'ch serrpare'tatoñet po'ñoñ acheñeneshesho'mar; po'potantañña' añcha' torrenet o'ch cohuanpenan allohuen ñeñt ame'ñetsa ñeñtara ñeñtcha' ye'chatenahuet Yomporecop po'ñoñ.

12 Attoña ahuaencat pa'yeney allochña' ñach po'huamencaro yetorra'yesa po'poñe'ttsoema e'ñe puesheña'ttsoemay ñeñtey pueyochresha' o' perrey Parets. Attochña e'ñe cohuen yeyenpanneño'tpa' o'ch huomenc yepanna'ta yeyocher Yomporecop allohueney ñeñtey ame'ñenaya Cristo.

13 Attochña e'ñe yeparrocmatuen e'ñe yame'ñeño't Yomporecop Puechemer ñeñt Cristo tarro'mar allohueneypa' o'ch yeñotuerr ñeñt e'ñe cohuenare' ñeñt atet ye'chateney Yomporecop Puechemer. Attochña o'ch e'ñe atet yepohuen yaña ora allpon ñeñt cohuentetsa ñeñt atet pena Cristo ñeñt yechorra'yenaya. Ñato' o'ch netma'ntacha o'ch not, yapa' o' e'ñe yepo'n Cristocop.

14 Ya te'pa' ama atteye ñerra'm cheshanesha' ñeñt ama es eñotetso ñeñt epuoye' cotape'chene' cohuen. Ñehua, atet ñerra'm cheshanesha' te'pa' ñato' po'poñcha' cotape'chyenet, ñato' tsapañña' o'chcho' cotape'chyeneterr po'poñ. Yapa'cho'ña atet yepena yaña allempo ama yepo'nena' Cristocop. Yaña ñeñtey ama epuoye' yocteñe Cristopa' amach errotenot ye'mñocheña ya ashcañ attoch ame'ñatya ña pocta'ña, attoch o'ch pantatey.

15 Yapa' añachña e'ñech patrra yocape'chen ñeñt e'ñe po'ño'ch alloch yequeshperra ñeñt atet oteney Yomporecop po'ñoñ. E'ñech yemorrentanna'teño't es yepa'yen. Attochña e'ñe yepohuen allohuen ñeñt atet cotape'chateney Cristo. Attochña yapa' e'ñech ora yocape'chen e'ñe atet cotape'chen Cristo. Ñeñto'marña esheccha'ña yeparrocmat epay Cristo, ñeñña Cristopa' yeyocher* yepañ ñeñt chocma yocape'chatene' cohuen Yomporecop.

16 Ñato' o'ch netma'ntacha ñeñt atet pena yechets. Ñehua, yechetspa' amach errotenot ellopa'tetsteno. Ama't allemeñ meyna'ten yechets chocma parrocmaten atto rremannenet e'ñe cohuen attoña yenpannenet. Ñaña yapa' yame'ñeño't Cristo e'ñe po'chets pohueney allohueney ama't pa'namen acheñrey. Attoña Cristopa' e'ñe parrocmatateney ñeñto'marña e'ñe yemorrentanna'teño't o'ch yeyenpannena e'ñe cohuen. Attochña allo'nach yesen atontatnomue' ñeñt atet eñotateney Yomporecop o'ch yemorrentannerra allohueney.

Atto Yomporecop o' etserrataterrnay yocapa'ña ñeñt atet muenen ña

17 Ñeñto'marña te'pa' o'ch notas ñeñt po'ño'ch sherbets Yepartsesharecop. Sapa' amach allo'na atet sepa'yesheno ñeñt atet patse'tyenena ñeñt ama ame'ñenayo Yomporecop. Tarro'mar ñeñt atet cotape'chatse'tyenet ñetpa' ñeñtpa' e'ñe orrena ama't mameshapa' ama es sherbeno.

18 Ñetpa' ama chenaneo pueyochreto ñeñt Cristo pocta'ña. Ñetpa' cha ottenet ñerra'mrrate' atarr checmeto'tsenet. Tarro'mar ñetpa' atarr echarretenet pueyochret attoch coteret Yomporecop. Ñeñto'marña amach enterreto correñets ñeñt huetsa Yomporeshot tarro'mar ama eñoteñeto Yomporecop.

* 4:15 O'ch secue' nota 1.23.

19 Ñet po'chñaret ama't mamesha o'huañcha' apencochen eñchet. Ñetñapa' e'ñech pocsheñsha' pomuenet po'chets attochña e'ñe ñeñña yoma'yenet ñeññ pa'namen sosya'tsañechno ñeññ ama aþapahuoyaye ama't mamesha.

20 Tarraña sapa' amaña atteye' seyçheno. Sapa' añña seyçhen ñeññ atet yeçhateney Cristo.

21 Tarro'mar napa' neñotenes sapa' o' se'mñoterrñañ Cristo po'ñoñ allempo yeyçhatas ñeññ e'ñe po'ñoçh attoch yeyemtera Jesús.

22 Sa ahuatpa' atta soctape'chatse'tyese't te'ña ñeññpa' o'ch sa'ypo'ñañper. Sapa' ñeññaña atarr seshcare'taye't attoña añach e'ñe semnatse'tyese't ñeññ ama cohuenayaye ama't mamesha.

23 Te'ña sapa' añepa'chña setserrataterre' Yompor e'ñe ora ñeññ atet soctape'chyen seyoçhro.

24 Añepa'chña chorraterrsa Yompor ñeññcha' soctape'chaterre' cohuen e'ñe etserra. Ñeññpa' attochña etserrataterrnas Yompor soctapña e'ñe atet cotape'chen ña. Allochñapa' attoch e'ñe pocte' es sepa'yen arr patsro ñeññ e'ñe po'ñoçh cohuen enten Parets.

Arrpa' all cotape'chatyenamet pa'namen ñeññ atarr sherbets

25 Ñeñño'marña te'pa' añ poctetsa socop amach allo'na seshcare'tanna'tyesneno. E'ñe puesheña'ttsos erroten sotannena, e'ñepa'ch po'ñoçh sa'poctaten señoñ samo'tseshacop. Tarro'mar e'ñe yame'ñeñoñ Cristo e'ñe yeparrocmatuen.

26 Ñaña ñerra'm esempo sa'tsrre'mapa' amach alla señoatatoña' o'ch sorrtat ñeññ ama cohuenayaye. Ñaña çhocmach semach'a'nerr e'ñe mamecma amachña ñeññaña sellap'sateno.

27 Allochñapa' attoch amach yemnatatsche oneñeñ o'ch atarr topateney, tarro'mar yocop ama pocteyaye o'ch yemnach oneñeñ o'ch atarr ahua'mencat peney.

28 Ñaña ñerra'm eseshas etetspa' añ poctetsa te'ñapa' amach allo'na setyesatsetneno. Ñeññ acheñerpa' taruasepa'ña e'ñe ña potot. Ama't erra'tsena ñeññcha' po'taruas þa'pa' ñeññ taruaspa' e'ñe cohuen ama apencoçhenayaye. Allochñapa' attoçha' echenan shonte' attoch apa'yesan ñaña po'potantañ ñeññ atarr es pallta'yetsa.

29 Amach yeñosatse'tyesatsto ñeññ ama cohuenayaye ama't mamesha. Añcha'ña yeñosyen ñeññ e'ñe cohuen entuen allohuen acheñenesha' ñeññcha' yenpuene' ñeññ e'mñotets. Attochña ñetpa' o'ch huomenc pet pueyoçher Yomporecop.

30 Attochña amach çha yelcateññañe Yompor Puecamquëñ ñeññ yeçhetsa yeyoçhro ñeññtara ñeññ Puecamquëñ pen ñeññ atarr cohuen Parets. Tarro'mar puechorreñoçey ya, Parets Puecamquëñ ñeññpa' ñeññña yeñoatene'yapa' puechemer peney Yompor tayoteñ ñaña esempohuañencha' allempoch ya'queshþataretterra.

31 Amach atsrre'moçhen sentanna'tatsto ama't seyoçhra. Allochñapa' attoch amach çha sa'tsrre'mare'tatanneno, attochña amach seche'çhame'tanneno. Ñaña amach sesasare'tanna'tatsto. Ama't mameshapa' amach se'moñe'tanna'tatsto.

32 Añcha'ña e'ñech cohuen yentannena ñaña e'ñech cohuen yemueran-nena. Ñaña añña poctetsa çhocmach yeþretnannena atto Yomporpa' o' peretnerrey yaña. Ñeññpa' añoñ peretnerrey atto rroma Puechemer Cristo yocop.

5

Ñeñtey puechemer pen Yomporpa' o'ch yorrtaten ñeñt atet muenen ña

¹ Yomporpa' atarr morrentenya, attoña e'ñe puechemer peney. Ñeñto'marña yocoppa'cho'ña añ poctetsa o'ch yorrtateññañ ñeñt atet cohuenare' es pa'yen ña ñeñt Yeyomporer yepen.

² Elloña Cristopa' atarr morrentenya. Ñeñto'marña e'ñe pocte' eñch attoña poma ñañeña atto rroma yocop atet pete't ahuat allempo muetsete't carrnero Yomporecop. Ñeñtña e'ñe cohuen ente't Yompor e'ñe atet ñerra'mrrate' ñeñt allo atarr eñmosa'ttamñpsachete't ahuat ña. Atto atarr morrentya Cristo, yocoppa'cho'ña añ poctetsa e'ñech cohuen yemorrentanna'tuena.

³ Ñaña amach ye'pa'yesatsto ñeñt ama pocteye' enteno ña. Ama't parrocha amach yechtatsche ñeñt ama ye'taporeyaye, ñaña coyanesha'pa' amach agapatstano ñeñt ama puerrollareyaye. Ñaña ama't mameshapa' amach ye'patsto ñeñt atarr sosya'tsañyets ñaña ama es aye'chapretanna'tpahuo. Ñeñt atet poctetsa allohuenacpay ñeñtey pueyochresha' o' perrey Parets. Allochñapa' ama't parrochapa' amach errofenot otyeto' yapa' atto yepena.

⁴ Ñaña serrpare'tatse'teñets sosya'tsañ ñeñt ama aserrpare'tpahuoyaye ñeñto'marña yapa' amach atet ye'patsto ama't mamesha. Ñaña otatse'teñets ñeñtpa' ama sherbeno Yomporecop ñeñto'marña yapa' amach atet ye'patsto. Ñaña allocchame'tanneñets ñeñt ama ayellsheñe'chpahuoyaye allo, ñeñtpa'cho'ña amach atet ye'patsto. Añcha'ña yapa' Yomporepa'chña yeparasyoso'ten.

⁵ Sapa' señoteñ ñeñt cañoresha'tetspa' amach es o'paterroña Yomporesho ama't e'ñe esempaña allcha' añcha'taretterra Cristo epuet Pompor. Ñaña allohuen ñeñt eñotene' pa'namen sosya'tsañ, ñeñtpa'cho'ña amach es o'patataretterrtsoña all añcha'tarettena Yompor. Ñaña ñeñt atarr es ye'chapretetsa añña po'yomporer pen ñeñt atarr es ye'chatse'tatene'. Ñeñto'marña ñapa'cho'ña amach es o'patateñoña Yompor all añcha'tarettena.

⁶ Amach se'mñotatsche acheñ ñeñt muenene' o'ch shecare'tas o'ch otas ñeñtcha' atet se'patse'ta samña ñeñtpa' e'ñe pocte' Yomporecop. Tarraña napa' o'ch notas, ñeñtpa' ama po'ño'choyaye, tarro'mar Yomporpa' chocmach coñchatuerran allohuen ñeñt atet atpare'tetsa, ñeñtpa' o' e'ñe notuanmas.

⁷ Ñeñto'marña te'pa' o'ch notas, sapa' amach socshapretatstaneto ñeñt atet patse'tyenet.

Ñeñt atet yorrtatyen allempo o' yocrrerra e'ñe cohuen puetaro

⁸ Ñehua, sapa' ahuatpa' po'ño'ch e'ñe atet socshapretatse'tyese't allempo sapa' checmeta socra'yese't. Tarraña te' e'ñe seyemteño't Yepartseshar o' chapatonas seyo'chro ñeñt cohuen enten ña. Ñeñto'marña te' socoppa' añ poctetsa o'ch sorrtateññañ ñeñt cohuen enten ña, atto sapa' o' socrrerra puetaro.

⁹ Ñehua, ñerra'm puetaroch yocrrera, ñeñtpa' atetcha' yorrtatyen. E'ñech cohuenacma es ye'panna'tyena ñeñt e'ñe pocte' enten Yompor ñaña ñeñtpa' ama shequëñtsoyaye ama't mamesha.

¹⁰ Ñaña socoppa' añ poctetsa o'ch sema'yo'chra eñotnomue' ñeñtcha' atarr cohuen entapre'tenes Yepartseshar.

¹¹ Ñaña te'pa' o'ch alla noterrser; amach socshapretatsche ñeñt atet patse'tyenet, ñeñtpa' ama es sherbeno ama't e'ñe mamesha. Tarro'mar

ñetpa' checmeta correnet. Sapa' añcha'ña sorratyen ñeñt e'ñe cohuenare' allochñapa' attoch eñochet ñeñt atet patse'tyenet ñet, ñeñt ama't mameshapa' ama cohuenaye' enteñe Yompor. Ñeñtpa' ñato' yapa' o'ch yot, yapa' o' ya'puetarsam̄psanet ñet ñeñt atet patse'tyenet checmeto.

¹² Ñehua, sapa' señoteñ ñeñt atet patse'tyenet a'nahua. Ñerra'm ya'mete'pa' ñeñtpa' atarr apencochen.

¹³ Ñaña ñerra'm ya'puetarsam̄psanet ñet ñeñt patse'tyenet ñeñt ama cohuenayaye, attoña ñetpa' o'ch çhapanet pueyoçhro ñeñt atet penet ñetpa' po'ñoçh ama cohuenayaye.

¹⁴ Ñeñto'marña socoppa' atet açhotenes añ ñoñets:

Papa' ñeñtep̄ atet patse'tyetsa e'ñe attep̄ ñerra'm çha atarr rroma pemuen. Te'ñapa' o'ch pe'manerra o'ch petanterra atto rroma pemuen. Cristopa' ñach pa'puetarsam̄perre'.

¹⁵ Ñeñto'marña te'pa' o'ch notas: Señota e'ñe erro'tente' sepa'yen, ñato' cohuenta' ñato' amate' cohuenayaye. Amach atet sepatsto atet ñerra'mrrate' ñeñt ama es eñotetso. Añcha'ña atet sepa'yes atet ñerra'm ñeñt atarr es eñotets ñeñt cohuentetsa Yomporecop.

¹⁶ Te'pa' arosña atta es pueçhatstatsa çhochña yetorra Yomporecop tarro'mar te' acheñenesha' atarr sosey yeçcatyenet arr patsro.

¹⁷ Ñeñto'marña notenes amach atta es sepçhatsto ñeñt atet pena ñeñt ama es eñotetso. Sapa' añcha'ña o'ch señotoñ ñeñt atet muenen Yepartseshar ñeñtcha' atet ye'pa ñeñt cohuen enten ña.

¹⁸ Ñaña o'ch notas, amach seposa'tatsto; ñeñtpa' çhach cotape'chatenes sosya'tsañeçhno attoch a'puerrataterres. Amach seposa'tatsto, añepa'chña sechorrenaya ñeñtcha' socshatene' ñeñtara Parets Puecamquañ.

¹⁹ Añepa'chña e'ñe socshapretannena ñeñt atet saçhoteñ Yepartseshar. E'ñepa'chña socsheñesha' seyoçhrocmañen semorreçhena allo ya'ye'choçhtateññañ Parets, ñaña allohuen morreñtsoçhno ñeñt Partsocop.

²⁰ E'ñe yeyerpueñoñ Yepartseshar Jesucristo çhocmuepa'ch yeparasyoso'teññañ Pompor allohuenacop pa'namenacop.

²¹ E'ñe semorrenteñoñ Cristopa' e'ñepa'chña cohuen same'ñannena. Attochña yecohuentateññañ Cristo.

Arrpa' all cotape'chatan yacma epuet puetapor

²² Ñeñtes arrollaretes o'ch notas, añ pocte' serrollarpa' ñachña e'ñe same'ñena atet yepen ñaña Yepartseshar Cristopa' ñachña e'ñe same'ñena.

²³ Tarro'mar serrollarpa' añ poctetsa atetcha' senteñ ñerra'mrrate' samo'mte' sepeñ. Attecma yepena yaña allohueney ñeñtey ame'ñetsa, añ Yamo'mte' yepen Cristo ñeñt yecuan̄pene'. Tarro'mar ñapa' o' a'queshpaterrey ñeñtey o' po'çhets perrey.

²⁴ Ñeñto'mar añ pocte' serrollarpa' ñach pomnaren sepene' allohuenacop, attecma yaña ñeñtey ame'ñetsapa' añcha' pomnaren yepene' Cristo.

²⁵ Te'pa' o'ch notas saña ñeñtes ataporetes, añ poctetsa e'ñech cohuen semorreñcha setapor. O'ch semuerya nanac atet peney Cristo atarr muerenya yaña ñeñtey ame'ñenaya ña. Ñeñto'marña puemorrenteño'tey ya ñapa' e'ñe pocte' eñch o'ch rroma yocop.

²⁶ Allochñapa' attochña e'ñe e'shohuerrnay allohuen yo'chñar o'ch a'cohuentaterrey Partsocop. Ñehua, ñeñt toma'ntena allempo yapataretterra Yomporecop. Ñaña po'ñoña' ñeñña e'ñe ya'cohuentaterre'.

²⁷ Allempoña o' ya'cohuentataretterra'pa' ñapa' mueneñ o'ch aguërrey al-lohueney ñeñtey ame'ñenaya ña. Ñaña ya atto o' ya'cohuentataretterra'pa' amach alla eñalletterte ama't mamesha ñeñtcha' ya'sosyaterrayerr. Amach alla enterrye'te atto ama cohuenaye' yorrteno ama't errotena. E'ñechña ya'cohuentataretterra Partsocop.

²⁸ Po'ñoçpa' ñeñtes ataporetespa' añ poctetsa socop e'ñepa'ch cohuen semuerya setapor e'ñe atet atarr semorrentena sañeña. Tarro'mar ñerra'm atarr yemorrenteña yetapor ya'naña atarr morrentetsa, tarro'mar yetaporpa' ñeñtara yechets yepen.

²⁹ Ñehua, yapa' yeñoteñ ama't e'ñe puesheñarroçeya ama yetsena'tenoña e'ñe ya yechets. Chochña e'ñe cohuen yerren esheccha' e'ñe huomencna'ntatene. E'ñech cohuen yecuen e'ñe ya yechets. Attecma peney ñaña Cristo atarrcha' cohuanpeney ya allohueney ñeñtey ame'ñenaya ña.

³⁰ Tarro'mar ñapa' ña e'ñe po'ñoçh po'chets pohueney ya. Pa'namenot po'chets pa'yeney allohueney ñeñtey ame'ñenaya ña.

³¹ Ñehua, Yompor po'ñoñ ñeñt aquellcayet ahuatoteñ ñeñtpa' atet oten: "Ñeñto'marña ñerra'm esempo yesna'ta amapa' coyanesha'pa' o'ch echan puerrollar; añ pocte' o'huañcha' tama yeyemteña yachor ñaña yompor. Allochñapa' attoch e'ñe yeparrocmaten epay yetapor. Attoña e'ñe epsheño'mareypa' e'ñech patrra yechets yepen."

³² Ñeñtpa' ahuatoteñ ama eñotpahuoyaye ñeñt toma'ntatenya añ cotapñats. Tarraña te'pa' napa' noten añ yetma'ntenaya ñeñt atarr cohuen ñeñt atto e'ñe yeparrocmaten epay Cristo allohueney ñeñtey ame'ñenaya ña, ñeñtara ñeñt po'chets yepene' allohueney.

³³ Ñeñto'marña o'ch alla noterrser; e'ñe puesheña'ttsospa' e'ñepa'ch cohuen semuerya setapor atet atarr semorrentena e'ñe sañeña. Ñaña ñeñtes coyaneshaspa' o'ch notas, añ poctetsa ñaña socop semorrenteño'tpa' same'nyach serrollar; ñaña e'ñech cohuen senteñ.

6

Arrpa' all cotape' chatan cheshanasha' epuet pamo'mte'

¹ Te' cheshaneshacha' o'ch notas ñeñt poctetsa socop ñeñtcha' atet sepa. E'ñe same'ñeño't Yepartseshar Cristo çhocmuepa'ch e'ñe cohuen same'ñeña sompor ñaña sachor, tarro'mar ñeñt poctetsa socop.

² "Ñaña e'ñe semorrenteño't somporpa' çhocmuepa'ch semcha'na'ch ñaña sachor" tarro'mar ñeñtpa' ñeñt e'ñe ñanom atet ot Yompor ñeñtcha' atet yepeñ yamo'mte' allochñapa' attoch e'ñe cohuen a'natenya Yompor.

³ "Attoch pa'nateño'tes e'ñe cohuenpa' atomatcha' socrena arr patsro."

⁴ Te'pa' o'ch notas samña ñeñtes pamo'mte' pen cheshanasha', se'moñe'teño'tpa' amach sa'tsrre'mare'tatatsche sacñeñarnesha'. E'ñechña añeñolloteñ e'ñe secuanpeño't cohuenpa' o'ch seyçhatyenenet e'ñe cohuen attoch ñetpa'çho'ña o'ch ame'ñeret ñamet Yepartseshar Cristo. Ñaña amach semnatatstaneto o'ch atta atarr atpare'taset.

Arrpa' all cotape' chatan ataruasañ epuet po'patronar

⁵ Te'pa' o'ch notas samña ñeñtes ataruasaretes ñeñt poctetsa socop. Chocmach same'nya ñeñt setaruasatene' arr patsro. Ama't erra'tsena apuenset ñeñtcha' setaruas sepa' e'ñechña semcha'na'teño't setaruasen e'ñe cohuen seyoçhrocmañen. Ama't acheñecpa setaruasenpa' atetcha' setaruasen ñerra'mrrate' Cristocop setaruasen.

⁶ Amachña e'ñe puecuampeño'tesa sema'yore'teno taruasats attoch e'ñe cohuen socshach sepatronar attoch e'ñe pocte' entenes. Añcha'ña ama't acheñecpa setaruasempa' e'ñechña atet sesherbeñ cohuen ñerra'mrrate' Cristo sesherben. E'ñechña seyo'chrocmañen sepena cohuen ñeñt atet muenen Yompor.

⁷ E'ñe semneñño'tpa' e'ñech cohuen socsheñeshocmañen setaruasen tarro'mar ama ñap'ta acheñecop setaruaseno, Yomporecpa'ñaña setaruasen.

⁸ Te' sapa' e'ñe seño'teñ ama't erra'tsente' cohuen es ye'pa'yen, Yepartsesharñapa' chocmach alla aphuerrey e'ñe puesheña'ttsoy ñeñt'cha' atarr cohuen yocshaterre' ama't añ acheñer ñeñt ataruasatare't amapa' añ acheñer ñeñt e'ñe cohueno'tsen, attec'mach apa'yuesuerranet ñeñt'cha' atarr cohuen coshaterrahuet ñet.

⁹ Ñaña te'pa' o'ch notas ñeñtes taruasatets. Sapa'cho'ña atet'cha' sepoñ sa'taruasañer ñeñt atet poctetsa, amachña cha sechemama'tyenaneto. Seño'chepa'ch sapa'cho'ña sechen Samo'mte' Cristo ñeñt pue'ntaño'tsen. Ñeñtara ñeñt Pamo'mte' pen allohuen sa'taruasañrenesha'. Ñaña ñapa' ama puesheña'ttsa morrenteno.

Ñeñt apuene'y Yompor ñeñt'cha' yemoñenaya attoch amach alla a'puerrataterrye oneñe't

¹⁰ Allohuanen arr necarto't o'ch masheñneshacha' ñaña no'chaneshacha' notas, ahuamencatepa'ch p'as Yepartseshar tarro'mar ñapa' ña atarr ahuamencattetsa.

¹¹ Ñeñto'marña añ poctetsa yocop o'ch yaguërrñañ ora allpon ñeñt apuene'y Yompor allochñapa' ñeñt'cha'ña yemoñenaya attoch amach alla a'puerrataterrye oneñe't. Tarro'mar yeñoteñ oneñe'tpa' chocma e'nenan attoch shecare'teney.

¹² Tarro'mar po'ño'chpa' ama acheñeye' ye'cllareno ñeñt entpo' po'chets. Yapa' añña ye'cllaren oneñe'te'chno ñeñt ama erro't a'papahuo e'ñe ya yoto't tarro'mar ñeñt'pa' ama entpahuoyaye po'chets erro'tente'ña. Tarraña ñeñt'pa' atarr añcha'no'chetyena ñaña atarr ahuamencate'chno. Attoña pomnaren penan allohuen acheñenesha' arr patsro ñeñt p'atse'tyene' ñeñt ama cohue'nayaye ñeñt checmeto'tsena. Ñeñtara oneñe'te'chno ñeñt ama cohuenaye' ye'chcatetso ñeñt erracmañen añcha'no'chetyetsa ento't.

¹³ Ñeñto'marña notenes, o'ch saguërrñañ allohuen allpon ora ñeñt apuene'y Yompor allochñapa' ñeñt'cha'ña allo yemoñena attoch amach alla a'puerrataterrye oneñe't ñerra'm esempo atarr nanac topateney. Tarraña ama't allempo pa'namenot atarr topateney yañapa' amach erro'tenot a'puerrataterrye.

¹⁴ Te'pa' o'ch neñotatas ñeñt apuene'y Yompor ñeñt'ña yemoñenaya attoch ama a'puerrataterrye oneñe't allempo topateney. Ñato' o'ch netma'ntacha ñeñt atet pa'namen chorra'yena solltarnesha' allempo quellarenet.* Ñeñt ñanom ñeñt'pa' Yompor po'ñoñ ñeñt e'ñe po'no'ch ama shequëñtsoyaye ama't mamesha. Ñeñto'marña yapa' e'ñech yeñmañesha' es ye'pa'yen, amach yeshcare'tanna'tyesatsto. Ñato' o'ch netma'ntacha ñeñt'pa' ñeñt'ña yechanar yepen ñeñt'cha' ahuamencat yepe' atet ñerra'm solltar apueñet chanarets alloch chanena ñeñt quellarenet. Elloñapa' e'ñepa'ch cohuen es ye'panna'tyesnoma ñeñt atet e'ñe pocte' enten Yompor. Ñeñt'pa' añ

* **6:14** Ñehua, ñeñt'pa' atet chorra'yese't ahuat solltarnesha' allempo quellarete't.

toma'ntena asrom atet ñerra'mrrate' ñeñt chorrena solltar ñeñt a'natene' puesomap allempo quellarena.

¹⁵ Te'ñapa' o'ch se'shpo'cha e'ñe socsheñesha' o'ch ahues allcha' seserrpare'tyena' atto Yomporpa' o' amo'tsterrya attochña e'ñe cohuen a'queshpaterrey. Ñeñtpa' añ toma'ntena atet pena solltar o'ch nan po'sapatpa' o'ch ahuo' allcha' quellarosa.

¹⁶ Elloña ñeñt nanac sherbets ñeñtpa' añ, chocmuepa'ch e'ñe cohuen yeyemteña Yompor ñeñt atet oteneý. Ñeñtpa' añ toma'ntena solltar pue'scudo allo a'natena allochñapa' attoch ama etaretteneto. Ñehua, atto huomenc topateney oneñeñ ñato' o'ch netma'ntacha ñerra'mrrate' ñapa' cho sanapecheney po'chopaño ñeñt huoretnets. Tarraña ya e'ñe yeyemteñoñ Yompor ñeñtpa' ñeñtña ye'scudo yepen ñeñtcha' chocma emayene' oneñeñ po'chopañ ñeñt huoretnets allo sanapecheney.

¹⁷ Ñaña yapa' yeñoteñ Yomporpa' te'pa' o' a'queshpaterrey, ñeñtña yemoñenaya. Ñeñtpa' añ toma'ntena atet pena solltar o'ch na'nman asret poño attoch ama etto'cheto. Ñaña o'ch yerrmoñ Yompor po'ñoñ yeyo'chro ñeñt atet eñotateney ña Puecamquëñoñ; ñeñtpa' ñeñtña yepanmet yepen alloña yeçllareñña oneñeñ.

¹⁸ Ñaña sapa' chocmuepa'ch sema'yochena ama't erroteno'tsensa. Añcha'ña seyepuene' Parets Puecamquëñ. Allochñapa' attochña chocma sema'yochrena ma'yochatsa. O'ch senañ Yompor ora allpon ñeñt sepalltena, ñaña chocmuepa'chña e'ñe sema'yochamñpesueña allohuen ñeñt pueyochresha' pen Parets.

¹⁹ Napa'cho'ña chocmuepa'chña sema'yochamñpenna. O'ch senamon Yompor nocop allochñapa' ñachña ne'ñoratene' attoch amach nem'cha'nañoña neserrpare'teññañe po'ñoñ. Allochñapa' attochña neñotatyesanet cohuen ñoñets ñeñt alloch e'ñe yequeshpa'huerra allohueney; ñeñtpa' ama eñotpahuoyaye, ama't ahuatoteñ.

²⁰ Napa' allsensareten ñeñten eñosyets e'ñe cohuen Yomporecop. E'ñe neñosyeñoñ Yomporecop ñeñto'marña te'pa' yottamñpennet. Ñeñto'marña nemneñ o'ch sema'yochamñpenna attoch amach nem'cha'nañoña neserrpare'teno ñeñt e'ñe cohuen ñoñets alloch yequeshpa'huerra. Attochña e'ñe nocsheñeshocmañen neserrpare'ten tarro'mar ñeñt e'ñe cohuen atet poctetsa nocop.

Arrpa' all so'tnerranet e'ñe po'cartot

²¹⁻²² Te'ñapa' o'ch notas, o'ch nemñonas masheñ Tíquico ñeñt atarr nemorrentena. Ñapa'cho'ña chocma atarr cohuen torrena Yepartsesharecop. Ñapa' ñeñto'marña o' nemñe sesho allochñapa' ñach señotatuere' ñeñt atet yepena ya arr. Attochña atarr coshatuerres seyo'chro.

²³ Te'ña masheñeshacha' ñaña no'chaneshacha', Yomporepa'chña semorrentanna'tataya e'ñe same'ñeñoñ, ñeñtara Parets epuet Puechemer Jesucristo ñeñt Yepartseshar yepen. Ñetepa'chña socshatene' seyo'chro.

²⁴ Ñaña ñetepa'chña e'ñe sa'natenaya allohuenes ñeñtes e'ñe cohuen morrentenaya Yepartseshar Jesucristo. Ñeñt atto semorrenteñapa' amach ahuañaña'atterro ama't e'ñe ahuaña. Ñeñtach notas, ñeñtpa' attetepa'ch Nom-pore. Allohua.

Pablo

AÑ SAN PABLO PO' CARTA ÑEÑÑ QUELLCAN FILIPOSO' MARNESHA' FILIPENSES

Pablopa' quellcan carta all ayottam̄psarettena; añecop quellquë' ñeññ ame'ñetsa anetso Filiposo

¹ Masheñneshacha' ñaña nochaneshacha' ñeñtes allohuenes o' pueyochresha' perres Parets e' ñe separrocmateñoť Cristo Jesús all anetso Filiposo, ama't ñaña sa'mcha'tareterneshohuen ñaña ñeñtes diáconochnos ñeñtes sherbets all puerahuo. Na Pablón epan masheñ Timoteo ñeñten sequellquëne'ña añ carta.

² Te'pa' e' ñe nehuom̄cha'teñoťes sa, napa' o'ch notas: Yomporepa'chña sebensare'tam̄pene' ñeññ nanac Parets epuet Puechemer Jesucristo ñeññ Yepartseshar yepen. Ñetepa'chña socshatene' e' ñe sa seyochro allohuenes.

Arrpa' atet ma'yocham̄penanet Pablo

³⁻⁴ Te'pa' o'ch notas, allempo nema'yocheña Yompor ñeññ neyemtena na, neyerpueñoťespa' chocma nocshensa Yomporeshoť. Ñeñño'marña allempo es nenamuennas Yomporpa' chocma nocshensa Yomporeshoť allohuenes.

⁵ Tarro'mar allempoteñ saguër Cristopa' sapa' allo'na't sesen ame'ñatsa teme'ttsen. E' ñe same'ñeñoťpa' attoña sellcapretna attoch errotenoťpa' o'te' epa'huerra erracmañen añ cohuen ñoñets alloch yequeshperra.

⁶ Ñaña napa' neñotenes atto Yomporpa' o' ame'ñatasa ahuaña, te'ñapa' ñepa'chña allo'na'ahuamencat sepa'nmue' e' ñe ñocop, tayoteñ ama't esempohuañencha' huerra Jesucristo pue'ntañoť.

⁷ Ñeññ atet nentapretenespa' ñeññpa' e' ñe pocte' tarro'mar atarr nemorrentensa e' ñe neyochrocmañen. Ñeñño'marña yellcanna'teñoťpa' yeñoteñ Yompor e' ñe puemuereñoťpa' amach a'ypo'ñerrno na ama't ñaña sa. Atet napa' ama't cárcelo'tsenen Yompor puemuereñoťenpa' amach a'ypo'ñerrno. Ñaña ñerra'm allempo achm̄are'tenet añ cohuen ñoñets alloch yequeshperra, atto napa' nemoñena añ cohuen ñoñets, Yompor puemuereñoťenpa' chocma ahuaamencat penen. Ñaña allempo name'ñateña acheñenesha' añ cohuen ñoñets alloch yequeshperra, Yompor puemuereñoťpa' chocma ahuaamencat penen.

⁸ Ñeñño'marña te' Yomporpa' eñotenen po'ñoch te'pa' nanac neyerpuensa. E' ñe atet nanac nemorrentensa ñerra'm atet morrentenya Jesucristo e' ñe cohuen.

⁹ Atet nenamuennas Yompor socoppa' atet noten, allo'nepa'ch sesen morrentanna'tnomtsa nanac ñaña allo'nepa'ch sesen eñotnomue' ñeññ nanac sherbets yamo'tseshacop. Allochñapa' attoch chocma yorrtaten yemorrenteña e' ñe po'ñoch.

¹⁰ Attochña señoť erra'tsente'ña nanac cohuen sherbets Yomporecop. Allochñapa' e' ñe señoťeñoťpa' añepa'chña atet sepa'yen ñeññ e' ñe cohuenare'. Allochñapa' amach cha sa'yohuaretterro ñerra'm esempohuañencha' huerra Cristo.

¹¹ Ora atet nenamuennas Yompor socoppa' atet noten, e' ñe same'ñeñoť Jesucristo poctacmapa' añepa'chña cohuen atet sepa'yen ñeññ nanac sherbets Yomporecop. Ñerra'm atet yepenapa' attochña e' ñe cohuen ya'cshapretarettena Yompor po'cohuenña.

Atto epatuan allohuenacop Yompor po'ñoñ e'ñe cárceloĩ

12 Ñeñto'marña masheñeshacha' ñaña nochaneshacha' o'ch neñotatas, ama't atto ayottam̄psareten cárcelo ñeñtpa' ama añecpayaye attoch o'ch epatare'tenan cohuen ñoñets alloch yequeshperra. Elloña e'ñe attotpa' allo'nach sen epa'huatsa Yompor po'ñoñ.

13 Ñeñto'marña te'pa' allohuen guardianesha' ñeñt̄ cohuan̄pene' am̄cha'taretepo' ñetpa'cho'ña o' e'ñe eñotuanet atto ayottam̄psareten cárcelopa' añoñña e'ñe name'ñeñoñ Cristo atet pennet. Ñaña ama't pa'namen acheñenesha' te'pa' o' eñotuanet ñeñtecop nemueroçhtena.

14 Ñeñto'marña te'pa' shonte' masheñesha' e'ñe allo'na senet yemuet-nomuet Yepartseshar Cristo poctacma, tarro'mar ñetpa' atet entennet e'ñe name'ñeñoña Cristo nemueroçhtena cárcelo. Ñeñto'marña ñetpa'cho'ña o'huañ mecha'na'tet serrpare'tet Yompor po'ñoñ.

15 Ñehua, po'ñoçhpa' eñall puesheña'tets tarrecpach serrpare'tenet Cristo e'ñe pue'matare'teñoñetan na. Tarraña po'psheññechnopa' e'ñech pocsheñeshocmañen a'poteññañet Yompor po'ñoñ.

16-17 Añpa' e'ñe puemorrenteñoñetan atet penet tarro'mar ñetpa' eñotennet napa' anareten atto nach moñenaya añ cohuen ñoñets alloch yequeshperra ñerra'm esempo achm̄are'teñet. Tarraña ñeñña serrpare'tene' Cristo po'ñoñ e'ñe ñocpuetapa' amach pueñmañeshacmaye' serrpare'teneto. Ñetpa' chate' otenapuetañ allo'nach atsrre'moçhen entatnennet ama't cárcelo'tsenen.

18-19 Ñehua, ama't atetpa' nocoppa' e'ñe pocte'. Ama't erroteno serrpare'tenet cohuen ñoñets Cristocop, nocoppa' e'ñe pocte' nenteñ. Tarro'mar ama't puehquẽñme'chatsa serrpare'tenet Cristo, ama't ñaña pueñmañeshoçha' serrpare'tenetpa' napa' ñeñt̄cha'ña nanac nocshatene'. Ñeñto'marña napa' çhocmach nocshena tarro'mar napa' neñotenes sapa' çhocma sema'yocham̄penna ñaña neñotena Jesucristo Puecamquẽñpa' ñeñña ahuamencat nepene'. Ñeñto'marña neñoteñ añ mueroçhteñets tsapañetpa' a'poctatareçha' e'ñe cohuen nocop.

Atto Pablopa' ora allpon corre't arr patsropa' ñeñtpa' e'ñe ora Cristocop

20 Ñeñto'marña e'ñe nocsheñesha' necueñ tarro'mar neñoteñ amach apen-catare'teno ama't mamesha. Ñaña amach nem̄cha'nañoñayaya ne'ñoreno e'ñe cohuen Cristocop. Attochña napa' acshapretpo' entapre'tennet Cristo, ama't napa' erroteno'tsenencha' ama't ñerra'm nerroma amapa' ñerra'm ora nocrenmeñ. Atet ahuañtoñepa' te'pa'cho'ña attecmuepa'ch pena.

21 Tarro'mar napa' allpon nocrena arr patsropa' ñeñtpa' e'ñe ora Cristocop. Ñaña ama't çho nerromapa' ñeñtpa' elloña nanac cohuen nocop.

22 Ñaña ñerra'm allempo nocrenmeñpa' torrenayanach Yompor po'taruas tarro'mar attotcha'ña allo'nach nesherb̄atneññañ Yompor po'ñoñ. Ñeñto'marña ñeñt̄cha' nanac nemna' te'pa' ama neñoteñe erra'tsente'ña ñeñt̄ nanac sherbets, ñato' o'ch nerroma tayecma amapa' ñato' corretsanach.

23 Ñeñt̄ nanac torrapo' nenten o'ch notas ñeñt̄ atarr cohuen nenten, ñato' o'ch nerroma amapa' corretsanach. Napa' nemneñeñ o'huañcha' nocrra añe patsro allochñapa' o'ch neçhap tecma Cristesho, tarro'mar ñeñtpa' elloña nanac cohuen nocop.

24 Tarraña ñerra'm amach nerromopa' ñeñt̄cha'ña nanac sherbats socop.

25 Ñeñto'marña napa' neñoteñ amach nerromo, amach nesa'nerrso, allochñapa' allo'nach nesen seyçhatnomue' allohuenes atto ñerra'm allo'na yesen yemtaya Cristopa' çhocmachña yocshena.

26 Allochñapa' ñerra'm esempo neçherr seshopa' allempochña alla neñotaterr serr nanac, attoch allo'na sesen nanacocmañen coshaya Cristo.

Chocmuepa'ch yocrrena e'ñe cohuen ñeñt atet oteney Yompor po'ñoñt

27 Te'pa' añach notas, chocmuepa'ch socrra e'ñe cohuen ñeñt atet yorrtaten ñeñtey ame'ñenaya Cristo po'ñoñ. Allochñapa' ñerra'm machayota nabcherrsa' amapa' ñerra'm ama'tcha' ama yabchannerropa' e'ñepa'chña cohuen ne'mare'tenes atto e'ñe huomenc sepen seyoçher attoch e'ñe patrra soctape'chen. Ñaña o'ch ne'mare'tas atto sapa' sema'yochrena allohuenes parro attoch semoñena añ cohuen ñoñets alloch yequeshperra.

28 Ñaña amuepa'chña añña seyore'tatstaye ama't mamesha ñeñt se'moñe'tene' tarro'mar ñetpa' ñeñtcha'ña eñotatahuet po'ñoçh ñetpa' amach queshperreto. Tarraña yocopñapa' ñeñtña yeñotatene' po'ñoçhpa' yequeshpa'huerrach. Añechnopa' Yomporo poctapña.

29 Ama patrrayaya muenateney Yompor atto o' yame'ñera Cristo. Añña e'ñe pueuereñoçey muenateney ñaña e'ñe yame'ñeñoçpa' choçña yemue-roçhta ñocop.

30 Ñeñto'marña sapa'cho'ña e'ñe poçte' o'ch sa'mueroçhtataretta Cristocop e'ñe atet sentenen na ahuaçoteñ ama't teme'ttsenpa' se'mare'tenen napa' allo'tsenarana all nemueroçhtena e'ñe name'ñeñoç Cristo.

2

Atetcha' yentena yañeña e'ñe puesheña'ttsoy atet ente't Cristo e'ñe ñañaña

1-2 Te'pa' o'ch notas ñaña po'poñ. Ñerra'm po'ñoçh yame'ñeñoç Cristo e'ñech yocshatannena allempoña po'ñoçh sapa' socshatterrencha' ñaña. Añña ñeñtcha' nocshatene' e'ñe poctacma ñerra'm e'ñech patrra soctape'chuen allohuenes. Ñaña ñerra'm po'ñoçh e'ñe yemorrentanna'teñoç e'ñech yeyemtanna'tuenapa' ñehua, te'ñapa' chocmuepa'ch semorrentannena ama't e'ñe sagatssa ñeñtes e'ñe parro'marneshacmas. Ñaña ñerra'm allohueney po'ñoçh chorra'huenya ñeñtara Parets Puecamquëñpa' ñeñtotcha'ña e'ñepa'ch sepatrratuen soctapñoç allohuenes. Ñaña ñerra'm po'ñoçh e'ñe socsheñsha' semuerannenapa' ñeñtotcha'ña amach po'poñ sentanna'tuatsto.

3-4 Ñaña amach añña atarr sellcatsto ñeñt e'ñe socpa. Aññaña puesheña'ttsospa' sellcapreta ñeñt llecatyene' samo'ts. Ñaña amach sañeña entatstatso atet ñerra'mrrate' ñeñtes nanac sherbets. Aññaña atet sent samo'ts atet ñerra'mrrate' ñeñtña nanac sherbetset, pañapa' amach es asherbenaye' penteno.

5 Añña poçte' o'ch senta sañeña atet ente't Cristo Jesús e'ñe ñañaña allempo huapa añe patsro.

6 Ñehua, ñapa' ama't nanac Paretspa' ama ommo'chane'te po'partsoña.

7-8 Ñapa' e'ñe poçte' enche't o'ch atet enteñ acheñenesha' ñerra'mrrate' ñapa' ama Partsoyaye, o'ch atta orrtena ñerra'm ama esoyaye atet pena acheñ ñeñt e'ñech pauner aparettena. Tarraña añecop atet pe't attotcha' sherbenan Pompor ama't ñaña acheñenesha'. Ñaña ñapa' ama't Paretspa' o' acheñetos arr patsro, e'ñe atet orrtosa ñerra'm ya ñeñtey arromñaçey. Ñañaña allo'na sen pauner entatatsa attoña e'ñe pue'mñoteñoç Pomporpa' e'ñe poçte' eñch o'ch rroma corsocho ñeñt nanac apencoçhen entete't ñerra'm esesha' rromats atet corsocho.

⁹ Ñeñto'marña attotña Pomporpa' o' alla nanac a'cohuentater ñaña o' alla aphuer ello pa'so'cheñ ñeñt nanac cohuen sherbets. Ñeñtña so'chñetspa' ello metana'tuanenan allohuen po'poñečno so'chñetsočno.

¹⁰⁻¹¹ Ñeñto'marña esempohuañenpa' allohuenet po'yorñoťetpa' a'meta'hueretcha' e'ñe poctacma, Jesucristepa'tña ñeñt nanac partsotets. Allochñapa' atto e'ñe pame'ña'rreñoťet Jesús pa'so'chñopa' concorpa'rretueretcha' allohuenet ñeñt allpon eñall ama't allohuen ñeñt ento'marnesha' ñaña allohuen patso'marnesha' ñaña allohuen o'pono'tseneshačno ñeñt patso'tsen. Attochña allempopa' aye'chočhtataretterra Yompor ñeñt nanac Parets.

Añach yema'yochrena attoch allo'nach yesen ama't acořa etsotyenomue' ñeñt poctetsa Cristocop

¹² Te'pa' e'ñe nemorrenteñoťes masheñnesha ñaña nočhanesha o'ch notenes, ahuañmo'chapa' chocma se'mñotneť ñeñt atet notaseť allempo sesho'tsenen. Te'pa'cho'ña attecma se'mñoten ñeñtcha' atet noterrser ama't te'pa' nanac bačhayo'tsenen seshoť. Te'pa' añach notas ñeñtcha' atet seřa. Chocmuepa'ch sema'yochra attoch allo'nach sesen etsotnomue' ñeñt cohuen enten Yompor, tarro'mar ñapa' ñeñtecopña o' a'queshpaterres. Tarraña e'ñech señcha'na'teñoť seyomcha Yompor tarro'mar yeñoteñ yoročheno'tsenya ñerra'm ama Yompor po'huamenco yeyemto.

¹³ Tarro'mar Yompora e'ñe yemnatene' e'ñe yeyochro ñeñt cohuen enten ña. Ñaña ñapa' ñach ahuamencat yepene' attoch yetsotoñ ama't ora erra'tsencha' coshatene' ña.

¹⁴ O'ch noterrser ellonet te'pa' ñeñt ama atteye' es sepeno. Ama't eseshacpa amach epuoye' es atet sepeno, señošeñošopa' amach es soñare'tanna'tatsto.

¹⁵ Allochñapa' ñerra'm ama atet yepenopa' e'ñech cohuen entyeny allohuen acheñenesha', amach eñalle attoch esesha'pa' o'ch eñošyenet yocop año' pocteye' es yeřa'yeno, tarro'mar e'ñech cohuen es yocape'chyen attoch yorrtaten atet penaña ñeñt po'ñočh o' puechemer per Yompor. Amach eñalle ñeñtcha' a'sosyatene' atto yocrrena e'ñe cohuen Yomporecop año patsro. E'ñech cohuen yorrtena acheñenesha'cop ama't ñeñt ama ame'ñetso ñeñt atarr nanac sosey cotape'chenet. Cohuencha' yorreyena atet ñerra'mrate' rantočno ñeñt a'puetarene' checmete' tsapo.

¹⁶ Attoch sa'puetarsamřsanetpa' choch señoťaterranet ñoñets ñeñt huetsa Yomporeshoť alloch yocrerra e'ñe cohuen. Allochñapa' ñerra'm esempohuañencha' huerra Cristopa' socshatterrencha', tarro'mar neñotercha' ama e'ñe orrena nanac neťorrerro socop.

¹⁷ Ñaña ama'tcha' machayota muetsataterret arr atto napa' o' name'ñatasa, napa' atarr nocshena ñaña te'pa'cho'ña nocshapretensa atto same'ñerra. Añña same'ñeñapa' ñeñtcha' yehuapateññañ Yompor atet ñerra'mrate' ñeñt amtsareťtetsa ñocop. Ñaña nerraspa' ñeñtcha' orrtatsa ñerra'mrate' ñeñtcha' ashatarettatsa all ñeñtcha' o'patateñet Yompor.

¹⁸ Ñeñto'marña napa' nemneñ sapa' amach čha sellcatsto, chochña socshapreterra ñeñt atet o' notuas.

Timoteopa' nanac cohuen llecapretane't pamo'tsesha'

19 Te'pa' o'ch notas ñeñt atet noctape'chen. Añ noctape'chen o'te' nemñer masheñ Timoteo tayecma o'ch enterrsa', ñerra'm atetcha' muena' Yepartseshar Jesús. Allochñapa' ñach neñotatuerte' erro'tente' sepa'yena, allochñapa' attoch socshaterren ñerra'm cohueno'tseneste'.

20-21 Añcha' nemñonas masheñ Timoteo tarro'mar ama eñalle ama't puesheñarra ñeñt cotape'chene' cohuen atet ñerra'm ña ñeñtcha' e'ñe po'ñoçh sellcapretenaya ñeñt echarr sentyen. Tarro'mar ama't eñalleñ ñeñt parro yetorrena, ama allohuenacmaye' llecapretenseto ñeñt echarr sentyen. Añach torra'yenet ñeñt e'ñe ñocueta. Amachña añeye' llecapreteneto attoch torrenet ñeñt nanac sherbets Jesucristocop.

22 Ñaña sapa' e'ñe seño'tueñ atet masheñ Timoteopa' e'ñe cohuen pa'yena allempo parro yeserrpare'tatyen añ cohuen ñoñets alloch yequeshperra. E'ñe cohuen torrapretenna atette'ña ñerra'm yechemerpa' e'ñech cohuen yenpueney yetaruás.

23 Ñehua, esempoch e'ñe neñoçh ñato' erro'tente' poctetsa nocoppa' napa' noctape'cheñ o'ch nemñonas masheñ Timoteo.

24 Na te'pa' aña necuen Yepartseshar Cristo ñerra'm ñach muenats, napa'çho'ña naçcherrsa'ch amach atarr natomatatatsche.

Atto Epafroditopa' yenpa'yesosan Pablo all cárcelo

25 Ñaña o'ch notas po'poñ, e'ñe pocte' nenteñ te'pa' o'ch alla nemñer sesho masheñ Epafrodito ñeñt parro yetaruaseño'tpa' nanac yetorre't Yomporecop. Ñeñtara masheñ Epafroditopa' ñeñt semñon ahuaña ñach neyenpa'yesose' all es nepalltena ñeñtcha' neyenpose' arr.

26 Napa' e'ñe pocte' nenteñ te'pa' o'ch alla ahuerr sesho, tarro'mar ñapa' nanac yerpuensa attoch o'ch alla entuerres. Tarro'mar ñapa' añ nanac llecatene' atto sapa' ahuo't se'mare'ch ñapa' cha atsna'tos arr.

27 Ñehua, po'ñoçh ahuañapa' cha atsna'tos cha muene' rromañ, tarraña Yompor e'ñe puemuereño'teypa' o' alla a'crrater atto ñerra'm rromaña' el-lote' na'na llecatañ arr cárcelo.

28 Ñeñto'marña e'ñe poctennana o'ch nemñer e'ñe tayecma sesho allochñapa' o'ch socshapuera ñerra'm esempoch çherr e'ñe sesho. Allochñapa' amach ña'na allo'na nellcatnenaye.

29 E'ñech separasyoso'teñesha' Yepartseshar Cristo o'ch sagapapuer ñaña e'ñe socsheñeshocmañen. Ñaña o'ch notas, çhocmuepa'ch semorrenteña ama't erra'tsena acheñer ñeñt e'ñe atet senten ñerra'm ña.

30 Atto ñapa' e'ñe puemneñño't o'ch torra Cristocop cha atsna't ama't cha muene' rromañ. Atarr yoreretso't correrra arr, tarraña ñapa' ama ñeñt'ayaya mecha'to attoch ñapa' o'ch yenposen, ñeñt sapa' amate' erro't sepe attoch sehua'cha'ta baçhayot e'ñe puesheña'tsos attoch seyepuenna' arr.

3

Arrpa' all eñotatyesanet ñeñt e'ñe po'ñoçh sherbets Yomporecop ñaña ñeñt e'ñe orrena cotapñats

1 Ellonetpa' o'ch alla masheñesha ñaña noçhanesha noterrrerr po'pocheño, e'ñe same'ñeño't Yepartseshar Cristopa' çhocmuepa'ch socshena. Ama't te'pa' o'ch alla noterrrerr atet tarro'mar amach nemuenme'che sotare'te' atet, tarro'mar ñeñt'pa' ñeñtcha' nanac seyemta sa.

2 Ñaña te'pa' o'ch notas po'poñoneñ. Seño'ta'tach ñato'tña seyemteña' ñeñt acheñeneshar ñeñt añach torrenet ñeñt ama cohuenayaye, ñeñt e'moñe'tene' cohuen serrparñats ñeñt alloch po'ñoçh yequeshperra. Ñetpa' e'ñe atet

nentenamet ñerra'mrrate' ochec ñeñt nanac atsena'tareť. Ñeñt judionesha' ñeñt o' notuanmaspa' añach ma'yočhrenet coťapñats attoch tsorrannenet atto'ch puechemer perranetañ Yompor.

³ Tarraña yapa' yaña e'ñe po'ñočh puechemer o' enterrey Yompor, tarro'mar yapa' e'ñe yeñoteñ ama yetsorranna'teñoťeye' puechemer penye Yompor. Po'ñočh puechemer perrey tarro'mar yapa' e'ñe yocsheñoť Parets ñeñtpa' e'ñe Puecamquëñoť huena. Ñaña puechemer o' perrey Yompor tarro'mar yapa' yocsheññaña Puechemer Cristo Jesús ñaña tarro'mar yapa' ama añeye' yeyemteno ñeñt atet yetsotaten e'ñe yañeña, ñeñt e'ñech yecht-sochaya.

⁴ Ñehua, ñerra'm esesha' ñetpa' čhate' otenapuetañ añte' poctetsa o'ch yeyemtena ñeñt allo es yepenañ alloch yequeshperra e'ñe yoťotapa' nocoppa'cho' eñalleñ shonte' ñeñt neyemtenañ, tarro'mar ñeñt allpon o' netsotatuenpa' ello metana'tuenan allohuen po'psheññečhno namo'tseshačhno puetsotateñ.

⁵ Tarro'mar napa' o' e'ñe allpon netsotueññañ judionesha' poctapña: Ama't po'psocmatñoťeñ allempo ne'ñalletuapa' napa' atsorrataťolle'tareťen* ñeñt atet anuareť allohuen asheñorroťolleshacop ñeñťey judioneshay, tarro'mar e'ñe israelena'tareshoť ñeñt e'ñe judiom'reyoť eñalletñan. Ellonetpa' ñaña napa' Benjamín po'mrenñen. Ñaña napa' e'ñe hebreoneshan tarro'mar ach ñaña apapa' e'ñe judioneshet poctacma ñeñt eñets e'ñe ya yeñoño ñeñtara hebreačho. Allotpa' ñaña na ahuatpa' e'ñe fariseoneshan ñeñten nanac ma'yočhrayeť attoch netsotua ora allpon ñoñets ñeñt aquellca'huaret judioneshacop.

⁶ Nanac netsoteť judionesha' poctapña. E'ñe nemoñseñoť yoctapña napa' ne'moñe'cheť allohuen ñeñt o' ame'ñerrana Cristo. Ñeñto'marña epaye'ch ne'name'taneteť attoch erroťenotpa' o'te' erroť nepatanet. Ñaña ora atet oteney ñoñets ñeñt atet anareť judioneshacop napa' chocma e'ñe atet nepohuahueť. Ñeñto'marña ama eñalle'te ama't patrra ñeñt nepalltena attoch ello po'psheñeñpa' o'ch otinet ñeñto' nepalltenmeñ.

⁷ Allempo atet netsotrrroteť ñeñťecop nañapa' ñeñta notenapañ ñeñťte'ña nanac sherbets nocop. Tarraña te'ñapa' e'ñe nemorrenteñoť Cristopa' o' neñoter ñeñt allpon o' nepohuahuaapa' amach es sherberro nocop ama't coñe'ta.

⁸ Ama't ellonet allohuen po'poñečhno ñeñt nenteť ñeñto'ch sherbatseñ nocoppa' te'ña e'ñe neyemteñoť Cristopa' ama asherbenaye' nenteñe, ama't coñe'ta, tarro'mar te'pa' o' neyemtera Yepartseshar Cristo Jesús ñeñt nanac sherbets. Ñapa' ello metana'tuenan allohuen po'poñečhno ñeñt atet nenteť na ñeñto'ña nanac sherbets. Ñeñto'marña nemorrenteñoť Cristo te'pa' o' nepuesuerr ora po'poñečhno, nocop te'ñapa' ama esoye' nenteñe esheccha' te'pa' e'ñech nocsheñsha' nocter Cristo.

⁹ Allochñapa' e'ñe yeparrocmateñoť Cristo, Pomporpa' e'ñech pocte' enteney tarro'mar amach añoťeye' a'queshpaterrye e'ñe yoťoťa ama't yetsotatsetuahua ñoñets ñeñt atet anareť judioneshacop. Añoťcha'ña te'pa' e'ñech pocte' enterrey e'ñe yeyemteñoťa ñeñt Puechemer pen ñeñtpa' Cristo.

¹⁰ Atto e'ñe yeparrocmateñoť Cristopa' o'ch yaguërrñañ po'huamenc atto ñapa' nanac ahuamencattena allempoteñ tanterra puerromñoť. Ñaña e'ñe yeyemteñoť Cristopa' e'ñech pocte' yeñch ama't e'ñe erroťenotpa' o'ch yemue-

* 3:5 O'ch secue' nota San Lucas 1.59.

roçhta e'ñe ño'mara atto ñapa' nanac amueroçhtatarette't. Ñaña ama't yemuroçhetuaneño't Cristocopcha' yerromapa' ñeñ'tpa' e'ñepa'ch pocte' yeñch tarro'mar atet'cha' yerromaprecha Cristo.

¹¹ Attochña yapa'cho'ña yetantuerrach esempohuañen.

Ñeñ'tach e'ñe paterr llequë't Pablo

¹² Ñehua, napa' ama noteno napa' o' e'ñe poctacma netsotuahuen ora allpon ñeñ't pocte' enten Cristo. Ñaña po'ñoçhpa' ama noteno napa' e'ñe es coçhneshare' noctape'chuen. Tarraña ama't atet neñotenapa' elloña te'pa' allo'ña nesen ama't aco'pa o'ch netsotnom ñeñ't pocte' enten Cristo Jesús, tarro'mar ñapa' ñeñ'tecop o' pueyochresha' perren.

¹³ Napa' masheñnesha ñaña noçhanesha neñotena po'ñoçhpa' ama atteye' nepohuena ora allpon ñeñ't cohuentetsa Cristocop. Tarraña ama't atet'pa' amach ñeñ'ta neyerpuerre'te, çochña nepuesuanom ñeñ't atet nepatse'tyese't ahuatoteñ. Te'ñapa' añach nema'yoçhrena attoch allo'nach nesen ama't aco'pa etsotayesnomue' ñeñ't poctetsa Cristocop.

¹⁴ Tarro'mar ñeñ'tecop o' çhore'terrey Yompor pue'ntaño't attoch e'ñe yeparrocmateño't epay Puechemer ñeñ't Cristo Jesús, esempopa' yepohuerrach ora errponte' e'ñe pocte' enten ña. Allochña'aphuerreycha' ñeñ't o'patatenya ñeñ'tcha' nanac yocshatuerre' allohueney ñeñ'tey o' yame'ñera.

¹⁵ Ñaña o'ch notas ñeñ'tes po'ñoçh o' same'ña'huera Cristo ahuañmo'çhoteñ, te'pa' ñeñ'tña o' notuanmas e'ñepa'ch seyoçhre'cha. Ñaña ñerra'm erra'tsente' soçtape'chyen ñeñ't ama atteye' poctetso Yomporecoppa' ñeñ'tpa'cho'ña e'ñe ña Puecamquëño'tpa' ñach e'ñe seño'tatuerre'.

¹⁶ Añcha'ña e'ñe pocte' o'ch yepohuena ñeñ't allpon o' çhapatuonay Yompor e'ñe yeyoçhro ñeñ't yeñoten erra'tsente' e'ñe pocte' enten ña.

E'ñech cohuen yocrrena atet corre't Pablo

¹⁷ Ñaña o'ch masheñneshacha' ñaña noçhaneshacha' o'ch notas, ñeñ't atet sentenen atet nocrrena napa' sapa'cho'ña atet'cha' socrra samña allohuenes. Ñaña añcha'ña secua' ñeñ't seño'ten erra'tsente' ñeñ't e'ñe atet corretsa cohuen ñeñ't atet entenyet ya.

¹⁸ Tarro'mar añ patsropa' eñall shonte' acheñnesha' ñeñ't atet penetpa' yapa' yeñoteñ ama ayemuetpahuoye' enteñeto atto Cristopa' rroma corsocho attot'cha' yequeshperra. Ama't ñeñ'tpa' shontoch o' notuanmas ahuañapa' te'pa'cho'ña e'ñe nanac nellquëñesha'pa' o' alla noterrser.

¹⁹ Ñetpa' añ o'patenahuet attoch allohuenetpa' e'ñech chenca'huerret. Añach yomña'yenet attoch rra'yenet amapa' orrare'tyenet. Ñeñ't atet yomñatse'tyenetpa' ñeñ'tpa' atet ñerra'mrate' ñeñ'ta po'yomporer penet. Ama't ñeñ'tcha' pencatahuetañpa' tarraña ñetñapa' ñeñ'tach atarr coshatenahuet. Ñaña añach e'ñe nenet pueyoçhro ñeñ'tcha' atet coshatse'tatyenahuet arr patsro.

²⁰ Tarraña yapa' o'huañ atteye' yoçtape'ch tarro'mar añ patsropa' ama't all yeyçhenañpa' tarraña po'ñoçhpa' ama ya'netsreyaye. Tarro'mar ya'netsro allcha' yeyçherra ya errponohuañenpa' ñeñ'tpa' all Yompor pue'ntaño. Ñeñ'tara pue'ntaño'tpa' yecueñ allot esempohuañencha' huerra Yepartseshar Jesucristo ñeñ't Ya'queshpatañer yepen.

²¹ Ñerra'm o'ch huerra añe patsropa' ya ñeñ'tey arromña'teypa' ñapa' o'ch a'po'poñetuerrnay yechets, allochña' yapa'cho'ña yorrterrach e'ñech attey ñerra'm ña po'partsoteño'tpa' nanac cohuentena. E'ñech ña po'huamencot

a'po'poñetuerrey ñeñtara po'huamenco'tpa' e'ñech pomnaren p'ohuerran allohuen allpon ñeñt eñall.

4

¹ Ñeñto'marña masheñshacha' ñaña no'chaneshacha' e'ñe nemorreneteñotespa' o'ch notas, chocmuepa'ch huomenc sepa'nem seyo'cher Cristocop ñeñt Yepartseshar yepen. Añpa' atet notenes tarro'mar sapa' chocma neyerpuensa ñaña chocma socshatenen atto sapa' e'ñe cohuen same'ñena. Nanac nocshensa tarro'mar napa' nentenes atet ñerra'mrrate' necopa' ñeñt o' naguërr e'ñe netorreño't Yomporecop e'ñe so'mar. Atarr nanac nemorrentensa.

² Ñaña o'ch noteñ no'chanesha' Evodia ñaña Síntique, amach allo'na po'poñ entanna'tatsetneneto tarro'mar e'ñe yame'ñeño't Yepartseshar Cristopa' e'ñech cohuen yemuerannena.

³ Ñaña o'ch notas, ama't erra'tsenotesa ñeñtes po'ño'ch nanac neyemtenapa' o'ch samo'tstatanna'terranet añ epsheña coyanesha' tarro'mar ahuañmo'chapa' e'ñe parrocmá nanac yema'yochre't attoch epa'hua añ cohuen ñoñets alloch yequeshperra, ñaña epay Clemente ñaña po'potantañ ñeñt parrocmá nanac yetorre't ahuañmo'cha. Ñet pa'so'chñechnopa' o' aquellca'huare'tterret attochña ñetpa' corretsetach.

E'ñe yame'ñeño't Yomporpa' chocmuepa'ch yocshena

⁴ Te'ñapa' o'ch noterrser atet, e'ñe same'ñeño't Yepartseshar Cristopa' chocmuepa'ch socshena. O'ch alla noterrser, chocmuepa'ch socshena.

⁵ Eñotuasepa'ch allohuen acheñenesha' atto sapa' e'ñe cohuen acheñes, amach cha po'poñ es sentatatsetuenaye, ama't erro'teno'tsenes. Tarro'mar yeñoteñ po'ño'chpa' alla'tsena Yepartseshar Cristo.

⁶ Amach es sellcatsto ama't e'ñe mamesha. Añcha'ña ama't erro'teno'tsenes e'ñe sema'yocheño'tpa' chocmuepa'ch sotue Yompor ñeñt sellcatyene' ñaña e'ñe socsheño't Yomporpa' chocmuepa'ch senamyey ñaña ñeñt sepallta'yena.

⁷ Ñerra'm atetcha' chocma sepena, Yomporpa' ñachña ama semnatenaye o'ch es sena'yen seyo'chro ama't coñe'ta. Attoch eñmataterrnay Yompor yeyo'cherpa' ya acheñey e'ñe yoc'ap'ño'tapa' amate' erro'teno't e'ñe yotapa' yeñmataterro atet. Ñeñto'marña e'ñe yeparrocmateño't epay Cristo Jesús, Pomporñapa' cohuañpennaycha' yeyo'cher attoch amach allo'na yena'nenoye'chro ñeñt allcatañtetsa.

Añcha'ña e'ñe cohuen yoc'tape'ch ñeñt e'ñe cohuen entuen allohuen acheñenesha'

⁸ Te'ña masheñnesha ñaña no'chanesha e'ñe allohuanenpa' o'ch noterres, añcha'ña soctape'chyes ora erra'tsente' señoten ñeñt e'ñe cohuenetyetsa ñaña ñeñt ora cohuen entuapotetsa. Ñeñtcha'ña soctape'chyes ora erra'tsente' ñeñt ama shequëñtsoyaye, allo'tpa' ñaña ora erra'tsente' asherben entpahuotets, allo'tpa' ñaña ora erra'tsente' ñeñt p'octetsa, allo'tpa' ñaña ora erra'tsente' ñeñt ama sosya'tsañeyaye, ñaña ora erra'tsente' amorrentanna'tatañtetsa, ñaña ora erra'tsente' ñeñt e'ñe cohuen aserpare'tpahuotets. Ora allpon añechnopa' ñeñtcha'ña atet soctape'chyes.

⁹ Ñaña o'ch noterrser po'poñ ñeñtcha' atet sepa. Allpon o' ney'chatuas, ñaña allpon o' ne'chapatuonas seyo'chro, ñaña allpon o' neñotatyesas, ñaña allpon sentenen ñeñt atet es ne'pa'yena napa' sapa'cho'ña te'ñapa' e'ñepa'chña atet es sepa'yen samá. Allochñapa' Yompor ñeñt acshatañtetsa yeyo'chropa' ñachña parro'tsenes allohuenes.

Atto filiposo'marnesha'pa' es apueñet Pablo ñeñt pallta'yena

10 Ñaña o'ch notas, e'ñe neyemteñoť Yepartseshar Cristo, napa' atarr nocshena țarro'mar sapa' o' alla seyerpuerrna. Ñehua, napa' ama notenso o'ťe' sepuesuerren, añña noten sapa' ama't erroť sepeñe attoch seyempa'n.

11 Ama ۆho es nemnapreteñoťeye' notenso atet, țarro'mar na te'pa' o' ۆhapona neyoۆhro ñeñť atet cohuentetsa, ñeñťo'marña te'pa' o' attaña neyća ama't erroťeno'tsenanapa' țarraña attachña ۆhocma nocshena neyoۆhro.

12 Ñehua, napa' neñotena erroťenopa' nanaccha' es nepallta'yese't atto yocr-rena aña patsro, elloneťña erroťenopa' esocmañencha' nechyses't. Țarraña ama't erroťeno'tsenenpa' na te'pa' o' neñooh o'ch attaña neyća; ñerra'm es nepalltena erroťenopa' amach ۆha llecatenno, ama't ۆho esocmañen es nechyes erroťenopa' amach ۆha nommo'cheño. Ñaña attecmaoh nocshena ama't esempo eñall shonte' nerrar ñeñťcha' neyetena, amapa' esempo ama eñalle ñeñťcha' nerren, amach es ne'nenno.

13 Ñeñťo'marña napa' e'ñe neñoteñ, yapa' ama't erroťeno'tsenyapa' ۆhocmaoh ahuamencatey țarro'mar Cristopa' ñach nanac ahuamencat yepene'.

14 Țarraña ama't o' notuanmas atetpa' e'ñe pocte' nenteñ atto sapa' sell-capretenna ñeñť nemueroۆhtatene' arr.

15 Ñaña sa ñeñťes filiposo'marneshas e'ñe señoťueñ allempo ñanoh nesar-ppare'tnom cohuen ñoñets allooh yequeshperra, allempo non Macedonioť, allempopa' ama't allemeñ anetso'marpa' ama eñalle aheñenesha' ñeñť atet apۆherrtsa Yomporecop ñeñťcha' nellcapretenaya attoch e'ñe parrocmah es yapanna'ta. Sapa' saña e'ñe sapta ñeñťes es napuene' ñeñť allpon nepalltena.

16 Napa' ama't ahuañmo'cha allempo Tesalónico'tsenenpa' ama parro-choťayaya sapa' ۆhocma soñmaten ñeñť sapuenen añecop ñeñť nepallta'yena all.

17 Ñehua, napa' ama nocpaye' nemnapretenso o'ch es sapuenen. Añña nemnen ñaña alloohña' socoppa'ۆho'ña ellopa' o'ch atonetnoma attoch coshatuerres Yompor.

18 Te'pa' o' aposen masheñ Epafrodito ñeñť allpon soñmaten nocop. Ñeñť allpon o' nagaponaspa' te'pa' ama es nepallteno ama't coñe'ta, elloña ۆha metanuosan allpon ñeñť nepalltena. Ñeñť allpon sapuanpa' napa' e'ñe attecoptar nenteñ ñerra'mrrate' ñeñť apuenet Yomporecop ñeñť eñmosaťtetsa ñeñťcha' e'ñe pocte' enten, ñaña ñeñťcha' nanac coshatene' ña.

19 Ñaña Yompor ñeñť e'ñe neyemtena napa' ñachña sapuerre' saña ama't ora ñeñť allpon sepallta'yena sa, țarro'mar e'ñe yeparrocmateñoť epay Puechemer ñeñť Cristo Jesús ñeñť e'ñe esocmañen es ehyetspa' nanacocmañencha' esocmañen apuerrey yaña.

20 Aye'choťtatarettepa'ch Yompor ñeñť atarr Parets. Ñeñťpa' attetepa'ch ama't tayoteñ errponhuañen.

Arrpa' all so'tnerranet e'ñe po'cartoť

21 Ñaña o'ch notas, o'ch sehuomñcha'ch allohuen ñeñť pueyochresha' o' perr Cristo Jesús. Ñaña allohuen masheñnesha' ñeñť e'ñe parro'tseneypa' ñetpa'ۆho'ña mueneñet o'ch huomñcha'taset ñamet arr necartoť.

22 Ñaña allohuen ñeñť pueyochresha' o' perranet Parets arr Romopa' ñetpa'ۆho'ña mueneñet o'ch huomñcha'taset ñamet necartoť. Ñeñť nanac

muenets atetpa' ñeñtpa' ñeñt parro yeçhena ñeñt atarr añcha'tarettetsa arr Romo.

²³ E'ñe Yepartseshar Jesucristopa' ñepa'chña e'ñe sa'natenaya allohuenes. Te'pa' ñeñtach notas, ñeñtpa' attetepa'chña Nompore. Allohua.

Pablo

AÑ SAN PABLO PO' CARTA ÑEÑÑ QUELLCAN COLOSASO' MARNESHA' COLOSENSES

Atto Pablopá' quellcan carta añecop ñeññ ame'ñetsa anetso Colosaso

¹⁻² Masheñeshacha' ñaña nochaneshacha' ñeññes o' pueyochresha' perres Parets e'ñe seyemteñoñ Cristo, sa ñeññes yeçhetsa all anetso Colosaso. Na Pablon sequellquëneña añ carta epan masheñ Timoteo. Napa' ñeññen Cristo Jesús puellsensaren tarro'mar atet muenatenen Yompör. E'ñe nehuomñcha'teñoñes sa napa' o'ch notas: Yomporepa'ch Parets sebensare'tamñene' ñepa'chña socshatene' e'ñe sa seyoçhro allohuenes.

Arrpa' all parasyoso'teñet Yompör ñocpuet

³ Yapa' allempo yema'yochamñpensapa' çhocma yeparasyoso'teñ Yompör, ñeññara Yepartseshar Jesucristo Pompör.

⁴ Tarro'mar yapa' o' ye'mare'tas atto sapa' atarr same'ñeña Cristo Jesús. Ñaña ye'mare'tenes sapa' atarr semuereña allohuen ñeññ pueyochresha' pen Parets.

⁵ Ñeññpa' tarro'marña sapa' atet atarr seyemteña sapa' e'ñe same'ñeñoñ Cristopa' sapa' añ atarr seyemtena ñeññ o'patatensa all pue'ntaño. Ñeññña sapa' ahuañoñeñ se'mñnotenña cohuen ñoñets ñeññ e'ñe po'ñoçh Yompör po'ñoñ alloch yequeshperra.

⁶ Ñeññña cohuen ñoñets ñeññ çhapats sesho ñeññña te'pa' allemeñ çhapyen, allpa'çho'ña nanac ame'ñatenana shonte' acheñenesha'. Allpa' allo'na senet orrtatyaset ñeññ e'ñe cohuen enten Yompör. Ñetpa' e'ñe atet penet atet sepena samña. Sa po'ñoçh allempo errtes e'muerre' Yompör po'ñoñ atto ñapa' atarr morrentenya, sañapa' e'ñe allempoteñ çhaponasa seyoçhro ñeññña ñoñetspa' e'ñe po'ñoçh Yompör po'ñoñ. Allempoteñña sapa'çho'ña allo'na sesen orrtatyeseñmue' ñeññ e'ñe cohuen enten Yompör.

⁷ Ñeññara cohuen ñoñets ñeññ ñanom yeçhatas masheñ Epafras. Ñapa' ñeññ e'ñe parrocmá yeçtorrena Yomporecop, atarr yemuerannena. Ñapa' çhocma atarr cohuen çtorrena Cristocop ñeññña' e'ñe socop.

⁸ Ñapa' e'ñe cohuen eñotaturrey atto sapa' atarr semorrentannena e'ñe same'ñeñoñ Cristo.

Arrpa' all ma'yochamñpeñet colosaso'marnesha'

⁹ Ñeñño'marña allempo ye'mare'tas allempoteñ yapa' ama yequeçhpueno sema'yochamñpsaya Yompör. Yapa' añ yenamuennas Yompör: Sapa' çhocmuepa'chña eñotatenes ñeññ atet muenen ña ñeññcha' atet sepa'yes e'ñe cohuen ñocop. Ñaña çhaponasepa'ch seyoçhro ora allohuen ñeññ atarr cohuentetsa yecamquëñecop.

¹⁰ Allochñapa' o'ch e'ñe seyçherr ñeññ atet poctetsa allohuenacop ñeññey pueyochresha' pen Yepartseshar. Allochñapa' attochña e'ñe socshateñ. E'ñe atto es cohuen sorrtatyenpa' nanaccha' cohuenot sesherbeñ. Allo'nepa'chña sesen eñotnomue' ñeññ atet penaña Parets.

¹¹ Ñaña añ yenamuennas Yompör: Po'partsoteña ñeññ cohuenñatsotetspa' e'ñepa'chña ahuañencat pa'yesas e'ñe poctacma allochñapa' amach çha sequeçhpatstere. E'ñechña socsheñesha' sa'huantha'huanomña allohuen ñeññ atarr echarr sentyen.

12 Ñaña sapa' ch McMuepa'ch separasyoso'ch Yompor tarro'mar ñapa' a'pocstaterney attoch yagapapreter yaña ñeñt' o'patatenana allohuen pueyochreshachno. Ñeñt'ña' ñeñt' po'cohuenña pen ñeñt' atarr cohuentetsa allña' puetaretsa.

13 Tarro'mar te' Yomporpa' o' cheterrey checmetot all amcha'nochtena oneñt'. Te'ña yapa' o' chapaterrey po'cohuenño all ayochreshattena e'ñe ña Puechemer ñeñt' Jesucristo ñeñt' atarr morrentena ña.

14 Ñeñt'ña Jesucristo ñeñt'ña rromats yocop ñapa' attoña e'ñe tsa'tuerrnayaña yo'chñar attoch e'ñe peretna'huerrnay yo'chñar esheccha'ña e'ñech cohuen a'qeshpaterrey Yompor.

Allempo ashataretta Cristo po'rras corsocho, ñeñt'ña e'ñe a'mchechatue'ña allohuen esocmañen

15 Yompor Paretspa' ama entpahuo, tarraña Cristoña ama't entpo'pa' ñapa' e'ñe parro attecma ñerra'm Pompor Paret ñeñt' ama entpahuoyaye. Ora allohuen allpon eñalletyestsas, Cristoña' e'ñe ñanom eñall ñeñt'cha' pomnaren penahuet allohuenet.

16 Allohuen ñeñt' allpon ayeçcataretetyestsas ña e'ñe yeçcatuahuet, ama't ora allpon ñeñt' ento'tsa'yen ñeñt' ama entpahuoyaye ñaña allohuen ñeñt' yentyen arr patsro, e'ñe ñocma pueyeçcatuar. Ñaña allohuen ñeñt' allpon amcha'taretetyestsas, ñaña allohuen ñeñt' allpon ayochreshatetyestsas, ñaña allohuen ñeñt' allpon amcha'noçhetyestsas erracmañen, ama't ñaña allohuen ñeñt' allpon huomenc entyestsas, ora allohuenet ñeñt'et ayeçcataretet e'ñe ñocma pueyeçcatuaranet. E'ñe ñocpacma ayeçcataretetyesuahuet.

17 Ora allpon ñeñt' esocmañen eñallpa' ñaña' e'ñe ñanom eñall. Ora allpon ñeñt' esocmañen eñallpa' ñapa' ña orratyenuahuet.

18 Cristoña' yeyoçher* yepohueñ allohueney ñeñt'ey parrocmatenaya e'ñe yame'ñeñot' ña, tarro'mar ñapa' ña yocstape'chatene' e'ñe cohuen allohueney ya ñeñt'ey e'ñe po'chets pohueney. Ñeñto'mar Cristopa' pomnaren peney allohueney ñeñt'ey ame'ñenaya ña. Ñapa' e'ñe ñanom orrtatene' allochña yapa' corretsayach allohueney ñeñt'ey e'ñe po'chets pohueney e'ñe yeparrocmateño' epay ña. Ñaña ñapa' ñanom tanterrtsa rromot', ñeñt'ña' ellochña nanac sherberr. Ñeñt'pa' tarro'mar atet pa' allochña' ora ñeñt' esocmañen allpon eñall, ñetña' Cristochña e'ñe ñanom nanac cohuen entyenet.

19 Pompor Paret e'ñe pocte' enteñ o'ch e'ñe cohuen chorratena ora allohuen po'partsoña.

20 Ñaña' e'ñe alla parrocmaten Pomprosho e'ñe parrocmata allohuen esocmañen, ama't ñeñt' patso'tsa'yen, ama't ñeñt' ento'tsa'yen. Allempo ashataretta Cristo po'rras corsocho, ñeñt'ña e'ñe a'mchechatue'ña allohuen esocmañen.

21 Ama't sa ahuatpa' atarr ellaparo'tsa'yenes Yomproshot'. E'ñe se'moñe'teño' Yompor seyoçhro saña' aña seyeçcatyese't ñeñt' ama cohuenayaye.

22 Tarraña te'ña Yomporpa' o' e'ñe parrocmata terres e'ñe ñesho. Ñehua, allempo amuroçhtataretta Cristo e'ñe ña po'chtso atto rroma, ñeñt'pa' attochña e'ñe parrocmata terres samã. O' e'ñe parrocmata terres attoña sapa'cho'ña o' sa'cohuentataretterra Partsocop, ñaña attoch amach sa'tanmare'tterro, amach eñalle attoch sottene'charetterra. Te'pa' atetca'ye enterresña Yompor.

* 1:18 Ñehua, po'ñoçh Cristopa' arr atma'ntaret atet ñerra'mrrate' ñeñt' yoñ yepen.

²³ Ñerra'm po'ñoçh çhocmach same'ñera Cristo, ñerra'm e'ñech huomenc seperr seyocher attochña sapa' amach sepurrerro. Cohuen ñoñets ñeñt' o' se'mhua alloch yequesperra ñerra'm amach cha sa'ypo'ñañpere ñeñt' o' seyemterra Yomporña'pa' enterrescha' o' e'ñe sa'cohuentataretterra. Añ cohuen ñoñets ñeñt' o' se'mare'tua sa, te'ñapa' aserrpare'tataretterrach ñaña allohuen ñeñt' corra'yetsa añe patsro. Ñeñto'marña na ñeñten Pablón nach sherberrets te'ñapa' nach serrpare'taterrahuet.

Atto Pablo a'potan ñeñt' ahuatoteñ ama eñotpahuo

²⁴ Te'ña na e'ñe nemuerochteño' socoppa' atarr nocshena. E'ñe nemuerochteño' nechtsopa' ñeñt'pa' attoña netsotatenas allpon ñeñt' palltetsa attoch nemueroçhtaprecha Cristo allohuenacop ñeñt' ame'ñenaya ña ñeñt' e'ñe po'chets pen Cristo ñeñt' e'ñe a'parrocmataten.

²⁵ Ñeñto'marña te'pa' nach sherberre' allohuen ñeñt' ame'ñenaya Cristo. Ate' llesenen Parets e'ñe socop, attochña napa' o'ch e'ñe na'potuerrñañ ora Yompor po'ñoñ.

²⁶ Añcha' na'poterr ñeñt' ama't ahuatapa' ama eseshaye' eñotaye'te e'ñe yatañeshapoteñ tarro'mar allempopa' ama çhena' allempoch eñotaterranet Yompor. Tarraña te'ñapa' e'ñe eñotaterrey Yompor allohueney ya ñeñtey pueyochresha' pen Parets.

²⁷ Te'ña Yomporpa' atarr mueneñ o'ch eñotaterrey ñeñt' atarr coçheshare' ñeñt' po'cohuenña e'ñe ahuatoteñpa' ama eseshaye' eñotaye'te. Te'ña ñeñt' po'cohuenña'pa' o' e'ñe orrtataretterra añecop ama't ñeñt' ama judioneshayaye. Ñeñt'ña ama eñotete'te ahuatpa', ñeñt'ña'pa' añepa't Cristo ñeñt' chorrenaya yeyocher. Attoña e'ñe yeyemteño't ña yañapa' o'ch yecohuentapretera.

²⁸ Ñeñto'marña Cristopa' çhocmach ya'poteñ. E'ñechña cohuen yotape'chatyeñ allohuen ama't erra'tsena acheñer. Ñaña e'ñech cohuen yeychatyeñña allohuen ama't erra'tsena acheñer attochña ñetpa'cho'ña e'ñech eñotyeñet ñeñt' atet pena Cristo. Attoña e'ñe pueyemteño'tet Cristopa' o'ch ame'ñeñet e'ñe poctacma.

²⁹ Ñeñto'marña napa' nanac netorrena ñocop. E'ñe po'huamenco ñeñt' atarr ahuamencat nepene' attoña napa' çhocma atarr netorra'yena ñocop.

2

¹ Napa' nemneñ o'ch señoçh atto napa' e'ñe nellquëño'fes sa atarr nanac netorrena socop. E'ñe attecma netorrena ñaña laodiceo'marneshacop, ama't ñaña allohuenacop ñeñt' ama puentarno.

² Allochña'pa' attochña e'ñe socsherra seyochrohuen atto e'ñe semorentanna'teño'tpa' o'ch e'ñe separrocmaterr. Attochña çhaponasa seyochro attoch atarr es seño'tyerr. O'ch seño'terr ñeñt' ama eñotete'te ahuatoteñ, ñeñt'pa' ñapñaña Yompor eñotene'. Ñeñt'pa' e'ñepa'tca'ye Cristesho'tsenña

³ allohuen pa'namen eñoteñets ñeñt' nanac coçheshare' yentyen. Ñeñt'pa' e'ñe yeyemteño'ta Cristo esheccha' yeñoterrña ñeñt' ama't ahuatapa' ama eñotpahuo.

⁴ Ñeñto'marña napa' atet notenes allochña'pa' sapa' amach esesha' se-shquërraye ama'tcha' cotape'chatyesaset ñeñt' atarr cohuen ñoñets sentyeren.

⁵ Ama'tcha' ama allo'tsenno e'ñe na tarraña neyerpueño'fes neyoçhropa' e'ñe parro'tsa'yenacmay. Sapa' e'ñech nocsheñesha' nentyenes atto e'ñe cohuenare' es sorrtyen. Ñaña nentenes atto e'ñe same'ñeño't Cristo o' e'ñe huomenc sepa'yen seyocher ñocop.

⁶ Atto o' sagapuer Yepartseshar Cristo Jesús, te'ña sapa' allo'nepa'ch sesen e'ñe parrocmats epas.

⁷ Attochña sapa' e'ñech huomenc serrmuerrñañ po'ñoñ atet ñerra'mrrate' tsachrech atarr huomenc rromuenan pats, e'ñe separrocmateño' epaspa' allo'nepa'chña atonetnomaña ñeñt' atto same'ñena. E'ñe same'ñeño'pa' huomenquëpa'chña sepa'yesnom seyo'cher. Atterepa'chña allo'na sesen ñeñt' atet ye'chatyenes. Ñaña chocmuepa'chña separasyoso'chña Yompor.

E'ñe yame'ñeño' Cristopa' o'ch yesuanomña atet muenatyese't yechets

⁸ Señota'tach allochña sapa' amach esesha' seshquërraye. Ñato'rraña po'poñ cota'pñatso'pa' chate' shequërrset. Ñeñt' cota'pñatserpa' e'ñe orrena tarro'mar ñeñt'pa' atta shequënsset. Ñeñt'pa' arromña'a a'mtene'ña pocta'pña ñeñt' atto shecare'tyenet. Ñeñt'pa' patso'marnesha, ñeñt'ña'pa' ama poctenanoña Cristo pocta'pña.

⁹ Tarro'mar Cristo atto acheñetos ñepa'tña chorrenayaña allohuen Yompor po'partsoña.

¹⁰ Sapa' e'ñe separrocmateño' Cristo sa'naña chorrapretenayaña Parets. Ñeñt' allohuen allpon am'cha'tare'tetyests, Cristoñapa' e'ñe ñap'ta atarr sherben. Ñaña allohuen ñeñt' allsensare'tetyests, ñaña'pa' e'ñe ñap'ta atarr sherben.

¹¹ Sapa' e'ñe separrocmateño' Cristo te'pa' sesuanom atet muenatyese't sa sechets. Ñeñt'pa' ama año'teye' hueno o'ch setsorratannena e'ñe sañeña sechets ñeñt' atet ye'chena judionesha'. Ñeñt'pa' Cristesho'ña huena e'ñe seyemteño' ña. Ñeñto'marña e'ñe separrocmateño' Cristopa' te'ña sapa' o' seyomporena'tarterra e'ñe po'ño'ch.

¹² Tarro'mar allempo sapatare'tta Yomporecop sapa' añ setma'ntena ñerra'mrrate' cho sepampapreteña Cristo. Elloña e'ñe sa same'ñeño'pa' attoña o' setantapreteraña Cristo. Tarro'mar sapa' añ same'ñate' atto Yomporpa' orrtatan po'partso'teña allo tantaterran Puechemer allempo rroma.

¹³ Ahuat sapa' so'chñaro'ña ama es soctape'chperra' seyo'chro ama't e'ñe mamesha ñeñt' cohuentetsa Yomporecop. E'ñe atet sepe't ñerra'm po'poñ acheñ ñeñt' ama Yomporena'tareyaye. Ñeñto'marña sapa' cha sottet ñerra'mrrate' secamquëñpa' cha rromuen. Tarraña te'ña Yomporpa' o' apuerres attoch sapa'cho'ña corretsasach e'ñe atet pena Cristo, tarro'mar ñapa' o' peretna'huernnas allohuen so'chñar.

¹⁴ Tarro'mar ñapa' o' e'ñe e'shohuerrnay ñoñets ñeñt' o' quellca'huetañ alloch yotteñe'charetterrañ ya, atet oten ñoñets ñeñt' atet anaret' ahuatoteñ. Ñeñt' ñoñets Paretsñapa' alla a'huañata'mperrey atet ñerra'mrrate' ñeñt' apatare'ttetsa corsocho.

¹⁵ Ñeñt'ña am'cha'no'chetyetsa añe patsro ama't ñaña ñeñt' huomenc entyet-sapa' Cristoñapa' e'ñe puerrata'mpesuerranet allo am'cha'no'chetyenet. Atto rroma corsocho allotña e'ñe a'mtsoññetuerranet. Allempoñapa' orrtatanet allohuenet acheñenesesho attoch ñetpa' eño'chet ñeñt'pa' o' aprratare'tterra po'huamenc.

¹⁶ Ñato't same'ñeña'ña ama't erra'tsena acheñer ñeñt'cha' sote' sa amo' pocteyaye ñeñt' atto es serra'yen ama't ñaña atto es sorryen. Ñaña amach same'ñatsche ñeñt'cha' sotene' sapa' amo' setsotenoña añ yetñatser ñeñt' allpon ana'yesaret' judioneshacop, ama't allempoch cherrerr pate'tets char, ama't ñaña allempoch e'ñe erre't orrterrtsa pueña'tets arrorr. Ñaña amach

same'ñatsche ñeñtcha' sotene' sapa' año' setsotenoña ñeñt yetñatser ñeñt anaret allempocma yamesen.

17 Ñeñtpa' pa'choyeshe'maca'ye peñña ñeñt huapatsa. Ñeñt huapatsapa' po'ñoçhpa' ñeñtca'yeña Cristo ñeñt atarr sherbets.

18 Ñaña amach same'ñatsche ñeñtcha' soterre' sapa' año'ch saguërroña attoch coshaterres Yompor tarro'mar sapa' año' atteye' sepeno ñeñt atet penet ñet. Ñeñt acheñer atet, ñetpa' año coñape'chyenet o'ch mueroçhtatenet e'ñe ñañeñeta, tarraña ñetpa' pommo'cheñoña atet penet ñeñt po'ñoçhpa' ama es sherbeno Yomporecop. Ñeñto'marca'yeña ñetpa' añaca'ye ma'yochyenet Yompor po'mllañoñeñer. Ñaña ñetpa' año nanac yemtenet ñeñt entpesa'tyenetañ. Poçtaññoñet ñeñt e'ñe ñeta po'chtotet huena, ñetpa' ñeñña atarr ommo'chenet, ñeñto'marña ñeñtpa' e'ñe orrena atet penet.

19 Ñetpa' ama parrocmateñeto Cristo ñeñto'marña ama pueyoçhreye' peñetoña Cristo. Ñehua, yapa' yoten yeyoçher* ñeñtña atarr sherbets tarro'mar ñeñt atarrtatene'ña ora yechets. Atet pena yelloquëm ñaña yechtsoreçh ñeñtña orrene'ña yechets ñeñto'marña e'ñe parrocmateñ attoña ora yechetspa' atarrtena. Atet penaña Cristo atet ñerra'm po'ñoçh ñeñt yeyoçher yepen. Allohueney ñeñtey ame'ña'yenaya Cristo e'ñe parrocmateney, allochña yapa' allo'nach yesen orrtatyesnomue' ñeñt atarr sherbets Yomporecop tarro'mar yapa' atet muenateney Yompor.

20 Sa atto o' serromapretera Cristo ñeñto'marña añ coñapñatser arr patro ñeñt arromñañenesha poçtañña, ñeñtpa' amaca'ye socpayaye. Sa atto o' serromapretera Cristo ñeñtpa' añecop attoch sequeçhpuerrñañ arromñañenesha' poçtañña. Te'ñapa' eso'mare'tcha'ña alla same'ñerrerrña patso'mar coñapñats. Ñato'tña same'ñena'ña ñerra'm esempo otenset:

21 "Amach es sa'pñlatsetyesatsto, amach es serratsetyesatsto, amach es seçhta'yestatsto." Tarraña ñeñtpa' e'ñech orrena atet otenset,

22 tarro'mar ñeñt allohuen ñeñt añe patsro'tsen ñeñtpa' e'ñeca'ye e'nuapo'. Ñerra'm ye'nuepa' o'ch e'ñe huañ. Ñeñto'marña ñeñtcha' atet sotyese' ñeñtpa' arromñañaca'ye poçtañña yeçhatenset.

23 Ñetpa' po'ñoçhpa' orrtenetañ atet ñerra'm esocmañen eñotuenetañ ñeñt cohuentetsañ tarro'mar puema'yochreñoñetpa' muechatsetyenet, ñaña ñetpa' e'ñe ñañeñeta mueroçhtatetset po'çhets, tarraña e'ñe pommo'cheñoñeta atet penet. Tarraña ñeñt atet penet ñeñtpa' amaña aye'ña atet peneto alloch huenaterret ñeñt atet muenatsetatyenanet po'çhets pa'namen sosya'tsañeçhno.

3

Añach soçtape'chen ñeñt atet muenen Cristo ñeñt pue'ntañ'tsen

1 Atto po'ñoçh o' setantapretera Cristo, te'ñapa' añach soçtape'chen ñeñt atet muenen Cristo ñeñt pue'ntañ'tsen. Ñapa' allña atarr partsoten e'ñe Parets po'cohuenroñ.

2 Ento'marecopcha'ña sema'yochra. Sapa' amachña año sema'yochratsto ñeñt patso'marecpa

3 tarro'mar sapa' o'huañcha' socshenaña ñeñt patso'marecpa. Te'ña sapa' e'ñe attes ñerra'mrrate' puesheñarr ñeñt rromuets o'huañcha' allo'na cosha'nenana ñeñt patso'marecpa. (Ñeñto'marña yapa' yoten o' yerromapretera Cristo.) Te'ñapa' ñeñtña yocshatene' ñeñt ora allpon atarr

* 2:19 O'ch secue' nota 1.18.

cohuen enten Cristo. Te'pa' atto yocrrerra ello e'ñe yeparrocmateño' Cristo ñeñ' parrocmatene' Pompor Parets, ya'naña o' yeparrocmaterr epay Parets ama't ñeñ'tpa' ama entpahuoyaye.

⁴ Ñeñ'to'marña ñerra'm esempoch orrterra Cristo ñeñ' allo e'ñe yocrrena, allempoña sapa'cho'ña sorrterrach saña epas Cristo. Attochña sapa' o'ch secohuentapretera saña.

O'ch yesuanom ñeñ' mellashañ cotapñats ñeñ' ama pocteye' enteno Yompor

⁵ Ñeñ'to'marña socoppa' añ poctetsa: Ama't erra'tsena sechets ñeñ' soctape'chatene' patso'marpa' chosaña a'mchechatterre', ñeñ' atto sechta'yeñ ñeñ' ama setaporeyaye, ñaña pa'namen sosya'tsañechno ñeñ' atet muenatse'tatyeney yechets, ñaña allpon yemnatse'tyen ñeñ'tpa' ama cohuenaye' entapretenye Yompor, ñaña atto es atarr yeye'chapretanna'tyena, ñeñ'tpa' ñeñ'taña yeyomporer yepen.

⁶ Ñeñ'to'marña'ña Yomporpa' entaterranetcha' po'yorochenña ama't allohuen ñeñ' atpare'tene'.

⁷ Sapa'cho'ña ahuatpa' e'ñe attecma soctape'chyese't allempo sapa' sosya'tsañe'cpa socrre't.

⁸ Tarraña te'ña ñeñ'tpa' chosaña a'ypo'ña'mperre', ama't ora allohuen e'moñe'tanna'teñets, atsrre'mueñets, o'patarñats, achm're'tanna'teñets, ama't allohuen e'ñosatse'teñtsochno ñeñ' atarr sosya'tsañechno.

⁹ Ñaña amach seshcare'tanna'tatsto tarro'mar te'pa' o' sesuanemñ ñeñ' mellashañ ñeñ' atet soctape'chatyesaye't seyo'chro. Ñeñ' atet sepa'yese't ahuat ñeñ' ama pocteye' enteno Yompor ñeñ'tpa'cho'ña o' sesuanemñ.

¹⁰ Sapa' añcha'ña sechorrerraya ñeñ' etserra ñeñ'tcha'ña soctape'chatterre' ello etserra allochña setserrataterrña soctapña. Attoña e'ñe setserrateño'tpa' o'ch soctape'cherr e'ñe cohuen ñeñ' atet cotape'chen Yompor ñeñ' seye'chcate'. Attochña sapa' allo'nach sesen e'ñotnene' ñeñ' atet cotape'chen ña.

¹¹ Atto yetserrataterr yoc'tapña Cristocop, yaña allohueneypa' e'ñechca'ye attecma puechemer p'ohueneyña Yompor. Ñeñ'to'marña yocoppa' ama eñalleña attoch yotare'tta yapa' po'poño' acheñrey, yapa' ellopa'tetstatare'teyo' año' judioneshayayye, año' atsorrare'teyayye, ñaña po'poño' acheñrey ñeñ' ahuapña po'poñ anetso't ñaña ñeñ'teyo' yapa' año' es yeñoteno ñaña ñeñ' acheñrey ñeñ'teyo' ataruasatare'tey e'ñe atta ñaña ñeñ' acheñrey e'ñe cohueno'tseney, tarro'mar Cristopa' ñeñ'tca'yeña e'ñe allohuenacpay, ñapa' ña e'ñe yechorra'huenaya allohueney pa'namen acheñrey ñeñ' parrocmatenaya.

¹² Yomporña puemorrenteño'es sapa' o' acrerres ñeñ'tescha' a'cohuentatare'ttertsa Partsocop. Atto acrerrespa' e'ñepa'chña sey'chen attoch e'ñe cohuen semuerannena, e'ñepa'chña cohuen es sorrtyen po'potantañecop. Sapa' e'ñepa'chña pocte' señch ñerra'm po'psheñeñ o'ch entenes sapa' ama esoshe'mayayso. Ñaña sapa' amachña aña se'natsto ñeñ' e'ñe socpa ñeñ' atet soctape'chen sa tarro'mar sapa' ñeñ'tes alleshoncatets. Ñeñ'to'marña sapa' e'ñepa'chña sa'huan'ta'huanomña ñeñ' atarr echarrare'sentyen.

¹³ Ñaña e'ñepa'chña cohuen es sa'huantannena ñerra'm esempoch señch po'psheñeñ ñeñ' ama pocteye' orrtateno socop, sapa' e'ñechña cohuen se'pretnannena. Atto Yepartseshar Cristopa' o' peretna'huerres sa, sapa'cho'ña chocmachña se'pretnannena saña.

14 Ñeñt atarr nanac sherbets o'ch seyčherr attoch semorrentannena e'ñe cohuen. Tarro'mar ñerra'm po'ñočh yemorrentannenapa' amate' errotenot ya'ypo'ñerroña po'poñečno ñeñt cohuenteyetsa ñeñt atet yeḡa'yen. Attochña allo'nachña yesen etsotnomue'ña parrocmateñets.

15 Atto Yompor o' e'ñe coshaterres seyočhro, ñeñtcha'ña soctape'chaterre'ña e'ñe cohuen, tarro'mar ñeñtecopña o' chore'terreyña Yompor attoch e'ñe yeparrocmatuerr allohueney ñeñtey ame'ñenaya. Ñaña o'ch notas: Sapa' chocmuepa'chña separasyoso'teñ Yompor.

16 Cristo po'ñoñpa' chocmuepa'chña e'ñe cohuen soctape'cheñ sa seyočhro, attochña e'ñe ora señoñehuenpa' chocmuepa'ch seyčhatannena attoch e'ñe cohuen socshatannena. Ñaña separasyoso'teñoñpa' semorrechepa'ch allohuen morreñtsočhno ñeñt Partsocop attoch sa'ye'chočhtatoñ atto sačhoteñ. Socsheñeshohuenña seyočhropa' separasyoso'chepa'ch Yompor.

17 Ama't esa ñeñt atet es seḡa'yen ama't esa ñeñt atet señosyen, e'ñechña seyemteñoñ Yepartseshar Jesús attochña sapa' es seḡa'yes. Ñeño'marña sapa' chocmuepa'ch separasyoso'teñ Yompor Parets e'ñe Yepartseshar Jesucristo pa'so'chño.

Atetcha' yocrra añecop ñeñt parro yepacollo'tsa'yen

18 Te'pa' o'ch notas samña ñeñtes arrollaretes: Ñeñt serrollar sepenpa' e'ñech cohuen same'ñeña tarro'mar atet poctetsa yocop allohuenacpay ñeñtey ame'ñenaya Yepartseshar Jesucristo.

19 Ñaña sa ñeñtes ataporetespa' o'ch notas samña: E'ñech cohuen semuerya setapor, amachña čha muene' errotuanen sepeñeña setapor.

20 Ñaña sa cheshaneshacha' o'ch notas samña: Chocmach same'ñya sompor ñaña sachor amachña čha satpare'tatsto. Ñerra'm atetcha' seḡapa' e'ñech cohuen coshensa ama't Yompor Parets.

21 Ñaña o'ch notas samña ñeñtes achemereshatneshas: Amachña čha sa'tsrre'mare'tatatscheña sechemerasha', te't čha nanac sellcatyenanet. E'ñe puellqueñoñetpa' čhach atarr quellañtsotyeset, amach e'ñe cohuenaye' ame'ñenseto.

22 Ñaña sapa' o'ch notas samña ñeñtes ataruasataretes e'ñe atta: Chocmachña e'ñe cohuen same'ñyaña ñeñt samo'mte' sepen añe patsro. Amachña puecuampeñoñesaña sema'yoreñ setaruasatsto, ñeñtpa' añecpaña atet sepena attoch e'ñe cohuen entenes samo'mte'. E'ñechña sema'yorñecma seyočhrocmañen e'ñech cohuen setaruasen. E'ñechña semčha'na'teñoñ Yompor setaruasen e'ñe cohuen.

23 Ama't erra'tsena ñeñt setaruas seḡa'yen e'ñechña seyočhrocmañen e'ñe cohuen setaruasen. Tarro'mar ama't acheñecpa setaruasenpa' e'ñechña atet sepena ñerra'mrrate' Yamo'mtayecop Jesucristocop setaruasen.

24 Sapa' e'ñe señoñeñ ñapa' añ o'patatensa ñeñtcha' atarr socshaterre' tarro'mar sapa' po'ñočh añ sesherben Cristo ñeñt e'ñe po'ñočh Yamo'mte' yepen.

25 Tarraña allohuen ñeñt atet ḡa'yene' ñeñt ama pocteye' enteno Yompor, ñetñapa' atsa'tataretterretcha' ñeñt allpon ḡa'yesaye't ñeñt ama pocteyaye. Ñeño'marña ama't puesheñarroteta ñocpuetpa' amach eñalleña attoch pocte' enterranet Yompor.

4

1 Ñaña sapa' o'ch notas samña ñeñtes pamo'mte' pen ñeñt setaruasaten. Sapa' atetcha' sepe'ña sa'taruasañer ñeñt e'ñe pocte' entenet ñet. Ñaña sapa'

señochepa'ch sapa'cho'ña sechenca'yeña Samo'mte' ñeñt' pue'ntaño'tsen.

² Ñaña te' allohuenespa' o'ch notas saña: Chocmuepa'chña sema'yoçhrenaña ma'yochatsa, amach seçllañoña sema'yocheñoña Yompor. E'ñechña separasyoso'teñsha' sema'yocheña.

³ Ñaña o'ch sema'yocheña Yompor yocop, o'ch senamonay attoch eñalleta allcha' yeserrpare'toñ po'ñoñ, allcha' e'ñe ya'potua ñeñt' ahuañoteñ ñeñt' ama't puesheñarrapa' ama eseshaye' eñotenaye ñeñt' atet penaña Cristo. Ñeñto'marña na te'pa' ayottam̄psareten cárcelo.

⁴ Ñaña añcha' senamon Yompor allochña napa' o'ch e'ñe neñotaterranet e'ñe eñotochen ñeñt' atet poctetsa nocop o'ch e'ñe na'potuer allohuen.

⁵ Ñaña añecop ñeñt' ama ame'ñetso sapa' seño'tepa'chña ñeñt' cohuentetsa ñeñt'cha' atet sepanet. Ama't taya sapa' arosña atta es puechatstatsa.

⁶ E'ñe semuereño'tpa' chocmuepa'chña e'ñe cohuen se'ñorana'tyenamet, allochña ñetpa' e'ñech cohuen entonaset ñeñt' atet señen. Allochña sapa' seño'chcha' eñorana'tyesahuet attoch e'ñe cohuen sanapyesanet e'ñe puesheña'ttso'cmet.

Arrpa' all so'terranet po'cartot

⁷ Ñaña te'pa' o'ch notas, masheñ Tíquico ñach seño'tatenaya' allohuen ñeñt' atet nepena na arr. Ñapa' atarr yemuerannena, ñapa' çocma e'ñe cohuen yenpuenen atto yetorrena Yepartsesharecop.

⁸ Ñeñto'marña napa' ñeñt'ecopña nemñeñña sesho ñach seño'tatenaya' ñeñt' atet yepena ya arr. Ñaña ñach socshatose' e'ñe seyoçhrohuen.

⁹ O'ch nemñe epuet masheñ Onésimo. Ñapa'cho'ña çocma atarr cohuen yenpuenen, nanac yemuerannena. Ñapa' e'ñe parro'marneshas. Ñetcha'ña seño'tatose'ña allohuen ñeñt' atet yepena ya arr.

¹⁰ Ñaña masheñ Aristarcopa'cho'ña mueneñ o'ch huom̄cha'tas añ necarto't. Ñapa'cho'ña e'ñe parro'cma ayottam̄psaretey. Allo'tpa' o'ch huom̄cha'tas ñaña masheñ Marcos ñeñt'ara añ paterr necarto't. Ñapa' Bernabé puepa'ñer. Napa' o' notuas atet'cha' sepe' masheñ Marcos. Ñerra'm esempoch çhap seshopa' e'ñech cohuen saga'p.

¹¹ Ñaña masheñ Jesús ñeñt'ara sochetsa Justo, ñapa'cho'ña mueneñ o'ch huom̄cha'tas añ necarto't. Ñetpa' ñeñt'et ñapue't judioneshet ñeñt' ame'ñetsa, ñetña netorrapretenet Yomporecop attoch atarr ayochreshattena ña. Ñetña atarr nocshatene'.

¹² Ñaña masheñ Epafra's ñeñt' parro'marneshas, ñapa'cho'ña mueneñ o'ch huom̄cha'tas ñaña. Ñapa'cho'ña nanac torrena Cristocop. E'ñe puema'yocheño't huomencpa' atarr torrena socop. Puema'yocheño'tpa' çocma enamatennas Yomporesho't attoch e'ñe huomenc sepa'nom seyoçher Yomporecop. Ñaña añ enamuennas attoch e'ñech poctacma çhaponasa seyoçhro ora allohuen ñeñt' atet muenen Yompor.

¹³ Ñocoppa' o' e'ñe neñotatuas ñeñt' atet nanac torrena socop ñaña añecop ñeñt' Laodiceo'tsa'yen, ñaña ñeñt' Hierápoliso'tsa'yen.

¹⁴ Ñaña masheñ Lucas ñeñt' apartañtetsa, nanac yemuerannena, ñapa'cho'ña mueneñ o'ch huom̄cha'tas añ necarto't. Masheñ Demaspa'cho'ña mueneñ o'ch huom̄cha'tas ñaña.

15 Te'ña sapa' o'ch sehuom'cha'ch sam'a nocop masheñnesha'chno ñaña no'chanesha'chno ñeñ' Laodiceo'tsa'yen. O'ch sehuom'cha'ch ñaña Ninfas, sehuom'cha'ch ñaña allohuen ñeñ' chocma ap'chetsa ña pa'paclo e'ne pame'ñeño'et Cristo.

16 Esem'poch lleya'huet añ carta sesho allotpa' o'ch selleyach ñaña laodiceo'marnesha' ñeñ' pame'ñeño'et Cristopa' chocma ap'chenet ñamet. Ñaña po'poñ necarta ñeñ' nemñen Laodiceo sapa'cho'ña selleye'ch ñerra'm esempoch huapateret Laodiceo' o'ch cherr sesho.

17 Ñaña o'ch soch masheñ Arquipo ñeñ' atet noten na, po'ño'chpa' et-sotanepa'ña ñeñ' atet yecheña Yepartseshar ñeñ'cha' po'taruas pa' nocop.

18 Na ñeñ'ten Pablon arrpa' nequellquëño' e'ne na nototpa' o'ch nehuom'cha'tnerres. Te'pa' o'ch seyerpa'na napa' ayottam'psareten. Te'pa' ñeñ'tach notas, Yomporepa'chña sa'nataya. Ñeñ'tpa' atetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑÑ QUELLCAN TESALÓNICO'MARNESHA' 1 TESALONICENSES

Atto Pablopá' quellcan carta añecop ñeññ ame'ñetsa anetso Tesalónico epuet Silvano ñaña Timoteo

¹ Masheñeshacha' ñaña nochaneshacha' ñeññes allohuenes apchetsa all anetso Tesalónico e'ñe seyemteñoť Yompor Parets epuet ñaña Puechemer Jesucristo ñeññ Yepartseshar yepen. Na Pablon sequellquëne'ña añ carta epan masheñ Silvano ñaña masheñ Timoteo. E'ñe nehuomñcha'teñoñes sa napa' o'ch notas: Yomporepa'ch sebensare'tamñpene' ñeññara Parets epuet Puechemer Jesucristo ñeññ Yepartseshar yepen. Ñetepa'chña socshatene' e'ñe sa seyoçhro allohuenes.

Atto ame'ñena ñeññ apchetsa Tesalónico

² Yapa' yema'yochamñpeñoñes sa çhocma yeparasyoso'teñ Yompor socop allohuenacpas.

³ Tarro'mar allempo yema'yocheña Yompor çhocma yeyerpuensa atto sapa' e'ñe seyemteñoť Yompor atarr setorra'yena ñocop ñaña e'ñe semor-rentanna'teñoťpa' atarr seyenpanna. Ñaña e'ñe seyemteñoť Yepartseshar Jesucristo sapa' o' huomenc sepa'nom seyoçher e'ñe ñocop.

⁴ Masheñeshacha' ñaña nochaneshacha' Yomporpa' atarr morrentensa. E'ñe yeñoteñ Yomporpa' ahuatoteñ acrerres sa ñeññescha' ame'ñerraya.

⁵ Tarro'mar añ cohuen ñoñets ñeññ yeserrpare'tatoses ahuaña, ñeññpa' ama ñoñtsenochayayo, yapa' añña ahuamencat yepene' Parets Puecamquëñ allochñapa' atto sapa' o' çhaponasa seyoçhro ñeññ ñoñetspa' e'ñepa't po'ñoçh ñeññpa' ama shequëñtsoyaye. Sapa' e'ñe señoñteney ñeññ atet e'ñe cohuen yorrtatysonas allempo allo'tseney sesho.

⁶ E'ñe atet sentey ya ñeññ atet yepena, sapa'çho'ña te'pa' e'ñech atet sepena saña, ñaña e'ñe atet cohuen orrtatyen Yepartseshar Jesucristo sapa'çho'ña te'pa' ñeññara sorrtatyen saña. Atto sagapoñ Yompor po'ñoñ e'ñe socsheñsha' Paretsña Puecamquëñ socshate'ña e'ñe sa seyoçhro. E'ñe same'ñeñoť ama't atarr sa'mueroçhtataretetyena ñarraña sapa' çhocma atarr socshena.

⁷ Ñeñto'marña allohuen ñeññ ame'ñetsa Macedonio'mar ñaña Acayo'mar, ñetñapa' atet eñotenset e'ñe cohuen sorrtatyen Yomporecop, ñetpa'çho'ña te'pa' e'ñe attecma orrtatyenet ñamet Yomporecop.

⁸ Te'ña e'ñe seshoť o' epa'hua Yompor po'ñoñ all serrpare'tyeñet. Ama allayayo Macedonio ñaña Acayo, oraña o' e'ñe epa'hua errañaren allemeñ. Errañaren o' e'mare'tuaset sapa' atarr same'ñeña Yompor. Te'ña ñet o' e'mare'tuetpa' ñocpuetpa' ama pallteneto o'ch alla yoterraneterr ya ello.

⁹ Ñetñapa' serrpare'tyenyet atto sapa' e'ñe cohuen sagapapuey. Ñaña serrpare'tatanna'tyenet atto sapa' o' soctape'cherr ello cohuen Yomporecop o' sequeçhpa'huerr ñeññ semchatse'tyese't ayeçhcataret. Te'ña ñeññpa' o' sequeçhpa'huer e'ñe poctacma attotña allempoteñ e'ñe cohuen sesherber Yompor ñeññ ama arromñañeshayaye ñeññ e'ñe po'ñoçh Yompor.

¹⁰ Ñaña serrpare'tyeñet atto sapa' e'ñe seyemteñoť atarr secueññañ Yompor Puechemer esempohuañencha' huerra pue'ntañoť ñeññara

Puechemer ñeñt tantaterr allempo rroma, ñeñtara Jesús ñeñtcha' ya'qushpaterre' ñerra'm esempoch yoroçhtatuer Yompor.

2

Atet pa Pablo allempo Tesalónico'tsen

¹ O'ch masheñshacha' ñaña noçhaneshacha' notas: Saña po'ñoçhpa' e'ñe señoteñ ahuañmo'cha e'ñe cohuen sagapapuey, ama orrena yemo'tenso.

² Ellonetpa' e'ñe señoteñ ama't epaye' mueroçhtatyete't Filiposo, ama't errotuanen pa'yetañe't, tarraña Yomporña atarr ahuaenca't pa'ye't atto yapa' e'ñe yeyemteño't ña yeserrpare'tatas saña añ cohuen ñoñets ñeñt huetsa Yomporesho't. Ama't allo'tsa'yen ñaña ñeñt nanac epatarña'tetyetsa, yañapa' çhocmaña yeserrpare'tatase't.

³ Ñeñtpa' ama panteñtso'teye' yoc'tape'chataso, ñaña ama sosya'tsañeye' yoc'tape'chataso, ñaña ama e'ñe ya yeshquëño't yoc'tape'chataso.

⁴ Elloña ya Yomporpa' e'ñe pocte' enteney ñeñto'mar llesensa'y yach a'po'terre' po'ñoñ ñeñt e'ñe po'ñoçh cohuen ñoñets alloch a'qushpaterrey. Ñeñt atet ye'ñorenapa' ama añecpayaye o'ch e'ñe orrena yocshach acheñenesha', yapa' añecopña ye'ñorena attoch yocshateñ Yompor ñeñt e'ñe yentuene' ñeñt atet yoc'tape'chyen yeyoçhro.

⁵ Ñeñto'marña sapa' señoteny ya ama't ahua'tapa' ama e'ñe ya yeñoño't yocshatenso attoch e'ñe cohuen sentueny. Ñaña ama't ahua'tapa' ama erra yeshquënsa attoch sapa' o'ch sapuey ñeñt yemnapretenes. Ñeñtpa' ama't Yomporpa' e'ñe pocte' entapreteney ñeñt atet yepenes.

⁶ Ñaña ama't ahua'ta ama a'ñeye' yellquëno attoch sapa' o'ch secohuentatennay ama't ñaña allohuen po'potantañeçhno. Ñaña yapa' ama't Cristo yellensenayeñ ñeñto'marña yocoppa' e'ñe pocteñ o'ch atet yepennaseñ ñeñt atet pena añcha'tare't, tarraña yapa' amaña yemno o'ch atet yepennasa.

⁷ Tarro'mar yapa' yemuereño'tes sapa' e'ñe cohuen es yorrtatyennas. E'ñe atet yentenes ñerra'mrrate' cheshatollesha' e'ñech cohuen muereña pachor.

⁸ Atarr nanac yemorrentensa ñeñto'marña ama e'ñe ñap'ta cohuen ñoñets yapuenso ñeñt Yompor po'ñoñ. Elloña yocoppa'çho'ña pocte' yenteñ o'ch yesuanom ñeñt e'ñe yocpa attoch yeyenpas saña tarro'mar sapa' atarr yemorrentensa.

⁹ Ñeñt atet yepena ya, amate' masheñshacha' çha sepsenye atto nanac yetaruase't yeto e'ñe tsapome'tets allempo allo'tseney sesho. Ñeñtpa' añecop atarr yetaruase't allochñapa' attoch sa ama't puesheñarro'tesapa' amach çha ya tsrre'moçhtana'taso allempo yeserrpare'tatase't cohuen ñoñets ñeñt Yompor po'ñoñ.

¹⁰ Sapa' e'ñe sentye't, Yomporpa'çho'ña e'ñe enteney atto yapa' e'ñe cohuen yorrtatyenes socop ñeñtes ame'ñetsa all. Ñeñtpa' e'ñe cohuen yorrtatyen Part-socop ñeñt e'ñe pocte' enten ña allochñapa' attoch amach erroteno't otenyeto "ama pocteyaye ñeñt atet sepena."

¹¹ Sapa' señoteñ yapa' e'ñe atet yentenes ñerra'mrrate' e'ñe yechemerasha' yepohuenes. Ñeñto'marña e'ñe cohuen yoc'tape'chatase't e'ñe puesheña'ttsos. E'ñe cohuen yocshaterres, e'ñe cohuen yoc'tape'chatase't

¹² po'ñoçh sapa' e'ñepa'chña cohuen sorrtatyen ñeñt atet poctetsa añecop ñeñt po'ñoçh ame'ñenaya Yompor tarro'mar ñapa' o' hua'ñerres o'ch so'patapretera all añcha'tare'tena ña, attochña secohuentapretera saña.

¹³ Ñeñto'marña añecop chocma yeparasyoso'teñ Yompor ñaña atto sapa' allempo ye'mñotaterres Yompor po'ñoñ sañapa' e'ñe cohuen saguèrrñañ po'ñoñ. Ama't ya seserrpare'tatosayen ama acheña po'ñoñ senteñe, ñeñtpa' Yomporoña po'ñoñ sentña allempo. Ñehua, ñeñtpa' e'ñe po'ñoñch Yompor po'ñoñ. Te'ña sa ñeñtes o' same'ñerra, Yomporña po'ñoñ o' cotape'chaterres e'ñe cohuen seyoçhro o' e'ñe huenaterres ñeñt atet chocma sepatse'tyese't ahuat; te'ña sapa' añ sorrtatyen ñeñt e'ñe cohuen enten Yompor.

¹⁴ Sapa'cho'ña masheñeshacha' e'ñe atet sa'mueroçhtatarettena Yomporecop e'ñe atet pe't ñeñt ñanom apçhatsa Yomporecop ñeñt Judeo'tsa'yen. Ñetpa' e'ñe pueyemteño'tet Cristo Jesús, judionesha'ña ñeñt e'ñe pamo'ts penetpa' atarr mueroçhtatenanet. Sapa'cho'ña e'ñe seyemteño't Cristo atarr mueroçhtatenes samã samo'tsesha'.

¹⁵ Ñeñtara judionesha' ñeñt muetse' Yepartseshar Jesús ñaña ñet muet-sanatete't ñeñt a'mta'yesaye't ahuat Yompor po'ñoñ. Ama't te' yapa'cho'ña pue'moñe'teño'tetay o' cotare'terryeterr yaña. Ñeñto'marña Yomporpa' ama't e'ñe mameshapa' ama cohuenaye' entenaneto tarro'mar ñetpa' añe'ña e'moñe'tenet allohuen pa'namen acheñenesha'.

¹⁶ Ñetpa' atarr epatare'tenyet attoch yeserrpare'tach po'poñ acheñ ñeñt ama judioneshayaye attoch ñetpa'cho'ña o'ch a'queshpataretterret. Attoña ñetpa' atarr nanac yorenet po'chñaret. Tarraña te'ña Yomporpa' o' entatuer-rmochanet po'yoroçhenña.

Secherra Pablo o'ch abcherraneta'

¹⁷⁻¹⁸ Ñaña o'ch masheñeshacha' ñaña noçhaneshacha' notas: Yaña po'ñoñch allempo cha'nmataterryet seshot allempoteñña ama't esempapa' ama yaßchanna'terro e'ñe teme'ttsen. Chemerrña te' yapa' o' e'ñe yaptamerra. Tarraña ama't ama allame'ttsa yaßchannenopa' yeyoçhroñapa' e'ñe parrocmatetsey. Yapa' chocma yesechenañ o'ch yaßcherrsa' ama't napa' allponoche'tats nesechenañ. Tarraña oneñeñña' chocma epatare'teny.

¹⁹⁻²⁰ Tarro'mar sapa' saña ñeñtes atarr yocshatene'. Ama't allempoch huerra Yepartseshar Jesucristo sapa' saña ñeñtescha' atarr yeyemterra, ñeñtescha' atarr yocshaterre' allempo, tarro'mar sapa' ñeñtescha' yap-ataterre' ñeñtcha' atarr yocshatene'ña ya allempo.

3

¹ Allempoña na o'huañ na'huanta' ñeñt atto nellquënsa ñato' erroteno'tseneste', ñeñto'marña napa' e'ñe pocte' neñch o'ch alla na'pa napue't Atenso

² attoch nemñonas masheñ Timoteo ñach semo'terraya', ñach seserrpare'tatose' attoch e'ñe huomenc sepa' seyoçher ñeñt atto same'ñena. Ñach socshaterre' ello ñeñt atto same'ñena. Tarro'mar masheñ Timoteo ñapa'cho'ña atarr cohuen yetorrena parro Yomporecop. Atarr serrpare'tatyenanet cohuen ñoñets atto Cristopa' ña a'queshpatañtetsa.

³ Ñach soctape'chaterre' e'ñe cohuen Yomporecop allochñapa' ama't atto atarr amueroçhtataretes, amachña ñeñtota sepueerratsterro ama't puesheñarrotesa. Ñehua, sapa' e'ñe seño'teñ chocmach huaponaya ñeñt amue-roçhtatañ yenten.

⁴ Allempo e'ñe allo'tsa'yenacmay allohueney e'ñe parro allempo yapa' atet o' yotuas chocmach huaponaya mueroçhteñets. Ñeñtña te'pa' atetcho' o' ñonasa, te'pa' e'ñeñe' seño'teñ e'ñe po'ñoñch atet.

⁵ Ñeñto'marña ahuaña allempo o'huañ na'huañ ñeñt atto nellquënna naña allempo nemñe masheñ Timoteo attoch neñotas sapa' erroteneste'ña sa, ñato' atterate' sesen ame'ñaya Yompor. Napa' nellquëño'pa' atet noten ñato'rraña oneñet puetpateño'es o'te' cha quechpaterres Yompor. Ñerra'm atet seperra napa' atet noten ñeñt atto netorrena e'ñe socoppa' ñato'rraña ñeñtpa' e'ñete' orrena.

⁶ Tarraña allempo huerra masheñ Timoteo seshot, ñapa' serrpare'tatuerrey cohuen ñoñets, sapa' attera e'ñe cohuen same'ñena, e'ñe cohuen attera semorrentannena. Ñaña serrpare'tatuerrey atto sapa' chocma seyerpuenya socsheñsha' ñaña atarr semneñ o'ch yabchannerra parro. Yapa'cho'ña e'ñe attecma atarr yemneñ yaña.

⁷ Ñeñto'marña masheñneshacha' ñaña nochaneshacha' yapa' ama't allohuen es yehuenoya ñaña ama'tcha' atarr yemuerochetuanena, te'ñapa' o' alla socshaterrey. Atto yeñoterres sapa' attera cohuen same'ñena ñeñtña atarr yocshaterre'.

⁸ Atto sapa' e'ñe cohuen huomenc sepen seyocher Yepartsesharecop, napa' ñeñtña e'ñe cohuen nocshatene' atto nocrrena arr patsro.

⁹ Ñeñto'marña atarr nanac yeparasyoso'teñ Yompor socop. E'ñe yeyochropa' chocma yocshensa Yomporeho ñeñto'marña chocma yeparasyoso'teñ Yompor socop.

¹⁰ Chocma yenamueñ Yompor yeto ama't ñaña tsapo attoch yabchannerra. Atarr yemneñ o'ch yoctape'chaterrsa' erra'tsente'ña sepalltena attoch same'ñera e'ñe poctacma.

¹¹ Yompor Parets ñaña Yepartseshar Jesús ñetepa'chña yechapaterre'ña sesho.

¹² Yepartsesharepa'chña atontaterre'ña semorrenteña allochñapa' allo'nach nanac sesen morrentanna'ttsa e'ñe sagattsa attochña allo'nach sesen morrentenaya allohuen acheñenesha', e'ñe atet yepena ya sapa' nanac yemorrentensa.

¹³ E'ñe semorrentanna'teño' seyocherñapa' e'ñech huomenc pennas Yepartseshar Cristo. Ñerra'm atetcha' sepa' allempopa' amach erroteno' otteñe'chuerrsoña Yompor tarro'mar sapa' e'ñech cohuen es sorrtyen Partso-cop e'ñe tayoteñ. Attepa'chña entuerresña Yompor Parets ñerra'm allempoch huerra Yepartseshar Jesús. Esemppo po'ño'chpa' huerrach epuet allohuen ñeñt pueyochreshachno pen ñeñt e'ñe pocte' enten Parets.

4

Allo'nepa'chña cohuen yesen orrtatyesnene' ñeñt atet e'ñe pocte' enten Yompor

¹ Te'ña masheñneshacha' ñaña nochaneshacha' napa' o'ch notas, e'ñe yame'ñeño' Yepartseshar Jesús, sapa' allo'nepa'chña cohuen sesen orrtatyesnene' ñeñt atet e'ñe pocte' enten Yompor ñeñt yeychatuas ahuañmo'choteñ.

² Sapa' po'ño'chpa' o' seño'ter ñeñt atet yeychatuas e'ñe yame'ñeño' Yepartseshar Jesús attochña sapa'cho'ña o'ch sorrtyen ñeñt cohuen enten ña.

³ Po'ño'ch ñeñtpa' Yomporña muene'ña atet, sapa' o'ch sa'cohuentatare'tterra ñocop attochña ama't puesheñarro'apa' amach sechtatscheña ñeñt ama setaporeyaye.

⁴ E'ñe puesheña'ttsospa' chochña e'ñe señoach attoch e'ñe cohuen seyore coyanesha' ñeñtcha' e'ñe ñapueñ setapor sepa'. Atetpa' e'ñech pocte' entapretenes Parets, ama't ñaña allohuen acheñenesha'. E'ñechña cohuen senteñña setapor.

⁵ Amachña e'ñe añecpa seyoroña setapor attoch e'ñe socshaten sechets ñeñt atet pena po'potantañ acheñenesha' ñeñt ama eñotenaye Yompor.

⁶ Ama't puesheñarrotésapa' amach so'chña'tamñsatscheña semo'nasheñ, amach sechtapretatsche puetapor. Allohuen ñeñt atet ye'pa'pa' chocmach tsa'taterrya Yompor esempo. Ñeñt'pa' ahuañmo'choteñ e'ñe po'ño'ch o'yotuas.

⁷ Yomporpa' ama añecpaye' chore'tenye o'ch aña atet ye'pa'yes ñeñt atarr sosey, añecopña chore'tenye o'ch e'ñe ya'cohuentataretterra ñocop.

⁸ Ñerra'm esesha'ch atpare'tene' ñeñt atet neychatenes ñetpa' ama acheñeye' po'ñoñ atpare'teneto, ñeñt'pa' Yomporña po'ñoñ atpare'tenet ñeñtara Yompor ñeñt yapuene' Puecamquëñ ñeñtcha' ya'cohuentatene' e'ñe ñocop.

⁹ Atto semorrenteña allohuen masheñneshachnopa' te'ña sapa' ama sepallteno o'ch alla noterr serr necartoñ, sapa' o' eñotaterres Yompor attoch semorentannerra allohuenes.

¹⁰ Po'ño'ch e'ñe semorrentueña allohuen ñeñt ame'ña'yetsa allemeñ Macedonio. Tarraña ama't atet sepena'ña' ellopa' o'ch masheñneshacha' ñaña nochaneshacha' alla noterr serr: Allo'nepa'ch sesen morrentanna'tnomtsa e'ñe cohuen.

¹¹ Sapa' añcha'ña se'nen attoch e'ñe cohuen muechet seyçhena sa'netsro, amachña aña sorrtatatsetyeso attoch se'moñe'tannena. Ñaña o'ch alla noterr serr e'ñe sa soto'pa' chocmachña setaruasa'yes ñeñt atet o' notuas.

¹² Cohuencha' setaruasa'yes allochñapa' e'ñech cohuen entenes ama't ñeñt ama ame'ñetso. Ñaña sapa' añecopcha'ña setaruasa'yes attoch amach cha es sepallteno.

Attoch tantuerra ñeñt arromñañnesha' allempoch huerra Jesús

¹³ Masheñneshacha' ñaña nochaneshacha' yapa' yemneñ o'ch e'ñe seño ter erroteno'tsa'yente'ña ñeñt pame'ñeñoñ rromuets. Allochñapa' amach atta atarr sellquënaneto ñeñt atet pena po'potantañ, ñetpa' ama es yemteneto.

¹⁴ Yapa' atto yame'ñeña Jesús ña ama't rroma ellopa' alla tanterra, yame'ñeña ñaña Yomporpa' attec mach tantatuerrey allohueney ñeñteycha' e'ñe yame'ñeñoñ Jesucristo yerroma.

¹⁵ Ñeñto'marña te' sapa' o'ch neñotatas ñeñt atet eñotaterrey Yepartseshar Jesucristo, ñeñt'pa' atet ye'chatey: Allohueney ñeñteycha' orameñ corretsa allempoch huerra ña ñeñteycha' ama rromhuetsa' allempo, ya'ñapa' amach yotamñpesyoña yanom ñeñt o' rromhua, añcha' ñanom oterrtsa ñeñt o' rromhua alloñapa' ya'ña ñeñtey orameñ corretsa, tarro'mar allempopa' atetcha' perra.

¹⁶ Partsessa'pa' ñachña eñerrets huomenc ñaña ñeñt pa'mñcha'tareter pen allohuen mellañoñeñnesha' ñachña rrana'nerrtsa, e'ñech allempocma e'morrterra ñaña Yompor po'pocctor. Attochña ñapa' sohua'nerra pue'ntañ. Ñeñtña rromuets ñeñt ameña'nmaya Cristo ñetña allempopa' ñanmuetcha' tantrra'tuerret.

¹⁷ Alloñapa' ya'ña ñeñtey orameñ corretsa arr patsro a'tapatareteycha' ya'ña oso e'ñe parro epay ñeñt o' tantrra'tuena rromot attochña e'ñech parrocmayepocter Yepartseshar eno. Attochña e'ñe allohueneypa' parro'tseneycha' epay Yepartseshar e'ñe allempoteñ errponañohuen.

18 Ñeñto'marña sapa' chocmach seyerpatannena añ cohuen ñoñets attoch e'ñe cohuen socshatannena.

5

1 Te'ña masheñneshacha' ñaña nochaneshacha' socoppa' ama pallteno o'ch alla noterrser añ necartot e'ñech esempo etsoterra allempoch huerraña Yepartseshar.

2 Tarro'mar sapa'cho'ña o' e'ñe señoter cherrcha' paterr yet allempoch huerra Yepartseshar Jesús. Allempopa' e'ñech machayota huerra e'ñe atet ñerra'm esempo huennaya eñe' tsapo e'ñech machoyota huapa.

3 Allempo amach chena' ñeñt yeter allempoch huerra Yepartseshar acheñenasha'ña arr patsro ñetña'pa' atetcha' otyerret allempo: "Te'ña yapa' e'ñe cohuen muechet yeychena arr patsro. Yocoppa' ama't ahuatapa' amach eñalleterroña ñeñtcha' yeyore'tame'terre'." Tarraña e'ñech allorocma machayotach huerranet ñeñtcha' e'ñe a'cllatuerrahuet. Allempo ama't puesheñarrapa' amach eñalleña attoch yeterret. E'ñech atet cherranet ñerra'mrrate' allempo atsotenana coyanesha' pue'mar amach eñalleña attoch yetamñsana atto atserrpeñ pue'mar attoch amach atserrpe.

4 Tarraña saña po'ño'ch masheñneshacha' ñaña nochaneshacha' sapa' ama checmeto'tsenayayso ñeñt atet pena acheñenasha' ñeñt ama ame'ñetso. Sapa' e'ñe seño'teñ ñeñto'marña ama'tcha' machayota huerra e'ñe atet machayota huennaya eñe', saña'pa' amach cha seyorenatsto.

5 Tarro'mar sapa' e'ñe same'ñeño't Cristo e'ñe seño'teññañ po'cohuenña ñeñto'marña napa' o'ch netma'ntatasa sapa' puetarenana'tarneshas ñaña yetena'tarneshas. Po'ño'ch yapa' ama tsapo'marneshayayye ñaña ama checmeto'marneshayayye tarro'mar yapa' ama a'ñeye' ye'pa'yeno ñeñt atet patse'tyen ñeñt ama ame'ñetso.

6 Ñeñto'marña o'ch notas: Yapa' amach cha ye'cllatsto Yomporecop, tarro'mar ñerra'm atet ye'papa' chach yottena ñerra'm cha yemuen Yomporecop atet pena po'potantañ ñeñt atta es pue'cha'yetsa. Yapa' amachña cha yemanrra'tatsto chochña e'ñe ye'notena attochña ye'ñose're'tyesuena.

7 Ñehua, ye'noteñ ñeñt manrretspa' tsapoch manrrenet ñaña ñeñt posa'tare'tyetspa' tsapoch posa'tare'tyenet.

8 Tarraña yapa' yeto'marneshay ñeñto'mar chocmuepa'ch e'ñe ye'noteño't ye'ñose're'tyesuena. E'ñe yame'ñeño't Yompor ñaña yemorrentanna'teño't ñeñtña cohuanñpene'ña yeyocher Yomporecop attoch amach aña yoc'tape'chatsto ñeñt ama pocteye' enteno Yompor. Ñeñt'pa' añ toma'ntena asrom atet ñerra'mrrate' ñeñt chorrena solltar ñeñt a'natene' puesomap allempo quellarena attoch ama etaretteneto. Ñaña yapa' yeyemteño't Cristo te'ñapa' e'ñe a'queshpatare'tey ñeñt'pa'cho'ña ñeñtña yemoñenaya. Ñeñt'pa' añ toma'ntena atet pena solltar o'ch na'nman asret poño attoch ama etto'tare'tteto.

9 Tarro'mar Yompor po'ño'ch'pa' ama a'ñeye' o'patatenyo attoch coñchatuerrey; yapa' añña o'patatenya attoch e'ñe cohuen a'queshpatuerrey allohueney e'ñe yame'ñeño'ta Yepartseshar Jesucristo

10 ñeñt rromats yocop, attochña ama'tcha' o' yoclla'huenañ allempoch huerra amapa' ñato' orameñ yocrenmeñ allempoch huerra atterayach yañapa' corretsayach epay ña e'ñe parro.

11 Ñeñto'marña te'pa' notenes, sapa' chocmuepa'ch socshatannena Yomporecop. Chocmuepa'chña huomenc se'panna'ta seyocher Yomporecop e'ñech atet se'pa tayoteñ.

Pablo'pa' e'ñe cohuen cotape'chatyesanet

12 O'ch masheñneshacha' ñaña no'chaneshacha' notas po'poñ, sem'cha'na'teño'pa' e'ñepa'ch cohuen semorrenteña allohuen ñeñt' torra'yetsa Yomporecop sesho tarro'mar ñetpa' e'ñe Partsesheshot anarettenet ñeñt'cha' añcha'tarettatsa socop, ñetcha'ña soctape'chatene'ña e'ñe cohuen.

13 Atto atarr torrenet Yomporecop sañapa' e'ñepa'chña cohuen sentenanet, atarrcha' semorrentenanet. Ñaña ama't allohuenes e'ñe sagattsapa' e'ñepa'chña cohuen sentannena attoch e'ñe cohuen sey'chena e'ñe señañesha'.

14 Ñaña o'ch masheñneshacha' alla noterserr ñeñt'cha' atet sepa: Ñeñt' atarr quellañtsotyets sesho sachña cotape'chaterrahuet cohuen attoch amach allo'na quellañtsoteneto. Ñaña ñeñt' ama coshetso sachña e'ñe cohuen coshaterrahuet ñaña ñeñt' ama huomencaye' penaye pueyo'cher Yomporecop, sachña e'ñe cohuen coshatyerrahuet attoch e'ñe huomenc perret ñamet pueyo'cher Yomporecop. E'ñe allohuenet saña e'ñe semorrenteño'fanet ñetpa' chocmuepa'chña e'ñe cohuen sa'huantenanet.

15 Ñaña sapa' chocmuepa'ch e'ñe cohuen seño'tena allochñapa' ñerra'm po'psheñeñ erro't p'onaspa' sapa' ama't e'ñe puesheñarro'fesa amach setsa'tatatsche ama't coñe'ta. Añcha'ña e'ñechña cohuen sepeñ samo'ts ama't ñaña allohuen po'potantañ acheñenesha'.

16 Ñaña sapa' chocmuepa'ch e'ñe cohuen socshena.

17 Ñaña chocmuepa'chña sema'yochena.

18 Ñaña ama't erro'teno'tsensa chocmuepa'ch separasyoso'teñ Yompor tarro'mar ñeñt'pa' atet muenen e'ñe yocop allohuenacpay ñeñt'ey yemtenoya Puechemer ñeñt' Cristo Jesús.

19 Ñaña amach satpare'tatsche ñeñt' atet cotape'chatenes Parets Puecamquëñ e'ñe seyochro, tarro'mar ñerra'm atet se'papa' chate' sa'huañaterrñañ ñeñt' atet eño'tatyenes Yompor Puecamquëño't. Ñeñt'pa' e'ñe atet ñerra'mrrate' o' semayerrñañ Yompor po'urare.

20 Ñaña amach atet sentatsche ñeñt' atet eño'raten Parets Puecamquëño't ñerra'm ama asherbenaye' senteñe.

21 Allohuen ama't erra'tsena' chochña ñanom seño'ch ñato' e'ñe'te' cohuen ñato'pa' amate' cohuenayaye. Ñeñt' allohuen erra'tsencha' e'ñe cohuen sentyes ñeñt'ñapa' amach seque'chpatstere ama't ahuata.

22 Tarraña allohuen erra'tsencha' ama cohuenaye' sentyeso ñeñt'ñapa' chosaña a'ypo'ñerre'.

23 Yompor ñeñt' e'ñe yocshatene' yeyochro, ñepa'chña e'ñe sa'cohuentaterre' e'ñe cohuen Partsocop. Chocmuepa'ch allo'na sesen e'ñe cohuen allochñapa' ñerra'm esempoch huerra Yepartseshar Jesucristo, socoppa' amach eñalleña ama't coñe'ta attoch otteñe'chuerres ama't secamquëño'huen, ama't seyochrohuen, ama't ñaña sechtsohuen.

24 Tarro'mar Yompor ñeñt' o' chore'terres ñapa' ña atarr ayemuetpotetsa, ñachña setsotatue'ña e'ñe ora allohuen ñeñt' e'ñe cohuentetsa ñocop.

Arrpa' all so'terranet po'cartot

25 O'ch masheñneshacha' ñaña no'chaneshacha' notas, chocmach sema'yocham'pesya yaña.

26 Ñaña te'pa' nemneñ o'ch nehuom'cha'tas allohuenes ñeñtes ame'ñetsa.*

* 5:26 Po'ño'ch otene'y. "Choch setso'ttsa'pa'tannena ñerra'm esempo sehuom'cha'tanna'tena ñeñt' atet poctetsa Partsocop." Ñeñt'pa' atet ye'chete't ahuat.

²⁷ Ñaña te'pa' o'ch notas, e'ñe yem'cha'na'teñoť Yepartseshar Cristo añ cartapa' o'ch selleyach allohuen masheñneshačno ñaña nočhaneshačno.

²⁸ Yepartsesharepa'chña Jesucristo sa'natenaya e'ñe allohuenes. Ñeñtach notas, ñeñtpa' attetepa'ch Nompore. Allohua.

Pablo

AÑ PUEPAÑ SAN PABLO PO' CARTA ÑEÑÑ QUELLQUËRRANERR TESALÓNICO'MARNESHA' 2 TESALONICENSES

Atto Pablopa' quellquërranerr carta añecop ñeññ ame'ñetsa anetso Tesalónico epuet Silvano ñaña Timoteo

¹ Masheñeshacha' ñaña nochaneshacha' ñeññes allohuenes apçheta all anetso Tesalónico e'ñe seyemteñoñ Yompor Parets epuet ñaña Puechemer Jesucristo ñeññ Yepartseshar yepen. Na Pablon o'ch alla nequellquërrnaserr po'poñ carta epan masheñ Silvano ñaña masheñ Timoteo.

² E'ñe nehuom'cha'teñoñes sa napa' o'ch notas: Yomporepa'chña sebensare'tañpene' ñeññara Parets epuet Puechemer Jesucristo ñeññ Yepartseshar yepen. Ñetepa'chña socshatene' e'ñe sa seyoçhro allohuenes.

Allempoch huerra Cristopa' a'coñchatare'terrach allohuen ñeññ ama eñotaye'te Yompor

³ O'ch masheñeshacha' ñaña nochaneshacha' notas, e'ñe pocte' çhocmach yeparasyoso'teñ Yompor socop tarro'mar sapa' po'ñoçh allo'na sesen ame'ña'nmaya Yompor ñaña allohuenes e'ñe puesheña'ttospa' allo'na sesen morrentanna'tyesnomtsa.

⁴ Ñeñño'marña yañapa' atarr yocshensa. E'ñe yocsheñoñpa' atarr cohuen yeñosyen socop all allampaño'mar all apçha'yenet Yomporecop. Ñetpa' çhocma yeñotatyenanet atet sepena sa, ama't ñeññ se'moñe'tene' ñeññ çhocma soçtare'tene' atto mueroçhtatenset, tarraña sañapa' çhocma atarr sa'huantenanet e'ñe same'ñeñoñ Yompor.

⁵ Ñehua, yapa' yeñoteñ Yomporpa' e'ñe pocte' es pa'yen. Ñeñño'marña yeñoteñ sapa' e'ñe same'ñeñoñ ña, ñañapa' e'ñeca'ye pocte' entenes allochñapa' attoch seçherr all añcha'tare'ttena ña, sapa' ñeññecopña atarr sa'mueroçhtatare'ttenaña te'.

⁶ Tarraña Yomporpa' e'ñe pocte' enteñ ñach tsa'taterraya mueroçhteñtso allohuen ñeññ semueroçhtatene' sa te'.

⁷ Ñeññ atto atarr semueroçhtena te' e'ñe ñocop, Yomporñaapa' e'ñe pocte' enteñ socop, ñachña ello socshaterre'ña sa e'ñe atet atarr coshateney ya. Yapa' ñeññcha'ña atarr yocshaterre' ñerra'm esempoch orretuerra Yepartseshar Jesús allempoch huerra pue'ntañoñ. Ña po'ñoçhpa' orretuerrach epuet po'mllañoñeñnaneshar ñeññ atarr ahua mencatesha' pa'yen. Ñapa' e'ñeçh po'yoroçhenñoñ huerra atet ñerra'mrrate' tso' huoretnets.

⁸ Allempoch huerrapa' coñchatuerrancha' allohuen ñeññ ama eñotaye'te Yompor ñeññ ama ame'ña'poye' entaye'te cohuen ñoñets ñeññ Yepartsesharecop Jesucristo.

⁹ Ñetñaapa' attoch a'coñchatare'terretpa' chenca'huerretcha' errponañohuen. Attoch ñetpa' o'ch ellopa'tetstatare'terret amach entereto Yepartseshar, amach enterrñañeto po'cohuenña all nanac partsotena.

¹⁰ Ñapa' tarro'marcha' huerra attoch allohueney ñeññey pueyochresha' pen Parets, yañapa' yecohuentatapuerrñañcha'. Allohueney ñeññey ame'ñaye't atarrcha' yecuanrrortapuer. Sa'nachña cohuentatapuerre' tarro'mar sapa'çho'ña same'ñena cohuen ñoñets ñeññ yeñotatenes.

11 Ñeñto'marña yapa' chocma yema'yocham̄pensa allochñapa' attoch Yomporpa' e'ñe pocte' entenes atto ñapa' o' chore'terres o'ch pueyochresha' perres saña. Ñaña yapa' añ yenamuennas Yompor e'ñepa'chña po'huamencoť etsotatonasña allohuen ñeñť atet soctape'chyen cohuen ñocop ñaña ora ñeñť allpon setorra'yena e'ñe same'ñeñoť ña.

12 Attochña sapa' e'ñech cohuen secohuentaterrñañ Yepartseshar Jesús, ñañaapa' cohuentaterrescha' saña. Ñeñťpa' e'ñe Yompor puemuereñoťey ñaña Yepartseshar Jesucristo.

2

Allempoch orrterra puesheñarr acheñ ñeñť atarr atparñatetsa

1 Te'pa' o'ch masheñeshacha' ñaña nochaneshacha' neñotatas po'poñ ñeñťpa' añ allempoch huerra Yepartseshar Jesucristo attoch ñapa' o'ch apchatuerrey allohueney e'ñe ñesho.

2 Te'pa' ñeñto'marña notenes: Ama't puesheñarrofesapa' ñato't čha yore'tensa'ña po'poñ coťapñats. Sapa' amach čha seyorenatsto ama'tcha' se'mare'ter o' čherr allempoch huerra Yepartseshar. Ama'tcha' otasetañ ñetpa' e'ño' Parets Puecamquēñ eñoratenahuet, sañapa' ñato'tña čha seyorena'. Ama'tcha' puseserrparñoťet atet otaset, sañapa' amach seyorenatsto. Ama'tcha' atet otasetañ te'pa' o' chap carta ñeñť mueñen Pablo ñeñťpa' atet oten carta, te'pa' o' čherr allempoch huerra Yepartseshar, saña e'ñe seyorñoťpa' ñato'tña ñeñťaña same'ñena'.

3 Ama't puesheñarrotesa sapa' amach se'mñotatstaneto ama't e'ñe errotēncha' otyesaset, tarro'mar ñetpa' atetcha' shecare'tasetañ. Ñeñto'marña napa' o'ch notas, allempopa' amaca'ye čherra' ñeñťeño po' ñeñte yetñatsroch huerra Yepartseshar, ato'tña atarr atonterra' ñeñťcha' quechpuerre' Yompor. Ñaña allempopa' orrterrach puesheñarr acheñ ñeñť atarr atparñatetsa, ñeñťpa' chenquēñtsa o'patenaya. Ñañaapa' Yomporach atarr e'moñe'terr ñaña allohuen acheñenesha' ñeñť muechatse'tyene' pa'namen ñeñť po'yomporer pa'yenet ñachña e'ñe tanterrahuet.

4 Ñaña ñeñťña atparñatpa' e'ñe pommo'cheñoťpa' atetcha' oterran acheñenesha' ñapa' ño'ña e'ñe Yomporētets. Attochña ama't Parets pa'pacłlopa' o'ch anorruerr, o'ch e'ñe atet perra ñerra'mrrate' ña po'ñočh Yomporētets.

5 Sapa' ama't seyerpuenoña allempo allo'tsenmeñen seso na ama't ñeñťpa' e'ñe notuase't.

6 Sapa' señoťeñte' ñeñť onare'tatene'ña ña attoť amo' huerro tarraña chocmach orrterra allempoch čherr e'ñe atet onañchareť ñocop.

7 Ama't e'ñe tayoteñ atto atpare'tenet ñoñets ñeñť atet anareťpa' ñetña e'ñe a'nahuapa' chocma atet penet. Tarraña te'pa' eñall ñeñť onare'tatene' ñeñť acheñer ñeñťcha' atarr atparñaterrtsa, ñeñťñaapa' chocmach atet pena tarremphuach esempoch aprratam̄psareťterra ñeñť onare'tatene' te'.

8 O'ch aprratam̄psareťterrapa' ñeñťña acheñer ñeñťcha' atparñaterrtsa allempochña orrtatareťterra. Tarraña allempoch huerra Yepartseshar Jesús ñachña e'ñe puenamoť po'rrerrñoťpa' ñeñťcha' muetserre'ña ñeñť atarr atparñatetsa. Attoch orrterra Jesús e'ñe ña po'partsoteñoť ñeñťcha'ña e'ñe a'mchechaterre'ña ñeñť atparñatetsa.

9 Ñehua, ñeñť acheñerpa' oneñeť atarr ahuamencat pene' attoch orrterra. Ñeñto'marña pa'namencha' orrtaterr ñeñť po'partsoña pen ña ñeñť ama't ahuata acheñenesha' arr patsropa' ama't puesheñarroťetapa' ama puentareto.

Tarraña ñeñt po'partsoteña pen ñapa' ñeñtpa' ama Yomporeye' apuenaye, ñeñtpa' oneñeta apuene' atto shecare'tyenan acheñenesha'.

¹⁰ Attach e'ne pa'namenot atarr shecare'tyerran acheñenesha' ñeñt ama't mameshapa' ama pocteyaye. Añcha' ashcaretterrtsa allohuen ñeñt ama ame'netso ñeñt o'patena chenquëñets. Tarro'mar ñetpa' ahuatoteñ ama ame'ña'poye' enteññañetoña Yompor po'ñoñ ñeñt e'ne po'ñoñ alloch a'queshpaterretetañ.

¹¹ Ñeñto'marña Yomporpa' muenaterranetcha' o'ch atarr ashcaretterret, attochña ñetpa' e'ñech aña ame'ñerret shequëñets ñeñt ama po'ñoñhayaye ama't mamesha.

¹² Attochña allohuen ñeñt ama ame'ña'poye' entaye'te Yompor po'ñoñ ñeñt e'ne po'ñoñ queshpeñets, ñetpa' aña coshete't ñeñt ama pocteye' enteno Yompor, ñeñto'marña ñetpa' a'coñchatare'tterretcha' allempo.

Yapa' e'ne ahuatoteñ acrerrey Yompor attoch a'queshpaterrey

¹³ Tarraña saña masheñnesha ñaña nochaneshacha', yapa' chocma yeparasyoso'teñ Yompor socop ñeñtes atarr muerena Yepartseshar. Tarro'mar Yomporpa' ahuatoteñ acrerres sa attoch a'queshpaterres e'ne cohuen. Ñeñtpa' añcha' sa'queshpaterre' atto Parets Puecamquëñpa' e'ne a'cohuentatenes ñocop atto sapa' e'ne cohuen same'ñerrñaña po'ñoñ ñeñt e'ne po'ñoñ alloch yequeshperra.

¹⁴ Sapa' ñeñtecopña chore'terresña Yompor allempo yeserrpare'tatase't cohuen ñoñets alloch a'queshpaterrey Yompor. Attochña sapa'cho'ña secohuentapreterach Yepartseshar Jesucristo esempohuañen.

¹⁵ Ñeñto'marña o'ch masheñneshacha' ñaña nochaneshacha' noterrserre: Sapa' e'ñepa'chña huomenc sepa'nom seyoçher Yomporecop. Ñaña ora allpon ñeñt yeychatyesase't e'ne ya yenamot yeserrpare'tatase't ama't ñaña yecartot ñeñtñapa' e'ñepa'ch huomenc seyoçhre'cha.

¹⁶⁻¹⁷ Te'ñapa' o'ch notas: Yepartseshar Jesucristo ñaña Yompor Parets ñetepa'chña e'ne cohuen socshaterre'ña sa seyoçhro, ñetepa'chña ahuaamenca't sepa'yese' allochñapa' attochña sapa' chocmach señosyen ñeñt e'ne cohuen ñoñets ñaña e'ñechña cohuenare' es sorratyen. Tarro'mar Yomporpa' ñeñtña atarr yemorrenenaya, ñapa' ña ñeñt chocma yocshatene' yeyoçhro. Ñeñtña cosheñetspa' amach ahuañaña'tterro ama't errponaña. Ña e'ne puemuereño'tpa' chocma eñotateney e'ne cohuen ñeñt atarr yeyemtena.

3

Atto Pablopa' otanet chocmach ma'yochampeñet

¹ Masheñneshacha' ñaña nochaneshacha' te'ña e'ne allohuapa' o'ch notas: Sapa' chocmach sema'yocham'pesya yaña. O'ch senamueñ Yompor attoch epa'huerra tecma Yepartseshar po'ñoñ erraparen, cohuenepa'ch entyeññañet po'ñoñ e'ne atet atarr cohuen señch saña allempo chap sesho.

² Tarro'mar acheñenesha'pa' ama allohuenacmaye' ame'ñeneto, shonte' ñeñt atpare'tene' Yompor ñaña shonte' atsrre'mñañnesha' ñeñt ama cohuenayaye. Ñeñto'marña sapa' añcha' senamueñ Yompor amuepa'chña cha epatare'tatsetyeto.

³ Tarraña Yepartsesharpa' ñachña atarr yeyemtena, ñachña ahuaamenca't sepene', ñach secuan'pene', ñach sa'nataya, amach muenatano o'ch çhaponasa ñeñt ama cohuenayaye.

⁴ Ñaña yapa' e'ñe yeyemteñoť Yepartseshar sapa' e'ñe yeñotenes ñeñť atet yotenes sañapa' e'ñech atet sepena te' ama't ñaña tsapaťonet čhocmachña atet sepena.

⁵ Yepartsesharepa'chña Jesús e'ñe cohuen señotatene'ña seyočhro atto Yomporpa' atarr morrentensa, attochña e'ñech cohuen sa'huinta'huanom allohuen topateñets e'ñe atet pe't Cristo.

Yocoppa' añ poctetsa čhocmach yetaruasen

⁶ Te'ñapa' masheñneshacha' o'ch notas e'ñe Ya'mcha'tareťer Jesucristo pa'so'chño, sapa' ñato't seyemteña'ña ñeñť atarr quellañets ñeñť amach mueno taruasa'. Ñeñť atet petsapa' ama mueno o'ch ame'ñanaña ñeñť atet yeychatenes.

⁷ Sapa' e'ñe señoteñ añ poctetsa socop o'ch atet sepena samā e'ñe atet senteney ya. Yapa' allempo allo'tseney parro yapa' čhocma yetaruasen.

⁸ Yapa' ama't erroťena ama't puesheñarrapa' ama yerraprecheña puer-rar e'ñe atta. Ñamche'ña yapa' čhocma yetaruasen yeto e'ñe tsapome'tets attot yentña ya yerrar allempo allo'tseney sesho. Yapa' ama čhoje' ya'tsrre'močhtana'taso ama't puesheñarroťesa.

⁹ Ama't e'ñe poctetñ o'ch serratapyeñ e'ñe atta, tarraña yapa' ama yemno tarro'mar yapa'cho'ña yemneñ o'ch yetaruasos yamā allochñapa' attoch yorrtatonas ñeñť e'ñe cohuentetsa socop allochñapa' atetcha' sepa samā.

¹⁰ Allempo allo'tseney seshopa' atet yotas, ñerra'm esesha'ch atarr quel-letspa' arepa'ña rratstats, rranepa' po'čllañ.

¹¹ Yapa' ye'mare'tenes puesheña'ttsos sapa' sečllañoťpa' atta sellapene't, ama čhoje' setaruaseno ama't mamesha, añaña e'ñe setorra'yena sa ñeñť ama es sherbeno.

¹² Allohuenes ñeñťes atarr quellañtsarerespa' te'pa' o'ch notas e'ñe Ya'mcha'tareťer Jesucristo pa'so'chño, sapa' čhoñaca'yeña setaruasa'ña e'ñe cohuen señmañesha' atťotcha' sechen allpon ñeñť sepallta'yena arr patsro.

¹³ Ñaña sa masheñneshacha' ñaña nočhaneshacha', sapa' ñato'tña čha se-muenme'chena'ña orrtatyese' cohuen ñeñť attecma sepa'yena.

¹⁴ Ñerra'm esesha'ch ama e'mñotaye atet yotenes añ yecartot, ñeñťña acheñerpa' o'ch se'ñotorrtach ñapa' čhocma atet pena. Sañapa' ñato'tña seyemteña'ña ñeñť atet petsa, allochñapa' atťotcha' penquerra.

¹⁵ Tarraña amach atet sentatsche ñerra'mrrate' čho se'moñe'teñ. Sapa' čhochña e'ñe cohuen soctape'chater atet e'ñe cohuen yoctape'chateñ yemo'nasheñ.

Arrpa' all so'terranet po'cartot

¹⁶ Yepartseshar ñeñť e'ñe yocshatene' yeyočhro ñepa'chña socshaterre' sa seyočhro ama'tcha' erroťeno'tsenes. Yepartsesharpa' e'ñepa'chña parro allo'tsenes allohuenes.

¹⁷ Na ñeñťen Pablon arrpa' nequellquēñoť e'ñe na nototpa' o'ch ne-huomcha'tnerres. Sapa' ñeñťcha'ña señotate' añmapa' e'ñe no necarta. Allo-huen ñeñť e'ñe no necartapa' attecma nequellquēñ.

¹⁸ Yepartsesharepa'chña Jesucristo sa'natenaya e'ñe allohuenes. Ñeñťach notas, ñeñťpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑT̃ QUELLCAN TIMOTEO 1 TIMOTEO

Atto Pablopa' quellcan carta Timoteocop

1-2 Masheñe Timoteo ñeñteḡ e'ñe yame'ñeñoḡ e'ñe atet̃ nenteneḡ ñerra'mrrate' e'ñe nechemer nepeneḡ, na Pablon pequellquêne'ña añ carta ñeñten Jesucristo puellsensaren, tarro'mar ñeñtpa' atet̃ llesenserren Yompor Parets epuet Puechemer Jesucristo ñeñtcha' nanac yeyemterra. Ñeñtpa' ñeñtara Yompor ñeñt̃ Ya'queshḡatañer yepen, ñaña ñeñtara Puechemer Jesucristo ñeñt̃ Yepartseshar yepen. Te'pa' e'ñe nehuom̃cha'teñoḡeḡpa' o'ch notaḡ, Yomporepa'chña pebensare'tam̃pene' ñeñt̃ nanac Parets epuet Puechemer Cristo Jesús ñeñt̃ Yepartseshar yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡhro.

Timoteopa' ña cotape'chaterrahuet cohuen all anetso Efeso all ayḡhatarettenet po'poñ cotapñats

3 Ñaña te'pa' o'ch notaḡ, ahuañmo'cha allempo nesechena o'ch ahuen Macedoniopa' atet̃ notnomueḡ, ḡapa' allach ḡa'pa Efeso attoch ḡach cotape'chatyese' ñeñt̃ yeḡhatyets po'poñ cotapñats, attoch ñetpa' amach allo'na yeḡhatneneto ñet poḡtapñet̃ ñeñt̃ ama po'ñoḡhoyaye. Te'pa' ñeñtecopña nequellquēnnaḡ añ carta allochñapa' o'ch alla neyerpaterrperr.

4 Ñaña te'pa' ḡach otyesahuet attoch amach allo'na cotape'chatyesneneto e'ñe ñet pueserrparñet̃ ñeñt̃ ama po'ñoḡhoyaye. Ñaña ḡach otyesahuet attoch amach allo'na cotape'chatyesneneto ñeñt̃ atet̃ serrpare'tatyesanete't̃ pa'tañneshañ. Tarro'mar ñeñt̃ serrparñatspa' at̃ta nanac moññe'tateñet̃ acheñenesha'. Ñeñtpa' ama añecpayaye alloch e'ñe yeñoter erra'tsente' e'ñe po'ñoḡch alloch yesherber Parets ñeñt̃ atet̃ muenen ña. Añña e'ñe yame'ñeñoḡa Cristopa' o'ch yeñoter.

5 Yomporpa' añña muenen o'ch yeyḡhach acheñenesha' amorrentanna'tpahuepa'ch allohueneḡ. Tarro'mar e'ñe yame'ñeñoḡ Cristo poḡtacma arrña yeyoḡhropa' e'ñech cohuenare' yoḡtape'chyen Yomporecop. Ñaña e'ñech yeñmañesha' yoḡtape'chen cohuen.

6 Tarraña puesheña'tets acheñenesha'pa' ahuo't̃ alla queḡhpa'huerret̃ ñeñt̃ atet̃ muenen Yompor. Ñeñt̃ña atet̃ serrpare'tatenet̃ po'poñ cotapñats, ñeñt̃ñapa' ama es sherbeno ama't̃ mamesha Yomporecop.

7 Ñetpa' añña muenenet̃ ahuo'ch orrtet̃ atet̃ ñerra'mrrate' nanac etsotenet̃ añ ñoñets̃ ñeñt̃ atet̃ anaret̃ judioneshacop ahuaḡ. Tarraña ama't̃ atet̃ penetañpa' amaña eñoteñeto este'ña yeḡhateneyña añ ñoñets̃ ñeñt̃ ḡhocma serrpare'tenet̃. Ama't̃cha' ñeñt̃a nanac torrenetañpa' amachña ḡhenaneto pueyoḡhro ñeñt̃ po'ñoḡch atet̃ yeḡhateneỹ ñeñt̃ ñoñets̃.

Attoch yeñoch eseshacopte' sherben añ ñoñets̃ ñeñt̃ atet̃ anaret̃

8 Ñehua, allohueneḡpa' e'ñe yeñotueñ, ama't̃ erra'tsena ñoñets̃ ñeñt̃ atet̃ anaret̃ ñeñt̃cha' atet̃ yeḡpapa' ḡhocma sherben ñerra'm añecop yesherbateñ añ ñoñets̃ ñeñt̃ atet̃ muenen Yompor.

9 Ñaña allohueneḡpa' e'ñe yeñotueñ añ ñoñets̃ ñeñt̃ atet̃ anaret̃ ñeñt̃cha' atet̃ yeḡpapa' ama añecpaye' anaretẽ acheñeneshacop ñeñt̃ cohuenare' es ḡa'yets,

tarro'mar ñetpa' o' ye'cha'hueñet e'ñe poctacma. Ñeñtpa' añecpa anaret añ acheñrecop ñeñt' ama es otapespahuo, ñaña ñeñt' nanac atpare'tetsa, ñaña ñeñt' ama es chenoyo pueyo'chro ñeñt' cohuentetsa Yomporecop, ñaña ñeñt' nanac ochña'tare'tets, ñaña ñeñt' ama añcha'na'tpo' entenaye Yompor po'ñoñ, ñaña ñeñt' ama't Paretspa' achm'are'teñcha'. Ñaña añecpa anaret añ ñoñets añ acheñrecop ñeñt' amtsañtetsa, ñaña ñeñt' muetsene' pompor, ama't ñaña pachor.

10 Ñaña añecpa anaret añ ñoñets añ acheñrecop ñeñt' cañoresha'tets, ñaña ñeñt' agu'ene' pacma, ñaña ñeñt' a'yetyene' acheñ, ñaña ñeñt' atta toma'tyets, ñaña ñeñt' shecare'tyets ama'tcha' atarr huomenc nenaneña po'ñoñ Yompor pa'so'chño, ñaña ama't erra'tsente' acheñer ñeñt' atpare'tene' ñeñt' atet cohuen ye'chateney Yompor po'ñoñ.

11 Ñaña ñeñt' atet ye'chateney Yompor po'ñoñ ñeñtpa' ñeñtara cohuen ñoñets ñeñt' alloch a'queshp'aterrey Yompor e'ñe po'cohuenño, ñeñtara Yompor ñeñt' nellsenserre' na o'ch neserrpare'toñ po'ñoñ, ñaña ñeñtara Yompor ñeñt' atarr ya'ye'cho'chtatyen allohueney.

Atto Pablopa' atarr parasyoso'ten atto atarr ahuamencat per Yompor

12 Tarraña ama't ña nellsenserrayeña' napa' nanac neparasyoso'teñ Yepartseshar Jesucristo tarro'mar atto nanac ahuamencat pa'n. Ñaña nanac neparasyoso'teñ Yompor, tarro'mar ñapa' e'ñe pocte' enterren o'ch nesherber

13 ama't na ahuatpa' nanac nachm'are'che't Cristo, ñaña nanac noctare'che't ñeñt' ame'ñaye't ña, ñaña nanac na'tserrpa'yesanete't. Tarraña ama't atet nepe'tpa' Yomporpa' ama coñe'ta morrenterno tarro'mar allempopa' ama es ne'chenoyo neyo'chro, ñaña allempopa' ama name'ñe'te.

14 Tarraña Yomporpa' ama coñe'ta morrenterno, ñeñto'marña ame'ñataterna attoña te'pa' e'ñe neyemteñoñ ñapa' nemorrentera allohuen acheñenesha'.

15 Ñeñto'mar te'pa' o' neñoter añepa'tña ñoñets ñeñt' e'ñe po'ño'ch: Cristo Jesús'pa' añecopña huapa añ patso attoch a'queshp'atosan allohuen ochña'atenesha'. Ñeñto'marña te' napa' neñotena, allohuen ñeñt' ochña'atenesha'pa' na ello metana'tuenahuet po'chñaret. Ñeñto'mar te'pa' añ poctetsa o'ch yame'ña'huerra ñeñtara añ ñoñets.

16 Ñeñto'mar Yomporpa' attoña peretnerren na, ama't napa' nanac ochña'ten, allochñapa' attoch eñochet ama't erra'tsente' acheñer ñeñt' nanac ochña'tpa' attera nanac morrenteña Jesucristo. Allochñapa' ñerra'm esesha'ña ame'ñerrayapa' ñetñapa' corretsetach pocsheñeshocmañen tayoteñ e'ñe errponañohuen.

17 Ñeñto'marña te'pa' nanac nocsheñoñ noten, amorrentpahuépa'ch Yompor ñeñt' partsetets e'ñe ñapue't ahuatoteñ errponohuañen, ñeñtara ñeñt' ama arromña'teshayaye ama't ahuata, ñeñt' ama't eseshapa' ama puentare, ñeñtara ñeñt' e'ñe ñapue't eñotañ. Ñeñto'marña yecohuentatoñepa'ch tayoteñ errponohuañen. Ñeñtpa' attetepa'ch Nompore.

Añpa' ñeñt' atet otan Timoteo ñeñt'cha' atet pa

18-20 Te' masheñe Timoteo ellopa' o'ch alla noterrperr po'pocheño ñeñt'cha' atet pe'pa, tarro'mar atet nentene'p atet ñerra'mrrate' e'ñe nechemer nepene'p. Te'pa' e'ñech peyo'chrocmañen petorra Yomporecop atet ñerra'mrrate' cho ye'cllarena. E'ñe pame'ñeñoñ Cristo e'ñech peñmañeshocmañen es porrtatyen. Napa' añ noctape'chen ñeñt' atet eños e'ñe cohuen pocop ahuañmo'cha ñeñt' a'm'tene' ñoñets Yomporeshot. Ama't papa'

čhocmuepa'ch peyerpa ñeñt atet a'poclat p̄ocop, tarro'mar ñeñt atet eños p̄ocoppa' ñeñtcha' allo'na ahuaencat pepene'. Ñaña chocmach p̄ame'ña Cristo e'ñe cohuen e'ñe peñmañesha', tarro'mar ñerra'm ama e'ñe yeñmañesha' yocteñe Cristopa' ñato' acoṗonetpa' o'huañcha' yame'ñera Cristo. Ñeñt atet p̄a ahuaña epsheña yacma ñeñt pa'so'cheñ Himeneo ñaña Alejandro, ñaña po'poñechno acheñ ñeñt atet petsa. Ñeñto'marña napa' napuenanet oneñeñ ñeñtara epsheña yacma attoch ñapa' o'ch muerochtatanet allochñapa' o'ch eñochet ama achñare'tpahuo Yompor.

2

Atto e'ñe pocte' o'ch yema'yocham̄pesya ñaña ama't añcha'taretechno

¹ Te'pa' o'ch notap̄ po'poñ ñeñtcha' atet p̄oclate'chatyes acheñenesha' ñeñtcha' atet pet. Ñanompa' ma'yocham̄pesyetepa'ch allohuen acheñenesha', ñaña enamatoñetepa'ch acheñenesha' Yompor, ñaña parasyoso'chetepa'ch Yompor.

² Ñaña ma'yocham̄pesyetepa'ch allohuen añcha'taretechno ama't ñaña gobierno'. Allochñapa' attoch Yomporpa' cotape'chatanet e'ñe cohuen attoch añcha'tarettet e'ñe cohuen, allochñapa' attoch yocrrena yaña e'ñe cohuen muechet. Ñerra'm atet penetpa' attochña eñall ñaña yocop attoch yema'yochrena e'ñe cohuen Yomporecop, ñaña attoch e'ñe cohuen yentanena.

³ Ñerra'm atetña yepenapa' e'ñech cohuen enteney Yompor ñeñt Ya'qeshp̄atañer yepen.

⁴ Tarro'mar ñapa' mueneñ allohuen acheñenesha'pa' o'ch a'qeshp̄aterranet, ñaña mueneñ o'ch eñotatuerranet añ ñoñets ñeñt e'ñe po'ñoçh Yompor po'ñoñ.

⁵ Tarro'mar yapa' yeñoteñ Yomporpa' e'ñe patra. Ñaña yeñoteñ e'ñe puesheñarra ñeñt chocma eñets yocop Yomporesho, ñeñtara Yompor Puechemer ñeñt Jesucristo ñeñt acheñetosets arr patsro.

⁶ Ñaña ñeñtara ñeñt a'rroyatsa e'ñe ñañeña attoch puerromueñoñ ñapa' o'ch tsa'tuonaya yo'chñar e'ñe allohueney ñeñtey acheñey. Ñeñtpa', atet orrtatonay Pompor allochñapa' attoch yeñoch ñeñt atet cotape'chen ña. Allempoña chap allempo e'ñe pocte' enteñ Pompor o'ch chap añ patsropa' allempoña e'ñe eñotatey ñeñtapa't atet cotape'chen Pompor.

⁷ Ñeñto'marña napa' na allsensaret atto nach chopeñe'chats erracmañen atto e'ñe na neserrpare'tateñoṗpa' o'ch name'ñatyesanet ñeñt e'ñe po'ñoçh Yompor po'ñoñ, ama't ñeñt ama judioneshayaye. Ñeñt atet noten e'ñe name'ñeñoñ Cristo ñeñtapa' e'ñe po'ñoçh tarro'mar ñeñtapa' ama shequēntsoyaye.

Añ poctetsa e'ñech yeñmañesha' yema'yochena

⁸ Ñaña napa' nemneñ ora ama't errate' apcha'yenet Yomporecoppa' añ yacmanesha' allempo echantenet pot puema'yocheñoṗetpa' e'ñepa'ch pueñmañesha' ma'yochenet, amachña cha po'poñ entueneto pueyoçhro, ñaña amach cha atsrre'moçhen entueneto.

⁹⁻¹⁰ Atet ñaña coyaneshaçhnopa' chorretepa' atet chorra'yena po'potantañ pacmanesha' ñeñt po'nanesha'. Amachña aña chorra'yestatsteto attoch aye'charettenet e'ñe ñet po'llchapota. Ñaña pue'chetpa' e'shorretepa' atet e'shorra'yena po'potantañ. Añña ama pocteyaye o'ch aña ma'yochret attoch añño'tet e'ñe cohuen pue'ch. Aññoṗepa'chña orrtet e'ñe cohuen atto

amuerañtenet, ñaña atto cohuenare' es ña'yenet. Amachña aña cohuen orrtatenahueto atto na'yenet oro, amapa' seretsma't ñeññ nanac tsa'te', ñaña atto es chorra'yenet ñeññ nanac cochnesha' ñeññ nanaccha' tsa'te'. Añepa'chña atet penet ñeññ e'ñe cohuentetsa Yomporecop, ñeññ poctetsa coyaneshacop ñeññ otets ñapa' o' ame'ñerrana Yompor.

¹¹ Ñaña allempo sapchena Yomporecoppa' añ coyaneshačhnopa' e'ññotetepa' e'ñe muetsoññen attoch es eñotet. Amachña čha atpare'teneto ama't mamesha.

¹² Ñaña allempo sapchena Yomporecoppa' napa' ama pocteye' nenteñe coyanesha'pa' o'ch yečhaten all chorren allohuen yacmanesha', ñaña amach pomnaren patstano yacma. E'ñepa'chña mamtetenet allempo sapchena Yomporecop.

¹³ Tarro'mar Adánpa' ñanom ayečhcataret' ačeñ, allotpa' ñaña Eva ñeññcha' puetapor ña' Adán.

¹⁴ Ñaña Adánpa' ama esesha' shecaye. Aña shecoñet puetapor Eva, allot orrta atparñats Yomporecop.

¹⁵ Ñeñño'marña te' allempo cheyore'ten coyanesha'pa' e'ñech pa'llpuepñoña cheyore'ten. Tarraña ama't atteñpa' Yomporñapa' chocmach yenpueñ attoch chocma qeshpenet e'ñe cohuen, ñerra'm po'ñočh chocma ame'ñenet, ñaña ñerra'm chocma amuerañtenet, ñaña ñerra'm e'ñe cohuen es orrtatyenet Partsocop, ñaña ñerra'm e'ñe cohuen yečhenet.

3

Attoch yeñočh erra'tsente' pocte' ñeññcha' yena' amcha'taret puerahuo

¹ Te'pa' o'ch notap' po'poñ ñeññ e'ñe po'ñočh atet. Ñerra'm esesha' muenats o'ch amcha'taretta allohuenacop ñeññ ame'ñetsa ñeññ atarr muenene' o'ch torrena Yomporecop ñeññpa' e'ñe poctet' ñeññ atarr mueneneñ tarraña eñoche'pa'chña atarr torrapo' attoch e'ñe cohuen orrtatyesan ñeññ atarr sherbets.

² Tarro'mar ñeññ muenets o'ch amcha'taretta allohuenacop ñeññ ame'ñetsapa' añcha' se'n ñeññ etsotuene' añečhno. Ñeññcha' sena' amcha'taretpa' añcha' se'n ñeññ e'ñe cohuenare' es pets. Ñeññ ama't ahua'apa' amach eñalle attoch tanmare'cha ačeñenesha' ama't mamesha. Ñaña ñeññcha' pa'mcha'tareter ña'yenes allohuen ñeññ ame'ñetsapa' añcha' sena'yenes erra'tsente' senten e'ñe patrra puetapor pen (ñerra'm ataporet'), ñaña ñeññ nanac ma'yočhrenaya ñeññ cohuentetsa Yomporecop, ñaña ñeññ e'ñe eñotuene' ñeññ cohuentetsa, ñaña ñeññ amcha'na'tpo' entuen allohuen ačeñenesha'. Ñaña añ e'ñe pocte' o'ch amcha'taretta ñeññ e'ñe cohuen aguene' ačeñenesha' pa'paclo, ñaña ñeññ e'ñe cohuen yečhatene' ačeñenesha' Yompor po'ñoñ.

³ Ñaña añcha' se'n ñeññ ama posa'tare'tetso, ñaña ñeññ amach orroña'eyaye. Ñaña añcha'ña se'n ñeññ e'ñe cohuen muerenana pamo'ts, ñaña ñeññ ama atsrre'mña'eyaye, ñaña ñeññ ama nanac ye'chapretetso quelle ñeññ apencočhenot o'ch gana.

⁴ Ñaña ñeññcha' amcha'tarettatsapa' añcha' se'n ñeññ e'ñech cohuen ame'ñatuenana puechemeresha', ñaña ñeññ e'ñech mecha'na'tueñ allohuen ama't ñeññ parro yečhena.

⁵ Tarro'mar ñerra'm ama eñotenano attoch e'ñe cohuen ame'ñatuana ñeññ parro yečhenapa' amachca'ye cohuenaye' amcha'tarettoña allohuenacop ñeññ ame'ñenaya Yompor.

6 Ñaña ñeñtcha' amcha'tarettatsapa' amach aña senatsto ñeñt' errte' ame'ñetsa, tarro'mar ñerra'm aña sena' amcha'tareñ ñeñt' errte' ame'ñetsapa' ñeñtpa' amach e'ñe eñotuenano ñeñt' cohuentetsa Yomporecop, allempopa' e'ñe ña pa'mcha'tareñteñoñpa' chate' atarr ommo'cha. Tarro'mar ñerra'm cha yommo'chapa' ñeñtpa' ama pocteye' enteñe Yompor. Chate' ahua-pore'taretey atet pet ahuañ oneñt' e'ñe pommo'cheñoñpa' ahua't hua-pore'chet.

7 Ñaña ñeñtcha' amcha'tarettatsapa' añcha' sena' ñeñt' ama't ñeñt' ama ame'ñetsopa' e'ñech cohuen entueñet ñamet. Tarro'mar ñerra'm nanac sasare'teñ ñeñt' ama ame'ñetso, e'ñe puesasare'teñoñetpa' ñato'rraña chate' oneñetpa' nanac topachpa' ellopa' o'te' alla nanac atpare'terran Yompor.

Attoch yeñoch ñaña erra'tsente' pocte' ñeñtcha' yena' diácono

8 Attecmach pa ñaña ñeñtcha' sherbets Yompor pa'paclo, ñeñt' otenet diácono. Ñeñtcha' sherbatspa' añcha' se'n ñeñt' amcha'na'tpo' entuen allo-huen acheñenesha', ñaña ñerra'm erroñ otpa' amach shequëno, ñaña ñeñt' ama posa'tare'tetso, ñaña ñeñt' ama nanac ye'chapretetso quelle ñeñt' apen-cochenoñ o'ch gana.

9 Ñaña ñeñtcha' sherbats Yompor pa'paclopa' añcha' se'n ñeñt' e'ñech pueñmañesha' ma'yoçhrenaya ora ñeñt' atet yame'ñera Cristo ñeñt' e'ñe po'ñoçh cohuen.

10 Ñeñto'marña añ pocte' choch ñanom secue' ñeñtcha' sena' diácono. Ñerra'm atette' pena ñeñt' atet o' notuapa' ñehua, pocte' o'ch sene' ñeñtcha' sherbats Yompor pa'paclo.

11 Attecmach ñaña coyaneshaçhnopa' amcha'na'tpo'ch enteñ allohuen acheñenesha', ñaña amachña atta nanac puetomañenteneto, ñaña ñeñt' nanac ma'yoçhrenaya ñeñt' cohuentetsa Yomporecop, ñaña e'ñech cohuen cotape'chenet Partsocop.

12 Ñaña ñeñtcha' sena' diáconopa' añcha' sena' erra'tsente' senten e'ñe patrpa puetapor pen (ñerra'm ataporeñ), ñaña erra'tsente' senten ñeñt' e'ñe cohuen ame'ñatuenaya puechemeresha' ñaña ñeñt' e'ñe cohuen ame'ñatuenaya ñeñt' parro yeçhena pa'paclo.

13 Tarro'mar ñeñt' e'ñe cohuen sherbets atet ñerra'm diáconopa' e'ñech cohuen entueñ allohuen acheñenesha', ñaña o'huañcha' pomcha'nañoñayaya serrpare't ama't e'ñe mamesha atto atarr ame'ñenana Cristo Jesús.

Ñeñt' atet cotape'chateney Yompor attoch yame'ñerapa' ñeñtpa' nanac coçhnesha' ama't ahuañtoñpa' ama eseshaye' eñotenaye

14 Te'pa' o'ch notañ po'poñ. Napa' neseçhenañ o'ch nabçherrpa'.

15 Tarraña ñerra'm ama nehuapopa' amach sepallteno sapa' o'ch señoçh ñeñtcha' atet seña, tarro'mar o' notuañ añ necartoñ ñeñtcha' atet seña ñeñtes parro same'ñeña Yompor, ñerra'm esempo sapçhena Yomporecop, ñeñtara Yompor ñeñt' ama arromñañeshayaye. Ñaña ñeñtara Yompor ñeñt' e'ñe yame'ñeñoñ allohueneypa' choçhña yorrtatyen ñeñt' e'ñe po'ñoçh Yompor po'ñoñ amachña cha ya'nasoteño.

16 Ñaña yapa' yeñoñteñ ñeñt' atet cotape'chateney Yompor atto yame'ñerapa' ñeñtpa' nanac coçhnesha' ama't ahuañtoñpa' ama eseshaye' eñotenaye. Añpa' ñeñt' atet ya'çhoteñ Cristo:

Ama't Paretspa' o' acheñetos aña patsro, tarraña Yompor Puecamquëñoñña nanac ahuañcañtosa ñeñt' eñotatene'ña acheñenesha' ñapa' e'ñe

po'ñoçh cohuen. Ama't allohuen mellaño'teññanesha'pa' e'ñe entuoñete't ñeñt atet pa'yese't añ patsro, ñaña ñeñt ame'ñaye'tpa' çhocma a'po'tet Cristo erracmañen arr patsro ama't all ama judione-shayaye. Ñaña shonte' acheñ ame'ñerraya Cristo, allo'tña Yompor po'cohuenño'tpa' o' alla aguër pue'ntañ.

4

Atto esempohuañenpa' puerruerrach patantarr ama't ñeñt ame'ñetsa te'

¹ Te'pa' o'ch notap̄ po'poñ. E'ñe po'ñoçh atet eñotateney Parets Puecamquëño't. O'ch mellapoterrmochapa' puerruerrach patantarr acheñ ama't ñeñt ame'ñetsa te'. Allempopa' o'ch alla ame'ñeret ñeñt ashcañtetsa, ñaña o'ch añ ma'yoçhrerret oneñet poçtap̄ña.

² Tarro'mar o'ch alla ame'ñeret acheñ ñeñt ashcañtetsa, ñeñtara acheñ ñeñt ama es çhenoyo pueyoçhro ama't mamesha ama't allempo o' achm̄are'tuan Yompor.

³ Ñaña ñeñtara añ acheñpa' o'ch otyenan acheñenesha', ama pocteyaye o'ch sesna'ta. Ñaña ama pocteyaye o'ch es serratse'tyes. Tarraña allohuen ñeñt yerrenpa' e'ñe pocte' o'ch yerreñ, ñeñto'mar yeçhcach Yompor ñeñtcha' yerren. Tarro'mar ñeñtey o' yeñoterr ñeñt e'ñe po'ñoçh Yompor po'ñoñ, ñaña ñeñtey ame'ñetsapa' e'ñe pocte' o'ch yerren e'ñe yema'yocheño't Yompor.

⁴ Tarro'mar allohuen ñeñt yeçhcatua Yompor ñeñtcha' yerrenpa' e'ñe cohuenacma, ñeñto'marña amach erroteno't yoto ama pocteyaye o'ch yerre'. Añña pocte' çhocmach es yerren e'ñe yeparasyoso'teño't Yompor.

⁵ Yema'yoçhampeño't yerrarpa' e'ñe pocte' Partsocop o'ch yerreñ, tarro'mar ñeñtpa' atet otene'y Yompor.

Atto Timoteo atarr cohuen sherbenan Jesucristo

⁶ Te'pa' o'ch masheñe Timoteo notap̄ po'poñ. Ñerra'm atetcha' peyçhatyes acheñenesha' ñeñt ame'ñetsa ñeñt atet o' notua'ppa' allempoña po'ñoçhpa' e'ñech cohuen pesherbeñ Yepartseshar Jesucristo. Tarro'mar atto poçtape'cheññan Yompor po'ñoñpa' ñeñtcha'ña allo'na ahuamencat pepene'. Ñaña atto poçtape'chen e'ñe cohuen Yomporecoppa' ñeñtcha'ña allo'na ahuamencat pepene'.

⁷ Ñaña amach pe'mñotatsto serrparñats ñeñt ama aneyaye ñeñt atet yeçhateney Yompor po'ñoñ attot yame'ñera Cristo, tarro'mar ñeñtpa' ama es sherbeno. Añcha'ña pema'yoçhra ñeñt atet yeçhateney Yompor po'ñoñ.

⁸ Ñaña añcha'ña o'ch pema'yoçhra attoch huomenc pe'pa' peyoçher Yomporecop. Atet pena po'potantañ acheñenesha' ma'yoçhraya attoch huomenctatet e'ñe ñañeñeta po'chets, ama't ñeñtpa' ama tama es sherbeno. Tarraña papa' añcha'ña pema'yoçhra attoch huomenc pe'pa' peyoçher Yomporecop, tarro'mar ñeñtpa' ello nanac sherben attoch yocrra cohuen añe patsro, ñaña sherben attoch ello yocrra'huerra cohuen esempohuañen.

⁹ Ñeñt atet notene'ppa' e'ñe po'ñoçh atet, ñeñto'marña añ pocte' o'ch ame'ñyet allohuenet.

¹⁰ Ñeñto'marña te'pa' ama't e'ñe yemueroçhteño'tpa' çhocma yetorrena Yomporecop, tarro'mar ñapa' ñach yeyemterra e'ñe poctacma, ñeñt Yompor ñeñt ama arromñafeshayaye, ñaña ñeñtara Yompor ñeñt Ya'queshpatañer yepen allohueney añecop ñeñtey ame'ñenaya.

¹¹ Te'pa' ñeñt atet o' notua'ppa' ñeñtcha' atet potyes acheñenesha' ñeñtcha' atet pet, ñaña e'ñech cohuenacma peyçhatyesanet.

12 Ñaña chocmach porra e'ñe cohuen acheñenesha'cop, attoch ñetpa' e'mñotapet ama't papa' nanac huepuesha'p. Ñaña chocmach porra cohuen ama't atet pe'ñorena, ñaña ama't allempo es pe'pa'yen. Ñaña chocmach pe-muereña acheñenesha', ñaña chocmach pame'ña e'ñe cohuen Yompor, ñaña ama't peyo'chropa' chocmach poctape'ch e'ñe cohuen ñeñ' atet pena ñeñ' e'ñe po'ño'ch Cristona'tartetsa. Allochñapa' e'ñe peshot añña acheñenesha' ñeñ' ame'ñetsapa' o'ch chapanet pueyo'chreto ñeñ' atet cohuentetsa Yomporecop.

13 Ñaña te'pa' ama't ama ne'chena' napa', chocmach pelleyatanet Yompor po'ñoñ allempo chocma sap'chena allohuenes. Ñaña chocmach peser-ppare'tatanet, ñaña e'ñech cohuen pey'chatenanet.

14 Ñaña chocmach peyerpa atto ahuañmo'cha Yomporpa' ahua'menca' p'ap' allempo ñeñ' pompornesha' pen ñeñ' ame'ñetsapa' ñetpa' net pot pesho. Ñaña atto eñoratanet Yompor ñetña allempopa' e'ñe cohuen eñosyaset p'ocop. Ñeñto'marña te'pa' añ poctetsa chocmach pe'orra Yomporecop.

15 Chocmach pema'yo'chra ñeñ' cohuentetsa Yomporecop, ñaña choch payom'ya, attoch acheñenesha'pa' entonapet ñeñ' atet petsoten Yomporecop.

16 Ñaña chocmach peñota p'añeña, ñato' cohente' poctape'chen, ñato' amate'. Ñaña chocmach peñota p'añeña ñato' e'ñete' atet pey'chaten. Ñaña chocmach pey'chat cohuen e'ñe atet otene' Yompor po'ñoñ attoch pequesh-perra pa, ñaña allohuen ñeñ' pe'mñotene'.

5

Añpa' ñeñ'cha' atet ye'p'annena ñeñ'tey ame'ñetsa

1 Masheñe Timoteo, te'pa' o'ch noterrperr po'poñ. Amach peche'ptare'tatsche ñeñ' po'nare' yacma ñerra'm esempo pantenet. Elloña chochña poctape'chaterranet cohuen e'ñe aco'pa. Atet'cha' pentanet ñerra'mrrate' e'ñe p'ompor pepenanet. Añña allohuen hueparneshach'nopa' atet'cha' pentanet ñerra'mrrate' e'ñe pemo'nasheñ pepenanet poctacma.

2 Ñaña coyaneshach'no ñeñ' po'nare'pa' atet'cha' pentanet ñerra'mrrate' e'ñe p'achor pepenanet poctacma. Añña ñeñ' shopshare'pa' atet'cha' pentanet ñerra'mrrate' e'ñe p'och pepenanet poctacma. Amachña cha muene' p'allocchame'tyenaneto ama't mamesha.

3 Ñaña añ poctetsa chocmach seyenpue' rretorrnanesha' ñerra'm esempo ama eñalleto ñeñ'cha' yenpahuet.

4 Tarraña ñerra'm erra'tsen rretorrnanesha' echene' puechyoresha' amapa' pue'ñaresha', ñeñ'tpa' añ pocte' ñetach cohuañ'pset pachor. Tarro'mar añ pocte' e'ñe ñet o'ch eñochet ñanomcha' añ yecuañ'pes yamo'ts attochña yesherber Yompor ñaña attoch yesherbeñ yamo'mte' atto ñetpa' cohuañ'pesyet yaña ahua't. Tarro'mar ñerra'm atet ye'papa' e'ñech yocshateñ ama't Yompor.

5 Añpa' attoch seño'ch erra'tsente' rretorrnanesha' palltetsa o'ch seyenpue': Añcha' seyenpa' ñeñ' rratotetsa e'ñe ñap'ta ñeñ' ama echenaye puechyoresha', ñaña ñeñ' e'ñe yemtenaya Yompor, ñaña ñeñ' chocma ma'yo'chenaya Yompor pate'tets yet, ñaña ama't tsapo.

6 Tarraña erra'tsen rretorrnanesha' ñeñ' atta coshatse'tyetsapa' chach ottena ñerra'mrrate' o' rroma, ama't allempo correnmeñ.

7 Te'pa' o'ch potanet ñeñ'cha' atet pet attoch ama eñalle ama't eseshapa' o'ch sasare'tanet.

8 Ñerra'm esesha' ama muenenaye o'ch cohuañpsan pamo'ts ama't ñeñt parro yeçhena ñeñña acheñ atetpa' amaca'ye po'ñoçhaye' ame'ñenano ñeñt atet oteney Yompor. Ñaña ñeñt atet acheñpa' amach pocteye' enteñe Yompor ama't mamesha. Ñeñtpa' elloch metaneñ ama't ñeñt ama ame'ñetso.

9 Ñaña po'poñ attoch señoçh erra'tsente' rretornaneshar ñeñt pocte' ñeñtcha' seyenpa', ñeñtpa' erra'tsente' po'nmeneshar ñeñt echene' pechapoch çharra' po'charña, ñaña ñeñt patrach puerrollar pe't.

10 Ñaña erra'tsente' senten ñeñt e'ñe cohuenare' es pets, ñeñt e'ñe cohuen cohuañpene' puechyoresha', ñaña ñeñt nanac amueraña, ñaña ñeñt e'ñe cohuen aguene' puemo'to', ñaña ñeñt e'ñe pueñmañesha' sherbene' allohuen ñeñt ame'ñetsa, ñaña ñeñt nanac yenpuene' ama't ñeñt mueroçhtetsa, ñaña ñeñt nanac pa'yene' po'poñeçhno ñeñt cohuentetsa.

11 Tarraña ñeñt rretornaneshar attera shopsheshameñ ñeñt ama echenana' pechapoch çharra' po'charña' amach sagapatsche, tarro'mar ñerra'm machaya muenme'cherran sherbe' Cristopa' o'te' alla some'terra,

12 çate' tanmare'cha acheñenesha' tarro'mar amach etsotano ñeñt atet otan Cristo ahuañmo'cha.

13 Ñaña ñato' o'ch atta nanac quella', ñato' po'çllaño'pa' ñato' o'ch atta ta'yesa po'poñ pocollo'mar serrpare'tatse'tyesets pa'namen ñoñets, ñaña ñato' o'ch atta a'metare'tyesan ñeñt atet pa'yena po'psheññeçhno ama't ñeñt ama otenayaye.

14 Ñeñto'marña napa' e'ñe pocte' nenteñ ñeñt shopsheshameña' some'terrepa' ñaña cheyore'terrepa' attoch añach ma'yoçhrena ñeñt pa'paçllacop. Ñerra'm atet penetpa' attochña amach eñalle ama't ñeñt ye'moñe'tene'pa' amach sasare'tye.

15 Tarro'mar puesheña'tets rretornaneshapa' o' alla puerruerret o' alla coteret oneñeñ.

16 Te' ellopa' o'ch notap po'poñoneñ. Ñerra'm eñall ama't coyanesha' ñeñt ame'ñetsa, ñaña ñerra'm ña pamo'ts rratotatsapa' e'ñe pocte' ñañeñach cohuañpse' pamo'ts. Allochñapa' amach pallteno allohuen ñeñt ame'ñetsapa' o'ch apueñet ñeñt pallta'yena. Allochñapa' attoch añcha'ña yenpuenet po'poñeçhno rretornaneshapa' ñeñt ama echenaye pamo'ts ñeñtcha' yenpuene'.

Añ poctetsa ñeñtcha' atet yepañ ñeñt nanac torretsa Yomporcop

17 Te'pa' o'ch notap po'poñ. Ñeñt pompornesha' pen ñeñt ame'ñetsapa' ñerra'm e'ñe cohuen añcha'tarettenetpa' e'ñe pocte' acheñenesha'pa' cohuencha' cosheñet, ñaña ellopa' añ pocte' o'ch es apueñet ñeñt palltena. Ñeñtpa' ñeñtcha' atet sepeñ erra'tsencha' ñeñta po'taruas pe' atto serrpare'ten, ñaña ñeñt e'ñe ma'yoçhrenaya yeçhatets Yompor po'ñoñ.

18 Tarro'mar ama't Yompor po'ñoñ ñeñt anuaret ahuañto'ña' atet toma'ntateney, ñeñtpa' atet oten: "Ñerra'm esempo satmama'tateñ huaquesh attoch es serrocllome'chach pa'tcoñ, allempopa' amach sempanma'tatsche. E'ñe pocte' rranepa' ñaña ñeñt serrocllome'chateñ." Ñaña ñeñt atet oten po'poñ Yompor po'ñoñ: "Ñeñt ataruasña' e'ñe pocte' çhocmach agapan po'tsa' atto taruasen."

19 Ñaña ñerra'm eñall puesheñarr ñeñt a'metare'tañpene' ñeñt pompor pen ñeñt ame'ñetsapa' sapa' amach same'ñatscho. Añña ñerra'm epsheña a'metare'tañpene' amapa' ma'psheña, allempopa' pocte' o'ch se'mñoçh, tarro'mar allempopa' o'ch señoçh ñato' po'ñoçhte' atet.

20 Atteña ñerra'm po'ñochte' atet pena, allempo allo'tsa'yen allohuen acheñenesha'pa' añ poctetsa o'ch soch ñeñt atetpa' ama aña'pahuo. Allochña'pa' po'potantaña'cho'ña esheccha' mecha'na'tenet.

21 Aña'pa' chocmach atet peña ñeñt atet o' notuañ ama't errotenete' o' pohua ñeñt parro nanac peyemtena ahuaña. Tarro'mar Yomporpa' enteneñ epuet Puechemer Jesucristo ñeñtara Yepartseshar yepen, ñaña epuet po'millañoñenashar ñeñt epuet yemtena ña. Allohuenetpa' e'ñe entuenpet ñeñto'marña te'pa' añ pocte' o'ch pepena ñeñt atet o' notuañ.

22 Te'pa' o'ch noctape'chaterrperr po'poñ ñeñtcha' atet seña. Ñerra'm esempo semneñ o'ch sena'yes ñeñtcha' añcha'taretttertsa Yomporecop, amach ahuen senatstere ñeñtcha' añcha'taretttertsa, chocña secua'yes erra'tsente' acheñer ñeñt e'ñe cohuen es pa'yets. Tarro'mar ñerra'm aña sena'yes ñeñt ama cohuen es petsopa' te't e'ñe ña po'chñarotpa' atet sepena samña. Ñeñto'marña te'pa' chocmach pa'ypo'ñañpes ñeñt ama cohuenayaye ama't mamesha.

23 Te'pa' o'ch notañ po'poñ. Atto papa' chocma patsna'tame'ten, ñaña atto atserrpare'teneñ pa'topa' añ pocte' amach porratsterrerro e'ñe ñapueñ oñ, añcha'ña epuet porr coñe't vino.

24 Ñaña te'pa' o'ch notañ po'poñ attoch peñoch. Eñall puesheña'tets acheñ ñerra'm esempo pena ñeñt ama cohuenayaye Yomporecoppa' yapa'cho'ña o'ch yeñotanet allorocma. Allempoña yapa' o'ch yot, po'ñoch aña'pa' ama pocteyaye. Tarraña eñall ñaña po'poñechno acheñ ama't esempo pet ñeñt ama cohuenayaye Yomporecoppa' ñeñtpa' amach esesha' eñotaye ama't puesheñarroña. Tarraña esempohuañenpa' orrtatuarettterrach.

25 Attecma pena ñaña ñerra'm esempo yepena e'ñe cohuen, acheñenesha'pa' o'ch entuenyet e'ñe cohuen. Tarraña errotenopa' ama't e'ñe cohuen enteney Yomporpa' acheñenesha'pa' amach e'ñe cohuenaye' entenyeto. Tarraña esempohuañenpa' cherranetcha' pueyo'chro.

6

Aña'pa' ñeñt poctetsa ñeñtcha' atet pa' ñeñt ataruasataret e'ñe atta

1 Te'pa' o'ch notañ po'poñ ñeñt poctetsa ñeñtcha' atet pa' ñeñt ataruasataret e'ñe atta ñeñtara ñeñt o' ame'ñerrana Cristo. Añ pocte' ñetpa' cohuencha' eñchet po'patronar, attoch e'ñe ñoñotetpa' amach errotenot eñalle attoch achñare'tachet Yompor, ñaña ñeñt atet yeychaten Cristocop.

2 Ñaña ñeñt ataruasataret e'ñe atta, ñerra'm po'patronarpa' ame'ñenet ñametpa' elloña allempopa' amach atpare'tatscheto ama't mamesha, tarro'mar o' pa'mo'nasheñ peret e'ñe pame'ñeñotet Yompor. Amach otañsa'tatsteto "te'pa' ama'tcha' ama e'ñe name'ño nepatronarña' o' ame'ñerrapa' amach erroñ pa'no." Elloña te'pa' e'ñech yemorrenesha' yesherbeñ yemo'nasheñ e'ñe cohuen. Masheñe Timoteo, aña' chocmach peychatanet, ñaña o'ch potanet ñeñtcha' atet pet.

Cotaññats ñeñt ama po'ñochoyaye

3 Ñerra'm esesha' yechatats po'poñ cotaññats ñeñt ama atteyaye atet yechateney Yepartseshar Jesucristo ñeñt po'ñoch atet muenen Yomporpa'

4 ñeñt acheñ atetpa' attach ommo'chena, po'ñoch ñeñtpa' ama choye' es eñoteno. Ñeñt atet acheñerpa' añecpach atet pena attoch es otnare'tyesan acheñenesha' e'ñe po'poñ cotaññatso'mara. E'ñe potnare'tanna'teñotetpa'

o'ch atta atsrre'mare'tet, ñaña o'ch atta e'moñe'tanna'tet, ñaña o'ch atta sasare'tanna'tyeset, ñaña allempopa' o'huañcha' eñoranna'tet.

⁵ Po'ñoçh añ acheñ ñeñt'atta cotape'chatse'tets e'ñe ñañeña poçtaþñoçpa' po'ñoçhpa' amach cotape'chenano ama't mamesha ñeñt'cohuentetsa ñaña amach eñotenano ñeñt'po'ñoçh alloch yequeshperra. Ñetpa' attach çhocma mueneñet o'ch es otnare'tanna'tyeset. Ñaña ñetpa' añeçpach mueneñet o'ch serrpare'tet Yomporecop attoch ganet esocmañen. Ñeñto'marña ñeñt'atet acheñpa' amach peyemtatscho.

⁶ Ñehua, po'ñoçh yapa' yeñoteñ e'ñe yame'ñeñoç Cristopa' shonte' yechen esocmañen. Ñeñto'marña yapa' ñeñt'ach nanac yocshena.

⁷ Tarro'mar allempo ye'ñalleta ahuaçpa' atta ye'ñalleta muelle'mcoç. Te'pa'cho'ña ñerra'm esempo yerromuenpa' amach errotenoç yahuanmo yechecom.

⁸ Ñeñto'mar yapa' amach es yellcatsto. Ñerra'm yechen ñeñt'cha' yerra' ñaña ñeñt'cha' yechorrapa' ñeñt'ach yocshena.

⁹ Tarro'mar ñeñt'muenets o'ch echan esocmañenpa' amach errotenoç ahuantano atto topatyeny oneñeç. Attach pa'namen ye'chatse'tyenet ñeñt'ama es sherbetso. Elloña ñeñt'pa' ñeñt'cha' anmahuet chenquëñtso esempo-huañen.

¹⁰ Tarro'mar e'ñe yeye'chapreteñoç quellepa' alloç huenaña esocmañen sosya'tsañ. Tarro'mar puesheña'tets ñeñt'nanac muenets o'ch ganet shonte' quellepa' atteñapa' o'huañcha' ame'ñyet Yompor. Ñeñto'marña acoþoneçpa' o'ch huapanet shonte' ñeñt'cha' nanac llecatahuet.

Añach paçerr yema'yoçhra ñeñt'cohuentetsa Yomporecop

¹¹ Tarraña þapa' amach atet peþatsto tarro'mar þapa' anareteþ Yomporecop. Ñeñto'marña þapa' añach pema'yoçhra ñeñt'cohuentetsa Yomporecop, ñaña çhocmach peyereþya Yompor, ñaña çhocmach þame'ñya cohuen, ñaña çhocmach pemorrencha þamo'ts, ñaña çhocmach þa'huanta'huanom ñeñt'atarr echarr pentyen amach þañeña e'ñe cohuen entatstatso.

¹² Ñaña çhocmach þame'ñya cohuen Yompor atet ñerra'm çho peçllarena Yomporecop. Allochñapa' esheccha' peñoç þapa' corretsapaç tayoteñ e'ñe errponañohuen. Ñeñto'mar Yomporpa' çhore'taþ ahuaña allempo peñoçt'ach allohuen acheñenesha' atto þapa' o' þame'ñerra.

¹³⁻¹⁴ Te'pa' o'ch masheñe noterrperr po'poñ ñeñt'cha' atet peþa. Chocmach petsotua ora ñeñt'atet oteneþ Yompor. Amach poçtape'chatsto po'poñoneç attoch amach eñalle attoch tanmare'taþa acheñenesha'. Añpa' atet'cha' peþa tarremþhua esempohuañencha' huerra Yepartseshar Jesucristo. Tarro'mar ama't te' Yomporpa' enteneþ, ñeñt'ara Yompor ñeñt'yapuene' yocreña teme'ttsen, ñaña allohuen ñeñt'yentyen. Ñaña Puechemer Jesucristopa'cho'ña enteneþ, añ ñeñt'ara Cristo ñeñt'eñosets e'ñe cohuen allempo a'þto'tare'teñ Poncio Pilato.

¹⁵ Eempohuañencha'ña poçte'enter Yomporpa' allempoçña mueñerranerr alla Puechemer arr patsro, ñeñt'ara Yompor ñeñt'e'ñe paçra, ñaña ñeñt'ara ñeñt'atarr ya'ye'çochtatyen allohueney, ñaña ñeñt'ara ñeñt'nanac ahua-mencat, ñeñt'Pompor pen ama't allohuen ñeñt'amcha'taretetyetsa, ñaña allohuen ñeñt'ayochreshatetyetsa.

¹⁶ Ñaña ñeñt'ara Yompor ñeñt'ñapueç ama arromñañeshayaye, ñeñt'ara Yompor ñeñt'yechetsa allo'tsen puetare' ñeñt'nanac a'rrechatañ all amach errotenoç yeçapo. Ama't puesheñarra acheñpa' ama puentare all, tarro'mar

amate' errotentot yechapo. Ñeñto'marña ya'ye'chochtatoñepa'ch Yompor, ñaña ahuamencatepa'ch tayoteñ errponohuañen. Ñeñtpa' attetepa'ch Nompore.

Arrpa' all cotape' chatan ñeññ nanac eçllayoret

¹⁷ Te'pa' o'ch notap̄ po'poñ. Ñeññ nanac echeçmattetsa añ patsropa' o'ch p̄otanet amach ommo'chatsteto e'ñe po'cheçmoť, ñaña amach cotape'chatsteto ñato' poçllayoroťpa' amach es pallterreto, tarro'mar ñeñtpa' huañerrcha' esempohuañen. Añña yemchetepa' Yompor ñeññ ama arromñañeshayaye ñaña ñeññ yapuene' shonte' esocmañen ñeññcha' çhocma yocshatene'.

¹⁸ Ñaña o'ch p̄otanet petepa' e'ñe cohuen Yomporecop, ñaña es apa'yestetepa' ñeññ es palltetsa, ñaña amuerañtetepa'.

¹⁹ Ñerra'm atetcha' petpa' eñallcha' shonte' alloch coshaterranet tsapatonet Yompor. Ellopa' o'ch apanet ñaña attochña ñetpa' corretsetach pocsheñeshocmañen tayoteñ e'ñe errponañohuen.

Ñeññ atet otan Timoteo e'ñe allohuanen

²⁰ E'ñe allohuanenpa' o'ch masheñe Timoteo noterrperr alla: Chocmach petsotua ora ñeññ atet otenep̄ Yompor. Amach pe'mñnotatsche ñeññ çhocma muenets o'ch es otnare'tanna'tyesa. Ñeñtpa' ama sherbeno ama't mamesha Yomporecop. Ama't ñetpa' otenetañ po'ñocho' es eñotenetpa' tarraña yapa' yeñoteñ ñeñtpa' ama po'ñoçhoyaye.

²¹ Tarro'mar puesheña'tets ñeññ cotene' atetpa' ama çhenaneto pueyoçhro ñeññ atet yame'ñeña Cristo.

Te'pa' Yomporepa'ch p̄a'nataya. Ñeññach notap̄, ñeñtpa' attetepa'ch Nompore. Allohua.

Pablo

AÑ PUEPAÑ SAN PABLO PO' CARTA ÑEÑT QUELLQUËRRANERR TIMOTEO 2 TIMOTEO

Atto Pablopá' alla quellquërranerr carta Timoteocop

¹⁻² Masheñe Timoteo, ñeñteþ nanac nemuerena tarro'mar atet nenteneþ ñerra'mrrate' e'ñe nechemer nepeneþ. Na Pablon o'ch alla nequel-lquërrnaperr po'poñ carta, ñeñten Jesucristo puellsensaren tarro'mar atet muenen Yompor attoch nach eñotatyese' allohuen acheñenesha' ñeñt atet oteney Yompor: E'ñe yeyemteñoñ Puechemer Cristo Jesús pa' yañapa' corretsayach yocsheñeshocmañen tayoteñ e'ñe errponañohuen. Te'pa' e'ñe nehuomcha'teñoþpa' o'ch notap: Yomporepa'chña pebensare'tamþene' ñeñt nanac Parets epuet Puechemer Cristo Jesús ñeñt Yepartseshar yepen. Ñetepa'chña pemuerenaya. Ñetepa'chña þocshatene' e'ñe þa peyoçhro.

Atto Timoteo e'ñe cohuen ame'ñena

³ E'ñe neyerpueñoþpa' napa' çhocma neparasyoso'teñ Yompor þocop, yeþo ama't ñaña tsapo allempo çhocma nema'yocheña Yompor þocop. Ñeñtara Yompor ñeñt çhocma neñmañesha' nesherven, atet sherbe't ñaña ahuat natañeshañ.

⁴ Ñaña napa' çhocma neyerpuena allempo peya'na'tapuen ahuañmo'cha. Ñeñto'mar te' napa' nemneñ errotenohuaca' yentannerra attote' þocshatterren.

⁵ Ñaña çhocma neyerpuenþa atto þapa' e'ñe cohuen þame'ñena, ñaña atet ame'ñena ñaña þacnor Loida ñaña þachor Eunice. Ñeñto'marña napa' neñoteñ þapa'çho'ña çhocmate' þame'ñena e'ñe cohuen.

Atto ama apenca'pahuo e'ñe yeserrpare'teñoñ Yompor po'ñoñ

⁶ Ñeñto'mar napa' nemneñ o'ch alla neyerpaterrperr atto ahuañmo'cha Yomporpa' ahuañmenca't þapþ allempo nena' ñaña not pesho. Ñeñto'marña te'pa' amach pemuenme'chatstoñe ñeñt atet oþap Yompor.

⁷ Tarro'mar Yomporpa' ama añecpaye' chorratenyoña Puecamquëñ attoch yapa' o'ch çha yeñcha't, añecopña chorratenya attoch ahuañmenca't þa'y, ñaña attoch yemorrentanna'ta allohueney, ñaña attoch e'ñe cohuen yortatyen ñeñt atet muenen Yompor.

⁸ Ñeñto'marña te'pa' amach pepencatsto atto peserrpare'teññañ ñeñt atet pena Yepartseshar Cristo. Ñaña amach pepencatsto e'ñe no'mar atto napa' o' cárcele'ternnet e'ñe name'ñeñoñ Cristo. Elloña çhocña pocte' peñch þaña o'ch pemueroçhtapretna e'ñe peserrpare'teñoñ Cristo po'ñoñ tarro'mar Yomporpa' attoña ahuañmenca't peneþ.

⁹ Ñeñtara ñeñt o' a'qeshþaterrey, attoña o' çhore'terrey attoch yema'yoçhra ñeñt cohuentetsa Partsocop. Tarraña añmapa' ama añoteyaye atto e'ñe cohuen es yeþa'yese't ahuat, añmapa' tarro'mar atet muenen ña. Yomporpa' nanac morrentye't ñeñto'mar ama't ahuaþoteñpa' ahuo't o'patatya Puechemer Cristo Jesús.

¹⁰ Ñeñt huapatsa attoña te'pa' o' yeñoter atto nanac morrentya Pompor. Ñeñtara Puechemer Jesucristo ñeñt Ya'qeshþatañer yepen, tarro'mar ñach ya'qeshþaterre' yerromñoñ attoch elloch yocrra'huerra, allempopa' amach

alla ya'rromñaat'erre'te. Ñeñto'marña yoten te'ña yapa' o' a'huañaamperrey Cristo atto o'patye't rromueñets. Te'pa' o' yeñoter tarro'mar atet yechateney cohuen ñoñets ñeñt huetsa Yomporeshot.

¹¹ Ñeñtña añ cohuen ñoñetspa' ñeñtecop allsensareten attoch nach a'pote' allemeñ acheñenesesho'mar ama't ñaña ñeñt ama judioneshayaye, ñaña attoch nach yechatyesahuet ñeñtara añ ñoñets.

¹² Ñeñto'marña te'pa' e'ñe neserrpare'teñoť añ ñoñetspa' muerochtatennet, tarraña napa' ama nepenqueno tarro'mar napa' neñoteñ Yompor ñeñt neyemtenapa' nanac ahuañenat. Ñeñto'marña neñoteñ e'ñe po'huañencoťpa' o'ch cohuañpson ora all netorra'yese't ñocop ñeñt atet yechenna ama't tayoteñ esempohuañencha' huerra.

¹³ Papa' chocmach poctape'ch ñeñt atet o' neychatuanmař, ñeñtara ñoñets ñeñt e'ñe pačharr cotapñats. Ñaña peparrocmateñoť Cristo Jesúsapa' chocmach pame'ñya cohuen, ñaña chocmach pa'mueraña.

¹⁴ Ñaña chocmach peñota, amach pa'po'poñetatstoñe Yompor poctapñña ñeñt atet yechenpa Yompor. E'ñe po'huañencoť Parets Puecamquēñ ñeñt yečhetsa yeyo'chro ñepa'chña peyenpue'.

Atto puesheña'tetspa' a'ypo'ña'huaneret Pablo

¹⁵ Napa' o' notap atet tarro'mar ama't papa' peñoteñte' shonte' acheñ ñeñt yeča'yetsa Asio'marpa' o' sohuanerrnet, atet ñerra'm Figelo ñaña Hermógenes.

¹⁶ Te'pa' aña chocma nocshatene' Onesíforo tarro'mar ñapa' ama penquēnno ama't napa' cárcelo'tsenen. Ñeñto'marña Yomporpa' a'natanepa' Onesíforo pamo'tsesha'.

¹⁷ Ahuañmo'cha allempo chap Onesíforo arr Romopa' ñapa' nanac e'name'terren attot enterren.

¹⁸ Ama't papa' nanac peñoteñ, ahuañmo'cha Efesopa' ñapa' nanac yenpa'y. Ñeñto'marña Yomporpa' muera'huerepa'ch esempohuañencha' huerra po'yoro'chenñoť.

2

Ñeñtcha' atet yetorra e'ñe cohuen Jesucristocop

¹ Nechemere Timoteo, e'ñe peparrocmateñoť Cristo Jesúsapa' huomenquēpa'ch pepa' peyo'cher tarro'mar ñapa' chocmach yenpař.

² Allpon pe'mone't ñeñt atet neserrpare'tache't shonte' acheñenesha'pa' papa'cho'ña te'pa' attecnochach peychach po'poñe'chno ñeñt ame'ñetsa attoch ñetpa'cho'ña eñochet yechatet allohuen pamo'tsesha'.

³ Ñaña o'ch notap po'poñ. Papa' amach peñcha'tatsto attoch pemue-rochtapretya. Chochña pocte' peñch o'ch pemue-rochta atet ñerra'mrrate' cho peçllarena e'ñe cohuen Jesucristocop.

⁴ Nato' o'ch netma'ntacha ñeñt atet pena solltarnesha'. Solltar ñeñt ejército'tsenpa' amach es cotape'cheno po'poñoneñ ñeñt atet pena ñeñt ama ejército'tseno. Añach pa'terr cotape'chen attoch coshatan ñeñt mandene'. Añ toma'ntena yapa'cho'ña añach pa'terr yocape'chen attoch yocshach Jesucristo ñeñt yeyechenaya yaña.

⁵ Nato' o'ch netma'ntatererr po'poñ ñeñt atet pena ñeñt atarr juguētsa. Ñeñt atarr cohuen juguētsa chocmach juguēnet e'ñe cohuen e'ñe atet anare'ttenet ñocpuet attoch e'ñe cohuen ganet. Ñerra'm ama e'ñe atet juguēto e'ñe atet anare'ttenet ñocpuet, amach erro'tenoť apare'ttetoña ñeñtcha'

coshatahuet ñeñtecop atarr jueguënet. Ñeñtpa' añ toma'ntena yapa'cho'ña ñerra'm amach atet yeperro ñeñt atet anaret Yompor po'ñoñ yocop, amach errotenot apuerrye ñeñtcha' nanac yocshaterre'.

⁶ O'ch netma'ntatererr po'poñ. Ñeñt nanac taruaset pa'mropa' ñapa' ñanomcha' rre' ñeñt nare'ten. Ñeñtpa' añ toma'ntena ñeñt nanac torretsa Yomporecop ñapa'cho'ña nanaccha' coshateñ po'taruas ñeñt atet torrena Yomporecop.

⁷ Ñehua, pöcrape'ch ñeñt atet noteneþ tarro'mar Yepartsesharpa' chapatonaþcha' peyoçhro ora ñeñt atet toma'ntena añeçhno.

Añ pocte' çhocmach yeyerpueña Jesucristo

⁸ Amach pepsatsto atto Jesucristopa' tanterra allempo rroma, ñeñtara ñeñt po'mreneñ David, ñaña ñeñtara Cristo ñeñt çhocma neserrpare'ten attoch yequeshperra.

⁹ Ñeñto'marña napa' attoña huanca'net atto te'pa' nanac nemueroçhtena atet ñerra'mrrate' amtsañen. Tarraña Yompor po'ñoñpa' amach errotenot huanquëto.

¹⁰ Ñeñto'marña napa' çhocma na'huanten atto nemueroçhtena, allochñapa' ñerra'm erra'tsencha' acerr Yompor ñeñtcha' ame'ñerrayapa' queshperretcha' e'ñe pame'ñeñotet Cristo Jesús. Ñaña all Yompor po'cohuenñopa' correrretcha' errponohuañen.

¹¹ Añ ñoñets allo çhocma ya'çhoteñ Yomporpa' e'ñe po'ñoçh atet: Ñerra'm e'ñe yame'ñeñot Cristo yerromapa' yeyçherrach parro epay Cristo.

¹² Ñaña ñerra'm çho yemueroçhtaprecha Cristopa' ya'mcha'taretapreterach esempohuañen. Tarraña ñerra'm cha ya'nasoteñapa', ñapa'cho'ña a'nasoterryach esempohuañen.

¹³ Ama't allempo yapa' ama yeyemteño, tarraña po'ñoñ ñeñt atet otenpa' çhocma po'ñoçh atet, tarro'mar amach errotenot alla a'po'poñeterrano ñañeña po'ñoñ.

Atto Yomporpa' e'ñech cohuen pa'taruasañer peney

¹⁴ O'ch alla noterrperr po'poñ: Chocmach peyerpacha acheñenesha' ñeñt atet o' notuaþ, ñaña o'ch potanet e'ñe Yompor po'huamencot amach allo'na otnare'tanna'tyesneneto e'ñe ñañeñeta pöcþño'maret. Tarro'mar atto es otnare'tanna'tyenetpa' ama't mameshapa' ama es sherbeno. Ñerra'm attach penetpa' atteñapa' o'ch alla puerruerra allohuen acheñenesha' ñeñt e'mñotenahuet.

¹⁵ Tarraña þapa' añcha'ña pema'yoçhra ñeñt cohuentetsa Yomporecop attoch ñapa' entaþ e'ñe cohuen ataruasañeþ. Amach eñalle ñeñtcha' pepencate' all petorra'yena ñocop. Attochña çhocmach pesherbatoñ po'ñoñ ñeñt e'ñe po'ñoçh ama shequëñtsoyaye.

¹⁶ Ñaña þapa' amach þa'na otnare'tatstahueto ñerra'm esempo es otnare'tanna'tyenet. Tarro'mar ñeñt atet serrpare'tatyenetpa' ama añeyaye alloch huomenc yeþa' yeyoçher Yomporecop. Ñaña ñeñt atet petsapa' atteñapa' o'ch allo'na senet puesuanmuet ñeñt atet yeçhateney Yompor.

¹⁷ Ñaña ñerra'm allo'nach yeçhatnenet ñeñt ama es sherbetsopa', atteñapa' ñerra'm o'chña epa'hua orapa' allo'nach senet puesuanmuet ñeñt atet muenen Yompor. Nato' o'ch netma'ntacha ñeñt atet pena atsnañets ñeñt otenet cáncer ñeñtpa' mamesha o'ch epa'hua ora yechtso o'ch muetsay. Ñeñtpa' atet þa epsheña ñeñt pa'so'cheñ Himeneo ñaña Fileto, tarro'mar ñetpa' añña yeçhatenet po'poñ coþañats.

¹⁸ Ñetpa' atta aycha'natateññañet Yompor po'ñoñ all oteneý esempopa' yetanterrach. Ñetpa' ahuo't serrpare'tatyaset acheñenesha' atet: "All oteneý Yompor attoch yetanterra esempopa' ñeñtpa' toma'nteñtsa. Ñeñtpa' añña toma'ntena atto yapataretta ahuaña oño." Ñeñto'marña patanta'tets ñeñt ame'ñetsapa' alla quechpa'hueret atto ame'ñeñet Yompor.

¹⁹ Ama't atet pañ patantarrpa' tarraña Yompor po'ñoçhpa' ama pueno po'ñoñ. Ama't Yompor po'ñoñ ñeñt aquellcaret ahuañoteña' atet eñotateney eñallach pate'tets acheñ ñeñt po'ñoçh ame'ñenaya. Ñeñtpa' atet oten: "Yomporpa' cheme'tenan ñeñt po'ñoçh ame'ñenaya." Añpa' arr eñotateney po'poñ Yompor po'ñoñ ñeñt aquellcaret ahuañoteñ, ñeñtpa' atet oten: "Allohueneý ñeñteý cotene' Cristopa' yequechpa'huerrepa' allohuen sosya'tsañ."

O'ch netma'ntacha ñeñt atet pena pocoll

²⁰⁻²¹ Po'ñoçhpa' çhoch yesuanom allohuen sosya'tsañ, allochñapa' attoch añach yema'yoçhra attoch yesherbe' e'ñe cohuen Yompor. Tarro'mar allohueneý ñeñteý ame'ñetsapa' ama e'ñe attecmaýe' yesherbeñe Yompor. Ñato' puesheña'tetspa' nanaccha' cohuen sherbeñet Yompor, ñato' po'potantañña' amach. Ñato' o'ch netma'ntacha ñeñt atet pena pocoll. Ñeñt acheñ eçllayoretpa' arrña pa'paclopa' shonte'ch eñall pa'namen coymeçhno. Ñato' patantarrpa' ororro'ch ñato' po'potantañpa' asrerro'ch, ñato' po'potantañña' tsachrro'ch, ñato' po'potantañña' patsrro'ch. Tarraña allohuenpa' amach e'ñe attecmaýe' sherbenano pamo'mte'. Atet ñerra'm ñeñt ororro'pa' nanaccha' coçhneshot sherbenan pamo'mte', tarraña atet ñerra'm patsrro'pa' amach tama coçhneshoteýe' sherbenano pamo'mte'. Ñeñto'marña yapa'cho'ña ñerra'm yemneñ o'ch yesherbe' e'ñe coçhneshot Yamo'mte' Cristopa' añ palltetsa çhoch ñanom yesuanom allohuen sosya'tsañ attoch añach yema'yoçhrena ñeñt cohuentetsa Yamo'mtayecop. Allochñapa' ama't erra'tsena es yeña'yenpa' e'ñech cohuenacma yocshateñ Yamo'mte' Cristo.

²² Ñeñto'marña papa' noteneþ o'ch pesuanom allohuen sosya'tsañ ñeñt atet muenatse'tyen huepaneshaçhno ñeñt ama po'ñoçhaye' sherbenaye Yompor, allochña papa' añach pema'yoçhrena ñeñt cohuentetsa Yomporecop, ñaña çhoch pame'ñya Yompor e'ñe peñmañesha', ñaña çhocmach pemuerya allohuen pamo'tsesha'. Allochñapa' attoch peparrocmat epaþ allohuen ñeñt e'ñe cohuen pueyoçher pene' Yepartsesharecop.

²³ Ñaña ñerra'm esempo es otnare'tanna'tyenetpa' papa' amach pe'mñotatstaneto, tarro'mar ñeñt atet otatse'tyetspa' e'ñe orrena atet penet. Ama't papa' peñoteñ ñerra'm cho es yotnare'tanna'tapa' allot huena shonte' atsrre'mueñets.

²⁴ Tarro'mar ñeñt torretsa Yepartsesharecoppa' ama pocteyaye o'ch atta atsrre'mare'tyesa allemeñ. Elloña çhochña ya'mueraña allohuenacop. Ñaña çhochña yeychatyes e'ñe cohuen acheñenesha' ñeñt atet cohuen enten Yompor. Ñaña ama't ñetpa' erroþ pa'yetpa' yapa' e'ñe yemorrenteñoþpa' o'ch ya'huantoñ.

²⁵ Ñaña añ pocte' o'ch alla yocape'chater cohuen ñeñt ye'moñe'tene'. Tarraña e'ñech acoþa yocape'chatyerranet e'ñe cohuen. Ñaña o'ch yecuenanet e'ñe acoþa esempohuañencha' çchapanet pueyoçhro ñeñt e'ñe po'ñoçh cohuen enten Yompor. Ñaña o'ch yecuenanet esempohuañencha' coþape'cherret ello e'ñe cohuen Yomporecop.

²⁶ Ñerra'm atet yeḑapa' ñato' attotpa' o'ch a'rroyerranet oneñeñ atto huanquënanet atto te'pa' ḑa'yenet sosya'tsañ ñeññ atet muenatenanet ña.

3

Ñeññcha' atet perra esempoch mellapoterrmocha

¹ Ñehua, te'pa' o'ch neñotataḑ po'poñ ñeññcha' atet perra esempoch mellapoterrmocha. Allempopa' nanaccha' echarr attoch yocte' Cristo.

² Tarro'mar allempopa' atetcha' perra acheñenesha'. Allempo acheñpa' nanaccha' moparrareret, ñaña añach pa'terr cotape'chenet ñeññ atet muenenet e'ñe ñocpueta. Ñaña allempopa' nanaccha' ye'chapretenet quelle. Ñaña allempopa' nanaccha' ommo'chenet ñeññ echyenet, atarrcha' cohuen entyerret e'ñe ñañeñeta, po'potantañña' amach esoye' asherben entyereto. Ñaña allempopa' nanaccha' achmāre'teret Yompor, ñaña allempopa' o'huañcha' ame'ñyet ama't ñeññ pamo'mte' penet, ñaña ñetpa' amach es coshatenahueto ama't coñe'ta. Ñaña allempopa' nanaccha' tsena'teret allohuen ñeññ anaret Partsocop.

³ Ñaña allempopa' o'huañcha' esesha' mueranna'terrtsa, ñaña o'huañcha' muenet o'ch amo'tstanna'terret. Ñaña allempopa' nanaccha' toma'tamḑsanna'tyerret ñaña allempopa' erro'ten'cho' muenetpa' atetcha' ḑatse'tyenet, ñaña allempopa' nanaccha' muero'chtatanna'tyerret attoch nanac coshenet, ñaña nanaccha' tsena'terret ñeññ cohuentetsa.

⁴ Ñaña nanaccha' apomatatañterret, ñaña allempopa' amach es yepuer entyerreto, ñaña allempopa' e'ñech ñañeñeta nanac cohuen entetset, ñaña allempopa' ñañeñetach e'nenet alloch nanac coshenet, amachña añeye' e'neneto atet muenen Yompor.

⁵ Ñaña allempopa' ama'tcha' ottenetañ ñerra'mrrate' ame'ñenetpa', tarraña amach po'ño'chaye' ame'ñeneto. Tarro'mar ñetpa' amach po'ño'chaye' mueneñeto o'ch ḑapanet pueyo'chro ñeññ cohuentetsa Yomporecop attoch huomenc ḑa'nmuet pueyo'cher e'ñe po'ño'ch.

Ñeññ atet acheñpa' amach pecua'ḑsatsche.

⁶ Tarro'mar ñeññ acheñ atetpa' attach mueneñ o'ch sheca'yesan acheñenesha'. Ñato' o'ch ahuanmuet po'ḑḑauño'marpa' ñerra'm be'toset a'nahua pocollopa' añña coyanesha'chno ñeññ ama es eñotopa' o'ch atta ame'ñateñet e'ñe ñet po'ctaḑñet. Tarro'mar ñeññ coyanesha'chnopa' nanaccha' yorateñet po'chñar. Ñaña ñetpa' añach e'nenet pa'namen ñeññcha' coshatenahueto.

⁷ Ñeñño'marña añ coyanesha'chnopa' pa'namencha' topatyenetañ cotapñats. Tarraña ama't ahua'tapa' amach erro'teno't enterreto ñeññ po'ño'ch Yompor po'ctaḑña.

⁸ Yacma ñeññcha' atet shequërre' acheñenesha'pa' ñeññpa' añña muenen o'ch epatare'tan añ cotapñats ñeññ e'ñe po'ño'ch Yompor po'ctaḑña. Atet ḑa ñaña ahua't Janes epuet Jambres ñeññ muenatseñ o'ch epatare'tan Moisés. Ñeññ yacma ñeññ atet shequëne' acheñenesha'pa' amach cotape'chenano ñeññ cohuentetsa ama't mamesha. Ñetpa' ḑhach a'po'poñetenet ñeññ atet yame'ñena.

⁹ Tarraña ñet po'ctaḑñetpa' amach allohuenacmaye' anetso'mar epuerro tarro'mar esempopa' ñato' allohuen acheñenesha'pa' o'ch eñotuet ñeññ atet otatse'tyenetpa' ñeññpa' shequëñtsa. Ñato' atetcha' ḑa atet ḑa ahua't epsheña yacma ñeññ muenatseñ o'ch epatare'taneñ Moisés.

Arrpa' all cotape'chatan e'ñe cohuen Timoteo

¹⁰ Tarraña p̄papa' ama atteye' pepeno. Tarro'mar p̄papa' añ p̄octa'nen ñeñt̄ atet nepena na. Ñaña p̄papa' peñotuennan ñeñt̄ atet neyčhatyen Yomporecop, ñaña ñeñt̄ atet nocrrena e'ñe cohuen Yomporecop, ñaña atto e'ñe patrra nema'yochrena ñeñt̄ cohuentetsa. Ñaña p̄papa' peñotueñ ñeñt̄ atet nanac neyemteña Yompor ñaña atto nanac na'huanten allohuen ñeñt̄ echarr nentyen, ñaña atto nanac nemorrenteña allohuen acheñenesha', ñaña atto ama't nemuerochteñoŋpa' čhocma nocteñ Cristo.

¹¹ Ñaña peñotueñ atto pue'moñe'teñoŋetanpa' čhocma coŋare'tnete't̄ atto mueročhtatyesnete't̄. Ñaña ama't p̄papa' peñotueñ ñeñt̄ atet mueročhtatyesnet a'yo anetso ñeñt̄ pa'so'cheñ Antioquío, ñaña Iconio, allotpa' ñaña Listro. Tarraña ama't atet p̄a'yesnete't̄pa' Yomporñapa' čhocma a'queshp̄atyesne't̄ allot̄.

¹² Ñehua, yapa' yeñoteñ erra'tsencha' muenats o'ch coŋan e'ñe cohuen Cristo Jesúsapa' čhocmach mueročhtatanet ñeñt̄ e'moñe'tenahuet.

¹³ Tarraña ñeñt̄ ama cohuenayaye acheñpa' allo'nach senet p̄atse'tnomuet sosya'tsañ. Ñaña ñeñt̄ atta sheca'yetspa' allo'nach senet shecanna'tatset.

¹⁴ Tarraña p̄papa' čhocmach p̄octape'ch ñeñt̄ atet ayčhatareteŋ, ñeñt̄ara ñeñt̄ ama't p̄papa' o' peñoter ñeñt̄ e'ñe po'ñoč cohuen coŋap̄ñats. Tarro'mar p̄papa' peyemtenya ñeñt̄ey peyčhate' ahuaŋoteñ.

¹⁵ Ñaña p̄papa' e'ñe cheshoteñ ayčhatareteŋ Parets po'ñoñ ñeñt̄ara añ ñoñets ñeñt̄ peñotaterre' atto e'ñe yame'ñeñoŋa Cristo Jesúsapa' o'ch yequeshperra.

¹⁶ Allohuen Yompor po'ñoñ ñeñt̄ aquellcareŋpa' e'ñe Partseshotecma anaret̄. Ñeñto'mar añ ñoñetspa' nanac sherben ñeñt̄cha' yeyčhate' ñeñt̄ atet muenen Yompor, ñaña ñeñt̄cha' alla yoctape'chaterre' cohuen ñerra'm esempo es yepanten, ñaña ñeñt̄cha' yeñotatene' e'ñe cohuen ñeñt̄ atet poctetsa Yomporecop.

¹⁷ Allochñapa' attoch ñeñt̄ey o' puechemer perrey Yomporpa' e'ñech yeñotuen allohuen ñeñt̄ cohuentetsa Yomporecop, ñaña attoch huomenc yeŋa' yeyočer allohuenacop ñeñt̄ cohuentetsa Yomporecop.

4

Añ pocte' čhocmach yeserrpare'toñ Yompor po'ñoñ ama't erroteno'tsenya

¹⁻² Te'pa' o'ch alla noterrperr ñeñt̄cha' atet peŋa: Chocmach peserrpare'toñ Yompor po'ñoñ ama't esempo erroteno'tsenŋa. Tarro'mar Yomporpa' enteney epuet Puechemer Jesucristo, ñeñt̄ara ñeñt̄ Yepartseshar yepen, ñaña ñeñt̄arach huerrtsa ama't esempohuañen, ñaña ñeñt̄arach añcha'taretetuerrtsa esempohuañen, ñeñt̄cha' acrerre' allohuen acheñenesha' ñeñt̄ e'ñe cohuenare', ñaña ama't ñeñt̄ ama cohuenayaye. Atetcha' p̄an allohuen ñeñt̄ corretsmeñ allempo, ñaña ama't ñeñt̄ o' colla'hua. Ñaña te' p̄papa' o'ch peñotatyes acheñenesha' ñerra'm esempo ñetpa' ama pocteye' es peneto. Pañapa' p̄ach otyesahuet amach atet yeŋatsto, allotpa' o'ch p̄octape'chatyerranet e'ñe peñmañesha'. Ñaña čhocmach peyčhatyesanet ñeñt̄ poctetsa Yomporecop.

³ Tarro'mar esempohuañenpa' čhapcha' allempo acheñenesha'pa' o'huañcha' muenet o'ch ame'ñet ñeñt̄ e'ñe pačharr coŋap̄ñats, ñeñt̄ atet yečhateney Yompor po'ñoñ. Allempopa' añach e'nyerret erra'tsente' serrpare'tene' coŋap̄ñatser ñeñt̄ e'ñe cohuen entenet ñet attotcha'ña atonterraña ñeñt̄cha' yečhaterrahuet ñeñt̄ e'ñe ñet poctap̄ñet.

⁴ Allempopa' amach esesha' muenerraye o'ch e'mñotet cotapñats ñeñt e'ñe po'ñoçh. Atteñapa' o'ch aña e'ñe cotape'cherret ñeñt e'ñe ñet pueserrparñet.

⁵ Tarraña papa' añach paterr pōctape'ch ñeñt cohuentetsa Yomporecop, ñaña chocmach pa'huanta' ñerra'm huaponapa mueroçhteñets, ñaña añach paterr pema'yochra serrpare'tatysets cohuen ñoñets alloch yequeshperra. Ñaña chocmach petorra ñeñt atet petaruas apañ Yompor.

Allempo o' muetsamochet Pablo

⁶ Napa' amach erroñ nepere'te tarro'mar o' chapmoch allempoch na'mtsaretta Yomporecop. Te'pa' neñotena napa' o' muetsamochnet.

⁷ Tarraña napa' o' epaye' netorra'nma Yomporecop atet ñerra'mrrate' cho neçllarena Yomporecop. Ñaña napa' o' netsotua ora ñeñt atet oterren Yompor. Ñato' o'ch netma'ntacha ñeñt atet nepena: Ñerra'm cho erra yesechapa' chocmach yeçhap all yesechena. Ñaña napa' ama't mameshapa' ama nequeçhpue'te atto name'ñaña Yompor.

⁸ Te'ña napa' aña necuen esempoch nagap ñeñt o'patatenna Yompor ñeñtcha' nanac nocshatterre', tarro'mar napa' añ nepa'yese't ñeñt atet muene't Yompor. Ñeñto'marña te' esempoch huerra Yepartseshar Cristopa' allempo napa' aphuerrencha' ñeñt o'patatenna. Tarraña amach napta aphuerrno ñeñt o'patatenya. Añe'nachña aphuerr ñaña allohuen ñeñt chocma cohume'tene' te' Cristo o'ch huerra. Ñeñtara Yepartseshar Cristo ñeñtcha' yeñotaterre' ñeñt po'ñoçh atet yeña'yena te'.

Arrpa' all otyesan Timoteo ñeñt atet apearetena

⁹ Te'pa' o'ch notañ ñaña ñerra'm errotentpa' o'te' ñon arr tayecma.

¹⁰ Tarro'mar arr masheñ Demaspa' o' a'ypo'ña'nerren arr napue't, ñapa' o' ahuerr Tesalónico, tarro'mar ñapa' aña nanac morrentena ñeñt patso'marecpa. Añpa'cho'ña masheñ Crescentepa' o' ahuo' ñaña Galacio. Ñaña masheñ Titopa' o' ahuo' anetso Dalmacio.

¹¹ Te' arrpa' aña arro'tsen masheñ Lucas. Ñaña o'ch pa'sech masheñ Marcos ñeñtcha' epañ ñon arr, tarro'mar ñato' ñapa' o'ch yenpa'n arr.

¹² Masheñ Tíquicopa' o' nemñe a'yo anetso Efeso.

¹³ Ñaña o'ch notañ ñerra'm ñoncha' arrpa' panmoncha' necapa ñeñt nena'nom Troaso e'ñe Carpo pa'paclo. Ñaña panmoncha' allohuen nelibroçhno, ñaña nepaplleçhno. Ñeñtara añ nepaplleçhnopa' ñeñt nanac nemnen.

¹⁴ Alejandro ñeñt po'taruas pene' asreçhnopa' ñapa' atta nanac a'metare'tamñsen. Tarraña Yomporpa' tsa'taterach ñeñt atet pa'n.

¹⁵ Ñeñto'mar papa' e'ñech peñota ñocop, tarro'mar ñapa' nanac epatare'tenan Yompor po'ñoñ ñeñt atet yeserrpare'ten.

¹⁶ Ñaña o'ch notañ. Ama't ahuañmo'cha allempo ñanom na'pōctat neñoñ amcha'tareteshopa' ama't puesheñarrapa' ama esesha' neñosapretaye. Elloña ñeñtapa' cha a'ypo'ña'hanet. Tarraña ama't atet pa'netaña' napa' ama nemno Yomporpa' o'ch tsa'taterranet.

¹⁷ Tarraña Yepartseshar Cristopa' ama a'ypo'ña'no, elloña nanac ahua-mencat pa'n. Ñeñto'marña o' alla neserrpare'terrerr Yompor po'ñoñ attoch e'mare'ch allohuen acheñenesha' ama't ñeñt ama judioneshayaye ñeñt alloch yequeshperra. Atto nequeshperra allempo all atarr amueroçhtataretēn, napa' atet nenteñ ñerra'mrrate' Yepartsesharpa' o' a'queshpaterren e'ñe ma'yarr puenamoñ.

¹⁸Ñeñto'marña te'pa' neñoteñ Yepartsesharpa' chocmach a'queshpaterren arroť all ama cohuenayaye, ñaña napa' neñoteñ chocmach cohuañpenen, attochña chapaterren all amcha'tarettena ña pue'ntaño. Ñeñto'marña chocmuepa'ch ya'ye'chochtatoñ errponohuañen. Ñeñtpa' attetepa'ch.

Arrpa' all huomcha'tyesnerranet po'cartoť

¹⁹Ñaña añ necartoťpa' nemneñ o'ch nehuomcha'ch noť Prisca epuet puerrollar Aquila, ñaña o'ch nehuomcha'ch Onesíforo pamo'tsesha'.

²⁰Ñaña masheñ Erastopa' alla a'pa anetso Corinto, ñaña masheñ Trófimopa' alla nesa'nem patsnañoñ Mileto.

²¹Ñaña papa' ñerra'm errotenoťpa' chocmate' pehuapa allempo ama huapuenta'. Ñaña añ necartoťpa' mueneñ o'ch huomcha'tať masheñ Eubulo, ñaña Pudente, alloťpa' ñaña Lino, ñaña noť Claudia ñaña allohuen masheñneshachno ñeñtey ame'ñetsa arr Romo.

²²E'ñe allohuanenpa' o'ch notať, Yepartseshar Jesucristopa' chocmuepa'chña e'ñe parro'tsenep. Ñaña Yomporepa'ch sa'natenaya allohuenes. Ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT QUELLCAN TITO TITO

Atto Pablopa' quellcan carta Titocop

1-4 Masheñe Tito ñeñteḡ e'ñe parro yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquene'ña añ carta ñeñten nanac torretsa Yomporecop. Ñaña napa' ñeñten Jesucristo puellsensaren. Ñapa' atto llesenserren attoch nach ame'ñaterre'ña allohuen acheñenesha' ñeñt acre't Yompor ahuatoteñ attochña ñetpa' o'ch ame'ñeret. Ñaña añecop llesensa'n attoch nach eñotaterahuet ñeñt e'ñe po'ñoḡ atet poctetsa Partsocop, ñaña nach eñotaterahuet e'ñe yeyemteñoḡ ña yañapa' corretsayach yocsheñeshocmañen tayoteñ e'ñe errponañohuen. Tarro'mar ñeñtpa' atet oteney Yompor ama't ahuatoteñ ñeñtcha' atet ḡonay, ñaña yapa' yeñoteñ Yomporpa' ama puenesho po'ñoñ. Ñeñto'marña te'pa' o' cherr allempo e'ñe pocte' enteñ ña o'ch eñotaterrey ña po'cohuenña. Ñeñto'marña napa' o' llesenserren Yompor ñeñt Ya'queshpatañer yepen, nach serrpare'terre' po'ñoñ ñeñt atet otenen. Te'pa' e'ñe nehuomñcha'teñoḡppa' o'ch notapḡ: Yomporepa'chña pebensare'tamḡpene' ñeñt atarr Parets epuet Puechemer Jesucristo ñeñt Yepartseshar yepen ñeñtara Ya'queshpatañer yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡhro.

Ñeñt po'taruas ḡa' Tito Yomporecop all anetso Creto

5 Te'pa' o'ch notapḡ, napa' atto nena'nmaḡ ahuaña Creto attoch ḡach a'poctatyese' ñeñt pallta'yetsa, ñaña ḡach acra'yese' puesheña'tets ñeñtcha' pena'yesh allemeñ anetso'mar ñeñtcha' pompornesha' ḡa'yesh ñeñt ame'ñetsa. Añmapa' ñeñtña atet notnomueḡ ahuañmo'cha.

6 Ñeñtcha' pompornesha' ḡa'yeshetpa' añcha' pena'yesh acheñ ñeñt e'ñe cohuenare' es ḡa'yesh, ñeñt amach eñalle attoch tanmare'teña acheñenesha'. Ñaña ñeñtcha' pompornesha' ḡa'yeshetpa' añcha' pena'yesh erra'tsentē' penten e'ñe patrra puetaḡpor pen (ñerra'm ataporet), ñaña erra'tsentē' penten ama't puechemereshapā' e'ñech ame'ña'huenet, ñaña puechemereshetpa' amach atteye' enteñe acheñenesha' atet ḡa'yena po'poñechno acheñenesha' ñeñt atḡa coshatse'tyenet, ñaña ñeñt ama atpare'tetso puechemereshapā'.

7 Tarro'mar ñeñtcha' pa'mñcha'tareter ḡa' ñeñt ame'ñetsapa' añcha' pena'yesh acheñ ñeñt e'ñe cohuenare' es ḡa'yesh, ñeñt amach eñalle attoch tanmare'teña acheñenesha', tarro'mar ñapa' anaret ñach a'poctatyene' pa'namen ñeñt poctetsa Yomporecop. Ñaña ñeñtcha' pa'mñcha'tareter ḡa'yesh ñeñt ame'ñetsapa' amach añeyaye acheñer ñeñt añach pocte' enten o'ch ḡhocma ḡatanet ñeñt atet muenen e'ñe ña, ñaña amach ḡha atsrre'moḡchen entueno, ñaña ñeñt ama posa'tare'tetso, ñaña ñeñt amach orroñateyaye, ñaña ñeñt ama nanac ye'chapretetso quelle ñeñt apencoḡhenot o'ch gana.

8 Añña e'ñe pocte' o'ch amñcha'tarettā ñeñt e'ñe cohuen aguene' acheñenesha' pa'paclo, ñaña ñeñt nanac muenene' o'ch e'ñe cohuenare' es ḡa'yesh, ñaña ñeñt e'ñe eñotene' ñeñt cohuentetsa, ñaña ñeñt e'ñe pocte' es ḡa'yesh acheñenesha'cōp ñaña Partsocop, ñaña ñeñt e'ñech puetaḡpara es ḡa'yesh.

9 Ñaña ñeñtcha' pa'mcha'tareter p̄a'yes ñeñt ame'ñetsapa' e'ñech yemtenana poctacma añ ñoñets ñeñt e'ñe po'ñoçh Yompor po'ñoñ ñeñt atet yeçhateñet. Allochñapa' ñapa'çho'ña e'ñech attecma yeçhatan ñaña po'potantañeçhno ñeñt e'ñe paçharr cotapñats, ñaña ñeñt eñotene' attoch anapuenan e'ñe cohuenacma ñeñt achm̄are'tene' Yompor po'ñoñ attoch ñetpa' amach errotenoñ anapeto.

10 Tarro'mar eñall shonte' ñeñt atpare'tets, ñaña ñeñt e'ñe orrena otatse'tyets, ñaña ñeñt shecare'tyets. Po'ñoçh ñeñtpa' atet pena shonte' judionesha'.

11 Ñeñto'marña añ palltetsa o'huañcha' yeçhatyenet po'poñe'ttsocma cotapñats. Tarro'mar ñetpa' atta nanac moñne'tateñet acheñenesha' poctapña; ama puesheña'ttsayaya atet petso ama't allohuen ñeñt parro yeçha'yenet. Ñetpa'çho'ña añ yeçhatenet ñeñt ama pocteyaye. Ñaña añecpa yeçhatenet attoch ganet quelle, tarraña ñeñtpa' apencoçhena.

Ñeñt atet pena creto'marnesha'

12 Puesheñarr creto'marnesha' ñeñt nanac etsotene' e'ñe ñañeñeta poctapñetpa' ñeñtña acheñer ama pocteye' entenano pamo'tsesha' ñeñto'marña atet oten pamo'tseshacop: "Allohuen namo'ts creto'marnesha'pa' ñetpa' çhocma nanac toma'tam̄peñet pamo'tsesha', ñaña ñetpa' nanac atsrre'mñañet e'ñe atet ñerra'mrrate' berr ñeñt nanac bellac, ñaña nanac quellañtsareret, atarr araquet ama ayetñañeto."

13 Ñeñt atet a'metam̄penan pamo'ts ñeñtpa' e'ñe po'ñoçh atet. Ñeñto'marña o'ch notap̄, te'pa' p̄ach otahuet, "te'pa' amach allo'na atet sepanna'tneno." Allochñapa' attoch allo'na ame'ña'nmuet añ cotapñats ñeñt e'ñe paçharr,

14 ñaña allochñapa' amach allo'na e'mñotneññañeto ñeñt pueserrparña pe't ahuatnaneshañ judionesha', ñaña allochñapa' amach allo'na e'mñotneñe acheñenesha' ñeñt atet yeçhatyenenet ñeñtcha' atet pet, tarro'mar ñetpa' çhach atpare'tenet ñoñets ñeñt e'ñe po'ñoçh Yompor po'ñoñ.

15 Ñaña o'ch señoçh: Ñeñt acheñer e'ñe cohuenare' es cotape'chen pueyoçhro Yomporecoppa' ñocoppa' ama es eñalle attoch sosey enteñ Parets. Tarraña ñeñt nanac sosey cotape'chets pueyoçhro ñaña ñeñt ama ame'ñetsopa' ñocoppa' ama eñalle ñeñt cohuen enten ña. Tarro'mar poctapñetpa' atarr sosey. Ñeñto'marña ñetpa' amach çhapaneto pueyoçhro ama't esempo o' p̄ohuet ñeñt ama pocteye' enteno Yompor.

16 Ñeñt atet acheñpa' ama't otenetañ eñoteñeto' Yomporpa' tarraña ñeñt atet p̄atse'tyenetpa' yeñoteñ ñeñtpa' ama atteyaye. Ñeñt Yomporpa' ama pocteye' entapretenaneto, tarro'mar ñetpa' ama es otapahueto, ñaña ñetpa' ama es sherbeneto ama't mamesha.

2

Ñeñt e'ñe paçharr cotapñats Yomporecop

1 Tarraña p̄ocoppa' añña poctetsa o'ch peyçhateñ acheñenesha' ñeñt e'ñe paçharr cotapñats Yomporecop.

2 Ñaña ñeñt po'nmeneshaçhno yacmapa' o'ch peyçhatanet atet: Amach orrare'tatsteto attoch çhocma cotape'chenet e'ñe cohuen, allochñapa' pamo'tsesha'pa' am̄cha'na'tpo'ch enteñ, ñaña attoch nanac eñotenet ñeñtcha' atet p̄a'yeset ñeñt cohuentetsa Yomporecop. Ñaña o'ch p̄otanet e'ñe cohuenacma, ame'ñetepa' ñeñt e'ñe paçharr cotapñats Yomporecop, ñaña morrentanna'tetepa' ñaña ahuenta'huetepa'ch allohuen topateñets.

³ Attecmach peychach ñaña po'nmenesachno coyanesha' ñetpa' añepa'ch orrtatyenet ñeñt' e'ñe pocte' enten Parets ñaña ama't allohuen acheñenesha'. Amachña chaña atomañeñteneto, ñaña ñetpa'cho'ña amach orrare'tatsteto. Añña pocte' o'ch yeçhachet pacmanesha' ñeñt' cohuen enten Yompor.

⁴ Ñetpa' yeçhachetepa' pacmanesachno ñeñt' shopshare' ñeñt' o' some'tua allochñapa' attoch e'ñe cohuen mueryet puerrollaret, ñaña attoch e'ñe cohuen mueryet puechoyoreshet,

⁵ ñaña attoch ñetpa' eñotenet nanac ñeñt'cha' atet pa'yeset ñeñt' poctetsa ñaña attoch muecheñtenet, ñaña attoch amach muenme'cheneto ñeñt' po'taruas penet pa'pacleto, ñaña e'ñech amuerañtenet, ñaña e'ñech ame'ñeñet puerrollaret. Allochñapa' e'ñe ñeshoñetpa' amach errotenoñ acheñenesha'pa' achm'are'toñeto Yompor po'ñoñ.

⁶ Attecmach peychach ñaña yacmanesha' ñeñt' huepaneshameñ attoch ñetpa'cho'ña o'ch eñochet ñeñt'cha' atet pa'yeset ñeñt' poctetsa.

⁷ Papa'cho'ña e'ñech cohuenare' es pepa'yes pa'ma, allochñapa' attoch entaḡ acheñenesha' ñeñt' cohuen enten Yompor. Ñaña allpon peychatenanetpa' e'ñepa'chña paçharr peychatenanet, amachña cha muene' peyellsheñoña peychatenaneto attoch añcha'na'tpo' entoñet Yompor po'ñoñ.

⁸ Tarro'mar e'ñe peychateñoñ Yompor po'ñoñ ñeñt' e'ñe paçharrpa' amach errotenoñ ama't eseshapa' oto añpa' ama atteyaye. Ñaña ama't ñeñt' pe'moñe'tyene' ñerra'm e'ñe peychateñoñ e'ñe cohuenpa' allempoña ñetpa' o'ch penquët, tarro'mar e'ñe peychateñoñ cohuen paçharr. Allempoña ñetpa' amach errotenoñ alla sasare'terrpeterro.

⁹ Ñaña e'ñech cohuen poctape'chatyes acheñenesha' ñeñt' ataruasatareñtetsa e'ñe atfa. O'ch potanet ame'ñyetepa' e'ñe cohuen ñeñt' po'patronar penet. Ñaña añ pocte' allpon muenenet po'patronaretpa' e'ñepa'chña ame'ña'hueñet, allochñapa' attoch coshateñet po'patronar. Amachña cha anapare'teñeto.

¹⁰ Ñaña amachña cha etyeneto attoch po'patronaretpa' e'ñech yemtenanet poctacma. Allochñapa' e'ñe pame'ñeñoñet cohuen po'patronaretpa' añña acheñenesha'pa' e'ñech cohuen entapretenet Yompor poctaḡña, ñeñtara ñeñt' Ya'qeshḡatañer yepen.

Atto Yomporpa' orrtatan puemuereña allohuenacpay

¹¹ Yomporpa' orrtaterrnay pomuereña e'ñe allohuenacpay pa'namen acheñeneshacop attoch yeqeshperra.

¹² Ñaña ñeñt' ama cohuen enteno Yomporpa' añ pocte' o'ch ya'ypo'ña'huer, ñaña ñeñt' allpon yemnatse'tyen arr patsropa' añ pocte' ñaña o'ch ya'ypo'ña'huer, tarro'mar puemorrenteñoñ Yomporpa' ñeñto'mar yeçhatey atet. Añña pocte' ama't añe patsropa' o'ch yepena ñeñt' cohuentetsa, ñaña o'ch yepena ñeñt' atet pocte' enten Yompor, ñaña ñeñt' atet muenen o'ch yetsotoñ.

¹³ Añpa' attoch yecuame'teñ e'ñe yocsheñesha' esempohuañencha' huerra po'cohuenño Jesucristo ñeñt' nanac Parets ñeñt' Ya'qeshḡatañer yepen.

¹⁴ Tarro'mar ñapa' ña pocte' ente' o'ch rroma yocop attoch o'huañcha' allo'na yeḡatse'tnena sosya'tsañ. Ñaña ñapa' attoña e'shohuerrnay allohuen ñeñt' ama pocteyaye. Allochñapa' attoch pueyochresha' perrey, ñaña attoch yapa' yema'yoçhrena ñeñt' cohuentetsa.

¹⁵ Allohuen ñeñt' atet o' notuaḡ pa'pa' ñeñt'cha'ña peychatyesanet. Ñaña o'ch poctape'chatyesanet e'ñe cohuen, ñaña ñerra'm pa'yenet ñeñt'

ama pocteyayepa' o'ch potanet, amach patsteto atet, tarro'mar papa' ñeñtecop anaretep. Ñaña ñeñt ama pocteyayepa' amach atet pepatsto, te't acheñenesha'pa' amate' acua'psenaye' entenpeto.

3

Ñeñt atet poctetsa allohuenacop ñeñtey ame'ñetsa

¹ Ñaña o'ch peyerpacha acheñenesha' añ pocte' o'ch ame'ñeñet ñeñt nenet nanac amcha'tare't, ñaña allohuen po'psheññechno ñeñt amcha'tare'tetyetsapa' añ poctetsa o'ch ame'ñeñet. Ñaña añepa'chña pocsheñesha' chocma torra'yenet erra'tsente' cohuen enten acheñenesha'.

² Ñaña o'ch peyerpatanet amach allo'na sasare'tneñeto ama't puesheñarra, ñaña e'ñepa'chña cohuen entannenet, ñaña e'ñepa'ch aco'pa es penet po'psheññecop ñaña e'ñepa'ch cohuen amuerañtenet allohuenacop.

³ Ñeñtpa' e'ñe pocte' atetcha' pannenet tarro'mar yapa'cho'ña yeñoteñ ahua'tpa' añ yepatse'tyese't ñeñt ama pocteyaye. Yapa'cho'ña attach ama es yepche'te allempo nanac yepatse'tyese't sosya'tsañ. Ñaña nanac yatpare'te't ahua't, ñaña añ ye'chatyesyete't ñeñt ama po'ño'choyaye co'tañats. Yechetspa' añ nanac muenatse'tatyete't ñeñt ama cohuenayaye ñaña allempopa' añ nanac yocshe't pa'namen sosya'tsañechno. Ñaña allempopa' nanac atsrre'mo'chen yentanna'tyese't ñaña nanac es yeye'chapretanna'tyese't. Ñaña allempopa' ñerra'm esesha' ye'mo'ne'te'pa' yapa'cho'ña o'chcho' ye'mo'ne'chcho' yañ.

⁴ Tarraña allempoña Yomporpa' eñotatey e'ñe ña puemuereño'tpa' mueneñ o'ch yenpa'y, e'ñe allempocma yapa' attoña a'queshpaterrey, ñeñto'marña Yomporpa' ñeñt Ya'queshpatañer yepen.

⁵ Ñeñtpa' ama añoteyaye atto e'ñe cohuen es yepa'yen, añña e'ñe puemuereño'teya ñapa' a'queshpaterrey. Attoña e'shohuerrnayña yo'chñar attochña ello'pa' o'ch yoctape'cherr e'ñe cohuen etserra ñocop, ñaña Puecamquëño'tpa' o' e'ñe etserrataterrnay yoctañña.

⁶ Ñeñto'marña Puechemer Jesucristopa' attoña a'pocatuonay yocop attoch Pomporpa' chorraterrya Puecamquëñ e'ñe poctacma. Jesucristopa' ñeñtña Ya'queshpatañer yepen.

⁷ Ñeñto'marña te'pa' yeñoteñ e'ñe puemuereño'tey Yomporpa' o' pocte' entuerrey allohueney, ñeñto'marña te'pa' e'ñe yeyemteño't chocma yecuame'ten ñeñt o'patatenya, ñeñtpa' attochña yapa' corretsayach yocsheñeshocmañen tayoteñ e'ñe errponañohuen.

⁸ Ñeñt atet notenpa' e'ñe po'ño'ch. Ñeñto'marña napa' atarr nemneñ o'ch poctape'chatanet e'ñe huomenco atet, allochñapa' ñeñt ame'ñenaya Yomporpa' e'ñech añ ma'yo'chrenet o'ch penet ñeñt cohuen enten ña. Ñeñt o' notuapa' ñeñtña cohuentetsa ñaña ñeñtña nanac sherbets allohuenacop.

⁹ Ñaña o'ch notañ, amach pa'na anapare'tatstahueto ñerra'm esempo anapare'tanna'tyena acheñenesha' e'ñe ñet poctañño'maret. Ñaña amach pa'na anapare'tatstahueto ñerra'm esempo anapare'tanna'tyenet atet pa'yese'te't pa'tañneshañet. Ñaña amach pa'na otnare'tatstahueto ñerra'm esempo pueserrparño'tepa' es otnare'tanna'tyenet. Ñaña amach pa'na anapare'tatstahueto ñerra'm esempo anapare'tanna'tyenet e'ñe Moisés po'ño'ño'mar. Tarro'mar atto yanapare'tannenapa' ñeñtpa' ama es sherbeno, ñaña ñeñtpa' e'ñe orrena.

¹⁰ Ñaña ñerra'm esesha' ñeñt muenets o'ch atta e'moñe'tatyesan acheñenesha'pa' ñeñtpa' atetcha' pepe', o'ch peñotach atetpa' ama ařapahuo. Ñerra'm ama huenano ñeñt atet penapa' ñato' o'ch alla pōtererr po'pocheño. Ñerra'm allempoña ama huenererropa' añ pocte' o'ch sa'ypo'ñe'.

¹¹ Tarro'mar ñeñt atet acheñpa' yeñoteñ ñeñtpa' po'chñarořcha' nanac es panten. Ama't ñapa' eñoteñeñ ñeñt atet pena ñeñtpa' ochña'teñets.

¹² Ñehua, o'ch noterrperr po'poñ. Ñerra'm esempoch čhap pesho masheñ Artemas amapa' masheñ Tíquico ñeñtcha' nemña peshopa' ñerra'm errořenotpa' čhocmate' řon, o'ch pečhap Nicópoliso, țarro'mar napa' noctape'cheñ ñato' allcha' nechara'perra.

¹³ Ñaña čhocmach peyenpue' masheñ Zenas ñaña masheñ Apolos attoch ñetpa' čhapuet all sechenet, ñaña attoch amach es pallteto. Zenaspa' ñeñt nanac etsotene' ñoñets ñeñt atet anareř.

¹⁴ Allochñapa' ñeñt parro yame'ñena allpa' añ pocte' o'ch řa'yenet ñamet ñeñt atet cohuenteyetsa, ñaña attoch ñetpa' yenpueñet ñaña ñeñt nanac es palltetsa. Allochñapa' ñetpa'čo'ña o'ch sherbeñet pamo'ts.

Arrpa' all huomřcha'tyesnerranet po'cartoř

¹⁵ Allohuenet ñeñt parro'tsenenpa' mueneñet o'ch huomřcha'tapet ñamet añ necartoř. Ñaña o'ch pehuomřcha'ch allohuen ñeñt pame'ñeñořetpa' čhocma morrentenyet. Yomporepa'chña sa'nataya allohuenes. Te'pa' ñeñtach notař, ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT̃ QUELLCAN FILEMÓN FILEMÓN

Atto Pablopá' quellcan carta Filemónacop

¹ O'ch masheñe Filemóna nequellconap̃ añ carta, na Pablón epan masheñ Timoteo. Napa' o' yottam̃pennet e'ñe neserrpare'teñoť Cristo Jesús po'ñoñ. Te'pa' o'ch masheñe yehuom̃cha'tap̃ p̃a ñeñtep̃ atarr yemorrentena ñeñtep̃ atarr yetorrapretenaya Yomporecop.

² O'ch yehuom̃cha'teñ ñaña allohuen ñeñt̃ pame'ñeñoťet čhocma apčhenet pepaclo. Ñaña o'ch yehuom̃cha'teñ yočh Apia ñaña masheñ Arquipo ñeñt̃ nanac yetorrapretenaya ñaña Yomporecop.

³ E'ñe nehuom̃cha'teñoťes sapa' napa' o'ch notas: Yomporepa'ch sebensare'tam̃pene' ñeñt̃ara Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyočhro allohuenes.

Atto Filemón e'ñe pame'ñeñoťan Cristo atarr morrentenana allohuen ñeñt̃ ame'ñetsa

⁴⁻⁵ Ñaña te'pa' o'ch notap̃ masheñe. Napa' atet̃ ne'mare'tenep̃ p̃apa' nanac peyemteña Yepartseshar Jesús ñaña atarro' pemorrenteña allohuen Yomp̃or pueyochreshačhno. Ñeñt̃o'marña na atet̃ ne'mare'tenep̃pa' čhocma neparasyoso'teñ Yomp̃or allempo nema'yocham̃penp̃a.

⁶ Ñaña o'ch notap̃, añ nenamueñ Yomp̃or p̃ocop, ñeñt̃ allpon p̃ame'ñatena e'ñe p̃ame'ñeñoť Yomp̃or, ñetpa'čho'ña čhapanetepa'ña pueyočhreto atto nanac shonte' e'ñe cohuen bensare'tam̃peney Yomp̃or e'ñe yame'ñeñoť Puechemer ñeñt̃ Cristo Jesús.

⁷ Ñehua, masheñe atarr nocshena atto p̃apa' atarr pemorrenteña allohuen ñeñt̃ pueyochresha' pen Parets. Atto atarr pemuerenanetpa' ñeñt̃o'marña na'ña atarr p̃ocshaten neyočhrohuen.

Atto Pablopá' otenan Filemón e'ñech cohuen aguërran pa'taruasañer Onésimo

⁸ Ñeñt̃o'marña te'pa' o'ch noterrperr po'poñ: Napa' ñeñt̃en Cristo puellsensaren ñeñt̃o'marña p̃ocoppa' e'ñe pocten o'te' atet̃ notapeñ e'ñe ne'mueñocma ñeñt̃ poctetsa atet̃cha' pepa.

⁹ Tarraña neñotenep̃ p̃apa' atarr amuerañañ ñeñt̃o'marña te'pa' o'ch notap̃ e'ñe p̃a pemuereñoť atet̃ñaca'yeña pepa. Ñehua, na Pablón ñeñt̃en atet̃ p̃otene' napa' po'nmoťa o' yottam̃perrnet e'ñe neserrpare'teñoťa Cristo Jesús po'ñoñ.

¹⁰ Tarro'mar na p̃otene' añecop ñeñt̃ atet̃ nenteñ ñerra'mrrate' nechemer. Ñehua, ñapa' o' name'ñacha arr all ayottam̃psareten ñeñt̃o'marña te'pa' e'ñe nechemer nepeñ. Ñeñt̃pa' añ pa'so'cheñ Onésimo ñeñt̃ p̃a'taruasañer pepeť allempo ama yetam̃penp̃a'.

¹¹ Ña ahuatpa' ama es asherben peñche'te allempo petaruasache't e'ñe at̃ta. Te'ñapa' nanaccha' asherben penter e'ñe atet̃ atarr asherben nenteñ ñaña.

¹² Te'pa' o' alla nemñer pesho, e'ñepa'chña cohuenacma alla p̃aguë, e'ñech atet̃ pepapuer ñerra'mrrate' e'ñe no nechemer p̃aguën, tarro'mar ñapa' e'ñe neyočhrocmañen atarr nemorrenteña.

¹³ Napa' atarrčho' nemneñeñ o'ch na'pacheñ arr ñeñt̃cha' epan atto ñapa' ñaťe' neshherbenayen. Ñehua, napa' neñoteñ ñerra'm p̃a arro'tsenpeñcha'pa'

ṗate'ña neshherbenayeñ arr all ayottamṗsareten e'ñe neserrpare'teñoť Cristo po'ñoñ. Tarraña ṗapa' amaña arro'tsenayaype ñeñto'marña napa' nemneñeñ o'ch na'patonapeñ ṗa'cheñer ñeñtcha' neshherbenayeñ.

¹⁴ Napa' ama't atarr nemneñeñ o'ch atet nepeñ, tarraña ama nemno o'ch atet neṗa ñerra'm ama ṗa atet notaye, attoña e'ñe ṗa ṗoctaṗñoťpa' añcha'ña ṗorrtatonay pemuereña. Ama nemno o'ch e'ñe na ne'mueñocmapa' o'ch notap atetcha'ña peṗa'y, ñeñto'marña te'pa' o'ch alla nemñer masheñ Onésimo pesho.

¹⁵ Ñaña o'ch notap ñato' tarrecpate' yetamṗsaṗa mame' attoch e'ñe parrocmaterreṗ e'ñe tayoteñ errponañohuen.

¹⁶ Te'pa' o'huañcha' atet peñch ñerra'mrrate' ṗa'taruasañra pepeñ ñeñt ama esoye' pente'te. Te'pa' e'ñechña atet penter ñerra'mrrate' e'ñe pemo'nasheñ ñeñt atarr pemorrentena. Napa' atarr nemuereña elloña ṗapa' o'ch atarr pemuerya nanac tarro'mar ñapa' ama e'ñe atta pemo'nasheñ pepeñe atet yeṗannena allohueney acheñey, te'ñapa' e'ñe yame'ñeñoť Yompor o'ch e'ñe pemo'nasheñtera e'ñe poctacma.

¹⁷ Ñerra'm po'ñočh atette' pentenen na ñeñtey parro attecmay yeyemtannena, ñeñtepñapa' e'ñechca'ye cohuen ṗaguèrña yemo'nasheñ Onésimo atet ñerra'mrrate' na e'ñe cohuen ṗaguèn.

¹⁸ Ñerra'm čhote' erroť pennap ñeñt ama cohuenayaye amapa' ñerra'm čhote' tebeneṗ, te'ñapa' nach petsa'terraya.

¹⁹ Na Pablónpa' te'pa' o'ch nequellconap e'ñe na notot attoch e'ñe cohuen neñotataṗ nach petsa'terraya. Tarraña ñato' o'ch neyerpataṗa atto na ṗame'ñaterraya attoch ṗa'queshṗataretterra, ñeñto'marña ṗocoppa' añ poctetsa te'pa' o'ch alla ṗocshatterren naña.

²⁰ Po'ñočh masheñe, napa' añ e'ñe nemnen te'pa' o'ch alla ṗocshatterren naña e'ñe ṗame'ñeñoť Yepartseshar Jesucristo. Allochñapa' napa'cho'ña attoch e'ñe cohuen nocsherra neyočhro e'ñe name'ñeñoť naña Cristo.

²¹ Napa' neñoteneṗ ṗapa' čhocmach pe'mñnoten ñeñto'marña nequel-lquènnap añ carta. Neñoteneṗ amach ñeñtayaya atet peṗo ñeñt o' notuaṗ, ṗapa' ellochña atarrcha' cohuen peṗa'y es allohuen ñeñt atarr cohuentetsa.

²² Te'pa' o'ch noterrperr po'poñ: ṗañño'toncha' ñaña nocop allcha' nečhap ñerra'm esempoch a'rroyerrnet. Sema'yochamṗeñoťen Yomporpa' napa' añ atarr necuen ñato' esempopa' a'rroyerrnetcha'. Allempopa' eshecte' neta sesho o'ch nemo'terrsa'.

Arrpa' atto so'tner po'cartot

²³ Arr necartot all huomñcha'teneṗ ñaña masheñ Epafras ñeñt parro yottamṗpenyet e'ñe yeserrpare'teñoť Cristo Jesús po'ñoñ.

²⁴ Huomñcha'teneṗ ñaña masheñ Marcos ñaña masheñ Aristarco ñaña masheñ Demas ñaña masheñ Lucas. Ñetpa' čhocma torrapretennet Jesucristocop.

²⁵ Te'ñapa' ñeñtach notap masheñe. Yepartsesharepa'chña Jesucristo sa'nataya allohuenes. Ñeñtpa' attetepa'ch Nompore. Allohua.

Pablo

AÑ CARTA ÑEÑÑ HEBREONESHACOP HEBREOS

Te'ña Yompor Puechemerpa' ña e'ñe ye'ñorana'terraya ñeññ atet oteñ Pompor yocop

¹ E'ñe ahuatoteñ Yomporñapa' chocma eñorana'tyesane't ñeññ pueyochresha' pe't ñeññcha' a'mta'yesaye't po'ñoñ ñeññtara profetanesha'. E'ñe pa'namenot eñotatyesanete't. Ñeññapa' o'ch eñotatennayet yatañneshañ judionesha' ñeññ atet otenanet Yompor.

² Tarraña te'ña yapa' e'ñe ña Puechemer o' eñorana'terrya ñeññ atet eñoreññaña Yompor yocop. Ñehua, ñeññpa' ñeññtara Puechemer ñeññ Jesucristotets ñeññ ne't Pompor ahuatoteñ, ñach o'patenaya allohuen ñeññ ora allpon eñall, tarro'mar ña ye'chcataprete' ahuat Pompor añ patser ñaña allohuen ñeññ esocmañen pa'namen eñalletyesta.

³ Ñeññtara Cristo atto atarr cohuentena ña pa'tsnomueño't, ñeññpa' Pomporña orrtaten po'partsoña. Ñeññ atet cohuen orrtatyen ñapa', Pomporpa'cho'ña e'ñe parro attecmet. Ñapa' e'ñe po'ñoñoña orrtatuan ora esocmañen ñeññ allpon pa'namen eñall tarro'mar ña po'ñoñpa' atarr huomenc. Ñeññtara ñeññ rromats attoch e'ñe e'sham'pesuerrey yo'chñar. Allempoña o' orrtatuan atto e'sham'perrey yo'chñar allempoñapa' o' alla anorruerr Pompor Parets po'cohuenrot allña atarr partsotapretuerrana Pompor po'conaño e'ñe all pue'ntaño.

Ñeññ Yompor Puechemerpa' ña metana'tuene' allohuen mellaño'teññanasha' atto atarr sherben ña

⁴ Ñeñño'marña te'ña ñapa' atarr am'cha'tarettena, ello metana'tuenan allohuen mellaño'teññanasha', tarro'mar ñapa' ñeññ otenet ñapa' e'ñe Parets Puechemer. Ñeññña mellaño'teññanasha' ñetpa' ama atteye' otaretteneto.

⁵ Ñaña ye'ñoteñ ñapa' ña e'ñe metana'tuenahuet tarro'mar mellaño'teññanasha' ama't puesheñarrotetapa' ama otaneto ñeññ atet otan Puechemer, ñeññpa' atet ot Puechemerecop:

Papa' pa' ñeññe' e'ñe Nechemere'p, te'ñapa' o'ch e'ñe neñnotach acheñenesha' po'ño'ch papa' e'ñe Nechemer nepene'p.

Po'pocheñoñapa' atet oterrerr Puechemerecop:

Napa' na ñeññten Pompor, ñapa' no Nechemer.

⁶ Po'pocheñoña allempo chapatan Puechemer po'moter ñeññ atarr nanac sherbets a'ne patsro atet eñora ñocop, ñeññpa' atet ot:

Te'pa' concorpana'teñepa'ch allohuen nem'llaño'teññaneshar.

⁷ Po'm'llaño'teññaneshar ñetpa' añe'cpa anarettenet ñetcha' sherbenet Yompor. Ñeñño'marña atet eñorena ñocpuet:

Ñerra'm erra nemñayenanet e'ñech poma'yorñecma erra senet e'ñe atet penet ñerra'm m'orr. Atarr cohuen sherbennet atet ñerra'mrrate' tso' ñeññ atarr cohuen huoretyets.

⁸ Tarraña Puechemerecoppa' ama atteye' oteno. Ñocoppa' atet eñora:

Papa' atarr Partso'p, ñeññe'pcha' chocma am'cha'tarettsa peconaño ñeññ errponañohuen. Ñaña ñeññ atto pa'm'cha'tarettena papa' e'ñe pocte' es pe'pa'yenanet.

- 9 Ñaña ñeñt e'ñe pocte' nenten napa' ñeñtña atarr p̄ocshatene'. Ñaña ñeñt ama pocteye' nenteno napa', p̄apa'cho'ña ñeñt atarr petsena'ten. Ñeñto'mar napa' ñeñten Peyomporer pepenen, ahuo't atarr nanac nocshaterreḡ. Atto atarr p̄ocshena p̄apa' ello pen̄tana'tueñ allohuen po'potantañ ñeñt nesherḡa'yene' ñamet.
- 10 Yomporpa' alla eñorerrerr Puechemerecop, ñeñtpa' atet otererr: Partseshacha' p̄a yeḡcatue' ahuaḡ pats, e'ñe echarr p̄orratue. Enetpa'cho'ña e'ñe pehuamencotecma peyeḡcatue.
- 11 Ñeñt e'ñe peyeḡcatuapa' ñeñtpa' huañerrcha' e'ñech chenca'huerra esempo, tarraña p̄apa' ama arromñañeshayape ama't e'ñe errponaña. Allohuen ñeñt peyeḡcatua ñeñtpa' e'ñech mellasha'tua e'ñech atet pena ñerra'mrrate' shetamuets ñeñt atarr amllasha'tña.
- 12 Atetcha' peperr peyeḡcatar atet ñerra'mrrate' shetamtsoshe'm ñeñt o' mellasha't. O'ch a'metatse'chet o'ch huapore'chet allempo chorrenet po'poñ ñeñt atarr cohuen emarr. Tarraña p̄apa' atterapach errponañohuen. Atto p̄ocrrena p̄apa' ama't ahuaḡapa' amach ahuañañat̄terro.
- 13 Po'pocheño Yomporpa' alla oterranerr Puechemer, ñeñtpa' atet och: Te'pa' o'ch alla p̄anorruerr arr necohuenroḡ allcha' pepartsotapretuernna. Esemphuañencha' allohuen ñeñt pe'moñe'tene' o'ch e'ñe na'mchechueranet attochña pomnaren pepohuerranet. Tarraña mellañoḡeññanasha'ñapa' ama atteye' oche ñeñt atet otan Puechemer. (Ñeñto'mar yeñoteñ Yompor Puechemer ña atarr sherbets, ello metana'tuenan allohuen mellañoḡeññanasha'.)
- 14 Yeñoteñ allohuen mellañoḡeññanasha'pa' añecpa allsensareḡtenet atet ñerra'm Yompor Puecamquēñ, ñetcha' sherbenet Yompor. Attochña ñetcha' yenpuenet allohuen ñeñtcha' a'qeshp̄atareḡterrtsa.

2

Amach atta es yepḡchatsto esheccha' ya'qeshp̄atareḡterra

1 Te'pa' atto o' yeñoterrñañ Yompor Puechemer atto atarr nanac partsoten ñeñto'marepa'chña te'pa' elloch yema'yoḡherra o'ch ye'mñoter e'ñe poc-tacma ñeñt atto o' ye'muerrñañ po'ñoñ. Ye'mñoterrepa'chña e'ñe cohuen te't acoḡoteñpa' ñato'rraña o'te' alla yepserrñañ ñeñt atet o' yeḡchaterrey Yompor Puechemer.

2 Tarro'mar yeñoteñ Yomporpa' ama puenesho po'ñoñ ñeñt atto eñorana'tanet ahuaḡ. Tarro'mar allempo ñeñt ama e'mñotaye ñeñt at̄ta at̄pare'te'pa' e'ñe tsa'tatuanete't allohuen ñeñt allpon e'ñe pocte' ent ña. Ama't añ ñoñets ñeñt orrtat po'mllañoḡeññrenesha' ḡhocma tsa'tatanete't ñerra'm esempo at̄pare'tenet ñeñt ñoñets.

3 Ñeñto'marña yapa' yeñoteñ ñerra'm ama ye'mñoterrñañe e'ñe ña Puechemer, yañapa' errotenotuachñaca'yeña yeqeshperrate'ña ñerra'm at̄ta ama es yepḡcheno; e'ñe at̄ta eñalleñca'yeña attoch ya'qeshp̄atareḡterrañ e'ñe cohuen. Ñehua, ñenmaḡpa' Yepartseshar Jesúsña serrpare'tatahuet attoch ya'qeshp̄atareḡterra. Allempoña ñeñt e'muene' atet otanet Yepartseshar Jesús, ñetñapa' o' serrpare'tatyet yaña attoch yeñoch ñeñt e'ñe po'noḡ ña a'qeshp̄atañtetsa.

4 Ñaña Pomporñapa' ñaña yeñotate' Puechemer po'ñoñ ñeñt atet oteneypa' e'ñe po'noḡ. Ñapa' orrtatyesanet po'partsoña ñaña po'huamenc ñeñt acheñenesha'pa' ama puentareto. Ñaña ña Puecamquēñoḡpa' o' apa'yesey

e'ñe puesheña'ttsoy errotencha' muenatey ña ñeñtcha' atet yetorra'yesa ñocop.

Atto Jesucristopa' e'ñe poctacma acheñetos arr patsro attoña e'ñe pa'mo'nasheñ pohuerrey

⁵ Te'pa' o'ch noterrser po'poñonet añ patser ñeñtcha' huerrtsa tsapaonet. Ñeñtpa' ama mellañoñeshaye' noña Yompor ñeñtcha' pomnaren perre'. Ñapa' aña na' acheñ ñeñtpa' arromñañenesha'.

⁶ Tarro'mar atet anaret Yompor po'ñoñ ahuatoteñ allempo puesheñarrpa' atet otan Yompor:

Ama't acheñaya ama't mamesha ama esoyaye, tarraña ña Nomporepa' atarropa't peyerpuenya. Ama't ya ñeñtey arromñañena'taraya tarraña ña Nomporepa' atarropa't pemuerenya.

⁷ Ñeñt arromñañenesha'pa' ama tama ahuañecatayayeto atet atarr sherben mellañoñeshaye'. Tarraña ñeñtpa' mamecpa atet pemnach. Tarraña ama't atteña' elloña o'ch alla pecohuentater atet ñerra'mrrate' esempo o'ch net ñeñtcha' añcha'tarettertsa, allempopa' o'ch nacet po'choyo'm ñeñt atarr cohuen.

⁸ Ñeñtpa' tarro'marña atet pene' arromñañena'tar allochñapa' attoch e'ñe pomnaren penan allohuen ñeñt allpon es peyechcatua. Arrpa' allohua atet oten ñoñets ñeñt ahuatoteñ anaret.

Ñehua, ñeñt ñoñets all oten arromñañena'tar ñeñtcha' e'ñe pomnaren perre' allohuen, ñeñtpa' añca'yeña oteney allohuenacop ñeñt erraparen eñall; amach eñalleña ama't e'ñe patrra ñeñtcha' ama pomnaren perreto. Tarraña ama't atet oteneñ ñeñtpa' amaña yentera' allempoch pomnaren es perr arromñañena'tar, tarro'mar ama çherra' allempoch etsoterra ñeñtecop anaret.

⁹ Tarraña e'ñe yeñoteñ puesheñarr ñeñt arromñañecatostosa ñeñt atet ñostsa ñeñtca'yeña Jesús. Allempo acheñetos arr patsro Pomporña muenate' amach tama ahuañecatoso atet atarr ahuañecatena mellañoñeshaye'. Tarraña ñeñtpa' mamecpa atet muenach attoch e'ñe arromñañecatostosa arr patsro. Ñeñtpa' añecopña atet ña attoch mueroçhtosa o'ch rromos allohuenacpay ñeñtey arromñañenesha'. Yompor e'ñe puechereñtey ya attoña muenatan Puechemer o'ch rroma yocop. Ñeñto'marña Pomporpa' o' alla atarr cohuentaterran Puechemer allempo o' alla ner ñeñtcha' atarr añcha'tarettertsa.

¹⁰ Ñehua, Yomporpa' yeçcatan allohuen ñeñt eñalleteyetsa. Ñaña allohuenpa' tarro'mar yeçcatue attoch cohuentateññañet ña. Ñaña ñapa' añ muenen shonte' ñeñtcha' e'ñe puechemerasha' perr ñeñtcha' cohuentapreterrera ña. Yomporpa' e'ñe pocte' enteñ o'ch muenatan Puechemer attoch mueroçhtateñ acheñenesha'. Attochña e'ñe etsotatoñ Puechemer esheccha' a'queshpaterran allohuen ñeñtcha' puechemerasha' perr, attochña e'ñe ahuanerranet allcha' cohuentapreterrerañet Pompor.

¹¹ Ñehua, Puechemer ñeñt Jesús, ñapa' a'cohuentatan acheñenesha' Partocop, attoña e'ñe e'shampesuanet po'chñar. Te'ña ñeñtey a'cohuentatuaretey ñaña ñeñt ya'cohuentaterre' ñeñtpa' ñeñtña e'ñe ñeñtçena'tarecmay tarro'mar ñeñtara Yompor yepen ñeñt Pompor pen ña. Ñeñto'marña Jesús pa' ama puepencñoñeye' pa'mo'nasheñ penye.

¹² Yeñoteñ ama penquënyo tarro'mar Yompor po'ñoñ ñeñt anaret ahuatoteñ ñeñtpa' atet oten ñerra'mrrate' Puechemer otets:

Napa' neserrpare'tachcha' nemo'nasheñnesha' atet e'ñe cohuenare' es pepa'yen pa. E'ñe nachoteñoṭep̄ papa' chocmach na'ye'chochtatonaṭ all ap̄chena allohuen masheñneshachno.

¹³ Yompor po'ñoñ ñeññ aquellcareṭpa' atet oterrerr ñerra'mrrate' Cristo o' alla oterrerr:

Napa'cho'ña neyemteña Yompor.

Ñaña atet oterrerr Cristo:

Te' arro'tsenen epan Nompor puechemerasha' ñeññ cohuaṃpsatenen ña.

¹⁴ Ñehua, allohuen ñeññ e'ñe pa'mo'nasheñecmuet p̄annetsa, ñetpa' e'ñe ñeññena'tarecmuet. Ñeñño'marña Jesús pa' e'ñe acheñetos attoch pa'mo'nasheñ p̄osey. E'ñe arromñatena'tartosa e'ñe atet ñerra'mrrate' ya. Ñapa' tarro'marña atet p̄osa allochñapa' attoch rromos. Tarro'mar allempo rromapa' attoña puerratan̄pesuan oneñet po'huamenc atto atarr añcha'nochtana'teney allempo yerromuen.

¹⁵ Ñeññpa' Jesúsña a'huañataṃpesuose' ñeññ ama't cheshoteñ chocmach yeñcha'ten atto yerromuen, ñeññpa' atarr añcha'nochen yenteñ.

¹⁶ Ñehua, yeñoteñ ama mellañoṭeññaneshaye' llequenoña Jesús ñeññcha' yenpos arr patsro. Yaña llecosa ñeññey arromñateneshay ñeññey e'ñe po'ñoñch po'ñrenñey pen Abraham; ñeñño'marña ñapa' mueneñ o'ch yenposey.

¹⁷ Ñeñño'marña ñocoppa' e'ñe poctoña o'ch acheñetos, o'ch e'ñe attetos ñerra'm ya ñeññey pa'mo'nasheñnesha' pen. Allochñapa' e'ñe puellcapreteñoṭey ya ñeññey e'ñe pamo'ts penpa' e'ñech cohuen a'pocaterrey Partsesho. Attoña ñapa' chocma e'ñe cohuen sherbenan Pompor atet ñerra'mrrate' ñeññ corneshatyets Partsocop. Ñapa' e'ñe po'ñoñch Pa'mcha'tareter peñ allohuen ñeññ cornaneshatyets Partsocop. Ñeñño'marña ñapa' e'ñe ña tsa'tuerraya allohueneñy acheñeneshay yo'chñar allempo ashataretta e'ñe ña po'rras. Attoña e'ñe a'pocaterrenay yo'chñar Yomporesho.

¹⁸ Ñapa' atarr muerochtosa allempo huapoñe't topateñets; ñeññpa' attoch a'ypo'ñereñ Pompor. Ñeñño'marña te'pa' e'ñe puellcapreteñoṭey ya ñapa' e'ñe eñoteñ o'ch yenpa'y attoch ahuamencat p̄onay yeyo'cher allochñapa' amach alla a'puerrataterrye topateñets ñeññcha' allpon yehuapoya yaña.

3

Jesús ñeññ Yompor Puechemer ña metanene' ama't Moisés atto atarr sherben ña

¹⁻² Ñehua, masheñneshacha' ñaña nochaneshacha' sapa' ñeññes o' sa'cohuentatare'tterra Partsocop ñeññes o' chore'terres Yompor o'ch chapaterres all pue'ntaño. Te'pa' o'ch notas, o'ch soctape'ch e'ñe cohuen ñeññ atet perrnay Cristo Jesús ñeññ yame'ñerra. Ñapa' atto allsensare'ttapa' e'ñe cohuen etsotuan ñeññ atet llesense' Pompor. Ñaña ñapa' ña Yecorneshar yepen ñeññ atarr sherbets Partsocop allohuenacpay ñeññey ame'ñenaya Yompor. Ñapa' e'ñe attecma cohuen etsotuan ora allpon ñeññ atet muenach Pompor acheñeneshacop atet pe't ñaña Moisés ñapa'cho'ña e'ñe etsotan ñeññ atet och Yompor allohuen pueyochreneshacop. Ñehua, allohuen ñeññ pueyochrenesha' pen Yomporpa' ñetpa' pa'paquell penanet Yompor.

³ Ñehua, yeñoteñ ñerra'm eñall puepahuarr pocoll ñeññ tomatenet e'ñe cohuen añcha'ña atarr cohuen yenten ñeññ tomatene'. Amachña aña cohuen yenteno pocoll tarro'mar pocollpa' ama ñoñaye' cohuenteno; eñallca'yeña pamo'mte' ñeññ a'cohuentatene'. Attecmañch yeñch ñaña Jesús atarr cohuen

tarro'mar ñapa' atto ame'ñatana shonte' ñeñtcha' pueyochrenesha' pa' Pompor attoña tomatosan ñaña pocoll ñeñt atarr cohuen ñeñtcha' pa'paquëll pen Pompor. Moiséspa' amachña ñañaña atarr cohuen yenteno tarro'mar ñapa' ama ñaye' tomataye ñeñtcha' pa'paquëll perr Yompor.

⁴ Ñehua, yeñoteñ allohuen pocollpa' ama ñoñaye' yeçhquëno; çhocmaca'yeña eñall ñeñt yeçhcatene'. Ñeñt yeçhcate' esocmañen ñeñt eñalleyetsa ñeñt'pa' Yomporña yeçhcatuahue'.

⁵ Añña Moiséspa' e'ñe cohuen etsotan ñeñt atet yehya Yompor; ñeñt'pa' o'ch es eñotatyesan acheñenesha' tarraña ñeñt'pa' toma'nteñtsa. Tsapañoneña Yomporpa' o'ch eñotaterranet ñeñt e'ñe eñotochen. Ama't e'ñe cohuen etso-tenaneñ Moisés allohuenacop ñeñt pa'paquëll pen Yompor allempo, tarraña ñeñt atto sherbenan Yompor pa'paclopa' ñapa' atta pueñaña peñ Yompor. Amaña Puechemereye'ña peñe.

⁶ Ñapa' aña'yeña Puechemer pen Cristo ñeñtcha' sherberrets tsapañoneñ allohuenacop ñeñtcha' e'ñe pa'paquëll perr Pompor. Ñapa' e'ñe cohuen etsoterran ñeñt e'ñe Pomporecop. Allohueneypa' e'ñe pa'paquëll pohueney Yompor allcha' yeçhena ña ñerra'm allo'nach huomenc yeyemuetneña attochña e'ñe yocsheñeshocma yecua'huanom ñeñt o'patatenya.

Yomporpa' e'ñech cohuen amesaterran pueyochresha'chno ñeñtcha' e'ñe cohuen ame'ñerraya attoch e'ñe cohuen cosherret

⁷ Ñeñto'marña Parets Puecamquëño'tpa' atet oten all aquellcare't Yompor po'ñoño ñeñt'pa' atet oten:

Ñerra'm se'mueñ Yompor atto çhore'tenes te',

⁸ sañapa' çhochña se'mñoçh, amachña çha se'charrtatatsto seyoçher. Amach çha sa'tpare'tatsche atet pe't israelnesha' ahuat allempo chopeñe'chyese'te't amayo. Allña' epaye' atsrre'moçhtana'tyesnete't.

⁹ All amayo satañneshañña' atarr topatnete't atto'ch eñotnet po'ñoçho'te' atsa'tatañen. Ñetpa' atet pa'yesnete't ama't çhocma entyesonete't ñeñt norrtatyesanete't. Pa'tatsoch çharra' charohua entyesonete't ñeñt çhocma negatyesanete't.

¹⁰ Ñeñto'marña napa' atsrre'moçhen nentyesanet, napa' atet not: "Ñeñt atet co'tape'chenet pueyoçhro ñeñt ama cohuenayaye ñetpa' atarr panteñet nocop. Ama aña'ye' mueneneto o'ch co'tape'chet ñeñt cohuen nenten na."

¹¹ Atarr atsrre'moçhen nentanete't. Ñeñto'marña atet not ñocpuet: "Ñetña po'ñoçh ama't ahuatapa' amach neçhapaterraneto allcha' pocsheñesho'tpa' o'te' amesapreterrnetañ." Ñeñto'marña ñocpuetpa' atet nena' neñoñ e'ñe na neso'chño.

¹² Ñeñto'marña masheñeshacha' ñaña noçhaneshacha' te'pa' o'ch notas saña, e'ñech seña'ta seyoçhro atet soçtape'chyen e'ñe puesheña'ttsos, ñato'pa' amate' cohuenaye' soçtape'cheno, ñato'pa' amate' po'ñoçhaye' same'ñeñoña Yompor. Ñerra'm po'ñoçh atet sepenapa' ñeñt'pa' ñeñtach sequeçhpaterre' Yompor ama't ñeñt Yomporer ñeñt ama arromña'teshayaye.

¹³ Sapa' e'ñepa'chña cohuen soçtape'chatanna'tnoma pate'tets yet tayepa'tña' orameñ yet allempoteñ o' çhore'terrey Yompor. Attochña so'chña'arpa' amach erroteno't alla shequërrserro. Attoch amach çha se'charrteno seyoçhro allochña' amach alla sa'tpare'tere Yompor, ama't e'ñe puesheñarrotesa.

14 Allo'nepa'chña e'ñe huomenc yeþa'nom yeyoçher. E'ñepa'chña yeyoçhrocmañen yeyemteña Cristo atet yeþa allempo e'ñe errtey ame'ñenaya. Ñerra'm atetcha' yeyemuetnoña allempopa' yagapapretercha' Cristo ñeñt o'patateña Pompor.

15 Ñeñto'marña o'ch alla neyerpaterrser ñeñt atet oten Yompor po'ñoñ ñeñt aquellcaret ahuatoteñ, ñeñtpa' atet oteney:

Ñerra'm se'mueñ Yompor atto çhore'tenes te' sañapa' çhochña se'mñoçh, amachña çha se'charrtatatsto seyoçher. Amach çha saþpare'tatsche ñeñt atet pe't israelnesh'a' ahuat allempo chopeñe'chyesete't amayo.

16 Ñaña te'pa' o'ch neyerpaterrser ñeñt atpare'tyesaye't Yompor allempo pueçhore'teño'tpa' eñorana'tanete't, ñetpa' ñeñtareta ñeñtet çha'nmaçha'taterr Moisés Egipto't.

17 Ñaña o'ch neyerpaterrser, ñeñt atarr atsrre'moçhen entyese't Yompor ahuat ama't pa'tatsoch çharra' charohua, ñetpa' ñeñtareta ñeñtet atarr ochña'tare'tatsete't. Ñeñto'marña ñet allempopa' e'ñe alla colla'huet amayo.

18 Ñaña o'ch neyerpaterrser, ñeñt otarettatsa allempo ñetpa' ama't ahuatapa' amach amnataretterreto attoch pocsheñesho'tetpa' o'te' amesapreteretañ Yompor, ñeñtpa' ñeñtara ñeñtet atarr atparña'tatsete't. Ñeñt atet otarettete't allempo, Yomporña nahuet po'ñoñ e'ñe ña pa'so'chño, tarro'mar ñapa' ama puenesho po'ñoñ.

19 Attoña yeñotenanet ñetpa' ama't puesheñarro'tetapa' amach eshcaye' çhapueto allcha' yeçha'huerretañ e'ñe cohuen pueñmañesha' tarro'mar ñetpa' ama eseshaye' cohuen ame'ñayo Yompor.

4

1 Ñehua, Yomporpa' po'ñoçh oteney yeçhapcha' allcha' yamesapretera allcha' e'ñe cohuen yocsha'huera Yompor ñerra'm po'ñoçhcha' yame'ñera yaña. Tayepa'tña'pa' orameñ atet oteney yaña e'ñe yemçha'naño'tpa' yame'ñyepa'ch te't puesheña'ttso'tespa' amate' seçherro samña all.

2 Tarro'mar ñeñt atpare'taye't all amayopa' aserrpare'tatarettetañña cohuen ñoñets Yomporesho't tarraña ama huenetoña paþparñet tarro'mar ama't e'metaña'pa' ama eseshaye' ame'ña'pahuoye' entaye. Yapa'çho'ña o' ser- rpare'taterryet yaña cohuen ñoñets Yomporesho't.

3 Ñeñteycha' e'ñe po'ñoçh ame'ñerraya Yompor ñeñteycha'ña çherrets allcha' yamesapretera allcha' e'ñe cohuen yocsha'huera Yompor. Ñeñña ama ame'ñetsopa' ñetpa' amach esesha' çherrtso allcha' coshapreteret Yompor. Ñeñtpa' e'ñe attecma ñeñt atet otare'tta ahuat ñeñt ama ame'ñatso. E'ñe atet oteney Yompor po'ñoñ all aquellcaret, ñeñtpa' atet oten Yompor:

Atarr atsrre'moçhen nentanete't ñeñto'marña atet nena' neñoñ ñocpuet:
 “Ñet po'ñoçh ama't ahuatapa' amach neçhapaterraneto allcha' amesapreterrnet allcha' e'ñe cohuen cosha'huerrnetañ.”

Attoña ñetpa' amach eseshaye' çherrtso allcha' e'ñe cohuen coshapreteret Yompor. Ñehua, ahuat Yomporpa' ña orrtate' ameseñets e'ñe allempoteñ yeçcatuahuan pats ñaña enet. Ñeñña ameseñetspa' atarr coshateney yeyoçhrocmañen.

4 Tarro'mar all po'ñoño yeñoteñ atet aquellcaret, ñeñtpa' atet oten:

O' yeçcatuan Yompor allohuen ñeñt allpon yeçcatyesua, po'cançherrmatñoñapa' o' ames Yompor.

5 Tarraña po'pocheño all oterrerr Yompor po'ñoñ ñeñt aquellcaret, ñeñtpa' atet oten:

Ñeñt ama name'ñenayopa' amach eseshaye' çherrtso allcha' amesapreternet attoch e'ñe cohuen coshapreternet.

6 Ñeñto'mar yeñoteñ ñeñt e'mayeñ ahuat cohuen ñoñets ñetpa' amach eseshaye' çherrtso allcha' amesaterranet Yompor attoch e'ñe cohuen pueyoçrohuen cosherret tarro'mar ñetpa' ama eseshaye' ame'ña'pahuoye' entaye Yompor. Tarraña ama't atteña' yeñoteñ Yomporpa' ama puenesho po'ñoñ. Ñeñto'marña te'pa' yeñoteñ Yomporpa' atterach e'ñe cohuen amesaterran ama't erra'tsena ñeñtcha' po'ñoçh ame'ña'po' enterre', attochña ñetpa' çherretcha' allcha' e'ñe cohuen cosherret.

7 Ñehua, ñeñto'marña Yomporpa' onañcherran po'poñ po'yeter, ñeñtpa' o' çherr te' esheccha' ama't patantarra acheña' o'ch ame'ñeñet. Ñeñto'marña yeñoteñ Yomporpa' ora attera cohueney tarro'mar ama't metuen aton char allempoteñ atpare'chete't all amayopa' o' çhap allempo atto eñosatan David. Ñeñtpa' ñeñtara ñeñt o' notuanmas:

Ñerra'm esempoch se'mueñ Yompor atto çhore'tenes sañapa' çhochña se'mñoçh tayepa'tña orameñ yet allempo o' çhore'terres Yompor, amachña çha se'charrtatatsto seyocher.

8 Ñehua, yeñoteñ Josué ahuatpa' e'ñe çhapatan israelnesha' puechemere-shaçhno all patso ñeñt all sechete't ahuatoteñ allcha' yeçhoret. Tarraña ama't çhapatanetañ allpa' ama eseshaye' pocsheñeshoñ pueyoçrohuen amesostsoña all. Ñerra'm e'ñech cohuen amesatuerranetañ Josuépa' amach onañcherranñerroña Yompor po'poñ po'yeter attoch coshaterrey e'ñe cohuen yeyoçrohuen.

9 Ñeñto'marña yeñoteñ te'pa' e'ñallmeñ ñeñt o'patatenya Yompor ñeñtey pueyoçhresha' pen allcha' e'ñe yocsheñeshocmañen yamesuerr. Ñeñtpa' e'ñe atet ñerra'mrrate' allempo ames Yompor ahuat po'cançherrmatño.

10 Tarro'mar allohuen erra'tsencha' çherrets allcha' amesaterranet Yomporpa' ñetña'pa' amach alla es llecatterahuete'te; e'ñe pameseñoçet cohuenpa' e'ñech eñmaterret pueyoçrohuenet atet ñerra'mrrate' allempo e'nuan e'ñe poctacma Yompor po'taruas, e'ñe pocsheñeshocma ames.

11 Yapa'çho'ña añepa'chña ye'nen attoch yeçherr yaña allcha' amesaterrey Yompor attochña e'ñe yocsherra yeyoçhro. Te'ña'pa' ama't puesheñarroçeyapa' amuepa'ch alla yatpare'terre'te te't ama yeçherro yaña all.

12 Yompor erroç oteneç, po'ñoñpa' atarr ahuamencat ñeñtpa' ama ahuañañaate. Ñeñt po'ñoñpa' e'ñe atet etsotenan ñeñt atet muenen ña. Po'ñoñpa' allo çhocma ñerra'mrrate' cochell ñeñt atarr etsotañtatareç emoto'mar. O'ch es yepata' allopa' e'ñech be'tosua ora, e'ñech pecha'tampesuoñ ama't posapohuen. Atetca'ye penaña Yompor po'ñoñ e'ñech çhaponaya e'ñe yeyoçhro ama't e'ñe yecamquëñoçhuen, ñeñtcha'ña e'ñe yeñotaterre' ñeñt yeyoçhro'tsen ama't ñeñt allpon yoçtape'chyen ora esocmañen.

13 Ama't puesheñarroçeya amach erroçenoç ye'potampesyoña Yompor ñeñt yeyeçcate'. Amate' erroçenoç ya'nasotampesyoña, ñapa' e'ñeca'ye entuennayña yeyoçher ñeñt ora allpon es yoçtape'chyen. Ñapa' ñach ya'metatatuerre' allohuen ñeñt allpon yoçtape'chyen.

Jesúspa' ña corneshaterrets, e'ñe metana'tuerran allohuen cornaneshaçhno atto atarr sherben ña

¹⁴ Ñehua, yeñoteñ eñall ñeñt Yecorneshar yepen ñeñt atarr Partseshatets, ñeñtpa' ñeñtara Jesús ñeñt Yompor Puechemer. Ñaña'pa' o' alla çherr allohuanen pue'ntañ e'ñe all Pomporesho, allña e'ñe cohuen a'pocstatennay yocop. Ñeñto'mañña yapa'cho'ña allo'nepa'ch yeyemuetneña. Amuepa'chña yequeçpatstere.

¹⁵ Tarro'mar Jesús ñeñt Yecorneshar yepen ñapa' e'ñe eñoteñ attoch e'ñe cohuen llecapretenya allempo ama e'ñeye' huomencaye'yenteno yeyoçhro. Tarro'mar ñapa'cho'ña attecma huapoñe't allohuen pa'namen topateñets, e'ñe atet yepena ya te' çhocma huennaya pa'namen topateñets. Tarraña ñapa' ama't pa'namen huapoye't topateñets, ñapa' ama't parrocha ama ðano ñeñt ama pocteye' enteno Pompor.

¹⁶ Ñeñto'marepa'chña e'ñe yeyemteñoñ Yompor Puechemer, amach yemcha'nañoteye' yeçhore'teñe Yompor ama't ñeñt atarr partsotets po'conaño. E'ñe puemuerenotey e'ñech cohuen e'mñoteny, çhocmach yenpueny. Ñaña ñerra'm esempo huennaya ñeñtcha' yellcatene' ñachña e'ñe ahuamencat yepene'.

5

¹ Ñehua, yeñoteñ allohuen ama't erra'tsena ñeñt pa'mcha'tareter pen ñeñt corneshatyets judioneshacop, ñeñtpa' acheña, arromñaña. Ñapa' añecop acrare'tta ñach anare'ttatsa attoch eñen acheñeneshacop Yomporesho. Allempo es apueñet Yomporpa' ñach anene' o'pono Yompor pa'paclo. Allempo muetsenet payara ñeñt allo sherbeñet Yomporpa' ñach nene' eyarra po'rras allo tsa'tenana pueyochresha'chno po'chñar.

²⁻³ Ñapa'cho'ña ama huomencaye' enteno pueyoçhro tarro'mar ñapa' arromñaña ñeñto'mañña ama e'ñe pueyochreshacpayaya nenanoña eyarra po'rras; ñeñtpa' ñocpa'naña neñ allo tsa'tenana ñaña po'chñar Yomporesho. Atto ñapa'cho'ña ama huomencaye' enteno pueyoçhro ñeñto'mañña ñapa' e'ñe eñoteñ o'ch llecapretana pueyochresha' allempo es pantenet ñet ñaña allempo yeçhcatenet ñeñt sosey enten Yompor tarro'mar amaña e'ñe ñeñta neneto pueyoçhreto; çhocmaña pueseñet Yompor.

⁴ Ñaña yeñoteñ ama't e'ñe puesheñarrapa' ama eseshaye' netso e'ñe ñañeña attoch corneshat Partsocop. Ñeñtpa' Yomporña çhore'tene' ama't erra'tsena puesheñarr ñeñtcha'ña corneshatats. Atet ða ñaña Aarón, ñapa' Yomporña ne' atto corneshate't Partsocop.

⁵ Cristopa'cho'ña attecma ða ñaña ama ñaye' otatso, "ñapa' nach corneshatats." Pomporña ne' ñeñtcha' corneshatats attoch yecohuentateññañ. Yeñoteñ Pomporpa' atet cohuentateñ tarro'mar Yompor po'ñoñ ñeñt aquellcare't ahuat ñeñtpa' atet oten:

Papa' Nechemereþ, te'ñapa' o'ch neñotach acheñenasha' po'ñoçh ðapa' Nechemer nepeneþ tarro'mar te'pa' o'ch nenaþ ðach amcha'tare'ttertsa.

⁶ Po'poñ aquellcare'topa' all otererr:

Papa' attoch pecorneshaterrpa' ñeñtpa' amach huañerro ama't e'ñe erponaña. E'ñe atet o' ða'llsensare'tterra atet ñerra'm Melquisedec ñeñt corneshatate't ahuat.

⁷ Allempo allo'tsenmeñ Cristo arr patsropa' ma'yochamþsa ñañeña. Ma'yochamþsa e'ñe huomenc puellquëñsha'. Pueya'chpeñsha' enaman Pompor ñeñt atarr ahuamencatesha' attoch a'queshþach puerromueñoñ. E'ñe pomcha'na'teñoñan Pomporpa' atet och: "Amach añeye' atet peþatstono

ñeñt nemnen na; añcha'ña atet pepon ñeñt pemnen pa." Ñeñto'marña Pomporpa' e'ñe e'mñoch.

⁸ Ñehua, Cristo ama't e'ñe Yompor Puechemerpa' ñapa'cho'ña atarr muerochta, attoña e'ñe yeçhan attoch e'ñe cohuen e'mñotenan Pompor.

⁹ Atto yeçhan pue'mñoteñpa' ñeñto'marña e'ñe etsotuan ora attoch a'queshpataña, allochñapa' attoch a'queshpatterran e'ñe poctacma allohuen erra'tsencha' e'mñoterre' ña.

¹⁰ Ñeñto'marña Pomporpa' ne' ñach corneshatterrets Partsocop e'ñe atet corneshate't ahua't Melquisedec.

Ñeñt ama huomencaye' penaye pueyoçher Yomporecop çha ottena ñerra'm ematoll

¹¹ Ñeñtpa' orameñ shontemeñ nemneñeñ o'ch notaseñ. Tarraña ama'tcha' notaseñpa' atarr torrapo' o'ch neçhapatonas seyoçhro tarro'mar te'pa' o'huañ tama semne' ama't erra'tsenapa' o'ch se'mñoteñ.

¹² Sapa' ahua'toteñ same'ñenañ ñeñto'marña te'pa' socoppa' añ poctetsañ o'ch seyçhatyeseñ po'potantañeçhno ñeñt allpon shonte' señotyeneñ. Tarraña sañapa' amaña atteye'ña sepeno tarro'mar sapa' teme'ttsen sepalltena o'ch alla yeçhaterrseterr Yompor po'ñoñ ñeñt yeçhatuaset e'ñe ñenmañ ama't ñeñtpa' ama torrapahuoyaye yocop o'ch yeñoch. Sapa' ama huomencaye' sepeno seyoçher tarro'mar sapa' çha sottena ñerra'mrrate' ematoll ñeñt añach orren pachor pomosos ñeñt ama etsotenana' o'ch rran rreñets ñeñt yerren ya.

¹³⁻¹⁴ Ñaña yeñoteñ allohuen ñeñt añach pocrrañ pen pomosos, ñeñtpa' ematolla ama eñotenana' o'ch e'nan rreñets ñeñt çhocma yerren. Ñaña ñeñt ottetsa ñerra'mrrate' ematollpa' ama eñotenanoña Yompor po'ñoñ attoch pocte' eñch Yompor. Tarraña ñeñt po'ñoçh atet enten Yompor ñerra'mrrate' po'nanesha' ñetpa' e'ñech eñotenet ñeñt pocte' enten Pomporret ñaña ñeñt ama pocteye' enteno; tarro'mar ñetpa' ahua'toteñ ame'ñeret Pomporret. Ñeñto'marña ñetpa' allo'na senet etsotnomuet Yompor po'ñoñ ama't ñeñt atarr echarr ñeñtña e'ñe pocrrañ penet.

6

¹⁻³ Allo'nepa'ch yesen e'ñe yeçha'nmue' Yompor poctapña ama't ñeñt atarr echarr. Allochñapa' yepeno atet muenen ñapa' e'ñech po'n enteneyña Yompor. Ñehua, sapa' o' e'ñe seyçherr ñeñt ñenmañ yeçhataset Cristocop, attoch sequeçhpa'huerrña ñeñt atet seyeçhatyeseñ ñeñt ama a'queshpatañeyaye. Añca'yeña o' ello soctape'çherr cohuen Yomporecop çhoca'yeña o' same'ñera. O' señoterr ñaña ñeñt atet yapatarettena Yomporecop, ñaña atto çhocma yenen yot ñesheto ñeñt ame'ñatsa. Ñaña o' sa'yçhataretterra attoch yetanterra ñaña attoch esempohuañenpa' ya'craretterrach allohueney errotentcha' entyesuerrey Yompor, ñato' cohuenta' ye'pa'yen, ñato' amate' cohuenaye' yepeno. Ñeñt o' yeçhatuanmaset ahuañoteñ Cristocoppa' amachña ñeñtaña alla seserrpare'tame'terre'te. Añcha'ña allo'nepa'chña yesen eñotnomue' po'poñeçhno Yompor poctapña ñerra'm Yomporcha' yemate'.

⁴⁻⁶ Tarro'mar yeñoteñ ñerra'm esesha' o' çhapoña pueyoçhro ñeñt cohuen enten Yompor ñaña ñerra'm o' agapan Yompor ñeñt apueney attochña yapa' corretsayach tayoteñ errponohuañen pue'ntaño, ñaña ñerra'm o' agapan Yompor Puecamquëñ ñaña ñerra'm çho yomenana Yompor po'ñoñ ñaña ñerra'm eñotuanman Yompor po'huamenc ñeñt

ama ahuañañañeyaye, tarraña ñerra'm o'ch alla puerrerret, ñetpa' amach errotenot alla yoctape'chaterranete'te attoch cotape'cherret etserra cohuen Yomporecop. Tarro'mar ñeñt'acheñerpa' añ toma'ntena ñeñt'atarr muenene' o'ch alla corso'tam'perranerr po'pocheño Yompor Puechemer; attoña o' alla achm'are'tererr allo'tsa'yen shonte' acheñenesha'.

7 Ñeñt' atet petsapa' o'ch netma'ntacha ñeñt' atet pena pats. Ñehua, allempo e'ñe cohuen huapotam'psatenan Yompor pats ñerra'm o'ch chepares pa'namen narmetsočno ñeñt'cha' coshatene' pamo'mte' ñeñt' nare'tene', Yomporña chocma a'torene' ñeñt' pats esheccha' pa'namen ye'chquëtsa all.

8 Tarraña ñerra'm aña cheparsats pa'namen ajačno ñeñt' ama cohuenayaye, ñeñt'ña patspa' amach es sherbeno. Yomporshotpa' arnomare'terrach attoch a'poyare'tterra.

Atto e'ñe yeyemteño't Yompor chocmach yecuen ñeñt' o'patatyenya

9 Tarraña ama't atet notensoñ masheñeshacha' sa ñeñtes atarr nemorentena, napa' necuenes ñaña neñotenes sapa' o'ch alla sorrtatyerr e'ñe cohuenare' ñeñt' atet orrtatyen allohuen ñeñt'cha' queshperrtsa.

10 Tarro'mar Yomporpa' e'ñe pocte' es pennay. Ñapa' chocma po'ño'ch entenes ñeñt' atet se'torra'yena ñocop ñaña atto semorrenteññaña allohuen ñeñt' pueyochresha' pen Parets. Ñeñto'marña e'ñe same'ñeño't ñapa' e'ñe cohuen seyepa'yeñ allohuen masheñeshachno ñeñt' pueyochresha' pen ña, ama't teme'ttsen attecma sepena.

11 Añña atarr nemnen ama't allohuenespa' allo'nepa'chña sesen orrtatyeshnomue' ñeñt' cohuen enten Yompor, e'ñechña socsheñeshocmañen sorrtatyeshuanom allohuen ñeñt' cohuen enten Yompor e'ñe atet socsheño't chocma seyepa'yeñ ñeñt' pueyochresha' pen Parets. Attoña e'ñe seyemteño't Yompor secuen ñeñt' o'patatenya.

12 Attochña amach cha se'cllatsto Yomporecop, añcha'ña sepena saña ñeñt' atet pa'yena po'potantañečno ñeñt' pame'ñeño'tet Yomporpa' ama't erro'tuaneno'tsa'yenet ñetpa' chocma ahuanta'huaneñet. Attochña e'ñe o'patueññañet Yompor ñeñt' oteney Yompor ñeñt'cha' apuerrey.

13 Tarro'mar yapa' yeñoteñ chocmach apuerrey ñeñt' atet oteney. Ñehua, yeñoteñ Yompor ahua'tpa' atet otane't Abraham ñeñt'cha' atet perrñañ tsapa'tonet po'm'reñecop. E'ñe ñañaña pa'so'chño atet otan Abraham tarro'mar ama eñalle po'poñ ñeñt' atarr ahua'mencatesha' atet ñerra'm ña allcha' a'poc'tatan po'ñoñ.

14 Ñeñto'mar e'ñe ña pa'so'chño atet otan Abraham: “Na po'ño'chpa' atarrcha' nebensare'tam'psa'p attochña na'm'raterrna'p ñeñt'cha' pem'reneñ peperr.”

15 Ñeñto'marña Abrahampa' e'ñe pueyemteño't Yompor po'ñoñ atet oteñ ñapa' ama que'chpueñe, chocma cohuenan ñeñt' atet oteñ Yompor. Ñeñto'marña Abrahampa' po'ño'ch agapater Yompor ñeñt' atet och'e't ahua'toteñ.

16 Ñehua, yapa' yeñoteñ acheñ arr patsro ñerra'm es muenenet o'ch es otenet e'ñe po'ño'ch, ñetpa' o'ch otenet e'ñe añ pa'so'chño ñeñt' atarr ahua'mencatesha'. Ñerra'm atet penetpa' attoña eñoteñet ñeñt' ñoñetspa' o' anare'tta, o'huañcha' allo'na otnare'tanna'tnenet po'ñoño'maret.

17 Yomporpa'cho'ña e'ñe attecma nan po'ñoñ e'ñe ña pa'so'chño tarro'mar ñapa' mueneñ o'ch eñotateney amachña a'po'poñeta'm'perryeña po'ñoñ, allohueney ñeñtey o'patatena ñeñt' atet oteney o'ch apuerrey.

18 Ñeñto'mar yeñoteñ Yomporpa' e'ñe epoch eñotateney e'ñe po'ñoçh atetcha' perrnay, ñaña Yompor po'ñoñpa' ama çoye' shequënye. Ñeñto'marña e'ñe yeyemteñoñ ñapa' yeñoteñ po'ñoçhpa' a'qushpätuerreycha' ñeñt atet oteney. Ñeñto'marña yecueñ ama't allohueney ñeñtey e'nene' ña ñachña ya'qushpätuerre'.

19 Ñeñto'marña yeñoteñ ñeñt yecuen ya o'ch a'qushpätuerrey Yompor ñeñtpa' e'ñe po'ñoçh, ñeñt ama ahuañañayaye. Ñeñto'marña yeñoteñ e'ñe yeyemteñoñ ña yecamquëñña' e'ñe cohuenotsen amach errotenoñ chenquërro. Yeyemteñoñ Yompor ñeñtpa' añ toma'ntena ñeñt orrene' barco oño ñeñt otenet ancla. Allochña barcopa' amach errotenoñ chenco. Ñeñt atto yeyemteña Yompor ñeñtña anclatetsña yecamquëñecop ñaña ñeñtpa' e'ñe po'ñoçh allo e'ñe huomenc orrena yecamquëñ tarro'mar ñeñtpa' Yomporeshot anaret e'ñe allohuanen ñeñt allo'tsen Parets pa'pacillo pue'ntaño, e'ñe allohuanen allo'tsen besom allo yottampeññañet Parets po'poner. Allca'yeña anarettenaña ñeñt toma'ntenaya ancla atto ya yeyemteña Yompor.

20 Tarro'mar e'ñe all Partseshopa' allña o' çherrña Jesús ñeñt o' otamperrya allcha' a'pocatosnay e'ñe cohuen yocop Pomporesho. Allña'pa' o' corneshatuerr Partsesho. Atto o' corneshatuerr ñeñtpa' amach huañerro ama't errponaña. E'ñe atet o' allsensaretterra o'ch corneshatuerr ñerra'mrrate' atet corneshate't ahua't Melquisedec.

7

Jesúspa' atarr cohuen corneshatos Partsocop atet corneshate't ñaña Melquisedec Partsocop ahua't

1 Ñehua, te'pa' o'ch alla neyerpaterrsa ñeñt atet pe't ñeñt corneshatatset' ahua't ñeñtpa' añ pa'so'cheñ Melquisedec. Ñapa' ñeñt corneshatatset' Partsocop ñeñt atarr partsotets. Ñaña ñapa' ñeñt amcha'taretatset' all anetso ñeñt pa'so'cheñ Salem. Allempopa' correna ñaña yatañ Abraham. Parrochña Abrahampa' ahua' allcha' quellarenana' po'potantañeçhno ñeñt amcha'taretetyetsa allo'mar. E'ñe a'mchechuahuananeta'pa' huerra. Allempo err, toñopa' all pocatapueñ cornesha' Melquisedec. Allña pocteña' allenta bensare'tampsapuenan Abraham.

2 Ora ñeñt allpon yorampsan ñeñt o' quellara'huena'pa' allempoña Abrahampa' aphuanan cornesha' Melquisedec allpon ñeñt Partsocop. Allpon aphueña' ñeñtpa' ñeñt allpon otenet la décima parte. Ñeñtpa' atet ñerra'm es eñall ñeñt yechen çharrapa'ttsocma, pate'tetsña'pa' o'ch yeneñ e'ñe Partsocop. Ñehua, ñeñt so'chñetser Melquisedecpa' añ otenet "ñeñt pompor pen allohuen amcha'tareteçhno ñeñt e'ñe pocte' enten Parets." Allo'tpa' ñaña ñapa' arr amcha'tarettena anetso añ pa'so'cheñ Salem. Ñeñt anetser pa'so'cheñ añ otenet "muecheteteñsompaña" tarro'mar all amcha'tarettena ñapa' ña orrtatene' e'ñe cohuen morrentanna'teñets attoña yechenet e'ñe cohuen muechet'.

3 Ñeñt Melquisedecpa' ama eñotpahuoyayeña ñeñt pompor pe't ñaña ñeñt pachor pe't tarro'mar ama aquellcareteyaye ñeñt pa'so'cheñ. Ñaña ñeñt pa'tañneshañ pe't ñeñtpa'çho'ña ama eñotpahuoyaye. Ama't ñaña allempoteñ eñalleta Melquisedec ama't ñaña allempo rroma ñeñtpa'çho'ña ama eñotpahuoyaye. Ñapa' tarro'mar atet pe't añ toma'ntena ñeñt Puechemer pen Parets. Ñeñto'marña atto corneshaten ñeñtpa' amach huañerro ama't errponaña.

4 Señochepa'ch cornesha' Melquisedec ñapa' atarr sherben. Ama't yatañ Abrahampa' chocma es apane't Melquisedec atet ñerra'mrrate' ñeñt es yenen ñeñt Partsocop. Añ aphueñ ñeñt allpon yoram̄psan ñeñt o' quellara'huenta'. Allpon aphueñ ñeñt atet ñerra'm cho es yenen Partsocop ñeñt'pa' atet ñerra'mrrate' ñeñt allpon es yechyen e'ñe charrapa'ttsocma, pate'tetsñapa' o'ch yeneñ e'ñe Partsocop.

5 Ñehua, yeñoteñ levína'tarnesha'pa' ñeñt'ena'tarña anarettatset' judioneshacop ñeñt'cha' corneshatets Partsocop. Ñocpuetña nanña Moisés po'ñoñ, ñeñt'ña ñoñetspa' atet oten ñocpuet: E'ñe pocte' secobreñ acheñenesha'. Apa'yenetepa'ña allponapa'tets ñeñt' Partsocop, atet ñerra'mrrate' ñeñt allpon yechyen e'ñe charrapa'ttsocma, pate'tetsñapa' o'ch yeneñ e'ñe Partsocop (ñeñt'ara otenet diezmo). Ñeñt'o'marña chocma cobreñetña pamo'tsesha' ama't e'ñe ñeñt'ena'tarecmuet, tarro'mar Abrahampa' ñeñt'ara pa'to' pohueñet allohuenet.

6 Tarraña Melquisedec ama't ñapa' ama levína'tarneshayaye ñaña'pa' ello metana'tuenanet ñet tarro'mar ñapa' ama't yatañ Abrahampa' agapoñe't allpon ñeñt'cha' a'p Partsocop. Elloña bensare'tam̄penan Abraham ama't Abrahampa' o' otue Yompor ñach bensare'tam̄pse'. (Abrahampa' e'ñe pocte' enteñ tarro'mar atarr ahuamencatesha' entenan Melquisedec.)

7 Ñehua, yeñoteñ po'ño'ch ñeñt atarr nanac am̄cha'tarettetsa ñapa' ñachña bensare'tam̄pene' po'potantañe'chno ñeñt ama tama am̄cha'tarettetso atet ñerra'm ña. Ñeñt'o'marña yeñoteñ Melquisedecpa' atarr sherben tarro'mar ama't am̄cha'tare't Abrahampa' ñapa' ello bensare'tam̄peñ.

8 Ñeñt yenten arr patsro ñeñt corneshatets Partsocop, ñetpa' arromña'oto'a atet penet. Tarraña ama't arromña'oto'a atet penet chocma aguëññañet acheñenesha' ñeñt apa'yenet Partsocop. Melquisedecpa'cho' ñaña agapaye't ñeñt apa'yesete't Partsocop. Tarraña Melquisedec ñeñt atet anaret Yompor po'ñoño ñocop ñeñt'pa' atet oten ñerra'mrrate' ñapa' ama arromña'eshayaye.

9-10 Ñehua, ñato' o'ch yot Leví ama't allohuen pue'ñareshohuen, ñeta'naña agapam̄psanet Melquisedec ñeñt allpon apueñet Partsocop e'ñe allem-pocma agapan ñeñt a'p Abraham Partsocop. Ama't ama eñalletena' Leví allem-popa' te'pa' o'ch yot ñapa' e'ñe pa'to' Abraham po'chtso'tsen allem-po, allem-po pocten Melquisedec. Ñeñt'o'mar te'pa' o'ch yot levína'tarnesha' ñeñt po'taruas pene' o'ch cobran acheñenesha' attoch allpon apa'yenet Partso-cop, ñeta'netepa'tña cobra'ña allem-po Melquisedec. Ñeñt'o'marña yeñoteñ Melquisedecpa' atarr sherben, ello metana'tuenan levína'tarnesha' ñeñt corneshatyets Partsocop.

11 Ñehua, yeñoteñ ahuat allem-po apare'tta israelnesha' ñoñets ñeñt atet anaret, ñeñt'pa' añ orrtate' levínesha' ñeñt corneshatyestset' ahuat Partsocop. Tarraña añ ñoñets ñeñt orrtat cornanesha'chno ñeñt'ara levínesha'pa' ñeñt'pa' amach erro'teno't a'cohuentaterranetoña Yomporecop. Ñerra'm po'ño'ch'cha' a'cohuentatenyeñ amate' eso'mar huapoña Cristo ñeñt'cha' corneshatosets ello ñeñt atet corneshate't Melquisedec, ñeñt'pa' ama atteye' corneshatoso ñeñt atet corneshaten Aarón ñeñt'ara levína'tarnesha'.

12 Ñehua, yeñoteñ ñerra'm esempo Yomporpa' orrtaterran po'psheñeñ ñeñt'cha' corneshaterrets po'poñone't, yeñoteñ añ ñoñets ñeñt atet anaret ñeñt orrtat cornanesha' levína'tarnesha' ñeñt ñoñtsorpa'cho'ña o'ch cha po'poñetuerr.

13-14 Yeñoteñ Yepartseshar Cristo ñeñt'ña otenña Yompor po'ñoñ

ñeñtcha'ña ello corneshatosets. Yeñoteñ ñapa' ama levína'tareyaye, ñapa' judámereñtsoroñ eñalleta, ñeñt po'poñ mereñtsor ñeñtara israelena'tar. Ñetpa' ama anareteyayeto o'ch corneshatet Partsocop ñeñt atet anareta levína'tarneshacop. Moiséspa' ama esoye' sochaneto ñocpuet ama't puesheñarroña attoch corneshatet. Ñaña ñetpa' ama't puesheñarroñeta ama eseshaye' tetso altaro allofecma sherbeñet Parets.

15 Elloña yeñoteñ o' po'poñet ñeñtcha' e'ñe cohuen corneshaterrets tarro'mar allempo orrta Cristo, ñach corneshaterrets atet anarete't Melquisedec. Ñapa' ama atteyaye ñerra'mrrate' atet anarete't levína'tarnesha'.

16 Atto corneshatos Cristo ñeñtpa' ama añecpayaye attoch allo'na corneshatnen levína'tar ñeñt atet anaretenet ñocpuet. Ñapa' añecopña corneshaterr Partsocop tarro'mar ñapa' ña atarr ahuamencatesha' ñeñt ama arromñañeshayaye ama't errponaña.

17 E'ñe Cristocop eñotateney añ ñoñets ñeñt atet anare't Yompor po'ñoño, ñeñtpa' atet oteñ Pompor:

Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensare'tterra atet ñerra'm Melquisedec ñeñt corneshatase't ahuat.

18-19 Ñeñt ahuatoteñ ñoñets ñeñt atet nonaye't Moisés ñeñtcha' atet ye'pohueneñ ñeñtña te'pa' o'huañcha' ye'cua'per tarro'mar ñeñtpa' ama eñalle po'huamenc attoch ñeñtcha' ya'cohuentaterre' Yomporecop, e'ñe orrena atarr yetorra'yese't. Tarraña te'pa' o' orrterrnyaya po'poñ ñeñtña'pa' ello atarr sherben ñeñtcha' ya'cohuentaterre' Yomporecop esheccha' ye'cherr Yomporecho ñeñtcha'ña atarr yeyemtarraña te'.

20 Yomporpa' e'ñe ña pa'so'chño nan po'ñoñ allempo llesensan Cristo ñach corneshaterrets errponañohuen.

21 Po'potantañechno ñeñt corneshatyets ñeñtara levína'tarnesha' allempo acornesha'tare'tetyeset ñetpa' ama Yomporeye' nahueto pa'so'chño attoch corneshatyaset. Tarraña Cristo allempo allsensare'tta attoch corneshatos, ñeñt eñoraten Yompor Cristocoppa' ñeñtña'pa' atet oten:

Yompor o' nan po'ñoñ e'ñe ña pa'so'chño ñeñto'mar amach errotenot a'po'poñetuerrano po'ñoñ; (ñeñtpa' atet ot Cristocop): "Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensare'tterra atet ñerra'm Melquisedec ñeñt corneshatase't ahuat."

22 Ñeñto'marña Jesús'pa' eñotochtaterrnyaya po'ñoñ atto Yomporpa' a'pocataterrnyaya etserra ñeñtña atarr sherbets, ello o' metana'tuerran ñeñt atet a'pocatonaye't ahuat.

23 Ñeñt ahuatoteñ cornaneshachno ñeñtara levína'tarnesha', ñetpa' epaye' shonta'nmuat tarro'mar chocmach rromayesete't attoña o'huañcha' allo'na corneshatyenesnet. Ellopa' o'chcho' huapa po'psheñeñ ñeñtara levína'tar ñeñtcha' alla corneshaterrets. Ñeñto'mar epaye'shonta'nma ñeñt corneshatyenesnomtse't ahuatoteñ.

24 Tarraña Cristopa' errponañohuencha' corneshaterr tarro'mar ñapa' ama arromñañeshayaye.

25 Ñeñto'mar Cristopa' ña eñotene' attoch chocma a'queshpátenan allohuen ñeñt e'nene' Yompor ñerra'm e'ñe pueyemteñoñet ña, tarro'mar ñapa' chocma allo'tsen Pomporcho allecma a'pocatatennay ñeñt e'ñe cohuen yocop.

26 Ñeñtpa' e'ñeca'ye pocte'ña yocop o'ch yechen Yecorneshar ñeñt Cristo tarro'mar ñapa' e'ñe cohuen Parets, ama eñalle po'chñar ama't mamesha ñeñtcha' a'sosyatene'. Ñapa' o' sohuanerran allohuen ñeñt cotene' sosya'tsañ o' alla çherr allohuanen Yompör pue'ntañño allña partsotapretenan Pompor.

27 Ñapa' ama atteye' p̄oso ñerra'm po'potantañ cornaneshachno ñeñt ahuatoteñ. Ñet pate'tets yetpa' epaye' muetsete't payaraçhno; ñeñt eyarra po'rraspa' alloña peretnatane'tña cornaneshachno po'chñar. Ellonetpa' o'ch peretnateñet ñaña allohuen acheñenesha' po'chñar ñeñtara eyarra po'rroso. Tarraña Cristo ñapa' e'ñe parrocha shatan e'ñe ñañeña po'rros allohuenacop ochñartsocop allempo rroma yocop e'ñe ña puemnenño; ñeñtpa' attoña tsa'tuerrnaya yo'chñar Pomporesho.

28 Moisés ñeñt atet nan ñoñets ahuatpa' ñeñtpa' acheña na'yes ñeñtcha' corneshatysets atteta ñerra'mrrate' ya ñeñtey ama cohuenacmaye' es petso. Tarraña allempo met allpon charpa' allempoña Yomporpa' o' alla nerran po'ñoñ e'ñe ña pa'so'chño. Allempoñapa' nerran Puechemer ñeñtcha' corneshaterrets ñeñt e'ñe cohuenare' es pa'yets Partsocop; ñeñtpa' amach huañerro ama't errponaña. (Ñeñto'marña Cristopa' e'ñe etsotuan ñeñt nanac sherbets.)

8

Jesúspa' ña a'pocatañtertsa e'ñe etserra yocop

1 Ora allpon ñeñt o' notuanmas ñeñtpa' e'ñe po'ñoçh atet notenes: ñeñt atto atarr sherben Cornesha' Cristo te'ña ñapa' o' alla anorruerr Parets po'cohuenroñ all anen po'conañño all pue'ntañño. Allñapa' o' alla partsotuerr ñaña.

2 Allñapa' o' atarr sherba'huerr e'ñe allohuanen Parets po'prahuo all e'ñe po'ñoçh allo'tsen Yompör. Ñeñtpa' ama atteyaye ñerra'm patso'mar puerahua' ñeñt tomaten acheñ. Allpa' Yompörña tomatene'ña po'prahua' e'ñe ña pue'ntañño.

3 Yeñoteñ allohuen ñeñt corneshatets Partsocop, ñetpa' añecopña anarettenet attoch ñetcha' es apuenet Yompör ñaña ñetpa' o'ch muetsenet payaraçhno Yomporecop attoch peretnatenet po'chñaret. Ñeñto'marña Cornesha' Jesús, ñocoppa'cho'ña e'ñe pocte' o'ch es apan Pompor. (Ñeñtpa' añña apuerran Pompor e'ñe ñañeña po'chets attoch rroma yocop.)

4 Ñehua, ñerra'm ñapa' allo'tsenaraña añe patsropa' ama't mamesha amate' pocteye' enteñeña ñeñt cornaneshatyets añe patsro, tarro'mar ñetpa' añach e'ñe cohuen entenet o'ch es apueñet Yompör ñeñt e'ñe atet nanete't Moisés po'ñoñ.

5 Ñeñto'marña yeñoteñ ñeñt atet sherbenet ñet ñeñtpa' atta toma'nteñet ñeñt atto po'ñoçh Cristo e'ñe cohuen sherben Parets po'prahuo ñeñt pue'ntañño'tsen. Añach sherbenet ñeñt attema'ttetsa ñeñt e'ñe po'ñoçh atet muenen Yompör. Yeñoteñ ñeñtecma sherbete't tarro'mar ahuat allempo Moiséspa' ahuo'ch tomataneñ ñeñtcha' po'prahua' pa' Parets arr patsro, all aspeno Yompörña gate' ñeñt toma'ntenaya e'ñe ña po'prahua' ñeñt pue'ntañño'tsen. Allempoñapa' atet otan Moisés: "Po'ñoçhpa' e'ñech atet peyeçcaton ñeñtcha' neprahua' neña' añ patsro allcha' yeçhena Necamquëñ." Arrpa' allohua atet otan Yompör Moisés.

6 Tarraña Cornesha' Cristo te' atto sherberr all pue'ntañño, ñeñtpa' e'ñe po'ñoçh poctacma cohuen. Ello metana'tuenan ñeñt atet sherba'yese't ahuatoteñ cornaneshachno arr patsro. Tarro'mar te' ñeñt atet o'

a'poclaterrnay Pomporeshopa' ñeñtña e'ñe poclatma cohuen yocop, tarro'mar añ a'poclateneñetspa' pa'namen oteney ñeñtcha' atet perrnay coshateñtso.

⁷ Yeñoteñ ñerra'm e'ñe cohuen a'poclatyeñe't ñeñt ñenmañ allempopa' amach palltenañe o'ch alla a'poclaterryeterr e'ñe ello etserra.

⁸ Yeñoteñ ñeñt ahuat a'poclateneñetspa' ama e'ñeye' cohuen yenpa'ye'te tarro'mar allempo Yomporpa' ama pocleye' entane'te israelnesha'. Tarro'mar po'ñoñpa' atet oten ñeñt aquellcare't ñeñtpa' atet ot Yompor: Chapcha' allempoch nenererr po'poñ neñoñ israelena'tarneshacop ñaña judána'tarneshacop, ñeñtpa' allochña na'poclaterranet e'ñe cohuen etserra.

⁹ Ñeñtpa' amach ateyaye ñerra'm ñeñt atet na'poclatanet ñenmañ pa'tañneshañ allempo nerraneta' Egiptot e'ñe cohuen na nehuamenco't. Tarro'mar allempo ñetpa' ama ateye' poneto ñeñt atet nenanet ñeñtcha' a'poclatahuetañ. Ñeñto'mar napa'cho'ña atta na'ypo'ñanet. Ñeñtpa' atet ot Yompor allempo.

¹⁰ Allempoñapa' o' alla oterrerr Yompor ñeñtara:

Esempohuañenpa' o'ch alla na'poclaterr po'poñ ñeñt israelena'tarneshacop. Ñeñtpa' atetcha' neperranet allempo esheccha'ña nechapaterranet neñoñ e'ñe ñet pueyo'chreto, ñeñtpa' ñato' o'ch netma'ntacha atto neñoñpa' o' aquellcare'tterret e'ñe ñet pueyo'chreto ñeñtcha' cotape'chaterrahuetañ e'ñe cohuen. Allempoña po'ño'chpa' e'ñech Po'yomporer perrnet, napa'cho'ña e'ñech neyochrenesha' neperranet ñamet.

¹¹ Ñaña allempo allohuenetpa' e'ñech eñotuerrnanet ñeñtcha' atet noctape'chaterranet cohuen pueyo'chreto. Allohuenetpa' e'ñech attecma eñoterrnet pomporneshohuenet ama't ñaña añeñolleshohuen ama't ñeñt atarr sherbets ama't ñaña ñeñt ama esoye' enteñeto. Ñeñto'marña allempo ñeñt añcha'na'tpo' entetsapa' ama pallteno o'ch ye'chatan po'potantañ pamo'ts ama't ñaña pa'mo'nasheñ. Amach esesha' oterrahue'te te'pa' añ pocletsa o'ch señoter Yompor; tarro'mar allempopa' o'ch e'ñe eñotuerrnet.

¹² Ñaña napa' e'ñe nemuereño'tanetpa' ne'pretnerranetcha' po'chñaret, amach alla neyerpuerranete'te po'chñaret. Arrpa' allohua atet ot Yompor ahuat.

¹³ Ñeñto'marña yeñoteñ ñeñt atto Yomporpa' all oten e'ñe etserra o'ch a'poclaterray, ñeñtpa' tarro'mar ñapa' o' a'ypo'ñerran ñeñt attoch ñanom a'poclatyeñ. Ñaña ñeñt ahuatoteñ a'po'tateñets te'pa' o' a'ypoeñare'terra, ñeñtpa' huañerrcha'.

9

Ñeñt patso'mar Yompor po'prahua'pa' añ toma'ntateññañet ñeñt e'ñe ña pue'ntañotsen po'prahua'

¹ Ñehua, yeñoteñ ñeñt atet a'poclatanetañ ahuat Yompor ñeñtpa' echenan ñoñets anaret ñeñtcha' atet sherba'yeset Parets. Ñaña arrcha' e'ñe etsotetña ñeñt Yomporecop e'ñe ña po'prahuo, ñeñt puerahua'pa' ama't acheña tomatene' arr patsro.

² Ñehua, ñeñt puerahuatase't ahuat ñeñtpa' shetamtsopo'. Ñeñt tomatenet ñehuapo'tpa' ñeñt otenet Partsopahuesho allo'tsen all orratenet huerare ñaña allo'tsen mesa allecma nenet pan Partsocop.

³ Allohuanen allohua ayottam̄psaret besmo po'ppahueñ shetamtsopo' ñeñt otenet, E'ñe Partsopahuesho Po'ponro.

⁴ Allñapa' allo'tsen altar, enoññapa' allecma a'crratenet tsach puese' ñeñt atarr eñmosařtetsa Partsocop; ñeññña altar eno'marpa' e'ñe cohuen orotatena. Ñaña allohuanen po'ppauño allo'tsen tsapot; ñeñtpa'cho'ña eno'marpa' orotaten. Allña año'tenet mapuettall allo aquellcareř Yompore po'ñoñ ñeñt a'pocstat Yompore ahuat acheñenesacop. All año'tenet ñaña pajo' orotaten, allña esha'taret coñe't maná ñaña tsapoto allo'tsen Aarón po'carr ñeñt tapallatse't ahuat.

⁵ Tsapoto enoř all ten epsheña mellañoñeñma't ñeñt ayečcataret ñeñt otenet querubiñ ñeñt toma'ntenaya Parets po'partsoña ñeñt chorrets all. Querubiñ pa'pa'yopa' alloña ca'matenan tsapot enoř alloř e'tam̄penet tsapot. Allñapa' allecma peretnanete't Yompore po'chñaret. Ñehua, te'pa' o'ch noterrser po'poñečno ñeñt pa'namen atma'ntatař all.

⁶ Allpa' pa'namen año'tareřetyetsa ñeñt all puerahuo. Ñaña ñeñt cornaneshatyets Partsocoppa' chocmach be'tosyenet ñeñt all puerahuo ñehuapoř, allcha'ña etsotayenet ñeñt atet anaret Partsocop.

⁷ Tarraña ñeñt allohuanen po'ppahueñ Parets po'poner ama eseshaye' be'tetsoña all. Allpa' añach be'tets pueseñarr cornesha' ñeñt pa'mcha'tareřer pen po'potantañ cornaneshachno. Ama't ñapa' pařer charpa' e'ñe parrocha be'ten. Ñaña chocmach anman eyarra po'rras alloch peretnenanet Yompore po'chñaret. Ñeñtpa' e'ñe ñocpa'na po'chñarecop ama't ñaña allohuen acheñenesha' po'chñarecpuet.

⁸ Ama't ñeñt ñehuapořetsen puerahua' allecma sherba'yen cornaneshachno ñeñt atet anaret Partsocop, tarraña e'ñe allohuanen Parets po'ponro añach be'tets ñeñt nanac corneshatets e'ñe ñapueř. Ñeñto'marña te'pa' Parets Puecamquēñña yeñotatene' atto ama atoram̄psareřeyaye allohuenacpay attoch yečhapanpeña Yompore all partsoten.

⁹ Ñeñt allempopa' aña toma'ntena ñeñtcha' atet cohuen p̄osa tsapatonet Cristo allempoch huapa; atet ñerra'm te'ña o' huapa Cristopa' o' etsotua. Tarro'mar allempo all Parets po'prahuo ama't es apuenetañ Yomporecop ñaña ama't es muetsayenetañ Yomporecop, ñeñtpa' arepa't a'cohuentatenanoña añ poc̄tařña ñeñt atet sherbenayeñ Yompore.

¹⁰ Tarro'mar ora atet anareřtet allempo ñeñtpa' añeçpa sherben ñeñt e'ñe po'chtsocpueta ñeñt atet ñerra'm ñeñtcha' rrenet ñaña ñeñtcha' orrenet ñaña atto apa'yeseř Partsocop. Ñeñt orapa' añeçpa sherbe't attoch a'pocstatenet po'chets Partsocop. Ñaña ñeñtpa' mameçpa anareřta esempohuañeñña Yomporepa' orrtaterrnaycha' po'poñ ñeñtcha' ello nanac yesherberre'.

¹¹ Ñeñtpa' e'ñe tarremphua e'ñe etsoterra allempo huapa Cristo, ñeññña orrtatose' ñeñt ello nanac sherbets te' yocop. Ñapa' atto corneshatospa' o' alla be'tosuerr allohuanen Partsopahuesho all pue'ntaño ñeññña ello nanac sherbets Partsocop. Ñapa' e'ñe metana'tuerran ñeñt sherba'yestse't ahuat puerahuo Partsocop ñeñt tomaten acheñ arr patsro. Tarro'mar ñeñt Parets po'prahua' ñeñt pue'ntaño'tsenpa' ama acheñeye' tomatenaye ñaña ñeñtpa' ama aña patsroye' atomatařeyaye.

¹² Ñaña Cristo allempo be'tosuerr allohuanen Partsopahuesho ñeñtpa' e'ñe parrocha be'tosuerr all pue'ntaño. Ñaña ñapa' ama añaeye' anmo eyarra po'rras — cabra amapa' huacshetoll. Ñapa' e'ñe ñañeña po'rras pomhuerr. Ñaña ñapa' e'ñe parrocha pomanña po'rras all ama't allohuen pa'namen

acheñeneshacop po'chñarecop. Attoña e'ñe cohuen a'pocatonay attotcha' a'queshpaterrey, ñaña ñeñtpa' amach ahuañaña'tterro ama't errponaña.

¹³ Ñehua, yeñoteñ ñeñt atto shellcapechyesane't cornesha' acheñenesha' cabra po'rraso amapa' huaquësh po'rraso amapa' huacshetoll po'tsapñero ñeñt a'poyenet altaro, ñeñtpa' attoña a'pocatenan ama't erra'tsena acheñer po'chets Partsocop, ama't erroteno a'sosyatena Partsocop.

¹⁴ Tarraña ñeñtpa' e'ñe po'chtsochaya a'pocatarettenet Partsocop. Tarraña allempo ashataretta Cristo po'rras, ñeñtpa' ellonet añecopña nanac sherbos attoch a'pocaterrnay ama't ñeñt atet yoctape'chyen yeyochro. Ñeñto'marña allempoteñpa' amach alla yeyemtererro ñeñt atet yeyeçcatyen arr patsro ñeñt ama a'queshpatañeyaye. Añcha'ña e'ñe cohuen yesherven Yompor ñeñt ama arromña'teshayaye. Cristopa' ñeñto'marña ello atarr sherbeney atto pomuerra ñañaña o'ch rroma yocop ama't ñapa' ama eñalle po'chñar ama't e'ñe mamesha. Ñeñtpa' e'ñe Yompor Puecamquëño atet p̄osa; ñeñtña Camuecñetserpa' ama ahuañaño.

¹⁵ Atto Jesucristopa' ña eñosets yocop attoch a'pocatuerrnay e'ñe cohuen etserra. Tarro'mar allempo rroma Cristo ñeñtpa' añecopña sherben attoch peretna'huerrnay yo'chñar ñeñt o' allpon yepohuen ahuatoteñ allempoteñ yocta'nom ñeñt ñanom a'pocatañtatsañ. Allochñapa' allohueney ñeñtey o' ya'hua'ñare'tterra o'ch yame'ñera, ñapa' aphuerreycha' ñeñt o'patatenya ñeñt atet oteney attochña yapa' corretsayach errponohuañen.

¹⁶⁻¹⁷ Ñehua, yeñoteñ arr patsro çhocma eñall puesheña'tets acheñ ñeñt atet petsa o'ch quellca'nman ñoñets all oten ñeñtcha' allpon puechat-sreçhno apa'nman pamo'tsesha' ñerra'm esempoch rroma. Tarraña allempo orameñ correna ñeñt quellquëne' e'ñe ña po'ñoñ, añña ñeñt o'patatyenapa' amach erroteno amnataretto o'ch yoret e'ñe allempocma. Tarraña ñerra'm esempoch eñoteñet po'ñoçh o' rromuen ñeñt o'patatenahuet, allempoñapa' aparetetyesetcha' ñeñt allpon o'patataretetyenet. (Ñeñto'marña yapa' yeñoteñ allempo rroma Cristo atto ashataretta po'rraspa' ñeñt allpon o'patatyenya yama ñeñtpa'çho'ña e'ñe yocma.)

¹⁸ Ñeñto'marña ahuat allempo ñenma't a'pocatatete't Partsocop, ama't allempopa'çho'ña o'ch muetset eyarra, po'rrasoñapa' allochña shellcata'tyeset. Ñeñtpa' attoña e'ñe a'pocatatete'tña po'ñoñ.

¹⁹ Ñehua, Moiséspa' atet p̄a allempo. E'ñe eñotatuan acheñenesha' ora allpon atet oten Yompor po'ñoñ ñeñtcha' atet pet, allempoña ñapa' o' yoran carrnero pue'ch ñeñt e'çhomare't tsama'to ñeñtña' huanquë' hisopoch puetacro, allotñapa' yoran ñaña huacshetoll po'rras ñaña cabra po'rras, tsech epuet oñ. Allña e'çhoman carrnero pue'ch ñeñt huanquën tsachp̄o allempoñapa' shellcata'tan allo libro ñeñt all anaret Yompor po'ñoñ, attoña shellcana'tam̄pesuan ñaña allohuen acheñenesha'.

²⁰ Allempoñapa' atet otan acheñenesha': "Añ po'rras ñeñtpa' alloña Yomporpa' a'pocatenas ñeñt atet nenan po'ñoñ socop ñeñtcha' atet sepa."

²¹ Ñaña attecma p̄an ñaña puerahua' ñeñt shetamtsopo' o' shellcapo'ch ñeñtara errasatso. Ñaña ora allpon coymeçhno ñeñt allo'tsa'yen allecma sherbeñet Parets, ñeñtpa'çho'ña e'ñe shellca'ta'tue.

²² Ñehua, yeñoteñ ñeñt atet oten ñoñets ñeñt atet anaret, allohuen es po'rrasochña e'ñe a'cohuentatenet Partsocop. Allohuen pa'namen ñeñt allo'tsa'yenpa' e'ñe autsa allohuen a'cohuentatue atto ashellcana'taretta eyarra po'rraso. Ñeñto'marña yeñoteñ ñerra'm ama es muetseneto attoch

shatatoñet po'rraspa' amach eseshaye' aḡretnarettetso po'chñaret.

Atto amtsaretta Cristo yo'chñarecoppa' attoña e'shohuerrnaya yo'chñar

²³ Ñeñto'marña yeñoteñ añe patsro puerahua'pa' eyarra po'rrasoña a'cohuentatyenetña allohuen ñeñt' Partsocop. Ñeñt' puerahua' añ patso'marpa' añ toma'ntena Parets po'prahua' ñeñt' pue'ntañotsen, ñeñtpa'cho'ña attecma errasatso a'cohuentatarettena allohuen ñeñt' allpon allo'tsa'yen. Tarraña ñeñt' rromats Parets po'prahuacop ñeñt' pue'ntañotsen ñeñtpa' añ muenen errasats ñeñt' ello atarr cohuen sherbets.

²⁴ Ñeñto'marña Cristopa' ñeñtecopña rroma. Tarro'mar Cristopa' ama arreye' be'tosuerro ñeñt' patso'mar puerahua' ñeñt' ye'chcaten acheñ ñeñt' atta toma'ntenaya Yompor po'prahua' ñeñt' pue'ntañotsen. Allña be'tosuerrña Cristo Parets po'prahuo ñeñt' pue'ntañotsen ñeñto'marña te' ñapa' allo'tsen e'ñe allohuanen Yomporesho allña torra'huerra cohuen yocop.

²⁵ Ñaña Cristopa' ama atteye' ḡoso atet pena cornaneshachno ahuaḡ. Ñetpa' chocma be'tosete't allohuanen Parets po'ponro e'ñe pate'tets char. Ñaña errasats ñeñt'cha' anenet o'pono ñeñtpa' ama ñetoyaye po'rraset.

²⁶ Tarraña Cristopa' e'ñe parrochepa anaret o'ch pomuerra ñañeña o'ch rroma attoch ashataretta po'rras. Tarro'mar ñerra'm ama atteye' anareteñepa' chocmate' rromame'tañ ama't tarrempoteñ allempoteñ e'ñe errte' aye'chcatarettsa pats. Tarraña ñeñtpa' ama atteye' ḡo. Ñapa' añecopña huapa attoch e'ñech parrocha amtsaretta allohueney yo'chñarecop attoch ñachña yahuanmanḡperre' yo'chñar. Ñeñto'marña huapa allempohuach cherr yet allempoch mellapoterrmocha.

²⁷ Yeñoteñ ama't allohueney acheñey chocmach yerromuen. Tarraña e'ñech parrocha yerroma allempoñapa' o'ch huerrnaya attoch Yomporpa' eñotatyesuerrey e'ñe errotencha' entyesuerrey – ñato' e'ñech cohuen entyesuerrey amapa' ñato' amach cohuenaye' entyesuerrye.

²⁸ Attecma ḡa ñaña Cristo e'ñe parrocha rroma allempo amtsaretta allohuen ochñartsocop. Attoña ñapa' e'ñe ahuanmanḡperrey shontey allohueney yo'chñar. Ama't amtsarettañ ochñartsocop, tarraña Cristopa' allach orrtterra po'pocheño. Allempoch huerra po'pocheño'pa' po'cohuenño amach añecpaye' huerro o'ch alla rromuerrerr ello ochñartsocop. Añecopcha'ña huerra po'pocheño o'ch e'ñe a'qeshḡatuerran allohuen ñeñt' chocma cohuen e'ña.

10

¹ Ñeñto'marña yeñoteñ Moisés po'ñoñ ñeñt' atet anaret ahuaḡ judioneshacop, ñeñtpa' ama e'ñeye' cohuenteno ñeñt' atet cohuentena te' ñeñt' orrtatosnay Cristo. Añ ñoñets ñeñt' atet anaret ahuaḡ ñeñtpa' añ toma'ntena ñeñt'cha' e'ñe po'ño'ch cohuenetuerrtsa ñeñt'cha' orrttertsa tsapaḡonet. Ñeñto'marña añ ñoñets ñeñt' atet anaret ahuaḡ ñeñtpa' amach errotenoḡ a'cohuentatanoña acheñenesha' ama't puesheñarra ñeñt' muenenayeñ o'ch yemtenanañ Yompor. Ama't chocma muetsa'yeseḡañe't eyarra'chno po'chñarecop e'ñe atet oteneñ añ ñoñets ñeñt' atet anaret, ñeñtpa' amach errotenoḡ e'ñe a'cohuentatanoña acheñenesha'. Ama't pate'tets char chocma muetsa'yeseḡañe't ñeñt' Yomporecop, ñeñtpa' ama e'ñeye' a'cohuentatane'teña acheñenesha' Yomporecop ama't puesheñarra ñeñt' muenenayeñ o'ch yemtenanañ Yompor.

² Ñerra'm e'ñe po'ño'ch a'cohuentatenaneñña acheñenesha' eso'marte'ña o'ch alla muetsereterrña po'poñe'chno shonte' eyarra. Ñerra'm po'ño'ch

a'cohuentatenaneñ acheñenesha' ñeñt atet cotape'chyene' sosya'tsañ pueyoçhreto, eso'marte'ña alla yerpapa'taterranete'tña po'chñaret ñeñt pueyoçhro'tsa'yenet.

³ Tarraña po'ñoçh epaye' yerpapa'taterranete'tña po'chñaret. E'ñe pate'tets char allempopa' o'ch alla muetserreterr eyarraçhno añecop ñeñt atto yerpapa'taterraneterr po'chñaret.

⁴ Ñeñto'marña yeñoteñ eyarra po'rraspa' amate' errotenot ahuanmanperryeña yo'chñar ama't toro po'rras amapa' cabra po'rras.

⁵ Ñeñto'marña Cristopa' atet otosan pompocor allempo acheñetos arr patsro ñeñtpa' atet ot:

Pa te'pa' ama añeye' pemneno eyarra ñeñt amtsarettetsa p̄ocop ñeñtcha' atarr p̄ocshatene'. Ama't ñaña ñeñt es apa'yenet p̄ocop. Ñeñto'marña nocop te'pa' o' peyeçhcatuerrnan nechets añ patsrecop ñeñt e'ñe atet pemnen p̄a, e'ñech nechsoñ nesherb̄osep̄ attoch e'ñe cohuen nocshatenep̄.

⁶ Po'ñoçh te'pa' ama añeye' atarr p̄ocshatenaye atto chamuenet eyarra p̄ocop amapa' allempo muetsanatenet eyarra ñeñt po'chñarecpuet.

⁷ Ñeñto'marña Nompore te' napa' o'ch notap̄: "Napa' añecopña nohuapa arr patsro attoch netsotosnañ ñeñt atet pemnen p̄a, ñeñt e'ñe atet anaret peñoño nocop." Arrpa' allohua atet otan Cristo pompocor.

⁸ Ñehua, ñeñt atet ot Cristo arr ñeñtpa' atto Yomporpa' ama añeye' mueneno eyarra ñeñt amtsarettetsa ochñartsocop attoch coshateñet ña. Ama't ñaña ñeñt es apa'yenet ñocop ñeñtpa'çho'ña ama ñeñteye' e'nenno ñeñtcha' coshatene' ama't ñeñt achamaret ñocop ama't ñaña ñeñt amtsarettetsa ochñartsocop. Ñeñt ora añeçhno ñeñt atet nane't Moisés po'ñoñ atetcha' es apueñet Yompor, te'ña ñeñtpa' ama coshatenano Yompor; atet oten Cristo.

⁹ Elloña ñapa' atet oten, "Napa' añecopña nehuapa Nompore, o'ch netsotosnañ ñeñt atet pemnen p̄a." Ñeñtpa' añ eñotatosey, ña a'huañatose' ñeñt ahuañoteñ atto muetsete't eyarra po'chñarecop. Attoña ñapa' nosan po'ñoñ ñach rromosets yo'chñarecop.

¹⁰ Ñeñto'marña Jesucristopa' pomosa ñañeña yo'chñarecop. Ama't parrocha rromapa' ñeñtpa' allohuenacpay. Atto ñapa' etsotenan ñeñt atet muenen Pompocor yañapa' e'ñe a'cohuentaterrey Partsocop.

¹¹ Ñaña ñeñt cornaneshatyets judioneshacop ñet pate'tets yetpa' çhocma tenet all altaro allotecma sherbeñet Yompor allecma muetsanaterretañe't eyarraçhno ñeñt ochñartsocop. Tarraña ama't amtsarettenañpa' amach errotenot ahuanmanoña ochñarets.

¹² Tarraña Jesucristopa' e'ñe parrocha pomuerra e'ñe ñañeña ñach amtsaretterrtsa ochñartsocop. Ama't parrocha rroma ñeñtpa' allohuena-cop e'ñech errponohuañenacop. Allempoñapa' o' alla anorruerr Pompocor po'cohuenrot allña partsotuerr.

¹³ Alotña cohuenan allohuen ñeñt e'moñe'tene' esempohuañenpa' a'mchechatuerranetcha'.

¹⁴ Jesucristo allempo pomuerra ñañeña, ñapa' e'ñe etsotatuerrnay attoch e'ñe a'cohuentaterrey Partsocop. Ama't parrocha rroma ñeñtpa' e'ñe allohuena-cop ama't ahuañoteñ errponohuañenacop añecop ñeñt pueyoçhresha' pen Parets.

¹⁵⁻¹⁶ Ama't Yompor Puecamquëñ ñeñtpa'çho'ña eñotoçhtatennay tarro'mar ñapa' añ eñotatyet ñeñt atet otyet Yompor, ñeñtpa' atet ot:

Esempohuañenpa' napa' o'ch na'pocatterranet po'pocheño. Ñeñtpa' atetcha' neperranet. Allempo esheccha'ña nechapatterranet neñoñ e'ñe pueyo'chreto. Ñeñtpa' ñato' o'ch netma'ntacha atto neñoñpa' o' aquellcaretterret e'ñe ñet pueyo'chreto ñeñtcha'ca'yeña cotape'chaterrahuetña e'ñe cohuen.

¹⁷ Ellonetpa' atet ote't allempo:

Napa' amach alla neyerpuerranete'te po'chñaret. Ama't ora atto atpare'tnete'tpa' amachña ñeñña alla neyerpuerranete'te.

¹⁸ Ñeñto'marña yeñoteñ atto Yomporpa' o' peretna'huerrnay yo'chñar amach alla yerpuerrnaye'te ñeñto'marña amach alla es yemtserre'te ñeñt yo'chñarecop.

Te'pa' ama es palltetso yocop attoch e'ñe cohuen ye'ñorana'tera Yompor Parets

¹⁹ Ñeñto'marña masheñneshacha' ñaña no'chaneshacha' te'pa' yeñoteñ e'ñe pocte' yocop e'ñe ya ye'chore'teño't Yomporpa' e'ñech yeyemteña e'ñe atet ñerra'm yamo'ts yeyemtena e'ñe allame'tets. Ñeñtpa' añ toma'ntena ñerra'mrrate' o' yebe'terr e'ñe allohuanen Parets po'ponro all po'prahuo atet pe't ahua't cornaneshá' ñeñt be'tostse't ñapue't ñeñt anmaye't eyarra po'rras all, tarro'mar te'ña atto o' rroma Jesucristo yocop, po'rrasña ñeñtña e'ñe ya'pocatterra'ña ya attoch ye'ñorana'tera ama't ñeñt atarr Parets.

²⁰ Po'ño'ch Jesucristo e'ñe ña po'chtso't orrtaterrnay po'poñ etserra attoch yapa'cho'ña o'ch ye'chapanmpera Yompor attoch ye'ñorana'tera. Ñeñtpa' e'ñe cohuen attoch yeyemteña e'ñe po'ño'ch. Ñeñtpa' añ toma'ntena ñerra'mrrate' Cristopa' o' chapatterrey allohua yottampeññañet besmo Parets po'ponro all po'prahuo.

²¹ Jesús te'pa' yeñoteñ ñeñtña atarr Yecorneshar yepen ñeñt chets Yompor pa'paclo, ñapa' allña amcha'taretetuerra Yomporepahuo añecop allohuen ñeñt pueyo'chreshachno pen Parets.

²² Ñeñto'marña e'ñe yeyemteño'tpa' amach yemcha'naño'ayaya ye'chore'teñe. E'ñepa'chña yeñmañesha' yeyo'chrocmañen ye'chore'teñ, tarro'mar Cristo po'rrasoña o' a'cohuentaterrnay yeyo'cher atto te'pa' o' e'ñe cohuen yocape'chyerr, amachña allo'na yerpapa'tatnenye yo'chñar. Ñeñtpa' añ toma'ntena atto yapa' e'ñe cohuen apatare'tey oño ñeñt pocetetsa Partsocop.

²³ Chocmuepa'chña yecueñña ñeñt yeyemtena allochñapa' a'queshpaterreycha', amuepa'chña cha ye'charrtatatstenoña yeyo'cher tarro'mar Yompor ñapa' chocmach a'pocatterrnay po'ñoñ ñeñt atet otene.

²⁴ Ñaña añepa'chña e'ñe cohuen ye'nen attoch yeyenpannena allohueney allochñapa' attoch e'ñe cohuen yeychen morrentanna'teñets ñaña e'ñech cohuen es yeyenpannena.

²⁵ Ñaña chocmuepa'ch yesen all chocma yap'chena e'ñe yame'ñeño't Cristo. Amachña atta yepatsto ñeñt atet pena po'potantañ ñeñt ama huetso allecma yap'chena. Añcha'ña atet yepena allempo yap'chena e'ñech cohuen yocape'chatannena Yomporecop. Elloña te'pa' chocmach yap'chena ñeñt nanac cohuentetsa yocop tarro'mar yeñoteñ te'pa' o' cherrmoch allempoch huerra Yepartseshar Cristo.

²⁶ Tarro'mar ñerra'm o' yeñoter po'ño'ch Cristo rromats yocop attoch a'queshpaterrey ñaña ñerra'm ñeñto' yame'ñerra tarraña ñerra'm allo'na yesen ochña'tare'tnomuets e'ñe ya yemneñño'tpa' allempopa' amach eñalleña ñeñtcha' rromuerertserr po'pocheño ñeñtcha' yetsa'terroyerr ello yo'chñar.

27 Ñeñt allo'na sets ochña'tare'tnomuets añach o'paterrahuet coñcheñets ñeñt atarr am'cha'nochtetsa ñeñtara Yompor po'yorochenña ñeñt tso'pa' e'ñech e'nuerran allohuen ñeñt e'moñe'tene' Yompor.

28 Ñehua, ahuat ñerra'm eñall ama't puesheñarra ñeñt atpare'taye't Moisés po'ñoñ, ñerra'm eñall epsheña amapa' ma'psheña ñeñtcha' a'metanpene' ñeñtña atparña'pa' ahuo'ch muetse allohuen acheñenesha'. Ama't puesheñarrapa' amach eñalleña ñeñtcha' morrentaya.

29 Elloña ñeñt ama esoye' entenaye Yompor Puechemerpa' atarrcha' nanac a'coñchatare'tterret. Elloña po'rras ñeñtcha' a'cohuentaterrahuetañ Partso-cop ñeñt'pa'cho'ña ama esoye' enteñeto ama't ñeñt errasatser ñeñt etserra a'pocatañtetsa. Elloña ama't Yompor Puecamquëñ ñeñt'pa'cho'ña chach sasare'teññañet ñeñtara Puecamquëñ ñeñtcha' morrenterrahuetañ attoch chorrerranetañ. Ama't seño'teñña elloña atarrcha' nanac acoñchatare'tterra ñeñt atet atarr tsena'tene' Yompor Puechemer.

30 Tarro'mar yapa' yeñoteñ Yomporña atet otets: "Napa' ñeñt'ench'a' coñchaterahuet, napa' ñeñt'ench'a' tsa'taterrahuet." Elloñapa' atet oten Yompor: "Napa' ñeñt'ench'a' otteñe'cherrahuet attochña necoñchatteranet ama't ñeñt neyochreshachno nepeneñ."

31 Ñeñto'marña yeñoteñ atarr yoro'cheno'tsen ama't allohuen ñeñt aña o'patenaya ñeñt po'yorochenña pen Yompor ñeñt ama arromña'feshayaye.

32 Tarraña te'pa' o'ch notas, o'ch alla seyerpuerra atet seña ahuañmo'cha allempo e'ñe errtes eñoterre' po'ño'ch Cristepa'tña a'queshpatañ. Ñeñt'pa' allempo ñanom a'puetarsam'psare'tta seyo'chro socta'pña. Allempopa' ama't atarr amuro'chtatare'teseñ sañapa' e'ñe sa'huan'ta'huanom pa'namen topateñtso'chno ñeñt setantyesoya; ñeñt'pa' e'ñe atet ñerra'mrrate' sapa' cho atarr se'cllarena.

33 Patanta'ttsospa' atarrca'ye che'tatsetasete't e'ñe allo'tsa'yen allohuen acheñenesha'. All atarr sa'muro'chtatare'tta. Elloña ñerra'm esempo muro'chtateñet po'potantañ samo'tsesha' sapa'cho'ña chocmach semue-ro'chtapretanete't.

34 Po'ño'ch ñeñt arrmanatare'ttatse't o'ch ayottam'psare'ttet, sañapa' e'ñe sellcapreteño'anetpa' chocmach e'ñe cohuen seyenpuenanet. Ama't allempo puerrata'm'psatsre'tase't ñeñt se'moñe'tyesaye't, sañapa' e'ñech socsheñesha' sa'huantenanet. Tarro'mar sapa' seño'teñ o' secherr ento ñeñt atarr sherbets ñeñt ello metana'tuene' atto sherbenes sechatser, tarro'mar ñeñt'pa' ama aptsaño.

35 Ñeñto'marña masheñneshacha' o'ch alla noterrser, amach alla se-que'chpatsterrñañe ñeñt atto atarr seyemteña Cristo tarro'mar Yomporpa' ñachña atarr cohuen setsa'terraya.

36 Te' sapa' aña sepalltena attoch e'ñe aco'pa sa'huan'ta'huanom ñeñt atarr echarr sentyen, attochña allo'nach sesen pa'yenomue' ñeñt atet muenen Yompor, attochña Yomporpa' apuerrescha' ñeñt e'ñe atet otenes.

37 Tarro'mar yeñoteñ Yompor po'ñoñ ñeñt aquellcare't ahuatoteñ ñeñt'pa' Cristocop atet oten:

O' mameshamerra o'ch orretuerra ñeñtcha' huerrtsa, te'pa' amach alla atomato pue'ntaño.

38 Tarraña Yomporpa' atet oten:

Ñeñt e'ñe pocte' nenten na ama't erra'tsena acheñer tarro'mar e'ñe pueyemteño'ten na, ñeñt'ña'pa' corretsach. Tarraña ñerra'm esesha' nepuerram'perraya ñapa' o'huañcha' allo'na coshatenen.

39 Tarraña yapa' ama atteyayye ñerra'mrrate' ñeñtcha' puerram̄perraya Yompor ñeñtcha' chenquerrtsa. Yapa' añeyca'yeña ñeñteycha' čhocma yemterraya Yompor ñeñteycha' a'queshpatarettertsa e'ñe yecamquëñohuen.

11

E'ñe yeyemteñoť Yomporpa' e'ñech cohuen es yetsotayen ñocop

1 Ñehua, allempo po'ñočh yeyemteña Yompor e'ñe yeñoteñ čhocmach apuerrey ama't esempo ñeñť atarr yecuen te' e'ñe yenamueñoť. Ama't ama yenteña' e'ñe yeyočhroña yeñoteñ ñeñť yecuen te' po'ñočhpa' apuerreycha' ama't esempo.

2 Yatañneshañ ahuatpa' atarr yemuetyesete't Yompor. Ñeñť atto yemue-tyesyete't Yomporñapa' e'ñe pocte' entyesanete't.

3 Ñaña ya e'ñe yeyemteñoť Yompor te'ñapa' o' yeñoter allpon ñeñť yentyen arr patsro ñeñťpa' e'ñe po'ñoñoña yečhca'hua. Allempopa' ama't coñe'ta ama es orrtetso ñeñťcha' pa'namen yečcatyes ñeñť atet yentyen te'.

4 Ñaña Abel ahuat atto yemtane't Yompor, ñapa' apan Yompor ñeñť atarr coshate'. Pa'mo'nasheñña Caín ama't apaneñ ñaña Yompor, ñeñťñapa' ama coshatano Yompor. Ñeñto'mar Yomporpa' e'ñe cohuen agapan ñeñť aň Abel; attoña Yomporpa' eñotatanet e'ñe pocte' entapretan Abel. Tarraña Abel ama't rromañpa' atto atarr yemtane't Yompor, ñeñťpa' e'ñe teme'ttsen eñotateney ñeñť cohuen enten Yompor. Ñeñťpa' attema't ñerra'mrrate' Abelpa' teme'ttsen serrpare'tateney cohuen.

5 Ñaña ahuat Enoc ñeñť atarr cohuen yemtaye't Yompor, ñapa' e'ñe ora aner Yompor pue'ntaño e'ñe beñnaťoť. Ñapa' ama čhoye' rromo arr patsro. E'ñe atta a'chencach pamo'tsesha' ama esesha' enterraye tarro'mar Yompor erraya'. Ñehua, allempo ama a'tapatera' Yompor pue'ntaño ñapa' atarr cohuen coshatane't Yompor allempo aña patsro'tsen, tarro'mar ñeñťpa' atet oten Yompor po'ñoñ ñeñť aquellcareť.

6 Ñerra'm ama yeyemteñe Yompor amach erroťenoť yocshateñe ama't e'ñe mamesha. Tarraña ñerra'm esesha' muenene' o'ch yemteret ñamet Yompor añ poctetsa o'ch otet po'ñočhpa' Yomporpa' eñall, ñaña eñoteretepa'chña Yomporpa' čhocmach coshaterran allohuen ñeñť e'nene' ña.

7 Ñaña ahuat Yomporpa' eñotatan Noé ñeñťcha' atet e'chořan oñ tsapaťonet. Allempo atet otan Noé ama't mameshapa' ama huate'te. Tarraña Noéñapa' e'ñe yemtenana atet och Yompor allempo. Ñañañapa' yečcatuan po'compuer allochñapa' attoch a'queshpatan pamo'tsesha'. Atto yečcatan po'compuer e'ñe ñapueť e'ñe pueyemteñoť Yomporpa' eñotataneñña allohuen po'potantañečhno pamo'tsesha' ñetpa' coñchatuerranetcha' Yompor. Ñeñto'marña e'ñe pueyemteñoť, Yomporñapa' e'ñe pocte' entenan Noé.

8 Ñaña ahuat Abrahampa' allempo chore'ch Yompor o'ch mueñe allapař allcha' apuer pats, ñañañapa' e'ñe pueyemteñoť Yompor e'ñe cohuen ame'ñya. Allempoñapa' sa'nman pa'netser o' ahuo' ama't ñapa' ama eñoteñe allcha' ta tarro'mar ama puentare all sen.

9 Allempo čhap anetso all oteñ Yompor ñeñťcha' apuer esempohuañen, allñapa' all yečhosa e'ñe pueyemteñoť Yompor. Tarraña ña allpa' atta yečhosa atet ñerra'm ahuañña. Ama't ñeñť patspa' ñeñť o'patateña Yompor ñeñťcha' apuer, tarraña allempopa' ama apueña' Yompor ñeñť atet oteñ. Ñeñto'mar ñapa' atta shetamtsopo'tos all manatoset. Ñaña ama't ñeñťcha'

po'mñreneñ perr Isaac ñaña Jacob ñetpa'cho'ña attera yeçherret shetamt-sopahuo. Ñetpa'cho'ña atfa cohueñet esempohuañencha' apuerranet Yompor ñeñt patser e'ñe atet otenanet ñamet.

¹⁰ Abraham po'ñoçhpa' aña cohuen ñeñt Yompor pa'netser ñeñt e'ñe echarr aþaret tarro'mar Yompor yeçcatene' e'ñe echarr peñ.

¹¹ Puetapor Sarapa'cho'ña e'ñe pueyemteñoñ Yomporpa' cheyore'terr ama't ñapa' o' atarr po'nme'ten. Ama't o' meten allempo atfo cheyore'ten coy-anesha' e'ñe pueyemteñoña Yomporpa' ña ahuamencat pe' attoch cheyore't. Tarro'mar ñapa' atarr ayemuetpo' entenan Yompor atet oteñ.

¹² Atfoña e'ñe Abrahamota atarr mererra shonte' acheñenesha' nanac ama't ñapa' o' atarr nanac po'nme'ten allempo. Allpon acheñenesha' ña e'ñe po'mñreneñ þohuenahuet ñeñt allpon shonte' nanac atet ñerra'mrrate' ora allohuen rantoçhno ñeñt ento'tsa'yen ñaña atet yenteññañ sa'p po'mñer ñeñt ama e'ñotuapahuoyaye.

¹³ Ñeñtet allponet atarr yemuetnomuet Yompor ama't allempo Yomporpa' ama apuenaneta' ñeñt patser ñeñt o'patatanete't. Tarraña ama't ama aparetterreta' ñeñt patser ñeñt o'patatanete't Yompor; ñetña' pueyemuet-neñoñet Yompor eñoteñet ñetpa' aparetterretcha' ñeñtcha' po'ñoçh pa'netser perret. Ñeñtcha' atarr coshaterrahuet. Tarro'marña ñetpa' eñoteñet añ patser po'ñoçh ama pa'netsreye' peñeto. Ñetpa' ahuapñanesheta entenet arr patsro.

¹⁴ Ñehua, yeñoteñ acheñ ñeñt atet entetsa ñerra'm ahuapñanesheta ñetpa' aña e'nenet ñeñtcha' e'ñe pa'netser perret po'ñoçh.

¹⁵ Ñaña ama añeye' pa'netser peneto allot onet tarro'mar ñerra'm ñeñta e'nenetañpa' po'ñoçhpa' o'ch alla puerrerretañ allot onet tarraña ñetpa' ama ñeñteyena e'name'teneto.

¹⁶ Ñetpa' aña e'nete't ñeñtcha' e'ñe pa'netser perret po'ñoçh ñeñt atarr nanac cohuen, ñeñtpa' aña'at Yompor pa'netser ñeñt pue'ntaño'tsen. Ñeñto'marña Yomporpa' e'ñe pocte' entenanet ama penquënaneto atfo Po'yomporer peñet. Ñaña'pa' o'patatenanet ñeñtcha' e'ñe po'ñoçh pa'netser perret all pue'ntaño.

¹⁷ Ñaña allempo Yomporpa' atarr topatan Abraham; ñeñtpa' atet otan Abraham: "Te'pa' o'ch pemptser pechemer Isaac e'ñe atet ñerra'm ñeñt muetsenet nocop." E'ñe pueyemteñoñ Yompor Abrahamña' e'ñe pocte' eñch o'ch poman puechemer Isaac o'ch muetse Yomporecop. Ñehua, Yomporpa' atet o' otuan Abraham ahuatoteñ:

¹⁸ "E'ñe pechemereshoñ Isaacpa' mererrach shonte' acheñenesha' ñeñtcha' e'ñe pemñreneñ peperr." Tarraña ama't atet oteñeñ Yompor, ñaña'pa' e'ñe pueyemteñoñ Yomporpa' e'ñe pocte' eñch ahuo'ch muetsan po'patrro allempo atet otererr Yompor.

¹⁹ Tarro'mar ñapa' atet oten, Yomporpa' atarr ahuamencatesha' ñach tantatuerre' ama't ñeñtcha' rromats. Ñeñtpa' atet ñerra'mrrate' Yomporpa' o' alla tantaterrñañ puechemer rromot, o' alla agapuer pompor po'pocheño.

²⁰ Isaacpa'cho'ña allempo po'n e'ñe pueyemteñoñ Yomporpa' enaman puechemereshacop Yompor pa'nateña añecop Jacob ñaña Esaú; ñeñtcha' atet bensare'tamþerranet tsapañet.

²¹ Jacobpa'cho'ña allempo rromamoch e'ñe pueyemteñoñ Yomporpa' enamatnoman Yompor pa'nateña pue'ñaretolleshacop ñeñt puechemer José puechemeretollesha' puepo'nmeñoñpa' po'carra quellpuena allña ma'yochenanaña Yompor.

22 Josépa'cho'ña e'ñe pueyemteñoñ Yompor allempoch rroma allaṣar all anetso Egipto, ñapa' atet otnoman pamo'tsesha': "Po'ño'chpa' chocmach chap allempoch allohuenes israelena'tarneshas se'cha'nerrcha' arrot Egiptoñ, o'ch sahanerra allo'tsen pats ñeññ o'patatye't ahuatoteñ Yompor ñeññcha' apuerrey. Ñaña ñerra'm esempoch ahuerres arrotpa' sanerrnancha' nenpa'ts."

23 Ñaña allempo eñalleta Moisés, pamo'mte'ñapa' e'ñe cohuenatoll entan ematoll. Ñetpa' e'ñe pueyemteñoñet Yomporpa' o' e'pochet. Ama mecha'teññañeto añcha'taret po'ñoñ ñeññ atet nen attoch chocma muetsanachet allohuen asheñorroñollesha' ñeññ eñalletyetsa. E'ñe ma'pmña arrorr alla e'poteñet.

24 Tarraña Moisés allempo o' po'n ñapa'cho'ña e'ñe pueyemteñoña Yomporpa' ama mueno o'ch oteñet ño' pue'ñar penña añcha'taret, tarro'mar ñapa' atta ñañreteña añcha'taret po'señ ñeññ egipto'marnesha'.

25 Ñapa' añña e'ñe pocte' ent o'ch mueroçhtapretana israelnesha' ñeññ e'ñe pamo'tsesha' pen ñeññara ñeññ pueyochresha'chno pen Yompor. Ama pocteye' entano o'ch coshapretana egipto'marnesha' ñeññ atet yeçhenet ñeññ ama pocteye' enteno Yompor tarro'mar ñapa' eñoteñ ñeññtpa' e'ñe mamecpa atet coshenet.

26 Ñapa' atta ahuantenan atto atarr sasare'teñet israelnesha'. Tarro'mar ñapa' añ pocte' enten o'ch mueroçhta Cristocop. Ñapa' ñeññña atarr cohuen enten, ello metana'tuenan ñeññ atet sherben allohuen ñeññ esocmañen ñeññ atarr morrentena egipto'marnesha'. Tarro'mar ñapa' añña cohuen ñeññcha' apuer Yompor ñeññcha'ña atarr coshaterre'.

27-28 Ñeñño'marña Moisés e'ñe pueyemteñoñ Yomporpa' atet otan allohuen israelena'tar ñeññ Egipto'tsa'yen: "Te'pa' o'ch semtsa carrnerotoll tarro'mar Yompor otets. Ñeññña po'rraspa' o'ch seshellcata'tyes allot sebe'ten so'ponro, allochñapa' ñerra'm esempoch huapa mellañoñeñ ñeññ amñare't ñeññcha' muetsanatuenaya' allohuen egipto'marnesha' po'moternesha' attochña sa ñeññes israelena'tarneshaspa' ama't puesheñarrotesapa' amach muetsenso." Ñaña Moisés e'ñe pueyemteñoñ Yomporpa' sa'nerran anets Egipto, ama mecha'tnomano ñeññ añcha'tarettetsa all Egipto ñeññ atarr atsrre'mñañ. Moiséspa' atta ahuanta'huanman allohuen ñeññ atarr echarr entyen tarro'mar ñapa' añ e'ñe yemtena Yompor ñeññ ama't ama entpahuoyaye.

29 Ñaña allempo onaçherr allohuen israelena'tarnesha' Egiptoñ allempo çha'cha'tet atarr sa'po ñeññ otenet Sa'p Tsasasen, israelena'tarnesha' e'ñe pueyemteñoñet Yomporpa' e'ñe atta ahuanmoset all chope'chnomuet atet ñerra'mrrate' e'ñe porrare' patso chope'chenet. Egipto'marnesha'ña ñeññ cofahuetañpa' ñetpa'cho'ña ahuanmosetañ ñamet all sa'po, tarraña ñetñapa' e'ñe allohuenet ño'shrra'tuoksetña all oño.

30 Ñaña allempo çha'cha'tet all anetso Jericó ñeññña allo'marnesha'pa' ama mueneñeto o'ch abe'tosanñpsarettet. Tarraña israelena'tarnesha' e'ñe pueyemteñoñet Yomporpa' cançherrmatoset; o' cançhroch puetesamñpsame'toset ñeññ anetser Jericó ñeññ atet otanet Yompor. Allempoña e'ñe pueyemteñoñet Yomporpa' ñeññña conçhet allo aconçha'tamñpsare't ñeññ anetser all puetesme'tet cançhroch e'ñepa'tcha' ñoña mata'nom.

31 Ñaña Rahab ama't ñeññ atarr ecañoresha'ttatse't ahuatpa' atto atarr yemterrana ñaña Yompor, ñeññ coyanesarpa' ama rromo allempo a'cllataretta allohuen pamo'tsesha' ñeññara jerico'marnesha' ñeññ atarr atpare'tyesaye't Yompor all anetso. Tarro'mar ñapa' e'ñe cohuen agapan

pa'paclo allponsheña israelena'tar ñeñt ñanom amñarettatsa all anetso ñeñtcha' eñotenaya' errotenente'ña ñeñt anetser ñaña ñeñt yeçhetsa all, ñato' ahuamencatarerette' ñato'pa' amate'.

³² Po'potantañechnopa' shontemeñ ñeñtcha' alla neyerpaterrsañerr ñeñt atarr yemtaye't Yompor ahuat. Tarraña ama eñalle allponmat yet attoch alla neyerpatuerrsa allohuen ñeñt atarr yemtaye't Yompor, atet ñerra'm Gedeón, ñaña Barac, ñaña Sansón, ñaña Jefe, ñaña David, ñaña Samuel ñaña allohuen ñeñt a'mta'yesaye't Yompor po'ñoñ ahuat.

³³ Tarraña allohuenet e'ñe pueyemteño'tet Yomporpa' pa'namen etsotayenet ñeñt atet muenatenanet Yompor. Puesheña'ttsetpa' e'ñe a'mchechueñet po'potantañ añcha'taretneshachno ñeñt e'moñe'tenahuet. Po'potantaññapa' e'ñe pueyemteño'tet Yompor e'ñe cohuen añcha'tarettenet. E'ñe pueyemteño'tet Yompor ñapa' alla yenpuerranet ñeñt atet otanete't. Ama't po'psheñeñpa' e'ñe pueyemteño't Yompor ama muenatano ma'yarr o'ch erro't pe'.

³⁴ Ñaña ama't tso'ña ama't atarr huomenc huorten ama muenache o'ch atserrpe'. Po'psheñeñpa' e'ñe pueyemteño't Yompor ñapa' a'queshpach attoch ama muetseto espado. Po'potantañpa' ama't ama eñalleto po'huamenc, e'ñe pueyemteño'tet Yompor atarr ahuamencat panet. Ñeñtña huomencñatserpa' alloña quellarenet. Atto e'ñe a'mchechuet ñeñt e'moñe'tenahuet.

³⁵ Ama't po'potantañ coyaneshachno ñetpa'cho'ña e'ñe pueyemteño'tet Yompor, o' alla atantataretterret pamo'ts ñeñt rromuets.

Po'potantañ ama't atarr atserrpatse'tarettenet, ñetpa'cho'ña e'ñe pueyemteño'tet Yompor ama mueneñeto o'ch quechpuet Yompor attoch a'rroyarettyerret. E'ñe pocte' enteñet o'ch rromuet pueyemteño'tet Yompor tarro'mar ñetpa' eñoteñet allach tanterret ello ñeñt atarr nanac cohuentetsa.

³⁶ Po'potantañechno ñetpa'cho'ña e'ñe pueyemteño'tet Yompor ahuantayenet pa'namen atto atarr atserrpatse'tarettyesete't — attoña atarr ache'tatsetarette't, all ashtarette't, ehuananatarette't, ayottampsarettyesete't.

³⁷ Po'potantañ amtsanatarette'te't atto arrollapecharette'te't. Po'potantañpa' ashesharettyesete't e'ñe puerrochreto atto amtsanatarettyesete't, atarr huomenc huapanete't topateñets. Po'potantañ espado amtsanatarettyesete't. Po'potantañ atfa chopeñe'chyesete't, aña chorra'yesete't carrnerorrom, ñaña cabrarrrom. Atarr huocchañetyesete't atfaña atarr amuerochtatarette'te't atto atserrpa'yesarette'te't.

³⁸ Atfa chopeñe'chyesete't amayo'mar, aspeno'mar. Esho'tyesete't arro-roto'mar, mapuetpono'mar aña patsro. Allohuenet ñet ñeñt atto atarr amuerochtatarette'te't, Yomporñapa' atarr cohuen entanete't. Ello metana'tueñet ora allohuen acheñenesha' arr patsro.

³⁹ Allohuenet ñeñtet atarr yemtete't Yompor ahuat, Yomporñapa' e'ñe cohuen entanete't, tarraña ñetpa' amaña enterretoña ora allpon ñeñt atet otanete't Yompor ahuat ñeñtcha' atet apuerranet.

⁴⁰ Tarro'mar Yomporpa' ama't ahuatoteñ añ cotape'chen ñeñt ello nanac cohuen enten ña. Ñeñtpa' yocpa'na allohuenacpay. Ñapa' añ muenen allohueney parro o'ch etsotaterrnay ñeñt o'patatenya ñeñtcha' e'ñe cohuen ya'cohuentaterra' allohueney.

12

Chocmuepa'chña e'ñe yeyemuetneña Yepartseshar Jesús

¹ Ñeñto'marña yeñoteñ shonte' acheñ ñeñt orrtatyesaye't ahuatoteñ; e'ñe pueyemteñotet Yompor e'ñe etsotayesete't Yomporecop ñeñt atarr echarr. Ñaña ñet te'pa' o'ch netma'ntatanet ñerra'mrrate' allohuenetpa' o' cohuapreterryet yaña o'ch entyesyet errotentcha' yetsota yaña ñeñt atet muenateney Yompor. Ñeñto'marña yocoppa' añ poctetsa o'ch e'ñe yesuanom ama't erra'tsena ñeñt yepatare'tene' ama't ñaña yo'chñar ñeñt atarr yetpatyene'. Ñaña e'ñepa'ch ya'huanta'huanom allohuen ñeñt echarr yentyen. Allochñapa' attoch e'ñe cohuen yetsoteññañ ñeñt atet muenateney Yompor. Ñeñtpa' e'ñe atet ñerra'mrrate' ñeñt matetsa ñetpa' chocmach chapuet allohua onañchare'tenet ñocpuet.

² Añcha'ña chocmuepa'chña e'ñe yeyemuetneña Jesús ñeñt orrtaterre' attoch yeyemtera ñaña ñeñtcha' yetsotaterre' ñeñt atto atarr yeyemuetneña. Tarro'mar ñapa' e'ñe pocte' eñche't o'ch ahuanta'huan allohuen ñeñt echarr ente't ama't atto rroma corsocho. Ama't ñeñt atarr apenco'chen entyenet, ñapa' e'ñe poctacma ahuanta'huanemñ. Tarro'mar e'ñe pueyemteñoña Pompor ñapa' eñoteñ ñach apapuerre' ñeñtcha'ña atarr coshatuerre'. Ñeñto'marña te'pa' o' alla anorruerr Pompor po'cohuenrot all anen po'conañño allña part-sotuerr ñaña.

³ Ñehua, te' sapa' o'ch alla seyerpuera Jesús atto ñapa' atarr muerochtater ñeñt atarr ochñaatenesha' ñeñt atarr e'moñe'taye't. Tarraña ñapa' allohuen muerochteñetspa' e'ñe ahuanta'huanemñ. Allochñapa' sapa'cho'ña amach cha semuenme'chatsche ñeñtcha' atarr echarr sehuapoya, attochña amach cha llecatenso.

⁴ Tarraña saña ama't atarr satpare'tyeñeñ atto atarr topatase't so'chñar amaña choye' muetsenseto ñeñt atet a'paretta Jesús, ashataretta po'rras ochñartsocop.

⁵ Ñaña sapa' o'te' cha sepuesua ñeñt atet cotape'chateney Yompor po'ñoño allohueney ñeñtey puechemer pen. Ñeñtpa' atet oteney po'ñoñ:

Nechemere, ñerra'm esempo cotape'chaterres cohuen Yompor amachña atta sentatsche ñerra'm ama esoye' sherbeno. Ñaña ñerra'm esempo coñchatas mame' attoch o'ch alla soctape'cherr cohuen amachña ñeñto'ta cha muene' sequechpatstere.

⁶ Tarro'mar allohueney ñeñtey morrentena Yompor ñeñteycha'ña cotape'chaterres cohuen. Ñaña allohueney ñeñtey puechemerasha' pen ñeñteycha'ña coñchatyes mamesha'tets attoch o'ch alla yocotape'cherr cohuen ñocop.

⁷ E'ñepa'chña ya'huanta'huanom atto coñchateney mame' tarro'mar ñapa' añ muenen o'ch e'ñe puechemer perrey poctacma. Ñehua, yeñoteñ e'ñe pocte' atto ñeñt achemerasha't errotentopa' o'ch coñchachet puechemer mame' allochñapa' attoch e'ñe cohuen ame'ñenanet puechemer.

⁸ Tarro'mar ñerra'm esesha' ama coñchatenaye mame' puechemer attoch e'ñe cohuen ame'ñachet ñeñtpa' po'ñoñch ama puechemereye' peñe; ñeñtpa' cha ottena ñerra'm ellapnanesha'. Ñeñto'mar sapa'cho'ña ñerra'm ama coñchatenso Yompor mame' attoch same'ñya e'ñe cohuen po'ñoñch amaca'ye puechemereye' penso.

⁹ Elloña yeñoteñ allempo cheshenya' ñeñt yompor yepen arr patsro atto e'ñe cohuen cotape'chatyesye't, ñeñtpa' e'ñe pocte' yeñche't tarro'mar yeñoteñ ñeñtpa' e'ñe cohuen yocop. Ñeñto'marña te'pa'cho'ña e'ñepa'chña cohuen yenteñ atto Yomporpa' o' cotape'chaterrey cohuen ñeñtara Yompor ñeñt

pue'ntañ'o'tsen ñeñt' pamo'mte' pen yecamquëñ attoña yapa' corretsayach.

10 Ñehua, ñeñt' yamo'mte' yepen arr patsro ñetpa' e'ñe allponmata cotape'chatyesyete't allempo yapa' cheshenya'. Ñetpa' chocma coñchatyesyete't allpon pocte' entyese'te't ñet. Ñaña Yompor atto allpon coñchatyenyey mamesha'tets ñeñt'pa'cho'ña e'ñe cohuenacma yocop allochñapa' yapa'cho'ña e'ñech cohuenare' es yorrtatyen e'ñe atet ñerra'm ñapa' e'ñe cohuenare' es orrtatyen.

11 Ñaña yapa' yeñoteñ ñerra'm esesha' yecoñchatene' ñeñt'pa' ama cohuenaye' yenteñe e'ñe allempo coñchatenyet, tarro'mar ñeñt'pa' chocmach llecatenyet. Tarraña puecoñchateño'tetaypa' o'ch yeñoterr ñeñt' atarr cohuen enten Yompor. Allochñapa' attochña e'ñech yocsheñesha' yeychena cohuen muechet.

Ñato'tña atta es sepcham'pena'ña ñeñt' atet anaret Partseshot socop te'tña ama seçherro ñesho

12 Ñeñto'marña te'pa' o'ch notas, o'ch alla setanterra o'ch alla sa'huamencaterra Yomporecop. Atetcha' netma'ntatasa atet ñerra'mrrate' o' alla ahumencat seperr sot ñeñt' cha yoncota'ten ñaña atto seyonllocme'chenpa' o'ch alla ahumencat seperr selloquëñ.

13 E'ñepa'ch cohuen es sorrtatyen allochñapa' ñerra'm esesha' ama e'ñeye' huomencaye' penaye pueyoçher Yomporecop, sañapa' amach aña sorrtateno ñeñt'cha' a'puerrataterrahuet. Añcha'ña sorrtateññañ ñeñt'cha' e'ñe cohuen yenpuene'. Ñeñt'pa' atetcha' netma'ntatasa ñerra'mrrate' sapa' añ se'nen toñ ñeñt' atarr cohuen paçharr sets muepñarero allcha' e'ñe cohuen sechope'chen. Allochñapa' ñerra'm eseshas checa'repuets amach cha sepoto'tatse'tnomo amach cha sa'tserrpa'nmo attochña e'ñe cohuen sechope'chnom e'ñe huomenc.

14 Añepa'chña sema'yoçhrena attoch e'ñe cohuen samo'tstannena, e'ñech muechet seyçhena epas allohuen samo'tseshaçhno. Ñaña añcha'ña soctape'chyen ñeñt' e'ñe cohuenare' enten Parets. Tarro'mar ñerra'm añ ama yocotape'cheno ñeñt' cohuenare' enten Paretspa' amach errotenot yentereña Yompor.

15 Ñaña seño'tanna'tnomuepa'ch, ñato' eseshaspa' ama añeye' e'nenno Yompor ñeñt'cha' yempue'. Ñaña seño'tanna'tepa'ch ñato'tña ama't e'ñe mameshapa' sorrtatena'ña attoch se'moñe'tanna'ta. Ñerra'm atet sepenapa' aco'poteñpa' o'ch e'ñe epa'huapa' çhach orrtatan atsrre'moçhen. Attoña ñerra'm shonte' acheñenesha'pa' çhach a'sosyatuanet; ñeñt'pa' ama pocteye' enteñe Parets. Ñeñt'pa' atetcha' netma'ntacha ñerra'mrrate' narmets ñeñt' atarr pesherr ye'muen.

16 Ñaña seño'tanna'tnomuepa'ch ñato'tña esesha' chetenaya'ña ñeñt' ama puetaporeyaye. Amapa' ñato'tña atta es sepcham'pena'ña ñaña ñeñt' atarr sherbets Partsocop, ñeñt' atet pa' ahuat Esaú. Ñapa' e'ñe pa'chporrño'ta pomhuan ñeñt' anaret ñocop Partseshot. Ñeñt'pa' ñeñt' o'patacha pompor ñeñt' metana'tuene' ñeñt'cha' allpon apa'nman po'poñ puechemerasha' tarro'mar ñapa' ñeñt' e'ñe po'moter pen pompor. Tarraña Esaúpa' ama esoye' enteñe ñeñt' anaret ñocop Partseshot ñeñto'mar e'ñe pomhuan ñeñt' o'patacha pompor ama't e'ñe parrocha rrachet.

17 Tarraña e'ñe allponmatapa' yeñoteñ o' alla muenerran ñeñt' anaret ñocop Partseshot, tarraña allempopa' amach errotenot alla apuereterro.

Ama't pueya'chpeñesha' enamuerreñ allempopa' amate' errotent a'po'poñeterretoña ñeñt atet o' pohuet ñenmañ.

18 Ñehua, yeñoteñ ahuat allempo Yomporpa' eñotatan israelena'tarnesha' attoch a'pocatanetañ Parets all aspeno Sinaíño, ñeñtpa' atarr yoroçhen. Allña aspeno ñerra'm esesha' çhapats ama't pa'rrpapa' allorocmach errotset all. Ñeñña aspenrepa' all huorten tso' ñaña ama macheçmeto, amcha'noçhtena, huomenquëshaten.

19 All e'morrtena ñaña poctor atarr yoroçhen. Atto eñorana'tanet Paretspa' atarr amcha'noçhen enteñet. Ñeñto'marña acheñenesha' ñeñt e'mñotene' atto eñorena Parets, ñetñapa' atet otyenet. “Ñeñtepa'ta amach allo'na eñorana'tnenye Parets.”

20 Ama eshcaye' ahuantenaye' enteñeto ñeñt atet otareñtenet: “Ñerra'm esesha' çhapats ñeñt aspenrepa' ama't pa'rrpapa' amsareñtetepa' — arrolle'tareñtetepa'ch amapa' enapechareñtetepa' panmeto. Ama't ñaña eyarra muetsetepa'.”

21 Ama't Moiséspa'çho'ña atarr yoroçhen enteñ, ama't ñapa' atet otanet: “Ama't napa' nemcha'na'teño'tpa' çha neyonshema'ten.”

22 Tarraña sapa' ama sentare aspenet all amcha'noçhtena Parets. Sapa' aña senterr ñeñt Siónapen ñeñt toma'ntenaya all yeçhena Yompor ñeñt ama arromñaeshayaye. Ñaña aña senterr Jerusaléñ ñeñt toma'ntenaya Yompor pa'netser ñeñt pue'ntaño'tsen. Allñaapa' shonte' coshame'tampeña mellañoñenesha' shonte' nanac. Ñeñt allpon allo'tsa'yenpa' ama e'ñotuapahuoyaye.

23 Ñaña sapa' aña senterr allohuen ñeñt puechemeresha' o' perr Parets ñeñt apçheta pame'ñeño'tet ña. Ñetña allohuenetpa' ñeñtet aquellcareñtet pa'so'chñeçhno Yompor pue'ntaño. Ñaña sa te'pa' o' senter Yompor ñeñtcha' yeñotaterre' allohueney erra'tsencha' cohuen entyesuerr ñaña erra'tsencha' ama cohuenaye' entyesuerr. Ñaña allo'tsa'yen allohuen acheñenesha' puecamquëñeçhno ñeñt e'ñe pocte' enten Yompor; ñeñtñapa' o' e'ñe etsotatuanet all pue'ntaño.

24 Ñaña te' o' senter ñaña Jesús ñeñt eñosets yocop Yomporesho attoch e'ñe cohuen a'pocatonay etserra. Ñaña o' seño'terrñañ po'rras ñeñt ashatareñtatsa alloña o' apreñnareñtterraña yo'chñar. Ñeñtpa' elloña e'ñe cohuen yenpuerrey. Ñeñtpa' ama atteyaye ñerra'm Abel po'rras ñeñt ashatareñtatsa ahuat.

25 Ñeñto'marña te'pa' o'ch notas, se'mñoterepa'ch Yompor ñeñt se'ñorana'tenaya te'. Tarro'mar ahuat israelena'tarnesha' ñeñt ama e'mñotaye'te Yompor allempo eñorana'tanete't arr patsro, ñetñapa' ama eseshaye' queshpatso. Ñeñto'marña yeñoteñ ñerra'm yapa' amach ye'mñotere yaña Yompor ñeñt ye'ñorana'tenaya te' pue'ntaño't, elloña yapa'çho'ña ama't puesheñarrotteyapa' amach eseshay queshperrtso.

26 Ahuat allempo eñorana'tanet aspeno't, po'ñoñña' çha pelle'llchatenan pats. Ñaña te'pa' elloña o' alla atet oterrerr Yompor ñeñtcha' atet pererr, ñeñtpa' atet oten: “Elloña esempohuañen po'pocheño'pa' o'ch alla nepelle'llchatererr pats, tarraña amach ñapñayaya pats nepelle'llchaterro, enta'nachña nepelle'llchater.”

27 Ñeñtña po'ñoñer all oten “po'pocheño” ñeñtña yeñotatene' esempohuañenpa' ahupore'tareñterrach allohuen ñeñt ayeçhcataret

ñeñt' apelle'llchatpo'. Allempopa' añach a'puerrtsa ñeñt' ama apelle'llchatpahuoyaye.

²⁸ Ñaña atto amicha'tarettena Yompor, ñeñtpa' ama apelle'llchatpahuoyaye. Ñeñto'marña yeparasyoso'chepa'ch Yompor tarro'mar ñeñt' o'patatenyapa' ama ahupore'tpahuoyaye. E'ñe yemcha'na'teño'tpa' e'ñepa'chña cohuen yesherbeñ Yompor ñeñt'cha' e'ñe coshatene' ña.

²⁹ Tarro'mar yeñoteñ ñeñt' Yeyomporer yepen ñapa' atarr Parets e'ñe atet ñerra'm tso' ñeñt' e'nuene' ama't erra'tsena ñeñt' ama erro't apen yenteno.

13

Atetcha' ye'pa attoch e'ñe cohuen yocshach Yompor

¹ Atterepa'ch chocma semorrentannena allohuenes atet ñerra'm e'ñe semo'nasheñ se'panna'tuena.

² Ñaña amach sepsatsto attoch e'ñe cohuen saga'p allohuen ama't esesha ñeñt' huapyetsa sepaclo. Tarro'mar ama se'notanna'tueno; ñato'rraña añ saguën ñeñt' mueñen Yompor atet pena po'potantañ ñetpa' añepa't agapuet mellaño'teñ.

³ Ñaña chocmuepa'chña seyerepya ñeñt' ayottam'psaretetyetsa. E'ñech cohuen sellcapretenanet atet ñerra'mrrate' sapa'cho'ña ayottam'psaretes e'ñe parro. Ñaña ñeñt' amuerochtataretetyetsa e'ñepa'ch cohuen sellcapretenanet ñamet tarro'mar sapa'cho'ña se'noteñ attecma erro'tenopa' chocmach semuerochtana saña e'ñe sechtso.

⁴ Ñaña o'ch notas po'poñ: Allohuenes ñerra'm esempo sesna'tena o' e'ñe seyoranna'ta epas se'tapor e'ñepa'ch cohuen sentña ñeñt' atto seyorannena. Ama't parrochapa' amuepa'chña se'nam'psanna'tatsto. Yacmapa' amach chetatstano coyanesha' ñeñt' ama puetaporeyaye ama't e'ñe parrocha. Coyanesha'pa'cho'ña amach agapatstanoña ñaña ñeñt' ama puerrollareyaye ama't e'ñe parrocha. Tarro'mar Yomporpa' chocmach tsa'taterrana ñeñt' chetene' ñeñt' ama puetaporeyaye ama't ñaña ñeñt' aguëne' ñeñt' ama puerrollareyaye.

⁵ Ñaña te'pa' o'ch noterrser po'poñ: Amuepa'chña aña atarr seye'chapretatsetyesatsto quelle. E'ñepa'chña aña socshena ñeñt' e'ñe allpona sechyen. Tarro'mar Yomporpa' atet otene'y: "Napa' ama't ahua'tapa' amach neque'chpuerrso, amach na'ypo'ñerrso ama't ahua'ta."

⁶ Ñeñto'marña yeyemteño't Yompor e'ñech yocsheñesho't chocmuepa'ch atet yoten:

Yomporpa' ñeñt'ña yeyenpuene' ñeñto'marña amach es yemcha'tatsto. Ama't erro'tuanen muene' peney po'potantañ Yomporpa' ñach yecua'm'pene'.

⁷ Ñaña seyerpueño't chocmuepa'ch cohuen senteñ ñeñt' a'potene' Yompor po'ñoñ socop, ñeñt'cha' se'notatnomue' cohuen. Ñaña o'ch soctape'ch ñeñt' atarr cohuenare' orrtatyesnomuet sesho, atto ñetpa' e'ñe cohuen yemteñet Yompor, sapa'cho'ña atetcha' se'pa saña yemtenaya Yompor e'ñe cohuen.

⁸ Jesucristo ñapa' atterach yeyemteña ama't ahua'toteñ, ama't teme'ttsen, ama't ñaña errponañohuen ñeñt'ach attera ayemuetpotena.

⁹ Ñeñto'marña amach seyematstoña ñeñt' po'poñe'chno yechateñets ñeñt' ama atteye' ay'chatareteso ahuañmo'choteñ. Tarro'mar añña poctetsa o'ch huomenc ye'pa' yeyo'cher e'ñe Yompor puemorrenteño'tey atto atarr yenpueney e'ñe atta. Ama añoteye' huomenc yepenoña yeyo'cher atto es yerra'yen amapa' atto es yefore'tyena. Tarro'mar ñeñt' co'tene' añ yechateñets

rreñtsocpa'na, ñeñt yeçhateñtsorpa' ama yenpuenaneto attoch huomenc pa'nmuet pueyoçher Yomporecop.

10-11 Ñehua, yeñoteñ ñeñt corneshatets judioneshacop ñerra'm esempo muetsenet eyarra all altaro ñeñt po'chñarecpuet, ñeñtña eyarra po'rraspa' ñeñt'pa' o'ch anemñ cornesha' e'ñe allohuanen Parets po'ponro ñeñt ochñartsocpatets. Tarraña ñeñtña eyarra po'chetspa' amach esesha' rrenaye. Ñeñtña po'chetspa' o'ch anmet a'yo all ama acheñempañooyaye, allcha' chamoset. Tarraña te'ña yocop ñeñt amtsarefterrtsa yo'chñarecop ñeñt'pa' Cristo. Yapa' ñeñt po'ñoñ pocrrañ pen yecamquëñ allohueney ñeñtey yemtenaya ña. Tarraña ñeñt attera corneshatets judionesha' poçta'pñacop all po'prahuo peñet, ñetpa' amach errotenoç pocrrañ petoña Cristo.

12 Ñaña atto anenan judionesha' eyarra po'chets a'yo all ama acheñempañooyaye, ñeñt'pa' añ toma'ntena atto Cristopa'cho'ña anmet a'yo all ama acheñempañooyaye allcha' e'ñe puemuerochtateñoçetpa' o'ch rroma. Attoña e'ñe ña po'rroso a'cohuentaterrey Partsocop.

13 Ñeñto'marña te'pa' e'ñepa'chña yesuanom ñeñt ahuat yoçta'pña ñeñtara ñeñt ya'netser yepenpa' o'ch ahuey a'yo allo'tsen Jesús. Allcha'ña yemue-roçhtapretosya yaña all atarr otnare'tyeñet.

14 Tarro'mar añe patserpa' ama añeyaye ñeñt po'ñoçh ya'netser yepen tarro'mar ñeñt'pa' huañerrcha'. Yapa' añña ye'nen ñeñt'cha' ya'netser yeperr ñeñt'cha' yenterr Yompor pue'ntaño ñeñt ama ahuañaño ama't e'ñe er-ronaña.

15 E'ñe yeyemteñoç Jesucristo çhocmuepa'chña ya'ye'choçhtateññañ Yompor. Atto çhocma ya'ye'choçhtateññañ ñeñt'pa' añ toma'ntena ñeñt'cha' yapueñ Yompor atet pete't ahuat o'ch muetsset eyarra ñocop. E'ñepa'chña ya yenamot ya'ye'choçhtateññañ pa'so'cheñ attochña e'ñech yocshateñ.

16 Ñaña çhocmuepa'chña e'ñe cohuen seyenpannena ñaña e'ñech cohuen sa'muerañtana. Tarro'mar te'pa' ñeñtña atto es yapueñ Yompor ñeñt'cha' atarr coshatene' ña.

17 Ñaña ñeñt sa'mcha'tareternesha' sepa'yenpa' çhocmuepa'chña same'ñenanet, tarro'mar ñetpa' añecop anare'ttenet ñet'cha' cohuanmpenet secamquëñ Yomporecop. Ñaña Yomporpa' eñotatuerranetcha' ñeñt atet pa'yenet, ñato' e'ñete' cohuen cohuanmpenset ñato'pa' amate' cohuenaye' cohuanmpenseto. Ñeñto'marña socoppa' añ poçtetsa e'ñechña cohuen same'ñenanet attochña ñetpa' e'ñech pocsheñeshocmañen torrenet socop. Amuepa'ch cha sellcatatstenaneto tarro'mar ñerra'm atet'pa' amach errotenoç coshaterrsetoña saña.

18 Ñaña te'pa' o'ch notas, çhocmach sema'yochampenya. Yapa' yeñotena yeyoçhro ama eñalle attoch po'poñ yentannena. Yapa' añña yemnen çhocmach yorrtatyen ñeñt atarr cohuen enten Yompor.

19 Ellopa' o'ch alla noterrser çhocmach sema'yochampesna allochñapa' amach atarr atomatatstopa' o'ch alla neçherrerr sesho.

Arrpa' all so'tnerranet po'cartot

20-21 Te'ñapa' Yomporepa'chña e'ñe ahuamencaç sepene' ama't allohuen pa'namenacop ñeñt atarr sherbets ñocop. E'ñe yame'ñeñoç Puechemer ñeñt Jesucristo ñachña ya'cohuentatene'ña ora yoçta'pña ñeñt atet yoçtape'chyen yeyoçhro allochñapa' attochña e'ñe cohuen yoçtape'cherr ora allohuen ñeñt cohuen enten ña. Attochña e'ñech cohuenare' sorrtatyen ñeñt e'ñe atet muenen ña. Ñeñt'pa' ñeñtara Yompor ñeñt e'ñe yocshatene' yeyoçhro ñaña

ñeñtara ñeñt tantaterre' Puechemer rromot ñeñt Yepartseshar yepen, Jesucristo ñeñtña atarr cohuen yecuanmpene' atet ñerra'mrrate' ñeñt atarr cohuen cohuanmpene' po'carrneror. E'ne po'rrosoña alloña a'pocatonay ñeñt e'ne etserra ñeñtña a'pocateñetspa' ama't errponañapa' amach huañerro. Te'ña e'ne tayoteñpa' yecohuentatoñepa'ch Cristo ama't errponohuañen. Ñeñtpa' attetepa'ch Nompore yocop.

²² E'ne allohuanen masheñneshacha' ñaña nochaneshacha' o'ch alla noterrser, e'ñepa'ch cohuen se'mñoton neñoñ ñeñt allpon o' alla noctape'chaterres tarro'mar ama atonaye' ñoñets nequellquënnaso.

²³ Ñaña o'ch neñotatas masheñ Timoteopa' o' alla a'rroyeret. Ñerra'm ahuencha' chap arrpa' epsheño'mareypa' o'ch ahuey o'ch yemo'tensa'.

²⁴ Ñaña napa' nemnen o'ch nehuomcha'ch necartot allohuen ñeñt sa'mcha'tareternesha' sepa'yen, ñaña allohuen masheñneshachno ñeñt pueyochresha' pen Parets all sesho. Ñaña italio'marnesha' ñeñt ame'ñetsapa' ñetpa'cho'ña mueneñet o'ch huomcha'taset ñamet añ necartot.

²⁵ Te'ñapa' Yomporepa'ch sa'nataya allohuenes. Ñeñtach notas, ñeñtpa' attetepa'ch Nompore. Allohua.

AÑ SANTIAGO PO' CARTA SANTIAGO

Atto Santiago quellcan carta allohuenacop ñeñi atta parratse'tyets allemeñ

¹ Masheñeshacha' ñaña nochaneshacha' ñeñtes Israel puechemerasha' po'mrenñes, ñeñt' charrasheña puechena epsheña ñeñña po'mreneñ sepeneña sa, ñeñtes atta parratse'tyets allemeñ anetso'mar. Na Santiagon sequellqueneña añ carta ñeñten torretsa Yomporecop ama't ñaña Puechemeracop Jesucristo ñeñt' Yepartseshar yepen. Te'pa' o'ch nehuom'cha'tas allohuenes añ necartot.

Attoch ya' huanten allohuen topateñets

² Ñaña te'pa' o'ch masheñeshacha' ñaña nochaneshacha' notas, ñerra'm esempo huaponasa pa'namen topateñetspa' sapa' socshepa'ch nanac.

³ Tarro'mar sapa' señoñeñ ñerra'm cho huaponaya topateñets, ñeñtpa' añecopcha' huapa attoch topatenya' ñerra'm po'ñochte' yame'ñena. Allochñapa' attoch chocma es ya' huanten.

⁴ E'ñe pocte' allo'nepa'ch sesen ahuantahuanmue' allohuen topateñets, allochñapa' attoch poctacma huomenc seña' seyocher Yomporecop, ñaña attoch amach es sepallteno ama't mamesha atto same'ñeña Yompor.

Yomporpa' chocma mueneñ o'ch es eñotatey

⁵ Ñerra'm eseshaste' ama e'ñeye' eñotenaye ñeñt' cohuen enten Yomporpa' sapa' añcha'ña senam Yompor, ñapa' chocmach es eñotatey, tarro'mar ñapa' e'ñech pocsheñesha' es apueney allohueney, amachña ñeñtapa' cha che'ptare'tye.

⁶ Tarraña ñerra'm esempo es senamueñ Yomporpa' e'ñech seyemteñoñ es sanamñ. Amach cha se'charrtatsto seyo'chro ama't mamesha. Tarro'mar ñeñt' chocma echarrtetsa pueyo'chropa' amach e'ñeye' yemtenano Yompor ñeñto'marña ñeñt' atet petsapa'chach ottena ñerra'mrrate' oñ pue'mo'yer ñeñt' allemateñ anen mōrr.

⁷⁻⁸ Ñeñt' atet petsapa' eñochetepa' po'ño'chpa' amach es ape Yompor, tarro'mar ñeñt' atet petsapa' amach patrraye' cotape'cheno. Atet ñerra'm te'pa' ñato' po'poñcha' cotape'chen, ñato' tsapatñapa' o'ch'cho' cotape'chenan po'poñ. Ñeñt' acheñerpa' chocmach atet pa'yena.

⁹ Tarraña ñerra'm eseshas masheñre esempo atet sentena ñerra'm ama esoshe'mayaysopa' socshepa'ch, tarro'mar allempo Yomporpa' atetcha' entenes ñerra'mrrate' ñeñtes nanac sherbets.

¹⁰ Ñaña añ masheñer ñeñt' echene' shonte' po'çllayorpa' coshepa'ch ñerra'm esempo es huapoya. Allempopa' amach esoshe'maye' entereto. Tarro'mar ñeñt' eçllayoret' ñeñtpa' mamecpa atet pena ñerra'mrrate' ta'te' puerorer ñeñt' nanac auyaña.

¹¹ Tarro'mar ñeñt' ror atetpa' ñerra'm o'ch huapa'muena atsne', ñerra'm o'ch atserrtapa' chach a'uyatoñña pue'chor, añña puerorerñapa' o'ch shorna'tua; ñeñña atto cohuentenapa' o'ch huañ. E'ñe atet penaña ñeñt' eçllayoret'. E'ñe puechecma'teño'pa' huañerrcha' ñaña.

E'ñe yañeña yemnenñoñ topateney oneñeñ

¹² Nanac cosheñtso'tsen allohuen ñeñt' ahuantene' ora pa'namen topateñets, tarro'mar ñerra'm esempo ahuantahuan ora topateñetspa'

nanaccha' cohuen entuer Yompor. Allempopa' aphuercha' Yompor ñeñtcha' atarr coshaterre' alloch ñapa' corretsach tayoteñ ama't errponañohuen. Ñeñtpa' aña o'patatena allohuen ñeñt morrentenaya ña.

¹³ Ñaña te'pa' o'ch notas, ñerra'm esempo e'ñe sañeña semnenñoť o'ch sepa ñeñt ama cohuenayayepa' amach sotatsto, "aña' Yompor'te' o' topaten." Tarro'mar Yomporpa' ama esesha' topatenaye attoch ñapa' o'ch pa ñaña ñeñt ama cohuenayaye. Ñeñto'marña ñapa'cho' amach errotenoť topatye yaña.

¹⁴ Elloña añmapa' e'ñe sañeña semneññoť attoch huaponasa topateñets o'ch sepa ñeñt ama cohuenayaye.

¹⁵ Tarro'mar ñerra'm esempo es yemnatse'tyen yeyo'chro, ñerra'm o'chcho' ye'pa' atetpa', ñeñtpa' ñeñtña yo'chñar yepen. Ñaña ñerra'm chocma allo'na yesen pa'nmue' ñeñt ama cohuenayayepa' e'ñe yo'chñarotpa' o'ch yechenquerra.

¹⁶ Masheñneshacha' ñaña no'chaneshacha' e'ñe nemorrenteñotespa' o'ch alla noterrser; amach sepantatsche sañeña. Po'ño'chpa' ama Yomporeye' yetpatenaye attoch ye'pa' ñeñt ama cohuenayaye.

¹⁷ Yomporpa' e'ñe cohuenare' es apueney ñeñtcha' allo'na yeyenpuene' ñeñtara ñeñt mueñennay pue'ntañoť. Ñaña ñeñtara Yompor ñeñt ye'chcate' allohuen ñeñt ye'choyo'tam'pene' pue'ntañoť. Tarraña erroteno e'ñe puechop'e'cheño'tpa' amach tama choyo'tam'penye. Tarraña Paretspa' ama atteye' peno. Ñapa' amach ellopa' alla a'po'poñeta'm'perrye ñeñt atet muenateney.

¹⁸ Allempo yame'ñerrñaña po'ñoñ ñeñt e'ñe po'ño'ch atet oteney ñeshoñña' ye'ñallettera atet ñerra'm'rrate' e'ñe puechemerey ñeñt e'ñe po'moter pen ñeñt anaret e'ñe ñocop. Tarro'mar ñeñtpa' atet muenen ña.

Aña' ñeñtcha' atet yesherbe' Yompor e'ñe cohuen

¹⁹ Ñeñto'marña masheñneshacha' ñaña no'chaneshacha' e'ñe nemorrenteñotespa' o'ch neñotaterrser po'poñ. Sa allohuenes añ poctetsa chocmach pocte' señch o'ch se'mñoch cohuen ama't erra'tsena ñeñtcha' serrpare'tatets. Añcha'ña chocmach serrmuen señoñ. Ñaña amach e'ñe atto'a sa'tsrre'ma'yeno, chochña ñanom es soctape'ch ñato' atsrre'mo'chente' ñeñt atet otenset, ñato' amate'.

²⁰ Tarro'mar e'ñe ya'tsrre'mueño'tpa' amach errotenoť yetsotoña ñeñt atet pocte' enten Yompor.

²¹ Ñeñto'marña sapa' o'ch seque'chpa'huerr sosya'tsañ ora allohuen ñeñt shonte' sepa'yen ñeñt ama pocteyaye Yomporecop. Añcha'ña sapa' o'ch sagapoñ Yompor po'ñoñ e'ñe señmañesha'. Tarro'mar ñerra'm o'ch chaponaya Yompor po'ñoñ e'ñe yeyo'chropa' ñeñtpa' ñeñtcha' ya'queshp'aterre' esempo-huañen yecamquëñoť.

²² Ñaña sapa' amach e'ñe orrena se'matstoñe Yompor po'ñoñ, chochña sorrtatyesña ñeñt atet oteney. Tarro'mar ñeñt e'ñe orrena e'muene' Yompor po'ño'pa' ñeñtpa' ñañeñach shequëtsa tarro'mar chate' otenapañ ñato' ñeñtate' poctetsa ñocop attoch queshperra.

²³ Ñaña ñeñt atet petsapa' chach ottena ñerra'm'rrate' ñeñt atta cohuetsa rerpo.

²⁴ Añecpach cohuenta o'ch entan erro'tente' orrtena pa'clloyoť. O'chña entuan ñeñt atet orrttenapa' allempoñapa' o'ch ahuerr. Allempoña cherr a'yopa' o'ch alla puesuerran ñeñt atet orrttena pa'clloyoť.

²⁵ Tarraña ñeñtña eñe pomnenñoť ma'yočhrenaya Yompor po'ñoñ ñeñť eñe cohuen atet oteneypa' ñeñtñaapa' ama atteye' peno ñeñť atet pena ñeñť eñe orrena e'muene' Yompor po'ñoñ ñeñť atta puesene' ñeñť atet oteneypa' Yompor. Añcha'ña čhocmach orrtatyenan ñeñť atet oten Yompor po'ñoñ. Elloña ñeñť atet petsapa' nanaccha' cosheñtso'tsen.

²⁶ Ñerra'm esesha' otets ñapa' nanaco' cohuen sherbenan Yompor, tarraña ñerra'm ña ama anenano po'ñoñpa' ñeñťpa' ñañeñach shequętsa. Tarro'mar ñerra'm atterach yeñosatse'tyenpa' amach po'ñočhaye' yesherbeñe Yompor.

²⁷ Añña eñe pocte' enten Yompor Apa ñeñťcha' atet yesherbeñ ña eñe cohuen: O'ch yeyenpueñ huocchaneshachno, ñaña rretorrnanesha' ñerra'm esempo es mueročhtatenahuet. Ñaña yapa' amach ya'sosyatatsto yechets ñeñť atet patsetyena ñeñť ama ame'ñetso arr patsro.

2

Atto amach puesheña'ttsa cohuen yentatsto

¹ Masheñeshacha' ñaña nočhaneshacha' te'pa' o'ch noterrser po'poñ. Sa eñe same'ñeñoť Yepartseshar Jesucristo ñeñť eñe cočhneshare' orrtatetspa' amach puesheña'ttsa eñe cohuen sentatsto. Sapa' eñech cohuen senteñ allohuen acheñenesha'.

²⁻³ Ñato' sa errotenopa' o'ch sapčhena allohuenes Yompor pa'paclo. Allempona sapčhenapa' ñato' o'ch huapa puesheñarr ñeñť chorrenaya ñeñť nanac cohuen, ñeñť nene' anillo orotlleden. Ñato' ñapa' eñech cohuen sagař o'chčo' sotař: "Panorros arr allame'tets eñe cohueno." Ñato' eñech allempocma o'ch huapa ñaña ñeñť atarr huocchañ ñeñť čha shetsre'she'muen pa'shtam. Ñato' ñeñťñaapa' čhach sotař: "Papa' alla pátomos tarroneť, amapa' alla panorros patso."

⁴ Tarraña ñerra'm atet sepenapa' ñeñťpa' amach allohuenacmaye' cohuen sentanneno. Ñaña čhach sottena ñerra'mrrate' sañeña eñotene' ñeñť acheñer nanac sherbets. Tarraña ñerra'm atet yepenapa' ñeñťpa' amach cohuenaye' yocťape'cheno.

⁵ Masheñeshacha' ñaña nočhaneshacha' eñe nemorrenteñotes te'pa' nemneñ o'ch se'mñoten ñeñťcha' atet notas. Elloña Yomporpa' añña nanac muenen o'ch acerran allohuen ñeñť nanac huocchañetets añ patso, attoch eñe pame'ñeñoťet ñetpa' echerretcha' esocmañen Yomporeshot. Esemphuañenñapa' o'ch aguęrret ñaña ñeñť o'patatenanet Yompor all amčha'tarettena pue'ntaño. Ñaña ñeñť o'patatenya allohueney ñeñťey morrentenaya ña.

⁶ Tarraña sañapa' čhaña semneñ o'ch sepencach ñeñť huocchañetets. Sapa' ama't señoťeñeña ñeñť nanac ečllayoreťpa' ñeñťña es aprratamřsañ, amapa' o'ch temantas amčha'tareťesho.

⁷ Ñaña ama't señoťeñeña ñeñť nanac ečllayoreťpa' ñeñťña nanac achmāre'tene' Cristo pa'so'cheñ ñeñťara ñeñť nanac amčha'na'tpo' yenten ya ñeñťey Cristona'tarey.

⁸ Ñerra'm čhocma semorrentannenapa' allempopa' o'ch setsotua añ ñoñets ñeñť atet anaret Yompor po'ñoño ahuaťoteñ, ñeñťpa' atet oten: "O'ch atarr cohuen pemuerya pāmo'ts eñe atet atarr pemorrentena pāñeña." Añ ñoñets ñeñťña nanac sherbets, ello metana'tuenan po'poñečhno. Ñerra'm atetcha' seřapa' allempopa' amach es sepallteno Yomporecop.

⁹ Tarraña ñerra'm sapa' eñe puesheña'ttsa semorrentenapa' ñeñťpa' alotña čhocma yo'chña'ten. Ñaña ñerra'm atet yepenapa' nanaccha' yeyoren

yo'chñar, tarro'mar ama atet yepeno ñeñt atet otene y Yompor po'ñoñ ñeñt atet anaret.

¹⁰ Ñaña ama't e'ñe yeychatset allohuen Yompor po'ñoñ ñeñt atet anareña', ñerra'm paterrñapa' ama atteye' yepeñepa' Yomporñapa' o'ch entene y ñerra'mrrate' o' ora yepanta'huoñ.

¹¹ Añ Yompor ñeñt yotene' "amach sechtapretatsto taporets" ñeñfara Yompor ñeñt yotene' ñaña "amach semtsanna'tatsto." Ñeñto'marña ama't ama yechtapretatsto taporetsña' ñerra'm errotenopa' machayo'a yemtse acheñ Yomporñapa' o'ch entene y ñerra'mrrate' o' ora yatpare'tuoñ po'ñoñ ñeñt atet anaret.

¹² Ñeñto'marña sapa' chocmach seyerpa atto esempohuañen Yomporpa' eñotatyesuerreycha' e'ñe errotencha' entyesuerrey. Tarro'mar ñato' yepena ama't ñeñt atet otene y te' Cristo po'ñoñ ñeñt atet anaret ñeñt ama amuerochtatañeyaye. Ñeñto'marña sapa' e'ñe señoñeño' atetpa' ama't errotena seña' e'ñepa'chña cohuenare' señosyen. Ñaña e'ñe señoñeño' atetpa' e'ñepa'ch cohuenare' es sorrattyen.

¹³ Ñaña sapa' señoche'pa'ch ñeñt ama morrentenayo te' pamo'tspa' ñapa'cho'ña esempohuañen allempoch eñotatyesuerrey Yompor e'ñe errotencha' entyesuerrey, ñapa'cho'ña allempopa' amach eseshaye' morrenterrayo. Añña ñeñt morrentenaya te' pamo'tspa' esempohuañeña allempoch eñotatyesuerrey Yompor e'ñe errotencha' entyesuerrey, allempoña ñapa' nanaccha' amuerare'terra.

Ñerra'm po'ño'ch yame'ñenapa' choc yorrtat ñaña ñeñt cohuentetsa ñocop

¹⁴ Masheñeshacha' ñaña nochaneshacha' te'pa' o'ch notas. Po'ño'ch ama sherbenoña añ acheñer ñeñt otets ñapa' ame'ñeno', tarraña ñerra'm ama orrtatenano ñeñt cohuentetsa Yomporecop. Ñeñña acheñer atetpa' amach po'ño'chaye' ame'ñeno. Amachca'ye a'queshpatereña ñeñt atto oten e'ñe orrena ñapa' ame'ñeno'.

¹⁵ Ñehua, ñato' o'ch netma'ntacha atet. Ñerra'm pueñeñarr masheñ, amapa' yo'ch palltenet ñeñtcha' chorret, amapa' ñeñtcha' rret allempo,

¹⁶ tarraña ñerra'm sapa' atta sotyey: "Ahua'ta, Yomporepa'chña pa'nataya. Eñalletepa' ñeñtcha' pechorra, ñaña ñeñtcha' perra'." Tarraña ñerra'm amaña es sape ñeñt palltenapa' atetpa' amaca'ye choye' es sesherbeno.

¹⁷ Ñeñt'pa' atet pena ñaña ñerra'm esempo atta yoten, "napa' name'ñena", tarraña ñerra'm ama yorrtateno ñeñt cohuentetsa Yomporecoppa', ñeñña atto yoten, napa' name'ñenapa' amach es sherbeno. Chach yottena ñerra'mrrate' o' huañerr atto yame'ñena.

¹⁸ Ñato' o'ch netma'ntacha atet. Ñato' pueñeñarrpa' o'ch otan po'psheñeñ: "Papa' e'ño' peyemteññaña ñeñt atet otene y Yompor po'ñoñ, tarraña amaña porrtatyenoña ñeñt atet otene y Yompor po'ñoñ. Tarraña napa' e'ñe nepohuen ñeñt cohuentetsa Yomporecop. Ñehua, ¿erra'tsenoteyte'ña e'ñe pocte' enten Yompor?" Ñehua, te'pa' o'ch notap ñeñte'p atet otets: Po'ño'ch ñerra'm ama yepeno ñeñt cohuentetsa Yomporecoppa' amach erroteno' yeñotache po'psheñeñ ñato' po'ño'chte' yeyemteññaña Yompor po'ñoñ. Tarro'mar ñerra'm po'ño'ch yame'ñenapa' chocmach yorrtat ñaña ñeñt cohuentetsa Yomporecop.

¹⁹ Ñaña papa' peyemteño'pa' peñoteñ Yomporpa' e'ñe patrra. Ñehua, ñeñt'pa' e'ñe pocte' atet, tarraña oneñetpa'cho'ña eñotenan ñaña atet. Tarraña

ñapa' ama't eñotenaneñña Yomporpa' ama't e'ñe patrra, tarraña po'yorñotach eñoteñ, tarro'mar ñapa' eñotena amach queshperro.

²⁰ Te' papa' amate' peñoteña'. Chote' pemneñ o'ch neñotatañ atto ñerra'm ama yepeno ñeññ cohuentetsa Yomporecoppa' ama't yoteneñ yame'ñena e'ñech orrena atet yoten.

²¹ Ñehua, Yomporpa' e'ñe pocte' entan ahuat yatañ Abraham allempo muene' muetsaneñ puechemer Isaac Yomporecop,* tarro'mar ñapa' añ ortaten ñeññ cohuen enten Yompor.

²² Ñapa' e'ñe pocte' entan Abraham tarro'mar e'ñe pueyemteño'pa' ortatuan ora ñeññ atet och Yompor. Ñeñto'marña yeñoteñ Abrahampa' e'ñe poctacma ame'ñane't Yompor.

²³ Allempo atet pe'tpa' attotña e'ñe etsotuan Yompor po'ñoñ ñeññ atet aquellcareñ ahuatoteñ Génesis, ñeñtpa' atet oten: "Abrahampa' nanac yemtana Yompor, ñeñto'marña e'ñe pueyemteño'ña Yomporña' e'ñe pocte' eñche't. Ñeñto'mar Abrahampa' atet ochete't, añmapa' ñeññ e'ñe parro yemtena epuet Yompor."

²⁴ Ñeñto'mar yeñoteñ Yomporpa' e'ñech pocte' enteney ñerra'm esempo yorrtatyehñañ ñeññ cohuentetsa ñocop. Ama't errpon yotatset yapa' e'ñe cohuen yame'ñena tarraña ñerra'm ama yepohueno ñeññ atet muenen ñapa' amach errotenot pocte' entyeña Yompor.

²⁵ Tarro'mar ama't Yomporpa' e'ñe pocte' entan ahuat coyanesha' ñeññ pa'so'cheñ Rahab, ama't ñapa' allempo pa' ñeññ e'ñe pocte' ent Yompor ñocop. Ama't ñeññ coyanesha'pa' nanac ecañoresha't, tarraña ñapa' e'ñe año'ña pocte' eñch Yompor atto ñapa' agapan e'ñe cohuen pa'paclo ñeññ mueña ahuat Josué ñeññcha' entenaya' ñanom pats. Allo'tpa' ñaña ahuo't gaterranet po'poñ toñ allcha' oñerret attoch ama rromuerraneto allo'marnesha' ñeññ e'moñe'tenahuet. E'ñe atet puepeño'ña Yomporña' e'ñe pocte' eñch e'ñe attecma ñerra'm Abraham.

²⁶ Ñeñto'marña te'pa' yeñoteñ ama't errpon yotatset yapa' e'ñe cohuen yame'ñena, tarraña ñerra'm ama yorrtateno ñeññ poctetsa Yomporecoppa' amate' eso yesherbeña Yompor. Ñato' o'ch netma'ntacha atet. Allohueneypa' e'ñe yeñotueñ ñerra'm esempo yeñch yamo'ts o' rromapa' o'ch yeñoch ñeñtpa' o' sa'neñ puecamquēñ tarro'mar ñerra'm ñeñto' o' yerromapa' añ yechetspa' amach es sherberre'te.

3

E'ñe yeñosatse'teño'ña nanac yochña'ten Yomporecop

¹ Masheñeshacha' ñaña nochaneshacha' te'pa' o'ch notas po'poñ. Ama pocteyaye o'ch sechen shonte' ñeññ muenets o'ch cotape'chaten ñeññ cohuentetsa Yomporecop. Tarro'mar seño'teñ ñeññey cotape'chatets cohuen Yomporecoppa' ello nanaccha' yoro'cheno'tseney ñerra'm esempo yepena ñeññ ama cohuenayaye tarro'mar Yomporpa' amach pocteye' entenye ama't e'ñe mamesha.

² Tarro'mar allohueneypa' chocma es yepanten. Ñerra'm esesha'ña ama es panteno pueñosatse'teño'pa' ñeññña po'ño'chpa' e'ñech cohuen cotape'chen, ñaña ñeññ atet acheñpa' e'ñech eñoteñ attoch huenatan ora ñeññ atet muenatse'tyen yechets.

* **2:21** Ñehua, ahuat Yomporpa' ahuo't otan Abraham muetsanepa'to' puechemer ñocop. Tarraña ñapa' añecpa atet och attoch topach ñato' po'ño'chte' ame'ñeña. Ñeñto'marña Abrahampa' autsa muetsayeñ puechemer Yomporecop, tarraña ello'pa' ama muenache Yompor.

³ Atet pena ñaña cahuall. Ñerra'm echenan attoch yame'ñacha, E'ñe puenamoṭpa' esheccha' yanem̄ all yesechateñ. E'ñe puenamoṭpa' o'ch yame'ñacha ora pue'mocrohuen.

⁴ Ñato' o'ch netma'ntacha ñaña ñeññ atet pena bote ñeññ chope'chets oño. Ñehua, botepa' ama'tcha' nanac añecmuen noñṭpa' e'ñe puepopaṭpa' o'ch aneñet all sechateñ pamo'mte'. Ñaña ama'tcha' puepopaṭpa' añeñollṭpach, ñaña ama't mōrrpa' mueneñeñcha' o'ch anem̄ a'yenet allenet ama yesechateñe, e'ñe puepopaṭpa' o'ch e'ñe cohuen aneñet allenet sechateñ pamo'mte'.

⁵⁻⁶ Atet pena ñaña yenam. Yenampa' ama't añeñolla yechetspa' atar-rcha' pa'namen esocmañen yeñosyen allot. Ñaña ñeññ atto yeñosatse'ten sosey e'ñe yenamotpa' ñeñṭpa' atet pena ñerra'mrrate' tso'. Ñehua, tso'pa' ama'tcha' añeñolla ya'torapa' mameshapa' o'ch epa'hua erracmañen puet-saṭo'mar, allotpa' o'ch a'poyuonay ama't ora ñeññ nanac yemorrentena. Ñeñṭpa' atet pena ñaña eñosatse'teñets. Eñosatse'teñetspa' ama'tcha' mame-sha yeñosatse'tpa' mameshapa' o'ch epa'hua erracmañen. Allempoñapa' o'ch čha a'huañerran ñeññ cohuentetsa Yomporecop. Tarro'mar ñeññ atto yeñosatse'tyenpa' allot huena esocmañen sosya'tsañečno ñeññ añe pat-sro'tsen. Ñaña ñeñṭpa' a'sosyatennay ora allohuen yocṭaṭña. Ñaña allohuen eñosatse'teñetspa' arroṭ huena e'ñe oneñet pa'netsroṭ, allara coñcha'puetso all parraren tso' erraṭaren. Ñeññcha' a'sosyatene' ora allohuen ñeññ atet yocrrena arr patsro.

⁷ Ñehua, allohuene yacheñeypa' e'ñe pomnaren yeṭohueñ allohuen berročno, ñaña otečno, ñaña allohuen shechpečno, ñaña ama't ñeññ yečha'yetsa oño'mar. Ora añečno'pa' e'ñe pomnaren yeṭohueñ.

⁸ Tarraña atto yeñosatse'tyen yenamotpa' ama esesha' pomnaren penaye. Tarro'mar atto yeñosatse'tenpa' amate' errotenoṭ yeunache, ñeñño'marña čhocmach yeñosatse'tyen. Ñeñño'marña yeñosatse'teñapa' e'ñe atet pena ñerra'mrrate' shecheṭ ñeññ nanac amtsañ. Shecheṭ amtsañpa' ñerra'm čho ačhay mameshapa' o'ch muetsay.

⁹ Ñaña añ ñeññara yenamotpa' ñato' errotenopa' o'ch ya'ye'chočhtatoñ Yompor ñeññ Yepartseshar yepen. Tarraña errotenopa' ñeññara añ yenamotpa' ñato' o'ch yesasare'ch yamo'ts ñeññara ñeññ yečcat Yompor ñeññ puetma'ntatara atet ñerra'm ña.

¹⁰ Ñeñño'marña masheñeshacha' ñaña nočhaneshacha' sapa' amach atet seṭatsto tarro'mar ama pocteyaye e'ñe yenamotpa' allot yenamateññañ yamo'ts Yompor pa'nateña, ñato' elloñapa' o'chčo' alla yesasare'ter yamo'ts ñeññara añ yenamot. Sapa' amach atet seṭatsto tarro'mar po'poñ Yompor pueyečcatar, ñeñṭpa' ama atteye' ṭanneneto.

¹¹ Ñato' o'ch netma'ntacha atet: Ama't sapa' señoñeñ ñerra'm erroṭ poten oñ e'ñe cohuenpa' amach erroteno poto ñaña all oñ ñeññ čha rreno'sen.

¹² Ñaña masheñeshacha' ñaña nočhaneshacha' ama't sapa' e'ñe señoñueñ, ñerra'm yenare't poporrpa' amach pue'mer ṭanoña ñaña parte allempo me'ten, amapa' ñerra'm yenare't ompa' amach pue'mer ṭanoña ñaña poporr.* Ñaña ellopa' e'ñe señoñueñ, ñerra'm erroṭ poten oñ e'ñe cohuenpa' amach errotenoṭ poto ñaña all oñ ñeññ čha poserrsastena. Ñeñño'marña

* **3:12** Po'ñočh arrpa' añ toma'ntatanet higočh ñaña uva ñaña aceituna tarro'mar ñeññ chopuets Palestino. Ñeñṭpa' atet oten: "Ñerra'm yenare't higočhpa' amach pue'mer ṭanoña ñaña aceituna, amapa' ñerra'm yenare't uvachpa' amach pue'mer ṭanoña ñaña higo."

yeñoteñ yocoppa' ama pocteyaye o'ch yorrtat ñeñt epa ñeñtara yenamot. Ñeñt paterrpa' atto ya'ye'chochtateññañ Yompor, po'poññapa' o'chcho' alla yeñosatse'terr allohuen pa'namen sosya'tsañ ñeñtara yenamot.

Añpa' ñeñt atet pena eñoteñets ñeñt huetsa e'ñe yañeña yocapñoť

¹³ Ñehua, te'pa' o'ch noterrser po'poñ. Ñerra'm eñall sesho ñeñt otets ñapa' nanaco' eñotenan esocmañen, ñaña ñapa' e'ño' es etsotuen, ñehua, orrtepa' atet pena ñeñt e'ñe cohuen achen attoch achenesha'pa' eñochet po'ñoche'pa't eñotuenan ñeñt cohuentetsa Yomporecop. Tarraña ellopa' amachña cha ommo'chatsteto atto e'ñe cohuenare' es pa'yenet. Tarro'mar ñerra'm po'ñoch es yeñotenpa' o'ch yeñoch ñaña ñeñt atto es ye'pa'yen e'ñe cohuenpa' ama ommo'chpahuoyaye.

¹⁴ Tarraña ñerra'm sapa' attera nanac sa'tsrre'muena seyo'chro e'ñe sesope'chapreteñoť samo'ts ñaña ñerra'm aña sema'yo'chrena ñeñt e'ñe socpa ñeñtepñapa' ama pocteyaye o'ch sommo'chena atto es señotyeneñ mamesha'tets. Tarro'mar ñerra'm ñeñta atarr yommo'chatene'pa' ñeñtpa' attaca'yeña yeshquën.

¹⁵ Tarro'mar ñeñt atet eñoteñetspa' ama arroteye' hueno Yomporeshot. Ñeñtpa' arrota huena e'ñe ya yocapñoť ñeñt patso'marecpa. Ñaña ñeñt atet eñoteñetspa' arrota huena e'ñe oneñet pocapñoť.

¹⁶ Tarro'mar ñerra'm chocma ya'tsrre'muena yesope'chapreteñoť yamo'ts amapa' ñerra'm aña yema'yo'chrena ñeñt e'ñe yocpa, ñeñtpa' allot huenaña e'moñe'tanna'teñets, ñaña allohuen sosya'tsañe'chno.

Atet pena eñoteñets ñeñt huetsa Yomporeshot

¹⁷ Tarraña ñerra'm po'ñoch Yompor eñotañ yepene'pa' ñeñtpa' atetcha' yepena: Ñanompa' o'ch yesuanom allohuen sosya'tsañe'chno ñeñt ama pocteye' enteno Yompor, ñaña amach allo'na atarr atsrre'mo'chen yenteno, ñaña e'ñech cohuen yentueñ allohuen yamo'tsesha', amachña cha po'poñ yentueno. Ñaña ñerra'm po'ñoch Yompor eñotañ yepene'pa' chochña ya'muerañtena, ñaña e'ñech cohuenare' es yorrtatyen yamo'tseshacop, ñaña ñerra'm erroten yotenpa' e'ñech po'ñoch atet yepena, amachña cha yesh-care'tanneno.

¹⁸ Ñeñtña ma'yo'chrenaya attoch e'ñe cohuen yentannenapa' ñeñtpa' añ muenen o'ch etsotan attoch allohueneypa' o'ch yepohuerra ñeñt atet pocte' enten Yompor.

4

Ñeñt coshatse'tyenaya ñeñt patso'marecpapa' ñeñtña e'moñe'tene' ñeñt cohuentetsa Yomporecop

¹ Ñehua, te'pa' o'ch yocape'ch po'poñ attoch seño'ch erro'tte' huenaña e'moñe'tanna'teñets ñaña orroteñets ñeñt chocma orrtatyenet sesho. Ñehua, ñeñtpa' allot huena e'ñe sa seye'chapretanna'teñoť pa'namen ñeñtña quel-lara'yetsaña seyo'chro.

² Tarro'mar ñerra'm erroteno nanac es yeye'chapretena, ñerra'm yapa' ama yecheñepa' o'chcho' ñeñto'mara yemtsanna'ta. Ñaña ñerra'm esempo es yesope'chapreten, ñerra'm yapa' ama yecheñepa' o'chcho' ñeñto'mara yorrota, amapa' o'chcho' ñeñto'mara ye'cllaranna'ta. Ñehua, yapa' añoť ama yecheno ñeñt nanac yemna'yen, tarro'mar ama añ yenamueno Yompor.

³ Ñato' ama'tcha' es yenañpa' amach yagape, tarro'mar ñato' añecpach es yenamueñ ñeññ ama pocteyaye ñocop. Tarro'mar ñato' añecpach es yenamueñ attoch yañapa' o'ch nanac es yocshatse'tyena allo.

⁴ Ñehua, ahuañapa' soten ahuo'ch same'ñera Cristo, tarraña te'ñapa' aña socshatse'tyena po'poñ. Ama't señoñe ñeññ coshatse'tyenaya ñeññ patso'marecpapa' ñeññña e'moñe'tene' ñeññ cohuentetsa Yomporecop. Ñeñño'marña ñerra'm yapa'cho' o'ch alla yocshatse'terra ñeññ patso'marecpapa' o'chcho' alla ye'moñe'ter yaña Yompore.

⁵ Ñeññpa' ama orrena oteno Yompore po'ñoñ ñeññ aquellcareñ ahuañoteñ, ñeññpa' atet oten. "Yompore Puecamquëñ ñeññ chorratenya ñapa' e'ñe puemorrenteñoñeypa' nanac mopa'teney."

⁶ Ñeñño'marña Yomporepa' chocmach mueneñ o'ch ahuañencat pa'y attoch amach alla yepsere ña. Ñeñño'mar ama't Yompore po'ñoñopa' e'ñe anuañet ahuañoteñ ñeññpa' atet oten: "Yomporepa' amach erroñenoñ yenpano ñeññ e'ñe cohuen entetsa ñañeña, amachña Yomporeye' ame'ñeno. Ñeñño'marña Yomporepa' añach nanac yenpuen ñeññ e'ñe pueñmañesha' ame'ñenaya ña."

⁷ Ñeñño'marña sapa' chocmach e'ñe cohuen same'ñeña Yompore. Añcha'ña satpare't oneñeñ tarro'mar ñerra'm atetcha' sepa'pa', oneñeñpa' quechpa'nerrescha'.

⁸ Ñeñño'marña o'ch alla separrocmaterr epas Yompore. Tarro'mar ñapa' chocmach alla aguërrer. Te'pa' ama't o'te' señoñhua ñeññ ama cohuenayaye Yomporecoppa' te'pa' añ poctetsa o'ch alla soctape'cherr cohuen attoch Yomporepa' o'ch alla enterres e'ñe cohuen. Tarro'mar sapa' ama't semeneñ o'ch semorrentera Yomporepa', tarraña chocma semorrentena ñaña ñeññ patso'marecpa. Ñeñño'marña te'pa' aña poctetsa o'ch sa'ypo'ña'huerr sosya'tsañ ñeññ seyo'chro'tsen.

⁹ E'ñe satpare'teñoñ Yomporepa' chosa llequërrtsa. E'ñe sellquëñoñpa' seyahuepa'ch. Ñaña amach allo'na seche'tatsetneno, chochña seyahua. Ñaña amach allo'na nanac es socshatse'tneno, chochña sellca.

¹⁰ Ñaña o'ch sa'meterr so'chñar Yomporesho attoch Yomporepa' o'ch alla tantaterres.

Atto ama atopare'tpahuo yamo'ts

¹¹ Masheñeshacha' ñaña nochaneshacha' amach sesasare'tanna'tatsto. Tarro'mar ñerra'm esesha' sasare'tene' pamo'ts, amapa' ñeññ tompare'tene' pamo'tspa' po'ñoñchpa' o' achñare'tan ñaña Yompore po'ñoñ ñeññ atet anareñ. (Tarro'mar Yompore po'ñoñ ñeññ atet anareñpa' atet oten, yemorrentanna'tepa'ch allohueney.) Tarro'mar ñetpa' chach otenapuetañ Yompore po'ñoñ ñeññ atet anareñpa' ñato' amate' es sherbeno. Tarraña ñerra'm esempo atet yepenapa' chach yottena ñerra'mrrate' yañeña e'ñe es eñoñuets. Tarraña ñeññpa' ama atteyaye. Añña pocte' chocmach yame'ñya Yompore po'ñoñ ñeññ atet anuañet.

¹² Tarraña yapa' yeñoteñ e'ñe pueñheñarra ñeññ nene' añ ñoñets ñeññara Yompore ñeññ e'ñe po'ñoñch es eñoñets. Ñeññara Yompore ñeññ eñoñene' ñeññcha' allpon a'queshpater, ñaña ñeññcha' allpon chenquërrtsa. Eso'mare'tña sañapa' chate' sotenapañ ñato' e'ñech sañeña eñoñe' ñeññ ama cohuenayaye achen.

Atto ama eñoñpahuo ñeññcha' yetantoya tsapatonet

13 Te'pa' o'ch notas ñaña po'poñoneť. O'ch se'mñnoten ñeñtes atet otets: "Te'ch amapa' ñato' tsapatcha' o'ch ahuen ñachayo po'poñ anetso, allcha' netaruasena' paťerr char attoch negana shonte' quelle."

14 Tarraña ama't atet soteneñpa' amaña señoteñeña ñato' escha' setantoya tsapaťoneť. Tarro'mar añ patsropa' e'ñe mamecpa yocrrena. Atto yocrrena arr mame' añ patsropa' e'ñe attey ñerra'mrrate' os ñeñť yenta'mueneť ahuatecma ċhach rrema'ċhen e'ñe patso. O'chña enome'ta'muen atsne'pa' o'ch huañerr.

15 Ñeñťo'mar aña pocte' o'ch soten atet: "Ñerra'm Yomporcha' muenatspa' a'natnepa' attoch ne'pa'yes ñeñť atet noctape'ċhen."

16 Tarraña sapa' ama atteye'ña sepeno. Ñeñťapa' attachña pa'namen sotyen e'ñe sommo'ċeñoť. Tarraña ñeñť atto yommo'ċyenapa' ñeñťpa' ama cohuenayaye.

17 Ñeñťo'marña ellopa' o'ch alla noterrser: Ñerra'm esempo yeñoteñ yeyoċhro ñeñť cohuentetsa Yomporecop, ñerra'm amaña atet ye'popa' ñeñťpa' ñeñťña yo'ċñar yepen.

5

Ñeñť atet otan eċllayoretnesha'

1 Te'pa' o'ch se'mñnoten ñeñtes nanac eċllayoretes. Te'pa' e'ñe seya'ċhpeñesha'pa' serranare'ta tarro'mar po'ñoċh ċhocma eñall ñeñťcha' sehuapoya esempo ñeñťcha' semueroċhtate'.

2 Ama't te'pa' o' atťa puetsana'tuen seċhecom. Sapa' ñeñťaña atarr semorrentena. Ñaña ñeñť nanac coċhnesha' ñeñť seċorra'yenapa' o' atťa pompere'ċhua.

3 Ñaña ama't te' seċllayorpa' o' atťa chomatlle'ċhuen. Te'pa' ama es sherbeno. Yeñoteñ e'ñe puechmatlle'ċeñoť seċllayorpa' ñeñťcha'ña se'nuerre' samña seċhets esempohuañen atet ñerra'mrrate' achamaretes tso. Te'ña ama't o' mellapoterrmochapa' sañapa' allo'na seshonta'huanen seċllayor.

4 Ñaña te' ñeñť atťa setaruasatyese't ñeñť ama setsa'tyese'tepa' te'ña ñetpa' puellquēñoťetpa' nanac eñenet socop. Ñeñťo'marña te' Yompor ñeñť nanac Paretspa' e'muenanet ñeñť atet pueya'ċhpeñesha' ċhocma eñenet socop.

5 Ñaña sa aña patsropa' esocmañen seċhen ama es sepallteno ama't mamesha. Ñeñťo'marña ñerra'm erroťenċho' nanac cohuen sentenpa' atetċha'ċho' sepena. ċhach sottena ñerra'mrrate' ċañoċho ñeñť nanac erratareť attoch nanac ota'. Ñerra'm o'chña nanac esoya'tpa' allempoñapa' o'ch muetset. Sapa'ċho'ña atetċha' perres samña Yompor esempohuañenċha' huerra.

6 Tarro'mar sapa' ċhocma semueroċhtatyeñ aċeñ ñeñť ama es yeċċatetso attachña sapa' semtsatyenanet. Ñaña ñetpa' amach erroťenoť a'qeshpateto ñañañeta allempo sapa' soteñe'ċhenanet.

Atto ama amuenme'ċhpahuo cohuae'te' Cristo

7 Ñeñťo'marña masheñeshacha' ñaña noċhaneshacha' o'ch notas, ċhocmach e'ñe sa'huinta'huanom ñeñť eċharr sentyen, attoch secuame'ċh Yepartseshar Cristo esempohuañenċha' huerra. Atetċha' se'pa atet yepena ñerra'm esempo yemneñ o'ch es yenare't. Ñerra'm yemneñ o'ch es yenare'tpa' ċhocmach ñanom yecuen esempohuañenċha' huapotyena esċecċha' e'ñeċh cohuen es yeċċcatsa ñeñť nanac yemorrenyena.

8 Ñeñto'marña sapa'cho'ña chocmach es sa'huanten. Amach semuenme'chatsche tarro'mar o' mameshamerrapa' o'ch huerra Yepartseshar.

9 Masheñneshacha' ñaña nochaneshacha' amach señanmare'tanna'tatsto, attoch Yompor ñeñt e'ñe es eñotetspa' amach otteñe'chuererso saña ñerra'm esempoch huerra. Tarro'mar Yomporpa' o' allanerrmoch.

10 O'ch masheñneshacha' ñaña nochaneshacha' soctape'ch ñeñt atet pa'yese't ahuat ñeñt a'mta'yesaye't Yompor po'ñoñ. Tarro'mar ñetpa' nanac ahuantete't atto nanac amuerochtatarettete't. Ñeñto'marña sapa'cho'ña atetcha' sepa saña.

11 Po'ño'chpa' yeñoteñ ñeñt nanac ahuantene' muerochteñetspa' ñeñtpa' nanaccha' cosheñtso'tsen. Ama't sapa' seño'tueñ ñeñt atet pa' ahuat Job. Ñapa' nanac ahuantan topateñets. Ñaña sapa' e'ñe seño'tueñ ñeñt atet poñ Yompor. Allempo muerochetua Job Yomporñapa' alla apuer esocmañen attoch eñoch Yomporpa' nanac amueraña.

12 Ñeñto'marña sa masheñneshacha' ñaña nochaneshacha' añ pocte' sapa'cho'ña añcha' ñanom seque'chpa'hua. Ama't e'ñe erra'tsena pa'so'chñopa' ñato't senena'ña señoñ; amach sotatsto o'ch sena' señoñ Yompor pue'ntañ pa'so'chño, ñaña amach sotatsto o'ch sena' señoñ Yompor po'patseñ pa'so'chño. Añcha'ña ñerra'm esempo e'ñe pocte' es sentenpa' attach sanap: "Atette'ca'ye." Ñaña ñerra'm esempo ama es pocte' sentenopa' attach sanap: "Ama atteyaye." Allotpa' ñeñtach. Allochñapa' amach eñalle attoch otteñe'chuerres Yompor.

Añ pocte' chocmach yema'yocham̄psannena

13 Añña ñeñt poctetsa ñeñtcha' atet sepa. Ñerra'm erra'tsenotes muerochtatsapa' chochña sema'yocha. Ñaña ñerra'm esesha' e'ñe coshetsapa' e'ñe pocte' morrechetepa' allo ya'ye'chochtateñ Yompor.

14 Ñaña ñerra'm eseshas atsna'tetspa' añ pocte' o'ch sagotach ñeñt pompornesha' pen ñeñt ame'ñetsa, attochña ñetcha' ma'yocham̄pset atsnañe't. Allotpa' e'ñe puechore'teño'tet Yomporpa' noñetepa' coñe't es puese' atsnañe'tesho.

15 Ñerra'm e'ñe pueyemteño'tet Yompor ma'yochetpa' atsnañe'ñapa' corrrach. Tarro'mar Yomporpa' ñach ahua'mencat perre'. Ñaña ñerra'm añ o' pohua ñeñt ama pocteyayepa' allempo Yomporpa' o'ch alla peretnerrñañ po'chñar.

16 Ñeñto'marña añ pocte' o'ch sa'meta'huerr allohuenes so'chñar. Allochñapa' chocmach sema'yocham̄psannena attoch socrrerra e'ñe cohuen. Ñaña ama't erra'tsena acheñer ñerra'm e'ñe cohuen cotape'chen Yomporecop ñaña ñerra'm e'ñe pueyo'chrocmañen ma'yochetpa' atetña e'mñotenña Yompor.

17 Atet pa' ahuat Elías ñeñt a'mtaye't Yompor po'ñoñ. Ñeñtña Elías ama't atta ñerra'm ya ñeñtey arromña'tey. Tarraña allempo ma'yochana Yompor atto enam amach huaterropa' e'ñe allempoteñña ama huaterro ma'pa char ñaña meterrerr pechapña arorr ama huatenó.

18 Allempoñapa' o' alla ma'yocherrerr attoch enamuerran Yompor huaterrepa'. Allempoñapa' o' alla huaterra, ñaña allempopa' o' alla choparesyerr narmetso'chno.

19 Masheñneshacha' ñaña nochanesha ñerra'm sa puesheñarrotes o'ch alla sepurrerra ñeñtes te'pa' cotene' cohuen Yompor po'ñoñ, tarraña ñerra'm esesha'ña alla soctape'chaterre' e'ñe cohuenpa'

20 sapa' señoche'pa'ch ñeñĩ atet' cotape'chatets e'ñe cohuenpa' čoch a'qushp'atenan pamo'ts puecamquẽñ ñeñĩ atarr ochñaĩ ñaña čoch peretnateññañ allohuen shonte' po'chñar. Te'pa' ñeñĩach notas. Allohua.

Santiago

AÑ ÑANOM SAN PEDRO PO' CARTA 1 SAN PEDRO

Atto Pedropa' quellcan carta allohuenacop ñeñt ame'ñetsa ñeñt atta a'parratse'tataret

¹⁻² Masheñeshacha' ñaña noçhaneshacha' ñeñtes a'yetaten ñeñt sa'mueroçhtatene'. O' e'ñe sesuanom seney o' atta a'parratse'tataset allemeña anetso'mar, all anetso Ponto ñaña Galacia, ñaña Capadocia, ñaña Asia ñaña Bitinia. Sapa' ñeñtes ahuafoñ nase't Yompore Paret e'ñe ñocop. Ñapa' e'ñe eñotuase't sach a'cohuentatarettertsa Partsocop. E'ñe ña Puecamquëñpa' ñeñtña sa'cohuentaterre'ña sa attotña e'ñe same'ña'hueraña Jesucristo. Attoña ña po'rraspa' ñeñtña o' e'shohuerrnasña so'chñar. Na Pedron sequellquëne'ña añ carta, napa' ñeñten Jesucristo puellsensaren. E'ñe nehuomcha'teñoñes sa napa' o'ch notas: Yomporepa'chña atarr sebensare'tam'pene', ñepa'chña socshatene'ña e'ñe sa seyoçhro allohuenes.

E'ñe yeyemteñoñ Yepartseshar Jesucristo çhocmach yecuame'ten ñeñt o'patatare'tey

³ Te'ñapa' aye'choçhtaterrapo'ch Yompore Paret ñeñt Yepartseshar Jesucristo Pompor ñeñtara ñeñt Po'yomporer pen, tarro'mar o' ye'ñallettera etserra e'ñe ña nanac puemuereñoñey. Allempoteñña ya e'ñe yeyemteñoñ ña çhocmach yecuame'teñ esempohuañen tarrempohua allempoch ama ya'rromña'terro. Atto Jesucristopa' o' tanterra, ñeñto'marña yapa'cho'ña yecuen yaña attoch amach ya'rromña'terro.

⁴ Ñaña yeyemteñoñ çhocmach yecuame'ten ñeñt o'patatare'tey pue'ntañoñ tarro'mar allpa' allña añno'tare'ttenaña alloch yequeshperra. Ñeñtña queshpeñetspa' amach ahuañaña'terro, ñaña ama asosyatño, ñaña ama amllasha'tño.

⁵ Sapa' e'ñe seyemteñoñña Cristo Yomporpa' a'natasepa'ch. A'natasepa'ch çhocma attoch sequeshpa'huerra esempohuañencha' mellapoterra. Yompore po'huamencopa' a'natasepa'ch attoch e'ñe seño'tuerr po'ñoçh e'ñech sequeshpa'huerra.

⁶ Ñeñto'marña te'pa' allohuenespa' socshepa'ch. Ama't te'ña atto semue-roçhtenapa' ñeñt'pa' e'ñe mamec'pa. Tarraña ama't o' çhaponasa pa'namen topateñetspa' sapa' çhocmuepa'ch socsheña Yompore.

⁷ Tarro'mar nanac huomenc echarr yenteñ, tarraña Yomporpa' eñoçcha' ñerra'm po'ñoçh e'ñe yame'ñeña ña. Atet ñerra'm oropa' çhoch ñanom at-serrtachtet huomenc allochña'pa' o'ch eñoçhet ñerra'm po'ñoçh ñeñt'pa' e'ñe'te' oroche'. Ñeñtña ama't oropa' huañerrcha' esempo. Ama't nanac tsa'te' oro, tarraña atto po'ñoçh yame'ñera Cristo, ñeñtña ello nanac sherbets. Ñerra'm po'ñoçh yeyemteña ña, yeyemteñoñ ñapa' e'ñech cohuen entyesuerrey esempohuañencha' huerra Jesucristo, attochña e'ñe cohuen yecohuentapretera, e'ñech cohuen ya'm'cha'tare'ttapretera.

⁸ Jesucristo ama't ama sentarñepa' te'ñapa' o' semorrentera. Ama't ama senteñe, te'ñapa' o' same'ñera. E'ñe socsheñeshocmañen o' same'ñeña, ñeñtña cosheñetspa' atarr nanac cohuen. Te'pa' amach erra yenerre'te yeñoñ ñeñt'cha' atet yoterrerr.

⁹ Attoña e'ñe same'ñeñoñ Cristopa' sa'queshpaterrcha' secamquëñ.

10 Ñaña o'ch notas, ama't ñeñt a'mta'yese't Yompor po'ñoñ ahuatpa' ñeñña serrpare'tete't allempo attoch orrtaterrnay Yompor puemuerena alloch yequeshperra. Tarraña ñetpa' ama e'ñeye' eñochete'te erro'tente'ña alloch yequeshperra. (Ñehua, allempopa' amaca'ye orrtena' Cristo arr patsro.) Ñetpa' ñeñña nanac e'netañe't erro'tente'ña ñeñtcha' a'queshpatañtertsa. Ñetpa' nanac a'p'to'tanna'tyese't e'ñe ñagattseta erro'tente'ca'yeña Yompor puemuerena alloch e'ñe yequeshperra.

11 Ñetpa'cho'ña e'ñe Cristo Puecamquëñña chorrahuetet ñeñña eñotatahuetet o'ch orrterra ñeñtcha' Cristoterrets arr patsro. O'ch chap añe patsropa' elloñapa' o'ch muerochtateret. O'ch amurochtataretetuapa' allempochña orrtaterranña po'cohuenña. Tarraña ñeñt a'mta'yese't Yompor po'ñoñ ahuatpa' o' alla a'p'to'tanna'tyerretter; ta', ¿eseshachña Cristoterrets? ¿Esempo'tcha'ña orrterra?

12 Yomporpa' eñotatanet ñeñtpa' amachca'ye ahuenaye' etsoterro; shonte'ch char allempochña etsoterra atet eñotatanet Yompor. Tarraña ñeñt eñotat allempopa' ñeñtpa' ama ñocpuetayaye, ñeñtpa' e'ñechca'ye yocop. Te'ñapa' ñeñt seserrpare'tatene' cohuen ñoñetspa' ñeñña señotatene' e'ñe cohuen ñeñt atet penaña ñeñt cotapñats. Parets Puecamquëñ ñeñt huetsa pue'ntañotpa' ñeñña eñotatenahuetña attoch serrpare'tataset saña añ cohuen ñoñets. Ama't Parets po'mllañoteñnaneshar ñetpa'cho'ña atarr mueneñet o'ch eñochet ñamet ñeñt o' señotuerr sa.

Añ poctetsa o'ch yepomhuerra yañeña e'ñe Partsocop

13 Ñeñto'marña te'pa' añ poctetsa e'ñe sa señoñeñotpa' e'ñech cohuen soctape'chen. E'ñe seyemteñot'ñapa' o'ch secuame'teñ esempoch huerra Jesucristo. Allempopa' ellochña nanac muera'huerrsa, cohuencha' es aphuerres.

14 Se'mñoch Yompor atet ñerra'm ñapa' puechemerasha'ch perres. Amach añ seychatsto atet ñerra'm ahuat allempo ama señoñeña'; allempopa' añ semnatse'tyese't ñeñt ama cohuenayaye.

15 Yomporpa' e'ñe cohuenare' es pen. Ñeñtara Yompor ñeñt o' hua'ñerrey ya. Ñeñto'marña yapa'cho'ña añ poctetsa o'ch yepomhuerra yañeña e'ñe Partsocop. Atet ñapa' e'ñe cohuenare' es pen, yapa'cho'ña añ poctetsa o'ch ye'pa' atet es pen ña.

16 Atet otene'y Yompor po'ñoñot' ñeñt anuaret ahuatoteñ: "Atet nepena na ñeñten Seyomporer sepen, napa' e'ñe cohuenare' es nepen, sapa'cho'ña e'ñepa'ch cohuenare' es sepen."

17 Yomporpa' ñach tsa'taterrahuet allpon ye'chcatyese't ñeñt ama cohuenayaye. Amach eñalleña ama't puesheñarra ñeñtcha' queshpatsa ñeñt ama ame'ñenaye ña. Atto yema'yocheña Yompor ñeñtcha' yetsa'tatuerraya, ñeñtpeñapa' te'pa' añcha'na'tpo'ch Yompor. Ama't allponmat socrena arr patsro ñeñtpa' ama sa'netsreyaye, e'ñech tayoteñ semcha'na'tnom Yompor.

18 Sapa' satañeshañpa' apa'nmaset poctapña atet pete't e'ñe orrena. Te'ña sapa' o' seño'ter Yomporpa' o' tsa'tuonasa attoch sesuanom ñeñt ahuatnaneshañ poctapña. Ama quellayoye' tsa'tonaye. Quellepa' ahuañaña.

19 Añña atto tsa'tonaya po'rraso Puechemer ñeñt Cristo. Po'rraspa' ñeñt nanac sherbets atet ñerra'm carrnerotollpa' e'ñech co'chnesha' muetsetet Partsocop.

20 Ama't ama aye'chcatarettena' pats Yomporpa' o' nan Puechemer Cristo, ñach tsa'terraya yo'chñar. Ama't ahuatoteñ anaretpa' tarraña ama orrteno añe patsro. Te'ñapa' orrta e'ñe yocop, tarro'mar te'pa' o' mellapoterrmocha.

²¹ Yame'ñeñoť Cristopa' o'ch yeyemterrñaña Pompor, tarro'mar Pomporpa' o' tantater ama't o' rromhua. Tantater attoch alla e'ñe cohuentater Pompor. Ñeñto'marña te' yapa' o'ch yeyemcha Yompor, o'ch yecuame'toñ ñeñť o'patatenya.

²² Sapa' o' same'ña'hua ñoñets ñeñť e'ñe po'ñočh Yompor po'ñoñ. Ñeñto'marña e'ñe Parets po'huamencot o' sesuanom allpon sosya'tsañ ñeñť seyočhro'tsen, attoťcha' e'ñe semorrentanna'ta. Te'ñapa' semorrentanna'tepa'ch poctacma e'ñe seyočhrocmañen.

²³ E'ñe yame'ñeñoť Yompor po'ñoñpa' o' ye'ñallettera etserra. Añ eñalleteñetspa' ama atteyaye ñerra'm allempo eñalletey yachor. Atto eñalletey yachorpa' ñeñťpa' huañerrcha'. Añña Yompor po'ñoñoťña ye'ñallettera ñeñťpa' amach ahuañañaťterro ama't errponaña.

²⁴ Tarro'mar Yompor po'ñoñ ñeñť anuaret ahuatoteñ ñeñťpa' atet oten: Allohueney ñeñťey arromñaťeypa' attey ñerra'mrrate' ta'te' tarro'mar mamecpa yocrrena. Ñaña ñeñť cohuen yentyen ya, ñeñťpa' atet ñerra'mrrate' ta'te' puerorer. Ta'te'pa' o'ch hueya'hua pue'chorpa' puerorerpa'cho'ña ama't cočhnesha'tenañpa' shor'cha'tuach.

²⁵ Tarraña ñeñť Parets po'ñoñpa' amach ahuañañaťto ama't errponaña. Ñeñť po'ñoñpa' ñeñťara cohuen ñoñets ñeñť o' serrpare'tatuaset saña.

2

¹ Te'ñapa' añ poctetsa o'ch sesuanem allohuen ñeñť ama cohuenaye' enteno Yompor. Atto ora allpon allo seshcanna'tenapa' o'ch sequečpa'huer. Añ shecaneñets ñeñť attoch entenes po'psheñeñ e'ñe cohuenpa' ñeñťpa'cho'ña añ palltetsa te'pa' o'ch sequečpa'huer. Atto seye'chapretannenapa'cho'ña o'ch sepuesuer ñaña. Sasare'teñetspa'cho'ña o'ch sepuesuer.

² Añña poctetsa atarrcha' yeye'cheññaña Yompor po'ñoñ e'ñe atet pena ematołlpa' nanaccha' ye'chenana puemomos. Yapa'cho'ña añ poctetsa o'ch yeye'chya atet ñerra'm ñeñť yemomos yepen, tarraña ñeñťpa' ñeñťara Yompor po'ñoñ. Yompor po'ñoñpa' nanac cohuenare' alloch yocshaten yecamquëñ, attoťcha' allo'na yesen eñotnomue' ñeñť poctetsa Yomporecop attoťña a'queshřatareťeycha'.

³ Sapa' o' señoťuerrñañ Yompor puemuereña atto ñapa' nanac muerensa. Ñeñto'marña añ poctetsa sapa'cho'ña o'ch seye'choña po'ñoñ.

Atto Cristo atma'ntatareťta mapue'; elloña ñapa' nanac sherben alloch e'ñe yocrterra

⁴ Añ poctetsa o'ch separrocmaterr epas Cristo. Cristo ñeñť atarr sherbets atet ñerra'm mapue' ñeñť nenet quellpach pa'rrřot allo orratenet pocoll ñeñť nanac echarr. Tarraña mapue' ama't nanac sherbenpa' ama añeyaye alloch e'ñe yocrra. Añña Cristo atto sherbenpa' allochña e'ñe yocrra po'ñočh. Ama't acheñenesha' ama't ama cohuenaye' enteñeto Cristopa' Pomporñapa' e'ñe pocte' enteñ. Pomporñapa' ña acre' ñeñťcha' nanac sherbats ñocop atet ñerra'm mapue' ñeñť nanac cohuen allochña tomatenan pa'paquëll.

⁵ Yomporpa' pa'paquëll penan allohuen ñeñť ame'ñenaya ña. Yapa'cho'ña attey ñerra'mrrate' mapue' alloch tomatenan pa'paquëll. Tarraña yapa' atteyeyñ ñerra'mrrate' mapue'pa' tarraña yapa' ñeñťey o'rrerrñaťot yocrrena. Yapa'cho'ña añ poctetsa o'ch yattecmatuerr ñerra'mrrate' Parets pa'paquëll. Allñapa' yesherberrcha' Partsocop. Yecamquëñoťpa' o'ch yepomhuerra e'ñe yeyo'chrohuen yepomuerra attoch Paretspa' coshena. Yame'ñeñoť Jesu-cristopa' o'ch yesherber erroťencha' muenateney Parets.

⁶ Tarro'mar atet oteney Yompor po'ñoñ ñeñt anuaret ahuatoteñ, ñeñtpa' atet oten Yompor Cristocop:

All anetso Sión ñeñtara Jerusaléñ o'ch nemñanet puesheñarr ñeñt atarr sherbets ñeñt atet ñerra'mrrate' mapue' ñeñt acrareñ ñeñt nanac sherbets ñeñt alloch natomat nepaquell. Ñerra'm esesha' ame'ñenaya ñapa', ñetñapa' amach alla e'nerrete'te po'psheñeñ.

⁷ Ñeñtey ame'ñenaya Cristopa' e'ñech yocsheñeshocmañen yenteñ. Añña ñeñt atpare'tene' Yomporpa' atetcha' enteñet Cristo ñerra'mrrate' mapue' ñeñt huapore'ten ñeñt tomatene' pocoll tarro'mar atet enteñet Cristo ñerra'mrrate' ama es sherbeno. Ñeñto'marña Yompor po'ñoñpa' atet oterryerr:

Añ mapue' ñeñt huapore'ten ñeñt tomatene' pocoll, ñeñña mapue'pa' Yompor nene' ñeñtcha' nanac sherbets.

⁸ Añ ñeñtara Cristo ñeñt toma'ntenaya

Mapue' allcha' epoto'tena ñeñt ama ame'ñetso ñeñtcha'ña a'shoratahuet chenquëñtso.

Añ epoto'teñetspa' añ toma'tena atto atpare'teññañet Cristo po'ñoñ. Ñeñto'marña atet anaret, ñerra'm ama yame'ñyopa' e'ñech yechenca'huerra.

Ya ahuatpa' ama esona'tareyayye, te'ñapa' e'ñe Yomporena'tarey

⁹ Tarraña sapa' ama añeyayso ñeñt atpare'tene' Yompor. Ya ñeñtey ame'ñenaya Yomporpa' atetcha' enteney ñeñtey acrare'tterrtsa ñocop. Ñaña atetcha' enteney ñeñteycha' sherberrets Partsocop, ñeñteycha' anare'tterrtsa ñocop. Ñaña e'ñech Yomporena'tar enteney. Ñeñto'marña yocoppa' añ poctetsa o'ch yorrtatyesoñ po'cohuenña. O'ch yeserrpare'toñ atto ñapa' cheterrey checmetot all sosya'tsañoñ, te'ñapa' o' chapaterrey e'ñe ña po'puetarenño all e'ñe cohuentena ña.

¹⁰ Ahuatpa' ama esona'tareyayye, te'ñapa' Yomporena'tarey. Ahuatpa' ama amuerare'teyayye, te'ñapa' o' ya'muerare'tterra.

Atto cohuen es yepen attochña e'ñe cohuen yesherbeñ Yompor

¹¹ O'ch masheñneshacha' ñaña nochaneshacha' e'ñe nemorrenteñoñes o'ch notas: Sapa' ama't seyçhenañ añe patsro ñeñtpa' ama sa'netsreyaye. Ñeñto'marña añ poctetsa o'ch sa'ypo'ñañpes ñeñt muenatse'tyese't sechets. Atet muena'yen yechetspa' ñeñtña quellarene'ña yecamquëñ; mueneñ o'ch a'chencatonay yecamquëñ.

¹² Ñeñt ama ame'ñetso seshopa' añ poctetsa o'ch sorrtratoñ ñeñt atet e'ñe cohuenare' es sepen. Allochñapa' ñerra'm mueneñet o'ch sasare'tasetpa' o'ch entonaset atto e'ñe cohuenare' es sepen. Allochñapa' ñerra'm esempo huerra Cristo attoch eñotatuerrey ñeñt atet ye'pa'yena, ñetpa'cho'ña o'ch aye'chochtaterrñañet Yompor.

¹³ Te'pa' o'ch notas ñaña, allpon ñoñets ñeñt nen añcha'taret añ patsropa' añ poctetsa o'ch same'ñya. Yame'ñeñoñ Yepartseshar Cristopa' añ palltetsa o'ch yame'ñera ñaña allpon ñoñets ñeñt nen ñeñt atarr añcha'tare'ttetsa arr patsro.

¹⁴ O'ch same'ñera ñaña ñeñt mueñen añcha'taret ñeñtcha' a'coñchatuene' allohuen ñeñt ama pocteye' es petso, ñaña ñeñtara ñeñtcha' coshapretene' allohuen ñeñt e'ñe cohuenare' es pets.

¹⁵ Tarro'mar atet muenen Yompor: chocmach yorrtaten atet e'ñe cohuenare' es yepen. Ñato' yorrtateñoñ e'ñe cohuenpa' o'ch quechpa'huerret atto eñosatse'tyenet. Ñetpa' patpare'teñoñet eñosatse'tyenet tarro'mar ama es

eñoteneto. Ñato' yorrtateñoť e'ñe cohuenpa' o'ch yequečhpaturranet atto eñosatse'tyenet.

16 Ñaña e'ñech same'ña cohuen ama't Yompor po'ñoñpa' ama añcha'nochenaye' senteñe socop. Tarraña ama't ama añcha'nochteno po'ñoñ yocoppa' amach allo'na yeřa'yesneno ñeñť sosya'tsañ. Añcha'ña o'ch atet yame'ña atto pueyochresha' perrey Yompor.

17 Añ poctetsa o'ch semcha'na'ch allohuen acheñ. O'ch semorrentanna'ta allohuenes ñeñtes ame'ñetsa. O'ch semcha'na'ch ñaña Yompor. O'ch same'ña ñaña ñeñť añcha'taretetyetsa arr patsro.

Añ poctetsa o'ch yemuročhtaprecha Cristo

18 Ñeñtes ataruasatareťespa' o'ch notas, añ poctetsa socop. Semcha'na'teñoťpa' o'ch same'ña samo'mte'. O'ch same'ña samo'mte' ñeñť amueraña. Alloťpa' o'ch same'ña ñaña ñeñť ama't ama amueraño.

19 Ñaña ama't po'psheñeñ muročhtateney ama't allempo yepen ñeñť cohuenare', e'ñe yame'ñoť Yomporpa' amach ya'tsrre'matsto, ñeñťpa' e'ñech pocte' enteney Yompor.

20 Ñerra'm esempo čho erroť yepeñ po'psheñeñ ñerra'm coñchatuerrey, ñeñťpa' e'ñe pocte' yecoñchepa'. Ama't ama ya'tsrre'mo allempo, tarraña amach cohuenaye' entenye Yompor, tarro'mar ñeñťpa' čhocma mueneñ o'ch yecoñcha. Tarraña ñerra'm esempo ama't yepena ñeñť cohuenare' ñato' ama't muročhtatey po'psheñeñpa' ñerra'm ama ya'tsrre'mopa' ñeñťpa' e'ñech pocte' enteney Yompor.

21 Ñeñto'marña te'pa' yapa' o' hua'ñerrey Cristo attoch yame'ña'huera, allochñapa' o'ch yemuročhtaprecha ña. Ñapa' ña ñanom muročhtatsa, tarraña ñapa' yečhatnerrey attoch añ poctetsa o'ch yemuročhtapretera ña.

22 Ñapa' ama eñalletatane'te po'chñar ama't coñe'ta. Ñapa' ama sheca'ye'te ama't parrocha.

23 Ama't allempo sasare'chete'tpa' ñapa' amach ellopa' sasare'terraneto ñaña. Ama't allempo muročhtachete'tpa' ñapa' amach ellopa' o'terraneto o'ch nemuročhtaterres saña. Ñapa' ña e'ñe yemte't Pompor, tarro'mar eñoteñ Pomporpa' a'poctaterrñañcha', tarro'mar ñapa' ña e'ñe pocte' es pets.

24 Ñapa' ña yecoñchaterr e'ñe ya yo'chñarof allempo muročhta all corsocho. Allempoña rroma e'ñe ña po'chtsoťpa' o' ahuanmamperrey yo'chñar. Te'ña yocoppa' añ poctetsa o'ch ya'ypo'ña'huerr ora yo'chñar o'ch yeperra ñeñť atet poctetsa Partsocop. Atto atarr atserrpare'terra ahuať ñeñťpa' attoña a'queshpaterrey ya.

25 "Yapa' ahuaťpa' attey ñerra'm carrnero. Ya'ypo'ña'uye't ñeñť yecuanpene'." Tarraña te'ñapa' o' alla yoctape'cherr e'ñe cohuen, o' yeyemtera Cristo ñeñť yecuanpene', ñeñtara ñeñť Pamo'mte' pen ñaña yecamquēñ.

3

Arrpa' all cotape'chatan ñeñť arrollaretnesha'

1-2 Sapa'čho'ña ñeñtes arrollaretes, o'ch notas saña. Añ poctetsa o'ch same'ña serrollar. Chocmach same'ña serrollar ama't serrollarpa' ama ame'ñenano Yompor po'ñoñ. E'ñe cohuen same'ñoť serrollarpa' ama't ama erroten es soteno ñato' attoťpa' o'te' ame'ñerra ñaña serrollar. Ñetpa'čho'ña o'ch cotape'cherret e'ñe cohuen ñerra'm esempo entennaset atet e'ñe cohuenare' es sepen.

³ Amach e'ñe patrira sema'yoçhratsto atto secohuentena e'ñe orrena. Atef ñerra'm sechpa' amach ñeñta sellquëno o'ch sañño'teñ e'ñe cohuen attoch enteney yamo'tsesha' e'ñe cohuen, tarraña ñeñtpa' e'ñe orrena. Ñaña amach e'ñe patrira sema'yoçhratsto attoch sech alloch secohuenta atef ñerra'm oro, tarraña ñeñtpa'cho'ña e'ñe orrena. Amach sema'yoçhratsto ñaña attoch sechorra'yesa e'ñe coçhnesha'. Añ añaño'teñets ñeñt yentapretannena e'ñe yechsopa' ñeñtpa' e'ñe orrena orrtateney e'ñe cohuen.

⁴ Añcha'ña yema'yoçhra o'ch yecohuentena yeyoçhro attoch Yomporpa' entapretey e'ñe cohuen. Añ cohuentañets yeyoçhro ñeñtpa' ama entpahuoy-aye tarraña ñeñtpa' amach ahuañañañterro. Atef ñerra'm muereñets ñeñtpa' e'ñech cohuen entapreteney Yompor. Ñerra'm ama atsrre'mñañeyaye ñeñtpa'cho'ña e'ñech cohuen entapreteney Yompor. Ñerra'm e'ñe cohuen yoctape'chen, Yomporpa' entapreteney yocta'ña atef ñerra'm ñeñt nanac sherbets, ñaña ñeñt nanac coçhnesha'.

⁵ Atef pa'yese't ahua't coyanesha'çhno ñeñt e'ñe cohuenare' es pa'yestse't Partsocop. Ñetpa' e'ñe pueyemteño'tet Yomporpa' e'ñe cohuen ame'nyete't puerrollaret. Ñetña pueyoçhretpa' e'ñe a'cohuenchete't Yomporecop.

⁶ Atef pe't ñaña ahua't Sara. Ñapa' e'ñe cohuen ame'ñane't puerrollar Abraham. Ñapa' e'ñe atef entane't puerrollar ñerra'mrrate' ñeñt pamo'mte' pen, nanac ame'nye't. Sapa'cho'ña te'pa' sachorcha' seper Sara ñerra'm ama semchaño'ta es pocte' sepa'yeno samña.

Attecmach cotape'chatan ñaña ñeñt ataporetnesha'

⁷ Attecmach notas samña ñeñtes ataporettes. O'ch semuerya setapor e'ñe cohuen. Sapa' o'ch senteñ samña setapor e'ñe cohuen, tarro'mar coyanesha' ama tama ahuamencate. Añcha'ña o'ch sagaphuer parro ñeñtcha' apas Yompor. E'ñe puemuereño'tes sapa' apascha' allochña sapa' corretsasach socsheñeshocmañen e'ñe tayoteñ errponañohuen. O'ch seycha e'ñe cohuen epas setapor, attotcha' Yomporpa' e'mñotas ñerra'm esempo sema'yochya.

⁸ Te'ñapa' o'ch notas allohuenes. Añ poctetsa o'ch soctape'cherr e'ñe patrira ñeñt amuerañtetsa. Ñaña o'ch sellcapretanna'ta ñerra'm esempo es sellcatyene'. Ñaña e'ñech cohuen yemorrentanna'ta allohueney ñeñtey ame'ñetsa, ñaña e'ñech cohuen yemueranna'ta. O'ch es yentaprech po'psheñeñ e'ñe cohuen, amachña yañeña e'ñe cohuen entatstatso.

⁹ Ñerra'm po'psheñeñ erro't paspa' sapa' amach setsa'tatatsche eso. Ñerra'm po'psheñeñ sasare'taspa' sapa' amach sesasare'tatsterraneto. Añcha'ña o'ch senamoñ Yompor a'nachepa', tarro'mar atef muenen Yompor atetcha' ye'pa. Allochñapa' ñerra'm atef ye'papa' ñapa' o'ch a'natenya yaña.

¹⁰ Tarro'mar atef oteney Yompor po'ñoñ:

Ñerra'm yemneñ o'ch yeycha e'ñe cohuen, ñaña ñerra'm yemneñ o'ch yocsherrapa' ñeñtpa' añ poctetsa, amach yesasare'tatsto, ñaña añ poctetsa, amach yeshcare'tatsto.

¹¹ Ñerra'm yemneñ e'ñe cohuen yocsherra, añ poctetsa o'ch yesuanem ñeñt ama cohuenaye' enteno Yompor. Ñeñt e'ñe atef muenen Yomporpa' ñeñtcha'ña atef ye'pa. Ñaña añ poctetsa, o'ch ye'nerr attoch yentannena e'ñe cohuen epay yamo'tsesha'. Te'ñapa' allo'nepa'ch yesen entanna'ttsa e'ñe cohuen.

¹² Yomporñapa' e'ñech cohuanñpeney ñeñtey e'ñe pocte' es pets. Ñapa' e'mñoteneny allempo es yenamueñ e'ñe ñesho. Añña ñeñt petsa ñeñt ama pocteyayepa' Yomporñapa' amach cohuenaye' enteñe ama't mamesha.

Ñerra'm esempo e'ñe attota muerochtatenyet yapa' atarrcha' cosheñtso'tseney

¹³ Ñerra'm sapa' chocma sema'yoçhrena ñeñt' cohuentetsa Yomporecop, allempoñapa' amach esesha' errotenot' semuerochtataye.

¹⁴ Tarraña ñato' errotenopa' o'ch muerochtataset ama't añ sema'yoçhrena ñeñt' cohuentetsa Yomporecop. Tarraña ñerra'm e'ñe attota muerochtatasetpa' sañapa' atarrcha' cosheñtso'tsenes. Amach sem'cha'tatstaneto ñaña amach sellcatsto.

¹⁵ Añcha'ña o'ch seyemcha Cristo e'ñe seyoçhrohuen. O'ch senteñ Cristo atarr cohuen Parets ñeñt' Yepartseshar yepen. Ñerra'm esempo esesha'pa' o'ch a'p'to'tas ¿eso'marte'ña atarr same'ñeñaña Cristo? sapa' chocmuepa'chña e'ñe cohuen señoñeña atet'cha' sanap e'ñe cohuen. E'ñe semuereño't e'ñech acopa sanapanet e'ñe cohuen e'ñe sem'cha'na'teñoñanet.

¹⁶ Chocmach e'ñe señañesha' seyoçhro e'ñech cohuenare' es sepen. Allochñapa' ñerra'm ama't esempo sasare'tenyetpa' ñeñt'ña atto e'ñe pocte' es yepa'yen Cristocoppa' ñeñt'pa' ñeñt'cha'ña pencatahuet.

¹⁷ Añ pocte' ama't yemueroçhta atto ama't e'ñe cohuenare' es yepen. Ñerra'm atet' muenen Yomporpa' pocte' o'ch yemueroçhta. Añña ñerra'm e'ñe yo'chñarot'pa' o'ch yemueroçhta, ñeñt'pa' orrenach yemueroçhta.

¹⁸ Ama't Cristopa'cho'ña ahua'tpa' atarr muerochtachete't. Ñapa' ña rromats e'ñe parrocha allohuenacpay attot'ña tsa'tuerrnaya yo'chñar. Cristo ama't ña ñeñt' e'ñe pocte' es petspa' attot'ña rroma yocop ñeñt'ey ama pocteye' es petso. Tarro'mar rroma yocop attot'cha' yeparrocmaterr epay Yompor. Ña ama't rroma po'chtso'tpa' puecamquëñña'pa' ama rromo.

¹⁹ E'ñe puecamquëñña'pa' arr ahuo' allo'tsa'yen ahua'tnaneshañ puecamquëñneshañ ñeñt' alla ayottam'psaret, ñeñt' ama cha'netso. Ñaña puecamquëñ allña'pa' serrpare'tatosanet.

²⁰ Ñehua, añ puecamquëñ ñeñt' ahua'tnaneshañ ñeñt' nanac atpare'taye't Yompor po'ñoñ allempo corre't Noé. Allempopa' Yompor nanac cohume'tanetañe't o'ch ame'nyet. Allempoteñ Noépa' yechcatane't po'compuer, Yomporpa' cohume'tanete't esesha'ch ame'ñatsa. Tarraña ama eseshaye'ña ame'ñatso, e'ñe posocsheña ñeñt' ame'ñatsa. Añ posocsheña ñeñt' ame'ñaya Yomporpa' ñeñt'ara posocsheña ama esesha' ño'sha'tso, ñetpa' qeshpet oño't.

²¹ Tarro'mar yapa'cho'ña te' ñerra'm yapataretta oño't Partsocop e'ñe atet' pena ñerra'm ahua't Noépa' o' qeshpa' e'ñe oño't. Ñeñto'marña yapa'cho'ña ñerra'm yame'ñeño't o' yapataretta Partsocop e'ñe oño'tpa' yeñoteñ o' yequeshpa. Ñehua, ñeñt' apataretteñetspa' ama añecpayaye o'ch yapa oño' attoch huañ yepatser. Añcha'ña ñeñt' alloch yequeshpa. Atto yapataretta Partsocop o'ch yenam' Yompor etserrataterrnayepa' yoc'apña e'ñe cohuen. Atto yapataretta Partsocoppa' yeñoteñ o' yequeshpa tarro'mar Jesucristo atto tanterra ama't rromhua.

²² Allempo tanterra Cristopa' o' ahuer pue'ntañ. Te'ñapa' allo'tsen epuet Pompor e'ñe po'cohuenrot', allña'pa' all partsoten. Ama't allohuen ñeñt' Pompor po'millaño'teñnanesharpa' ñetpa'cho'ña te'pa' e'ñe cohuen ame'ñeñet ñamet. Ñaña ama't allohuen ñeñt' añcha'taretetyetsa pue'ntañopa' ñetpa'cho'ña ello ame'ña'hueñet ñamet. Ama't allohuen ñeñt' ahua'mencateçhnopa'cho'ña ello ame'ña'hueñet.

4

Atto e'ñe yemuerochteñoŕpa' o'ch huomenc yeŕpa' yeyoçher Yomporecop

¹ Cristo allempo aña patsro'tsenpa' ñapa' e'ñe pocte' enteñ attoch mue-roçhtateñet nanac. Ñeñto'marña sapa'çho' e'ñepa'chña pocte' senteñ o'ch semueroçhta e'ñe ñocop. E'ñe yemuerochteñoŕpa' o'ch huomenc yeŕpa' yeyoçher. Yemuerochteñoŕ yechsopa' o'ch yequeçhpa'huerr ñeñt ama pocteyaye Yomporecop.

² Allochñapa' amach allo'na yeŕpa'nenno atet muenatyese't yechets ahuat. Yocoppa' añ poctetsa o'ch yoctape'chen ñeñt atet muenen Yompor.

³ Te'ñapa' ñeñteshañach atet seŕpa atet seŕpa'yese't ahuatoteñ ñeñt atet pena te' ñeñt ama ame'ñetso. Ñetpa' aña pa'namen pa'yenet ñeñt atarr sosya'tsañeçhno ñeñt allohuen pa'namen muenatse'tyeñets sosya'tsañ ñaña posa'tarñats ñaña coshatse'teñets ñaña orrare'teñets ñaña muechatse'teñets ñeñt ama't mameshapa' ama pocteye' enteñe Yompor. Te'ñapa' ñeñteshañach atet seŕpa' ñeñt semnatse'tyen sa.

⁴ Ñeñt peyemte't ahuat ñeñt epaŕ pŕorrare'te'tpa' te'ñapa' amach çhapaneto pueyoçhro eso'marte' o'huañ pŕorrare'tapretanet. Attoña ñetpa' mueneñetcha' o'ch achmãare'taset.

⁵ Tarraña te'pa' o'ch notas, ama't ñeñt ama ame'ñetso, esempohuañenpa' a'metatuerranetcha' Yompor. Po'ñoçh ñapa' ñach tsa'taya ñeñt ame'ñetsa. Ñaña ama't ñeñt ama ame'ñatsopa'çho' ñach tsa'tatuerrahuet, ora allohuenet, ama't ñeñt corretsa, ñaña ama't ñeñt o' colla'huena.

⁶ Ñeñto'marña ama't ñeñt arromñañesha' o' aserrpare'tatuarettet cohuen ñoñets. Allochñapa' ama'tcha' a'coñchatare'tetañ po'chtso'tet atet pena allohuen arromñañesha', puecamquëñoŕotñapa' corra'huerretcha' e'ñe atet correna Yompor.

⁷ Te'ñapa' o' mellapoterrmocha. Ñeñto'marña añ poctetsa, e'ñe yeñotateñoŕpa' o'ch yema'yochera Yompor. E'ñech yetpara es yepen attotcha' amach yepseñe Yompor ma'yochaya.

⁸ Añpa' ñeñña ñanom nanac sherbets: o'ch yemorrentanna'ta nanac e'ñe yeyoçhrocmañen. Yemorrentanneñoŕpa' o'ch yeŕpretnanna'ta atto erroten yeŕpannena.

⁹ Ñaña e'ñech socsheñesha' o'ch sagapannena e'ñe sepaçllo.

¹⁰ Yompor puemuereñoŕpa' o' e'ñe apa'yenas attoch seŕorra'yena e'ñe ñocop. Te'ñapa' o'ch notas, o'ch seyennanna'ta año ñeñt apuenes Yompor. Attochña sesherbatyenañña Yompor puemuereña.

¹¹ Ñeñtapa' atet ñerra'm eseshas serrpare'tatspa' Yomporepa'chña po'ñoñ seserrpare'ten. Ñerra'm eseshas yenpuene' po'psheñeñpa' Yomporepa'chña po'huamenco't seyennannena. Allochñapa' yeparrocmateñoŕ epay Jesucristopa' o'ch ya'ye'choçhtatuerrñañ Yompor. Yomporepa'chña aye'choçhtatuapo' allohueney. Amcha'na'tpahuepa'ch po'partsoña tayoteñ errponohuañen. Ñeñtapa' attepa'chña Nompore.

Ñerra'm esempo sasare'tenyet atto yapa' yecristona'tarterra yañapa' atar-cha' cosheñtso'tseney

¹² Amach masheñneshacha' ñaña noçhaneshacha' seyorenatsto ñerra'm huaponasa topateñets nanac huomenc; tarro'marcha' huaponasa o'ch topatensa'. Amach seyorenatsto atet sepena ñerra'm esempo huaponasa ñeñt ama sentare. Attecma ama't masheñnesha' ñeñto' ame'ña'huapa' attecma o' topatuanet.

13 Allempoteñ o' semueroçhtaprecha Cristo, e'ñe semueroçhteñoŧpa' socshepa'ch. Allochñapa' ñerra'm esempoch orrterra po'cohuenñapa' sapa'cho'ña socshapreterach e'ñe cohuen.

14 Ñerra'm cho sasare'tenset atto o' secristona'tarterra, sañapa' atarrcha' cosheñtso'tsenes, tarro'mar e'ñe allempoteñ Yompor Puecamquëñ ñeñt' cohuenñatsotetspa' çhaponasa sesho. Po'ñoçh ñetpa' Cristo'na sasare'tenet tarraña sapa' e'ñe cohuen secohuentateññañ Cristo.

15 Añña ama cohueno o'ch yemueroçhta yemtseñoŧ acheñ, ama't ñaña yeteñoŧ, ama't ñaña yepeñoŧ ñeñt' ama cohuenayaye, ama't ñaña ya'metanpeñoŧ attochcha' ye'moñe'tanna'ta. Ñerra'm attoña yemueroçhtapa' ñeñt'pa' e'ñech orrena yemueroçhta.

16 Añña ñerra'm añecop yemueroçhta tarro'mar o' yecristona'tarta, amach yepencatsto. Chocmach yecohuentatoñ Yompor tarro'mar o' yanerrñañ pa'so'cheñ.

17 O' çhampoch allempoch Yomporpa' acranatuerrey allohueney ya. Yapa' yanomcha' a'meterr atet enteney ama't ñeñt'ey puechemereshay o' perrey Yompor. Ñerra'm yapa' yanomcha' a'metanperr ama't ñeñt'ey ame'ñatsapa', allempopa' errotenoŧuachca' qeshperrate' ñeñt' nanac atpare'tene' cohuen ñoñets ñeñt' Yompor po'ñoñ.

18 Ama't ñeñt'ey e'ñe pocte' es petspa' e'ñech yemueroçchenñoŧa yeqeshperra, allempopa' errotenoŧuachca' çhapña ñeñt' ochñañenesha' ñeñt' atarr atpare'tene' Yompor.

19 Ñeñto'marña ñerra'm esempo yemueroçhta e'ñe Yompor puenneññoŧpa' allempopa' amach yelcatsto. Añña poctetsa o'ch alla yeyemtera Yompor e'ñe yocsheñeshocmañen yeyoçhro, tarro'mar ñapa' ña ñeñt' yeyeçcate'. Ñapa' ña ñeñt' e'ñe pocte' es pets, ñapa' e'ñech a'poctatonay. Añcha'ña allo'nepa'ch yesen cotape'cherre' ñeñt' cohuentetsa Yomporcop.

5

Atto cotape'chatan allohuen ñeñt' pompornesha' pen ñeñt' ame'ñetsa

1 Te'pa' o'ch notas samña ñeñtes pompor pen ñeñt' ame'ñetsa sesho. Napa'cho'ña nach pompor pen ñeñt' ame'ñetsa nesho. Napa' neñche't atet mueroçhte't Cristo. Tarraña ñerra'm esempo huerra po'cohuenñopa' yapa' o'ch yecohuentapretera yaña.

2 Napa' te'pa' o'ch notas sa ñeñtes pompor pen ñeñt' ame'ñetsa. Atet pena ñeñt' cohuanmpene' po'carrneror, sapa'cho'ña secuanmpescha' e'ñe cohuen ñeñt' ame'ñetsa sesho, tarro'mar ñetpa'cho' po'carrneror penanet Yompor. Amachña seçllañoŧa secuanmpsatstaneto atet sepeñ ñeñt' ama tama cohuenaye' senteno. E'ñechña socsheñesha' secuanmpenanet atet muenen Yompor. Tarraña amach sagapueñoŧa quelle secuanmpsatstaneto. Ñerra'm quellayecop yecuanmpespa' o'ch yepenca. Añcha'ña e'ñech yocsheñesha' yecuanmpsanet.

3 Amach çha sa'mcha'noçhteñoŧeye' secuanmpenaneto, ñeñtes atet anaret'es sach cohuanmpenahuet. Añcha'ña çhocmach yentatanet atet e'ñe cohuen es yepen. E'ñe yocape'chateñoŧ cohuenpa' o'ch yeyçhatenanet allohuen ñeñt' e'ñe po'carrneror pen Yompor.

4 Cristoñapa' ñeñt' yecuanmpene' allohueney atet ñerra'm po'carrnerorey. Ñerra'm esempo huerra, allempopa' yapa'cho' atsa'tareteycha'. Atsa'tareteycha' po'cohuenño ñeñt'cha' atarr nanac yocshaterre' ñeñt'pa' ama ahuañaño ama't errponaña.

⁵ Ñeñtes huepaneshas, te'pa' napa' o'ch notas samña. Añ poctetsa o'ch same'ñeña ñeñt' po'n yacma ñeñt' sompor sepen. Po'ñoçh o'ch notas allohuenes, e'ñech cohuen same'ñannena amach sañeña e'ñe cohuen entatstatso tarro'mar:

Yomporpa' ama pocteye' entenano ñeñt' atet ommo'chetsa. Añña ñeñt' ama esoye' entetso ñeñt'ña atarr muerenaña Yompor.

⁶ Yapa' yeñoteñ Yomporpa' nanac ahuamencat. Yapa' ama ya yehuamencoteye' yommo'cheno. Ñeñto'marña yeñoteñ Yomporpa' ama cohuenaye' entenano ommo'cheñets. Amach yeyemtatsto e'ñe yañeña, tarro'mar yapa' ama es yesherbena. Añcha'ña e'ñe cohuen yeyemtena Yompor, allochñapa' ñerra'm esempo ña muenats, ñachña yocshatuerre'ña e'ñe cohuen.

⁷ Ora allpon ñeñt' yellcatene' añ poctetsa o'ch yotue Yompor. Tarro'mar ñapa' po'ñoçh çhocma llecapretenya ñeñt' yellcatene'. Allochñapa' ñachña ya'metuerre' yellquëña attoch yocsha'huerra e'ñe cohuen.

⁸ E'ñe señotateño'tpa' seño'tach, tarro'mar oneñet' ñeñt' se'moñe'tene'pa' çhocma chopeñe'chen errañaren atet ñerra'm ma'yarr, çhach añcha'noçhetnena e'nyese' ñeñt'cha' a'chencat.

⁹ Añcha'ña satpare't oneñet'. E'ñe yame'ñeñot' Cristo o'ch huomenc ye'pa' yeyoçher. O'ch señoçh attecmaçh mueroçhtatuan allohuen masheñnesha' ama't ñeñt' o' ame'ña'huerra ora errañaren añe patsro.

¹⁰ Ama't mueroçhtatyasetcha' mame' tarraña Yomporpa' nanac amueraña. Ñapa' ñachña a'poctatuerre'ña socop, attoch huomenc perrnas seyoçher. Allochñapa' amach alla sepuesuere. Atet'cha' p'atonay Yompor, ñeñtey muenene' o'ch yecohuentaprecha po'cohuenño. E'ñe yame'ñeñot' Cristo yecohuentapreterach po'cohuenña ñeñt'cha' ama ahuañaña'aterrtso.

¹¹ Yomporepa'chña aye'choçhtatuapo' allohueney. Añcha'na'tpahuepa'ch po'partsoña tayoteñ errponohuañen. Ñeñt'pa' atetepa'chña Nompore.

Arrpa' all so'tnerranet po'cartot

¹² Te'ñapa' ñeñt'ach e'ñe notas necartot. Te'pa' o' notuas o'ch same'ña'huera e'ñe po'ñoçhocmañen. Ñaña o' notuas añpa' ñeñt'ña e'ñe po'ñoçh Yompor puemuereña alloch atarr bensare'tam'peney. Te'ñapa' o'ch alla noterrser; po'ñoçhpa' o'ch seyemtoña Yompor puemuereña. Ñeñt' masheñ Silvanopa' ña nequellcaten attoch neserrpare'tatas mame' añ necartot. Atet nenteñ masheñ Silvano, ñapa' nanac cohuen ame'ñenana Yompor.

¹³ Ñaña ñeñt' ame'ñetsa arr Babilonia* mueneñet o'ch huom'cha'taset ñamet añ necartot. Netpa'cho'ña o' acerranet Yompor e'ñe atet ñerra'm sa. Ñaña neyoçher Marcospa'cho'ña mueneñ o'ch huom'cha'tas ñaña necartot.

¹⁴ E'ñe semorrentanna'teño't o'ch sehuom'cha'tanna'ta.†

E'ñe seyemteño't Jesucristo, Yomporepa'chña socshatene'ña e'ñe cohuen seyochro. Te'pa' ñeñt'ach notas, ñeñt'pa' atetepa'chña Nompore. Allohua.

Pedro

* **5:13** Anets ñeñt' pa'so'cheñ Roma te'ñapa' añ toma'ntateñet anets Babilonia. † **5:14** Po'ñoçh oteneý, "E'ñe semorrentanna'teño't çhoch setso'tstsa'pa'tannena ñerra'm esempo sehuom'cha'tanna'tena." Ñeñt'pa' atet yechete't ahuat.

AÑ PUEPAÑ SAN PEDRO PO' CARTA 2 SAN PEDRO

Atto Pedropa' quellquërranerr carta allohuenacop ñeñt ame'ñetsa

¹ Masheñeshacha' ñaña nochaneshacha' allohuenes ñeñtes e'ñe attecma cohuen same'ñena atet yame'ñena yaña, tarro'mar allohueneypa' e'ñe ñapta Jesucristo ñeñt Yeyomporer yepen ñeñtara ñeñt Ya'queshpatañer yepen, ñeñña e'ñe pocte' es pets. Na Simón Pedronpa' o'ch alla nequellquërrnaserr po'poñ carta, ñeñten torretsa Jesucristocop, ña puellsensaren.

² E'ñe nehuomcha'teñoñes sa napa' o'ch notas: Yomporepa'chña atarr sebensare'tam'pene'; ñepa'chña socshatene'ña e'ñe sa seyo'chro allohuenes e'ñe seyemteñoñ Yompor ñaña Puechemer Jesús ñeñt Yepartseshar yepen.

Atetcha' ye'pa'yena allohueney ñeñtey e'ñe cohuen ame'ña'yenaya Cristo

³ E'ñe yeyemteñoñ Yompor ñapa' chocma apueney allohuen ñeñt allpon yepalltena alloch yocrrena e'ñe cohuen ñocop. Ñaña apueney attoch yoctape'cherr ñeñt e'ñe pocte' enten ña. Ñeñtpa' e'ñe ña po'partsoteñoñ apueney. Ñapa' añ muenen o'ch yecohuentapretera ña. Ñaña añ atarr muenen o'ch yorrtatapreter po'cohuenña.

⁴ E'ñe po'cohuenñoñ ñapa' atet otnerrey ñeñtcha' apuerrey ñeñtcha' nanac cohuen yenterr, ñaña ñeñtcha' atarr nanac sherberrets yocop. Añ apuerrey po'huamenc attoch amach añ atarr yemna'yeno ñeñt yentyen arr patsro. Attochña amach atarr nanac ya'sosyateno e'ñe yañeña. Allochñapa' e'ñe yeyemteñoñ Paretspa' o'ch yaguërrñañ ñeñt e'ñe atet pena ña.

⁵ Ñeñto'marña añ poctetsa, ñanomcha'ña Cristo yeyemta. Allotpa' ñaña o'ch yorrtaten atto e'ñe pocte' es yepen. Allotpa' ñaña añ poctetsa, o'ch yeñotua e'ñe ora atet muenen Yompor.

⁶ Allotpa' ñaña o'ch yepuesuanom ñeñt atet yemnatse'tyen ya. Allotpa' ñaña e'ñech ya'huanta'huanom allohuen ñeñt atarr echarr yentyen, aloteñña' o'ch yoctape'ch ñeñt poctetsa Partsocop.

⁷ Allotpa' ñaña o'ch yemorrentanna'ta, e'ñech yemo'nasheñesha' ye'pannena. Allotpa' ñaña e'ñech yemuerannena.

⁸ Ñerra'm atetcha' se'pa añe'chno atet ñeñt o' notuaspa', allempoñapa' allo'nach sesen parrocmatats epas Yepartseshar Jesucristo. Allochñapa' amach e'ñe orrena señoñtere, añcha'ña e'ñe sorrtatyen ñeñt atet muenen Yompor. Allempoñapa' nanaccha' sesherberr Cristocop.

⁹ Ñerra'm ama allo'na yeyemuetneño Cristopa' yapa' amach e'ñe es cohuenaye' yeñotueno. Chach yottena ñerra'mrrate' puesheñarr ñeñt ama cheme'tetso a'yo. Añach cheme'ten ñeñt alla'tsena. Amapa' chach yottena ñerra'mrrate' puesheñarr aporo'yet ñeñt ama entetso, ama't e'ñe mamesha. Tarro'mar ñapa' o' cha puesuerran atto Cristopa' e'ñe e'shohuerrñañeñ po'chñar.

¹⁰ Ñeñto'marña masheñeshacha' ñaña nochaneshacha' te'pa' o'ch alla noterrser. Allo'nepa'ch sesen yemuetnomaya Cristo atto ñapa' o' hua'ñerres attoch same'ñeño'pa' o'ch sequeshperra. Ñerra'm atetcha' se'papa' ama't ahua'tapa' amach sepsere, ñaña amach alla sepurrerro atarr toñoneñ.

¹¹ Allochña sapa' se'cherrcha' all añcha'tare'ttena Yepartseshar Jesucristo ñeñt Ya'queshpatañer yepen. Allña' o'ch aguërrres e'ñe pocsheñeshocmañen

all partsoten. Ña po'partsoñapa' ñeñtpa' amach ahuañañat'erro ama't e'ñe errponaña.

¹² Ñeñto'marña napa' noten, çhocmach neyerpatasa atet noctape'chen. Ama't sapa' o' seño'tue añe'çhno, napa' o'ch alla noterrser. Ama't o' çhaponasa seyo'çhro ñeñt' ñoñets po'ño'çhpa' napa' nemneñ allo'nach neyerpatnensa.

¹³ Napa' noten, te'pa' orameñ nocrrena e'ñe pocte' o'ch neyerpatnomsa attoch o'ch setorroña Yompor po'ñoñ.

¹⁴ Napa' neñoteñ o' mañamenapa' o'ch nerromuen, tarro'mar atet otne't Yepartseshar Jesucristo.

¹⁵ Allochñapa' amach nemnatenso o'ch sepuesuer ama't errponaña. Ama't allempoch o' nerromuenpa' sapa' allo'nach seyerpuerra ñeñt' atet o' notuanmas.

Pedropa' e'ñe entane't Cristo allempo orrtatyesanete't po'partsoña

¹⁶ Ya te'pa' o' e'ñe yeñotatas atto Yepartseshar Jesucristo ña partsotets, ñapa' ñach huerrtsa po'pocheño. Añ ñoñets po'ño'çhpa' ama shequëñtsoyaye ñoñets ñeñt' o' yotuas. Ñeñtpa' ama yaye' yoc'apña yotenso, ñaña ama ahuañnaneshañeyaye pueserrpareñ. Ya po'ño'çhpa' e'ñeca'ye allame'ttsa yeñche'tña Yepartseshar Cristo. Yapa' e'ñe yentuoñe'tña po'partsoña.

¹⁷⁻¹⁸ Tarro'mar yapa' e'ñe parro allo'tseney all aspen'to allempo Yompor Parets gatey Puechemer po'cohuenña. Yapa' allempopa' e'ñe ye'mhuaña ñoñets ñeñt' ye'morrtoya entot. Yompor ñeñt' nanac partsotets pue'ntaño, po'cohuenño'pa' atet cohuentatenan Puechemer, ñeñtpa' atet oten: "Añmapa' ñeñt' Nechemer ñeñt' nanac nemorrentena, ñapa' ña nanac nocshatene'." Ñeñtpa' attoña aye'cho'chtatenan Puechemer.

¹⁹ Te'ña ñeñt' otyese't ahuañ ñeñt' a'mta'yesaye't Yompor po'ño'ñpa' te'ña e'ñe po'ño'çhpa' o' e'ñe etsotuerra. Ñeñto'marña yapa' attoña yeñoteñ ñapa' e'ñe po'ño'çh otye't po'ño'ño't. Ñeñto'marña yocoppa' añ poctetsa o'ch yame'ña ñaña ñeñt' a'mta'yesaye't ahuañ Yompor po'ñoñ. Ñeñtña ñoñetspa' a'puetarsam'pennay yoc'apña atet ñerra'mrrate' lampareñ a'puetarene' checmete'. Te'ña o' huapa Cristo; ñapa' ñeñt'cha'ña a'puetarerre' yaña yeyo'cher. Yapa' atarr cohuen yenteñ Cristo atet ñerra'm ranto atarremñ.

²⁰⁻²¹ Ñaña seño'che'pa'chña ñeñt' a'mta'yesaye't ahuañ Yompor po'ñoñ ñetpa' ama añaye' orrtatete'te ñeñt' atet co'tape'chete't ñet. Atto ñet ma'yo'çhrete't Partsocop, Paretsña Puecamquëñña eñotatahuete't atet'cha' serrpare'toñet Yompor po'ñoñ. Ñeñto'marña seño'che'pa'ch ama pocteyaye e'ñe yañeña yoc'apño't o'ch ye'nachatateñña po'ñoñ.

2

Ñeñt' ashcañtetsa amach Yomporeye' po'ñoñ serrpare'teno (Jud 4-13)

¹ Te'pa' o'ch notas ñaña po'poñ. Ahuañtpa' orrte't ashcañ ñeñt' ama Yomporeye' po'ñoñ orrtatete'te, ñeñtpa' atta shecane't israelena'tarnesha'. Sapa'çho'ña attec'mach orrtonasa ñeñt' amach Yomporeye' po'ñoñ a'poteno. E'ñe a'nahuapa' o'ch ye'çhatas po'poñ poctapña. Tarro'marcha' ñetpa' atet pet atto'tcha' a'chencatatuerras. O'ch a'nasotam'psasa atto Yepartseshar Cristopa' ñeñtña tsa'terroyaña yo'chñar. Tarraña ñetpa' machayotach a'chencatatuerrret ñañeñeta.

² Esem'poch orrta, shonte'ch acheñ ñeñt'cha' ame'ñaya atet'cha' ye'çhatanet. Ashcañpa' e'ñech pocte' entan ama't ñeñt' atarr ye'çhene' sosya'tsañ.

Ñeñto'marña e'ñe ñoñot'acheñenesha'pa' o'ch achmare'teññañet Cristo po'ñoñ ñeñt' po'ñoñ Yompor po'ñoñ.

³ E'ñe pueye'cheño'tpa' o'ch shecaset attoch yoram'pesuas seçllayor. E'ñe pocta'ño'tpa' shecasetcha'. Tarraña ama't ahuatoteñ Yomporpa' ote't ahuo'ch mueñanet coñcha'puetso. Yomporpa' ama orrena ote'te, ama pueno po'ñoñ; atet oten, atetcha' pa. Ñeñt' ama Yomporeye' po'ñoñ yeçhatetsopa' chenca'huerretcha'.

⁴ Tarro'mar ahuatpa' ama't Yompor po'mllaño'teñnaneshar allempo atpare'chete'tpa' ama esesha' quesh'patse'te. Yomporpa' allempoña huapore'tanete't o'pono coñcha'puetso, allña'pa' all ehuanca'rettenet checmeto. Allo'tpa' amach cha'nerreto, allotña esempohuañenpa' a'coñchata're'terrach.

⁵ Ñaña acheñenesha' ahuatpa' ama esesha' quesh'patso allempo nanac atpare'chete't Yompor. Ñaña'pa' e'cho'pam'psanet oñ, ora erra'poren patso. Ñap'ta Noé a'quesh'pat epuet cançherrsheña ñeñt' pamo'tsesha'. Tarro'mar Noé'pa' serrpare'te't ñeñt' atet poctetsa Yomporecop.

⁶ Ñaña ahuatpa' ñeñt' yeçhatse't anetso ñeñt' pa'so'cheñ Sodoma ñaña Gomorra, Yomporpa' etomam'psanet pa'netser. Atto etomam'pesuerranet pa'netserpa' allohuenetpa' e'ñe poctacma poyuerret. Ora e'ñe tsapñere'tuet, o' a'chencatuerranet e'ñe poctacma. Atto te'pa' eñotatenan po'psheññeçhno ñerra'm o'ch atpare'teñet Yomporpa' attec'mach perraneterr. Ñeñto'marña yeñoteñ erra'tsencha' orrtatene' ñeñt' ama Yomporeye' po'ñoñ a'poteno, ñetpa'cho'ña attec'mach chenca'huerret ñamet.

⁷ Tarraña Yomporpa' a'quesh'patan puesheñarr ñeñt' pa'so'cheñ Lot ñeñt' e'ñe pocte' es patse't. Ñaña'pa' epaye' entenan pamo'tsesha' atto' pa'yesete't ñeñt' nanac sosey enten Yompor. Ñapa' epaye' llecachete't.

⁸ Ñapa' e'ñe cohuen cotape'che't. Pamo'tsesha'ña'pa' nanac pa'yesete't ñeñt' ama cohuenayaye. Ñaña'pa' epaye' entapretanete't ñeñt' cotape'chete't ñet, ñaña epaye' e'mapretanete't atto eñosatse'tyesete't. Ñaña'pa' epaye' llecanete't tarro'mar ñapa' e'ñe cohuen cotape'che't pueyoçhro.

⁹ Ñeñto'marña Yomporpa' eñoteñ attoch a'quesh'patan ñeñt' e'ñe pocte' es pets, ñerra'm esempo o' huapanet topateñets huomenc. Ñaña eñoteñ attoch mueroçhtatan ñeñt' ama pocteye' es petso. Allo'nach mueroçhtatnenanet esempohuañencha' acrar'etetuerra allohuen acheñenesha'. Allempopa' mueñuerranetcha' coñcha'puetso.

¹⁰ Po'ñoçhpa' coñchatancha' ñeñt' aña ma'yoçhrenaya ñeñt' atta mue'natse'tyets e'ñe po'chtso't, atto nanaccha' sosyare' yeçha'yenet, añach e'ñe yomenet ñeñt' e'ñe ñet pocta'pñet. Ñeñto'marña ama't Yepartsesharpa' ama am'cha'na'tpahuoye' enteñeto, attoña ama't ñaña allohuen ñeñt' ahua'mencatetyetsapa'cho'ña e'ñe achmare'tueñet. Amach am'cha'na'tpahuoye' enteñeto.

¹¹ Tarraña Yompor po'mllaño'teñnaneshar ama't nanac ahua'mencatet, ñaña ama't nanac am'cha'taretet, ñetña'pa' ama't Yomporesho'tsenet, ama sasare'teñetoña ñeñt' ahua'mencattetsa.

¹² Tarro'mar ñeñt' ama Yomporeye' po'ñoñ yeçhatetso ñetña'pa' sasare'tenet tarro'mar ama es eñoteneto, e'ñe atet ñerra'm es berr ñeñt' ama es eñotetso. Atet muena'yenetpa' atetcha' penet. Ñeñt' atet eñalletetsa atet ñerra'm es berr; tsapa'onetpa' o'ch rromueñet. O'ch rromuetpa' o'ch muetset. Ñeñt' ama Yomporeye' po'ñoñ yeçhatetsopa' ñetpa'cho'ña esempohuañen attec'mach a'cclatuare'tterret.

13 Tarro'mar attoch atsa'tatuare'tterret allohuen po'chñaret. Tarro'mar e'ñech ellapenete't coshatse'tatset ñeñt ama pocteyaye. Ama't atto rrallme'chapretasetpa' nanaccha' pencatenset tarro'mar ñetpa' nanac sosyare' es penet. E'ñech pocsheñesha' mueneñet o'ch shecaset.

14 Ñeñt ama Yomporeye' po'ñoñ ye'chatetsopa' chocmach mueneñ o'ch cohua'yesan coyanesha' attoch nanac cañoesha'tenet. Amach huañeno atto cofape'chenet sosey. Nanaccha' shequëñet coyanesha' ñeñt ama tama es eñoto attoch aguëñet. Añach ye'chenet atto es ye'chatse'tyenet. Tarraña ñeñt atet petsapa' o'patataretetcha' coñcheñets.

15 Tarro'mar ñetpa' o' puesuerret ñeñt poctetsa. O' sa'nmet Yompor nanac ella'par. Ñetpa' cota'neñet atet pe't Balaam ñeñt Beor puechemer. Ñapa' ahua'tpa' añach cohuen ente't o'ch pa'yesa ñeñt ama pocteyaye alloña ganet shonte' quelle.

16 Allempoña atet pe't Balaam ñeñt ama pocteyaye, pashanorñapa' o' che'ptare'ch, atto' eños atet ñerra'm acheñ eñets, ama't ashenpa' yeñoteñ ama eñeno. O'ña eñosuapa' Balaamñapa' allempoteñña o'huañ atet pa'yesan sosey.

17 Ñeñt ama Yomporeye' po'ñoñ ye'chatenetopa' ñetñapa' amach es sherbertso. Ñetpa' ama't attetañ ñerra'mrrate' oñ allot potenpa' te'ñapa' o' masohua. Ñetpa' amach es sherbatso ama't attetañ ñerra'mrrate' os, tarraña ñerra'm o' matach mōrr a'yopa', amach huato. Tarraña ñeñt atet petsapa' o'patataretetcha' all ama machecmeto o'pono.

18 Ñaña nanaccha' ommo'chenet atto pa'yenet ñeñt nanac sosyare'. Ñaña o'ch a'secheñet po'psheñeñ attoch o'ch p'achet ñeñt nanac muenenet po'chets attotcha' a'psataretterret, allempoñapa' o'ch'cho' alla puerrerret. Shonte' acheñ ñeñt e'ñe etserra puesuanmue' ñeñt atet ye'cha'yesete't ñeñt nanac sosyare', tarraña allempoñapa' o'ch alla muenereterr ñeñt o' puesuanmuetañ ahua't pocta'pñet.

19 Ñeñt ama Yomporeye' po'ñoñ ye'chatetsopa' o'ch alla o'terraneterr: "Ama palltenoña o'ch es yesuanom. Yapa' e'ñe cohueno'tseney. Yocoppa' ama eñalleña ñeñtcha' yeyore'terre'." Ama't atet oteneñ ñeñt atpare'tetspa' tarraña napa' o'ch notas, ñeñt atetpa' aña ye'chenet e'ñe ñet pocta'pña ñeñt nanac sosyare'. Tarro'mar ñerra'm erra'tsen es yey'chatene' ñeñt'pa' ñeñt'ña pomnaren yepene'.

20 Attecma ñerra'm ya. O' yeñotuer Yepartseshar Jesucristo, ñeñt'ara Ya'queshpatañer yepen. Yeparrocmateño't Cristo o' yesuanom sosya'tsañ. Tarraña ñerra'm yo'chñarpa' alla a'psaterrey Yompor po'ñoñpa' yañapa' elloña nanaccha' yoro'cheno'tseney.

21 Ahua'tpa' yoro'cheno'tseney tarro'mar ama yentare ñeñt poctetsa Part-socop. Te'ñapa' o' yenter ñeñt poctetsa. Tarraña ñerra'm te'pa' o'ch alla yepuerrerra ñaña o'ch alla yepuesuerrñañ po'ñoñ atet oteneñ Parets, te'ñapa' yañapa' elloña nanaccha' yoro'cheno'tseney.

22 Yapa' po'ño'ch ñerra'm o'ch alla yepuerrerra cha yottena ñerra'mrrate' ochec. Yapa' o'ch alla yepuerrerra "atet ñerra'm ochec o'ch a'tatsta; o'ch a'tatsetuapa' tematenpa' o'ch alla puerrerra allot'sen pa'tatsña." Amapa' cha yottena ñerra'm atet pena ñaña chañcho. "Chañchopa' o'ch apa; o'chña apuapa' o'ch'cho' alla puerrerra atstso allcha' e'ya'pna'tuerra o'ch alla atsot-señe'chuerr." Ama't ahua'toteñ atet otete't atet pena ochec, ñaña atet pena chañcho.

Esempoch huerrmocha Cristopa' orrterrach ñeñtcha' achmāre'terre' Yompor

¹ Te'ñapa' masheñneshacha' ñaña nochaneshacha' o'ch notas, po'pocheño o' alla nequellquèrrnaserr carta. Tarro'mar añecop nemneñ o'ch alla noctape'chaterrser, o'ch alla neyerpaterrser soctapña e'ñe cohuen.

² Ñaña o'ch alla noterrser, añ poctetsa amach sepsatsche ñeñt otye't ñeñt a'mta'yese't Parets po'ñoñ. Ate't otye'tpa' atetcha' etsoterra esempohuañen. Ñaña amach sepsatsche atet o' otuas ñeñt Yompor puellsensarnesha'. Ñetpa' o' ye'chatuaset Yepartseshar Cristo po'ñoñ ñeñtpa' atetcha' sepa, ñeñtara Cristo Ya'qeshpatañer yepen.

³ Ñanom o'ch seño'ch añ, ñerra'm esempoch o' huerrmocha Cristopa' huapach ñeñtcha' achmāre'tene' Yompor poctapña. Ñeñtpa' attach cotape'chen atet muenatse'tyenet ñeñt cohuen entenet po'chets.

⁴ Pachmāre'teño'tpa' o'ch otet: "Cristopa' otnerr esempopa' ahua'ch huerra. Te'ñapa' ¿eso'marte' amo' huerro'? Ama't yatañneshañpa' o' colla'huenet; teme'ttsen yenten ora erraparen e'ñe attera atet orrte't ahua'toteñ allempo errte' aye'chcatare't pats."

⁵ Ñetpa' mueneñet o'ch puesuerret atto ahua't Yompor e'ñe po'ñoño'ta o' ye'chcatuan enet. Patspa'cho'ña e'ñe po'ñoño'ta ye'chca'hua. Ñaña e'ñe oño'tpa' ye'chca añ pats.

⁶ Ahua'tpa'cho'ña e'ñe puechopeño't oñpa' chenca'hua pats allempo e'ñe chorra oñ erraparen.

⁷ Ñaña Yompor po'ñoño'tpa' te'pa' ama't patspa' esempohuañenpa' poyuercha'. Enetpa'cho'ña attec'mach poyuercha' ñaña. Aña cohuen esempohuañencha' acrare'tetuerra allohuen acheñenesha'. Allempochña melapoterra. Ñeñtña ama'ame'ñenaye ñapa' o'ch mueñanet coñcheñtso.

⁸ Tarraña te'ña masheñneshacha' ñaña nochaneshacha' amach atfa es sep'chatsto. Añcha'ña o'ch seño'ch; Yomporpa' entenan ama't mil char atet ñerra'm pam'tarra. Ama't ñeñt ñapa' pam'tarr enten, yocopñapa' yenteñ atet ñerra'm mil char.

⁹ Puesheña'tets acheñpa' otenet o' meten shonte' char amo' huerro. Tarraña yapa' yeñoteñ Yepartseshar chocmach a'poctatan po'ñoñ o'ch huerra. Yapa' yeñoteñ tarro'mar amo' huerro añ cohuen ñato' esempoch o'ch yoc'tape'chuerr ello cohuen Yomporecop allohueney. Ñapa' nanac muerenya ama' mueno ama't eseshapa' o'ch chenquerra.

¹⁰ Tarraña ama't amo' huerro, esempopa' machayotach huerra. Ate't ñerra'm eñe't amach es yep'chenopa' machayotach huapa tsapo. E'ñech atet perraña ñaña Yepartseshar Cristo, e'ñech machayota huerra. Allempopa' huañerrcha' enet. E'ñe puepotrrareño'tpa' huañcha'. Huañcha' ora ñeñt orreyetsa ñaña ama't ora allpon eñall, pañna'tuerrcha' ñaña e'yohuach. Tso'ñapa' ñach e'ñe e'yatuerre' allohuen ñeñt eñall. Patspa'cho'ña ñaña ora ñeñt aye'chcatare't arr patsropa' poyuach.

¹¹ O'ch poyuapa' o'ch e'yohua ora esocmañen. Ñeño'marña sapa' añ poctetsa socop. O'ch soctape'cherr e'ñe cohuen Partsocop, ñaña o'ch se-pomhuerra sañeña e'ñe Yomporecop.

¹² Ñaña añ poctetsa o'ch secuame'teñ esempoch yoro'chtatuer Yompor. Sapa' o'ch se'torreññaña atto'chña mameshapa' o'ch huerra. Esempoch yoro'chtatuer allempopa' ñachña a'crratuerrre' enet. O'ch a'crratuerran enetpa' allempochña pottle'chuerr e'ñe poctacma. Ñaña ora ñeñt orreyetsa entopa' ñeñtpa'cho'ña e'ñech poyuahuer. O'ch poyuahuerpa' o'ch

e'yohuerra poctacma. Tso'ñapa' ñach e'ñe e'yatuahuerre' ora allohuen ñeñ' eñall.

¹³ Tarraña yapa' yecueñ o'ch etsoterra atet otnerrey. Ñapa' ña yotnerre', eñalleterro'ch po'poñ enet etserrare', Patspa'cho'ña o'ch eñalletterra etserra. Allñapa' añach orrtatsa ñeñ' e'ñe cohuenare' es pa'yets.

¹⁴ Ñehua, masheñneshacha' ñaña nochaneshacha' o'ch secuame'teñ. Secuame'teño'tpa' o'ch sema'yochrena attoch entuerres Yompor e'ñe pocte', attoch amach eñalle ñeñ'tcha' sepencate'. O'ch cohuen sentannena epas samo'tsesha'.

¹⁵ Ñaña o'ch señoch e'ñe eso'marte' amo' huerro Yepartseshar Cristo. Ñapa' atarr muerenana allohuen acheñenesha'. Ñapa' mueneñ yapa' o'ch yame'ñatuera acheñenesha' attoch yequeshpa'huerra allohueney. Ñeñ'tara o' quellconas ñaña masheñ Pablo po'carto't. E'ñe Yompor pueñotateño'tey atet quellconas ñaña. Yapa' nanac yemuerannena.

¹⁶ Ora allpon Pablo po'carto'tpa' o' eñotatey atet'cha' perra esempo. Pa'te'tets ñoñets ñeñ' quellquë't Pablopa' nanac echarr yenteñ o'ch yeñoch e'ñe atet otene'y. Puesheña'tets acheñ ñeñ' ama tama es eñotopa' atarr moññe'toñete't Pablo po'ñoñ. Tarro'mar ñetpa' ama tama cosheññañeto Yompor po'ñoñ ñeñ'to'marña chocmach mueneñet o'ch e'nachaterrñañet atet otene'y Pablo po'carto't. Ñaña po'poñ Yompor po'ñoñ ñetpa' chocma mueneñet o'ch e'nachaterrñañet atet otene'y. Ñetpa' attot'cha' a'chencatatuerreret ñetañeña.

¹⁷ Ñeñ'to'marña masheñneshacha' ñaña nochaneshacha' te' napa' o' no-tuas necarto't ama't ama etsotena' atet notenes, attochña señoch. Te'ñapa' señota'tach allochñapa' amach shecaseto atto es panten ñeñ' atpare'tets. Saña te'pa' amach sequechpatsterrñañe Yompor po'ñoñ atet atarr same'ñena te'.

¹⁸ Añcha'ña e'ñe Yompor pemuereño'tpa' allo'nepa'ch sesen cotape'chnomue' e'ñe cohuen, ñaña allo'nepa'ch sesen yemuet-nomaya Yepartseshar Jesucristo ñeñ'tara Ya'queshpatañer yepen. Ya'ye'chochtatoñepa'ch tayoteñ e'ñe errponohuañen. Te'pa' ñeñ'tach notas, ñeñ'tpa' attetepa'ch Nompore. Allohua.

Pedro

AÑ ÑANOM SAN JUAN PO' CARTA 1 SAN JUAN

Jesucristo ñeñt po'ñoñ pen Yompor, yañapa' allochña e'ñe yocrrerra

¹ Te'pa' o'ch neserrpare'tatas arr nequellcot ñeñt atet pena Jesucristo; ñapa' chocma eñall ama't ahuatoteñ ama't allempo ama ayeçhcatarettena' pats. Ñeñtña yapa' e'ñe ye'me't atet serrpare'tatyese't allempo orrtosa arr patsro, ama't ya yecloyotpa' e'ñe yeñche't e'ñe allame'tets, ama't e'ñe ya yoto'tpa' ya'plla'yese't. Ñeñtña Jesucristo ñapa' ñeñtña po'ñoñ penña Pompor Parets tarro'mar ñach e'ñe eñotaterre'ña acheñenesha' atet oten Pompor Parets. Ñeñtña ña po'ñoñpa' po'ñoñch yapa' allochña corretsayach.

² Ñeñtña Jesucristo allempo acheñetos arr patsro yañapa' e'ñe yeñche't. Ñeñto'marña te' yapa'cho'ña chocma yeñotatenes saña. Ñeñto'marña yeserrpare'tatenes ñeñtña Cristopa' ñeñt alloch yocrrena ama't tayoteñ e'ñe erponañohuen. Ña ahuatpa' e'ñe parro'tsen epuet Pompor Parets. Te'ña atto orrtosnaya arr patsro yapa' e'ñe yeñche't e'ñe ye'me't atet serrpare'tatyese't. Ñeñto'marña te' ya ñeñt atet yentyese't, ñeñt atet ye'myese'ñe't, te'ñapa' o'ch yeserrpare'tatas saña.

³ Allochñapa' attoch allohueney yeparrocmaterr epay Yompor Parets ñaña Puechemer ñeñt Jesucristo.

⁴ Ñeñto'marña nequellquënnas ñeñt e'ñe po'ñoñch yeñoten attochña sapa'cho'ña o'ch e'ñe socsherra saña.

Yomporpa' añ toma'ntena puetare' tarro'mar ñapa' e'ñech cohuen es orrtatyen

⁵ Añ ñoñets ñeñt ye'mapretyese't Jesucristo, te'ñapa' o'ch yeserrpare'tatas. Ñeñtapa' atet eñotateney: Yomporpa' ña e'ñe cohuenare' es pa'yets, ñapa' e'ñe atet pena ñerra'm puetare' e'ñech cohuen yenteñ. Ñapa' ama't mameshapa' ama orrtatenanoña ñeñt ama cohuenayaye; ñeñto'marña yoten, ñeshopa' ama't coñe'tapa' ama eñalleña checmete'.

⁶ Yapa' ama't yoteneñ o' e'ñe yeparrocmaterr epay Yompor, tarraña ñerra'm ora yorrtatyen ñeñt ama cohuenaye' enteno ña, yañapa' atta yeshquën. Ñeñto'marña chach yottena ñerra'm checmeta yechope'chen tarro'mar ama e'ñe yeychena' ñeñt e'ñe po'ñoñch cohuen enten Yompor.

⁷ Tarraña ñerra'm e'ñe cohuenare' es yorrtatyen atet pena Yompor, ñeñtña' e'ñe atet yepena ñerra'mrrate' arr yechope'chen puetaro e'ñe allo'tseney epay Yompor. Attoña allohueney e'ñech cohuen yeparrocmatuen ñaña Yompor Puechemer ñeñt Jesucristo ña po'rrosoña chocma e'shennayña allohuen yo'chñar.

⁸ Tarraña ñerra'm cha yoten, "napa' amaca'ye eñalle no'chñar", ñeñtña' yañeñaca'ye shequëtsa tarro'mar Yompor pocta'ña ñeñt e'ñe po'ñoñch cohuenpa' amaca'ye chennayoña yeyochro.

⁹ Tarraña ñerra'm cho ya'meten yo'chñar, Yomporña' e'ñech peretna'huerrnay allohuen yo'chñar, e'ñech e'shohuerrnay allohuen ñeñt ama pocteye' entapretenye tarro'mar ñapa' ama puenesho po'ñoñ, ñapa' e'ñe pocte' es pen, ñeñto'marña ñapa' chocmach peretnerrey.

¹⁰ Ñaña ñerra'm cha yoten, "napa' ama no'chña'tpeno", Yomporña' cha yottatateñ ñerra'mrrate' ñapa' atarr ashcañ tarro'mar po'ñoñpa' atet oteney

ya allohueneypa' e'ñe yo'chña'tuen. Ñeñtña po'ñoñpa' yañapa' ama't e'ñe mameshapa' ama çhappennayoña yeyoçhro.

2

Jesucristo ñeñt e'ñe cohuen eñets yocop Yomporesho

¹ Nechemerneshacha' te' socoppa' o'ch nequellconas attoch amach allo'na sepa'nenno ñeñt ama't mameshapa' ama pocteye' enteno Yompor. Tarraña ñerra'm esesha' orrtatene' ñeñt ama cohuenayaye, ñerra'm o'ch enamuerr peretneñets, Yomporpa' o'ch peretner tarro'mar eñall yocop ñeñtcha' eñosets Apuesho. Ñeñtña' añ Jesucristo ñeñt e'ñe pocte' es pa'yets.

² Ñapa' ña apareť attoch tsa'tuerrnaya yo'chñar. Ñeñtpa' ama e'ñe yaptecpayaye, añeçpa'naña allohueney ñeñtey añe patsro'tsa'yeney.

³ Ñerra'm e'ñe po'ñoçh yame'ñerrñaña Yompor po'ñoñ ñeñt atet oteneý allempoñapa' e'ñech po'ñoçh yeñoter ñeñt atet pena ña.

⁴ Ñeñt otets, ñapa' e'ño' eñoteñ atet pena Yompor; ñerra'm attera atpare'tenan Yompor po'ñoñ ñeñt atet oteneý, ñeñtña atet otetspa' ñapa' atfaca'ye shequën. Ama't e'ñe mameshapa' ama cheññañoña Yompor po'ñoñ pueyoçhro ñeñt e'ñe po'ñoçh atet oteneý.

⁵ Tarraña ñerra'm esesha' e'ñe po'ñoçh ame'ñerraya Yompor po'ñoñ ñeñt atet oteneý, ña po'ñoçhpa' o' morrenterrana Yompor e'ñe pueyoçhrocmañen. Ñeñtpa' attoña yeñoteñ po'ñoçhpa' o' yeparrocmaterr epay Yompor.

⁶ Ñerra'm esesha' otets, ñapa' e'ño' parrocmaten epuet Yompor; ñeñtpeñapa' orrtatyesanepa'ña ñeñt atet pa'yese't Yompor Puechemer ñeñt Jesucristo.

Cristopa' ña orrtaterre' etserra morrentanna'teñets attochña e'ñe cohuen yemorrentannerra

⁷ O'ch masheñeshacha' ñaña noçhaneshacha' notas, ñeñt atet notenes nequellcot te' amorrentanna'tpahuepa'ch sentannena allohuenes ñeñtpa' ama añeyaye ñoñets ñeñt ama se'mare. Ama't allempoteñ e'ñe errete' same'ñerrapa' allempoteñ se'muerrña ñeñt ñoñets ñeñtcha' atet sepa' e'ñe cohuen ñeñtara Yompor po'ñoñ ñeñt e'ñe errtes e'muene' allempo.

⁸ Tarraña morrentanna'teñets ñeñt atet nequellquënnas te' ñeñtpa' e'ñe atet ñerra'mrrate' o' tayo' orrtatonasetña atet morrentanna'teñets, tarro'mar Cristo e'ñe po'ñoçh orrtatonayña e'ñe etserra attoch e'ñe cohuen yemorrentanna'terra, ñeñto'marña sapa'çho'ña te'pa' o' e'ñe etserra sorrtaterrña samña attoch semorrentannerra. Morrentanna'teñets po'ñoçhpa' ñeñtña atarr sherbets tarro'mar ora allohuen ñeñt ama cohuenaye' enteno Yompor; ñeñtña' allo'na sen huañuanmats. Ñeñtpa' e'ñe atet pena ñerra'mrrate' checmete'pa' allo'na sen metuanmats. Allohuen ñeñt e'ñe po'ñoçh cohuen enten Yompor; ñeñtpa' atet ñerra'mrrate' puetare', ñeñtña po'ñoçh o' a'puetarsañperres.

⁹ Ñeñtña otets ñapa'çho'ña Yomporo' po'puetarenño'tsen tarraña ñerra'm orameñ e'moñe'tyenan pamo'ts, ñapa'çho' orameñ checmeto'tsena.

¹⁰ Tarraña ñeñt e'ñe po'ñoçh muerenaya pamo'tsesha', ñeñtña' e'ñe Yompor po'puetarenño yeçhena. Allña' ama eñalleña ñeñtcha' paterrayerr ñeñt ama pocteye' enteno Yompor.

¹¹ Ñeñtña e'moñe'tyene' pamo'ts ñapa' orameñ checmeto'tsen. Ñaña' atet pena ñerra'mrrate' puesheñarr ñeñt checmetch chopeñe'chyen, ama eñoteñe errenette'ña sen tarro'mar checmete'pa' ñeñta a'natacle'chene'.

¹² Nechemerneshacha' sa so'chñarpa' o' aḗretna'huareṯterra Cristeshoṯ, ñeñṯo'marña te'pa' atē nequellquēnnas.

¹³ Ñaña te'pa' o'ch notas saña allohuenes ñeñṯes e'ñe pompornesha' penset. Sa te'pa' o' señoṯer Cristo ñeñṯ e'ñe ahuaṯoteñ eñall ama't e'ñe allem-poteñ ama ayeḗcatareṯtena' pats; ñeñṯo'marña te'pa' atē nequellquēnnas saña. Ñaña te'pa' o'ch notas saña allohuenes ñeñṯes huepueshares, sapa' o' e'ñe saṯpare'ter oneñēṯ; ñeñṯo'marña socop te'pa' atē nequellquēnnas saña.

Ñaña sa nechemerneshacha' te' sapa' o' e'ñe señoṯer atē penaña Yompor Parets; ñeñṯo'marña te'pa' atē nequellquēnnas e'ñe socop.

¹⁴ Ñaña sa ñeñṯes pompornesha' e'ñe penset, sa te'pa' o' señoṯer Cristo ñeñṯ e'ñe ahuaṯoteñ eñall ama't e'ñe allem-poteñ ama ayeḗcatareṯtena' pats; ñeñṯo'marña te'pa' atē nequellquēnnas. Ñaña sa ñeñṯes huepueshares, sapa' atarr ahuaṯmencates ṯarro'mar Yompor po'ñoñpa' o' e'ñe ḗchaponasa seyoḗhro ñeñṯo'marña sapa' o' atarr saṯpare'ter oneñēṯ; ñeñṯo'marña te'pa' atē nequellquēnnas.

¹⁵ Amachña aña atarr semorrentatsto allohuen ñeñṯ yentyen aña patsro ṯarro'mar ñerra'm aña atarr yemorrentena ñeñṯ aña patsro'tsenpa' Yomporña Parets po'ñoḗhpa' amach yemorrenteño, (ñeñṯo'marña amach erroṯenot ḗchaponayoña yeyoḗhro ñeñṯ atē muenen ña).

¹⁶ Allohuen ñeñṯ eñall aña patsro, atē ñerra'm ñeñṯ atē muenatyenyey yechets, ñaña ñeñṯ yeye'chapretyena e'ñe ya yecueñoṯ, ñaña ñeñṯ e'ñe yemen ya o'ch e'ñe cohuen entapretyenyet, ñeñṯña allohuenpa' ama Yompore-shoteye' hueno, ñeñṯpa' aña patsro'marnesha poḗṯañña.

¹⁷ Allohuen ñeñṯ yentyen aña patsropa' ñeñṯpa' atarr ahuañaña, ñaña ñeñṯ yemnatse'tyen aña patsro ñeñṯpa'ḗo'ña atarr ahuañaña. Tarraña ñeñṯ atē petsa ñeñṯ e'ñe atē muenen Yomporpa' ñeñṯñapa' amach huañerro ama't errponaña.

Atē pena coṯaññats ñeñṯ e'ñe po'ñoḗh Yompor poḗṯañña ñaña atē pena po'poñ coṯaññats ñeñṯ shequēñtsa

¹⁸ Te' nechemerneshacha' o'ch notas po'poñoneṯ. Te'pa' o' mameshamerra o'ch huañerr allem-pochña mellapoterra. Atē se'myen te' ñeñṯpa' allem-pochña orrterra ñeñṯcha' atarr e'moñe'terre' Cristo pueyochreshohuen. O' e'ñe ṯayoteñ orretyesa shonte' ñeñṯ ḗhocma e'moñe'tene' Cristo. Ñeñṯo'marña te'pa' yeñoteñ o' mellapoterrmocha.

¹⁹ Ama't ahuañmo'cha e'ñe parrocmayapḗḗañēṯ ñetña te'pa' o' ahuan-muet elloneṯ o' sohuanerryet ṯarro'mar po'ñoḗhpa' ama allohuenacmaye' yeparrocmaṯerro. Ñerra'm po'ñoḗhcha' allohuenacmay yeparrocmaṯerreñ allem-pochña ñetpa' allo'tsa'yenetañate' ñamet yesho. Tarraña te'ña ñetpa' o' ahuanerret elloneṯ atñoña o' yeñoterranet po'ñoḗhpa' ama allohuenacmaye' yeparrocmaṯerro.

²⁰⁻²¹ Tarraña te'ña sapa' Cristoña sechorratenayaña Parets Puecamquēñ. Atñoña allohuenes o' e'ñe señoṯuer. Sapa' o' e'ñe señoṯuerr ñoñets ñeñṯ po'ñoḗh, ñeñṯpa' ama shequēñtsoyaye. Te' sapa' ama e'ñe sepallteñoṯeye' nequellquēnnaso ñeñṯ atē poḗṯetsa socop. ṯarro'mar sapa' señoṯeñ ñeñṯ ñoñets shequēñetspa' ama Yomporeshoteye' hueno ṯarro'mar ñeñṯ Yompor po'ñoñpa' ñeñṯña e'ñe po'ñoḗh ama shequēñtsoyaye.

22 Te'ña sapa' señoche'pa'ch ñeñt' atarr nanac ashcañtetsapa' ñeñtca'yeña otets Jesús'pa' año' Cristoyaye ñeñt' atarr yecuen ya ahua'otoñ ñeñt'cha' llesenserr Yompor. Ñeñto'marña ñetpa' cha e'moñe'teñetña Cristo, ama choye' ame'ñeñeto, Pompore'ñaña ama ame'ñeññañeto, cha a'nasoteñet.

23 Allohuen ñeñt' a'nasotenaya Yompor Puechemer, ñetpa' Pompore'ñaña ama aguëññañeto. Tarraña allohuen ñeñt' otets, Jesús'pa' Yomporo Puechemer ñeñt' Cristotets, ñetña'pa' e'ñe aguëññañet Pompor.

24 Ñeñto'marña o'ch notas, Yompor po'cohuenña ñeñt' se'muerr ahuañmo'choteñ, te'ña sa atto o' e'ñe seño'ter seyo'chro allo'nepa'ch sesen ame'ña'nmat'sa allochña'pa' attoch e'ñe cohuen separrocmaterr epas Yompor Puechemer ñaña epas Yompor Parets.

25 Jesucristopa' atet otnerrey o'ch apuerrey e'ñe po'ño'ch attochña yapa' corretsayach yocsheñeshocmañen tayoteñ e'ñe errponañohuen.

26 Ñeñt' notenes añ nequellco't ñeñt'pa' añecpa nequellquënnas attoch sapa' e'ñech seño'ter allochña'pa' attoch ama sa'shcare'tterro.

27 Tarro'mar Jesucristo o' chorrater'sa Parets Puecamquëñ, ñeñto'marña sapa' ama sepallteno o'ch esesha' ye'chatas tarro'mar ñapa' eñotatascha' allohuen. Ñaña ñeñt'cha' atet ye'chaterres ñapa' e'ñeca'ye po'ño'ch atet, ñeñt'pa' ama shequëñtsoyaye. Ñeñt' atet ye'chatenes sapa' allo'nepa'ch sesen parrocmatenaya Cristo.

28 Te'ña nechemerneshacha' allo'nepa'ch sesen parrocmatenaya Cristo allochña'pa' ñerra'm esempoch huerra ñapa' ñachña e'ñe seyemtapuerra attoch sapa' amach cha sepencapuero ñerra'm esempoch huerra.

29 Ñehua, sa te'pa' o' e'ñe seño'ter Jesucristo ñapa' e'ñe pocte' es pa'yen. Ñeñto'marña señoche'pa'ch ñaña allohuen ñeñt' e'ñe pocte' es orrtatyets ñeñt'ña'pa' e'ñe po'ño'ch puechemer peñ Yompor.

3

Yomporpa' e'ñe puechemerasha' peney

1 Te' sapa' chosaña e'ñe cotape'cherre', Yomporpa' atarrca'ye nanac morrentenya. Ña e'ñe puemorrenteño'tey ñapa' e'ñe puechemer peney, ñeñto'marña yapa' e'ñe po'ño'ch Yomporena'tarey. Ñeñto'marña acheñenesha' arr patsro ñeñt' ama ame'ñetso ñetña'pa' ama eseshaye' eñotenayeña ñeñt' atet yoc'tape'chyen Yomporecop tarro'mar Yomporpa'cho'ña ama eseshaye' eñotenaye ñeñt' atet cotape'chen ña.

2 O'ch masheñneshacha' ñaña no'chaneshacha' o'ch alla noterr'serr, te'ña yapa' e'ñe po'ño'ch puechemer peney Yompor. Ama't ama e'ñe eñotatenya' erro'teneycha'ña ya esempohuañen tarraña yapa' e'ñe yeñoteñ ñerra'm esempo orrterra Jesucristo, yañapa' e'ñech attey yaña ñerra'm ña tarro'mar allempo yapa' yentercha' ñeñt' atet atarr cohuentena ña.

3 Allohuen ñeñt' atet ame'ñetsa, ñetña e'ñe pueyemteño'tet cohua'me'teñet, attoña ñetpa' e'ñech cohuen a'cohuentata'retterret ñamet e'ñech attet ñerra'm Jesucristo ñeñt' e'ñe cohuenare' es orrtatyets.

4 Allohuen erra'tsen ochña'tetspa' ñeñt'ña'pa' cha atpare'tenan Yompor po'ño'ñ ñeñt' atet anaret. Tarro'mar ñerra'm esempo yatpare'ten ñoñets ñeñt' atet anaret, ñeñt'ña yapa' chach yeyoren yo'chñar.

5 Sapa' e'ñe seño'teñ Cristo ñapa' tarro'mar huapa arr patsro ñach ahuanerre' ya yo'chñar ama't ñapa' ama eñalle po'chñar ama't coñe'ta.

⁶ Ñeñto'marña allohuen esesha'ch parrocmaterre' Cristo, ñetñapa' ama choye' ochña'tare'teneto. Tarro'mar ñeñt atarr ochña'tare'tetspa' ñeñtñapa' ama puentaranoña Cristo, ama cheññañoña pueyoçhro ñeñt atet pena Cristo.

⁷ Nechemerneshacha' sapa' señoche'ch ñeñtcha' atet noterrserre' te', allochñapa' attoch amach esesha' seshquërraye. Po'ñoçh ñeñt orrtatyene' ñeñt e'ñe pocte' enten Yompor, ñeñtña po'ñoçhpa' e'ñe cohuen acheñer, e'ñech atet pena ñerra'm Cristo ñeñt e'ñe pocte' es pa'yets.

⁸ Tarraña ñeñt chocma orrtatyene' ñeñt ama pocteye' enteno Yompor, ñeñtña acheñerpa' po'ñoçh oneñetena'tar, tarro'mar oneñetpa' e'ñe ahuatoteñ ñapa' aña orrtatyes ñeñt ama't mameshapa' ama pocteye' enteno Yompor. Ñeñto'marña Yompor Puechemerpa' huapa, allochñapa' ñach e'nuerre' atet patse'tyena oneñet.

⁹ Allohueney ñeñtey po'ñoçh eñallettertsa Yomporotpa' amach allo'na yo'chña'tare'tneno tarro'mar yapa' o' yeycherrñañ ñeñt atet pena Yompor Parets. Yapa' po'ñoçhpa' o' ye'ñalletterra Yomporot ñeñto'marña amach errotenot alla yo'chña'tare'terre'te.

¹⁰ Arrpa' attoña yeñoteñña ñeñt Yomporena'tar ñaña ñeñt oneñetena'tar. Allohuen ñeñt ama pocteye' es orrtatyetso ñeñt ama morrentenaye pamo'tsesha', ñetñapa' amaca'ye Yomporena'tareyayeto.

Amorrentanna'tpahuepa'ch yentannena e'ñe allohueney

¹¹ Añ ñoñetspa' e'ñe ahuatoteñ eñotatasete't amorrentanna'tpahuepa'ch e'ñe allohueney.

¹² Amach atet ye'patsto atet pa' ahua't Caín, ñapa' oneñetena'tara. Ñaña'pa' pa'mo'nasheña muetsa. Tarro'marca'yeña muetse ñapa' amaca'ye cohuenaye' cotape'che'te; pa'mo'nasheñña Abel ñeñt muetsa, ñaña'pa' e'ñe cohuen cotape'che't Yomporecop.

¹³ Ñeñto'marña masheñeshacha' ñaña noçhaneshacha' e'ñepa'ch seño'ta sapa' ñeñto'marcha'ña e'moñe'tasña acheñenesha' añ patsro ñeñt ama ame'ñetso.

¹⁴ Tarraña ya e'ñe yemorreneteñt yamo'tspa' e'ñe yeñoteñ yapa' o' yemtanerrña allcha' e'ñe poctacma yerromuerreñ. Yapa' o' yeycherr allña yapa' corretsayach. Ñeñtña ama muerenayo pamo'ts ñetñapa' allo'tsenareta allcha' e'ñe rromuerret e'ñe poctacma.

¹⁵ Allohuen ñeñt cha' e'moñe'tyenan pamo'tspa' ñeñt po'ñoçhpa' amtsaña enteñña Yompor. Ama't e'ñe sapa'cho'ña seño'teñ ñeñt amtsaña' pueyoçhropa' ama eñalleña attoch ñapa'cho'ña corretsach tayoteñ e'ñe erponañohuen.

¹⁶ Arrpa' attoña e'ñe yeñoteñña ñeñt atet penaña e'ñe po'ñoçh morrenteñets, attoña Jesucristopa' arroya ñañaña attoch rroma yocop. Yapa'cho'ña e'ñepa'chña pocte' yeñch o'ch ya'rroya yañeña attoch yerroma yamo'tseshacop.

¹⁷ Tarraña yaña ñerra'm yechyen attoch e'ñe cohuen yocrrena arr patsro, allempo yenteñ yamo'ts cha' atarr es pallta'yenet yañapa' ama yemorreneteño, Yomporpa'cho'ña ama't e'ñe mameshapa' amaca'ye yemorreneteñoña yeyoçhro.

¹⁸ Amach nechemerneshacha' e'ñe yeñoñoçhaya yotanna'tatsto atarr yemorrentannena. Chochña yorrtatyesña yemorreneteña e'ñe po'ñoçh atet es ye'pa'yen po'psheññecop e'ñe cohuen.

Attoch e'ñe cohuen yeyemtera Yompor

¹⁹ Alloña yapa' e'ñech yeñotena yapa' e'ñe po'ñocheý ñeñteý atet petsa e'ñe cohuen. Ñeñto'marña yapa' e'ñech yeñmataten yeyoçher Yomporeshonet.

²⁰ Tarro'mar ñerra'm ama e'ñe yeñmañeshocmaye' es yeþa'yeno Yomporecop, Yomporñaapa' elloña e'ñe po'ñoçh atet eñoteny tarro'mar ñapa' ña atarr eñotañesha'.

²¹ Tarraña nechemerneshacha' ñerra'm e'ñe yeñmañeshocmañen es yeþa'yen Yomporecop ñeñteþñaapa' Yomporcha'ña e'ñe cohuen yeyemtena.

²² Atto yame'ñerrñaña po'ñoñ ñeñt atet oteney, ñapa' atarr coshenya; ñeñto'marña ñerra'm es yenamueñ, ñapa' çhocmach e'ñe po'ñoçh apueney.

²³ Yompor po'ñoñoñ atet oteney o'ch e'ñe cohuen yame'ñerrñaña Puechemer ñeñt Jesucristo. Ñaña oteney amueranna'terrapo'ch allohueny, atet oteneyña ña.

²⁴ Erra'tsencha' e'ñe cohuen ame'ñenaya Yompor po'ñoñ ñeñt atet oteney, ñetñaapa' e'ñe parrocmatenet epuet Yompor. Ñeñto'marña yeñoteñ yeparrocmaten, Parets Puecamquëñoñ ñeñt chorratenya ñeñña yeñotatene'ña e'ñe yeparrocmateña Yompor.

4

Attoch yeñoch erra'tsente'ña ñeñt e'ñe po'ñoçh eñoraten Yompor Puecamquëñ; attoch yeñoch ñaña ñeñt epatare'tene' Yompor poctaþña

¹ Ñaña te'pa' o'ch masheñeshacha' ñaña noçhaneshacha' noterrserri; sapa' ñato't same'ñena'ña allohuen pa'namen coþaþñaats tarro'mar ñetpa' ama't otenetañ Partso' Puecamquëñ eñoratenahuet, sapa' çhochña señoysesña ñeñt pa'namen coþaþñaatser attochña sapa' e'ñe señoçh erra'tsente'ña ñeñt e'ñe po'ñoçh huetsa Yomporeshot. Tarro'mar shonteñ ñeñt otetseñ ñetpa' Yomporo' po'ñoñ a'mtenet tarraña ñeñtpa' ama Yomporeyaye po'ñoñ. Ñeñtpa' erraþaren o' orreyesa añ patsro.

² Arr sapa' alloch señoçh erra'tsente'ña e'ñe po'ñoçh eñoratenña Parets Puecamquëñ: Erra'tsencha' otats Jesucristopa' ña po'ñoçh partsoñ acheñetos arr patsro, ñeñña coþaþñaatserpa' e'ñe po'ñoçh Parets Puecamquëñ eñoratene'.

³ Erra'tsencha' ñeñt amach atteye' otetso Jesúsocop, ñeñña coþaþñaatserpa' ama po'ñoçh Parets Puecamquëñ eñoratenahueto. Ñeñtpa' ñeñña po'ñoçh e'moñe'tene'ña Cristo ñeñt atet se'mare'tyese't o'ch huapa. Te'ñapa' o' orrton-aya añ patsro.

⁴ Saña po'ñoçh nechemerneshacha' e'ñe po'ñoçh Yomporena'tares tarro'mar sapa' ama aña se'mñoteno atto pa'namenot shecare'tyensetañ. Yompor Puecamquëñ ñeñt sechorrenayapa' ñeñña sapa' atarr ahuamencattatenes. Ñeñña chorrenaya añ patso'marnesha'pa' ñapa' ama e'ñeye' ahuamencattatenaneto.

⁵ Ñeñña shecare'tyets e'ñe ñet poctaþñaotet po'ñoçhpa' patso'marnesheta. Ñeñto'marña ñerra'm eñosetpa' añach serrpare'tyenet ñeñt patso'marecpa. Ñeñto'marña ñetpa' patso'marneshach e'mñotenahuet.

⁶ Yaña po'ñoçhpa' Yomporena'tarey. Ñeñt po'ñoçh eñotene' Yompor; ñetñaapa' e'ñech cohuen e'mñotenyet ya. Ñeñña ama Yomporena'tareyaye, ñetñaapa' amach e'mñotenyeto. Yapa' alloña yeñotenña coþaþñaats ñeñt po'ñoçh huetsa Yomporeshot attoña yeñotenña ñaña coþaþñaats ñeñt shequëñets.

Atto Yomporpa' ña atarr amorrentañtetsa

7 Masheñneshacha' ñaña nochaneshacha' amueranna'tpahuepa'ch allohueney tarro'mar ñeñtpa' Yomporeshot huena. Allohuen amorrentñaapa' ñetpa' o' eñalletterret Yomporot, po'ñoçh o' eñoteret ñeñt atet pena Yompor.

8 Ñeñña ama amorrentñaopa' ñocpuetpa' ama eñoteñetoña atet penaña Yompor, tarro'mar Yompor ñapa' ña atarr amorrentañtetsa.

9 Aña' Yompor orrtate' yocop allochñaapa' yapa' o'ch yeñoter Yomporpa' atarr morrentenya. Attoña mueñan Puechemer arr patsro ñeñt po'patrorr pen attochña yapa' corretsayach e'ñe ñeshot.

10 Arrpa' all orrtatonay Yompor ñeñt e'ñe po'ñoçh morrenteñets: Allempo ya ama't mameshapa' ama yemorrentpeño Yompor, ñañaapa' allempoteñ atarr morrentenya ya. Ñeñto'marña ñapa' mueñonay Puechemer ñeñtcha' yetsa'terroya yo'chñar.

11 Ñeñto'mar masheñneshacha' atto Yomporpa' atarr nanac morrentenya, yapa'cho'ña e'ñepa'chña yemorrentanna'tuena allohueney.

12 Yomporpa' ama esesha' puentare. Tarraña ñerra'm e'ñe yemorrentannena allohueney, po'ñoçhpa' e'ñe yeparrocmaten epay Yompor. Ña puemorrenteñaapa' e'ñech chorrenya poctacma.

13 Ña atto apuerrey e'ñe ña Puecamquëñ ñeñña yeñotatene'ña yapa' e'ñe yeparrocmaten epay Yompor.

14 Ñaña yapa' e'ñe yentuoñe't Yompor Puechemer ñeñto'marña ya te'pa' o' ya'potonas samã atto Yompor po'ñoçhpa' mueñonay Puechemer ñeñtcha' ya'queshpaterre' ya ñeñtey ye'cha'yetsa añ patsro.

15 Ñeñt ame'ñenaya Jesús ñapa' po'ñoçh e'ñe Yomporo Puechemer, ñetñaapa' e'ñe parrocmatenet epuet Yompor.

16 Attoña ya te'pa' e'ñe yeñoteñ ñaña yame'ñeña atto Yomporpa' atarr morrentenya. Yompor ñapa' ña atarr amorrentañtetsa. Ñerra'm e'ñe po'ñoçh yemorrentannena po'ñoçhpa' o' yeparrocmaterr epay Yompor.

17 Attoña yapa' e'ñech cohuen yemorrenteña Yompor e'ñe poctacma, allochñaapa' yapa' amach yeñcha'nañoñayaya yeyemtero Yompor ñerra'm esempohuañen eñotatyesuerrey e'ñe errotencha' entyesuerrey. Tarro'mar e'ñe atet pena Jesucristo, yapa'cho'ña e'ñech atet yepena yaña arr patsro.

18 Ñerra'm po'ñoçh yemorrenteña Yomporpa' amachña cha yeñcha'teñe. Tarro'mar atto e'ñe poctacma cohuen yemorrentannena epay Yompor, ñeñña po'ñoçh yehuapore'tam̄pene'ña yeñchañ. Ñerra'm esempo cha es yeñcha'tenpa' attoña e'ñe yañeña coñchatetsa. Ñaña ñerra'm orameñ yeñcha'ten amaca'ye e'ñe yeychena'ña attoch e'ñe cohuen yemorrentannena e'ñe poctacma.

19 Yomporpa' o' e'ñe morrenterrya yanom, ñeñto'marña yapa'cho'ña te'pa' o'ch e'ñe yemorrentera yaña.

20 Ñerra'm esesha' otets, ñapa'cho'ña e'ño' cohuen morrentenana Yompor, tarraña ñerra'm cha e'moñe'tyenam̄ pamo'ts, ñeñña atet otetspa' attacaye shequën. Atto ama morrentenano pamo'ts ama't ñeñtpa' e'ñe enteñ, amach errotenot morrentanoña ñaña Yomporña' tarro'mar ñeñtpa' amaca'ye choye' enteñe.

21 Yompor po'ñoñ ñeñt yotene': Ñerra'm po'ñoçh yemorrenteña Yompor, yamo'tspa'cho'ña e'ñepa'chña cohuen yemorrentenanet.

5

E'ñe yeyemteñoñ Cristo chocmach pomnaren yepen allohuen ñeñt ama pocteye' enteno Yompor arr patsro

¹ Allohueney erra'tseneycha' ame'ñerraya Jesús pa' ña Cristotats ñeñteyña yapa' o' e'ñe puechemer perrey Yompor. Ñehua, yeñoteñ arr patsro ñerra'm yemorrenteña puesheñarr acheñ ñeñt' achemereshat, puechemerasha'ña e'ñe yemorrentuena.

² Ñeñto'marña yeñoteñ ñaña ñerra'm esempo yemorrenteña Yompor ñaña yame'ñerrñaña po'ñoñ atet' oteneý, aña'ña e'ñe yemorrentuena ñeñt' puechemerasha' pen Yompor.

³ Atto yemorrenteña Yompor choch yame'ñerrñaña po'ñoñ ñeñt' atet' oteneý. O'ch e'ñe yepena ñeñt' atet' oteneý, ñeñtpa' ama torrapahuoyaye.

⁴ Tarro'mar allohueney ñeñtey puechemer pen Yompor, yañapa' e'ñe yeyemteñot Jesús chocma pomnaren yepen allohuen ñeñt' ama pocteye' entyeno Yompor arr patsro.

⁵ Allohuen ñeñt' ame'ñenaya Jesús ñapa' Yomporo' Puechemer, ñetña e'ñe ñapfet pomnaren penetña allohuen ñeñt' ama pocteye' entyeno Yompor arr patsro.

Allpon ñeñt' yeñotaterre' Jesucristopa' e'ñe po'ñoñ Yomporeshot huapa

⁶ Ñeñta Jesucristo allempo huapa arr patsro eñall ñeñt' yeñotaterre'ña ñapa' e'ñe po'ñoñ Yomporeshot huapa. Ñeñt' ñanompa' allempo atto apataretta Yomporecop oño. Tarraña ama e'ñe ñapña oña yeñotataye ñapa' e'ñe po'ñoñ Yompor Puechemer. Po'rroso'ña yeñotate'ña allempo acorso'tamñsaretterra; ñapa' e'ñe po'ñoñ Yompor Puechemer. Ñaña Parets Puecamquëñ ñeñtpa'cho'ña ña yeñotaterre'ña Jesús pa' e'ñe po'ñoñ Yompor Puechemer tarro'mar Parets Puecamquëñpa' erroten es eñotateney ñeñtpa' e'ñe po'ñoñ atet'.

⁷ Ñaña eñall ma'pa ñeñt' pue'ntaño'tsen ñeñtña yeñotatene'ña ya. Ñeñtpa' Yompor Parets ñaña po'ñoñ ñaña Puecamquëñ. Ñetpa' ama't ma'po'maret e'ñe patrra atet' petsa.

⁸ Ñaña arr patsro eñall ma'pa ñeñtña yeñotatene' Jesús pa' ña po'ñoñ Yompor Puechemer. Ñeñtpa' Parets Puecamquëñ, allo'tpa' oñ allempo apataretta Yomporecop allo'tpa' ñaña po'rros atto acorso'tamñsaretterra. Ñetpa' ama't ma'po'maret eñotatenet, e'ñe patrra eñotatyenet ñeñt' Jesús ñapa' e'ñe po'ñoñ Yomporo Puechemer.

⁹ Ñehua, arr patsro chocma e'ñe pocte' yenteñ ñeñt' atet' eñotateney acheñ tarro'mar ñeñtpa' chocma sherbeney. Ñaña ñeñt' atet' eñotateney Yompor elloña ñeñtpa' atarr nanac sherbeney. Tarro'mar ñeñtpa' e'ñe ña Puechemer cop eñotateney Jesús pa' Yomporo Puechemer.

¹⁰ Ñerra'm esesha'ch ame'ñerraya Yompor Puechemer, ñeñtña' echerrancha' e'ñe ña pueyo'chro ñeñtcha' eñotaterre' e'ñe pocte' o'ch e'ñe yemterrana Jesucristo ñeñt' e'ñe po'ñoñ Yompor Puechemer. Ñeñtña ama ame'ñenayo Yomporpa' cha ottatateñ ñerra'mrrate' ñapa' atarr ashcañ tarro'mar ñeñt' acheñerpa' ama ame'ñenano Yompor ñeñt' atet' eñotateney Puechemer cop.

¹¹ Yomporpa' atet' eñotateney atto yapa' apuey Puechemer, e'ñe ñeshoña yapa' corretsayach yocsheñeshocmañen tayoteñ e'ñe errponañohuen.

¹² Ñeñtña aguërre' Yompor Puechemer aña'ña o' aguërret attochña ñetpa' corretsetach tayoteñ e'ñe errponañohuen. Aña ñeñt' ama aguërriye Yompor Puechemer, ñetña' amach esesha' aguërriye alloch correrret.

All pa'namen cotape'chatnerranet e'ñe allohuanen allempo so'tnerranet po'cartot

13 Ñeñt allpon o' nequellconas sa ñeñtes ame'ñenaya Yompor Puechemer, sapa' ñeñtcha'ña señotaterre' po'ñoçh sapa' corretsasach socsheñeshocmañen e'ñe tayoteñ errponañohuen.

14 Yapa' e'ñe yeyemteñoť Yompor ñeñto'marña yeñoteñ es yenañ ñeñt pocte' enten ña, yapa' çhocmach e'mñoteney.

15 Ñaña atto yeñoteñ ñapa' çhocma e'mñoteney ñerra'm es yenañ ñeñto'marña yeñoteñ e'ñe allorocma o' yo'patatareťta ñerra'm escha' yenamueñ.

16 Ñerra'm eseshascha' eñote' samo'ts ñeñt atet pene' ñeñt ama pocteye' enteno Yompor, ñeñtña po'chñarpa' ñerra'm ama añecpayaye alloch rromuerr attoch chenquerra e'ñe poctacma, sañapa' añcha' senamoñ Yompor attoch ñach a'crraterre' e'ñe puecamquëñoť. Yomporpa' o'ch a'crrater ñerra'm po'chñarpa' ama añecpayaye alloch rromuerr attoch chenquerra e'ñe poctacma. Po'ñoçhpa' eñall yo'chñar alloch yerromuerr attoch yechenquerra e'ñe poctacma. Ñeñto'marña napa' ama añecpaye' notenso sapa' çhocmach sema'yochampeña ñeñtcha' chenquërtsa e'ñe ña patpare'teñoť.

17 Ñehua, yeñoteñ allohuen ñeñt ama pocteye' enteno Yompor ñeñtpa' ochña'teñets enteñ Yompor. Tarraña eñall ñaña ochñarets ñeñtpa' ama añeyaye ñeñt alloch yerromuerr attoch yechenquerra e'ñe poctacma.

18 Yeñoteñ allohueney ñeñtey po'ñoçh eñalleterrtsa Yomporotpa' amach allo'na yeña'nenno ñeñt ochñarets enten Yompor. Tarro'mar Yompor Puechemerpa' çhocma cohuañpeney ñeñto'marña oneñetpa' ama't e'ñe mameshapa' amach alla errot perrye'te.

19 Te'ña yapa' yeñoteñ o' yeyomporena'tarterra ya. Po'potantañña acheneshasha' arr patsro ñeñt ama ame'ñetso, ñetñapa' aña yochresha'tenahuet oneñet.

20 Yañapa' yeñoteñ ñeñt Puechemer pen Yomporpa' ñaña'apa' o' huapa. Ñaña yeçhapterre'ña yeyoçhro attochña yapa' o'ch yeñoter Yompor ñeñt e'ñe po'ñoçh Parets. Ñeñto'marña yeñoteñ o' yeparrocmaterr epay ñeñt e'ñe po'ñoçh Yompor Puechemer ñeñtpa' Jesucristo. Attoña yapa' o' e'ñe yeñoter Yompor ñeñt e'ñe po'ñoçh Parets, ñeñtña yapa' allochña e'ñe corretsayach yocsheñeshocmañen tayoteñ e'ñe errponañohuen.

21 Te'ña nechemerneshacha' sapa' e'ñech señoťnoma, ñato'tña seyomporer sepeña'ña po'poñ ñeñt ama po'ñoçh Partsoyaye. Te'pa' ñeñtach notas, ñeñtpa' attetepa'ch Nompore. Allohua.

Juan

AÑ PUEPAÑ SAN JUAN PO' CARTA 2 SAN JUAN

Attoch cohuen yemorrentannena e'ñe po'ñoçh atet oteneY Yompör po'ñoñ

¹ Napa' na ñeñten pompor pen allohuen ñeñt ame'ñenaya Yompör, te'pa' o'ch nequellconas añ carta. O'ch nequellconap̄ ða ñeñteþ e'ñe noçhesha' nepeneþ, ða ñeñteþ o' acerr Yompör. O'ch nequellconap̄ ñaña ora pechoyoresohuen ñeñt e'ñe pachor pepene'. Napa' e'ñe po'ñoçh atarr nemorrentensa, ama e'ñe napta nemorrentenso, elloña po'potantañeçhno ñeñt o' enterran ñeñt e'ñe po'ñoçh Yompör po'ñoñ, ñetpa'çho'ña e'ñe morrentuenset.

² Tarro'marña sapa' atarr yemorrentensa atto yapa' o' e'ñe çherrnaya ya yeyoçhro ñeñt e'ñe po'ñoçh Yompör po'ñoñ. Ñeñtpa' allach e'ñe a'puena yeyoçhro errponañohuen.

³ E'ñe nehuomcha'teñoñes sa napa' o'ch notas: Yomporepa'ch sebensare'tampene' ñeñtara Parets epuet Puechemer Jesucristo ñeñt Yepartseshar yepen. Ñetepa'chña semuerenaya attochña sapa' e'ñech cohuen socshena seyoçhro. Ñeñtpa' añecop attochña sapa' señoñterrñañ ñeñt e'ñe po'ñoçh Yompör po'ñoñ attochña sapa' o'ch semorrentannerra e'ñe cohuen allohuenes.

⁴ Te'pa' o'ch notap̄, ða ñeñteþ e'ñe noçhesha' nepeneþ na atto nentenaþ puesheña'tets ñeñt pechoyoresha' pepen, ñetpa' çhocma e'ñe cohuen coñape'cheññañet Yompör Parets po'ñoñ ñeñt e'ñe po'ñoçh atet oteneY, napa' ñeñtña atarr nocshatene'.

⁵ O'ch noçheshacha' neyerpataþa, allo'nepa'ch amorrentanna'tpo' sentannena allohuenes. Ñeñt atet noteneþ arr nequellcoñpa' ñeñtpa' ama añeyaye ñoñets ñeñt ama se'mare. Ama't allempoteñ e'ñe errte' same'ñerrapa' allempoteñ se'muerrña ñeñt ñoñets.

⁶ Ñerra'm yemneñ yemorrentanna'tapa' añcha'ña atet yeþohuerra ñeñt atet oteneY Yompör. Ñerra'm añ yemneñ o'ch e'ñe atet yeþohuerra ñeñt atet oteneY Yompörpa' çhochña e'ñe cohuen yemorrentannerra allohueney. Ñeñtpa' e'ñe ahuatoteñ atet serrpare'tatyasasete't.

Atet pena ashcañnesha' ñeñt çhocma e'moñe'tene' Cristo

⁷ Ñeñto'marña te'pa' atet notenes tarro'mar ñeñt shequene' acheñpa' o' epa'hua añ patsro. Shonte'ch ñeñtcha' shequene' acheñ, ñetpa' atet otyenet Jesucristo ama partsoye' acheñetostso. Ñeñt otets atetpa' ñeñtña po'ñoçh ashcaña ñeñtña e'moñe'tene' Cristo.

⁸ Sapa' e'ñech señoñta allochñapa' amach shecaso. Ñerra'm shecas allempopa' e'ñete' orrena setorrerra Yomporecop. Añcha'ña setorrrena attochña sapa' e'ñech sagaphuerr ora allpon ñeñt alloch tsa'tuerrsa ña.

⁹ Ñerra'm erra'tsencha' ama attecmaye' yeçhatatso ñeñt atet yeçhateneY Cristo, ñerra'm çha a'po'poñeteññañ po'ñoñ, ñeñt atet petsapa' amach Yomporeye' yemteno. Añcha'ña erra'tseneyte' allo'na coñene' Cristo po'ñoñ yapa' e'ñe po'ñoçh yeyemteña Yompör Parets e'ñe Puechemere'na.

¹⁰ Ñerra'm esesha'ch huapatsa sesho ñapa' atetcha' otos ñapa'çho' año' yeçhaten Yompör po'ñoñ tarraña ñapa' ñerra'm ama atteye' yeçhateno atet yeçhaten Cristopa' ñehua, amach sagapatsche sepaclo. Ama't sehuomcha'teñoñapa' amach sotatsche, "Yompore't ða'natenaya."

¹¹ Amach sehuom̃cha'tatsche tarro'mar ñerra'm sehuom̃cha'teñ, sapa' ñeñtate' seychaprech ñeñt̃ ama po'ñoçhoyaye.

Atto so'terranet po'cartoť

¹² Shontemeñ po'poñeçhno ñeñt̃cha' notaseñ tarraña ama nemno o'ch e'ñe notuas arr necartoť. Tarro'mar napa' nesechena o'ch nemo'tensa' allempochña attoch yeserrpare't e'ñe parro, attochña e'ñech cohuen parro yocsherra.

¹³ Añ pemo'nerr puechoyoresha'pa' ñetpa' huom̃cha'tenpet ñamet arr necartoť. Ñetpa'çho'ña ñeñtet o' acerranet Yompor. Te'pa' ñeñt̃ach notas, Yomporepa'ch sa'nataya. Ñeñt̃pa' attetepa'ch Nompore. Allohua.

Juan

AÑ POMA'PAÑ SAN JUAN PO' CARTA 3 SAN JUAN

Atto Juanpa' eñotenan Gayopa' e'ñe cohuen ame'ñena

¹ O'ch masheñe Gayo nequellconañ añ carta, napa' na ñeñten pompor pen allohuen ñeñt ame'ñenaya Yompor. O'ch notañ, napa' e'ñe po'ñoçh atarr nemuerenpa.

² Ñehua, masheñe çhocma nema'yochampenpa allochñapa' Yomporpa' e'ñech a'natenpa. E'ñepa'ch cohuen pehuomñchena, tarro'mar napa' neñoteneþ e'ñe pecamquëño'tpa' e'ñe cohuen þoctape'chen Yomporecop.

³ O'ch notañ, napa' atarr nocsha allempo huerra masheñnesha' pesho't. Ñetpa' atet serrpare'tatuerrnet þapa' e'ño' po'ñoçh cohuen þame'ñena, e'ño' cohuen þoctape'cheññañ Yompor po'ñoñ ñeñt e'ñe po'ñoçh atet oteneý.

⁴ Allempo ne'mare'tas atto sapa' e'ñe cohuen soctape'chen ñeñt e'ñe po'ñoçh atet oteneý Yompor po'ñoñ, napa' ñeñña atarr nocshatene'; ama eñalle po'poñ ñeñt atet atarr nocshatene'. Napa' e'ñe atet nentenes ñerra'mrate' nechemeres ñeñto'marña napa' atarr nocshensa.

⁵ Ñehua, masheñe o'ch notañ, þapa' e'ñe pocte' atet pepena ñeñt atto þaguëñ e'ñe cohuen pepacillo masheñnesha' ñeñt huapyetsa po'poñ anetsot.

⁶ Ahuaña allempo yapçhena allohueney ñeñtey ame'ñetsa, ñetñapa' atet serrpare'tatuerryet atto þapa' e'ñe cohuen pemuerapanet. Ñaña o'ch notañ, çhocmach peyenpuenanet, þapanetcha' ñeñt palltenet attoch anerret Yompor po'ñoñ po'poñ anetso. Ñerra'm atet pepenapa' ñeñtpa' e'ñech pocte' enteneþ Yompor tarro'mar ñetpa' Yompor sherbenet.

⁷ Ñehua, ñetpa' o' ahuanmuet attoch serrpare'teññañeta' Jesucristo po'ñoñ tarraña ñetpa' ama mueneñeto o'ch es apapanet ñaña ñeñt ama ame'ñetso.

⁸ Ñeñto'marña yapa' e'ñe pocte' o'ch es yapapanet tarro'mar ñeñtpa' attoña yetorrapretenañña Yompor po'ñoñ.

Atto Diótrfespa' ama't mameshapa' ama cohuenaye' entenano ñeñt ame'ñetsa

⁹ O'ch noterrperr po'poñ. O' nequellca'hua carta allohuenacop ñeñt apçhetsa all þa'netsro. O' notuanet ora allpon atet notuaþ arr necarto't, tarraña Diótrfespa' çha achmare'tey. Ñapa' e'ñe pommo'cheño't e'ñe ñañeñapa' añña muenen o'ch pomnaren þa'yenan acheñnesha' ñeñt o' ame'ñerrana Yompor, ñeñto'marña ama e'mñotenye.

¹⁰ Ñeñto'marña esempoch neçhap peshopa' o'ch neyerpatosanet ñeñt atet pena Diótrfes. Ñapa' çhocma toma'tampeney attach eñosatse'tyen yocop. Ama ñeñtayaya atet peno, elloña ama aguënano masheñneshaçhno ñeñt anene' Yompor po'ñoñ. Ama aguënaneto ñaña ama muenatenano acheñnesha' o'ch aguëñet ñamet masheñneshaçhno. Ñerra'm esesha'ña aguënahuetpa' ñañaapa' o'chçho' mueño'terranet arro't all sapçhena.

¹¹ Ñehua, masheñe þapa' amach peyçhapretatsto ñeñt atet pentapreten ñeñt ama pocteyaye. Papa' añcha'ña peyçha' ñeñt pentapreten atto e'ñe pocte' es þa'yenet. Ñeñto'marña atet noteneþ tarro'mar erra'tsen ñeñt e'ñe pocte' es petspa' ñeñtca'yeña Yompor pueyochresha'; ñeñña ama pocteye' es þa'yetso ñeñña ama't mameshapa' ama eñotenanoña Yompor.

Atto e'ñe cohuen orrtaten Demetrio

¹² Ñehua, o'ch notap ñaña po'psheññecop ñeñtpa' añ pa'so'cheñ Demetrio. Ñaña po'ñoçhpa' e'ñe cohuen enteñ allohuen acheñenesha'. Ñapa' e'ñe atet pena atet oten Yompor po'ñoñ ñeñt e'ñe po'ñoçh cohuen. Ñeñto'marña yapa'cho'ña yeñoteñ ñapa' e'ñe cohuen acheñer. Ñehua, ðapa' e'ñe peñoteneñ ñerra'm erroteneñ yoten, ñeñtpa' e'ñech po'ñoçh atet.

¹³ Shontemeñ ñeñtcha' notapeñpa' tarraña amach e'ñe notuape añ necartot.

¹⁴ Tarro'mar napa' atarr nemneñ ahuenepoña neçhap pesho. Ñerra'm esempoch neçhappa' allempochña e'ñe yeserrpare'tatanna'ta parro.

¹⁵ Ñeñt arro'tsa'yen masheñnesha' ñetpa'cho'ña huomñcha'tenpet ñeñtara añ necartot. Pañapa' o'ch pehuomñcha'tyesanet e'ñe puesheña'ttsocma masheñnesha' ñeñt parro'tseneñ. Te'pa' ñeñtach notap masheñe, Yomporepa'chña ða'natenaya. Allohua.

Juan

AÑ SAN JUDAS PO' CARTA SAN JUDAS

Atto Judaspa' quellcan carta allohuenacop ñeñt pueyochresha' pen Yomp

¹ Masheñeshacha' ñaña nochaneshacha', allohuenes ñeñtes o' huañerres Yomp Paretts attoch pueyochresha' perres, ñeñtes o' sa'cohuentataretterra Partsocop, ñeñtes e'ñe cohuanñpen Yomp e'ñe separrocmateñoť Jesucristo. Ñeñto'marña napa' nequellquënnas añ carta na Judason ñeñten torretsa Jesucristocop.

² E'ñe nehuomñcha'teñoťes sa napa' o'ch notas: Yomporepa'chña semuerenaya, ñaña nanquëpa'chña morrentensa, nanquëpa'chña coshatenes seyo'chro.

*Ñeñt ashcañtetsa amach Yomporeye' po'ñoñ serrpare'teno
(2Pe. 2.1-17)*

³ Te'pa' o'ch notas, masheñeshacha' ñaña nochaneshacha' napa' atarr nemneñ o'te' nequellconas attoch neñotatas ñeñt e'ñe errotenotcha'ña a'queshpatarey e'ñe allohueney ñeñtey ame'ñenaya Jesucristo. Tarraña te'pa' añ nenten ñeñt atarr palltetsa o'ch notas, nanquëpa'ch sema'yochra añ ñeñt atto yame'ñena attochña e'ñech cohuen semoñena, attoch amach semnateñe ama't puesheñarra o'ch a'po'poñetonaset ñeñt atet yame'ñeña Jesucristo.

⁴ Añecopña notenes tarro'mar chocma orretyena acheñenesha' ñeñt ashcañtetsa ñeñt ama Yomporeye' po'ñoñ cotape'cheneto. Ñet pueshquëñoťespa' ñato'rraña chate' a'po'poñeterrnayet ñeñt atto po'ñoñch yame'ñerrñaña Yomp po'ñoñ. Ñetpa' atetcha' otyeset, e'ñeca'ye pocte' o'ch sosya'tsañechna yeychen tarro'mar Yomparpa' chocma peretnened, ñapa' atarr amueraña ñeñto'mar amach coñchaterrye. Ñetpa' po'ñoñch ama pamo'mtayeye' peñeto Yomp ñeñt ñapuët Yamo'mte' yepen ya. Ñaña ñetpa' ama po'partseshareye' peñetoña Jesucristo. Tarraña sapa' señohepa'ch e'ñe ahuaťoteñ anuaretta ñeñt atet petsapa' ñeñtña o'patatenetña coñcheñets.

⁵ Ñehua, sapa' po'ñoñch e'ñe señoťeñ ñeñt atet pa' ahuať, tarraña te'pa' o'ch alla neyerpaterrsa atto Yomparpa' cha coñchatuerran ñeñt alla quechpuerre' ñeñt e'ñe atet oteney Yomp. Ñeñtpa' atet pa' allempo a'queshpatteran israelnesha' allempo erraneta' Egiptot all atarr amurochtatarettete't. Tarraña ama't a'queshpatteranetañ allempo, elloña tsapatonetpa' o' alla a'cllatuerran allohuen ñeñt ama cohuenaye' ame'ñaye'te. E'ñech attecma perran allohuen ama't te' ñeñt ama ame'ñetso.

⁶ Te'pa' o'ch alla neyerpaterrsserr po'poñ ñeñt atet pa' ñaña patanta'tets mellañoťeñnesha'. Ñetpa' anaretetañ ñetcha' sherbenet Yomp, tarraña ama't atet anaretetañpa' ñetña ellopa' o' a'ypo'ña'nmuët pue'ntañ e'ñe patpare'teñoťet Yomp. Ñeñto'marña Yomparpa' alla huancanet cadeno ñeñt ama apyapahuoyaye ama't errponaña alla huapore'tanet nanac checmeto. Ñetña'pa' alletach tarrempohua esempoch mellapoterra allempochña mueñerranet ñaña coñcha'puetso.

⁷ Te'pa' o'ch alla neyerpaterrsserr ñaña ñeñt atet pe't sodomo'marnesha' ñaña gomorro'marnesha' ñaña allohuen ñeñt allampaño'marnesha' all.

Ñetpa' e'ñe atet pete't atet pa patantarr mellaño'teñnesha' atto nanac ye'chcatenet ñeñt nanac sosey enten Yompor. Cañoresha'tyenet nanac ama't yacmapa' agapannena e'ñe parro yacmacma, ñeñtpa' amaca'ye atteye' anareteye. Ñeñto'marña Yompor allpa' attoña coñchatanet o' etomam̄psanet attoch e'ñe a'poyatatuerranet tso' ñeñt ama emaya'pahuoyaye. Ñeñto'marña yeñoteñ allohueney eñall coñcheñets ñeñt ama ahuañaño.

⁸ E'ñe attecma p̄tse'tyena ñaña ashcañnesha' ñeñt orretyetsa te'. Ñaña ñetpa' po'poñonfa es cotape'chyenet ñeñt ama po'ño'ch atteyaye. Attoña ñetpa' a'sosyatenet po'chets e'ñe ñañeñeta. Ñeñto'marña ama't Yepartsesharpa' ama am̄cha'na'tpahuoye' enteñeto, attoña ama't ñaña allohuen ñeñt ahuamencatetyetsapa'cho'ña e'ñe achm̄are'tueñet.

⁹ Tarraña ama achm̄are'tpahuoyaye ama't Yepartseshar ama't ñaña allohuen ñeñt ahuamencatetyetsa. Ñehua, ama't Miguel ñeñt pa'm̄cha'tareter pen mellaño'teñnesha' ñapa' ama achm̄are'tapanoña oneñet. Allempo rroma Moisés oneñetñapa' huapa, ñapa' añ atarr mueneñ o'ch enana' arromñañ, tarraña Miguelñapa' ama muenache o'ch aner. Ama't muene es otnare'tanna'tetaña' Miguelñapa' amaca'ye achm̄are'tanoña oneñet. Ñeñtpa' atfa och: "Ñehua, ñeñt atet pepena te' Yomporpa' ñach p̄otteñe'che'."

¹⁰ Tarraña ñeñtña ashcañnesha' ñeñt orretyetsa te'pa' ñetñapa' chocma achm̄are'teñet ama't ñeñt atarr ahuamencatesha' tarro'mar ñetpa' ama eñoteññañeto po'huamenc. Añach e'ñe paterr eñotenet ñeñt e'ñe patso'marecpa. Ñetpa' e'ñe atet penet ñerra'mrrate' berr ñeñt añach pa'yen ñeñt atet muenatyenanet po'chets, ama es cotape'chpenayeña o'ch eñotet erra'tsente'ña ñeñt po'ño'ch cohuentetsa. Ñeñto'marña ñetpa' a'chencataterretcha' e'ñe ñañeñeta.

¹¹ Atarr yoro'cheno'tsa'yenet tarro'mar ñetpa' ama morrenteñeto pamo'ts, e'ñe atet penet ñerra'mrrate' atet pe't Caín allempo muetsan pa'mo'nasheñ Abel. Attoch aparettet quelle, ñetpa' añach cotape'chenet o'ch shecare'teñet acheñenesha' atet pe't Balaam. Ñeñto'marña ñetpa' chenquë'rretcha' tarro'mar e'ñe atet penet ñeñt atet pe't Coré ñeñt amtsarettatsa ahuañ e'ñe ña patpare'teñoñ.

¹² Ñeñtña ashcañnesha'pa' sapa' ñeñtña sepenca'ntatene' allempo sap'chena o'ch serratallme'channena ñeñtes ame'ñenaya Yompor. Sapa' serratallme'channena e'ñe semorrentanna'teñoñ, tarraña ñetpa' attach nanac rratse'tyenet amach ayetña'tteneto amach cohua'peñetoña ñaña po'psheñeñ ñeñt cheporretsa ñeñt muenets o'ch rra' ñaña. Ñetpa' e'ñe atet penetañ ñerra'mrrate' ñeñt cohuan̄penayeñ carrnero ñeñtcha' rratenayeñ tarraña amachña carrneroye'ña rrateno, ñeñtapa' ñañeñetach atarr rretset. Ñetpa' ama es sherbeneto e'ñe atfa penet atet ñerra'mrrate' os ñeñt ama huatetso attach matateñ m̄orr. Ñaña e'ñe attet ñerra'mrrate' narmetsoch ñeñt ama ame'tño, ama'tcha' chen pueme'teñporopa' amach me'teno. Ñaña ñeñtña narmetsocherpa' e'ñech atet pena ñerra'mrrate' rromuech o'ch ya'mare ora puer'chohuenpa' o'ch e'ñe puetsohua o'ch huañ. Ñeñtña ama't mameshapa' amach es sherberrye.

¹³ Amach pueñmañeshofeye' es orrtatyeneto e'ñech pommo'cheñoñeta es orrtatyenet. E'ñe atet penet ñerra'mrrate' oñ apellche' puemo'yer. Ama't mameshapa' amach muechecheno. Ñeñtña emo'ypa' chach huapore'tenan sosyare' topña'so all pa'so'ten. Ñeñtpa' e'ñe atet penaña ashcañnesha' amach pasayaya orrtatenetoña apenco'chen. Ñetpa' e'ñe attet ñerra'mrrate' shepram̄o' ñeñt

yenten o'ch shora'nom o'ch ahuo' patso ñeñtpa' ama es sherbeno. Yomporpa' o'patenanet o'ch mueñanet coñcha' puetso all atarr nanac checmete', alloña ñetpa' amach cha'nerreto ama't errponaña.

14 Ñaña te'pa' o'ch notas, ahuatpa' eñall puesheñarr yacma añ pa'so'cheñ Enoc ñeñt Adán po'mreneñ po'cançhroñohua. Ñaña'pa' ñeñt a'mtaye't Yompor po'ñoñ. Ñapa' eñotatan acheñenesha' atetcha' a'paretterra ama't ñeñt ashcañnesha'. Ñocpueta'ñaña atet ote't: "Huerrach Partsesha' e'ñe pueyochreshachnohuen ñeñt nanac po'nnacaren patsopueñ.

15 Huerrach allochña'pa' o'ch entuerran allohuen acheñenesha' ñato' cohuenette' ñato' amate' cohuenayayeto. Allohuen ñeñtcha' ama cohuenaye' entuerro Yompor, ñetña'pa' amñare'tterretcha' coñcheñtso. Attochña tsa'tatuerrana allohuen ochñañenesha' ora allpon patse'tyesete't ñeñt ama pocteye' enteno Yompor Parets ama't mamesha. Ñaña atetcha' tsa'tatuerranet ora allpon atto sasare'chete't Yompor e'ñe pachm're'teño'tet." Arrpa' allohua huañ ñeñt atet eñose't Enoc ahua't.

16 Ñaña ñeñt ashcañnesha'pa' atarrcha' tanmare'tyeñet, chach po'poñ entuenet. Añach cotape'chyenet ñeñt muena'yenet e'ñe ñocpueta. Cho'nate' ñetpa' atarrcha' ommoña'tet. Ñaña ñerra'm esempo e'ñe cohuen eñosyenet acheñenesha'cop, ñetpa' añecpach e'ñe cohuen eñosyenet attoch es apuenanet acheñenesha'.

Atto pa'namen cotape'chatenan allohuen ñeñt ame'ñetsa

17 Tarraña sa masheñnesha' ñaña noçhaneshacha' amachña ñeñta same'ñatsto. Sapa' añcha'ña seyerpa ñeñt atet otyese't Yepartseshar Jesucristo puellsensarnesha'. Ñetpa' ahua'toteñ atet otete't ñeñtcha' orreyerrtsa tsapa'onet.

18 Ñeñtpa' atet otyete't: "Allempoch mellapoterrmochapa' orrtarrach ñeñtcha' achm're'terre' Parets. Añach yeçhenet ñeñt muenatse'tyenet ñañeñeta, ñeñtpa' ama't mameshapa' ama cohuenaye' enteñe Parets."

19 Ñeñt ashcañnesha'pa' çhocmach mueneñet o'ch ellopa'tetstateret ñeñt ame'ñenaya Yompor. Ñeñtara ashcañnesha'pa' añach cotape'chenet ñeñt atet muenatenanet ñet po'chets; ñetpa' ama chorrenaneto Parets Puecamquëñ.

20 Tarraña sa masheñnesha' ñaña noçhaneshacha' e'ñe ne-muereño'tespa' o'ch notas, amach seyçhatstaneto ñeñt atet penet ñet. Sapa' e'ñechña same'ñeño't Yompor huomenquëpa'ch sepa' seyoçher tarro'mar ñeñt same'ñena sapa' e'ñeca'ye Partseshotecma huena. Chocmach sema'yochena. Sapa' amach sotaye' se'ñoreno allempo sema'yochena. Añcha'ña se'ñoratene' Parets Puecamquëñ ñeñt atarr ahua'mencatesha'.

21 Atetcha' sepaña sa allochña'pa' çhocmach seño'teñ atto atarr morrentenya Yompor, amach sepurratsterro. Socsheñesha'pa' çhocmach seyemteña Yepartseshar Jesucristo; ña e'ñe puemuereño'tey esempohuañen a'qeshpaterreycha', attochña yañapa' corretsayach yocsheñeshocmañen erponañohuen.

22 Ñehua, o'ch notas ñaña atetcha' sepe' po'potantañeçhno. Patanta'tets acheña'pa' atarr echarr enteñet o'ch ame'ñerrñañet Yompor po'ñoñ. Ñetpa' çhoch soçtape'chaterranet e'ñe cohuen attoch ame'ñerret ñeñt e'ñe po'ñoçh Yompor po'ñoñ,

23 atarr yoroçheno'tsenet po'chña'ro'tet. Ñeño'marña sapa' o'ch sa'qeshpataterranet, ñeñtpa' e'ñech atet sepenanet ñerra'mrrate' chesha'toll ya'qeshpaten o'ch yechter all poyapen pocoll. Po'potantañeçhno ñeñt

ye'chene' atarr sosya'tsañe'chno, ñetpa' čhochña semuerenanet țarraña ama'tcha' semuerenanetañpa' amach socshapretatstanetoña ñeñĩ atet ye'chenet sosya'tsañ. Sapa' čhochña setsena'tapretanet ñeñĩ atet Ƥa'yenet sosey, te't sa'naña a'shoratatenet.

E'ñe yame'ñeñoĩ Yepartseshar Jesucristo aye'chočhtaterrapo'ch Yompor

²⁴⁻²⁵ Te'ña Yompor ñeñĩ e'ñe ñapueĩ partsotets, ñeñĩ allohuen es eñotyets, ñaña ñeñĩ Ya'qeshƤatañer yepen, ñaña'pa' atarr ahuamencaťesha', ñachña ahuamencať sepene' allochña'pa' amach alla seshora'nerro. Attochña sapa' čapatuerrescha' e'ñe ñesho all atarr cohuentena ña. E'ñech socsheñeshocmañen se'cha'cherr, amach eñalle ama't coñe'ța ñeñĩ'cha' entapreteres ñeñĩ ama pocteye' enteno ña. Te'pa' e'ñe yame'ñeñoĩ Yepartseshar Jesucristo aye'chočhtaterrapo'ch Yompor attoch e'ñe cohuen yecohuentaterrñañ. Chocmuepa'ch e'ñe ñapueĩ Yepartseshar yepeñ, čocmuepa'ch am'cha'tarettena e'ñe țayoteñ errponañohuen ñeñĩ atet Ƥa ahuatoteñ. Te'pa' ñeñĩ'ach notas, ñeñĩ'pa' attetepa'ch Nompore. Allohua.

Judas

ATTO SAN JUANPA' EÑOTATER YOMPOR ÑEÑTCHA' ATET PERRTSA TSAPATONET EL APOCALIPSIS

Atto Yomporpa' gatyesan Puechemer Jesucristo

¹ Añ ñoñets ñeñtapa' atto Yomporpa' gatyenan Puechemer Jesucristo, allochñapa' ñachña eñotatyese' allohuen ñeñt torra'yetsa Yomporecop. Ñeñtcha' eñotatanetpa' ñeñtapa' ñeñtcha' ahuen atet perra ama't esempo. Atto eñotaten na, ñapa' ahuo't mueñon po'mllañoñeñer, allochñapa' ñach negatyese' na ñeñten sochetsa Juan ñeñten torretsa ñocop, allochñapa' attoch eñoch ñaña allohuen ñeñt torra'yetsa Yomporecop.

² Tarro'mar napa' nach eñotatahuet allohuenet ñeñt e'ñe po'ñoñ ñeñt atet eñotatenen Yompor po'ñoñ ñaña ora ñeñt allpon eñotatenen Jesucristo ama't ñaña ñeñt ora allpon gatyennet.

³ Atarrcha' cosheñtso'tsen ñeñtcha' lleyatene' acheñenesha' añ ñoñets ñeñt huetsa Yomporeshot ñeñt yeñotatene' ñeñtcha' atet perra esempo. Atarrcha' cosheñtso'tsa'yen ñaña allohuen ñeñtcha' e'mñotene' añ ñoñets ñaña e'ñech ayemuetpo' enteñet, ora allpon ñoñets ñeñt aquellcareñ arr. Tarro'mar o' chapmoch allempoch etsotuerra añ ñoñets.

Atto Juanpa' quellcan cancherr ñeñt anetser all apcha'yena allohuen ñeñt ame'ñenaya Cristo

⁴⁻⁵ Napa' o'ch nequellconas carta allohuenacpas ñeñtes apcha'yetsa e'ñe same'ñeñot Yompor all ñeñt po'poñe'ttsocma anets ñeñt cancherr ñeñt Asio'tsa'yen. E'ñe nehuomñcha'teñoñespa' o'ch notas: Yomporepa'chña semueraya epuet ñaña Puecamquëñ epuet ñaña Puechemer ñeñt Jesucristo. Ñetepa'chña sebensare'tamñene'. Añ ñeñtara Yompor ñeñt chocma eñall, ama't ahuatoteñ chocma eñall ñaña ñeñtara ñeñtcha' huerrtsa po'pocheño. Ñaña Puecamquëñ ñeñtapa' ñeñtara cancherr ñeñt sherba'yets e'ñe all po'conaño e'ñe po'poñe'ttsocma sherbenet. Ñaña ñeñtara Jesucristo ñeñt atarr ayemuetpo' yenten ñeñt ora allpon ñeñt eñotateney; ñaña ñeñtara Jesucristo ñeñt ñanom tanterrtsa puerromñoñ ñapa' amach alla rromuerre'te. Attoña pa'mcha'tareter peñ allohuen ama't allohuen amcha'taretechno añe patsro. Ya'ye'chochtatoñepa'ch ñeñtara Jesucristo ñeñt atarr amorrentña, e'ñe ña puemorrenteñoñeypa' attoña rroma yocop allochñapa' attoch ashataretta po'rras e'ñe yocop allochñapa' attoch e'ñe e'shohuaretterra yo'chñar.

⁶ Ñaña ñapa' attoña e'ñe cohuen aguëney attochña ya'mcha'tarettapretera attochña yesherbapreterrñañ Pompor ñeñt atarr Parets, attey ñerra'mrrate' ñeñt corneshatets Partsocop. A'cohuentaterrapo'ch Jesucristo, amcha'tarettepa'ch tayoteñ ama't errponhuañen. Ñeñtapa' attetepa'ch Yompore.

⁷ O'ch secueñ huerrach Cristo, oscha' a'suatañperre'. Ama't allohuen acheñenesha'pa' entuapueretcha' e'ñe pa'clloyotet. Ama't ñeñt pata'te'pa' entuapueretcha' ñamet. Allempoña ñeñt shonte' pa'namen acheñenesha' ñeñt ye'cha'yetsa arr patsropa' ya'na'tapueretcha' e'ñe puellquëñoñtet. Ñeñtapa' e'ñech atet perra.

8 Yompor ñeñt nanac Parets ñeñt Yepartseshar yepen ñapa' chocma eñall, ama't ahua'toteñ chocma eñall, ñeñt'pa' ñeñt'ara ñeñt'cha' huerrtsa po'pocheño. Ñapa' atetña ot: "Napa' e'ñe pa'motroteñ eñallen atten ñerra'mrrate' quellec A ñeñt pa'moter pen alfabeto. Allempoteñña napa' chocma eñallen esempohuañencha' huañerr ñeñt allpon eñall, napa' atten ñerra'mrrate' quellec Z ñeñt all puen alfabeto." Añpa' allohua ñeñt atet toma'ntatena Cristo.

Atto Cristopa' orrtana Juan e'ñe po'cohuentaño

9 Te' napa' ñeñten sochetsa Juan o'ch alla noterrser. Napa' ñeñten e'ñe semo'nasheñ sephouenen sa. Napa' ñeñten semueroçhtapretenaya e'ñe yame'ñeño Jesús. Ñaña e'ñe yeyemteño ñapa' e'ñech acoña es ya'huanten esheccha' ya'mcha'tarettapretera. Ñehua, napa' o'ch neñotatas ñeñt atet nepena na arr. Ahuañmo'cha napa' e'ñe neserrpare'teño Yompor po'ñoñ ñeñt atet eñotatenen Yepartseshar Jesucristo, añña ñeñt ne'moñe'tene'pa' o' huapore'tenneta' arr atarr allañar all rroçhpe'chañetollo ñeñt otenet Patmos.

10 Pamtarr allempo çhapa'muen aña yetro allempo chocma yeyerpueña Yompor napa' neyerpueño ñapa' e'ñe machayota chorratna huomenc Yompor Puecamquëñ. Allempoñapa' machayota ne'm ñoñets huapa necha'ño. Atarr huomenc eñen atet ñerra'mrrate' poctor e'morrtetsa huomenc. Ñeñt'pa' atet oten añ ñoñets:

11 —Napa' ñeñten ñanom eñallen, allempoteñña napa' chocma eñallen ama't esempohuañencha' huañerr ora allpon ñeñt eñall, napa' atten ñerra'mrrate' quellec A ñeñt ñanom huetsa alfabeto, arrohua all huañen alfabeto ñeñt yoten Z. Te' napa' o'ch notañ ñeñt ora allpon ñeñt'cha' negatyesañ añ poctetsa o'ch pequellca'yepapañllo allotpa' o'ch pemñe all anetsoçhno ñeñt cançherr ñeñt apçha'yetsa all pa'namen anetso ñeñt ame'ñetsa. Ñeñt ñanom añ pa'so'cheñ Efeso, allotpa' Esmirna, allotpa' Pérgamo, allotpa' Tiatira, ñaña Sardis, ñaña Filadelfia, allotpa' ñaña Laodicea. Ora añeçhno anetspa' ñeñt Asio'tsen.

12 Allempoña ne'muen atet ñoñetspa' nañapa' neptallsa o'ch neñch esesha'te' ne'ñorana'tenaya. Allña'pa' nent cançherr ñeñt all orratenet huerare allo çhoyo'tenet ñeñt'pa' oro ayeçhcatare't.

13 E'ñe rroçho ñeñt cançherr all orratenet huerare all orrtena puesheñarr yacma ñeñt'pa' Jesucristo ñeñt'ara Ñeñt Acheñetosets. Ashtama't, pa'shtampa' e'ñe çhen pa'tcohua. Achanare't, po'chanarpa' orotommuen ñeñt allo charena puesomapo.

14 Poño't pue'chpa' e'ñe ora atarr huallama't atet ñerra'mrrate' carrnero pue'ch ñeñt e'ñe huallama't. Amapa' o'ch not pue'chpa' e'ñe ora huallama't atet ñerra'm senet ñeñt otenet nieve ñeñt atarr huallama't. Pa'cile'pa' atarr poptena atet ñerra'mrrate' tso' po'huorter nanac a'rrechatañ.

15 Pa'tacpa'çho'ña attecma poptena atet ñerra'm aser yachamuen. Allempo eñorena e'ñe atet e'morrtena po'ñoñ atet ñerra'mrrate' shonte' oñ atarr huomenc ma'moreten.

16 Pot po'cohuenro'tpa' orrenan cançherr ranto. Puenamo'tpa'çho'ña all orrtena cochell ñeñt emoshe'mto'mar etsotañtare't. Ora pa'tsa'pot e'ñe atet poptena ñerra'mrrate' atsne' atarr huomenc a'rrechatañ.

17 Allempo neñchpa' e'ñe nem'cha'na'teño'tpa' nañapa' o' nerrmosa patso e'ñe pa'tco. Neyorño'tpa' ama nepelleno ama't mamesha, çha nottena ñerra'mrrate' çho nerromuen. Tarraña ña potot po'cohuenro't a'plla'n, oten:

—Amach pem̄cha'tatsto, napa' ñeñten ñanom eñallen, allempoteñña napa' chocma eñallen ama't esempohuañencha' huañerr ora allpon ñeñt eñall.

¹⁸ Napa' ñeñten ama arromñañeshayayno. Ama't nerromhua ahuaña tarraña te'pa' o' alla nocrrerra, amach alla nerromuerre'te ama't ahuaña. Ñaña napa' nechen llave, ñeñt nehuamenc nepen alloch pomnaren nepen rromueñets ñaña ñeñtcha' aguerre' allohuen ñeñt rromuets.

¹⁹ Te' p̄ocoppa' añ poctetsa o'ch pequellca'yes ora ñeñt allpon o' negatyeseḡ ñaña allpon ñeñtcha' negatyerrperr ñeñtcha' atet perrtsa esempohuañen.

²⁰ Ñehua, te'pa' o'ch neñotataḡ ñeñt atet toma'ntena añ cancherr ranto ñeñt penten e'ñe notot necohuenrot ñeñt ama eñotenaye' penteno. Ñeñt cancherr rantopa' añ toma'ntena ñeñt cohuañpesyenahuet ora allohuen ñeñt name'ña'yenaya allemeñ ñeñt cancherr anetso ñeñt apcha'yetsa all. Ñaña ñeñt atet pent ñeñt ayeçcataret oroch all orratenet huerare, ñeñtpa' añ toma'ntena ora allpon ñeñt apcha'yetsa allemeñ anetso ñeñt cancherr ñeñt name'ña'yenaya.

2

Atto Juanpa' quellcan carta añecop ñeñt ame'ñetsa anetso Efeso

¹ Ñeñt neserrpare'tatene' ñapa' alla oterrner, ñapa' atet oten:

—An poctetsa o'ch pequellca' carta añecop ñeñt cohuañpene' allohuen ñeñt ame'ñetsa all anetso Efeso, o'ch p̄otanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt orrene' cancherr ranto e'ñe all pota po'cohuenrot, ñeñtara Cristo ñeñt chope'chets rroçho e'ñe allo'tsen ñeñt ayeçcataret oroch all orratenet huerare.

² Ñaña'pa' atet otenes: 'Napa' neñotuennas ñeñt ora allpon atet seḡa'yena all. Napa' e'ñe nentuennas ñeñt allpon nanac seḡorra'yena ñaña allpon ñeñt e'ñe cohuen acoḡa es sa'huanta'huanen. Ñaña napa' e'ñe nentuenes sapa' ama saguēne ñeñt ama cohuenaye' es p̄a'yetso. Sapa' atto setpatyeñ ñeñt otetseñ ñetpa' allsensareteto' tarraña ñetpa' atta shecare'tenet. Attoña setpateñoḡ o' señotanet ñetpa' atta shecare'tenet.

³ Ñaña napa' neñotuenes ñeñt allpon semueroçhtena nocop ñaña atto e'ñe cohuen sa'huanta'huen mueroçhteñets, ama semuenme'cheñe allo seḡorrena.

⁴ Tarraña ama't atteñpa' nentuennas paḡerr ñeñt ama cohuenaye' nentapretenso. Ñeñtpa' añ atto sapa' o'huañ e'ñe semorrentna ñeñt atet seḡa ahuañ allempo e'ñe errte' same'ñerra.

⁵ Te'pa' o'ch notas, o'ch seyerpuerra atto ahuañmo'cha nanac cohuen semorrentenna. Te'pa' ama atteye' sepeno. Añ pocte' o'ch alla soctape'cherr e'ñe cohuen attoch o'ch alla seperra cohuen ñeñt atet seḡa allempo e'ñe ñenmañ same'ñenna. Ñerra'm amach ello soctape'cherro cohuen napa' tayecma o'ch ahuen o'ch neprratam̄perres ñeñt atma'ntataret socop ñeñtara ñeñt all orratenet huerare.

⁶ Tarraña ama't atteñpa' napa' añña e'ñe cohuen nentuennas atto sapa' ama pocteye' senteno ñeñt atet p̄atse'tyen acheñenesha' ñeñt cotene' Nicolás poctañña. Napa'cho'ña ama pocteye' nenteno ñeñt atet p̄atse'tyenet sosya'tsañ.

⁷ Ñeñt e'm̄ñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquēñoḡ, ora allohuen ñeñt pame'ñeñoḡet chocma apcha'yenet allemeñ anetso'mar. Ñeñt metana'tue' allohuen pa'namen

topateñtsočno, ñeñt ama nepuerram̄perrayo, ñetñapa' naphuerranetcha' ñeñt no'patatenanet ñeñtcha' atarr yom̄a'huerret e'ñe poctacma Nompore-sho, allpa' e'ñech cosheñtso'tsenet. Ñeñña napa' o'ch not, napa' o'ch nem-naterranet attoch o'ch tsohmuerret añ tsach pue'mer alloch corra'huerret e'ñe poctacma amach alla rromuerrete'te ama't ahuata.' " Arrpa' allohua huañ atet ot efeso'marneshacop.

Atto Juanpa' quellcan carta añecop ñeñt ame'ñetsa anetso Esmirno

⁸ Allempoña ñeñt neserrpare'tatene' ñapa' alla oterrerr:

–Te'pa' o'ch pequellquërrerr carta añecop ñeñt cohuan̄pene' ñeñt ame'ñetsa all anetso Esmirna, o'ch p̄otanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt ñanom eñall, allempoteña ñapa' chocma eñall ama't esempohuañencha' huañerr ora allpon ñeñt eñall. Jesucristo ñapa' ñeñt rromhuats tarraña te'pa' o' alla betterra.

⁹ Ña te'pa' atet otenes: ‘Napa' neñotuennas ora allpon ñeñt atet sepa'yena. Neñotuennas ñaña atto atarr sa'muerochtatarettena, ñaña atto atarr huocchañes. Ñehua, ama't huocchañsoña' Yomporeshot shonte' esocmañen ñeñt sechyen. Ñaña ñeñt se'moñe'tene' neñotuennas atto atarr sasare'tenset. Ama't otenetañ ñetpa' judionesheto' tarraña ñetpa' ama Yomporeye' pueyochresha' penahueto; ñetpa' aña pueyochresha' penahuet oneñet ama't allohuenet.

¹⁰ Amach yore'tatstaso muerochteñets ñeñtcha' ahuen sehuapoya. Tarro'mar ñeñtcha' seyottam̄pse' patanta'ttsos, ñeñtpa' oneñeshot huena añecopña attoch topatuas ñerra'm po'ñochte' same'ñena. Puesheña'ttsos muerochtatassetcha' e'ñe çharramat. Ama'tcha' muetsasetpa' añ pocte' o'ch serromapes atto same'ñena. Allochña napa' naphuerrescha' ñeñt no'patatensa alloch socrra'huerra e'ñe socsheñeshocmañen. Ñeñtpa' ñeñtara noten po'poñ ñoñtso naphuerrescha' sepremio ñeñtcha' socshatuerre' e'ñe poctacma.

¹¹ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoñ ora allohuen ñeñt pame'ñeñoñet chocma apcha'yenet allemeñ anetso'mar. Ñeñt metana'tue' allohuen pa'namen topateñtsočno, ñeñt ama nepuerram̄perrayo, ñetpa' ama't puesheñarrotetapa' amach amñare'tterreto coñcheñtso ama't ahuata. Ñetpa' amach alla rromuerreterro po'pocheño.' " Arrpa' allohua huañ atet ot esmirno'marneshacop.

Atto Juanpa' quellcan carta añecop ñeñt ame'ñetsa anetso Pérgamo

¹² Allempoña ñeñt neserrpare'tatene', ñapa' alla oterrerr:

–Te'pa' o'ch pequellquërrerr carta añecop ñeñt cohuan̄pene' ñeñt ame'ñetsa all anetso Pérgamo, o'ch p̄otanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt orrtatene' cochell puenamoñ, po'cchellpa' ñeñt emoshem̄to'mar etsotañtatareñ.

¹³ Ñapa' te'pa' otenes: ‘Napa' neñotuennas ora allpon ñeñt atet sepa'yena. Napa' neñotenes all seyçhena ñeñtpa' all atarr añcha'noçhtena oneñet. Tarraña ama't atteña' sapa' ama sequeçhpueno atto same'ñenna, ñaña chocma sa'meten atto same'ñenna, ama't e'ñe allempo muetsennanet ñeñt name'ñenaya ñeñtara Antipas ñeñt chocma neserrpare'tene' neñoñ sesho, allara ñeñt pa'netser peñ oneñet.

14 Tarraña ama't atteñpa' napa' nentuennas coñe't ñeñt ama pocteye' nentapretenso ñeñt atet seřatse'tena. E'ñe all Pérgamo patanta'ttsos ama semno o'ch sequëchpa' ñeñt pueyčhateñ pe't atet yečhate't Balaam ahuat. Balaam ahuatpa' atet cotape'chatane't Balac attoch shecare'tane't israe-lena'tarnesha' allochñapa' attoch ñetpa' o'ch řatse'tyenet ñeñt ama pocteye' enteno Yompor. Ñeñt atet řatse'tyenet ñeñtapa' atet pete't o'ch rrallme'chapretan po'poñ acheñ ñeñt po'yomporer pene' ñeñt ayečhcataret, ñerra'm esempo rrenet po'chets ñeñt muetsenet allo sherbeñet pueyečhcatar. Elloña allempo ñetpa' e'ñe pocshapreteñořetpa' o'ch agapanna'tet ama't ñeñt ama puetaporeyaye, allñapa' o'ch cañoresha'tenet.

15 E'ñe attecma seshopa'cho'ña patanta'ttsos atarr ashcaretes ñeñtes puesheña'ttsos ñeñtes ama semno o'ch sequečhpoñ Nicolás poctařña ñeñt atet yečhatenes ñeñt ama pocteye' nenteno.

16 Tarraña napa' o'ch notas, sequëchpa' ñeñt añ cotapñatser, o'ch alla soctape'cherr e'ñe cohuen. Ñerra'm amach ello soctape'cherr cohuen, napa' e'ñe řayecma o'ch ahuen o'ch nečllarenaneta' nocchelloř ñeñt nenamo'tsen.

17 Ñeñt e'mñotene' añ ñoñetspa' čhapanetepa'ch pueyočhreto ñeñt atet neñotatenanet na Necamquëñoř ora allohuen ñeñt pame'ñeñořet čhocma apčha'yenet allemeñ anetso'mar. Ñeñt metana'tue' allohuen pa'namen topateñtsočhno, ñeñt ama nepuerramřerrayo ñetñapa' napanetcha' maná ñeñtcha' pocrramř perret ñeñt ama entpahuesho. Ñaña o'ch napanet mapyetoll ñeñt atarr huallamemen allo aquellcarettena so'chñets e'ñe et-serra. Ñeñtcha' agapue' ñeñtapa' ñapřa eñotenan añ so'chñets ñeñt aquellcareř all.' " Arrpa' allohua huañ atet ot pérgamo'marneshacop.

Atto Juanpa' quellcan carta añecop ñeñt ame'ñetsa anetso Tiatiro

18 Allempoña añ ñeñt neserrpare'tatene' ñapa' alla oterrnerr:

—Te'pa' o'ch pequellquërrerr carta ñaña añecop ñeñt cohuanřpene' ñeñt ame'ñetsa all anetso Tiatira, o'ch řotanet atet: “Napa' o'ch nequellconas carta attoch neñotatas ñeñt atet otenes ñeñt Yompor Puechemer, ñeñtara ñeñt pa'cille'pa' atarr a'rrechatañ atet ñerra'mrrate' tso' po'huorter, ñaña ñeñtara pa'tacpa' atarr poptena atet ñerra'm aser ñeñt bronze ñeñt atarr cohuen poptetsa.

19 Ñapa' te'pa' atet otenes: ‘Napa' neñotuennas ora allpon ñeñt atet cohuen seřa'yen, atto atarr semorrentannena ñaña atto atarr same'ñena, ñaña atto atarr seyenpannena, ñaña atto e'ñe cohuen sa'huinta'huen ñeñt atarr echarr senten. Ñaña elloña allo'na sesen atet řa'nmue' ñeñt atarr cohuen enten Yompor.

20 Tarraña ama't atteñpa' eñall paterr ñeñt ama pocteye' nentapretenso. Ñeñtapa' atto sapa' semnateñ coyanesha' ñeñt sochetsa Jezabel atto ñapa' aña yečhaten ñeñt ama cohuenaye' nenteno na. Ama't ñapa' oteneñ ño' a'mñtene' Yompor po'ñoñ tarraña ama atteyaye, ñapa' atta shecare'tenes ñeñtes torretsañ nocop. Ñaña ñapa' aña yečhatenes ñeñt atto secañoresha'ten, ñapa' otenes ñeñtapa' e'ñe pocte' enteñ Yompor. Ñaña aña yečhatenes ñeñt atto serrapreten po'chets ñeñt muetsenet ayečhcatareřecop, ñapa' otenes ñeñtapa'cho'ña e'ñe pocte' enteñ Yompor. Tarraña Yomporñapa' ama't mameshapa' ama pocteye' enteñe.

21 Napa' atta necueñ allponmat, noten ñato' o'ch cotape'cherran cohuen tarraña teme'ttsenpa' ama mueno o'ch cotape'cherran cohuen. Ñapa' aña atarr cohuen enten atto cañoresha'ten.

²² Ñeñto'mar te' napa' o'ch nemnach o'ch atsna'ten attoch amach cha'nerro po'mayoť. Ñaña ñeñť epuet atet penet ñerra'm ama coťape'cherreto cohuen attoch quechpuenet ñeñť atet yeťchatenanet ña, ñetpa'cho'ña o'ch necoñchatanet nanac.

²³ Ama't ñaña puechoyoreshohuen napa' o'ch ne'nuerranet. Allochñapa' attoch allohuen ñeñť pame'ñeñotet apcha'yetsa allemeñ anetso o'ch eñochet ñeñť atetpa' ama aťapahuo. Napa' e'ñe nentuennas ama't ñeñť atet soctape'chen seyoťhro. Napa' ñeñťencha' saphuerre' allpon ñeñť poctetsa e'ñe puesheña'ttsocpas, ñeñť allpon atet sepa'yen.

²⁴ Tarraña po'potantañes ñeñťes tiatiro'marneshas sapa' ama socteññañe ñeñť atet yeťchaten coyanesha'. Ama't ñaña ñeñť otenet oneñeť poctapña ñeñť ama eñotpahuoyaye, puesheña'ttsa e'ñe etsotene' — ñeñťpa'cho'ña sapa' ama seycheñe. Ñeñto'mar te'pa' o'ch notas, napa' amach nenonaso po'poñ ñoñets ñeñť atarr echarr senten.

²⁵ Añña notenes, amach sequechpatsche ñeñť atto soctape'chen cohuen Yomporecop, ama't tayoteñ ñaña esempohuañen allempoch nohuerra.

²⁶⁻²⁷ Ñeñť metana'tue' allohuen pa'namen topateñťsoťhno, ñeñť ama nepuerram̄perrayo, ñeñť allo'na sets pa'nmue' ñeñť pocte' nenten na, ñetpa' naphuerranetcha' attoch añcha'tareť entenanet allohuen pa'namen acheñenesha' ñeñť yeťcha'yetsa añe patsro. Ñeñťpa' atet Nompore apuennen naña. Neyoroťhenñoch añcha'noťhtapreterrnetcha'. E'ñe po'huamencotet ñerra'm ñet muenats atarrcha' muerotťtateret allohuen pa'namen acheñenesha' arr patsro. Ñeñťpa' o'ch netma'ntacha ñerra'mrrate' ñeñť echene' po'carr asreť, ñerra'm allo aso'tet patsrro'pa' chach a'mllo'tstach e'ñe poctacma.

²⁸ Ñeñť metana'tue' allohuen pa'namen topateñťsoťhno elloña ñetpa' napanetcha' ranto ñeñť atarr ateshamerr.

²⁹ Ñeñť e'mñotene' añ ñoñetspa' chapanetepa'ch pueyoťhreto ñeñť atet neñotatenanet na Necamquēñot, ora allohuen ñeñť pame'ñeñotet chocma apcha'yenet allemeñ anetso'mar.' ” Arrpa' allohua ñeñť atet ot tiatiro'marneshacop.

3

Atto Juanpa' quellcan carta añecop ñeñť ame'ñetsa anetso Sardiso

¹ Allempoña ñeñť neserrpare'tatene' ñapa' alla oterrerr:

—Te'pa' o'ch pequellquerrerr carta añecop ñeñť cohuan̄pene' ñeñť ame'ñetsa all anetso Sardis, o'ch potanet atet: “Napa' o'ch nequellconas carta attoch neñotatas ñeñť atet otenes Jesucristo ñeñť e'ñe chorratena Yompore Puecamquēñ cancherr ñeñťara cancherr ñeñť sherba'yets. Ñetpa' po'poñe'ttsocma sherbenet. Ñaña ñeñťara Cristo ñeñť orrene' cancherr ranto. Ñapa' te'pa' atet otenes: ‘Napa' neñotuennas ora allpon ñeñť sepa'yen. Ñaña neñotuennas atto sa acheñenesha'pa' atet entensetañ ñerra'mrrate' e'ñe cohuen socrrena Yomporecop. Tarraña ñeñťpa' ama atteye' sepeno chaña sottena ñerra'mrrate' cho serromuen, amaña es sesherbenaña Yomporecop.

² Ama't atto same'ñenañ mame' tarraña ñeñťpa' allo'na sen huañuanmats. Napa' nentuenes ama setsotenoña ñeñť e'ñe pocte' enten Nompore. Te'pa' o'ch notas, e'ñechña señoťa, o'ch alla setanterra Yomporecop.

³ Chocmachña seyerpueña ñeñť atto aserrpare'tatareťes ahuañmo'choťeñ. Amach sepsatsche añ ñoñets ñeñť same'ñataya. Ñeñto'marña te'pa' añ

poctetsa o'ch alla soctape'cherr cohuen Yomporecop. Ñerra'm ama atteye' sepeno napa' machayotach nohuernasa atet ñerra'mrrate' eñetpa' amach señoteñe esempopa' machayotach huaponasa.

⁴ Tarraña ama't atteña' all anetso Sardiso e'ñe puesheña'ttsaña ñeñt' ama ye'chenaye sosya'tsañ ñeñt' ama pocteye' enteno Yompor. Ñetpa' atet atma'ntatarettenet ama't pa'shtamuetpa' ama a'sosyateñeto. Ñeñto'mar ñetpa' e'ñe pocte' nentenanet ñaña attochña nemnaterranet o'ch yechope'cherr e'ñe parro tarro'mar ñet ñeñt' neshtamtatenanetpa' ama a'sosyateñeto, e'ñe cohuenarer orrtenet e'ñe huallama'tareret.

⁵ Ñeñt' metana'tue' allohuen pa'namen topateñets ñeñt' ama nepueram̄perrayo, ñetpa' neshtamtaterranet shetamuets ñeñt' atarr huallama't. Ñetpa' amach ne'sherraneto pa'so'cheñ all aquellcarettenet Yompor po'libro attochña ñetpa' corretsetach. Ñetña'pa' nechme'taterranetcha' ñeñt' na Nompor ñaña allohuen po'mllaño'teñnaneshar.

⁶ Ñeñt' e'mñotene' añ ñoñets çhapanetepa'ch pueyoçhreto ñeñt' atet neñotatenanet na Necamquëño't ora allohuen ñeñt' pame'ñeño'tet çhocma ap'cha'yenet allemeñ anetso'mar.' ” Arrpa' allohua ñeñt' atet ot sardiso'marneshacop.

Atto Juanpa' quellcan carta añecop ñeñt' ame'ñetsa anetso Filadelfio

⁷ Ñeñt' neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñt' cohuan̄pene' ñeñt' ame'ñetsa all anetso Filadelfia, o'ch potanet atet: “Napa' o'ch nequellconas carta attoch neñotatas ñeñt' atet otenes Jesucristo ñeñt' e'ñe Parets ñeñt' e'ñe po'ño'ch allohuen es oten. Ñeñt'ara Cristo ñeñt' allsensaret ñach añcha'taretterrtsa e'ñe atet añcha'tarette't David. Ñato' o'ch netma'ntacha o'ch not ñapa' echenan David po'llave. Ama't erra'tsencha' o'ch toram̄penanet attoch çhapanet Yompor po'cohuenña ama't eseshapa' amach erro'teno't alla epatare'terraneto. Ñaña ñerra'm ñach yottam̄perre' ama't eseshapa' amach erro'teno't toram̄pereto.

⁸ Cristopa' te'pa' atet otenes sa: ‘Napa' e'ñe neñotuennas ñeñt' atet cohuen es sepa'yen. Ama't ama tama ahuamencateso Yomporecop, tarraña ama't coñe'ta sehuamenc sepen çhocma same'ñennana neñoñ ñaña çhocma sa'meten atto same'ñenna ama sa'nasoteno. Ñeñto'mar napa' o'ch netoram̄psonas allcha' sa'potennan neñoñ, ñaña ama't eseshapa' amach erro'teno't alla yottam̄perrnaso.

⁹ Ñaña añña ñeñt' otetseñ ñetpa' judionesheto' — ñehua, ñetpa' ama Yompor-eye' pueyoçhresha' penahueto tarro'mar ñetpa' añña pueyoçhresha' penahueto oneñe't, ñetpa' atta shecare'tenset. Tarraña ñetña te'pa' o'ch name'ñatanet allochñapa' o'ch çhapanet pueyoçhreto sapa' ñeñtes atarr nemorrentena. Ñeñto'marña ñetpa' o'ch huapuet sesho o'ch concorposet allo'tsenes.

¹⁰ Sapa' e'ñe cohuen aco'pa setsoton allpon neñoñ, ama sa'ypo'ñenno na, ñeñto'marña napa'çho'ña amach na'ypo'ñaso. O'ch necuan̄perres tarremphua allempoch mueroçhteñsopoterra ñeñt'cha' topaterre' ora allohuen acheñenesha' ñeñt' ye'cha'yetsa añe patsro.

¹¹ O'ch e'ñe mamerrerrpa' o'ch nohuernasa. Ñeñt' atto allpon same'ñena o'ch e'ñe seño'tuanem amach seque'çhpatsche. Allochñapa' ama't eseshapa' amach erro'teno't puerrata'm̄psaso ñeñt' no'patatensa ñeñt'cha' atarr socshaterre'.

12 Ñeñt metana'tue' allohuen pa'namen topateñtsoçhno ñeñt ama nepueram̄perrayo ñetpa' ama'te' erroteno't ahuapore'taretterreto allot, ñetpa' e'ñe attet ñerra'mrrate' all orratenet pocoll ñeñt pa'paquell pen Nompore' ñeñt e'ñe huomenc echarr a'paret. Ama't eseshapa' ama'te' erroteno't huapore'che. Ñaña e'ñe ñesheto napa' o'ch nequellcoñ Nompore' pa'so'cheñ, allotpa' o'ch nequellcoñ ñaña Nompore' pa'netser e'ñe allara ñesheto, ñeñtara pa'netser ñeñt sochetsa Jerusalén, ñeñtcha' sohuerrtsa ento't e'ñe etserrare'. Allotpa' o'ch nequellca' ñaña neso'cheñ all e'ñe ñesheto ñeñt e'ñe etserrare' neso'cheñ.

13 Ñeñt e'mñotene' añ ñoñets çhapanetepa'ch pueyoçhreto ñeñt atet neñotatenanet na Necamquëño't ora allohuen ñeñt pame'ñeño'tet ap'cha'yenet allemeñ anetso'mar.' " Arrpa' allohua ñeñt atet ot filadelfio'marneshacop.

Atto Juanpa' quellcan carta añecop ñeñt ame'ñetsa anetso Laodiceo

14 Ñeñt neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñt cohuan̄pene' ñeñt ame'ñetsa all anetso Laodicea, o'ch potanet atet: "Napa' o'ch nequellconas carta attoch neñotatas ñeñt atet otenes Jesucristo ñeñt ama puenesho po'ñoñ. Ñeñt atet oteney Pomporecop ñeñt'pa' atet'cha' perrnay, ñaña ñeñt allpon oten, ñeñt'pa' e'ñe po'ñoçh atet, ñaña ñeñtara Cristo ñeñt ñanom eñall, allotña Pomporepa' yeçhcatyesan allohuen ñeñt allpon eñall.

15-16 Cristoña te'pa' atet otenes: 'Napa' e'ñe neñotuennas ñeñt ora allpon atet sepa'yen. Tarraña sapa' seçllaño'tetsetsa same'ñenna, ama e'ñe huomencaye' same'ñenno. Ñerra'm ama semno o'ch same'ña'na huomencpa' amachña same'ñatsetno ama't mamesha. Tarraña sapa' seçllaño'tetsetsa same'ñenna. Ñato' o'ch netma'ntacha atet. Sapa' ama atteyayso ñerra'mrrate' oñ ñeñt atarr sose', ñaña ama atteyayso ñerra'mrrate' oñ ñeñt atarr atserrrasen. Sapa' atta sepena ñerra'mrrate' oñ ñeñt mamesha shorrsastetsa ñeñt nanac netsena'ten. Ñeñto'marña napa' e'ñe atet nentenes atet ñerra'mrrate' oñ ñeñt cha' aya'pesatañtena. Ñerra'm yorrrpa' çhach ya'pesatey o'ch ya'tatstera. Ñeñto'marña sapa' e'ñe atet nentenes çhach nemneñ o'ch nehua-pore'tam̄perres.

17 Sapa' ama't soteneñ año' es sepallteno e'ño' sechuen ora ñeñt allpon poçtetsa socop e'ñe sa setaruasot. Tarraña ñeñt sherbets secamquëñecoppa' ama secheñe ama't coñe'ta. Napa' atta nentenes atet ñerra'mrrate' ñeñt nanac atsena'taret, atarrcha' amueroçhtatarettena ñeñt e'ñe huocchañ ñaña aporo'yet attach muelle'mquën.

18 Ñeñto'marña na te'pa' o'ch noctape'chatterres sa o'ch notas sapa' ñeñt sepalltena. O'ch senamuen nesho ñeñt po'ñoçh nanac sherbets secamquëñecop. Allochñapa' attoch sechuerr shonte' esocmañen ñeñt e'ñe po'ñoçh sherbets. Ñeñt ama sherbetsopa' o'ch sa'ypo'ñer. Ñato' o'ch netma'ntacha atto allempo atserrtatenet oropa' o'ch nohuanña a'yo ñeñt ama sherbetso allempoñapa' o'ch e'ñe orochayama ñeñt nanac sherbets. Ñeñt atarr sherbets atet ñerra'm oro ñeñtcha'ña se'nenña nesho. Elloña napa' o'ch netma'ntatasa atet'cha' sepa, o'ch serañta nesho shetamuets ñeñt atarr huallama't. Allochñapa' ñeñtcha' sechorrerra attoch o'huañcha' sepenca ñeñt atto semuelle'mquën. Attoch serañtena ñaña quello'yeñtsoapar alloch separterr seclle' allochñapa' attoch secuerr o'ch senterra e'ñe cohuen.

19 Ñehua, allohuen ñeñt po'ñoçh atarr nemorrentenapa' çhocmach e'ñe cohuen noctape'chatterranet ñerra'm esempo a'pare'tennet. Ñaña erroteno

allohuen ñeñt nemorrentena o'ch necoñchach mame', tarraña ñeñtpa' e'ñe ñocpueta allochñapa' attoch o'ch alla cotape'cherret cohuen nocop, o'ch alla ame'ñerrnet huomenc.

²⁰ Señocheapa'ch ñeñtcha' atet netma'ntaterrsa. Napa' atetcha' nepena ñerra'mrrate' esesha' ñeñt chocma chore'tets yetarrof. Ñerra'm eseshas se'mapuerrnan neñoñ ñaña ñerra'm setorampenen, nañapa' o'ch nebe'tos all, allñapa' o'ch yerrallme'chen parro.

²¹ Ñeñt metana'tue' allohuen pa'namen topateñtsochno ñeñt ama nepuerampperraye, ñetñapa' nemnatanetcha' o'ch añcha'tarettapreterrnet e'ñe all neconaño. E'ñech attet ñerra'mrrate' na, napa' e'ñe nemtana'tua allohuen pa'namen topateñtsochno. Ñeñto'marña napa' na'mcha'tarettapreteña Nompor e'ñe all po'conaño.

²² Ñeñt e'mñotene' añ ñoñets chapanetepa'ch pueyoçhreto ñeñt atet neñotatenanet na Necamquëñof ora allohuen ñeñt pame'ñeñoñet apcha'yenet allemeñ anetso'mar.' " Arrpa' allohua ñeñt atet ot laodiceo'marneshacop.

4

Atto Juanpa' entan Yompor po'conaño e'ñe alla pue'ntaño

¹ Allempoñapa' alla gatyerrnerr po'poñ. Necuerrerr, allñapa' nentos yetarr atoraref allcha' nebe'tos o'ch nechap ento. Alla ne'muerrerr ñoñets ñeñt atet e'morrtetsa ñorra' atarr huomenc atet ñerra'mrrate' poctor atarr huomenc eñen. Ñeñtña ñoñetspa' atet oten:

—Apon arr, o'ch pebe'tosampesna o'ch negatyesañ allohuen ñeñtcha' atet perrtsa tsapatonet.

² Allempoña Yompor Puecamquëñ e'ñe chorrenna, atto nechap ento all nentos puesheñarr alla anen po'conaño.

³ Ñeñt anets all po'conañopa' atarr nanac cohuen aspanamcoquëno pop-tamco'tena atet ñerra'mrrate' mapue' ñeñt atarr cohuen poptetsa ñeñt otenet jaspe. Ellonetpa' po'poñonfo atarr nanac cohuen tsamcoquëno pop-tamco'tena atet ñerra'mrrate' mapue' ñeñt otenet cornalina. Ñaña allo arca'tampenapa' ñeñtpa'cho'ña atet ñerra'mrrate' ayon tarraña ñeñtpa' atarr nanac cohuen aspano shemashro poptena; e'ñe atet poptena ñerra'mrrate' mapue' ñeñt otenet esmeralda.

⁴ Ñaña topño'mar ñeñt rroçhtam'pene' all shonte' po'poñ conañechno. Ñeñt conañechno topño'tsa'yen ñeñt rroçhtam'pene' allo'tsen epoch çharra' puechena pa'tats. Ñaña ñeñt anorrçhets allohuen conañechno ñeñtpa'cho'ña allo'tsen epoch çharrasheña puechena pa'tats ñeñt sherbene' Yompor all pue'ntaño. Coçhneshareret pa'shtam atarr huallama'tarer, po'choyo'met oro ayeçhcataref ñeñt choyo'mtenet.

⁵ E'ñe rroçh conaño'pa' allof huena meratste', allof huena ñaña tatste'. Allpa' atarr huomenc ma'moreten. E'ñe alla allame'tets po'conaño ñehuapof allo'tsen cançherr huerare ñeñt huoretyets all. Ñeñtpa' ñeñt toma'ntenaya Yompor Puecamquëñ ñeñt cançherr ñeñt sherba'yets e'ñe po'poñe'ttsocma.

⁶ E'ñe alla a'yenet po'conañof all orrtena erracmañen atet ñerra'mrrate' ñeñt añecmuen rerpat ñeñt e'ñe orrtatuene' ora ñeñt allpon eñall all.

Allo'tsen po'conañ e'ñe pa'tatsshermto'marof all tomchen pa'tats ñeñt berrma'ttetsa. Ñeñtñapa' shonte' pa'cillo'yechno emota cohua'yen. Pa'chco'tago'pa'cho' shonte' pa'cille' allof cohuen.

7 Ñeñt ñanom ñeñt berrma'ttetsa all, ñeñtpa' e'ñe atet ñerra'mrrate' ma'ñor. Po'poñpa' allo'tsen ñaña atet ñerra'mrrate' toro, po'poñ pa'tsa'pot pa'clloyotpa' e'ñe atet orrtena ñerra'mrrate' acheñ. Po'poñ all orrtena attema't ñerra'mrrate' ñeñt otenet contor ñerra'm esempo anena.

8 Ñeñt pa'tatso'mar berrma'tpa' e'ñe apa'pa'yetarerochet, pate'tetspa' echenan pechapa'ttsocmuet pa'pue' penet. Pa'pa'yot enotpa' e'ñe aclo'yetarerochet, puelleca'notpa'cho'ña aclo'yetareret emoto'mar allot cohua'yenet. E'ñe ellapenete't arepenete't all achoteñet Yompor, ama't mameshapa' ama ameseneto atto achoteñet Yompor. Ñeñtpa' atet otenet: Parets, parets, parets ñeñtara Yompor ñeñt atarr ahuamenca't nanac ñeñt Yepartseshar yepen ñeñt chocma eñall. Ama't ahuatoteñ eñall ñaña ñeñtara ñeñtcha' ello huerrtsa po'pocheño.

9 Ñaña ñeñt berrma'ttetsa allpa' cohuentateññañet Yompor ñeñt anets all po'conaño, atarr amcha'na'tpo' enteñet, ñaña chocma puema'yocheñoet parasyoso'teñet Parets ñeñt ama arromña'feshayaye ama't ahuaata.

10 Ñetpa' ñerra'm esempo aye'chochtateñet Parets, añña ñeñt epoch çharrasheña ñeñt puechetsa pa'tats ñeñt sherbene' Yompor allpa' ñetpa'cho'ña o'chcho' concorpa'rrtenet e'ñe all ñesho, o'chcho' ma'yocheñet ñamet Yompor ñeñt ama arromña'feshayaye ama't errponaña. Allo'tpa' o'ch a'meyet po'choyo'm o'chcho' net e'ñe Yomporeshonet ñeñt anets all po'conaño. O'chcho' aye'chochtateñet Yompor ñamet, ñeñtpa' atet otenet:

11 Yompore, ñeñteþ Yepartseshareþ, ñeñteþ nanac Partsoþ, ya añ poctetsa o'ch yecohuentatonaþ ñeñteþ amcha'na'tpahueþ ñaña atarr ahua-mencateþ. Tarro'mar þa yeçhcatyene' ora allpon ñeñt eñall, e'ñe þa pemneñño't ahuo't eñalleyesa, e'ñe þa peñoño't ahuo't yeçhca'yena ñeñt allpon eñall.

5

Atto Juanpa' entan Cristo ñeñt atma'ntataret Carrnero, e'ñe ñapña toran Yompor po'libro

1 Allempoñapa' alla necuererr ñeñt anets all po'conaño. Potot po'cohuenrotpa' all nent all orrenan libro apco'nottataret, e'ñe emoto'mar aquellca'huaret o'ponot ñaña enot. Echenan cançherr ñeñt allo ayomrraret atto e'ñe echarr aþaret.

2 Ñaña all nent puesheñarr mellaño'teñ ñeñt atarr ahuamenca't. Ñaña'pa' rrana huomenc, ñeñtpa' atet oten:

—Esha'huaca' e'ñe cohuenare' cotape'chetsña Yomporecop ñeñtcha' tore' añ Yompor po'libro allo echarr aþare'ttena.

3 Tarraña ama't puesheñarrapa' ama eñalle ñeñtcha' tore' Yompor po'libro. Ama't puesheñarra ñeñt ento'tsen ñaña ama't ñeñt patso'tsen ñaña ama't ñeñt o'pono'tsen patso, ama eñalle ñeñtcha' muenatet ñeñtcha' tore' Yompor po'libro attoch eñorachet.

4 Napa' ñeñtña atarr neyarre' atto ama't puesheñarrapa' ama neñche ñeñt e'ñe cohuenare' es cotape'chets Yomporecop ñeñtcha' muenatet o'ch toran Yompor po'libro ñeñtcha' eñorate'.

5 Allempoña ñeñt epoch çharrasheña ñeñt puechetsa pa'tats ñeñt sherbene' Yompor, puesheñarrña'pa' oten:

—Amach peyahuatsto, tarro'mar eñall puesheñarr ñeñt e'ñe pocte' ñeñtcha' tore' Yompor po'libro ñeñt cançherr allo echarr aþare'ttena, tarro'mar ñapa' ñeñt metana'tue' allohuen pa'namen topateñtsoçhno, ñeñtña'pa' añepa't

Cristo ñeñtara atma'ntataret Ma'ñor. Ñeñtpa' judámerena'tar ñeñtara David po'mñreneñ.

⁶ Necuererr, allñapa' nent Cristo ñeñt toma'ntenaya Carrnero. All ten e'ñe rrocho allo'tsa'yen Parets po'conañ ñaña añ pa'tatso'mar ñeñt berrma'ttetsa ñaña e'ñe allo'tsa'yen ñeñt sherbene' Yompor. E'ñe rrocho all ten Cristo ñeñt atma'ntataret Carrnero. Orrtena atet ñerra'mrrate' carrnero ñeñt amtsarettetsa ochñartsocop. Ñeñt carrneropa' cancherr po'ucor, echenan ñaña cancherr pa'clle'. Ñeñt cancherr pa'clle'pa' ñeñtpa' añ Yompor Puecamquëñ ñeñtara cancherr ñeñtcha' sherba'yesets e'ñe po'poñe'ttsocma ora erracmañen añe patsro allcha' amñarefetyerret.

⁷ Allempoña añ Carrneropa' o' huapa o' chap allo'tsen Yompor ñeñt anets all po'conañ. Ñaña' chetsosan Yompor po'libro ñeñt orren po'cohuenrot.

⁸ O' chetan libropa' allempoña añ ñeñt pa'tatso'mar berrma't ñaña ñeñt epoch charrasheña ñeñt puechetsa pa'tats ñeñt sherbene' Yompor, allohuenetñapa' concorpa'rrteñet Cristo ñeñt atma'ntataret Carrnero. Puesheña'ttsetpa' orrenet arpa ñaña pajo' ñeñt orotaten all anaret ñeñt atarr eñmosa'ttetsa Yomporecop. Ñehua, añ ñeñt eñmosa'ttetsa añ toma'ntena ñeñt atto ma'yochena ñeñt pueyochresha' pen Parets.

⁹ Añña ñeñt concorpa'rrtetsapa' ñetñapa' morrechenet ñeñt etserra morreñets ñeñtpa' atet achoteñet Cristo ñeñt atma'ntataret Carrnero:

Papa' e'ñe cohuenare' es peña'yen ñeñto'mar e'ñe pocte' p̄ach chete' Yompor po'libro, e'ñe pocte' p̄ach tore' allo echarr aparettena tarro'mar p̄apa' p̄a amtsarettatsa, perrasoña p̄apa' allo petsa'tuonaya yo'chñar allochñapa' attoch e'ñe puechemer perrey Yompor ama't allohueney ñeñtey pa'namen acheñey, ama't erra'tsena mereñtsorey allot yehuena, ama't ñaña erra'tsena ñoñtsor allo yeñosyen e'ñe po'poñe'ttsocma, ama't ñaña pa'namenana'tarey allohuen errohuanen ñeñt e'ñe ya'netser yeña'yen.

¹⁰ Ñeñtey allohueneypa' p̄a yemnatene' o'ch ya'm̄cha'tarettapreta p̄a attochña yesherbapretene p̄ Yompor ñeñt atarr Parets. Attoña yecorneshaten Partsocop. Ñaña attoch ya'm̄cha'tarettterra añe patsro.

¹¹ Allempoña alla necuererr o' ne'muererr mellañoñeñnesha' atet eñosyenet. Shontet nanac che'muechenet all rrochtam̄peñet a'yohuen errap̄aren. Ñaña ñeñt berrma'ttetsa all ñaña ñeñt sherbene' Yompor ñeñt allohuenet ma'potanto'maretpa' ñeñt e'ñe rrochtam̄pene' Yompor ñeñt anets all po'conañ.

¹² Ñeñt mellañoñeñnesha' ñetñapa' e'morrtenet huomenc all achoteñet Cristo ñeñt atma'ntataret Carrnero. Ñeñtpa' atet otenet:

Cristo ñeñt toma'ntenaya Carrnero ñeñt amtsarettatsa, ñapa' e'ñe cohuenare' es pa'yen ñeñto'marña ñapa' e'ñe pocte' ahuamencattena, agapanepa' shonte' esocmañen ñaña e'ñe pocte' eñotañtepa'ch, ñaña e'ñe pocte' partsotepa'ch, ñaña e'ñe pocte' am̄cha'na'tpahuo'tepa'ch. Ñaña e'ñe pocte' ya yecohuentateñoñ ya'ye'chochtatoñepa'ch.

¹³ Allempoña ne'muerrerr atet ama't allohuen ñeñt Yompor pueyeçhcatar aye'chochtateññañet Yompor ama't ñeñt ento'tsa'yen ñaña ama't allohuen ñeñt patso'tsa'yen, ñaña allohuen ñeñt o'pono'tsen patso ñaña oño. Ama't e'ñe allohuen pueyeçhcatar ñeñt allo'tsa'yen allohuenet aye'chochtateññañet Yompor, atet otenet:

Ya'ye'chochtatoñepa'ch Yompor ñeñt anets po'conaño ñaña Puechemer Cristo ñeñt atma'ntataret Carrnero. Ancha'na'tpahuepa'ch yenteñ, yecohuentatoñepa'ch tarro'mar ñetpa' atarr ahumencatet fayoteñ ama't errponañohuen.

14 Ñaña ñeñt berrma'ttetsa pa'tatso'mar all ñetñapa' otenet:

—Ñeñtpa' attetepa'ch.

Ñaña añña ñeñt sherbene' Yompor ñeñt epoch çharrasheña ñeñt puechetsa pa'tats o' concorpa'rrtet all ma'yocheñet Yompor ñeñt ama arromñañeshayaye.

6

Atto Cristopa' toran ñeñt cancherr allo echarr aþarettena Yompor po'libro

1 Allempoñapa' nent Cristo ñeñt toma'ntenaya Carrnero attoch ñach tore' ñeñt cancherr allo echarr aþarettena Yompor po'libro. Allempoña ñapa' o' tore paterr ñeñt e'ñe ñanom allo ayomrraret ñeñt libro. Allempoña o' tore, añña pa'tatso'mar ñeñt berrma'ttetsa, puesheñarrñapa' eños. Nañapa' o' ne'muerrerr ñeñt atet eñen huomenc, po'ñoñpa' e'ñe atet e'morrtena ñerra'mrrate' cho tatstena. Ñeñtpa' atet oten:

—¡Aþon, pecue'!

2 Naña necue'pa' nent paterr cahuall atarr huallaþnanen. Ñeñtña montenayapa' echenan paterr po'ca'not ñeñt orra'nen potot. Allñapa' apet paterr choyo'mets ñeñtcha' choyo'metnoma. Nañapa' ahuo' o'ch quellara'yena' o'ch e'ñe a'mchechuan ñeñt e'moñe'tyen.

3 Allempo torerranerr ñeñt puepañ allo ayomrraret Yompor po'libro, nañapa' alla ne'muererr ñeñt puepañ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Aþon, pecue'!

4 Allempoñapa' cha'nerrerr po'poñ cahuall, ñeñtñaapa' atarr tsaþnanen. Ñeñtña montenaya allñapa' apet paterr espada atarr allpocha'þ. Nañapa' o' muenateñet o'ch quellaratanna'tatan acheñenesha' arr patsro attochña muetsatanna'tatenanet. Attoña ñetpa' o'huañcha' muechet yeçhenet arr patsro.

5 Allempo torerranerr ñeñt puema'pañ allo ayomrraret Yompor po'libro nañapa' alla ne'muererr ñeñt puema'pañ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Aþon, pecue'!

Naña necuererrpa' nenterrerr po'poñ cahuall ñeñtñaapa' atarr quel-lueþnanen. Ñeñt montenayapa' orra'nenan paterr pesamets.

6 Allo'tsa'yen ñeñt berrma'ttetsapa' e'ñe all rroçho'tpa' ne'muererr ñeñt atet e'morrterrerr ñoñets, ñeñtpa' atet oten ñoñets:

—Paterr kilo trigopa' nanquëpa'ch tsa'teterr ama't ñeñt paterr denario*, ñaña ma'pa kilo cebadapa' nanquëpa'ch tsa'terra. Tsa'terrepa'ch ñaña paterr denario. Tarraña olivose' ñaña vinospa' çhocmuepa'ch eñall, amach seprratamþsatsetye.

7 Allempo torerranerr ñeñt puepa'tatseñ allo ayomrraret Yompor po'libro, nañapa' alla ne'muererr ñeñt puepa'tatseñ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Aþon, pecue'!

* 6:6 Denariopa' quelle ñeñt allpon tsa'tenet pamtarr ñeñt taruaset all pa'nyo.

8 Naña necuererrpa' nenterrerr ñeñt paterr cahuall atarr she-mashreþnaneno puerrama'þnen. Ñeñt montenayapa' añ pa'so'cheñ Rromueñets. Ñeñt cotene' chenta'pa' añ toma'tena ñeñtcha' aguëne' allohuen ñeñtcha' rromuets. Ñeñtþa' apareť llesens añecop attoch a'cllatatan shonte' acheñenesha' arr patso. Ama't pasheþarr pats, allpon otenet un cuarto, allponcha' a'cllatatuerran acheñenesha'. Ñeñtþa' atetcha' a'cllatatanet, quellareñtsoterrcha', chaporrñatsoterrcha', atsnañtsoterrcha', orrtarrach berr ñeñt atarr atsrre'mñať ñeñt atarr bellac arr patsro.

9 Allempoñapa' o' torerranerr ñeñt pa'mnareñ allo ayomrraret Yompor po'libro, naña necuererrpa' allña'pa' nenterrerr altar ñeñt allecma a'crrateteť ñeñt eñmosaťtetsa Yomporecop. E'ñe all patsoť altaro all nent shonte' camuecñetsočno ñeñt amtsanatarettatseť all e'ñe pueserrpare'teñoťet Yompor po'ñoñ atto a'meteteť ñaña atto ame'ñeñet Cristo.

10 Añña ñeñt camuecñetsochnopa' ñetña'pa' rrannartenetpa' oteñet Yompor: —Yompore þa atarr Partsoþ, atarr ayemuetpo' atet þoteny. Esemphuachca' pecoñchatuerña acheñenesha' all patsro, esempohuachca' petsa'tateraña ñeñt acheñer yemtsanatayeť ñeñt patso'tsen. Añpa' allohua atet ot camuecñetsnesha'.

11 Ñetña puesheña'ttsetpa' apareťtenet pa'shtam atarr huallama'tarer. Ñaña ñetña'pa' otareťtet ato't e'ñe ameseta'. “O' mameshamña o'ch etsotua allpon po'potantañecop semo'nasheñ ñeñtcha' amtsanatarettterrtser ñeñtes e'ñe attecma sesherbeñ Cristo.”

12 Allempo torerranerr ñeñt po'pechapueñ allo ayomrraret Yompor po'libro naña o' alla necuererrpa' nent ñaña cha puetalle'chena pats huomenc. Atsne'ñapa' o' checmet atet ñerra'mrrate' shetamuets ñeñt atarr quellue ñeñt chorrena ñeñt atarr llequetsa. Arrorrñapa' o' cha tsama'tta atet ñerra'mrrate' errasats.

13 Rantočno ñaña ñeñt ento'tsa'yen allohuenpa' o'cha shorcha'tua o' cha'cha't patso. O'ch netma'ntacha atet ñerra'mrrate' parte ñeñt e'meret o'ch huomenquëshatpa' pue'merñapa' o'ch a'shore'tamþesue huomenquëshat, ama't atarr emerñ pue'mer.†

14 Enetpa'cho'ña o' e'ñe chenca'hua atet ñerra'm papell eþaretpa' o'huañcha' orrta. Ama't ora allpon aspentarerpa'cho'ña o' e'ñe rrote'tyesuahua ñopa'tets. Ñaña ora allohuen oñečno ñeñt rrochpe'chanečno ñeñtþa'cho'ña o' e'ñe rrote'tyesuahua.

15 Allempoñapa' allohuen acheñenesha' ñeñt ye'cha'yetsa añe patsropa' o' e'ñe e'potrra'tuet arroroto'mar ñaña mapuetpono'mar ñeñt aspentarero'tsa'yen. Ama't allohuen añcha'tareťnesha'čno o' e'ñe e'potrra'tuet, ñaña allohuen ñeñt atarr sherba'yets, ñaña ñeñt e'cllayoretečno, ñaña ñeñt pa'm'cha'tareťer pen solltar, ñaña ñeñt atarr ahuamencať entyetsa, ñaña ama't allohuen acheñ ñeñt ama esoye' enteneto ñeñt ataruasataret e'ñe atta, ama't ñaña allohuen ñeñt ama ataruasareťeyaye ñeñt e'ñe cohueno'tsen, allohuenet e'ñe e'potrra'tuenet.

16 Allohuenetpa' chore'teñet aspenet ñaña mapuetačno atet otenet:

—Te'ñapa' yeñgatañperrepa' attoťcha' e'poterrey attoch amach enterrye Parets ñeñt anets all po'conañño allochña'pa' amach erroťenoť coñchaterrye Cristo ñeñt toma'ntenaya Carrnero.

† 6:13 Ñehua, Juanpa' añ toma'ntatena higo ñeñt puenarem penet all pa'nyo.

17 Tarro'mar te'pa' o' chap añ yetro allempoch yoroçhterra allempoch atsa'tataretterra allohuen acheñenesha'. Ama't eseshapa' amach errotenot ahuantofeto Yompor po'yoroçhenña.

7

Atto Israel po'mreneñ ñeñtcha' ayato'ma'taretetyesta

1 Allempoña napa' nent mellañoñeñnesha' pa'tatssheña. E'ñe allohuanen pats, ñeñt pa'tats po'toññaro'mar allña'pa' all tomyen puesheña'tets mellañoñeñ ñeñt pa'tatssheña. Ñeñt pa'tatssheña ñetña'pa' ñet epatare'tenet mōrr pa'tatsshemto'marot allot huapyena mōrr. Allochña'pa' attoch amach atarr mōrrarsañpeno añ patser, ama't ñaña oñeçhno, ñaña ama't patrra tsachpa' amach mōrrarsañpeno.

2 Allempoña napa' o' alla nenterrerr po'psheñeñ mellañoñeñ, arr orrtena allot huena atsne'. Ñapa' añ orren yapets ñeñt alloch yanatan allohuen ñeñt pueyochresha' pen Yompor ñeñt ama arromñañeshayaye ama't ahuaña. Ñaña'pa' rrana huomencpa' otan mellañoñeñnesha' ñeñt pa'tatssheño'mar ñeñt añecop ahuamencattenet attoch ñetcha' pomnaren pet pats ñaña oñeçhno.

3 Ñeñt'pa' atet otanet:

—Amach errof sepatsto añ pats ama't oñ ama't tsach ato'tña yeyato'ma'tueya' allohuen ñeñt torra'yetsa Yomporecop.

4 Allempoña ne'muerrerr ñeñt atet oteñet ñeñtcha' allpon ayato'ma'tarettatsa. Ciento cuarenta cuatro mil ñeñt'pa' allpon otenet. Ñeñt ciento cuarenta cuatro mil acheñenesha' ñetpa' e'ñe po'poñe'ttso cmuet mereñtsoret. E'ñe ñeñta mereñtsore cmuet ñeñt çharrasheña puechena epa ñeñt pa'tañ pene' Israel ñeñt corratse't ahuañ.

5 Ñehua, pañe'tets mereñtsorpa' allponsheña ñeñtcha' ayato'ma'tarettatsa: Judána'tarpa' allo'tsencha' çharra' puechena epa mil acheñenesha'; Rubénna'tarpa'çho'ña allo'tsencha' çharra' puechena epa mil acheñenesha'; Gadna'tarpa'çho'ña allo'tsencha' çharra' puechena epa mil acheñenesha';

6 Aserna'tarpa'çho'ña allo'tsencha' çharra' puechena epa mil acheñenesha'; Neftalína'tarpa'çho'ña çharra' puechena epa mil acheñenesha'; Manasésna'tarpa'çho'ña çharra' puechena epa mil;

7 Simeónna'tarpa'çho'ña çharra' puechena epa mil; Levína'tarpa'çho'ña çharra' puechena epa mil; Isacarna'tarpa'çho'ña çharra' puechena epa mil;

8 Zabulónna'tarpa'çho'ña çharra' puechena epa mil; Joséna'tarpa'çho'ña çharra' puechena epa mil; Benjamínna'tarpa'çho'ña çharra' puechena epa mil acheñenesha'.

Atto shonte' pa'namen acheñenesha' ñetpa' e'ñe huallama'tarerochet pa'shtam

9 Allempoña napa' o' alla nenterrerr shonte' acheñenesha', nanac che'muechenet ama e'ñotuenteno ñeñt allpon allo'tsen. Shonte' pa'namen acheñenesha'. Ñeñt'pa' pa'namen anetsot huachatyenet, shonte' pa'namen mereñtsoret ñeñt huachetsa all, shonte' pa'namen ñoñets e'ñe po'poñe'ttso cma eñosyenet. Ñetña'pa' all tomçhenet e'ñe ñehuapof allotsen Yompor po'conañ allotsen ñaña Cristo ñeñt toma'ntenaya Carrnero. Ñetpa' e'ñe huallama'tarerochet pa'shtam. Potofetña'pa' añ orra'yenet atet ñerra'm shequëpan.

10 Allohuenetpa' rranenet, otenet:

Yompor ñeñt po'conaño'tsen ñapa' o' a'queshpaterrey epuet ñaña Puechemer ñeñt toma'ntenaya Carrnero.

¹¹ Ñeñt berrma'ttetsa pa'tatso'mar ñaña ñeñt sherbene' Yompor all, ñaña allohuen mellaño'teñnesha' ñeñt tomchets a'yohuen erraparen, ñetña allohuenetpa' e'ñe rroçhtam'pesueñet Yompor ñeñt po'conaño'tsen. Ñeñt mellaño'teñnesha' all rrema'rrartenet Yompor po'conaño atet ma'yocheñet Yompor.

¹² Ñeñt'pa' atet aye'choçhtateññañet Yompor; ñeñt'pa' atet otenet: Attetepa'ch yocop ya'ye'choçhtatoñepa'ch, yecohuentatoñepa'ch, amuepa'ch ahuañaño atto eñotañtena Yompor; yeparasyoso'chepa'ch, amcha'na'tpahuepa'ch yenteñ, amuepa'ch ahuañañaatto ñeñt atto ahuamencattena Yompor; amcha'tarettepa'ch tayoteñ errponohuañen. Ñeñt'pa' attetepa'ch.

¹³ Allempoña puesheñarr ñeñt sherbene' Yompor; ñaña'pa' a'p'to'ten, atet oten:

—Papa' ¿ama't peñoteñeña eseshachnote'ña ñeñt chorrenaya huallama'tarer, ñaña ama't peñoteñe erro'tte'ña huachenet?

¹⁴ Nañapa' atet noch:

—Amaca'ye Nompore neñoteñe. Pate'ca'yeña eñotene'.

Ñaña'pa' o' alla oterren:

—Añenesha' ñeñt chorrenaya huallama'tarer ñetña ahuanterret allempo orrterra pa'namen mueroçhteñtsoçhno. Ñaña ñetpa' atto e'shohuarette'tet po'chñaret e'ñe Cristo po'rraso, ñeñtña ottetsa atet ñerra'mrrate' ñetpa' o' atsama'tarette'tet pa'shtam attoch e'ñe cohuen a'huallama'ttarette'tet pa'shtamuet e'ñe cohuen.

¹⁵ Ñeñto'marña ñetpa' allo'tsa'yenet Yompor po'conaño. All çhocma sherbeñet Yompor — ellapenete't, arepenete't sherbatset all Yompor pa'paclo. Yomporña ñeñt anets all po'conaño, ñachña e'ñe a'natenahuet e'ñe ñesho.

¹⁶ Ñetpa' amach mueroçhterre'te pa'chporrñoñ ama't po'ñpañoñ. Ñaña ñetpa' amach erro'teno't chemuerranete'te atsne' ñaña amach a'mñechaterranete'te ñaña huerate'.

¹⁷ Tarro'mar Cristo ñeñt atma'ntataret Carrnero ñeñt allo'tsen all Yompor po'conaño, ñachña cohuanpenahuet e'ñe atet ñerra'mrrate' carrnero e'ñech cohuanpeñ pamo'mte'. Ñapa' çhapatanetcha' all poten oñ ñeñtcha' apahuet attoch correnet errponañohuen. Yomporña ñach a'huañañpsahuet puelquëña ama't ahuatapa' amach yahuerrete'te.

8

Allempo Cristopa' toruan po'cançhroñ ñeñt allo ayomrrarettena Yompor po'libro allempoñapa' orrta ñaña puesheñarr mellaño'teñ ñeñt orrene' po'pajo' orotaten

¹ Allempoña Cristo ñeñt toma'ntenaya Carrnero, ñapa' allempo e'ñe toruan po'cançhroñ ñeñt allo ayomrrare't Yompor po'libro, e'ñe muetsoñeñtua poctacma pue'ntaño tematuanen.

² Allempoña napa' alla nenterrerr mellaño'teñnesha' ñeñt cançherrsheña ñeñt tomchets e'ñe all Yomporesho. Ñetña puesheña'ttset allpa' aparettet poctor.

³ Allempoña o' huapa po'psheñeñ mellaño'teñ. Huapapa' o' tomos all altaro. Añ altarpa' allecma a'crratenet tsach puese' ñeñtña atarr amostetsa all. Pamosoñapa' ñeñt atarr eñmosa'ttetsa Yomporecop. Ñeñt mellaño'teñpa' añ

orren pajo' orotaten allcha' nenan ñeñtcha' eñmosařtetsa. Ñeñt mellañoñeñpa' allña apet shonte' eñmosař ñeñtcha' eñmosařtate' ñeñt atto ma'yochena Parets pueyochresha'. Ñeñtña eñmosařtetsapa' ñeñtcha' net altaro ñeñt ayečhcataret oro ñeñt e' ñe ñehuapoře'tsen Yompor po'conaño.

⁴ Ñeñt orrampen mellañoñeñ eñmosařpa' čha amosoñe'chnen enonet allo'tsen Yompor, ñeñtña eñmosařtatene' ñeñt atto ma'yochena Parets pueyochresha'.

⁵ Allempoña mellañoñeñpa' cheterran pajo'pa' o' esha'tan tso' puecallamshor ñeñt cheta' altarot e'ñe e'chorran tso' pajo. Allempoñapa' huapore'ch patso. Chap patsopa' meratstosa, tatstosa, e'morrtosa huomenc, pellatan pats.

Atto Juanpa' entan cančherrsheña mellañoñeñ ñeñt poctorets

⁶ Allempoña mellañoñeñ ñeñt cančherrsheña ñeñt epoctoreřarer puesheña'ttsetpa' o' echantyeset po'pactor o'ch a'toret.

⁷ Allempoña ñeñt ñanom mellañoñeñpa' o' poctora', poctora'huatsapa' orrta ñeñt ma'po'mar ñeñtcha' ahupore'tarettatsa patso. Ñeñtpa' añ hue' allotpa' ñaña tso' ñeñt tsetetsa errasatso. Atto ahupore'tareřta patso allempo chap patsopa' e'ñe a'huortatuosan ñeñt allo'tsen all chap patso. Tso'ñapa' errařaren e'ñe a'poyuosan ñeñt allpon tsachečno ñaña allpon ta'tečno ñeñt allo'tsa'yen ama't allohuanen pats allpon ñeñt otenet la tercera parte.

⁸ Allempoña po'psheñeñ mellañoñeñ ñeñt puepañpa' o' poctorerrerr. Poctora'huerrtserrpa' orrterrerr atet ñerra'm ñeñt nanac atarr aspenet. Ñeñtñaapa' čha huorten. Ñeñt aspenetpa' ahupore'tareřta sa'po. O'ña chap oñopa' errařarenña oñpa' puenasa errasats allohuanen oñ ñeñt allpon otenet la tercera parte.

⁹ Ñaña ñeñt allpon yečhetsa all oño errařaren, e'ñe colla'hua, allpon colla'huatsa ñeñt otenet la tercera parte. Ñaña ñeñt allohuen botečno ñeñt chope'chyets all oño errařaren e'ñe chenca'huet, allpon chenca'huatsa ñeñt otenet la tercera parte.

¹⁰⁻¹¹ Allempoña po'psheñeñ mellañoñeñ ñeñt puema'pañpa' o' poctorerrerr. Poctora'huerrtserrpa' orrterrerr ranto ento ñeñt añecmuen atarremñ. Shora'nerrerr čha huerarere'tnena. Chap allo'tsa'yen po'ñesočno ñaña allot potayen oñečno errařaren arr patsro. Ñeñtpa' arrohua chap ñeñt allpon otenet la tercera parte. Ñeñt rantopa' añ pa'so'cheñ Peshrremñ. Chap allo'tsa'yen oñečno ñeñtpa' čha a'pesherrretuosan oñečno errařaren arr patsro. Ñeñtpa' allponohua a'pesherrtatan oñečno ñeñt allpon otenet la tercera parte. Oñ po'peshrroña ñeñtña a'cllatue'ña shonte' acheñenesha' all.

¹² Allempoña po'psheñeñ mellañoñeñ ñeñt puepa'tatseñ o' poctorerrerr. Poctora'huerrtserrpa' allempocma čhoře' errořetyesa atsne' ñaña arorr ñaña rantočno, o' atñaña checmetyeset. Ñetpa' allpon checmetyesets ñeñt allpon otenet la tercera parte. Ñeñt atto čhoyo'tenet yeřo ñaña tsapopa' o'huañ atsnomyeset. Ñeñt allpon o'huañ čhoyo'tyeset yeřo ñaña tsapo ñeñtpa' allpon otenet la tercera parte.

¹³ Allempoña napa' o' alla necuererrpa' allñaapa' nenterrerr po'psheñeñ mellañoñeñ ñapueř all anoma'mtena ento allpononet. Allñaapa' ne'muerrerr ñeñt atet eñosnom huomenc. Panoma'mteñořpa' atet oten:

—Llequēñtsa-bee ñeñt allohuenacop ñeñt yečha'yetsa añe patsro. O' mamešhaña o'ch poctora'huerrerr po'poñ ma'psheño'mar mellañoñeñ.

9

Atto o' e'ñe ma'psheñaña mellañoñeñ ñeñtcha' poctorerrtserr e'ñe allohuanen

¹ Allempoña po'psheñeñ mellañoñeñ ñeñt pa'mnareña'pa' o' poctorerrerr. Poctora'huerrtserrpa' nañapa' all nenterrerr ranto atarremñ ñeñt shora'nmats entot o' e'ñe chap patso e'ñe atet orrtosa ñerra'm mellañoñeñ. Ñeñña mellañoñeñ allña'pa' apet paterr llave alloch toran allo e'tamñsaret arrotot ñeñt atarr o'pononet arrottena pats.

² Nañapa' o' toramñsan arrotot. Ñeñña arrotot allotña cha'nom amos shonte' atet ñerra'mrrate' cho chemue'chenet. Chepoten amos cha muene' emayenan ama't atsne', erracmañen chepoten, e'ñe chorren amos.

³ Atto atarr chepoten amospa' cha'nmacha'tatan ñaña allot ahuañchenclla nanac shonte', pamcha'tyesa erracmañen patso. Ñehua, ñeñt ahuañchencllapa' o' apet attoch epotaña atet pena ñerra'mrrate' yellas ñeñt atarr epotañ.

⁴ Ahuañchencllaña'pa' atet otareta amach errotot patstano ta'te' ñeñt patso'tsen, amach errotot patstano ñaña tsach. Ama't ñaña allohuen ñeñt pa'namen chopyets aña patsro amach errotot patsche. Añcha'ña errotot pa' achen ñeñt ama ayato'ma'tareteyaye Yompor pueyotsaparo.

⁵ Ama muenacheto o'ch muetsan ama't patrra achen allempo. Ñeñt ahuañchencllapa' aña oteñet o'ch muerochtatan achen amnarnña arrorr. Ñeñtpa' atetcha' atserrpanet atet atserrtena yellas ñerra'm cho epota'y.

⁶ Allempoña achenesha'pa' e'netcha' attoch rromuet tarraña amach errotot rromueto. Ama'tcha' atarr ya'ñametare'tenetaña'pa' amach rromueto.

⁷ Ñeñt ahuañchenclla atet orrtena ñerra'mrrate' cahual allempo o'ch natyeñet attoch quellaracet. Poñpa' e'ñe atet orrtena ñerra'm choyo'mets ñeñt orrotaten. Pa'clloyotpa' e'ñe atet orrtena ñerra'mrrate' achen.

⁸ Echet, pue'chpa' añecmuen atet ñerra'mrrate' coyanesha' pue'ch. Pa'spa' e'ñe atet orrtena ñerra'mrrate' ma'yarras.

⁹ Pa'tallpa' e'ñe atet orrtena ñerra'mrrate' asertall ñeñtcha' moñenaya, amach etsoto allo saneñet. Ñaña ahuañchenclla ñerra'm esempo anomchenapa' e'ñech atet e'morrtena ñerra'mrrate' shonte' carro ma'moretets allempo matateñ cahual huomenc attoch chapuet allcha' quellaraset.

¹⁰ Pa'sme'llpa' e'ñe atet orrtena ñerra'mrrate' yellas pa'sme'll allot epotañtena. Pa'sme'llotsen puepotañer allot atserrpenan achenesha'. E'ñech amnarnña arrorr muerochtatenanet.

¹¹ Ñeñt ahuañchenclla ñetpa'cho'ña añ pa'mcha'tareter penet mellañoñeñ ñeñt añcha'tarettetsa all allot'sen arrotot ñeñt atarr arrotot o'pononet pats. Mellañoñeñ ñeñt pa'mcha'tareter pen ahuañchenclla, hebrea'chopa' añ socheñet Abadón; griega'cho'ña'pa' añ socheñet Apolión. Ñeñt epo'mar so'chñets ya yeñoño ñeñt yoten amsanatañ.

¹² Allempopa' met ñeñt ñanom ñeñt allcatañtetsa, tarraña señoche'pa'ch palltena po'poñ epa ñeñtcha' allcatañtertserr.

¹³ Allempoña po'psheñeñ mellañoñeñ ñeñt po'pechapueñ o' poctorerrerr. Poctora'huerrtserrpa' naña allpa' ne'muerrerr ñoñets ñeñt e'morrtetsa altar pa'tatso'marot po'ucorot. Añ altar ñeñt aye'chcataret oro, ñeñtpa' e'ñe ñehuapo'tsen Yompor po'conaño.

¹⁴ Ñeñña ñoñetspa' atet otenan mellañoñeñ ñeñt po'pechapueñ ñeñtara ñeñt o' poctora'huerrerr. Ñeñña ñoñetspa' atet otenan mellañoñeñ:

—Te'pa' o'ch pepyamper mellañoñesha' pa'tatssheño'mar ñeñt' ehuan-carettetsa all ñeñt' atarr po'ñeso ñeñt' pa'so'cheñ Eufrates.

¹⁵ Ñehua, ñeñt' mellañoñeñ pa'tatssheño'maretpa' añecop añño'tarettenet all atomat o'ch chap allempo onañchareñ allempochña ñetpa' o'ch a'cllatueret shonte' acheñenesha'. Ñeñt' ora allpon acheñenesha' ñeñt' ye'cha'yetsa arr pat-sro allponcha' colla'huerrtsa ñeñt' allpon otenet la tercera parte. Te'pa' o' e'ñe etsotua ñeñt' atet onañchareñ ñeñt' hora, ñaña ñeñt' yetro, ñaña ñeñt' arrorro ñaña ñeñt' chararo. Allempoña ñeñt' mellañoñeñ pa'tatssheño'marpa' o' a'rroyareñterret.

¹⁶ Ñeñt' mellañoñeñ pa'tatssheño'mar ñetñapa' ahuanmet po'solltarer ñeñt' monta'yetsa puecahualloro. Nañapa' ne'muen allpon ñeñt' atet oten ñeñt' allo'tsa'yen. Ñeñt'pa' atarr aton shonte'. Ñeñt' che'muechets all, allo'tsen doscientos millones solltarnesha'.

¹⁷ Ñeñt' atet gatennet all nent ñaña cahuallechno, ñaña nent ñeñt' atet orrtena ñeñt' montenaya. Puesomapo'tpa' añ chorra'yenet asrom. Patanta'tetspa' añ chorra'yenet tsamamuenare', po'potantañpa' añ chorra'yenet asollemamuenare', po'potantañpa' añ chorra'yenet shemashremamuenare'. Ñaña cahuallechno poñpa' atet orretyena ñerra'mrrate' ma'yarroto'. Puenamoñapa' allo't cha'nen tso' huorte' epuet ñaña amos epuet ñaña ñeñt' huoretnets shemashrepñeñen ñeñt' otenet azufre.

¹⁸ Añña ñeñt' cha'nets puenamoñ atsetaren ma'po'marpa' ñeñt'pa' ñeñt'ña amtsañtetsa ñeñt'cha' a'cllatuerre' shonte' acheñenesha' ñeñt' allpon otenet la tercera parte.

¹⁹ Ña po'huamenc allo muetsenan acheñenesha' ama puenamoñayaya atet peno, añña ama't pa'sme'llo'tpa'cho'ña amtsañtena. Tarro'mar pa'sme'llpa' shechpeto' ñeñt' poso'sme'll pen. Ñeñt'pa' alloña atserrpenan acheñenesha'.

²⁰ Allpon acheñenesha' ñeñt' queshpatsa ñeñt' ama muetsanato ñeñt' amtsañtetsa ñetñapa' attera atpare'teñet Yompor. Ama cotape'cherreto cohuen attoch quechpuet ñeñt' atet patse'tyenet sosya'tsañ. Ñetpa' attera mueneñet o'ch ma'yochyet oneñeñechno ñeñt' ama cohuenayaye. Ñaña ñetpa' attera mueneñet o'ch ye'chcatatse'tyeset pa'namen ñeñt'cha' ma'yochenet atet ñerra'm oro ñaña quellema't, ñaña bronca, ñaña mapue', ñaña tsach. Allohuenet ñeñt' ye'chcatyenet ñeñt'ña po'yomporer penet, ñeñt' ma'yochenet ama't ama enteno, ama't ama e'mueno, ama't ama chope'cheno.

²¹ Ñaña ama quechpueneto ñeñt' atto muetsanna'tenet ñaña atto tsañnannenet ñaña atto nanac cañoresha'tenet ñaña atto etatsre'tanna'tyenet. Ora añechnopa' alloña ama cohuenaye' cotape'cheneto.

10

Atto Juanpa' entan puesheñarr mellañoñeñ ñeñt' orrene' po'librotoll

¹ Allempoña napa' o' alla nenterrerr po'psheñeñ mellañoñeñ ñeñt' atarr ahuamencattetsa. Ñaña'pa' sohua'nena entot, e'ñe osot sohuanpena. Poñoñapa' añ arca'tamipesnene' ayon. Pa'clloyoñapa' e'ñe atet poptena ñerra'mrrate' atsne' choyo'tetsa. Pa'tac pa'chepohuen ora atet orrtena ñerra'mrrate' tso' huortets enonet.

² Sohua'nenapa' orra'nenan po'librotoll. Ñeñt'ña librotollpa' e'ñe cohuen atorareñ ñeñt' rremuen potot. O' chap patsopa' pa'tacña po'cohuenrotpa' tomos oño, po'ptecañña ñeñt' pue'chcoterotpa' tomos patso.

³ Allempoña tomospa' rranosa huomenc. Po'ñoññapa' e'ñe atet e'morrtosa ñerra'mrrate' ma'yarr tecoretsa. Atto rranosapa' e'ñe atet e'morrtena ñerra'mrrate' tecore' anapuene' ñeññ cançhroche'tats tecorena.

⁴ Allempoña e'morrra ñeññ cançherr tecore' napa' nemneñeñ o'ch nequell-cañ ñeññ atet ne'mñ tecore', tarraña na allempopa' ne'muerrerr ñoñets all e'morrtena ento. Ñeññña ñoñetspa' atet otenen:

—Amach pequellcatsche ñeññ atet pe'mueñ tecore' çhochña pa'nasocha.

⁵ Allempoña añ mellañoñeñ ñeññ tomosets oño ñaña patso, ñañaapa' echan-tosan pot enoneñ po'cohuenrot.

⁶ Allña eñosospa' e'ñe huomenc nosan po'ñoñ Yompor pa'so'chño, ñeññpa' atet otos:

—Yompor ñeññ ama arromñañeshayaye ñeññ yeçhcate' enet ñaña ora allpon ñeññ allo'tsa'yen pue'ntaño, ñaña ñeññ yeçhcate' pats ñaña ora allpon ñeññ allo'tsa'yen po'patsño, ñaña ñeññ yeçhcate' oñeçhno ñaña ora allpon ñeññ allo'tsa'yen pueyeçhcatareso, ñañaapa' entenen ñeññ atet noten te' ñeññpa' e'ñech po'ñoçh atet perra. Te'pa' amach alla yecuame'tere'te atomatuanen.

⁷ Ñerra'm esempoch poctorerrerr po'psheñeñ mellañoñeñ ñeññ po'cançhroñpa' allempochña e'ñe etsotuerra Yompor poçtañña ñeññ ama e'ñeye' eñotpahuoyaye ama't ahuatoteñ ama't allempo ñanom eñotatyesane't ñeññcha' a'mta'yeyase't po'ñoñ ñeññara ñeññ nanac torra'yestse't ñocop. Allohua ñeññ atet eños mellañoñeñ.

⁸ Allempoña napa' o' alla ne'muerrerr ñoñets ñeññara ñeññ atet ne'm ñorra' ñeññ e'morrtetsa pue'ntañoç, alla oterrerr:

—Te'pa' o'ch peponemya mellañoñeñ ñeññ tets oño ñaña patso o'ch pechtosñañ potot po'libro ñeññ e'ñe cohuen atorare't.

⁹ Nañapa' ahuen allo'tsen mellañoñeñ, neçhap ñeshopa' notos:

—Te'pa' o'ch papuen pelibrotoll.

Ñañaapa' atet oten:

—Añca'ye peyore o'ch perre'. Penamo'tpa' atarrcha' nanac puetsarr pe'mñ atet ñerra'm pets po'moñ, tarraña ñerra'm o'ch çhap pa'topa' atarrcha' pesherr pe'mñ.

¹⁰ Allempoña napa' o' nechtosñañ po'libro pototpa' o' nerre'. Allempo nerruepa' nenamo'tña atarr puetsarr ne'mñ atet ñerra'm pets po'moñ tarraña allempo çhap natopa' atarr pesherr ne'mñ.

¹¹ Allempoña napa' o' alla oterrneterr:

—Te'pa' añ pocte' o'ch alla peserrpare'terrerr ñeññcha' atet etsotaterr Yompor esempohuañen. Añcha' peserrpare'tyes ñeññcha' atet perra shonte' pa'namen acheñenesha' ñaña atetcha' perra pa'namen anetso'marnesha' ñaña atetcha' perra pa'namen mereñtsoreçhno ñeññ eñosyets po'poñe'ttsocma ñoñtso ñaña atetcha' perra pa'namen añcha'tareteçhno.

11

Atto epsheña ñeññ pueyochresha' pen Paretspa' ñetcha'ña eñertset Yompor-cop

¹ Allempoña napa' apnet tepapets ñeññ atarr allpocha'p e'ñe atet ñerra'm carrots. Ñaña allpa' atet otnet:

—Te'pa' o'ch ahuep o'ch petpueññaña' Yompor pa'paquell allo, ñaña altar ñeññ allo'tsen. Ñaña o'ch pe'ñotena' errosheña'te' ñeññ ma'yochetsa all.

² Tarraña amach petpanñpsatscheña ñeññ a'yote'tsa'yen cha'petot. Tarro'mar all ñetpa' aparetetcha' po'poñ acheñ ñeññ ama ame'ñetso. Ñetñaapa'

atmama'terretcha' all anetso ñeñt' anaret' Partsocop. Pa'tatsoch çharrama' puechena epña arrorr allponmatcha' a'sosyateñet all ñeñt' anarettetsa Partsocop.

³ Ñaña allempopa' o'ch nemñe epsheña ñeñt' neyochresha' nepen. Nach ahuamencat' p̄ahuet attoch a'potet ñeñt'cha' atet perra esempohuañen. Mil doscientos sesenta yet allponmatcha' serrpare'tennanet neñoñ. Puel-lquëñoñet chorretcha' pa'shtamashe'm. Arrpa' allohua ñeñt' atet otnet all Yompor pue'ntaño.

⁴ Ñehua, añ epsheño'mar ñeñt'cha' eñerrets Yomporecop ñetpa' atma'ntatarettenet epcha olivoch ñaña epa all orratenet huerare ñeñt' e'ñe tomçhets all Yomporesho, ñeñt'ara Yompor ñeñt' pomnaren p̄ohuene' allohuen acheñenesha' arr patsro.

⁵ Ñaña añ epsheña ñeñt'cha' eñerrets Yomporecop, ñerra'm ama't esesha ñeñt' muenene' o'ch erroñ pet añ epsheña, ñetñapa' puenamoñpa' o'ch çha'nmatet tso' huorte' ñeñt'cha' e'nue' ñeñt' e'moñe'tenahuet. Ñeñto'mar yeñoteñ ñerra'm esesha' e'moñe'tenahuet, ñetñapa' e'ñech rromhuet poc-tacma.

⁶ Ñaña añ epsheña ñeñt'cha' eñerrets Yomporecop, ñetpa' atarrcha' ahua-mencatet. E'ñe ñet po'huamencoñ epatare'teñet o'entof' attotcha' ama hu-ateno e'ñech allponmat eñorenat Yomporecop. Ñaña e'ñe ñet po'huamencoñ oññapa' o'ch a'pnaseret errasats. Ñaña e'ñe ñet po'huamencoñet o'ch çhapaterret añ arr patsro pa'namen ñeñt'cha' amtsañterrtsa. Ama't esempo allempo atet muenenet ñet, allempocmach atet pet.

⁷ Tarraña ñerra'm esempoch e'ñe e'nuet ñeñt'cha' allpon eñoret arr patsro, allempoñapa' o'ch çha'nom ñaña ñeñt' berrma'ttetsa ñeñt' atarr bellac. Arroñcha' çha'nom arrotot ñeñt' atarr o'pononet arrottena pats. O'chña çha'nompapa' o'ch quellarosan añ ñeñt' epsheña ñeñt'cha' eñerrets Yomporecop. Ñeñt' berrma'ttetsa ñachña ganatsa o'ch muetsan añ ñeñt' epsheña.

⁸⁻⁹ Añña epsheña ñeñt' amtsaretpa' attach o'shshe'muet toño allecma chopeñe'chen allohuen acheñenesha'. E'ñe ma'pamuet ñaña po'poñ pueshmet yet allach o'shshe'muena all atarr anetso, ñeñt'ara anetser Jerusaléñ all corso'tam̄pset Yepartseshar Jesucristo ahuañ. Ñeñt'ña anetserpa' ñato' o'ch netma'ntacha ñerra'mrrate' ñeñt' atet pete't anetso Sodoma ñaña anetso Egipto. Añña epsheña ñeñt' amtsaret' attach o'shshe'muet all amach esesha' muenateto o'ch pampuet. Allñapa' allcha' huaçhena shonte' pa'namen acheñenesha' ñeñt'cha' cohuanrrortene', shonte' pa'namen mereñtsoreçhno ñeñt' eñosyets po'poñe'ttsoçma ñoñtso. Shonte' pa'namen anetsoçhno allot huaçhena.

¹⁰ Acheñenesha' ñeñt' yeçha'yetsa erraḡaren arr patsro ñetñapa' o'ch coshame'tam̄pesyet añ epsheña arromñañ. Atarrcha' nanac cosherret. Poc-sheñeshotetña ñetpa' o'ch es apanna'tyeset e'ñe atta. Ñetpa' añecopcha'ña atarr coshenet tarro'mar o' rroma añ epsheña ñeñt' atsrre'moçhen entenet ñeñt' yore'tatenahuet po'chñaret e'ñe pueserrpare'teñoñet Yompor po'ñoñ.

¹¹ Allempoña o'ch met ma'pamuet ñaña po'poñ pueshmet yet, añña ñeñt' epsheña machayoñepa'tcha' alla tanterret tarro'mar Yomporña alla tanta-terre'. Allohuen acheñenesha' ñeñt' cohuanrrortene'pa' atarrepapa'tcha' nanac yorenat.

¹² Allempoña tanterret epsheño'maret, e'muet ñoñets ñeñt' e'morrtetsa atarr huomenc entof'. Ñoñetsñapa' atet otenanet:

—Sa'tap arr ento.

Ñetñapa' o'cho' a'tapuet, ospa' ñeñña anmahuet ento.

13 Cohuanrrortets ñeñ e'moñe'tenahuetpa' e'ñe allempocmaña pella pats huomenc. Allña anetsopa' shonte' matna't pocoll, allpon otenet la décima parte. Ñaña cancherr mil acheñenesha' ñeñ allpon colla'huatsa. Ñeñña allpon qeshpatsapa' atarr yorenent. Pueyorñoťetpa' e'ñe allempocma amcha'na'tpo' eñchet Yompor ñeñ pue'ntaño'tsen. Allñapa' cohuentatoñet.

14 Allempopa' o' metuaña ñeñ puepañ ñeñ allcatañtetsa, tarraña señochepa'ch palltena po'poñ paterr ñeñcha' tecma allcatañtatsa ñeñcha' puema'pañ.

Allempoch poctora'huerr mellañoťeñ e'ñe allohuanen allempochña amcha'taretetuerra Yompor arr patsro

15 Allempoña po'psheñeñ mellañoťeñ ñeñ po'canchrroñpa' o' poctorerrerr ñaña. Poctora'huerrtserrpa' entoñapa' atarr huomenc e'morrterrerr ñeñ eñoretza all ento. Ñeñtpa' atet otenet:

Ñeñ allpon amcha'taretetyetsa arr patsro te'ñapa' o'huañcha' allo'na amcha'taretetnenet tarro'mar ñeñ atto amcha'taretetyenetpa' ñeñtpa' allochña amcha'taretterra Yompor epuet ñaña Puechemer ñeñ Cristo. Ñeñcha' atto amcha'taretterra Yomporpa' ñeñtpa' amach ahuañañatterra ama't errponaña.

16 Allempoña añ ñeñ epoch çharrasheña ñeñ puechetsa pa'tats ñeñ anorrçhets all e'ñe ñet po'conañeto allot sherbeñet Yompor all pue'ntaño, ñetñapa' rrema'rrartenet Yomporshonet atet ma'yocheñet Yompor.

17 Ñetñapa' atet otenet:

Pa Yompor ñeñtep atarr nanac Partsop ñeñtep Yepartseshar yepenep, ñeñtep çhocma eñallep ama't ahuatoteñ ñaña ñeñtepcha' alla huerrtserr po'pocheño aña patsro, yañapa' atarr yeparasyoso'tenep tarro'mar te'pa' o'ch alla po'paterra pa'pehuamenc attotcha' o'ch alla atarr pa'mcha'taretterra.

18 Shonte' pa'namen acheñenesha', pa'namen anets allo'tsa'yenet, ñet pa'tsrre'mueñoťetpa' e'ñe e'moñe'tuenpet, tarraña te'pa' o' çhap allempoch pecoñchatuerranet. Ñaña te'pa' o' çhap allempo onañchareť añecop ñeñ colla'huetsa ahuatoteñ allempoch peñotatuerranet ñeñ atet pa'yeseť. Añña ñeñ torra'yestseť atto amtonapeteť peñoñ ñeñ e'ñe peyochresha' pepeť, te'ñapa' o' çhap allempoch petsa'tuerranet. Ama't allohuen ñeñ pame'ñayeť pa' ama't ñeñ atarr asherben entyeseť ñaña ñeñ ama asherben entete'te, te'ñapa' o' çhap allempoch petsa'tuerranet allohuenet ñeñ pame'ñenaya pa'. Ñaña te'pa' o' çhap allempoch e'ñe pa'chencatuer allohuen ñeñ a'chencatañtetsa aña patsro.

19 Allempoña añ Yompor pa'paquell ñeñ ento'tsenpa' e'ñe cohuen atorareťtena. O'ponoña all nentoñ Yompor po'tsapot all çhocma añño'tenet ñeñ aquellcareť ñeñ a'pocmat Yompor yocop. Allñapa' meratstena, tatsllaren ma'moreten huomenc, pellena pats ñaña atet huechen huomenc.

12

Atto Juanpa' entan puesheñarr coyanesha' ñeñ emaret, pue'maretollpa' ñeññara Cristo, añañña' mueneñeñ o'ch añañpes pue'maretoll

1 Allempoña all pue'ntaño'pa' all orrtena ñeñ ama't ahuaťa ama't puesheñarroťeyapa' ama yentare. Ñeñtpa' ñeñcha'ña yeñotaterre' ñeñcha'

atef perra esempohuañen. Allñapa' all orrtena puesheñarr coyanesha'; añ po'cashe'm pen atsne'. Pa'rrpoñapa' allo'tsen ñaña arrorr. Poñoñña' echoyo'meñ. Po'choyo'mopa' all orrtena çharra' ranto puechena epa.

² Ñeñña coyanesharpa' ačhomen, o' çhen allempoch eñalletatan pue'mar. Atto atsotenana pue'marpa' çha rranare'tena, atarr allpatateñ pue'mar.

³ Allempoña all pue'ntaño all orrtena po'poñ ñaña ñeñt ama't ahuařapa' ama yentare. Ñeñtpa' añ orrtetsa añañ ñeñt atarr aña'noçhen. Ñeñt añañpa' atarr añecmuen ñaña atarr tsama't orrtena. Poñpa' cançherrmaga. Cançherrmago'mar poñpa' e'ne echoyo'metareroche'. Ñaña po'ucorpa' allo'tsen çharra'.

⁴ Pa'sme'll ñeñt chetare'tnen alloña tarra'huanenanña shonte' rantoçhno e'ne a'shore'tuaneñ patso. Ñeñt allpon ranto ñeñt ento'tsen, allpon a'shore'tuaret ñeñt otenet la tercera parte. Ñeñña añañpa' alla tomos e'ne coyaneshešo ñeñt atsotenaya pue'mar all cohueñ ñerra'm o'ch eñalletatan pue'marpa' ñach añañpse'.

⁵ Allempoña coyanesha'pa' o' eñalletatan pue'mar ñeñtpa' asheñorr. Allempo eñalletua ñeñt asheñorrořollpa' e'ne allempocma a'tapachet Yompor po'conaño tarro'mar ñapa' ñach anarettertsa ñeñtcha' aña'taretertsa allohuen pa'namen acheneshacop. E'nech po'yoroçhenñoñ aña'tareterranet, atef ñerra'mrate' ñapa' a'sreperet o'ch aña'noçhtana'terranet.

⁶ Allempoña coyanesha'pa' allorocma o' yeta o' çhap allaparr all amaraño. Allña Yomporpa' e'ne cohuen aña'tatoñ allcha' cohuanpeñet allcha' rrateñet allponmat yet ñeñt otenet mil doscientos sesenta yet.

Atto quellarenet Yompor pue'ntaño

⁷ Allempoña quellarenet Yompor pue'ntaño. Ñeñt pa'mcha'tareter pen allohuen ñeñt e'ne cohuen mellañoñeñnesha'pa' añ pa'so'cheñ Miguel.

⁸⁻⁹ Miguelña' all quellara po'mllañoñeñnesharohuen. Quellareñet añañ, añañña'pa' o' quellara ñaña pueyochreshohuen. Miguelpa' chetanna'tet parro epuet añañ all Yompor pue'ntaño. Ñehua, ñeñt pueyochresha' pen añañ ñeñtpa'cho'ña mellañoñeñnesha' tarraña ñeñt mellañoñeñpa' ama cohuenayaye. Tarraña añañ atto quellaran Miguelpa' ñapa' amagano. Ñeño'marña añañpa' huapore'chet entoñ pueyochreshohuen a'shorareterret patso. Attoña ahuaapore'tareña añañ ama't atarr nanac aña'noçheneñ. Ñehua, añañpa' ñeñt shecheř ahuařoteñ ñeñtara yoten oneñeñ ñaña ñeñt otenet Satanás ñeñt atarr ashcañtetsa ora erraparen aña patsro.

¹⁰ Allempoña napa' o' alla ne'muerrerr po'poñ ñoñets ñeñt atarr e'morrtetsa huomenc all Yompor pue'ntaño. Ñeñt ñoñetspa' atef oten:

—Te'ña'pa' po'ñoçh o' çhap allempoch queshpa'huerra allohuen acheneshas' ñeñt pueyochresha' pen Yompor, tarro'mar o'ch alla o'paterrana po'huamenc e'ne poctacma o'ch alla aña'tareterra ñapueñ epuet Puechemer ñeñt Cristo ñeñt nen ña ñeñtcha' aña'tarettapretenaya. Añ oneñeñ ñeñt çhocma atta toma'tam pesyene' masheñneshaçhno all Yomporesho yeto ama't ñaña tsapome'tets ñeñtña'pa' o' ahuaapore'tareña.

¹¹ Ñeñt masheñneshaçhnor ñeñt ame'ñenaya Yompor, ñetña'pa' o' e'ne a'mchechueret oneñeñ ñeñt toma'tam pesyenahuet e'ne atta. Añ a'mchechaterre' ñeñt atto Cristo rroma, ashatareña po'rras ñeñt toma'ntenaya Carrnero ñeñt muetsete't ochñartsocop. Ñaña añ

a'mchechaterre' ñeñt atto masheñneshachno chocma eñosyenet e'ñe cohuen ñeñt atet pena Cristo po'cohuenña. Ama't amuerochtatarefetyenetpa' ñetpa' ama quechpueñeto atto eñosyenet e'ñe cohuen Cristocop, tarro'mar ñetpa' ama mecha'teneto ama't mamesha o'ch rromuet e'ñe pame'ñeñoñet Cristo.

¹² Atarr cosheñets Yompor pue'ntañño allohuenacop ñeñt allo'tsa'yen. Tarraña atarr llequëñets allohuenacop ñeñt yecha'yetsa añe patsro ama't ñaña ñeñt oño'tsa'yen. Tarro'mar oneñetpa' o' sohuam̃perranet e'ñe pa'tsrre'mueñesha'. Ñapa' eñoteñ e'ñech mameshapa' o'ch alla ahua-pore'tare'terrerr.

Atto añaña' attera cotare'tenan coyanesha' ñeñt o' eñalletatuan puechoyor

¹³ Allempoña añ añañ ñeñtara oneñet o' eñota ñapa' o' ahua-pore'tare'ta entoñ, ña pa'tsrre'mueño'tpa' o' alla cotare'terranerr coyanesha' ñeñt o' eñalletatuan puechoyor asheñorroñoll.

¹⁴ Tarraña coyanesha'pa' allempo cotare'terrerr añaña'pa' ñeñtña coyanesha'pa' o' apet eppa'ya pa'pue' ñeñt atesha' contor pa'pue'. Ñeñtpa' alloch anomam̃psana po'yalloñ ñeñtara añañ o'ch sa'nem o'ch chap bachayo all amaraño all añño'teññañet ñocop e'ñe cohuen allcha' cohuañpeñet. E'ñech ma'pa char ñaña po'poñerrerr pueshmet char, ñeñtpa' allponmatcha' rrachet all.

¹⁵ Allempoña añ po'yalloppa' e'ñe puenamoñ cha'nmatan shonte' oñ atet ñerra'mrrate' po'ñes apellchetsa. Ñapa' cha otapañ ñeñtcha' rremuerraya' coyanesha' ñeñt cotare'ten attoch a'ño'shach. Tarraña ñeñtpa' ama attetache.

¹⁶ Ama't patspa' yenpan coyanesha', attoña tara'nom all esha'tañña oñ e'ñe masohua ñeñt allpon cha'nmat po'yalloñ puenamoñ.

¹⁷⁻¹⁸ Ñeñtña atarr atsrre'mate'ña añañ, ello alla atarr e'moñe'terranerr coyanesha'. Allempoñapa' ahua' allo'tsa'yen po'potantañ coyanesha' puechoyoresha' o'ch quellarosamet ñamet. Tarro'mar ñetpa'cho'ña chocma ame'ñeñet Yompor po'ñoñ ñeñt atet anaret ñaña chocma coteññañet Jesucristo pocta'ña.

13

Atto Juanpa' entan berrma't ñeñt atarr añcha'nochen ñeñt cha'nets oñoñ

¹ Allempoña napa' natomos sa'patopño, allña'pa' nenterrerr berrma't atarr añcha'nochen ñeñt cha'nmatas oñoñ. Poñpa' cancherrm̃aga, po'ucorpa' charra'. Pate'tets po'ucorpa' e'ñe echoyo'metoche'. Puenm̃aga'ttso all aque-llcare't sochatse'teñets ñeñt pa'namen sosya'tsañ allo achm̃are'teñet Yompor.

² Ñeñtña berrma't pue'moquër e'ñe atet ñerra'mrrate' ma'yarr tarraña pa'tacñapa' e'ñe atet ñerra'mrrate' orranatec. Puenampa' e'ñe atet ñerra'm ma'ñorenam. Añañña'pa' ñeñt apue' po'huamenc, a'p ñaña llesens attoch añcha'nochtaprecha all po'conaño.

³ Puenm̃agarr poñpa' all orrtena cha atserrpena nanac huomenc cha met-taguën ñeñtcha' muetsayeñ tarraña ama rromo alla correrra. Ñeñto'marña allohuen acheñenesha' arr patsro ñetpa' atta cohuanrrorteñet cha otapuetañ ñato' chach rroma, tarraña ama rromo. Ñeñt atto ama rromopa' acheñenesha'ña arr patsro ñeñtña ame'ñatenahuet. Ñetpa' otenapuetañ ñato' ñeñt'e'ña Parets.

⁴ Ñeñto'marña acheñenesha' ma'yocheñet ma'yarrma't. Ñetpa' atet otanna'tyeset:

—Ama eñalle po'poñ ñeññ nanac ahuaencať atet ñerra'm añ ma'yarrmať ñeññ yenten. Ama't e'ñe eseshapa' amate' errotenot a'mchechachetoña añ ñeññ atarr ahuaencať.

Ama't añaña'cho'ña ñeññ ma'yochena acheñenesha' tarro'mar añaña'pa' ña ahuaencať pe' ma'yarrmať.

⁵ Añaña'pa' muenatenan ma'yarrmať o'ch ommo'chatse'tyesa. Pommo'chatse'teñoťpa' o'ch achmāre'tenan Yompor. Ñaña muenatan ma'yarrmať o'ch amcha'taretta pa'tatsoch charramā ñaña puechena epña arrorr.

⁶ Atet pa ma'yarrmať achmāre'tenan Yompor, sochatse'teññañ pa'so'cheñ. Ñaña Yompor pa'paquell ñaña allohuen ñeññ allpon allo'tsa'yen pue'ntañ e'ñe achmāre'tueñ.

⁷ Ñaña muenateñ o'ch quellaran ñeññ pueyochresha' pen Parets. Ñaña muenateñ o'ch ganana Yompor pueyochresha'. Ñaña muenateñ o'ch amcha'taretta allohuenacop ñeññ pa'namen acheñenesha', allpon ñeññ pa'namen mereñsor ñeññ e'ñe eñosyets po'poñe'ttsoema ñoñtso ñeññ ora allpon allemeñ anetso'mar.

⁸ Ora allohuen acheñenesha' ñeññ añe patsro'tsa'yen añach ma'yochenet ma'yarrmať tarro'mar ñeññ acheñenesha'pa' ama aquellcareteyayeto pa'so'cheñ Cristo po'libro all aquellcarettena allohuen ñeññ corretsetach ñeññ ameñenaya Cristo ñeññ amsarettatsa ochñartsocop atet ñerra'm carrnero. Ahuať allempo errte' ayečcataretta pats, Cristoña po'libropa' all aquellcareť so'chñetsočno attochña ñetpa' corretsetach.

⁹ Ñerra'm esesha' e'mñotene' añ ñoñets, chapoñepa'ch pueyočhro ñeññ atet yečhateney añ ñoñets. Ñeññ ñoñetspa' atet oten:

¹⁰ Ñerra'm esesha' rromanatene' po'potantañ attoch yottam̄psatanet, ñetpa'cho'ña ayottam̄psaretterretcha'. Ñaña ñerra'm esesha' muetsanatene' po'potantañ espado, ñetpa'cho'ña amsaretterretcha' espado. Ñeñño'mar añ ñeññ poctetsa yocop e'ñe yeyemteñoť Yompor o'ch ya'huanten acoṗoteñ ñerra'm es yehuapoya, allohueney ñeññey o' pueyochresha' perrey Parets.

Atto Juanpa' entan po'poñ berrma't ñeññ čha'nets o'ponot patsot

¹¹ Allempoña na allpa' nenterrerr po'poñ ñeññ berrma'ttetsa. Ñeññpa' arroť čha'nom o'ponot patsot. Ñeññña'pa' e'ñe epa po'ucor atet ñerra'm carrnero po'ucor, tarraña ñeññpa' atarr amcha'nočhen eñen e'ñe atet eñen ñerra'mrrate' añaña' eñoretsa.

¹²⁻¹³ Ñapa'cho'ña atarr amcha'taretta e'ñe atet amcha'tarettena ma'yarrmať ñeññ ñanom nent ñeññ čha'nmats oñoť. Allña'pa' amcha'tarettapretenana ñeññ ma'yarrma'ttetsa all. Ñeññ čha'nmats o'ponot patsot ñeññña'pa' muenatenan allohuen acheñenesha' ñeññ añe patsro'tsa'yen o'ch ma'yochyet ñeññ ma'yarrmať. Ñeññtara ma'yarrmať ñeññ correrřtsa e'ñe mamecma allempo mettaguën. Ñeññ atto mettaguën ñeññčha' muetsayeñ tarraña ñapa' ama rromo. Añ berrma't ñeññ čha'nmats o'ponot patsotpa' ñerra'm esempo allo'tsen parro epuet ma'yarrmať ñaña'pa' eñall attoch orrtatenan acheñenesacop pa'namen ñeññ ama puentareto ama't ahuať. Attoña a'shoran entoť huorte' tso' ñeññña' tso' huorte'pa' o' e'ñe čhap patso allña'pa' cohuanrrortatan shonte' acheñenesha'.

¹⁴ Ñeññña'pa' allo shequēnan shonte' acheñenesha' ñeññ añe patsro'tsen. Ñeñño'marña ñerra'm allempo otenan acheñenesha', o'ch seyečcat

ma'yarrma't, ñetñapa' e'ñech pocte' enteñet. Añ ñeñtara ma'yarrma't ñeñt metto'ten espada ñarraña ñapa' e'ñe mamecma o' alla correrra.

¹⁵ Añña berrma't ñeñt ÷ha'nmats o'pono't patsot ñeñtñapa' muenateñet o'ch o'rrerratan ayeçhcataret ñeñt toma'ntatenet ma'yarrma't. Allochñapa' attoch eñorana'tanet pueyeçhcatar. Ñaña ma'yarrma'tpa' atet nanet po'ñoñ, ñeñtpa' atet oten: Ñerra'm esesha' ama ma'yochenaye ayeçhcataret muet-sanachetepa'ch.

¹⁶⁻¹⁷ Elloñapa' o'terranerr acheñenesha':

—Te'pa' o'ch seyaco'mta'tyesa soto't secohuenro't amapa' arr seto'mo'mar. Allcha' sena'yeson neso'cheñ amapa' sena'yeson ñeñt nenúmero nepen. Atet p'atan allohuen acheñenesha' ama't ñeñt ama esoshe'mayaye acheñ, ama't ñaña ñeñt atarr sherbets, ama't ñaña acheñ ñeñt atarr eçllayore't, ama't ñaña ñeñt atarr huocchañetets, ama't ñaña acheñ ñeñt e'ñe cohueno'tsen, ama't añ acheñer ñeñt ataruasataret e'ñe atta. Allohuen acheñenesha' ñeñt ama ayaco'mta'tare'te all neññañet ma'yarrma't pa'so'cheñ amapa' ñeñt po'número pen ma'yarrma't, ñetñapa' amach erro'teno't es pomueneto ñaña amach erro'teno't es rañteneto ñeñt muenenet ñet.

¹⁸ Ñehua, ñeñt allpon po'número pen ma'yarrma'tpa' ñeñtpa' allo'tsen seiscientos sesenta seis. Ñeñt número añ toma'ntena puesheñarr acheñ pa'so'cheñ ñeñtcha' ñanom orrterrtsa tsapatonet. Ñerra'm esesha'ch atarr es eñoterrets eñoterrñañetepa'ch pa'so'cheñ ñeñt atma'ntataret añ número.

14

Allempo Juanpa' entan Cristo ñeñt atma'ntataret Carrnero, all ten Siónaño epuet ñaña shonte' acheñenesha'

¹ Allempoña na cohuerrtsanerrpa' alla nentererr Cristo all ten Siónaño. All orrtena e'ñe atet orrtena ñerra'm Carrnero. All tomchen ñaña shonte' acheñenesha'. Ñeñt acheñenesha'pa' allo'tsen ciento cuarenta cuatro mil acheñenesha' ñeñt emchorrenaya Cristo. Ñeñña acheñenesha'pa' e'ñe ayato'ma'taretoche'. Pueto'muetopa' all na'yehñañet Cristo pa'so'cheñ ñeñt atma'ntataret Carrnero, ñaña Pompor pa'so'cheñ ñeñtara ya Yeyomporer.

² Allñapa' ne'muen ñeñt huomenc e'morrtetsa, arro't huena ento't. Atarr huomenc e'morrtena atet ñerra'm all etsase'tena shonte' oñeçhno ñeñt atarr huomenc ma'moretets. Po'ma'moreteñapa' atarr huomenc e'morrtena ÷ha ottena ñerra'm ÷ho tecor-rraren huomenc ñeñt yoten tatsllare'. Ñeñt ma'moretets all añepa't ma'moretets ñeñt shontetsa acheñenesha' all añepa't a'ma'moretenet arpa.

³ Allñapa' cohuentatenet morreñets ñeñt e'ñe etserra morreñets all Yompor po'conaño. Allo'tsen ñaña pa'tatso'mar ñeñt berrma'ttetsa, ñaña allo'tsa'yen ñeñt sherbene' Yompor ñeñt epoch çarra' ñeñt puechetsa pa'tatssheña. Ama't e'ñe puesheñarrapa' ama eseshaye' yeçhenayeña añ morreñets ñeñt etserra. Añña eñotene' ñeñt ciento cuarenta cuatro mil acheñenesha' ñeñt a'qeshpatarettetsa añe patsot.

⁴ Ñetpa' ama a'sosyateneto atto yorayeñet coyanesha' tarro'mar ñetpa' e'ñe cohuen correnet. Ñetpa' añ e'ñe cohuen cotenet Cristo ñeñt toma'ntenaya Carrnero. All ama't erra muene' sen Cristo, ñetñapa' e'ñech co'ta'neñet cohuen. Ñetpa' e'ñe ñanom a'qeshpatarettet attoña ñetpa' anarettenet atet ñerra'mrrate' ñeñt ñanom yapueñ Yompor ñeñt atarr cohuen, ñeñtara o'patena ñaña Cristo ñeñt atma'ntataret Carrnero.

⁵ Ama't puesheñarroñetapa' ama shequëneto ama't e'ñe mamesha. Ñetpa' e'ñe cohuen orreyenet amach errotenoñ otteñe'chareñterreto ama't ahuaña all Yompor po'conaño.

Allempo Juanpa' enterranerr ma'psheña mellañoñeñ ñeññ eñosyesnets anoma'maot

⁶ Allempoña napa' alla nenterrerr po'poñ mellañoñeñ all anoma'mtena allpononet enonet. Ñapa' ñeññña serrpare'tatenahuet cohuen ñoñets ñeññ ama ahuañaño ñeññ alloch yequeshperra. Añ cohuen ñoñets ñeññcha' serrpare'tatan allohuen pa'namen acheñenesha' ñeññ yecha'yetsa aña patsro, ama't ora allemeñ pa'namen anetsočno ñeññ pa'namen mereñtsorečno ñeññ eñosyets e'ñe po'poñe'ttsocma ñoñtso.

⁷ Ñeññ atto anoma'mtena all, eñosnen, atarr huomenc e'morrtena, ñeññpa' atet oten:

—Señcha'na'chepa'ch Yompor, ÷ochña secohuentatoñ tarro'mar te'pa' o' chap allempoch entyesas e'ñe puesheña'ttsos errotenñe' sepa'yena. Te'pa' ñachña sema'yocha ñeññ yeçhcate' enet ñaña ñeññ yeçhcate' pats, ñaña oñečno ama't allot potayen oñ.

⁸ Allempoñapa' alla coña'nererr po'poñ mellañoñeñ ñeññ puepañ mellañoñeñ. Ñapa'cho'ña eñosnerrerr, ñeññña' atet otnom:

—Te'pa' o' ahupore'tareña añ anets ñeññ atma'ntataret Babilonia ñeññ nanac atarr anets. Tarro'mar ñeññpa' aña yeçhatyenan ora allpon po'poñečno anetsočno ñeññ atarr sosya'tsañečno ñeññ atet muenatse'tatyenanet ñet po'chets.

⁹ Allempoñapa' alla coña'huererr po'poñ mellañoñeñ ñeññ puema'pañ. Ñapa'cho'ña eñosnerrerr, po'ñoñpa' atarr huomenc e'morrtena, ñeññña' atet otnerrerr:

—Ñerra'm esesha' ma'yochenaya ma'yarrma't amapa' ayeçhcataret ñeññ toma'ntenaya ma'yarrma't, amapa' ñerra'm esesha' muenatenet o'ch yaco'mta'chet ma'yarrma't pueyotsaparo amapa' pueto'mo ayato'ma'tareña,

¹⁰ ñetña'pa' a'coñchatareñterretcha', tarro'mar Yomporña e'ñe po'yorochenñoñpa' ñachña e'ñe coñchatuerrahuet e'ñe poctacma. Tso'pa' ñeññcha'ña mueroçtatuerrahuet ñaña ñeññ epuet huorten tso'pa' ñeññpa' atarr shemasher ñeññ otenet azufre. Allcha' a'coñchatareñterret, allotcha'ña cohueretña allohuen mellañoñeñaneshachno ñeññ pueyochresha' pen Parets. Cohueretcha' ñaña Cristo ñeññ atma'ntataret Carrnero.

¹¹ Attoch achamareñterret, tso'ña'pa' chepoten pamosoñ enonet ñeññña'pa' amach ahuañaña'terro ama't errponaña. Amach huañerro ama't mamesha ñeññ atto a'coñchatareñtenet ama't yeto ama't ñaña tsapo. Tarro'mar ñetpa' aña ma'yochenet ma'yarrma't ñaña ayeçhcataret ñeññ toma'ntenaya ña. Ñaña muenateñet acheñ o'ch yaco'mta'chet o'ch noñet pa'co'meto ma'yarrma't pa'so'cheñ amapa' pueto'mo. Arrpa' allohua ñeññ atet ot mellañoñeñ ñeññ anoma'mtetsa eno'mar.

¹² Ñeñño'marña allohueney ñeññey e'ñe pueyochresha' peney Parets ñeññey ame'ñenaya Yompor po'ñoñ ñeññ atet oteney ñeññey e'ñe yemtenaya Jesús, yocopña'pa' añ poctetsa o'ch ya'huanta'huen e'ñe acoña ñeññ allpon pa'namen es yehuenoya.

¹³ Allempoña na allpa' ne'muerrerr ñoñets arroñ huena entoñ, ñeññpa' atet oten:

—Te'pa' o'ch pequellca' añ ñoñets: “Te'ña'pa' atarrcha' cosheñtso'tsa'yen allohuen ñeññcha' rromayets e'ñe pame'ñeñoñet Yepartseshar Jesucristo.”

Po'ñoçh atet oten Yompor Puecamquëñ, ñetpa' amesataretterretcha'. Te'pa' amach alla torrerrete'te tarro'mar ñeñt allpon o' torra'yenet añ patsro, ñeñtpa' e'ñe eñotuaref all Yompor pue'ntaño.

Attoch çherr ñeñteñpo allempoch apçherret narmets ñeñt o' pomella'huen

¹⁴ Allempoña na cohuerrotsanerrpa' nenterrerr os atarr huallama't. Ñeñña ospa' all anen puesheñarr ñeñtpa' añepa't Jesús ñeñtara Ñeñt Acheñetosets arr patsro. Ñeñtña' echoyo'met, ñeñña po'choyo'mpa' oro ñeñt choyo'mtena. Potoñapa' orrenan cochell ñeñt atore'gorrot ñeñt atarr nanac etsotañ ñeñt otenet hoz.

¹⁵ Allempoña Yompor pa'paclotpa' çha'nom po'psheñeñ mellañoñeñ. Ñaña' otosan ñeñt anets oso. Po'ñoñña' atarr huomenc e'morrtena, ñeñtpa' atet otenan ñeñt anets oso:

—Pamat pöcchello ñeñt pomellets allochña' o'ch pa'yapaçhe' tarro'mar o' çhap ñeñteñpo allempo yapçhen ñeñt o' pomella'hua yenareñ.

¹⁶ Allempoña ñeñt anets oso, ñaña' o'cho' amatan ñeñt o' pomella'huen ora erraparen añe patsro. Ñaña' o' a'yapaçhan allenateñ ñeñt pomellets añe patsro.

¹⁷ Allempoña çha'nerrerr po'psheñeñ mellañoñeñ Yompor pa'paclof ñeñt ento'tsen. Ñapa'cho'ña orrenan po'cchell ñeñt atarr nanac etsotañ.

¹⁸ Allempoña' çha'nerrerr po'psheñeñ mellañoñeñ. Ñapa' arrof huapa allo'tsen altar. Ñaña' ñeñt ahuamencattetsa attoch pomnaren penan tso'. Ñaña' otan ñeñt occhellet. Po'ñoñña' atarr huomenc e'morrtena, ñeñtpa' atet oten:

—Te'pa' o'ch pamat pöcchello ñeñt atarr nanac etsotañ o'ch papçha' allo puechña'tets uva ñeñt añe patsro'tsen tarro'mar o' atarr nanac yen.

¹⁹ Ñeñña mellañoñeñ atet oteñetpa' atetçho' pa. Allempoña amatan po'cchello uva ñeñt añe patsro'tsen o'cho' a'yapaçhach. A'yapaçhatuepa' o' shontanña uva allcha' atmama'chet attoch çha'nmatonet po'ñer. Ñeñtña' añ toma'ntena atto Yompor po'yoroçhenño'tpa' atarrcha' coñchaterran acheñenesha'.

²⁰ All atmama'teñet uva, poccollotpa' tama a'yente'tsen. Ñeñt atto çha'nen uva po'ñer ñeñtpa' añ toma'ntena o'ch chorrerr errasats arr patsro a'yohuen ñeñt allohuanen trescientos kilómetros ñaña enonet çhapcha' e'ñe cahuall po'frenohua ñeñt çhets e'ñe yelleca'nohua.

15

Allempo Juanpa' enterranerr cançherrsheña mellañoñeñ, ñetpa' o'ch orrtaterret ñeñtcha' amueroçhtatañterrtsa

¹ Allempoña all ento napa' o' nenterrerr po'poñ ñeñt atarr yoroçhen ñeñt ama yentare ñeñtcha' yeñotaterre' ñeñtcha' atet perra esempo. Nenterrerr mellañoñeñnesha' cançherrsheña. Ñeñtña' allsensarettenet attoch orrtaterret ñeñtcha' amueroçhtatañterrtsa. Puesheña'ttsetpa' orrtaterretcha' ñeñtcha' amueroçhtatañterrtsa e'ñe po'poñe'ttsoçma cançherrsheño'maret. Allempoña etsotuerra allohuen ñeñtcha' atto Yomporpa' yoroçhtater.

² Allña napa' nenterrerr ñeñt atet orrtetsa erracmañen atet ñerra'mrrate' ñeñt añecmuen rerpap e'ñe atet huorten atet ñerra'm tso' huortets all. Allña' all tomçhen allohuen acheñenesha' ñeñt e'ñe metana'tue' ora allpon ñeñt atet topatyenanet ma'yarrma't ñaña ñeñt pueyeçhcatar. Ñetpa' ama ayato'ma'tareteyayeto ma'yarrma't pueyotsaparo attoch noñet pa'so'cheñ

amapa' ñaña po'número. All tomchenet e'ñe arpatochet ñeñtpa' Yompor apuenahuet.

³ Ñetña puenñtana'tueñoñet allohuen topateñets morrechenet Moisés puemorreño ñeñt Moisés ñeñt atarr torratset Yomporecop. Pa'queshpatareteñoñet morrechenet ñaña Cristo puemorreño ñeñt toma'ntenaya Carrnero. Ñeñtpa' atet achoteñet Yompor:

Yompore, ñeñteþ nanac Partsoþ þa ñeñteþ Yepartseshar yepen, atarr echarr es petsotatyen, atarr cochneshare' es peþa'yen. Pa ñeñteþ Pa'mcha'tareter pen allohuen pa'namen acheñenesha' ñeñteþ e'ñe pocte' es peþa'yen. Ñaña e'ñe po'ñoçh atet ñeñt allpon es þotyen.

⁴ Allohuen acheñenesha' e'ñe amcha'na'tpo' entenpet, Yompore. Ama't puesheñarrapa' ama eñalle ñeñt ama amcha'na'tpahuoye' pentenaye, Yompore. Allohuen acheñenesha'pa' e'ñe þapta cohuentatennapet, tarro'mar e'ñe þapta þa ñeñteþ atarr Partsoþ. Tarro'mar allohuen acheñenesha' ñeñt pa'namen anetsoþ huacha'tetcha' pesho attoch ma'yochapet þa e'ñe þapuet tarro'mar ñetpa' o' taya çhapanet pueyoçhro atto þapa' e'ñe cohuen pocte' es peþa'yen.

⁵ Allempoña napa' cohuerrianserr nenterrñañerr Yompor pa'paquell ñeñt pue'ntaño'tsen. Ñeñña pocoll popellrrarpa' e'ñe cohuen atoraret. O'ponoñapa' allo'tsen all año'tenet mapuettall ñeñt allo aquellcaret Yompor po'ñoñ ñeñt atet anaret ama't ahuatoñ.

⁶ O'ponoña Yompor pa'pacloþpa' cha'nmaçherrerr ñeñt cançherrsheña mellañoñeñnesha'. Puesheña'ttset orrtaterretcha' ñeñtcha' amue-roçhtatañterrtsa e'ñe po'poñe'tsocma cançherrsheño'maret. Añ chorra'yenet ñeñt atarr nanac cohuen ñeñt otenet lino ñeñt ama asosyatño ama't e'ñe mamesha. E'ñe cohuen poptama'tyena. Achanaretareret, po'chanaretpa' orotommuenare' ñeñt allo chana'yenet puesomapo.

⁷ Allempoña añ ñeñt pa'tatso'mar berrma't, paterrñaapa' apa'yesan mellañoñeñnesha' cançherrsheño'mar pajo'. Apa'yesanet puesheña'ttset po'pajo' ñeñt orotaten. Ñeñña pajo'pa' all e'chorrayesaret alloch coñchatterran Yompor pa'namen acheñenesha' ñeñt añe patsro'tsen, ñeñtara Yompor ñeñt ama arromñañeshayaye ama't errponaña ama't ahuata.

⁸ Allña Yompor pa'paclo e'ñe chorren amos. Ñeñña amospa' añepa't ottetsa Yompor po'cohuenña ñaña po'partsoña. Allñaapa' ama't puesheñarrapa' ama muenateñeto o'ch be'toset all Yompor pa'paclo tarrempohuach esempoch orrtatan ñeñt cançherrsheña mellañoñeñnesha' mueroçhteñets. Allempochña be'tosçherret all Yompor pa'paclo.

16

Allempo Juanpa' enterranerr cançherrsheña mellañoñeñ ñeñt echene' po'pajotollesha' all na'yenet ñeñtcha' amue-roçhtatañterrtsa pa'namenot

¹ Allempoña napa' alla ne'muerrerr ñoñets ñeñt e'morrtetsa huomenc Yompor pa'paclo. Ñeñña ñoñetspa' atet otenan mellañoñeñnesha' ñeñt cançherrsheña, atet otenanet:

—Te'pa' o'ch sahuanna allcha' seyo'panat errañaren patso ñeñt sena'yen sepajotollesho ñeñt cançhro'mar attoch sorratoñ Yompor po'yoroçhenña.

² Allempoña puesheñarr ñanom mellañoñeñpa' o'cho' ahuo'. Allñaapa' yo'posan ñeñt po'pajotollo'tsen patso. Allempo çhap patsopa' ñeñtñaapa' orrtatan puetsarñats ñeñt ama amapoçhatatañe ñeñtpa' ama eñalle pa'par alloch partet attoch metuerranet. Ñeñtpa' añ a'ptsarsat ñeñt

ayato'ma'tarefetyetsa ma'yarrma't pueyotsaparo ñaña ñeñt ma'yochenaya ayečcatareť ñeñt toma'ntatenet ma'yarrma't.

³ Allempoña po'psheñeñ ñeñt puepañ mellañoťeñpa' o'čho' ahuererr o'ch yo'puenana' oño ñeñt po'pajotollo'tsen. Allempo yo'pos oño all atarr sa'po, oñña'pa' čha errassastach, e'ñe atet orrta ñerra'mrrate' arromñať po'rras. Ñeñtña'pa' e'ñe a'cllatuosan allohuen ñeñt allpon yečheta all oño'mar.

⁴ Allempoña ñeñt puema'pañ mellañoťeñpa' o' ahuererr ñaña o'ch yo'puenana' ontapo ñeñt po'pajotollo'tsen ñaña allot potayen oñ. Ñeñtña allempo ayopareťta oño čha a'pnasatosan oñ errasats.

⁵ Allempoña napa' ne'muen ñeñt atet otenan mellañoťeñ Yompor. Ñehua, ñeñtña mellañoťeñpa' atarr ahuamencat attoch pomnaren penan ora allohuen oñečno. Ñeñtña mellañoťeñpa' atet otenan Yompor:

—E'ñe pocte' Nompore ñeñt atet pecoñchatyenamet, pa ñeñteř chocma eñalleř ama't ahuaťoťeñpa' ñeñteř atarr nanac Partsoř.

⁶ Tarro'mar acheñenesha' ñeñt pe'moñe'tene'pa' chocma muetsanatenapet ñeñt peyochresha' pepen ñaña ñeñt a'mta'yene' peñoñ, chocma shatyeññañet po'rras. Te'ña pa'pa' o' pñonerranet errasats. Ñeñt'pa' e'ñe pocte' tarro'mar ñetpa' añ o' pñohuet ñeñt ama pocteye' penteno pa.

⁷ Allempoña e'morrterrerr ñoñets arr e'morrta altarot, ñeñtña'pa' atet oten:

—Attesha' Yompore, pa ñeñteř atarr nanac Partsoř ñeñteř Yepartseshar yepen. Ñeñt atto pentyenanet ñeñt'pa' e'ñe po'ñočh atet, e'ñe pocte' ñeñt atet o' pecoñchatteranet.

⁸ Allempoña po'psheñeñ mellañoťeñ ñeñt puepa'tatseñ o' yo'puerranerr ñeñt po'pajotollo'tsen. E'ñe arr yo'pue' allo'tsen ñeñt yečhoyo'tam'pene'. Ñeñt'cha' ahuamencat pe' atsne' attoch chemuerran acheñenesha' atet ñerra'm tso'.

⁹ Acheñenesha' ama't atarr etomuenanetañña atsne'pa' tarraña ama es quečhpuenayeña ñeñt atet correnet sosya'tsañečno. Ama eseshaye' cotape'cherraye cohuen Yomporecop attoch cohuentateññañet Yompor. Elloña ñetña'pa' atarr nanac achmare'teññañet Yompor pa'so'cheñ ama't ñeñt atarr ahuamencattetsa atto čhapatamet ñeñt'cha' mueročhtaterrahuet.

¹⁰ Allempoña po'psheñeñ mellañoťeñ ñeñt pa'mnareñ, ñapa'čho'ña o' yo'puerranerr ñeñt po'pajotollo'tsen. E'ñe arr yo'pue' ma'yarrma't po'conaño all am'cha'tareťtena. Ñeñtña all am'cha'tareťtenapa' čha a'čecmetue. Acheñenesha'ña allpa' epaye' mueročhtatanet pa'namen atserrpeñets. Ñeñt atserrpeñetspa' čha muellatstame'tatyesamet, ačhañe'chatyesamet atserr.

¹¹ Tarraña ñetpa' ama't atet o' a'pareťtetañpa' ama quečhpuenetoña ñeñt atet p'atse'tyenet sosya'tsañečno. Elloña ñetpa' allo'na achmare'tneñet Yompor ñeñt ento'tsen ñeñt atto atserrpenamet puetsarñats.

¹² Allempoña ñeñt po'pechapueñ mellañoťeñ, ñapa'čho'ña o' yo'puerranerr ñeñt po'pajotollo'tsen. Arr yo'pue' po'ñeso ñeñt añecmuen atarres ñeñt po'ñes añ pa'so'cheñ Eufrates. Yo'pose'pa' čha emasa'huosanña po'ñes ama't atarr añecmuen. Ñeñtña allot masohuapa' ñeñta toñeterrets ñeñta pa'teř perret allcha' oñem am'cha'tareťečno ñeñt'cha' huačha'ttsa allot huena atsne'.

¹³ Allempoña napa' nenterrerr añañ epuet ma'yarrma't epuet ñaña ñeñt a'mtene' ma'yarrma't po'ñoñ añe patsro tarraña ñeñt'pa' ashcaña. Ñetña e'ñe puenamotetpa' čha'nmatyeset puesheña'tets oneñeť ñeñt ama mapocho.

Ñeñt oneñetpa' ma'psheña. Ñetñapa' e'ñe atet orretyenet ñerra'mrrate' rre-huancrro.

¹⁴⁻¹⁶ Tarraña ñeñtpa' oneñetca'ye ñeñtcha' orrtaterre' ñeñt ama puentare allohuen acheñenesha' ñeñtcha' cohuanrrortaterrahuet. Ñetpa' o'ch chopeñe'chyerret erracmañen attoch apcheret allohuen ñeñt añcha'taretetyetsa añe patsro. Allochñapa' attoch quellareret Yompor ñeñt atarr ahuamencat, attoch quellaret allempoch cherr ponañcho ñeñte yetroch yoroçhtater Yompor. Allohuen añcha'taretnesha' ñeñtcha' quellarerre' Yompor, arrcha' apchataretterret anets ñeñt pa'so'cheñ Armagedón, allotcha' quellareret Yompor. Añ Armagedónpa' ñeñtpa' hebreonesha' sochene' añ ñeñt anetser. Ñehua, o'ch neyerpatasa ñeñt atet ote't Yepartseshar Jesús, ñapa' atet ote't: "Señoche'ch napa' e'ñech machayota nohuerra atet ñerra'mrrate' eñet amach esesha' eñotenaye esempoch huapa. Tarraña atarr cosheñtso'tsa'yen ñeñt chocma neñose'rtenaya ñeñto'marña ñetpa' e'ñe cohuen añño'tenet pa'shtam ñeñtcha' chorra'nmuet allochñapa' amach muelle'mco'ta cha'nmuet amach cha apencoçhterreto."

¹⁷ Allempoña po'psheñeñ mellaño'teñ ñeñt pocançhroñ, ñapa'cho'ña o' yo'puerranerr ñeñt po'pajotollo'tsen. E'ñe arr yo'pue' morresho. Allempocma e'morrta ñoñets ñeñt huetsa Yompor po'conaño' ñeñt pa'paclo'tsen all pue'ntaño. Ñeñtña ñoñetspa' atarr huomenc e'morrtena, ñeñtpa' atet oten:

—Te'ña po'ñoçhpa' o' etsotuerra, huañerrcha' ñeñt ahua'toteñ.

¹⁸ Allempoñapa' meramerta o' tatsllares, e'morrta ñaña ñeñt ma'moretets, atarr huomenc e'morrtena. Puetalle'cha ñaña pats nanac huomenc ñeñt ama't ahua'tapa' ama atet pueparo allempoteñ e'ñe pa'motroteñ eñalleta acheñenesha' arr patsro.

¹⁹ Añ ñeñt atarr anets ñeñt atma'ntataret anets Babiloniapa' ñeñtña anetserpa' o' rrara'pes ma'psheñta. Ama't ora allpon pa'namen anetsoçhno añe patsro all shonta'yena pa'namen acheñenesha', ñetpa'cho'ña e'ñe ñegatañpesuahuet. Yomporpa' añcha' yerpaterranet ñeñt allohuen allpon p'atse'tyenet ñeñt atarr sosya'tsañ all atarr anetso ñeñt atma'ntataret Babilonia. Ñeñt allpon allohuen allo'tsa'yenet e'ñe coñchatuerranet Yompor, o' e'ñe tsa'tatuerranet po'yoroçhenño.

²⁰ Allempoña ama't ñeñt rroçhpe'chañeçhno ñaña aspenteçhno o' e'ñe chenca'huerra.

²¹ Shora'nom ñaña ento't hue' ñeñt atarr añecmuesheñ ateshamerr. Pate'tetspa' eñerrtena cuarenta kilo. Ñeñtña e'ñe a'tpetse'tuose' allohuen acheñenesha'. Allempoña ñetpa' atarr achm'are'teñet Yompor tarro'mar o' coñchaterranet atarr huomenc.

17

Attoch a'coñchatare'terra coyanesha' ecañoresha' ñeñt toma'ntenaya anets Babilonia all ama esesha' yerpapenayo Yompor

¹ Allempoña mellaño'teñ ñeñt cançherrsheña ñeñt echyene' po'pajotollesha', puesheñarrñapa' o' huapa. Huapa neshopa' otosen:

—Te'pa' o'ch p'octa'n o'ch negatenpa' allcha' a'coñchatare'ta añ coyanesha' ñeñt atarr ecañoresha' ñeñt ame'ñatenaya pa'namen añcha'taretnesha' ñeñt pa'namen anetso'tsa'yen e'ñe allohuanen çhen oñeçhno añe patsro. Ñapa' po'conañ penan oñeçhno all anen.

² Ñeñt añcha'taretetyetsa añe patsropa' pame'ñeño'tet ñetpa' e'ñe po'cañoreshacma peñet ñeñt coyanesha'. Allohuen ñeñt añe patsro'tsen

acheñenesha' e'ñe a'posa'tuenanet tarro'mar ñeñt' atto cañoresha'tenanet ñeñtpa' chochña a'posa'tenanet attoch e'ñe cohuen ame'ñeñet.

³ Allempoña ñeñt' mellañoñeñpa' arr anmuen amaraño, e'ñe Yompor puecamquëñot' anmuenet. Allña'pa' nentos puesheñarr coyanesha' ñeñt' anets berrma't pa'che'ño. Ñeñt' berrma'tpa' atarr añcha'nochen, atarr tsañnanen. Poñpa' cancherrmaga, po'ucorñapa' charra'. Ora pue'mocro'marpa' e'ñe aquellca'huaret' allemeñ. Ñeñt'ña quellecpa' allo sochatse'teñet Yompor.

⁴ Ñeñt'ña coyanesha'pa' añ chorrena yetsñorromamuen epuet tsamamuen. Ñaña allo añño'tena ñeñtpa' atet' ñerra'm orollmemen ñeñt' atarr cohuen, ñaña mapyellmetollesha' ñeñt' nanac poptallme'chyetsa ñeñt' nanac tsa'te' ñaña po'ser ñeñt' atarr cohuen orrtatene' ña. Potot' orrenan po'pajo' orotaten. Ñeñt' pajo'pa' e'ñe e'chorrenan pa'namen sosya'tsañechno ñeñt' atarr yetsena'ten ñeñt' atto nanac cañoresha'ten.

⁵ Pueto'mpa' aquellcato'ma'taret'. Añ so'chñets ñeñt' quellquënet allpa' ñeñtpa' attoch eñotatanet ñeñt' ama e'ñeye' eñotpahuo, ñeñtpa' atet' oten: "Añpa' ñeñt' toma'ntenaya anets Babilonia ñeñt' nanac atarr anets ñeñt'ara pachor pen ñaña allohuen ñeñt' atarr ecañoreshañ ñaña pa'namen sosya'tsañechno ñeñt' atarr yetsena'tyen arr patsro."

⁶ Allempoña ñeñt' coyanesha'pa' neñoch atarr posa'ten. Ñaña'pa' añ posa'tena errasats ñeñt' po'rras ñeñt' muetsanatete't' ñeñt' pueyochresha' pen Parets tarro'mar ñapa' atarr cohuen entenan o'ch muetsachet ñeñt' serrpare'tene' atto ame'ñeñet Jesús. Allempo neñch ñaña'pa' atta necuana'ch ñeñt' coyanesha'.

⁷ Naña allempo mellañoñeñpa' o' alla oterren:

—¿Eso'mare'tña atta pecuana'teñ? Te'pa' o'ch neñotatañ ñeñt' toma'ntena añ coyanesha' ñaña ñeñt' toma'ntena añ berrma't ñeñt' allo anen ñeñt' cancherrmaga poñ, po'ucorñapa' charra'.

⁸ Añ berrma't ñeñt' penten, ñeñtpa' añ toma'ntena ñeñt' corratse't' ahuañmo'cha te'pa' ama eñalle o' rroma. Tarraña o' mameshamerra o'ch alla tanterra o'ch cha'nerr arrotot'. Tarraña ñeñtpa' mamecpach atet' perra, ellochña o'ch alla rromuerrerr. Allempochña o'ch chenca e'ñe poctacma. Acheñenesha' ñeñt' ye'cha'yetsa añe patsro ñeñt' ama ame'ñetso ñetñapa' atarrcha' cohuanrrorteret' añ berrma't tarro'mar ama puentareto ñeñt' atet' pena añ berrma't. Ama't ñeñt' corratse't' arr patsro, tarraña ahuañmo'chapa' o' rroma. Ama't o' rromhuañ tarraña o' alla orrterrerr. Ñeñto'marña acheñenesha'pa' atarr cohuanrrortet'et. Ñehua, ñeñt' cohuanrrortene'pa' ama aquellcareteyaye pa'so'cheñ Yompor po'libro all aquellcarettena pa'so'chñechno ñeñt' pueyochresha' pen Yompor; ñetñapa' corretsetach errronañohuen. Ñeñt' ama ame'ñetso ama aquellcareteyayeto pa'so'cheñ ahuañmo'cha te'pa' o' rroma. Ama't o' rroma'ña' tarraña ñeñt'ara

⁹ Te' ñeñt'cha' neñotatañpa' o'ch poctape'ch e'ñe cohuen esheccha' peñot ñeñt' atet' toma'ntena añ berrma't poñechno. Ñeñt' penten cancherrmaga poñ, ñeñtpa' añ toma'ntena cancherrpena aspenet' all ye'chena añ coyanesha'.

¹⁰ Toma'ntenana ñaña cancherrsheña ñeñt' añcha'tarettetsa añe patsro. Tarraña amnarsheñapa' o'huañ añcha'taretteta. Te'pa' o' puesheñarraña añcha'tarettetsa. Tarraña puesheñarrmeñ palltena ama orrtena'. Tarraña esempoch orrtapa' amach atarr atomat' añcha'taretteta.

¹¹ Ñaña añ berrma't ñeñt' toma'ntenaya puesheñarr añcha'taret' ñeñt' corratse't' ahuañmo'cha te'pa' o' rroma. Ama't o' rroma'ña' tarraña ñeñt'ara

o'ch alla orrterra o'ch alla amcha'taretterrerr ñeñtcha' posocsheñterre' ñeñt cancherrsheña amcha'taret ñeñt o' colla'hua. Tarraña ñapa'cho'ña chocmach rromuerrerr allempoch chenca e'ñe poctacma. Ñehua, ñapa' ñeñtara ñeñt amcha'tarettatse't ñaña ahuañmo'cha allempo cancherrsheñtete't.

12 'Ñaña añ berrma't ñeñt charra' po'ucor ñeñt penten, ñeñtpa' añ toma'ntena charrasheña amcha'taretnesha', tarraña ñetpa' ama amcha'taretteneta' tarro'mar ama orrteneta'. Tarraña esempoch orrterret allempochña amcha'tarettapreteret berrma't e'ñe mame'.

13 Ñetpa' e'ñech patrpa cotape'chenet ñeñt atet cotape'chen berrma't, o'ch neñet berrma't ñeñtcha' pa'mcha'tareter perret. Ñeñtpa' atto yempueñet attoch ahuañmo'cha peñet berrma't.

14 Ñetña' pue'moñe'teñoñet Cristo ñeñt toma'ntenaya Carrnero quellareretcha'. Tarraña Cristo ñeñt toma'ntenaya Carrnero ñach a'mchechuerrahuet tarro'mar ñapa' atarr ahuañmo'cha. Ama't ora allpon ñeñt ayochreshatetyetsa, Cristoñapa' e'ñe Pa'yochreshater pohueñet allohuenet, ñaña ama't ora allpon ñeñt amcha'taretetyetsa, ñetpa'cho'ña e'ñe Pa'mcha'tareter pohueñet allohuenet. Ñaña ñeñt epuet parro yemtena, ñetpa' Yompor acerrahuet ñeñt chore'ten ña ñeñt atarr yemtenaya ña.

15 Allempoña añ mellañoñeñ alla oterrerr, ñeñtpa' atet oten:

—Ñaña añ oñechno ñeñt penten ñeñt allo anen coyanesha' ñeñt atarr ecañoreshat, ñeñtpa' añ toma'ntena shonte' pa'namen acheñenesha' ñaña pa'namen anetsochno all ye'cha'yenet ñaña po'poñe'ttsocma ñoñets ñeñt allo eñosyenet.

16 Ñaña añ berrma't ñeñt penten charra' po'ucor ñeñt toma'ntenaya charrasheña amcha'taretnesha', ñetña' tsena'chetcha' ñeñt coyanesha', a'ypo'ñeretcha' e'ñe muelle'mcot. E'nuerrñañetcha' e'ñe ña po'chets allempochña chamueret tso.

17 Yomporpa' ña nene' allohuen amcha'taretnesha' pueyo'chreto attoch ñetpa' e'ñech patrpa cotape'chenet ñeñt atet cotape'chen berrma't, attoch yempueñet esheccha' ahuañmo'cha peñet berrma't. Allochña' attoch etsotatetñañet Yompor po'ñoñ ñeñt atet oten.

18 Ñaña añ coyanesha' ñeñt penten ñapa' añ toma'ntena ñeñt atarr nanac anets ñeñt pomnaren pene' allohuen ñeñt amcha'taretetyetsa allemeñ anetso'mar ñeñt añe patsro.

18

Atto allohuen e'cllayoretenesha'pa'ya'na'teretcha' ñeñt anetser Babilonia o' ahuañmo'chataretterra

1 Allempoña o' alla nenterrerr po'psheñeñ mellañoñeñ ñeñt sohua'netsa ento't, ñeñtña' atarr ahuañmo'cha. O' e'ñe chap patsopa' a'puetarsam'psosan pats e'ñe ña po'popteño't.

2 Ñaña' rranosa huomenc, ñeñtpa' atet otos:

—Te'ña' o' a'ypo'ñare'tterra añ anetser ñeñt atma'ntaret Babilonia ñeñt atarr añecmuen anets. Te'pa' añecpach sherberr allcha' shonterra pa'namen oneñe'chno ñeñt atarr apo'chenare' ñaña allcha' shonterra pa'namen o'chno ñeñt atarr yetsena'tyen.

3 Tarro'mar añ coyanesha' ñeñt toma'ntenaya anets Babilonia, ñapa' ahuañmo'cha e'ñe po'cañoreshacma pete't allohuenet ñeñt amcha'taretetyetsa añe patsro. Allohuen ñeñt añe patsro'tsen acheñenesha' e'ñe a'posa'tuanete't

tarro'mar ñeñt atto cañoresha'tanete't ñeñtpa' choch a'posa'tanete't. Ñaña allohuen ñeñt allpon pomatsre'tyestse't, ñaña atarr eçllayorettatahuetet tarro'mar ñapa' shonte' esocmañen muenatse'tyese't.

⁴ Allempoña o' alla ne'muerrerr po'poñ ñoñets ñeñt e'morrtetsa ento't, ñeñtpa' atet oten:

—Ñeñtes neyochresha' nepen, te'pa' o'ch sesa'nemñ añ anets ñeñt atma'ntataret coyanesha'. Amach socshapretatsche ña po'chñar te't sa'na mueroçhtapretenaya.

⁵ Tarro'mar ña po'chñarpa' allo'na sen atonetnomtsa nanac. Yomporpa' e'ñe eñoteññañ po'chñar ñeñt allpon pa'yese't.

⁶ Te'pa' atsa'tataretterrepa'ch allpon ñeñt atto erro't pa'yesane't po'potantañ. Ñehua, ama't epoche'tats atsa'tataretterrepa'ch allpon ñeñt atto es pãtse'tyese't. Ñeñt atto allpon llecatyesane't po'potantañ, ñapa' epoche'tatsepa'ch atsa'tataretterra llequëñtso.

⁷ Ñeñt allpon coshatse'tyese't, te'ñapa' ñeñtepa'chña allpon llecaterrayerr. Ñeñt allpon echyese't, te'ñapa' ñeñtepa'chña allpon mueroçhtaterre'. Tarro'mar ña ahuañmo'chpa' pommo'cheño't atet ote't pueyoçhro: “Napa' atto nanen na neconaño'pa' atarr na'mcha'tare'ttena. Napa' ama añeyayno ñeñt rretorrnanesha'. Na ama't ahua'tapa' amach nellquërro tarro'mar amach es nemueroçhtaterraye.”

⁸ Tarraña ama't atet ommo'chenañpa' mamerrerrpa' o'ch çhapoña ñeñtcha' mueroçhtaterre' pa'namen mueroçhteñets — rromueñets, llequëñets ñaña muecheñets. Ñapa' a'poyataturetcha' tso. Tarro'mar Yompor ñeñt Yepart-seshar yepen ñapa' ñeñt atarr Parets ñachña coñchaterre'.

⁹ Ñeñt añcha'tareteçhno ora erraþaren añe patsro, ñetña e'ñe puellquëño'tetpa' ya'na'teretcha' ñerra'm esempo enterrñañet pamosoñ ñeñt atto poyen. Ñeñtara añcha'taretnesha' ñeñt e'ñe po'cañoreshacma pe't ahuañmo'cha ñeñt parroçma epuet atarr coshete't.

¹⁰ Ñetpa' pueyorño'tetpa' cohuanrrorteretcha' a'yo't tarro'mar atarrcha' yorenet ñeñt atto o' a'coñchataretterra. Ñet puellquëño'tetpa' atetcha' otet:

—Atarr llequëñets-bee, ama't ñeñt atarr añecmuen anetser ñeñt atarr ahua-mencat, machayota o' çherrñaña ñeñtcha' coñchaterre'.

¹¹ Ñaña allpon ñeñt pomatsre'tyetsa erraþaren añe patsro, ñetpa'çho'ña e'ñe puellquëño'tet ya'na'teñet, tarro'mar te'pa' ama eñalle ñeñtcha' rañta'yeshuet ñeñt pomyenet.

¹² Tarro'mar ñet ñeñt po'checom penetpa' shonte' esocmañen pa'namen — oro, ñaña asreçhno ñaña mapyetollesha' ñeñt poptame'te' nanac tsa'te', ñaña serets ñeñt otenet perla, ñaña shetamtsoçhno ñeñt atarr coçhnesharer — yetsñorromamuenare', tsamamuenarer, sedamamuen. Shonte' ñaña pa'namen tsacheçhno ñeñt atarr eñmosateçhno, ñaña marfil ñeñt elefantas ñeñt allot yeçhcatyenet pa'namen, ñaña pa'namen ñeñt yeçhcatyenet tsa-cho't ñeñt atarr nanac tsa'te', ñaña ñeñt yeçhcatyenet bronso't ñaña hierro't ñaña mapyo't ñeñt otenet mármol.

¹³ Ñaña ñeñt pa'namen po'checom penet atet ñerra'm ñeñt otenet canela ñaña pa'namen aspanatollesha' ñeñt eñmosafare' ñaña tsachese' ñeñtpa'çho'ña eñmosafare' ñerra'm esempo a'crrateñet e'ñe atet ñerra'm ñeñt otenet mirra ñaña incienso. Allo'tpa' po'poñeçhno cheçmañatsoçhno ñeñtpa' añ vinos, olive'se', harina ñeñt atarr cohuen ñaña trigo. Ñaña po'poñeçhno ñeñt pomyenet ñeñtpa' añ huacsheçhno, carrneroçhno,

cahuallečno ñaña carrotollesha' ñeñt matatyen cahuallečno. Ñaña allpa' ama't acheñ pomueñet ñeñtcha' taruasatenet e'ñe atta. Ñeñt acheñerpa' allña pomueññañet pocreña ñeñt atto correna arr patsro.

¹⁴ Ñeñt pomatsre'tyetsa allpa' ñetñapa' serrpare'tenet, cha ottenet ñerra'mrrate' cho es oteñet ñeñt anetser; ñeñt'pa' atet oteñet:

—Ñeñt allpon atarr ðayoma'yese't atet ñerra'm puetsarr ñeñt atarr ayoma'po' te'ñapa' ama eñalle o' huañerr. Ñaña ñeñt allpon nanac cohuen pentyese't ñeñt nanac cochnesha'tatse't, te'pa' o' chenca'huerra. Te'ñapa' ama't ahuatapa' amach alla pentere'te. Arrpa' allohua ñeñt atet oteñet ñeñt anetser.

¹⁵ Ñeñt allpon pomyenet allpa' ñetñapa' epaye' ganatanet nanac aton quelle. Tarraña ñet te'pa' po'yorñotet attach tomcha'tet a'yo't allotcha' cohuerret ñeñt atet o' a'coñchatare'terra. Ñetñapa' epaye' ya'na'teñet e'ñe puellquëño'tetpa'

¹⁶ atet otenet:

—Llequëñtsa-bee añ atarr anets tarro'mar ñapa' o' atet perrate' ñeñt atarr añecmuen anetser ñeñt atet ñerra'mrrate' puesheñarr coyanesha' ñeñt nanac cohuen añño'tetsa. Añcha' chorrena ñeñt atarr cochnesha' yetsñorromamuen epuet ñaña tsamamuen ñaña ñapa' nenan oro, ñaña mapyetolleshma't ñeñt atarr cochnesha' poptallme'chyetsa ñaña nenan cochnesha' seretsočno.

¹⁷ Te'ñapa' e'ñe mamecmapa' o' e'ñe huañerr ñeñt atto atarr nanac esocmañen echyese't. Arrpa' allohua ñeñt atet ot ñeñt pomatsre'tetsa all.

Allempoña allohuen ñeñt po'taruas pene' bote ñeñt anmatsetene' checmañats all ñeñt anetsro, ñetpa'cho'ña o' alla tomcha'tet a'yo't — atet ñerra'm ñeñt pamo'mte' pen bote ñaña ñeñt achopeñañesha' ñaña marineronesha' ñeñt taruasets all boto.

¹⁸ Ñetpa'cho'ña allohuenet all tomchenetpa' rrannartenet allempo enterrñañet pamosoñ ñeñt atto poyen ñeñt anetser. E'ñe puellquëño'tetpa' atet otenet:

—Ama eñalle po'poñ anetser ñeñt atarr cohuen atet ñerra'm añ anetser.

¹⁹ Allñapa' atarr yahuanrrortenet. Puellquëño'tetpa' pampato'tyeset patso. Rrannaretyesetpa' atet otyeset:

—Llequëñtsa-bee añ atarr anetser tarro'mar allohueney ñeñtey echyene' yebote ñeñt chocma yanene' oñopa' shonte' quelle ganatye't tarro'mar ñeñt anetserpa' shonte' echane't quelle nanac aton. Tarraña ama't atet pe'tpa' te'ñapa' e'ñe mamecmapa' o' e'ñe huañerr.

Atarrcha' cosheñtso'tsa'yen allohuen ñeñt pueyochresha' pen Parets

²⁰ Te'ña sapa' socshepa'ch ñeñtes pue'ntaño'tsenes ñaña allohuen ñeñtes pueyochresha' pen Parets ñaña allohuenes ñeñtes allsensaretes Yomporecop ñaña allohuenes ñeñtes a'mtene' Yompor po'ñoñ tarro'mar ñeñt atto Yompor o' coñchatteran ñeñt anetser; ñeñt'pa' attoña o' chemnaterrsa sa.

²¹ Allempoña mellaño'teñ ñeñt atarr ahua menca'tpa' ñañapa' chetan mapue' ñeñt atarr añecmuenmen atet ñerra'mrrate' ñeñt allocma es puets'tenet ñeñtñapa' huapore'ch sa'po cha chencostsa poctacma. Allempoña ñeñt mellaño'teñpa' atet ot:

—Attecmach ahua pore'tare'terra añ atarr anetser ñeñtara ñeñt atma'ntatare't Babilonia. Amach orrterre'te ama't ahuata.

²² Te'ña allpa' amach es e'morrterrtse'te ñeñt atto toquënet arpa ñaña atto penclla'tenet ñaña ñeñt atto poctorare'tyenet po'poctoro. Ñaña ñeñt po'taruas ðaye't ñeñt es ye'chcatyesaye't pa'namen esocmañen all, te'ña ama't

ahuata amach orrterre'te. Ñaña atto e'morrte't allempo es puetse'tete't allpa'te'ñapa' amach alla e'morrterre'te. E'ñe muetsoñeñtuerra.

²³ Ñaña ñeñt allo choyo'tam̄psete't, te'ñapa' amach alla choyo'tam̄perranete'te. Ñaña ñeñt coshame'tam̄psaye't ñeñt sena'tetsa ñaña coyanesha', te'ñapa' amach alla e'morrterre'te pocshañña. Ñaña allpon ñeñt pomatsre'tyesatse't all ñeñt atarr anetsro, ñetpa' atarr asherben entete't. Ora errañaren añe patsropa' ama eñalle ñeñt atet sherbets. Ama't atarr asherben entyesetañe't tarraña chocma shecare'tyesete't allohuen pa'namen acheñenesha' ora errañaren añ patsro. E'ñe atet es ame'ñatena amase'ñetpa' e'ñe attecma shecare'tenanet ñeñt anetsr.

²⁴ Ñaña all anetsro, ñeñtpa' all amtsanatarete't ñeñt a'mitaye't Yompor po'ñoñ ñaña allohuen ñeñt pueyochresha' pen Parets. Allña ashatarettete't po'rras ñaña ama't allohuen ñeñt amtsanatarettatse't ora errañaren añe patsro, ñeñtara anetsrot allotña amtsanatarettete't.

19

¹ Allempoña o' alla ne'muerrerr ñeñt e'morrterre'te huomenc ento, shonte' acheñenesha' e'ñe parrocma rrannartenet, ñeñtñapa' atet otenet:

¡Aleluya! Aye'chochtatpo'ch Yompor tarro'mar ñapa' ña ñapueñ a'queshpatañtetsa, acohuentatpo'ch Yompor ñeñt ñapueñ atarr ahuañcatesha'.

² Ñaña ñeñt pocte' enten Yompor ñeñtpa' e'ñe pocte' attecma, ñaña allpon ñeñt atet oten ña, ñeñtpa' e'ñe po'ñoñ attecma. Tarro'mar ñapa' o' coñchatteran coyanesha' ñeñt atarr ecañoresha'tetsa tarro'mar e'ñe ña po'chñaro'tpa' atarr a'sosyatenan acheñenesha' ora allohuen ñeñt ye'cha'yetsa añe patsro. Te'ña Yomporpa' o' e'ñe tsa'tatuera ñeñt allpon muetsanatañe't ñeñt torra'yestse't ñocop.

³ Po'pocheñoñapa' alla oterreterr:

—¡Aleluya! Aye'chochtatpo'ch Yompor tarro'mar te'pa' Yompor o' amosoñe'chatteran ñeñt atpare'taye't. Attoña o' chepoterr pamosoñ enonet; ñeñtpa' ama't ahuatapa' amach huañerro.

⁴ Allempoña añ epoch charra' ñeñt puechetsa pa'tatssheña ñeñt sherbene' Yompor po'conaño, ñetñapa' concorpa'rrtenet epuet ñaña pa'tats ñeñt berrma'ttetsa. Allohuenet concorpa'rrtenet all Yomporesho. Allohuenetpa' ma'yocheñet Yompor all anen po'conaño. Ñetñapa' atet oteñet:

—Aye'chochtatpaupapa'ch Yompor, atetepa'ch pocop errponohuañen.

⁵ Allempoña all Yompor po'conaño'tpa' allotña e'morrterrerr po'poñ ñoñets, ñeñtpa' atet oten:

Sa'ye'chochtatoñepa'ch Yompor, allohuenes ñeñtes torra'yetsa ñocop, ama't sa ñeñtes atarr sherbets ama't saña ñeñtes ama tama sherbetso. Ama't allohuenes erra'tseneste' ñeñtes atarr añcha'na'tpo' entene' Yomporpa' te'ñapa' sa'ye'chochtatoñepa'chña.

Atto Cristopa' e'ñe cohuen aguërran allohuen ñeñt ame'ñenaya ña ñeñt atma'ntataret atet ñerra'mrrate' ña puetapor penahuet

⁶ Allempoña napa' o' alla ne'muerrerr shonte' acheñenesha' rrannartenet, atarr huomenc e'morrtena atet ñerra'mrrate' all etsase'tena shonte' oñ atarrcha' huomenc ma'moreten. Po'ma'moreteñña' cha ottena ñerra'mrrate' cho'tecor-rraren. Acheñenesha'ña ñeñt rrannartetsapa' ñetñapa' atet otenet:

Aye'chochtatpo'ch Yompor tarro'mar te'pa' o' chap allempoch amcha'taretterra ña e'ñe ñapueñ ñeñtara Yepartseshar ñeñt atarr ahuaamencañesha'.

7 Te'ñapa' yocsherrepach, yocshame'tamperrepach, yecohuentaterrñañepach tarro'mar te'pa' o' chap allempoch yocshame'tamipesya Cristo ñeñt atma'ntataret Carrnero. Te'ñapa' o' chap allempoch sena'ta. Ñaña ñeñt coyanesha' ñeñtcha' puetapor pa', ñaña'pa' o' e'ñe añño'taretta.

8 Ñaña'pa' o' apet ñaña ñeñtcha' chorra ñeñt atarr cohuen huallama't atarr coñnesha' shetamuets ñeñt otenet lino ñeñt ama asosyatño ama't e'ñe mamesha, atterach poptame'tena.

Ñehua, añ shetamuets ñeñt otenet lino ñeñt ama a'sosyatpahuoyaye ama't e'ñe mamesha, ñeñt'pa' añ toma'ntena ñeñt atto e'ñe cohuenare' es pa'yen ñeñt pueyochresha' pen Parets. Ñetñapa' añ toma'ntenet Cristo puetapor penahuet.

9 Allempoña mellañoñeñpa' alla oterrerr:

—Te'pa' o'ch pequellquerrerr añ ñoñets ñeñt noteneñ, ñeñt'pa' atet ot: “Atarr cosheñtso'tsen allohuen ñeñt ahua'ñarettsa o'ch rrallme'chaprechet allcha' coshame'tamipeñet Cristo ñeñt atma'ntataret Carrnero ñeñt sena'tatsa.”

Mellañoñeñpa' alla oterrerr:

—Ora allpon ñeñt atet oteney Yompor arrpa' ñeñt'pa' e'ñe po'ñoñ atet.

10 Nañapa' neconcorposa mellañoñeñ pa'rrpo ñeñt neserrpare'tatene' o'ch nema'yochyañ, tarraña ñapa' atet oten:

—Napa' amach pema'yochatsetno, napa' añana ñeñten petorrapretenaya Yomprecop ñaña allohuen pemo'nasheñnesha'chno ñeñt serrpare'tene' atto ame'ñeñet Jesús. Papa' añcha'ña pema'yocha Yompor ñapueñ.

Tarro'mar allohuen ñeñt a'mtene' Yompor po'ñoñ, e'ñe ña Puecamquëño'tpa' añ serrpare'tenet ñeñt atto yame'ñeña Jesús.

Cristo ñeñt montenaya cahual ñeñt atarr huallañnanen

11 Allempoña po'pocheñopa' alla nenterrerr atoraret enet. Allñapa' allo'tsen cahual ñeñt atarr huallañnanen. Ñeñt montenaya cahualpa' añ socheñet, Ñeñt atarr Ayemuetpotetsa ñaña ñeñt e'ñe Po'ñoñ Yompor Po'ñoñ. Tarro'mar ñapa' erra'tsen pocte' ent o'ch coñchach, ñeñtña ñocoppa' e'ñe pocte'. Ñaña ñerra'm ña quellaratahuet ñeñt'pa'cho'ña e'ñe pocte' ñocop.

12 Pa'clloyotñapa' atarr nanac a'rrechatañ atet ñerra'mrrate' tso' po'huorter. Poñoñapa' shonte' po'choyo'm ñeñt choyo'mtena. Allñapa' anaret ñaña pa'so'cheñ ñeñt'pa' e'ñe ñapt'a eñoteñ.

13 Pa'shtampa' año e'chomaret errasatso. Ñaña añ socheñet Yompor Po'ñoñ.

14 Ñaña ñeñt allpon pa'çllarañneshar pen all pue'ntaño, ñetñapa' coteñet chenta' monta'yesnenet ñamet puecahualloro ñeñt atarr huallañnarren. Ñetpa'cho'ña ñeñt pa'shtam penet atarr huallama'tarer. Ñeñt shetamuetspa' atarr cohuen ñeñt otenet lino ñeñt ama sosyatetso ama't mamesha.

15 Ñeñt anenahuet, e'ñe puenamo't all orrtena cochell ñeñt atarr etsotañtareñ. Ñeñt cochellpa' añecop sherben alloch ame'ñatuerrana ora allpon pa'namen acheñenesha' arr patsro. Allochñapa' po'yorochenño'tpa' o'ch amcha'taretterranet atet ñerra'mrrate' ñapa' a'sreperet o'ch amcha'nochtana'terranet. Ñaña ñach coñchaterrahuet. O'ch netma'ntacha atet ñerra'mrrate' ñach atmama'te' uva esheccha' cha'nom po'ñer. Ñeñt atet

atmama'teñet uvapa' añ toma'ntena atto Yompor ñeñt atarr ahuamencat e'ñe ña po'yorochenñoŕpa' atarrcha' coñchatteran acheñenesha' ñeñt atpare'tetsa.

16 Ñaña pa'shtamo e'ñe pa'tapacoptaro allña'pa' all aquellcareŕ ñoñets ñeñtcha' atet enteñet Cristo, ñeñtpa' atet oten ñoñets: "Allohuen ñeñt amcha'taretečno añmapa' ñeñtña e'ñe Pa'mcha'tareter pohueñet allohuenet. Ñaña allohuen ñeñt ayochreshatečno añmapa' ñeñtña e'ñe Pa'yochreshater pohuenet allohuenet."

17 Allempoña napa' o' alla nenterrerr mellañoŕeñ ñeñt tets all ñeñt yeçhoyo'tampene'. Ñaña'pa' atarr huomenc eñen, çhore'tenan allohuen tse'mačno ñeñt anomcha'tyetsa eno. Ñeñtña'pa' atet otenanet:

—Sehuaçha'ta allohuenes o'ch sapçha arr o'ch serren po'çhets ñeñt atarr aton rratenes Yompor.

18 Attoch serroñ po'chtsočno shonte' acheñenesha' ñeñt amcha'tareteyetsa, ñaña shonte' ñeñt capitanatyets, ñaña shonte' ñeñt atarr ahuamencat entyenet. Serroñ ñaña shonte' cahuallečno po'çhets ñaña añ po'çhets ñeñt montenaya. Ama't shonte' pa'namen acheñenesha' o'ch serroñ po'çhets ama't ñeñt acheñer ñeñt atarr sherbets ñaña ama't ñeñt ama sherbetso, ama't ñeñt e'ñe cohueno'tsen acheñ, ama't ñaña ñeñt ataruasatareŕ e'ñe atta — o'ch e'ñe serruanet po'çhets allohuenet.

19 Allempoña napa' o' alla nenterrerr ma'yarrma't epuet ñaña allohuen amcha'taretečno ora erraŕaren ñeñt añe patsro'tsen epuet ñaña allohuen ñeñt pa'çllarañneshar pen. Ñetpa' añecop apçhenet allochña'pa' o'ch quellareñet ñeñt montenaya puecahuallor ñeñt atarr huallaŕnanen ñaña epuet ora allpon ñeñt pa'çllarañneshar pen ña.

20 Allempoña quellaranna'tet ma'yarrma'tña'pa' çha rremuet epuet ñaña ñeñt a'mtene' e'ñe ña po'ñoñ tarraña ñeñtpa' ashcaña. Añ ñeñt ashcañerpa' e'ñe ma'yarrma't po'huamencot gatenan acheñenesha' ñeñt ama puentareto. Ñeñtpa' alloña shequënan acheñenesha' attoch ame'ñeñet. Ñeñtña acheñenesha'pa' o' e'ñe yato'matuanet ma'yarrma't pueyotsaparo. Ñetña'pa' añ ma'yochenet ayeçhcatareŕ ñeñt toma'ntatenet ma'yarrma't. Allempoña rremuet ma'yarrma't epuet ñaña ñeñt a'mtene' po'ñoñ allempoña'pa' ahua-pore'tarettet epsheño'maret e'ñe betareret all parraren tso' erraŕaren. Ñeñt tso'pa' atarr shemasher huorten.

21 Po'potantañečnoña ñeñt epuet quellarañ ma'yarrma't ñetpa'çho'ña o' e'ñe amtsanatareŕtetuet. Año amtsanatareŕtet cochllo ñeñt puenamo'tsen ñeñt montenaya puecahuallor ñeñt atarr huallaŕnanen. Allempoña ñeñt allohuen tse'mačno epaye' ochare'ch po'çhets allempo rret añ po'çhets ñeñt o' e'ñe amtsanatareŕtetua.

20

Attoch çherr allempoch mellaŕpoterra

1 Allempoña o' alla nenterrerr po'psheñeñ mellañoŕeñ ñeñt sohua'netsa entoŕ. Ñaña pototpa' añ orren llave alloch toramŕpsan arroroŕ ñeñt atarr o'pononet arroroŕttena pats. Pototña'pa' orrenan ñaña cadena ñeñt atarr añeçmuen cadena.

2 Ñeñtña mellañoŕeñpa' rremosan añyañ. Añyañpa' ñeñtara shecheŕ ñeñt ahuatoteñ ñeñtara yoten oneñeñ ñaña ñeñt otenet Satanás. Atto rremue'pa' allempoña'pa' huanquë'. Ñeñt atto ehuancaŕettapa' e'ñech errponañohuen char ñeñt otenet mil char, atterach ehuancaŕettena.

³ Allempo huanca'huepa' o' huapore'ch o'pono arrorofo. Allña yottam̄pes o' noñ alloch e'ñe echarr p̄am̄pes. Allochñapa' amach alla shecare'terranerro allohuen pa'namen acheñenesha' arr patsro. Ñehua, ñerra'm o'ch chap mil charpa' allempoñapa' o'ch alla a'rroyeret. Tarraña ñerra'm o'ch alla a'rroyeretpa' ñeñtpa' mamecpach a'rroyare'tterra.

⁴ Allempoña o' alla nenterrerr ñeñt anorrcha'tyets po'conaño'mar. Ñetñapa' allsensarettet attoch ñetpa' o'ch am̄cha'taretetyenet. Ñaña napa' o' e'ñe nentuerrñañ puecamquëñechno allohuen ñeñt apecha'tanatarettatset e'ñe pueserrpare'teñoñet Yepartseshar Jesús ñeñt atto a'potoñete't Yompor po'ñoñ. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetpa' ama ma'yochyete'te ma'yarrma't ama't ayeçhcataret ñeñt toma'ntenaya ña ama esesha' ma'yochaye'te. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetña allpa' corretseta all am̄cha'tarettapreteñet Cristo shonte' char allpon ñeñt otenet mil char.

⁵ Ñetñapa' ñanmuetcha' atantatare'tterret. Tarraña po'potantañechno arromñañnesha' ñetña allpa' ama allo'tseneto tarro'mar ñetpa' ama atantatare'teyayeto tarremphuach allempoch çherr mil char.

⁶ Atarr cosheñtso'tsen allohuen ñeñt e'ñe pueyochresha' pen Parets tarro'mar ñetpa' ñanmuetcha' atantatare'tterret. Tarro'mar ñetpa' amach alla rromuerrete'te po'pocheño ñeñtcha' atet rromuerr po'potantañ ñeñtcha' chenquërrtsa e'ñe poctacma. Tarro'mar ñeñtcha' tanterrtsa ñanompa' ñetpa' amach erroteno't o'pataneto po'pocheño rromueñets ñeñtara chenquëñets. Ñetpa' añcha'ña sherbenet Yompor epuet Puechemer Cristo. Ñetpa' Yompor po'corneshar penahuet, am̄cha'tare'ttapreteretcha' nanac aton shonte' char ñeñt mil char.

Atto Juanpa' entan oneñe't o' ahupore'taretta all parraren tso' errañaren

⁷ Allempoch metua añ mil charpa' allempochña a'rroyeret oneñe't all ayottam̄psare'ttena mil charohua.

⁸ Ñañaapa' o'ch auyes ora errañaren pa'namen anetso'mar arr patsro allcha' shecare'tyerran pa'namen acheñenesha'. O'ch shecare'terran Gog ñaña Magog attoch a'yapaçhaterranet o'ch quellaraterranet. Ñeñt atet yenteññañ ontap po'mñer atetcha' shonterran ñaña pa'namen acheñenesha' arr patsro, ñeñt ama e'ñotuapahuoyaye.

⁹ Atet nentanet ñetpa' ahuanmuet mopñarero'mar o'ch parratset'er rapañaren allcha' orretyeset. Ñetpa' arrentach ahuanenet Yompor pa'netsronet ñeñt atarr morrentena tarro'mar allpa' allo'tsa'yen ñeñt pueyochresha' pen ña. O' e'ñe arrotam̄pesuosyet attoch rremanatoñet Yompor pueyochresha'. Tarraña Yompor pue'ntañotpa' e'ñe allempocma a'shoranet tso' attoch e'ñe a'poyatatuanet.

¹⁰ Allempoña oneñe't ñeñt shecare'tenahuetpa' o' huapore'teret ñaña all parraren tso' errañaren ñeñt huortets shemasher. Allo'tsa'yen ñaña ma'yarrma't epuet ñaña ñeñt a'm̄tene' po'ñoñ. Allñapa' allempoteñ a'coñchatarētetuerret e'ñe parrocmā, yetome'tets, tsapome'tets ama't ahuaña ñeñtpa' amach ahuañañaterra ama't errponaña.

Ñeñt atto allohuen arromñañnesha'pa' tomcherretcha' Yompor po'conaño allñapa' allcha' entyesaretterret errotente' ñeñt atet pa'yesete't e'ñe puesheña'ttset

¹¹ Allempoña o' nenterrerr atarr añecmuen conañ ñeñt atarr huallama't ñaña ñeñt anets all. Ñaña e'ñe po'partsoteño't a'chencatuan añ pats ñaña enet, o' e'ñe chenca'huerra poctacma. Ñocpuet ama eñalle allcha' a'puet ama't e'ñe coñe'ta.

¹²⁻¹³ Nent ñaña allohuen arromñañnesha' all tomchenet Yompor po'conaño. Ama't allohuen arromñañnesha' allo'tsa'yenet ama't ñeñt atarr sherba'yestse't ama't ñaña ñeñt ama asherboyenaye' entete'te. Ama't allpon omarrña'techno ñeñt omarrcha'tyestse't ahua'tpa' ñetña ama't oño'tpa' o' alla tantrra'tuerret. Ama't allohuen arromñañnesha' ama't o' chapuet all o'patenamet rromueñets, allo'tña o' alla tantrra'tuerret allohuenet. Ñeñto'mar ñet te'pa' e'ñe Yompor po'conaño tomcha'tuenet allohuenet. Allempoña allpa' tore'tet shonte' libro, ñeñtña librorpa' all aquellca'huaret ñeñtcha' yerpatterahuet ñeñt allpon atet patse'tyesete't e'ñe puesheña'ttset. Allempoña Yomporpa' all entan ñeñt libro all aquellcare't ñeñt ama cohuenaye' es petso. Ñeñto'marña ñapa' attoña otteñe'cherranet o'ch mueñanet coñcheñtso. Allo'tñapa' tore'tet po'poñ libro ñeñt libropa' all aquellcare't añ pa'so'chñechno attochña ñetpa' corretsetach.

¹⁴⁻¹⁵ Allohuen ñeñt ama enteññañeto pa'so'cheñ libro all aquellcare't añ pa'so'chñechno ñeñt corretsetach, ñetñapa' asaprrotare'ttet o'pono all parraren tso' erraparen. Ñeñtpa' attochña rromuerreterr po'pocheño ñeñt puepocheñ rromueñets ñeñt e'ñe poctacma chenquëñets. Ñaña añ rromueñets ñeñt o'patenaya arromña'techno ñeñtara pa'netser pen rromueñets, ñeñtpa'cho'ña ahupore'taretta o'pono all parraren tso' erraparen.

21

Atto Juanpa' entan po'poñ enet ñeñt e'ñe etserra ñaña patspa'cho'ña o' etserraterr

¹ Allempoña na ñeñten Juanan allpa' o' nenterrerr po'poñ enet ñeñt e'ñe etserra, patspa'cho'ña o' etserraterr. Tarro'mar ñeñt atet yenten enet te' ñaña pats, ñeñtpa' o' e'ñe chenca'huerra o' huañerr. Ñeñt etserra patspa' allña ama't sa'p ñeñt yenten añecmuen ama eñalle.

² Nenterrerr ñaña Parets pa'netser ñeñtara Jerusalén ñeñt o' etserraterr. Ñeñtñapa' ento't a'suatare'tterra e'ñe Yomporeshot. Ñeñtñapa' atarr cohuen orrtena e'ñe atet orrtena ñerra'm puesheñarr coyanesha' allempo some'tenapa' o'ch añño'tena e'ñe cochneshot attochña puerrollarpa' atar-rcha' cohuen enteñ.

³ Allempoña napa' o' alla ne'muerrerr all e'morrtena ñoñets ñeñt huetsa ento't e'ñe Yompor po'conaño't. Ñeñtñapa' atet oten:

—Te'pa' señoche'pa'ch, o' cherr allempoch ye'cherra Parets e'ñe parro epuet acheñenesha'. Ñeñtcha' e'ñe parro ye'cherra ñetpa' e'ñe pueyochreshoche' penanet Yompor. Ña ama't atarr Paretspa' ye'cherrach epuet acheñenesha' ñeñt e'ñe Po'yomporer penet.

⁴ Te'ña Yomporpa' o' a'huañañperrnay yellquëña, te'ña ama't ahua'tapa' amach alla yeyahuerre'te. Te' ama't ahua'tapa' amach yerromuerre'te amach yellquëre'te. Te' ama't ahua'tapa' amach eñalleterre'te yahueñets ama't ñaña atserrpeñets amach eñalle. Tarro'mar añechno ñeñt allpon yellcatyeyesaye't te'ñapa' o' e'ñe huañerr.

⁵ Allempoña Yompor ñeñt anets po'conañopa' alla eñorana'terrnerr, ñeñtpa' atet oten:

–Te'ñapa' o'ch señoçh, napa' o' netserrataterr ñeñt allohuen esocmañen eñall.

Allempoñapa' alla oterrerr:

–Te' p̄ocoppa' añ pocte' o'ch alla pequellquërrerr ora allohuen añeçhno tarro'mar añ ñoñets ñeñtcha' atarr seyemtena ñeñtpa' e'ñe po'ñoçh atet.

⁶ Allempoña ñapa' alla oterrerr:

–Te'ña po'ñoçhpa' o' e'ñe etsotuerra, o' huañerr ñeñt sentyese't ahuafoñeñ. Napa' e'ñe pa'motroteñ eñallen atten ñerra'mrrate' quelled A ñeñt pa'moter pen alfabeto. Allempoteñña napa' çhocma eñallen esempohuañencha' huañerr ñeñt allpon eñall, napa' atten ñerra'mrrate' quelled Z ñeñt all puen alfabeto. Te'pa' allohuen ñeñt ama e'ñeye' coshetso pueyoçhro ñeñt çhocmach es e'nenet, nañapa' napanetcha' ñeñt alloch e'ñe eñmaterret. Tarro'mar atto ama cosheneto çha ottenet ñerra'mrrate' ñeñt atarr nanac oñpa'tets. Ñeñto'marña te' napa' notenes allohuenes ñeñtes oñpa'tetspa' napuerrescha' oñ ñeñt ama ahuañañate ñeñt çhocma potets all. Ñeñtña oñ alloña sapa' corretsasach. Tarraña ñeñtñaapa' ama't coñe'tapa' amach setsa'tero. E'ñe atta napuenes.

⁷ Allohuen ñeñt metana'tue' pa'namen topateñtsoçhnopa' ñetñaapa' no'pataterranet ora añeçhno a'nateñets. Attoçhña ñetpa' e'ñech Po'yomporer pennet, nañapa' e'ñech nechemerasha' neçohuenanet allohuenet.

⁸ Tarraña allohuen ñeñt ama name'ñenayo ñeñt echarttetsa pueyoçhro, ñetñaapa' aña o'patenahuet all parraren tso' errañaren, ñaña allohuen ñeñt etsotene' sosya'tsañeçhno ñeñt atarr atsena'tpo' ñaña ñeñt amtsañnesha' ñaña ñeñt cañoresha'tets, ñetpa'çho'ña allohuenetpa' aña o'patenahuet all parraren tso' errañaren. Ñaña ñeñt amase'ñeteçhno ñaña ñeñt po'yomporer p̄a'yene' ayeçhcatareteçhno ñaña allohuen ashcarñaateçhno, ñetpa'çho'ña aña o'patenahuet all parraren tso' errañaren ñeñt huortets shemasher. Ñeñtpa' allcha' puepocheño rromuerret.

Atto Juanpa' entan Yompor pa'netser ñeñt so'hua'netsa entot ñeñtara ñeñt soçheta Jerusalén

⁹ Allempoña ñeñt cançherrsheña mellañofoñnesha' ñeñt echyesaye't po'pajotollesha' all e'chorrayesarete't ñeñt allot e'ñe orrtatuerret allohuanen mueroçhteñets, puesheñarrña mellañofoñpa' o' huapapa' otosen:

–Apon o'ch p̄octa'n o'ch negatenp̄a' ñeñtcha' puetapor perr Cristo ñeñt atma'ntataret Carrnero.

¹⁰ Allempoña napa' o' alla chorraterrnerr Yompor Puecamquëñ ñeñtña nanmue' a'yo allo'tsen ñeñt atarr añecmuen aspenet. Allo'tña napa' nentapoñ Parets pa'netser ñeñt sohua'netsa entot e'ñe Yomporeshot ñeñtara ñeñt Jerusalén.

¹¹ Ñeñtña anetserpa' çha popuetsnena atarr coçhnesha' atet cohuentena Yompor po'cohuenña. Po'popteña e'ñe atet ñerra'mrrate' mapue' ñeñt atarr poptame'te' ñeñt mapyer otenet jaspe ñeñt nanac amorrentaret. Ñeñtpa' e'ñe ora orrtatuenan allohuen ñeñt allo'tsa'yen e'ñe all.

¹² Ñeñt anetserpa' e'ñe aconcha'tam̄psaret a'yohuen. Ñeñt allo aconcha'tam̄psaretpa' atarr añecmuen enonet. Ñaña allo'tsen çharra' puechena epa yetarr allot be'tenet. E'ñe pate'tets yetarr allo'tsa'yen ñaña puesheña'tets mellañofoñ ñeñt cohuañpene' yetarr. Pate'tets yetarropa'

all aquellca'yesareġ añ pa'so'chñeċhno Israel po'mñreneñ ñeñġ ċharrasheña puechena epa.

¹³ Ñeñġ conċhet, allot huena atsne' allo'tsen ma'pa yetarr. Ñaña allenet emuena atsne'pa' allo'tsen ñaña ma'pa yetarr. Tenoteñta'npa'ċho'ña allo'tsen ma'pa yetarr. Topoteñta'npa'ċho'ña allo'tsen ma'pa yetarr.

¹⁴ Ñeñġ conċhtar allo echarr aġarettena pa'rrġopa' e'ñe allohuenpa' allo'tsen ċharra' puechena epa mapue' ñeñġ allo echarrtateñet. Ñaña pate'tets mapue' allo echarrtateñet conċhetpa' all aquellca'yesareġ añ pa'so'chñeċhno ñeñġ ċharrasheña puechena epa ñeñġpa' ñeñġ puellsensarne-sha' Cristo ñeñġ atma'ntatareġ Carrnero.

¹⁵ Mellañoġeñ ñeñġ neserrpare'tatene' ñaña'pa' echenan tepapets ñeñġ oropepen allo tepuenan Parets pa'netser ñaña allo aconċha'tamġsareġ ñaña pueyottarohuen.

¹⁶ Mellañoġeñ atto tepuenan Yompor pa'netser e'ñe allponeshacma tepa'hue allenġateñ – onnatonet ñaña pa'llpocha'peronet ñaña enonet e'ñe allponeshacma ċha'nmach – dos mil doscientos kilómetro allenġateñ.

¹⁷ Allempoña tepan ñaña conċhet po'ġateña ñeñġña'pa' allo'tsen sesenta cuatro metro. Ñehua, mellañoġeñ e'ñe atet es tepa'yen atet es yetpa'yen yaña ñeñġey arromñaġey.

¹⁸ Ñaña añ conċhetpa' añ ayeċhcatareġ mapue' ñeñġ atarr cohuen aspanamemeno poptame'tyena ñeñġ otenet jaspe. Pa'netserña'pa' añ ayeċhcatareġ oro – ora allohuenpa' e'ñe oroche'. Añ oropa' atarr nanac cohuen ñeñġpa' e'ñe orrtatuenan pa'namen ñeñġ allpon allo'tsa'yen. E'ñe atet ñerra'mrrate' rerpat ñeñġ atarr cohuen e'ñech orrtatuenan allohuen pa'namen ñeñġ allo'tsa'yen.

¹⁹ Ñehua, añ econach allo orratenet conċhet, ñeñġ econach puecllo'ya'tetspa' atsetareno poptena ñeñġ allo a'cohuentateñet. Ñeñġ ñanom econach puecllo'yarr allña'pa' añ ana'yesareġ atarr cohuen poptame'te' aspanamemenatollesha' ñeñġ otenet jaspe. Ñeñġ puepuecllo'yañ econach allña'pa' añ ana'yesareġ atarr cohuen poptame'te' asollememenaretollesha' ñeñġ otenet zafiro. Ñeñġ econach puema'puecllo'yañ allña'pa' añ ana'yesareġ atarr cohuen poptame'te' huallamemenatollesha' ñeñġ otenet ágata. Ñeñġ puepa'tatsecllo'yañ econach allña'pa' añ ana'yesareġ atarr cohuen poptame'te' aspanamemenatollesha' ñeñġ otenet esmeralda.

²⁰ Ñeñġ econach pa'mnarecllo'yañ allña'pa' añ ana'yesareġ ñeñġ atarr cohuen pa'namenot poptame'tyena ñeñġ otenet ónice. Ñeñġ po'pechapuecllo'yañ econach allña'pa' añ ana'yesareġ atarr cohuen poptame'te' tsamemenatollesha' ñeñġ otenet cornalina. Ñeñġ econach po'canċherrecllo'yañ allña'pa' añ ana'yesareġ atarr cohuen poptame'te' shemashrememenatollesha' ñeñġ otenet crisólito. Ñeñġ econach po'psoclo'yañ allña'pa' añ ana'yesareġ atarr cohuen poptame'te' aspanamemenatollesho asolleten ñeñġ otenet berilo. Ñeñġ econach pue'sconeclo'yañ allña'pa' añ ana'yesareġ atarr cohuen poptame'te' e'ñe shemashrememenatollesha' ñeñġ otenet topacio. Ñeñġ econach po'ċharraclo'yañ allña'pa' añ ana'yesareġ atarr cohuen poptame'te' ama e'ñeye' aspanamemenaretolleshayaye ñeñġ otenet crisoprasa. Ñeñġ econach po'ċharraclo'yañ puechena puecllo'yarr allña'pa' añ ana'yesareġ atarr cohuen poptame'te' asollememenma'tetollesha' ñeñġ otenet jacinto. Ñeñġ econach po'ċharraclo'yañ puechena epuecllo'ya allña'pa' añ ana'yesareġ

atarr cohuen poptame'te' yetsñorromemenatollesha' ñeññ otenet amatista.

²¹ Allohuen yetarrochno ñeññ çharra' puechena epa e'ñe cohuen huallatren atet ñerra'm chempeshtall o'pono'tpa' atarrcha' huallatllellen ñeññ otenet perla. Pate'tets yetarr e'ñe pa'trra perla ayeçhcataret. Ñaña añ calle ñeññ all chopeñe'chenet ñeññpa' e'ñe oroche' ayeçhcataret atet ñerra'm rerpap ñeññ e'ñe orrtatuene' ora ñeññ allpon allo'tsa'yen all.

²² All Parets pa'netsro ama't pa'trra pocoll ama neñche ñeññ all ma'yocheñet Yompor. Tarro'mar allpa' ama pallteno pocoll allcha' ma'yocheñet Yompor, tarro'mar ñeññ nanac Parets ñeññ Yepartseshar yepen ñapa' e'ñe allo'tsen all ñeññcha' ma'yochena allohuen acheñenesha' epuet ñaña Puechemer Cristo ñeññ atma'ntaret Carrnero.

²³ Ñaña Parets pa'netsro allpa' ama muenenano atsne' ama't arorra ama mueneñeto ñeññcha' çhoyo'tetsa all. Tarro'mar Yompor ñeññ atto poptena pa'tsnomueño'tpa' ñeññña çhoyo'tetsa all epuet ñaña Puechemer Cristo ñeññña lamparñetets. Ñeññara Cristo ñeññ atma'ntataret Carrnero.

²⁴ Ñeññ atto poptena Yompor pa'tsnomueño'tpa' ñeññña a'puetarsañpene' erracmañen allohuen pa'namen acheñenesha' attoña correnet e'ñe cohuen. Allohuen amcha'tareñnesha' ñeññ atto cohuentenet añe patsro, huapatueretcha' Parets pa'netsro alloch cohuentateññañet ñamet Parets pa'netser.

²⁵ Ñeññ Parets pa'netser ñeññ pueyottar pen allot be'tenet, amach yotamperre'te e'ñech ellapene't atoraret. Allpa' ama't checmetapa' ama eñalle.

²⁶ Allohuen pa'namen acheñenesha' ñeññ amcha'na'tpotyetsa añe patsro ñeññ atto cohuenteyenet, huapatueretcha' Parets pa'netsro alloch cohuentateññañet ñamet Parets pa'netser.

²⁷ Allpa' ama't ahua'tapa' amach orrtateto ñeññ sosya'tsañechno tarro'mar allpa' ama't pueheñarrapa' ama be'teno ñeññ cotape'chene' sosya'tsañechno ñeññ atarr tsena'ten Yompor ñeññ atet ñerra'm ashcarñañ. Allpa' añe be'tets ñeññ aquellcare't pa'so'çhñechno Cristo po'libro attochña ñetpa' corretsetach.

22

¹ Allempoña mellaño'teñpa' o' alla gaterrnerr po'ñes. Ñeññpa' arro't huena conañot allo'tsen Yompor epuet ñaña Puechemer Cristo ñeññ atma'ntataret Carrnero. Ñeññ oñpa' atarr cohuen, atarr llancasaseno poptaso'tena. Oñ ñeññ atarr cohuen añ toma'ntena atto apueney Yompor attochña yapa' corretsayach e'ñe yocsheñeshocmañen errponohuañen.

² Ñeññ Parets pa'netsro e'ñe rroçho allecma chopeñe'chenet, allña'pa' all oñen oñ. Ñeññ oñ emoto'mar popame'tar-ro all chopyen tsach. Ñeññña tsachpa' atarr nanac me'ten, puenña'tets arorrpa' çhocma me'ten. Pa'terr charpa' çharroch me'ten puechena epa. Ñeññ pue'mer ñeññcha' apuerrey Yompor añ toma'ntena alloch yocrrerra errponañohuen ñeññ ama ahuañaño ama't ahuaña. Ñaña pasopanerpa' añecop sherben ñeññcha' a'crraterre' allohuen pa'namen acheñenesha' e'ñe puecamquëñohuenet.

³ Parets pa'netsropa' amach eñalleterro ama't pa'trra ñeññcha' a'cmare'tterrtsa. Tarro'mar Yompor epuet ñaña Puechemer Cristo ñeññ atma'ntataret Carrnero, ñetña partsotetset all po'conañeto. Ñaña allohueney ñeññey torretsa Yomporcop e'ñech cohuen yesherberr yaña all.

⁴ Yentercha' Parets yecuacle'channerrach parro epay Yompor. Yeto'moña yapa' quellquërrancha' e'ñe ña pa'so'cheñ.

⁵ Allña'pa' amach eñalleterro checmete'. Ñeññeycha' yeçherrtsa allpa' amach yemnerro ñeññcha' yeçhoyo'tamipse'. Atto te'pa' çhocma yemnen

lampareñ alloch yeçhoyo'tam̄pena. Allempopa' amach yemnerro ñaña o'ch çhoyo'tam̄peney atsne', tarro'mar Yompor ñeñt̄ Yepartseshar yepen, ñapa' ñaña pa'tsnomueña ñeñt̄cha' yeçhoyo'tam̄perre' all. Ñaña yapa' ya'm̄cha'tarettapreterach allempoteñ errponohuañen.

Arrpa' all eñotateney Jesucristopa' ahuencha' huerra po'pocheño arr patsro

⁶ Allempoña mellañoñeña' o' alla oterrerr, ñeñt̄pa' atet oterrerr:

—Ora allohuen añ ñoñetspa' e'ñech seyemcha tarro'mar ñeñt̄pa' e'ñech po'ñoçh atet perra. Ñaña Yompor ñeñt̄ Yepartseshar yepen ñaña'pa' çhocma eñotatenan ñeñt̄cha' a'm̄tene' po'ñoñ. Ñeñt̄ara Yompor ama't te'pa' o' llesensan po'm̄llañoñeñer ñeñt̄cha' gatyene' ñeñt̄ torretsa ñocop ñeñt̄cha' ahuen atet perra ama't esempo.

⁷ Ñaña Cristo ñapa' atet oten:

—Señoche'pa'ch napa' ahuencha' nohuerra.

Atarr cosheñtso'tsen allohuen ñeñt̄ yemtenaya ora allpon añ ñoñets ñeñt̄ aquellcaret all Yompor po'libro ñeñt̄cha' atet perra esempo. Arrpa' allohua huañ ñeñt̄ atet eñotaten mellañoñeñ.

⁸ Na ñeñt̄en Juananpa' naña e'muene' ñeñt̄ ora allohuen añ ñoñets ñaña naña entene' ñeñt̄ allpon gatyennet. Allempoña napa' neconcorposa e'ñe mellañoñeñ pa'rrpo ñeñt̄ negatyene' ora allpon pa'namen esocmañen o'ch nema'yochyañ.

⁹ Ñaña'pa' oten:

—Amach pema'yochatsetno na, tarro'mar napa'cho'ña e'ñe parropa' atta netorrapretenpa Yomporecop ñaña allohuen ñeñt̄ pemo'nasheñeshachno pepen ñeñt̄ a'm̄ta'yene' Yompor po'ñoñ, epuet ñaña allohuen ñeñt̄ atarr yemtenaya añ ñoñets ñeñt̄ atet aquellcaret añ libro. Papa' Yomporña pema'yocha.

¹⁰ Allempoña ñeñt̄ mellañoñeña' alla oterrerr:

—Ñato't cha pa'nasotena' añ ñeñt̄ allpon Yompor po'ñoñ ñeñt̄ o' pequellca'hua. Tarro'mar allpon ñeñt̄ o' pequellca'hua ñeñt̄cha' atet perra esempo, te'ñapa' o' çchapmoch allempoch attoch e'ñe etsotuerra esempohuañen.

¹¹ Tarraña e'ñe allempoteñ allohuen ñeñt̄ ama cohuenaye' es petso ñeñt̄pa' allo'nepa'ch senet pa'tse'tyeset ñeñt̄ ama cohuenaye' enteno Yompor. Allohuenet ñeñt̄ añach yeçhenet sosya'tsañeçhno, ñetpa' allo'nepa'ch senet yeçhcatyesnomuet ñeñt̄ atarr sosya'tsañeçhno. Tarraña allohuen ñeñt̄ e'ñech cohuen es pa'yenetpa' ñetñapa' allo'nepa'ch senet e'ñe cohuen es pa'yestset. Ñaña allohuen ñeñt̄ ma'yochrenaya ñeñt̄ atto sherbeñet Parets, ñetpa'cho'ña allo'nepa'ch senet ma'yochrenet ñeñt̄ atarr cohuen enten Parets.

¹² Ñaña Cristo ñapa' atet oten:

—Te'pa' señoche'pa'ch napa' ahuencha' nohuerra. Nehuapaterrnascha' ñeñt̄ no'patatensa alloch netsa'tuerrsa e'ñe puesheña'ttsos sa erroñente' setorra'yese't. Tarraña o'ca'ye nehuapaterr ñaña alloch netsa'tatuera ñeñt̄ ama pocteye' es petso.

¹³ Napa' e'ñe pa'motroteñ eñallen, atten ñerra'mrrate' quelled A ñeñt̄ pa'moter pen alfabeto. Allempoteñña napa' çhocma eñallen esempohuañencha' huañerr ñeñt̄ allpon eñall, napa' atten ñerra'mrrate' quelled Z ñeñt̄ all puen alfabeto.

¹⁴ Atarr cosheñtso'tsen allohuen ñeñt̄ e'ñe pocte' enten Yompor o'ch tsomhuerrñañet Yompor puenaren alloch e'ñe correrret poctacma. Allempopa' amach alla rromuerrete'te. Ñeñt̄pa' ñeñt̄cha'ña e'ñe yoma'huerret

ñesho. Ñehua, ñeñt e'ñe pocte' enten Yompor ñeñt'pa' allohuen ñeñt e'ñe e'shohuaretterra po'chñar e'ñe pame'ñeñoet Cristo. Ñato' o'ch netma'ntacha atet: Ñetpa' o' e'ñe tsama'tuerret pa'shtamuet attoch e'ñe pocte' entanet Yompor o'ch be'toset yetarro esheccha' chapuet Yompor pa'netsro.

¹⁵ Tarraña allohuen ñeñt ama ame'ñenayo Cristo ñetña'pa' a'yote'tsa'yenetach Yompor pa'netsro. Ateñ ñerra'm amase'ñeñechno, ñaña ñeñt ecañoreshatechno, ñaña ñeñt amtsañechno ñaña allohuen ñeñt po'yomporer pene' aye'chcataret ñaña allohuen ñeñt cohuen entene' allohuen shequëntsochno. Ñetpa' e'ñe ñeñta eñotenet o'ch shecare'chet acheñenesha'.

¹⁶ Allempoña Jesús'pa' alla oterrerr, ñeñt'pa' atet ot:

—Napa' ñaña ñeñten llesensene' nemillañoñer ñeñt o' eñotaterres ora añechno, allohuenes ñeñtes e'ñe same'ñeñoen na sapa' chocma sapcha'yena allemeñ anetso'mar. Napa' ñeñten allot huapa amcha'taret David, elloñapa' o' alla po'mreneñ perrnerr ñaña. Ñaña napa' atten ñerra'mrrate' ranto ñeñt atarr atarrem ñeñt atarr huomenc atsnets o'ch puetarenmoch. Attoña na'puetarsampeñ allohuen acheñenesha'.

¹⁷ Allohuen ñeñt pueyochresha' pen Parets ñetpa' atma'ntatarettenet atet ñerra'mrrate' Cristo puetapor penahuet. Attoña ñet Parets Puecamquëñoñ oteñet Cristo:

—Apon.

Ñaña allohuenes ñeñtes e'mñotene' o'ch soch samña Cristo:

—Apon.

Ñaña allohuenet ñeñt oñpa'tets ñeñt ama eñmatetso pueyo'chreto ñeñt chocma es e'nyenet, ñetpa'cho'ña huapuetepa'. Yoretapa' añ oñ, allochñapa' ñetpa'cho'ña corretsetach. Ñeñt oñpa' e'ñech atta aparettet, amach es tsa'tayo ama't e'ñe coñe'ta.

¹⁸ Na te'pa' o'ch noctape'chach allohuen ñeñt e'mñotene' añ ñoñets all oteney ñeñt'cha' atet perra esempo. O'ch notanet: Ñerra'm esesha' atontatene' ñet poctapñet ñeñt ama atteye' otenye añ ñoñets, Yomporña'pa' o'ch atontatanet ñocpuet ñeñt'cha' muero'chtaterrahuet ñeñt atet o' aquellca'huare'tta añ libro.

¹⁹ Ñaña ñerra'm esesha' cha a'chencatenan ama't patrra ñoñets ñeñt allpon aquellca'huare'tta añ libro, Yomporña'pa' amach muenataneto o'ch es o'patapreteret all aquellcare'ttena libro allpon ñeñt'ña'pa' corretsetach. Ñaña ñetpa' amach be'tosapo'tampereto Parets pa'netsro ñeñt atet o' aquellca'huare'tta añ libro.

²⁰ Ñeñtara Jesús ñeñt yeñotatyene' ora añechno, ñaña'pa' alla oterrerr:

—Napa' po'ño'chcha' ahuen nohuerrerr po'pocheño.

Yañapa' allohueney yoteñ:

—Apon Yepartseshare Jesucristo. Ñeñt'pa' attetepa'ch yocop.

²¹ Yepartsesharepa'chña Jesucristo sa'natenaya e'ñe allohuenes. Ñeñt'pa' attetepa'ch Nompore allohuenacpay. Arrpa' e'ñe allohua puen Yompor po'ñoñ.